

Esuquidistu Chuiquin
Tantiamete



New Testament in Matsés (PE:mcf:Matsés)

Esuquidistu Chuiquin Tantiemete

New Testament in Matsés (PE:mcf:Matsés)

copyright © 2008 Wycliffe Bible Translators, Inc.

Language: Matsés

Translation by: Wycliffe Bible Translators, Inc.

Matsés [mcf], Peru

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Matsés

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 21 Feb 2024 from source files dated 29 Jan 2022
446da786-5bd1-5ffa-85e2-9eff4052cf8b

Contents

| | |
|--|-----|
| Mateyon Dada uaid | 1 |
| Madcosën Dada uaid | 74 |
| Ducasën Dada uaid | 117 |
| Uanën Dada uaid | 188 |
| Esus Chuibenequidon Naid | 242 |
| Doma yacnocquidon Iste | 305 |
| Codinto yacnocquidon Iste 1 | 338 |
| Codinto yacnocquidon Iste 2 | 367 |
| Cadasia yacnocquidon Iste | 384 |
| Epeso yacnocquidon Iste | 396 |
| Pidipos yacnocquidon Iste | 406 |
| Codosas yacnocquidon Iste | 414 |
| Tesadonica yacnocquidon Iste 1 | 421 |
| Tesadonica yacnocquidon Iste 2 | 428 |
| Timoteyon Iste 1 | 432 |
| Timoteyon Iste 2 | 441 |
| Titon Iste | 448 |
| Pidemonën Iste | 452 |
| Ebedeyon Isadaidbon Iste | 454 |
| Santiacon Dada uaid | 475 |
| Petedon Dada uaid 1 | 483 |
| Petedon Dada uaid 2 | 493 |
| Uanën Dada uaidëmpi 1 | 498 |
| Uanën Dada uaidëmpi 2 | 506 |
| Uanën Dada uaidëmpi 3 | 507 |
| Udasën Dada uaid | 509 |
| Esusën Uan Ismiaid | 512 |

MATEYON DADA UAID

Esuquidistun tsusedpabotedi chiaid (Duc 3.23-38)

¹ Esuquidistu chuiquin dada uanu. Aidën tsusedpa Abadauan nec. Aidën tsusedpabidi Abadauanën tsyuecquid Dabid nec. Abadauanën tsyuecquido chuiquinc aidën tsyuecquid Dabidën tsyuecquido chuiquinc caquin Esusën tsusedpabotedi chuinu. Tantia.

² Abadauanquiobi bedanquin chuinu. Abadauanën mado Isac cuëmëdpampic. Isaquën madobic Acobo cuëmëdquid. Acobon mado dadpen icpampic. Abentsëc Uda cuëmëdnuc aton buchiado utsi-utsiec cuëmëdpampic.

³ Adnubien Acobon mado Uda caidën Tamad caid abentsen chudpampic. Aden chudaqui bacuë daëd usundoshon abi ushëmbi aton mado daëdpambo tishpampic. Abentsëc Pades cuëntanquin utsi Sada cuëmpampic. Padesën mado Eston cuëmëdpampic. Estonën madobic Adan cuëmëdquid. ⁴ Adanën madobic Aminidad cuëmëdquid. Aminidadën madobic Nason cuëmëdquid. Nasonën madobic Sadmon cuëmëdquid icpampic. ⁵ Adshumbic Sadmonën aton chido Daba bedshun aton mado Bos tishmepampic. Adoac canishumbi Bosën aton chido Dud bedshun aton mado Obed tishmepampic. Obedën mado Isai cuëmëdquid icpampic. ⁶ Adshumbic Isain aton mado Dabid isadaidbo chuiquid dapambo tishmepampic. Adoac canishumbic Dabidën dada utsi Udias caid cuesunetanquin aton chido bedshun aton mado Sadomon tishmepampic.

⁷ Sadomonën mado Doboan nepampic. Doboanën madobic Abias cuëmëdquid. Abiasën madobic Asa cuëmëdquid. ⁸ Asan madobic Osapad cuëmëdquid. Osapadën madobic Odan cuëmëdquid. Odanën madobic Usias cuëmëdquid. ⁹ Usiasën madobic Otan cuëmëdquid. Otanën madobic Acas cuëmëdquid. Acasën madobic Esequias cuëmëdquid. ¹⁰ Esequiasën madobic Manases cuëmëdquid. Manasesën madobic Amon cuëmëdquid. Amonën madobic Osias cuëmëdquid. ¹¹ Osiasën madobic Eonias cuëmëdquid. Aid Eonias caid aton matsesadobëdtabi yuanuen Babidonia yacnocquidon aton naididën buampampic.

¹² Buanac shubu dadpen icquid Babidonia caid yacnoshon Eoniasën aton mado Sadatied tishmepampic. Sadatiedën mado Sodobabed cuëmëdpampic. ¹³ Sodobabedën madobic Abiud cuëmëdquid. Abiudën madobic Ediaquin cuëmëdquid. Ediaquinën madobic Asod cuëmëdquid. ¹⁴ Asodën madobic Sadoc cuëmëdquid. Sadoquën madobic Aquin cuëmëdquid. Aquinën madobic Ediud cuëmëdquid. ¹⁵ Ediudën madobic Ediasad cuëmëdquid. Ediasadën madobic Matan cuëmëdquid. Matanën madobic Acobo cuëmëdquid. ¹⁶ Acobon madobic Ose cuëmëdpac caondash. Aidquio Madian bënë nepac caondash. Aidën inabi Madian Esus usundoshon tishpac caondash. Esus Nuquin Papan chomiaid yec matses bëdambo icmequidquio nec. Isadaidbon cainaidquio nec.

¹⁷ Aidedi Esusën tsusedpabo icpampic. Abadauamba bedanquin aton matses 14tedi chuiquin Dabid ënquin chiombi. Adoshombic Dabid ënquin chuiboed chuioaquin padpiden bedanquin aidën matses 14tedbidi chuiquin Eonias aton matsesbëdta buanaid ënquin chiombi. Adoshombic Eonias ënquin chuiboed chuioaquin padpiden bedanquin aton matses 14tedbidi chuiquin Esusquiobi ënquin chiombi.

Esuquidistu tishaid
(Duc 2.1-7)

¹⁸ Nēbi aid tishaidquo chinu. Esus tishabi yec aton tita Madia icpac caondash. Abi inuequidēn Osen bedabi icshobi Nuquin Papan Mayanēn bacuē usundomepac caondash. ¹⁹ Usundoacsho isun abi inuequidēn Osen dada utsin chudaaid danec: —“Nēbi mibi bedtiapimbo iquebi,” quequin bedenquo icnuen dada uashun Madia menenu —queuidpac caondash. Nuquin Papan chiacpadquo bēdambo icquid icquin naden chiampo icpac caondash. —Bedabi bacuē usundoaque. Cuidquimbien ictiad —quequin aton matses chienquo yequi: —Bedēnquo icnuen dada uaid menenu —queuidpac caondash.

²⁰ Adnubien Nuquin Papan abi yacnoshon uaidēn mayan bēdan Ose ushquin ismepac caondash. —Dabid yampidēn tsyuecquid icsho mibi chinu, Ose. Tantia. Chudenquo icquin Nuquin Papan Mayanēn Madia bacuē usundomiaye. Dacuēdēnda. Dacuēdenquo icquin Madia min shubuno buanta. ²¹ Adoshombic dada bacuē tishacsho Esus cuēnta. “Matses icsaid bedshunquin Nuquin Papa aton matses cuidmenquo iquendac,” quequin Esus cuēnta —quequin mayan bēdan Ose ushquin ismepac caondash.

²² Aden mayan bēdan Esus tishte chiacpadomboen Nuquin Papan ambi chiaid naden dada uamepampic.

²³ “Dadan inacmaidēmbi bacuē usundoshon dada bacuē tishendac.

Aidi Imanued cuēnendac.

‘Nuquin Papapadquidquobidi matsesbēd tabadnuec choash nec,’ quequin Imanued cuēnendac,” quequin Esus tishte Nuquin Papan dada uamepampic.

²⁴ Aden mayan bēdan chiac isucunshumbien aidēn chiacpadomboen Osen aton shubuno Madia buampac caondash. ²⁵ Buanshun Osen chudenquo icnubi dada bacuē tishpac caondash. Tishacsho Esus cuēmpac caondash.

2

Uispa isquido Esus isec choaid

¹ Nidaid Udeya caid yacno tabadquin shubu daēdpactsēcquid Beden caid yacnoshon Esus tishpac caondash. Adnubien shubu dadpen icquid Edu-saden caid yacno isadaidbo matses ancaquid Edodes cuēmēdquid icpac caondash. Aid icnubi matses utsibo uispa isquido Esus isnuec ushē choacmiuēsh chopac caondash. Edusaden yacno choquin ² anocquido chuituidpac caondash. —Min matses isadaidbo chuiquid dapa ictequidquo nēbi tishsaidēmpi ¿midambo icteque? Isnu. Aid tishaid tantiamete uispa isombique. ¿Mitsimbo icteque? Isnu. “Chuiquid dapa bēdamboshē ictequid nec,” quiash aid isnuec chopobi —quetuidpac caondash.

³ Adsho tantiaish dacuēdcuēdedpac caondash abitedimbo. —Padtec. ¿Midadpadquid bacuē nependabac? —quecuededpac caondash Edodes isadaidbo ancaquid ambi ancaidobēdi. ⁴ Adshumbien Edodesēn abi yacno tsusiobo cho-chomepac caondash. —¿Mitsicquid caique? Tantienu —queshun abi yacno Moisesēn dada uampid chuibanquido abi chuiquid dapabobēda cho-chomepac caondash. Cho-chomeshumbic: —¿Mitsishunquo Nuquin Papan chomiaid min matses chuiquid dapa ictequid tishpash? ¿Ada Nuquin Papan chiaid isbanquin tantio? —caquien: ⁵ —Ai, tantiembi. “Nidaid Udeya caid yacno tabadquin shubu daēdpactsēcquid Beden caid yacnoshon aid bacuē tishendac,” quiampicpadembi tantiembi. Nuquin Papan ambi chiaid nuquin tsusedpa dada uamepampic naden. ⁶ Shubu daēdpactsēcquid Beden caid yacnocquido chiec:

“Beden yacno tabadec nidaid Udeya caidën tabadquido mibi nec. ‘Chuiquid dapa nibëdnuc icsambo iquendac,’ quedenedi mibi yacnoshon chuiquid dapa ictequid tishendac.

Aidëmbi isadaidbo matses chuiquid dapa icquin bëdamboen tabadmendac,” —quequin Nuquin Papan Esus tishte chiaid chuipac caondash tsusiobon Edodes caid chuiquin.

⁷ Adoaquien Edodesën ambi ancaido isadaidbo ismenquoio icquin matses utsibo uispa isquido chomeshun chuimepac caondash. —¿Nëbida tishaid tantiamete uispa isquin tauao? ¿Nëid inchëshën ushëmbida isbeno? ¿Ëndenda isbenonda? En chui. Tantiyanu —cac chuisho ⁸ tantiashun: —Beden yacno istan. Ano nidshun mimbi chiapadquid bacuë istan. Aid bacuë istanec cuenquin ëbi chuibenta. Ëmbitsen istanu. “Nuquin Papan chomiaid chuiquid dapa ictequid bëdambo iquec,” quequin ëmbitsen istanu —capac caondash Edodesën muaquimbi. —Cuesunenu —quequimbi adopac caondash.

⁹ Adoaquien ushë choacmiuësh bed-bedquesho ambi isbëquin tsibambëboedi uispa tsibanec Beden yacno nidpac caondash. Adec nidnubien uispa shubu ismec nidtuidpac caondash: —Bacuë ictsaid shubu nëid iquec —quec. ¹⁰ Adsho isashien cuishonquepac caondash uispa isquido.

¹¹ Adash shubun puduedshun isquien aton tita Madiabëd bacuë ictsec. Aid isashic: —Matses chuiquid dapa ictequid nec. Matses bëdambo icmetequid nec —quequin aton matsesën nacpadomboen ismequin danëshën sebudpac caondash. Adshumbic ambi bëboed aton na bëdambo icquid chicshun menepac caondash nëidtedi. Nëidic shocosh piu. Nëidic bëdambo nuadnuc tauitequid. Nëidic bëdambo noadec danoshquete. Aidedi menepac caondash. Adoash ushtopac caondash. ¹² Adec ushtoacsho Nuquin Papan ushquin ismepac caondash. —Isadaidbo ancaquid Edodes chuibidanenda —quequin ushquin ismiac isucunanec abi choboedën nidenquoio yec podqued utsin nidpac caondash aton shubuno nidec.

Equipito yacno Osen buanaid

¹³ Esus isuanquido nidambien Nuquin Papan abi yacnoshon uaidën mayan bëdan Ose ushquin ismepac caondash. —Isucunanec cuenta. Bacuëmpi aton titabëdta buanec nidaid utsi Equipito caid yacno cuenta. Ëmbi chiabi choenda. Anobi tabadta. Edodesën: “Bacuëmpibo cuesun siatanta,” cac cho-choeque. Cuenta —quequin Ose ushquin ismepac caondash mayan bëdan.

¹⁴ Aden ushquin ismiac isucuntantsequi inchëshëmbi puduanec aton bacuë anibëdta buanec nidaid utsi Equipito caid yacno Ose nidpac caondash.

¹⁵ Equipito yacno nidash ambobi tabadpac caondash. Isadaidbo ancaquid Edodes unësabi icnuc Equipito yacno tabadpac caondash. Esus tishabi icnubi ëndenquimboshë Nuquin Papan tantiamiac ambi chiaid chuibanquidën Esus Equipito yacno buante chuiquin dada uapampic naden chuiquin. “Equipito yacno nidash tabadsho: ‘Auëshquoio cho, Mado, caindami,’ quioish Nuquin Papa,” quequin Nuquin Papan chiaid dada uapampic.

Bacuëbo dadpen cuesun siatanaid

¹⁶ Adnubien isadaidbo ancaquid Edodes: —Uispa isquidon cacuidposhi —quiash comapenec nëishun aton yuabo sondado chuipac caondash. —Uispa isquidon chuibocpadsëcquid comapenec onquecuenabi ictsëcquidotedi dada bacuëmpibotedi cuesun siatan. Beden yacnocquidon bacuëbëbëdtabi uano pauequidon bacuëbotsen cuesun siatan —cac cuesun siatampac caondash. ¹⁷ Aden cuesun siatanambo icnubi Nuquin Papan adote chiaid ëndenquimboshë Edemias cuëmëdquidën dada uapampic naden chuiquin.

18 “Abi yacnuësh aton bacuëbo nibëdänsho isash isadaidbon chidobo seden-
quecuededendac.

Unësaid tantiec baded ënëdenquo yec sedenquebudnendac,”

quequin chiampicpadomboen aton bacuëbo nibëdamepac caondash.

19 Yuecquo ictaniashic isadaidbo ancaquid Edodes caid unëspac caon-
dash. Adambic nidaid utsi Equipito caid yacno tabadsho Nuquin Papan
abi yacnoshon uaidën mayan bëdan Ose ushquin ismepac caondash. 20 –
“Bacuëbo cuesun siatan,” quiondaid unësaccoshe. Min chido min bacuëbëdta
buanec min nidaid Isadaid caidën nidoata –caquien 21 isucunanec aidën
chuibocno buanuec nidpac caondash.

22 Aton nidaidën nidshun aton matsesën chiaid tantiapac caondash. –¿Ada
tantio? Udeya yacnocquido ancadened unësaidën mado Adquedayo caid
ancanquidquibodien nechitec –quesho tantiashien dacuëdtampac caon-
dash Ose. Adshobien Nuquin Papan Ose ushquin ismeoapac caondash.
–Cuesunenushe. Min nidaid Udeya caidën nidenda –quequin ushquin
ismiac isucunanec aid nidaid Isadaid caidëmbidi nidec aid nidaid cuëshë
utsi Cadidia caidën nidpac caondash. Udeya caidën nidenquo yec uquëmbo
nidpac caondash. 23 Uquëmbo nidec shubu dadpen icquid Nasaded caid
yacno choash ambo tabadtuidpac caondash. “Nasaded yacnocquid nendac,”
quequin Nuquin Papan chiaid dada uampicpac anobi tabadpac caondash.
Auëshquo canipac caondash Esus.

3

Uan acten mentoanquidën chuibeniaid (Mad 1.1-8; Duc 3.1-9, 15-17; Uan 1.19-28)

1 Adash yuecquo ictaniashien Uan caid Nuquin Papa tantiabenquido
acten mentoquid icpac caondash. Nidaid Udeya caid yacno shubu
nibëdacno capucuenequin Nuquin Papan chiaid chuibenequid nepac caon-
dash. 2 Adquid icquin Esus chote chuibampac caondash naden. –Mibi icsaid
ënash bëdamboec tabadta. Nuquin Icbombo choeque –quequin chuipac
caondash. 3 Aden Uanën chuite chuiquin Nuquin Papan isadaidbo tsusedpa
Isayas cuëmëdquid dada uamepampic naden.

“Masiuidpambo yacno shubu nibëdacno capuquin ëcac matses chosho
chuibenendac.

‘Chuiquid dapa choeque. Podqued andëdbanshunta,’ quiacbimboen:

‘Nuquin Icbombo choeque.

Icsaid ënash bëdamboec tabadta,’ quequin chuibenendac,”

quequin Isayasën Uanën chuite chuipampic.

4 Nadquid Uan icpondash. Aton dashcute nëish yua dapa cameyo caidën
bu daëdcaid dasiuidpondash. Tspantebic nidaidën capuquid yua bitsi nacen-
naid tsiupondash. Aton pete bacumbëd shioshbimboecquid icpondash.

5 Aidën Nuquin Papan chiaid chuibenesho tantianuec nëidtedi matses cho-
chopac caondash. Nëidic shubu dadpen icquid Edusaden caid yacnoc-
quido. Nëidic nidaid Udeya caid yacnocquido. Nëidic acte Odan caid
cuëman tabadquido. Aidtedi cho-chopac caondash. 6 Cho-choshon Uanën
chuisho tantiash: –Nuquin Papan chiaid niac-niaquec icsapobi. Icsaboedi
aid tantiec bëdamboec tabadtiaidquo iquebi –quesho: –“Nëid Nuquin Papa
tantianu,” quequid nec –quequin acte Odan caidën mentopac caondash
Uanën.

7 Adnubien padiseyobobëd saduseyobo Uan isec cho-chopac caondash.
Padiseyobo isadaidbo tsusedpabon chiaid namequido nec. Saduseyobobic:
–Matses unësaid uincuenenquo iquendac –quequido nec. Aido cho-chosho
isun Uanën: –Nisibimboecquido mibi nec. Adquidën icsa uacbimboen

matses icsa uaquido mibi nec. Bëdambo icquid damianquiec mibi iquéc. “Nuquin Papan mibi cuidnushe. Tantiatan,” quequin ¿tsuntsin chiac cho?
 8 Mentomete bunec Nuquin Papan chiaid niac-niacboedi ënash bëdamboec tabadta. 9 “Ëbipadquid Abadauanën tsyuecquidouditsëqui Nuquin Papan bëdamboen isec,” quequin tantienda. ¿Adquidta Nuquin Papan bëdamboen ispec? Abadauampadquid abi tantiaquidien Nuquin Papan bëdamboen isec. Mimbi bëdamboen tantiatiapimbo icshe isun nëid cuënotebi matses uashun Nuquin Papan Abadauampadquid abi tantiaquidombo icmetsiash icnushe. Nuquin Papambo tantiata. 10 “Icsambo icquid nec,” qeshun ambi nitsinaid cuëte bacuësa dëdshun nëdëncabimboen ambi chiacpadomboen naisa Nuquin Papan cuidendac —quepac caondash Uan padiseyobo saduseyobobëdta chiec.

11 Adshumbic padpiden chuiquin Esusën nate chuipac caondash. —Nuquin Papa tantianuequid acten mentobanquin chuibanquid nebi. Padnuen con tsyuecquid choshon aidëntsen chuibanendac. Ëbi bëdiatsëc tantiaquid ictsëcnic aidquien comapenen tantiaquidquio yec bëdamboshë iquendac. “Aidquio bëdamboshë icquid icnuc ¿atotsieshun icsaquidquio: ‘Aid choec,’ quequin chuiquidquio Nuquin Papan ëbi icmeposh?” quec tsadebi. Ëmbi chuiboed choshon: “Ëbi tantiaquid nec,” qeshun aton Mayan menequin bëdamboec tabadte mibi tantiamendac. Abi tantiesaboen cuidendac. 12 Piacbo choeshashun putu bushcaquin secacimboen abi tantiesabo chian anëdënquiacno nësecaindac. Adshumbic abi tantiaquido abëdi tabadmendac —quepac caondash Uan acten mentoanquid.

Uanën Esus mentoaid

(Mad 1.9-11; Duc 3.21-22; Uan 1.32-34)

13 Acte Odan caidën matses mentoec adpac caondash Uan. Adnubien Uan yacno Esusquio chopac caondash. Aton nidaid Cadidia caid yacnuësh tauamboen matses ismenuec choec: —Ëbitsen mento —quetuidpac caondash.

14 Adshobien Uanën: —Padenquio iquembi. Nuquin Papan chomiaid icquin mimibi ëbi naquien bëdambo ictsiash. ¿Atotsieshun ëbi aden chie? Padi —qeshobien: 15 —En na. Bëdambo iquéc. Ëbi mentoquin mimbi Nuquin Papan chiacpadomboen natsiaque. Ëbi acten mento —quesho tantiashun Esus acten mentopac caondash Uanën.

16 Adoac Esus pudundonobien canchedacimboec abu shëcuë yampac caondash. Adsho isaquien aid shëcuë yacnuëshquio dëbimbimboec budec Nuquin Papan Mayan Esusquio matsadtopac caondash abëd icnuec.

17 Adnubien abucuëshquio Nuquin Papa onquiampac caondash. —Nëid ëmbi tantiaidquio con Mado nec. Ëmbi chiacpadomboen nasho isash bëdambo iquebi —quepac caondash Esus caic.

4

Satanasën Esus icsamenuequin tanuidaïd

(Mad 1.12-13; Duc 4.1-13)

1 Uanën acten mentobocshobien Nuquin Papan Mayanën masiuidpambo yacno matses nibëdacno Esus nidmepac caondash. —Ma Nuquin Papa chieshëquid Satanasën Esus icsamenuequin ma tanu —quequin ämbo nidmepac caondash.

2 Adoaquien buna mëmunquin penquio yec Esus tsadpac caondash. Inchëshën ushë abentsëc nidmiash utsi tashquecuntsëcnic 40tedec ushquin penquio yec comapenec bumpac caondash. 3 Bunec tsadshobien Satanasën

istuidpac caondash. Istuidtanquimbien: —¿Nuquin Papan Madombobida mibi neque? Aidën Madombo icquin nëid cuënote cain: “Pete icta,” cata —caquien ⁴ Esus: —Padi. Nuquin Papan chiaid dada uapampid nad iquec. “¿Peteuidi tantieta matses bédamboec tabadpec? Nuquin Papan chiacpadomboenuidi naiquien matses bédamboec tabadtsiash,” quequin dada uapampid iquec —quepac caondash Esus.

⁵ Adsho tantiashumbien shubu dadpen icquid Edusaden caid yacno buanshun Nuquin Papa tabadte shubu uashunaid macano Satanasën Esus manidtomepac caondash abucquio. ⁶ Adotanguimbien padpiden chuiioquin: —¿Nuquin Papa caidën Madombobida mibi neque? Aidën Mado yec nëuëshquio pudunta. Nuquin Papan mibi paëdmenquio ictsiashe. Nadentsen Nuquin Papan chiaid dada uapampic.

“ ‘Uidën uata,’ quequin ambi abi yacnoshon uaido mayan bédabo Nuquin Papan chiac mibi uidën uaindac paëdenquio icnuc. ‘Cuënoten tadquëdnushe,’ qeshun adoendac,”

quequin Nuquin Papan chiaid dada uapampique. Pudunta —caquien ⁷ Esus: —Padi. Nuquin Papan chiaid dada uapampid nad iquec. “ ‘¿Icsamboen tantiaguin ëmbemi nashodabi Nuquin Papan cuidpatsiashe? Tanu,’ quenda,” quequin dada uapampique. Padi —quepac caondash Esus.

⁸ Adoaquien Satanasën padpiden buanquin macuësh dapa abucquiocquid manidtomeshun nidaid abichobi Esus ismepac caondash. Chuiquid dapabotedi ismequinc aidobëd icquido ismequinc aidon dayun uaidtedi ismequinc capac caondash. ⁹ Adoshombic: —Nëidtedi mibi menetsiambique. Èbi con icho cata. Èbi aden chuiquin ismenuen danëshën sebudta. Adsho isun ëmbi ismiactedi mibi menembi. Aidën icho mibi icmembi —caquien ¹⁰ Esusën: —Padi. Baded cuenta. Nuquin Papan chiaidquio chuiquin naden dada uapampique. “Nuquin Papa abentsëccquiobi mimbi tantiaiduidtsëqui min Icbombo neque. Aidën namiaidquio icta,” quequin dada uapampique. Cuenta —capac caondash Esusën. ¹¹ Adoaquien Satanas cuempac caondash. Cuenubien Nuquin Papan abi yacnoshon uaido mayan bédabo choshon abëdi tabadquin Esus bédambo icmepac caondash.

*Cadidia yacnoshon Esusën chuibeniaid
(Mad 1.14-15; Duc 4.14-15)*

¹² Adashic aton nidaid Cadidia caidën Esus nidpac caondash. —Mibi acten mentonaid Uan bedshun quënën nauedac caosh —quesho tantiash nidpac caondash. ¹³ Nidashic shubu dadpen icquid Nasaded caid yacno tabadash nidec chian dapa cuëman shubu dadpen icquid Capednaun caid yacno nidash anotsen tabadoapac caondash. Aid nidaid Netadi capampic. Aid anoentsëqui icquid nidaid utsi con tsusedpabon Sabudon capampic. ¹⁴ Esus ambo tabadte chuiquin Nuquin Papan con tsusedpa Isayas cuëmëdquid dada uamiampicpadec ambo tabadpac caondash Esus. Naden dada uapampic.

¹⁵ “Nuquin Papa tantiamequidën chuisho nëidtedishun tantiendac.

Nëidic nidaid cuëshë utsi Netadi caidën tabadquidon.

Nëidic nidaid cuëshë utsi Sabudon caidën tabadquidon.

Nëidic chian dapambo anoentsëqui tabadquidon.

Nëidic acte dapa Odan caid cuëman tabadquidon.

Nëidic isadaidpembo dadpen tabadacno Cadidia caidën tabadquidon.

¹⁶ Aidedishun Nuquin Papan chomiaid tantiendac.

Pabiacte cuënëdabimboec icsamboec tabadquin Nuquin Papa tantienquio icboedombi tantiabenendac.

Nuquin Papa tantiamenuen chuibansho tantiashun matsesën paposhquiacbimboen Nuquin Papa tantiabenendac.

Abi tantienquo icsho Nuquin Papan cuidtsenaidombi Nuquin Papa tantiabenedac ushash isucunacimboen,”
quequin Isayas Esus choash tabadte dada uamepampic Nuquin Papan.

¹⁷ Ashunquiobi Nuquin Papan chiaid chuiquin tauamboen Esusën matses abitedimbo chuibenepac caondash. —Icsaid ënash Nuquin Papa tantiec ambi chiacpadec bëdamboec tabadta. Nëbi Nuquin Papan abëd tabadtequido icmequin matses bëdamboen tabadmendac —quepac caondash Esus ambibi naid chiequi.

Nuëcquid bedquido Esusën: Cho, caid
(Mad 1.16-20; Duc 5.1-11)

¹⁸ Aden chuibenec chian dapa Cadidia caid cuëman nidquin isquien dadan aton utsibëdtambi nëshaid dapamo acte nënepac. Aid Simombidi Petedo capec. Aton utsi Andedes nec. Aid daëdshun nuëcquid bedquidombo icquin aton nëshaid acte nënesho istuidpac caondash Esusën. ¹⁹ Adshumbien Esusën: —Nuquibi icnu. Cho. Nuëcquid bedquid icboedi nëbi ëbi chuibanquid mibi icmenu ²⁰ —caquien aton nëshaid nianec nidquimbi Esus tsibanampac caondash.

²¹ Udictsëc nidquin isquien dada daëd cano antabëdpec. Acobo aton utsi Uambëd icpac caondash. Aton papa Sebedeyo caidbëdi cano antabëdquin nuëcquid bednun aton nëshaid dapa nacenmpac caondash. Adsho istuidshun Esusën: —Nuquibi icnu. Cho —caquien ²² aton papabëdta cano nianec Esusbëd icnuec nidpac caondash.

Matses dadpen Esusën chuibeniad
(Duc 6.17-19)

²³ Adashic aton nidaid Cadidia caid yacnobi capucuenec Nuquin Papan chiaid chuibante shubun-shubunquiec puduedcuenequin Esusën Nuquin Papan chiaid chuibenepac caondash. Abi yacno tabadmenun Nuquin Papan bëdamboen iste matses chuibeniad caondash. Adshumbic daic-saidotedi bëdamebampac caondash. ²⁴ Adosho istanquin: —Bëdamequidquo nec —quequin isboedon Esusën naid chuibenepac caondash. Ënapen nidec nidaid utsi Sidia caidën nidshun chuibeniad caondash. Aden chiac daic-saidotedi bë-bëpac caondash. Dada paëmboshë icquido yec podobitsi icsa dapuedaido yec unësanquido yec dada shëquëquenquo icquido yec quenuc bë-bëacsho aittedi bëdamepac caondash Esusën. ²⁵ Aden: —Bëdamiosh —quequin chiac isec cho-choash dadpenquo tsucus-tsucustsëcquo yec tsidadash niquianquin Esus tsibanampac caondash. Nëidtedshun tsibananac caondash. Nëidic nidaid Cadidia caidën tabadquidon. Nëidic shubu dadpen icquid Decapodis caid yacno tabadquidon. Nëidic shubu dadpen icquid Edusaden caid yacnquidon. Nëidic nidaid Udeya caidën tabadquidon. Nëidic acte Odan caid uquë cuëma utsiuc tabadquidon. Aidedshun Esus tsibanampac caondash.

5

Nadquido bëdambo iquendac, quequin Esusën chiaid
(Duc 6.20-23)

¹ Matses dadpenshun tsibananac macuësh dapa cuëte nibëdpamboecquid pudundoec poctsebi Esus tsadtuidpondash. Abi tsibananash matses dadpen abi datsidadnubien abëd icquido Esusën dayunquo tabadpondash. ² Adshobien Nuquin Papan matses bëdamboen isquin bëdambo icmete Esusën matses abitedi chuibanpondash.

³ —¿Mitsipadquid Nuquin Papan bēdambo icmepec? Nadquid caimbique. Tantia. Mibitedi chuinu. “Ēbemi bēdamboec tabadtiapimbo iquebi. Bēdapenquio iquebi. Nuquin Papan bēdamboen tabadmiaquini bēdamboec tabadtsiac,” quequid Nuquin Papan: “Ēbēd tabadtequid nec,” quequin bēdambo icmendac.

⁴ “Matses abitedi icsamboec tabadnuc ēbitsen icsamboec tabadquid nebi,” quec shubiquimbi abi tantiasho Nuquin Papan bēdamboen isquin bēdambo icmendac.

⁵ Aton nauidi tantienquio icquin Nuquin Papa tantiaquin utsibotsen tantiaquid Nuquin Papan bēdambo icmendac. Yueshun ambi nidaid chuca uaidēn tabadmendac.

⁶ Pete bunachimboec ambi chiacpadec bēdamboec tabadte bunquid Nuquin Papan bēdamboen tabadmendac.

⁷ Abi chieshēnquidi chieshēnenquio icquin bēdamboen isquid Nuquin Papan bēdamboen isendac.

⁸ Ambi chiacpadomboenuidi nate bunquid Nuquin Papan bēdambo icmequin abibi bēismendac.

⁹ Aton matses chieshēnansho isash: “Padi. Chēn. Bēdamboequien tabadtiad,” quequid Nuquin Papan bēdambo icmequin con mado caindac. Adquidbidi ademibidi con champi caindac.

¹⁰ Nuquin Papa tantiec bēdamboec tabadsho utsin chieshēnaid Nuquin Papan bēdambo icmequin unēsacsho abēdi tabadmendac. ¹¹ “Esus tantiaquid nec,” qeshun utsin mibi chieshēnquin chiacsho Nuquin Papan abēd tabadmenuen mibi bēdambo icmendac. Mibi cueso ademibidi mibi bēdambo icmendac. Ademibidi mibi muauasho Nuquin Papan mibi bēdambo icmendac. ¹² Aden utsibon: “Esus tantiaquid nec,” qeshun chieshēnaqui cuis-honqueta. “Ēnden tsusedpabon Nuquin Papan chiaid chuisho chieshēnquin cuesunepampic. Adoacsho Nuquin Papan bēdamboen isquin abēdi tabadmec. Ademibidi utsibon chieshēnacsho ēbi bēdamboen isquin unēsacsho abēdi tabadmendac,” quiash cuishonqueta —quequin chuipondash Esusēn.

Abi tantiaquido bēdamboec tabadte chiaid

(Mad 9.50; Duc 14.34-35)

¹³ Abi macuēsh dapa poctse tsadquin Esusēn chuibampondash. —“Ma utsibotsen Nuquin Papa tantianu,” quec sa pambid casecac batambo yec petiadquio yacimbocē icta. Aden Nuquin Papan chiacpadec bēdamboec tabadquin mimbi utsibo bēdamboec tabadte bumetsiac. Sa batambo icquid bēdambo iquec. Sa batambo ichoedi batapenquio yec icsasho ¿mitsipadēntsi batambo icmeoapec? Adotiapimbo iquec. Sa icsambo yanacsho penquio icquin secatequid nec. Ademibidi matses bēdamboec tabadenquio yec icsambo icsho Nuquin Papan chian anēdēnquiacno nēsecatequid nendac —quepondash Esus.

¹⁴ Adashic padpidec onquec: —Nuquin Papan chiacpadec bēdamboec tabadte utsibo tantiamequido mibi neque. Aden tantiamenuec bēdamboec tabadta. ¿Nuntanshunda ēapadic? Padenquio. Umanucshumbien ma tantianueshun ēaquid. Ademibidi: “Ma Nuquin Papan chiacpadec tabadte tantianu,” quiash ēnēdenquio yec bēdamboec tabadquin ismeta. Adsho isash: “Nuquin Papa tantiec bēdamboec tabadquid nec,” quetsiash utsibo.

¹⁵ ¿Utsibo chuinuecta abentsēqui uano icpadic? Padenquio. “Ma nēidēn tantianu,” quec aibēdi bēdamboec tabadquin chuibanquid. ¹⁶ Ademibidi ēbi tantiesabobēd tabadquin: “Ma Nuquin Papa tantianu,” quequin ēnenquio icquin Nuquin Papan chiacpadomboen nata. “Nuquin Papa bēdambo iquec,” mā utsibotsen quenu,” qeshun adota —quequin Esusēn chuipondash.

Nuquin Papan Moises chuimiaid chiaid

¹⁷ Nadentsen Esusën chuipondash. —Ëmbi chuibansho tantiashun: “Nuquin Papan chiaidquo chienquo iquec,” quequin tantienda. “Nuquin Papan Moises dada uamiampidbēda con tsusedpabo utsibo dada uamiampid chienquo icquin utsi uapec,” mimi ãbi capec. Mambi utsi uainquo yoc. Nuquin Papan chiaid utsi uainquo icquin ambi chiacstedimbo namenuc nebique. ¹⁸ Abimbo chuinu. Tantia. Abubēda nidaid nibēdamiabi icnuc Nuquin Papan chiaid bēnudtiapimbo iquendac. Ambi chiacstedimbo naquin Nuquin Papan nainendac.

¹⁹ Padnubic Nuquin Papan: “Nadomboen nata,” quequin chiaid abentsēqui niacquin aid chiaidbidi adomboembidi niacmequid Nuquin Papan: “Bēdambo icquid nec,” catiapimbo iquec. Utsibic Nuquin Papan chiacpadec tabadec: “Nuquitsen bēdamboec tabadnuna,” quequid abi yacno nidacsho Nuquin Papan: “Bēdamboshē icquid nec,” caindac. ²⁰ Moisesën dada uampid chuibanquido padiseyobobēd Nuquin Papa yacno puduedtequidoen mimi dampec. Aido bēdambo icquid damianashi ompodash icsaic. Adashic Nuquin Papa yacno puduedtiapimbo iquendac. Adembidi Nuquin Papan chiaid niac-niaquec adecbidi Nuquin Papa yacno mibi puduedtiapimbo iquendac. Nuquin Papa tantiec bēdamboec tabadquidien puduedtsiash —quequin chuipondash Esusën.

Chieshēmēnquido nēish bēdante chiaid

(Duc 12.57-59)

²¹ Adshumbic Esusën padpiden chuioapondash. —Nuquin Papan chiaid chuiquin isadaidbo tsusedpabon: “Cuesunenda. Cuesunianquid Nuquin Papan chiacpadomboen matses cuidte chuiquidēn cuesunemequin cuidquid,” quequin chuipampid mimi tantiec. ²² “Nadquidotsen cuidtequido nec,” quequin chuinu. Tantia. Aton matses nēishēnash aton nēish bēdanenquo icsho Nuquin Papan cuidtequido nendac. Utsibic chieshēmēnec icsamboec cuēmēnquido isadaidbo tsusiobon cuidacsho isun: “Bēdamboen naic,” catsiambi. Nēidic aton matses chieshēnquin shēpiaquid Nuquin Papan icsano nēsecaquin cuidtequido nendac. ²³ “Chieshēmēnquid Nuquin Papan cuidtequid nendac,” quequin ãmbi chuisho tantiashun bēdamboen nata. Nuquin Papa tabadte shubu uashunaidēn puduedash: “Ambi chiacpadomboen musuc menenu,” mibi quepec. Aden musuc menenumbi mimi naid tantiata. “¿Ada ãbi chieshēnquid icpec? ¿Ëmbi chieshēmeboeda icpec?” quequin tantiata. ²⁴ Adshun: “Ai, ãmbi chieshēmeboed iquec,” qeshun Nuquin Papa tantiaquin mimi bēboed meniabi mibēd chieshēnamboed yacno nidash aidbēd bēdamboec onqueta. Adec bēdamboec onquiash padpidec choashun Nuquin Papa tantiaquin meneta. Adec mibēd chieshēnamboedbēdi bēdamboec onqueta.

²⁵ Mibēd chieshēnamboed utsimbic: “Nēid cuidmenuen cuidte chuiquid yacno buanchitembimbi iquec,” qeshun: “Baded nid,” cac podquedēn nidec aidbēd bēdamboec onquenidta: “Ma nēish bēdanu,” quiash. “Matses cuidte chuiquidēn cuidchitoshe,” quiash badedquo mibēd chieshēnamboedbēd bēdamboec isnanta. Abi yacno buanacsho cuidte chuiquidēn: “Icsambo iqueque. Quēnēn nauedta. Ëmbi chiacsted piucquid ãmbi bedabi icnuc ma tsadpanu,” mibi catsiash. Quēnēn nauedshun ²⁶ ambi chiacsted piucquid nibēdnuc mibi cuemenquo ictsiashe. Mibēd chieshēnamboedbēdi bēdamboec onqueta. “Nuquin Papan adembidi cuidnushē,” quiash adta —quequin Esusën chuipondash.

Icsaquin chudaid chiaid

²⁷ Adshumbic naden Esusën chuipondash. —Chiaid utsitsen mimbi tantiec. “Min chidopenquio chudenda. Min bënëpenquio chudmenda. Aben uequid chudenda. Aben uequidën dada chudmenda,” quequin Nuquin Papan chiaid nuquin tsusedpan dada uapampic. ²⁸ Aden chiaid niac-niaquec icsambo icquid icnubi nadquid icsambo icoaic. Aton chidopenquio isec: “Aidquo chudtiadquo icchitebi,” quequin otacquo tantiequi matses icsapec. ²⁹ Ĕshën isec mibi min chidopenquio bunec icsaic. Ĕshë chichshuniacimboec icsainquo yec ënëdash mibi bëdambo ictsiaic. Icsaid ënenquio icquid Nuquin Papan chian anëdënquiacono nësecaquin cuidendac. ³⁰ Min chidopenquio chudte bunquin mëismec mibi icsaic. Mëteshuniac bedtiapimbo yäcbimboen mibi icsaid ënta. Ĕnenquio icquid Nuquin Papan cuidendac —quequin Esusën chuipondash.

Aton chidobëd cuëshëdte chiaid
(*Mat 19.3-9; Mad 10.11-12; Duc 16.18*)

³¹ Nadentsen Esusën chuipondash. —Nuquin Papan Moises chuimiaid utsitsen mimbi tantiec. “Aton chido bunenquio icquin naden dada uashun menequid. ‘Mibi intiapimbo yanobi,’ quequin dada uashun aton chidobi menequin nidmequid,” quequin Moisesën dada uapampic. ³² Utsitsen chuinü. Aton chidon bënëpenquio chudmesho istuidshun Moisesën chiacpadomboen nac bëdambo ictsiaish. Aton chido dada utsi chudmesa icshobi dadan ambembi dada uaid menequin nidmiac icsambo ictsiaish. Aden nidmequin chido icsametsiaish. Chido nidmiacsho bedquidtsen icsatsiaish —quepondash Esus.

Abimbo chiacimboen chienda, quequin Esusën chiaid

³³ Adshumbic Esusën padpiden chuipondash. —Naden Nuquin Papan ambi chiaid nuquin tsusedpa Moises dada uamepampic. “ ‘Nuquin Papa utsi uatiapimbo yacimboen abimbo caimbi,’ quequin chiaid niactemaid nec. Niacsho Nuquin Papan cuidendac,” quequin Moisesën chuipampic. ³⁴⁻³⁶ Aidën chiacpadec muainquo ictiadquidi mimbi abimbo chiacimboen utsi uain icsamboen chiec. “Äbi cuëmëdquid cuë nec muasho ëbi cuidtsiaish. Nuquin Papa cuëmëdquid cuënenquio yec muasho Nuquin Papan ëbi cuidenquo ictsiaish,” qeshun mimbi utsi chiec. “Abu utsi uatiapimbo yacimboen ëmbi chiacpadomboen naimbi. Muainquo iquebi,” mibi quepec. Adecbidi: “Nidaid utsi uatiapimbo yacimboen ëmbi chiacpadomboen naimbi,” mibi queoapec. Adembiidi chiec mibi Edusaden queoapec. Adembiidi con mapi quequin mimbi chieque. Aden abimbo chiacimboen chienda. “Nuquin Papa cuëmëdquid cuënenquio iccombi,” mibi quenubi abu abi tabadaid icnuc ashunquo Nuquin Papan abitedi namendac. Nidaidic Nuquin Papan tincate nec. Edusaden yacnoshombic Nuquin Papan chomiaidën bëdamboen namendac yuechshun. ¿Min mapin icboda mibi nedi? Padenquo. ¿Mimbida min mapi masedcamedi? Padenquo. Aton Icbombien Nuquin Papan naique. Abimbo chiacimboen icsamboen chienda. ³⁷ Adec muainquo icquin abimbo chuita. “Äi, adembi naimbi,” quequin mimbi chiacpadomboen nata muainquo icquin. Adembiidi: “Padi. Natiapimbo iquebi,” qeshun mimbi chiacpadomboen nainda. Utsi uaic matses icsamequidën Satanasën tantiamiapadec mibi muapeque. Adenda —quepondash Esus.

Chieshë nec cuidnanenda, quiaid
(*Duc 6.29-30*)

³⁸ Adashic padpidec Esus onquec: —Nuquin Papan Moises chuiquin dada uamiapid mimbi tantiaboed nad iquec. “Chieshë nquin ëshë ansiaic

adecbidi cuidnanec ëshë ansenanquid. Chieshënquin sëcsiac adecbidi cuidnanec sëcsenanquid,” quequin chiaid icnuc³⁹ utsitsen chuinu. Tantia. Mibi cuesquid cuidenda. Chieshënaqui cuidnanenquio icquin adembi bédamboen ista. ⁴⁰ Min matses: “Ëbi cuidquin mimbi ëbi meniampo iqueque. Min dashcute beccho,” qesho mimbi menenquio icsho isun: “Cuidte chuiquid yacno buanshun dashcute dachicmechitomane,” qesho aid dashcute meneshumbic min dashcute utsitsen chicshun meneta. Adec bédamboec tabadta. ⁴¹ Utsibic: “Nëbi nidtuidquin con na buanec nid,” quequin ancabadac nëbi nidtuidenquio icquin udimbo buanshunta. ⁴² Aton na nibédquid: “Mitsana beccho,” qesho meneta. Utsibic: “Mitsana buanshun bëuaindami,” qesho: “Padi,” cainda. Meneta. Aden bédamboen nata – quepondash Esus.

Chieshënquidobi bédamboen iste chiaid
(Duc 6.27-28, 32-36)

⁴³ Adshumbic abi macuësh dapa poctse tsadquin bédamboec tabadte Esusën chuipondash. Nuquin Papan Moises chuiquin dada uamiampid mimbi tantiaboed nad iquec. “Mibi tantiaquidombo tantiaquin mibi chieshënquido chieshënta,” quequin chuipampic. ⁴⁴ Utsi mibi chuinu. Tantia. Mibi chieshënquidobi bédamboen isquin tantiata. Chieshënaqui: “Ëbi chieshënquid bédamboen ista, Papa,” quequin Nuquin Papa chianeta. ⁴⁵ Aden chianec Nuquin Papabimboec mibi ictsiaic. Mibi utsibo bédamboen nashunquid ictsiaic. ¿Bédambo icquido yacnouidida Nuquin Papan ushë chëncamepadic? Padenquio. Icsaido yacnotsen ushë chëncamec. ¿Bédambo icquido yacnouidida ue chomepadic? Padenquio. Icsaido yacnotsen ue chomec. Bédambo icquidobëdtabi icsambo icquido Nuquin Papan bédamboen nashunec. ⁴⁶ ¿Mibéd tantiananquido min shubun icquidouidi mimbi bédamboen nashunsho isunda Nuquin Papan mibi: “Bédambo iquec,” capec? Padenquio. Mimbi icsambo iquec caidontsen ambi tantiaido nashuntsiash. Aidombien piucquid bedshumënquido icquimbi aton shubun icquidouidi nashuntsiashe. Aden nainda. Utsibotsen bédamboen nashunta. ⁴⁷ ¿Min shubun icquidobëduidida mibi onquec tabadpe? Nuquin Papa tantiesaboen adpec. Utsibotsen bédamboen ista. ⁴⁸ Nuquin Papabimboec icta. Bédambo icquid icta. Bédambo icquidobëdta icsambo icquidobi Nuquin Papan bédamboen tantiacpadomben utsibotsen bédamboen tantiata – quepondash Esus.

6

Utsibo bédamboen nashunte chiaid

¹ Adshumbic abi macuësh dapa poctse tsadquin Esusën chuipondash. – Nadquid icsambo iquec. Nuquin Papa tantienquio icquimbi aton matses ismenuenuidi naic icsambo iquec. Adquid Nuquin Papan bédamboen istiapimbo iqueque. “Utsibo nashunu,” quequin utsibo ismenquio icquin nata. ² “Aton na nibédquido menenu,” qeshun utsibo ismequin menenda. Ismenquio icquin meniac bédambo ictsiashe. “Nuquin Papa tantiaquid nebi,” quec muaquidën nacpaden nainda. Nuquin Papa tantiaquid damenuembien muaquidën matses dadpen yacnoshonuidi menedenepec. Adosho isun aton matsesënuidi bédamboen isnubi Nuquin Papan bédamboen istiapimbo iquec. ³ Aton na nibédquido menenquin utsibo ismenda. Meneshun: “Menebanombi,” quequin utsibo chienda. ⁴ Adsho isun mimbi utsibo ismenquio icquin naid tantiaquid icquin Nuquin Papan bédamboen isquin abëdi mibi tabadmendac – quequin Esusën chuipondash.

Nuquin Papa chianete Esusën chiaid
(Duc 11.2-4)

⁵ Adshumbic Nuquin Papa chianetetsen Esusën chuipondash naden. — Bëdambo icquid damianquidën nacpaden nainda. Aidon Nuquin Papan chiaid chuibante shubun puduedshun utsibo tantiamenuenuidî nidtoshon comapenec onquequin Nuquin Papa chianepec. Adash umanuc puduenshun matses dâpen ismenuenuidî padpiden ademvidi chianec. Adquid aton matsesën: “Bëdambo iquec,” canubi Nuquin Papan padenquio iquec. Bëdamboen istiapimbo iquendac. ⁶ Mibi adenda. Utsibo ismenuenuidî nainquio icquin matsesën isacmaidquio Nuquin Papambo tantiaquiquin chianeta. Aden chianequid mibi icsho Nuquin Papan mimbi utsibo ismenquio icquin naidtedî tantiaquid icquin mibi bëdamboen isquin abëdi tabadmendac.

⁷ Nuquin Papa chuiquin bëdamboen chianeta. Nuquin Papa tantiesabon ambi tantiaid chuibudacimboen Nuquin Papa chuibudenda. “Yuenquio chuibudac nuqi tantiaobodën nuqi nashuntsiash. Padenquio icac nuqi nashunenquio ictsiash,” qeshun Nuquin Papa tantiesabon yuen chuibudacimboen nainda. ⁸ Adoenquio icquin Nuquin Papa chianeta. Mimbi chiabi: “Adopashuni. Aid nibëdnuc unësebi. Utsi icnuc bëdambo ictsiabi,” quequin mimbi otacquio tantiaid Nuquin Papan tantieque. ⁹ Naden Nuquin Papa chuita.

“Bëdambohë icquid icsho matses abitedishunquio mibi tantiapashun, Papa.

¹⁰ Matses abitedishunquio mibi con Icbo capashun. Mibi yacnoshon mimbi uaido mayan bëdabon mimbi chiacpadomboenuidî naic.

Adomboembidi mimbi chiacpadomboen matses abitedishunquio napashun.

¹¹ Bumianenda, Papa. Badiadquidën badiadquidënquien con pete icmeta.

¹² Utsibon chieshënaqui ëbi cuidnanenquio icsho isun ëbi icsashobi cuidenquio icquin ëbi bëdamboen ista, Papa.

¹³ Mimbi chiaid ëbi niacmenda, Papa.

‘Icsamenushe,’ qeshun Satanas ëbi yuamenda, Papa.

Abitedishun Icbombo yec abitedimbo namequidquio mibi nec, Papa.

Ëmbi mibi chuisho tantia, Papa.

Ënenquio icquin abitedishunquio: ‘Bëdambo iquec,’ mibi capashun. Padi,” quequin Nuquin Papa chianeta —quequin Esusën chuipondash.

¹⁴ Adashic nadpondash: —Utsibo bëdamboen ista. Cuidnanec chieshënanenda. Cuidnanec chieshënanenquio icsho isun Nuquin Papan mibi cuidenquio icquin bëdamboen istsiash. ¹⁵ Cuidnanec chieshënansho isun Nuquin Papan mibi bëdamboen istiapimbo ictsiash —uequin Esusën chuipondash.

Buna mëmunte chiaid

¹⁶ Adshumbic utsibo ismenquio icte utsi Esusën naden chuipondash. —Tantia. Nuquin Papauidî tantianuequin buna mëmunquid chuinu. Muaquidën nacimboen ismenda. Muaquido: “Buna mëmunquid nec,” aton matses camenuec abibi maniumëdash nënquidbitsëcquiec mamënenquio iquec. Adec buna mëmunquid tanec muaic. Adsho isun matsesën bëdambo icquid danubi Nuquin Papan: “Icsambo icquid nec,” qeshun bëdamboen istiapimbo iquec. ¹⁷ “Nuquin Papauidî tantiaquin nëidtedec ushquin buna mëmunu,” qeshun Nuquin Papambo tantiaquin nata. “Utsibon tantianushe,” qeshun bëdamboen min manëdaid shueshcata. Adash bëdamboec mamënta. Aden utsibo ismenuenuidî nainda. ¹⁸ Aden bëdamboen manëdaid shueshcaid isun: “Buna mëmunec nec,” cainquio ictsiash utsibon

mibi chuiquin. Nuquin Papambien: “Ëbiuidtsëqui tantianuen naic,” quequin tantiatsiash. Adshun mimbi utsibo ismenquo icquin naidtedi tantiaquid icquin abëdi mibi tabadmendac –quequin chuipondash Esusën.

Nuquin Papa yacno tabadte bunta, quiaid
(Duc 12.34)

¹⁹ Adshumbic padpiden Esusën chuipondash. –Ëmbi chuiboedquo tantiashun mimbi dayun uatequiduidi tantienda. Dayun uatequid nadquo iquec. Chodquetequid yec shocosh chiuidtequid yec matsesën ampeshuntequid yec quec icsabudtequid nec. Adquiduidi tantienda. ²⁰ Icsabudesambo tantiata. Nuquin Papambo tantiec aidbëd tabadte bunquin ambi chiacpadomboen nata. Chodquetiapimbo icquid yec shënbudtiapimbo icquid yec ampeshuntiapimbo icquid yec quec Nuquin Papa yacno iqueque. Aidquo tantiata. ²¹ Mibi bunaidquo ënenquo icquin tantiec mibi tabadtsiac. Nuquin Papabëd tabadte bunquin aid tantiata –quepondash Esus.

Pabiate shëcuë cuembo icquid chiaid
(Duc 11.34-36)

²² Adshumbic abi macuësh dapa poctse tsadquin utsitsen Esusën chuipondash. –Pabiate shëcuë cuembo icquin Nuquin Papa tantiaquiec mitsanauidi tantienquo yec mibi bëdamboec tabadtsiac. ²³ Pabiate cuënëdacbimboec yec Nuquin Papa tantienquo yec mitsanauidi tantiec ÷bëdamboecta tabadtsia? Padenquo. Adec mibi icsamboec tabadtsiaque. Adenda –quequin chuipondash Esusën.

Bedteuidi tantienda, quiaid
(Duc 16.13)

²⁴ Adshumbic naden Esusën chuipondash. –Mitsanauidi tantiec mibi icsamboec tabadtsiac. “Naic cho,” quequin daëdshun chiacna aid daëdi mimbi nashumpatsia? Padenquo mimbi ictsiac. Abentsëc nashunquin utsin chiaid mimbi natiapimbo ictsiac. Aden mitsana bedtequiduidi tantiaquin aid bednuenuidi mimbi natsiac. Aden naquin Nuquin Papan chiacpadomboen mimbi natiapimbo ictsiaque. Mitsana bedteuidi tantienda. Nuquin Papauidtsëqui tantiata –quequin Esusën chuipondash.

Nuquin Papan abi tantiaquido dayun uaid
(Duc 12.22-31)

²⁵ Adshumbic Esusën padpiden chuipondash. –Ëmbi aden chuisho tantiash dacuëndenda. “¿Atotsimbi pepe? ¿Atotsimbi acpe? ¿Atotsibi dasiuidpe?” quec dacuëndenda. Nuquin Papan nac unësabi mibi tabadeque. Aidëmbien petebëdta dasiuidte icmeque. “Con na nibëdtsiash,” quiash dacuëdec tabadenda. ²⁶ ¿Uicchunënda ambibi cuëte ëshë siac bacuëacsho chepadic? Padenquo. Adecbidi ambi pete dayun uatequid shubumpi nibëdec. Adquid icsho Nuquin Papan aton pete bedmec. Uicchun abipadquidpenquo icshobi aton pete Nuquin Papan bedmec. ¿Ad icnuc ambi abipadquid uaidobi matses icsho aton pete bedmenquioda icpadic? Nuquin Papan mibi nashunquin min pete icmeque. Dacuëndenda. ²⁷ “Unëstiapimbo iquebi. Dacuëdebi,” quequidta unësenquo icpadic? Adequi dacuëdquid unëstiashe. Unësteuidi dacuëndënda.

²⁸ “¿Atotsibi dasiuidpeba?” ¿quec mibi dacuëdec tabadpe? Tantia. Chuinu. “Cuëte bacuëec bëdamboshë isadtsec,” quepec nuquin matses. ¿Aton sedquidi shoyontëcshun abi dasiuidte daëdcash dasiuidtsashta bëdamboshë isadpadic? Padenquo. Nuquin Papan uacpadquidobi iquec. ²⁹ ¿Cuëte bacuëec bëdamboshë isadquidbimboecta nuquin tsusedpa chuiquid dapa Sadomon cuëmëdquidën dashcute icpampic? Padenquo. Adpenquien

icpampic. ³⁰ Cuète bacuëec bédamboshë isadboed abadiadtsëcshumbi isac ènden chodquiac. Aid badedquio chodquequid nec. Ad icnuc ¿abipadquid Nuquin Papan uaido mibi icsho mibi dasiuidte bedmenquioda icpadic? Padenquio. Mibi dasiuidte icmeque. Dacuëndenda. Mitsana nibèdquio icte dacuëndënquimbi mimbi Nuquin Papa bēdiactsëc tantiatseque. ³¹ Dacuëndec tabadenda. “¿Atotsimbi pepe? ¿Atotsimbi acpe? ¿Atotsibi dasiuidpe?” quec dacuëndenda. ³² Nuquin Papa tantiesaboen adquid bedteuidi bunquieque. Adenda. Mitsana nibèdsho isun Nuquin Papan mitsana icmetsiashe. Abi tantiaquido yec dacuëndec tabadenda. ³³ Adenquio yec: “Con Icho mibi nec, Papa,” quequin ambi tantiacpadec bédamboec tabadte bunta. Adec tabadec: “Aid nibèdnuc unësebi,” quequin mimbi tantiaidtedi Nuquin Papan mitsana icmetsiashe. ³⁴ Èbi adsho tantiashe badiad utsi caic: “Aid badiadën ¿atotsimbi nape?” quec dacuëndenda. Aid badiadën Nuquin Papan ambi tantiacpadomben mibi nametsiashe. Nèid ushëmbi: “Naden naimbi,” quequin tantiec tabadnuna dacuëndenquio yec —quequin chuipondash Esusën.

7

Utsibo icsaid chienda, quiaid (Duc 6.37-38, 41-42)

¹ Naden Esusën Nuquin Papan chiacpadec tabadte chuipondash. —Mibi icsaid ucudambobi utsibo icsaiduidi chienda. Adembidí Nuquin Papan: “Icsambo iquec,” mibi canushe. ² “Icsambo aid iquec,” mimbi cac adembidi aidontsen mibi adoatsiashe. Adembidi Nuquin Papantsen: “Mibi icsambo iquec,” canushe. Utsibo icsaiduidi chienda. ³⁻⁴ ¿Abi bētsiadaid bēchish nua bēuequid bēbedadabi icquidēnda: “Mibi bētsiadaque. Bēbednu,” capatsiashe utsi chuiquin? Padenquio. ⁵ Abi bētsiadaid abia bēbedadashien: “Mibitsen bēbednu,” quetsiashe. Adembidi mimbia mibi icsaid ènshun: “Icsaid ènash bédamboequien tabadtiad,” quequin utsibo bédamboen chuita. Bédambo icquid damianquidën abi icsaid ènabi: “Aid icsambo iquec,” quequin utsibo icsaid chuibanec. Adquid tanenda. ⁶ Mimbi bédamboen chiaqui tantienquio icsho chuidonenda. Nuquin Papan chiaid chuibudaqui tantiatiapimbo icquin niac-niacsho isun adenuidi chuidonenda. Opa icsan abi pemequid piacbinboen mibi chieshëntiashe. Chanchon icbon dashcute nebudshun bēchish uaquin tin-tincacbinboen Nuquin Papan chiaid niac-niacsiashe. Adquid chuidonenda —quepondash Esus.

Ènenquio icquin Nuquin Papa chianete chiaid (Duc 11.9-13)

⁷⁻⁸ Nadembidí Esusën chuipondash. —Nuquin Papa ènenquio icquin chuidoneta. Bacuëbon: “En na,” cadoniacbinboen chuidoniac Nuquin Papan mibi tantiasiashe. Adembidi: “Èbi bédamboen name, Papa,” mimbi cacpadomben bédamboen mibi nametsiashe. Adembidi: “Èbi nashunquin èbi bédambo icmeta, Papa,” quequin chuidoniac Nuquin Papan mibi bédambo icmendac.

⁹ ¿Icsambo icquidta Nuquin Papa icpadic? Padenquio. Bédambo icquidquio nec. Bacuëmpi: “Bundobique. Penu. Beccho, papa,” ¿queshoda amèn cudasënquin cuënotebi menepadic? Padenquio. ¹⁰ ¿Adembidi aton bacuën: “Nuëcquid chenu. Beccho, papa,” cacta cudasquin nisimbo menepadic? Padenquio. ¹¹ Matses yec icsaquido icquimbi min bacuëbo abimbo mimbi menenubien Nuquin Papan ambi uaido matses: “Èbi nashunta, Papa,” quesho tantiashun bédamboen nashuntsiashe. Nuquin Papa chianeta.

(Duc 6.31)

¹² Nuquin Papan tantiaido icquin utsibo bēdamboen isquin bēdamboen nashunta. Utsibo caic: “Aidon nashumpashuni,” quequin mimbi otacquo tantiapadomboembidi utsibotsen nashunta. Aden Nuquin Papan chiaid Moisesbēdtan nuquin tsusedpabo utsibon dada uaqin chiampicpadomboen mimbi natsiaque. Aden utsibo nashunta —quequin chuipondash Esusēn.

Daēdpactsēcshun Esus tantiabente chiaid

(Duc 13.24)

¹³⁻¹⁴ Adshumbic Esusēn naden chuipondash. —Nuquin Papabēd tabadnuec aid tantiec bēdamboec tabadta. Shēcūē aniambo icquidēn matses abentse-abentsec puduedachimboec abentse-abentsec Nuquin Papa yacno puduednuec aid tantiec bēdamboec tabadec. Padnuen antied dapan abi maisi nidachimboec matses dadpenquo abi tantiesabo yec Nuquin Papan icsaido nēsecacno nidendac —quepondash Esus.

Icsambo icquid nec, quequin tantiate chiaid

(Duc 6.43-44)

¹⁵ Abi macuēsh dapa poctse tsadquin naden Esusēn chuipondash. —Utsibo: “Nuquin Papan chiaidquo chuiquid nebi,” quec bēdambo icquid damianquid iquendac. Adquid choshon Nuquin Papan chiaid niac-niacmequin icsamendac. Bēdi dapa nēish yua pete bunquiacimboec mibi icsamete bunquieque. Adquidēn chuisho tantienda. ¹⁶ “¿Mitsipadembimbi muaquid tantiapatsia?” ¿quecta ique? Ambi naid isun mua quequin mimbi tantiatsiac. Adembidi Nuquin Papan chiaidquo chienquo icsho tantiashun: “Utsi uain chiec,” mimbi catsiac. Chetequid isun cuēte dada matsēsēn tantiec. Aden tantiec nisanquidēn bacuē bēsho isash: “Dadainēn bacuē nec,” qesa matses nec. Adecbidi echo bacuē bēsho isash: “Bata nec,” qesa matses neoaic. ¹⁷ Cuēte bēdan bacuē adquiobidi bacuēec. Cuēte icsan bacuē adquiobidi bacuēoaic. ¹⁸ ¿Cuēte bēdan bacuē chetemaidta nepec? Padenquo. ¿Cuēte icsan bacuē chetequidta icpec? Padenquo. ¹⁹⁻²⁰ Chetemaiddimboec muaquid bēdambo ictiapimbo iquec. Nuquin Papan chiaid niac-niaquec icsamboec tabadsho isun: “Muaquid nec,” quequin mimbi tantiatsiac. Adembidi Nuquin Papan chiaidquo chienquo icsho: “Muaquid nec,” quequimbidi mimbi tantiatsiaque. Adquidēn chuisho tantienda. Cuēte bacuēesa dēdshun nēdēncacimboen: “Nuquin Papan chiaid chiembi,” quec muaquid Nuquin Papan icsaido cuidacno nēsecaindac —quepondash Esus.

Nuquin Papa yacno puduednu, queuidte chiaid

(Duc 13.25-27)

²¹ Utsitsen Esusēn chuipondash. —Ēbi caic: “Con Icbo mibi nec. Mibi tantiembique. Mibi yacno ēbi puduedme,” ¿quequidtedida Nuquin Papa yacno puduedpatsias? Padenquo. Nuquin Papan chiapadomboen naquidquien abi yacno puduedtsias. ²² Nuquin Papa yacno ēmibi yuedte ushēn matses dadpenhun ēbi chuiuidendac. “Con Icbo mibi nec. Mibi caic: ‘Aidēn nami-aidquo nebi,’ quequin dadpen naombi. Nuquin Papan chiaid chuiquinc, podobitsi icsabo matses dapuedaido cuemequinc comapenen tantiaquin ismequinc caombique. Nuquin Papa yacno ēbi puduedme,” ²³ qesho ēbimbo tantiec Nuquin Papan chiapadec bēdamboec tabadabi icsho: “Ēmibi tantiacmaidquo mibi neque. Baded cuenta. Icsamboec tabadquid mibi neque,” caindami. Ēbi adsho tantiash muainquo yec bēdamboec tabadta —quepondash Esus.

Shubu uaquidimboecquid chiaid

(Duc 6.47-49)

²⁴ Adshumbic Esusën padpiden chuipondash naden chuiquin. —Ëmbi chiacpadomboen nata. Aden mimbi bédamboen natsiaque. Shubu uaqin bédamboen tantiaquidbimboec mibi icsiaque. Tantia. Chuinu. Bédamboen tantiaquidën manänquio shubu uaqin buintad nitsinqid. ²⁵ Aden shubu uan ue dapa conquequidbëdi chonoc shubu chimeshadenquio icquid. Shubu nuntan anchiuidenquio icquid. ²⁶ Aden ëmbi chiacpadomboen naquid icnubi utsibo ëbi tantiesa iquendac. Aido shubu uaqin tantienquio icquidbimboec iquec. Tantiengio icquidën nadoquid. Acte cuidi cuëmanquiobi shubu uaqin badedi unëstsëcquidquio cueste nitsinqid. ²⁷ Adquid nitsinaid ue dapabëd conquequid choquin shubu chimeshquid. Adecbidi acte cubudtoquidën shubu nuntan mauanquid. Aden tantesa uatsëcquidbimboec ëbi tantiesa iquec. Adquid Nuquin Papan cuidtequido neque. Ëbi tantiata —quequin chuipondash Esusën.

(*Mad 1.22*)

²⁸⁻²⁹ Adsho tantiash: —Ma comapenen tantiaquidquio Esus neyoc. Nuquin matses tsusiobon Moisesën chiampid bëdiactsëc tantiatsëcquin chuitsëccosh. Padnuen Esusënquio comapenen tantiaquin chuiposh —quecuededpondash matses dadpenquio.

8

Esusën daicsaid bédamiaid

(*Mad 1.40-45; Duc 5.12-16*)

¹ Ambobi macuësh poctse tsadquin ënquin chuitanequien Esus macuësh budpondash. Adec budanec nidsho isumbien matses dadpenshun tsi-banampondash.

² Adnubien dada ushumbo yec daicsaidquio choshon Esus ismenuen danëshën sebudpondash. —Ëbi bédamete bunquin mimbi ëbi bédametsiaque. Ëbi bédame, Icbo —caquien Esus: ³ —Ai, mibi bédamete bunebi. Mibi bédanendac —quequin mishtemaidquiobi mishnubi badedquio bédampondash daicsaid nibëdquiec. ⁴ Adsho Esusën: —Utsibo chienquio yec nëish yua abided unës uaquido ismenuec nidta. Mibi isash: “Bédamiaid nec,” quequin ma aidon tantianu. Moisesën chuipampicpadomboen nanuen: “Nuquin Papan bédamioshi,” quequin Nuquin Papa menetequid buanquin ismec nidta —quequin Esusën chuipondash. Adtanec shubu dadpen icquid Capednaun caid yacno chopondash Esus.

Sondado chuiquid dapan yua Esusën bédamiaid

(*Duc 7.1-10*)

⁵ Capednaun yacno choash Esus tabadpondash. Adnubien Doma yacnoquido sondado 100ted chuiquid dapan Esus chuituidpondash. ⁶ —Tantia. Chuinu, Icbo. Con shubun icquid con yua shëquëquenquio iccosh. Nati-ambo yec unëstiadtsëcquio iccoshe. Bédameta ⁷ —quesho tantiashun: —Ai, bédamec nidnu. Nid —caquien: ⁸ —Padi. Mibi bédamboshë icquidquio nec. Ëbibi icsactsëcquid icquin mibi con shubun puduedmetiapimbo iquebique. Nëshunquiobi bédameta. Nidenquio icquin nëshunquiobi mimbi: “Bédanta,” cac con yua bédantsiashe. Mimbi tantiacpadomboen namequidquio mibi nec. ⁹ Ëbibi chuiquid dapan namiac sondado utsibo namequid nebi. Ëmbi: “Nid,” cac badedi nidec. Ëmbi: “Baded cho,” cac badedquio choec. Con yuan ëmbi: “Nata,” cac ëmbi chiacpadomboen naic. Mibi adquidquiobidi neque. Con yua bédameta —quepondash sondado chuiquid dapa.

¹⁰ Adsho tantiashun Esusën abi tsibambëquido chuipondash. —Bédamboen nëidën chuipec. “Comapenen tantiaquin chuiquinuidi con yua bédametsiasih,”

quequin ëbi bēdamboen tantiaquid nec. Isadaidbo adquid nibēdec. Isadaidbon ëbi bēdiactsēc tantiabededtsec. ¹¹ Tantia. Chuinu. Matses utsi icquimbi sondado chuiquid dapan ëbi bēdamboen tantiec. Adec nidaid utsi-utsiēc yacnocquido isadaidpembō ëbi tantiaquido yanash Nuquin Papa yacno puduednac. Ambo puduedash isadaidbo tsusedpabobēd tabadendac. Abadauan caid yec Acobo caid yec Isac caid yec quequidobēd tabadendac. ¹² Padnuen Nuquin Papan con matses caido isadaidbo dadpenquo Nuquin Papa yacno puduedenquo iquendac. Abi tantiesabo icsho Nuquin Papan cacumequin icsaido nēsecacno mibi nidmendac. Adoac mibi tēnquebudquiendac — quequin abi tsibambēquido isadaidbo chuipondash Esusēn. ¹³ Adshumbic sondado chuiquid dapa chuiquin: —Nidec nid. Mimbi tantiacpader min yua bēdaneque —cac nidshun isquien bēdanac Esusēn chuibopadequi.

Petodon nachi Esusēn bēdamiaid
(Mad 1.29-31; Duc 4.38-39)

¹⁴ Adash yuec-yuecpactsēc ictanec Esus Petodon shubun puduedpondash. Puduedshun isquien Petodon nachi chumbo yec ueten uepec. ¹⁵ Uesho istudshun mēdinquin Esusēn bēdamepondash. Aden bēdamiac Esus pemepondash.

Esusēn matses dadpen bēdamiaid
(Mad 1.32-34; Duc 4.40-41)

¹⁶ Petodon nachi bēdamiaid inchēshbudtsēqui Esus ismenuequin matses daicsaido dadpen bē-bēpondash. Bē-bēshobien podobitsi icsa dapuduedaido comapenec cuēdquin cuemeshumbic daicsaidotsen Esusēn bēdamebampondash. ¹⁷ “Nuqui icsaid ucquin nuqui daicsaidobi bēdamiac,” quequin ēndenquo Nuquin Papan Esusēn nate Isayas dada uamepampicpadomboen nanuen adopondash Esusēn.

Abēd icte bunquido Esusēn chiaid
(Duc 9.57-62)

¹⁸ Adashic abi isnuec matses dadpenquo datsidadsho isash abēd icquido chiec: —Chian potec nidnu. Nid —quianec chian yacno nidec puduampondash Esus. ¹⁹ Pduanec nidaneshobien Moisesēn dada uampid chuibanquidēn Esus chinuntuidpondash. —Con Icbo mibi caindami. Mibēd nidendabi —caquien: ²⁰ —Ēbēdta nide? Tantia. Mibi chuinu. Bēdi chēshē shēcuēn ushquid. Uicchun shubu uash abuc ushquid. Padnueni con shubu nibēdnuc Nuquin Papan matsesmiaid yec quenēnquio yec capucuenendac. Āda mibi adpatsia? —capondash Esusēn Moisesēn chiampid chuibanquid chuiquin.

²¹ Adnubien abēd capucuneboed utsin: —Chiata, Icbo. Con pa unēsoshe. Chococatambono —caquien: ²² —Padi. Cho. Ma unēsaidēn tantienquio yachimboen ëbi tantienquio icquidon ma papa chococanu. Ēbēdtan bēdamboen naic cho —capondash Esusēn amē unēsaid chuiquin. Adobidanec nidanepondash chian yacno.

Natiambo cunquenuc acte tēccuasquiaid Esusēn ēnēdmiaid
(Mad 4.35-41; Duc 8.22-25)

²³ Chian budash Esus chedo cano antabēdtopondash. Adashic potenuec puduampondash. ²⁴ Aden potenubi nēnantanquio icnuc cunquetuidpondash. Adnubien acte comapenec tēccuasquampondash. Adec acte tēccuasquenuc cano acte ancushad-ancushadquiec yampondash cano mentoadtiadtēcquio yec. Adsho isun abēd icquidon: —Dacuēdampambo iquec —quetanquin isquien Esus ushpec.

²⁵ Adshobien tinquin: —Nuqui mentoadeque. Isucun, Icbo. Baded ëbi nashun —caquien: ²⁶ —¿Atotsi quiash dacuède? Èbi bëdiactsëc tantiatsec dacuèdquidquio mibi neque. Istac —quetanec nidtoshon actebëdtabi cunquequid chuipondash. —Padi. Ènëdta —caquien natiambo cunqueboedi badedquio ènëdpondash cano mentoadtseñquionibi. Actetsen tècguasquenuio yampondash. ²⁷ Adsho isashien: —¿Mitsipadquidënquio actebëdta cunquequid ènëdmpashba? —quecuededpondash Esusbëd icquido.

Dada daëd dapuedaido podobitsi icsabo Esusën cuemiaid
(*Mad 5.1-20; Duc 8.26-39*)

²⁸ Aden chian potiash pudundonobien Cadada yacnoquid podobitsi icsa dadpen dapuedaid dada daëd choshon Esus chuituidpondash. Aid daëd unësaido chococaid shëcuëmbi tabadpondash. Matses cüesunete bunquiee dacuèdampambo icsho isash aid yacno matses nidenquio icpondash. ²⁹ Aidon podobitsi icsabon oncamiacpadomboen comapenec cuèdquin Esus chuituidpondash. —¿Nuquin Papa caidën Madombo icquin ëbi natiamequin cuidnucta cho? ¿Nuquin Papan cuidte ushë choabi icnubida ëbi cuide? —capondash dada daëdshun abi oncamequidën chiaid chuiquin.

³⁰ Uano chanco dadpenshun natiacquin udquin pebededpondash.

³¹ Adnubien podobitsi icsabon aid dada daëd oncameoac: —Èbitedi cuemiach chanco icbo-icboec dapuedetsiabi —quecuededpondash podobitsi icsabo.

³² Adsho tantiaashun Esusën: —Ai, mímibi tantiacpadec nid —cac nidash chanco icbo-icboec dapuedenubi chanco abitedi macuësh budec acte nësebudec mentoadbudnepondash nibëdquiee yec. Adec podobitsi icsabo dapuduenanec nidnubi dada daëd bëdambo yampondash.

³³ Adsho istanequien chanco pemequido aton matses chiee niqüianec shubu dadpen yacno nidanepondash. Chanco mentoadbudneboëbëdta podobitsi icsabo dapuduemeboed uesquin chuituidpac caondash. —Nuqui dacuèdëmboedobi bëdambo yanosh —quequin ³⁴ chuituidaquien anocquido abitedi Esus isec cho-chopondash. Adec cho-choshombien: —Dacuèdampambo mibi iqueque. Èbi yacno choenda. Nidec nid —cabededpondash. Adoac Esus nidpondash.

9

Shëquëquenquio icquid Esusën bëdamiaid
(*Mad 2.1-12; Duc 5.17-26*)

¹ —Nid —cac nidanec chian budash cano antabëdtoshon chian potiash abi iccondacnobidi Esus choapondash. ² Adnubien utsibon dada shëquëquenquio icquid Esus ismenuen aton uetechobi bëpondash. Bësho isumbien Esusën: —Èbi caic: “Aidën bëdametsiash,” gueshun bëac —quequin daicsaid chuipondash naden. —Dacuèdenda, madosio. Ambi chiaid niac-niaquec icsaboedi coidmenquio icquin Nuquin Papa mibi bëdamboen ismembique —capondash Esusën.

³ Adsho tantiaish aid datsidadash tabadquido Moisesën dada uampid chuibanquido: —¿Adpecta matses icquid? “Nuquin Papapadquidquibini nec,” quepequien iquec. Icsamboen chiee —quecuededpac caondash Esus caic.

⁴ Uanuësh adsho ambembi tantiaashumbien Esusën aido chuipondash. —¿Atotsi quequin mímibi ëbi chieshëmpe? ⁵ Ambi namiaid icquin èmbi: “Nuquin Papa cuidmenquio icquin mibi bëdamboen ismembique” cac Nuquin Papan nëid cuidenquio iquendac. Adembidi ambi namiaid icquin èmbi: “Caputa,” cac nëid capuendac. ⁶ Istac. Mibi ismembique. “Nuquin Papan

chomiaid nec. Icsaidobi Nuquin Papa bēdamboen ismequid nec,' mabi canu," qeshun naimbique. Istac —quetanquin dada shēquēquenquo icquid chuiquin: —Caputa —capondash Esusēn. ⁷ Adoac bēdanash aton shubuno nidpondash. ⁸ Adsho isashien: —Adquidshenda nepec. Nuquin Papan namiaid icquimbien adochitec. Abi namequid Nuquin Papa bēdambo iquec —quecuedpondash isquido.

Ēbēd iquec cho, quequin Esusēn Mateyo chiaid
(Mad 2.13-17; Duc 5.27-32)

⁹ Adnubini con matses aton piucquid bedshunuec podqued cuēman tsadquid shubumpin tsadpondac. Con matses yuaquid ancaquid dapan: —Min matsesēn na ěmbi chiactedi piucquid bedshun ěbi meneta —cac niōndabi. Ambo tsadshobini Esusēn istuidpondash. Istuidshumbini Esusēn: —Nuquibi icnu. Cho —capondash. Adoac badei tsibananec ¹⁰ nidequi con shubun Esusbēd puduedpondabi.

Adec puduedsho isashien matses dadpen pudued-puduedpondash. Esusbēd pec tabadnuec ěbēd tan piucquid bedshunquidobēdi con matsesēn: "Icsaido nec," caidombo pudued-puduedpondash. ¹¹ Adsho isumbien Esus chieshēnquido Padiseyobo caidon Esusbēd icquido chuituidpondash. —¿Atotsi quiash mibi chuiquid Esus caid icsaquidobēdi pec tabadpec? Icsambo iquec —capondash Esus chieshēnquidon.

¹² Adsho tantias Esus nadpondash. —¿Bēdambo icquidta dauēchoquidēn dauē menepadic? Padenquo. Ma daicsaidi dauēchoquidēn menepaid yoc. Adembidi icsaidobi abi icsaid uacquin bēdambo icmenuec nebi. ¹³ Nuquin Papan naden dada uamiampid pausudshun bēdamboen naic nid. "Ěmbi chiacpadomboen abentse-abentsen mimbi naic. Adoquimbi ěmbi chiaid utsi niaquec mimbi icsaido caido mimbi bēdamboen istiapimbo iquec. Adsho isun: 'Mibi bēdambo iquec,' catiapimbo iquebi" quequin Nuquin Papan dada uamiampid pausudta. Ěbibi matses bēdamboen ismequid nebi. Muaquido: "Bēdambo icquid nebi," qesho bēdambo icmetiapimbo iquebi. Icsaquidobi: "Nuquin Papan chiaid niac-niaquec icsapobi," qesho: "Icsainquo yec ěnēdta," canuec nebi —quepondash Esus abi chieshēnquido chieci.

Esusēn buna mēmunquido chiaid
(Mad 2.18-22; Duc 5.33-39)

¹⁴ Adnubien Uan acten mentoanquidbēd icquidon choshon Esus chuituidpondash. —Nuquin tsusedpabon nacpadomboen Nuquin Papauidi tantianuen buna mēmunquidquo nebi. Padiseyobo adembidi naquidquo nec. ¿Atotsieshun mibēd icquidon aden nainquo icpec? ¿Natiapimboda iquec? —caquien ¹⁵ Esus nadpondash. —¿Icbon: "Pec cho," cacta aid tantiec sedenquecuededquin buna mēmumpadic? Padenquo. Adquidbēd tan pec cuishonquec tabadquid. Icho nibēdanan sedenquecuededquin buna mēmunquid. Ěbi nibēdanan ěbēd icquidon ěbiuidi tantianuen buna mēmunenac —quepondash Esus.

¹⁶ Adshumbic Esusēn naden chuipondash. —Dashcute chuca cuēshun dashcute shēni nedesquaidbēdta tuscaisa. Aden tuscashun panac shēni badedquid nedesquequid. ¹⁷ —¿"Machi sandono," qeshun tsitsan shēnimbida sandopadic? Padenquo. "Machi sebudnushe," qeshun tsitsan shēnin sandoenquo icquid. Tsitsan chuca daēdcashumbien machi sandoquid —quepondash Esus. —Adembidi tsusedpabon: "Naden nata," quequin chiaid chienquo icquin ambi bēdamboen iste chuiquin Nuquin Papan chiaid utsi chieci nebi —quequin tantiec adpondash Esus Uan acten mentoanquidbēd icquido chieci.

Champi uincuemaiadbēda chido bēdamiaid

(Mad 5.21-43; Duc 8.40-56)

¹⁸ Aden chuishobien Nuquin Papan chiaid chuibante shubun tabadsho isquid dapan chuituidpondash. —Con champi unēstiadsēcquo iccoshe. Mīshēc cho. Mīmibi mishac bēdantsiashe —capondash. —Mibi con Ico canu —quequin danēshēn sebudquin ismepondash. ¹⁹ Adoquien Esus aibdēdi nidpondash.

²⁰⁻²¹ Nidnubien chido intac budted-budtedec seta 12tedi matamec bēdanenquo yec nacchoadbudquidēn Esusēn cachochsēqui choquin: —Bēdamianquidēn dashcute mishec bēdampatsiash icmanendac —qeshun ismenquo icquin dashcute cuēmano mishtsac caondash. ²² Adoquien bidiadquin isun Esusēn chuipondash. —Dacuēdēnda. Mibi: “Aidēn nac bēdantsiabi,” quiacpadec mibi bēdanendac —Esus quenubi bēdampondash.

²³ Aid bēdamebidanec nidequi chuibante shubun tabadsho isquidēn shubun puduedshun isquien matses dadpen tabadec. Champi unēsacsho isash sedenquecuededec tabadec. Nēidic matses unēsān con matsesēn nacpadomboen shoncate shoncaquido. Nēidic comapenec sedenquecuededquido dadpen. Aidedi icpondash. ²⁴ Adshobien Esusēn abitedi chuiquin: —Baded umanuc niecun. Champi unēsabi iqueque —capondash. Adoac: —“Champi unēsabi iquec,” quepequien iquec —qeshun Esus mamēnshumbededpondash.

²⁵ Niecunan Esusēn champi uiacno quēnēn puduedtanquin mēdinac champi uincuenash bēdambo yec capupondash. ²⁶ Adsho isun champi unēsaid uincuemaiad chuibenepac caondash shubu utsin-utsinquien. Anocquido Capednaun caid yacno pauequidotedishun tantianuc chuibeniac caondash.

Bēshuaid daēd Esusēn bēdamiaid

(Duc 18.35-43)

²⁷ Auēshquo puduanec nidshobien bēshuaid daēdshun chinunshun comapenec cuēdquin Esus chuituidpondash. —Dabidēn tsyuecquid Nuquin Papan chomiaid icquin bēdamboen isquien ēbi bēdame —quebudquebudpondash. ²⁸ Shubu utsin puduedash abēdi tabadshobien Esusēn: —“Ēbi bēdametsiash,” ¿caindabi ique? —caquien: —Ai, adebi —quepondash.

²⁹ Adshobien aid daēdi bēmishquin: —Mīmibi tantiacpadec bēdanta —cac ³⁰ bēdampondash. Adsho isun Esusēn: —“Bēdamioshi,” quequin utsibo chienda —capondash. ³¹ Adoboqui anocquidotedi chuiben-chuibempac caondash.

Esusēn onquesa bēdamiaid

³² Bēshuaid bēdamiaid puduenubien podobitsi icsa dapuduedaid onquesa dada Esus ismenuen bēpondash. ³³ Bēacsho isun Esusēn podobitsi icsa dapuduemiac bēdanash onquiampondash. Aden bēdamesho isash: —Nuquin nidaid Isadaid caidēnshun adoēn ictenec —quecuededpondash isquido.

³⁴ Adnubien Esus chieshēnquido Padiseyobo: —Podobitsi icsan icbon namiad icquin podobitsi icsa cuemequidien nechitec —quecuededpondash Esus caic.

Esusēn matses tantiaquiaid

³⁵ Aden onquesa bēdamianec nidash capucuen-capucuenquin shubu dadpen icquid yacno Nuquin Papan chiaid chuibante shubun puduedshun Nuquin Papan matses icsaidō bēdamboen iste chuipondash. Adshumbic anocquido daicsaidotedi bēdamebampondash. Adenuidi shubu dadpen yacno-yacnoamboen chuibanquimbi matses bēdamebampondash. ³⁶ Abi tantienquo icquido dadpen cho-chosho isash unēsquo icnuc shubiantiadquo icpondash Esus. —Abi isquid nibēdnuc bacuēbo icsamboec tabadacimboec icsambo iquec. Nuquin Papa bēdamboen ismete chiabi yac tantienquo yec natia

chieshëmë nec bédamboec tabadtiapimbo iquec —quiash shubiantiadquo icpondash Esus.

³⁷ Adshumbic abéd icquido chuipondash. —Pete dadpen nitsinaid caniacsho bedtanenquio icnuc sinash chodquebudnequid. Adecbidi Nuquin Papan chiaid chuibanquid nibédnuc matses icsamboec tabadec. Aden chuibanquid nuquipadquid daédpactsëcquio iqueque. ³⁸ Nuquin Papa chianeta. “Matses dadpenhunquio mimbi bédamboen iste tantiabi iqueque. Mimbi chiaid chuibanquid dadpen icmeta, Papa,” quequin Nuquin Papa chianeta —quequin chuipondash Esusën abéd icquido chuiquin.

10

Esusbéd icquido 12tedi chiaid (Mad 3.13-19; Duc 6.12-16)

¹ Adshumbic Esusën abéd icquido 12tedi chuipondash. —Ëmbi naid chuibeneta. Ëmbi namiaid icquin ëmbi nabocpadomboen podobitsi icsa matses dapuedaid mimbi cuemendac. Ademebidi daicsaido abitedi mimbi bédamendac —quequin chuipondashi nëidtedi. ² Nëidic Petedo caidbidi Simon cuëmédquid. Nëidic abédta tishaid Andedes cuëmédquid. Nëidic Sebedeyon mado abi daëdi. Abentsëc Acobo icnuc utsi Uan icpondash. ³ Nëidic Uedipe. Nëidic Badtodome cuëmédquid. Nëidic Tomas. Nëidic ëbibi Mateyo con matses piucquid bedshundenedi. Nëidic Acobo cuëmédquid utsi Adpeon mado. Nëidic Debeyo caidbidi Tadeyo cuëmédquid. ⁴ Nëidic Simon cuëmédquid utsi con matses yuaquido cuemete bunquid. Nëidic Iscadiote caidbidi Udas cuëmédquid abi chieshënquido Esus bedmequid. Aidtedi abéd icquido icsho chuipondashi.

Abéd icquido: Chuibeneta, caid (Mad 6.7-13; Duc 9.1-6)

⁵ Adshumbic: —Ëmbi chiacpadomboen chuibenenuec nidshun isadaid-pembo chienda. Aido yacno nidenda. Nidaid cuëshë Samadia caid yacnocquidon shubu datambidanta. ⁶ Nuquin matses isadaidbouidi chuibeneta. Bënudshun podqued tantienquio yacimboen nuquin matsesën Nuquin Papanbo tantienquio iqueque. ⁷ “Mibi icsaid ënash bédamboec tabadta. Nëbi abéd tabadtequido icmequin Nuquin Papan matses bédamboen tabadmendac,” quequin chuibeneta. ⁸ Ademebidi daicsaido bédamequinc unésaido uincuemequinc dada ushumbo yec daicsaido bédamequinc podobitsi icsa dapuedaido cuemeshunquinc cabeneta. Adoshon: “Piucquid beccho,” cainda. Ëmbi nabocpadomboembidi mibi namembique. “Piucquid beccho,” quequin nainquio iccombique. Ademebidi nashumbanta. ⁹ Aden chuibenec nidquin min piucquid buanenda. ¹⁰ Ademebidi pete sandaoid buanenda. Dashcute utsibédta tapucudte utsi sandoshon buanenda. Mibi tidinquete cuate abentsëqui buanta. Adec mēdadauidquio chosho isun mimbi bédamiaidon: “Mibi bédambo iquec. Èbi yacno ushec cho,” mibi cac bédambo ictsiash. Ademebidi: “Mitsana nibédsho isun mibi menenu,” mibi cac bédambo ictsiash.

¹¹ Aden chuibenec shubu dadpen icquid yacno nidshun bédambo icquid istuidta. Istuidshun: “Min shubu yacno ushec nidnu,” mimbi cac: “Ai,” qesho tantiash aidën shubun ushta. Auëshquio nidabi yec aidën shubunuidi ushta. ¹² Aidën shubun puduedshun: “Mibi isnuec chopobi,” cata. Adoshombic: “Nëid shubun icquido Nuquin Papan bédambo icmepashun,” quequin aido bédamboen ista. ¹³ Adoac anocquidon mibi bédamboen iso: “Nuquin Papan bédambo icmepashun,” mimbi canubi Nuquin Papan aido bédambo

icmendac. Anocquidon mibi chieshënsho Nuquin Papan aido bédamboen istiapimbo iquec. ¹⁴ Shubu dadpen icquid utsi yacno mibi nidacsho anocquidon cuemiác naden ismeta. Auëshquío puduanec nidnun: “Nuquin Papa tantiesabo yec Nuquin Papan cuidtequidombo mibi nec. Icsaidombo mibi nec,” quequin ismec nidaid putu tasequeta. ¹⁵ Mimi adosho isun matses cuidte ushëmbi Nuquin Papan aido comapenen cuidendac. Èndenquimbo shubu dadpen yacnocquidotedi cuidquin Nuquin Papan uesquin unës ua-pampic. Aid shubu dadpen icquid abentsëc Sodoma canubi shubu dadpen icquid utsi Comoda capampic. Aid daëd yacnocquido bēdiactsëc cuidshun mimi chiaid tantienquío icquido comapenen cuidendac –quepondash Esus abëd icquido chiec.

Esus tantiaquido chieshënte chiaid

¹⁶ Adashic padpiden chuioaic: –Èmbi naid chuibenequido icsho utsin-utsinquien mibi chieshënendac. Bēdi nēish yua acte bunacximboec chieshëmēnquido mibi cuate bunendac. Aidobëd chieshënanenda. “¿Mitsipadomboen chiac Nuquin Papan chiaid tantiabempatsiash?” qeshun bédamboen tantiaquin bédamboen chuita. ¹⁷ Mibi chieshënquin cuesnetiadquío iquendac. Mibi bedshun: “Cuesmenu,” qeshun abi chuiquido mibi cuidmenuen Nuquin Papan chiaid chuibante shubuno mibi buanendac. Ashunquío mibi cueshcaten cueshcaindac. ¹⁸ Utsibombic adembidi cuesmenuen chuiquid dapa cobenadod yacno mibi buanendac. Adembidi chuiquid dapa utsi yacnotsen mibi buanendac. “Ma ëbi chuiquidon chuiquid dapabëdta isadaidpembo ëmbi naid chuibanu,” ëbi quenuc mibi aden buanendac. ¹⁹ Adoac dacuëdenda. “Chuiquid dapa yacnoshon ¿atotsimbi chuipatsiaba? ¿Adambi bédamboen chuipatsiaba?” quec dacuëdenda. Chuiquid dapa mimi bēisnubi Nuquin Papan ambi tantiacpadomboen mibi oncamendac. ²⁰ Aden aton Mayanën ambi tantiacpadomboen mibi oncamendac –quepondash Esus.

²¹ Adashic padpidec onquec: –Èbi chieshënquidon ëbi tantiaquidotsen comapenen chieshënendac. “Esus tantiaquid nec,” qeshun aton buchimbi aton utsi cuesunemendac. Amëmbi ambi tishmiaid cuesunemendac. Aton bacuëbombi chieshtoshon anibëdta amë cuesunemendac. ²² “Esus tantiaquid nec,” qeshun matses dadpeshun aden chieshënaqui chieshtoenquío icquin ëbi tantiasho Nuquin Papan abi yacno mibi puduedmendac. ²³ Shubu dadpen yacno nidacsho chieshënac shubu dadpen icquid utsi yacno cuenta. Anoshontsen ëmbi naid chuisho chieshënoac shubu dadpen icquid utsi yacnotsen cuenoata. Adecuidi cuendeneta. Nēid nidaid Isadaid caidën shubu dadpen icquid abitedi yacno nidabi icnubi choaindabi. Nuquin matses isadaidbo abitedi chiabi icnubi Nuquin Papa yacnuësh choaindabi.

²⁴ Mibi tantiamequid nebi. Èmbi tantiamiaido icsho ëbi icbocpadom-boembidi mibi chieshënendac. Abi chuiquid dapa chieshënacpadembidi ambi namiaidotsen chieshënquid. Icbo chieshënquimbi yuabotsen chieshënquid. ²⁵ Adembidi ëmbi chiacpadomboen natiadquío icsho mibitsen chieshënendac. Nuquin Papa yacno puduedmianquid icsho: “Ma podobitsi icsan icbo Betsibu caid neyoc,” ¿cainquiodabi ictiosh? Adembidi mibi Nuquin Papa yacno puduedtequido icsho mibitsen chieshënendac –quequin chuipondash Esusën abëd icquido chuiquin.

Dacuëdenquío icquin chui, quequin chiaid

(Duc 12.2-7)

²⁶ Adshumbic padpiden chuiquin: –Mibi chieshënquido dacuëdënenda. Aidon ompodshon icsamboen naid Nuquin Papan utsibo ismendac.

Adembidi aidon shoshquetsëcquin chiaid Nuquin Papan utsibo tantiamendac. Adembidi mimbì bédamboen naidtedi Nuquin Papan utsibo tantiamendac. ²⁷ Nèbi èmbi mibitedictsèqui chuiboed dacuèdenquo icquin utsibo chuibeneta. ²⁸ Chuibenesho min dadauidsèqui cuesunetequid dacuèdenenda. Min tantiate unètiapimbo icquid icsho nibèdametiapimbo iquec. Min dada unèsan min tantiate abi icsho cuidnuequin chian anèdènquequid nèsecanquid tantiaata. Adquid Nuquin Papa icsho dacuèdènta.

²⁹ Utsibon chieshènaqui dacuèdenda. Nuquin Papan mibi tantieque. ¿Padichucu cuesaid isashta unèsqüo icti? Padenquo. Padnuen ambi tantiapadomboembi padichucu dadpen icquid abentsèc cuesac paèdsho Nuquin Papan tantiec. ³⁰ Adembidi min manèdaid Nuquin Papan tambanaidquo nec. Aden min manèdaid abentsèc paèdsho aidèn tantiec. ³¹ Aden min manèdaid tambanquid icquin padichucu bèdiactsèc tantiatseçquin mibien compapen tantieque. Mibi chieshènquido dacuèdènenda –quequin chuipondashi Esusèn.

*Esus con Icho nec, quequido chiaid
(Duc 12.8-9)*

³² Adshumbic padpiden chuiquin: –Utsibo chuiquin: “Con Icho Esus nec. Nuquin Papa yacno èbi puduedmequid nec,” quequin chianequid Nuquin Papa yacno chosho isun: “Nèid èbi tantiaquid neque. Puduedmeta, Papa,” quequin Nuquin Papambo chiendambi. ³³ Padnuen utsibo chieshec: “Con icho Esus catiapimbo iquebi. Tantiatiapimbo iquebi,” quequid bédamboen istiapimbo iquebi. “Nuquin Papa yacno puduednu,” qesho: “Padi. Èbi tantiaquidpenguio neque. Puduedmenda,” quequin Nuquin Papa chiendambi –quequin Esusèn chuipondashi.

*Esus tantiaquidobèdi cuèshèdte chiaid
(Duc 12.51-53; 14.26-27)*

³⁴ Adshumbic padpiden chuiquin: –Èmbi chuiboed tantiashun: “Nuquin Papa yacnuèsh choquid icquin abitedimbo bédamboen tabadmetsiash,” ¿caquindabi ique? Padenquo ictsiambi. Èbi tantiaquidobèd èbi tantiesabo cuèshèdenquo icte danenda. Èbi tantiaquidobèdi èbi tantiesabo cuèshèdendac. ³⁵ Amèbèd aton mado cuèshèdendac. Adecbidi anibèd aton champi cuèshèdendac. Adecbidi aton chayabèd aton babanèn cuèshèdendac. ³⁶ Aden aton shubun icquidombi èbi tantiaquid chieshèndac.

³⁷ Padnubic aton matesuidi tantiaquidèn èbi bèdiactsèc tantiatseçtsiash. Aton tita tantiaquinc aton papa tantiaquinc cain aidèn chiapadomboenuidsèqui naquidèn èbi bèdiactsèc tantiatseçquin èmbi chiapadomboen natiapimbo ictsiash. Adembidi aton mado tantiaquinc aton champi tantiaquinc cain aid bédambo icmeteuidsèqui bunquin èbi bèdiactsèc tantiatseçquin èmbi chiapadomboen natiapimbo ictsiash. Adquido bédamboen istiapimbo iquebi. Èbi tantiesabo nec. ³⁸ Utsibon chieshènac èbi tantiatseçboedi badedi chieshtoshon èmbi chiapadomboen natiapimbo yantsiash. Adquidotsen èbi tantiaquidpenguio iquendac. ³⁹ Matses ambi naiduidi naquid Nuquin Papa yacno puduedtiapimbo iquendac. Padnuen èbi tantiaquinc èmbi chiapadomboen naquid Nuquin Papa yacno puduedendac. Adquid chieshènaqui chieshtoenquo ictsiash –quequin Esusèn chuipondashi.

*Nuquin Papan bédambo icmete chiaid
(Mad 9.41)*

40 Adshumbic Esusën ëbi chedo padpiden chuipondash. —Mibi chieshënquido icnubi mibi bédamboen isquid iquendac. Ëmbi naid mimbi chuisho tantiash: “Ai, abimbo caic,” qeshun ëbi tantiabenquin ëbi chomequidtsen tantiabenendac. 41 “Naden naindami,” quequin ambi chiaid chuibenequid Nuquin Papan bédamboen isaido nec. Adquid shubu utsi yacno nidacsho isash: “Nuquin Papan chiaid chuibenequid choeque. Bédamboen chuisho tantianu,” quequid icsho Nuquin Papan bédamboen isendac. Adembidi abi tantiec ambi chiapadec bédamboec tabadquid Nuquin Papan bédamboen isaidobidi nec. Adquid shubu utsi yacno nidacsho isun: “Nuquin Papan chiapadec tabadquid nec,” qeshun bédamboen isquidotsen Nuquin Papan bédamboen isendac. 42 Adembidi ëbi tantiaquid yec acte bundoacsho acte menequid Nuquin Papan cuidnanquin bédambo icmendac. Adembidi utsibon Esus tantiaquido bédamboen nashunsho Nuquin Papan bédambo icmendac —quequin Esusën chuipondashi. Adshun: —Chuibenetan —cac nidshumbimbi chuibenepondac.

11

Uan acten mentoanquidën chuimiai (Duc 7.18-23)

1 Esusën: —Chuibenetan —cac abéd icquido nidanenubi auëshquiobi puduanec nidquin shubu dadpen icquid shubu dadpen icquidquien Esusën Nuquin Papan chiaid chuibeniac caondash. Aid nidaid cuëshë Cadidia caidën capucuenequin adoac caondash. Adnubini yuec-yuecpambo ictanec Esusbéd icoaic cho-chopondac.

2 Adnubien Uanën Esus acten mentondaidëmbi quënën nauedaid icquin Esusën naid tantiapac caondash. Adshumbic abéd icquido chuiquin: —¿Nuquin Papan chomiaid nuqui cainaidta nepec? Esus chuitan —cac choshon Uambéd icquidon Esus chuítuidpondash. 3 —Uanën: “Chuitan,” cac chobi. ¿Ëmbi cainaid Nuquin Papan chomiaidquida mibi nepe? Mibi adquidpenquo icnuc ¿ada utsi chopatsiash? —caquien 4 Esusën: —Ëmbi nadatiampo icquin nabamboedbédta ëmbi chuiboed Uan chiec nid. 5 “Bëshuachoedën isbenosh. Canite icsaidi capucuenosh. Daushumbo icquid nami mishadenquo icquid bédanosh. Pashuachoedën tantiabenosh. Adoshombic unèsaidi uincuemiosh. Adoshombic Nuquin Papa tantienquo icquido Nuquin Papan bédamboen iste chuiposh,” quequin Uan chiec nid. Aden chiac Uanën: “Nuquin tsusedpan chiampicpadquid Nuquin Papan chomiaidquo nec,” quequin ëbi tantiendac. 6 Adshumbic nadentsen chuita. “Muambo nec, ëbi cainquo icquin: Ambi chiapadquid Nuquin Papan chomiaidien nec, quequin ëbi tantiaquid Nuquin Papan bédambo icmendac, quiosh,” quequin chiec nid —cac nidanepondash Uambéd icquido.

Uan acten mentoanquid chiaid (Duc 7.24-35)

7 Aido nidanebon Esusën Uan acten mentoanquid chuiquin abi datsidadquido naden chuipondash. —Matses nibédacno ¿atotsi quenuc nidonda? ¿Cunquidquidën ishacunaid isnuecta nidtionda? Padenquo. 8 ¿Dashcute bédaidquido dasiuidaid isnuecta nidtionda? Padenquo. Icsactsëcquid Uan dasiuidpondash. Dashcute bédamboshë icquid dasiuidquido ancanquidën shubu dapan tabadquido nec. 9 Ad icnuc ¿atotsi quenuc nidonda? “Naden naindami,” quequin Nuquin Papan chiaid chuibenequid chuisho tantianuec ma mibi nidondac. Adec Nuquin Papan oncamiaidquo Uan nec. 10 Uanën abia choshon chuite chuiquin Nuquin Papan naden dada uamepampic.

“Mibi chote chuiquidba chomembi, Mado.

Aid: ‘Bédambo icquid choeque. Icsainquoio yec ënëdta,’ quequin mibi chote chiendac, Mado,”

quequin Nuquin Papan ambi chiaid dada uamepampic. ¹¹ “Nuquin Papan chomiaidquoio choec,” quequin chuiquid Uanpadquid utsi nibëdec. Adquid yequi: “Abi choec,” quequin ambi chuiboedën ëmbi nabansho isabi yequi bédapabi Uan icctsec. Padnuen ëmbi Nuquin Papan chiacpadomboen nabansho isash ëbi tantiaquido bédamboshë iquendac. ¹² Uanën chuisho Nuquin Papa tantiabenacpadomboen ëmbitsen Nuquin Papan bédamboen iste chuisho tantiashun adembidi abi icsaid ënshun icsaboedon dadpenshun Nuquin Papa tantiendac. ¹³ Nëbi Uanën: “Nuquin Papan abi yacnoshon bédambo icquid chomendac,” quequin chuipondash. ¿Ambiada adopondash? Padenquoio. Ëndenquimboshë tauamboen nuquin tsusedpa Moisesën chuibepampic. Adshumbic utsintsen. Adshumbic utsintsen. Aden Nuquin Papan ambi bédambo icquid chomete chuiquin dada uamianepampic. ¹⁴ Adembidi Uan chote chuiquin dada uamepampic. “Nuquin Papan ambi tantiacpadomboen oncamiaidquoio Edias cuëmëdquid choendac,” quequin Ediasbimboecquid Uan chote chuipampic. Bédamboen tantiaquin: “Nuquin tsusedpa Ediasbimboecquid Uan nec,” mimi catsiac. ¹⁵ Bédamboen tantiaquidën adembidi tantiatsiash –quepondash Esus abi datsidadquido chieci.

¹⁶ Aden chuisho tantiash chieshtoshobien Esusën chuipondash naden. – Nuquin Papan chiaid tantienquoio icquido yec nëmbo icquido ¿midapadquidoen nec? Bacuëbo nëishnanacbitsëcquieci mibi iquec. Bacuëbo: “Ëmbi chiacpadomboen nanuna,” queuidash ambi chiacpadomboen aton utsibon nainquoio icsho isash nëishash chushcananquid. ¹⁷ “ ‘Cuëdënuna,’ queuidbosh ëbi cuëdënubi ma mibi cuëdënenquoio icboc. ‘Sedenquenuna,’ queuidbosh ëbi sedenquenubi ma mibi sedenquenquoio icboc,” quetsash bacuëbo nëishnanacbitsëcquieci ma mibi iqueyoc. Adec nëishëmëndquido yec icsambo ma mibi iqueyoc. ¹⁸ Uan pete utsi-utsien pesa iccosh. Adecbidi acte paëmbo icquid aquesambo niosh. Adquid icsho isash nëishash: “Ëmbi nacpadomboen naisa nec. Podobitsi icsa dapuduedashien nechitec,” mibi quepondac. ¹⁹ Ëbien nuquin matsesën piacbimboen pequid nec. Adembidi actequid acquid nebi. Adsho isash nëishun ëbitsen icsamboen chuishunquin: “Petuiddi tantiaquin nua pequid nec. Tantiadenuen acte paëmbo icquid acquid nec. Adecbidi nuquin matses piucquid bedshunquidobëd onquec icsambo icquid caidobëd onquec quequid ma aidobëdi icsambo icquid nepayoc,” mimi ëbi capec. Padnuen bédamboen tantiaquidën Nuquin Papan chiacpadomboen nasho isun Uambëdta ëbi: “Bédambo iquec,” caindac –quepondash Esus abi chieshënquido chieci.

Shubu dadpen icquidën tabadquido cuidte chiaid
(Duc 10.13-15)

²⁰ Adshumbic Esusën padpiden chuipondash. –Nëbi shubu dadpen icquid shubu dadpen icquidquien comapenen tantiaquid icquin dadpen nabanquin ismebeniombi. Aden ismiac: “Icsaboedi bédamboec tabadtiaadquoio iquebi,” quetiadquidi chieshec adenquoio iquec –queshun Esusën naden chushcapondash. ²¹ –Shubu dadpen icquid Codasin caid yacnocquidobëdi shubu dadpen icquid utsi Betsaida caid yacnocquido Nuquin Papan cuidtequido nec. Ëmbi aido ismebocpadomboen ismiac isadaidpëmbo cuidadenquoio icctsempampic. Aden ismiacqui: “Ai, icsapobi,” quish shubibudequi icsainquoio yec ënëdtsempampic. Shubu dadpen icquid Tido caid yacnocquidobëdi shubu dadpen icquid utsi Sidon caid yacnocquido adtsempampic. ²² Nuquin Papan matses abitedi cuidte ushën: “Nadatiambo

icquin nabanquin ismiacmaido nec,” qeshun Tido caid yacnocquido Sidon caid yacnocquidobēda bēdiactsēc cuidendac. Adoshombic: “Comapenen tantiaquin ismiaqui tantienquo icquido nec,” qeshun Codasin caid yacnocquidobēda Betsaida caid yacnocquido comapenec sidquenuc cuidendac. ²³ Adembidi nēmo icquido Capednaun caid yacnocquido mibitsen Nuquin Papan cuidendac. “Nuquin Papa yacno tabadtequido nuquitedi nec,” ¿quecta ique? Adquidpenquo yec Nuquin Papa chieshēnquido cuidacno nidmetequido ma mibi nepayoc. Ēndenquimboshē yampido shubu dadpen icquid Sodoma caid yacnocquido cuidquin Nuquin Papan nibēdamepampic. Ēmbi mibi ismebocpadomboen ismiac aidon abi icsaid ėntsempampic. Abi icsaid ėnsho Nuquin Papan cuidenquo ictsempampic. Cuidenquo yac nēbi aton matses abi ictsiash. ²⁴ Nuquin Papan matses abitedi cuidte ushēn: “Comapenen tantiaquin ismiacmaido nec,” qeshun Sodoma caid yacnocquido bēdiactsēc cuidendac. Nuquin Papan chomiaid icquin ėmbi ismeboedo Capednaun caid yacnocquidoen comapenec sidquenuc cuidendac — quequin abi tantiesabo Ēsusēn chushcapondash.

Ēsusēn dayacquibimboecnuc icmete chiaid
(Duc 10.21-22)

²⁵ Adshumbic Ēsusēn Nuquin Papa chuipondash. —Mibi bēdamboshē iquec, Papa. Mibi yacnocquidotedishun Icbombo yec nidaidēn tabadquidotedishun Icbobīdi mibi nec. Mimbi tantiabi: “Dadpen tantiaquid nebi,” quequidombi ėbi tantiabi iquec. Mimbi tantiamic nēidon ėbi tantiec. Aden mimbi bēdamboen naic. ²⁶ Mimbi tantiacpadomboen mimbi bēdamboen naic. Mibi bēdamboshē iquec, Papa —quequin Ēsusēn Nuquin Papa chuipondash.

²⁷ Adshumbic abi datsidadquido chuipondash. —Nuquin Papan ambi tantiaidtedi ėbi chuimec. Ēmbi naboebēda ėmbi nate abitedi con Pan ambentsēqui tantiec utsibon tantienquo icnuc. Adembidi Nuquin Papan natebēda ambi naboed abitedi ėmbentsēqui tantiembi. Aden Nuquin Papa tantiaquin: “Nēidtedi matses bēdamboen tantiamembi,” qeshun: “Nuquin Papa nadquo iquec,” quequin tantiamembi. ²⁸ Ēbi tantiata. Dayacquio yacimboecnuc mibi bēdambo icmembique. “¿Mitsipadequibi Nuquin Papa yacno puduedpe?” quec ¿uimambo yacimboecta mibi icpe? Adquidēn ėbi tantiaho Nuquin Papa yacno puduedtequid mibi icmembique. Ēbi tantiata. ²⁹ Con Icho ėbi cata. Con yuambo icquin ėmbi chiacpadomboen nasho mibi bēdamboen isquin dayacquio yacimboecnuc mibi bēdambo icmembique. Ancanesambo yec bēdambo icquidini neque. Con Icho ėbi cata. Adsho mibi bēdambo icmembique. ³⁰ Mibi ancainquio icquin dayacquio yacimboecnuc bēdamboen mibi tabadmembique. Con Icho ėbi cata —quequin chuipondash Ēsusēn.

12

Ēsubēd icquidon petsēcsho istuidshun chushcaid
(Mad 2.23-28; Duc 6.1-5)

¹ Adshumbic chonoadtemaid ushēn Ēsubēd capucuenequin tied matanquin bundotsēcshun tiedēn caniquid ėshchicshun petempi petsēccondambi.

² Pesho istuidshumbini con tsusedpabon chiampid namequido padiseyobon: —Is. Mibēd icquido chonoadtemaid ushēmbi chonoadeque — capondash Ēsus chuiquin.

³ Adoquien Ēsus: —Ma icsapenquo icpayoc. ¿Nuquin tsusedpa Dabidēn bundoshon ambi petemaidquio pepampid chuiquin dada uapampid isamboda ictio? ⁴ Aidēn Nuquin Papa tabadte shubu uashunaid abi

puuedtemaidën puuedshun ambi petemaid pan sanaid istuidpampic. Aid panëmpi nëish yua abided unës uaquidon petequid nepampic. Aid panëmpi bedshun abëd icquidobëdtan Dabidën pepampic. Aden nuqui bëdambo icquid caidën ambi natemaidi napampic. ⁵ Adembidi chonoattemaid ushën natemaid chiaid niacquimbi nëish yua abided unës uaquidon aid ushëmbi Nuquin Papa tabadte shubu uashunaidën puuedshun nacnendenepec. Nuquin Papan chiapadomboen naiqui icsainquio icpec. ⁶ Nuquin Papa tabadte shubu uashunaid tantiaquin adopec. Aid shubu bëdapabi icnuc bëdamboshë icquid nebi. ⁷ Nuquin Papan naden chiaid mimbi bëdamboen tantienquio iquec.

“Ëmbi chiapadomboen abentse-abentsen mimbi naic.

Adoquimbi ëmbi chiaid utsi niaquec mimbi icsaido caido mimbi bëdamboen istiapimbo iquec.

Adsho isun: ‘Mibi bëdambo iquec,’ catiapimbo iquebi.”

quequin Nuquin Papan chiaid bëdamboen tantiaashun ëbëd icquidon bëdamboen nasho mimbi chushcainquio ictsenoc. ⁸ Tantia. Nuquin Papan chomiaid icquin chonoattemaid ushë ëmbibi chiampid icnuc ëmbi tantiapadomboen aid ushëmbi ëbi tantiaquido namembique —quepondash Esus ëmbi petsëcscho istuidquido chiec.

Mëicsatsaid bëdamiaid

(Mad 3.1-6; Duc 6.6-11)

⁹ Adanec nidec Nuquin Papan chiaid chuibante shubun puuedshun ¹⁰ isaquien mëicsatsaid icpondash. Adnubien padiseyobon: — Chonoattemaid ushëmbi bëdamequid Nuquin Papan chiaid niacquidien nechitec. Nuquin Papan chiaid Esus niacmenuna. Aden niacmeshun: “Icsambo mibi iquec,” canuna —qeshun Esus chuituidpondash. — ¿Nadquid chonoattemaid ushëmbi matses bëdamequinda Nuquin Papan chiaid niacpec? —caquien ¹¹ Esusën: —¿Ada min nëish yua obeca caid icpec? Adquid chonoattemaid ushën shëcuë uquëduc ampaëdacsho istuidshun ¿chiquenquioda mimbi icpatsia? Ai, mimbi chictsiac. Chonoattemaid ushëmbi mimbi chonoadquin chicpatsiac. ¹² Aden min obeca bëdiactsëc tantiec mibi bëdapabi icnuc matses tantiaquiquin nashunquid bëdamboshë ictsiash. Nadquid chonoattemaid ushëmbi matses aden bëdamboen nashunquidën Nuquin Papan chiaid niaquenquio ictsiash —quequin Esusën abi icsamenu caquido chuipondash.

¹³ Adotanquimbien Esusën mëicsatsaid chuiquin: —Mëcueta —cac mëcuëc bëdampondash aton mëdante abiuc daëdi bëdambo yec. ¹⁴ Adsho isashien abi chieshëquido padiseyobo nëishquiopac caondash. Adec nëishanec nidash aton matses utsibobëd: —Cuesunequimbien Esus ictiad —quecuededpac caondash.

Esusën nate ëndenquimboshë chiampid

¹⁵ Adnubien Esus: —Ëbi cuesunetiadquio iquec —quianec auëshquiobi puduanec nidpondash. Nidsho isumbien matses dadpeshun tsibanampondash. Adshumbic aidon bëaid daicsaidotedi bëdamebampondash.

¹⁶ Adshumbic ambi bëdamiaido chuiquin: —“Bëdamioshi,” quenda —quequin chuipondash Esusën: —Ëbi abi chuiquid dapa icmenushe —quiash adpondash Esus. ¹⁷ Aden Esusën nate chuiquin Nuquin Papan isadaidbo tsusedpa Isayas dada uamepampic naden chuiquin.

¹⁸ “Ëmbi chomiaid ëmbi chiapadomboen naquidquido nec. Aid tantiaquiec bëdambo iquebi.

Con Mayan bëdambo icquid abëdi tabadmimbi.

Adoac ěmbi bědamboen iste isadaidbobědta matses utsibo abitedi bědamboen chiendac.

¹⁹ Chushcanante bunenquoio yec ancanenquoio iquendac.
Chuiquid dapa ictiapimbo iquendac.

²⁰ Icsambo icquido yec shubiquido yec natiaic tabadquido yec daicsaido yec quequidon abi bědiactsěc tantiabentsěcsho bědamboen isquin bědamboen tantiamendac.

Nuquin Papan chiacpadec cuidte ushě choabi icnuc adoendac.

²¹ ‘Nuquin Papan tantiacpadomboen matses bědamboen namendac,’ qeshun nidaid utsi-utsiec yacnoquidon matses dadpeshun aidi tantiendac,”

quequin Esusěn bědamboen nate chuipampic Isayasěn.

Podobitsi icsan namiaidi Esus nec, quiaid
(*Mad 3.20-30; Duc 11.14-23; 12.10*)

²² Adnubien Esus ismenuen daicsaid běpondash. Dapuduedshun podobitsi icsan běshu uain eme uaidi onquesa nepondash. Isenquoio yec onquenquoio icshobien Esusěn bědamepondash. Adoac isbenequoio onquiampoundash.

²³ Adsho isashien Esus datsidadquido: –Is. Comapenen tantiaquin nabanquidquido něid neque. ĴNuquin tsusedpa Dabiděn tsyuecquidta nepec? Adquid yec nuqui cainaidquio Nuquin Papan chomiaidien nechitec – quecuededpondash.

²⁴ Adsho tantiasĥ Esus chiesĥenquido padiseyobo: –ĴAidta nedic? Ma aidpenquoio neyoc. Betsibu caiděn podobitsi icsan icbon namiaid icquimbien Esusěn podobitsi icsa cuemehitec –quequin otacquoio tantiapaneědash.

²⁵ Adshobien Esusěn aidon otacquoio tantiaid ambembi tantiasĥnuden chuipondash. –ĴAdquiděnda aton yuabi cuemepatsiasĥ? Padenquoio. Chuiquid dapan aton yuabo něishtanquin chushcac cuěsh-cuěshědec aton yuabo uesadec nietsiasĥ. Aido nibědnuc chuiquid dapa ictiapimbo ictiasĥ. Adecbidi shubu dadpen icquiděn tabadquido chushcananash cuěsh-cuěshědec niquan shubu dadpen icboedi daědpactsěc yanec. ²⁶ “Betsibu caidbidi Satanas caiděmbi namiaquien podobitsi icsa cuemehitec,” mimbi ěbi capoc. ĴAmbi naid nashobida Satanasěn aton yuabo podobitsi icsabo cuemepatsiasĥ? Padenquoio ictiasĥ. Satanasěn cuemiac aidbědi aton yuabo cuěsh-cuěshědtsiasĥ. Adnuc Satanas aton icbopenquoio yantsiasĥ. ²⁷ Miběd icquidon podobitsi icsa dapuduedaid cuemiac caosh. ĴCuemesho isun mimbi ěbi chiacpadomboen: “Betsibu caiděn namiaquien nachitec,” cainda ictio? Ma mimbi padenquoio icpaboc. Mimbi adoac: “Mimbi icsamboen chiec,” quetsenosh podobitsi icsa dapuduedaid cuemequido miběd icquido.

²⁸ Nuquin Papan Mayaněn namiaquimbi podobitsi icsa cuemioc. ěmbi adosh isash: “Něbi matsesběd icquin Nuquin Papan namiaiděn naosh,” quetiadquidi mibi nec –quepondash Esus.

²⁹ Adashic abi onquec: –Tantia. Mibi chuinu. Ampenuesho icbon istuidac ampequiděn icbo uiděn uabi ampeshuntiapimbo iquec. Icbo uiděnquoio icquid bucun cataneshun ampeshunquid. Adecbidi Satanas bědiactsěc tantiaquid icnuc ěbien comapenen tantiaquidquido nec. Uiděn uacimbien nadatiambo icquin nabanquin aton yua cuemepombi. ³⁰ ěbi con icbo cainquoio icquido Satanasěn yuabo nec. Adquid icquin ěbi chiesĥenquin ěbi tantiatsěcquido cuěshědmendac. Adquidbidi mibi nec –quequin Esusěn abi chiesĥenquido chuipondash.

³¹ Adshumbic nadentsen chuipondash. –Nuquin Papan chiaid niacniacboeděmbi ěnacsho Nuquin Papan bědamboen isec. Nuquin Papan icsamboen chuishunquiděmbi abi icsaid ěnacsho Nuquin Papan bědamboen

isec. Aton Mayanën namiacsho isash: “Icsambo iquec,” quequin bēdamboen tantienquo icsho Nuquin Papan bēdamboen istiapimbo iquec. ³² Ēbi chieshēnquin icsamboen chuishunquidēmbi ēnacsho Nuquin Papan bēdamboen isec. Aton Mayanën namiacsho isash: “Icsambo iquec,” quequin icsamboen tantiasho Nuquin Papan bēdamboen istiapimbo iquec. Aden ēnenquo icquin icsamboen tantiasho adembidi ēnenquo icquin bēdamboen istiapimbo iquendac —quequin abi chieshēnquido Esusēn chuipondash.

Bēdambo icquid nec, quequin tantiate chiaid
(Mat 7.15-20; Duc 6.43-45)

³³ Adshumbic naden bēdamboec tabadte Esusēn chuipondash. —Cuēte bēdan bacuē bēdambo iquec. Cuēte icsan bacuē icsambo iquec. Chetequid isun cuēte dada matsesēn tantiec. Adembidi matses bēdambo icquid bēdamboec onquec bēdamboec tabadsho isun: “Aid bēdambo icquid nec,” quequin matsesēn tantiatiassh. ³⁴ Ma mibi adquidpenquo neyoc. Nisibimboec icsa uanquido mibi nec. ¿Icsambo icquinda mimbi bēdamboen chuidio?. Ma mimbi padenquo icboc. Mimbi icsamboen tantiaid ma mimbi utsibo icsamboen chuiboc. ³⁵ Bēdambo icquidēn ambi bēdamboen tantiaid bēdamboen chuitsiassh. Icsambo icquidēmbien ambi icsamboen tantiaid icsamboen chuitsiassh. Aden mimbi icsamboen chuipoc. ³⁶ Ambi cuidte ushēn Nuquin Papan: “¿Ada bēdamboen tantiaquin chuidenio?” quequin matses abitedi chuimendac. ³⁷ Adoac abimbo chiec: “Ai, bēdamboen nadeniombi,” qesho icsano nidmenquo iquec. Padnuen utsi: “Padenquo. Icsamboembimbi chuidenechitoc,” qesho icsano nidmequin cuideque. Icsamboec onqueboedi ēnēda —quequin Esusēn abi chieshēnquido chuipondash.

Padiseyobon: Ēbi isme, quequin Esus chiaid
(Mad 8.12; Duc 11.29-32)

³⁸ Aden chuisho tantiashumbien abi chieshēnquido utsibon Esus chuituidpondash. —“Nuquin Papan chomiaidini nec,” quequin ēbi ismequin nadatiambo icquin nabanta. Isnu —quepondash padiseyobo Moisesēn dada uapampid chuibanquidobēdi.

³⁹ Adoquien Esus: —Padi. Nuquin Papan chiaid niac-niaquec mibi icsamboshē iquec. Ēbi tantiate bunenquo icquimbi mimbi: “Ēbi isme,” ēbi capec. Adsho nēbi mibi ismenquo iquēmbi. Yuecshumbimbi mibi ismendac. ¿Ada nuquin tsusedpa Onas caidēn nampid tantie? Aid yampicpaden naindambi. ⁴⁰ Chishcambiecquid dapan chebudac aidēn pucun uec daēdec ushacsho ucbudac Onas padpidec nidpampic. Adecbidi unēsacsho chococac Onas yampicpadec daēdec ushach uincuenendabi. Aden ismendambi. ⁴¹ Ēbi tantienquo yec mibi icsambo iquec. Padnuen Nuquin Papan chiaid Onasēn chuibanac shubu dadpenquo icquid Ninibe caid yacnocquido badedi icsainquo yec ēnēdpampic. Nuquin Papan chiaid chuibanquid Onas bēdambo icpampic. Ēbien bēdamboshē icquidquo nec. Adquid icquin nadatiambo icquin dadpen ismiaqui mimbi ēbi tantienquo iquec. Aden ēbi tantienquo icquido icsho Nuquin Papan matses abitedi cuidte ushēn Ninibe caid yacnocquidon: “Icsambo iquec,” mibi caindac. ⁴² Adquid cuidte ushēmbi matses utsi Sud yacnocquido ancaquidēn nuquin tsusedpa Sadomonēn chuisho tantiec chopampidēntsen: “Icsambo mibi iquec,” mibi caindac. Aid ancaquid chido nepampic. “Isadaidob ancaquid Sadomon cuēmēdquid dadpen tantiaquid nec,” quequin chuituidac Sadomonēn chuisho tantianuec nidshun aid chidon tantiatuidpampic. Adash: “Nuquin Papan tantiamiaidēnquo Sadomonēn bēdamboen chuiepec,” quepampic. Ēmbien abitedi tantiaquid

icquin nadatiambo icquin ismeuidpoc. Ado aqui mimbi tantienquoio icpec — quepondash Esus abi chieshēnquido chiec.

Abi nianaïd podobitsi icsa dapuedoaid
(Duc 11.24-26)

⁴³ Adshumbic naden Esusēn chuipondash. —Icsaquido mibi nec. Podobitsi icsa dapuedoaidbimboecquid mibi nec. Tantia. Mibi chuinu. Abi dapuedoaid matses nianashi podobitsi icsa abi dapuedtequid nibēdacno yec capucuen-capucuenec. Adtanequi: “Ēbi icbocnobidi dapueduoaic nidebi,” quianec choec. ⁴⁴ Chonobi ambi niamboed matses: “Ēbi dapuedoaid podobitsi icsa nibēdnuc bēdambo iquebi. Adquid chomeoati-apimbo iquebi. Ēmbimbo naic bēdamboec tabadquidquoio nebi,” queuidpec. Adshobien ambi niamboed podobitsi icsan istuidoapec. Istuidoashic: “Dapuedtequidquoio nēid nec,” quianec ⁴⁵ abipadquid utsi bedec nidoaic. Nidshumbic 7tedi icsamboshē icquido istuidshun bēash aidobēdi dapuedec. Adnuc podobitsi icsa abentsēc dapuedoaid yec ēnden icsambo icboedi aido dadpen dapuedoaid yec buēdanquiec aid matses icsamboshē yanec. Adquio mibi iquec. “Bēdambo iquebi,” queboedi nēbi mibi icsamboshē yanec — quequin Esusēn chuipondash.

Anibēdi Esusēn utsibo choaid
(Mad 3.31-35; Duc 8.19-21)

⁴⁶ Adanec shubun puduedshun Esusēn abēd puduedquido dadpen chuinubi aton utsibo aton titabēdi Esus isnuec chopac caondash. Umanuc tabadnubi ⁴⁷ utsin puduedshun Esus chuituidpondash. —Mibi isec tita min utsibobēdi choaccosh. Umanuc tabadec —caquien badedi nidenquoio yec ⁴⁸ Esus: —Utsitsen con ta caimbi. Adembidi utsitsen con utsi caimbi —quetanquin ⁴⁹ abēd icquido mēdquin ismepondash. —Nēid ēbēd icquido con utsibo caimbi. ⁵⁰ Nuquin Papan chiacpadomboen naquidquoio icsho con matses caimbi. Con utsi caquinc con chibi caquinc con ta caquinc caimbi —quepondash Esus.

13

Piacbo ēshē siaid chiaid
(Mad 4.1-9; Duc 8.4-8)

¹ Adtanec nidec chian budash cuēmano tabadtuidpondash. ² Tabadtuidsho isash matses dadpenquoio cho-choash tsucus-tsucustsēcquoio yec Esus datsidnadpondash. Adsho istanec cano dapa antabēdtoash cuēmano anoentsēc canon nuadquin Esusēn chuipondash cuēmano tabadquidon tantianubi.

³ Adshumbic abi tantiate chuinen naden ompoacimboen chuipondash. —Piacbo ēshē siaid utsi-utsiec bēdamboec caniec. Utsi-utsiec padenquoio. ⁴ “Abitedi ansecanu,” caidi utsi-utsiec shēcuē nibēdacno paēdec. Paēdacsho paēdaid uicchunēn chequid. ⁵ Ēshē utsibic nidaid tsasimbo yacno siac badedi dēyucuidash ⁶ aton tapun nidaidēn puduedenquoio icnuc ushē chēnquequidēn badedi unēsquid. ⁷ Ēshē utsibic nisanquid diadacno siaid dēyucash caniduidtsēcsho nisanquidēn dayunac unēsquid. ⁸ Padnuen ēshē utsi-utsiec nidaid bēdanquoio siac dēyucash canish dadpenquoio ēshēquid. Utsi-utsiec 100ted ēshēquid icnubi utsi-utsiec 60ted ēshēquid icnuc utsi-utsiec 30ted ēshēquid —quepondash Esus.

⁹ Adashic: —¿Min pabiate shēcuē nibēdquiecta iquec? Ēmbi chuiboed bēdamboec pausudta —quepondash Esus.

Ompoacbimboen chiec nebi, quiaid
(Mad 4.10-12; Duc 8.9-10)

¹⁰ Adsho tantiaashun abèd icquidon Esus chuipondash. —¿Atotsieshun ompoacbimboen nèid matses dadpen chie? —caquien ¹¹ Esus nadpondash. —Utsibo tantiamenquio icquin Nuquin Papabèd tabadte chuiquin nèbi mibiuidtsèqui tantiamembi. ¹² Nuquin Papa tantiatadquio icquidèn èbi tantiaasho bédamboen tantiamendambí. Nuquin Papa tantiauidtsècquidèn èbi tantienquio icsho èmbi ompoacbimboen chiac tantienquio ictsiash. ¹³ Ompoacbimboen aido dadpen chuibanembi. Èmbi naid isun èbi tantienquio iquec. Èmbi chuisho pamumèdacobimboen tantienquio iquec. Adsho aidon tantiatapimbo icnuc chiembi. ¹⁴ Nèidon tantienquio icte chuiquin Nuquin Papan nuquin tsusedpa Isayas caid naden dada uamepampic. “Chiac tantiaboshombi tantienquio iquendac. Ismiac isquioboshombi: ‘Ai, aidi nec,’ cainquio iquendac.

¹⁵ Ai, èmbi chiaid tantiatapimbo iquec.

Ushacimboben tantienquio yec pamumèdacobimboec chieshèmènquidombo iquec.

Èbi tantiate bunenquio iquec.

Èmbi chiaid tantiaquidombien paposhquiacimboben bédamboen tantiabentsiash.

Pausunacimboben tantiaashun èmbi chiacpadomboen natiadquio yansho aton chiesh bédametsiambi. Aton chiesh bédamete bunenquio iquec,” quequin Nuquin Papan dada uamepampic —quepondash Esus abèd icquido chiec. ¹⁶ Adashic aidobidi chiec: —Isayasèn chiacpadomboen utsibon èbi tantienquio icnubi mimbien èbi tantiec. Èbi isec mibi tabadec. Èmbi chuibansho tantiaash: “Ai, abimbo caic,” quec mibi bédambo iquec. ¹⁷ Èbi chote chuipampidobèd tan bédamboec tabadquido dadpenshun mimbi èbi isacpadomboen èbi iste bunequi èbi isambobi unèspampic. Mimbi èmbi chuisho tantiacpadomboen tantiatadquio yequi tantiambobi unèspampic —quepondash Esus.

Piacbo siaid sebadènquio chiaid
(Mad 4.13-20; Duc 8.11-15)

¹⁸ Adashic abi onquec: —Tantia. Èmbi piacbo èshè siaid quequin chuiboed sebadènquio mibi chuinu. ¹⁹ Nuquin Papabèd tabadte chiaid piacbo èshè siaidimbocquid nec. Nuquin Papan chiaid chiaqui tantiaidenquio icsho Satanasèn nac badedi bëshumpec. Uíchunèn piacbo èshè paèdai badedi chiacimboben adopec. ²⁰ Utsibic Nuquin Papan chiaid chiaqui bèdiactsèc tantiauidtsash: “Bédambo iquec,” quec cuishongqueuidtsec. ²¹ Adsho: “Nuquin Papan chiaid tantiaquid nec,” qeshun utsibon chieshènac badedi chieshtoshon tantienquio yanendac. Piacbo èshè tapunuidtsash unèsacimboben adoendac. ²² Utsibic Nuquin Papan chiaid tantiatasashi ambi dacuèdquin tantiaiduidi tantiequi chieshtopec. Utsibic tantiauidtsash ambi bedtequiduidi tantiequi chieshtopec. Nuquin Papan chiaid tantienquio icpec. Ísitodon dayunac unèsacimboben adoendac. ²³ Padnuen utsibon tantiate nidaid bédan siaidimbocquid nec. Nuquin Papan chiaid chuisho tantiaquioshon ambi tantiaid bènuainquio icquin tantiabudec bédamboec tabadec. Adshun aidèn chiac utsi dadpenquioshè èbi tantiaquid yanendac. Utsin chiac dadpen adecbidi èbi tantiaquid yanendac. Utsin chiac daèdpactsèc adquidbidi yanendac —quequin abi tantiate chuipondash Esusèn.

Èshè icsambo icquid seuanaid chiaid

²⁴ Adshumbic Esusën naden chuipondash. —Tantia. Nuquin Papan nami-aid tantiamenuen utsi chiacbimboen chuinu. Tiedën caniquid pete adosbiequid icbon siac caondash. ²⁵ Adanec nidambic inchëshëmbi choshon chieshëmënkuidën êshë icsambo icquidtsen daëd uain seuanac caondash. ²⁶ Adoac adosbiecquid canidotsëcnubi abëdi tancandaëdpamboec icsambo icquid canidotsac caondash. ²⁷ Adsho istanquin yuabon aton icbo chuituidpac caondash. “¿Pete êshëda sio?” cac: “Ai,” qesho tantias: “Icsambo icquidbëd tancandaëdec canidopaboc. ¿Mitsipaden sio?” quequin yuabon icbo chuipac caondash. ²⁸ Adoquien: “Chieshëmënkuidëmbien seuanchitash,” cac: “¿Chicshunetanquindambi icpe?” yua qesho: ²⁹ “Padi. Petebëdi chiquidtsias. ³⁰ Aidbëdi ma canipanuna. Êshëacsho tacuesquimbi teshun sianun nanuna. Adoshombic icsambo icquid tsindobanshun nêdëncanun nanuna. Icsambo icquid nêdëncatanquimbic pete bedshun sandoshon shubun dectandonon nanuna,” quepac caondash tied icbo —quequin Esusën chuipondash.

Esus tantiaquido dadpen yante chiaid

(Mad 4.30-32; Duc 13.18-19)

³¹ Adshumbic abi tantiaquido dadpen yante tantiamenuen Esusën naden chuipondash. —Cuëte bacuë êshëmpi ³² pistsëcquidi nuamboshë caniec. Aid cuëte cuidin uicchun dadpen tabadtonec. Adechidi ëbi tantiaquid abentsëchshun bëdamboec tabadquin ismiac ëbi tantiaquid dadpenquio yanendac —quepondash Esus.

Abi bëdamboen tantiate Esusën chiaid

(Mad 4.33-34; Duc 13.20-21)

³³ Adshumbic Esusën abi bëdamboen tantiate chuipondash. —¿Mitsipad nami uaid icpec? Aniactëc nami uashun utsibëdta daëd uain cabiunac abichobi batambo yanec. Adembidi ëbi bëdiactëc tantiatsëcboedi ëmbi chiaid tantias ëbi bëdamboen tantiaquid yanendac ³⁴ —quequin Esusën chuipondash. Sebadënquio chienquio icquin ompoacbimboenuidi Esusën chuipondash. ³⁵ Aden Esusën chuite chuiquin Nuquin Papan dada uamepampic-padomboen nanuen adopondash. Nuquin Papan dada uamepampid nad iquec.

“Sebadënquio chienquio icquin ompoacbimboenuidi chuibanendambi.

Ëndenquimboshë matses uaboshombi Nuquin Papan ambi tantiaidi ambi uaido chiambo iquec. Adembidi aidon tsyuecquidotedi chiambobidi iquec.

Nëbimbi chuibanendac,”

quequin nuquin tsusedpan Esusën chuite dada uapampic.

Êshë icsambo icquid seuanaid sebadënquio chiaid

³⁶ Adashic matses dadpen tabadacnuësh nidec Esus shubun puduedondash. Puduedshobien abëd icquidon chuipondash. —“Chieshëmënkuidën êshë icsambo icquid siaid nec,” quequin mimbi chuiboed en sebadënquio chui, Icbo. Tantanu. ¿Atotsi chuitiadquio icquin aden chio? ³⁷ —caquien Esusën chuipondash naden. —Tantia. Mibi chuinu. Pete êshë bëdambo icquid sequidbimboecquid nebi. Nuquin Papan chiaidquio tantiamequin matses bëdambo icmequid nebi. ³⁸ Padnuc tied dapabimboecquid nidaidën tabadquidtedi nec. Padnuc pete êshëbimboecquid ëbi tantiaquid nec. Nidaid utsi-utsiec yacno tabadquido utsi-utsien ëbi tantiaquid icmendambi. Padnuc ëbi chieshënkuid Satanasën yuaido icsambo icquid siaidbimboecquid nec. ³⁹ Padnuc êshë icsambo icquid sequidbimboecquid Satanas nec. Aidën yuaido matses icsambo icquidon ëbi tantiaquidobëd tabadquin icsametiadquio iquec. Adsho badedi cuidenquio icquin Nuquin

Papan cuidte ushë choabi icnuc matses icsambo icquidobëd bëdambo icquido tabadmendambi. Padnuen ambi chiacpadën Nuquin Papan abi yacnoshon uaido mayan bëdabon ëmbi chiacpadomboen naindac. ⁴⁰ Icsambo icquid tsindoshon nëdëncacimboen Nuquin Papan cuidte ushëmbi icsambo icquido cuidendac. ⁴¹ Ëmbimboen mayan bëdabo namendac. "Icsamianquidobëdta icsaidotedi bedshun chian anëdënquiacno nëseca," quequin ëmbi chiac ⁴² bedshun chian anëdënquiacno nësecaindac. Adoac natiaic mëyadbudec sidquequendac. ⁴³ Padnuen ëbi tantiec bëdamboec tabadquido Nuquin Papa yacno nidash icsatiapimbo icquid iquendac. Ëmbi aden chuiboed tantiashun ëmbi chiacpadomboen nata —quepondash Esus.

Nuquin Papabëd tabadte bunquiota, quiaid

⁴⁴ Adshumbic padpiden Esusën chuipondash. —Tantia. Matses ambi istuidaid bedte comapenec bunquiaid mibi chuinu. Utsin tied nantan nidshun dadan ëndenquimbo ompoampid piucquid dadpenquo icquid istuidpac caondash. Istuidash aid bedte comapenec bunquiopac caondash. Adshun aton na abitedimbo menequin piucquid bedshun tied icbo aid piucquid meneshun: "Nëbi con tied nec," qeshun piucquid ompoampid bedpac caondash. Adomboen matsesën Nuquin Papabëd tabadte bunquin aton nauidi nainquo icquin Nuquin Papan chiacpadomboenuidi nac bëdambo ictsiash.

⁴⁵ Tantia. Casëdu bëdaidquo bunaidtsen mibi chuinu. Dadan casëdu bëdaidquo bunquin bednuen nibëbenepac caondash. ⁴⁶ Adshun bëdaidquo istuidash: "Nadquid utsi nibëdec," quiaish comapenec bunquiac caondash. Adshun aton na abitedimbo menequin piucquid bedshun casëdu icbo menequin aid casëdu bedac caondash. Adomboen Nuquin Papabëd tabadte bunquin matsesën ëbi tantiaquiac bëdambo ictsiash —quepondash Esus.

Nuquin Papan cuidte ushë Esusën chiaid

⁴⁷ Adshumbic Esusën naden chuipondash. —Tantia. Mibi chuinu. Nuëcquid nibedacimboen naindami. Isadaidbon nuëcquid dadpenquo bedte nëshaid dapa acte nënequin ⁴⁸ nëshaid cubu-cubuctsëcquio icnuc nuëcquid bedshun acte cuëman tabadquin nuëcquid nibedquid. Nuacquid sandobanquin pistsëcquid acte nësecaquid. Aden Isadaidbon nuëcquid bedquid. ⁴⁹ Adomboembidi namendambi. Nuquin Papan cuidte ushë chonoc ambi abi yacnoshon uaido mayan bëdabo namendambi. Adoac choshon nibedacimboen matses bëdambo icquido Nuquin Papa yacno nidmequimbi ⁵⁰ icsambo icquido chian anëdënquiacno nësecaindac. Adoac natiaic shubiquendac —quequin Esusën Nuquin Papan cuidte chuipondash.

⁵¹ Adshumbic: —¿Ada ëmbi chuiboedtedi tantie? —caquini: —Ai, tantiambi —quepondac. ⁵² Adsho tantiashun Esusën chuipondashi. —Nuquin Papan chiaid chuibanquid mibi iquendac. Matsesën aton na ëndenquimbo dayun uanëdaidbëdta aton na chuca ismequin chiacimboen mimbi naindac. Nuquin Papan chiaid ëndenquimbo dada uampidbëdtabi Nuquin Papan chiaid utsi ëmbi chuiboedquio mimbi chiendac —quepondash Esus.

Nasaded yacno Esus nidaid

(*Mad 6.1-6; Duc 4.16-30; Uan 4.44*)

⁵³ Adanec auëshquiobi nidequi ⁵⁴ abi caninëdacno shubu dadpen icquid Nasaded caid yacno chopondash. Ambo choshombic Nuquin Papan chiaid chuibante shubun puduedshun aton matses chuipondash. Adoaquien: —¿Mitsipaden comapenen tantiabempash neba? ¿Mitsipadec comapenen tantiaquin bëdamequid yampash? ⁵⁵ ¿Nuqui isacmaidta nedic? Ma aton papa cuëte nacnenquid nepaboc. Ma aton tita Madia nepayoc. Aton utsibo nëdtedi

iccosh. Nèidic Acobo. Nèidic Ose. Nèidic Simon. Nèidic Udas. Aidedi aton utsibo iccosh. ⁵⁶ Aido nèmbo tabadosh. Aton chibichedotsen nèmbo tabadosh. ¿Comapenen tantiaquidta nedic? Ma adquidpenquoio neyoc – quequin ⁵⁷ Esus chieshènquin tantienquoio icpondash.

Adsho tantiashun Esusèn nadopondash: –Nuquin Papan: “Èmbi tanti-amiacpaden chuibanta,” caidèn chiac utsibon tantiaquid. Adquidèn abi caniacnoshon chuibansho tantienquoio icquid –quepondash Esus. ⁵⁸ Adshun nadatiambo icquin nabanquin daèdpactsèc ismetsèccondash: –“Nuquin Papan chomiaidquoio nec,” quetiapimbo iquec –queshun.

14

Uan acten mentoanquid

unès uaid

(Mad 6.14-29; Duc 9.7-9)

¹ Adnubien ancaquidèn Edodes caidèn Esusèn comapenen tantiaquin nabanaid chuisho tantiapac caondash. ² Adshumbic aton yuabo chuipac caondash. –Uan pado acten mentoanded nepash icnui. Èmbi mapi butemiondaidi uincuempash icnui. Adquid icquin comapenen tantiaquin nabampash icnui –quepac caondash Edodes.

³⁻⁴ Edodesèn Uan cuesuniac caondaic chuinu. Tantia. Uanèn: –Mimbi bedaid Edodias caid min chidopenquoio nec. Min utsi Uedipe caidèn chido bedshun Nuquin Papan chiaid mimbi niaquec –cadoniaquien Edodesèn chieshtoshon uidèn uameshun Uan quènèn nauedmepac caondash.

⁵ Adshumbic Uan cuesunetiadquoio icquimbi aton matses: –Nuquin Papan chiaid chuibanquidquoio nec –quesho tantiashun aido dacuèdènquin Uan badedi cuesunenquoio icpac caondash.

⁶ Adshumbic Edodesèn: –Èbi tishaid ushè nec –queshun matses dadpen aton shubun puduedmeshun pemepac caondash. Adnubien ambi inaidèn champin Edodesèn pemiaido baidaquin ismepac caondash. Adsho isumbic Edodesèn: –Bèdamboenshè mimbi naic –queshun ⁷ naden chuipac caondash. –Tantia, champi. ¿Atotsi buneque? Mibi bunaidquoio mibi menenu. “Nuquin Papan cuidnushe,” quiaish muatiapimbo iquebique. En èbi chui –capac caondash Edodesèn. ⁸ Adoaquien champin aton tita chuitampac caondash. Chuitanec choshon anin chiaid chuituidpac caondash. –Uan acten mentoanquidèn mapi butetanquin pada-padaid dapan ananshun baded èbi mene –capac caondash champin Edodes chuiquin. Uanèn –Min bènè nianshun utsi bedmec mibi icsaic –cac champin tita Uan cuesunemete bumpac caondash.

⁹ Adoaquien Edodesèn: –¿Atotsi quepequini ado? ¿Adoenquoio ictiadtsimbi icpoba? –quequin ambi chuiboed niactiadquoio icpac caondash. –Èbi isedquidon: “Mibi muambo nec,” canushe –quetanquin champin chiacpadomboen aton yuabo: –Uan mapi butetan –capac caondash.

¹⁰ Adoac quènèn tsadacnobi Uan mapi buteshun ¹¹ mapi pada-padaid ananshun buanshun champi menepac caondash yuabon. Adoaquien champin ani menenun buampac caondash.

¹² Adnubien Uanbèd ictenedon Uan mapi butiacsho dada bedanquin buanshun chococatampac caondash. Adotanec Esus chiec nidpac caondash.

Comapenen tantiaquin 5000tedi pemiaid

(Mad 6.30-44; Duc 9.10-17; Uan 6.1-14)

¹³ Nidshumbic: –Mibi acten mentondaic mapi butiaccosh –catuidpondash. Adsho tantianec cano antabèdtoshon chian potiaish

puundoanec matses nibēdacnombo Esus nidanepondash. Aden chian potesho isash: —Nuquitsen nidnu. Nid —quianec matses dadpen chian dēquiadec podqued nidquidēn nidanepac caondash.

¹⁴ Adnubien Esus matses nibēdacno istanec chian yacno choapondash. Choashun isquien abi cainec matses dadpen tabadec. Adsho isun aido tantiaquidquio icquin daicsaidotedi bēdamebampondash.

¹⁵ Ushē budambi Esusbēd icquidon: —Inchēsheque. Pete nibēdacno nuqui tabadeque. Nidaneme, Icho. Shubu dadpen icquid utsi-utsiec yacno nidshun ma piucquid menequin ma pete bednu —caquien ¹⁶ Esusēn: —Padi. Ma tabadnu. Mimbibi peme —capondashi.

¹⁷ Adoaquini: —Ma panēmpi 5tedpactsēc icpayoc. Nuēcquidēmpi daēdquioibi ictsec —quepondac. ¹⁸ Adsho: —Aidtedtsēqui beccho —cac meniondambi.

¹⁹ Adoaquien Esusēn abi datsidadquido chuiquin: —Uasinēn tabadbud —capondash. Adoac tabadbudnubi abuc isquin Nuquin Papa chuipondash. —Mimbi uaid pete bēdambo iquec, Papa —quetanquin panēmpi cuēsh-cuēshun abēd icquido menebanac aidontsen matses abitedi menebampondash. Adembidi nuēcquidēmpi bushtebantsēcshun menebampondash.

²⁰ Adoaquien nua cubudcuededquin pebededpondash abitedishumbi. Piacsho isun napi uaid bedtanequin tsitsan dapan sandotanquin isquien tsitsan dapa 12tedi cubu-cubuctsēcquio iquec pete cuēsh-cuēshaid napi uaid. ²¹ Aden matses dadpenquio pemebampondash. Aido dadatedi tambanac 5000tedi icpondash. Aton chido aton bacuēbobēdta tambanambo iccondambi.

Acte bēntse Esus choaid

(Mad 6.45-52; Uan 6.16-21)

²² Adshumbic Esusēn abēd icquido chuiquin: —Chian potec nidta —capondash. Adoac cano antabēdtoanec potec nidnubi Esusēn abi datsidadquidotsen: —Nidanec nid —cac nidanepac caondash. ²³ Adec nidanebon Nuquin Papa chuinec macuēsh dectatoash abentsēqui Esus inchēshpac caondash.

²⁴ Adnubien chian dapa potequi abēd icquidotsen inchēshpondash. Chian nēnantanquio yanubi cunquetuidpondash. Adnuc acte comapenec tēccuasquampondash uncadenquio yec. Comapenec acte ishucdnuc cano mentoadtiadpambo icpondash.

²⁵ Adnubien badiade anoentsēqui acte bēntse Esus chopondash. ²⁶ Acte bēntse chosho isashini: —Podobitsi nec —quiash dacuēdtanec sidquecuededpondac. ²⁷ Adshobini Esusēn: —Ēbien neque. Dacuēdenda —capondash. ²⁸ Adoaquien Petedon: —¿Con Ichombobida ne? Con Icho icquin: “Acte bēntse cho,” ēbi ca —capondash.

²⁹ Adsho tantiashun Esusēn: —En cho —caquien Petedo canonoēsh budanec acte bēntse Esus bēquedbanec niduidtsēccondash. ³⁰ Esusuidi isec bēdamboec niduidtsequi acte comapenec tēccuasquesho isash dacuēdtanec acte bēntse niduidtsēcboedi mentoadtsempondash. —Ēbi bed, Icho. Mentoadebique —caquien ³¹ Esusēn badedquio bedtanquin indopondash. Aden indoequi: —“Con icbon ēbi bēdamboen nametsiash,” queboedi ¿atotsi quiash dacuēdtano? Ēbi bēdiactsēc tantiatsēcquid mibi nec —quepondash Esus Petedo caic.

³² Adtanec Petedobēdi cano antsadtonobien cunqueboedi cunquenquio yampondash. Actetsen tēccuasquenquio yanondash. ³³ Adsho isun cano antabēdquidon: —Mibi bēdamboshē iquec. Comapenen tantiaquidquio yec Nuquin Papan Madombo mibi nec —quequin Esus tantiabededpondash.

*Quenesaded yacnoshon Esusën bēdamiaid**(Mad 6.53-56)*

³⁴ Adashic chian potiash Quenesaded yacno pudundopondash.
³⁵ Pudundosho isun anocquidon: —Esus chosh —quequin uanocquido abitedi chuibeniac daicsaido abitedi bē-bēpondash. ³⁶ Bē-bēshumbic: —Dashcuteuidtsēqui mishashi bēdantsiash —queshun Esus chuituidquin: —Min dashcute cuēmano daicsaido mishme —cac mishmiaqui bēdampondash abitedi.

15*Padiseyobo icsaid Esusën chiaid**(Mad 7.1-13)*

¹ Adnubien padiseyobo Moisesën dada uampid chuibanquidobēdi shubu dadpen icquid Edusaden caid yacnuēsh cho-choquin Esus istuidpondash.

² Istuidashic: —¿Atotsieshun mibēd icquidon nuquin tsusedpabon chiaid niac-niacpash? Penush mēpamēdenquo icquin nuquin tsusedpabon chiaid ma niac-niacpaboc —quepondash Esus chieshēnquido.

³ Adsho tantiashun Esusën: —Ma mimbi. ¿Atotsieshun Nuquin Papan chiaidquo niac-niaque? Nuquin tsusedpabon chiacpadomboen naquin ma mimbi Nuquin Papan chiaidquo niac-niacpayoc. ⁴ Tantia. Mibi chuinu. “Titabēda papa chieshēnquido icquin bēdamboen tantiata,” quequin Nuquin Papan chiampidquo ma mimbi niacpaboc. Adembidi: “ ‘Con pa unēspashun,’ quec chieshēmēnquid icsho unēs uaquid. Adembidi ani icsamboen chuishunsho unēs uaquid,” quequin Nuquin Papan chiampid utsi mimbi niacpec. ⁵ Aid niacquin nuquin tsusedpabon ambembi chiaidien mimbi chieic. “Anibēda amē naden cudasēnac bēdambo ictsias,” mibi quepec. “ ‘Nuquin Papa menetequid nēditd con piucquid iquec. Mitsana nibēdsho menetiadquidi mibi menenquo iquembi. Nuquin Papa menetequid nec,’ quequidēn ⁶ cudasēnac bēdambo ictsias,” mibi quepec. Aden nuquin matsēsēn chiaid naquin Nuquin Papan chiaidquo ma mimbi niac-niacpayoc. ⁷ “Nuquin Papa tantiacidquo nebi,” quec muaquid mibi nec. Ēdenquimboshē Nuquin Papan chuimiac nuquin tsusedpa Isayas caidēn mimbi icsamboen tantiata chuiquin dada uapampic naden.

⁸ “Isadaidbo: ‘Nuquin Papambo tantiembi,’ quepec.

Adboedēmbi ēmbi chiaid niacquin ēbi tantienquo iquec.

⁹ “Ma Nuquin Papan ēbi bēdamboen isnu,’ queboedēmbi ēbi bēdamboen tantienquo iquec.

Ēmbi chiaidquo namenquo icquin aton matsēsēn chiaiduidi namepec,” quequin Isayasēn Nuquin Papan chiaid dada uapampic —quequin Esusën abi chieshēnquido chushcapondash.

*Ana shēcuēnuēsh choaid chiaid**(Mad 7.14-23)*

¹⁰ Adshumbic abi isec datsidadquido ompoacbimboen chuipondash. —Tantia. Mibitedi chuinu. ¹¹ Ana shēcuēn puduedaidēn matsēs ic-saten mimbi dampec. ¿Adquidēnda matsēs icsapec? Padenquo. Ana shēcuēnuēsh choaidēmbien matsēs icsatsias —quequin Esusën chuipondash.

¹² Adnubien abēd icquidon: —Mimbi aden chuiboed tantiashun padiseyobon mibi chieshēnosh, Icho —caquien: ¹³ —Dacuēdenda. Icsa bescatanquin tsindoshon nēdēncacimboen ambī tantiamiabi yaido ambembi chuiquido Nuquin Papan cuideque. ¹⁴ Dacuēdenda. Padiseyobo bēshuaidbimboec icquido neque. Bēshuaidēn aton matsēs bēshuaid utsi bēdamboen buantiapimbo iquec.

Buanuec abi shëcuë ampaëdtsiash. Adembidi Nuquin Papan chiaidpenquoio namequin aton matses bëdamboen tantiametiapimbo iquec —quepondash Esus abëd icquido chieç.

¹⁵ Adshobien Petedon: —Mimbi ana shëcuënuësh choaid quequin chuiboed tantiambo iccombique. Aid sebadënuquoio chui. Tantianu, Icho —caquien: ¹⁶ —¿Tantiamboda icco? ¹⁷ Chuinu. Tantia. Ana shëcuën puduedaid mimbi peboed min pucun uedoash chimute shëcuënuësh choec. Adquidën Nuquin Papan chiaid niacmenquoio iquec. ¹⁸ Matses onquiaidimbi ana shëcuënuësh choaid caoc. Abibi uquëducuësh onquec: “Adoembi,” quequin otacquoio tantiaquin naic matses icsatsiash. ¹⁹ Icsambo icquido yec: “Ai, adoembi,” quequin otacquoio tantiaquin Nuquin Papan chiaid niacsiasih nadquidën. Nëdic unës uanquid. Nëdic aton chidopenquoio chudquid. Nëdic aton bënëpenquoio chudmequid. Nëdic aben uequid. Nëdic ampequid. Nëdic muaquid. Nëdic icsamboec chuishumënuquid. ²⁰ Adquidtedi: “Ai, adote bunebi” quequin otacquoio tantiaquin icsaquid nec. Padnuen penush mëpamëdenquoio icquin Nuquin Papan chiaid niaquenquoio ictsiasih —quepondash Esus abëd icquido chieç.

*Isadaidpembo chidon Esus tantiaid
(Mad 7.24-30)*

²¹ Adanec auëshquiobi Esus nidpondash. Shubu dadpen icquid Tido caid anoentsëqui datambidanec choec shubu dadpen icquid utsi Sidon caid anoentsëqui chopondash.

²² Adnubien anocquid cananeyabo chidon Esus cuëntuidpondash. —Tsusedpa Dabidën tsyuecquid Nuquin Papan namiaid icquin ëbi bëdamboen ista. Con champi podobitsi icsa dapuedaid yec natiambo iqueque. Con champi bëdameta —caquien ²³ Esusën ëcbedenquoio icpondash. Ècbedenquoio yaqui chidon tsibanbanquin cuënbampondash. Adsho tantiaquin Esusbëd icquidon: —Chieshanquieç cuëdpeque. Cuemepa —caquien ²⁴ Esusën cuemenquoio icquimbi aid chuiquin: —Nuquin Papan chiacpaden Isadaidbo matsesba Nuquin Papa bëdamboen ismete tantiamenuec nebi. Bënudacimboc icquin Nuquin Papa tantienquoio icsho aidoba tantiamenuec nebi —quepondash Esus.

²⁵ Adsho tantiaquin nidenquoio yec chido cuëdboed Esus ismequin danëshën sebudtsec: —Èbi nashunta, Icho. Con champi bëdameta —queshobien Esusën: ²⁶ —¿Aton bacuëbo pemenquoio icquimbi aton opa pemiacta bëdambo icpatsiasih? Padenquoio. Adembidi Nuquin Papan con matses caidotedi tantiamiabi utsibo ëbi nashunac icsambo ictsiasih. Isadaidboba tantiamenuec nebi —quepondash Esus.

²⁷ Adsho tantiaquin chidon: —Ai, abimbo mimbi caic. Padnuen bacuëbon pequin paëdmiaid opashëmpin petsëcquid. Adembidi mimbi comapenen tantiaquin nabanaquin isadaidbo dadpen bëdanubi isadaidpembo abentsëc tantiaquid icsho ëbi nashunquin con champi bëdameta ²⁸ —caquien Esusën: —Ai. Èbi tantiaquidquid mibi nec. Mimbi chiacpadec min champi bëdanendac —quesho tantianec aton shubuno nidshun isquien aton champi bëdanac Esusën chuinubi.

Daicsaido dadpen Esusën bëdamiaid

²⁹ Adanec auëshquiobi nidec chian dapa Cadidia caid cuëman nidquid podquedën nidanepondash. Adashic macuësh dapa dectatoec poctsebi tabadtuidpondash.

³⁰ Tabadtuidsho isun matses dadpenquoio cho-choquin daicsaido dadpen Esus ismenuen bë-bëpondash. Tidinequid yec bëshuaido yec

shëquëquenquo icquido yec onquesabo yec daicsaido utsibotedi yec quenuc bē-bēpondash. Adsho Esusēn bēdamebampondash. ³¹ Bēdamiac onquenquo icboedi onquianondash. Bēshuacboedēmbi isbenondash. Capuenquo icboedi capucuenondash. Daicsaido utsibo adecbidi bēdanondash. Adsho isquido nadpondash. —¿Adquidta ictenec? Nuquin matses isadaidbon tantiaidēn Nuquin Papan namiaid icquin bēdamepash icnui. Nuquin Papa bēdambo iquec —quepondash Esusēn bēdamiaid tantiash.

*Matses 4000tedi pemiaid
(Mad 8.1-10)*

³² Adec tabadsho isashien Esus: —Nēido tantiac unēsquo iquec. Ēmbi nabansho isnuec choash 3tedec ushquin piac ambi bēboed pete naimēdaccosh. Ēmbi: “Nid,” cac nidnuequi bunambi padishtiash. Pemiaibi nidmetiapimbo iquebi —quepondash. ³³ Adsho tantiashun abēd icquidon: —¿Midambo pete bētiapimbo iquec? Pemetiapiambo matses dadpen iquec —capondash.

³⁴ Adoaquien Esusēn: —¿Tedtsi panēmpi iquec? —cac: —Sieteted ictsec. Nuēcquidēmpi daēdpactsēc ictsec —quesho ³⁵ tantiashumbien abi datsidadquido chuiquin: —Nēmbo tabadbud —capondash. Adoac tabadbudpondash abitedi.

³⁶ Adshumbic panēmpibēdta nuēcquidēmpi bedshun Nuquin Papa chuipondash. —Nēid mimbi uaid bēdambo iquec, Papa —queshun pete cuēshcuēshbantsēcshun abēd icquido menebampondash: —Pemeban —quequin. Adoac abitedimbo pemebampondash. ³⁷ Aden pemiab abitedimbo nua cubudcuededpondash. Piacsho isun pequin napi uaid bedbanquin tsitsan 7ted icnuc cubu-cubuctsēcquo icnuc sandobampondambi. ³⁸ Esusēn pemiaido dadpenquo icpondash. Tambanac 4000tedi dada icpondash. Chido bacuēbobēdta tambanambo iccondambi. ³⁹ Adashic: —Nidanec nid —quepondash Esus ambi pemeboedo caic. Aido nidanenubi chian budash cano antabēdtoshon Esusēn chian potepondash. Chian potiash nidaid Mac-tada caid yacno pudundopondash.

16

*Saduseyobon: Ēbi isme, quiaid
(Mad 8.11-13; Duc 12.54-56)*

¹ Pudundoanec nidshobi anocquidon abi chieshēnquidon Esus chuituidpondash. —“Nuquin Papan chomiaid nebi,” quequin comapenen tantiaquin nabanquin ēbi isme —cabededpondash padiseyobobēdta saduseyobon.

² Adshobien Esusēn: —Nuquin matsesēn chiaid mimbi tantiec. “Inchēshbudtsēqui abu piumbo icsho isash: ‘Tanunquo badiadec,’ quequid. ³ Badiadnubi abu inchēshpambo icsho isash: ‘Ue dapa choec,’ quequid.” quequin nuquin matsesēn chiaid mimbi tantiec. Aden chiaid tantiacbimboen bēdamboen tantiatiadquidi Nuquin Papan nēbimbobi naid mimbi tantienquo iquec. ⁴ Icsambo icquid icquimbi mimbi: “Ēbi isme,” cadednepec. Nēbi mibi ismenquo iquembi. Nuquin Papan nuquin tsusedpa Onas chishcambiecquid dapan chebudacsho daēdec ushun ucbudmiacimboec unēs uacsho chococac daēdec ushash uincuenendabi. Aden ēbi tantiesabo ismendambi —quianec nidpondash Esus.

*Padiseyobon chiaid tantienda, quiaid
(Mad 8.14-21)*

⁵ Adanec nidec chian budash cano antabēdtoshon chian poteopondash. Chian potequien Esusbēd icquido: —Pete nianchitombi. Bētiadquidi nepobi —quepondash. ⁶ Adshobien Esusēn abēd icquido chuiquin: —Padiseyobēdta

saduseyobon naid pan bidiscamete**bimboecquid** iqueque. Ista —caquien 7 tantienquo yec abèd icquido nadec onquecuededpondash. —Nuqui niamboed pete chiequi nepanui —quepondash. 8 Adsho ambembi tantia**sh** Esus: —Èbi bèdiactsèc tantiat**sècquid** mibi nec. ¿Mimbi pete niamboed chiectabi nedi? Padenquo. 9 ¿Bèshunashta mibi nepe? Pete 5tedtsècboedi èmbi 5000tedi pemiaidèn napi uaid dadpen iccondaid ¿tantienquioda yano? 10 ¿Adembidi pete 7tedi ict**sècboedi** èmbi 4000tedi pemiaidèn napi uaid dadpen tsitsanèn sandoboed tantienquioda yano? 11 ¿Aden comapenen tantiaquid icquimbidambi pete niamboed chuipadi? Padenquo. Pan bidiscamete pict**sèc** cabiunac pan abichobi nua bidisquiac**bimboecquid** padiseyobobèdan saduseyobon chiaid iquec —quepondash Esus.

12 Aden chuisho tantia**sh** abèd icquido nadpondash. —Pan chienquo icquimbi nuquin matses tsusiobon chiaidshenda capec. Aido caic: “Icsamenda,” quepecshenda niosh. “Padiseyobon chiaidbèdta saduseyobon chiaid tantienda,” quepecshenda niosh —quepondash Esusbèd icquido.

Nuquin Papan Mado mibi nec, quiaid
(Mad 8.27-30; Duc 9.18-21)

13 Adash yuectaniash puduanec nidequien Esus nidaid utsi Sesadeya Uedipo caidèn nidanepondash. Adshumbic abèd icquido chuimepondash. —Utsibon ¿tsutsi èbi caosh? —caquien: 14 —“Uan pado acten mentoanondaidien nec,” mibi caosh. Utsimbic: “Edias cuèmèdquid Nuquin Papan ambi tantiaid oncamiampid nepanui,” mibi caosh. Utsimbic: “Edemias cuèmèdquid Nuquin Papan oncamepampid nepanui,” mibi caosh. Utsimbic: “Nuquin Papan oncamiampid utsi nepanui,” mibi caosh —capondash abèd icquidon. 15 Adsho tantia**shun** Esusèn: —Ma mimbibi. ¿tsutsi èbi mimbibi cao? —caquien 16 Petedo Simon caidèn: —“Quidistu caid Nuquin Papan chomiaidquo nec,” caombi mibi. Aton Madombo mibi nec —capondash.

17 Adsho tantia**shun** Esusèn: —Nuquin Papan aden tantiamiac mimbi bèdamboen chioc, Petedo. Onasèn mado Simon caid yec matsesien mibi nec. Adquid icquimbi matsesèn tantiaid chienquo icquin Nuquin Papan tantiamiaidquo mimbi abimbo chioc. 18 Tantia. Èmbitsen mibi chuinu. “Cuènote**bimboecquid** nec,” quequin mibi Petedo cuènondami. “Cuènote dapa utsi ictiapimbo yac**bimboec** chieshtoenquo icquid iquendac,” qeshun mibia èbi tantiaquido chuiquid dapambo icmendambi. Adec mimbi nami-aido èbi tantiaquido iquendac. Šatanasèn aido: “Nèid yuanu. Utsibic chieshtomenu. Utsibic unès uamenu,” caqui abi èbi tantiaquido iquendac. 19 Padnuc Nuquin Papan chiacpadomboen èbi tantiaquidon nate mimbi chiendac. Adembidi èbi tantiaquidon natemaidtsen mimbi chiendac —quepondash Esus Petedo chiec.

20 Adashic abèd icquido abitedi chuioc: —“Nuquin Papan chomiaidquo nec,” quequin utsibo èbi chienda —quepondash Esus.

Abi unès uate Esusèn chiaid
(Mad 8.31-9.1; Duc 9.22-27)

21 Adshumbic tauaquin abi unès uate chuidondash. —Shubu dadpen icquid Edusaden caid yacno nidendabi. Anoshon nuquin matsesèn èbi chieshènquiendac nèidtedshun. Nèidic tsusiobon. Nèidic nèish yua abided unès uaquido chuiquid dapabon. Nèidic Moisesèn dada uampid chuibanquidon. Aideddishun mëyanquoquin èbi unès uamendac. Adoacsho chococac daèdec ushash uincuenendabi —quequin chuisho 22 tantia**shun** Petedon uanotantsècquin tsadumbudshun Esus chuipondash. —Unèsquo icnuc mimbi chieque. Aden chienda. Ma mibi unès uatiapimbo icpayoc —capondash

Petedon. ²³ Adoaquien Esusën: —Satanasën oncamiac Petedo adec onquec —qeshun Petedo isquin Satanas chushcapondash naden. —Cuen, Satanas. Nuquin Papan chiaid mimbi ëbi niacmetiadquio iqueque. Cuen —quetanec Petedobi chiec: —Matsesën tantiaid chuiquimbi Nuquin Papan tantiaidquio mimbi chienquio iccoc —capondash.

²⁴ Adashic abëd icquidotedi chuioaic: —Ëbi tantiaquidon aton nauidi nainquio icquin ëmbi chiacpadomboen natsiash. Adsho chieshëmënuquidon: “Unës uachitomane,” cac chieshtoenquio icquin ëbi tantiatsiash. Adquid ëbi tantiaidquio nec. ²⁵ Padnuen ëbi tantiatsëcquid: “Esus tantiasho unës uachitoshe,” quiaish ëbi tantienquio yanec unësash Nuquin Papan cuidaidobëd nidendac. Padnuen chieshtoenquio icquin ëbi tantiaquid Nuquin Papa yacno tabadendac. ²⁶ ¿Nuquin Papa tantienquio yec tabadecta matses bëdambo icpatsiash? Abi bunaidtedi bedquin Nuquin Papa tantienquio yec unësash ¿mitsimbo tabadpatsiash? Nuquin Papabëd tabadte bunquin ¿atotsi menepatsiash? ¿Piuquid meniashta Nuquin Papa yacno tabadpatsiash? Padenquio. Adotiapimbo iquec. ¿Atoda meniantiapimbo iquec? ²⁷ Ëmbien matses cuidte chiendac. Nuquin Papa yacnuësh ambi abi yacnoshon uaido mayan bëdabobëd cho-choshon Nuquin Papan abitedishun icho icmiaid icquin matses cuidte chiendambi. Nuquin Papa tantiec bëdamboec tabadquid Nuquin Papabëd tabadmequin Nuquin Papa tantienquio yec icsaquido icsano nidmendambi. ²⁸ Tantia. Chuinu. Utsi-utsiec unësabi icquin ëbi tantiaquido dadpen yansho mimbi isendac —quepondash Esus.

17

Esus bëchamauanquiecscho isaid (Mad 9.2-13; Duc 9.28-36)

¹ Aden chiasch 6tedec ushanec nidquimbi Esusën abëd icquido 3tedtsëqui buampondash. Petedo yec Acobo yec Acobon buchi Uan yec quetsëcnuac buanash macuësh dapa dectatoash mananënquio tabadtuidpac caondash.

² Tabadtuidshun isquien Esus utsiacbimboec isadpec. Aton dashcutebëdi aton bëtantete ushëbimboec bëchamauanquieac yanac caondash.

³ Esus bëchamauanquieac icnubien dada utsi daëd isadcuenash Esusbëd onquiampac caondash. Abentsëc Moises yampid icnubi utsi Edias Nuquin Papan ambi tantiaid oncamiampid icpac caondash. ⁴ Adsho isashien Petedo: —Mibi adec tabadsho isash bëdambo iquebi. Mibi nëmbobi tabadmenun abentsëc chotsecnuac shubumpi uatsëcnuna, Ichu. Mitsana natsëcquinc Moisesën na natsëcquinc Ediasën na natsëcquinc canuna. ¿Ada bëda icpec? —quenubi ⁵ abu ushu bëchamauanquieac icquidën isadenquio icnuc bëtimpac caondash. Adnubien abu ushu nënantanuëshquio Nuquin Papa onquiampac caondash. —Nëid con Madombo nec. Ëmbi tantiaidquio yec ëmbi bëdamboen isaidquio neque. Nëidquio tantiaata —quec dacuëdampamboec onquenubien ⁶ uinte paëdtampamboec dacuëdtanec uebudcuededpac caondash Petedo chedo.

⁷ Adshobien Esusën camishquin: —Dacuëdenda. Nidto —cac ⁸ nidtoquin isquien Esus abentsëqui iquec.

⁹ Adtanec macuësh budequi Esus: —Mimbi isboed nëbi utsibo chienda. Unës uac ëbi uincuenacsho isun chianta —quepac caondash abëd icquido chiec.

¹⁰ Adsho tantiash Petedo chedo: —“Nuquin Papan chomiaidquio nec,” quequin nëbi mibi tantiembi. Mibi adquid icnuc ¿mitsipadquid nuquin matses tsusiobon chuiposh? Nuquin Papan chiaid isash: “Nuquin Papan chomiaid choabi icnuc Edias yampidba choendac,” quepequien iccosh —qeshobien

¹¹ Esusën: —Abimbo chiosh. “Edias yampid bëyuc choshon: ‘Nuquin Papan chomiac bédambo icquid choeque. Bédamboec tabadta,’ quequin chiendac,” quequin abimbo chiosh. ¹² Adquid Ediasbimboecquid chondash. Choacsho tantienquo icquin matsesën abi bunacpaden unès uapac caondash. Adembidi Nuquin Papan chomiaid icsho èbitsen chieshënquin unès uaindac —quesho tantiashien: ¹³ —“Ediasbimboecquid nec,” quequinshenda chuiposh. Uan pado acten mentoanded caquinshenda Edias capec —quepac caondash Petedo chedo.

Madompi dapuedaid podobitsi icsa cuemiaid

(*Mad 9.14-29; Duc 9.37-43*)

¹⁴ Bëchamuanquiec ictanec choequi abèd icquido utsibo yacno choquin matses dadpen aido datsidadacsho Esusën istuidpondash. Adec Esus chosho isumbien unèsanetsëcquidën papan Esus ismequin danëshën sebudshun chuipondash. ¹⁵ —Con mado bédamboen isquin bédameta, Icho. Badedbadedquiec unèsanec cuëten pichiuanec. Adecbidi unèsanec acten mentoatsenaccosh. ¹⁶ Mibèd icquidon bédamete danquin bëuidombi. (“Në bédame,” cac bédamenuen tanuidosh. Bédamenuo iccoshe. Mimbimbo bédameta —caquien ¹⁷ Esusën ambo icquidotedi chuipondash. —Èmbi nadatiambo icquin nabanquin ismiaqui mimbi èbi tantienquo iquec. Adsho isash chieshtoash cuentiadquo icchitebi. Adtiadquo yequi padenquo iquec nebique. Min mado beccho —cac ¹⁸ bësho istanquin Esusën podobitsi icsa chushcapondash. —Padi. Daicsa uainda —cac podobitsi icsa cuenubi madompi bédampondash.

¹⁹ Adsho isun abèd icquidon Esus chuipondash utsibo tantiamenquo icquin. —Èmbi: “Cuemenu,” cac çatotsi quiash podobitsi icsa cuenenquo icposh? —caquien: ²⁰ —Nuquin Papa bédamboen tantiaquin mimbi bédamboen natsenoc. Mimbi bëdiactëc tantiatsec. Pete èshëmpi mostasa caid pistsëcquidi siac nua yec canitsiash. Adecbidi Nuquin Papa tantiatsëcboedi: “Ambi natiapimbo ictequid nibèdec,” quequin abimbo tantiaquidquo yanshun comapenen tantiaquidbimboec mibi ictsiac. Adquidën nëid macuëshquiobi cain: “Uquë manèd,” cac manèdtsiash. Aden mimbi: “Èbi bédamboen nameta, Papa,” quequin Nuquin Papa chianiac aidëmbi mimbi: “Èmbi natiapimbo ictequid nec,” caid mibi bédamboen nametsiash. ²¹ Nèbi èmbi cuemeboed abembi cuentiapimbo icquid nec. Nuquin Papauidi tantianuen buna mëmunquin Nuquin Papa chianeshun adquid cuemequid —quequin Esusën chuipondashi.

Abi unëste Esusën chuioaid

(*Mad 9.30-32; Duc 9.43-45*)

²² Adanec aton nidaid Cadidia yacnobi capucuenequimbi Esusën abèd icquido chuipondash. —Èbèd icquid abentsëcshun èbi chieshënquido èbi bedmendac. ²³ Bedshun èbi unès uamendac. Aden unès uamiacsho chocoacuinì daèdec ushash uincuenendac —quesho tantiatanequien abèd icquido: —Unèsquo icnuc chiec —quiash shubiantiadtsëcquo icpondash.

Chuiquid dapa menetequid piucquid Petedon istuidaid

²⁴ Aden chianec nidequi shubu dadpen icquid Capednaun caid yacno Esus chopondash. Adnubien Nuquin Papa tabadte shubu uashunaid nacnemenuëquin piucquid bedquidon Petedo chuituidpac caondash. —Nuquin Papa tabadte shubu uashunaid nacnemenuen çada min icbon dos dada uatsaid piucquid shocoshëmpi abentsëc menepatsiash? —cac ²⁵ Petedo: —Ai, menetsiash —quepac caondash. Adanec nidec shubun puduedshobien

Esusën ambia Petedo chuipondash. —¿Atotsi mimbi chie, Simon? Aton mat-sesën na nacnemenuen ¿tsutsi chuiquid dapabon piucquid bedshumpec? ¿Ada aton matses piucquid bedshumpec? Aïdo bedshunenquio icquin ¿ada ambi bedaido aton yuabo piucquid bedshumpec? —caquien ²⁶ Petedo: —Ma aton yuabo bedshumpaïd yoc. Aton matses piucquid bedshunenquio iquec —quesho tantiashien: —Adembidi aton Mado icsho aton shubu nacnemenuen Nuquin Papan ëbi bedshuntiapimbo iquec. ²⁷ Aden tantiaquimbi: “Nëishnushë,” gueshun menenun nanuna. Chianën ansemetan. Tauaquin ansemiaïdi ancanshun anisquin 4 dada uatsaid piucquid shocoshëmpi abentsëc mimbi istuidendac. Aïd bedshun piucquid bedshumënquido menetanta. “Në con icbon nabëdi con na nec,” quequin menetanta —capondash Esusën. Adoac Petedon Esusën chiapadomboen menetampac caondash.

18

¿Mitsicquid chuiquid dapa mimbi icmepatsia?

quequin chiaïd

(Mad 9.33-37; Duc 9.46-48)

¹ Adshumbic abëd icquidon Esus chuipondash. —Abitedishun Icho icquin matses mimbi namendac. Èbi chedo caic ¿mitsicquid mibëdtan chuiquid dapa mimbi icmepatsia? —quesho ² tantiashun abi tabadacno nënantanquio bacuë tsaduntsëcshun Esusën chuipondash. ³ —Tantia. Mibi chuïnu. Mitsanauidi tantiec Nuquin Papan namiaïd mibi ictiapimbo iquec. Mitsanauidi tantiaboedi nadquid bacuën amën chiapadomboen nachimboen ëbi tanti-aqiota. Adash ambi namiaïd yanash Nuquin Papa yacno mibi puduednac. ⁴ Aden ëmbi chiapadomboen naquidquio icsho mibi Nuquin Papan: “Bëdamboshë iquec,” caindac. ⁵ Nadquid bacuëbëdta ëbi tantiabentsëcquid bëdamboen tantiaquidën ëbitsen bëdamboen tantiendac —quepondash Esus.

Tantiabentsëcquido icsamete chiaïd

(Mad 9.42-48; Duc 17.1-2)

⁶ Adshumbic padpiden chiec: —Èbi tantiabentsëcquid caic: “Nuquibi Nuquin Papan chiaïd niac-niacquiec icsaquionona,” quequid Nuquin Papan cuidendac. Icsamiabi yec unësacsho isun: “Bëdambo iquec,” catsiambi. “Cuënote yuëmboshë icquid tēdectanshun acte nënepatecnëdan,” caimbi icsami-ante bunquidquio. ⁷ Aden ëbi tantiatsëcquid utsibon icsamendac. Adec icsamianquid Nuquin Papan cuidendac.

⁸ Aden Nuquin Papan cuidte chuïsho tantiequi icsainda. Mëdanten naic mibi icsaic. Mëteshuniac bedtiapimbo yacimboec icsainquio yec ënëdta. Taën capuec mibi icsaic. Tateshuniac caputiapimbo yacimboec icsainquio yec ënëdta. Ènëdenquio icsho Nuquin Papan mibi cuidendac. ⁹ Adechidi ëshën isec mibi icsate bunquiec. Èshë chicshuniacimboec icsainquio yec ënëdacsho: “Bëdambo iquec,” catsiambi. Ènëdenquio icsho Nuquin Papan chian anëdënquiacno nësecaindac —quequin Esusën chuipondash.

Matses ëbi tantiamete Nuquin Papa bunaid

(Duc 15.3-7)

¹⁰ Adashic padpidec: —Nadquid bacuëmpin ëbi tantiatsëcsho isun: “¿Adtsëcquidëmpinquiobida bëdamboen tantiapec?” cainda. Nuquin Papan abi yacnoshon uaid mayan bëda aid bacuëbo dayun uaquid icquin Nuquin Papa yacno puduedshun mimbi mamëshumboed Nuquin Papa chuïnushë. Adtsëcquidëmpi mamëshunenda. Èbi tantiabentsëcquido con

Pan tantiaquieque. ¹¹ Èmbitsen aido tantiembi. “Bēnudaïd istuidachimboen ēbi tantienquo icquidobi ēbi tantiaquido icmenu,” quiash matseson dabi –quepondash Esus.

¹² Adashic padpidec: –¿Mitsipadquo nuquin matses icpec? Nēish yua obeca dadpen 100ted dayun uaquidēn aton yua tambanac abentsēc nibēdsho istanquin utsitedi nianshun aid abentsēc nibēnbenequin istuidquid. ¹³ Aden istuidash comapenec cuishonquequid: “Con yua nibēdantsenquiac,” quiash. Aton yua utsi yacno bēash abi icboctedi icsho isash bēdambo icquid. Adecbidi matsesēn ēbi tantiabensho isash Nuquin Papabēd cuishonquebi bēnudaïd istuidachimboec. ¹⁴ Icsaido cuidacno matses nidmete Nuquin Papa bunenquo iquec. Matses bēdamboen isquin abēd tabadmete Nuquin Papa bunquiec –quepondash Esus.

Chieshēnquidobēdi onquete chiaïd
(Duc 17.3)

¹⁵ Adashic padpidec: –¿Ada ēbi tantiaquid utsin mibi icsa uaosh? “Ai, icsa uaoshi. Chieshēmiantiadquo icchitosh,” qeshun nadoac bēdambo ictsiash. Aid abentsēqui chuiquin aïdbēd bēdamboec onquequin: “Èbi icsa uaquin Nuquin Papan chiaïd mimbi niac-niacoc. Adec icsainquo yec ēnēda,” mimbi cac: “Ai, adebi,” quiash mibēdi bēdamboec tabadtsiash Nuquin Papa tantiesabimboec icuidboedi. ¹⁶ Mimbi: “Icsainquo yec ēnēda,” caqui: “Padi. Adequi icsaibi,” qesho tantiashun ēbi tantiaquid utsi beduanshun aïdbēdan chuitanta. “Nuquin Papan chiaïd niac-niacsho isun daēdshun chiaïd abimbo chiaïd nec,” quequin chiaïd tantiaquin adota. ¹⁷ Mimbi buanaïdēntsen: “Adec icsainda,” caqui: “Adequi icsaibi,” qesho tantiatanec choashun mibēdan ēbi tantiec iccuededquido chuiquido chuituidta. “Mimbisen chuitanta,” cac aidontsen chiaqui tantienquo icsho isun: “Nuquin Papan chiaïd niac-niacquid yec Esus tantiesabimboecquid nec,” qeshun ēbi tantiaquido cuēdēnacno chomenda. ¹⁸ Aden mimbi: “Esus tantiesabimboecquid neque. Cuēdēnacno chomenquo ictiad,” casho Nuquin Papan: “Bēdamboen naic,” mibi catsiash. Adembidi mimbi: “Adec icsaboedi icsainquo yec ēnēdsho isun cuēdēnacno chomeoanuna,” qeshun chomeoasho Nuquin Papan: “Bēdamboen naic,” catsiash.

¹⁹ Padpiden chuinu. Tantia. Mimbi: “Nuquin Papa chuïnuna,” cac: “Ai, adonona,” qesho tantiashun aïdbēdan mimbi Nuquin Papa chianiac mimbi chiacpadomboen Nuquin Papan natsiash. ²⁰ Èbi tantiec daēd tabadnuc aïdbēd con Mayan yec ēbēd yacimboec tantiadendac. Adec tabadsho isun: “Con Mado tantiaquido nec,” qeshun aidon chianiaïd Nuquin Papan tantiendac.

Yuan bēdamboen istiapimbo yaïd

²¹ Adec: –Icsa uanec chieshtomiantiadquo iquec –Esus qesho tantiashumbien Petedon Esus chuipondash. –¿Icsa uanec chieshtomianquid tedentsimbi chieshenquo icquin bēdamboen ispe? Chieshēnquin padpiden icsa uac ¿padpidendambi bēdamboen isoape? ¿Mēdante utsiuc daēd tauadoquin sietetedembi nashun padpiden bēdamboen isenquo icquin enacta bēdambo icpatsiash? –caquien ²² Esusēn: –“Mēdante utsiuc daēd tauadoec sietetedi” quequin daēdpactsēcquio mimbi chuipec. 70 por 7 caïd ¿tedsi icpec? Aidteden 490tedembi ēnenquo icquin bēdamboen isoadoniac bēdambo ictsiash –quepondash Esus.

²³ Adashic abi onquec: –Nuquin Papan chiacpadomboen matses bēdamboen iste mibi chuinu. Tantia. Tsusion yuabo dadpen icpac caondash. “Ma bēnu,” quequin ambi meniactedi piucquid bednuen aton yuabo aton

shubuno chomepac caondash. ²⁴ Abia chomiaidën piucquid dadpenquioshë bedshun aton icbo meniambo icpac caondash. ²⁵ Adsho icbon: “Mimbi bedactedi beccho,” cac: “Nibêdec,” quepac caondash yua. Adshobien icbon: “Aidtedi piucquid bednuen matses utsibo mibi yuamenu. Min chido min bacuëbobêdtabi cuësh-cuëshêdmeshun aidtedi piucquid bednu. Mibi icsambo iqueque,” cac ²⁶ yua abi yuaquid ismequin danëshën sebudash: “Padi. Èbi yuamenuen cuësh-cuëshêdmenda. Chiata. Yuecshun aidtedi bedshun mibi menenun nanu,” capac caondash. ²⁷ Adoquien icbon bédamboen isquin: “Padi. Èbi menenda. Mibi utsibo yuamenquo iquembique. Dacuëndenda. Nidec nid,” quequin icbon aton yua bédamboen nidmepac caondash.

²⁸ Adoac nidquimbien aid yuan icbon bédamboen isboedën ambi: “Ma bēnu,” quequin piucquid daëdpacksëc meniaid yua utsi istuidpac caondash. Istuidshumbic bedtanquin têtêdinquin: “Mimbi bedactedi piucquid beccho. Unës uachitomane,” caquien ²⁹ aidtsen ambi piucquid bedshunondaid ismenuen danëshën sebudtsec: “Chiata. Èbi unës uainda. Yuecshun bedshun mibi menenun nanu. Chiata,” quepac caondash yua utsi. ³⁰ Adsho tantiashun icbon bédamboen isboedëmbi chieshëquin: “Padi. Mibi cuidmëmbi,” qeshun quënën nauedmepac caondash. “Piucquid aidtedi abi menianenquo yacpadequi ma quënënuësh mëyadbudchitono,” qeshun nauedmiac caondash.

³¹ Aden chieshëquin quënën nauedmiacsho isumbien yua utsibon: “Chieshanquieç,” qeshun icbo chuituidpac caondash. “Mimbi bédamboen isboedëmbi min yua utsi quënën nauedmiac: ‘Piucquid menianenquo iqueç,’ qeshun,” quequin icbo chuipac caondash. ³² Adsho tantiashun icbon ambi cuidenquo icquin bédamboen isboed chomeshun chushcapac caondash. “Icsambo icquidquo mibi nec. ‘Chiata. Mibi menenun nanu,’ mibi qesho: ‘Padi. Èbi menenda,’ quequin mibi bédamboen isombi. ³³ ¿Èmbi mibi adobocpadomboen utsi bédamboen istiapimboda icco? ‘Ma bēnu,’ qeshun mimbi meniactedi bēabi icsho bédamboen isec mibitsen bédambo içtsenac. Mibi yacpadeç nēishun mibi cuidëmbi,” quepac caondash icbo. ³⁴ Adshun quënën nauedmepac caondash. “Ambi bedactedi piucquid dadpenquo meniash ma puduëmpanu,” qeshun quënën nauedmiac caondash. ³⁵ Aden matses yuan icbon nacpadomboen Nuquin Papan naindac. Utsibon chieshënaqui chieshënanasho Nuquin Papan mibi bédamboen istiapimbo iqueque. Chieshënanenda. Mibi chieshëquidobi bédamboen ista — quepondash Esus.

19

Chidobêd cuëshêdte Esusën chiaid (Mad 10.1-12; Duc 16.18)

¹ Adanec nidaid cuëshê Cadidia caid yacnuësh puduanec nidec nidaid cuëshê utsi Udeya caidën nidquin acte Odan caid potebidanec Esus nidpondash. ² Adec nidshobien matses dadpeshun tsibanampondash. Abi tsibanansho isun nidtuidshun daicsaidtedi Esusën bédamepondash.

³ Adnubien tsusedpabon chiampid namequido padiseyobon chieshëquin: —Nuquin Papan chiaid niacmenu —quequin Esus chuituidpondash. —¿Atotsi mimbi chuipe? Dada uashun aton chidobi nidmete ¿mitsipaden mimbi chuipe? En chui. Tiantianu —capondash.

⁴ Adoquien Esus: —¿Nuquin Papan chiaid isamboda ictio? “Nuquin Papan dadaba uashun aton chido uapampic,” quequin dada uaid ma mimbi ispacoc. ⁵ Adembidi: “Dadan canite chido uaid icsho dadan aton

chido bedquid. Amë chedobëd icboedi aton chido bedash aid nianenquio yec aïdbëd tantiananquieç dada aton chidobëd abentsëc yacbimboec tabadquid,” quequin dada uaid ma mimbi ispacoc. ⁶ Aden Nuquin Papan tantiacpadomboen aton chido nianenquio yec aïdbëdi tantiananquieç abentsëc yacbimboec tabadac bëdambo ictsiash. Padnuen aton chido nianec aïdbëdi cuëshëdquin Nuquin Papan chiaid niactsiash. Adeçbidi chido aton bënë nianec icsaquid —Esus qesho ⁷ tantiashumbien abi chieshënquidon: —¿Abimboda mimbi capadi? Nuquin Papan chiaid dada uaquin ¿atotsieshun Moisesën naden chuiampic? “Aton chido bunenquo yanshun dadan naden dada uashun menequid. ‘Mibi intiapimbo yanobi,’ quequin dada uashun aton chidobi menequin nidmequid,” quequin Moisesën dada uapampid ma icpayoc —quequin chuipondash Esus chieshënquidon.

⁸ Adsho tantiashun Esusën chuipondash. —Ai, Nuquin Papan chiacpadec aton chidobëd bëdamboec tabadtiapimbo icsho isun Nuquin Papan Moises aden dada uamepampic. Tauamboen matses uaquin Nuquin Papan aden chiamo icpampic. ⁹ Tantia. Mibi chuinu. Aton chidobëd cuëshëdshun chido utsi bedquin Nuquin Papan chiaid niactsiash. Padnuen aton chidon bënëpenquo chudmesho istuidash aïdbëd cuëshëdquin Nuquin Papan chiaid niaquenquio ictsiash —quepondash Esus.

¹⁰ Adnubien abëd icquidon: —Adotiapimbo icte mimbi chuipec. Aton chidobëd cuëshëdenquio icte mimbi chuïsho tantiashun: “Aton chido bedesambo dada bëdambo ictsiash,” caimbi —quepondash abëd icquido. ¹¹ Adsho tantiash Esus: —Ai, utsi-utsieç pabiate shëcuë nibëdacbimboen ëmbi chiaid tantiatiapimbo iquec. Utsiboen aton chido bedash Nuquin Papan chiacpadec bëdamboec tabadquid nec. ¹² Utsibic mimbi chiacpadquid chido bedesa iquec. Nëidtedi chido bedesa iquec. Nëidic aton padibi împadishtsaid. Nëidic matsesën inicsa uaid. Nëidic: “Nuquin Papan yuambo icquin aïdën chiacpadomouendi naquin chido bedtiapimbo iquebi,” qeshun chido bedesa. Adquidtedi chido bedesa nec. Embi chuiboed tantiashun ëmbi chiacpadomboen nac bëdambo ictsiash —quepondash Esus.

*Esusën bacuëbo chiaid
(Mad 10.13-16; Duc 18.15-17)*

¹³ Adnubien Esus ismenuen bacuëbo bë-bëpondash. —Mamishquin ma Nuquin Papa Esusën chuinu —quequin bë-bësho isumbimbi: —Padi. Bëenda —cauidpondac. ¹⁴ Adshobini Esusën: —Chën. Ma bënu. Cuemenda. Bacuëbimboecquid Nuquin Papa yacno puduedtequid nec. Amën chuïsho tantiash bacuë badedi: “Abimbo caic,” quiacbimboen ëbi tantiaguïd Nuquin Papa yacno puduedtequid nec. Bacuëbo bëdambo iqueque. Beccho —cac bë-bëpondash. ¹⁵ Adshobien mamishbanquin Nuquin Papa chuipondash. Adobidanec nidondash Esus.

*Cania aton na dadpenquio dayun uaquid Esusbëd onquiaid
(Mad 10.17-31; Duc 18.18-30)*

¹⁶ Adnubien dada caniampinquo Esus chuituidpondash. —Mibi bëdambo iquec. Bëdamboen chuïquidquio mibi neque. Èbi chui. Padpidec unëstiapimbo icquid icmenun bëdambo icquid Nuquin Papan abi yacno puduedmetsiash. ¿Atotsi nasho Nuquin Papan ëbi bëdambo capatsiash? —caquien ¹⁷ Esusën: —¿Mitsipadquid bëdambo icquid cai? Nuquin Papauïdtsëqui bëdambo icquid nec. Aïdbëd tabadnuen ambi Moises dada uamiampictedi nata —capondash. ¹⁸ Adoaquien cania: —Nuquin Papan chiaid ¿mitsipadquid cai? —qesho tantiashumbien: —Naden chiaid caimbi. “Cuesunenda. Min chidopenquio chudenda. Min bënëpenquio chudmenda. Ampenda. Muainda. ¹⁹ Titabëda

papa chieshënenquo icquin bëdamboen tantiata. Adembidi mibibi datantiadacimboen matses utsi abitedi tantiaquiota,” quequin chiaid caimbi — capondash Esusën. ²⁰ Adsho tantiash cania: —Aidtedi niaquenquo icquin nabanquidquo nebi. Bacuëctëc icquimbi tauaondambi. “Nuquin Papabëd tabadnuen çatotsimbi utsi nape?” caimbi —quepondash.

²¹ Adsho tantiashumbien Esusën: —Nuquin Papan chiaid niaquesambo ictiadquo icquin mimbi dayun uaidtedi uesquin menequin piucquid bedta. Piucquid bedshun piucquid nibëdquido min piucquid uesquin menebanta. Adsho abëd tabadmenun Nuquin Papan mibi bëdamboen istsiashe. Adota. Adotanequic ëbëd iquec cho —caquien ²² cania: —Con na dadpenquo icsho uesquin menetiapimbo iquebi —quiash shubiantiadtsëcquio ictanec nidpondash Esusën chiacpadomboen natiapimbo yec.

²³ Adsho isun Esusën abëd icquido chuipondash. —Chuinu. Tantia. Aton na dadpen dayun uaqaid aton na tantiequi: “Nuquin Papa yacno tabadte bunebi,” queboedëmbi ëbi tantiatiapimbo iquec. Aton nauidsëqui tantiec.

²⁴ çAda nëishamën pinchuc chichte ancumpadic? Padenquo. Adecbidi aton na dadpenquo dayun uaquidën aton nauidsëqui tantiaquin ëmbi chiacpadomboen natiapimbo yec Nuquin Papa yacno tabadiapimbo iquendac —quequin Esusën chuipondash.

²⁵ Adec: —çAda nëishamën pinchuc chichte ancumpadic? —quesho tantiashien abëd icquido nadpondash. —çTsudain Nuquin Papa yacno puduedtequid icchitotsiashe? Nibëdchitequien iquec —quesho tantiashumbien ²⁶ Esusën abëd icquido bëisquin naden chuipondash. —Matses namiantiapimbo icnuc Nuquin Papain namianquidquo nec. Ambi natiapimbo ictequid nibëdec —quepondash.

²⁷ Adsho tantiashun Petedon: —Mimbi: “Nuquibi icnu. Cho,” cac con na abitedi nianec mibëd icnuc chopondabi. çMitsimbo tabadtequidini nepe? çAtotsimbi nape? —caquien ²⁸ Esusën: —Tantia. Mibi chuinu. Nuquin Papan ambi uaid abitedi chuca uabocnoëshquo ëbëdtan chuiquid mibitedi iquendac ëmbi abitedi namiacnuëshquo. Èbëd icquido icsho isun Nuquin Papan mibi chuiquid icmendac. Nuquin tsusedpa Acobon mado çtedtsi icpampic? Aidtedi 12tedshun tsyuecquidon shubu 12tedi shubun-shubunqueic chuiquid dapabo mibitedi iquendac. ²⁹ Utsibontsen ëbi tantierendac. Aton shubu nianquinc abëdta tishaido nianquinc aton tita nianquinc aton papa nianquinc aton bacuëbo nianquinc aton tied nianquinc cain ëbi tantiaquin ëmbi chiacpadomboen naquid iquendac. Adsho nëbi unësabi icsho ambi nianaidobëd tabadacimboecnuc bëdambo icmendambi. Adoshombic unësacsho Nuquin Papa yacno tabadmendambi padpidec unësenquo icnuc. ³⁰ Nidaidënuësh chuiquid dapamo icboedi Nuquin Papa yacnuësh utsi-utscic chuiquidpenquo iquendac. Utsibic nëuëshquo chuiquidpenquo icboedi Nuquin Papa yacnoshon: “Bëdambo icquid nec,” quequin chuiquid dapa icmendac —quepondash Esus.

20

Chonoadquido chiaid

¹ Adshumbic abëd icquido Esusën ompoachimboen chuipondash. —Tantia. Èbi tantiaquido Nuquin Papa yacnoshon namete mibi chuinu. Badiadnubi tied icbon piucquid menequin aton tied neshcamenuen matses istuidpac caondash. ² Istuidshumbic: “Badiadnubi tauashun ushë budtsambi mimbi ënacsho nëidtedi piucquid mibi menenu. Naic cho,” cac chonoadec cho-chopac caondash. ³ Ushë abucquio yanubi tied icbon pete meniacno

nidshun utsibo nainquo yec samēdsho istuidpac caondash. ⁴ Adoshombic aidotsen chuiquin: “Con tied neshcaic cho. Mibi bēdamboen cuidquin menenu,” cac ⁵ tied neshcaic nidpac caondash. Ushē cuembo icnubi tied icbon padpidec pete meniacno nidoashun utsitsen istuidshun ademibidi aton tied neshcamepac caondash. Ushē budambic padpiden utsitsen. ⁶ Inchēshbudtsēqui nidoaquin utsibo nainquo yec samēdsho istuidoashun: “¿Atotsi quiash samēduidequi ique?” cac ⁷ samēdquido: “Chonoa uanquid nibēdosh,” qesho tantiashun tied icbon: “Mimbitsen con tied neshcaic cho. Mibi menenu,” cac tied neshcaic nidaneopac caondash inchēshbudtsēqui neshcaquin tauaic.

⁸ Inchēshtsēcnubi tied icbon ambi chonoa uaido isquid chuipac caondash. “Chonoadquido piucquid meneban. Tsyuec choboedba menequin tauatanquin ushē budambi choboedotsen meneta. Adoshombic ushē cuembo icnuc choboedotsen. Adoshombic ushē abuctoan choboedotsen. Adoshombic badiadnubi abia choboedo ēnquimbi meneta,” cac menequin tauapac caondash. ⁹ Inchēshbudtsēqui chonoadec choboedoba menequin badiadnuc chonoadec taēboed tied icbon: “Menenu,” cactedquido piucquid menepac caondash.

¹⁰ Adosh isashien badiadnubi choboedo: “Aido aden meneshun nuqui chonoadquioboed yuapambo nuqui menec,” qeshobi aitedtsēcbidi piucquid menepac caondash. ¹¹ Aitedtsēcbidi meniaquien tied icbo chushcapac caondash. ¹² “Tsyuec chonoadboed meniactedsēcbidi menioshi. Icsambo iquec. Inchēshbudtsēqui chotsash daēdpactsēc chonoadtsēcquid meniactedsēc yuec chonoadquid piucquid meniac icsambo iquec. Chun mēyadec yuecquio chonoadobi. Aitedtsēc menianec mibi chieshanquieq iquec. Ēbi dadpen meniac bēdambo ictsias,” quequin chushcapac caondash.

¹³ Adoaquien tied icbon: “¿Chieshanquiectabi ique? Ēmbi: ‘Nēidted piucquid menenu. Naic cho,’ cac ma mibi: ‘Al,’ quepaboc. Mambi mibi aitedquio menepaboc. ¹⁴ Mimbi bedboed buanec nid. Ēbi bunacpaden tsyuec choash chonoadquid mibi meniactedquiobi meniombi. ¿Icsamboda iquec? ¹⁵ ¿Icbon ambi tantiacpadomboen aton na dadpen meniac ada aid icsambo icpec? ¿Utsibotsen menesho isunda mimbi ēbi nēishēmpe? Aden nēishēnac ¿ada bēdambo iquec?” quequin tied icbon chuipac caondash —quequin ompoachimboen chuipondash Esusēn. ¹⁶ Adashic: —Adembidi abi yacnoshon ambi tantiacpadomboen Nuquin Papan naindac. Utsi-utsien chuiquid dapa icmequin utsi-utsien padenquo icmendac —quequin chuipondash Esusēn.

Abi unēste Esusēn padpiden chuioid

(Mad 10.32-34; Duc 18.31-34)

¹⁷ Adanec: —Edusaden yacno nidnu. Nid —quianec Esus nidpondash. Adec nidquimbi utsibo tantiamenquo icquin abēd icquido 12tedi icquid chuinen uanotantsēcquin buampondashi. ¹⁸ Buanshun chuipondashi naden: —Edusaden yacno nidacsho Nuquin Papan matsesmiad icsho ēbi chieshēnquido ēbi bedmendac. Nēish yua abided unēs uaquido chuiquid dapabobēdan Moisesēn dada uampid chuibanquidon ēbi bedshun: “Ma unēs uamenu,” qeshun ¹⁹ matses utsibo isadaidpembo ēbi bedmendac. Aden bedmiac matses utsibon mamēnshunquin ēbi cueshtaten comapenen cueshcaindac. Adshumbic ēbi unēs uanuen cuesten dectanendac. Aden unēs uaqui daēdec ushash uincuenendabi —quequin Esusēn abi unēs uate padpiden chuiopondashi.

Uanēn titan chiaid

(Mad 10.35-45)

²⁰ Adnubien Sebedeyon chido Uanën titan Esus chuituidpondash. Uambëdta Acobo aton mado daëdi bëshun ismequin danëshën sebudtanquin chuipondash. —Ëmbi chiapadomboen ëbi nashunta, Icho —caquien: ²¹ —¿Atotsi cai? —capondash Esusën. Adoaquien: —Nëid con mado daëdi nec. Abitedishun ichó icquin mibëdta chuiquid dapa con mado abi daëdi icmeta. Chuiquid dapa icmequin min dayun tsadmeta. Opioc utsi tsadunquin abiuc utsi tsadunta —caquien Esusën: ²² —Ëmbi naid tantienquo icquin mimbi chuipéc —quequin ani chuishumbic Uanbëdta Acobo Esusën chuipondash. —¿Ada ëbi mëyadacpadquiecbidi mëyadtsia? ¿Ada chieshtoenquo icpatsia? —caquien Uan: —Ai, chieshtoenquo ictsiabi. Mibëd mëyadtsiabi —quepondash.

²³ Adsho tantiashien: —Ai, ëbi tantiquid yec mibi mëyadendac. Padnuembi ëbëdta chuiquid dapa icmequin mibi ëbi datsadmetiapimbo iquec. Nuquin Papambien ambi tantiapadomboen ëbëdta chuiquid dapa icmendac —quequin Esusën chuipondash.

²⁴ Adnubimbi: —Chuiquid dapa ëbi icme —Esus casho tantiashun Uan chedo nëishëmpondac. ²⁵ Adsho Esusën ëbitedi chuipondash. —¿Mitsipadquid matses utsibo isadaidpembo chuiquid dapa icpec? Abi chuiquid dapan baded-badedquien ancabudac dacuëdquin aton yuabon badedi naic.

²⁶ Ëbi tantiaquido icquin mimbi adoenquo iquendac. “Bëdambo mibi iquec,” Nuquin Papa cametiadquo icquin utsibo tantiaquin mimbi utsibo nashuntsiac. ²⁷ Bëdambo icquid ictiadquo icquin yuan aton icho nashunacimboen mimbi utsibo nashuntsiac. ²⁸ Adembidi Nuquin Papan matsesmiad icquin matses nashunquid nebi. Ancainquo icquin matses tantiaquin Nuquin Papa icsaquidobi cuidmenquo icnuec ëbided cuidadec unësendabi —quequin Esusën abëd icquido chuipondash.

*Bëshuaid daëd Esusën bëdamaid
(Mad 10.46-52; Duc 18.35-43)*

²⁹ Adashic yuecquo ictanec shubu dadpen icquid Edico caid yacno tabadash auëshquiobi Esus nidpondash. Adsho isanec nidquin matses dadpeshun Esus tsibanampondash. ³⁰ Adnubien aid podqued cuëman bëshuaid dada daëd tsadpondash. —Esus cuenec —quesho tantiashien aid daëdi comapenec cuëdpondash. —Tsusedpa Dabidën tsyuecquid Nuquin Papan namiaidquo icquin ëbi bëdamboen ista, Icho —quepondash Esus caic.

³¹ Adsho tantiashun matses dadpeshun chushcapondash. —Padi. Chën. Adec cuëdec chieshanquieci mibi iquec —caquien abi niacbidanec buëdanquieci cuëdpondash. —Tsusedpa Dabidën tsyuecquid Nuquin Papan namiaidquo icquin ëbi bëdamboen ista, Icho —queoapondash.

³² Adoaquien Esusën niduntidshun ëcbedpondash. —¿Atotsi chuinuec ne? —caquien: ³³ —Isbente bunquiebi, Icho —quepondash. ³⁴ Adsho tantiash: —Unësquo iquec —quetanquin Esusën bëshuaid daëdi bëmishpondash. Adoac abi daëdi bëdampondash. Bëdانشun aidënsen Esus tsibanampondash bëshuacboedëmbi.

Edusaden yacnoshon chuiquid dapabimboecnuc Esus bëdamboen isaid

21

*Edusaden yacnoshon chuiquid dapabimboecnuc Esus bëdamboen isaid
(Mad 11.1-11; Duc 19.28-40; Uan 12.12-19)*

¹ Adanec nidequi shubu dadpen icquid Edusaden caid anoentsëqui macuësh dapa Odibos caid poctse shubu daëdpactsëcquid Bedpaque caid yacno Esus nidpondash. Adshumbic anoentsëqui choshon abëd icquido daëd chuipondash. ² —Nëid podquedën nidquin shubu daëdpactsëc yacno nidshun

cabayobitsecquid aton bacuë caniatšëcbëdta mimbi badedquio istuidendac. Istuidshun tēnēshaid tēdiadsho tēchicta. ³ Mimbi tēchicsho isquidēn: —¿Atotsi acnun nai? —cac: —Nuquin Icbo: “ ‘Bedtan,’ quiosh,” mimbi cac: “Ai, buantan,” quendac —quequin Esusēn chuipondash. ⁴ Ambi Esusēn nate chiaid Nuquin Papan con tsusedpa dada uamiampicpadomboen nanuen Esusēn adopondash. Naden dada uapampic.

⁵ “Shubu dadpen icquid Sion caidēn tabadquido chui. Edusaden cain Sion capec.

‘Is. Mibi chuiquid dapa cabayobitsecquidēn bacuë caniatšëc catsadtoash choeque. Ancanenquio yec bēdamboshē icquidquio neque. Is,’ quequin chui,”

quequin dada uapampic. ⁶ Aden dada uampicpadomboen ambi: —Bedtan —caidon bedtampondash.

⁷ Adotanquin cabayobitsecquid anibēdta caniatšëc bēacshobimbi con dashcute bēntse dasiuidboed chictanquin Esus nidte podqued ansambampondash. Cite casansho isash caniatšëquēn Esus catsadtopondash.

⁸ Adanec nidsho istanquin matses dadpenšun aton dashcute abi dašuidaid bēntse icquid chictanquin Esus nidte podqued ansambampondash. Adnubien utsibon niste podobiecquid tetanequin podqued ansambampondash: —Chuiquid dapa Esus nec —qeshun. ⁹ Matses dadpen bēyuc nidnubi aidtedbidi tsyuec nidpondash. Abitedi cuēdēnidpondash.

“Adeduya. Nuquin tsusedpa Dabidēn tsyuecquid Nuquin Papan namiaid yec mibi bēdamboshē iquec.

Nuquin Papan chomiaid yec mibi bēdamboshē iquec.

Mibi chomequid Nuquin Papatsen bēdamboshē iquec. Adeduya,” quec cuēdēncuededpondash.

¹⁰ Adec Edusaden yacno matses dadpenquio cuēdēnidec nidsho isashien Edusaden yacnocquido: —¿Tsutsi tantiec cuēdēncuededpec? —quepondash.

¹¹ Adsho tantiashun Esusbēd nidquido: —Esusquio tantiec nec. Nuquin nidaid cuēshē Cadidia caidēn shubu dadpen icquid Nasaded caid yacnūēsh canionaid Nuquin Papan chiaidquio chuiquid Esus tantiec nec —quepondash.

Esusēn chushcaquin cuemiaid

(Mad 11.15-19; Duc 19.45-48; Uan 2.13-22)

¹² Edusaden yacno choash Nuquin Papa tabadte shubu uashunaid umanuc daquēnē uabenaidēn Esus puduedpondash nuntanquio puduedenquio yec. Adshun isquien piucquid bednuequido dadpen tabadpec. Utsi-utsiec nidaid utsin icquido piucquid dadpen bedshungimbi muaquin piucquid utsi daēdpactšëc menequid icnubi utsi-utsiec: —Nēid bedquidēn: “Ma Nuquin Papan ēbi bēdamboen isnu,” qeshun pichicametsiash —quequin aton nēish yua menequin piucquid dadpenquio bedquid nepondash. Adsho istanquin Esusēn cuemepondash. Ambi tabēcaid bidiacbanquin aton yua dēbimbitsecquido cuemequin piucquid bednuequidotedi cuemepondash naden chuiquin. ¹³ —¿Adenda mimbi Nuquin Papan chiaid bēdamboen nape? Naden Nuquin Papan chiaid dada uapampic.

“Ēbi tabadte shubu uashunaid ēbi chianete shububidi nec,”

quequin Nuquin Papan chiacpadomboen aton shubun puduedshun aid chianetiadquidi mimbi adoengquio iquec. Mitsana bedteuidi bunec ampec tabadte shubu mimbi icmiaye. Cuen —quequin cuemepondash.

¹⁴ Adnubien Nuquin Papa tabadte shubu uashunaid yacno bēshuaid yec daicsaid yec quenec bē-bēpondash. Aden bē-bēshobien Esusēn bēdamepondash.

¹⁵ Adsho isashien Esus chieshēnquido nēishpondash. Adec nēish yua abided unēs uaquido chuiquid dapabobēd Moisesen dada uampid chuibanquido nēishpondash. Adec comapenen tantiaquin Esusēn nabansho isash nēishboedi bacuēbotsen: —Nuquin tsusedpa Dabidēn tsyuecquid Nuquin Papan nami-aid yec mibi bēdamboshē iquec —quec Esus caic cuēdēncuededsho tantia- sh nēishquiopondash. ¹⁶ Adshumbic: —Icsambo iquec —queshun Esus chuitu-idec: —¿Ada bacuēbo cuēdēnsho tantio? —caquien: —Ai, tantiombi. ¿Nuquin Papan chiaid isabida ictio? Naden bacuēbo cuēdēnte chuipampic. “Nuquin Papan oncamiac bacuēmpin aton bacuē utsibēdtan: ‘Nuquin Papa bēdambo iquec,’ caindac.” quequin chuipampic —quepondash Esus. ¹⁷ Adanec nidec shubu dadpen icquid Betania yacno nidash ushtuidpondash.

*Esusēn cuēte unēs uaid
(Mad 11.12-14, 20-26)*

¹⁸ Badiadnubi ēnden aucbidi nidoaic Edusaden yacnobidi nidoapondash. Piabi nidec bundoshon ¹⁹ podqued cuēman nidquid cuētempi icueda caid istuidash: —¿Ada bacuēaye? Chenun isbono —quepondash Esus. Adshun isquien bacuē nibēdec. Podouidquio ipec. Adsho isumbien Esusēn: —Adequi bacuēesambo yec unēsta —capondash. Adoac badedquio unēspondash.

²⁰ Adosho isun abēd icquidon: —¿Atotsi quiash badedquio unēsposh? —caquien ²¹ Esusēn: —Tantia. Mibi chuinu. Adembidi mimbi natsiac. “Nuquin Papan ambi chiaid nainquien icchitec,” quenquio icquin: “Nuquin Papan ambi chiacpadomboen naquidquio nec,” queshun mimbi Nuquin Papa chianesho aidēmbi mimbi: “Natiapimbo iquec,” caidi mibi nametsiash. Aden tantiaquin mimbi nēid macuēsh cain: “Mananuc tabadboedi adquiecbidi acte nantan tabadoata,” mimbi cac nēid macuēsh acte nantan tabadoatsiash. ²² “Ambi chiacpadomboen naquidquio Nuquin Papa nec,” queshun mimbi aid chianiac mimbi chiaid Nuquin Papan mibi nashuntsiash —quequin Esusēn abēd icquido chuipondash.

*¿Tsuntsin: Naic nid, cac nai? quequin Esus chuimiai
(Mad 11.27-33; Duc 20.1-8)*

²³ Adcuidanec Edusaden yacno padpidec nidshun Nuquin Papa tabadte shubu uashunaid daquēnē uaidēn puduedshun Esusēn Nuquin Papan chiaid chuipondash. Adsho tantiaahun con matses tsusiobon Esus chieshēnquidon chuituidpondash. —¿Tsuntsin: “Naic nid,” cac nai? En chui. Tantanu —caquien ²⁴ Esusēn: —En mimbia chui. Ēmbia tantianu. Mimbi chuisho tantiaahun ēbi namequidtsen chuinu. ²⁵ ¿Tsuntsin namiac Uan padon acten mentopadenec? ¿Ambembida napadenec? —capondash Esusēn. Adoquien badedquio chienquio yec uanotantsec tabadec onquecuededpondash Esus chieshēnquido. —¿Atotsi nuqui chuipeba? “Nuquin Papan namiaidquio Uan pado nepadenec,” cac Esusēn: “¿Atotsieshun aidēn chiacpadomboen nainquio ique?” canushe. Aden chienquien ictiad. ²⁶ Nuqui: “Ambembi napondash,” qesho tantiaahun nēmo icquidon nēishēnushē: “Nuquin Papan namiaid Uan pado niondash,” queshun. Aden chienquien ictiad —quepac caondash Esus chieshēnquido. Isadaidbo tsusiobobēdi nēish abided unēs uaquido chuiquid dapabo adpac caondash. ²⁷ Adashien Esus padpiden chuiuoic: —Tsauid. ¿Tsundan chiaquien nachitondash? —queshobien: —Mimbi chienquio icsho tantiaahun ēmbitsen ēbi namequid chienquio iquembi —capondash Esusēn abi chieshēnquido cuidquin chuiquin.

Mado daēdshun nacbimboecquido chiaid

²⁸ Adshumbic Esusën padpiden chuipondash. —Tantia. Mibi chuinu. Ëmbi chiaid tantiashun ¿mitsicquid: “Bëdambo iquec,” catsia? Dada aton mado daëdpambo icquid icpac caondash. Abentsëc chuiquin: “Neshcaic nid, mado,” cac: ²⁹ “Padi,” quec chieshuidboedi yuec-yuecpectsëctanec: “Tiedimbi neshcatanchitec,” quia sh neshcaic nidac caondash.

³⁰ Adshumbic amën aton mado utsi chuiquin: “Neshcaic nid, mado,” cac badedi: “Ai, adonona,” queboedi neshcaic nidenquoio icpac caondash.

³¹ ¿Mitsicquidën aton papan chiaçpadomboen napac caondash? En chui. Tantiyanu —caquien Esus chieshënquido: —Abia chiac chieshuidboedën —quesho tantiashumbien Esusën: —Adquidpenquien mibi nec. Mibi tantia-tiapimbo yec tabadnubi mimbi icsambo caido Nuquin Papa yacno puuedendac. Chieshuidacimboecquid aido nec. Aton matses piucquid bedshundenodo yec aton piucquid bednuen dada chudmeboedo chido yec quequin Nuquin Papa tantiabenash abëd tabadtequido yanendac. Mibien padenquoio iquec. ³² Uan pado acten mentoandenedën Nuquin Papan chiaid chuiquin bëdamboec tabadte chuipadenec. Adsho mimbi tantienquoio icnubi mimbi icsambo caidombi Nuquin Papa tantiabempondash. Adsho isun Uan padon chiaçpadomboen mibi icsaid ëntiadquidi mimbi ënenquoio iccondac. Aton papan chiaid niacquidbimboecquid mibi nec —quepondash Esus abi chieshënquido chieç.

Abi chieshënquido icsaid Esusën chuioid

(Mad 12.1-12; Duc 20.9-19)

³³ Adshumbic Esusën abi chieshënquido ompoacimboen chuipondash naden. —Tied icbon chetequid nidtsinac caondash. Adoshombic aid tied daquënë uatanquimbic chetequid chintetsen nacnempac caondash. Adoshombic: “Ampequid chosho isnu,” qeshun shubu abucquio icnuc shubu uapac caondash. Adoshombic: “Nëid tiedën caniquid chetequid iquec. Aid chequin ëbi neshcashunta,” utsibo canec ënapen nidpac caondash.

³⁴ Adash yuectaneshumbien abëd nidondaïdo aton yuabo chuiquin: “Nëen chetequid sinashe. Bedtan,” cac aton yuabo nidanepac caondash. ³⁵ Adec aton icbon tiedno nidaniacshobien neshcaquidon cudasënquin chieshëmpac caondash. Abentsëc cuesunetanquin utsi cuënoten seshunequiopac caondash. Utsibic cuesquin cuemepac caondash. ³⁶ Aden cuemiaid choshon chuituidaquien icbon nidboedtedpenquoio dadpenquoio aton yua utsibo chuipac caondash. “Bedtan,” cac nidanec tiedno choacsho isun adembidi cuesun siapac caondash.

³⁷ Adoacsho tantiash aton madombo caic: “Bedtan,” quepac caondash. “Con mado cuesunenquoio icquin ëmbi chetequid menetsiashe,” qeshun aton madotsen nidmepac caondash ³⁸ Adoac nidec aton papan tiedno choacsho chetequid cudasquidon: “Tied icbo unësan aidën natedi aton madon bedtsiashe. Nëbien aton mado cuesunetiad. Aid nibëdnuc icbo unësan aidën natedi nuquin nabi ictiashe,” qeshun ³⁹ tied tsitsuno buanshun cuesunepac caondash —quequin Esusën chuipondash.

⁴⁰ Adshumbic ambi chuiboedquido abi datsidadquido chuimenuen chuipondash. —Ëmbi chuiboed tantiash ¿atotsi mibi quepatsia? “Min mado cuesuniacosh,” cac ¿atotsi tied icbon napatsiashe? —quesho ⁴¹ tantiash datsidadquido: —Aido icsamboshë icsho comapenen cuidtsiashe. Adshumbic ambi chetequid sinacsho abi cudasënesambo utsibo aton tied neshcametsiashe —quecuededpondash datsidadquido.

⁴² Adsho tantiashun Esusën: —Ai, abimbo caic. Adembidi ambi chomiaid chieshënsho Nuquin Papan mibi cuidendac. ¿Nuquin Papan chiaid isabida ictio? Naden chiampid ma mimbi ispaboc.

“Buintad bēdambo icquid istuidashi: ‘Nēidquio shubu uanun nitsinēmbi,’ quetiadquidi isuidacimboen Nuquin Papan namiaid chieshēnac. Aden buintad isuidaid utsin bedshun shubu uanun nitsinacimboen Nuquin Papan tantiamiacpadomboen utsibon ambi namiaid tantiosh.

Adsho isun: ‘Nuquin Papan namiaid bēdambo iquec,’ caimbi,” quequin dada uapampic. ⁴³ Aden ambi namiaid ēbi chieshēnsho isash mibi caic Nuquin Papa nadpec. “Ēmbi con matses caid isadaidbo ēbi bēdamboen tantiametiadquidi chuiquid dapabon namenquio icsho isun ut-sibotsen: ‘Ēbi chuiquid icta,’ caindambi,” quepec Nuquin Papa. Aden ambi chiacpadquidēn bēdamboen chuibanac abi tantiaquido dadpen yanendac. ⁴⁴ Mibien Nuquin Papan cuidtequido nec. Cuēte uebudquin catashac canite uesadec podquēd-podquēdabimboecnuc mibi comapenen cuidendac — quepondash Esus abi chieshēnquido chiec.

⁴⁵ Adsho tantiaashun padiseyobobēdtan nēish abided unēs uaquido chuiquid dapabon: —Nuquien cachitec —quequin tantiabempanēdash. ⁴⁶ Adshumbic Esus cuesunemenuen bedtiadquio icquimbi bedenquio icpanēdash. —Abi datsidadquidon: “Nuquin Papan chiaid chuibanquidquio Esus nec,” queshun Esus bedsho isun nuqui cuesnushe —queshun aton matses dacuēdēnquin bedenquio icpanēdash.

22

Cacuidanaiid chiaid (Duc 14.15-24)

¹ Adshumbic Esusēn padpiden ompoacimboembidi chuipondash naden. ² —Tantia. Isadaidbon nacpadomboen aton mado chido bednuesho tantiaashun amēn matses dadpen: “Pec cho,” cauidaid mibi chuinu. ³ Chuiquid dapan aton yuabo chuiquin: “ ‘Con icbon madon chido bedeqe. Aidbēd cuishonquenuen pec cho,’ quequin ēmbi tantiaidotedi chuitan,” cac yuabon chuitanaquid choenquio icpac caondash.

⁴ Adsho isumbien chuiquid dapan aton yua utsibo chuiquin: “Nēish nua bēchichoquidquio dadpen codoquiacoshe. Padpiden chuitan,” cac chuitanoaquid ⁵ choenquibidi icpac caondash. “Adec cacuidanquie abentsēc aton tied nantan nidnubi utsi piucquid bednuequin ambi aton na menebante shubuno nidpac caondash. ⁶ Utsimbic abi: “Pec cho,” cashobi yuabo mēyanquin cuesun secapac caondash.

⁷ Adoshobien chuiquid dapan nēishantquin shēpiapac caondash. “Uesquin cuesun siatan,” cac aton sondado chedon aton yuabo cuesun siaquido uesquin cuesun secatanquin aton shubutsen uesquin nēdēncapac caondash.

⁸ Adomeboshombic chuiquid dapan: “Abi pete codocaid dadpen iqueque. ‘Pec cho,’ cac cacuidanoshe. Utsibo chuitan. ⁹ Ēmbi: ‘Pec cho,’ cacmaidobi chuibenetan. Podquedēn nidquin mimbi istuidaidtedi: ‘Pec cho,’ cabenatan,” cac nidshun ¹⁰ ambi istuidaidtedi chuibenetanac matses dadpenquio pec cho-chopac caondash. Icsambo icquidobēdi bēdambo icquido cho-choash chuiquid dapan shubun puduedash pec tabadte quēnē dapan tabadcuēded-pac caondash tsucus-tsucustsēcquio yec.

¹¹ Adshun chuiquid dapantsen puduedshun isquien dashcute bēdaidquio dasiuidabi icquid abentsēc tsadtsec. ¹² Adshobien chuiquid dapan: “‘¿Atotsi quiaish dashcute bēdaidquio dasiuidambobi cho, buchi?’” caqui ēcbedenquio yec tsadec. ¹³ Adshobien chuiquid dapan: “ ‘Chido bedacno isnuec dashcute bēdaidquio dasiuidquid,’ quepadenec. Mibi icsambo iqueque. Mibi cuidnu,”

queshun aton yuabo chiec: “Shëbunshun buanshun icsano netan,” capac caondash. Adoac taneshun netanac mëyadquieq natiaic shubiquiopac caondash.

¹⁴ Adembidi Nuquin Papan ambi matses bëdamboen iste dadpen tantiamaqui utsin-utsinquien tantienquoio iquendac. “Abi yacno puduednu,” queuidboedi bëdambo icte bunenquoio yec abi tantiatiapimbo icscho Nuquin Papan comapenen cuidendac. Utsi daëdpacksëquien Nuquin Papan tantiacpadec abëd tabadtequid iquendac –quequin Esusën chuipondash.

Chuiquid dapa piucquid menete chiaid
(Mad 12.13-17; Duc 20.20-26)

¹⁵ Adsho tantianec nidash abi chieshënquido padiseyobo: –Esus icsamboen chuimenuna. Icsamboen chuisho tantiashun bedshun unës uamechitono –queshun ambi chuibanquin tantiamiaido chuipac caondash.

¹⁶ –Icsamboen chuimetan –caquien chuiquid dapa Edodes caid tantiacquidobëdtan icsamboen chuimenuc cho-choshon chuituidpondash. –Bëdamboen chuiquid mibi neque. En ëbi chui. Tantianu. Muesambo icquin Nuquin Papan chiapadec bëdamboec tabadte mimbi abimbo chuihoc. Matses dacuëdënenquoio icquin Nuquin Papan chiaidquoio mimbi chuihoc.

¹⁷ Adquid icquin ¿atotsi mimbi chuipe? Tantianu. Chui. Nuquin matses yuaquid chuiquid dapa Sesad caidën: “Piucquid shocoshëmpi dadpen beccho,” cac nuqui meniäc ¿ada bëdambo icpatsiash? –capondash. ¹⁸ Adoquien Esusën ambembi tantiashun: –Bëdambo icquid damianquieq mibi muambo nec. ¿Atotsieshun ëbi icsamboen chuimetadquoio ique? –quetanquin:

¹⁹ –Chuiquid dapa menetequid piucquid shocoshëmpi beccho –ambi cac ²⁰ bësho bedshun Esusën chuipondash. –¿Në tsutsibimboecnuc dada uaid në iquec? ¿Tsutsi cuëmëdquidbëdta dada uac? En chui. Tantianu –caquien: ²¹ –

Ma nuqui yuaquid chuiquid dapambo Sesad neyoc –quepondash. Adsho tantiashumbien Esusën: –Abibimboecnuc dada uaid abi cuëmëdquid dada uaid bedtequid shocosh icnuc Sesadën na neque. Icbon: “Beccho,” cac meneta. Adëcbidi Nuquin Papa nuquin Icbombo neque. Aidën chiapadomboen nabanta –quequin Esusën bëdamboen chuipondash. ²² Adsho tantiash icsamboen chuimetadquoio icboedi: –Bëdamboen chuipec –quetanec nidanepondash.

Matses uincuemete chiaid
(Mad 12.18-27; Duc 20.27-40)

²³ Adnubien aid ushëmbi Saduseyobo: –Matses unësaid uincuenesambo nec –quequidotsen: –Esus icsamboen chuimenu –quec cho-chopondash.

²⁴ –Bëdamboen chuiquidquoio mibi neque. Mimbi chuisho tantianu. ¿Mitsipaden mimbi chuipatsia? Nuquin tsusedpa Moisesën naden chuiquin dada uapampic. “Aton chido bedash bacuë tishmiabi unësacsho aton utsin aid chido bedshun: ‘Con buchïn bacuëbo nibëdeque. Con buchïn madobimboecnuc tishmenu,’ quequin tishmequid,” quequin Moisesën dada uapampic.

²⁵ Aid tantiaquin chuinu. Dada aton utsibobëd tabadpac caondash. Aton utsibo seistedi icpac caondash. Bëyucquid aton chido bedashi bacuë tishmiabi unësac caondash. Adsho isun abi tsibanquidën aidën chido bedash

²⁶ bacuë tishmiambobidi unësoapac caondash. Adsho isun aid tsibanquidën aid chidobidi bedoashic bacuë tishmiambobidi unësoapac caondash. Adenuidi abi tsibanquidën abi tsibanquidënquien aton buchï unësän-unësanquien aid chidouidi beduid-beduidpac caondash. Bacuë tishmiabi-tishmiabiec abitedi unësbudnepac caondash. ²⁷ Adashic bacuë tishambobi aid chidotsen

unëspac caondash. ²⁸ Aid abitedi uincuemiac ζmitsicquidën chido icpatsiash? —caquien ²⁹ Esusën: —Nuquin Papan chiaidquio tantienquio icquin Nuquin Papan nadatiambo icquin nabanquin uincuemete mimbi tantienquie iqueue. Chuinu. Tantia.

³⁰ Uincuemiac dadan aton chido bedesa. Adembidi amën aton champi menesa. Nuquin Papan abi yacnoshon uaido mayan bédabobimboec matses uincuemiaido iquendac. Aden uincuemiaidën chido bedesa —quepondash Esus. ³¹ Adshumbic padpiden chuipondash. —Ambi unësaid uincuemete chuiquin Nuquin Papan dada uamepampid ζisbanabida ictio? Ma mimbi aid isbampaboc. ³² Naden dada uapampic. “Abaduan caid yec Acobo caid yec Isac caid yec quequidtedishun ëbi Papa capec,” quepampic Nuquin Papa ënden unësampid chiequi. Unësun matses tantienquien mimbi danec. Unësash aton dada chodquiambic aton tantiate unësambo icnuc abi Nuquin Papa tantiatsiash —quepondash Esus. ³³ Adsho tantiash abi datsidadquido: —ζMitsipadquid nepec? Bédamboenshëen chuipec —quepondash.

*Moisesën dada uampid chiaid
(Mad 12.28-34)*

³⁴ Aden unësaid uincuemete chuisho tantiashumbien Saduseyobon padpiden: —En chui —cainquio icpondash. Adsho isashien Esus chieshënuquid utsibo Padiseyobo: —Nuquin Papan chiaid Esus icsamboen chuimenu. Nid —quianec Esus chuimec cho-chopondash. ³⁵ Cho-choquin abentsëcshun Nuquin Papan Moises dada uamiampid tantiaquidquio icquin chuimetuidpondash. ³⁶ —Chuiquidquio mibi neque. En ëbi chui. Tantanu. Nuquin tsusedpa Moisesën dada uaquin dadpen chiampic. ζMitsicquid abentsëc ëmbi nasho Nuquin Papan: “Bédamboshë iquec,” capatsiash? —caquien ³⁷ Esus: —“Nuquin Papa tantiaquiec ambi chiacpadec tabadte bunquiota,” quequin ³⁸ chiampidba naic Nuquin Papan chiacpadec mibi bédamboec tabadtsiandac. ³⁹ Adembidi Moisesën chiampid utsitsen naic matses bédamboec tabadtsiash. “Min dada mibibi datantiadacimboen utsibotsen tantiaquiota,” quequin chiampicpadomboen nasho Nuquin Papan bédambo catsiash. ⁴⁰ Aden matses bédamboen namenuen Nuquin Papan ambi chiaid utsi abitedi Moisesba chuishun nuquin tsusedpa utsibo chuiquin dada uamepampic —quequin Esusën bédamboen chuipondash abi chieshënuquido chuiquin.

*Nuquin Papan chomiaidquio chiaid
(Mad 12.35-37; Duc 20.41-44)*

⁴¹ Adshumbic Esusëtsen abi icsamboen chuimete bunquido Padiseyobo chuipondash. ⁴² —Ëmbitsen mibi chuimenu. Tantia. Nuquin Papan chomiaid ζmitsipadquid nec? ζMatsesën madouidida nepec? —capondash Esusën abibi cadquimbi. Adoquien badedi: —Nuquin tsusedpa yampid Dabidën tsyuecquid icsho Dabidën mado caimbi —quepondash Padiseyobo.

⁴³ Adsho tantiashumbien Esusën: —ζBédamboenda chuidio? Mimbi chiacpadquid aton mado icsho ζatotsieshun Nuquin Papan Mayanën tantiamiacpadomboen Dabidën con Icho capampic? Naden Dabidën dada uapampic.

⁴⁴ “Nuquin Papan con Icho naden chiendac.

‘Con abiuc tsadash abitedishun Icbombo icnush nëmbo cho.

Mibi chieshënuquidobi con Icho mibi camenu,’ quequin Nuquin Papan con Icho chiendac,”

quequin Dabidën dada uapampic. ⁴⁵ Con mado cainquio icquin con Icho capampic Dabidën. ζAtotsieshun mimbi: “Dabidën mado nec,” quequin tantiap? —caquien ⁴⁶ ëcbedenquio yec otacquio tabadpondash. Esusën

bédamboen chuisho tantiash: —Icsamboen chienquien icchitec. Ēmbi padpiden: “Icsamboen chuimenu,” cac bédamboembidi chuiotsiash —qeshun abi chieshēnquido abitedishun Esus padpiden chuimenquo icquin ēnaccondash.

23

Bédambo icquid damianquido tanenda, quiaid
(*Mad 12.38-39; Duc 11.43, 46; 20.46*)

¹ Adshumbic Esusēn abēd icquidobēdta abi datsidadquido tantiamequin chuipondash. ² —Tantia. Moisesēn dada uampid chuibanquidobēdntan tsusedpabon chiampid namequido Padiseyobon naid mibi chinu. Aidon: “Moisesēn chiampicpadomboen nata,” quequin nuquin matses isadaidbo chuidenepec. ³ Aden Moisesēn dada uampid abimbo chiac adenuidi mimi nac bédambo ictsiash. Aden naquin padiseyobon nacpadomboen nainda. Aidon Moisesēn chiampid chuiquimbi ambibi aidēn chiaid niac-niaquec. ⁴ Chieshēmēnquido nec. Nuquin Papan chiaid nametiadquidēmbi tsusedpabon ambembi chiaid dadpenquo namepec chushcanquin. “Matsesēn aitedi natiapimbo iquec. Padi icnuna. Nuquin matsesēn chiampitēdi nainda,” catiadquidi adoenuquo iquec.

⁵ Aden padiseyobon Nuquin Papa tantiaquidquo damequin matses ismenuenuidi naic. Nuquin Papan chiaid dada uaidēmpi sauedtsash bēdectamēdec abiuc daēdi pēdectamēdec qeshun matses ismenuenuidi naic. Adembidi aton dashcute tēdiadte nacnenuquin: “‘Nuquin Papa chianequidquo nec,’ ma ēbi canu,” qeshun sedquid shoyonaid ēnapenpactsēcnuc cuididicash matses ismenuec matses tabadacno capucenepec. Adec Nuquin Papa chianequid damianquiec. ⁶ “Chuiquid dapa nec,” cameteuidi bunec. Isedec puduedash: “Chuiquid dapa icsho icbon abēdi tsadmequid,” quiash icbobēdi tsadte bunquieci. Nuquin Papan chiaid chuibante shubun puduedash: “Tsusio dapambo nec,” camenuc utsibobēd tabadenquo yec tsusiobobēduidi tabadquid nec. ⁷ “Chuiquidquo yec mibi bédambo iquec,” camete bunquieci matses dadpen tabadacno nidtenepec.

⁸ Mibitsen adenda. Utsibo: “Mibiuidtsēqui bédambo iquec, Icbo,” camenuc adenda. Min Icbo abentsēcquiobi ēbi iquec. Ēbi abentsēqui con Icbo cata. Con yuabo yec con utsibo mibi neque. Bédamboec isnanta. ⁹ Adembidi mibi chuibanquid chuiquimbi: “Mibiuidtsēqui bédambo iquec, Papa,” cainda. Nuquin Papauidtsēqui aden chuita. ¹⁰ Adembidi: “Chuiquid dapa yec mibiuidtsēqui bédambo iquec,” utsibo camenuenuidi nainda. Ēbiuidtsēqui mibi chuiquid dapa nec. Nuquin Papa yacnuēshquo choquid ēbipadquidquo utsi nibēdec.

¹¹ Padnuen ambi chiacpadomboen utsibo nashunquidquo utsibo dēniacte bunenuquo icquid Nuquin Papan bédamboshē catsiash. ¹² Utsien abibi cadequi: “Ēbiuidtsēqui bédambo iquec,” quequin utsibo ismenuenuidi naquido Nuquin Papan icsambo catsiash. Utsibic Nuquin Papan chiacpadomboen naquin utsibo nashunquid yec utsibo ismeteuidi bunenuquo icsho Nuquin Papan bédambo caindac —quepondash Esus abi datsidadaido chieci.

Abi chieshēnquido Esusēn chushcaid
(*Mad 12.40; Duc 11.39-45, 52; 20.47*)

¹³ Adshumbic abi chieshēnquidotsen chuipondash. —Tantia. Moisesēn chiampid chuibanquidobēdta Padiseyobo mibi chinu. Nuquin Papan cuidtequidombo mibi nec. Bédambo icquid damianquieci mibi icsambo iquec. Nuquin matses: “Nuquin Papabēd tabadte tantianu,” qeshobi

mimbi bēdamboen chienquoio iquec. Ēm̄bi Nuquin Papabēd tabadte bēdamboen chuisho mimbi tantienquoio iquec. Aden tantienquoio icquin: “Aidēn chiaid tantienda,” quequin mimbi utsibotsen Nuquin Papabēd tabadte tantiameti-apimbo iquec.

14 Nuquin Papan cuidtequido mibi nec. Muaquin unēsboedēn niante piucquid bedshunquido mibi nec. Nuquin Papa tantiaquidquo damenuen utsibo tantiamequinuidi buēdpambo cuēdquin Nuquin Papa chiacbimboen mimbi chianepec. Aid abimbo mimbi chienquoio iquec. Adēc chieshanquiecsho isun Nuquin Papan mibi comapen cuidendac.

15 Nuquin Papan cuidtequido mibi nec. Mimbi tantiacpadomboenuidi tantiamenuen mimbi matses utsibo chuiben-chuibenec. Nīdaid utsi-utsiec yacno nidshun mimbi chuibenesho tantiaquido mimbi tantiacpadquo yanash Satanasēn yuambo yanec Nuquin Papan cuidtequidom̄bo iquendac.

16 Nuquin Papan cuidtequido mibi nec. Isadaidbo chuiquid icquin bēdamboen tantiamenuen mimbi icchitec. “ ‘Nuquin Papa utsi uatiapimbo yacpaden abimbo caimbi,’ quequid muaisa nec. Muaquidēn Nuquin Papan chiaid niacquid,” quetiadquidi mibi adenquoio iccoc. “ ‘Nuquin Papa tabadte shubu uashunaid utsi uatiapimbo yacpaden abimbo chiombi,’ quequid muesa nec,” quetiadquidi mibi adenquoio iccoc. Padenquoio yec: “ ‘Nuquin Papa tabadte shubu uashunaid dapan icquid shocosh piu nacne-aidquoio utsi uatiapimbo yacpaden abimbo chiombi,’ quequid muesa nec,” quechitequien mibi iquec. 17 Aden tantienquoio icquin mimbi icsamboen chiec. Nuquin Papa tabadte shubu uashunaid Nuquin Papa tabadtequid yec ¿bēdapenquioda icpec? “Aid bēdamboshē icnubi aid nuntan icquid bēdiactšēc bēdambo iquec,” caimbi. Mimbien icsamboen tantiec. 18 Nadentsen mimbi icsamboen chiec. “ ‘Nuquin Papa tabadte shubu uashunaid dapa yacnoshon: Mabi Nuquin Papan bēdamboen isnu, quequin nēish picchate nacneaid dapa utsi uatiapimbo yacpaden abimbo caimbi,’ quequid muesa nec,” quetiadquidi mibi adenquoio iccoc. “ ‘Nuquin Papa mabi bēdamboen isnequin picchatequid nēish utsi uatiapimbo yacpaden abimbo caimbi,’ quequid muesa nec,” mibi quepec. 19 ¿Adenda mimbi bēdamboen chuipe? Pashuacimboen mimbi bēdamboen tantienquoio iquec. ¿Mitsicquid bēdambo iquec? “Mabi Nuquin Papan bēdamboen isnu,” quequin nēish picchate nacneaid dapa bēdambo icnuc aidēn picchatequidi nēishquoio bēdapabi ictsec. Nuquin Papamboen bēdamboshē iquec. 20 Nēish picchate nacneaid caic: “Aid utsi uatiapimbo yacpaden abimbo caimbi,” quequin aid nantequid nēish abitedi chiaidbidi nec. Adembidi ambi: “Mabi bēdamboen isnu,” caid Nuquin Papatsen chuipec. 21 Adembidi Nuquin Papa tabadte shubu uashunaid caic: “Aid utsi uatiapimbo yacpaden abimbo caimbi,” quequin ambo tabadquid Nuquin Papatsen mimbi chiec. 22 Adembidi abu caic: “Abu utsi uatiapimbo yacpaden abimbo caimbi,” quequin Nuquin Papa tsadaidsen chiec. Nuquin Papa tsadaid cain Nuquin Papambo chiec. Aidēn chiaidquoio tantiec: “Abimbo cacbimboen chuiquid icsaquid nec,” quetiadquidi mibi adenquoio iccoc.

23 Bēdambo icquid damianquid yec Nuquin Papan cuidtequido mibi nec. Nuquin Papan chiaid abentsēqui tantiatsēcquin min tiedēn cansēcquid musuquēmpi bedshun Nuquin Papa mimbi menepc. Aden menequid icquimbi mimbi Nuquin Papan chiaid utsi dadpen niac-niacpec. Chieshēmianquid icboedi: “Ēbi bēdamboen ista,” quesho bēdamboen istiapimbo mibi iquec. Adembidi bēdambo icquidi muauaquin mimbi tsusio icsamboen cuidmec. Adembidi mimbi Nuquin Papa abimbo tantienquoio iquec. Aden mimbi Nuquin Papan chiaid niac-niacpec. Ambi chiacpadomboen Nuquin Papa menequid icquimbi ambi chiaid utsi abitedi natiadquidi ma

mimbi nainquo icpaboc. ²⁴ Tantesa uatsëcquimbi mimbi utsibo icsamboen chiec. Manuampi nibedbantsëcquimbi utsi nuacquid nibedquiabi abi nësamëdpanumbobi acacimboembien mimbi nachitec. “Nuquin Papa meneta,” quequin chiaiduidtsëqui natsëcshun adenuidtsëqui mimbi utsibo namepec. Adenuidtsëqui namequimbi Nuquin Papan chiaid utsien mimbi niac-niacchitec.

²⁵ Nuquin Papan cuidtequido mibi nec. Padiseyobo yec Moisesën dada uapampid chuibanquido yec quequimbi mimbi icsamboen naic. Pada-padaidbëdta dëshote chieshquin cachocuidtsëqui dapanshun anauc ampanambo icquidi ampanaid damianacimboec mibi bëdamboec tabadquid damianquie. Nuquin Papan chiaid dadpen nainquo icquin mitsanauidi bednuen mibi bunaiduidi mimbi napec. ²⁶ Pamumëdacimboec tantiatiapimbo mibi iquec. Dëshote abichobi bëdamboen ampanacimboec icsaid ucodash bëdambo icta. Adec icsainquo yec ënëdash Nuquin Papan chiacpadec mibi bëdamboec tabadtsiac.

²⁷ Bëdamboec tabadquido mimbi damesho isun Nuquin Papan mibi cuidendac. Unësaid chococacno bëdamboen nacnenac bëdambo isadec ënden pisenambi. ²⁸ Adembidi bëdamboec tabadquid mimbi damec. Matses ismec bëdamboec tabadshumbic omposhon Nuquin Papan chiaid niac-niacquin mimbi natemaidien mimbi nachitec.

*Padiseyobo chedo cuidte chiaid
(Duc 11.47-51)*

²⁹ Nuquin Papan cuidtequidombo mibi nec. Nuquin Papan oncamiadobëdta bëdamboec tabadquido nuquin tsusedpabon unës uampido tantiaquin aido chococampicno shubu uaqin mimbi nacnempec. ³⁰ Adoshombic: “Nëmbo con tsusedpabon chieshënquin unës uampid chococac. Aidbëd tabadquin ëmbi unës uainquo ictsenëdac. Èmbien bëdamboen istsenëdac,” qeshun mimbi aido chococacno nacnempec. ³¹ Adoboedëmbi nuquin tsusedpabon bëdambo icquid unës uampicpadomboen adoante bunquin mimbitsen chieshtoshon adoaindac. ³² Ai, nuquin tsusedpabon Nuquin Papan oncamiampid unës uacpadombota —quepondash Esus abi unës uate chiec.

³³ Adashic abi padiseyobo chiec: —Nisibimboec icsa uanquido mibi nec. Adquido icsho Nuquin Papan icsano nësecaquin mibi cuidendac. ³⁴ Icsaido icsho isun: “Ma Nuquin Papan bëdamboen iste tantiamenu,” qeshun Nuquin Papan chiaid chuibanquido utsi-utsien mibi yacno nidmendambi. Adquid mibi yacno cho-choacsho mimbi dadpen unës uaindac. Utsi-utsien cuesten dectanquin utsi-utsien Nuquin Papan chiaid chuibante shubunoshon cueshcaten mimbi cueshcaindac. Utsi-utsien cuesnuequin nadancatanequin shubu utsin shubu utsinquien mimbi cuemetanendac. ³⁵ Adosho isun Nuquin Papan mibi cuidendac. Nuquin Papan chiacpadec bëdamboec tabadsho tsusedpan chieshënquin tauamboen cuesuniampid Abed nepampic. Adoshombic adecbidi bëdamboec tabadsho tsusedpa utsibon utsi-utsien unës uapampic. Adoshombic ënquin Bedequias caidën mado Sacadias caid unës uapampic. Aidi Nuquin Papa tabadte shubu uashunaid dayunshunquo cuesunepampic. Aidedi unës uampido tantiaquin aido unës uaquido cuidacimboen Nuquin Papan mibitsen cuidquiendac. ³⁶ “Yuecshun min tsyuecquido cuidendac,” quec nenquo iquebi. Nëbi caimbi —capondash Esusën abi chieshënquido chuiquin.

*Edusaden yacnocquido Esusën shubi uaid
(Duc 13.34-35)*

³⁷ Adshumbic Esusën chuiopondash. —Tantia, Edusaden yacnocquido. Mibitsen chuinu. Mibi tantiac unësquio iquec. Mibi yacnobidi tabadquin Nuquin Papan oncamaidon chuisho nuquin tsusedpabon unës uapampic. Adebidi Nuquin Papan: “Isadaidbo chiec nid,” caido chosho utsi-utsien cuënoten seshunequiopampic. Adebidi mimbi nëbi naindac. Adquidombo icsho mibi tantiaquiëmbi. ¿Mitsipadec cachina aton bacuë cudaspec? “Penushe,” quiaish aton bacuëmpi nua shoccoshon madadec cudasquid. Adebidi: “Satanasën yuanushe,” quiaish cacquieq mibi Nuquin Papa bëdamboen ismete tantiametiadquio iccobi. “Tantiamenu,” cac tantiate bunenquio mibi icchitoc. ³⁸ Èbi nidambic èbi tantiatiapimbo icsho Nuquin Papan namiac min shububëdtabi mibi nibëdamendac. ³⁹ Nëbi mimbi èbi isenquio yanendac. Padnuen min matsesën yuecash chosho èbi isendac. Aden isash: “Nuquin Papa yacnuësh choquid bëdambo iquec,” min matses quendac —quequin Edusaden yacnocquido Esusën chuiopondash.

24

Nuquin Papa tabadte shubu uashunaid nibëdante chiaid (Mad 13.1-2; Duc 21.5-6)

¹ Adash Nuquin Papa tabadte shubu uashunaid daquënë uacno tabadanec nidequi Esusbëd icquido Nuquin Papa tabadte shubu uashunaid caic: —En is, Icho. Nëid shubu bëdamboen nacnenaidquio neque —quepondash. ² Adsho tantiaishun Esusën: —Mimbi isboedquio cuënote bëdamboen nacnenaid matses utsibon cuënote chic-chiquendac nibëdquiecnuc —capondash.

Nuquin Papan cuidte ushë chiaid (Mad 13.3-13; Duc 21.7-19)

³ Adanec nidequi macuësh dapa Odibos caidën pudundoec poctsebi tabadtuidshun abëd icquidon utsibo tantiamenquio icquin Esus chuiopondash. —En mibi chote chui. Tantiyanu. “Nëbi choec,” quequin mibi chote ¿mitsipadembimbi tantiape? Adebidi ¿atotsi isashini: “Nuquin Papan cuidte nëbi nec,” quepe? —capondash abëd icquidon. ⁴ Adoquien Esusën naden chuiopondash: —Tantia. Mibi chuinu. Muaquidoba choendac. Aidon chuisho tantiaish: “Abimboen chuichitec,” quenda. ⁵ Adquido choshon: “Nuquin Papan chomiaidquio Quidistu caid nebi,” quequin muaquin chiaqui dadpeshun: “Ai, abimboen mimbi caic,” capendac.

⁶ Èbi choabi icnuc: “Matses dadpenquio cuesnan-cuesnanac caosh,” quecuededendac. Adsho tantiaish dacuëdenda. Nuquin Papan matses abitedi cuidte ushë choabi icnuc ambi tantiacpadec matses adonanendac. ⁷ Adec matses utsi dadpen icquido matses utsibobëd cuesnanendac. Nidaid utsi-utsiec yacno pete nibëdquieq icted-ictedendac. Nidaid utsi-utsiec yacno nidaidquiobi comapenec uëdëquedenendac. ⁸ Adsho isash chido bacuë nëncuenacsho isun: “Nëbien tishchitec,” quequin tantiacbimboen tantiaata. “Nuquin Papan abitedi cuidte nëbi nec,” quequin tantiaata —quepondash Esus.

⁹ Adashic abi onquec: —Èmbi chiacpadquio icnuc chieshëmënuquidon èbi tantiaquido bedshun chieshënquin utsi-utsien cuesendac. Utsi-utsien unës uaindac. Aden nidaid utsi-utsiec yacno tabadquidon dadpeshun èbi tantiaquido chieshënquindac. ¹⁰ Adoac èbi tantiatsechoedëmbi chieshtoshon èbi tantienquio yanendac. Aidëmbi èbi tantiaquid omopdacsho istuidmeshun mëyamendac. Adashic abipadquid utsibobëd chieshënanendac.

¹¹ Padnuen muaquido: “Nuquin Papan chuiopondash chuinu. Tantia,” quependac dadpen. Adsho tantiaishun dadpeshun: “Ai, abimboen mimbi

chiec,” caindac. ¹² Matses dadpenquoio icsamboecshë tabadsho isun ëbi tantiatsëcboedëmbi ëbi tantienquoio yanendac. ¹³ Padnuembi ëbi choabi icshobi ënenquoio icquin ëbi tantiaquido Nuquin Papa yacno tabadmendac.

¹⁴ Ëbi choabi icnuc: “Ma matses abitedishun Nuquin Papabëd tabadte tantianu,” qeshun ëbi tantiaquidon nidaid utsi-utsiec yacno nidshun chuiben-chuibenendac. Matses abitedi chuibenequin nainambi choaindabi –quepondash Esus.

Matses icsamboshë icquid chote chiaid
(*Mad 13.14-20; Duc 21.20-24; 17.22-24*)

¹⁵ Adashic abi onquec: –Ëbi chote ushë nëbi yanuc matses icsamboshë icquid Nuquin Papa tabadte shubu uashunaid dapa icsa uanuec puduedshun: “Mimbi Nuquin Papa caid tantienda. Ëmbi chiacpadomboenuidi nata,” quequin Nuquin Papa chieshënquin chiendac. Ëndenquimbo nuquin tsusedpa Danied caidën aden icsa uate chuiquin Nuquin Papan chiaid dada uapampic. Aidën dada uampid mimbi isaidquoio nec. ¹⁶ Aden: “Nuquin Papa tabadte shubu uashunaid dapa icsa uanuec puduedosh,” qesho tantiash Udeya yacnocquido macuësh dapa yacno ompodec cuenac bëdambo ictsias.

¹⁷ Adec cuenec shubu dayun icquido puduedenquoio yec: “Con na bednu,” quenquoio yec umanucuëshi cuenac bëdambo ictsias. ¹⁸ Adecbidi badedquoio cuenuen tied nantan icquidon aton dashcute utsi aton shubuno beduanenquoio yac bëdambo ictsias. ¹⁹ Nidequi bacuë usunquid yec bacuë chishmequid yec quec badedquoio cuentiapimbo yec mëyadquiendac. ²⁰ Adec cuente tantiec: “Ue sequenumbo cuemenquoio icpashuni,” queta. “Pete bedmianenquoio icnushe,” quiashe “Chonoadenquoio ichte ushënquoio cuemenquoio icpashuni,” queoata. ²¹ Aden Nuquin Papa tabadte shubu uashunaid dapa icsa uate bunquid icsamboshë icquid choan matses dadpenquoio natiambo chieshëmënquiec tabadendac. Nuquin Papan tauamboen matses uac adec tabadenquoio ictenec. Nëbi adec tabadenquoio iquec. Aido icsamboecshë tabadquido nibëdanambic utsibo adquidpenquoio yanoaindac. ²² Adec icsamboecshë tabadte tantiaquin Nuquin Papan: “Ëmbi Esus tantiaquid icmiaido uesquin cuesun sianushe. Matses abitedi nibëdanushe,” qeshun yuenquoio icsamboen tabadmenquoio icquin ënëdmendac –quepondash Esus.

²³ Nuquin Papan aden ënëdmiabi yac icsamboecshë tabadec utsibo: “Is. Nëid Nuquin Papan chomiaidquoio Quidistu neque,” quependac. Utsibic: “Is. Nëidquien Nuquin Papan chomiaidquoio Quidistu caid neque,” quequin icsamboen chuioaindac. Adsho tantiashun: “Nuquin Icho Esus choashien nec,” cainda.

²⁴ Adec muaquidoba choendac. “Nuquin Papan chomiaidquoio nebique. Is,” quequin comapenen tantiaquin nabanquin ismendac. Utsibontsen: “Nuquin Papan oncamiad nebique. Is,” quequin nadatiambo icquin nabanquin ismendac. Adsho isun dadpenhshun: “Ai, abimbo caic,” caindac. Padnuen Nuquin Papan: “Muambo nec,” quequin tantiamiabi yac ëbi tantiaquidontsen: “Ai, abimbo caic,” catsempendac. Nuquin Papan bëdamboen tantiamiado yec adtiapimbo iquendac. ²⁵ “ ‘Chieshëmënquido iquendac,’ quequin tantienquoio icquidën ëbi tantienquoio yanushe,” qeshun: “Aden ëbi tantiaquido chieshënquiendac,” quequin chiombi –quepondash Esus.

²⁶ Adashic padpidec onquec: –Ëmbi aden chuiboed tantiashun utsibo muasho tantienda. Ëbi caic: “Utsibo ismenquoio yec matses nibëdacno choac caoshe. Isnu. Nid,” cac istanenda. Adembidi: “Choash nëid shubun puduedac caoshe. Isnu. Nid,” cac adembidi istanenda. Muambo neque.

²⁷ Ëbimbo padpidec choquimbimbi abitedimbo ismendac. Abu ushëmbo

yec bed-bedquetanesho ¿ada matsesën abitedishunquo isenquo icpadic? Ai, isec. Adembidi ëbi choasho matses abitedishunquo isendac. ²⁸ Adec choendabi. ¿Ada edeste pisen chec budenquo icpadic? Ai, budec. Adechidi Nuquin Papan cuidte ushë chonoc choendabi –quepondash Esus.

Abi chote Esusën chiaid
(*Mad 13.24-37; Duc 21.25-33*)

²⁹ Adashic padpiden chiec: –Aden matses icsamboshë icquidon ëbi tantiaquido natiamenubi ushë chënquenquo yanendac. Inchëshën ushëtsen chënquenquo yanendac. Uispa chedo paëdbudnendac. Uispabimboecquid abitedimbo uedëquendac. ³⁰ Adnubini abitedishun Icho yec dacuëdampambo yec abucüesh choendac. Ëbi nadatiambo icquin nabanquidquo yec chosho isash cuidadtequido abitedimbo dacuëdec natiaic shubiquiendac. ³¹ Adnuc nua shoncanubimbi Nuquin Papan abi yacnoshon uaido mayan bédabo: “Bedtan,” caindac. Adoac nidaid utsi-utsiec yacno nidshun ëbi tantiaquido abitedimbo bedtanendac.

³² Ëmbi chuibocpadquiec yansho isun: “Esus chote nëbi nec,” quequin tantiata. ¿Mitsipaden: “Seta taëec,” quequin tantiapec? Suc seccuduquiaid isun: “Nëbi seta taëec,” quequin tantiaquid. ³³ Adembidi ëmbi chuibocpad isun: “Nëbimbobi Esus choec,” quequin tantiata. ³⁴ ¿Muectabi nedi? Ëmbi chuibocpadquo iquendac. Ëmbi chiacpadec yanabi matses abitedi nibédantiapimbo iquendac. ³⁵ Abimbo caimbi. Abu nibédanendac. Nidaidtsen nibédanendac. Padnuen ëmbi chuiboedquo nibédantiapimbo iquendac. Bënudenquo iquendac. Ucuttiapimbo iquendac. Ëmbi chuibocpadquo iquendac –quepondash Esus abëd icquido chiec.

Esus chote ushë tantienquo icte chiaid
(*Mad 13.32-33; Duc 17.26-35*)

³⁶ Adashic abi onquec Esus: –Ëbi chote tantienquo iquembi. “Aid ushënquo choendabi,” quetiapimbo iquebi. Adembidi mayan bédabon tantienquo iquec. Ëmbibi Nuquin Papan Madonquiobi tantienquo iquembi. Nuquin Papanuidtsëquien tantiec. ³⁷ Matses ëbi caic: “Nëbi choec,” quetiapimbo icnuc choendabi. Noen cano nacnenubi ¿mitsipaden aton matses icsambo icquidon tantiapampic? ³⁸ Nidaid abichobi mauanabi icnuc: “Nuquin Papan nuqui cuidendac,” quequin tantienquo icquin peshun acquin aton chido bedquinc aton champi bedmequinc capampic. Adnubien Noe Nuquin Papan chiacpadomboen cano dapa anshubu uaquin nacnenash pudedpampic. ³⁹ Aton matses: “Nëbimbobini Nuquin Papan cuidchitec,” quenquo icnubi ue dapambo choec mauanquidën matses abitedimbo unësbudnepampic Noe ambi cano anshubu uaidën nuadtonobi. Adechidi Nuquin Papan cuidtequido ëbi caic: “Choec,” quenquo icnubini choendac.

⁴⁰ Choquin Nuquin Papa yacno tabadmenuen beduamendambi. Ëmbi: “Bedtan,” cac tied nantan dada daëd icsho istuidshun ëbi tantiaquid abentsëc icsho beduanendac. Utsibic ëbi tantiesä icsho nianendac. ⁴¹ Adembidi Nuquin Papa yacno tabadmenuen chido daëdshun macueso istuidshun abentsëc ëbi tantiaquid icsho aid abentsëc beduanendac. Chido utsibic ëbi tantiesä icsho nianendac.

⁴² Aden ëmbi chuiboed tantiashun: “¿Nëbida con Icho chopeba?” quequin ënenquo icquin tantiata. Ëbi chote mimbi tantienquo iquec. ⁴³ ¿“Nëbi ampequidën ampec,” quequinda tantiapadic? Padenquo. Tantiaquidënquien aid ushënquo aton na bédamboen isquin ampemenquo ictsiash. Aden tantienquo icquin: “Ampesho isnu,” quequin ënenquo icquin isquid. ⁴⁴ Adembidi

ëbi chote ushë mimbi tantienquoio ye. ¿“Nëbida nuquin Icho chopeba?” quec Nuquin Papabëd tabadte bunec bédamboec tabadta. Matses dadpen: “Nëbien chochitec,” quenquoio icnubini choendac –quepondash Esus abëd icquido chieç.

Esus bédamboen cainte chiaid
(Duc 12.41-48)

⁴⁵ Adshumbic abi bédamboen cainte Esusën chuipondash. –Tantia. Aton icho tantiaquin yua bédambo icquidën naid mibi chuinu. Icbon: “Èbi nidan mibëdta yuaido pete sandoaid musuchshun ëmbi chiacpadën ëmbi chiacpadënquien menianeta,” cac yua bédambo icquidën adotsiash. ⁴⁶ Adnubien icbon choshon ambi chiacpadomboen yuan nasho isun bédamboen istsiash. ⁴⁷ Adshumbic aton yua chuitsiash. “Bédamboen tantiaquid mibi neque. Con yua utsibo namequin con natedi dayun uata,” catsiash icbon yua bédambo icquid caquin. ⁴⁸ Padnuen yua icsambo icquid: “Èndenquimbo con icho nidondash. Choenquien icchitec. Con nauidi nanu,” ⁴⁹ quiampatsiash. Adshumbic chieshtoshon abëdta yuaido cuesanetsiash. Adashic icsambo icquidobëdi icsamboec tabadtsiash. ⁵⁰ Adec: “¿Nëbida con icho chopeba?” quenquoio icnubien aton icho chotsiash. ⁵¹ Choshon ambi chiacpadomboen nainquoio icsho istuidshumbic: “Icsambo iquec,” queshun comapenen cuesquin cuesunetsiash. Adembidi Nuquin Papan icsambo icquido cuidendac. Bédambo icquid damianquido cuidacno icsamboshë yacno nidmendac. Adoac natiac shubiquidendac –quequin abi bédamboen cainte Esusën chuipondash.

25

Chido 10tedshun cainaid
chiaid

¹ Adshumbic Esusën ompoachimboen chuiquin abi chote ushë tantienquoio icte chuipondash. –Tantia. Mibi chuinu. Nuquin matses isadaid-bon nacpadomboen chido bednuequid aton chido bedtanec inchëshëmbi chosho aton matsesën bëquedtanquid. Bëquedtanec choec shubun puduedash cuishonquec aidbëd pec tabadquid. Adquido icpac caondash. Chido 10teddishun: “Champi bedtanec choquid bëquedtanu,” queshun aton tabote bëchin taboadquid icho-icboen buanuen sanambededpac caondash. ² Aid chido 5tedi tantienquoio icquido icnubi 5tedbidi bédamboen tantiaquido icpac caondash. ³ Tantienquoio icquidon: “Tabote bëchi naimëdsho cushtonon buanu,” quenquoio icquin bëchi uesadbudtsaid taboteuidtsëqui sananquin caimpac caondash. ⁴ Padnuen bédamboen tantiaquidon naimëdsho cushtonoequien tabotebëdta sedunten cushtoaid bëchi sananquin caimpac caondash. ⁵ Aiden cainaquu: “Chido bedtanu,” quianec nidboed choenquoio icsho isash abitedi ushcastoash ushcuededpac caondash. ⁶ Inchësh poctsemboen: “Choeque. Bëquednu. Nid,” cac ⁷ isucunshun chidobon tabonoen tabote dëbedpac caondash. Adoshon bédamboen tantiaquidon ambi bëboed bëchi cushtonobien ⁸ icsamboen tantiaquidon: “Bëchi beccho. Con na naimëdeque,” caquien bëchi bëboedën ⁹ bédamboen tantiaquidon: “Padi. Mibi meniac con na uesadtsiash. Aid uesadan shubun puduedabi nuquitedi inchështsiac. Piucquid menequin bëchi cushtoquid baded cushtometan,” capac caondash. ¹⁰ Adoac bëchi bedec nidnubien chido bedtanec dada chopac caondash. Chosho bédamboen tantiaquidon aton tabote taboshon chido bedtanec choquid bëquedampac caondash. Adtanec abëdi choash puduedshun bëtashte puduedtiapimbo icnuc bédamboen bëtashpac caondash. ¹¹ Adnubien bédamboen tantienquoio icquido bëchi bedtanec chopac caondash. Choshon shëcuë bëtashacsho isun:

“Shëcuë shëcne, buchi. Ĕbitsen puduednu,”¹² caquien chido bedquid: “Padi. Ĕmbi tantiacmaido mibi nec,” quepac caondash.

¹³ Ĕmbi chuiboed tantiaşun chido icsamboen tantiaquido tanenda. Bëdamboen nabi icşo: “Ĕmbi tantiacmaid mibi neque. Puduedenda,” aido cacimboen Ĕmbitsen Nuquin Papa yacno puduedmenquo icquin cacumechitomane. Ĕbi chote ushë tantiađenquo icnuc: “ĔNëbida con Icho chopeba?” quequin Ĕbi bëdamboen tantiec Ĕmbi chiacpadec bëdamboec tabadta –quepondash Esus abëd icquido chiec.

Icbon piucquid daëd uaid chiaid
(Duc 19.11-27)

¹⁴ Adshumbic abi tantiaquidon ambi chiacpadomboen nate Esusën ompoacimboen chuiopondash. Ĕnapen nidnun aton piucquid dadpen dayun uaquidën aton yuabo: “Ĕbi piucquid daëd uashunta,” quequin chuipac caondash. ¹⁵ “Nëidën bëdamboen tantiaquidquo icquin con piucquid Ĕbi daëd uashuntsiash,” qeshun aton yua piucquid 5tedi meniac caondash. Adshumbic: “Nëidëtsen bëdamboen tantiaquin adembidi con piucquid Ĕbi daëd uashuntsiash,” qeshun utsitsen 2tedi menepac caondash. Adshumbic: “Nëidëtsen bëdiactsëc tantiatsëcquin adembidi Ĕbi con piucquid daëd uashuntsëctsias,” qeshun utsitsen piucquid abentsëccquiobi menetsac caondash. Adanec nidpac caondash icbo. ¹⁶ Adnubien piucquid 5tedi bedboedën aton matsesën nacpadomboen piucquid daëd uanuen utisibo menequin yuecşun ambi meneboed udictsëc dëniacquin bedoapac caondash. Sincoted icboedi 5tedbidi bedoapac caondash 10ted icnuc. ¹⁷ Adembidi piucquid 2ted meneboedën 2bidi daëd uapac caondash 4tedi icnuc. ¹⁸ Padnuen abentsëc meneboedën chieshquin aid daëd uainquo icquin ambi uëdëşcaboed shëcuë anantsëcquin piucquid abentsëqui ompopac caondash.

¹⁹ Yuecquo ictaneshumbien icbon choshon ambi piucquid meniondaido chuituidpac caondash. “ĔAtotsi nao?” cac ²⁰ sincoted meniondaidën: “Is, icbo. Mimbi Ĕbi meniondaitedbidi daëd uaombi. Nëbi mitsana 10tedi iquec,” caquien ²¹ icbon: “Ai, con na daëdpactsëc icboedi daëd uaquin mimbi bëdamboen nac. Nëbi ëbëdtan chuiquid dapa icta. Ĕbëd cuishonquec tabadec cho,” capac caondash. ²² Adnubien piucquid 2tedi meniondaidën: “Is, icbo. Mimbi meniondaid 2ted icboedi daëd uaondambique. Nëbi mitsana 4tedi iquec,” caquien ²³ icbon: “Ai, Ĕmbi chiacpadomboen mimbi con na daëd uac. Nëbi ëbëdtan chuiquid icta. Mibitsen ëbëd cuishonquec tabadec cho,” capac caondash.

²⁴ Adnubien piucquid abentsëccquiobi meniondaidën chieshquidëtsen: “Mimbi ancaidon nidsinaid peteuidi bedquid mibi nec, icbo. Mimbi chiacpadomboen nainquo icşo isash chushcanquidquo mibi nec. ²⁵ Adec dacuëdampambo icquid icşo mibi dacuëdëşquin mimbi meniondaid piucquid ompoquin chococaondambi. Në mimbi meniondaiduidtsëqui ictsec,” caquien ²⁶ icbon: “Chieshquiec mibi icsac. Ĕmbi chiacpadomboen nambo mimbi iquec. Ĕbi caic: ‘Ancanquid icquin Ĕbi chushcanuşe,’ qeshun ²⁷ nuquin matsesën nacpadomboen utisibo meneshun piucquid daëd uaquin mimbi bedtsempac. Adoacşo aid daëd uaquin bedtsenombi. Chieshquin mimbi icsamboen nac,” ²⁸ quepac caondash. Adşun aton yua utsi caic: “Chieshquidën na bedşunşun piucquid 10ted dayun uatsëcboed mene,” cac meniac 10ted icboedi 11ted yanac caondash. Adshumbic chieshquid comapenen cuidpac caondash. ²⁹ Adembidi naindami. Ĕbi tantiaquin Ĕmbi

chiacpadomboen naquid adembidi namequin bēdamboen tantiamendambi. Ēbi tantiesabo ěmbi chiaid niacquid bēdamboen tantiamenquio iquendambi. ³⁰ Aid yua icsambo icquid cuidacimboen Nuquin Papan ěbi tantiesabo cuidquiendac. Ambi icsaido cuidquiacono nēsecac natiaic shubiquiendac — quepondash Esus abēd icquido chieć.

Matses nashunesa cuidte chiaid

³¹ Adshumbic Esusēn padpiden chuipondash. —Nuquin Papan abi yacnoshon uaido mayan bēdabobēd choec: “Abitedishun Icbomboeni nec,” quiaish bēchamauampamboec dacuēdampamboec choequi chuiquid dapan tsadten tsadtoquin abitedi ismendambi. ³² Adshumbic matses abitedimbo cho-chomequin tsidadmendambi. Adshumbic icbon aton nauidquio tsi-nacacimboen ěbi tantiaquido naden chiendambi. ³³ “Ēbēd tabadtequido mibi neque. Nēmo con abiuc tabadec cho,” caindambi. Adshumbic ěbi tantiesabo chuiquin: “Ēbi tantiesabo cuidadtequido mibi neque. Con copioc tabadec cho,” caindambi. ³⁴ Adshumbic ěbi tantiaquido padpiden chuiocaindambi. “Ēbēdi tabadec cho. Matses uaquin tauabi ěndenquimboshē mibi caic: ‘Aido ěbi tantiaquido icmeshun ěbēdi tabadmendambi,’ quequin Nuquin Papan tantiaidombo yec ěbēdi bēdamboec tabadec cho. ³⁵ Mimbĭ ěbi nashundenec. Bundoacsho mimbĭ ěbi pemedenedec. Acte bundoacsho adem-bidi mimbĭ ěbi acmedenedec. Mimbĭ isacmaidquio icsho mimbĭ ěbi yuedtenec. ³⁶ Con dashcute nibēdsho mimbĭ ěbi dashcute menenedec. Daicsabudt-sash unēstiadtsēcquio icsho ěbi tantiec mibi datsadtenec. Quēnēn nauedacsho mimbĭ ěbi isuan-isuandenedec,” caindambi. ³⁷ Adoquien bēdamboec tabadquido: “Tantiadenquio icnuc mimbĭ chuipec, icbo. ¿Bundoacshodambi mibi pemedionda? Mambi mibi pemiambo yoc. Mambi mibi acte bundoacsho acmiambo yoc. ³⁸ ¿Ēmbĭ isacmaidquio icshodambi mibi yuedtionda? Mambi padambo yoc. ¿Dashcute nibēdshodambi mibi dashcute menepacti? Mambi padambo yoc. ³⁹ Mibi daicsacsho datsadambo iquebi. Quēnēn nauedacsho mibi istaniambo iquembĭ. Mimbĭ tantiadenquio icnuc chuipec,” ěbi caindac. ⁴⁰ Adoac naden chiendambi. “Tantia. Mibi chuinu. Ēmbĭ chiacpadomboen ěbi tantiaquido utsibo bēdamboen isquin mimbĭ nashundenec. Aden ěbibi nashunacimboen mimbĭ utsibo nashundeneque. Ēbēdi tabadec cho,” caindambi.

⁴¹ Adoshombic ěbi tantiesabotsen chiendambi. “Nuquin Papan cuidtequido mibi neque. Mibi icsaid ěnte bunenquio icquid mibi neque. Nuquin Papan Satan as aton yuabo podobitsi icsabobēdta ěnenquio icquin cuidacno nid. ⁴² Ēmbĭ chiacpadomboen ěbi tantiaquido nashunesambo mibi icteneque. Bundoacsho mimbĭ ěbi pemenquio ictenec. Acte bundoacsho mimbĭ ěbi acmenquio ictenec. ⁴³ Mimbĭ isacmaid icsho mimbĭ ěbi cacumedenedec. Dashcute nibēdsho mimbĭ ěbi menenquio ictenec. Daicsacsho isash mibi ěbi datsadenquio ictenec. Quēnēn nauedacsho mimbĭ ěbi istanenquio ictenec,” caindambi. ⁴⁴ Aden chiaquien: “Tantiadenquio icnuc mimbĭ chieć. ‘Pete bundopash,’ quequin tantienquio iccondambi. ‘Acte bundopash,’ quequin tantienquio iccondambi. Ēmbĭ isacmaid icsho mambi mibi isambo yoc. ¿Min dashcute nibēdshodambi mibi istionda? Mambi padambo yoc. Mambi mibi daicsacsho isambo yoc. Mibi quēnēn nauedaid tantiambo iccondambi. Tantiadenquio icnuc mimbĭ chuipec,” caindambi ěmbĭ chiacpadomboen naisabon. ⁴⁵ Adoac naden chiendambi. “Ēbi tantiaquido nashunenquio icquin ěbibi nashunenquio yacimboen ěmbĭ chiacpadomboen naisabo mibi neque. Nuquin Papan cuidacno nid,” caindambi. ⁴⁶ Adoac icsamboec tabadquido

ënenquo icquin cuidacnombo nidnubi bédamboec tabadquido Nuquin Papa yacno ënëdenquo yec tabadendac –quequin Esusën chuipondash.

26

Esus bedshun unës uanuequin chiaid
(Mad 14.1-2; Duc 22.1-2; Uan 11.45-53)

¹ Aden abi chote ënquin chuitanquimbic abi unës uatetsen abëd icquido Esusën chuipondash. ² –Daëdec ushun nuquin matsesën obeca bacuë unës uaindac. Tsusedpabon: “Ma con mado unës uainquo icnu,” qeshun obeca bacuë abided unës uampid tantiaquin badiadshun penun obeca bacuë unës uaindac. Aid ushëmbi ëbi bedshun cuesten dectamendac –quepondash Esus.

³ Adnubien tsusiobobëdi con matses chuiquid dapa dadpen abi chuiquid dapambo Caipas cuëmëdquidën shubun pudued-puduedpac caondash.

⁴ Adashic: –Nëbien Esus unës uametiad utsibo ismenquo icquin bedshun.

⁵ Nuquin matses obeca pec tabadnuc bedenquien ictiad. “Esus bédambo icquidi cuesunec,” qeshun obeca penuec cho-choquidon nuqui cuesnushe –quepac caondash.

Chidon Esus machiuinaid
(Mad 14.3-9; Uan 12.1-8)

⁶ Adnubien Esus shubu dadpen icquid Betania caid yacno choash ambi daushumbo yec daicsaid bédamiondaid Simon caidën shubun puduedpondash. ⁷ Puduedshun pec samëdshobien chidon puduedshun ambi piucquid dadpenquo menequin bedaid tëchumpin icquid bédambo nuadquid Esus machiuimpondash: –Esus bédamboshë icquid nec –qeshun. ⁸ Adsho isumbien Esusbëd icquidon: –¿Adenda bédamboen nai? Ma icsambo yoc.

⁹ Utsibo menequin dadpen piucquid bedshun piucquid nibëdquido aid piucquid menetiadquidi mibi nec –quequin chido chushcapondash.

¹⁰ Adsho tantiaumbien Esusën: –¿Atotsieshun chido chushcai? Èbi bédamboen tantiaquin ëbi ismenquin bédamboen nashunebique. Chushcainda.

¹¹ Mimbi chuiboed piucquid nibëdquido ënëdenquo yec mibëdi tabadendac. Èbien mibëdi tabadenquo yanendac. ¹² Èbi unës uashun chococate tantiacbimboen machiuinoshibique. Chushcainda. ¹³ Èmbi chiaid chuibeniacionshon nëid chidon ëbi machiuimboed chiendac –quepondash Esus abëd icquido chiec.

Udasën Esus bedmenun piucquid bedaid
(Mad 14.10-11; Duc 22.3-6)

¹⁴ Adnubien Udas Iscadiote caid Esusbëd icboedi Esus chieshënquido chuiquid dapabo chiec nidpac caondash. ¹⁵ Nidshumbic chuituidpac caondash. –Utsibo ismenquo icquin mibiuidtsëqui Esus bedmenu. ¿Tedtsi piucquid ëbi menetsia? –caquien badedi pudunquin piucquid shocoshëmpi 30ted icnu tambantanquin menepac caondash: –Baded ëbi bedme –quequin. ¹⁶ Meniac bedanec nidec: –¿Mitsishunquiemi utsibo ismenquo icquidon Esus bedmeba? –quepanëdash Udas. Adashic Esusbëdi tabadoaic chopondash.

Unësnush abëd icquidobëd Esus pec tabadaid
(1Cod 11.23-26)

¹⁷ Adnubien Esusbëd icquidon: –Equipito yacnuësh cuenun pan bidiscamiabi yampid 7tedec ushquin tantiaquin tauaid ushë nëid nec –qeshun Esus chuipondash. –Nuquin Papan nuquin tsusedpabo unës uamenquo

icquin matamiampid inchësh tantiaquin obeca bacuë penuen ζmitsishun-quiemi mibi codocashumpe? —caquien Esusën: ¹⁸ —Edusaden yacno nidshun èmbi tantiaid dada chiec nid. “Nuquin Icbon: ‘Chiec nid,’ cac chobi. ‘Nëbi Nuquin Papan chiacpadomboen uesquin nabanemi,’ quiosh. Min shubumbo caic: ‘Aidën shubun puduedshun Nuquin Papan nampid tantiaquin obeca bacuë pec tabadcuedednu,’ quiosh,” quequin chiec nid ¹⁹ —cac nidquimbi shubu icbo chuituidac caondash. Adoac: —Ai, ma chobono —quesho tantiaashumbien abia nidboedon aidën shubun puduedshun penuen nëish yua obeca codocapcondash. Adnubien Esus chedo puduedpondash.

²⁰ Inchëshëmbi abèd icquido 12tedbèd samèdquin Esusën pepondash. ²¹ Pec samèdquin Esusën chuipondash. —Tantia. Mibi chuinu. Èbi chieshënquido èbi bedmequid abentsëc nëmbobi iquec —quesho tantiaashun ²² unësquio yanshun abentsëcshun abentsëcshunquien Esus chuipondash abèd icquidon. —ζÈbida cai, Icho? —quequin abi chuishobien ²³ Esusën: —Èbèdtan pete codocaid ènè punquid èbi bedmequid nendac. ²⁴ Èbi Nuquin Papan chiaid dada uamepampicpadquid matsesmiaid yec unësendabi. Padnuen èbi bedmequid comapen cuidtequidquo nec. Anin aid tishenquo icpatecndan. Cuidac natiaquiendac —quepondash Udas caic.

²⁵ Adoquien Udasën abi bedmequidënquo: —ζÈbida cai, Icho? —caquien: —Ai, mibibimbi caic —capondash. Adoac Udas puduenanec nidpondash.

²⁶ Adshumbic Esusën pete sananquin: —Mimbi pete uaid nëid nec. Mibi bédambo iquec, Papa —quequin Nuquin Papa chuitanquin cuësh-cuëshbanshun abèd icquido menebampondash. —Nèid cuësh-cuëshquin nibèdamiacimboen èbi mëyanquin unës uaindac. Èbi unës uate tantiaquin nëid peta —cac pebededtsëcondambi. ²⁷ Adshumbien Esusën dëshoten acte-quid cushtoshon sananquin: —Mimbi uaid nëid nec. Mibi bédambo iquec, Papa —quequin Nuquin Papa chuishun: —Nèid abitedishun abeced —cac dëshoten abentsen cushtoaid pictsë-pictsen acbampondambi. ²⁸ Aid acte-quid acshobien Esusën: —Nuquin Papan chiaid nuquin tsusedpan dada uapampicpadec èbided cuidadec unësendabi. Nèid acquin: “Esused Nuquin Papan cuidac aton intac siebudpamboec unësposh. Aton Madoded cuidshun Nuquin Papan èbi padenquo iquec,” quequin nëid acquin tantia —capondashi.

²⁹ Adashic: —Nadquid actequid padpiden aquec cuishonquec mibèd tabadenquo iquendabi. Nuquin Papan abitedishun Icbombo icmiac abi yacnombo mibèdi cuishonquec tabadendabi —quepondash Esus èbi chedo chiec. ³⁰ Adashic cuèdènten abentsec cuèdènach macuësh dapa Odibos caid pudundonoec nidanepondash Esus Udas Esus chieshënquido chiec nidbon.

Petedo chieshuidte Esusën chiaid

(Mad 14.26-31; Duc 22.31-34; Uan 13.36-38)

³¹ Macuësh dapa Odibos caid yacno nidquimbi Esusën chuipondashi. —Nèid inchëshëmbi Nuquin Papan chiacpadec èbi nianec mibitedi niquendac. Nuquin Papan naden chuiampic. “Icho cuesnu,” canubi aton yuabo niquendac,” quequin Nuquin Papan dada uamepampicpadec mibitedi adec niquendac. ³² Padnueni unësash uincuenendac. Adanec mibi cainuec nidaid cuëshè utsi Cadidia caid yacno èbia nidendabi —quepondash Esus abèd icquido chiec.

³³ Adoquien Petedo: —Mibi cuesnuec cho-chosho isash utsibo dacuèdec niquenuc èbimboen cuenenquimbo ictsianac —queshobien ³⁴ Esusën: —Tantia. Mibi chuinu. Nèid inchëshëmbi cachina bènè cuèdanabi icnuc: “Èmbi isacmaidquo aidi nec,” mimbi èbi caindac. Cachina bènè cuèdanabi icnuc

3tedec mibi adendac —caquien ³⁵ Petedo: —Pada. Adtiapimboeni iquec. Chieshēmēnquidon: “Esusbēd icquid mibi neque. Mibi cuesunenu,” caqui: “Ēmbi isacmaid neque. Padi,” quenquo iquendabi. Mibēdquiobi unēstsiandabi —Petedo quenubini: —Ai, ēbībic adecbidi ictsiac —quecuededpondabi Esusbēd icquidotedi.

Quetsemani caid yacnoshon Esusēn Nuquin Papa chiaid
(*Mad 14.32-42; Duc 22.39-46*)

³⁶ Adanec nidequi cuēte dadpen nitsinacno Quetsemani yacno nidpondash. Auēshquo Esus nadpondash. —Ambobi tabadta. Udicsēc nidshun Nuquin Papa chuitanu —quepondash.

³⁷ Adashic Petedobēdta Sebedeyon mado daēd buanec nidpondash. Udicsēc nidequi unēsquo yanec shubiantiadtsēcquo yampac caondash.

³⁸ Adshumbic Petedo chiec: —“Matsestedi icsaid ēmbi bedshunsho isun Nuquin Papan ēbi istiapimbo yanendac,” quiash unēsquo iquebi. Ēbi yacpadec ushenquo yec nēmbobi isec tabadta —quianec ³⁹ udicsēc nidash nidaidēn uebudshun Nuquin Papa chuipac caondash. —ĀAda mimbi ēbi unēs uamenquo icpatsia, Papā? Mimbi: “Ai, mibi unēs uamenquo iquēmbi,” cac bēdambo ictsiabi. Mimbi: “Nēbi mibi unēs uamenu,” cac mimbi tantiacpadequi unēsendabi —quepac caondash Esus Nuquin Papa chiec.

⁴⁰ Adtanec choshon isquien Petedo chedo ushpec: —Ushenquo yec isequi tabadta —caboqui. —ĀYuec-yuecpactsec ushenquo icquin istiapimboda icco? ⁴¹ “Satanasēn icsamenushe,” qeshun ushenquo icquin Nuquin Papa chuita. “Ushenquo iquebi,” queboedobi ushcas mēmunenquo yec mibi ushpec —capac caondash Esusēn Petedo chedo chuiquin.

⁴² Adtanec padpidec nidoashun Nuquin Papa chuioaic: —Ēbi unēs uameiadquo icquin ēbi unēs uameta, Papa. Ēbi unēs uametiapimbo icquin mimbi ēbi unēs uamenquo ictsiac. Mimbi tantiacpadomboen nata, Papa —quetanec ⁴³ choaquin isquien Petedo chedo ushoaic ushcas mēmuntiapimbo yec.

⁴⁴ Adsho istanec nidoashun ambi chuibocpadomboembidi Esusēn Nuquin Papa chuitanepac caondash tedesteden.

⁴⁵ Adtanec choaquin ushash uesho istuidoashun: —ĀUshecta ue? Nēbimbobi ēbi unēs uamenuen ēbēd icboedēmbi icsambo icquido ēbi bedmeque.

⁴⁶ Nidnu nid. Is. Ēbi bedmenuec ēbi bedmequid choeque —quepondash Esus Udas chosho isash.

Abi chieshēnquidon Esus bedaid
(*Mad 14.43-50; Duc 22.47-53; Uan 18.2-11*)

⁴⁷ Adnubien Udasēn Esusbēd icboedēn bedtanac matses dadpen cuesantiadpambo yec chēshtebēdta cuate sanambededtsēcquieac cho-chopondash. Nēish yua abided unēs uaquido chuquid dapabobēdta con matses tsu-siobon: —Bedtan —cac cho-chopondash. ⁴⁸ Ambi bedtanaidobēd cho-choquimbien Udasēn: —“Nēid Esus nec,” quequin adoendambi —abi quiacpadembi ⁴⁹ Esus tansudcatuidpondash: —Chobi, Icho —quequin.

⁵⁰ Adoaquien Esusēn: —Ēmbi tantiaobedquo mibi nec. Ēmbi adobedēnquiobi mimbi tantiacpadomboen nata —qeshobien cho-choquidon Esus bedtuidpondash. Aden bedshun: —Cuidmenun chuquid dapa yacno mibi buanu —capondash.

⁵¹ Aden Esus bedshobien abēd icquidēn abi tsiusudaic chēshte chictanquin chuquid dapan yua pateshunepondash. ⁵² Adoshobien Esusēn: —Padi. Chēn. Min chēshte tsiusudoata. Cuesanquid icsho adembidi cuidnushe.

53 ¿Tantienquioda ique? Ĕmbi chiac con Pan ambi abi yacnoshon uaido mayan bēdabo dadpenquioshē ēbi cudasmenuen chometsiash. 54 Nuquin Papan aden ēbi cudasmicac bedadtiapimbo icsho ¿mitsipaden Nuquin Papan chuiquin dada uamiampicpadomboen ēbi naden bedpatsiash? —capondash pateshunianquid chuiquin.

55 Adashic abi bedquido chiec: —¿Atotsi quenuc chēshtebēdta cueste sanambededtsēcquiec ēbi bednuec cho? ¿Nuqui chuiquid dapan chiaid niacniacquin matses cuesanquido chuiquid dapadabi nedi? Mabi mimbi isboedquiobi neyoc. Badiadquidēn badiadquidēnquien Nuquin Papa tabadte shubu uashunaid daquēnē uaidēn puduedshun chuidenesobi ma mimbi ēbi bedenquio icboc. 56 Padenquio icboedombi Nuquin Papan tantiacpadēnquiobi mimbi ēbi bedec. Ĕbi bedte chuiquin Nuquin Papan nuquin tsusedpa dada uamiampicpadomboen mimbi ēbi bedec —quequin Esusēn chuinubini niquepondac: —Cuenenquio ictsiabi —queboedi.

Caipas caid yacno Esus buanaid

(Mad 14.53-65; Duc 22.54-55, 63-71; Uan 18.12-14, 19-24)

57 Adnubien chuiquid dapambo Caipas cuēmēdquid yacno Moisesēn dada uampid chuibanquidobēdi tsusio utsibo cho-chopac caondash. Adnubien ambobi Esus bēpac caondash. 58 Adnubien Petedo uanoshon isbēec tsyuec chopac caondash. Choash chuiquid dapabo tabadacno daquēnē uaidēn puduedpac caondash. Adashic Esus mēyansho isnuec puduedash chuiquid dapan namiaido sondadobēdi tsadtuidpac caondash Petedo.

59 Adnubien cho-chobedo tsusio dapabo: —Esus unēs uamenuen: “Esus icsasho isombi,” quequin muaquidon chuisho tantianuna —qeshun chomiac muaquido dadpēnshun: —Esusēn icsamboen nasho isombi —quequin chuipac caondash. 60 Aden Esusēn naid muaquin chuiquin Esus unēs uatiadquio icquid chiamiho icpac caondash. Adnubien muaquid daēdshun chuituidpac caondash. 61 —Nuquin Papa tabadte shubu uashunaid caic: “Uesquin chic-chictanquin padpiden nacnoaquin daēdec ushquin nainendambi,” ma Esus quepondac —quepac caondash.

62 Adshobien chuiquid dapabo chuiquidēn Esus chuiquin: —¿Atotsi quenuc ado? ¿Atotsi nēidēn chiec? —caquien 63 Esusēn ēcbedenquio icpac caondash. Adshobien chuiquid dapan: —Abimbo chuita. “Nuquin Papan cuidchitoshē,” qeshun abimbo cata. ¿Nuquin Papan chomiaidquio aton Madombobida mibi nepe? —caquien 64 Esusēn: —Ai, mimbi chiaidquio nebi. Tantia. Mibitedi chuinu. Nuquin Papan abitedishun Icbombo icmiacshobini mimbi isendac. Adecbidi Nuquin Papa yacnuēsh padpidec choec abu ushu yacnuēsh choshobini mimbi isendac —quepac caondash Esus.

65 Adsho tantiahi chuiquid dapambo chieshtotanquin aton dashcute bēntse icquid dached-dachedquepac caondash. —¿Ada tantio? “Nuquin Papan Madombobi nebi,” quequin Nuquin Papambo icsamboen chiec mua-posh. Ambi icsamboen naid utsi chuisho tantiatiapimbo iquebi. Ambibi Nuquin Papa muauasho tantiaishun 66 ¿Atotsi natiadquio ique? —caquien abēdta chuiquid utsibo: —Adquid cuidquid quedeneque. Unēs uamequimbien ictiad —quecuededpac caondash.

67 Adshumbien Esus chieshēnquin bēcuishtuabudnetanquin mēshēbudtanquin mēdanten bēse-bēsēpac caondash. Bēse-bēsesho istanquin utsibontsen isti-apimbo icnuc Esus dashcuten bēpuctanquin mēdanten bēcues-bēcuespac caondash. 68 Bēcuesanquin: —“Nuquin Papan madombobien nec,” canu. En chui. Tantuanu. ¿Tsundan mibi naoshe? —cabededtsēcquien mamēnshumpac caondash Esus.

*Esus caic: Ĕmbi isacmaid nec, quequin Petedon chiaid
(Mad 14.66-72; Duc 22.56-62; Uan 18.15-18, 25-27)*

⁶⁹ Adnubien Petedo tabadacno choshon chido yuan chuituidpac caondash. —Cadidia yacnocquid Esus caidbēd ma mibi icpaboc —caquien: ⁷⁰ —Tantiadenquo icnuc mimbi chiec. Ĕmbi isacmaidquo mimbi chiec —quec Petedo muaic taēpac caondash.

⁷¹ Adanec daquēnē uaidēn puduedte shēcuē dayun nidash niduntuidpac caondash.

Adshobien chido yua utsin: —Nasaded yacnocquid Esusbēd ma nēid icpaboc —caquien ⁷² Petedo: —Ma Ĕmbi isacmaidquo Esus neyoc. Abimbo caimbi. Nuquin Papan cuidchitoshe muasho —queoapac caondash muequi.

⁷³ Adash yuec-yuecpactsēcshumbien ambo tabadquidontsen Petedo chuipac caondash. —Aidbēd icquidien mibi nec. Cadidia yacnocquid onquiacbimboec ma mibi onquepayoc —quesho tantiash ⁷⁴ Petedo: —Comapenen Nuquin Papan cuidchitoshe muasho. Abimbo caimbi. Ma Ĕmbi isacmaidquo neyoc —queoapac caondash.

Adec 3tedec Petedo muanubien cachina bēnē cuēdampac caondash. ⁷⁵ Adsho tantiashun Petedon Esusēn chuiboedquo tantiactampac caondash. —Cachina bēnē cuēdanabi icnuc mimbi ēbi caic: “Ĕmbi isacmaid nec,” capendac tedesteden —quequin Esusēn chuiboedquo tantiactanec umanuc puduenanec nidec Esus muauabosh natiaic shubinidpac caondash.

27

Pidato caid yacno

*Esus buanaid
(Mad 15.1; Duc 23.1-2; Uan 18.28-32)*

¹ Adnubien chuiquid dapabo aton tsusio utsibobēdi Esus isec ushenquo badiadpondash. Badiadshun Esus chieshēnquin: —Nuqui yuaquid ancanquid Esus unēs uamec nidnu. Nid —queshun ² podo cataneshun ancanquid Pidato cuēmēdquid ismenuen Esus buampac caondash.

Esus bedmequid Udas tētaniadaid

³ Adnubien Udas Esus bedmeboed: —Unēs uamechitembien iquec. Unēs uametiapimbo iquebi. Ĕmbi bedboed piucquid shocoshēmpi 30ted meoatanu —quianec abi meneboed tsusiobo menenuc nidpac caondash.

⁴ Nidshun tsusiobo chuituidpac caondash. —Icsachitobi. Unēs uanuequido bēdambo icquidi bedmechitombi. Nēid mimbi meneboed mibi menenuc chobi. Nē bed —caquien tsusiobo: —Padi. ¿Atotsieshun nai? Ma mimbi bedmepaboc —quepac caondash Udas caic. ⁵ Adoquien Nuquin Papa tabadte shubu uashunaid shēcuēn ambi bedboed shocoshēmpi piucquid ansecanec nidash uano cuenash tētaniadpac caondash Udas.

⁶ Aden piucquid shocoshēmpi ansecacsho bedashien tsusio dapabo: —Nuqui dayun uaid shocosh utsibēdta dayun uatiapimbo iquec. Unēs uanuen meniaid shocoshēmpi dayun uatemauid quedeneque. ⁷ Matsu nacnenquidēn tied bedquin nēid menenuna. Nuquin matsespenquo isedquido unēsacsho ambo chococanun aid tied bednuna —queshun piucquid meniac caondash. ⁸ Aidon bedacsho isun nēbi aid tied cuēnquin nadopec. —Unēs uamequidēn bedaid tied nec —capec. ⁹ Aden Udasēn shocoshēmpi 30ted menete nuquin tsusedpa Edemias caidēn dada uapampicpaden napac caondash. Naden dada uapampic. “ ‘Aid bednuen Isadaidbon piucquid shocoshēmpi 30ted

meneuidaid bedoashun ¹⁰ matsu nacnenquidën tied bedquin meneoapondash,' quequin Nuquin Papan chiaid dada uaombi," quepampic Edemias.

Pidato caidën Esus chuimaid

(*Mad 15.2-5; Duc 23.3-5; Uan 18.33-38*)

¹¹ Adnubien isadaidbo yuaquid ancanquid Pidaton Esus bëacsho chuipac caondash. —¿Min matses isadaidbo chuiquid dapamboda mibi nepe? —caquien Esusën: —Ai, aid nebi —capac caondash. ¹² Adnubien abi chieshënquid muaguin Esusën naid Pidato chuipac caondash. Adsho tantiashun Esusën ëcbedenquio icpac caondash.

¹³ Adshobien Pidaton Esus padpiden chuiuoquin: —Mibi icsaid dadpen chuipac. ¿Tantienquioda ique? ¿Ëcbedantiapimboda ique? —caquien ¹⁴ ëcbedenquio icpac caondash Esusën. —Nëidon muauac nebi —quequin chienquio icsho tantiash: —Adquid tantiambo iquemi —quepac caondash Pidato.

Esus unës ua, quequin chiaid

(*Mad 15.6-15; Duc 23.13-25; Uan 18.38-19.16*)

¹⁵ Nuquin Papan isadaidbo unës uainquio icquin matamiampid tantiate ushëmbi seta utsin-utsinquien Pidaton quënën nauedaid isadaidbo abentsëc cuemednec. Pidaton: —¿Tsutsi abentsëquimbi cuemepe? —cac isadaidbon chiapadquid abentsëc cuemednec. ¹⁶ Esus bëabi icnuc uimanëmënquidquio Badabas cuëmëdquid nauedpac caondash.

¹⁷ Adnubien Esus cuidte chuisho tantianuec cho-choash dadpenquio tabadpondash. Adsho isumbien Pidaton: —¿Tsutsi abentsëquimbi cuemepe? ¿Badabastambi cuemepe? ¿Nëbi mimbi bëboed Esus Quidistu caidtambi cuemepe? —capondash. ¹⁸ —Esus chieshënquidon: “Nuqui padenquio yanuc nuqui dëniaquec Esus chuiquid dapa yanushe,” queshun Esus bëaccosh. Nëmbo tabadquidon: “Esusquio cueme,” capashuni —quequin tantiaquin aden chuipanëdash Pidaton.

¹⁹ Adashic matses icsaido cuidte chuinec tsadte dapan abucquio tsadto-pondash Pidato. Adshobien yuan chuituidpondash. —Min chidon: “Chuitan,” cac chobi. Esus caic: “‘Aid dada bëdambo icquid neque. Unës uamenda. Dacuëdampambo icsho ushquin isombique. Unës uamenda, quiosh' quequin chuitan,” min chidon cac chobi mibi chïec —quequin aton yuan chuituidpac caondash.

²⁰ Adnubien Esus chieshënquido tsusiobon ambo tabadquido chuibudpondash. —Pidaton: “¿Mitsicquidimbi cuemepe?” cac: “Badabas cuemequin Esus unës ua,” cado-cadota —cac: —Ai, adoendambi —quecuededpondash.

²¹ Adnubien Pidaton padpiden: —¿Mitsicquidimbi cuemepe? —caquien ambo tabadquidon: —Badabas cuemeta —cadonepondash. ²² Adoquien Pidaton: —Ma Esus Quidistu caid. ¿Mitsipadopembimbi aid ique? —caquien: —Unës ua. Cuesten dectanquin unës ua —quecuededpondash.

²³ Adoquien Pidaton: —¿Atotsieshun mimbi adope? ¿Atotsi icsa uasho mimbi adope? —caquien buëdanquiecuëdec: —Cuesten dectanquin unës ua —quecuededpondash.

²⁴ Adsho —Padi icnuna —caqui niachidanquiecuëdequi unës uate bunquiecuësantiadpambo yansho isash: —Acte beccho —quepondash Pidato. Bëacsho tasun dapan cushtotanec mëpamëdquin abitedi ismepondash. Adashic Esus caic: —Nëid unës uametiapimbo iquebi. Nëid unës uamete bunec mibien cuidadtequidombo nendac. Èmbien adotiapimbo iquecuëc. Mëpamëdec bëchish ucudacimboec mimbi icsamiaid ucudebi —quiashe mëpamëdquin ismepondash Pidaton. ²⁵ Adsho tantiashien: —Con

nabobëdtsëqui adequi cuidadtequidombo icnuna —quecuededpondash abitedimbo.

²⁶ Adsho tantiahsun Badabas caid cuemequin Esus cueshcaten cueshcamepac caondash. Adshumbic: —Cuesten dectanquin unës uatan —quequin sondado buamepac caondash Pidaton.

Esus mamëshunaid
(*Mad 15.16-20; Uan 19.2-3*)

²⁷ Adoaquien sondadon Pidaton shubun Esus yuedshun: —Isec cho —cac aton sondado utsibo dadpen cho-chopac caondash. Cho-choshon Esus mamëshumbededpac caondash unës uanumbi. ²⁸ Abi dasiuidaid ënapen icquid chicshun: —¿Chuiquid dapada nedi? —quequin dashcute piumbo icquid dasiuintanquin ²⁹ mauete pinchuc-pinchucpambo icnuc nacnenaid mauemepac caondash. Adshumbic aton matses chuiquid dapan sananacbimboen sananuc abiuchun cuate sanamepac caondash. Adshumbic aton matses chuiquid dapa ismiacbimboen mamëshunquin: —Is. Isadaidbo chuiquid dapambo neque —queshun danëshën sebudquin Esus ismepac caondash.

³⁰ Adshumbic dacuishtucatanquin ambi cuate sanameboed bedshuntanquin aidëmbi matombudnepac caondash. ³¹ Aden mamëshuntanquin ambi dasiuiamboed chictanquin aton dashcutebidi dasiuiinoapac caondash. Adoshon: —Ma unëshuequin cuesten dectanec nidnu. Nid —quequin Esus buampac caondash.

Esus cuesten dectanaid
(*Mad 15.21-32; Duc 23.26-43; Uan 19.17-27*)

³² Buanquin Esus abi dectante cuate yuëmemebanquimbi dada nidaid Sidene caid yacnuësh choquid Simon cuëmédquid Esusën yuëmiaid sondadon chiadto mebidadpondash. ³³ Adobidanec nidec macuësh dapa yacno matses mapi canitebimboec isadquid Codocota caid yacno chopondash.

³⁴ Choshombien sondadon uba chinaid actequid paëmbo dauë nêcushaid Esus meneuidpondash. —Në. Ac —cac pictsëc tantanec: —Padi —quepondash aquenquio yec. ³⁵ Adshobien cuate napotiaid bãboedën dectampondash. Dectanshumbic ambi chicshumboed Esusën dashcute bednuequin sondadobon abi cuëmédquidtedi dada uabanshun têchun sandoshon cadotanequin dada uatempi puduemiaid isbanquin Esusën dashcute bedbampondash. ³⁶ Adash: —Esus unëso isnu —quec sondado tabadcuededpondash.

³⁷ Adshumbic: —“Nadquid icsho cuidquin unës uac,” quequin ma isquidon tantianu —queshun cuate cuëshën naden dada uapaccondash. —Nëidquio Esus nec. Isadaidbo chuiquid dapambo nec —quequin dada uaid Esusën mapino dectampondash. ³⁸ Ampequid daëd cuesten ëquë dectambudcuenquin dectantanquin nënantanquio Esus dectampondash.

³⁹ Adshobien podqued cuëmanquio Esus diadsho isbidanequin chieshënquin chuipondash. ⁴⁰ —“Nuquin Papa tabadte shubu uashunaid chic-chictanquin daëdec ushquin nacnenquin nainendambi,” quiondaid yec bud. Nuquin Papan madombo yec unësenquio yec auëshquiobi bud —cabidanepondash. ⁴¹ Adecbidi chuiquid dapabo yec Moisesën dada uampid chuibanquido yec tsusiobo yec quequido Esus icsamboen mamëshunec nadpondash. ⁴² —Utsibo ismenuembien comapenen tantiaquin matses bédamechitosh. Adembidi comapenen tantiaquin nacnenash budsho isnuqui. “Isadaidbo matses chuiquid dapambo nebi,” quequid neque. Ma budnu. Dectamboedi abibi budsho isash: “Nuquin Papan chomiaid yec Nuquin Papan Madombo nec,” quetsiabi. ⁴³ “Nuquin Papa tantiaquid yec Nuquin Papan madombo nebi,” quequid icsho: “Ai, con madombo nec,”

quequin ma Nuquin Papan budmenu. Unësenquo icsho isnu —quepondash tsusiobo. ⁴⁴ Adnubien abēdta cuesten dectamboedon ampequidontsen Esus mamēnshumpondash.

Esus unēsaid

(Mad 15.33-41; Duc 23.44-49; Uan 19.28-30)

⁴⁵ Adnubien ushē cuembo icnuc inchēshbocpadquiec inchēshpondash. Ushē cuembo icnuc inchēshstanec ushē budambi ushēmbo yanoapondash. ⁴⁶ Ushēmbo yanubien Esus comapenec cuēdec nadpondash. —Eloi, Eloi, lama sabactani —quec con onqueten cuēdpondash. —¿Atotsieshun ēbi bēdamboen isenquo yano, Papa Edoen? —quec adondash.

⁴⁷ Adec cuēdsho tantias isquido nadpondash. —Edias yampid cuēnchitequien nec —quiampondash. ⁴⁸ Adnubien Esus isec tabadquid abentsēc titinguianec nidshun shapu-shapupactsēcquid bedtampondash. Bedtanshumbic actequid mucacquid anidtsēcquidēn shapu-shapupactsēcquid punshun cueste dēdectanshun abuc sananec: —Chishmenu —queuidpondash. ⁴⁹ Adnubien abi isquido: —Padi. Nuquin tsusedpa Edias yampid choshon budmesho isnu —quepondash.

⁵⁰ Adnubien yampidec buēdanquiec cuēdtanec Esus unēspondash. ⁵¹ Esus unēsnuubi Nuquin Papa tabadte shubu uashunaid yacnuēsh: —“Quēnē uquēducquidēn Nuquin Papa tabadtembo nec,” caidēn utsi puduednushe —queshun dashcute ēnapen icquid dectanaid abucuēsh canchedbudcuenac caondash abitiombi. Nuquin Papan ambi bēdamboen iste tantiamenuen nanēdash. Adnubien nidaid uēdēquequidēn cuēnote dapa dadpen cuēshēdbudnepac caondash. ⁵² Adec unēsaid nauedaidd shēcuē bētashte cuēnote dapambo cuēshēdnubien Nuquin Papa tantiaquido ēnden unēsaido abentse-abentsec uincuenanec chopac caondash. ⁵³ Esus uincuenan adec uincuenaidon shubu dadpen icquid Edusaden caid yacno nidshun matses dadpen ismepac caondash.

⁵⁴ Nidaidd uēdēquenec dacuēdampambo icsho isashien: —Esus unēsō isnu —quiash tabadquido sondado chedo abi chuiquidbēdi dacuēdtanec: —Ma Nuquin Papan Madombobi nepayoc —quepac caondash.

⁵⁵ Adnubien chidobo Cadidia yacnuēsh Esusbēd choquin abi codocashumboedo Esus unēsō isnu nec ancuenshun isec tabadpac caondash. ⁵⁶ Nēidted icpac caondash. Nēidic Madia Mactada yacnuēsh choquid. Nēidic Madia utsi Acobon tita. Aid Ose cuēmēdquidēn titabidi niosh. Nēidic Sebedeyon chido Uanēn tita. Aid Acobo cuēmēdquidēn titabidi niosh. Aidedi uanoshon isbededec tabadpac caondash.

Esus chococaid

(Mad 15.42-47; Duc 23.50-56; Uan 19.38-42)

⁵⁷ Adnubien inchēshbudtsēqui aton na dadpen dayun uaquid shubu dadpen icquid Adimateya caid yacnocquid Ose caid: —Esus tantiaquid nebi —quianec Esus bedec chopac caondash. ⁵⁸ Choshombic chuiquid dapa Pidato caid chuituidpac caondash. —Esus bednuec chobi —cac aton yua chuiquin: —Ma buanu. Bedmetan —capac caondash Pidaton. ⁵⁹ Aden bedtanshun Osen Esus dashcute bēchish nībēdquidēnquo nuamboshē icnuc datanedonepac caondash. ⁶⁰ Adotanquimbic nidaid cuēnoteuidpambo icquid macuēsh tsimpiduc shēcuē uaboed ambi: —Ēbi unēsacsho nauedte nendac —caidēmbi Esus nauedpac caondash Osen. Adotanquimbic cuēnote dapabidi bētashte uaid bincumbēshun bētimpac caondash. Adotanec nidpac caondash Ose. ⁶¹ Adnubien Madia utsibēd Mactada yacnuēsh choquid Osen Esus nauedsho isbosh ambobi tsadpac caondash.

Esus nauedaïd isec sondado tabadaïd

⁶² Isadaïdbon obeca bacuë unës uacpadën Esus unës uamiash abentsec ushashi chonoadtemaïd ushëmbi Esus chieshënquido Pidato caïd chiec nid-pac caondash. Padiseyobobëdi nidshun chuiquid dapanon Pidato chuituid-pac caondash. ⁶³ —Esus nadpadenec. “Unësash daëdec ushash uincuenendabi,” quec muapadeneque. ⁶⁴ Daëdec ushquin min sondado Esus nauedaïd cudasmeta. Esusbëd icboedon chicshun buanushe. Aden buanash: “Uincuenaccosh,” quec muanushe. Unësabi yec abi: “Nuquin Papan madombo nebi,” quec muaic icsambo iccosh. Adembidi: “Uincuenaccosh,” quequin muauac icsamboshë ictsiashe. Min sondado: “Cudasta,” quequin chuita —capac caondash Esus chieshënquidon. ⁶⁵ Adoaquien Pidaton: —Ai, con sondado buantan. Aden buanshun: “Unësaid nauedaïd cudasec databëdta,” cata —capac caondash. ⁶⁶ Adoaquien isadaïdbo tsusiobon sondado buanshun cuënote dapa bëtashaid bucin bëbitaccapac caondash. —Bëbitaccaid isash: “Chuiquid dapan bëbitaccamiaïd nec. Cuidnushe. Esus chictiapimbo iquebi,” ma quenu —queshun bucin bëbitaccapac caondash. Adoshon: —Beduanushe. Isquieç tabadta —capac caondash sondado chedo chuiquin.

28

Esus uincuenaid

(Mad 16.1-8; Duc 24.1-12; Uan 20.1-10)

¹ Esus unësbon abentsec ushash abi chonoadtemaïdëntsen abentsecbidi ushash dominco badiadnuc chidobo Esus nauedshun bëtimboed isec tabadnec padpidec choapac caondash. Mactada yacnuësh choquid Madia ut-sibëd isec choapac caondash. ² Choash isec tabadnubi nidaïd uëdëquiampac caondash. Adnubien Nuquin Papan abi yacnoshon uaid mayan bëda abucüesh budtanquin cuënote dapa bëtashaid shëcbempac caondash. Adtanec cuënoten tsadtopac caondash. ³ Mayan bëda yec abu bed-bedquiabimboec ushëmboshë bëchamauanquieç icpac caondash. Aton dashcufe adquiobidi bëchish nibëdquieç ushumboshë icpac caondash. ⁴ Adec dacuëdampambo icsho isashien unësaid cudasquido sondado dacuëdtanec uëdëquec tantiadem-pambo yec padishbudnepac caondash abitedi.

⁵ Adnubien mayan bëdan Madia chedo chuipac caondash. —Dacuëdenda. Cuesten dectanquin unës uaboed Esus isnuec mibi tabadec. ⁶ Nibëdec. Nidosh. Ambi chuibocpadequi uincuenash nidosh. Abi uebocno en isec cho —cac chidobon anisnubien padpidec onquequin chuiopac caondash. ⁷ —Mimbi isboed Esusbëd icboedo chiec nid. Badedquio nidshun naden chuita. “Unësboedi uincuenash Cadidia yacno abia nidshun mibi cainadec. Anoshon mimbi Esus isendac,” quequin chiec nid —caquien ⁸ auëshquiobi chidobo dacuëdboedi cuishonquec titinquianec nidanepac caondash.

⁹ Titingquianec nidaneshobien Esusënquiotsen bëquedpac caondash. Adash: —Mibi isnuec nebi —quepac caondash. Adshobien chidobon: —Con Icho nec —quequin ismenüen danëshën sebudquin taë uidën uapac caondash. ¹⁰ Adoaquien Esusën: —Dacuëdenda. Con utsibo ëbëd icboedo chiec nid. “Cadidia yacno nidec nid. Anoshon mimbi Esus isendac,” quequin chiec nid —caquien chiec chopondash Madia.

Esus uincuenasho isun sondadon muauaid

¹¹ Madia nidnubien Esus nauedaïd isquido sondado abi chomebedo isadaïdbo chuiquid chiec chopac caondash. Mayan bëda chonoc Esus uincuenboed chuituidpac caondash.

¹² Adoaquien isadaïdbo chuiquidon aton chuiquid utsibobëd onqueshun aid sondado chedo chuipac caondash. —Mimbi chuibod utsibo chienda.

Mibi piucquid dadpen menenu –qeshun piucquid dadpenquoio menepac caondash. ¹³ –Mimbi isboedquoio chienquoio icquin naden chuita. “Èbi chedo ushtoan abèd icboedon Esus ampequin beduanaccosh,” quequin utsibo chuita. ¹⁴ Mibi caic: “Sondado ushtoac caosh,” quequin chiac mibi chuiquid dapa Pidaton chushcaquin mibi cuidnushe. Aid: “Chushcaquin cuidenda,” quequin chiendambi –qeshun ¹⁵ piucquid meniac bedanec nidec isadaidbo chuiquidon chiacpadec muapac caondash sondado. Adem-bidi nèbi isadaidbo dadpeshun: “Esus ampiac,” quequin chuioaic.

Èbi chuibeneta, quequin Esusèn chiaid

(Mad 16.14-18; Duc 24.36-49; Uan 20.19-23)

¹⁶ Adnubini Esusbèd icboedo 11tedi yec Esusèn chiacnombo Cadidia yacno nidec macuësh dapa yacno nidanepondac. ¹⁷ Macuësh dapa yacno nidquimbi Esus istuidpondambi. Istuidshumbic: –Con Icho neque. Ismenu –qeshun danëshèn sebudpondambi. Utsibombien: –¿Con Icbombobida nepeba? –capondash.

¹⁸ Adsho isun Esusèn anoentsèqui choquin chuituidpondash. –Èbipadquid utsi nibèdec. Nuquin Papan uaido abitedi con na nec. Abitedishun Icbombo icquin abitedimbo namequidquoio nebique. Mibitsen namenu. ¹⁹ Nidaid utsi-utsiec yacno nidshun èbi tantiaquido icmenuen matses abitedi èmbi chiaid chuibeneta. Adoac èbi tantiabensho utsibo ismequin acten mentobeneta. “Esus tantiabenshun Nuquin Papatsen tantiaquid nec. Nèidbèd Nuquin Papan Mayan tabadeque. Utsibo ismenu,” quetanquin aden acten mentobeneta. ²⁰ Mimbi mentoaido chuiban. “Nuquin Ichon chiacpadec bèdamboec tabadnuna,” quequin èmbi chuiboedtedi chuiban. Mimbi adosho isash mibèd iquendabi. Nidaid abitedi nibèdanabi icnuc mibi chedo nianenquoio iquendambi. Adembidi èbi tantiaquidotedi niantiapimbo iquebi –quepondash Esus ènquimbi chiec.

MADCOSËN DADA UAID

Bëyuc choshon Uanën Esus chote chiaid

(Mat 3.1-12; Duc 3.1-18; Uan 1.19-28)

¹ Madcos nebi. Nuquin Papan tantampicpadquieac aton madombo Esus abi yacno matses yuedquid chote tauamboen chiaid bëda chuinu. Tantia.

² Abi aton mado Esus chieac onquiaid Nuquin Papan Isayas dada uamiampid nad iquec:

“Naden naimbique. Tantia, mado. Mibi chotequid chuibanquidba chome-ndambi. Aidën chuibanac ambi tantiaid icsa ënshun mibi cainquidombo iquendac, mado.

³ Shubu nibëdacnoshon comapenec onquequin mibi chotequid aidën chuibanendac naden:

Nuquin Icho choeque.

Aid tantianu quequin mibi icsaid ëmbanta quequin mibi bëyuc chuiquidën mibi chotequid chuibanendac, mado,”

quequin aton mado chieac onquiaid Nuquin Papan Isayas dada uamiampid nec.

⁴ Aden chiampicpadquiequi Esus bëyuc chuitequid Uan chopondash. Shubu nibëdacno tabadquin comapenec onquequin chuibanpondash. Mibi icsaid ënshun Nuquin Papan chiaid tantiaquin nabanta. Aden tantiaquidquo icscho mibi cuidenquo yec mibi icsaid Nuquin Papa bëpiscudendac quequin chuibanpondash. Aden chuibanquimbi ämbi chiacpadomboen naquid acten mentobampondash Uanën. ⁵ Aden Uanën chuibanubien matses dadpen tantianu quec choded-chodedpondash. Nidaid Udeya caid yacnoësh chopondash. Edusaden caid yacnoëshbidi cho-choapondash. Chochoash tabadquin tantiashien, Icsapobi, quec abi icsaid chieac utsi-utside onquequedpondash. Aden abi icsaid chuibanquidtedictsëqui Uanën acte Odan caidën mentobampondash. ⁶ Ambo iquec Uan nidaidën capuquid cameyo bu daëdcaid dasiuidquid niondash. Nidaidën capuquid yua bitsi nacnenaid tsiuquid niondash. Shioshbimboecquid shuishun pequid niondash. Bacun chequid niondash. ⁷ Aidëmbi naden chuibanpondash: —Con tsyuecquid choendac. Aidi nadatiambocquin naquidquo nendac. Aidi bëdamboshëcquid icnuc ëbi icsaquid icscho çatotsieshun aid choec quequin chuiquidquo Nuquin Papan icmiosi? quec tsadebi. ⁸ Mibi acten mentoquid nebi; aidien abipadquiocquid aton Mayan menianquidquo nendac —quepondash Uan.

Esus acten mentoaid

(Mat 3.13-17; Duc 3.21-22)

⁹ Adnubien ambi chian-chianaidquo Esus chopondash. Nidaid Cadidia caid shubu dadpen icquid Nasaded caid yacnoësh chopondash. Adshobien Uanën Esus acten mentopondash. ¹⁰ Aden acten mentoac Esus pudundonobi abu bëcadoacnoëshquo dëbimbimboec isadquid abipadquiocquid aton Mayan bede-bedequemboec Esusbëd icnuec budpondash. ¹¹ Aden budmetanec ambi bëcadoacnoëshi: —Mibentsëcquiobi icscho ëmbi tantiaidquo mibi nec, mado. Embi bëdamboen isaidquo mibi nec —quepondash aton Papa Esus chieac.

Esus Nuquin Papan chiaid niacmenuequin Satanasën tanaid

(Mat 4.1-11; Duc 4.1-13)

¹² Aden chuibon budmeboed Mayanën: —Shubu nibëdacno nid —cac nidash Esus tsadpondash abentsëcquiobi. ¹³ Ambo tsadquimbi ushë abentsëc nidmec utsi choaid abutometsëcquieq tabadpondash. Ambo tabadshobi Nuquin Papan chiaid niacmenuequin tanu quianec mayan icsan icbo Satanas caid chopondash. Aden tanaqui niaquesambo yec tsadpondash. Adec tsadnubi nidpondash Satanas. Ambobi bëdi nibëdquid deon caid chedo icpondash. Ambo tsadshobi ambi uaido mayan bëdabon cho-choshon nashumbededpondash.

Cadidia yacnoshon tauamboen chuibanaid

(Mat 4.12-17; Duc 4.14-15)

¹⁴ Ambo yuec tabadash Esus choambien isadaidpembo ancaquidën acten mentoanquid Uan bedmeshun quënën nauedmepondash. Uan nauedmiambi nidaid Cadidia caid yacno nidshun Nuquin Papa yacno shubu abentsëquën tabadte iquec quequin Esusën chuibampondash. ¹⁵ —Nuquin Papan chiampidpadquid abi yacno yuedanquid nëmbobi iqueque. Mibi ic-said ënshun ëmbi chiaid bëda tantiata —quepondash Esus comapenec onquec.

Ëbëd iquec cho Esusën abia caido

(Mat 4.18-22; Duc 5.8-11)

¹⁶ Aden chuibanashic chian Cadidia caid cuëman capupondash. Ambo capuquin Petedo Simombëdtan aton utsin Andedesën nëshaid acte nënebansho istuidpondash. Aid daëdi nuëcquid bedquid niondash. ¹⁷ Aden nuëcquid bednuen nëshaid nënesho isec: —Nëshaidën nuëcquid bedquid icboedi nëbi Nuquin Papa yacno yuedanquid iquec quequin chuitequid mibi icmembique. Ëbëd iquec cho —quepondash Esus. ¹⁸ Adsho tantiash nëshaid abëd icquid menianec abi chuiquidbëd nidanepondash.

¹⁹ Adanec udictsëc nidanequin Sebedeyon mado daëd Acobobëdta Uan Esusën istuidpondash. Aidon aton nëshaid nacnempondash cano antabëdquin.

²⁰ Aden nacnesho isun Esusën ambi utsi chuibocpadomboen chiaquien aid daëdshuntsen aton papabëd aton yua cano antabëdsho nianec Esusbëd nidanepondash.

Mayan icsa Esusën dapuduemiaid

(Duc 4.33-37)

²¹ Adashic chian Cadidia caid yacnoësh nidequi shubu dadpen icquid Capednaun caid yacno Esusbëd icquido chopondash. Choash chonoadtemaid ushë icnuc ënapen capuenquo yec Nuquin Papan chiaid chuibante shubun puduedpondash. Puduedshun iccuedquido Nuquin Papan chiaid Esusën chuipondash. ²² Aden chuisho tantiashun: —Ambia tantiaquidën chiacpadomboen Esusën chuibanec. Utsimbien adomboen chienquo iccosh —quec onquec tabadcuededpondash. ²³ Aden Esusën chuisho tantianubien mayan icsa dapuduedaid tsadacnoëshquiobi comapenec onquiampondash: ²⁴ —Esus Nasaded yacnoësh choquid mibëd icquidpenquo nebique. Nidec nid. ¿Chian anëdënquiacno ëbitedi nidmneueta cho? Nuquin Papan Madombo icsaisa nec quequin ëmbi tantiaid mibi nec —quec mayan icsa dapuedtsaid onquepondash. ²⁵ Adoaquien: —Otaquio tabad —quetanquin: —Dapuduen —capondash Esusën. ²⁶ Adoac comapenec abi dapuduedaid uëdëquenec sidquianec dapuduempondash.

²⁷ Adsho isash: —¿Abimbodambi ispo? ¿Mitsipadquidquio nepec? Ambi tantiaid utsien nechitec. Chuiquidën nacpadomboen naid nec. Dapuduen, ambi cac ambi chiacpadomboen mayan icsan naic —quec onquecuededpondash Esusën naid chiec. ²⁸ Adec onquecuededash auëshquio nidaneshun

ambi isboed, Esusën naid, chuibampondash. Aden chuibansho nidaid Cadidia caid yacnocquidtedishuntsen tantiabededpondash.

*Simonën nachi bédamiad
(Mat 8.14-15; Duc 4.38-39)*

²⁹ Ambi chuisho tantiaboedo nidanenubien Petedo Simon caidën shubu yacno Esus Acobo Uan aitedi nidpondash. Aidën shubun icquidbidi aton utsi Andeces icpondash. ³⁰ Aidën shubun icquidbidi Simonën nachi icpondash. Ambo Simonën nachi chumbo yec uepondash. Ambobi Esus chosho isun utsin chuipondash chumbo iquec quequin. ³¹ Aden chiaquien Simonën nachi yacnombo choshon Esusën mëdinquin uëtsëndoac abi chumbo yaid badedquio bédampondash. Adec bédanash nidoashon codocashun abi choquidtedi pemebampondash Simonën nachin.

*Esusën dadpen bédamiad
(Mat 8.16-17; Duc 4.40-41)*

³² Adnubien inchëshbudtsëqui Capednaun caid yacnocquidën daicsaidtedi bë-bëpondash. Adembidi mayan icsa dapuduedaidtedi bë-bëpondash. ³³ Bë-bëash Simonën shubu shëcuë cuëmano puduedabi tabadcuuededpondash. ³⁴ Adsho isun daicsaidtedi Esusën bédamebampondash. Adembidi mayan icsa dapuduedaid dapuduebampondash oncamenquiocquin. Nuquin Papan Madombo abi yacno yuedmianquid abentsëcquiobi mibi nec quequin chuinushe qeshun oncamenquiocpondash.

*Shubu nibëdacno Nuquin Papabëd onque Esus onquiaid
(Duc 4.43-44)*

³⁵ Adashic badiadte anoentsëqui yanubi isucunanec puduanec shubu nibëdacno Esus nidpondash. Nidëc tabadtuidshun Nuquin Papabëd onquequin chuibampondash. ³⁶ Esus nidacshobi isunshun Petedo Simombëd icquidën nibënampondash. ³⁷ Aden nibënquin istuidashi: —Mibi isec chochoquidtedishun mibi nibëmbededec —quepondash Esus caic.

³⁸ Adoaquien Esus: —Capucuenequin utsibotsen Nuquin Papan shubu abentsëquën yuedanquid iquec quequin chuibenec chobique. Shubu utsi-utsiec dadpen yacno nidnu. Nid —quepondash. ³⁹ Aden chuibidanec nidaid Cadidia caid yacno capuequi shubu dadpen yacno choshon Nuquin Papan chiaid chuibante shubun puduedshun Nuquin Papa yacno shubu abentsëquën yuedanquid iquec quequin chuibampondash. Adembidi shubu dadpen icquid utsi-utsiec yacno choash puduedshun adomboembidi chuoapondash. Adembidi mayan icsa dapudueameopondash.

*Nami mishac tantiadenquiocquid bédamiad
(Mat 8.2-4; Duc 5.12-13)*

⁴⁰ Aden Esusën chuibanubien daushacbinboecquid nami mishac tantiadenquiocquid chopondash. Esus yacno choash: —Dada icsambo iquebique. Mibi adquid tantiaquid icquin ëbi bédame —quequin Esus chiec comapenec cuëdpondash.

⁴¹ Adec cuëdshobi nëid isash unësqüo iquebi quequin ëquëducshun tantiaguin mishec Esus: —Mibi bédamembique. Bëdambo icta ⁴² —quenubi daicsaid nibëdquio yec bédampondash.

⁴³ Aden bédametanquin nidmepondash: —Nidëc nid. ⁴⁴ Nidquimbi, Esusën bédamioshi quequin chuituidenda. Naden nata. Edusaden yacno nidash Nuquin Papa tabadte shubu uashunaid yacno nidëc puduedta. Ambo puduedshun min dada bédambo icquin anocquid, Nuquin Papa matses chiec onquianequid, isme. Adoshon dëbimbiëcquid daëd meneta Moisesën

chiacpadomboen ma anocquidën napanueshun. Aden meniac abentsëc cuesuneshun utsi cuesunenu quenquiocquin cuesuniaidën intac puntanequin intac mibi daseccashun dëbimbicquid utsi cuemeshun naden aidën mibi chuipec. Nuquin Papan mibi bëdamboen istiapimbochoedi nëbi bëdamboen mibi isendac. Aden chuiquin mibi bëdamiaid Nuquin Papan naid nec quequin tantiatsiash —quepondash Esus ambi bëdameboed chiec. ⁴⁵ Adsho tantiaboshombi niacbidanquin Esusën bëdamioshi quequin chuibenepondash. Aden chuibanac Esus yacno matses dadpen cho-chopondash. Adec chochoso isash shubu dadpen icquid yacno Esus tabadtiapimbo yec shubu nibëdacno capupondash. Adnubien Esus nibë nec nidaid utsi-utsiec yacnoësh dadpen cho-chopondash.

2

Cuembo yec uishquiaid Esusën bëdamiaid (Mat 9.2-8; Duc 5.18-26)

¹ Adashic Capednaun yacno nidoash shubun puduedpondash Esus. Adnubien, Esus chosh quesho tantiash padpidec dadpen cho-choapondash. ² Dadpen cho-choash puduedash tsucus-tsucustsëcquio yec tabadnubi adecbidi shëcuë cuëmano tabadpondash. Adec tabadsho isun Esusën Nuquin Papa yacno shubu abentsëquën tabadte iquec quequin chuibampondash. ³ Adnubien cuembo yec uishquiaid bëc dada daëd-daëdquiec 4ted chochopondash. ⁴ Cho-choshon matses tsucus-tsucustsëcquio yec tabadsho isun dectatoshon macano nacenaid chic-chictanquin Esusën dayunquo uishquiaid imbudpondash. ⁵ Aton dayunquo imbudsho isun Esusën bëdamec quequin abi imbudboedën tantiec quequin ambibi tantiapondash Esusën. Adashic: —Mado, mibi cuidenquo yec mibi icsaid bëpiscudobi —quepondash Esus.

⁶ Adnubien isadaidbo tsusedpabon nadomboen nata quequin chiaid tantiamequidon ambobi tabadquin naden onquenquiocquin icsamboen tantiapondash. ⁷ ¿Atotsi quiash adec Esus onquepeque? Tantianu. Nuquin Papa icsamboen chuiquidien aid nechitec. Nuquin Papauidi matses cuidenquo yec abi icsaid bëpiscudquid nec, quetsëcquiec tabadpondash.

⁸ Aidon tantiaid tantiec nadpondash Esus: —¿Atotsieshun aden mimbi icsamboen tantiape? ⁹ ¿Mibi cuidenquo yec mibi icsaid bëpiscudobi quequin ëmbi chiaidquo bëdantequidpenda nedic? Adecbidi, ¿Mibi icsambochoedi mibi bëdanoque. Nidtoшон mibi imbudboed chiadtoshon buanec nid quequin ëmbi chiaid bëdantequidpembidida neoadic? ¹⁰ Ai, adquidquibidi nec. Mibi cuidenquo yec mibi icsaid bëpiscudobi queboed chidon tishac matses yanaid yequi chuiquidquo Esus nec quequin tantiesabo mibi nepec. Adquid icsho ëbi tantiamenuequin ¹¹ cuembo yec uishquiaid naden chiembique Tantia. Mibi icsambochoedi mibi bëdamiombique. Nidtoшон mibi imbudboed chiadtoshon buanec nid —capondash Esusën. ¹² Adoaquien nidtoшон abi imbudboed chiadtoanquin buampondash. Aden buansho isash: —Nideque. Is. Adomboen nasho isamboccondambi —quetsëcquiec onquiash Nuquin Papan naid nec quec cuëdëncuededpondash.

Ëbëd iquec cho Esusën Debi caid (Mat 9.9-13; Duc 5.27-32)

¹³ Adashic padpidec chian Cadidia caid cuëmano nidoapondash Esus. Ambobi tabadnubien aidën chiaid tantianuec matses dadpen cho-choapondash. Cho-choasho isun Nuquin Papan chiaid chuibanapondash Esusën. ¹⁴ Aden chuibanec nidquimbi Debi, Adpeon madombo, tsadsho istuidpondash. Aidi Mateyobidi cuë nondash. Nidaid utsi yacno aton na utsibon buan-buansho

isun piucquid bedshunquid Debi nepondash. Adembidi nidaid utsi yacnoshon aton na bē-bēsho isun piucquid bedshunoaquid Debi nepondash. Isadaidpembro ancaquidēn, Con matsespembon piucquid bedshunta, cac bedshunoaquid Debi nepondash. Adshobien: —Ēbēd iquec cho —Esusēn cac: —Ai, mibēd nidnu. Nid —quianec badei Esus tsibanec Debi nidpondash.

¹⁵ Adshumbic Debin shubuno nidshun Esusbēd icquidon pepondash. Ashunquibidi aton na buansho isun piucquid bedshunquid Debipadquidēn utsin-utsinquien pepondash. Ashunquibidi isadaidbo tsusedpabon nadomboen nata quequin chiaid naisan utsin-utsinquien pepondash. Debin shubuno Esus tsibanec choquid dadpen icpondash.

¹⁶ Aden adquidbēdtan Esusēn pesho isun isadaidbon nadomboen nata quequin chiaid tantiamequid padiseyobo caid: —ĶAtotsieshun piucquid bedshunquidbēdtambi isadaidbon nadomboen nata quequin chiaid naisabēdtambi mibi chuiquidēn pepec? Tantiānu. Ēbi chui —quepondash padiseyobo Esusbēd icquido chiec.

¹⁷ Adsho tantiashien Esus: —ĶDada bēdamocquidta dauēchoquidēn bēdametequid nedic? Padenquio. Daicsaidien dauēchoquidēn bēdamec. Adquiecbidi, icsaisa nebi quequin ambibi tantiaquid icsho mibi icsaid ēnta. Aden ēnash ēbēd icquid mibi iquendac quequin chiesha nebi. Icsaquid nebi qeshun mibi icsaid ēnta. Aden ēnash, ēbēd icquid mibi iquendac quequin chuiquid nebi —quepondash Esus.

*ĶAtotsi quiash mibēd icquid buna mēmunesa nec? quiaid
(Mat 9.14-17; Duc 5.33-39)*

¹⁸ Adnubien abi chuiquid quēnēn nauedan aid tantiec unēsquioquin Uan acten mentoanquidbēd icquidēn buna mēmunabi padiseyobēd icquidon unēsaid tantiec unēsquioquin buna mēmunoapondash. Aden buna mēmunsho isanec nidequi Esus yacno nidash Esusbēd icquidon buna mēmunenquio icsho isash utsibo: —ĶAtotsieshun Uambēd icquidon adembidi padiseyobēd icquidon buna mēmunabi mibēd icquidon buna mēmunenquio icpec? Tantiānu. Chui —quepondash.

¹⁹⁻²⁰ Adoaquien Esus: —Aton chido bednun pambid meniac chidon codocacsho abi inquidēn abēd icquido menec. Aden meniac isuidesa abēd icquido nec. Adecbidi ēbi abi chuiquid icnuc ēbēd icquidon buna mēmunenquioquin isuidenquio iquec. Yuecash chido inquid nibēdanan abēd ichoedo unēsquioquin buna mēmunquin isuidpec. Adecbidi ēbi nibēdanan ēbēd ichoedo unēsquio yampec.

²¹ “Adembidi dashcute shēnibēdta chucambocquid bētuscaisa matses nec. Shēnibēdta chucambocquid bētuscatsaid amēec canchedoaic. Adecbidi abi icsaid ēnesa tantiaid bēda pausudtiapimbo yec icsabudec. ²² Adembidi dadpen icquid chodo uashun sandoec. Adotankumbic istuidshun chuca uain chodo uashun sandoaic. Chodo shēnin icsa sandoshon nequid bēenquioquin. Adecbidi Nuquin Papan tantiapadec pausudnu qeshun mibi icsaid ēnacsho isun Nuquin Papan pausundenac —quepondash Esus.

*Chonoadtemaid ushē icbo nebi quiaid
(Mat 12.1-8; Duc 6.1-5)*

²³ Adnubien chonoadtemaid ushē utsi icnuc ēnapen capuenquioquin tied matanquin adosbiecquid trico caid ēshē bedshun Esusbēd icquidon pepondash. ²⁴ Adshobien: —Mibēd icquido is. Chonoadtemaid ushēn chonoadeque. Abi chuiquid mibi iquec Ķatotsi quiash, Padi. Chēn, quenquio ique? —quepondash padiseyobo Esus caic.

²⁵ Adoaquien Esus: —ĶChuiquid Dabidbēd icquidon natia bunquin ambi petemaid pepondash quequin dada uapampid tantiamboda icconda?

²⁶ Nad icpampic. Abëd icquidobëd yuec capuash Dabid comapenec bundopampic. Bundoash Nuquin Papa tabadte shubu uashunaid yacno choash puduedtemaid quënën puduedshun Nuquin Papa tantianuequin pan me- niac sanaid bedshun ambi petemaid abëd icquidobëdtambi abi chuiquidën Dabidën pepampic. Puduedtemaid quënën puduedquid, Nuquin Papa mates chiec onquianequid, Abiatad abentsëqui icnubi aid quënën puduedshun bedshun Dabidën pepampic. Abiatadpadquidën peteuiddtsëqui nec quen- quioquin abëd icquido tantiaquin pan bedshun aidobëdtambi pepampic chuiquid dapa Dabidën –quepondash Esus padiseyobo caic.

²⁷ Aden chuishumbic naden padiseyobo Esusën chuioapondash: – Nabanash tiboedte mates bumpec quequin tantiaquin abitedi uabanquin ënashini con pabëdi tiboquepampic. Adashic yuecash, Chonoadtemaid ushë nec, quepadenebi con pabëdi. Aden chiequi mates tiboedte ushë aton icho ictiapimbo iquec. ²⁸ Aid ushë icho icquin ëbëd icquidon bunquin pebeded- sho isash, Padi. Chonoadtemaid ushë neque. Aden penda, quenquiocobi –quepondash Esus abi chieshënkuido padiseyobo chiec.

3

Mëuesadaid Esusën bëdamiaid (Mat 12.9-14; Duc 6.6-11)

¹ Adashic padpidec Nuquin Papan chiaid chuibante shubun Esus pudued- pondash. Ambo dada mëuesadaid tsadnubi ² Esus chieshënkuido padise- yobo dadpen tabadpondash. Adec tabadec, Nëbi chonoadtemaid ushë icnuda Esusën mëuesadaid bëdamepeque. Nëid badiadën bëdamesho isun bedmeshun quënën naudemnu quetsëcquiec padiseyobo tabadcuededpon- dash. ³ Aden tantiec padiseyobo tabadnubien mëuesadaid chuiquin Esusën: –Nënantanquio nidto –capondash.

⁴ Adoac nënantanquio nidtoash mëuesadaid nidnubi iccuededquido chiec Esus onquepondash: –¿Chonoadtemaid ushën mates tantiaquindambi nape? ¿Adoenquocquin matses icsa uapendambi ique? ¿Nëid ushëndambi matses bëdamepe? ¿Bëdamenquiocquindambi cuesunepe? –quepondash. Aden chiec Esus onquenubien onquenquio yec tabadpondash padiseyobo.

⁵ Adoaquien nëishtanquimbi abi chieshënkuido bëisbanec Esus, Nuquin Pa- pan chiaid tantiabanquin naisa yec pausudtiapimbo icquido nec, abibi quiashic, Unësquio iquebi, quec tsadpondash. Adec tsadquin mëuesadaid chuiquin Esusën: –Ëbi mëd –cac mëdequi bëdampondash. ⁶ Adosho isash puduenanec nidquin edodesbo padiseyobon badedquio istuidpondash. Aido istuidash: –Esus cuesunete mibi bunacpadquiec bunebi. ¿Mitsi- padentsimbi cuesunemenuen bedmepeba? –quecuededpondash padisey- obo.

Esus yacno matses dadpen choaid

⁷ Adnubien Esusbëd 12ted icquido chian Cadidia caid yacno nidoapondash. Adnubien nidaid Cadidia caid yacnoësh utsibo dadpen cho- choapondash. ⁸ Adnubien Esusën nabansho isboeden chiac nidaid Udeya caid yacnocquido dadpen cho-chonobi adecbidi Edusaden yacnocquido cho-chonobi adecbidi Idumeya yacnocquido cho-chonobi adecbidi acte Odan caid uquë cuëma utsiucquido cho-chonobi adecbidi shubu dadpen icquid Tido caid yacnocquido cho-chonobi adecbidi shubu dadpen icquid Sidon caid yacnocquido cho-chopondash. Esus yacno ambi nabanaid utsibon chuisho tantiasch cho-chopondash. ⁹ Adec cho-choash tsucus-tsucustsëcquio yec tabadquin tsicatiac nënantanquio tsadacnoëshi catashnushe quiash Esus: –Cano bec cho –quiampondash abëd icquidquido

caic. ¹⁰ Dadpen bēdamiosh cadoshe. Ēbitsen bēdanu quequin ambibi tantiaquin Esus mishbededpondash. ¹¹ Adembidi tantiaquin mishnuec mayan icsa dapuduedaid choquin Esus istuidequi uebudec comapenec sidquianec: —Nuquin Papan madombobi mibi nec —quec comapenec cuēdpondash. ¹² Adoquien: —Padi. Aden ēbi chienda —quepondash Esus.

Abēd 12ted icquid Esusēn tantiamenu caid
(*Mat 10.1-4; Duc 6.12-16*)

¹³ Adashic macuēsh dapa yacno nidnushi abēd 12ted icquido chomeshun nadopondash: ¹⁴ Ēmbi tantiacpadomboen mibitedi tantiamembi. Adquid icquin ēbēd tabadquin ēmbi chiacpadomboen mimbi tantiabenedac. Aden tantiabenascho isun ēmbi chiacpadomboen chuimenuen mibitsen nidmembi. ¹⁵ Adembidi mayan icsa dapuduedaid dapuduequidbidi mibi icmembi quequin abēd icquido Esusēn chuipondash. ¹⁶ Ambi tantiamenu caid nēdtedi icpondash: Simon cashumbic Esusēn Petedo capondash, ¹⁷ utsibic Sebedeyon mado daēd, Acobobēd Uan. Aid daēdi, abu cuēdtequidēn mado nec quequin oncain Buanedquis quequin Esusēn cuēmpondash. ¹⁸ Utsibic Andedes, utsibic Uedipe, utsibic Badtodome, utsibic Mateyo cuēnshumbic Debi cuēmpondash. Utsibic Tomas, utsibic Acobo, aidi Adpeon mado nepondash. Utsibic Tadeyo, utsibic Simon, aidi cananistabo caidbidi nepondash. ¹⁹ Utsibic Udas Iscadiote, aidi abi chieshēnquido Esus bedmenush Esusbēd capuquid nepondash. Aidedi Esusēn tantiamequin chuiquin ismiaido niondash.

Bedtsibu caidēn dausunaid Esus nec quiaid
(*Mat 12.22-32; Duc 11.14-23; 12.10*)

²⁰ Aidedi chianec nidequi Esusbēd icquido shubun puduedpondash. Shubun puduednubien mates dadpen cho-choapondash. Adshobien Esusēn Nuquin Papan chiaid chuibanubi Esusbēd icquid penquo icpondash. ²¹ Aden penquioscho isanec nidshun Esus yuedquid yacno choshon chuituidpondash. Aden chuituidac anocquidtsen Esus bednuec chopondash. Icsabudashien nec quianec chopondash.

²² Adomboembidi Esus icsabudec quequin icsamboen chuiquid utsibo icpondash. Isadaidbo tsusedpabon nadomboen nata quequin chiaid tantiamequid chuiquid dapabo niondash. Aido Edusaden caid yacnoēsh choquido niondash. Aido mayan icsa Esusēn dapuduemesho isboed Esus chieshēnquid yec nadpondash: —Mayan icsan icbo Satanas cashumbic Bedtsibu caidēn tantiamiaid Esus nec. Adquid icquin mayan icsa mates dapuduedaid dapuduemec —quepondash.

²³ Adoquien Esus: —Mimbi icsamboen tantieque. Mibi chuibanu. Tantieq tabadta. ¿Mayan icsan icbo ambi dapuduedmiaid dapuduequidta nepadic? Padenquio. ²⁴ Adquiecbidi shubu icbo abēd icquido cuēshēdmesa nec. ²⁵ Icbo abēd icquido cuēshēdmias shubu abentsēquēn tabadtiapimbo iquendac. ²⁶ Adembidi ambi dapuduedmiaid dapuduemias adquidēn icbo ictiapimbo Satanas iquec. Icbo icnuequid abēd icquid pudemesa nec. ²⁷ Dadpenshun icbo Satanas nec. Adquid icquin ambi mates dapuduedmiaid dēniacanquidēnuidquio nadatiambocquin nabanquin cuemepec. Adquid icquin ēmbi nac mayan icsa dapuduedaid Satanasēn yua icboedi icbombo tantieq bēdamo yanec ēbēd iquendac. ²⁸ Abimbo chiembique. Tantiata. Mates cudenquiocquin abi icsaid bēpiscudquin paucquid Nuquin Papa nendac. Adecbidi Nuquin Papa icsamboen chuiboedi, Icsaobi, Papa, qesho tantiashun Nuquin Papan aid paquendac. ²⁹ Utsien Nuquin Papan Mayan

abipadquidën tantiamiac nasho isun Satanasën naid nec qesho pauquenquio iquendac. Adquid ënëdenquio yec icsaquid nendac –quepondash Esus³⁰ Satanasën tantiamiac mayan icsa dapudemquid Esus nec abi caquido chiec.

Esus yacno aton utsibo anibëd choaid
(*Mat 12.46-50; Duc 8.19-21*)

³¹ Adashic Esus yacno aton utsibo anibëd chopondash. Aido choshon matses dadpen nuntan tabadsho istuidash: –Ëbi choaid con mado chuita –quepondash utsi chiec. ³² Adoac puduedshun Esus nënantan tsadsho isun: –Titabëd min utsibo choshon umanucshun mibi isnuen cainec –quequin chuituidpondash. ³³ Adoaquien Esus: –Adquid utsi chuinu. Tantiata. ³⁴ Në tabadquido ëbëd icquido neque. Is –quepondash Esus abëd icuedquido chiec. ³⁵ Adashic: –Nuquin Papan chiacpadomboen nabanquid ëbëd icquid nec. Adquid buchi caindambi. Adquid chido chuchu caindambi. Adquid utsi tita caindambi –quepondash Esus.

4

Tantiamequin pete ëshë nësecain chiaid
(*Mat 13.1-9, 18-23; Duc 8.4-15*)

¹ Adashic padpidec chian cuëmano nidshun Esusën tantiamequin chuibanopondash. Aden chuibanuc cho-choquid dadpen icsho isash cano antabëdtopondash cho-choquid acte cuëmano tabadnubi. ² Adec tabadshobi, matses nadquio iquec quequin tantiaquin tiedën caniquid ëshë Esusën tantiamequin naden chuibampondash: ³ –Tied icbo pete ëshë nësecanuec aton tied yacno nidquid. ⁴ Adec nësecanuec nidshun pete ëshë nësecac maisec pudun-pudunaid uicchunën chequid. ⁵ Adnubien nidaid cuënote dadpen samëdacno utsi-utsiec paëdash badedquio dëyucuidtsash ⁶ tapunenquio iquec ushën shoedec. ⁷ Adnubien pete ëshë utsi-utsiec nisanquid dëyucacno paëdash dëyucash caniduidtsacsho nisanquidën bëtinac podò sinash bacuëtiapimbo iquec. ⁸ Adnubien nidaid bëdambo yacno paëdaid dëyucuid caniaash dadpen pete ëshë icquid. Utsi-utsiec 30ted icnuc, utsi-utsiec 60ted icnuc, utsi-utsiec 100ted iquec –quepondash Esus.

⁹ Aden chiaash: –Ëmbi chuiboed tantianu quiash bëdamboen tantiec papuduedta –quepondash Esus.

¹⁰ Aden chuibanash udictsëc Esusbëdi nidshun utsibo choenquiocsho isun databëdtuidquin abëd icquidon: –Mimbi chuibamboed tantianu. Ëbi chui –capondash Esus chuiquin.

¹¹ Adoaquien: –Nuquin Papan shubun tabadquid tantiamendambi utsi-boembi, Mibi nadquido iquec, quenquiocquin chuibanoc. ¹² Aden chiac: “Nuquin Papan nabamboed isto-istoboedi ma padenquio tabadteneyoc. Adembidi tantiado-tantiadoneboedi ma padenquio tabadteneyoc. Aidon abimbo tantiaquin abi icsaid ëntsiandac. Aden abi icsaid ënsho isun cuidenquio yec Nuquin Papa abi icsaid bëpiscudtsiandac” –quepondash Esus abëd icquido caic.

¹³ Aden chiasic: –¿Mimbitsen ëmbi chuiboed tantienquioda ique? Aidi tantienquiocquin ¿mitsipadentsi adomboembidi chuibansho mimbi tantiape? Ëmbi chuiboed nad iqueque. Tantia. Chuinu. ¹⁴ Pete ëshë sequid-bimboecquid Nuquin Papan chiaid chuibanquidquio nec. Ëshë ambi siaid-bimboecquid Nuquin Papan chiaid nec. Abi paëdacno nidaidbimboecquid matsesën tantiate nec. ¹⁵ Nidaidën paëdash pete ëshë dëyuciapimbocsho

uicchunën chiaidbimboec matses utsi-utsiec iquec. Adquid Nuquin Papan chiaid tantiash papuduednu qesho Satanasën bēpiscudmiac tantienquo yanec Nuquin Papa yacno puduedtiapimbo iquec. ¹⁶⁻¹⁷ Nidaid cuēnote dadpen samēdacno pete ēshē paēdash bādedquo dēyucuidtsash tapunenquo yec ushēn shoedaiddimboec matses utsi-utsiec iquec. Adquid Nuquin Papan chiaid tantiauidash bēdambo iquec queboedi ¿Esus tantiaquid nebi quecta icco? quequin utsibon mamēshunac bādedquo tantiesa nebi quen-dac. ¹⁸⁻¹⁹ Nisanquid dēyucacno pete ēshē paēdash dēyucash canidoudtsacsho nisanquidēn bētīnac podō sinash bacuēesabimboec matses utsi-utsiec iquec. Adquid Nuquin Papan chiaid tantiauidash abi bunaid, abi nēnaid, abi ic-said aidtedi tantiaquin Nuquin Papan chiaid tantiesa yanshun bēdamboec tabadaid ismesa yanec. Adquidēn Nuquin Papan chiaid tantiaquid utsi icmetiapimbo iquec. ²⁰ Ēshē utsibic nidaid bēdambocquidēn paēdash dēyucash caniash dadpen bacuē icquiddimboec matses utsi-utsiec iquendac. Adquid Nuquin Papan chiaid tantiadonec bēdamboec tabadquin utsi ismequid nec. Aden ismiac Nuquin Papan chiaid tantiaquid daēdpactsēc yanubi utsin ismiac Nuquin Papan chiaid tantiaquid dadpen yanubi utsin ismiac Nuquin Papan chiaid tantiaquid dadpenquioshē yanendac –quepondash Esus abēd icquido tantiamenuc.

Tabote nēnantan nanac chēnquiabimboec ictiad quiaid

(Duc 8.16-18)

²¹ Aden chuishumbic abēd icquido naden Esusēn chuipondash: –¿Tabote icbon ambi dayun uaboed tabōshon tsadte tēdion nanshun isaidta nedic? Adembidi ¿Tabote matsun bētashun isaidta neoadic? Padenquo. Nēnantan tabote nanac chēnquiabimboec ismenu quec ictiad. ²² Adquiobidi abi yacno yuedanquid ambi dayun uapampidi nēbi Nuquin Papan dayun uain-quiocquin ēbi chomeshun ismec. Adembidi con mado chuiban quen-quiochoedēmbi nēbi ēbi ismec ma con mado chuibanu quequid con Pa nec. ²³ Ambi chiaid tantianu qeshun tantiaquiec papuduedta –quepondash Esus.

²⁴ Aden chias Esus: –Chiaid bēda tantiatequidquo iquec qeshun tantiaquiec papuduedquid icta. Aden chiaiduidi tantiec papuduedquid abipadquid bēdambocquid ambia tantiaquidēn Nuquin Papan mibi icmendac.

²⁵ Adquid ambi tantiadoniaidquo iquendac. Aden tantienquioctśēcquidēn tantiaid bēda uesadendac nibēdquiec –quepondash.

Ambi siaboed icbon isenquiocnoc bacuēc quiaid

²⁶ Adec onquequin abēd icquidquo chuishumbic cho-choquidtsen naden Esusēn chuipondash: –Nuquin Papan shubu abentsēquēn tabadec caidaidquo chuibanu. Tantiata. Nidaid bēdan tiedēn caniquid pete ēshē sias ²⁷ tabadquin cainquidquo icbo nec. Dadpen ushquin ambi seboed isenquo yec icbo tabadnubi ²⁸ ambi seboed dēyucash caniec tautitanec bacuēc. ²⁹ Ambi siaid isenquiocnoc canitanec bacuēcasho bādedquo bedquid icbo nec. Adquiecbidi Nuquin Papan chiaid chuiban-chuibanubi papudedquid utsi-utsiec yanec chuibanquidēn isenquiocnobi. Papuduedquioshon tantiabenece. Adquid isash con shubun puduedquido neque. Bednu quependac Nuquin Papa –quepondash Esus.

Mostasa caid ēshē chiaid

(Mat 13.31-35; Duc 13.18-19)

³⁰⁻³² Adec onquequin chuibanashic Esus: –Nadquo Nuquin Papan shubun icquido iqueque. Chuinu. Tantiata. Mostasa caid pistśēc ēshēmpi ictśēcquid nēsecaid dēyucash nuamboshē caniec cuidi-cuidipambo iquec

shubu-shubupambo yec podoec. Ambo uicchunën shubu uaic. Adomboembidi aton shubun abí tantiaquid dadpen dayun uaquid Nuquin Papa nec – quepondash.

³³ Aden chuibanshumbic adomboembidi Esusën chuibampondash. Aden chuibanash, aittedquoio tantiapec abibi queshumbic aden chiaid chuiquin ëmpondash Esusën. ³⁴ Aden abited chuibanshumbic abëd icquiduidtsëqui bëdamboen tantiamequin chuipondash.

Acte tēccoasquiaid ënëd cac ënëdaid
(*Mat 8.23-27; Duc 8.22-25*)

³⁵ Adashic abi ushëmbi inchëshbudtsëc cano antabëdtoanec Esus: –Chian uguë cuëma utsiuc nuquiuidtsëqui nidnu. Nid –quiampondash abëd icquido caic. ³⁶ Aden chiac chian cuëman tabadcuededquido niananec badëdquoio nidquin canon Esus buampondash. Abëd icquidon potenubien cano antabëdtoanquin utsin-utsinquieri potepondash. ³⁷ Aden potenubien cunquequid dapan acte tēccoasquequin cano acte uemiaidën mentoadtsempondash Esus tētadec ushñubi. ³⁸ Adec uec usho: –Cunquequid dapan acte tēccoascaidën nuqui mentoeque. Isucunta, icho –quequin Esus timpondash.

³⁹ Aden tinac uëtsëdtoshon Esusën: –Mibi comapenec cunqueque. Ënëd –cac badedquoio ënëdpondash. Adembidi: –Mibi comapenec tēccoasqueque. Ënëd –cac badedquoio ënëdoapondash acte.

⁴⁰ Aden ënëdmetanec Esus: –¿Atotsi quiash ëbi tantienquoio yec dacuëdcuedede? Ëbi tantiesa mibi nepec –quepondash abëd icquido caic.

⁴¹ Adec Esus cuëñubi badedquoio cunquequid dapa ënëdposh. Adëcbidi acte tēccoasquequid ënëdoaposh. ¿Mitsipadquidën napeba? Ënëd cacpadequi ënëdposh –quec abibi onquecuededequi uëdëquianquiopondash abëd icquido.

5

Mayan icsa dadpen dapuduedaid bëdamiaid
(*Mat 8.28-34; Duc 8.26-39*)

¹ Adshumbic acte tēccoasquec ënëdmebon nidquimbi cuëma utsiuc potiash nidaid Cadada cashumbic Quedasa caid yacno choapondash. ² Ambobi choash pudundosho mayan icsa dapuduedaidën Esus bëquedpondash. Cuënote dapa macuësh dapaten icquid yacnoësh choquin bëquedpondash.

³ Aidi unësaid chococate cuënote dapa shëcuë uaidën tabadquid icpac caondash. Aidi shococh bucin mëdantebëdta taë taniaid icboedi nadatiambo yanshobi mëtanetiapimbo yampac caondash. ⁴ Abi mëtaniaid shocosh bucu seccuduatanquin tēs-tëstenepac caondash. Adosho isac abi tanebocpadquid utsi nibëdpac caondash. ⁵ Aidi inchëshën capucuenequi mëyanacimboec sidquecuenepac caondash. Adec capuequi cuënoten abibi dasiadcuenepac caondash. Adec siadcuenequi dastidquebudnepac caondash.

⁶ Aidi abi yacno Esus canon chosho isanec titinquierianec choash: –¿Tsusio, ada cho? –quiashic: ⁷ –¿Mibëd icquidtabi nedi? Mimi namiaidpenquoio nebi. Abia Yampidën madombo mibi icquin naden ëbi chuita. Mibi chian anëdënquiacono nësecainquoio iquëmbi. Abimbo chiëmbi quequin ëbi chuita –quepondash mayan icsa dapuduedaid Esus chiec. ⁸ Adec mayan icsa dapuduedaid abi onqueshobien Esusën: –Dapuduen –cashic: ⁹ –¿Tsutsi cuëmëdquid mibi ne? –quepondash Esus.

Adoaquien: –Dadpenquioshë. Cuëte podotedi dapuduedondaid nebi – quepondash mayan icsa dapuduedaid abentsëc yacimboec onquec.

¹⁰ Adashic: —Mibi nadatiambocquid cadoque. Èbitedi chian anèdënquiacno nidmenquiocnuequin ¿nèid nidaidèn adabi tabadmetsia? —quepondash mayan icsatedi.

¹¹ Adnubien macuësh potseshun chanco dadpeshun pec tabadpondash.

¹² Aden pec tabadsho isashien: —¿Ada mimbi èbitedi chanco dapuduedmet-sia? —quepondash mayan icsa Esus caic.

¹³ Adoaquien: —Dada dapuduencuededash chanco dapuduedcuededta —Esusèn cac dapuduencuededash acte dapa quiusudacnombo comapenec niquec pudun-pudunec mentoadbudnepondash chanco nibèdquiec.

¹⁴ Adsho isash chanco pemequin isquido chiec nidanepondash. Adeç nidquimbi shubu dadpen icquid uano-uanoec tabadquido chuituidac aidot-sen isec cho-chopondash. ¹⁵ Esus yacno cho-choshon mayan icsa dapuduedaid bédamiosh quequin chuituidac mayan icsa dapuduedaid icboed naden isbededpondash. Dashcute dasiuidesa icboedi dasiuidash tsadsho abimbo iquec quequin isbededpondash. Aidèn tantienquicoeodi tantiec tsadsho adembidi isbededoapondash. Adeç tsadsho comapenen isbededequi nadatiambocquin naid nepec quetsècquiec tabadcuededpondash.

¹⁶ Adeç tabadsho isun mayan icsa dapuduedaid bédamequin chanco dapuduedmesho isboedon cho-choquido tantiamenuen chuibaampondash. ¹⁷ Aden chuisho tantiaishun cho-choeodon: —Nèmbò tabadenquio yec nidec nid. Mibèd tabadtiapimbo iquebique —capondash comapenen Esus chushcaquin.

¹⁸ Adsho tantiaish cano yacno nidequi cano Esus antabèdtonobien mayan icsa dadpen dapuduemboed choash: —Mibèd icte bunebi. ¿Adabi buane? —quepondash. ¹⁹ Adoaquien: —Padi. Min shubuno nidtan. Ambo nidshun mibi bédamequin mayan icsa dadpen dapuduemeboed Nuquin Papa tantiaquin chuiban. Nuquin Papan èbi ad icsho unèsquiocquin dapuduemiac quequin chuiban —quepondash Esus. ²⁰ Aden Esusèn chiaquien nidpondash. Nidequi shubu dadpen icquid yacno-yacnomboc nidanec nidaid Decapodis caid yacno choshon Esusèn naid chuiban-chuibaampondash. Aden chuiban-chuibansho tantiaquidtedi, Adopenshenda Esusèn bédamiash, quec abibi onquec tabadcuededpondash.

Nua intac budaid bédameshun champi unèsaid bédamiaid
(*Mat 9.18-26; Duc 8.40-56*)

²¹ Adshumbic canon Esusbèd icquidon padpiden abi chobocmibidi chian poteoapondash. Adeç choshò isash matses dadpen chian cuèmano padpidec cho-choashun mananuc Esus pudundotsècshobi badedquio tsucus-tsucustsècquio yec datsidadpondash. ²² Adnubien Nuquin Papan chiaid chuibante shubun tabadquido isquid, Aido cuèmedquid, chopondash. Adeç choquimbi Esus istuidash mibi bédambocquid nec quequin ismenuec Esus tauebudshun: ²³ —Con champi unèseque. Aid mishquin bédamec cho —cac ²⁴ Aidobèdi Esus nidpondash.

Adeç nidshobi matses dadpeshun tsibanampondash. Tsucus-tsucustsècquio yec nidquin Esus tsibanampondash. ²⁵ Esus tsibanquidquio chido utsi icpondash. Aid chido seta 12ted matamec intac budash bédanenquiocquid icpac caondash. ²⁶ Dauè meniaqui bédanenquio icpac caondash. Dauèchoquid utsi-utsien piucquid menequin dauè bedshun chequi bédanenquio yec intac nuambo yampac caondash aton piucquid naimèdnubi. ²⁷ Adeç intac icnubi capuquin Esusèn nabanaid chuisho tantianec nidquimbi matses dadpeshun tsibananubi aidèntsen tsibanampondash. Aden matses dadpeshun tsibananubi ismenquiocquin cachoc choshon Esusèn dashcute mishpac caondash. ²⁸ Aden aton

dashcuteuidtsëqui mishec bēdampatsiash icmane queshun mishtsequi bēdampac caondash. ²⁹ Intac bēdanenquiocquid Esus mishec bēdampac caondash. Ēmbi tantiacpadquiequi bēdanobi quequin ambibi tantiapondash.

³⁰ Adec chido bēdanubien ěmbi nadatiambocquin naoc quequin tantiec amibidi bidiadquin isec Esus: —¿Tsuntsimbini mishposh? —quepondash.

³¹ Aden chuisho tantiashun abēd icquidēnquo: —Tsucus-tsucustsēcquio matses dadpen iquec, ¿tsuntsimbini mishosh, quecta ique? —capondash.

³² Adec abēd icquid cuēdnubi onquenquiocquin, ¿Midaquidēnquo mishoshibique? Isnu, abibi quequin matses utsi-utsien bēispondash Esusēn. ³³ Aden bēisbanubi, ěmbi mishoc quenquo yec bēdamboed uēdēquec choequi mibi nadatiambocquin naquid nec quequin tantiequi Esusēn taēno uebudshun abi mishec bēdanaid chuibampondash. ³⁴ Adoaquien Esusēn: —Champi, mimbi tantiacpadquiequi mibi bēdanoc. Dada icsambo ichoedi nēbi dada bēdambo mibi iqueque. Bēdambo yec nid —capondash chido chuiquin.

³⁵ Aden nidmenubien Aidon shubun icquid cho-choshon: —Min champi unēsoshe. Tsusio chomenda —capondash Aido chuiquin.

³⁶ Adnubien Aido Nuquin Papan chiaid chuibante shubun tabadquido isquid caic: —Dacuēdenquiocquin ěbi tantiata —quepondash Esus.

³⁷ Aden Aido chuishun Esusēn: —Cho-choenda —capondash abi tsi-banuequido chuiquin. Aden chianec Petedobēdta Acobo Uan, Acobon ut-simbo aidtedi buanec Esus nidpondash. ³⁸ Adec nidequi Aidon shubuno choquin comapenec shubicuededsho tantiatuidpondash. ³⁹ Aden tantiequi puduedash Esus: —¿Atotsi quec comapenec shubicuedede? Champi unēsenuquo yec ushacimboec uec nec —quepondash.

⁴⁰ Adshobien tantiesa icquin mamēnshumbededpondash. Adoaquien aidtedi puduemiasch champin tita aton papa chedo abēd icquidbēd champi yacno Esus puduedpondash. ⁴¹ Ambo choshon mēdante mēdintanquin Esusēn: —Talita, cumi —capondash. Aton onqueten, Champi, isucunash nidto, quequin adopondash. ⁴² Adoac badedquio isucunash nidtoash capupondash. Champi seta 12ted icquid niondash. Aidi bēdansho isun abitedishun, Adopeshenda iquec quequin isbededpondash. ⁴³ Aden champi bēdameshun Esusēn: —Ēmbi naboed utsi chienda. Abimbo caimbi. Abentsēcquiobi chienda —capondash. Aden chuitanequi: —Champi peme —quepondash Esus.

6

Abi icnēdacnoshon Esus chieshēnquido (Mat 13.53-58)

¹ Auēshquio puduanec nidequi abi icnēdacno Nasaded caid yacno Esus choapondash. Abēdi abēd icquido chopondash. ² Ambo tabadashch chonoadtemaid ushēn Nuquin Papan chiaid chuibante shubun puduedshun Nuquin Papan chiaid chuibanquin tauapondash Esusēn. Aden chuibansho tantienquiocquid abentsēc: —¿Mitsishun chuibansho tantiashun adomboen Esusēn chuibampec? —quepondash.

Adnubien utsi: —¿Mitsicquidēn ismiac Esusēn nadatiambocquin nabampec? —queapondash.

³ Adnubien utsi: —Nēmbocquid, cuēte nacnenquid, Osen mado nec —queapondash.

Adnubien utsi: —Ani Madia nec. Aton utsibo nēidtedi nēmba tabadquid nec. Nēidc Acobo, utsibic Ose, utsibic Udas, utsibic Simon. Nēmbobidi aton chibi chedo tabadoaic —quetsēcquieq tabadec onquecuededec chieshcuededpondash.

⁴ Aden chieshënaqui Esus nadpondash: —Utsi yacno nidshun Nuquin Papan chiaid chuibansho tantiaquid dadpen icnubi abi yacno chuibansho chieshënuqid aton mates iquendac. Aton shubun icquido adecbidi iquendac —quepondash Nasaded yabnocquido chiec. ⁵ Aido abi chieshënuqid icsho isun nadatiambocquin nancatiapimbo icpondash. Èbi bédamepec quequin tantiaquidquio daëdpactsëc icsho mishquin bédamepondash. ⁶ ;Atotsi quiash ëmbi chiaid tantiatipimbo icpec? Adembidi nadatiambocquin nasho isti-imbo icpec quepondash Esus abibi onquec.

Abëd icquido Esusën nidmiaid
(Mat 10.5-42; Duc 9.1-6)

Adashic auëshquibi puduanec nidaniash shubu daëdpactsëc yacno puduedcuenequin Nuquin Papan chiaid Esusën chuibenepondash. ⁷ Adec cuenadquin chuibanequi abëd icquido caic: —Cho —guetanec tabadtuidpondash. Adec tabadtuidash Esus: —Nëbi mibi daëdshun-daëdshunquien chuibanec nid. Chuibanquimbi mayan icsa dapuduedaid dapuduemeta. ⁸ Nidquin dadpen mitsana sauedshun buanenda.

⁹ Tapucudte sandadia caiduidtsëqui tapucudash nidaneta. Adecbidi utsi bedenquio yec mibi dasiuidaiduidtsëqui dasiuidec nidaneta. ¹⁰ Shubu dadpen yacno nidash mibi yuedaid shubun puduedash ambouidi tabadquin chuibanta. Auëshquio puduanec nidequi shubu dadpen yacnobidi nidshun adquiecbidi tabadquin chuibanooata. Adenuidi naquin chuibanta. ¹¹ Mibi yuedquid nibëdsho isash nidaneta. Auëshquio nidash shubu ënëdacno choash, Nëmbo icquido tantiate icsaquoqid yec abibi cuidatequido nec, Papa. Adquid icsho isun abi capuaid nidaid pututedi tasequequin Nuquin Papan chiacpadomboen ismeta —capondash Esusën abëd icquido chuiquin.

¹² Aden Esusën chiaquien nidanepondash. Adec nidshumbic, mibi ic-said ënshun padpën tantianu quenquiocquin Nuquin Papan chiacpadom-boen nabanta quequin chuibanpondash Esusën nidmiaidon. ¹³ Adembidi mayan icsa dapuduedaid dadpen dapuduemepondash aidëmbidi. Adembidi nënquid dadpen daicsaid chedo cuëte bacuë bëchichoquid ënë dachinquin bédameopondash Esusën nidmiaidon.

Uan acten mentoanquid mapi butiaid
(Mat 14.1-12; Duc 9.7-9)

¹⁴ Adnubien, Chuibanquimbi Esusën nadatiambocquin nabanosh, que-quin isboedon ancanquid Edodes chuipondash. Aden chuiban-chuibanac dadpeshun Esusën nabanaid tantiapondash. Aden tantias: —Uan acten mentoanondaid mapi butemeboed uincuempash icnui. Adec uincuenshun nadatiambocquin nabanec nepanui —quecuededpondash tantiaquido.

¹⁵ Adnubien utsibo: —Ediasien nechitec. Nuquin Papan chiampic-padquiec choashien nec —quecuededpondash.

Adnubien utsibo: —Nuquin Papan chiaid chuipampidien Esus yanchitash —quecuededpondash.

¹⁶ Adnubien Edodes: —Èmbi mapi butemiondaid, Uan pado, uincuempash icnui —quepac caondash.

¹⁷ Ènden aidëmbi Uan bedmeshun tanemeshun quënën nauedmepac caon-dash. Aidëmbi aton utsin chido, Edodias caid, bedacsho isash: ¹⁸ —Min utsin chido mimbi bedaid natemaid niosh —qeshun Nuquin Papan Moises dada uamepampicpaden Uanën Edodes chuipac caondash. Adoac, Uanën chuisho dadpeshun tantianushe qeshun Uan bedmeshun quënën nauedmepac caondash Edodesën. ¹⁹ Adoaquien Uan Edodiasën chieshënuquin: —Uan cue-sunemetiadquidi mibi nec —quepac caondash aton bënë Edodes caic. ²⁰ Uan

bëdambocquid Nuquin Papan chomiaidbidi nec queshun Edodesën Uan cuesunemetiapimbo iquec cudaspac caondash con chidon cuesunemenushe quiaish. Aden tantiaquin Edodesën abi tsadacno Uan chuibaменуен chome-denepac caondash. Uanën chuibansho tantiash: ¿Atotsimbi nëid napeba? Ambì chuibanaid bëdambo iquec. Aidën chuisho tantiash bëdambo iquebi, abibi queshumbic Edodesën chomedednepac caondash chuisho tantianuen.

²¹ Adnubien aton chido bunacpadomboen Uan cuesunemete ushë chonobi naden napac caondash: Aton bënën abi tishte ushë tantiaquin abipadquid dadpen pemenuen chomepac caondash. Adembidi sondado tsusio dadpembidi chomeoapac caondash Edodesën. Cadidia yacnocquido chuiquid dapabobidi chomeoapac caondash. ²² Aden aitedi cho-chomiaish tabadnubien aton chidon champi puduedpac caondash. Puduedacsho: —Baidata —cac baidapac caondash. Adsho isash: —Bëdamboen mimbi naoc —quecuededpac caondash Edodesën chomiaido champi caic.

Adec onquesho tantiashien Edodes aton chidon champi caic: —Mibi bunaid mibi menenu. Èbi chui. ²³ Abimbo caimbi. Mibi bunaid ëbi chuita. Mitsanatedi bunebi ëbi casho tantiashun dadpen mibi menembi —quepondash.

²⁴ Aden Edodesën chuisho tantiash: —¿Atotsibi bumpeba? —quetanec aton tita yacno puduedshun: —“Mibi bunaid mibi menenu. Èbi chui,” Edodesën caoshi. ¿Atotsimbi chuipe, tita? —quepac caondash ani chieç.

Adsho tantiashun anin: —Uanën mapi bunebi quequin chuita —capac caondash aton champi chuiquin.

²⁵ Aden chiaquin badedquio Edodes yacno titinquec choec puduedshun champin: —Nëbimbobi Uan acten mentoanquidën mapi maspanën nandoshon ëbi mene —capac caondash anin chuibocpadomboen chuituidquin.

²⁶ Adsho tantiash Uan tantiec unësquio icpac caondash Edodes. Adec unësquiocquin ambi champi chiacpadomboen natiapimbo iquec ëmbi chomiaido quenushe queshun adoembi abibi queshun: ²⁷ —Uanën mapi bec cho —capac caondash Edodesën ambi cuesuneta caid chuiquin. Aden chiac Uan quënën nauedacno nidshun mapi butanquin ²⁸ maspanën nandoshon bëshun champi meniac bedshun champin aton tita menetuidpac caondash.

²⁹ Adnubien, Uan mapi butiac, qesho tantiash Uambëd icquido nidshun Uanën dada bedshun buanshun choccapac caondash.

*Dada 5000ted Esusën pemiaid
(Mat 14.13-21; Duc 9.10-17; Uan 6.1-14)*

³⁰ Adambic Esusbëd icquido ambi nidmeboedo Esus yacno cho-choshon ambi nabamboedbëdtabi ambi chuibamboed chuibampondash. ³¹ Aden chuibanash tabadnubi matses dadpen cho-chonobi utsi dadpen nidanepondash. Adec cho-chonobi penquo iccuededpondash Esusbëd icquido. Adnubien Esus: —Matses nibëdacno tabadec nidnu. Nid —quepondash abëd icquido caic.

³² Aden chiasic cano antabëdtoanec matses nibëdacno nidpondash aiddedsëqui. ³³ Adec nidsho isash matses dadpen abi nidte yacno tantiec: —U nidanec —quiaish titinquec choec abia cho-chopondash. Abia titinquequid cuensho isash utsi-utsiec dadpen titinquec cho-choapondash. ³⁴ Adec aitedi abia cho-choambien Esusbëd icquido choapondash. Pudundoquimbi matses dadpenashun abi cainec tabadsho isashien Esus, Abi tantiaequin Nuquin Papan chiaid chuiquid nibëdacbimboecnuc matses chochoec quequin tantiec unësquio iquebi queshun tauain chuibampondash Esusën. Yuen chuibampondash.

³⁵ Yuen Esusën chuibanubi ushë budpondash. Ushë budsho isun abëd icquidon: —Icho, ushë budaque. Nëmbo tiedën caniquid nibëdec; adecbidi yuedanquid nibëdec. Matses nidme. ³⁶ Nidmiac shubu yacno nidshun piucquid menequin ma aton pete bedpanuna penun —capondash Esus chuiquin.

³⁷ Adoaquien Esusën: —Mimbibi nëidtedi pemeban —capondash.

Adsho tantiashien: —¿Adambi nidshun piucquid menequin panëmpi bedpe? Ma matses dadpenquo yoc —quepondash abëd icquido Esus caic.

³⁸ Adoaquien: —¿Panëmpi penun bëaid iccuededquidon na tedtsi iqueque? Ista —capondash Esusën.

Aden chiac ashunquiobi matsesën bëaid isbanash abëd icquido: —Panëmpi sincoted icnubi nuëcquid dosted iquec —quepondash.

³⁹ Aden bësho isun: —Uasinën tabadbud mibëd icquid 50ted icnuc, utsibëd icquid 100ted icnuc quec tabadbud —capondash Esusën iccuededquido chuiquin. ⁴⁰ Adoac ambi chiacted-tedquieq tabadbudpondash. ⁴¹ Adec tabadbudsho isun panëmpibëdta nuëcquid bedshun sananquin abuc isec: —Mimbi meniaid nec Papa. Nëbi mimbi nadatiambocquin naid ismembì —queshun cuësh-cuëshun: —Meneban —Esusën cac abëd icquidon menebampondash. ⁴² Menebanac piash: —Padi. Piombi —quecuededpondash pequido. ⁴³ Aden piambien abëd icquidon napi uaid bedbampondash. Napi uaid sandobanaid tsitsan 12ted icpondash. ⁴⁴ Peboedo dada caniaid tambanac 500ted icpondash. Aton chidon aton bacuëbobëdtambi pepondash. Aido tambanenquiocquin dadatedictsëqui tambampondash 500ted iquec quequin.

Acte bëntse Esus choaid
(*Mat 14.22-27, 34-36; Uan 6.16-21*)

⁴⁵ Aden iccuededquido pemiashic: —Cano antabëdtoanec mibia shubu dadpen icquid Betsaida caid yacno potec nid. Mibi nidnubi matses-tedi nidmembì —quepondash Esus abëd icquido caic. ⁴⁶ Adoac canon potenubi matses-tedi nidmianec matses nibëdacno macuësh yacno Nuqin Papa chuinec Esus nidpondash. ⁴⁷ Adnubien inchëshbudtsëqui abëd icquido acte nënantanquo canon noadpondash. Ambobi noadnubi Esus abentsëqui mananuc tsadpondash. ⁴⁸ Ashunquo Esusën isaquien abëd icquido bëdiactsëcquio nidquimbi comapenen cano uncapondash cunquequid dapan bëded-bëdednubi. Adnubien cachina cuëdanabi badiadti-apimboçnoç acte bëntse choquin abëd icquido Esusën ismetuidpondash. ⁴⁹ Datantsensho isash, Mayambien nechitec, quequin ambibi tantiec sidquecuededec ⁵⁰ dacuëdcuededpondash.

Adsho isumbien: —Ëbibi nebique. Dacuëdenquo yec tabadta —capondash Esusën. ⁵¹ Aden chuitanec cano antsadtonobi comapene cunqueboedi ënëdpondash. Aid ënëdsho isash: —Adquidshenda nepec —quepondash abëd icquido. ⁵² Panëmpi daëdpactsëc ictsëcquid matses dadpen menebamboedën naid nec quequin tantienquiocpondash. Adembidi Esus acte bëntse capusho isun, Nadatiambocquin naquidën naidbidi nec, quequin tantienquo icoapondash pamunacimboecquin.

⁵³ Ashunquo chian potiashic nidaid Quenesaded caid yacno choshon cano nëshpondash. ⁵⁴ Aden nëshash mananuc pudundosho isec anocquido, Aidi bëdamianquid nec, quequin ambibi tantiaquimbi ⁵⁵ daicsaid aton ueten nandoshon Esus yacno bë-bëpondash. ⁵⁶ Adecbidi shubu dadpen yacno-yacnomboec Esus puduedcuenesho isun adembidi anocquidon, Bëdamequid

nec, qeshun daicsaido bë-bëpondash. Adoac —Min dashcute ëbi mishme — capondash bë-bëaidon. Aden ambi tantiacpaden Esusën dashcute mishash bëdancuedepondash.

7

Nuquin Papan paucaid (Mat 15.1-20)

¹ Adashien Edusaden caid yacnoësh padiseyobobëdi isadaidbo tsusedpabon chiaid tantiaquin chuiquido Esus yacno choshon, ² Ęmbi mishboed mishtemaid ictsiash, quesa iquec tsusedpabon chuinëdacpadquiec mëpanudabi Esusbëd icquidon pesho ispondash. ³ Padiseyobo isadaidbobidi yec tsusedpabon chuinëdacpadquiec penush mëpanudanequid nec. ⁴ Tiedën caniquid ambi piucquid menëquin bedacnoësh choec adecbidi penush tsusedpabon chuinëdacpadquiec mëpanudanequido isadaidbo nec. Isadaidbo tsusedpabon naden nata quequin ambibi chuinëdaid utsi-utsiec dadpen iquec. Ambi chuinëdacpadomboen dëshotetsen cachonouidi dapanquidquobidi nec. Adembidi matsu nacnenaid cachonouidi dapanoquidquobidi nec. Shocosh matsu cachonouidi dapanoquidquobidi neoaic. Tsusedpabon chuinëdacpadomboen naquidquio nec.

⁵ Aden nabanquidquio padiseyobo nec. Adquibidi abipadquid utsibo isadaidbo tsusedpabon naden nata quequin chuinëdaid tantiaquid neoaic. Adec tsusedpabon chuinëdacpadquiec Esusbëd icquido mëpanudenquiocsho isash padiseyobo: —Atotsieshun mibëd icquidon tsusedpabon chuinëdacpadomboen nainquiocquin mëpanudabi pepëc —quepondash Esus caic.

⁶ Adoquien Esus: —Isayasën ëndenquio dada uaquin mibitedi bëdamboen chiampidpadquid mibi nec. Ambi dada uampid nad iqueque. Tantia: “Nuquin Papa bëdamboquid nec quequin chiacpadomboen tantiesa isadaidbo nec.

⁷ Abia Yampidënquio Nuquin Papan nadomboen nata quequin chiaid tantiesa icquin tsusedpabon nadomboen nata quequin chuinëdaid tantiaquidquio nec.”

⁸ Aden tsusedpabon chuinëdacpadomboen nabanquin Abia Yampidënquio chiaid niacquid mibi nec —quepondash Esus isadaidbo tsusiobo caic Nuquin Papan Isayas dada uamepampid tantiamenuec.

⁹ Aden chuishumbic adomboembidi chiuoic: —Badedquio Nuquin Papan chiaid chieshëquin tsusedpabon nadomboen nata quequin chuinëdacpadomboen nabanquidquio mibi nec. ¿Aden naquinda Nuquin Papan chiacpadomboen mimbi nape?

¹⁰ Nuquin Papan chiacpadomboen Moisesën dada uampid nad iquec: “Titan papabëdta chiaid chieshenquiocquin naban.” Adquidën chiaid utsi nad iqueque. Tantia: “Aton papa icsamboen chuiquid unës ua. Adembidi aton tita icsamboen chuiquid unës uaoa,” quequin Nuquin Papan chiac Moisesën dada uampid nec.

¹¹ Mibien tsusedpabon chuinëdaid tantiaquin adoesa nec. Papan na naimëdacsho isun naden mimbi chiec. Mibi nashunquin menetiapimbo iquebi, papa. Mibi menenquiocquin Nuquin Papa Abia Yampid nashunquin menenun ëmbi dayun uaid nec, papa, quequin mimbi chiec. Adembidi titatsen mimbi chiuoic. Aden chuiquin papabëdta tita tantiaquin nashunenquiocquin Nuquin Papan chiaid niacquid mibi nec. ¹² Aden mimbi nashunenquiocquin ismiacpadec, Papa, mibi nashunquin menetiapimbo iquebi, queoic utsibo. Adecbidi, Tita, mibi nashunquin menetiapimbo iquebi, queoic. ¹³ Aden chuiquimbi titabëdta papa tantiaquin nashunta quequin Nuquin Papan chiacpadomboen

nainquiocquin tsusedpabon chuinëdacadpadomboenuidi nata quequin chuiquidien mibi nechitec. Adembidi Nuquin Papan chiaid utsi-utsien naisa mibipadquid utsibo icmequin tsusedpabon chuinëdaid nata quequin mimbi chiec —quepondash Esus isadaidbo tsusiobo caic.

¹⁴ Aden Nuquin Papan chiacadpadomboen niacquido chiashic: — Utsibo, tantiec cho. Mibi bëdamboen chuinu. Bëdamboec papuduedta.

¹⁵ Tsusedpabon chuinëdacadquieq mëpanudabi mimbi piaid min tantiate icsabudtemaid nendac. Icsamboen tantiec mibi icsaic. ¹⁶ Ëmbi chiaid tantiaquin utsi chuibanta —quepondash Esus.

¹⁷ Aden chiash iccuedquido abi tabadnubi shubun puduedash tabadpondash Esus. Tabadsho isash: —Mimbi chuihoed ëbitedi tantiamë — quepondash abëd icquido. ¹⁸ Adoaquien: —Utsitedishun tantienquo icbocpadquido mibitedi neque. Tanta. Mimbi piaidën mimbi tantiaid icsabudtiapimbo iquec. ¹⁹ ¿Min tantiate yacnoda mimbi piaid nidpec? Padenquo. Mimbi piaid min pucno bud-budec auëshquo chimu nëncuenash puduenec —quepondash abëd icquido caic.

²⁰ Aden chiec onquiashic: —Mimbi tantiacpadquiequi mibi icsabudec. ²¹ Chido mimbi inacmaid isash chudtiadquido iquec quequin mimbi tantiacpadomboen chido isuidtiapimbocquin mimbi chudted-chudtedec. Utsin na bedtiadquo iquebi quequin mimbi tantiacpadomboen mimbi ampec. Cuesunetiadquido iquebi quequin mimbi tantiacpadomboen mimbi cuesunepec. Utsin chido chudtiadquido iquec quequin mimbi tantiacpadomboen aidi mimbi chudpec. Dada utsin ëbi bëdaidquiocsho ispec quequin mimbi tantiacpadomboen min bënëpenquo chudmequid mibi nec. ²² Utsin bedactedi bednu quequin mimbi tantiacpadomboen bedquid mibi nendac. Adecbidi utsin bedaïd isash adomboembidi bednu queshun isuidesa iquec adomboen bedbanquidquido mibi yampec. Mibibi icsambocquid nec quiaish chieshëmënquid mibi nendac. Adquid abimbo chiacimboen chuiquid mibi nendac. Icsauidi bunquin adenuidi nabanec. Mibi icsaquin ompoenquiocquin nabanquid mibi yanec. Utsi bëdambo icsho isash chieshënquid mibi icpec. Utsi icsamboen chuiquid mibi nendac. Utsin chuisho, Ëbentsëqui tantiaquidquido nebi, quequin mamënshunquid mibi nendac. Adembidi nasho mamënshunoaquidbidi mibi nendac. Ëmbia tantiaquid nebi, quequin mimbi nabanaid icsa isash bëdambo iquec quec mibi mamënec tsadec. ²³ Ëmbi chuihoedtedi icsaquidën naid nec. Aden tantiaquid icsabudte nec — quepondash Esus.

Sidopenisia caid yacnoësh chido ambi tantiacpadquieq bëdanaid (Mat 15.21-28)

²⁴ Aden chiashic isadaidbo yacnoësh puduanec nidequi isadaidpembo yacno nidpondash. Shubu dadpen icquid Tido caid anoentsëqui yacno chosh shubun puduedash: —Nëmbo ëbi choaid chienda —quepondash Esus. Ambi chiacadpadpenquiocnoc chuisho tantiapondash anocquidon.

²⁵ Adoac: —Esus chosh —quesho tantiaashien mayan icsa dapuduedaidën tita Esus tabadacno nidpondash. Adec nidec puduedequi Esus taebudpondash chuiquid dapa nec quequin tantiec. ²⁶ Isadaidpembon chido nidaid Sidopenisia caid yacnocquid niøndash. Aidi Esus taebudash: —Con champi mayan icsa dapuduedaid dapudueme, tsusio, —quepondash comapenen chiec.

²⁷ Adoaquien Esus: —Mabi con matses isadaidboba bëdamenuec choboc. ¿Bacuëo cubudabicnubi opashëmpida pete menequin anin bënëpadic? Padenquo. Adembidi, ¿isadaidbotedi bëdamiabidambi matses utsibo, isadaidpembo, bëdamepadi? —quepondash Esus.

²⁸ Adsho tantiashien chido: —Icho, mimbi bēdamboen chiec. Padnuen anin meniac bacuēbon pete sananaid cuēshēmpi paēdtsacsho opashēmpin ambibi bedshun pec. Adembidi mimbi nadatiambocquin nabanac isadaidbo dadpen bēdanubi isadaidpembro abentsēc tantiaquid yec bēdanoapec —quepondash chido.

²⁹ Aden chidon chuishobien: —Bēdamboen mimbi chiec. Aden tantiaquid mibi neque. Nidec nid shubuno. Mayan icsa dapuduedaid dapuduenaque. Isec nid —capondash Esusēn isadaidpembro chido chuiquin.

³⁰ Adsho tantianec choec shubun puduedquin isaquien aton champi uecno ēnden mayan icsa niuqian bēdanash abi ushaidēmbi uec.

Pashu buēd onquenquicquid Esusēn bēdamiaid

³¹ Adashien Tido caid anoentsēcuēsh nidequi Sidon caid matambidanec chian Cadidia caid yacno choapondash Esus. Nidaid Decapodis caid shubu dadpen yacno-yacnomboec capucueniash choapondash. ³² Ambo choash tsadnubien dada icsa, pashu buēd onquenquicquid, Esus yacno bēash tsadquin: —Nēid mishquin bēdame —capondash.

³³ Adsho tantiashun iccuedquido ismenquicnuen udietsēc dada icsa buanshun aton mēdante bushbi pashun pabiatic pausuntanquin chicpondash Esusēn. Adshun, min anatsen mishnu quetanquin ismequin uicchun mēpidantanquin pashun ana mishpondash. ³⁴ Aden amishec abuc isec: —Epata —quepondash. Paucud, quec adpondash Esus. ³⁵ Adec Esus cuēdnubi pashu buēd onquenquicoedi tantiadcuenash onquiampondash.

³⁶ Aden pashuaid bēdamiaish: —Esusēn naid nec quequin chienda —quepondash Esus. Adoboqui niacbidanquin chuibampondash. ³⁷ Aden chuisho tantiash: —Adquidshenda Esus nepec. Ambi naidtedi bēdambo iquec. Pashu paucquid nec. Adembidi ana onquesa oncamequid nec —quec onquecuedepondash.

8

4000ted matses Esusēn pemiaid (Mat 15.32-39)

¹ Adashic Esus yacno matses dadpen padpidec cho-choash yuec tabadec bundocuedepondash. Adsho isun abēd icquido chomiash Esus nadpondash: ² —Matses bunec tabadsho isash unēsquo iquebi. Daēdec ushec ēbēd tabadquin aton pete uesquin piac. ³ Aton pete nibēdsho isash, Pec nid, quetiapimbo iquebi padishnushe quiash. Ēnapenuēsh dadpen cho-choash nec —quepondash Esus abēd icquido chiec.

⁴ Adoaquien: —Pete nibēdacno nuqui tabadec. Pemenun ĩMitsimbo nid-shumbimbi pete bedpatsia? —quepondash abēd icquido.

⁵ Adsho tantiashien: —ĭTedtsi panēmpi mitsana iquec? —quepondash Esus. Adoaquien: —Siete iquec —quepondash abēd icquido.

⁶ Adnubien: —Tabadbud —quetanquin Esusēn panēmpi sieteted bedshun sananquin Nuquin Papa ambi pete icmiaid chuishun panēmpi cuēsh-cuēshun: —Nēid meneban —cac abēd icquidon iccuedquido menebampondash.

⁷ Adembidi nuēcquid dēmishaid daēdpactsēcbidi bedshun: —Mimbi meniaid nec quequin tantiembi, Papa —queshun: —Nēidtsen meneban —Esusēn cac menebanoapondash. ⁸ Aden menebanac piash: —Padi. Piombi —quecuedepondash. Aden piambien napi uaid tsitsanēn sandoquin abēd icquidon bedaid tsitsan sieteted icpondash. ⁹ Peboedo dada caniaid dadpen 4000ted icpondash. Chidon aton bacuēbobēdtambi pepondash. ¹⁰ Aden

pemeshun peboedotedi nidmiash Esus abëd icquidobëd cano antabëdtoanec nidquin Dadmanuta caid yacno potepondash.

Nadatiambocquin nata. Isnu, padiseyobo quiaid
(Mat 16.1-4; Duc 12.54-56)

¹¹ Aden potiaş tabadnubien cho-choshon padiseyobon: —¿Nuquin Papan chomiaid nebi quepecta mibi icco? Aidën chomiaid icquin nadatiambocquin nata. Isnu —capondash Esus chuiquin.

¹² Adsho tantiaş, Èbi tantiesha nec, quec unësquio yec tsadequi —Èmbi naid dadpen mimbi ispaboc. ¿Adosho isboshida, Èbi isme, queoape? Nadatiambocquin nabanquin èbi isme caqui ismenquio iquembi. Abimbo caimbi —quepondash Esus. ¹³ Aden chianec nidec cano antabëdtoanquin uquë cuëma utsiuc poteoapondash.

Nuquin Papan chiaidbëdta ambi chiaid daëd uaquin chuiquid padiseyobo
(Mat 16.5-12)

¹⁴ Badedquio Esus nidnuesho tantiaş cano antabëdtopondash abëd icquido. Panëmpi bedabi puduampondash panëmpi abentsëqui tsitsanën anuetsëcnuc. ¹⁵ Aden potequimbi Esusën nadopondash: —Pan uanuequidën trico caid putubëdta bidiscamete acte pistsëc cacushaqui nua yec bidisquëc. Adembidi padiseyobon Nuquin Papan chiaidbëdtabi ambibi tantiaquin chiaid daëd uaquin chuibanec. Aden chuiquidbidi Edodesbëd icquido nec quequin tantiaş. Aden tantiaquin padiseyobopadquid adecbidi Edodesbopadquid icmane queshun ambi tantiacpadomboen nabanenda —capondash Esusën abëd icquido chuiquin.

¹⁶ Adsho Esusën chuiboed icsamboen tantiec abëd icquido: —¿Èmbi panëmpi bëambo yaidta icbon chuipec? —quec onquecuededpondash.

¹⁷ Aden chiec onquecuedednubien tantiaquidquio icquin Esusën nadopondash: —¿Atotsi quiaş ¿ada panëmpi bëambo yaid con Icbon chuipec? quepe, mibi? ¿Èmbi nabamboed isenquio yec bëshu tsadac bimboecta tsado? ¹⁸ Adecbidi ¿Èmbi chuibanaid tantienquio yec pashuac bimboecta tsadoapo? ¹⁹ ¿Panëmpi 5ted bedshun cuësh-cuëshun menebanqui napi uaid tsitsanën sandoaid tedtsi iccoshe? Chui —capondash Esusën.

Adoaquien: —Doseted iccosh —quepondash abëd icquido.

²⁰ Adoaquien: —Adembidi, ¿nëbi siete panëmpi bedshun matsesën piaid napi uaid tedtsi tsitsanën sandoaid icpoh? Chui —caoapondash Esusën.

Adoaquien: —Siete iccosh —quepondash abëd icquido.

²¹ Adoaquien Esus: —¿Nadatiambocquid Esus nec quequin èbi tantienquioda mimbi icpe? —quepondash abëd icquido caic.

Betsaida caid yacnoshon bëshu bëdamiaid

²² Adshumbic Betsaida caid yacno poteoapondash Esusbëdtambidi. Aden potiaş chosho isun bëshuaid bëpondash anocquidon. Aden bëshun ismequin: —Nëid bëshumbo neque. Mibi bëdamianquidquio icquin mishquin bëdame —capondash Esus chuiquin. ²³ Adsho Esusën bëshu mëdianquin Betsaida caid anoentsëqui buanshun uicchun bëcuishtuanquin bëmishec: —¿Ada mimbi iseqe? Èbi chui —capondash Esusën.

²⁴ Adsho tantiaş Esus isquin: —Bëdamboen isenquiocquin cuëte podo inchëshquio yac bimboecnuc mibi isembi —capondash bëshuaidën. ²⁵ Aden chuishobi Esusën bëshuaid padpiden bëmishoaquien bëucudquiopondash bëdamboen isec. ²⁶ Aden bëdamboen iso isun: —Nëbi min shubuno nid. Shubu dadpen icquid Betsaida caid datambidanec nid —quequin Esusën nidmepondash.

*Quidistu mibimbo neyoc, Petedo quiaid**(Mat 16.13-20; Duc 9.18-21)*

²⁷ Aden nidmiashic ancanquid Uedipo caid tabadaid nidaid Sesadeya caid yacno nidequi: —¿Atotsi Matsesën ëbi capec? —quepondash Esus abëd icquido chieic.

²⁸ Adoquien: —Utsi-utsieic, Acten mentoamboed, Uan Esus nec, quenubic; utsi-utsieic, Edias, Nuquin Papan chiacpadomboen chomiaidien Esus nechitec, quenubic; utsi-utsieic, Nuquin Papan chiaid ëndenquimbo chiampid-padquidien Esus nechitec, quec —quepondash abëd icquido Esus caic.

²⁹ Adsho tantiashun: —Ma mibitedishun ¿atotsibi cai? —capondash Esusën.

Adoquien: —Quidistu, Nuquin Papan ambi tantiampicpaden abi yacnoshon chomiaidquio mibi neyoc —quepondash Petedo abëd icquid utsibo onquiachimboen chuoiaic.

³⁰ Adsho: —Mimbi chuiboed utsi chienda. Abentsëcquiobi chienda —capondash Esusën abëd icquido comapenen chuiquin.

*Abi unës uate Esusën chiaid**(Mat 16.21-28; Duc 9.22-27)*

³¹ Aden chuishun abi unës uate tantiamequin abëd icquido Esusën chuipondash. Nuquin Papan chomiaid yec matsesacsho isadaidbo tsi-siobon chieshënquin ëbi mëyanendac. Aden mëyanquin unës uaqui daëdec ushash uincuenoaindabi, quequin Esusën chuipondash. ³² Abi unës uatequid chuipecshenda niondash. Aden Esusën chiaquien aibëdtsëqui uano nidshun Petedon: —Aden tantiaquin chienda —capac caondash.

³³ Aden Petedon chuisho tantiash auchbidi bidadquin abëd icquid utsibo isec Esus nadpondash: —Nidec nid, Satanas. Nuquin Papan tantiacpadpenquiocnoc ëbi niacmenuequin icsamboen chuiquid mibi neque. Satanasën mua uac matsesën tantiacpaden mimbi tantieic —quepondash Esus Petedo comapenen chushcaic. Petedo Satanasbimboecquid nec quequin Satanas capondash Esusën Petedo chuiquin.

³⁴ Aden Petedo chuibanashic abëd icnuec cho-choquid utsibo caic: —Cho —quepondash Esus. Chosho isash: —Esuspadquid icnu queshun mibi bunaid nainquiocquin ëmbi chiaid tantiaquin nabanta. Ëbi mëyanacpadembidi mibi mëyante icnuc niaquenda. ³⁵ Esus tantiaquin ambi chiacpadomboen nanu queboedi unësmanc quequin naisa Nuquin Papa yacno puduedtiapimbo iquendac. Esus tantiaquid nebi quequin tantieic mëyante icnuc unësmanc quenquiocquin ëbi chuibanec tabadquid Nuquin Papa yacno tabadendac.

³⁶ Aden aton na dadpen bedbanashic Esus tantiesha yec unësash Nuquin Papa yacno puduedtiapimbo iquendac. ¿Adquidta bëdambo icpadic? ³⁷ ¿Nuquin Papa mitsana menecta abi yacno puduedpatsia? Padenguio. ³⁸ Utsi icnubi dacuëdec Esus tantiaquid nebi quesa chido aton bënë bunenguio yec dada utsibëd tabadquidbimboecquid nec. Adquid chuiquin, Con utsi nec, caisa nendabi. Adembidi ëmbi chiaid chiesha caic, Con utsi nec, quequin Nuquin Papa chienquio iquendambi. Chuiquid dapa abipadquidquio con pan ëbi icmiac ëmbi abuschun uaido mayan bëdabobëdi nidaidën choaindabi. Adec aïdobëdi choashun ëbi chieshënquid isec, Con utsi nec, queoatiapimbo iquendabi —quepondash Esus cho-choquid caic.

9

¹ Aden chiasheic Esus: —Nëbimbobi tabadquid ëbi tantiaquid utsi-utsieic unësabicquin nidaidën tabadquin Nuquin Papan nadatiambocquin nabanaqui Nuquin Papan shubun icquid abi tantiaquid utsi dadpen yansho isendac —quepondash.

Esus bëdaidquo icmiaid
(*Mat 17.1-13; Duc 9.28-36*)

² Aden chuibanashic 5ted ushash: —Nidnu. Nid —quianec Esusbëd Petedo, Acobo, Uan, aidtedi ambi chiactedi macuësh dapa yacno nidpondash. Ambo nidash tabadquimbi abi bëdambo isadaid aidon ispac caondash. ³ Abi dasiuidaid dashcute icboedi nac-nacquo yampac caondash. ⁴ Edias, Moises, aid daëd ënden yampidi Esusbëd onquesho ispac caondash Esusbëd choboedon. ⁵ Aden isequi: —Chuiquid Dapa, nuquibi nëmbo choash tabadquin mibi isec bëdambo iquebi. Mìn shubumpi 3ted icnuc shubu uanuna mitsana, Moisesën na, Ediasën na, aidted icnuc —quepac caondash Petedo. ⁶ ¿Atotsimbi chuipe? quetiapimbo yec dacuëdcuededquin aden chuipac caondash Petedon.

⁷ Adec tabadshobien abu ushu choquidën ambo tabadquidtedi bëtimpac caondash. Aden bëtinacnoëshquiobi Esus chiec onquiampac caondash: —Esus, con madombo con dayunquiocquid nec. Adquid icquin chuibanasho bëdamboen tantiata —capac caondash Nuquin Papan.

⁸ Adsho isbanquin isaquien Esusbëd choboeduidi icoapac caondash.

⁹ Adanec macuësh yacnoësh budtanequi: —Mimbi isboed nëbi chienda. Èbi Nuquin Papan mado matsesacsho unësmiac ëbi uincuenan mimbi isboed chuita —capac caondash Esusën. ¹⁰ Adsho tantiash utsi chienquo yec abi uincuemete ¿mitsipadquo icpec? quec abibi onquecuededpac caondash Esusbëd choboedo.

¹¹ Adec onquecuededash: —Nuquin Papan chomiaidquo choabincuc Ediasba choendac quequin tsusedpabon nadomboen nata quequin chiaid tantiaquidon chuibanec. Ma Edias ëndenquimboshë chopampic —quepondash abëd icquido Esus caic.

¹² Adoaquien: —Ai, Ediasën matses bëdamboen tabadmenuen chiampidpadquidba choendac quequin Nuquin Papan chiaid nendac. Adem-bidi Nuquin Papan chomiaidquo yec matsesash nëbi tabadsho matsesën chieshënquin mëyanendac quequin chuipampid nec. ¹³ Ediasën chiampicpadquiec Uan acten mentoanquid chopondash. Aidi choacsho abi bunacpadomboen abi chieshënquidën mëyanac. Èndenquimboshë Edias chiec onquequin dada uampicpadomboen Ediaspadquid chomiaid Uan choshon, Mibi icsaid ënta, quequin chuisho abi chieshënquidën mëyanondash —quepondash Esus abëd icquido chiec.

Mayan icsan buëd onquetiapimbo icmiaid Esusën bëdamiaid
(*Mat 17.14-21; Duc 9.37-43*)

¹⁴ Adec onquetanec choquin isquien matses dadpenschun abëd icquid utsibo Esusën niamboed tsusedpabon nadomboen nata quequin chiaid tantiamequidon comapenec onquecuededquin bëtimpondash. ¹⁵ Adnubien Esus choshò isash iccuededquido, Bëdamaianquid choec. ¿Atotsi aidën napatsiashe? Isnu, quetanec titinque choec: —¿Ada cho? —quepondash.

¹⁶ Adoaquien: —¿Atotsi quec ëbëd icquidbëd comapenec onquecuedede? —quepondash Esus.

¹⁷ Adshobien: —Chuiquid Dapa, mibi ismenuen con mado bëombi. Mayan icsan buëd oncamentuquid yaid nec. ¹⁸ Aid Mayan icsan comapenen nebudteniac ëbcacush-ëbcacushpambo yec uedeniosh. Adecbidi, uebudash unësanec shëta chëquëdëshcaic uiosh. Adquo yanesho, Bëombique. Bëdame, cauidombi mibëd icquido chuiquin. Adoqui bëdamenquo iccosh —quepondash mayan icsan buëd onquetiapimbo icmiaidën papa.

19 Aden chuisho tantiash abëd icquido caic: —Esus nadatiambocquid nec quequin ëbi tantiesa mibi nepec. ¿Tedetsi icshun ëmbi chiacpaden mimi tantiabempe? Mibi tantiesa icsho ¿mitsipadembimbi tantiampe? —queshumbic: —Madompi bec cho —capondash Esusën.

20 Adsho tantiashun bëpondash. Bëshobi Esus istanquin mayan icsan abi dapuduedaid comapenen cuididicamiampundash. Aden nac madompi uebudec ëbcacush-ëbcacushpambo yec cuididiquëpondash.

21 Adsho isash: —¿Tedtsi seta matamec ad iccondashe? Chui. Tiantianu —quepondash Esus madompin papa chiec.

Adoaquien: —Bacuë ictsequi ad iccondash. 22 Cuëte dëtsiadaoid nënedeniosh abi dapuduedaidën. Actetsen nënedeniosh unësmenuequin. Mibi bédamequidquïo icquin ëbëdta tantiaquin ëbi con mado bédameshun —quepondash madompin papa Esus caic.

23 Adoaquien: —¿Mibi bédamequidquïo icquin ëbi con mado bédameshun queta ique? Nuquin Papa nadatiambocquin naquid nec quequin tantiacquidën tantiacpadomboen Nuquin Papan naindac —quepondash Esus.

24 Adsho tantiash: —Tantiëmbi. Èmbi abimbo tantienquiocsho isun ëbi tantiampe, Icbo —quepondash madompin papa Esus caic.

25 Adsho tantiashun matses dadpen titinquec chosho isun mayan icsa chuiquin: —Matses buëd oncamenquiocquid mibi nec. Adembidi tantiametiapimbo icmequidbidi mibi nequë. Ambo tabadenquïo yec dapuduen —capondash Esusën.

26 Aden chiaquien sidquec madompi cuididiquenubi dapuduempondash. Adnubien unësacimboec madompi uesho isash: —Unësosh —quepondash isquido. 27 Adnubien madompi mëdintanquin Esusën uëtsëndopondash. Adoac ambibi nidtopondash.

28 Adnubien shubun puduedacsho: —¿Atotsieshumbimbi mayan icsa dapuduetiapimbo icpo? —quepondash abëd icquido Esus caic utsibon tantienquiocnobi.

29 Adoaquien Esus: —Dapuduen quequinuidi chuibudaqui adquidquïo dapuduenësa nec. Ma Nuquin Papan nadatiambocquin napanuna quequin Nuquin Papa chuideneshun mayan icsa dapuduen cac dapuduenendac —quepondash.

Abi unës uate chuioid
(Mat 17.22-23; Duc 9.43-45)

30-31 Aden chianec nidaid Cadidia caid matanec nidpondash. Nidquimbi, Èbëd icquid 12tedtsëqui chuibanu, quec utsibo ismenquïo yec nidpondash Esus. Aden chuibanec nidequi: —Nuquin Papan Madombo matsesacsho bedendac. Aden bedshun meniäc cuesuniac uincuempendac —quepondash Esus. Abi uincuentequid chiecshenda adëc Esus onquepondash. 32 Aden chuisho bédamboen tantienquïo yequi dacuëdec ëbi bédamboen tantiamequin chui quetiapimbo icpondash abëd icquido.

¿Mitsicquid chuiquid dapa icpec? quequin chiaid
(Mat 18.1-5; Duc 9.46-48)

33 Adanec shubu dadpen icquid Capednaun caid yacno Esus choapondash. Adëc choash shubun puduedashun: —¿Podquedën choec atotsi chiec onquecuededo? —capondash Esusën abëd icquido chuiquin. 34 Adsho tantiash cuëdenquïocpondash abëd icquido. ¿Esusbëd icquid mitsicquid chuiquid dapa icpeque? Tiantianu, quec onquequin ambi chiaid chienquïo yec tabadpondash. 35 Adëc tabadnubi abi tsadacnoëshi: —Cho —quiampondash Esus abëd

icquido caic. Aido choacsho isash: —Chuiquid dapa ëbentsëqui icnu quequid utsi nashunquidbidi ictiad —quepondash Esus.

³⁶ Adec onqueshumbic bacuëmpi abentsëc mëdintanquin abëd icquid tabadacno nënantanquin tsadumbudpondash. Aden tsadumbudshun bacuë icuquequi: ³⁷ —Esus tantiaquid nebi quequin ismequin bacuë yuedquin nashunquid ëbi yuedquin nashunac bimboecquid nendac. Ëbi yuedquin nashunquid ëbi chomiondaid Nuquin Papa yacno yuedquin nashunoac bimboecquid neoaindac —quepondash Esus abëd icquido chiec.

Nuqui chieshënesa nuqui bëdamboen chuibanquid nec quiaid

(Mat 10.42; Duc 9.49-50)

³⁸ Adnubien utsin naid chiec Uan onquedopondash: —Icho, mimi chiacpadomboen utsin chuisho tantiapombi. Aidën: “Esus nadatiambocquin naquidquio nec, quequin tantiembi. Aden tantiaquin aidën chiacpadomboen mibi chiembique. Dapuduen,” cac mayan icsa dapuduemposh. Adosho isun, Esusbëd icquidpenquio mibi neque. Adenda quequin chuipombi —quepondash Uan.

³⁹ Adoaquien Esus: —Padicnuna. Nadatiambocquin naquidquio Esus nec quequin abimbo tantiaquin ëmbi nacpadomboen nabanquidën ëbi icsamboen chuitiapimbo iquec. ⁴⁰ Nuqui chieshënesa nuqui bëdamboen chuibanquid adquid nec. ⁴¹ Abimbo chiembique. Tanta. Esus tantiaquid nec quequin mibi nashunquid Nuquin Papan cuidnanquin bëdamboen naoaindac —quepondash Esus.

Icsa uanquin tantiabenabicquid ismequid cuidendac quiaid

(Mat 18.6-9; Duc 17.1-2)

⁴² Abi Esusën onquequin chuibanec: —Adembidi abi icsacpadomboen bëdamboen tantiabenabicquid ismequid Nuquin Papan comapenen cuidendac. Adquid abi icsacpadomboen ismiabichso cüenote yuëmbocquidbëdta tëtaneshun acte dapa nënepatecñëdan. ⁴³⁻⁴⁴ Adembidi mimi icsamboen tantiaquin mishaid ëntiapimbocquin ismedeniad adomboembidi utsin tantiec. Bednu quenquio yec mëtaniac bimboec tsad ënëdenquio yec chian anëdënquiacno nidmane quiash. ⁴⁵⁻⁴⁶ Adecbidi capuquin mibi icsaid mimi ismebeneque. Capunu quequin tantienguio yec tateshuniac bimboec tsadta ënëdenquio yec chian anëdënquiacno nidmane quiash. Adec mibi tsadnuc adquiecbidi mimi ismiaid tantiec tsadendac. ⁴⁷ Adecbidi ëshën isec mibi icsaid ëntiapimbocquin mimi ismedoniad adomboembidi utsin tantiec. Ëshë chichshuniac bimboec tsad ënëdenquio yec chian anëdënquiacno nidmane quiash ma mibi tsadacpadeq mimi ismiaid tsadoapanu. ⁴⁸ Icsa uadenequien enenguio yash unësash chian anëdënquiacno nidash unësenquiocshobi chodquiaid pequid macun mibi pendac. Ënëdenquio yec chian anëdënquiacno mibi tabadendac. Icsadenequin ënenquiocquid comapenen cuidtequid nendac. ⁴⁹ Sa casecac pambid batambo yac bimboec Esuspadquid icnu quiash mibi icsaid ënëdnuen mëmunec mibi bëdambo yampec. ⁵⁰ Sa batambocquid bëdambo iquec. Sa batambochoedi batapenguio yec icsasho çmitsipadentsi batambo icmeoapec? Sa batamboquid casecac daëdash batambo yacpadeq utsibëd bëdamboec tabadta —quepondash Esus.

10

Aton chido bedshun nidmequid

(Mat 19.1-12; Duc 16.18)

¹ Aden abëd icquido chuiquin nainashic Esus aidobëdi nidaid Cadidia caid yacnoësh nidquïn nidaid Udeya caid yacno matambidanec nidquïn acte

Odan caid potepondash. Ambo choash tabadsho isash padpidec matses dadpen cho-choapondash. Adec cho-chosho isun Nuquin Papan chiaid chuibanopondash Esusën.

² Adecbidi cho-choquid padiseyobon Esus Nuquin Papan chiaid icsamboen chuinu qeshun: —Aton chido bedash bunenquio yanshun cuemec. ¿Aden naicta bédambo iqueque? Tantianu. Chui —capondash Esus chuiquin.

³ Adoaquien: —¿Atotsi quequin Moisesën chuipampic? —queopondash Esus.

⁴ Adoaquien: —Aton chido bedash bunenquio yanshun, Con chido icsambocquid nec, quequin ambi tantiacpaden aton bènèn dada uashun nidmiacsho isash, Padi, quenquiocpampic Moises —quepondash padiseyobo.

⁵ Adoaquien Esus: —Nuquin Papan chiaid tantiesa tsusedpabo yansho isash, Padi. Adenda, quenquio Moises icpampic. ⁶ Nadomboen Nuquin Papan tauapampic. Dada abentsëc uashumbic chido abentsëcbidi uashun dada menepampic. ⁷ Adomboembidi nanuec dada aton tita aton papabéd tabadenquio yec aton chido bedash abëdi ambi quënë uaidëmbi tabadec.

⁸ Aden aton chido bedash tabadequi matses abentsëc icboedi daëdec. Matses daëd icboedi abentsëc yachimboec tabadec. ⁹ Aden dada aton chidobëdta Nuquin Papan daëd uacsho ma cuëshëdmenquio icpanuna —quepondash Esus.

¹⁰ Aden chiash shubun puduedacsho: —Mimbi chuiboed ëbitedi tantieme —capondash abëd icquidon.

¹¹ Adoaquien: —Aton chido bedshun chudshun nidmeshun chido utsi bedquid Nuquin Papan menepampid niacquin tantiesa nec. ¹² Adembidi chido aton bènèn bedac aton bënë nianshun dada utsi bedmequid Nuquin Papan menepampid niacquin tantiesa neoaic —quepondash Esus.

*Esus yacno bacuëbo bë-beaid
(Mat 19.13-15; Duc 18.15-17)*

¹³ Adnubien: Con bacuë mishquin Esusën bédambo icmetsiash, quequin Esus yacno aton bacuëbo anin bë-bëpondash. Aden bë-bësho isun: —Padi. Esusën naid utsi neque. Bacuëbo buantan —capondash Esusbëd icquidon.

¹⁴ Aden nidmesho isash nëishash: —Bacuëbo nidmenda. Ma cho-chono. Anin chiacpadomboen tantiaquidquio bacuëbo neque. Adomboembidi badedquio Nuquin Papan chiaid tantiëndac. Nuquin Papan shubu abentsëquën tabadquid aidonec. ¹⁵ Abimbo chiembique. Tantia. Nuquin Papan chiaid bacuëbon badedquio tantiacpaden tantiesa Nuquin Papa yacno puduedtiapimbo iquendac —quepondash Esus. ¹⁶ Aden chuitanquin bacuëbo dayumbanquin mamishec, Nëid bacuë bédambo icme, Papa, quequin Nuquin Papa chuipondash Esusën.

*Na dadpen icquid chiaid
(Mat 19.16-30; Duc 18.18-30)*

¹⁷ Aden bacuëbo chianec auëshquio puduanec nidshobien dada abentsëc titingec choquin bëquedtanec danëshën sebudash tsadec: —Chuibanquin tantiamianquid, bédambocquid mibi neque. ¿Nuquin Papan shubu abentsëquën tabadnuequin atotsimbi napeba? —quepondash choboed Esus chiec.

¹⁸ Adoaquien Esus: —¿Nuquin Papabëdtabidabi mibi bédambocquid nec, ëbi cape mimbi? Nuquin Papauidtsëqui bédambocquidquio nec ¹⁹ —quequin chiec abi onquec: —¿Nuquin Papan nadomboen nata quequin dada uamiampitëdi nabanquidta ne? Aidedti mimbi tantiapec. Nad iqueque. Tantia: “cuesunianenda; adembidi min chidouidi chudquid icta; adembidi, ampanda; adecbidi, utsi chiec muainda; adecbidi, utsin na bedesabimboec muainda;

adembidi papabëdtan titan chiaid chieshënenda.” ¿Aidtedi Nuquin Papan dada uamiampid nabanquidta ne? —quepondash Esus choboed caic.

²⁰ Adoaquien: —Abimbo chiembique. Tantia, Icho. Aidtedi nabanquidquo nebi. Bacuëtsëc icquimbi adquid nabanondambi ënenquiocquin —quepondash choboed.

²¹ Adsho tantiash, Aidbëd icte bunebi, quequin ambibi tantiec Esus nadpondash: —Nuquin Papan chuiquin dada uamiaid nabanec mibi nec. Ambi dada uacmaid iquec. Aidi mimbi nabi iquec. Nadquid iqueque. Tantia. Min shubuno nidshun mitsana mimbi tantiaidquio menebanquin piucquid bedshun aton na nibëdquid meneban. Aden menebanash Nuquin Papan chiaid tantiaquidquio mibi iquendac. Adec Nuquin Papa tantiaquidquio yec ëbëd iquec cho —quepondash Esus.

²² Adsho tantiash choboed mamënenquio yec unësquio yec nidpondash con na menebantiapimbo iquebi quiaish.

²³ Adec nidsho isun abitedi bëisbanec Esus: —Aton na dadpen icquidën, Con na tantiequi Nuquin Papan shubu abentsëquën tabadnu, quequin tantiuidtsec. Adquid Nuquin Papan shubun puduedesa nec —quepondash abëd icquid chieic.

²⁴ Aden Esusën chuisho tantiash, ¿Abimboda capec? quequin ambibi tantiec abëd icquido otacquo tabadsho isec Esus: —Abuido, Nuquin Papan shubu abentsëquën matses badedquio puduedtiapimbo iquec. ²⁵ Adembidi shëcuën puduedte nidaidën capuquid dapan badedquio tantiatiapimbo iquec. Puduedquin ismiac puduedec. Adembidi Nuquin Papan shubu abentsëquën puduedmianquid matsesën badedquio tantiatiapimbo iquec. Ambi tantiapadequi puduedte bunec —quepondash Esus.

²⁶ Adsho tantiash abëd icquido, ¿Abimbobida capec? quetsëcquiec onqueducedpondash. Adec tabadequi: —Ambi tantiapadequi puduedtiapimbo cnoct ¿tsutsi puduedquid icpeba? —quepondash abëd icquido Esus chieic.

²⁷ Adoaquien comapenen bëisec Esus nadpondash: —Ambibi tantiaquin naquid Nuquin Papan shubu abentsëquën puduedtiapimbo iquec. Matses abibi puduedtiapimbo cnoct Nuquin Papambien abi yacno yuedanquid mibi tantiamendac —quepondash Esus.

²⁸ Aden chiaquien Petedo nadpondash: —Chuinu. Tantia, Icho. Mibëd icnu, quequin abitedi nianondambi. Adembidi mibëd icquid utsibon abitedimbo nianondash. ¿Atotsi ëbitedi menetsia? —quepondash Petedo Esus chieic.

²⁹ Adoaquien: —Abimbo chiembique. Tantia. Esusbëd icnu qeshun Nuquin Papan shubu abentsëquën tabadte iquec quequin chiuuequidën aton shububëdta nianquin aton shubun icquid aton tied chedobëdta nianendac. Adquid ambi nianëdaidtedimbo csho ³⁰ daëd uaqin Nuquin Papan menendac. Nëbi shubu utsin-utsinguec mibi puduedcuenec. Adecbidi Nuquin Papan shubu abentsëquën tabadquid abi tantiaquido mibëd icquid dadpen iquec. Adquid icnuc mibi chieshënquidbidi iquendac. Yuecash ënëdenquio yec Nuquin Papan shubun mibi tabadendac mibi chieshënquid nibëdacno. ³¹ Nidaidënshun chuiquid icboedi Nuquin Papa yacno tabadquin utsi nashunquid mibi iquendac. Adecbidi nidaidën tabadquin nashunquid icboedi Nuquin Papa yacno tabadquin chuiquid iquendac. Nashunesa yec chuiquid icboedi Nuquin Papan shubun puduedash utsi nashunquid adquid iquendac —quepondash Esus.

*Ëbi unës uaindac quequin Esusën chiaid
(Mat 20.17-19; Duc 18.31-34)*

³² Aden chianec Edusaden caid yacno podquedën nidec Esus bëyucanec nidpondash. Edusaden yacno padpidec choacshobini bedshun unës uaic

quequin chiashi, ¿Dacuëdenquioda ambo Esus nidoapec? quetsëcquieq abëd icquido tsyuec nidanepondash. Adnubien abi tsibanquid utsibo dacuëdecbedi nidanepondash. Adnubien: —Èbëd icquiduidtsëqui padpiden chuiouanu — quiaash Esus nidtuidshun cho-chosho isquin naden abi mëyante chuiquin tauapondash: ³³ —Chuinu. Bëdamboen tantia. Nuquibi Edusaden yacno nidec. Ambo nidacsho ëbi bedshun ëbi matsesaid Nuquin Papan madombo isadaidbo tsusiobo menendac. Aden meniac icsaquidbimboecnuc ëbi icsamboen chuibanec onquecuededash, Icsambocquid Esus nec. Unës uamequimbien ictiad, quendac ëbi caic. Adec onqeshun ëbi buanshun isadaidpëmbo ancaquid ëbi meneoaindac. ³⁴ Aden meniac bedshun aidon ëbi oncain mamënshtubededquimbi dacuishtuashumbi cuestanquin buanshun ëbi unës uaindac. Aden unës uac daëdec ushash uincuenoaindabi —quepondash Esus abi uincuenta ambibi chieq.

Èbi daëdi nashunta Acobo Uambëd quiaid
(Mat 20.20-28)

³⁵ Aden chiaquien Acobo Uambëd Esusën dayuntsëqui choash: —Mibi chinu. Tantia. ¿Èbi daëdshun chiacpadomboen ëbi daëdi nashunenquioda mimbi icpe? —quepondash.

³⁶ Adoquien: —¿Atotsimbi mibi nashuneque? Èbi chui. Tiantianu — capondash Esusën.

³⁷ Adoquien: —Abuc nidoash chuiquid dapambo mibi icquin utsi ismequin min dayunquio ëquë tsadumbudcuenquin ëbi daëdi tsadunta — capondash Uanën Acobobëdtan Esus chuiquin.

³⁸ Aden aid daëdshun chiaquien: —Tantienquiocquin mimbi chieq. Icsaquid matstedidi nec, quequin Nuquin Papan aidò cuidenquiocquin ëbi aton madombo bëdambocquidded cuidendac. ¿Ada ëbipadquid mibi icpatsia? —capondash Esusën.

³⁹ Adoquien: —Ai, adquid tantiembi —quepondash.

Adoquien: —Ai, adomboembidi mimbitsen tantiendac —quepondash Esus. ⁴⁰ Aden chieq abi onquec: —Abuc nidash chuiquidquio iquec con dayunquio ëquë tsadbudcuenec tsadec cho, quetiapimbo iquebi. Nuquin Papambien ambi tantiaidquio aden chieq. Embi padenquio iquec — quepondash Esus Uambëdta Acobo chieq.

⁴¹ Aden Esusën chiaqui abëd icquidquio utsitedi Acobobëdtan Uanën chui-boed tantiash nëishcuededpondash. ⁴² Adec nëishash tabadsho isash: —Cho —quepondash Esus. Aden chomiash: —Utsi namequid isadaidpëmbo nec quequin mimbi tantieq. Aidon matses utsi yuaquin mëyanquin namebanec. ⁴³ Aden namesa mibi nec. Chuiquid dapa icnu quiaash utsi nashunquid icta. ⁴⁴ Adecbidi tsusio icnu quiaash yuabimboe yec utsin namiaid icta. ⁴⁵ Adquid icnuec Nuquin Papan madombo matsesash nidaidën tabadobi. Ancanquid iquenquio yec nashumënquidquio nebi. Adquid yec matses icsaid bedshunash ëbided cuidadec unësëndabi —quepondash Esus.

Bëshuaid, Badtimeyo cuëmëdquid bëdamiaid
(Mat 20.29-34; Duc 18.35-43)

⁴⁶ Aden chiashic Edico caid yacno chonobi abi tsibanquid utsibo dadpen cho-chopondash. Ambo tabadash abitedi puduampondash. Puduash nidquin isaquien bëshuaid, Timeyon mado, Badtimeyo cuëmëdquid podqued cuëman tsadpondash. Piucquid bednu quequin cainec podqued cuëman tsadpondash. ⁴⁷ Ambo tsadquimbi, Esus Nasaded caid yacnocquid choec, quequin utsin chieq: —Esus, Chuiquid Dapa, Dabidën madon, ëbi tantiaquin nashun —quequin chieq cuëdpondash bëshuaid.

⁴⁸ Adec cuëdsho tantiashun: —Esus cuënenquoio yec otacquoio tsad — cabededpondash utsibon.

Adnubien: —Chuiquid Dapa, Dabidën madon ëbi nashun —quepondash bëshuaid comapenec cuëdoaic.

⁴⁹ Adoac nidtuidshun Esusën: —Cuënquid chome —capondash.

Adoaquien: —“Chome,” queque. Nidtoash nid —capondash utsibon.

⁵⁰ Adsho tantiash bëshuaid aton dashcute bëntsecquid chicanec badedquoio nidtoanec Esus yacno chopondash. ⁵¹ Adec chosho isun: —¿Atotsimbi mibi nashumpeba? —capondash Esusën.

Adoaquien: —Iste bunebi, Icho —quepondash bëshuaid.

⁵² Adoaquien: —Esusën ëbi bëshuaid bëuquec quequin mimbi tantiacpadquiec mibi bëdanoque. Nidec nid —Esus quenubi isbenquiopondash bëshuaidën. Adec bëdanshun Esus nidsho isun tsibampondash.

11

Chuiquid dapabimboec yec Edusaden yacno Esus choaid (Mat 21.1-11; Duc 19.28-40; Uan 12.12-19)

¹ Adec nidequi Edusaden anoentsëqui Esus chopondash. Edusaden anoentsëqui Bedpaque caid icpondash. Edusaden anoentsëcbidi Betania caid icoapondash. Aidedi macuësh Odibos caid potsembo icpondash. Ambo choash ëbëd icquid daëd shubuno nidmenu quequin tantiec nadpondash Esus: ² —Në shubu dadpen yacno nidec nid. Ambo nidshun cabayobiecquidën bacuë caniabictsëcquid tënëshac tsadsho mimbi istuidendac. Aidi matses catsadabicquid neque. Aidi istuidshun tënëshaid tëchichshun sananquin bëta. ³ Aden bedsho isun, ¿Atotsi canun aid bede? cac, Bëoaimbi. Nëid nuquin icho bunaid nec, cata. Mimbi aden chiac, Buanec nid, quendac —quepondash Esus abëd icquid daëd chiec.

⁴ Aden Esusën chiaquien abi daëdi nidpondash. Adec nidanequimbi cabayobiecquid caniabictsëcquid shubu shëcuë cuëmano tënëshac tsadsho istuidshun tënëshaid tëchicpondash. ⁵ Aden tënëshaid tëchicho isun: —¿Mitsipaden tantiaquin ëmbi tënëshaid mimbi tëchiqueque? Tantianu. Chui —capondash anocquidën.

⁶ Adoaquien: —Tënëshaid tëchichshun bëta, con icho quebocpaden naimbi —capondash tëchicquidën.

Adoaquien: —Buanec nid —queoapondash.

⁷ Adoac Esus yacno buampondash. Aden bëshun aton dashcute bëntsecquid chicshun cabayobiecquid capupondash ma chuiquid aidën catsadtonoeshun. Adoaidën Esus catsadtopondash. ⁸ Adembidi chuiquid Esus nec quequin ismequin utsibontsen aton dashcute bëntsecquid chichededshun podqued ansambampondash ma chuiquid dapa bëdambocquid capunueshun. Adembidi tantiaquin utsibon budëdbiecquid podo tebededshun podqued ansambanoapondash. ⁹ Aden ansambanash matses dadpen bëyucanec nidanenubi Esus nënantanquoio nidnuc aidtedbidi tsyuec choquin tsibambëpondash. Adec abitedi nidanec Esus tantiec nadeccuëdëncuededpondash: —¡Adeduya! Nuquin Papan bëdambo icmiaid ambi tantiacpadomboen chuitanta quequin chomiaid nec. Tsusedpa chuiquid dapa, Dabid cuëmëdquidën tsyuecquid, shubu abentsëqui tabadquido chuiquid dapambo choc nec. ¹⁰ Èbi chuiquid dapa Nuquin Papan abuc tabadquidën chomiaid Esus nec. Nuquin Papa bëdamboshë iquec. ¡Adeduya! —queccuëdëncuededpondash Esusbëd nidquido.

¹¹ Adec cuëdëncuededequi Edusaden yacno cho-chopondash. Choashic Nuquin Papa tabadte shubu uashunaid quënë dadpen yacno nidash Esus

puuedpondash. Adec puuedshun abitedi isbanash ushë budtsambi Betania caid yacno nidaneopondash Esus.

Cuëte bacuëesa chiaid
(Mat 21.18-19)

¹² Abadiadtsashi Betania yacnoësh nidanec Esus bundopondash. ¹³ Adec bundoshombi cuëte icueda caid podo buntac-buntacpambo ancuenquo nidsho istuidec Esus: —Icueda podo buntac-buntacpambo podoash nideque. Isbono. ¿Bacuëashida neque? —quianec nidpondash. Adec nidquimbi icueda podoudiquio icsho ispondash. Ushë utsin bacuëtiadquidi bacuëabi podopac.

¹⁴ Ad icsho isun Esusën: —Adequi bacuëesa icsho ma matsesën chenquo icpanuna —capondash. Aden chuisho tantiapondash abëd icquidon.

Nuquin Papa tabadte shubu uashunaid yacnoshon cuemiaid
(Mat 21.12-17; Duc 19.45-48; Uan 2.12-22)

¹⁵ Aden cuëte chuibëtsenec choequi Edusaden yacno choapondash. Ambo choashic Nuquin Papa tabadte shubu uashunaidën puuedoapondash. Adec puuedshun piucquid bedquin piucquid sanaid cuestetedi bidicabanquin piucquid bednun nidaidën capuquidbëdta podochoquid chedo menabanquidën tsadtetsen nebudquin icbotedi puuemebampondash.

¹⁶ Aden puuemeshun Nuquin Papa tabadte shubu uashunaid nasiadquin aton na buansho isun: —Nuquin Papa tabadte shubu uashunaid neque. Adec nasiadec capuenda —capondash Esusën chushcaquin. ¹⁷ Aden chush-

cashic: —¿Ëbi tabadte shubu uashunaid matsesën ëbi onquianete shubu iquendac, quenquioda Nuquin Papa icpampic? Aden Nuquin Papan chiaid tantiesabimboecquin muaquin piucquid bedte shubu mimbi icmiayoc —quepondash Esus. ¹⁸ Aden Esusën chuisho tantiash, Icsambocquid Esus neque. Unës uatiad, quequin ambibi tantiabededec isadaidbo tsusiobo tabadcuededpondash. Utsiboen: —Chuiquid dapan chiacpadomboen Esusën chiec —quepondash. Adsho tantiash, Esus bednu, quetiapimbo yec dacuëdcuededec tabadpondash isadaidbo tsusiobo. ¹⁹ Adnubien inchëshbudtsëqui Edusaden yacnoësh nidoapondash Esus.

Cuëte bidiquiaid
(Mat 21.20-22)

²⁰ Abadiadtsashi Edusaden yacno nidoaquimbi cuëte icueda caid bidiquiacsho istuidpondash. ²¹ Aden istuidash Esusën icueda bacuëesa chiaid tantiec Petedo: —Cuëte bacuëëabichsho mimbi chuibod bidiquiaye. Is, Icbo —quepondash.

²² Adoacquien Esus: —Nuquin Papa nadatiambocquin nabanquid nec, quequin tantiaquiota. ²³ Abimbo chiembique. Nuquin Papa nadatiambocquin nabanquidquio nec, quequin abimbo tantiasho isun mimbi chiacpadomboembidi naindac. Aden tantiaquin mimbi nëid macuëcain, Mananuc tabadboedi adquiecbidi acte nantan tabadoata, mimbi cac nëid macuësh acte nantan tabadoaindac. ²⁴ Ëmbi chiacpadomboen Nuquin Papan naindac, quequin abimbo tantiaquin mimbi chuisho tantiashun Nuquin Papan adomboembidi naindac. ²⁵ Aden Nuquin Papa chuinus mibi utsin icsambocquin naid tantienquo yec bëpiscudta. Adsho abucshun isash Nuquin Papan mimbi icsa uanquin naid tantienquo yec bëpiscudendac. ²⁶ Adenquo mibi icsho isun Nuquin Papan mibi icsa uanaid bëpiscudenquiocquin mimbi chiaid tantiatipimbo iquendac —quepondash Esus abëd icquido caic.

¿Mitsicquidën chuibanta caid mibi ne? quiaid
(Mat 21.23-27; Duc 20.1-8)

²⁷ Adashic padpidec Edusaden yacno choapondash Esus. Adec choash Nuquin Papa tabadte shubu uashunaidën puduedash capusho isash isadaidbo tsusiobo: ²⁸ —¿Mitsicquidën chuibanta cac chuiquid dapabimboecquin mimbi chieque? Tantanu. Chui —capondash.

²⁹⁻³⁰ Adoaquien: —Adembidi ¿Atotsi tantiaquin mimbi chuipe? Chui. Tantanu. ¿Matses mentondaidën, Uan padon Nuquin Papan chuimiapadomboen nabanquinda nadiondash? Padenquo, quequin, ¿Ambibi tantiacpadomboen Uan padon naondash, quequinda mimbi tantiapeque? En chui. Tantanu. Aden mimbi chiac ëmbitsen mibi chiemi —capondash Esusën tsusiobo chuiquin.

³¹ Aden Esusën chuisho tantiash udictsëc nidash isadaidbo tsusiobo onquec nadcuededpondash: —Nuquin Papan tantiamiacpadomboen Uan padon naondash, nuqui qesho tantiash, ¿Atotsieshun aidën chiaid tantienquo icconda? quetsiash Esus. ³² Naden Uan padon ambi tantiacpadomboen naondash, nuqui qesho tantiashun, ¿atotsi napatsiash Uanën chuisho tantiondaidon? Aidon, Nuquin Papan chuimiad Uan pado niondash, quequin tantiabededquin nuqui cuënoten seshunetsiash —quecuededpondash.

³³ Aden chiec onquecuededashic —¿Tsuntsin tantiamiacpadomboen Uan padon nabampondash? quequin tantienquo iquemi —quepondash isadaidbo tsusiobo Esus chiec.

Adoaquien: —¿Tsuntsin tantiamiacpadomboen Uan padon nabampondashba? quequin mimbi chienquo yacpademi ëbi chuiquin tantiamequid mibi chienquo icoambi —quepondash Esus abi chieshënquido isadaidbo tsusiobo chiec.

12

Tied icbo nashunta quequin chiaid (Mat 21.33-46; Duc 20.9-19)

¹ Aden chiashic, isadaidbo tsusiobon nacpadomboen naid nec quequin tantiec utsi chiachimboec Esus nadpondash: —Chuinu. Tantia. Icbon aton tiedën uba caiduidquo nitsinshun cuate bëntsinaidën otadnidec cuidiancuidianec dadpen bacuëc. Sinash didiesho icbon bedec. Aid nitsinshun icbon daquënë uaic. Aden daquënë uashun yuecshun uba ënë chinun tsuc-tsucte nactemposh. Aden nactenshun uba ampenushe qeshun isec tabadte shubutsen shubu uaposh. Aden aid shubu uash nidnuequin abi tied nashunquid, Ista, quequin chianec nidposh icbo.

² “Adec nidequi nidaid utsi yacno choash yuec tabadash, Uba sinashe. Con uba bedtan, cac, aton yua nidposh. ³ Adec nidboed tied yacno chosho isun tied icbo nashunquidon bedshun cuestanquin menenquiocquin aton icbo yacno nidmeoposh. ⁴ Adoacsho isboshic, Uba bedtan, cac yua utsitsen nidoaposh. Tied yacno chosho bedshun cuestanquin aidtsen aton icbo yacno nidmeoposh tied icbo nashunquidon.

⁵ “Adosho isash, Padi, quenquiocquimbidi, Con uba bedtan, cac yua utsitsen nidoaposh. Aidi tied icbo nashunquidon cuesuneposh. Adembidi, tied icbon nidmiad utsi-utsien abi tied nashunquidon cuesosh. Aden nabanquimbi utsi-utsien cuesuneposh.

⁶ “Adsho isash tied icbo nadposh: Nëid, con madombo abentsëqui nec. Èbi cudasaid nec. Aidi tsyuec con tied yacno nidmembi. Aidi chosho isun, Tied icbon madombo nec, qeshun bëdamboen istsiash, qeshun aton madombo nidmeposh.

⁷ “Aden nidmiac ancuenquo chosho isash, Tied icbon madombo choegue. Is. Aton papa unësan aton papa yacpadec icbo icoanushe qeshun tied icbo nuqui icnun aidi cuesunenuna, quecuededposh tied icbo nashunquido.

8 “Adec onquetanquin aton icbon madombotsen bedshun cuesuneshun daquënë uaid mabudacquin nebudposh. 9 Adoacsho tantiashun ¿atotsi tied icbon napec? Naden naindac. Utsibèd aton tied yacno nidshun abi nashunuidboed cuesuneshun utsibo abi nashunquido icmendac – quepondash Esus.

10 Aden chuishumbic Esusèn: –¿Adomboembidi chuiquin Nuquin Papan dada uamiampid tantienquioda icco? Nad iqueque. Tantia. “Shubu uanuequidèn buintad isuidaidi utsin abia nitsinaid icoaposh. Adquiobidi Nuquin Papan chuimiaid matsesèn tantiauidaid iquendac.

11 Nuquin Papan naid bédambo iquec. Ambi Chomiaid abi yacno yuedquid icmequin Nuquin Papan nadatiambocquin naid nec quequin abi tantiaquidènquio tantiec” –quepondash Esus Nuquin Papan chiampidquio chiec. Nuquin Papan shubu abentsèquèn abi tantiaquido yuedanquid nendac, quequin utsi chiacbimboec abibi chiadquin Esusèn chuibampondash.

12 Adsho tantiash, Èbitedishun isuidaidbimboecnuc chuibanec quequin tantiec isadaidbo tsusiobo Esus bedtiadquio icpondash. Adnubien Esus onquesho dadpeshun tantiabededpondash. Dadpen icsho isash dacuèdcededec Esus bednu quenquio yec nidanepondash chieshènquido isadaidbo tsusiobo.

Bec cho quequin bedshunquid nec, quequin chiaid
(Mat 22.15-22; Duc 20.20-26)

13 Isadaidbo tsusiobo nidshun padiseyobo edodesbobèda istuidshun: –Nèidon Esus icsamboen chuimetsiash –queshun aido Esus yacno nidmepondash. 14 Aden nidmiac Esus yacno choshon abentsècshun Esus nadopondash: –Ambia tantiaquid, matsesèn tantiamiacpadpenquiocquid mibi yec Nuquin Papan tantiacpadomboen chuibanquidien mibi nec. Adquid icquin èbi chui. Tantanu. Shocosh piucquid bec cho quequin bedshunquid, isadaidpembo ancaquid, Sesad cuèmedquid nec. ¿Aden meniaid bédambo iquec, quequin Nuquin Papan chiaidta nepec? 15 ¿Adambi menepeba? –quepondash padiseyobèd edodesbo Esus caic.

Adoquien, Èbi icsamboen chuimenuec adec onquec, quequin ambibi tantiec: –Shocosh piucquid bec cho ma isnu –quepondash Esus.

16 Adsho tantiashun bèpondash. Adoquien: –Sananquin isme. ¿Tsutsibimboecnuc dada uaid iqueque? Chui. Tantanu –capondash Esusèn.

Adoquien: –Isadaidpembo ancaquid, Sesadbimboecnuc dada uaid nec –quepondash.

17 Adoquien: –Ai, aidèn na nec. Aid bec cho, quescho meneta. Adembidi Nuquin Papa Nuquin Icho icquin, Nata, cacpadomboen naban –capondash Esusèn.

Aden bédamboen chuisho tantiash, Bédamboenshenda tantiapec, quequin ambibi tantiec Esus chieshènquido tabadcuèdedpondash.

Abuc tabadequi, ¿mitsicquidèn chido neque? chui quiaid
(Mat 22.23-33; Duc 20.27-40)

18 Adnubien saduseyobtsen Esus yacno cho-chopondash. Unèsaid uincuentiapimbo iquec quequin tantiaquido aido nepondash. Aido chochoash nadpondash: 19 –Moisesèn dada uapampid nad iqueque. Tantia. chuinu. Chidochoquid bacuè tishmiabi yec unèsan unèsboedèn chido aton tishin bedtequid nec. Aden bedshun ma bacuè tishmepanuna. Aden tishmiac unèsaidèn tishmiaidbimboec ma icpanuna, quequin chuipampid nec –quepondash saduseyobo. 20 Aden chuishumbic: –Aden nata quequin Nuquin Papan chiaid icnuc, aton mado 7ted tishpondash. Abia

tishaid canishun aton chido bedshun bacuë tishmiabi yec unëspondash. ²¹ Adsho isun abi tsibanquidën aid chidobidi bedshun bacuë tishmiambo yec unësoapondash. Adembidi abi tsibanquidën ²² aton utsi unësan aid chidobidi bedshun tishmiambo yec unësoapondash bacuë nibëdquio yec. Adecbidi dadatedi unësbudnepondash. Adecbidi chidotsen unësoapondash. ²³ Adec unësash abuc tabadequi, ¿Mitsicquidën chido aid icpatsiashe? Chui. Tantianu –capondash saduseyobon Esus chuiquin.

²⁴ Adoaquien Esus: –Nuquin Papan chiaid mimbi icsamboen tantiec. Adembidi ambi nadatiambocquin naid mimbi icsamboen tantiaoaic. ²⁵ Nad iqueque. Tantia. Unësaid uincuenash abuc tabadquin chido bedesa nendac. Adecbidi aton champi bedmesa aton papa nendac. Nuquin Papan uaido mayan bēda unësesa yappadquiec matses uincuenash unësesa iquec caidesa nendac. ²⁶ Adembidi unësash uincuenaid tantianu queshun ¿Moisesën dada uaid isenquioda ictionda? Aidën cuētempo abibi nēdēnquesho istanec nid-tuidquin naded Nuquin Papa onquesho tantiampic: “Min tsusedpabon Papa nebi. Abadauanën Papa nebi. Adecbidi Isaquën Papa nebi. Adecbidi Acobon Papa nebi,” quequin Nuquin Papan chuišo tantiampic Moisesën. ²⁷ Nuquin Papan chiacpadpenquiocquin Moisesën dada uapampid nec quequin mimbibi muaquin chiēda. Chuinu. Tantia. Unësaidën Papa nebi quesa Nuquin Papa nec. Nami chodquiaid icquin Nuquin Papa tantiatiapimbo iquec. Aton nami chodquenubi aton tantiāte icsho ambi uincuen uatequido Nuquin Papan tantiendac –quepondash Esus matses uincuenta iquec quequin saduseyobo tantiamenuc.

Naden nata quequin chiaid ¿mitsicquid adquidpadquid utsi nibēdpec? quiaid (Mat 22.34-40)

²⁸ Adec Esusbēd saduseyobo onquecuedednubien tsusedpabon nadomboen nata quequin chiaid tantiamequid abentsēc chopondash. Bēdamboen Esusën saduseyobo chuišo tantiash Esus icsamboen chuimenuc aidtsen: –Ēmbitsen tantianu. Chui. Nadomboen nata quequin chiaid Nuquin Papan dada uamepampid dapen iquec. Dadpen icnuc, ¿mitsicquid aidpadquid utsi nibēdpec? –quepondash.

²⁹ Adoaquien Esus nadpondash: –Nēid chiaidpadquid utsi nibēdeque. Chuinu. Tantia. “Nuquin Icho Nuquin Papa nec. Nuquin Icho Abentsēcquiobi iquec. ³⁰ Adquid icsho ēbi tantiaquid isash bēdambo iquebi camequin Nuquin Papa tantiadoneta. Adecbidi ēbi yapadecuidi icnu quenquio yec Nuquin Papa bunacpadquiec icnu quec bēdamboec tabadta. Adembidi ambi tantiacpaden tantianu quequin adombota. Adembidi aid tantiaquin bēdamboen nabanquiota. ³¹ Aden nabanquin Nuquin Papa bēdambo icmequin utsibo adembidi bēdambo icmequin nabanta. Ēbi tantiaquin utsibon ēbi nashuntiadquidi nec, mimbi cacpaden utsibo tantiaquin nashunta.” Aden nata quequin Nuquin Papan dada uamepampid nec. Aidpadquid utsi nibēdec –quepondash Esus.

³² Adoaquien Esus icsamboen chuimenuc choboed nadpondash: –Mimbi chuiboed abimbo iquec. Nuquin Papa abentsēcquiobi iquec. Aidpadquid utsi nibēdec. ³³ Adembidi, ēbi tantiaquid isash bēdambo iquebi Nuquin Papa camequin tantiadoneta. Adecbidi mimbi tantiacpadomboen nainquio yec Nuquin Papan tantiacpadquiec icnu quec bēdamboec tabadta. Adquid icquin ambi tantiacpaden tantianu quequin adombota. Adembidi abi tantiaquin bēdamboen nabanquiota quequin chuitequidpadquid utsi nibēdec. Aden Nuquin Papa bēdambo icmequimbi utsibo adembidi bēdambo icmequin nabanta. Ēbi nashuntiadquidi nec, mimbi cacpaden utsibo tantiaquin nashunta, quequin chuitequidpadquid utsi nibēdec. Aden

naquid Nuquin Papan bédamboen isendac. Aden naisa, Con na Nuquin Papa menenu, qesho Nuquin Papan bédamboen istiapimbo iquendac – queopondash choboed.

³⁴ Aden choboedèn bédamboen chuiasho tantiash: –Nuquin Papan shubu abentsèquèn tabadaid mimbi bédamboen tantiatsem poc – quepondash Esus. Adoac Esus icsamboen chuimenu quetiapimbo icpondash utsibo.

*¿Tsuntsin mado Quidistu nepec? quiaid
(Mat 22.42-46; Duc 20.41-44)*

³⁵ Abi icsamboen chuimenu equid utsi nibèdnuc Nuquin Papa tabadte shubu uashunaidèn tabadquimbi Esusèn Nuquin Papan dada uamiampid chuibanquin nadopondash: –Nuquin Papan chomiaidquio tsusedpa Dabidèn mado nendac, quequin tsusedpabon chiaid tantiamequidon chiec. ¿Atotsi chuiquin naden chieque? Tantia. Chuinu. ³⁶ Naden Nuquin Papan Mayanèn Dabid chuimiampic: “Icho utsi icsho mibi chiebi que. Tantia, mado, quequin chiec Icho Dapa nadpampic:

Èquè con dayun abiucquio cainec tsadec cho ma mibi chieshènquidtedi mimbi namiaid ma icpanu,”

quequin chuipampic. ³⁷ Aden Nuquin Papa icho dapanquio aton dayunquio chomiaid chiec Dabid pado, Con icho nec, quiasic, ¿mitsipadquiec, Con mado nec, queopampic? Nuquin Papan chometequid, aton mado, Dabidèn icho yec ¿mitsipadectsi Dabidèn tsyuecquid icoapec? –quepondash Esus abibi chiaequid.

Aden chiec onqesho tantiash badedquio tantiatiadquio yampondash utsibo. Bédamboen chiec, quequin comapenen tantiapondash.

*Nuquin Papan chiaid tantiamequidon chuisho tantienda quiaid
(Mat 23.1-36; Duc 11.37-54; 20.45-47)*

³⁸ Aden tantiamequimbi Esusèn nadopondash: –Tsusedpabon nadomboen nata quequin chiaid tantiamequidèn chuibansho tantienda. Aido nadquid iqueque. Tantia. Tsusiobimboec isadnu quiasic abi dasiuidaid ènapen icquid dasiuidtenequid aido nec. Adecbidi tantiaquidquio yec tsusiobimboec isadnu quiasic aton matses dadpen yacno capuquid nec.

³⁹ Adomboembidi èbi isoanu quiasic Nuquin Papan chiaid chuibante shubun puduedash tsusiobèd tsadec. Adomboembidi ismenu quiasic isedquido dadpen yacno choash shubu ichon dayunquio tsadoaic. ⁴⁰ Aido bédamboen nashumbimboen nianten na ampequid nec. Adembidi bédambocquid nec camenuen yuen Nuquin Papa chiec. Adquid comapenen cuidtequid nendac –quepondash Esus.

*Nuquin Papa tantiaquin nianten meniaid
(Duc 21.1-4)*

⁴¹ Aden chiasic aton na bedtequid sandote tabècaid tabadacno choash isec Esus uano tsadpondash. Nuquin Papa tabadte shubu uashunaid tantiaquin nashunquidèn nacentiasic quequin aton na bedtequid bè-bèquin sandobansho isec tsadpondash. Adec tsadquin isquimbi aton na dadpen icquidèn aton na bedtequid sando-sandonobi ⁴² aton na daèdpactsècquidquio niantè choquimbi aton shocosh piucquid daèdquibictscquid sandopondash aton na utsi nibèdquiocnoc.

⁴³ Adosho isun abèd icquido chomeshun Esusèn nadopondash: –Abimbo chiebi que. Tantia. Niantè aton na bedtequid dayun uanu quenquioctscquimbi Nuquin Papa tantiaquiquin sandoquidquio nec utsibon aden sandoengquiocnobi. ⁴⁴ Utsibon aton na bedtequid dadpen uesenquiocquid sandobededpash. Aido daèdpactsèc icquid sandoacimboen sandoquido

nec quequin tantiambi. Adquidpenquo niante nec. ¿Bednun tedtsimbi dayunoape? quenguioquin aton na daëdquioibctšëcquidi nibëdquiocnoc sandoposh nianten. Dadpen icquid sandoac bimboen sandosho aid isembi — quepondash Esus.

13

Nuquin Papa tabadte shubu uashunaid chic-chicte chiaid (Mat 24.1-2; Duc 21.5-6)

¹ Aden chianec Nuquin Papa tabadte shubu uashunaidën puduenubien: —Nuquin Papan shubu cuënote nacnenaïd bëdaidquio iqueque. Is, Icbo — quepondash abëd icquid abentsëc Esus caic.

² Adoaquien: —¿Nëid shubu dapa isecta ne? Shubu uaquin cuënote dapa tsindonëdaïd mimbi nëbi isaid chic-chicac nibëdquëndac —quepondash Esus.

Abitedi naimbudte tauanun ismete chiaid (Mat 24.3-28; Duc 21.7-24; 17.22-24)

³ Aden chiashic auëshquio nidanec macuësh Odibos caid yacno tabadtu idpondash Nuquin Papa tabadte shubu uashunaid uano tsadnuc. Ambo tabadec abëd icquid 4ted icpondash. Petedo, Acobo, Uan, Andedes aïdted icpondash. Utsinon tantienquiocnoc aidon: ⁴—Cuënote nacnenaïd nebudte mimbi chuiboed ¿mitsipadën nebudte icpeque? Tiantianu. Èbi chui. Adembidi aïdi tauanun ismete ¿atotsi icoapeque? Tiantianu. Aid chuïoa —capondash.

⁵ Adoaquien Esusën nadopondash: —Muaquin chiaïd tantiamane queshun Nuquin Papan chiaïd isban-isbanquiota. ⁶ Nuquin Papan chomiaïd nebi quec muaquid cho-choendac. Aid chosh, quequin chiac utsin-utsinquien, Abimbo caic, quequin tantiabededendac. ⁷ Adecbidi cuesnancuededec quendac. Adembidi cuesnancuededosh, quequin chuituidsho tantiaoaindac. Aden chuituidsho tantiash dacuëdenda. Ad icnuc abitedi naimbudte ushë choabi iquendac. ⁸ Ai, adquio iquendac. Adashic abëd tabadquidobëdi cuesnancuededendac. Adecbidi abi ancaquid dapan, Cuestan, quequin nidmiac nidaïd utsin icquidobëdi cuesnancuededoaindac. Adecbidi utsi-utsiec yacno nidaïd ishcuendac canchednuc. Adecbidi bunquïote iquendac. Aïdtedi icsamboshëcquid taëyendac.

⁹ “Adquid yanubi Nuquin Papan chiacpadomboen nabanec tabadta. Mibi bedshun, Icsambocquid neque. Cuidta, quequin tsusio utsibo menenun mibi buanendac. Adembidi bedshun Nuquin Papan chiaïd chuïbante shubuno buanacsho nuqui tsusiobon cuesendac. Adembidi bedshun isadaïdpembo ancaquid dapabo yacno buanaqui mimbi tantiaïd Nuquin Papan chiaïd mimbi chuïbanendac. ¹⁰ Nuquin Papa yacno yuedanquid iquec quequin mimbi chiendac. Nidaïdtedi yacnoshon aden Nuquin Papa tantiaquidën chuitiaïd. Aden chiabicnuc abitedi naimbudtiapimbo iquec. ¹¹ Adembidi, Icsamboen naquid nec, quequin muaquin bedshun icsaquid cuidnuequid yacno mibi buanaqui ¿atotsimbi cape? quequin mimbibi tantiec tsadenda. Nuquin Papan Mayanën mibi tantiamiacpadomboen mimbi chuïbanendac.

¹² “Adembidi Nuquin Papan chiaïd tantiesan aton utsimbo Nuquin Papan chiaïd tantiaquid bedmec, Nëid cuesuneta, quendac. Adembidi aton papan aton bacuë cuesuneta, caïndac. Adembidi aton bacuëbo tantiesia icquin aton papan chiaïd niaquïn adembidi aton titan chiaïd niacoaquïn cuesunemen-dac. ¹³ Esus tantiaquid chieshënquid dadpen iquendac. Adquidën mëyanaqui Esus tantiaquid nebi quec niaquesa icta. Aden niaquenquio yec unësash Nuquin Papa yacno nidacsho bëdambo icmiaïd mibi iquendac.

14 “Adnubien Nuquin Papa chieshënte ushë choendac. Aid chonoc Edu-saden yacno abi chieshënkuid dapa choash, Nuquin Papa caid nebi, quiash Nuquin Papa tabadte shubu uashunaidën tsadendac. Adsho isash cuesunenushë quiash anoentsëqui icquido cuenenguiocboedi ma cuempanuna. Abimbo chiembique. Bëdamboen tantiata caimbi. 15 Adecbidi shubu macano pada-padapambo yacno tabadquido yec umanuc dectatote uaid dectandoidën budanec con na bednu quenquoio yec cuenta. 16 Adecbidi aton tied nantan tabadquid yec aton dashcûte bëntsecquid chicshun dectanaid bednuec bidiandenquoio yec badedquio cuenta. 17 Bacuë usunquid adecbidi bacuë chishmequin buanquid badedquio cuentiapimboesho mëyampec. Adquid tantiec utsibo unësquoio icchitec. Nuquin Papa chieshënte ushë icsamboshë iquendac. Adnuc badedquio cuenta. 18 Nuquin Papa chieshënte ushë icnuc ma ue dapa sequenquiocpanuna, quequin Nuquin Papa chuidedchuidedta. Adoac ma badedquio cuempanu. 19 Comapenen Nuquin Papa chieshënkwin abi tantiaquido icsa uaquin mëyanendac. Yuen naindac. Adoaidpadquid ënden nibëdondash. Adecbidi adoaidpadquid nibëdendac. 20 Nuquin Papa ëmenuen chuideneta. Nuquin Papa chuiquin, Chën, Papa, mimbi cainquiocnoc matsestedi nibëdtsiandac. Èbi tantiaquid ambi cuënaido tantiec, Chën, quequin Nuquin Papan ëmendac. 21 Nuquin Papa chieshënte ushë icnuc, Nèid, Quidistu, Nuquin Papan chomiaid neque. Isec cho, qesho tantienquido icta. 22 Aid ushë icnuc, Nuquin Papan chomiaid nebi, quec muaquid dadpen cho-choendac. Adecbidi, Nuquin Papan chuimiaid nebi, quec muaquid dadpembidi iquendac. Nuquin Papan cuënaido ëbi tantiaquid icmenu quequin abi chieshënkuidombidi nadatiambocquin nabandac. Adosho isun ëbi tantiaquidëmbi utsin-utsinquin tantiauidtsendac adquid. Nuquin Papapenquoio aid nec, quequin Nuquin Papambo tantiata. 23 Ad iquendac quequin chiombique. Ad icnuc chieshenquiocquin Nuquin Papan chiaid tantiaquiota –capondash Esusën.

*Nuquin Papan madombo choaid
(Mat 24.29-35, 42-44; Duc 21.25-36)*

24 Aden chiash abi onquec: —Adnubien Nuquin Papa chieshënte ushë nidan inchëshquoio yanendac. Badiadën ushëbëdtabi inchëshën chënquequid nibëdquiocnoc unës uaindac. 25 Adecbidi uispa paëdted-paëdtedendac. Adecbidi abuc tabëcaid nibëdnuc ambo icquido Satanashëd icquido ¿mitsimbo nuqui cuempeba? quendac.

26 “Adnubien Nuquin Papan madombo matsesaid ëbi choasho matsesën isendac. Abu ushun nadatiambo yec ushumbo yec bëdaidquio iquequi ëbi choasho isendac matsesën. 27 Adnubien Nuquin Papan uaido mayan bëdabo, Èmbi nidtan, cac nidanendac. Nuquin Papan cuënaido bednuec nidaiddedi yacno nidanesh bedbanash ëbi tsadacno choec, Bëombi, quetuidendac bedtanec choquido —quepondash Esus.

28 Aden chiashic: —Abi chiembique. Tantia. Suc seccuduquiac nëbi cunquecuenec, quequin matsesën tantiec. 29 Adomboembidi ëmbi chuibamboed tauadosho isash Nuquin Papa chieshënte ushë choeque. Ista, quec chuinanta. 30 Abimbo chiembique. Tantiata. Èmbi chuibamboed naimbudabicnuc ëmbi chuibamboed tantiaquidën tsyuecquido naimëdbudenquoio iquendac. 31 Aden matsesën isnubien nidaidbëdi abu ënëdendac. Èmbi chiaiddedi abimbo yec adquiuiddi iquendac.

Nèid ushëquoio tauadoendac, quetiapimbo matses iquec quiaid

³² “Adnuc nëid ushënquo Nuquin Papa chieshënquin tauaindac que-
tiapimbo matses iquec. Ambí uaido mayan bédabo adecbidi queti-
apimbo icoaic. Aton madombo yec adtiapimbo iquebi. Nuquin Papa
abentsëcquiobien adquid tantiaquid nec. ³³ Aid tauadote ushë choaid tantiat-
apimbocquin Nuquin Papan chiaid niacmane qeshun isbanquin nabanta.
³⁴ Nad iqueque. Tantia. Chuinu. Utsibo yacno nidnun abëd tabadquido
naden chuiposh. Min utsibo chieshënenquiocquin shubu isquid icta quequin
chianec nidposh. ³⁵ Adec icho nidan abi choate ushë mimbi tantienquo
iqueque. Bëshunenquiocquin tantiaquiota. Inchëshbudtsëqui choapatsiash,
quequin tantia. Adembidi inchëshpotsëmbo chopatsiash qeshun adem-
bidi tantiaquiota. Adembidi, cachina cuëdanubi chopatsiash, qeshun is-
cunshun tantiadenequiota ³⁶ ëmbi tantienquiocnoc con icho chochitondac,
qeshun. ³⁷ Adquiecbidi bëdamboec tabadquin Nuquin Papan chiaid isted-
istedta Nuquin Papa chieshënquidën niacmenushe qeshun –quepondash
Esus.

14

Esus cuesunete bunaid chiaid

(*Mat 26.1-5; Duc 22.1-2; Uan 11.45-53*)

¹ Adashic, bëyuc tishaid unësmenuequid aton shubu datamenuequin
Isadaidbo tsusedpabon nidaidën capuquid yuaded cuesunepampic. Aid
tantiaid ushëbëdtabi pan bidisquesa tantiaid ushë Pascuas caid daëdec
ushash choendac. Aid chonoshe qeshun isadaidbo tsusiobon Esus
nibëmbededpondash. ² Aden nibënec: –Pascuas ushë tantiec Edusaden yacno
matses dadpen cho-choec. Matses dadpen choabicnuc ismenquiocquin Esus
bedtiad. Bedsho isash, Padi. Bedenda, queuidash nëishun comapenen nuqui
cuestsiashe –quepondash isadaidbo tsusiobo.

Esus unësec qeshun nachimboen noadte machiuinte chiaid

(*Mat 26.6-13; Uan 12.1-8*)

³ Adnubien Betania caid yacno tabadquin Esusën Simonën shubun
pudedshun pepondash. Simon daushachimboecquid, nami mishac tan-
tiadenquiocquid icsho Esusën bëdamiaid nepondash. Adec puduedshun
pec tabadnubi comapenec noadquid bëc chido puduedpondash. Piucquid
dadpen menequin comapenec noadquid bedquid chido nec. Ambí bedaid
sedunte postichoquid dësunaid dëchictanquin Esus chidon machiuimpon-
dash.

⁴ Aden machiuinsho isash utsibo nëishun: –¿Atotsieshun machiuino?
⁵ Noadte menequin piucquid dadpen bedshun aton na nibëdquid dad-
pen menetsiandac –quec onquecuededpanëdash Esus machiuimboed chido
chushcaic. ⁶ Aden chushcacho tantiaishien Esus onquec nadpondash: –
Chushcainda. ¿Mitsanada nediosh? Ambí noadte machiuimboed bëdaidquo
nec. ⁷ Badiadquidën-badiadquidënquiec ënëdenquo yec aton na nibëdquid ënabi
iquec. Aidi menenu qeshun mimbi menepec. Èbien nashuntiapimbo iquen-
dac. ⁸ Èbi unësabincnuc nëid chidon tantiaquin chococanuequin nachimboen
noadte machiuimpaboc. ⁹ Abimbo chiembique. Tantia. Nuquin Papan
shubu abentsëquën tabadaid chuiquimbi ëbi machiuimboedën naidtsen tan-
tiaquidon chuiben-chuibenendac –quepondash Esus.

Esus bedmembali, Udas quiaid

(*Mat 26.14-16; Duc 22.3-6*)

¹⁰ Adnubien Udas Iscadiote, Esusbëd icquid abentsëc, Esus bedmenu,
quianec isadaidbo tsusiobo yacno nidpondash. ¹¹ Adec nidequi isadaidbo

tsusiobo yacno choshon Esus mibi bedmembu quequin chuituidac bēdambo icpac caondash aidō. Adembidi: —Esus ēbi bedmesho isun piucquid mibi menembu —quecuededpac caondash. Adsho tantiasn nidanec, ¿Mitsipadentsimbi bedmepe? quec tabadquin caimpac caondash Udasēn.

Nidaidēn capuquidded cuesuniaid abēd icquidobēdtan piaid
(Mat 26.17-29; Duc 22.7-23; Uan 13.21-30; 1Cod 11.23-26)

¹² Adashien penun isadaidbo utsibon nidaidēn capuquid cuesunenubien: —Cuesuniaid pambid penu qeshun, ¿mitsishunquiēmbi nacnempatsia? —quepondash Esusbēd icquido.

¹³ Adsho tantiasn Esus abēd icquid daēd chiec nadpondash: —Edusaden yacno nidquimbi dadan acte bēsho istuidash tsibananec aibdēdi nidta.

¹⁴ Aden aid tsibanec puduedash, ¿Ēbi tabadte quēnē mitsimbo iquec? ēbēd icquidobēdtan penu, quiosh chuiquid, quequin shubu icbo chuita. ¹⁵ Aden chiac buanshun dectatomesn abuc quēnē dapa mibi ismendac. Ambo pete sante cueste iquendac. Ashunquo penun nacnenta —quepondash Esus ambi daēd chuimiāid caic.

¹⁶ Aden chiac abēd icquid daēd Edusaden yacno nidquin Esusēn chiac padomboen bēquedshun tsibananash puduedshun penun nacnempondash.

¹⁷ Adnubien inchēshbudtsēqui aid daēdtsēqui yacno Esusbēd icquid utsibo chopondash. ¹⁸ Adec choash pec tabadnubien: —Abimbo chiēmbique. Tantiā. Ēbēdtan pequid abentsēcshun isadaidbo tsusiobo ēbi bedmendac —quepondash Esus.

¹⁹ Adsho tantiasn, Icsambo iquec, quequin tantiec: —¿Ēbida chienquo iquec? —quepondash abēd icquidtedi.

²⁰ Adoaquien: —Mibēd icquid nebi, quec mibitedi. Padnuen abentsēcshun ēbēdtambi pete cuēshēn ēnē punshun pequidēn ēbi chieshēnquido bedmendac.

²¹ Nuquin Papan chuimiācpadomboen aton madombo chidon tishac masesaid ēbi unēs uate anoentsēqui yanec. Ēbi bedmequid icsamboshē iquendac. Abi cuidte icsamboshē icnushe qeshun aidi tishenquicpatecnēdan —quepondash Esus.

²² Adashic pebededquin pete bedshun Nuquin Papa chiec onquetanquin pete cuēsh-cuēshun abēd icquido menebanquin: —Nēid pete cuēshē ēmbi piaid con dadabēd daēdacpadquiec Esus unēsash abi tantiaquid ēbi icnuc Esus ēbēdi iquec quequin tantiāta —capondash Esusēn.

²³ Adembidi dēshote bedshun uba caid actequid icnuc Nuquin Papa padpiden chuishun abēd icquido menebanac apcondash.

²⁴ —Nēid acquin Esused Nuquin Papan cuidac aton intac siebudpamboec unēsposh. Aton madoded cuidshun Nuquin Papan ēbi padenquo iquec quequin nēid acquin tantiāta. ²⁵ Uba caid ēnē nidaidēnshun padpiden aquenquicquimbi Nuquin Papan shubunshun actequid chuca mibēdtambi aquendambi —quepondash Esus abēd icquido caic.

²⁶ Aden chiasn Nuquin Papan naid chiec cuēdēnanec macuēsh Odibos caid yacno nidoapondash.

Esus tantiesa nebi quequin Petedon chuite chiaid
(Mat 26.30-35; Duc 22.31-34; Uan 13.36-38)

²⁷ Adshumbic Esusēn: —Esus tantiaquid nebi quesa mibitedi nendac. Nuquin Papan chiampidpadquid mibitedi nad iqueque. Chuinu. Tantiā, mibi.

“Abi tantiaquid bēyucanquin yuedquid unēs uaimbi. Adosho isash abēd icquido cuenec cuēshēd-cuēshēdendac,”

quequin Nuquin Papan chuipampid nec. ²⁸ Unës uac uincuenash Cadidia yacno ëbia nidoaindabi. Mibitsen ambo nidta –capondash Esusën abëd icquido chuiquin.

²⁹ Adoaquien: –Esus tantiaquid nebi quenquo utsitedi icnuc ëbien padenquo iquec –quepondash Petedo.

³⁰ Aden Peteden chuisho tantias: –Abimbo chiembique. Tantia. Nëid inchëshëmbi cachina bënë daëdec cuëdanabicnuc Esus tanties nebi, quequin mimbi tedesteden chiendac –quepondash Esus Petedo caic.

³¹ Adsho tantias: –Esus tantiaquid mibi icsho mibi aibbëdta unës uaimbi, cac, Esus tanties nebi, quenquo iquendabi –quepondash Petedo comapenec onquec. Adecbidi Esusbëd icquidtedi onquepondash.

Quetsemani caid yacno choash tabadaid chiaid
(*Mat 26.36-46; Duc 22.39-46*)

³² Adashic cuëte odibo caid dadpen icsho Quetsemani quequin cuënacno choash nidtuidash: –Nuquin Papa chuineuc udi nidebique. Nëmbobi tabad –quepac caondash Esus abëd icquido caic.

³³ Aden chianec Petedo, Acobo, Uan nëidted cho quianec bëyucanec nidec Esus, Matestedi icsaid cuidtequid ëmbi bedshunsho isun Nuquin Papan ëbi istiapimbo iquec, quequin tantiec unësquioshë yampondash. ³⁴ Adquio iquec: –Ëbibi unësquioshë yec udictsëc nidebi. Chieshtomane queshun nëmbobi tabadquin Nuquin Papa chuiban –quepac caondash Esus ambi nëid 3ted, Cho, caboed chiec. ³⁵ Aden chianec udictsëc nidash Nuquin Papa chuineuc nidaidën uebudash uec onquec: –¿Adabi adquid icmenquioctsia? Papa –quepac caondash Esus Nuquin Papa chie. ³⁶ Aden chuishumbic: –Papa, mimbi natiapimbo ictequid nibëdec. Adquid icquin matses cuidtequid bedshunquid con mado icmenquo iquembi queshun mimbi adoenquioctsiandac, Papa. Ëbi bunacpaden nainquiocquin mibi bunacpadomboen nata, Papa –capac caondash Esusën Nuquin Papa chuiquin.

³⁷ Aden chiash choquin abëd choboed 3ted icquid usho istuidec Petedo caic: –Simon, ¿ushecta ne? ¿Ëbibi chieshmane quiash yuecpactsëc iquec ushenquo yec tabadiapimboda icco? ³⁸ Chieshmane queshun Nuquin Papa chuita Nuquin Papan chiaid niacmenuequidën Satanas caidën chiaid tantiamane queshun. Chieshenquo iquebi quiash dacuëdash badedquio mibi chieshendac –quepac caondash Esus.

³⁹ Aden chiash ambi Nuquin Papa chuibocno nidoashun ambi chuibocpadembi Nuquin Papa Esusën chuiopac caondash. ⁴⁰ Adtanec choashumbic abëd choboedo adecbidi ushacsho istuidoapac caondash. Ushcasquiec tabadec, Ushenquioccobi, quequin chuitiapimbo yec otacquo tabadpac caondash.

⁴¹ Adnubien padpidec nidoashun Nuquin Papa chuiotanec choec: –¿Uimabudashta tiboquec ushec ne? Padi. Ushenquo yec isucun. Nuquin Papan madombo chidon tishac matsesaid ëbi icsho nëbimbobi ëbi chieshënquidon bedmeque. ⁴² Nidtoash ëbëdi nid. Ènden choaye. Is –quetuidpac caondash Esus abi bednuec choquido isec.

Esus bedshun buante chiaid
(*Mat 26.47-56; Duc 22.47-53; Uan 18.2-11*)

⁴³ Aden chuiniubien Esusbëd icboedquiobi Udasbëd matses dadpen chochpondash. Cho-choquid utsi-utsiec chështe sanampamboec chonobi utsi cüeste sanampamboec chopondash. Aideded Udasën chiac isadaidbo tsu-siobon chomiaido nepondash.

⁴⁴ Esus bednuequid tantiamenuen ambiabi Udasën: —Ëmbi tanchoccaid mimbi bedtequid nendac. Aidquiobi bedshun buanta. Cuenushe queshun bëdamboen ista —capac caondash. ⁴⁵ Aden chiashic aidobëdi choquimbi: —Icbo —quequin Udasën Esus tanchoccatuidpondash.

⁴⁶ Aden Udasën tanchocchaso isun Esus bedpondash. ⁴⁷ Adnubien anocquid abentsëcshun chështe sananquin isadaidbo tsusio dapan ancaidën pabiate auc abentsëc pateshunepondash.

⁴⁸ Adnubien: —¿Cuesanquid Esus nec, queshun utsin cuate sananubi utsibon chështe sananec ëbi bedecta cho-choec ne? ⁴⁹ Badiadquidën-badiadquidënquic Nuquin Papa tabadte shubu uashunaid umanuc daquënë uaidën tabadquin matses tantiamenuen chuibaniombi mibitedi tabadnubi. Ambo icshobi ¿atotsieshumbini mimbi bedenquiocpo? Nuquin Papan chiacpadomboen nëbi mimbi ëbi bedec, —quepondash Esus abi bedquido caic. ⁵⁰ Adec onquesho tantiashun cuenquin abëd icquidtedishun Esus niampondash.

⁵¹ Adec cuenubini nëbi caniquid yequi Esus tsibananeq nidpondac. Dashcute isad-isadquid dasiuidaneq nidquin Esus tsibampondambi. Aden tsibanshobi Esus chieshënquidon bedpondashi. ⁵² Aden bedac dasiuidte bëdaidquio nianec dadauidquio cuempondabi.

*Isadaidbo tsusiobo iccuededacno Esus buante chiaid
(Mat 26.57-68; Duc 22.54-55, 63-71; Uan 18.12-14, 19-24)*

⁵³ Adnubien, isadaidbo tsusio dapa, matses tantiec Nuquin Papa chiec onquequido yacno Esus buampondash. Aden buaneq puduednu quiacnombobi isadaidbo tsusiobo utsibo iccuededec tabadpondash. ⁵⁴ Aden Esus buanubi tsyuec choquin Petedo cuemboedën tsibananeq isadaidbo tsusio dapan shubu umanuc daquënë uaidën puduedpondash. Adec puduedash Esus cuenushe quequin isquido tabadacno ambotsen cuëte cuëc tsadpondash Petedo. ⁵⁵ Adec Petedo tsadnubien Esus unës uate bunquin Esus icsambocquid nec quequin chuiquid ¿Ada icpec? quequin nibënquin adquid tsusiobon istuidabicpondash. ⁵⁶ Abimbo chiacimboen dadpeshun chuibededpondash. Aden chuiquin abentsëcshun chiacpadomboen chienquiocquin utsin chuoapondash.

⁵⁷ Adnubien, Chuinu. Tantia, queshun Esusën chiacimboen utsi uain chuipondash utsibon. ⁵⁸ Aden chuinubien utsi onquec: —Naden Esusën chuisho tantiombique. Tantia. Chuinu. “Nëid, Nuquin Papa tabadte shubu uashunaid chichanendambi. Aden chichanshumbic daëdec ushquin matsesën naidpenquio isadnuc ëmbibi naindambi,” quequin Esusën chuipondash —quepondash utsi. ⁵⁹ Aden abentsëcshun chuinubi utsin aden chienquiocquin chuipondash.

⁶⁰ Aden chuisho tantiash isadaidbo tsusio dapa nënantanquio nidtoash nidquin: —¿Mimbi chiacpadomboen chiecta nec? ¿Abimbo chuiquidta nëidtedi neque? Chui. Tiantianu —capondash isadaidbo tsusio dapan Esus chuiquin.

⁶¹ Adsho tantiash ëcbedenquio yec otacquio nidsho isash: —¿Nuquin Papan chomiaidquio, Quidistu caid, Bëdamboquidën madon nebi, quecta mibi ique? —queoapondash isadaidbo tsusio dapa Esus caic.

⁶² Adoaquien Esus: —Ai, aidi nebi. Nuquin Papan madombo matsesaid abuc nidoashic Nadatiamboquidën dayun abiucquio tsadash abu ushun ëbi chosho matsesën isendac —quepondash Esus.

⁶³ Adsho tantiash, Icsamboen chiec, quec abi daëd dasiuidaid bëntsecquid dached-dachedquiash: —¿Atotsieshun Esusën icsamboen naosh, quequin chuimenuen utsi nibëmpe nuqui? ⁶⁴ Nuquin Papa icsamboen Esusën chuisho

mimbi tantioc. ¿Midapaden mimbi chieque? Tantaranu. Chui –capondash isadaidbo tsusio dapan tsusio utsibo chuiquin.

Adoaquien: –Icsambo iqueque. Unës uametiad –quecuededpondash.

⁶⁵ Adsho tantiaashun Esus dacuishtuaquin utsibon tauapondash. Adotanquin dashcuten bëpucshun ambibi cuestanequi: –¿Tsuntsin mibi cuesposh? Comapenen tantiaquidquo mibi neque. Èbi chui. Tantaranu –capondash Esus chuiquin.

Adnubien cuenushe quequin Esus bedshun sondadon comapenen cuesbededpondash.

Esus ëmbi tantiacmaidquo nec quiaid

(Mat 26.69-75; Duc 22.56-62; Uan 18.15-18, 25-29)

⁶⁶ Adnubien Petedo umanuc daquënë uaidën tsadnubi isadaidbo tsusio dapan yua chido chopondash. ⁶⁷ Choshon Petedo cuëte cuëc tsadsho isun: –Nasaded caid yacnocquid Esusbëd icquid mibi nec –capondash.

⁶⁸ Adoaquien, Esusbëd icquid nebi, quetiapimbo yec Petedo: –¿Atotsi mibi quepe? Tantienuquo yec tsadebi –quepondash.

Adtanec puduedte shëcuë anoentsëqui niduidash tsadnuc cachina bënë cuëdpondash.

⁶⁹ Adec Petedo ambo tsadsho chido yuaidën istuidtanquin padpiden: –Esusbëd icquidquo nëid nec –quequin anocquido chuiopondash.

⁷⁰ Adoaquien: –¿Aidbëd icquidtabi nedi? –quepondash Petedo.

Adnubien yuecpectsëc yash: –Aidbëdi Cadidia yacnocquid mibi nec –quepondash ambobidi tabadquido.

⁷¹ Adoaquien: –Èmbi tantiacmaidquo nec quequin abimbo chiemi. Èmbi abimbo chienquo icsho ma ëbi chian anëdënquiacno Nuquin Papan nënepanuna –quepondash Petedo comapenen chiech.

⁷² Adnubien cachina padpidec cuëdpondash. Adsho tantiaashun, “Cachina daëdec cuëdabicnuc ëmbi tantiacmaidquo Esus nec, quequin mimbi chiendac tedestedec onquequin,” quequin Esusën chioshi quequin tantiec unësquo yanec shubianquidpondash Petedo.

15

Pidato yacno nidshun Esus meniaid

(Mat 27.1-2, 15-31; Duc 23.1-5, 13-25; Uan 18.28-19.16)

¹ Badiadnuc isadaidbo tsusiobo iccuededpondash. Nëidted icpondash: isadaidbo tsusio dapabo, tsusio utsibo, tsusedpabon nadomboen nata quequin chiaid tantiamequido. Adec iccuededash onqeshun Esus mëtaneshun buanshun isadaidpemo ancaquid Pidato caid monepondash. ² Aden meniac Pidato: –¿Isadaidbo ancaquidta mibi neque? Èbi chui. Tantaranu –capondash Pidaton Esus chuiquin.

Adoaquien: –Mimbibi aden chuiPAYOC –quepondash Esus.

³ Adnubien, Esus icsaded-icsadedosh, quequin chiech isadaidbo tsusiobo onquecuedednuc cuëdenquo yec Esus tsadpondash. ⁴ Adec tsadsho isun: –¿Èchedanenquo yec otacquioda tsade? Mibi icsaid dadpen nëidon chuibanec –Pidaton caqui ⁵ adquiechbidi Esus tsadpondash. Adec tsadsho isash ¿Mitsipadquidquo Esus nëpec? Utsimbien, Icsapenquiocquid nebi, quequin chuipec, Aden chienquo Esusën iquec, quequin ambibi tantiec Pidato tsadpondash.

⁶ Adashic, isadaidbon nidaidën capuquidded cuesunepampid tantiaid Pascuas caid ushë choaidën-choaidënquien, Quënë navedmiaid abentsëc nidmenu. ¿Mitsiquidimbi nidmepeque? Chui. Tantaranu, quequin isadaidbo

Pidaton chuided-chuidedpadenec. Adoquien ismequin, Nëid nidme, cac nidmedenepadenec. ⁷ Aden chuidenequin ambi quënën nauedmiaid Badabas cuëmédquid nepondash. Aidëmbi utsibobëdtan Domanobo bunenquiocquin cuesquin tauasho isun bedmeshun quënën nauedmepac caondash. ⁸ Adnubien Pidaton seta utsin quënën nauedmiaid abentsëc ambi nidmiondacaden nëbi adquid utsi nidmepatsiash icnui quequin tantiec Pidato yacno chopondash isadaidbo iccuededquido. Aden tantiec choash: —Quënën nauedmiaid abentsëcta mimbi nidmepatsia —quecuededpondash aido Pidato caic.

⁹ Adec onquesho tantias Esus nidmetiadquiocquin Pidaton: —Mibi ancaquid caid, Esus, nidmependambi iqueque. Isadaidbon, ëbi chui. Tantiyanu —capondash. ¹⁰ Esusbidi tsusio icpec matses quenushe quiash isadaidbo tsusiobo Esus unës uate bumpec quequin tantiaquin Pidaton aden chuipondash. ¹¹ Aden tantiec, ¿Adambi Esus nidme? quequin Pidaton chiac, Padi. Badabas nidmeta, quequin isadaidbo iccuededquin chuipondash aton tsusiobon chiacpadomboen. ¹² Aden chuibededaquien: —Badabas nidmequimbi mibi ancaquid caid Esus ¿atotsimbi napeque? Chui. Tantiyanu —capondash Pidaton.

¹³ Adoquien: —Cueste nitsinshun dectan —quec comapenec cuëdcuededpondash isadaidbo.

¹⁴ Adoquien: —¿Atotsi icsa uaosh? —quepondash Pidato.

Adoquien: —Cueste nitsinshun dectan —queoic comapenec cuëdcuededpondash.

¹⁵ Adsho tantias Esus ëmbi nidmesho isun, Pidato icsambocquid nec, quequin ëbi chuiquid dapa isadaidbo tsusiobon chuinushe queshun Badabas nidmepondash. Adshumbic: —Cueshcaten Esus comapenen cuesmebedeshun cuesten dectanun buanec nid —capondash Pidaton sondado chuiquid chuiquin.

Sondadon Esus mamëshumbedaid chiaid

¹⁶ Adoac Esus bedshun Pidaton shubu umanuc daquënë uaid yacno sondadon buampondash. Aden buanshumbien sondado utsibo 600ted icnuc chomepondash. ¹⁷ Choshon dashcute abichobicquid bëdaidquio bedshun ancanquid dasiuidacimboecnuc dasiuiunshun pinchuc-pinchucquid mauete uashun Esus matoncashun ¹⁸ ancanquid cuënacpaden cuënc: —Mibi isash bëdambo iquebi. Isadaidbo ancaquid dapa caid mibi neyoc —quequin Esus oncaic onquecuededpondash sondado. ¹⁹ Adoquimbi ancanquidën sanante cueste bëdaidquibimboecnuc sananquin sondadon abentsëcshun-abentsëcshunquien Esus macuestanquin dacuishtucabudniash Esusën taëno danëshën sebadash uepondash. ²⁰ Aden mamëshumbededquin mëyanshun dashcute bëdamboquid ambi dasiumboed dachicshun aton dashcutebi dasiuiunshun cuesten dectanuequin Esus buampondash.

Esus cuesten dectante chiaid

(Mat 27.32-44; Duc 23.26-43; Uan 19.17-27)

²¹ Aden abi dectante cueste Esusën buantiapimboecnoc nidquimbi abi datanquid cueste chiadtometanquin buamepondash sondadon. Abi datanquid Sidene caid yacnoquid nëbi Edusaden caid dëuequiacnoësh choquid nepondash. Adecandedo, Dupo chedon papa Simon cuëmédquid niondash. ²² Aden cueste Simonën buanubi macuësh Codocota caid yacno abitedi chopondash. Macuësh mapi canitebimboecsho Codocota quequin isadaidbon aton onqueten cuëmpondash. ²³ Ambo choshon uba sicaid

paëacsho paëmbocquid dauë cacushtanquin meniac aquenquiocpondash Esusën. ²⁴ Aden isuidsho isun cuesten dectampondash. Aden dectanshun aton dashcute bednu quequin sondadon abi cuëmëdquidtedi dada uabanshun tēchun sandoshon cadotanequin dada uatsaidēmpi puduemaiid isbanquin Esusën dashcute bedbampondash.

²⁵ Ushë dectatoec 9 yanuc Esus cuesten dectampondash. ²⁶ Esus dectanaid mapino dada uaid cueste podectanaid diadpondash. Isadaidbo ancaquid nec quequin dada uaid nepondash. Esusën naden chiosh quequin isadaidbo tsusiobon chiacpaden dada uaid nepondash. ²⁷ Cuesunetanquin ampequid daëd ēquë dectambudcuenshun nēnantanquio Esus dectampondash. ²⁸ “Dectanquin icsaquidbēdta dectanendac,” quequin Nuquin Papan chuimiampicpadembi napondash. ²⁹ Aden Esus dectanaid mapino abuc: “Isadaidbo ancaquid nec” quequin dada uaid podectanaid diadsho isash, Adquidshenda diadpec, quequin tantiaquin datanquin mamēnshumbededpondash. Adec cuenquin mamēnshunquin: —Nuquin Papa tabadte shubu uashunaid chicbanshun daēdec ushquin chuca uaimbi, quequin chiec mibi onquiondaque. ³⁰ Abimbo chuiquid yec unēstiapimbocquid nebi quianec mibibi budta —cabidanepondash.

³¹ Aden cuenquidēn chuinubi adembidi isadaidbo tsusio dapabotedi tsusedpabon nadomboen nata quequin chiaid tantiamequid chedo onquecuededec: —Utsi-utsien bēdamequimbi utsi unēsacsho uincuemboed yec mētoccaid abembi chiquidtiapimbocquid nec —quepondash isadaidbo tsusiobo Esus caic. ³² —Quidistu, Nuquin Papan chomiaid, isadaidbo ancaquid nebi queboed mibibi bud. Mibi budaid isash, Quidistu nec, quequin tantien-dambi —quepondash. Aden cuenquidēn mamēnshunubi abēdta dectanaidēn adembidi chuiopondash.

Esus unēs uate chiaid

(Mat 27.45-56; Duc 23.44-49; Uan 19.28-30)

³³ Adnubien ushë cuembocnoc 12 yanan inchēshquio icboedi ushë budec 3 yanuc uēshēmo yanoapondash. ³⁴ Ushë 3 yanuc: —Eloi, Eloi, ¿lama sabactani? —quequin aton papa chiec Esus compapenec cuēdpondash. Aton onqueten: Papa Édoen, ¿atotsieshumbini bidiadquin isenquio ique? quec adpondash Esus.

³⁵ Aden Nuquin Papa Esusën chuisho tantiaquido, Nuquin Papa cuēnec, quenquio yec: —Edias cuēneque. Tanta —quepondash.

³⁶ Aden tantianubi badedi titinqueshun sicaid mucambocquid nēcushtanquin puntanquin cueste dēdectanshun acmenuequin ēccuēscadonequi: —Chiata. Edias Esus bedec chonoshe caimbono —quepondash.

³⁷ Adnubien compapenec cuēdec Esus unēsbudpondash.

³⁸ Esus unēsbudnubi abi inchēshacimbocnubi Nuquin Papa tabadte shubu uashunaid quēnē uaid nuntan dectanaid dashcute bitsipambocquid tsincabudquin dectanac diadquid canchedbudcuempac caondash tembi daēdquio yec. ³⁹ Adec Esus cuēdbud-cuēdbudec unēso isash: —Abimbo chuiquid niosh. Nuquin Papan madombo nēid nec —quepondash sondado chuiquid uquē tsadbudec.

⁴⁰ Adnubien ancuenquio isec chidobo nēidtedi tabadpondash: Madia Mactada caid yacnocquid; Madia utsi, Acobo bushcuctsēcquidēn tita, aidi Osen tita nepondash. Utsibic Sadome nepondash. Aidon Esus ancuenquio diadsho isbededpondash. ⁴¹ Aidon Esus Cadidia caid yacno capusho isun abi nashumboedo nepondash. Aidobēdta isquido chido utsibo Edusaden yacno choshon Esus buansho isun tsibanquido icpondash.

*Esus chococate chiaid**(Mat 27.57-61; Duc 23.50-56; Uan 19.38-42)*

⁴² Adashic biednes ushë budtsambi: —Inchëshbudtsëqui seis icnuc chonoadtemaid ushë chonoshe Esus unësoshe chococatanu —quianec Esus tantiaquid utsi nidpondash. ⁴³ Aidi, Ose Adimateya caid yacnoshon tishaid Pidato yacno nidpondash. ⁴⁴ Adec nidshun: —Esusën dada bedshun chococatiadquio iquebique. ¿Ada buantan mibi quepe? —caquien, ¿Ëndenda unësaccosh? quequin tantiesa icquin sondado chuiquid Pidon chomeshun: —¿Ada Esus unësosh? —capondash.

⁴⁵ Adoac: —Ai —quesho tantishun: —Ai, bedshun buanta —capondash Pidon Ose chuiquin.

⁴⁶ Adoac nidshun unësaid dabidiate bedshun Esusën dada imbudshun dataneshun macuësh dapa cuënote shëcuë uaquin ambi nacnenaidën nauedshun cuënote dapan bêtashpondash. ⁴⁷ Aden Osen Esus chococasho Madia Mactada caid yacnocquidbëdtambi Madia, Ose utsin titan ispondash.

16*Esus uincuenta chiaid**(Mat 28.1-10; Duc 24.1-12; Uan 20.1-10)*

¹ Aden isashic sabado chonoadtemaid ushë inchëshbudtsëqui seis icnuc naimëdnubi Madia Mactada yacnocquid; Madia, Acobon tita; Sadome aidtedi nidshun aton na bedtequid menequin comapenec noadte dadpen bedpondash Esus danoshcanuequin. ² Bedsash badiadtsëcnubi dominco ushë caidën Esus chococacno nidanequi: ³ —¿Tsuntsin cuënote shëcnepeba? —quec onqueuedepac caondash.

⁴ Adec onquequin ancuenquio isquien cuënote ënden shëcniac. Cuënote dapa yuëmbocquid nepondash. ⁵ Aden isequi nidash chococaid shëcuën puduedquin isaquien dada nëbi caniaid dashcute ushumbocquid dasiuidash abiucquio tsadpondash. Aidi isash dacuëdcuededec tabadpac caondash chidobo.

⁶ Adec dacuëdec tabadsho isun: —Dacuëdenquio yec tabad. Esus cuesten dectanaid mimbi nibënaid tantiembi. Uincuenash nidac. Nëmbobi nanac ueuidoshe. Is. ⁷ Nadoshi: “Cadidia caid yacno ëbia nidebi. Ambo nidshun ëmbi chiapadomboen mimbi ëbi isendac, quiosh quequin nëmbo choacsho isun chuita,” Esusën caoshi. Nëbi ëmbi chiapaden Petedo Esusbëd icquidquio utsibobëdta chuituidec nid —quepondash nëbi caniquid chidobo chiec.

⁸ Aden chuisho tantish uëdëquequi chococaid shëcuënuësh puduenanec titinguec dacuëdec onquenquio yec nidanepac caondash chidobo.

*Esus abuc indote chiaid**(Mat 28.16-20; Duc 24.13-53; Uan 20.11-23)*

⁹ Adnubien abi nibëmboed uincuenashun Madia Matcada caid yacnocquidba Esusën ismetuidpondash. Ambi mayan icsa 7ted dapuduemiaid Madia Mactada yacnocquid nepondash. ¹⁰ Aden ismiac Esusbëd icboedo yacno nidash puduedshun aido shubisho Esusën abi ismiaid Madian chuituidpondash. ¹¹ Esus uincuenash capusho isombi, Madia quesho tantish, Aidquio mimbi isambo iquec, quec tantienquio yec tabadcuëdedpondash.

¹² Adashic tantienquio yec tabadboed dada daëd Edusaden yacnoësh podquëdën nidsho Esusën chinumpondash. Chinunanec aidobëd nidanec puduedshun ismebempac caondash Esusën. ¹³ Aden ismiac aid daëdi

auchbidi Edusaden yacno nidshun ambi isboed chuiopondash. Adembidi tantienquo icoapondash utsibon.

¹⁴ Adashic, abèd icquidquo 11ted pete sante cuesten tabadnubi Esus chopondash. Adec choshon: —Uincuenac quequin èbi isquidon chiaid tantienquo mimbi icpoc. Chobique. Is —capondash Esusën.

¹⁵ Adashic: —Nèbi nidaidtedi yacno nidaneta. Adec nidshun Nuquin Papan shubu abentsëquën tabadtequid iquec, quequin matsestedi mimbit-sen chuiban. ¹⁶ Aden chuisho tantiaquid, Èbi cuidenquiocquin Esused Nuquin Papan cuidpanèdash. Adoac èbi icsaid ènu, quequin ismenuequin acten mentomiaid abi yacno Nuquin Papan puduedmendac. Tantiesain Nuquin Papan cuidendac abi yacno puduedtiapimboconoc. ¹⁷ Abi tantiaquid utsi-utsien Nuquin Papan nadatiambocquin nabanquid icmendac. Adquid icmiaidèn èmbi nacpaden mayan icsa dapuduemendac. Adembidi, utsi onquiaid tantienquiochoedèmbi tantiaquin èbi chuibanendac. ¹⁸ Adecbidi, nis-inquo piaqui bidisquenquo iquendac. Adecbidi, unèsmenuequin acmiaqui unèsenquo iquendac. Adembidi, utsi unèstsensho mishac bèdanendac. Nuquin Papan nadatiambocquin namiaidènquo adobanendac —quepondash Esus.

¹⁹ Aden chuiquin ènacsho Esus abuc buanaqui Nuquin Papan dayun abiucquo Esus tsadtuidpondash. ²⁰ Ambo tsadquimbi nadatiambocquin namiac nidaidèn tabadquimbi abèd icquido nidaid utsi-utsiec yacno capuquin Nuquin Papan shubu abentsëquën tabadaid chuibenepondash nadatiambocquin nabanquimbi.

Èmbi abimbo chuiboedquo mimbi isec aidquo tantianeta. Padi. Aidedi dada uaombi.

DUCASËN DADA UAID

Mibi ismenuequin dada uaquid Ducas nebi.

¹ Utsin-utsinquien ambi naidbëdtabi Esuquidistu chuibanquin dada uaid dadpen iquec. ² Aidon Esuquidistun tauain naidbëdtabi ambi naid utsitedi isted-istedquin chuibanquin chiacpaden dada uaidtedi nec. ³ Esuquidistu chuibanquin dada uaid isbanquimbi Esuquidistu isnëdaidon chuibanaid tantiashun aidtedi mibi chuibanquin dada uaimbi, chuiquid dapa, Teyopido. ⁴ Abimbo iquec quequin ëmbi dada uaid ma tantiapanueshun mibi chuiquin dada uaimbique. Isec onqueta.

Uan, acten mentoanquid tishte chiaid

⁵ Nidaid Udeya caid yacno Edodes cuëmëdquid ancanquid icnubien Nuquin Papan namiaidquio Sacadias cuëmëdquid icpanëdash. Aidi, Abiasën tsyuecquid Adonën tsyuecquidbidi nepanëdash. Aidi, Nuquin Papa tabadte shubu uashunaid nuntanshun nashunquid icpanëdash. Aidën chido Adonën tsyuecquidbidi icpanëdash. ⁶ Aton bënëbëdi Nuquin Papan chiaid tantiaquin naquidquio icpanëdash. Adquid icsho Nuquin Papan bëdamboen isaidquio aid daëdi icpanëdash. ⁷ Edisabed bacuë tishesa icpanëdash. Adquid yequi aton bënëbëdi tsusio budpanëdash.

⁸ Adashic, Nuquin Papa tabadte shubu uashunaid nuntanshun nabanuec padpidemboec Sacadias puduedpanëdash. ⁹ Ambi noadte bëda tauite ushë chonoc Sacadias aid shubun puduedpanëdash. Ënden abipadquid utsi-bobëdtan abi cuëmëdquid-cuëmëdquidquien dada uashun dada uatempï tëchun sandoshon cadotaniac ambi dada uatsaidëmpi abia puduenacsho isacpadeç Sacadias puduedpanëdash. ¹⁰ Noadte bëda tauinuec utsi puduedtemaid quënë yacno puduedpanëdash. Ambo Sacadias puduedash icnubi Nuquin Papa tabadte shubu uashunaid puduedte quënë yacno utsibo dadpen Nuquin Papa chieç onquecuededpanëdash.

¹¹ Adnubien utsi puduedtemaid quënë yacno Sacadias icnubi ambobi Nuquin Icbon chomiaid, ambi uaid mayan bëda, chopanëdash. Noadte tauinun sanaid dayun abiucquio tabadpanëdash. ¹² Adec tabadsho isash dacuëdampambo iquec, quetanec Sacadias uëdëquiampanëdash. ¹³ Adsho isash Nuquin Papan uaid mayan bëda nadpanëdash: –Bacuë bunquin mimbi chian-chiamboed Nuquin Papan tantiaidquio neque. Dacuëndenda, Sacadias. Min chido Edisabedën min mado tishendac. Min mado tishacsho Uan cuënta. ¹⁴ Min chidon tishaid isash mibi bëdambo iquendac. Aidi mibi bëdambo icmequid iquendac. Aidën chuibanaid tantiash matses dadpen bëdambo iquendac. ¹⁵ Aidi Nuquin Papan bëdamboen isaidquio iquendac. Paëmboçquid min madon isuidendac. Abi tishaid ushën abëd icmenuequin Nuquin Papan aton Mayan meniaidquio min mado iquendac. ¹⁶ Nuquin Papan chiaid tantiaquidquio icquin aidën chiac isadaidbo dadpen Nuquin Papan chiaid niacquid icboedi, Con Icho Nuquin Papa nec, queoaindac. ¹⁷ Min mado Nuquin Icho bëyucanec choendac. Tsusedpa Ediasën chiampicpadquiequi dacuëdenquio icquin cuembo chuibanquidquio min mado iquendac. Aden chuibanquid Nuquin Icho bëyucanec choendac. Tsusedpabon tishmiaidën tsyuecquid dadpen tantiesabo icboedi min madon chiac tsusedpabopadquid tantiaquidquio nëbi tabadquido iquendac. Aido Nuquin Papan chiaid

niacboedi min madon chiac Nuquin Papan chiaid naquidquo iguendac. Nuquin Icbon matses aido icmenuen min madon chuibanendac — quepanëdash Nuquin Papan uaid mayan bëda.

¹⁸ Aden Nuquin Papan uaid mayan bëdan chiaquien Sacadiasën: — ¿Mitsipadentsimbi mimbi chuiboed tantiape? Con chidobëdi tsusio budpobi —capanëdash.

¹⁹ Adoaquien: —Ëbibi, Cabaded nebi. Nuquin Papan abëd tabadquin namiaidquo nebi. Nuquin Papan ambi chiacpadomboen mibi chuimenuen chomiaid nebique. ²⁰ Tantia. Chuinu. Min chidon bacuë tishendac, quequin Nuquin Papan chiaid ëmbi chuiboed tantienquo icsho mibi eme uaindac. Min chidon bacuë tishan padpidec mibi onquianoaindac —quepanëdash Nuquin Papan uaid mayan bëda Sacadias caic.

²¹ Adnubien noadte bëda tauite quëñënuësh Sacadias baded pduenenquiocsho isash, Baded pduenenquiocpec, quequin cainec tabadpanëdash utsibo. ²² Aden yuen caimbudnubien pduenesh onquenuequi buëd cuëdenquiocpanëdash Sacadias. Adsho isun: —Ushquin isachimboen isbenac —cabededpanëdash. Adnubien Sacadiasën iccuededquido nidmenuen mëdante uic-uiccapanëdash.

²³ Adashic, Nuquin Papa tabadte shubu uashunaid nuntanshun nashunte ushëted nainash aton shubuno Sacadias nidoapanëdash. ²⁴ Ambo choash yuec tabadnubien aton chidon bacuë usundopanëdash. Aden usundoash mëdante auc abentsëcted ushë nidmec aton shubu nuntan icpanëdash. ²⁵ Adec tabadec Nuquin Papan naid chiec nadec Edisabed onquepanëdash: —Bacuë usundoenquiocpec, cabededboedëmbi nëbi macho budshumbi ëmbi bacuë usundoacsho utsibon ëbi isec. Ëbi tantiaquin Nuquin Papan usundomiaid nebi —quepanëdash Edisabed.

Esus tishendac, quequin chiaid

²⁶ Adashic, Edisabedën bacuë usundoan ushë 6ted nidan nidaid Caidia caid yacno shubu dadpen icquid Nasaded caid yacno Nuquin Papan Cabaded chomeoapanëdash. ²⁷ Ambo aton chido bedabicquid, tsusedpa Dabidën tsyuecquid Ose cuëmëdquid icpanëdash. Aidi ambo tabadnubien uano aton chido Madia cuëmëdquid tsadacno Cabaded chopanëdash. ²⁸ Adec choshon: —Mibi tantiaquin Nuquin Papan bëdamboen icmiaidquo mibi nec. Nuquin Icho mibëdi tabadendac —capanëdash Cabadedën.

²⁹ Adoaquien Madia, ¿Atotsi quepeba? quequin otacquo tantiec tsadpanëdash. ³⁰ Adec tsadsho isun Cabadedën: —Dacuëdenda. Mibi bëdamboen tantiaquin Nuquin Papan naden nanu quequin chiaid nad iqueque. ³¹ Chuinu. Tantiata. Bacuë usundoshon min mado mimbi tishendac. Tishun, Embi tishaid Nuquin Papa yacno yuedanquidquo nec, quequin Esus cuënta. ³² Mimbi tishaid chuiquid dapa iguendac. Aden mimbi tishaid isec, Nadatiambocquidën madombo nec, quecuedependac utsibo. Tsusedpa Dabid chuiquid dapa Nuquin Papan icmiacpadomboembidi chuiquid dapa min Mado Esus icmeoaindac. Adoac Chuiquid Dapa Abentsëcquobi aid iguendac. ³³ Adec tsusedpa Acobon tsyuecquido ënenquiocquin chuiquid dapa min mado Esus iguendac —quepanëdash Cabaded Madia chiec.

³⁴ Adoaquien: —¿Mitsipadentsimbi bacuë usundoshon bacuë tishpe? Chudabicquid nebi —quepanëdash Madia.

³⁵ Adoaquien: —Nuquin Papan Mayan mibëdi tabadnuc mimbi tishendac. Aden Nadatiambocquin naidënquo Madia usundomiaid, icsa nibëdquid, Nuquin Papan madombobi nec, utsibon cabededendac. ³⁶ Min utsi Edisabed macho icquin bacuë usundoenquiocboedëmbi nëbi bacuë usundoac.

Usundoenquiocquid nec, cabededboedëmbi nëbi ushë 6ted nidan usundoac. ³⁷ Utsin natiapimbo yaid Nuquin Papan naidquio nec –quepanëdash Cabaded.

³⁸ Adoquien Madia: –Ai, con Icbon namiaidquio nebi. Ma mimbi chiacpadquio icpanuna –quepanëdash. Aden chiaquien Cabaded nidpanëdash.

Madia Edisabed isedec nidaid

³⁹ Adashic, aton na nacnenanec Madia tsusedpa Udan tsyuecquidon nidaid macuësh yacno badedi nidpanëdash. ⁴⁰ Adec nidashic Sacadias oncamenquio yaidën shubu yacno choec puduedshun Sacadiasën chido, Edisabed istuidash: –Mibi isnuec chobi –Madia quepanëdash. ⁴¹ Adsho Edisabedën tantianubi aton bacuë comapenec cuididiquiampanëdash. Adec aton bacuë cuididiquenubi Nuquin Papan Mayanën tantiamiac Edisabed ⁴² Madia chiec nadec comapenec onquepanëdash: –Nuquin Papan bëdamboshë icmiaidquio mibi nec. Mimbi usundoaid adembi bëdamboshë icmiaidquio nec. ⁴³ Nuquin Icbon tita mibi yec çatotsi quiash ëbi isnuec cho? ⁴⁴ Mibi isec chobi, mibi qesho ëmbi tantianubi, Cuishon, quiacbimboec con bacuë cuididiquianosh. ⁴⁵ Nuquin Icbon tantiacpadomboen chuisho tantiaquid mibi iquec mibi bëdambo icted-ictedendac –quepanëdash Edisabed Madia chiec.

Nuquin Papan naid chiec Madia cuëdënaid

⁴⁶ Adnubien Madia nadec onquec cuëdëmpañdash: “Nuquin Papan naid chuibanu. Tantia.

⁴⁷ Èbi usundomiaid Nuquin Papa yacno Yuedanquid nec, quequin tantiec bëdambo iquebi.

⁴⁸⁻⁴⁹ Èbi ambi namiaid icsho bëdamboen isquin Nuquin Papan naosh. Adoacsho, Nuquin Papan bëdamboshë icmiaid Madia nec, quequin abitedishunquio tantiabededendac.

Adembi aton tsyuecquidon tantiabededoac. Nuquin Papa icsaisa iquec. Icsatiapimbo iquec.

⁵⁰ Ambi chiaid tantiaquin naquid icsho, Mimbi naid icsa cuidnu, quenquiocquin abëdi shubu abentsëquën tabadacbimboecnuc adquid tabadmendac.

Adenuidi tantiaquin nampidquio abi iquec.

⁵¹ Nadatiambocquin naded-nadedquidquio Nuquin Papa nec.

Èmbibi tantiacpadomboen naimbi, quequid icsho isun Nuquin Papan cacumiac uano tabadendac.

⁵² Ancanquid dapa icboedi utsin namiaidquio adquid iquendac.

Utsin namiaid icboedi chuiquid Nuquin Papan icmendac.

⁵³ Ambi chiaid tantiec bëdamboec tabadte comapenec bunquiacpaden naquidquio Nuquin Papan icmendac.

Con na ëmbi bedaiduidi tantiec bëdamboec tabadebi quequid unësacsho cacumiac uano tabadendac.

⁵⁴ Chuiquid Dapa Abentsëcquiobi chidon usundoendac, quequin ambi tsusedpabo chuimiampicpadomboen Nuquin Papan ëbi usundomiac.

⁵⁵ Tsusedpa Abadauambëdta aton tsyuecquidtedi ambi tantiampicpadomboen Nuquin Papan ëbi usundomiac.

Mimbi usundoaid ëbi yacno yuedanquid nec, quequin Nuquin Papan ambi tantiampicpadembi ëbi isec,”

quec comapenec cuëdëdash Madia ënëdpanëdash. ⁵⁶ Adec ënëdash Edisabedbëd ushë daëd nidmec tabadashic ushë utsi nidbudtsëcnubi aton shubuno nidoapanëdash.

Uan tishaid

⁵⁷ Adnubien Edisabedën bacuë tishte ushë chonoc dada bacuë tishpanëdash. ⁵⁸ Bacuë tishenquiochoedëmbi nëbi aton bacuë tishosh, qesho tantiash aton matses ado shubu utsinquidotedi Edisabedbëd bëdambo icpanëdash.

⁵⁹ Adashic, 8tedec ushtanquin Edisabedën madon shui dëbid dëteshunu qesho tantiash utsibo cho-chopanëdash. Choash puduedash bacuëmpi aton papa cuëmëdquid cuënu quenubi ⁶⁰ Edisabed: —Padenquio. Abi cuëmëdquid Uan nec —quepanëdash.

⁶¹ Adoaquien utsibo: —Min matses utsi Uan cuëmëdquid nibëdec —qeshun

⁶² Sacadias ismenuequin mëdante uic-uiccaquin: —Abi cuëmëdquid chui. Tiantianu —capanëdash utsibon.

⁶³ Adoaquien dada uate bedshun, Abi cuëmëdquid Uan nec, quequin dada uaquin Sacadiasën ismepanëdash.

Adoaquien: —¿Abimboda mimbi cape? —quecuededpanëdash utsibo.

⁶⁴ Adnubien Nuquin Papan oncameoac Nuquin Papan naid Sacadiasën chuibanpanëdash. ⁶⁵ Aden chuibancho tantiash: —Dacuëdampambo iquec. ¿Atotsiepashun onquenquiochoedëmbi nëbi onquequin Nuquin Papan naid chuibanpec? —quecuededpanëdash utsibo.

Aden tantianec aton shubuno nidaneshun ambi isboedbëdtabi ambi tantiaboed utsibon chuipanëdash. ⁶⁶ Adoac: —¿Mitsipadquidquio aton mado nepec? —quecuededpanëdash Sacadiasën mado Nuquin Papan tantiami-aidquio isbededec.

Sacadias oncamiaid

⁶⁷ Adnubien Uanën papa Sacadias Nuquin Papan Mayanën oncamiac nadec Esus chiech onquepanëdash:

⁶⁸ “Nuquin Papa isadaidbon Icho nec, quequin chuibanuna. Aidën isadaidbo icsaquid icsho cuidnushe quiash abided cuidadquid chomiac mayan icsan yuaid icboedi aidën mënchictequidquio isadaidbo iquendac.

⁶⁹ Abi mënchicquid nadatiamboquid nendac. Tsusedpa Dabidën tsyuecquidquio aid nendac.

⁷⁰ Ambi chuimiaidon chiampicpadembi Nuquin Papan adquidquio icmianac.

⁷¹⁻⁷³ Nuquin tsusedpa Abadauan tantiaquin Nuquin Papan ambi chiampicpadembi nuquin tsusedpabo aton tsyuecquidbëdtabi abi chieshënquido nidtiapimbo yacnombo abi yacno yuedanquid Nuquin Icho Abentsëcquiobi nec.

⁷⁴ Abi cudasquin mënchicaid yec dacuëdenquio yec Nuquin Papan namiaidombo iquendac.

⁷⁵ Adquid yec icsaisa abipadquio bëdamboec tabadquid icsho nuqui aidën isendac ënenquioquin.”

Adec Esus chiech onquiashic nadec aton mado chiech Sacadias onqueoapanëdash:

⁷⁶ “Adnubien nëbi Nuquin Papan chomiaid chuibanquidquio mibi nec, quequin utsibon mibi cuënenadac, mado. Nuquin Icho choec, quequin utsibon tantiabicnuc bëyuc tantiashun abi chuiquidquio mibi iquendac.

⁷⁷ Adquid icquin mibi icsaquid icsho cuidnushe quiash abided cuidadquid tantiasho isash Nuquin Papa mibi icsaid tantienquio yec bëpiscudendac,

quequin chuibanquid mibi iquendac, mado.

⁷⁸ Nuquin Papan matses tantiaquin naquidquio icquin abipadquidquio icsaisa abi yacnoshon chomiaidquio iquendac.

⁷⁹ Aidën tantiamiac unēsash abi iquendac.

Adquid shubu abentsëquën tabadacpadec tabadendac, quequin mimbi chiendac, mado.”

quec Uanën papa Sacadias Nuquin Papan Mayanën oncamiac onquepanēdash.

Matses nibēdacno Uan tabadcueniaid

⁸⁰ Adashic, Sacadiasën bacuë Uan caniacsho Nuquin Papan tantiamiaid yequi matses nibēdacno tabadcueneapanēdash ambi Esus chuibante ušhë choabicnuc.

2

Esus tishaid

(Mat 1.18-25)

¹ Adnubien, Doma yacno tabadquid, isadaidbo ancaquid dapambo, empedadod caid, Aucusto cuēmēdquid icpanēdash. Aucuston, ¿Ĕmbi ancaido isadaidbo aton nabēda tedtsi iqueque? Isquin tantiaata, quequin Sidenio cuēmēdquid chuipanēdash. ² Sidenio nidaid Sidia caid yacnocquido chuiquid, cobednadod caid icpanēdash.

³ Min tsusedpa tishampid yacnoshon mibi cuēmēdquid mitsanabēdtabi dada uanuec nidtan, cac abēd icquido buanec isadaidbo nidaneapanēdash.

⁴ Adec utsibo nidnubien Ose aton chido Madiabēdi nidaid Cadidia caid shubu dadpen icquid Nasaded caid yacnoēsh puduanec nidequi aton tsusedpa Dabid caid tishampidnombobi nidaid Udeya caid yacno shubu dadpen icquid Beden caid yacno chopanēdash. ⁵ Aton chido Madia bacuë nua usunquidbēdi Ose abi cuēmēdquid aton nabēdtabi dada uanuec Beden yacno chopanēdash. ⁶ Ambo choquin aton bacuë nuambo usumpanēdash. ⁷ Ambo matses dadpen cho-choash shubu abitedi puduedash tsucus-tsucustsēcquio tabadnuc nidaidën capuquid tabadacno puduedshun ambi bëyuc usundoaid Madian tishpanēdash. Tishun dashcute cuësh-cuëshun dapucshun nidaidën capuquidën pete sanaid cuesten ambi bëyuc tishaid dada bacuë Madian nampanēdash.

Obeca pemebanquin buanquido Nuquin Papan uaidon chiaid

⁸ Aden Beden yacnoshon Esus tishnubien shubu nibēdacno obeca dadpen pemebanquin buanquido inchëshbudtsëqui choec tabadtuidpanēdash.

⁹ Inchëshbudtsëqui choash tabadnubien inchëshnuc Nuquin Papan chomiac ambi uaid mayan bēda abuc chopanēdash. Aid uëshëmbo chēnquenec obeca pemebanquin buanquido dacuēdcuededpanēdash. ¹⁰ Dacuēdsho isash: — Chiaid bēda chuinuec chobique. Dacuēdenquiocquin tantiaata. Chuinu. Ĕmbi chuitequid bēda mibi, Cuishon, quetequid nendac. ¹¹ Nēbimbobi tsusedpa Dabid tishampid yacnoshon Beden caid yacnoshon mibi Nuquin Papa yacno yuedquid, Quidistu, Nuquin Papan Chomiaid tishosh. ¹² Abi tishacno nidshun naden mimbi aidi ispec. Dashcute cuësh-cuëshun dapucaid nidaidën capuquidën pete santen uesho mimbi istuidendac. Bacuēmpi adquieac uesho istuidash, Nuquin Papan chomiaid Quidistu nec, mibi quependac. ¹³ Aden chiec Nuquin Papan uaid mayan bēda onquenubien abēdi abipadquid utsi dadpen choash Nuquin Papan naid chiec nadec cuēdëncuededpanēdash:

¹⁴ “Nuquin Papa abucquio tabadquid abitedi uaquidquio bēdamboshë iquec.

Nuquin Papan bédamboen isaïdo ma abëdi tabadpanuna,”
 quec cuëdëmpañëdash. ¹⁵ Adec cuëdëñash Nuquin Papan uaido mayan bédabo
 abuc nidoapanëdash. Adec nidan obeca pemebanquin buanquido Nuquin
 Icbon chiaïd nanuec: —Nuquin Papan nuqi tantiameboed bacuëmpi is-
 nuec Beda yacno nidnu. Nid —quianec nidpañëdash. ¹⁶ Adec nidshun
 nidaidën capuquidën pete santen bacuë nanacsho istuidpañëdash. ¹⁷ Isanec
 nidquimbi ambi isboedbëdta ambi tantiaboed chiac ¹⁸ tantiaquidtedi: —
 ¿Midapadquidien capec? —quecuededpañëdash. ¹⁹ Aden obeca pemebanquin
 buanquidon chiaïd tantiash bëpiscudenquio yec Esusën tita, Madia, ¿Mitsi-
 padquid con bacuë nepec? quequin bëpiscudenquiocquin tantiadenepañëdash.

²⁰ Adnubien Nuquin Papan chiaïd chuïbocpadquiocsho isash obeca yacno
 choash obeca pemebanquin buanquido: —Ëmbi isboed ëmbi tantiaboed
 Nuquin Papan naidquio nec —quequin chiec onquecuededpañëdash.

Nuquin Papa tabadte shubu uashunaid yacno Esus buanaid

²¹ Adnubien 7tedec ushtanquin aton madon shui dëbid dëtemiacsho isun,
 Nuquin Papan uaid mayan bédan chiacpadomboen cuëñaid Esus nec, que-
 quin Madián aton mado cuëmpañëdash.

²² Adshumbic, bacuë tishun aid bacuën shui dëbid dëtemeshun ushë
 abentsëc nidan utsi chotsëcnuc Moises Nuquin Papan dada uamiacpaden
 nanuen Madiabëdñan Osen Esus Edusaden yacno buampañëdash. Edusaden
 yacno choash Nuquin Papa tabadte shubu uashunaid yacno choshon, Con
 bacuë Nuquin Papan namiaïdquio nec, quequin ismepañëdash. ²³ Nuquin
 Papan naden nata quequin chiaïd nad iquec: Bëyuc tishaid dada bacuë
 ëmbi namiaïdquio con na nec. ²⁴ Mimbi bëyuc tishaid bedte bunquin ëbi
 tabadte shubu uashunaid yacno mimbi buanaid min mado cuidtequidoain
 dëbin daëd cuesunemeta. Dëbin nibëdnuc masën bédambocquid daëd cue-
 sunemeta. Aden nanuec Edusaden yacno choash aton mado niantiapimbo
 yec Madiabëd Ose Nuquin Papan chiacpadomboen nanuec aton madobëdi
 puduedpañëdash.

²⁵ Adnubien Edusaden yacombo tabadquid Simeyon cuëmëdquid Nuquin
 Papan naden nata quequin chiaïd tantiaquin naquidquio icpañëdash. Aidi
 isadaïdbo chuïquid dapa abentsëcquiobi cainquidquio icpañëdash. Aidi
 Nuquin Papan aton Mayan meniaïdquio icpañëdash. ²⁶ Aidi Nuquin Pa-
 pan Mayanën tantiamiac, Chuïquid Dapa Abentsëcquiobi Nuquin Papan
 bédamboen isaïdquio choacsho unësabiqquin isendambi, quequin tantia-
 panëdash. ²⁷ Adembidi Nuquin Papan Mayanën nidmiac Nuquin Papa
 tabadte shubu uashunaid yacno nidequi Simeyon puduedpañëdash. Ambo
 puduedash capunubi Nuquin Papan naden nata quequin chiaïdquio
 nanuen aton bënëbëdtambi Madián Esus bëpañëdash. ²⁸ Esus bësho isun
 Simeyonën Esus bedshun icucquïn Nuquin Papan naid naden chuïbam-
 panëdash:

²⁹⁻³⁰ “Abitedishun Icho icquin mimbi ëndenquio chiampid nëbi nëid isembi.
 Nëid isash unësmene quenquio yec, Cuishon, quec unësebi, Papa.

³¹ Mibi yacno yuedanquid nëbi isembi.

Nëid mimbi chomiaïd icsho ma abitedishunquio ispanuna.

³² Nëidëmbi mimbi tantiacpaden chuïbanquin
 isadaïdbo bédambo icmendac,”
 quepañëdash Simeyon.

³³ Aden chuibanubi, ¿Midapadquidquien con mado capec? quequin Madian aton bënëbëdtambi tantiapanëdash. ³⁴ Esus chuibanquin naimbudshun Osebëdta Madia chiec Simeyon: —Bëdambo icmiaid mibi daëdi nec —quepanëdash. Aden chuishumbic Madiauidtsëqui naden Simeyonën chuioapanëdash: —Chuinu. Tantiata. Nëid bacuë tantiesa isadaidbo utsi-utsiec icsho Nuquin Papan uguë nësecaindac. Min mado tantiaquid utsi-utsiec icsho Nuquin Papan abi yacno puduedmiaid iquec bëdambo iquendac. Min bacuë, Esus, Nuquin Papa yacno puduedmianquid nec, qesho tantiashun matses dadpeshun icsamboen chuided-chuidedendac. ³⁵ Adsho ambi ompoquin naid icsabëdta ambi tantiaid icsa tantiamequid min mado iquendac. Adobanquin ismiac unës uasho isash mibibi unësquio yec, Con madon nati-ambo iquebi, mibi quendac —quepanëdash Simeyon Madia chiec.

³⁶ Aden Simeyonën chuinubi Nuquin Papan naden nanu quequin chiaid chuiquid chido Ana cuëmëquid icpanëdash. Aidën papa Panued icpanëdash. Aidën tsusedpa Ashed icpampic. Aid aton bënënen bedac abëdi seta 7ted matamiash tabadnubi ³⁷ aton bënë unëspanëdash. Aton bënë unësan Nuquin Papa tabadte shubu uashunaid yacno nidshun Anan tabadec nidenquioquin Nuquin Papauidi tantiaquin buna mëmumbudnequin Nuquin Papa chuidenapanëdash. ³⁸ Ambo icnubi Esus bësho isun Anan Nuquin Papan naden nanu quequin chiampicpaden chuipanëdash: —Isadaidbo icsaquid icsho cuidnu caid mënchictequid nëid nec —quepanëdash Ana Esus chiec utsibon tantianubi.

³⁹ Adashic, Nuquin Papan naden nata quequin chiacpaden nainash Osëbëd Madia nidaid Cadidia caid yacno nidoash Nasaded caid yacno abi tabadacno choapanëdash. ⁴⁰ Ambo tabadnubi aton bacuë Esus dada bëdambo yec canicuempañëdash. Aidi comapenen tantiaquidquio Nuquin Papan bëdamboen isaïdquio icpanëdash.

Canicuenash Nuquin Papa tabadte shubu uashunaidën Esus tabadaid

⁴¹ Adashic, Ëmbi bëyuc tishaid unës uamenushe qeshun intaquën aton shubu shëcuë ëcnoshcacsho isun aidon bëyuc tishaid unësmenquioquin Nuquin Papan uaid mayan bëdan matampampid tantiate ushë yanuc Madia Osëbëd Edusaden yacno nidoapanëdash. Nuquin Papan chiacpadequi setan-setanquiec nidtenapanëdash. ⁴² Adecbidi, Esus abi tishaid seta 12ted yanash canicuenash anibëd Edusaden yacno nidpanëdash. ⁴³ Adec ambo nidashic nami uabicquid petequid tantiaid ushëtedi tantiec tabadtenapanëdash. ⁴⁴ Adec ambo tabadquin nainash Esus ambobi icnubi tantienquio yec Madia Osëbëd auëshquio nidoapanëdash. Adec nidash inchëshbudtsëqui abëd choboedo yacno capuquin Esus nibëmbenapanëdash. ⁴⁵ Aden nibënquin istuidabi yec Edusaden yacno padpidec nidoapanëdash. ⁴⁶ Daëdec ushquin nibëshun Nuquin Papa tabadte shubu uashunaid yacno puduedshun Esus tsadsho istuidpanëdash. Ambo tsadec Nuquin Papan chiaid tantiamequin chuibanquidbëd onqueuedesho istuidpanëdash. ⁴⁷ Adec onquec tsadsho isquin, Bëdamboen tantiaquin chuibanquidquio nëid nec, quequin utsibon tantiabededpanëdash. ⁴⁸ Adnubien, ¿Mitsipadquid con mado nepec? quequin otacquio Madian tantiapanëdash. Aden tantiequi: —¿Atotsi quiash ëbi daëdi tantienquio yec nëmbo choash mibi tabade, mado? Unësquioquin papabëdtambi mibi nibëmbeniombi —capanëdash anin.

⁴⁹ Adoquien Esus: —¿Atotsieshun ëbi nibëno? Con Pa shubu uashunaidën tabadnuec chobosh nebi. ¿Tantienquioda mimbi icpe? ⁵⁰ Aden Esusën chuisho anibëdtan Osen tantienquioapanëdash.

⁵¹ Adashien: —Nidnu. Nid, mado —anin cac cacuidenquoio yec Nasaded yacno anibëdi choash tabadquin Madian chiaidbëdta Osen chiaid tantiaquin Esusën nadenepanëdash. Adëc tabadnubi aton titan ambi isboedbëdta ambi tantienquoio yaid bëpiscudenquiocquin tantiadepanëdash.

⁵² Adnubien comapenen tantiec bëdamboec canidopanëdash. Adquid icsho Esus Nuquin Papan bëdamboen isacpadomboen adomboembidi matsesën isbededpanëdash.

3

Esus choec, quequin Uan mentoanquidën chiaid (Mat 3.1-12; Mad 1.1-8; Uan 1.19-28)

¹ Adashic, seta 15ted matamec Tibedio Sesad cuëmëdquid, Doma yacno tabadequi abitedi ancaquid dapa, empedadod caid icpanëdash. Aidi Doma yacnocquido ancaquid dapa icnubien Ponsio Pidato cuëmëdquid, nidaid Udeya caid yacnocquido ancaquid, cobednadod caid icpanëdash. Aid daëd ancanquid icnubien Edodes cuëmëdquid, nidaid Cadidia caid yacnocquido ancaquid, cobednadod caidbidi icpanëdash. Ancanquid aitedi icnubien Edodesën utsi, Uedipe cuëmëdquid nidaid Itudeya caid yacnocquidobëdi nidaid Tëdaconite caid yacnocquido ancaquid, cobednadod caidbidi icpanëdash. Ancanquid aitedi icnubien Disanias cuëmëdquid nidaid Abidinia caid yacnocquido ancanquid cobednadod caid icpanëdash. ² Ancanquid aitedi icnubien Anasbëdi Caipas isadaidbo tsusio dapabo icpanëdash. Aid daëdi isadaidbo tsusio icnubien Uan, Sacadiasën mado matses nibëdacnombo tabadshobi Nuquin Papan, Ëmbi chiaid chuibanta, capanëdash. ³ Adoac acte Odan caid cuëmano capuquimbi naden chuibampanëdash. Mimbi tantiaid icsa ënta. Aden ënsho isun mimbi icsambocquin naboed tantienquoio yacnimboen Nuquin Papan mibi bëdamboen isendac. Ëmbi tantiaid icsa nainquiocquin ënu, mibi qesho tantiashun mibi acten mentono, quequin cho-choquid cho-choquidquien Uanën chuidednepanëdash.

⁴ Ëndenquimbo Nuquin Papan tantiamiac Isayasën Uan chuiquin dada uampicpadequi Uan icpanëdash. Naden Isayasën Uan chuiquin dada uampicp:

“Matses nibëdacnombo tabadquidën ëcauanshun naden chiendac:
Nuquin Icbombo choeque. Aid tantianu, quequin mimbi tantiaid icsa ëmbanta.

⁵ Umbo ancuenquoio chosho isnu quequin cuembocnoc andëdshun ambescabanachimboen abimbo chuiquidënuquoio chiaid tantianu, quequin mimbi tantiaid icsa ëmbanta.

⁶ Aden ënshun Nuquin Papa yacno puduedmianquid chuiquid dapa abentsëcquiobi cuembocnoc mimbi tantiabënëdash,”
quequin Isayasën Uan tishabicnuc chuiquid dada uapampid nec.

⁷ Aden ënden chiampicpadequi Esus bëyucanequin acten mentomenuec cho-choquid dadpen icsho Uanën nadopanëdash: —Nisin bacuë anipadquid nec. Aid bimboecquid icsambocquid mibi neyoc. Mibi adquid icsho isun ¿tsuntsin Nuquin Papan cuidnushe qeshun ambi mënchictequid icta, quequin mibi chiosh? ¿Aidën chiaid tantiashta acten mentomenuec cho?

⁸ Mentomete bunquin mimbi tantiaid icsa ënshun bëdamboec tabadquin utsibo ismebanta. Nuquin tsusedpa Abadauan Nuquin Papan bëdamboen isaidquoio icpampic. Ambi tishmiaidën tishmiaid caidaid ëbi icsho Nuquin Papan bëdamboen isaidquoio nebi, quequin tantienda. Abadauampadquid ambi chiaid tantiaid bunquin, Matses icta, Nuquin Papan cac cuënotebi matses iquendac —quepanëdash Uan. ⁹ Adequi onquebudec: —Cuëte icsatedi matenu, quequin cuëte bacuësa dëdshun mateshun icbon nëdëncaquin

tauiec. Adquiecbidi tantiaid icsambocquid cuëshëdmenu, qeshun bëdamboec tabadaid ismesa cuëshëdmeshun chian anëdënquequid Nuquin Papan nënendac –quepanëdash Uan.

¹⁰ Adoquien: –Chian anëdënquequid Nuquin Papan nësiate ictiapimbocquin çatotsimbi napeba? –quepanëdash iccuededquido.

¹¹ Adoquien: –Mibi dasiuidaid daëd icsho dashcute nibëdquid isun mitsana abentsëc meneta. Adembidi pete nibëdquid icsho isun meneta –capanëdash Uanën.

¹² Adecbidi ancanquid dapan matses utsin na bedtequid nëitded bedta caidotsen acten mentomenuc cho-chopanëdash. Choshon Uanën chuibansho tantiash: –Chian anëdënquequid nësiate ictiapimbocquin çatotsimbi napeba? –quepanëdash.

¹³ Adoquien: –Ancanquid dapan chiac tedtsëqui bedta. Muaquin mitsana daëd uanuequin bedenda –capanëdash Uanën aido chuiquin.

¹⁴ Adashic, adecbidi sondado cho-choash: –çAtotsimbi napeba? –quepanëdash Uan caic.

Adoquien: –Mitsana bedtequid bunquin icsamboen bedenda. Utsin naid tantiashun mua uaqin chienda. Mibi chuiquidën, Nëitdedi menenu, cac, Utsi bec cho, quenda –capanëdash Uanën sondado chuiquin.

¹⁵ Aden Uanën chuibansho tantiash: –çTsutsi nepec? çNuquin Papan chomiaidta nepec? –quecuedepanëdash cho-choquido.

¹⁶ Adsho tantiash: –Mibi acten mentoquidquio nebi. Padnuen ëbipadquidpenquio nadatiambocquid choendac. Aidi bëdamboshëcquid nendac. Adquid icnuc ëbi icsaquid icsho çatotsieshun aid choec quequin chuiquidquio Nuquin Papan icmioshi? Aid choshon aton Mayan abi tantiaquidombo aidëmbi menendac. Aden meni ac Esus tantiaquidombo ambi tantiaid icsa ënte bunquidquio icmendac aton Mayanën. Adoac ënsho isun pauquendac –quepanëdash Uan. ¹⁷ Aden chuibanec nadpanëdash: –Piacbo ëshë uashun bitsi secatanquin nëdëncashun ëshë icbon dayun uacpadomboen abi tanties a cuëshëdmeshun chian anëdënquequid nësiashun abi tantiaquidtedi abi yacno puduedmendac aidën. ¹⁸ Aden Nuquin Papan chiaid dadpen chuibanquin: –Adomboen tantiaquin nabanta –capanëdash Uanën.

¹⁹ Adshumbic, ancanquid Edodesën tantiaid icsatsen Uanën chuibampanëdash: –Min utsin chido, mimbi bedaid, mimbi tantiaid icsa neque. Mimbi tantiaid icsa ënta –capanëdash. Aden chuiboshombic adomboembidi padpiden abibidi Edodesën tantiaid utsibotsen chuiopanëdash. ²⁰ Aden ambi tantiaid icsa chuibansho tantiashun Edodesën Uan bedmeshun quënën nauedmepanëdash abitedishun tantianushe qeshun.

Esus acten mentoaid

(Mat 3.13-17; Mad 1.9-11)

²¹ Quënën nauedabicquin matses dadpen acten mentobampanëdash Uanën. Utsiboba mentoshombic Esustsen mentopanëdash. Adoquien mentoacnoëshquiobi Esus Nuquin Papa chiec onquepanëdash. Adec onquenubien abu shëcuë nibëdboedi shëcnianec ²² dëbimbimboec cuemo budac Nuquin Papan Mayan Esusen mapino tsadtoec budpanëdash. Aid budnubien abucuësh Esus chiec nadeç aton Papa onquepanëdash: –Mibentsëquiobi icsho ëmbi tantiaidquio mibi nec, mado. Adëmbidi ëmbi bëdamboen isaïdquio mibi nec –quepanëdash aton Papa.

Esuquidistun tsusedpabo chiaidtedi

(Mat 1.1-17)

²³ Adashic, abi tishaid seta 30ted icquimbi Nuquin Papan chiacpaden naquin tauapanëdash Esusën. Aden tauaquin chuibansho tantiasn aton matses nadpanëdash. Osen mado nec, quiasn, Nuquin Papan mado nec, quenquoio yec matses onquepanëdash. Esusën papapenquoio Ose icnëdash. Madia aton tita icbo icnuc Esusën tsusedpabo nëidtedi iquec: aton buchido Edi cuëmëdquid icpanëdash. ²⁴ Aidën papabic Matac cuëmëdquid, aidën papabic Debi cuëmëdquid, aidën papabic Ana cuëmëdquid, aidën papabic Ose cuëmëdquid, ²⁵ aidën papabic Matatias cuëmëdquid, aidën papabic Amos cuëmëdquid, aidën papabic Naun cuëmëdquid, aidën papabic Esdi cuëmëdquid, aidën papabic Nacai cuëmëdquid, ²⁶ aidën papabic Mac cuëmëdquid, aidën papabic Matatias cuëmëdquid, aidën papabic Semei cuëmëdquid, aidën papabic Ose cuëmëdquid, aidën papabic Uda cuëmëdquid, ²⁷ aidën papabic Uana cuëmëdquid, aidën papabic Desa cuëmëdquid, aidën papabic Sodobabed cuëmëdquid, aidën papabic Sadatied cuëmëdquid, aidën papabic Nedi cuëmëdquid, ²⁸ aidën papabic Medqui cuëmëdquid, aidën papabic Adi cuëmëdquid, aidën papabic Cosan cuëmëdquid, aidën papabic Edmodan cuëmëdquid, aidën papabic Ed cuëmëdquid, ²⁹ aidën papabic Osue cuëmëdquid, aidën papabic Ediesed cuëmëdquid, aidën papabic Odin cuëmëdquid, aidën papabic Matac cuëmëdquid, ³⁰ aidën papabic Debi cuëmëdquid, aidën papabic Simeyon cuëmëdquid, aidën papabic Uda cuëmëdquid, aidën papabic Ose cuëmëdquid, aidën papabic Onan cuëmëdquid, aidën papabic Ediaquin cuëmëdquid, ³¹ aidën papabic Medeya cuëmëdquid, aidën papabic Menan cuëmëdquid, aidën papabic Matata cuëmëdquid, aidën papabic Natan cuëmëdquid, ³² aidën papabic Dabid cuëmëdquid, aidën papabic Isai cuëmëdquid, aidën papabic Obed cuëmëdquid, aidën papabic Bos cuëmëdquid, aidën papabic Sadomon cuëmëdquid, aidën papabic Nason cuëmëdquid, ³³ aidën papabic Aminidad cuëmëdquid, aidën papabic Adan cuëmëdquid, aidën papabic Eston cuëmëdquid, aidën papabic Pades cuëmëdquid, aidën papabic Uda cuëmëdquid, ³⁴ aidën papabic Acobo cuëmëdquid, aidën papabic Isac cuëmëdquid, aidën papabic Abadauan cuëmëdquid, aidën papabic Tade cuëmëdquid, aidën papabic Nacod cuëmëdquid, ³⁵ aidën papabic Seduc cuëmëdquid, aidën papabic Dacau cuëmëdquid, aidën papabic Pedec cuëmëdquid, aidën papabic Ebed cuëmëdquid, aidën papabic Sada cuëmëdquid, ³⁶ aidën papabic Cainan cuëmëdquid, aidën papabic Adpashad cuëmëdquid, aidën papabic Sen cuëmëdquid, aidën papabic Noe cuëmëdquid, aidën papabic Damec cuëmëdquid, ³⁷ aidën papabic Matusaden cuëmëdquid, aidën papabic Enoc cuëmëdquid, aidën papabic Aded cuëmëdquid, aidën papabic Macadaded cuëmëdquid, aidën papabic Cainan cuëmëdquid, ³⁸ aidën papabic Enos cuëmëdquid, aidën papabic Sed cuëmëdquid, aidën papa abia uampid Adan cuëmëdquid, aidën papambo Nuquin Papa abia yanampidquoio nec. Abi tabadec. Aidtedi Esusën tsusedpabo nec.

4

Satanas Esus icsamete bunaid (Mat 4.1-11; Mad 1.12-13)

¹ Adshumbic, Matses nebi, quequin Nuquin Papan chiacpaden nanuen acten mentomepanëdash Esusën. Aden Uanën acten mentoquien Nuquin Papan Mayanën chiacpadec acte Odan caid yacnoësh puduanec matses nibëdacnombo nidash tsadpanëdash. ² Ushë utsi nidash utsi choaid abuc-totsëcquiecnuc ambobi tsadpanëdash. Aidtedi ushqin penquoio yash Esus bundopanëdash.

³ Bundoacsho isash Nuquin Papa chieshënuqid choash Satanas nadpanëdash: —Nuquin Papan madombo icquin penun cuënotebi pete icta cata —capanëdash Satanasën Esus chuiquin.

⁴ Adoaquien: —Padi: “Peteuidi pec bëdamboec tabadtemaid nec,” quequin dada uapampic —quepanëdash Esus Satanas caic.

⁵ Adoshombic, macuësh dapa abucquio yacno Esus buanshun Satanasën badedquio nidaidtedi ismebampanëdash. ⁶ Ismiash: —Nidaidën icquidtedishun icho icmiaidquio nebi. Abitedi con na nec. Èmbi menenu cac aidtedi mitsana iquendac. Nidaidën tabadquidtedi chuiquid dapa mibi icmete bunebi. Adquid mibi icnuc mibi buntequid nibëdendac. ⁷ Nidaidën tabadquidtedi chuiquid dapa icnu quequin, Con icho mibi nec, èbi casho adquid mibi icmëmbi —quepanëdash Satanas Esus caic.

⁸ Adoaquien: —Padi. Nuquin Papan chiaid dada uapampid nad iquec: “Nuquin Papa abentsëcquiobi mimbi tantiaiduidtsëqui min ichombo neque. Aidën namiaidquio icta” —quepanëdash Esus Satanas caic.

⁹ Adoshombic Edusaden yacno Esus buanshun Satanasën Nuquin Papa tabadte shubu uashunaid macano abucquio tsadumpanëdash. Aden tsadunshun: —Mibi Nuquin Papan madombo yec nëuëshquio dacuëdenquio yec pudunta. ¹⁰ Naden dada uapampid iqueque. Tantia. Chuinu.

“Mibi pudunsho isun, Tscatequën bëdamboen budmeta, quequin Nuquin Papan ambi uaido mayan bëdabo chiendac.

¹¹ Aidombi min taën tsasimbocquid tincanushe qeshun uidën uaquin mibi bëdamboen budmendac.”

Aden min Papan chiaid icnuc dacuëdenquio yec pudunta —capanëdash Satanasën Esus chuiquin.

¹² Adoaquien: —Chuinu. Tantiata: “Nuquin Icbon ambi chiacpadembida natsiashe, Isnu, quequin tanenda,” quequin Nuquin Papan chiaid chiampid utsi iquec —quepanëdash Esus Satanas caic.

¹³ Aden chiaquien Satanasën Esus icsamboen namenuen tanquin naimbudpanëdash. Aden naimbudequi, Padpidemboen èmbi chiaid namenuequin Esus tanun nanuna, quequin ambibi tantianec Esus nianec Satanas nidpanëdash.

Nasaded yacnocquido Esus bunesabo

(Mat 4.12-17; 13.53-58; Mad 1.14-15; 6.1-6)

¹⁴ Adashic, Nuquin Papan Mayanën tantiamiaidquio iquequi matses nibëdacnoësh Cadidia yacno Esus choapanëdash. Choacsho isun, Nuquin Papan Mayanën tantiamiaidquio nec, quequin abi isquidon chiac dëuequidon tantiapanëdash. ¹⁵ Adnubic, Nuquin Papan chiaid chuibante shubu utsin-utsinquec puduedcuenequin Nuquin Papan chiaid Esusën chuibampanëdash. Aden chuisho tantias, Nuquin Papan chiaid tantiaquidquio Esus nec, quec cuëdëncuededpanëdash.

¹⁶ Adashic, Nasaded yacno abi caninëdacno Esus nidoapanëdash. Ambo choash chonoadtemaid ushën Nuquin Papan chiaid chuibante shubu yacno nidash abi puduedteniacpadequi puduedash Nuquin Papan chiaid isec ongenush nidtopanëdash. ¹⁷ Nidtosho isun Nuquin Papan chiaid Isayas cuëmëdquidën dada uapampid anocquidën Esus menepanëdash. Aden aid meniac sananquin seccudoabanquin isbanec naded Esus onquepanëdash:

¹⁸ “Nuquin Icbon Mayanën namiaidquio nebi. Aidën Nuquin Papan chiaid tantiambo yaid chuibanta caid nebi.

Quënën nauedaido ambi tantiaid icsa èmenuen chuibanta caidquio nebi. Aidëmbidi Satanasën yuaid Nuquin Papan bacuë icmenuequin chuibanta caidquio nebi.

¹⁹ Aidën Nuquin Icbon bēdamboen iste chuibanta caidquio nebi.”

²⁰ Adec isec onquequin nainshun dada uaid bidicashun meniash tsadpanēdash Esus. Adec tsadsho shubu nuntan icquidtedishun bēisbededpanēdash. ²¹ Adoac: —Nuquin Papan chiaid mimbi tantiaboed nēimbobi tauadoec —quepanēdash Esus abibi chiaidei.

²² Adoaquien: —Bēdamboen chuipec. ¿Mitsipaden tantiaid ambi chiaid nepeba? —quecuededpanēdash. Adec onqueboedobi: —¿Osen mado Esus nenquioda ictic? —queoapanēdash.

²³ Adoaquien: —Bēdamequid yequi abibi daicsambo yanash bēdamiadacsho isash, Bēdamequidquo nec, quequin matsesën tantiapec, quequin chuipampid nec. Ēmbi Capednaun yacnoshon nabambocpadomboen nēshuntsen nabansho isun, Nadatiambocquin nabanquid nec, quequin mibitedishun tantiapec. ²⁴ Abimbo chiembique. Tantiata —quiash Esus abi onquec: —Nuquin Papan ěmbi tantiamiacpaden chuibanta caidēn abi caniacnoshon chuibansho tantienquiocquid icpec. ²⁵ Ēndenquimboshē adomboembidi Nuquin Papan ěmbi tantiamiacpaden chuibanta caid Edias cuēmēdquidēn chuibansho tantiesa icpampic. Aidi icnubien isadaidbon bēnua chidobo dadpen icpampic. Aido adquid icnubien seta abentsēc chotsēcncuc matamec aton pete nibēdquiec yanubi isadaidbon bēnuabo bunec tabadpampic. ²⁶ Adec bunec tabadsho isun, Isadaidbon bēnua yacno nidta, quenquiocquin isadaidpembon bēnua yacno pemeneuc nidta cac Edias nidshun ambi chiacpadomboen isadaidpembon bēnuan nanuc aton pete uesadenquiocpampic. Aid chido shubu dadpen icquid Sadecta caid yacno tabadpampic. Sadecta shubu dadpen icquid Sidon caid anoentsēqui icpampic. ²⁷ Adashic, adecbidi isadaidbo abi daushumbo yacno mishac mishadenquio yacimbocquido dadpen icpampic. Adquido icnubien Nuquin Papan namiaidquio utsi Ediseyo icpampic. Aidēmbi isadaidbo daushumbocquido bēdamenquiocquin isadaidpembon abentsēc Naman cuēmēdquid Ediseyon bēdamepampic. Ēbi bēdamepec, quequin tantiec aton nidaid Sidia caid yacnoēsh choacsho Ediseyon Naman bēdamepampic —quepanēdash Esus.

²⁸ Aden Esusēn isadaidpembon nashumpampid chuisho tantiaish iccuededquido isadaidbo comapenec nēishpanēdash. Isadaidpembobēd isadaidbo ictiapimbo iquec, quec iccuededquido nēishpanēdash. ²⁹ Adec nēishash nidanc nuntanuēsh puduenanec shubu ěnēdacno nidshun acte dapa quiusudacnombo nebudnuequin Esus buampanēdash. ³⁰ Aden nidmiaquien matses dadpen icquid natsusash Esus nidpanēdash.

Mayan icsa dapuduedaid cuemete (Mad 1.21-28)

³¹ Adec abi caniacnoēsh Nasaded caid yacno nidtanashi nidaid Cadidia yacno nidequi Capednaun caid yacno Esus choapanēdash. Ambo choash chonoadtēmaid ushē icnuc Nuquin Papan chiaid chuibante shubun puduedshun Nuquin Papan chiaid chuibampanēdash. ³² Aden chuibansho tantiaish: —Ambia tantiaquidēn chiacpaden chuibanquidien Esus nechitec —quecuededpanēdash anocquido.

³³ Aden Esusēn chuibanubien Nuquin Papan chiaid chuibante shubu nuntan mayan icsa dapuduedaid icpanēdash. Aidi comapenec sidquetanec onquec: ³⁴ —¿Nasaded yacnoquid Esus caid atotsi quec mibi cho? ¿Ēbipadquidtedi naimbudmenuecta cho? Ēmbi isaid mibi nec. Nuquin Papan bēdamboen isaidquio, icsapenquiocquidquio mibi nec —mayan icsan caquien: ³⁵ —Otaquio tabad. Adec tabadec dapuduenta —Esusēn cac mayan

icsan abi dapuduedaid tacpanën nebudec icsa uainquoio yec dapuduempanëdash.

³⁶ Adosho isash tantiadempanbo iquequi: —¿Chuiquid dapan chuitequidta neque? Tantiabono. Nadatiambocquin chuibanac mayan icsabo dapuduenchiteguin nec —quepanëdash Capednaun yacnocquido. ³⁷ Aden tantiaquin Esusën mayan icsa dapuduemiosh, quequin isquidon chuiban-chuibanac Capednaun yacno dëuequidtedishuntsen tantiapanëdash.

Daicsambocquid dadpen Esusën bëdamiaid
(*Mat 8.14-17; Mad 1.29-34*)

³⁸ Mayan icsa dapuduemiashic Nuquin Papan chiaid chuibante shubu yacnoësh puduenanec Simonën shubu yacno Esus nidpanëdash. Ambo puduedacsho isun: —Simonën nachi chumboshë iqueque. ¿Ada aid bëdametsia? —caquien:

³⁹ Simonën nachi yacno choash dayunquoio nidtuidec: —Chumbocquid dauebudta —Esus quenubi badedquio daebudpanëdash. Adec daebudash nidtoshon codocashun Esusbëd icquido pemepanëdash Simonën nachin.

⁴⁰ Adshumbic, inchëshbudtsëqui daicsaid utsi-utsien bë-bëpanëdash. Aden bë-bësho isun damishquin Esusën bëdamepanëdash. ⁴¹ Adembidi mayan icsa utsi-utsien dapuduemepanëdash. Adoac, Nuquin Papan madombobi mibi nec, quec sidquesho tantiashun: —Nuquin Papan chomiaid nec, quequin ëbi chieci adec onquenda —Esusën cac mayan icsa ënëdpanëdash.

⁴² Adashic, badiadnuc matses nibëdacno Esus nidpanëdash. Esus nidacsho isun matses dadpenshun nibënquin istuidshun: —Nidenquoio yec ëbëdi tabadta —capanëdash istuidquidon.

⁴³ Adoaquien: —Shubu dadpen icquid utsi-utsiec yacno nidshun Nuquin Papa yacno tabadaid iquec, quequin anocquidotsen tantiamenuec nidendabi. Nuquin Papan chomiaid icquid chuibanun nabono —quepanëdash Esus abi nibënquin istuidquido chieci.

⁴⁴ Aden chiashic Nuquin Papan chiaid chuibante shubu utsin-utsingueic puduedcuenequin Nuquin Papa yacno tabadte iquec quequin chuibampanëdash. Nidaid Udeya caid yacno shubu dadpen icquid utsi-utsiec yacno choshon aden Esusën chuibampanëdash.

5

Abëd tabadmenuen chomiaid
(*Mat 4.18-22; Mad 1.16-20*)

¹ Adashic chian Quenesaded caid cuëmambi tabadquin Esusën Nuquin Papan chiaid chuibansho tantiec iccuededquido dadpen tabadpanëdash.

² Adnubien masi yacno aton cano daëd nëshun icbon aton nëshaidtedi pam-bampanëdash. ³ Adsho isanec nidash Simonën cano antsadtoshon, Udicsëc ëbi buan, Esusën cac Simonën udicsëc buampanëdash. Aden buanac chian cuëman iccuededec tabadshobi cano antsadquin Esusën chuibampanëdash.

⁴ Aden chuibanquin nainshun: —Shodombo yacno nuëcquid bednuequin nëshaid nënebanta, Simon —capanëdash Esusën.

⁵ Adoaquien: —Icbo, inchëshëmbi nuëcquid bednuen nëshaid nënebenuquin ëbitedishun bedamboccomb. Mimbi nëshaid nënetan cac nënetanembi —quepanëdash Simon.

⁶ Adash shodombo yacno nidshun nëshaid nënetanquin nuëcquid dadpenquioshë bedac nëshaid tësëdec taëpanëdash. ⁷ Adsho isun abëdta nuëcquid beduidboedo cuëquin, Cadoec cho, quequin ismiac aido cano utsin choshon cano cubu-cubutsëcquiocno nuëcquid sandoac cano daëd mentoadtsempanëdash.

⁸ Adoanec Esus yacno choequi danëshën sebudec shuebudash Simon Petedon: —Icbo, ëbëd iqenquio yec nidaneta. Icsambocquid nebique —capanëdash Esus chuiquin. ⁹ Abëd icquidobëdtan nuëcquid dadpen bedboed tantiadempambo iquëc, Esus nadatiambocquid nec, quequin tantiec onquepanëdash Petedo. ¹⁰ Acobo Uan chedo tantiadempambo yec tabadoapanëdash. Aid daëdi Sebedeyon mado icpanëdash.

Adec Petedo shuebudash onquesho tantiatanec Esus nadpanëdash: —Dacuëdenda. Mimbi nuëcquid penun acten bedbocpaden nëbi tauain ëbi tantiaguid icmenuen nidaidën capucuenequin abuc tabadaid mimbi chuibanachuibanendac —quepanëdash Esus Petedo caic. ¹¹ Aden chiaquien aton cano acte cuëman nëshanec aton natedi nianec, Esusën chiacpaden tantianuna, quianec abëdtan nuëcquid bedboedobëdtan Petedon Esus nidsho tsibanampanëdash.

*Daushumbocquid bëdamiaid
(Mat 8.1-4; Mad 1.40-45)*

¹² Adashic, shubu dadpen yacno Esus icnubien daushumbocquid nami mishac paëpenquiocquid chopanëdash. Aidi choash Esusën taëno shuebudec nadpanëdash: —Ëbi bëdamete bunquin ëbi mimbi bëdamepec —quepanëdash daushumbocquid.

¹³ Adsho tantiashun adquid daushumbocquid mishtemaid nec, quenquicquin damishec Esus: —Mibi bëdamete bunebique. Mibi bëdamenu —quenubi badedquio bëdampanëdash.

¹⁴ Aden bëdametanec Esus: —Ëmbi naid utsibo chienda. Adenquiocquin isadaidbo tsusiobo ismetanta ma bëdamiaid Nuquin Papan naid nec quequin ma aidon tantiapanu. Aido ismeshun Nuquin Papan ambi chiaid Moises dada uamiampicpadembi bëdambo icmiaid cuidtequidquio meneta —capanëdash Esusën ambi bëdameboed chuiquin.

¹⁵ Adnubien Esusën bëdamesho isquidon Esusën bëdamiaid chuibanac mases dadpen Esusën chiaid tantianuec cho-chopanëdash. Adecbidi, daicsambocquido bëdanuec cho-choacsho Esusën bëdamepanëdash. ¹⁶ Adashien mases nibëdacnombo nidash Nuquin Papa chiec onquepanëdash.

*Dada shëquëquenquiocquid bëdamiaid
(Mat 9.1-8; Mad 2.1-12)*

¹⁷ Adashic, ushë utsin Esusën chuibanuc padiseyobobëdi Nuquin Papan naden nata quequin chiaid tantiamequid dadpen tabadpanëdash. Utsi-utsiec nidaid Cadidia yacnoësh cho-chonobi utsi-utsiec nidaid Udeya caid yacnoësh cho-chonobi utsi-utsiec Edusaden caid shubu dadpenquioshë yacnoësh cho-chopanëdash. Adec aido cho-choash tabadnubien Nuquin Papan nadatiambocquid naquid icmiac mases bëdamenuc Esus icpanëdash.

¹⁸ Aid icnubien dada shëquëquenquiocquid aton din nandoshon aton ut-sibon bëpanëdash. Aden bëquin shubu nuntan nënantanquio Esus icnubi

¹⁹ mases tsucus-tsucustsëcquiocsho isash puduedtiapimbo yec macano pada-padapambo yacno dada shëquëquenquiocquid buanec decatashon macano chic-chicshun dada shëquëquenquiocquid abi bëquidon imbudpanëdash.

²⁰ Dada shëquëquenquiocquid ëmbi bëaid Esusën bëdamec, quequin tantiaguin bëquidon ambi bëaid imbudsho isash dada shëquëquenquiocquid caic: —Mimbi tantiaid icsa cuidenquio yec bëpiscudtequidquio mibi nendac —quepanëdash Esus.

²¹ Aden chuisho tantiash padiseyobobëd Nuquin Papan naden nata quequin chiaid tantiamequid: —¿Nuquin Papanuidi chuitequidquioda chuibamposh? ¿Tsutsi aden chuibanquid nepec? Nuquin Papauidi tantiaid icsa

cuidenquoio yec bēpiscudquidquoio nec —quepanēdash ambibi tantiacpadec onquec.

²² Aidon tantiaid tantiec Esus: —¿Atotsi quiash mimbibi icsamboen tantiec onquepe? ²³ ¿Mimbi tantiaid icsa cuidenquoio yec bēpiscudtequidquoio nendac ěmbi chiaidquoio bēdantequidpenda nedic? Adecbidi, ¿Mibi icsambochoedi mibi bēdanoque. Nidtoash nidta, quequin chiaid bēdantequidpenda nedic?

²⁴ Nuquin Papan chomiaid icquimbi mimbi tantiaid icsa cuidenquoio yec bēpiscudtequidquoio nendac ěmbi cac ad iquendac. Nuquin Papan chuimi-aidquoio nec mibitedi camenuen dada shēquēquenquiocquid naden chiemi-bique Tantia. Nidtoash nidquin min di buanec nid —capanēdash Esusën dada shēquēquenquiocquid chuiquin. ²⁵ Adoac nidtoshon aton di bedanec Nuquin Papan naboed chuibanequi aton shubuno nidpanēdash.

²⁶ Adsho isash tantiadempambo yec Nuquin Papan naid chiec onquecuedec tabadpanēdash: —Aden bēdamiaid isenquiochoeděmbi nēbimbobi aid isbempombi —quecuededpanēdash.

Debi, ěbi tsibanec cho, quequin Esusën chiaid
(*Mat 9.9-13; Mad 2.13-17*)

²⁷ Adashic, capucuenequin Debi cuēmēdquid Esusën istuidpanēdash. Debi nec queshumbi Mateyo cuēmpañdash. Ancanquid dapan utsibon na bedtequid bedshumbanta caid Debi icpanēdash. Ancanquiděn chiacpaden Debin utsibon na bedtequid bedbansho isun: —Ěmbi chiaid tantianush ěbi tsibanec cho —Esusën cac ²⁸ Debi nidtoanec aton natedi nianec Esus tsibananec nidpanēdash.

²⁹ Adshun aton shubuno Esus buanshun Debin pemepañdash. Ancanquiděn utsibon na bedtequid bedbanta caido abipadquido dadpembēdtabi Esus Debin pemepañdash. ³⁰ Aden adquidobēdtan Esusën pesho isash padiseyobo: —¿Atotsieshun mibi chuiquidbēdtan mibitedishun icsambocquidbēdtan pepeba? —quepanēdash Esusbēd icquido caic.

³¹ Aden chuisho tantiaish Esus nadpanēdash: —Ěbi bēdamec cho, quenquoio bēdambocquid iquec. Daicsambocquidien, Ěbi bēdamec cho, quendac.

³² Adecbidi, Nuquin Papan bēdamboen isaidquoio icsho, Mimbi tantiaid icsa ěnta, quequin chuinuec choenquoio iccondabi. Nuquin Papan icsamboen isaidquoio icsho, Mimbi tantiaid icsa ěnta, quequin chuinuec chondabi —quepanēdash Esus padiseyobo caic.

Buna mēmunaid
(*Mat 9.14-17; Mad 2.18-22*)

³³ Aden Esusën chuibansho tantiaishun naden padiseyobon Esus chuipanēdash: —Uambēd icquido buna mēmunc Nuquin Papa chiec onquedenec. Adquiecbidi ěbēd icquido buna mēmunc Nuquin Papa chiec onquedenec. Adenquoio mibēd icquido iquec. Aidon buna mēmunenquiocquid peshun sicaid actenec —quepanēdash padiseyobo Esus chiec.

³⁴ Adoaquien: —Aton chido bednun pambid meniac chidon codocacsho abi inquiděn abēd icquido menec. Aden meniac isuidesa abēd icquido nec. Adecbidi ěbi abi chuiquid icnuc ěbēd icquidon buna mēmunenquiocquid isuidenquoio iquec. ³⁵ Yucash chido inquid nibēdanan abēd icboedo uněsquiocquid buna mēmunquin isuidpec. Adecbidi ěbi nibēdanan ěbēd icboedo uněsquio yampec —quepanēdash Esus padiseyobo caic.

³⁶ Aden chuibanequi abi Esus onquec: —Dashcute chuca cuēshun dashcute shēnibēdta nacnenquin bētuscaisa matses nec. Cuēshquin dashcute chuca icsa uaic. Adecbidi shēni tuscaid bētēsēdec. ³⁷ Adembidi dadpen icquid chodo uashun sandoc. Adotanquimbic istuidshun chuca uain

chodo uashun sandoaic chodo shënin icsa sandoshon nequid bēenquiocquin. ³⁸ Adembidi, ěmbi ěnden tantiaiduidi tantianu, quequin Nuquin Papan nēbi chiaid pausudtequid bēda tantiauidquid yanec icsabudendac. Mibi adquid iquec, quequin tantiaquin utsi chiacimboen Esusēn padiseyobo chuipanēdash. ³⁹ Adashic ambi ěnden chiaid tantienquiochoedi nēbi Nuquin Papan chiaid utsi chuibanac tantiaquidquio iquendac –quepanēdash Esus.

6

Chonoadtemaid ushē tantiaquid

(Mat 12.1-8; Mad 2.23-28)

¹ Adashic, chonoadtemaid ushē icnuc Esusbēdtan abēd icquidon tied matanquin tiedēn caniquid ěshchicshun abēd icquidon bitsi tsucucashun pebededpanēdash. ² Aden pesho isquin padiseyobon: –ĵAtotsieshun chonoadtemaid ushēn chonoadpeque? Tantianu. Ĕbi chui –capanēdash Esusbēd icquido chuiquin.

³ Adoaquien: –ĵTsusedpa Dabid caidbēd icquidon piasquin pepampid tantimboda ique? ⁴ Naden chuipampid neque. Tantia. Abēd icquidobēd Nuquin Papa tabadte shubu uashunaid puduedtemaid quēnēn puduedshun Nuquin Papa tantiaquin pan meniac nanaid chuiquid dapan bedshun abēd icquido mēnebanshun aidobēdtambi pepampic. Aid pan Nuquin Papan namiaidēnuidtsēqui petequid nepampic –quequin padiseyobo chuishun Esusēn nadopanēdash: ⁵ –Ĕbia: Tiboquenu, quiaish tsadacpadec matses: Nēid chonoadtemaid ushē nec, quequin tantiec. Adnubini aid ushē icho yec tiedēn caniquid ěshchicshun bitsi tsucucasho isash: Mimbi icsamboen naic, quetiapimbo iquebi.

Mēuesadaid bēdamiaid

(Mat 12.9-14; Mad 3.1-6)

⁶ Adashic, chonoadtemaid ushē utsin Nuquin Papan chiaid chuibante shubun puduedshun Esusēn chuibanubien abiucquio mēuesadaid dada icpanēdash. ⁷ Ambobidi tabadquimbi Esus chieshēnquidon, Chonoadtemaid ushēn Esusēn bēdamenushe. Isnu, quequin padiseyobon caimbededpanēdash. ⁸ Aden cainubien abi chieshēnquidon tantiaid tantiaquin mēuesadaid isquin: –Nēnantanquio nidto –Esusēn cac mēuesadaid nēnantanquio nidtoash nidpanēdash.

⁹ Adsho isashien: –Tantianu. Chui. ĵChonoadtemaid ushēn matses tantiaquindambi bēdamboen nape? ĵAdoenquiocquindambi bēdametemaid ushē nēid neque? ĵMibi nēbi bēdametiapimbo iquebi, quequindambi chuipe? ĵAdoac daicsaid utsi-utsiec unēsperc? –quepanēdash Esus.

¹⁰ Aden chuishumbic iccuededquido isbanquin: –Ĕbi mēd –cac Esus mēdequi mēuesadaid bēdampanēdash.

¹¹ Adec mēuesadaid bēdansho isashien comapenec nēishash: –ĵMitsipadentsimbi Esus acpe? –quec onquecuededpanēdash abi chieshēnquido.

Esusēn, Ĕbi chuibeneta, caido

(Mat 10.1-4; Mad 3.13-19)

¹² Adashic, ushē utsin macuēsh yacno matses nibēdacno Nuquin Papa chiec onquenuec nidash inchēshēn ushenquido yec Nuquin Papa chiec Esus onquepanēdash. ¹³ Badiadshun abēd icquido dadpen chomeshun, Ĕbi chuibeneta, quequin 12tedictsēqui chuipanēdash. ¹⁴ Nēidic, Simon, Esusēn Petedo caid; utsibic, Andedes, Simonēn utsibi; utsibic, Acobo; utsibic, Usan; utsibic, Uedipe; utsibic, Badtodome; ¹⁵ utsibic, Debi cashumbic Mateyo caid;

utsibic, Tomas; utsibic, Acobo, Adpeon mado; utsibic Simon, ancanquid isadaidpembo bunesa; ¹⁶ utsibic, Udas, Acobon mado; utsibic, Udas Isca-diote, yuecshun Esus chieshënquido Esus bedmequid. Aidedi, Esusën, Èbi chuibeneta, caido icpanëdash.

Nuquin Papan bëdamboen isaïdo icnuc ambi icsamboen isaïdo
(Mat 4.23-25; 5.1-12)

¹⁷ Adashic macuësh yacnoësh abëd 12ted icquido pada-padambo yacno budash abi tsibanquido dadpen icsho isash Esus nidtuidpanëdash. Nëitded icpanëdash: Nëidic, Edusaden yacnoësh choquido; utsibic, Acte Dapa cuëman shubu dadpen icquid Tido caid yacnoësh choquido; utsibic, Sidon caid yacnoësh choquido. Aido Esusën chuibansho tantianuec cho-choash tabadnubi, Èbi bëdamepec, quequin tantiec utsibo choash tabadpanëdash. ¹⁸ Adec choquido mayan icsa dapuduedaid icsho isun Esusën dapuduemepanëdash. ¹⁹ Adsho isun nadatiambocquid Esus neque. Mishnu, qeshun mishequi bëdancuededpanëdash.

²⁰ Adshumbic abëd icquidombo isbanquin naden Esusën chuibampanëdash:

—Nëmbo mibi icnuc mitsana nibëdtenesho isun Nuquin Papan bëdamboen isaïdo iquec abuc nidan con natedi mitsana nendac.

²¹ “Nëuëshquio bundodenesho isun Nuquin Papan bëdamboen isaïdo yec abuc ëbëd tabadec bundoesa iquendac.

“Nëuëshquio matses Nuquin Papan chiaid tantiesa icsho isash unëshquio yec shubidednequid Nuquin Papan bëdamboen isaïd yec abuc nidash ëbëd tabadec bëdambo iquebi quependac adquido.

²² “Esus tantiaquid icsho chieshënquin pudued cainquio yaid adembidi mua uaquin chuishunaid Nuquin Papan bëdamboen isaïdquio nec.

²³ “Adomboembidi ëmbi ëndenquimbo chuimiaid aton matsesën icsamboen chuishundeniampic. Adomboembidi mibi min matsesën icsamboen chuishundenetsiash. Nidaïdënshun adoaid iquec Nuquin Papa yacno choacsho ambi bëdambo icmiaid mibi iquendac. Adquid iquendabi quequin tantiec mibi icsamboen chuishunaqui, Cuishon, queta.

²⁴ “Padnuen, con na dadpen iquec, quequin tantiec bëdamboec tabadebi, qesho Nuquin Papan icsamboen isaïdo mibi nec. Nidaïdënshun mimbi bedeniaiduidi tantiec Nuquin Papa yacno puduedtiapimbocquid mibi iquendac. Nidaïdën bëdamboec tabadquin ënden bedondaïdi mibi nec.

²⁵ “Nidaïdënshun abi bunaidtedi bedquido Nuquin Papan icsamboen isaïdo nec. Abi bunaiduidi tantiaquin Nuquin Papan chiaid tantianu qeshun tantiatipimbo iquendac.

“Mitsanauidi tantiec, Bëdambo iquebi, quec mamë nec tabadquido icsho Nuquin Papan icsamboen isaïdo mibi nec. Adquido Nuquin Papa yacno puduedte bunsho, Padi, cac shubiquiendac.

²⁶ “Bëdamboquid nec, quequin mibi dadpenshun chuisho tantienda. Adomboembidi mua uain Nuquin Papan ëndenquimbo chuimiaidpembon chuipampic. Aidon chiaid tantiaishun tsusedpabon Nuquin Papan chiaid tantienquio yanampic. Adquido Nuquin Papan icsamboen isaïdo nec — quepanëdash Esus.

Mibi uïmanënquido tantiaquin nabanta, quiaïd
(Mat 5.38-48; 7.12)

²⁷ Aden chiashic abi Esus onquec: —Èmbi chiaid tantiaquidquio nad iqueque. Chuinu. Tantiata. Mibi chieshënquido bëdamboen tantiaquin

nabanta. ²⁸ Adembidi mibi icsamboen chuiquid bēdamboen chuita. Adem-bidi, ēbi icsamboen naquido bēdamboen tantiaquin cuidenda, Papa, quequin Nuquin Papa chuita. ²⁹ Adembidi mibi cuesquid cuidenda. Adembidi mibi icsamboen nadenesho cuidenquiocquin adembi bēdamboen nabanta. Adembidi ampequin min dashcute bedanec nidsho isun, Chiata. Dadam-icquidtsen buan, cata. ³⁰ Utsibic, aton na nibēdquid, Bec cho, quesho meneta. Adembidi utsin mitsana ampesho isun cuidenquiocquin bēdamboen naoata. ³¹ Adembidi ēbi bēdamboen nashuntiadquidi nepec quequin mimbi tantiacpadomboen utsi tantiaquin nashunta.

³² “Ēbēd tantiananquiduidi tantianu, quec ŷbēdamboda mibi icpe? Paden-quoio. Adembidi Esus tantiesan abipadquiocquido tantiec. ³³ Adecbidi, Ēbi bēdamboen tantiaquin nashunquiduidi tantiaquin nashunoanu quec ŷbēdamboda mibi icpe? Padenquoio. Esus tantiesan adembidi nashun- quidquido nec. ³⁴ Adecbidi, Ēbi menequiduidi menenu, quec ŷbēdamboda mibi icpe? Padenquoio. Esus tantiesan adenuidi menec. ³⁵ Naden nata, quequin chuinu. Tanta. Mibi chieshēnquid icsho aid tantiaquin bēdamboen nabanta. Adembidi mibi meniantiapimbocquid, Bec cho, quesho, Yuecash cuidna- nunana, quenquiocquin meneta. Mimbi adoshō isun Nuquin Papan mibi bēdamboen isendac. Adobanec bēdambo iquebi quec mibi tabadendac. Adomboen nabanquido Nuquin Papan nacpadomboen nabanquid nendac. Adquido aton mado iquendac. ³⁶ Nuquin Papan abi chieshēnquido nashun- deniacpadomboen mibi chieshēnquido nashundeneta —quepanēdash Esus.

Icsambocquid nec, quequin chienda, quiaid
(Mat 7.1-5)

³⁷ Aden chuibanashic Esus abi onquec: —Ēmibi tantiacpadomboen naisa icsambocquid nec, quenda. Adesa abi yacno choacsho Bēdamboquid neque. Puduedme, Nuquin Papan caindac. Adecbidi, Icsambocquid iquec. Aid cuidtiadquidi Nuquin Papa nec, quenda. Adenquoio icsho Nuquin Papan cuidenquioctequid mibi iquendac. Mibi icsamboen tantiaquin utsin nasho isash cuidnanenquoio yec bēpiscudta. Adquid, Cuidnu, quenquoio yec mimbi icsamboen tantiaquin naid Nuquin Papa bēpiscudendac. ³⁸ Aton na nibēdquid bēdamboen tantiaquin meneta. Adembidi, mibi tantiaquin abi utsibēd bēdamboec tabadtequid Nuquin Papan mibi menendac. Utsi tantiaquin mimbi meniactpadomboen mibi tantiaquin bēdamboen tabadmetequid daēd uashun Nuquin Papan mibi meneoaindac —quepanēdash Esus.

³⁹ Aden chuishumbic utsin tantienquoio ictequid abēd icquido naden Esusēn chuipanēdash: —ŷPodquedēn nidnu quec bēshuaid utsi bēyucampecta nidtic? Nidnu, quianec nidec abi daēdi nidaid shēcuē ampaēdpatsiash.

⁴⁰ Adembidi tantianequidēn abi tantiamequid dēniactiapimbo iquec. Tanti- amiac abi tantiamequidpadquid iquendac —quepanēdash Esus.

⁴¹ Adoshombic adembi tantiamequin naden Esusēn chuipanēdash: — ŷAtotsi quiash utsi bētsiadaid pistsēcquid isequi mibi bētsiadaid dapa isadti- apimbo icpec? ŷMibibi bētsiadaid dapa bēbedadabicquin mitsipadentsi mimbi utsi bētsiadaid pistsēcquid bedshunuen ispe? ⁴² Adembidi, utsin tantiaid icsa abentsēc icnubien mimbi tantiaid icsa utsi-utsiec icnuc ŷatotsieshun, Mimbi tantiaid icsa ēnta, quequin utsi chuipe? Mimbi tantiaid icsa nibēdacimboen mimbi chuipeque. Adoenda. Mimbi tantiaid icsa ēnshun utsin tantiaid icsa icsho isun ēmenuequin chui —capanēdash Esusēn.

Cuēte abipadquid aton bacuē nec, quequin chiaid
(Mat 7.17-20; 12.34-35)

⁴³ Adoshombic, adembidi Esusën chuipanëdash: —Cuëte bëdan bacuë adquiobidi bacuëec. Cuëte icsan bacuë adquiobidi bacuëoac. ⁴⁴ Chetequid isun cuëte dada matsesën tantiec. Aden tantiec nisanquidën bacuë isash, Dadain bacuë nec, quenquo matses iquec. Adecbidi, echo bacuë isash, Bata nec, quenquo matses icoaic. ⁴⁵ Adembidi bëdamboen tantiaquidën ambi tantiacpadomboen utsi bëdamboen tantiaquin nabanendac. Adecbidi ambi tantiacpadec bëdamboec onquec. Adembidi icsamboen tantiaquidën ambi tantiacpadomboen utsi icsamboen tantiaquin nabanec. Adecbidi ambi tantiacpadec icsamboec onquec —quepanëdash Esus.

Tantiaquidquo icnuc tantiauidquid nec, quequin chiaid
(Mat 7.24-27)

⁴⁶ Adoshombic: —¿Atotsieshun, Con Icho mibi nec, qeshumbi ëmbi chi-acpadomboen naisa mibi ne? ⁴⁷ Èbi yacno choshon ëmbi chuibansho tantiaquish nidshun nadomboen naquidquo iqueque. Chuinu. Tantiata. ⁴⁸ Cunquequid dapan chimeshnushe qeshun shubu uaquidën shëcuë équëduc uëdëshcashun buintad nitsinquid. Adembidi, natiamianquiec came-tequid yanabicnuc tantesa uainquiocnuen ëbi tantiaquidquo icquin ëmbi chiaid papudedshun adomboembidi nabanquid nec. Adquidën tantesa uainquio iquendac. ⁴⁹ Utsibic nad iqueque. Tanti. Èquëduc uëdëshcabi nitsinaid cunquequid dapan chimeshunendac. Adecbidi, ëmbi chiaid papueduidtsacpadomboen nabanenquio yec natiamianquid chonoc abi papueduidtsaid bëpiscudendac. Adquid uquë nësecatequid nendac —quepanëdash Esus.

7

Sondado chuiquidën tantiaid
(Mat 8.5-13)

¹ Aden iccuededquido chuiquin nainash Capednaun caid yacno Esus nidoapanëdash. ² Capednaun caid yacno choash Esus tabadnubien isadaid-pembõn sondado chuiquidën yua abi cudasaid unëstiadsëcquio icpanëdash. ³ Aton yua unëstiadsëcquio icnubien, Nënquid bëdamequid Esus nëmbobi iquec, quequin utsibon chiac:

—Aidën con yua bëdametsiash —quianec isadaidbo tsusiobo yacno nidshun istuidash: —¿Con yua chiec Esus yacno ada mibi nidpatsia? —quepanëdash sondado chuiquid.

⁴⁻⁵ Adoquien: —Ai —quianec Esus yacno isadaidbo tsusiobo nidshun chui-tuidec: —Sondado chuiquidën chuitan caido nebi. Con yua unëstiadsëcquio iqueque. Esus bëdamequid neque. Chuitan, cac mibi chiec chobi. Sondado chuiquid bëdamocquid nec. Nuquin Papan chiaid chuibante shubu uamiondaidquio nioshe. Ambi chiacpadomboen aton yua bëdametiadquidi mibi nec —quepanëdash isadaidbo tsusiobo Esus caic.

Adoac aidobëdi Esus nidpanëdash. ⁶ Adec aidobëd Esus nidshobi sondado chuiquidën chomiaid utsibo choquin bëquedtuish nadpanëdash: —Sondado chuiquidën chomiaid nebi. Aidën chiaid chuinuec chopobi. Naden chuita, caposhi: “Padicnuna, Icho. Icsambocquid nebique. Mibi bëdamocquid iquec con shubun puduedenquioctiadquidi mibi nec. ⁷ Èbi icsambocquid iquec mibi bëquedec nidenquioccobi. Mibi bëdamequid yec con shubun pudueden-quioctin mibi yacnoshombi, Bëdanta, mimbi cac con yua bëdampec. ⁸ Èbien sondado chuiquid nec. Èmbi nidta cacpadquiequi sondado nidec. Adecbidi, Cho, ëmbi cacpadquiecbidi choaic. Adembidi, Nadota, cacpadomboembidi con yuan nabanec,” quequin chuitan sondado chuiquidën cabocpadembi mibi chuipombi —quepanëdash sondado chuiquidën chuitan caido Esus caic.

⁹ Adoquien: —¿Abimbobida cai? —qeshun ambi chiaid tantiamenuequin iccuededquido Esusën bëisbanquin nadopanëdash: —Chuinu. Tantiata. Sondado chuiquid isadaidpembo ëbi tantiaquidpadquid isadaidbo nibëdec —quepanëdash Esus. ¹⁰ Aden chiaquien sondado chuiquidën chuitan caido auchbidi nidoash shubun puduedshun sondado chuiquidën yua bëdamaid istuidpanëdash.

Nianten mado uincuen uaid

¹¹ Adashic, ushë utsin shubu dadpen icquid Nain caid yacno Esus nidpanëdash. Aidbëdi abëd icquido nidpanëdash. Adecbidi matses utsibo dadpen nidpanëdash. ¹² Adec nidequi Nain tsasi uaid quënë shëcuë anoentsëqui choquimbi unësaid bëquido bëquetuidpanëdash. Unësaid epa icnubi ani nianten icpanëdash. Niantebëd Nain yacnocquido dadpen cho-chopanëdash. ¹³ Adec cho-choec nianten shubisho isash Esus unësqüo yec: —Shubienquio yec ënëd —quepanëdash. ¹⁴ Adec, Ënëd, quietanec udictsëc nidshun unësaid nanaid Esusën mishnubi abi bëquido nidtuidpanëdash. Nidtuisho isun: —Abuido, uëtsëdtota —cac ¹⁵ uëtsëdtoash tsadec unësböed onquepanëdash. Adsho isash ani caic: —Në, unësböedi min mado uincuenoshe. Abëdi nidec nid —capanëdash Esusën.

¹⁶ Aden unësaid uincuemesho isash cho-choquido: —Adopenshenda uincuemec —qeshun Nuquin Papan naid chuibampanëdash. Aden chuibanec: —Nuquin Papan matses bëdamboen isnuen ambi chomiaidquio nuquibëd icmïosh —quec isquido onquecuededpanëdash.

¹⁷ Aden isash nidshun unësaid uincuemïaid isquidon chuibansho isadaidbon nidaid Udeya caid yacnocquidon tantiampanëdash. Adembidi chiac dëuequidontsen tantiapanëdash.

Ëbitedishun cainaid mibi nec, quequin Uanën chiaid (Mat 11.2-19)

¹⁸ Adnubien, acten mentoanondaid Uan cuëmëdquid quënëna nauedaid icsho abëd icquidon Esusën nabanaid chuibampanëdash. Adoquien abëd icquido daëd chomeshun Uanën nadopanëdash: ¹⁹ —Esus yacno nidshun nadota. ¿Ëbitedishun cainaid Nuquin Papan chomiaid abentsëcquiobi mibida ne? ¿Aidtabi nedi? mibi quenuc, ¿Adambi utsi caimpe? quequin chuita —Uanën cac aid daëdi Esus yacno nidpanëdash.

²⁰ Adec Esus yacno choash: —Acten mentoanondaidëmbi Uanën chomïaido nebi. Uan nadosh: “¿Ëbitedishun cainaid Nuquin Papan chomiaid abentsëcquiobi mibida ne? cac ¿Aidtabi nedi? mibi quenuc ¿Adambi utsi caimpe?” quïosh Uan —quepanëdash Uanën chomïaido Esus caic.

²¹ Aden chiaquien icsambocquid bëdamequinc, mayan icsa dapuduedaid dapuduequinc, bëshuaid bëdamequinc caquin Esusën ismëbampanëdash.

²² Aden nabanquin nainashic: —Mibi chuiquid Uan caid yacno nidshun ëmbi nabamboedtedi mimbi isboed naden chuitanta. Bëshun isbenosh. Adecbidi canite icsaidi capuanosh. Adecbidi daushumbocquidon nami bëdanosh. Adembidi pashun tantiamenosh. Adembidi unësaid uincuemïosh. Adembidi aton na nibëdquido tantiamenuen Nuquin Papan chiaid Esusën chuibansho, quequin Uan chuitanta. ²³ Ëmbi aden nabansho isun tantesa uainquiocquin Nuquin Papan bëdamboen isaidquio nendac, Esus quïosh quequin Uan chuitanta —quepanëdash Esus Uanën chomiaid daëd chiec.

²⁴ Adashic, Uanën chomiaido nidambi iccuededquido tantiamëbanuec Uan chiec Esus nadpanëdash: —¿Atotsi isnuec matses nibëdacno nidonda? ¿Cunquequidën ishacunaid isnuecta nidtionda? ²⁵ ¿Aid isnuec nidenquio yec atotsi isnuec nidonda? ¿Dashcute ushumbocquid dasiuidquid isnuecta

nidtionda? Padenquoio. Dashcute ushumbocquid dasiuidquido aton na dadpenquoio icquido ancanquid dapan shubun tabadquido nec. ²⁶ Ad icnuc, çatotsi isnuec matses nibêdacno nidonda? ¿Nuquin Papan ambi chiaid chuimi-aid isnuec nidenquioda ictionda? Ai, matses nibêdacno Nuquin Papan chuimi-aid isnuec mibi nidondac. Uanën ëbi chuiquidëmbi ispondashi. Èbi êndenquimbo chuiquido ëbi isesabo icpampic. ²⁷ Èbi cain naden Uan Nuquin Papan chuimiampid nec:

“Mibi choec quequin chuibanquidba chomembi.

Mibi choec quequin chuibanac ambi tantiaid icsa ênshun mibi cain- quidombo iquendac.”

Aden ëbi cain Uan chuiquin dada uapampid nec.

²⁸ “Adembi Uan chuihanu. Tantiata. Nuquin Papan chuimi-aid Uampadquid matsesën tishaid utsi nibêdec. Aidën ëbi chotequid chuibanac choshon ëmbi nabansho isenquoio icposh. Isash, Nêid Nuquin Papan chomi-aid nec, quetsemposh Uan. Aidi quênên nauedac ëmbi nabanaid istiapimbo yec tsadec, Nuquin Papan chomi-aid, ëbitedishun cainaid mibida ne, quepec –quepanêdash Esus.

²⁹ Aden Esusën chuibansho tantiaish: –Nuquin Papan naid bêdambo iquec –quepanêdash Uanën mentobanondaido. ³⁰ Utsiboen ambi tantiaid icsa ênenquoio icquin Uan Esusën chuisho tantiaish, Nuquin Papan naid bêdambo iquec, quetiapimbo aido icpanêdash. Aido padiseyobobêd matsesën naden nata quequin chiaid tantiaimequido icpanêdash.

³¹ Aden Uan chiash Esus: –¿Nuquin Papan chiaid nêbi chuisho tantiesa mitsipadquid nepeque? ³² Adquid chuinu. Tantia. Ambi tantiacpaden naisa icsho isash bacuëbo yachimboec nêishun mimbi icsamboen tantiec. Adembidi ambi tantiacpaden naisa icsho isun Nuquin Papan chiaid tantienquoio iquec. Adquidên Nuquin Papan chuimi-aidên nabansho icsamboen ispec. ³³ Nua cubudquin pesa Uan icsho isash, Mayan icsa dapuduedaid nec, queposh Uanën chuisho tantiesa. ³⁴ Èmbi peshun acsho isec, Nua peshun tantienquiocquin acquid nepec. Aidbidi icsambocquidobêd icquid nec, ëbi caposh. ³⁵ Aden tantienquiocquid, Bêdamboen tantianu, queshun bêdamboen tantiaquidênquoio chuibansho tantiaish abi tantiaimequidpadquid iquendac –quepanêdash Esus.

Chidon Esus tanoshcaid

³⁶ Adashic, Èbi yacno pec cho, padiseyobo abentsêcshun cac aibbêd nidash shubun puduedash pete santen cuêshnudash Esus uepanêdash. ³⁷ Adec Esus puduedash uesho isquidon chiac utsin, Icsambocquid nec, caid chido choquin noadte bêda danoshquete aton shubumpichobi bêpanêdash. ³⁸ Aden bêequi Esus yuedacno choash puduedshun abi bêdamequid Esus istuidash, Èbi bêdamequid bêdambo iquec, quequin ambibi tantiec shubiec Esusën taëno tsadbudshun aton bêmên tapascapanêdash. Aden tapascac taë chucusho isun aton manêdaidên taucshun taë tachocabanshun noadte bêdan chidon tanoshcapanêdash. Chidon aton na bedtequid dadpen menequin comapenec noadte bêda bedshun Esusën taë tanoshcapanêdash chidon.

³⁹ Chidon adosho isash Esus yuedquid, Simon caid, abibi onquec: “Èmbi yuedaid Nuquin Papan chuimi-aid iquec, Èbi mishquid icsambocquid nec,” quequin chido mishmenquoio icpec, quepanêdash Simon.

⁴⁰ Adoquien, tantiaquidquoio icquin Esusën: –Mibi tantiaimequin chuinu. Tantiata, Simon –capanêdash.

Adoquien: –Aden chuiban. Tantianu –quepanêdash Simon.

⁴¹ Aden tantiashun Esusën Simon ambi tantiaid icsa tantiamenuen utsi chuiquin nadopanëdash: —Bec cho. Yuechshun menenun nanuna, quepundash daëd. Abentsëcshun dadpen bedshunubi utsin daëdpactsëc bedshumpondash. ⁴² Aden bedshunshun yuecshun ambi bedshunacted abi daëdi meniantiapimbo icpondash. Adsho isun: “Padi. Mimbi bedondaid ëbi cuidenda,” quequin abi bedshunëdaidën abi daëdi chuipondash. Adoacsho, ¿Mitsiquid abi bedshunëdaid ënenquiocquin tantiec bëpiscudenquo icpec? —quepanëdash Esus Simon caic.

⁴³ Adoquien: —Ambi dadpen meneshun cuidenda caidien nechitec —quepanëdash Simon.

Aden chiaquien: —Ai, bëdamboen tantiaquin mimbi chioc —quiash ⁴⁴ Simon ismenuec Esus chido yacmi bidadshun naden chuiapanëdash: —Min shubun puduedacsho mimbi taë pante ëbi menenquioccoc. ¿Nëid chido isquindactio? Aidëmbien aton bëunën taë chucu uashun aton manëdaidën con taë bëchishaid ucposh. ⁴⁵ Min shubun ëbi puduedsho isun tanchoccanesa mibi nec. Padnueni ëbi puduedacsho isun nëid chidon ëbi tantiaquiquin yuen con taë tachoccaniosh. ⁴⁶ Bëchin manoshcanesa mibi iccoc. Padnueni nëid chidombi noadte bëdan tanoshcaniosh. ⁴⁷ Adembidi mibi chiembique. Tantiata. Mayan icsa dadpeshun tantiamiaid icsho nëid chido bëdamepombi. Aden bëdamiashic abi icsaid tantienquo yec bëpiscudpobi. Ëmbi aden nac ëbi comapenen tantiaquiquin ëbi nashunquidquo nëid chido nec. Padnuen utsi icsaid daëdpactsëc mibi icsaidtedtsëcbidi icpec. Adquid icsaid bëpiscudebi ëbi quenuc ëbi bëdiactsëc tantiatsec mibi nashumë nec —quepanëdash Esus Simon caic.

⁴⁸ Aden Simon chiashic chido caic: —Icsaquid nec, quenquiocquin icsainquo yacimboecquid mibi isembi —quepanëdash Esus chido chuioaic.

⁴⁹ Adsho tantiash: —Icsainquo yacimboecquid mibi isembi, quec ¿mitsipadquid Esus nepec? —quepanëdash iccuededquido. ⁵⁰ Aden iccuededquidon tantianubi chido caic Esus: —Ëbi tantiaquid yec Nuquin Papa yacno puduedquid mibi neyoc. Bëdamboec tabadaid tantiamiaid mibi iqueque. Dacuëdenquo yec nidta —quepanëdash chido caic.

8

Chidobo abi nashunquido

¹ Adshumbic, Esusën shubu dadpen yacno-yacnomboen chuibanquin Nuquin Papa yacno shubu abentsëqui yacimboec nidaidën tabadaid chuibenepanëdash. Abi bëdamequid tsibananec chidobo nidpanëdash.

² Ambi mayan icsa dapuduemiaidobëdtan ambi bëdamiadon Esus tsibanampanëdash. Madia, Macada yacnoshon tishaid chedon Esus tsibanpanëdash. Mayan icsa 7ted dapuduemiaid Madia icpanëdash.

³ Abëd nidquid utsi Uana icpanëdash. Aidën bënë Chusa cuëmëdquid, ancanquid dapa Edodesën shubu nuntan nacnemequid icpanëdash. Abëd nidquid utsibic, Susana icpanëdash. Chido utsibo dadpen Esusbëd capucuenepanëdash. Aidon aton na dadpen icnuc Esusbëd icquidon aton na nibëdsho isun menebampanëdash.

Pete ëshë sequid

(Mat 13.1-23; Mad 4.1-20)

⁴ Aden chuibeniash tabadtuidtsëcnubi ambi chuiquin tantiambeoedo choquin tsibanampanëdash. Cho-chosho isun, Mibibimboecnuc chiembi, quenquiocquin Esusën nadopanëdash: ⁵—Tidën caniquid pete ëshë sianuec

aton tied yacno nidquid icbo. Adec nidshun tiedën caniquid pete ëshë se-cabanac maisec utsi-utsiec podqued nantan paëdacsho matsesën manenubi utsi-utsien uicchunën chec. ⁶ Utsibic, cuënote dadpen samëdacno secac badedquio dëyucuidtsash nidaid ëquëduc tapun nidenquio iquec bidiquequid. ⁷ Utsibic, nisanquid dëyucacno secac aibëdi dëyucash canidouidsacsho nisanquidën bëtïnac unësquid. ⁸ Utsibic, nidaid bëdan secac dëyucash canïash dadpen ëshëendac —quepanëdash Esus.

Aden chuibanashic: —Tantiate bëdambocquidën ëmbi chuiboed tantiapec —quepanëdash.

⁹ Adoaquien: —¿Mitsipadquid tantiaid mimbi chuiboed icpec? Èbitedi tantiapecquin chuioa —capanëdash abëd icquidon.

¹⁰ Adoaquien: —¿Mitsipadequini Nuquin Papa yacno tabadpe? queboedëmbi nëbi mimbi tantiabeneç. Padnuen utsibon tantienquio yaid aid iquec. Aden chiac:

“Èshë bëdambocquid icquimbi tantiesa icquin ma Nuquin Papa yacno isenquioçpanuna.

Adembidi tantiate bëdambocquid icquimbi tantiesa icquin ma abimbo chiaid tantienquioçpanuna”

—quepanëdash Esus.

¹¹ Aden chiashic: —Èmbi chuiboed nad iqueque. Tantia. Chuinu. Tiedën caniquid pete ëshë icbon siaidbimboecquid Nuquin Papan chiaid nec. Èshë siacno nidaidbimboecquid matsesën tantiate nec. ¹² Podquedën nidaid tsasimbocquidbimboecquid nad iquec. Nuquin Papan chiaid tantiaç papuedtiapimboçsho Satansën bëpiscudmiaid adquid nec. ¹³ Cuënote dadpen samëdacno nidaidbimboecquid nadquid iquendac. Nuquin Papan chiaid tantiaç, Bëdambo iquebi, quiashic natiamianquieç cametëquid icnuc aid tantieç Nuquin Papan chiaid papueduidquid iquendac. ¹⁴ Nisanquid dëyucuid dadpen yacno nidaidbimboecquid nad iquec. Nuquin Papan chiaid tantiaç abi bunaid, abi nënaid, ambi natequid adquid tantiaquin Nuquin Papan chiaid bëtashacbimboec icnuc bëdamboec tabadaid ismesa yampec. Aden bëdamboec tabadaid ismesa yanuc utsin Nuquin Papan chiaid tantiaçtiapimbo iquendac. ¹⁵ Nidaid bëdabimboecquidien nad iquec. Nuquin Papan chiaid tantiaçdoneç bëdamboec tabadquin utsi ismequidquio nec. Adquid natiamianquion chonoc tantesa uainquioçquin ënenquioçquin ismendac. Aden ismiac Esus tantiaquid utsi dadpen yampec —quepanëdash Esus ambi chuiboed abëd icquido tantiamenueç.

Tabote nënantan nanac chënquiacbimboecquid

(Mad 4.21-25)

¹⁶ Aden chuishumbic naden Esusën chuioapanëdash: —Tabote taboshon matsun bëtashesa. Adembidi tsadte tëdion tabote nanesa icbo nec. Ma ëmbi yuedaidon isnueshun nënantan tabote nanquid. ¹⁷ Adomboembidi mimbi ompoquin chuibanaid Nuquin Papan ompoenquioçquin chuibanendac. Adomboembidi mimbi tantiamenquio yaid aidëmbi chuibanendac.

¹⁸ Ad icnuc ëmbi chiaid bëdamboen tantiaçquiota. Nuquin Papan chiaid tantianuequin ambi chiaid dadpen tantiaçquid. Adquid ambi tantiaçpadec tabadquid. Adec tabadquin ompoenquioçquin utsi ismequid. Nuquin Papan chiaid tantiaçuidboed, Bëdamboen tantiembi, qeshun papuedmenquioçquin bëdamboen ismesa nec. Aden ambi tantiaçuidaid uesadendac —quepanëdash Esus.

Aton utsibo aton titabëd choaid

(Mat 12.46-50; Mad 3.31-35)

¹⁹ Adashic, Esus isec aton utsibobëd aton tita chopanëdash. Cho-choshon matses dadpen nuntan tabadsho isun, Ëbi choaid chuita, cac ²⁰ shubun puduedshun: —Titabëd min utsibo choshon umanucshun mibi cainec mibëd onquete bunquin —capanëdash Esus chuiquin.

²¹ Adoquien: —Adquid chuinu. Tantia. Nuquin Papan chiaid tantiashun nabanquido ëbëd icquid nec. Adquid buchi caindambi. Adquid utsi chido chuchu caindambi. Ütsibic tita caindambi —quepanëdash Esus.

*Acte tēccoasquesho ënëdmiaid
(Mat 8.23-27; Mad 4.35-41)*

²² Adashic: —Chian cuëma utsiuc nidnu. Nid —quianec abëd icquidobëd cano antsadtoanec nidpanëdash. ²³ Adec nidec cano anuequi Esus ush-topanëdash. Adec ushnuvien cunquequid dapa comapenec cunquenubi acte tēccoasquequidën acte uemiac cano mentoadtsempañëdash. Adsho isash dacuëdec ²⁴ Esus ushacno nidshun tinec abëd icquido: —Nuqui mentoad-egue. Isucun, Icbo —quec comapenec cuëdpañëdash abëd icquido. Adsho tantiash isucunash nidtoshon: —Mibi comapenec cunqueque. Ënëd —Esusën cac cunquequid badedquio ënëdpañëdash. Adembidi: —Mibi comapenec tēccoasqueque. Ënëd —Esusën cac badedquio acte tēccoasquequid ënëdoapanëdash. ²⁵ Aden ënëdmetanec: —¿Atotsi quiaish ëbi tantienquio yec dacuëcuedede? —Esusën caquien abëd icquido dacuëcuededquiequi, ¿Mitsipadquid nepec? Cunquequidbëdtabi acte tēccoasquequid ënëd cacpadequi ënëdchitosh, quec abëd icquido abibi onquecuededpañëdash.

*Mayan icsa dapuduedaid dapuduemequin bëdamiaid
(Mat 8.28-34; Mad 5.1-20)*

²⁶ Adshumbic, acte tēccoasquec ënëdan nidaid Cadidia yacno chian cuëma utsiuc Esusbëd icquidon poteoac nidaidëmpi Cadada caid yacno aido nidpanëdash. ²⁷ Ambo nidequi canon choash decatasho isash mayan icsa dapuduedaid dada Esus bëquedec chopanëdash. Aidi shubu dadpen yacno tabadboedi nëbi uano unësaid chococate macuësh cuënote yacno tabadpanëdash. ²⁸ Aidi Esus bëquedec choash sidquianec Esusën taëno uebudash: —¿Atotsienuec ëbi isec cho? Nuquin Papan madombo mibi cadoque. Ëbi mëyanenda —quec onquenubien ²⁹ mayan icsa chuiquin: —Dapudenta —capanëdash Esusën. Mayan icsa dapuduedaid nad icpanëdash. Shocosh bu-cun abi mëtaniaidbëdtabi abi tataniaid chictenesho isun, Mëtanenu, cainquio yampanëdash. Adoac mayan icsan matses nibëdacno nidmiaid icpanëdash.

³⁰ Adquid nec, quequin tantiaquin Esusën: —¿Tsutsi cuëmëdquid mibi ne? —capanëdash.

Adoquien: —Sincó midted dapuduedonaid nebi —quepanëdash mayan icsa dapuduedaid onquec. ³¹ Aden chiasic: —Mibi bëdambocquid cadoque. Ënenquiocquin mëyanacno cuidnuequin ëbitedi nidmenda —quiaishic ³² chancho dadpeshun pec tabadsho isash: —Ëbitedi chanchotedi dapuduedtiadquio iquebi. ¿Ada bëdambo icpec? —quepanëdash mayan icsa dapuduedaid.

Adoquien: —Aido dapuduedtan —Esusën cac ³³ dapuduenequi chancho mayan icsa dadpen dapuduedash acte quiusudacno chancho comapenec niquec chian pudun-pudunec mentoadbudnec nibëdquieq unësbunepañëdash.

³⁴ Adsho isash chancho pemequin isquido titinquecan shubu dadpen yacno choshon ambi isboed chuituidac ³⁵ anocquido istanu quianec Esus yacno cho-chopanëdash. Adec choshon mayan icsa dapuduemequin

bëdamiaid dashcute dasiuidash bëdamboen tantiec Esusën taëno tsadsho is-tuidpanëdash. Adec aid onquesho isash anocquido, Uinsadpambo iquec, quiash dacuëdcuededpanëdash. ³⁶ Dacuëdsho isun mayan icsa dapudue-mequin bëdamiaid isquidon ambi isboed dacuëdquido chuipanëdash. ³⁷ Aden chiac: —Nëuëshquio nidenquio icpec —quepanëdash dacuëdquido Esus chiec. Adoac Esusbëd icquido canon antabëdtopanëdash.

³⁸ Adsho isun: —Mibëd nidiadquio iquebi —quepanëdash ambi mayan icsa dapudue-mequin bëdamiaid Esus chiec.

³⁹ Adoaquien: —Padi. Min shubuno nid. Ambo tabadquin Nuquin Papan naid mayan icsa mibi dapuduedaid dapudueiaid anocquido chuibanta —quianec Esus canon nidpanëdash. Aid nidnubien mayan icsa dapudue-mequin bëdamiaid nidanec aton shubu yacno choshon anocquidtedi Esusën naid abi mayan icsa dapudue-mequin bëdamiaid chuibanopanëdash.

*Chido intac budaid bëdanaid icnuc champi uincuemiaid
(Mat 9.18-26; Mad 5.21-43)*

⁴⁰ Adashic chian potiash cuëma utsiuc Cadidia yacno Esus padpidec chosho isash: —Mibi isec bëdambo iquebi —quepanëdash iccuededquido abi cainquido. ⁴¹ Adnubien, Nuquin Papan chiaid chuibante shubun tabadquid isquid Aido cuëmëdquid choash Esusën taëno uebudash: ⁴² —Con champi abentsëc tishaid unësanëquidquio iccosh. Aton seta 12ted icquid niosh. Èbi cudasaid nec. ¿Aidi isnuec con shubuno ada nidtsia? —quepanëdash Aido.

Aden chiac Esus nidnubien cho-choquido dadpen tsucus-tsucustsëcquio yec Esus datsidadpanëdash. ⁴³ Adnubien, chido seta 12ted matamec intac buaid chopanëdash. Aidi dauëchoquid dadpeshun bëdametiapimbo icpanëdash. ⁴⁴ Adoac bëdanabi yec, Bëdamequidën ëbi bëdamepec, abibi quianec Esusën cachoc choshon ismenquiocquin Esusën dashcute cuëmano mishnubi aton intac badedquio bëdampanëdash.

⁴⁵ Aden mishac: —¿Tsuntsimbini mishosh? —quepanëdash Esus. Aden chuisho tantiasch abi datsidash capuquido mishambo yec otacquo tabadcuèdedpanëdash. Adec tabadnubien: —Matses dadpeshun tsucus-tsucustsëcquiocquin mibi cuëscabedec —capanëdash Petedon.

⁴⁶ Adoaquien: —Matses abentsëcshun ëbi mishosh. Èmbi nadatiambocquin natequid bëuesadsac —quepanëdash Esus.

⁴⁷ Adec Esus onquesho tantiasch chido, Ambi tantiacpadomboen ëbi isec, quec abibi onquequi dacuëdec uëdëquequi Esusën taëno uebudtuidpanëdash. Adec uebudec datsidadquidon tantianubi: —Intac bëdanëquin min dashcute cuëscatsequi bëdanobi —quepanëdash chido Esus caic.

⁴⁸ Adoaquien: —Mimbi tantiacpadquieci mibi bëdanaye. Dacuëdenquio yec bëdamboec tabadec nid, champi —capanëdash Esusën.

⁴⁹ Aden Esusën chuinubien Aidon shubun icquid utsibo Esus yacno cho-chopanëdash. Choash: —Min champi unësoshe. Chuibanquin tantiamëquid min shubuno nidnunda —capanëdash abi yacnoësh choquidon Aido chuiquin.

⁵⁰ Aden chuisho tantiasch: —Dacuëdenda. Aden tantiequi nid. Mimbi tantiacpadquieci min champi bëdaneque —quepanëdash Esus Aido caic.

⁵¹ Aden chianec Aidon shubuno nidash cho-choquidotedi, Èbëd puduedenda, quequin chianec Petedo, Uan, Acobo aيتد buanec Aido cuëmëdquidën champi yacno Esus puduedpanëdash. ⁵² Ambo puduedshun anocquido unësqüio yec shubisho tantiaschun: —Mibi shubieque. Ènëdta. Champi unësenquio yec usheque —capanëdash Esusën.

⁵³ Adsho tantiashun, Champi unësacsho isombi, quequin Esus tantien-
quiocquin shubiquidon mamënshumbededpanëdash. ⁵⁴ Mamënshumbedednubi
Esusën Aido cuëmëdquidën champin mëdante mëdinquin: —Nidto, champi
—comapenen cac ⁵⁵ aton tiboedte unësabi yec champi badedquio nid-
topanëdash. Champi nidtoshu isash: —Peme —quepanëdash Esus. ⁵⁶ Aton
champi nidtoshu isash: —Adopenshenda iquec —quepanëdash ani amëbëdi.
Adoaquien: —Mimbi isboed chuibanenda —quepanëdash Esus.

9

Esusën ëbi chuibeneta, quequin ambi nidmiaido (*Mat 10.5-15; 14.1-12; Mad 6.7-29*)

¹ Adashic ambi ëbi chuibeneta caido 12tedtsëqui chometanquin Esusën
nadopanëdash: —Ëmbi nadatiambocquin nabanacpaden mibitedishun na-
banendac. Mayan icsa dapuduequinc daicsaido bédamequinc cain mibi
capucueniacnoshon mimbi ismebenendac. ² Nëbi mibi nideque. Adec
capucuenequin chuibenequimbi bédamebeneta. ³ Nidquin cueste uidën nidte
buanenda. Shictoadte buanenda. Petequid buanenda. Mitsana bedtequid
buanenda. Dashcute utsi buanenda. Buanenquio yec dadauidquio niftan.
⁴ Adec nidash mibi yuedquidën shubun puduedshun ëmbi chiacpadomboen
nabanec anouidi tabadta. ⁵ Mibi nidacno mibi yuedquid nibëdsho isun
naden nata. Mimbi tantiad icsa mibibi cuidadte nec, quequin nidaid putu
tasequequin ismeta —capanëdash Esusën abëd icquido chuiquin.

⁶ Aden chiac nidash abëd icquido abi yuedacno puduedash tabadquin Es-
usën chiacpadomboen Nuquin Papabëd tabadaid chuibanquimbi daicsaido
bédamebenepanëdash.

⁷ Adnubien Esusën nabansho isquidon Edodes chuibanpanëdash. Edodes
Cadidia yacnoquido ancaquid icpanëdash. Aden Esusën nabanaid chuisho
tantiashun, ¿Tsudain nepec? Edodesën caquien,

Acten mentoanondaïd, Uan cuëmëdquid uincuempash icnui, quenubien;
⁸ Edias Nuquin Papan ambi chiaïd chuimiampid padpidec choapash icnui,
utsi-utsiec quenubien, Nuquin Papan chuimiampid utsi uincuenoapash
icnui, utsi-utsiec quecuededpanëdash, quequin chuipanëdash Esusën nabansho
isun chuiquidon Edodes tantiamequin.

⁹ Adoaquien: —Mambi uincuentiapimbocnoc Uan mapi budtemiondac.
¿Tsudain ëmbi tantiacmaidquio adobanquid icpec? —quiashic Esus iste
bumpanëdash Edodes.

Matses dadpen pemiaïd (*Mat 14.13-21; Mad 6.30-44; Uan 6.1-14*)

¹⁰ Adashic ambi nidmeboedo Esus yacno padpidec choapanëdash.
Choashumbic ambi nabamboedtedi chuibanpanëdash. Aden chuibanansho
tantiash Esus abëd icquido bëyucanec shubu dadpen icquid Betsaida
caïd anoentsëqui nidpanëdash. ¹¹ Aido nidsho isun cho-choquidon
tsibanampanëdash. Adsho isun Esusën Nuquin Papa yacno tabadaid
chuibanquimbi daicsaido bédamepanëdash.

¹² Adashic ushë budtsan Esusbëd icquidombo Esusën dayunquio choshon:
—Nëmbo shubu nibëdeque. Shubu utsi-utsiec yacno nidshun pete bedshun
pec tabadta, quequin cho-choquido chuita —capanëdash Esus chuiquin.

¹³ Adoaquien: —Padi. Mimbibi aido pemeban —capanëdash Esusën.
Aden chiaquien: —¿Ma nëmbobi panëmpi mëdante auc abentsëcted icnubi
nuëcquid daëd iquec. Aïdtedtsëqui icsho isunda cho-choquidtedi pemenu-
quin ëbitedi bedtan, cai? —quecuededpanëdash abëd icquido.

¹⁴ Ambobi tabadsho chido bacuëbobëdtabi tambanenquio icquimbi dadauidquio, 5000ted icnuc tambampanëdash.

Adoaquien: —Nëidtedi uano 50ted-50tedquien tabadme —Esusën cac ¹⁵ ambi chiacpadomboen tabadmepanëdash. ¹⁶ Aden tabadmesho isun panëmpi 5tedbëda nuëcquid daëd sananquin abuc isec: —Mibi bëdamboequid icquin mimbi meniaid nëid pete nec, Papa —quec onqueshun pete cuësh-cuëshun: —Meneban —Esusën caquien abëd icquidon menebampanëdash.

¹⁷ Aden menebanac piash cubudambic napi uaid sandobanquin tsitsan 12ted icnuc Esusbëd icquidon bedbampanëdash.

Chuiquid dapa abentsëcquiobi iquec, quiaid

(Mat 16.13-19; Mad 8.27-29)

¹⁸ Adashic, matses nibëdacho abëd icquido icnubi Nuquin Papa chiec Esus onquepanëdash. Adec onqueshumbic: —¿Tsutsi ëbi tsibanquidon ëbi capec? —capanëdash Esusën.

¹⁹ Adoaquien: —Acten mentoanondaid, Uan padoen Esus nechitec, quenubien, Edias Nuquin Papan ambi chiaid chuimepampidien Esus nechitec, utsibo quenubien, Nuquin Papan chiaid chuimepampid uincuenoaidien Esus nechitec, utsibo queoaposh —quepanëdash abëd icquido.

²⁰ Adoaquien: —¿Ma, mimbi, tsutsi ëbi cape? —capanëdash Esusën.

Adoaquien Petedo: —Chuiquid dapa abentsëcquiobi, Nuquin Papan chomiaidquio yec Quidistu caid ma mibi neyoc —quepanëdash.

Abi unëste chiaid

(Mat 16.20-28; Mad 8.30-9.1)

²¹ Adoaquien: —Mimbi ëbi tantiaid nëbi utsi chienda —quepanëdash Esus comapenen chiec. ²² Aden comapenen chiashic Esus: —Ëbi matsesaid icsho natiambocquin mëyantequid iquendabi. Ëbi chieshënkuido dadpen iquendac. Nuquin matses tsusio dapabo yec tsusio utsibo yec Nuquin Papan naden nata quequin chiaid chuibanquin tantiaquido yec quec aitedi ëbi chieshënkuido nec. Aidon naden chiendac: ¿Esus chuiquid dapa abentsëcquiobi Nuquin Papan chomiaidta nedic? Aidpenquio nec, quequin ëbi cuesunemependac aidombi. Adoaquini daëdec ushacsho uincuen uaindac —quepanëdash Esus abi uincuen uate chiec.

²³ Aden chiashic: —Ëbi tantiaquid icnuequin ambibi tantiacpadomboen nainquiocquin ëmbi chiacpadomboen nabantiadquidi nec. Ëbi mëyanacpaden mëyanuc unësmanc quenquiocquin tantesa uainquiocquid. Ëbi tantiaquidquio iquendac adquid. Nidaidën tabadaiduidi tantiaquid iquec Nuquin Papa yacno nidenquio iquendac. ²⁴ Cuesunenu cac unësmanc quiaish Esus tantiaquid nebi queboedi Esus tantiesa nebi quequid unësh Nuquin Papa yacno tabadenuio iquendac. Utsibo, Esus tantiaquid nebi, quiaishic abi cuesunenuquid icnuc adecbidi Esus tantiaquid nebi, queoapec. Adquid unësh Nuquin Papa yacno tabadendac. ²⁵ ¿Atotsieshun Nuquin Papa yacno tabadaid tantienquio yec nidaidën bëdamboec tabadnuequin bedted-bedted? Mimbi bedaidënkuido Nuquin Papa yacno puduedtiapimbo mibi iquec. ²⁶ Esusbëdtabi ambi chiaid tantiaquid nebi nidaidënuësh queti-apimbocquid icsho adquidi ëmbi tantiaid nec, queoatiapimbo iquendabi con pa yacnocquidtedishun tantianubi. ²⁷ Nad iquendac. Tantiakiota. Chuinu. Ëbi tantiaquid dadpen yansho ënabicquid utsin-utsinquien isendac —quepanëdash Esus.

Esus bed-bedquesho istiapimbo yaid

(Mat 17.1-8; Mad 9.2-8)

²⁸ Aden chiashic Esus mëdante utsiuc tauadoec ushash Nuquin Papa chiec onquenuc macuësh yacno nidoapanëdash. Petedo, Uan, Acobo aited buanec macuësh yacno Esus nidpanëdash. ²⁹ Adec macuësh yacno nidash Nuquin Papa chiec Esus onquenubi aton bësbed aton dashcutebëdi nacnacquoio ushë chënquiabimboec icpanëdash. ³⁰ Adsho isnubien badedquoio dada utsi daëd choash adquiobidi Esusbëd nidec. Nëidic, Moises, Nuquin Papan ambi naden nata quequin chiaid dada uamiampid; utsibic, Edias, Nuquin Papan ambi chiaid chuimiampid. ³¹ Aid daëdi Esusbëd tabadquin Nuquin Papan tantiampicpadec Edusaden yacnoshon Esus unës uate ushë chiec onquenedpanëdash. ³² Adnubien Esusbëd choboedo abëd icquido 3ted ushcasmash tabadtuidquin Esusbëd utsi daëd nac-nacquiocquid dasiuidacimboec bed-bedquesho isbededpanëdash. ³³ Esusbëd daëd nidtuidsho isash Petedo nadpanëdash: —Nëmbobi iquec bëdambo iquebique. Nëmbobi mibi tabadmenun abentsëc chotsëcncuc shubumpi uanuna, Icbo. Abentsëc mitsana, utsibic Moisesën na, utsibic Ediasën na, quequin shubu uanuna —quepanëdash Petedo.

³⁴ Adec Petedo onquenubien abu ushun isadenguicnoc abitedi bëtimpanëdash. Adsho isash Esusbëd choboedo dacuëdpanëdash.

³⁵ Adnubien abu ushunuësh onquec: —Nëidic ëbëd icte bunquidquoio, con madombo, ëmbi bëdamboen isaidquoio neque. Aidën chiaidquoio tantiata —quepanëdash Nuquin Papa Esusbëd icquido tedestedshun isenquiocnobi.

³⁶ Adec onquiash ënëdambi Esusuidtsëqui nidsho abëd icquidon ispanëdash. Adoshombic Esusbëd icquidon ambi isboed utsibo chienquiocpanëdash.

Mayan icsa dapuduedaid madompi (Mat 17.14-21; Mad 9.14-29)

³⁷ Adashic badiadash macuësh dapa yacnoësh Esus budsho isash bëquedec matses dadpen cho-chopanëdash. ³⁸⁻³⁹ Cho-choash abentsëc nadpanëdash: —Con mado abentsëc icquid mayan icsa dapuduedash icsambo iccoshe. Isec chota. Aidën bedto-bedtoac badedquoio sidquianesho aidëmbidi bedshun bëcunedeniac con mado ëcbacushaniosh. Dapuduenenquoio icquin con mado aidën uimambo icmedeniosh. ⁴⁰ Adsho isash choshon mibëd icquido chuiquin, Dapuduemeta, cauidombi. Adoac mayan icsa dapuduemenuquin aidon tanac dapuduenenquoio iccosh —quepanëdash dada abentsëc Esus caic.

⁴¹ Adoaquien ambi nianaido caic Esus nadpanëdash: —Nadatiambocquid Nuquin Papa nec, quequin tantiesha mibitedi neque. ¿Tedectsi icshun ëmbi chiacpaden mimbi tantiabempe? ¿Mimbi tantienquiocsho isash tedectsi-ashini chieshtope? —quetanquin: —Min mado bec cho —Esusën cac aton mado aton papan bëpanëdash. ⁴² Aden bënubi mayan icsan bëcuniac madompi uëdëquiampañëdash.

Adsho isun: —Padi. Chën —capanëdash mayan icsa chuiquin. Aden madompi bëdametanquin aton papa Esusën meneoapanëdash.

⁴³ Adsho isash: —Nuquin Papan nadatiambocquin naid uinsadpambo iquec —quecuededpanëdash isquido.

Abi unëste chuioaid (Mat 17.22-23; Mad 9.30-32)

⁴⁴ Adoaquien: —Chuinu. Bëpiscudenquiocquin tantiaquiota. Matsesacsho nëbi bedmendabi —quepanëdash Esus abi unës uate chiec.

⁴⁵ Aden chuisho abëd icquidon tantienquiocpanëdash. Aden tantienquoio yec, Mimbi chiaid tantienquoio iquembi, quetiäpimbo yec otacquoio tabad-cuededpanëdash abëd icquido.

¿Tsutsi chuiquid dapa icpec? quequin chiaid

(Mat 18.1-5; Mad 9.33-37)

⁴⁶ Adashic: —¿Nuquin Papa yacno nidash chuiquid dapa mitsiquid icpec? —quec Esusbëd icquido onquecuededpanëdash. ¿Ëbida chuiquid dapa icpe? quec ambibi tantiequi adpanëdash.

⁴⁷ Adoquien Esus tantiaquidquio icquin bacuëmpi chomeshun aton dayunquio tabëcash: ⁴⁸ —Chuiquid dapa icnu, quesa icta. Ëbi tantiaquid icquin nëid bacuëmpi bëdamboen nashunquid iquec ëbi nashunoaquid iquendac. Nuquin Papan chiapadomboen nabanquid Esus nec, quequin tantiaquidquio iquec ëbi chomiondaid, Nuquin Papa tantiaquidquio icoaindac. Nidaidënuësh utsi nashunquidquio icboedi aidquibi Nuquin Papan chuiquid dapa icta caindac —quepanëdash Esus abëd icquido caic.

Abimbo tantiaquid ëbëd icquid nec quiaid

(Mad 9.38-40)

⁴⁹ Adashic, Uan Esusbëd icquid abentsëc nadpanëdash: —Mayan icsa dapuduemebanquid ispombi. Aidi mayan icsa dapuduemenuc nadposh: “Esus, nadatiambocquin naquidquio mibi cadaque. Mayan icsa dapuduemeta,” cac mayan icsa dapuduemposh. Aidi ëbëd icquidpenquio icsho isun: “Padicnuna,” cauidpombi. ¿Adambi bëdamboen chuiipo? —quepanëdash Uan Esus caic.

⁵⁰ Adoquien: —Adquid, Padicnuna, cainda. Nadatiambocquin naquidquio Esus nec quequin abimbo tantiaquin ëmbi nacpadomboen nabanquid icnuc mibipadquid ëbëd icquid neque —quepanëdash Esus Uan caic.

Esus bunesabo, Samadia yacnocquido

⁵¹ Adashic Esus abi abuc indote ushë chote anoentsëqui yanan, Unësmanc quenquio yec nidebi, quequin ambibi tantianec Edusaden yacmi Esus nidoapanëdash. ⁵² Adec nidnun ambi bëyucmiaido Esusën abia nidmiac nidaid Samadia caid yacno shubu daëdpactsëc yacno Esusbëd icquido chopanëdash. Choash: —Edusaden yacno Esus nideque. ¿Aidbëd icquido ada mimbi yuedpatsia? —caquien ⁵³ Esus isadaidbo nec, quequin yuedenquiocpanëdash Samadia yacnocquidon.

⁵⁴ Adoquien, Acobobëd Uan nadpanëdash: —¿Ënabicquido unësmenuen mimbi nëdëncatequid chome, Papa, quequindambi Nuquin Papa chuipe, Icbo? —quepanëdash.

⁵⁵ Adoquien: —Padicnuna. ¿Matses unësmenuectabi chodio? —quianec

⁵⁶ shubu daëdpactsëc yacno nidoapanëdash abëd icquidobëd.

Esus tsibante bunquidën natequid

(Mat 8.19-22)

⁵⁷ Adec podquedën Esus nidsho abi databëdquid abentsëcshun nadopanëdash: —Mimbi chuibeniacnombobi mibi tsibananc nidendabi —quepanëdash Esus databëdquid abentsëc.

⁵⁸ Adoquien: —Bëdi chëshë aton shëcuën uec. Podochoquidën aton shubu uaic. Aden shubu uainquiocquin Nuquin Papa yacno tabadaid chuibenec nebi —quepanëdash Esus.

⁵⁹ Adoshombic: —Ëbi tsibanta —Esusën caquien utsi:

—Con pa unësacsho chococashun mibi tsibanec nidendabi, Icbo —quepanëdash.

⁶⁰ Adoquien: —Nuquin Papa yacno tabadnu quequin unësaid chococaquidëmbi ma chococapanuna. Mimbi Nuquin Papa yacno tabadnuequin abí yacno tabadaid tantiaquin mimbi chuibeneta —capanëdash Esusën.

⁶¹ Adashic, utsi nadpanëdash: —Mibipadquid icnuequin mibi tsibanendambi. Con matses nidnu quiacnoba ëbi nidme, Icbo —caquien:

⁶² —Mibi tsibanu queboedi utsiba tantiec ëbipadquid ictiapimbo mibi icpec —quepanëdash Esus.

10

Abi bëyucanec nidquid 72ted icquido (Mat 11.20-27; 13.16-17)

¹ Adshumbic ambi bëyucmiaido dadpen, 72tedi, Esusën nidmepanëdash. Daëd-daëdec shubu utsi-utsiec yacno nidshun chuibeneta, quequin nidmepanëdash. ² Nidmenun aid 72ted icquid Esusën nadopanëdash: —Mimbi ëbi chiac ëbi tantianuequid dadpen icpec. Adquido icnuc aido tantiamenuen ëbi chuibanquid daëdpacksëc iqueque. Naden Nuquin Papa chui: Icbombo, mibi cadoque. Mibi tantiamenuen chuibanquid dadpen nidmeta, Papa, quequin chui. ³ Aden mimbi chiapaden mibi nidmembique. Ëbi chuibenec nidanetan. Mimbi nidshun chuibenenubi mibi chieshënquido dadpen iquendac. ⁴ Ëbi chuibenec nidanequin mitsana buanenda. Mitsana bedtequidbëdta shictoate buanenda. Tapucudte tapucudenquio yec nidanetan. Adec nidanequin utsi bëquedash tabadenquiocquin datambidanec shubun puduedec nidta. ⁵ Shubun puduedshun naden shubu icbo chuita: Nuquin Papabëd abi yacnoquido bëdamboec tabadacpadquiec ma nëid shubun icquido tabadpanuna. ⁶ Aden chiac shubu icbo bëdamboec tabadnuequid icsho Nuquin Papan abi bëdamboec tabadte aid shubun icquido menendac. Shubu utsi icbo ëbi chieshënquid ictsiash. Adquid yec mimbi chiaid tantianu quesa aid shubu icbo icpec. Adquid icsho Nuquin Papan abi bëdamboec tabadte aid shubun icquido menenquid iquendac. ⁷ Mibi yuedacnouidtsëqui tabadta. Adembidi, mibi yuedquidën meniaid peshun acta. Mimbi chuibanaid cuidquin aidëmbi mibi menendac. Adoac anouidi tabadta.

⁸ “Shubu dadpen yacno mibi choacsho yuedshun pete meniac isuidec, Utsitsen bec cho, quenda. ⁹ Ambobi tabadquin daicsaid bëdameshun naden chuita: Nuquin Papan Chomiaid abi yacno yuedanquid neque. Aid tantiata, quequin chuita. ¹⁰ Shubu dadpen yacno choshon mibi yuedquid nibëdsho isun aton podquedën nidquin naden chuita: ¹¹ Nuquin Papan Chomiaid mibi chuineuc chobi. Ëbi daëdi yuedenquiocsho mibi chuitiapimbo iquebi. Adoac abi yacno ambi chomiaidën mibitedi yuedtiapimbo iquendac. Nuquin Papan chomiaid tantiate bunesa mibi icsho isash mibi yacno capuec ëbi tabitacquiaid tabesquenu. Is, quequin ismequin adota —capanëdash Esusën ambi nidmetequid 72ted icquido chuiquin. ¹² Aden chiashic aido chiec abi Esus onquec: —Naid icsabëdtabi naid bëda chuibante ushë chonoc mibi yuedesa Nuquin Papan comapenen cuidendac. Ëbi choabicnuc Sodoma yacnoquido icpampic. Ëbi choabicnuc aidon ëbi tantiatiapimbo icpampic. Adquido Nuquin Papan bëdiactsëc cuidendac —quepanëdash Esus.

¹³ Aden ambi nidmetequid 72ted icquido chuibanshumbic utsibo isacimboben Esusën nadopanëdash: —Nëbi icquido, shubu dadpen icquid tantiec unësquiocquin mibi chiembique. Tantiata. Shubu dadpen icquid Codasin caid yacnoshon ëmbi nadatiambocquin nabansho mibitedishun isted-istedshumbi Nuquin Papan chomiaid nec quequin tantienquio mimbi iccuededpec. Adembidi nadatiambocquin nabansho isted-istedboedi Bet-saida yacnoquido mibi nec. Aden ëmbi nasho isash ëbi tantiesa mibi icoapec. Ënden yampido isadaidpembon ëmbi nadatiambocquin nabansho isun, Icsaquid nebi, qeshun unësquiocnoc shubiquin abi icsaid

ëntsempampic. ¹⁴ Aden Tido yacnocquidobëdtan Sidon yacnocquidon tantiashun abi icsaid ëntsempampic. Adquido Nuquin Papan bëdiactsëc cuidendac. Isadaidbo Codasin yacnocquidobëd Betsaida yacnocquido ëbi isquido mibitedi nec. Ëbi tantiesa icsho Nuquin Papan mibi comapenen cuidendac. ¹⁵ Adecbidi, nëbi icquido, Capednaun yacnocquido mibi unësash ¿Nuquin Papa yacnoda mibi nidpe? Padenquio. Ëmbi nadatiambocquin nabansho isun tantiesa yec chian anëdënquiacno mibi nidendac —quepanëdash Esus abi tantiesabo chiacbimboec onquec.

¹⁶ Aden chiashic, ambi nidmenu caido 72ted icquido tantiamenuen chuibudec: —Mibitedishun ëbi chiac ëbi tantiaquido utsibo iquenda. Adquobidi mimbi ëbi chiac ëbi tantiesabo icoaindac. Adomboembidi ëbi chuibansho tantienquio yash ëbi chomiondaid tantiesambo nendac —quepanëdash Esus. Aden chiac ambi nidmenu caido nidanepanëdash.

¹⁷ Adec nidanequin Esusën chiapaden nabeniashic, Bëdambo iquebi, quecudedec Esus yacno cho-choapanëdash. Adec cho-choash: —Mimbi chiapaden nabanombi. Aden nabanquimbic, Esusën nadatiambocquin naidënquio dapudenta ëmbi caidtedi mayan icsa dapuduempash, Icbo —quecudedepanëdash ambi nidmiaido 72ted icquido ambi naboed Esus chuibanec.

¹⁸ Adoaquien: —Ëmbi nadatiambocquin nabanquin tantiamiac mibitedishun mayan icsa dadpen dapuduemebedednubi abi dëniacacimbocnuc bedquetanacimboc Satanab abucuësh badedquio paëdsho isec niobi.

¹⁹ Ëmbi nadatiambocquin nabanacpadquid mibitedi icmëbanombi. Aden mibitedi adquid icmiacsho mibi chieshënquidon mibi icsa uatiapimbo iquendac. Mibi chieshënquin icsa uanuequido nisibimboecquido nec. Aidobidi icsa uanuequid yec chichumbimboecquido neoaic. Adquid nisi icsho catashac mibi petiapimbo iquéc. Adomboembidi catashac chichunën mibi setiapimbo icoaic. Adquidbimboec mibi chieshënquid icsho ëmbi chiapadomboen nabanac mibi icsa uatiapimbo iquendac. ²⁰ Aden nabanac mibi icsa uatiapimbo icsho isash, Bëdambo iquebi, quenda. Nuquin Papan abi yacno chomenuequin ëbi cuëmëdquid ënden dada uaid iquéc abi yacno ëbi puduedte iquéc, quequin tantiec, Bëdambo iquebi, quianta —capanëdash Esusën ambi nidmiaido chuiquin.

²¹ Aden chuibanshumbic ambi nidmiaidon chiaid tantiasch, Bëdambo iquebi, quequin Nuquin Papa Esusën nadapanëdash: —Abu icbo nidaid icbobidi mibi nec, Papa. Adquid icquin ëmbi nidmiaido mimbi tantiamiacpadomboen nadatiambocquin aidon nabededosh. Aden nabededshun chuisho tantiasch bëdambo iquebi. Dadpen tantiaquido mimbi nadatiambocquin naid tantiamenquiocquimbi, ëmbi namiaido, daëdpactsëc tantiaquidobien mimbi tantiamioc, Papa. Mimbi tantiacpaden tantiamiac ëmbi nidmiaidon nabededosh, Papa —quepanëdash Esus Nuquin Papa chiec.

²² Aden Nuquin Papa chiec onquequin nainec: —Con pa abia yampid icquin abitedi tantiaquidquido nec. Aidën abipadquid icmiaid nebi. Aid abentsëcquiobi ëbi bëdamboen tantiaquidquido con pa nec. Adecbidi abëd abia yampid icquin con pa bëdamboen tantiaquidquido nebi. Adquid icquin, Con pa nad iquéc, quequin ëbi tantiaquido tantiamendambi —quepanëdash Esus abi tantiec choash iccuededquido caic.

²³ Aden iccuededquido chuibanshumbic naden ambi 72ted icquido nidmian choboedouidtsëqui Esusën chuoapanëdash: —Ëbi tantiaquido icquin ëmbi tantiamiacpaden mimbi nabansho isun Nuquin Papan bëdambo iquebi camiaido mibitedi nec. ²⁴ Nuquin Papan chiaid chiampidobëd ancanquid icampido mimbi nadatiambocquin nabamboed iste bunquin aidon istiapimbo icpampic. Adembidi, ambi chiaid Nuquin Papan chomiaid abi yacno

puduedmianquid chosho iste bunquin aidon ëbi istiapimbo icoapampic – quepanëdash Esus.

Utsi tantiaquin bëdamboen naquidquo

²⁵ Adashic, ¿Tantiaquidquioda Esus neque? Tantiabono, abibi quequin dada utsin: –¿Nuquin Papa yacno tabadnuen atotsimbi napeba? chuibanquin tantiamequidën ëbi chui –capanëdash.

²⁶ Adoaquien: –Ami Nuquin Papan naden nata quequin chiaid Moises dada uamiampid ¿mitsipaden chuipec? ¿Aid isquin atotsi mimbi tantiape? –quepanëdash Esus abi chuimequid caic.

²⁷ Adoaquien: –Nuquin Papan chiaid nad iquec: “Nuquin Papa tantiadoneta.” Ambi chiaid utsibic: “Mibi icnëdacpadpenquo yec Nuquin Papa bunacpadquiec tabadnuac adquiota.” Ambi chiaid utsibic, “Nuquin Papa tantiaquid nebi quequin bëdamboen nadeneta.” Utsibic, “Nuquin Papa tantiaquid nebi quequin ambi chiacpadomboen tantiaquiota. Aden nabanquimbi utsibo adembidi bëdambo icmequin naban. Ëbi tantiaquin nashuntiadquidi utsibo nec, mimbi cacpaden utsibo tantiaquin nashunta,” quequin Nuquin Papan chiaidquo nec –quepanëdash Esus chuimeboed Esus caic.

²⁸ Adoaquien: –Bëdamboen mimbi chioque. Nuquin Papan chiacpadomboen nabanec Nuquin Papa yacno mibi tabadendac –quepanëdash Esus.

²⁹ Aden Esusën chiac ëbi otacquo icsho isash Nuquin Papan chiacpadpenquiocquid nepec, quequin iccuedquid utsibon ëbi chuitsiash quequin tantiashun Esusën chuimeboed: –¿Mitsicquid con utsi nepec? –quepanëdash.

³⁰ Adoaquien Esus: –Utsi chuinu. Tantiata. Edusaden yacnoësh shubu dadpen icquid Edico caid yacno nidsho isun ampequidon bedshun ambi aton na bedtequid aton dashcutebëdtabi chicshun icsa uabudtsëccuien cuestasnquin niamposh. ³¹ Adoambi, cuestasnquin nianaid uiacno podquedën choquin isadaidbo tsusion, Con matses nenushe. Isnu, quenquiocquin uano datamposh. ³² Utsibic, Nuquin Papa tabadte shubu uashunaid nuntan nashunquid choquin, Con matses nenushe. Isnu, quenquiocquin adembidi uano datanoaposh. ³³ Utsibic, Samadia yacnoësh choquid aid podquedëmbi choquin cuestasnquin nianaid istuidash unësquiocquin ³⁴ aton dayun tsadbudshun cuestasnquin nia-naidën chiuëtedi aton dauëmbi bënoshcashun bëtaneshumposh. Aden bëtaneshunshun cuestasnquin nianaid aton cabayo canandoash aton cabayobëdi nidequi capuquido puduedmete shubu yacno choash abëdi tabadquin bëdamboen isquin nashumposh. ³⁵ Adec tabadashic badiadshun capuquido puduedmete shubu icbo cuidquin aton na bedtequid meneposh. Aden menequin nadoposh: “Nidebique. Ëmbi bëboed ampequidon cuestasnquin nianaid bëdamboen isquin nashunta. Mimbi aid nashunacsho isun mimbi meneboed cuidquin mibi menendambi,” quequin chianec ampequidon cuestasnquin nianaid istuidshun nashumboed nidposh –quepanëdash Esus. ³⁶ Aden chuishumbic: –Ëmbi chuiboed utsi-utsiec icposh. ¿Mitsicquid ampequidon cuestasnquin nianaidën utsibimboecquid icposh? –capanëdash Esusën.

³⁷ Adoaquien: –Ampequidon cuestasnquin nianaid istuidash unësquio yanquin abi nashumboedien con utsi nec, capendac –quepanëdash Esus chuimequid.

Adoaquien: –Adembidi mimbembi ëmbi chuiboedbimboecnuc utsibo tantiaquin nashunoata –quepanëdash Esus.

Madtan nabanubi Madian tantiaid

³⁸ Adashic, Esusbëd nidequi abëd icquido shubu daëdpactsëc yacno chosho isun anocquid chidon Madta caidëmbi Esusbëdta abëd icquido aton shubun

yuedpanëdash. ³⁹ Adoac ambo puduedash tsadquin Esusën chuibansho Madian Madtan chibinguio datsadbudshun tantiapanëdash. ⁴⁰ Adec tsadquin Madian tantianubi Madtan ambi natiadquio yaidtedi tantiaquin nabampanëdash. Aden nabanequi Esus yacno choshon: —¿Con chibin ëbëdtambi nainquiosho isenquioda mimbi ique? Min utsibëdtan nabanta, cata, Icho —capanëdash Madtan Esus chuiquin.

⁴¹ Adoaquien: —Mimbi natiadquio yaid dadpen tantiaquidquio mibi iqueque. ⁴² Èbi tantiaquidquio icta. Adquid min utsimbo Madia icsho, Padicnuna. Min utsibëdtan nabanta, catiapimbo iquebi —quepanëdash Esus Madta caic.

11

Nuquin Papa chiec onquianete (Mat 6.9-15; 7.7-11)

¹ Adashic ushë utsin Nuquin Papa chiec Esus onquepanëdash. Aden Nuquin Papa chiec onquequin nainacsho isun abëd icquidon nadopanëdash: —Nuquin Papa chiec onquianeta quequin Uan padon abëd icquido tantiamepanëdash. Adembidi Nuquin Papa chiec onqueta quequin ëbitedi tantiamequin chuioa, Icho —capanëdash.

² Adoaquien: —Nuquin Papabëd onquequin naden chuita:

“Bëdamboquidquio mibi nec, Papa.

Adquid mibi icsho matstedishun mibi con icho capashun, Papa.

Mibi yacnoshon mimbi uaido mayan bëdabon mimbi chiacpadomboenuidi naic.

Adomboembidi matses abitedishunquio napashun, Papa.

³ Tantiaquidquio, mibi cadoque. Bumianenguioquin badiadquidën-badiadquidënquien con petë ëbi bedmedene, Papa.

⁴ Adecbidi utsin ëbi chieshënsho cuidenquio yec ëbi abi icsaid bëpiscudacpadquiequi ëbi icsasho cuidenquio yec bëpiscudoata, Papa.

Adembidi, Satanasën icsa uanushe queshun ëbi cudasquin dayun uata, Papa, quequin chuita”

—quepanëdash Esus.

⁵ Adtanequic Esus nadpanëdash: —Mibëd nashunanquid iquec. ¿Adquid icnuda inchëshpotsembo abi yacno nidshun pete mibi bedshumpatsia?

⁶ Inchëshpotsembo pete bedshunuec mibëd nashunanquid yacno nidash: ‘Èbi yacno utsi chosho pete nibëdnubi yuedombi. Con pete nibëdsho isash pemenun bedec chobi. Mimbi meniaid cuidquin adquid mibi meneoaimbi,’ quepatsiac mibi mibëd nashunanquid caic.

⁷ “Adoaquien, nuntanuëshi: ‘Padi. Shëcnandombi. Con bacuë ishcunec din ictoshon mibi menetiapimbo iquebi,’ quequin mibëd nashunanquidën mibi chuitsiash.

⁸ “Aden aidën chiaqui min pete nibëdnuc chuidonetsiac mimbi. Aden chuidoniac mibi menetsiash. ¿Abëd nashunanquid icshoda mibi menepadic? Padenquio. Mimbi nidenquioquin chuidonesho tantiashun mimbi chuiboedtedi mibi menepatsiash —quepanëdash Esus.

⁹⁻¹⁰ Aden chiec abi onquec: —Adomboembidi Nuquin Papa chuidonesho mimbi bedtiadquio yaid aidëmbi mibi bedmendac. Adembidi, Nuquin Papa tantianu quequin abi chuidonesho mibi tantiamendac. Adembidi, abi chuidonesho Nuquin Papan aton Mayan mibëd tabadmiac aidën Nuquin Papa mibi tantiamendac.

¹¹ “Adembidi chuinu. Tantia. ¿Min mado, Nuëcquid bec cho, queshoda mimbi nisimbo menedi? ¹² Adembidi, ¿Cachinan bacuë bec cho, queshoda

mimbi chichun menedi? ¹³ Padenquo. ¿Aden icsaquid icquin min bacuë tantiaquin bédamboen menequid mibi icnuc Nuquin Papa icsaisa icquin mibi, Min Mayan ëbi mene, quesho tantiaquid menenquioda mibi ictic? —quepanëdash Esus.

Bedtsibu namiaid Esus nec, quequin chiaid

(Mat 12.22-30; Mad 3.19-27)

¹⁴ Adashic, mayan icsa dapuduedquin eme uaid icsho Esusën istanquin: —Dapuduen —cac mayan icsa dapuduempanëdash. Adec dapuduenan ambi eme uaid onquepanëdash. Adsho isash tantiadempambo yec iccuededquid dadpen tabadcuededpanëdash. ¹⁵ Utsiboen: —Mayan icsan icbo Bedtsibu caidën tantiamiac mayan icsa Esusën dapuduemepash icnui —quepanëdash Esus chieshënuquido.

¹⁶ Adnubien iccuededquid utsibo: —Nuquin Papan chomiaidquo icquin Nuquin Papa mimbi chiac aidëmbi abucshun naquin ëbi isambo yaid nada-tiambocquin ismepatsiashi. Aden mimbi Nuquin Papa chiac aidën nada-tiambocquin nasho isash, Nuquin Papan chomiaid nebi quequin abimbo chuiquid mibi nec, mibi catsiambi —quepanëdash iccuededquid utsibo Esus caic.

¹⁷ Aden chuisho tantiaquid tantiaquidquo yec abi icsamboen chuimenuquido chiec Esus nadpanëdash: —Chuiquid dapa nëishquin abëd icquido comapenen chushcac, Abëd ictiapibi, quianec cuëshëd-cuëshëdec nidanepec. Adec nidaniash chuiquid dapa ictiapimbo aid iquendac. ¹⁸ Adembidi, Bedtsibu cashumbic Satanas caid mayan icsatedi chuiquid dapa nec. ¿Mayan icsa icquinda abëd icquido dapuduemquid ëbi icmepadic? Adembidi, ¿ambi mayan icsa dapuduemiac abëd icquido nibëdenquioda ictic? ¹⁹ Bedtsibu tantiamiac nec, mimbi ëbi capec. Adembidi mibëd icquidon mayan icsa dapuduemec. ¿Tsuntsin tantiamiac aidon mayan icsa dapuduemepash? Nuquin Papan tantiamiaido nebi, aido quesho tantiaquid, Abimbo caic, mibi quepec. Adomboembidi Nuquin Papan tantiamiaid nebi, quequin ëmbi chuisho ¿atotsi quiaish, Abimbo chiec, quenquo mibi icpe? ²⁰ ¿Nuquin Papan tantiamiac mayan icsa dapuduemquid ëbi yec ambi chomiaidquo matses chuiquid dapa mibi yacno ënden choabida ictio? —quepanëdash Esus abi chuimequido chiec.

²¹ Aden chiashic abi onquec: —Mibitedi tantiamenuen utsi chuinu. Bédamboen tantiaata. Chuiquid dapa icquin abëd icquido cuëshëdnu quenquiocquin bédamboen chuiquin namepec. ²² Aden namiac tabadnubi chuiquid dapa icnuequid utsi chopec. Nëbi choquidën abia chuiquid dapan yuabo nameshun nua meniac aidën yuabo yanoapec —quepanëdash Esus.

²³ Aden chiashic: —Ëbëd icquido ëbi chieshënesa nec. Matses ëbëd icquido icmenu quequid nebi. Matses Esusbëd icmenu quesa cuëshëdmianquid nec —quepanëdash Esus.

Abibi dapuduemboed mayan icsa dapuduedoaid

(Mat 12.43-45)

²⁴ Aden chiashic abi onquec: —Abi dapuduedaid mayan icsa abibi dapuduenanec abipadquid tabadacno icsano matses nibëdacno nidash capuquin abi dapuduedbocpadquid istuidenquo icposh. Adquid istuidambo yec, Abibidi dapuduedoanu, quianec anobidi nidoaposh. ²⁵ Adec nidshun abi dapuduemboed naden istuidposh. Mayan icsa nidän, Ëbibi bédambo iquec. Adash bédambo tabadnu, abibi quiaishic, Nuquin Papa tantianu, quenquiocposh. Aden chienquiocsho aton Mayan Nuquin Papan aid mene-tiapimbo icnuc abi dapuduemboed choshon aid abentsëcquo ²⁶ istuidashic

nidoashun abipadquid chuituidac utsi 7ted abëdi choash abitedi dapudued-cuededac dada icsamboshë yamposh –quepanëdash Esus.

²⁷ Aden Esusën chiambien iccuededquid chido: –Mibi tishacsho shuma chishmiondaid Nuquin Papan bëdamboen isaid icpec –quepanëdash Esus caic.

²⁸ Adoaquien: –Aden nasho padenquo. Nuquin Papan chiaid tantiashun nabansho Nuquin Papan bëdamboen isaidquio nec –quepanëdash Esus chido caic.

*Onasën ismiampicpaden ismiaid
(Mat 12.38-42; Mad 8.12)*

²⁹ Adnubien abi yacno cho-choash utsi dadpen iccuededsho isun Esusën nadopanëdash: –Nëbi nidaidën tabadquido icsanuequido yec Nuquin Papan abucshun nadatiambocquin naid iste mibi bunacpaden mimbi isenquo iquendac. Nuquin Papan Onas ismiampicpaden ismiaid mimbi isendac.

³⁰ Ninibe yacno nidshun ambocquido icsaid cuidte Nuquin Papan chuimiapaden Onasën comapenen chuisho tantiash, Abimbo chuiquid nec, queshun abi icsaid Ninibe yacnocquidon ëmbededpampic. ³¹ Utsibic, Nuquin Papan dadpen tantiamiaid, Sadomon iquec quesho tantiash chuiquid dapa chido Sadomonën chiaid tantianuec ënapenuësh choshon tantiash, Abimbo iquec, quepampic. Nuquin Papan matsesën naid icsa ambi naid bëdabëdta chuibante ushë chonoc aid chidon tantiampicpadomboen Nuquin Papan chiaid abimbo iquec quequin mibitedishun tantienquiocsho Nuquin Papan mibi isendac. Nuquin Papan bëdamboen tantiaquin chuiquid dapa Sadomon icmepampic. Abitedi tantiampidquio nëmbobi iqueque. Ëmbi chiaid tantiata. ³² Adembidi, matses icsaidbëdta ambi bëdamboen naid Nuquin Papan chuibante ushë chonoc Ninibe yacnocquidon Onasën chiaid tantiacpadomboen Nuquin Papan chiaid abimbo iquec, quequin tantienquo icscho Nuquin Papan mibitedi isendac. Nuquin Papan chuimiapaden Onasën chuisho Ninibe yacnocquidon tantiabededpampic. Onas Nuquin Papan matses icsaid cuidte chuimiaidquio icpampic. Padnuen mibi icsaid bedshunash abided cuidadtequid nëmbobi iqueque. Ëmbi chiaid tantiata –quepanëdash Esus abibi chiadequi.

*Tabote taboshon bëtashenquo yachimboec abi bëdamboec tabadaid ismequid
(Mat 5.15; 6.22-23)*

³³ Aden chuishumbic Esusën abi chuibanec: –Tabote taboshon ompoesa. Adembidi matsun bëtashesambo icbo nec. Ma ëmbi yuedaidon isnueshun tabote nënantan nanquid. ³⁴ Adoaidbimboec min tantiate iquec. Min tantiate bëdambocquid icquin bëdamboec tabadquin ismequid mibi nendac. Bëtashacimboec min tantiate icnuc icsamboen ismequid mibi nendac. ³⁵ Con icbo ëbi bednuec choec queshun bëpiscudenquiocquin isted-istedta. ³⁶ Min tantiate icsaisa icscho Nuquin Papan chiacpadomboen tantiaquidquio aidi nec, quequin utsibon mibi isendac –quepanëdash Esus.

*Nuquin Papan icsamboen isaidquio
(Mat 23.1-26; Mad 12.28-40; Duc 20.45-47)*

³⁷ Aden Esusën chuibanshobien padiseyobo abentsëcshun: –¿Ada ëbi yacno pec nidtsia? –capanëdash. Adoac aibëdi nidash pete sanaid cuate dayunquo Esus tsadbudpanëdash. ³⁸ Adec Esus tsadsho isash, ¿Adpecshenda iquec. Penush mëpamëdenquo Esus icpec? quec abibi onquequin padiseyobon Esus yuedquidëmbi tantiapënëdash.

³⁹ Adoaquien, tantiaquidquio iquec Esus nadpanëdash: –Ëndenquimbo padiseyobon peshun acnun dëshote cachocbëdtabi pada-padaid cachoc

bëdamboen dapanta quequin chuinëdacadpden mimbi naoaic. Aden dapan-shun mimbi codocaidbëdtabi mimbi actequid nitsinaid anauc ampanenquin mimbi icpec. Mibitedi adquo iquec. Nesquin bëchish uquec dapanudquin mimbi tantiaid icsa ënenquo mimbi icpec. Adecbidi, mibi bunaïd bednuen icsamboen naquin ampequid mibi nec. ⁴⁰ Nuquin Papan chiaid tantiesabim-boecquid mibitedi nec. Nuquin Papan matses uaqin dadabëdtabi tantiate uainquioda icpampic. ⁴¹ Ai. Adquid icnuc aton na nibëdquid tantiaquin mimbi pada-padaïdën nitsinaidpadquid menebanta. Aden mimbi nade-sho isun Nuquin Papan min tantiatebëdta min dada bëdamboen isendac –quepanëdash Esus.

⁴² Aden chiashic padiseyobo caic Esus nadpanëdash: –Uno bedanquin dies yacno ënquin min tiedën caniquid ëshë tambanshun, Nuquin Papan chiapaden con na 9ted icnubi abentsëc Nuquin Papan na nec, quequin aid abentsëc menuequin mimbi dayun uaic penquiocquin. Aden nabanquin Nuquin Papan ambi matses bëdamboen tantiaquin nabanacpaden naisabo mibi nec. Min tiedën caniquid dies yacno cuëscaquin tambanshun Nuquin Papan chiapaden abentsëc menebanshun utsibo bëdamboen tantiaquin nabantiadquidi mibi neyoc. Adesa icsho Nuquin Papan icsamboen isaidquo mibi nec, padiseyobo. ⁴³ Adembidi, tsusio dapabimboecsho bëdamboen ispashuni, quequin tantiec Nuquin Papan chiaid tantiate shubun puduedash tsusio tsadacno mibi tsadtenec. Adomboembidi tantiec matses iccuedadacno nidequi, Èbi bëquedquidon ëbi tsusio dapabimboecsho isash onquequin chuiplashuni quec mibi capuec. Aden tantiaquid Nuquin Papan icsamboen isaidquo mibi nec. ⁴⁴ Adembidi, matses unësaid chococate manenushe gueshun ismequin mabiunu, quenquo yacpadomboen ëbi icsaid tantianushe quequin ompoquid mibi nec –quepanëdash Esus padiseyobo chiec.

⁴⁵ Adoaquien, Nuquin Papan naden nata quequin chiaid tantiemi, quiash utsibo tantiamequid abentsëc: –Padiseyobo chuiquin ëbipadquido mimbi chuoapec –quepanëdash.

⁴⁶ Adoaquien: –Nuquin Papan ëndenquimbo naden nata quequin chidbëdta mimbi naden nata quequin chiaid dadpen chuibanquin matses mimbi namec. Adoac aited matsesën natiapimbo icpec. Adsho isash, Mimbi natequid dadpen iqueque. Mibi nashunu, quesa icsho Nuquin Papan icsamboen isaid mibi nec.

⁴⁷ “Adembidi, Nuquin Papan chuimiaid dadpen min tsusedpabon cuesunepampic. Tsusedpabon cuesuniampido ënenquiocquin tantianu quiachimboen mimbi shubumpi uabanec. Èmbi shubumpi uaido isun utsibon bëdamboen ispashuni, quequin aden mimbi nabanec. ⁴⁸ Aden naquin tantiec, Nuquin Papan chuimiaido cuesunepaden bëdamboen tsusedpabon napampic, quiachimboen tantiaquid mibi icnuc ambi chuimiampido cuesuniampidobimboecsho Nuquin Papan mibi isec. Nuquin Papan icsamboen isaidquo mibi nec. ⁴⁹ Èmbi chiapaden chuibanta, cabicquin naden Nuquin Papan chuipampic. Èmbi chuimiaid utsi-utsien aton matsesën mëyampec. Utsi-utsien mëyanshun cuesuneppec, quec Nuquin Papa abitedi tantiaquidquo adpampic. ⁵⁰ Aden min tsusedpabo Nuquin Papan chuimiaidon chuisho tantiesa icquin aido mëyampampic. Min tsusedpabopadquid nëbi icquido icquin Nuquin Papan chuimiaid tantiesambo mibi nec. Adquido iquec ëden mëyanampidpadquido mibi neoaic. Aido cuesuniampidpadquido mibi neoaic. ⁵¹ Tsusedpan abia abed cuesunepampid icnubi ambi tsyuec Sacadias cuesunepampic. Aid Nuquin Papa tabadte shubu uashunaid dayunquiobi aidon cuesunepampic. Ai,

Nuquin Papan chiaid tantiesatedi ambi chuimiaido cuesuniampidpadquido nēbi icquid neoaic.

⁵² “Nuquin Papan naden nata quequin chiaid tantiembi, qeshun utsibo tantiamenquiosho Nuquin Papan icsamboen isaido mibi nec. Nuquin Papan chiaid tantienquocquin abi yacno yuedanquid tantiesa mibi nec. Adquid iquec mibi abi yacno puduedtiapimbo iquec. Adquid mibi icquin naden nata quequin chiaiduidi mimbi chiac utsibotsen abi yacno puduedmiantequid tantiesabo yec abi yacno puduedtiapimbo icoaic —quepanēdash Esus Nuquin Papan naden nata quequin chiaiduidi tantiaquido chiech.

⁵³ Aden chiashic, Ēbēdtambi pec cho, queboedēn shubunuēsh puduenanec Esus nidpanēdash. Adec Esus nidambien abi comapenen chieshēnquidombo padiseyobo: —Esus icsamboen chuimenu —quiampanēdash. ⁵⁴ Adquid icquin Esusēn chuibanacno nidanesun chuimeoanuequin naden padiseyobon tantiapānēdash: Ēbitedishun chuimiac Nuquin Papan chiaid icsamboen Esusēn chuitsiash. Aden icsamboen chuisho tantiash, Nuquin Papan chomiad nec, quec mibi muasho tantiashun, Unēs uametiadquio iquebi, quequin Esus chiembi, quequin tantiaquin Esus chuimepanēdash padiseyobon.

12

Natiamantequidbēdtabi dayacmetequid (Mat 10.28-31)

¹ Aden padiseyobon: Esus icsamboen chuimeoanembi, quequin tantianubien mates dadpenquioshē Esus yacno cho-choash tsucus-tsucustsēcquio yec tabadpanēdash. Aido tsucus-tsucustsēcquio yec tabadnubien abēd icquido Esusēn nadopanēdash: —Sicaid nami uaid cabiunac amēec bidisquedoec matesēn isenquiocnobi. Adembidi padiseyobon Nuquin Papan naden nata quequin chiaidbēdta ambibi tantiacpaden naden nata quequin dadpen chuioaic. Aden padiseyobon ambibi tantiacpaden naden nata quequin chuisho, Nuquin Papan naden nata quequin chiaidta nec, quequin Nuquin Papan chiaid bēdamboen ista. ² Matesēn ompoquin naid Nuquin Papan abitedi ismendac. Matesēn ompoquin chienquio yaidbidi abitedi tantiamendac. ³ Inchēshēn min nuntanuēsh mibi icsamboec onquiaid Nuquin Papan matsestedi tantiamequin chuibanendac. Nuntanuēsh shoshquequin mimbi chiaid Nuquin Papan matsestedi tantiamenuen chuioaindac.

⁴ “Adembidi chuinu. Tantiata. Mibi cuesunuequid dacuēdēnenda. Adquidēn mibi cuesunequin mibi nibēdametiapimbo iquendac. ⁵ Nuquin Papauidsēqui dacuēdēnta. Icsadednequid icsho aidēn mibi cuesunemeshun chian anēdēnquequid nēsecaindac. Adoanquiduidtsēqui dacuēdēnta. ⁶ Nuquin Papa tantiaquid yec dacuēdēnta. Nuquin Papan ambi uaidtedi tantiec. Padichucu dadpen icquid abentsēc cueso isun aid Nuquin Papan tantiapec. ¿Adquid tantiaquinda Nuquin Papan mibi tantienquio ictic? ⁷ Ai, mibi tantiaquiec. Min manēdaidtedi ambi tambanaid nec. Aid pistsēcquidtedi tantiaquin Nuquin Papan mibi tantienquioda ictic? Mibi comapenen tantiec.

Esus tantiaquid nebi, quequin utsibon tantianubi chiaid (Mat 10.32-33; 12.32; 10.19-20)

⁸ “Abi chiembique. Tantiapiota. Utsibo icnubi Esus tantiaquid nebi, quequin abimbo chuiquid Nuquin Papa yacno chosho isun, Nēid ēbi tantiaquid neque. Puduedme, quequin chiendambi. ⁹ Adecbidi, utsibo icnubi, Esus tantiaquid nebi, quetiapimbocquid Nuquin Papa yacno chosho isun, Nēid ēbi tantiesa neque. Puduedmēda, quequin Nuquin Papan uaido mayan bēdabo chiendambi. ¹⁰ Ēbi matesacsho matesēn icsamboen chuipēc. Aden

icsamboen chuiboshombic, Icsamboen chiombique. Ęmbi mibi icsamboen chienquio yac bimboec bēpiscudta, Papa, qesho tantiash aidēn icsamboen chienquio yac bimboec Nuquin Papa bēpiscudendac. Nuquin Papan Mayanēn tantiamiac nasho isash, Satanasēn tantiamiaid nec, quequid icpec. Aidēn chiaid bēpiscudenquiocquin Nuquin Papan abi yacno adquid yuedenquio iquendac.

¹¹ “Adembidi chuinu. Tantiaquiota. Mibi chieshēnquido iquendac. Adquid icquin chuiquid dapa yacno Esus tantiaquido ěmbi buanacsho aidēn mēyantsiash, quequin mibi bedshun aid yacno buampec. Aden nanu, quequin buanaqui ¿Atotsimbi chuiquid dapa chuipe? quequin tantienda. ¹² Nuquin Papan Mayanēn mimbi chuibante mibi tantiameque –quepanēdash Esus abēd icquido caic.

Aton na dadpen icquidēn tantiaid icsa

¹³ Adashic, abi datsidadquid abentsēcshun: –Con pa unēsan con pan na dadpen con buchin bedbanosh. Mimbi dadpen bedbamboed musuctanquin min utsi meneta, quequin con buchi chuita –capanēdash Esus chuiquin.

¹⁴ Adoaquien: –¿Buchibēdta mibi chuiquidtabi nepe? –quepanēdash Esus abi chuita caquid caic. ¹⁵ Aden aid chuishumbic utsibo chuiquin nadopanēdash: –Con na dadpen bednu, quesa icta. Mimbi bedaidēnquio mibi Nuquin Papa yacno puduedtiapimbo iquendac.

¹⁶ “Aidpadquid chuinu. Bēdamboen tantiata. Aton na dadpen icnubi aton tiedēn caniquid bacuēash dadpen icsho isash icbo nadposh: ¹⁷ ‘Con tiedēn caniquid bacuē dadpen iqueque. ¿Atontsimbimbi aitedi dayun uapeba? ¹⁸ Naden naimbi. Tiedēn caniquid ěshē dayun uate shubu shēnitedi chīcbanshun aitedi nuamboshēcnuc shubu uabanuna. Aden nuamboshēcnuc shubu uashun aidēnquio con tiedēn caniquid bacuētedi sandoshon dayun uanuna. ¹⁹ Aden dayun uashumbic nadopembi: Con na dadpen iquec yuecash naimēdenquio iquec. Ad icnuc nainquio yec tabadquin peshun anguendambi. Aden naic, Bēdambo iquebi,’ quec aton na dadpen icquid abibi onqueposh.

²⁰ “Adec abibi onquesho tantiashun, ‘Mimbi icsamboen tantiec. Nēid inchēshēmbi mibi unēsec. Adec mibi unēsan ¿mimbi dadpen dayun uaid tsuntsin bedpatsiash?’ quequin Nuquin Papan aton na dadpen icquid chuiposh –quepanēdash Esus.

²¹ Aden chiasich: –Aton na dadpenuidi tantiaquin Nuquin Papan chiacpaden naisa yec aton na nianec unēsash Nuquin Papa yacno tabadtiapimbo iquec –quepanēdash Esus.

¿Atotsimbi napeba? quesa icta, quequin chiaid (Mat 6.25-34)

²² Aden iccuededquido chuishumbic Esusēn abēd icquido nadopanēdash: –Aton na dadpen icquidēn tantiacpaden tantienda. ¿Con na nibēdnuc atotsimbi pepeba? quec dacuēdenda. Adecbidi, ¿Atotsibi dasiuidpeba? quec dacuēdenda. ²³ Bēdamboec tabadnuequin mibi piasteuidi tantienda. Adembidi, Con dada bēdambo icmenuequin, Dashcute bedteuidi tantienda.

²⁴ ¿Uicchunēnda ambibi cuēte ěshē siac bacuēacsho chepadic? Padenquio. Adecbidi, ambi dayun uatequid shubu nibēdnubi aton na nibēdec. Adquid icsho Nuquin Papan aton pete bedmec. Uicchun Nuquin Papapadquidpenquio icshobi aton pete Nuquin Papan bedmec. ¿Ad icnuc ambi abipadquid uaidobi matses icsho aton pete bedmenquioda icpadic Nuquin Papan?

²⁵ Adecbidi, ¿mibi unēste ushē abimbo chonoc, Padi, quepecta mibi icti?

Padenquoio. ²⁶ Adec mibi unëste chonoc, Padi, quetiapimbo mibi iquec ¿atotsi quiash ¿atotsimbi pepeba? quepe mibi?

²⁷ “Adembidi, cuëtempi chuinu. Tantia. ¿Cuëtempinda aton bacuë ictequid daëdcapec? Padenquoio. Adoenquoio yaid aton bacuë ictequid bēdaidquoio iquec. Cuëtempi bacuë ictequid bēdaidquoio yacpadquid chuiquid dapa Sadomonën dashcute adquoio ictiapimbo icpampic. ²⁸ Padnuen cuëte bacuë ictequid bēdaidquoio icboedi badedquoio sequiash chodquiacsho tauiquid. Ad icnuc ¿Abipadquid Nuquin Papan uaido mibi icsho mibi dasiuidte bedmenquioda ipadic? Èbi bedmenquoio ictsiashe quequin Nuquin Papa bēdiactšec tantienda. ²⁹ Aden tantienquoio yec ¿Atotsimbi peshun aque? quec dacuëdenda. ³⁰ Nuquin Papa tantiesan abi bunaiduidi tantianubi Nuquin Papa tantiaquidquoio icquin pete actequidbēdta èbi bedmedonec, quequin tantiec tabadta. ³¹ Adembidi, Nuquin Papabēd tabadnu quequin tantiec tabadta. Aden tantiaquin mimbi bedtiadquoio yaid mimbi bedendac.

Abi yacno choacsho meniaid (Mat 6.19-21)

³² “Nuquin Papan abi yacno mibi chomeque. Dacuëdenda, èbi tantiaquido caimbi. ³³ Ambo nidabi icquin mitsana menebanquin mitsana bedtequid bedshun aton na nibēdquid menebanta. Aden utsi tantiaquin mimbi nabanuc Nuquin Papa yacnoshon menetequid mitsana chodquetemaid iquendac. Ampequidēn bedtemaidquoio iquendac. Capishton petemaidquoio aid iquendac. ³⁴ Mimbi tantiaidquoio mimbi dayun uaid mibi cudasaid nec. Nuquin Papa yacno nidnu quequin mimbi tantiaid icnuc mibi bēdamboec tabadte cudasquin mimbi dayun uaid iquendac —quepanēdash Esus.

Chieshenquiocquin caintequid (Mat 24.45-51)

³⁵⁻³⁶ Aden chuishumbic Esusën nadopanēdash: —Aton icbo u isec nidan con icbo chonoshe quiash dasiuidacchobi ushenquiocquin tabote dēbedtonequin, Con icbo chosho puduedmeshun nashunu, quequin aton yuabon caimpec. ³⁷ Aden abi cainquido aton icbon bēdambo icmequin nadopec: “Èmbimbo mibi pemenu. Nēmbo tabadec cho,” qeshun ambi yuaido ichonquoio pemequin bēdambo icmendac. ³⁸ Adembidi, icbo inchēshpotsembo choshon abi nashunuequin cainquido icsho icbon bēdambo icmiaido iquendac. Adembidi, cachina cuëdanabi badiadabicnuc choshon abi cainquido icbon bēdambo icmiaido iquendac. ³⁹ Adquidpenquoio icbo utsi chuinu. Tantia. Aidi abi cainquid nibēdnubi aton na icnuc isedtanec choshon isac ampequid ēnden nidac. Adsho isash, Ampequid choec, quequin tantiaquid yec nidenquoio icshenobi, quependac icbo. ⁴⁰ Adquiecbidi ampequid choacbimboec Nuquin Icbo choeque. Ad icnuc, Chosho èmbibi tantienquiocchitomanē qeshun chieshenquiocquin èbi cainta —capanēdash Esusën.

⁴¹ Aden Esusën chuisho tantiashe Petedo: —¿Utsi chuiquin mibēd icquidoidi tantiamenuenda chio? ¿Abitedi tantiamenuenda chio? Tantiyanu. Èbi chui —quepanēdash Esus caic.

⁴² Adoquien: —¿Icbon chiac mitsipadquiocquin ambi namiaido bēdamboen napeba? Adquid chuinu: Pete tambanshun musucshun èmbi namiaid utsidedi bēdamboen menebanta, quequin ambi namiaid utsi abentsēc chianec icbo nidac. ⁴³ Adec nidashic choshon ambi chiacpadien ambi namiaidēn chieshenquiocquin nabanacsho isun icbon bēdambo icmiaid nendac. Adquid naden chuipic: Èbi nidan chieshenquiocquin mimbi nabanoque. ⁴⁴ Èmbi namiaid utsibotedi èbipadquiocquin chuiquid

icta. Adquid icquin con natedi dayun uata, quequin chiendac icbon. ⁴⁵ Adquid icnubi adomboen naisa icbo utsin namiaid icpec. Aton icbo yuec choenquicocho isun aton icbon namiaid utsibo chieshëñquin cuesbanshun ambentsëqui nua peshun tantienquo yanquin aguec. ⁴⁶ Aden nabanquin tantienquiocn aton icbo choshon ambi namiaidën icsamboen boesbanaido isun icbon comapenen chesquin abi tantiesa utsibo ambi nidmiacnombo aidi nidmeoaindac.

⁴⁷ “Adembidi, ambi chiacpaden nabanesa icsho isun, Comapenen cuesta, icbon cac cuesendac. ⁴⁸ Aton icbo bunaid tantiaicquidën cuesmetiadquiocquin nabansho aton icbon bēdiactsëc cuesmendac. Adembidi, Nuquin Papan dadpen tantiamiaido ambi chiacpaden nashuntiadquio iquendac. Adembidi, icbon dadpen meniaidon dadpen meneoatiadquidi nendac — quepanēdash Esus.

*Utsibēd bēdamboec tabadnu quesa icquin cuëshēdmequid
(Mat 10.34-36)*

⁴⁹ Aden chiashic abi onquec: —Ēbi tantiaquid icnuc ēbi tantiesa yec cuëshēdendac. Aido ėnden cuëshēdondan ēbi tantiaquidombo bēdamboec tabadtsiandac, quec tsadebi. ⁵⁰ Adecbidi, Yuecshun ēbi unēs uanun mēyantequid iquendac, quequin tantiec, Ēnden mēyanondaid iquec abuc Nuquin Papabēd tabadtsiandabi, quec tsadebi. ⁵¹ ¿Nidaidēnshun abitedi bēdamboen tabadmenu quectabi chodionda? Padenquio. Ēmbi chiaid tantiesa ēbi tantiaquidbēd icboedi cuëshēdtsiash quianec chopondabi. ⁵² Nad iquendac: Min shubun icquid sincoted icboedi Esus tantiaquid utsi-utsiec yanubien utsi padenquio yec cuëshēdec adquid. ⁵³ Nadeccuëshēdtsiash: aton papa ēbi tantiaquid icnuc con papadquid icnu quesa aton mado cuëshēdendac. Shubu utsin aton mado ēbi tantiaquid icnuc aton papa adquid icnu quenquio yec cuëshēdendac. Adecbidi aton tita ēbi tantiaquid icnuc con tapadquid icnu quenquio yec aton champi cuëshēdendac. Shubu utsin, aton champi ēbi tantiaquid icnuc aton tita padenquio yec cuëshēdendac. Shubu utsin aton chaya ēbi tantiaquid icnuc aton babanēn padenquio yec cuëshēdendac. Shubu utsin, aton babanēn ēbi tantiaquid icnuc aton chaya padenquio yec cuëshēdendac —quepanēdash Esus. Abi tantiesa cuëshēdtequid chuibanec.

*Nuquin Papan ismiente isun nad iquendac, quequin tantiaid
(Mat 16.1-4; Mad 8.11-13)*

⁵⁴ Aden abēd icquidombo chuishumbic Esusēn naden iccuededquido chuoapanēdash: —Inchësh chosho isec, Ue choec, quiacpadec choec. ⁵⁵ Adecbidi, ushē chēnquec chosho isash, Chumbo yampec quiacpadec iquec. ⁵⁶ Aden isquin mimbi ēmbi nidaidēnshun ismiaidbēdta abucshun ismiaid mimbi tantiec. Aden abucshun ismiaid isquin tantiaquidquio icquin ¿atotsieshun abucshun Nuquin Papan chomiaid isumbi tantienquiocquin mibi icsaid ėnenquio ique? —quepanēdash Esus iccuededquido caic.

*Utsibēd chushcananquid
(Mat 5.25-26)*

⁵⁷ Aden chiashic: —Utsibēd chushcananquido mibi nec. Adec tabadec ¿atotsi quiash, Naden natiadquidi nebi, quequin tantiashun mibi icsaid ėnenquio ique? ⁵⁸ Utsi icsambocquin mimbi nadenec. Adsho isun matses cuidte chuiquid yacno aidēmbi mibi buanshobi nēish bēdamenuen, Mimbi chiacpadomboen mibi nashunu, quequin bēdamboen chuita. Mibi adenquio icsho matses cuidte chuiquid yacno buanshun mibi icsaid chiac matses cuidte chuiquidën, Quēnēn nauedmenuen buanta, cac buanshun quēnēn

nauedmequidën mibi quënën nauedmepec. ⁵⁹ Aden nauedaqui mimbi icsamboen naboeð cuidnante meniabicnuc quënë yacnoësh mibi pduenti-apimbo iquendac –quepanëdash Esus.

13

Utsibo unësmiacpader unësmemane quequin mibi icsaid ënta caid

¹ Aden Esusën chuibanubien iccuededquid utsibon, Esus chuimenu, quequin caimpanëdash. Aden cainequi Esusën chuibanquin nainsho tantiashun iccuededquid utsibo: –Chuinu. Tantia. Cadidia yacnocquidon Nuquin Papan chiaçpadomboen nidaidën capuquido cuesunesho Pidaton aido cuesunemiosh, quiosh. Aden cuesuniac aidon intac ambi nidaidën capuquido cuesuniadën intachëd daëdash chididiquiosh, quequin chuibanëdash. Aid chiaid tantiashun. ¿Atotsi icsamboen nasho aido cuesunemepashba? caimbi mibi –quecuededpanëdash Esus chiec.

² Adoaquien: –¿Cadidia yacnocquido utsitedi icsaid daëdpactsëc icnuc cuesunemiaido icsaid dadpen icsho aido cuesunemias, quequina mimbi tantiape? ³ Icsamboen mimbi tantieque. Mibitedishun mibi icsaid ënta utsibo unësmiacpader unësmenushe queshun. ⁴ Chuinu. Tantiata. Shubu dadpen icquid Edusaden caid ënëdacno Sidoe yacno tabadquidon ambi abuchun nacnenaid uebudquin abëd icquido 18ted cuesac unësosh, quiosh. ¿Edusaden yacnocquid utsibo icsaid daëdpactsëc icnuc Sidoe yacnocquido icsaid dadpen icquid unësosh, quequina mimbi tantiape? ⁵ Mimbi icsamboen tantieque. Utsibo unësacpader unësmemane quequin mibitedishun mibi icsaid ënta –capanëdash Esusën abi chuimeboedo chuiquin.

⁶ Aden chuishumbic utsitsen chiec: –Icbon cuëte icnuc nadpec: ‘¿Con cuëte ada bacuëashe? Istanu,’ quianec icbo nidpec. Adec nidshun isquien bacuë nibëdec. ⁷ Adsho isun icbon abi neshcashunquid chuiquin nadopec: ‘Seta tedested matamiash cuëte bacuë cuësnuc chouïdobi. Bacuëambo iqueque. ¿Bacuëenquiocquididambi dayun uape? Utsi nitsinun dëdshuneta,’ quequin abi neshcashunquid aton icbon chiosh.

⁸ “Adoaquien: ‘Cuëte bacuëesa ëbi dëdshunemenda. Naden ëbi nameta, icbo. Cuëte bacuëesa tadeshcatanquin seta abentsëc matamequin nidaid chëshë chodquiaid ëbi bëdamboen tasiameta. Adoac bacuëtsias. ⁹ Aden seta abentsëc matamiash choquin bacuëacsho isash bëdambo mibi icpec. Padnuen bacuë nibëdsho isun, Dëdshuneta, ëbi caoata,’ abi neshcashunquid quiosh –quepanëdash Esus. Ëmbi tantiacpader tabadenquicoædi bëdamboen chiaç bëdamboec tabadsho isash ëbi tantiaquid dadpen yanendac, quequin tantieç adpanëdash Esus.

Cashuebudaid bëdamiaid

¹⁰ Adashic, chonoadtemaid ushën Nuquin Papan chiaid chuibante shubun pduedshun Nuquin Papan chiaid Esusën tantiamenubien ¹¹ seta dadpen 18tedi matamequin mayan icsan shuabudaid icpanëdash. ¹² Adquid icsho isun Esusën: –Shuabudaid icboedi nëbi cacueoaid mibi iquendac, chido –cashun ¹³ mishac cacuiash, Nuquin Papan nadatiambocquin naid nec, quequin chiec chido onquepanëdash.

¹⁴ Aden chonoadtemaid ushën Esusën chido bëdamesho isun Nuquin Papan chiaid chuibante shubu isquidon: –Nëid ushë chonoadtemaid ushë neque. Bëdamenu quequin nëid ushënquico bëdamenda. Chonoadtequid ushënquico bëdameta –capanëdash iccuededquido chuiquin.

¹⁵ Adoaquien Esus: –Mimbi chiaçpader naisa mibi neyoc. ¿Chonoadtemaid ushë icnuc, Con yua acte acmebono queshun mimbi yuaid tënëshacchobi acte

yacno buanenquioda mimbi icpe? ¹⁶ ¿Aden chonoadtemaid ushën mimbi min yua acmenuc nëid ushëmbidi chido, min matses Abadauanën tsyuecquid, dadpen seta matamequin Satanasën yuaid icsho mënchiquenquiodambi icpe? —quepanëdash Esus nëid ushën bëdamenda quequido tantiamequin chiec.

¹⁷ Aden Esusën chuisho tantiash, Adenda, quequin bëdamboen chiombi, quetiapimbo yec otacquoio tabadcuedednubi utsibotedi, Esusën nadatiambocquin naidtedi bëdambo iquec, quec bëdambo yec tabadpanëdash.

Cuëte ëshëmpi chiaid

(*Mat 13.31-32; Mad 4.30-32*)

¹⁸ Adashic: —¿Nuquin Papan shubun icquido mitsipadquidquo icpec? ¹⁹ Nadquidquo iqueque. Chuinu. Tantia. Icbon cuëte ëshë pistsëcquicoquid mostasa caid nësecaid dëyucash nuamboshë caniec. Aid cuëte caniaidën cuidin podochoquidën shubu uabededec. Adquiecbidi, Nuquin Papan chiaid chuisho tantiatsëcquidën tantiabenash bëdamocquid icsho isash matses utsibo ëbi tantiaquid Nuquin Papan shubun icquido dadpen yanec —quepanëdash Esus.

Sicaid nami uaidpadquid

(*Mat 13.31-33*)

²⁰ Aden chuishumbic utsitsen chuioaic: —¿Nuquin Papan shubun icquido mitsipadquidquo icpec? ²¹ Nadquid iqueque. Tantia. Sicanun nami uatepadquid nec. Sicaid chidon nami uashun cabiunac amëec bidisquedec. Adomboembidi ëmbi chiaid ëbi tantiaquidën chuibanac ëbi tantiaquid dadpen yanec utsibon isenquiocnobi —quepanëdash Esus.

Pudued-puduedtequid shëcuë pistsëcquio chiaid

(*Mat 7.13-14, 21-23*)

²² Adashic, Edusaden yacmi nidoaquin shubu dadpen icquid utsi-utsiec yacno isbidanquïn shubu daëdpactsëcquid utsi-utsiec yacnotsen isbidanoaquin anocquidotsen tantiamenuen chuibenenu, quec Esus nidpanëdash. ²³ Adec nidsho isun iccuededquid abentsëcshun nadopanëdash: —¿Nuquin Papa yacno matses daëdpactsëcta nidpec? Tantanu. Ëbi chui.

Adoquien Esusën nadopanëdash: ²⁴ —Nuquin Papa yacno pudued-puduedtequid shëcuë pistsëcquio iquendac. Esusquio tantiec aidëmpinquo mibi puduedendac. Mimi tantiaid utsi icnuc tsucusec puduedtiapimbo mibi iquendac. Adquid dadpen icnuc, ²⁵ Nuquin Icbon, Ëbi yacno puduedte ushë naimbudosh, caqui cho-choshon, Ëbi puduedme, quequin comapenen cuëmbededpec.

“Adoquien: ‘Ëbëd icquidpenquo mibi neque. Mibi puduedmetiapimbo iquebique. Mibëd icquido yacno nidtan,’ caindac Nuquin Icbon adquid.

²⁶ “Adoquien: ‘Mibëdtambi peshun acbededombi. Ëbi yacnoshon mimbi tantiamequin chuibansho tantiombi,’ quequin abi tantiesan Nuquin Icho chuipec.

²⁷ “Adoquien: ‘Icsaquido mibi neque. Nëmbo puduedenda,’ quepec Icho. ²⁸ Aden chiaqui Abadauan yec Isac yec Acobo yec quec Nuquin Papan chuimiaido aidtedi Nuquin Icho yacno tabadsho isash abi tanties aadiapimbo yec chian anëdënquiacno tabadec shubiquiec, Nuquin Papa icsambo iquec, quec nëishpec. ²⁹ Nuquin Papa yacno abi tanties puduedtiapimbo nobien nidaidtedi yacnoësh utsibo dadpen cho-choshon Nuquin Papan abia yuedaidobëdtan tsyuec choquidon peshun aquendac. ³⁰ Abi yacno choquido

utsin namiaid icboedi utsi-utsiec chuiquid iquendac. Choquid utsi chuiquid dapa icboedi utsi-utsiec utsin namiaido icoaindac —quepanëdash Esus.

*Edusaden isash anocquido Esus unësqiotequid
(Mat 23.37-39)*

³¹ Aden Esusën chuibanquin naimbudnubien padiseyobo utsi-utsiec choshon: —Ancanquid Edodes mibi cuesunemete buneque. Nëuëshquio nidec nid —capanëdash Esus chuiquin.

³² Adoaquien: —Edodes cuesunemenuecbimboec onquequidquio nec. Aid yacno nidshun naden chuita. Nëbi mayan icsa dapuduemequin ut-sibo bëdamembi. Badiadshun adomboembidi nabanoaimbi. Abadiadshun adomboembidi nabanoaimbi. Ushë utsin-utsinquin adomboembidi nabanoaimbi. Adobanquimbi naimbudembi. ³³ Adobanequi nëbi capuebi. Adobanequi badiadash capuoai. Adobanequi abadiadash capuoai. Adobanequi Edusaden yacno capuoai. Adec capuec ¿Edusaden yacno choabidabi unës uapec? quiosh, Esus quequin Edodes chuita —capanëdash Esusën.

³⁴ Adashic choequi macuësh yacno tabadtuidash shubu dadpen icquid Edusaden caid uano icsho isec Edusaden yacnocquido chiacbimboec Esus nadpanëdash: —Nuquin Papan chuimiado cuesunequido mibi nec. Adem-bidi, Nuquin Papan mibi yacno chomiaido cuënoten se-sequido mibi neoaic. Èbi tantiaquid icmenu, quequin chuideniombi. Cachinan, Con bacuë chieshënuquid choec, qeshun nua shocotsëcshun aton bacuë cudasquin mabësec aton podon. Adem-bidi: Mibi chieshënuquid choec, qeshun mibi cudasquin chuibanombi. Aden chuisho tantiatipimbo yec mibi tabadpoc. ³⁵ Adquido yec nëbi min shubun icquido cudasquid ëbipadquid nibëdec. Nad iqueque. Tantia. Mibi chieshë nec cuesunenuquido choabicnuc ëbi nidacsho yuen ëbi isenguio mimbi iquendac. Yuecash abucuësh choasho isash, Ambi chomiaid Nuquin Papan bëdamboen isaidquio nec, quequin tantienquicoedëmbi tantiendac —quepanëdash Esus Edusaden uano icnuc Edusaden yacnocquido tantimequin chiacbimboec onquec.

14

Padiseyobon shubun Esus puduedash tabadaid

¹ Adashic, chonoadtemaid ushë utsin padiseyobo tsusio dapa isedec Esus puduedsho isun, Nëid ushën natemaid icnuc Esusën bëdamenushe qeshun is-nuequin padiseyobo utsibo tabadquin caimbededpanëdash. ² Aden caimbedednubien podon nidte chedo bidisquiaid uano tsadsho isun Esusën: ³ —¿Chonoadtemaid ushën daicsambocquid bëdamenuicoete ushë nec, quequinda mimbi tantiapë? —caquien ⁴ abi caimbededquido otacquo tabadcu-edpanëdash. Adec aidó otacquo tabadcuenednubien podon nidte chedo bidisquiaid dada Esusën bedshun bëdameshun: —Nidec nid —cac bëdambo yec nidpanëdash.

⁵ Aden aid nidmeshun abi bëdamenushe quequin caimbededquido caic: —¿Chonoadtemaid ushën nua uëdëshcaidën min baca ampäedacsho isun bad-edquido bedtanquin indoenquioda mimbi ictsia? —quepanëdash Esus. ⁶ Aden chuisho tantiaish adquiobidi otacquo tabadcuenedpanëdash.

⁷ Adashic, tsusiobon dayunquio tsadsho isash, Chuiquid dapa nec, ut-sibo quetsiash, quec padiseyobo cho-choec, quequin tantiahsun Esusën nadopanëdash: ⁸ —Pec cho, cac choshon tsadte bëtinennda. Tsadte mimbi bëtinambien shubu icbon ambi pec cho caid utsi mibi chuiquid tsusio chosho ⁹ isun: “Chuiquid dapa choeque. Uano tabadaid,” icbon cac icsamboen

naombi quiash natiaic uano tsadpec mibi. ¹⁰ Naden nata. Pec cho, cac choash utsiuc tsadbudta. Adsho isun: “Uano mibi tsadeque. Nëmbo, chuiquidbëd tsadec cho,” capec mibi shubu icbon. ¹¹ Chuiquidbimboecsho ispashuni, quequid Nuquin Papa yacno choacsho adquid ambi namiaid Nuquin Papan icmendac. Nashunquid ichoedi Nuquin Papa yacno choacsho chuiquid Nuquin Papan mibi icmendac —quepanëdash Esus abëdta yuedaido caic.

¹² Aden aido chuishumbic abi yuedquid Esus nadpanëdash: —Pemenu, quequin mibëd icquid min utsibo aton na dadpen icquidouidi pec cho cainda. Aido pemiac, mibi pec cho caoaic. ¹³ Pemenu, quequin aton na nibëdquido, daicsaidobëdta bëshuaido pec cho cata. ¹⁴ Adquido mibi cuidquin pemetiapimbo iquec. Adquido pemias, Bëdambo iquebi, mibi quepec. Nuquin Papa yacno nidash puduedsho ambi bëdambo icmiaid mibi iquendac —quepanëdash Esus abi yuedquid caic.

Nuquin Papa yacnoshon pequido

¹⁵ Aden Esusën chuisho tantias abëdtan pec tsadquid abentsëc: —Nuquin Papa yacno nidshun abëdtambi pec bëdambo iquebi —quepanëdash.

¹⁶ Adoquien aidi tantiamenuen utsi chiacbimboec Esus nadpanëdash: —Yuednu, quequin nadënguio pec chota, quequin ambi yuedtequid dadpen chuiposh. ¹⁷ Ambi chiacpadën ushë chonoc: ‘Ëmbi chuiboedtedi pec cho quequin chuitanta,’ cac aton yua nidposh. ¹⁸ Adec nidshun chuitidaquien: ‘Nidtiapimbo iquebi,’ quepesh abitedi. Abia chuituida abentsëc nadposh: ‘Ëmbi sëuëmboed dëdabi nidtiapimbo iquebi,’ quepesh.

¹⁹ “Utsibic: ‘Baca bedshun, Bëdamboen nimbanquinda buaneque. Isnu,’ qeshun isedtanenquiocquin ambi bedboed nimbamepesh.

²⁰ “Utsibic: ‘Con chido bedombique. Nidenquio iquebi,’ quepesh.

²¹ “Aden chuisho tantias nidshun aidon chiacpaden aton yuan icho chuoaposh. Adsho tantias nëishun icbon: ‘Ëmbi isedacmaido yacno nidshun, Pec cho, cata. Aton na nibëdquidbëdta daicsaid, bëshuaid chedo chuitan,’ cac aton yua nidposh.

²² “Nidshun chuitanec aidobëdi choshon, ‘Mimbi chuiboedo bëombi. Aido icnubi abi tabadte iquec,’ quepesh yua.

²³ “Adoquien: ‘Shubu ënëdacno nidshun ëmbi chuibocpadquido isun bëoata ma con shubun tsucus-tsucustsëcquio yec ma adquido tabadpanuna.

²⁴ Abia ëmbi pec cho caidon ëbëdtambi petiapimbo iquendac,’ quepesh icho —quepanëdash Esus.

Esuspadquio ictequidquio

²⁵ Adashic, nidsho matses dadpenshun tsibanac abi choacmi bidiadshun isec Esus nadpanëdash: ²⁶ —Ëbipadquio icnuequid aton papabëduidi icquid iquec ëbipadquio ictiapimbo iquec. Adecbidi, aton titabëduidi icquid iquec ëbipadquio ictiapimbo icoaic. Adecbidi, aton chidobëduidi icquid iquec ëbipadquio ictiapimbo icoaic. Adecbidi aton bacuëbobëduidi icquid iquec ëbipadquio ictiapimbo icoaic. Adecbidi, aton utsibobëduidi icquid iquec ëbipadquio ictiapimbo icoaic. ²⁷ Unësmanc quiash mëyanac dayactiapimbocquid ëbipadquio ictiapimbo icoaindac —quepanëdash Esus.

²⁸ Aden chiec Esus abi onquec: —¿Shubu uanu, qeshun abia shubu uaid isec, Nëidtenquio nanu, qeshun aidedtquibidi bëshun toccashun shubu uainquioda icpec? ²⁹ Aden tantienquiocquidën abentse-abentsen bëbëtsëcquin baded naintiapimbo iquec. ³⁰ Adsho isun utsibon mamëshumpec. Bëdamboen isun shubu uaquidpadquid, Esuspadquio icnu, qeshun ëmbi

chiaid bēdamboen tantiabenash adquiobidi icpec. Ēbi tantiauidtsēcquid ēbipadquio ictiapimbo iquec.

³¹ “Adembi chuinu. Tantiata: ‘Mibēd icquidobēd cuesnanuec chuiquid utsi nēmo cho-choec,’ qesho tantiashun nēmbobi icquido chuiquidēn naden tantiapec: ‘Ēbēd icquido daēdpectsēc iquec. Aidtedtsēqui iquec dayacquiocquid icquin chuiquid utsi abēd icquido cuemepec, qeshun ma chobono,’ quequin caimpec. ³² Padnuen, abēd icquido dayactiapimbo icsho isun chuiquidēn: Chuiquid utsi bēquedtanta. Bēquedshun, Mibēdi ictsiabi. Ēbēd icquido chuiquid icta, ēbi chuiquid quiosh, quequin chuita, quequin chuiposh.

³³ Adembi ēbipadquio icnuequidon bēdamboen tantiata. ĴĒbi chuiquid Esus nec, quequin ambi chiapadendambi nabampeba? Ai, adonona, qeshun adota. Adoesa, Esuspadquiocquid nebi, quenda —quepanēdash Esus abi tsibananquido chiec.

*Sa batapentsēcquiocquid
(Mat 5.13; Mad 9.50)*

³⁴ Aden chiashic Esus nadpanēdash: —Sa batambo iquec. Casecac utsibēd daēdash batambo iquec. ĴSa batapentsēcquiocquid casecac batamboda icpadic? ³⁵ Padenquio. Secatequid adquid nendac. Adecbidi Esuspadquio icnu quiash ēbipadquio yanesa chian anēdēnquequid nēsiatequid nendac. Adquid ictiapimbo iquebi, quequin, Tantianu, qeshun tantiapadomboen nabanta —quepanēdash Esus.

15

*Obeca abentsēc bēnudtequid
(Mat 18.10-14)*

¹ Adashic, icsaquid utsibobēd ancanquidēn matsesēn aton na buansho isun aton na bedtequid nēidtedi bedta caido, Tantianu, quiash Esus datsidadpanēdash. ² Adsho isash padiseyobo Esus tantiamenquio yec chushquiabimboec, Abi datsidadquido icsambocquid icsho cacumenquiocquin aidobēdtambi peshun Esusēn aquec, quec abibi onquecuedepanēdash.

³ Adoaquien, tantiaquidquio iquec Esus: ⁴ —ĴMin obeca dadpen 100ted icboedi abentsēc bēnudacsho isun, Nibēnu, quequin min obeca utsi dadpen 99ted nianec nibēnec nidenquioda mibi icpe? ⁵ Aidi nibēnquin istuidash, Con obeca istuidbosh bēdambo iquebi, qeshun chiadquin buanec icbo nidec.

⁶ Shubuno choshon abēd icquido ambi yuedaidobēdta chomeshun: “Con obeca bēnudaid istuidshun bēbosh bēdambo iquebique. Nuquibi penuna,” quequin icbon chuipec. ⁷ Adecbidi Nuquin Papa tantiaquid dadpen icnuc matses icsaquid abentsēcshun abi icsaid ēnsho isash abuc Nuquin Papabēd tabadquido bēdamboshē iquebi, quecuedependac —quepanēdash Esus.

Aton na bedtequid bēnudtequid

⁸ Aden icbon aton yua bēnudaid chuishumbic utsi chiec Esus nadpanēdash: —ĴAton na bedtequid shocoshēmpi 10ted icboedi abentsēc nibēdsho isun tabote taboshon bescaquin chidon nibēnenquioda icpec? ⁹ Ai. Aden nibēnquin istuidshun abēd icquido chomeshun: ‘Con shocoshēmpi abentsēc niadaboedi nibēnquin istuidash bēdambo iquebi,’ quepec chido.

¹⁰ “Adecbidi matses abentsēcshun abi icsaid ēnsho isash abi yacnocquido ambi uaido mayan bēdabobēdi Nuquin Papa bēdambo iquebi, quecuededec —quepanēdash Esus.

Aton mado cuēshēdquid

11 Aden chido chiashic utsi chiacbimboec Esus nadpanēdash: —Aton mado daēd icnubi 12 tsyuec tishaid aton papa caic: ‘Tsusio budquin mimbi chiondacpaden nēbi ēbi aiteded meneta, papa,’ quepondash. Adoac aton na musucshun aton mado abi daēdi menebampondash.

13 “Aden meniac daēdpactsēc ushash aton mado tsyuecquid aton natedi sandoshon buanec nidaid utsi yacno nidash icsamboen nabanec tabadnuc aton natedi naimēdpondash. 14 Aden aton natedi naimēdambic tiedēn caniquid unēsbumian abi nidacnocquidon pete naimēdan tsusion mado chedo comapenec bundocuededpondash. 15 Adec bundoquieci abi nidacnocquid abentsēc yacno nidshun: ‘Mimbi namiaid ictiadquio iquebi,’ caquien: ‘Con chancho pemebanta,’ qeshun aton chancho yacno tsusion mado nidmepondash. 16 Aden nidmiac nidquin chancho pemebanequi ambi chancho pemiaid petiadquio yec tabadshobi anocquidon menenquio icpondash.

17 “Adec natiambo bunec tabadquin aton papa ambi nianondaidbēdta abi icsaid utsitedi tantiec abibi onquec nadpondash: ‘Con pan namiaidon pete dadpen icnubi con na nibēdnuc unēspebi. 18 Nēbi con pa yacno nidshun naden con pa chiembi: Nuquin Papan chiacpaden nainquiocquin mibi tantienquio yec nidshun icsamboen nabanombique. 19 Adquid icsho con mado nec, ēbi cainda, papa. Nēbi min yuapadquid ēbi icme,’ quequin chiembi, 20 abibi quianec aton papa yacno nidoapondash. Adec nidec ancuenquio yacno aton mado nidondaid casenash choshō isash unēsquiocnoc aton mado bēquedquin dayumbudshun shubi uatanquin aton papan tanchoccapondash. 21 Adoac ambibi tantiabocpaden aton papa chuiquin: ‘Nuquin Papan chiacpaden nainquiocquin mibi tantienquio yec nidshun icsamboen nabanec tabadteniobi. Aden naquid con mado ēbi cainda, papa. Min yuapadquid ēbi icme,’ capondash aton madon.

22 “Aden chiaquien bēdambo yanshun ambi namiaidombo naden aton papan chuipondash: ‘Con mado ēnden nidondaid choashe. Dasiuidte bēdaidquio bēshun con mado dasiuinta. Adoshombic mēusudtetsen mēusunta. Adoshombic tapucudtetsen tasiuinta. 23 Adoshombic, bacan bacuē nuacquid dapa bedshun cuesuneta nuquitedi bēdamboec tabadquin penun. 24 Con mado unēsacimbocboedi nēbi ēbēdi tabadoaic. Aidi bēnudacimbocboedi nēbi istuidacimboc choash iquec,’ cac bacan bacuē cuesuneshun codocacsho pebededpondash.

25 “Adnubien bēyuc tishaid tied nantan icpondash. Auēshquio nidec shubu anoentsēqui choquin tentencate cuēdēmec matses cuēdēsho tantiatuidpondash. 26 Aden tantiatuidashien aton papan namiaid istuidash: ‘¿Atotsi naic nec?’ quepondash bēyuc tishaid.

27 “Adoquien: ‘Min utsi ēnden nidondaid choaposh. Aidi choshō isash unēsquiocquin nuquitedi bēdamboec tabadquin pemenuequin aton bacan bacuē nuacquid dapa papan cuesunemiosh,’ cac 28 bēyuc tishaid nēishash shubun puduedenquio icpondash.

“Adsho isash, Puduedenquio iccosh, quequin chiac bēyuc tishaid yacno nidshun: ‘Min utsibobēd bēdambo icnuec cho, mado,’ capondash aton papan. 29 Adoquien: ‘Seta dadpen matamequin mimbi chiacpadomboen nabante-niombi. Adquid icsho ēbēd capuquidobēdta ēbi pemenuen yua utsin bacuē mimbi cuesunemenquiocpaboc. 30 Nēbi mimbi meniaitedi naimbudquinc, chido dada dadpen chudmequic chudquinc caic min mado choacsho isun bacan bacuē nuacquid mimbi cuesunemepaboc,’ quequin bēyuc tishaidēn aton papa chushcapondash.

³¹ “Adoaquien: ‘Mado, ëbëd icquid mibi nec. Adquid icnuc con natedi mitsana neyoc. ³² Min utsi unësacimboeçoedi nëbi choash tabadoaic. Aidi bënudacimboeçoedi nëbi istuidaid nec,’ quequin aton papan choboedën buchi chuipondash —quepanëdash Esus.

16

Icbon na icsamboen isquid

¹ Adshumbic, abëd icquido Esusën naden chuipanëdash: —Icbon, Con na dadpen isquid icta, caid icnubi: Mimbi con na ista caidën mitsana uesbudec, quequin utsibon chuiposh. ² Adoac, ambi con na ista caid chomiasch icbo nadposh: ‘Mimbi con na ista caidën mitsana uesbudec, quequin chioshi. Adoac, con na isquid mibi ictiapimbo iquec, caimbi. Nëbi ðËmbi tambamboed abitedida iqueque? Con na daëd uata quequin ëmbi meniac mimbi daëd uabanquin dada uaid bec cho. Isnu,’ quepash icbo.

³ “Aden chiac icbon na isquid otacquoio onquec: ‘¿Icbon na isquid ictiapimbo yec mitsimbobi tabadpeba? Neshcashunquid ictiapimbo iquebi. Adecbidi, Con na nibëdeque. Bec cho, quetiapimbo icoaibi. ⁴ Naden natsi-ambi. Con icbon na meniondaid abitedi cuidmenquoio yac ëbi yuedtsiash,’ quepash.

⁵ “Aden tantiashun ambi icbon na meniondaid abentse-abentsen chomiac bëyuc choquid chuiquin: ‘¿Tedtsi ëmbi con icbon na meniaqui mimbi cuiden-quiocpaccoc?’ caquien:

⁶ “Bëchi shocosh nuacquid dapan cushtoaid 15tedi bedshun cuidamboc-combi,’ quepash.

“Adoaquien: ‘Mimbi 15ted bedombi, quequin dada uaid secashun dada uatempi bedshun shocosh dapa bëchi cushtoaid 7ted bedshun cuidembi, quequin dada uata.’

⁷ “Aden bëyuc choquid chuishumbic utsi chosho isun: ‘¿Con icbon na tedtsi bedshun cuidenquoio mimbi icpo?’ caquien:

“Tsitsan dapa dadpen 1000ted tiedën caniquid ëshë bedombi,’ quepash.

“Adoaquien: ‘Mimbi aiteded bedombi quequin dada uaid secashun dada uatempi utsin tsitsan dapa dadpen 800ted tiedën caniquid ëshë bedshun cuidembi, quequin dada uata,’ quequin icbon na isquidën chuiposh. Adoac ambi chiacpaden ambi bedaid cuidambocquidën dada uaposh.

⁸⁻⁹ “Aden dada uabansho isun dada uatempitëdi bedshun icbo yacno nidshun meniac isbanec icbo tantiaquidquoio iquec nadposh: ‘Muaquin mimbi dada uamebanquin mibi yuedmetequid con na mimbi aido menioque. Nidec nid,’ caposh icbon —quequin Esusën chuipanëdash. Aden chuishun ambi chuiboed tantiamenuen abi chuibudec: —Nuquin Papa yacno mitsana buantiapimbo icquin nidaidën tabadquin mitsana meniac mimbi meni-aidotsen ëbi tantiaquid yanash unësash Nuquin Papa yacno nidshun mibi tsyuec chosho isun ëbëdtambi aidon mibi yuedendac —quepanëdash Esus.

¹⁰ Aden chuishumbic adomboembidi chuiquin Esusën nadopanëdash: —Icbon na daëdpactsëc bëdamboen isbanquin nashunquid icquin ademibidi icbon na dadpen isbanquin bëdamboen nashunendac. Padnuen, icbon na daëdpactsëc isbanquin icsamboen nashunquid iquin adomboembidi aton na dadpen icsamboen isbanoaindac. ¹¹ Adembidi mimbi nidaidënsun bedquin mimbi icsamboen nabansho isun, ¿Ëbi tantiaquid bëdamboen ista, quequinda Nuquin Papan mibi chuipeba? Padenquoio iquec. ¹² Adembidi, ¿utsin na isquin bëdamboen nashunenquoio icsho isun abi yacno chosho isun mibi menependa ictic? Padenquoio.

13 “Adechidi, chuiquid daëd icnuc aid daëdshun namiaidquio ictiapimbo mibi iquec. Abentsëcshun chiaiduidi tantiaquin utsin chiaid mimb chieshë nec. Adquiobidi Nuquin Papa mibi tantiaidquio icquimbi mitsana bedtequid mibi tantiaidquio ictiapimbo iquec —quepanëdash Esus.

14 Aden chuibanubi aton na bedtequid ambi tantiaidquio icnuc chieshec padiseyobo tabadcuededpanëdash. 15 Adec tabadsho isun Esusën: — Bëdamboen nashumbimboen ismequido mibitedi icsho mibi ompoquin naidtedi Nuquin Papan asquin tantiec. Adembidi, Bëdamboen naquidbimboesco matsesën ispashuni, quequin tantiaquin nasho Nuquin Papan bëdamboen istiapimbo iquec.

16 “Adembidi, acten mentoanquid Uan pado tishabicnuc Nuquin Papan naden nata quequin chiaid Moisesën dada uampidbëdta Nuquin Papan chuimiaid utsibon dada uampid mibi ënden tantiondaid nec. Nuquin Papa yacno puduedmianquid iquec, quequin nëbi chiaid utsi nec. Ad icnuc Nuquin Papa yacno puduedmianquid tantianu, quenquio yec ambibi tantiacpadec puduedte bunec. 17 Abubëd nidaid ënëdtequid icnuc Nuquin Papan naden nata quequin chiaid ënëdiapimbo iquendac.

Aton chido nianquid (Mat 19.1-12; Mad 10.1-12)

18 “Ad icnuc, aton chido bunenquiocquin aid nianshun chido utsi bedquin Nuquin Papan chiaid niacquid nec. Adembidi aton bënë niamboed chido bedquid Nuquin Papan chiaid niacquid neoaic —quepanëdash Esus.

Aton na dadpen icquid icnubien aton na nibëdquid

19 Adequi onquequimbi utsi chiacbimboen Esusën naden chuipanëdash: —Dada, aton na dadpen icquid bëdaidquio dasiuidquidën badiadquidën badiadquidënquien nua peshun acposh. 20 Adnubien aton na dadpen icquidën shubu dayun bëshun tsadunac aton na nibëdquid, Dasado cuëmëdquid, chiuë dadpen icquid tsadposh. 21 Bunquiec ambo tsadec aton na dadpen icquidën peshun secaid bedshun penuec tsadtsëcsho menenquiocposh. Aden menenquiocnoc tsadshobi opa choquin aton chiuë bëtashuntuidposh.

22 “Adnubien, aton na nibëdquid Dasado unëso isun Nuquin Papan uaido mayan bëdabon abuc buanshun Abadauanën dayunquio tsadumposh. Adoambic, aton na dadpen icquidtsen unësashi 23 chian anëdënquiacnoshon mëyanaid icquin abucquio isquien aton na nibëdquid unësboedi Dasado Abadauanën dayunquio tsadpec. 24 Adec aid daëdi tsadsho isun aton na dadpen icboedën Abadauan chuiquin: ‘Ëbi antauideque. Con ana dauebuduquin ëbi ëcpanun Dasado acte bëme, papa,’ caposh.

25 “Adoquien: ‘Chuinu. Tantia, abuido. Ënden nidaidën tabadquin mitsana dadpen bedbanec bëdambo mibi tabadnubien Dasado comapenec bunquiec tsadposh. Nëbi aidi ënabi bëdamboec tabadnubien anchumbo yec mibi tënquebudec. 26 Adboedi, uguëmbo mibi iquec cuëma utsiuc potetemaid icnuc nëuëshquio nidiapimbo iquec. Adquiobidi mibi yacnocquido nëmbo chotiapimbo icoaic,’ quequin Abadauanën aton na dadpen icboed chuiposh.

27 “Adoquien: ‘Ëbi yacno potetemaid icnuc con pan shubu yacno Dasado nidme. 28 Con buchi ado mëdante auc abentsëc 5tedi unësabi yec nidaidëmbi tabadeque. Con buchi ado nëmbo mëyanacno chonoshe qeshun Dasado aido chuimetanta, papa,’ queposh aton na dadpen icboed.

29 “Adoquien: ‘Nuquin Papan chiaid, Moisesën dada uampidbëdta dada uaid utsi isec tsusiobo onquepayoc. Aden chiaid ma min buchi adon tantiaquiopanuna,’ quequin Abadauanën chuiposh.

³⁰ “Adoaquien: ‘Aid tantienquiocsiash, papa. Unësboed nidshun chiac aidon tantiapatsiash,’ quequin aton na dadpen icboedën chuiposh.

³¹ “Adoaquien: ‘Padicnuna. Nuquin Papa tantiesha icquin uincuemiadën chiaid min utsibon tantienquo icpatsiash,’ caposh Abadauanën aton na dadpen icboed chuiquin –quepanédash Esus.

17

Mates icsaid chiaid, ambi Esus tantiaid chiaid, ambi natequid chiaid (Mat 18.6-7, 21-22; Mad 9.42)

¹ Aden chuishumbic abéd icquido Esusën nadopanédash: –Icsa uanquid iquendac. Adquid Nuquin Papan comapenen cuidendac. ² Adquid ëbi tantiabenabicquid icsa uanabicsho cuënote yuëmboequid têtanetanquin acte shodomboshë yacno nënepatecnëdan. ³ Aid tantiec aidpadquid icmane quequin bédamboec tabadquin ismedeneta.

“Utsi icsasho isun: ‘Mibi icsaique. Mibi icsaid ënta,’ mimbi cac: ‘Ai, icsaobique. Ènëdnuna,’ qesho tantiaid aidi icsainquo yacimboec bëpiscudta. ⁴ Mibi icsamboen nash choec: ‘Icsaobique. Ènëdnuna,’ quenuc mibi icsamboen nacmaidbimboec yec bëpiscudta. Mibi padpiden icsamboen nash choaic: ‘Icsaobique. Ènëdnuna,’ queoanuc mibi icsamboen nacmaidbimboec yec bëpiscudoata. Mibi padpiden icsamboen nash padpidec choec: ‘Icsaobique. Ènu,’ queoanuc aيتدedebidi aidi icsambo yenquo yacimboec bëpiscudoata –capanédash Esusën abéd icquido chuiquin.

⁵ Adoaquien: –Nuquin Papa nadatiambocquin nabanquidquo nec, quequin tantiaquidquo ictiadquo iquebique. Adquid ëbi icme, icbo –capanédash abéd icquidon Esus chuiquin.

⁶ Adoaquien: –Cuëtampi ëshë mostasa caid pistsëcquio iquec. Siac dëyucash nua yanec. Adecbidi Nuquin Papa nadatiambocquin nabanquid iquec quequin mimbi bëdiactësëc tantiapec. Aden bëdiactësëc tantiaquin Nuquin Papan nadatiambocquin naban-nabansho isun, Nuquin Papa nadatiambocquin nabanquidquo iquec, quequin tantiabenshun nëid cuëtampi caic, Cuëte mananuc tabadboedi adquecbidi acte nantan tabadoata, quequin mimbi chiacpadec acte nantantsen abi tabadacpadecbidi tabadoaindac –quepanédash Esus.

⁷ Aden chiashic Esus abi onquec: –¿Min yua mimbi neshcata cac nidshun neshcaquin nainash shubuno chosho isun: “Nëmbo tsadquin pec cho,” caquina mimbi icpe? ⁸ Padenquo. “Con pete codocashun ëbi pemeshun acte menetanquin mimbtsen peshun acta,” mimbi caic. ⁹ Aden mimbi chiac mimbi chuiboedtedictsëqui nabanquin mimbi yuaidën naimbudec. Aden naimbudsho isash: “¿Bédamboen mimbi naoc,” quecta mibi icpe? ¹⁰ Padenquo. Ambembi nainquo iccosh. Mimbi chiacpaden min yuan nabanosh. Adembidi Nuquin Papan chuiboedtedtsëqui nabanash Nuquin Icho caic: “Mimbi chuiboedtedi nabampombi. Mimbi namiaid icquin ëmbi naboed ëmbi natequiduidi napombi,” quequin mimbi chuite nendac –quepanédash Esus.

Daushumbocquido bëdamiaid

¹¹ Adashic, Edusaden yacno nidequi nidaid Cadidia caid ënëdacno nidaid Samadia caid yacno datambëtsenec ¹² shubu daëdpactsëc yacno Esus chopanédash. Ambo choshobien daushumbocquidon 10tedishun Esus bëquedtuidpanédash. ¹³ Adquido yec uano tabadquin: –Ëbitedi bédamboen tantiaquin nadatiambocquin naban, icbo –cabededpanédash comapenen cuënquin.

¹⁴ Adsho tantiashun Esusën: —Isadaidbo tsusiobo yacno nidshun ismetanta —capanëdash. Adoac nidanequi abitedi bëdambudnepanëdash.

¹⁵ Adoac bëdamboed abentsëc dëbidiadanec Nuquin Papan naid chiec onquec choaic ¹⁶ Esusën taëno tsadbudash: —Mimbi bëdameboc bëdambo iquebi —quepanëdash Esus caic. Aidi Samadia yacnocquid isadaidpembo nepanëdash.

¹⁷ Adoaquien: —¿Diestedidambi bëdamepo? —quepanëdash Esus dëbidiadanec choboed caic. ¹⁸ Aden chiashic iccuededquidtedi caic: —Nëidi isadaidpembo yequi dëbidiadanec choash Nuquin Papan naid chiec onquenubi ambi chiacpadomboen bëdameboed utsibo isadaidbo icquimbi Nuquin Papan naid chienquio icpec —quepanëdash Esus. ¹⁹ Aden chuishumbic: —Mimbi tantiacpadequi mibi bëdanoque. Nidtoanec nid —capanëdash Esusën daushumbo icboedi chuiquin.

Chuiquid dapabëd bëdamboec tabadte chote ushë
(Mat 24.23-28, 36-41)

²⁰ Adshumbic: —¿Chuiquid dapa abentsëcbëd bëdamboec tabadte ushë choaid mitsipadënquio nuqui ispeque? Tantanu. Èbi chui —capanëdash padiseyobon Esus chuiquin.

Adoaquien: —Chuiquid dapabëd bëdamboec tabadte ushë chote ismete nibëdendac. ²¹ Adecbidi, nëmbobi chuiquid dapa abentsëc choeque. Is, quetiapimbo matses icpec. Adecbidi, Umbo choeque. Is, quetiapimbo matses icoaic. Chuiquid dapa abentsëcbëd tabadte nëmbobi iquec caimbi —quepanëdash Esus padiseyobo abi chuimeboedo caic.

²² Aden padiseyobo chuishumbic abëd icquido Esusën nadopanëdash: —Yuecash natiamantequid icnuc abuc Esusbëd tabadte ushë chopashun, quec èbi iste mibi bunquimbi èbi isenquio mimbi iquendac. ²³ Adec èbi iste bunubien: “Bëdamboec tabadte chuiquid ambo choshe. Istan,” cac abëdi nidenda. Adembidi: “Nëmbobi choshe. Isnu. Cho,” cac istanenda. ²⁴ Nuquin Papa yacno bëdamboec tabadte ushë chonoc abu bedquetani-acbimboec uëshëmbo chënquec èbi chosho abitedishun isbedendac. ²⁵ Aid ushë choabicnuc èbi natiametequid iquendac. Adembidi, chuiquid dapa naid cainquiocquin èbi isadaidbon chieshëmbededec —quepanëdash Esus.

²⁶ Aden chiec Esus abi onquec: —Ëndenquimboshë Noe tabadnuc matsesën icsamboen tantiaded-tantiadednëdacpadomboen èbi choate ushë icnuc adem-bidi matsesën tantiadenepec. ²⁷ Naderc tabadpampic: Nuquin Papan chiaid tantiesa cuidte ushë choec, quenquiocquin abi bunaiduidtsëqui tantiaquin nua peshun nua acbededpampic. Adembidi tantiaquin aton chido bedpampic. Adembidi tantiaquin aton champi menepampic. Aden tantiaquin nabanubien Noebëd icquido cano dapan puduedambic nua mauantequid ue dapambo sequenuc cubudquin Nuquin Papan chiaid tantiesabotedi acte mauanquin mabocac abitedi unësbunepampic —quepanëdash Esus.

²⁸ Adec Noe tabadnuc icsamboen tantiec matses tabadaid chiashic, Esus nadpanëdash: —Adecbidi Dod caid icnuc icsamboen tantiec matses tabadpampic. Nuquin Papan chiaid tantiesa iquec abi bunaiduidtsëqui tantiaquid icoapampic. Nidaidën tabadaiduidquio tantiaquin nua peshun nua actenepampic. Adembidi tantiaquin aton na dadpen bedtenepampic. Adembidi tantiaquin aton tied nitsindenequinc, shubu uadenequinc, caquin napampic. ²⁹ Aden nabanquin Nuquin Papan chiaid tantienquio icnubi shubu dadpen icquid Sodoma caid yacnoshon Nuquin Papan abi tantiaquid Dod cuemepampic. Adnubien tabote dëpesh pasquiacbimboecquid nëdënquetequid ue sequiacbimboec

sequequidën Sodoma yacnocquidtedi Nuquin Papan chiaid tantiesabo unës uabunepampic –quepanëdash Esus.

³⁰ Aden chiashic: —Èbi choate ushë icnuc ëmbi chuibocpadquiec Nuquin Papan chiaid tantiesa yec abi bunaiduidtsëqui tantiaquid iquendac. ³¹ Shubu macano yacno dectatoash mibi tsadnuc ëbi choate ushë chosho isash budanec mitsana bednu quec shubuno puduedenquio yec cuenta. Adecbidi, tied nantan mibi icnuc äid ushë chosho isash shubu yacno mitsana bednuec nidenquio yec badedquio cuenta. ³² Mibi yacnocquidtedi unës uanushe bidadshun isenquio yec cuenta, cac Dod cuenubien aton na tantiec aton chido auchbidi bidiadsho unës uampidpadquid iquenda. ³³ Unësmene qeshun ambi tantiacpadecec tabadquid unësash mëyanacno tabadnubien unësmane quenquiocquin Nuquin Papa yacno tabadte tantiaquin chuiquido unësash Nuquin Papa yacnombo tabadendac. ³⁴ Èbi choate ushë icnuc nad iquendac: Inchëshën daëd usho Nuquin Papa yacno yuednuen abi tantiaquid bedquin abi tantiesa nianendac. ³⁵ Adembidi, chido daëdshun macueso Nuquin Papa yacno yuednuen abi tantiaquid bedquin abi tantiesa nianoaindac. ³⁶ Adembidi, dada daëd aton tied nantan icsho Nuquin Papa yacno yuednuen abi tantiaquid bedquin abi tantiesa nianoaindac –quepanëdash Esus.

³⁷ Aden chuisho bëdamboen tantienquiocquin abëd icquidon: —¿Mitsimbo budpec, icbo? –capanëdash.

Adoquien: —Unësaid yacno edeste bud-budec. Adquiecbidi Nuquin Papan chiaid tantiesa abi bunaiduidtsëqui tantiaquid yacno abi cuidtequid budendac –quepanëdash Esus abëd icquido caic.

18

Cadonequidquio chido chiaid

¹ Adashic, Èbëd icquido chieshenquio yec Nuquin Papa chiec onquian-onquianquidquio ma icpanu quec aido tantiamenu quec Esus nadpanëdash: ² —Shubu dadpen yacno icsambocquid cuidte chuiquid icposh. Aidi Nuquin Papan chiaidbëdta utsibo tantiesa icposh. ³ Adnubien uano tabadquid niantie chido icposh. Aidi icsambocquid cuidte chuiquid yacno nidshun: ‘Èbi icsamboen naquid ma cuidnu chuiquiota,’ quequin chuiposh. Aden chiaqui padenquiocsho isash choded-chodedquin adomboenuidi chuided-chuidedposh.

⁴ “Aden chuidoniaqui abi icsambocquin naquid cuidte chien-quioeboedëmbi chido ënëdenquio yec ⁵ choded-chodedquin adomboembidi chuiosho tantiasun: ‘Nuquin Papabëdta matses tantiesa nebi, quequimbi niantie ënëdenquio yec chodednesho isun uimabudmane qeshun abi icsamboen naquid cuidte chuiquiono,’ qeshun cuidte chuiquidën chuiquioposh.

⁶ Aden chiashic Esus: —Choded-chodedquin chidon chuiosho tantiasun: “Mibi icsamboen naquid cuidte chuinu,” queposh icsambocquid cuidte chuiquid. ⁷ ¿Adomboembidi ambi cuënaidon, Èbi chieshënquid cuidta, quequin chuidoniac, Cuidnu, quenquioda Nuquin Papa icpec? Ai, adendac. ¿Nëbimbobida cuidpeba? ⁸ Abitedi padenquioctsiash. Utsi nëbimbobi cuidenquiocquin choshon cuidendac. Badedquio cuidenquiocsho isash choquin ¿tedectsiashumbimbi ëbi tantiaquin caimbudnequido istuidpendac? –quepanëdash Esus.

Padiseyobo abentsëc icnuc ancanquidën utsin na bedtequid bedmianiaid chiaid

⁹ Adashic, bēdamboquid nebi, quish utsitedi icsambo iquec, quequido tantiamenuen adquidēn tantiaid icsa chuiquin Esusēn nadopanēdash: ¹⁰ — Nuquin Papa tabadte shubu uashunaid yacno Nuquin Papa chiec onquenuc nidnuequid daēd icposh. Abentsēc padiseyobo icnubi ancanquidēn utsin na bedmianiaid utsi icposh. ¹¹ Nuquin Papa tabadte shubu uashunaid yacno abi daēdi choash puduedash uano nidtuidshun padiseyobon ambi tantiacpaden naden Nuquin Papa chuiposh: Bēdamboquid nebi, Papa. Ampequido utsibo icnubi icsamboen nabanquido utsibo icnubi aton chidopen chūdquido utsibo nec. Adoesambo nebi. Adecbidi, choboed, ancanquidēn utsin na bedtequid bedmianiaidpadquidpenquo nebi, Papa. ¹² Adembidi, chonoadtemaid ushē yambi chonoadtemaid ushē utsi choabicnuc daēdec ushquin mibi tantiaquin buna mēmundenembi. Adembidi, uno bedanquin dies yacno cuēscquin con na tambanshun 9ted dayun uaquin abentsēc mibi menedenembi, Papa, quequin padiseyobon chuiposh.

¹³ “Aden padiseyobon uanoshon chuinubien ancanquidēn utsin na bedtequid bedmianiaid puduedash nidtuidash: ‘Icsamboquid nebi, Papa.’ Adquid nebi quequin ismec shuebudacchobi abuc Nuquin Papa yacno isenquo yec abi onquec: ‘Icsamboquin nabanquid nebique. Ēbi tantiaquin pauc, Papa,’ queposh — quepanēdash Esus.

¹⁴ Aden chiasic: —Chuinu. Tantia. Ancanquidēn utsin na bedtequid bedmianiaid Nuquin Papan bēdamboen isaidquio icnubien padiseyobo ambi icsamboen isaidquio icposh. Icsaisa yacimboec, Bēdamboquid nebi, quequid yuecshun Nuquin Papan aidēn icsamboen tantiaid ismequin chien-dac. Padnuen, icsamboquid nebi, quequin tantiaquid yuecshun ambi bēdamboen naid Nuquin Papan ismequin chuiaindac — quepanēdash Esus.

*Bacuēbo Esus yacno bē-bēaid
(Mat 19.13-14; Mad 10.13-16)*

¹⁵ Adshumbic, aton bacuēbo Esus mishmenuequin utsin-utsinquien bē-bēsho isun: —Bacuēbo bē-bēenda. Esusēn nabanaid utsi iqueque. Nidanec nid —capanēdash Esusbēd icquidon.

¹⁶ Aden chuisho tantiaish Esus nadpanēdash: —Bacuēbo nidmenquiocquin con dayunquo cho-chome. Chiac, Abimbo caic, quequin tantiaquidquio bacuēbo nec. ¹⁷ Adomboembidi, Nuquin Papa yacno tabadte iquec, quequin chiac bacuēbon badedquio tantiacpadomboen tantiec Nuquin Papa yacno puduedtequid iquendac. Aden tantiesa ambo puduedtemaid iquendac — quepanēdash Esus.

*Nēbi caniquid chuiquidēn chiaid
(Mat 19.16-30; Mad 10.17-31)*

¹⁸ Adshumbic, nēbi chuiquid caniquidēn: —Nuquin Papa yacno nidnuequin ¿atotsimbi nape? Bēdamboen tantiaquidquio icquin ēbi chui. Tantianu —capanēdash Esus chuiquin.

¹⁹ Adoaquien: —¿Mitsipaden tantiec bēdamboquid nec, quepe mibi? Nuquin Papauidtsēqui bēdamboquid nec. ²⁰ Abi yacno nidnuequin ambi naden nata quequin chiaid naden mimbi tantiapec: “Mimbi inacmaid chudenda; ambi chiaid utsibic, cuesunianenda; utsibic, utsi mua uaquin chienda; utsibic, papan chiaidbēda titan chiaid tantiaquin nabanta,” quequin chiampid mimbi tantiapec —capanēdash Esusēn nēbi chuiquid caniquid chuiquin.

²¹ Adoaquien: —Canidotsēcquimbi aden nadeniondambi —quepanēdash nēbi caniquid.

²² Aden chuisho tantiaish: —Abentsēc mimbi nabicquid iqueque. Mitsanatedi menequin bedtequid bedbanshun aton na nibēdquid menebanta.

Aden mimbi menebanac ëbi tantiaquid dadpen yanash Nuquin Papa yacno nidendac. Aden meniash ëbëd iquec chota –quepanëdash Esus.

²³ Aden Esusën chuisho tantiash aton na dadpen tantiec unësquio yanshun Esusën chiapaden natiapimbo icpanëdash. ²⁴ Adsho isun: –Aton na dadpen tantiaquin Nuquin Papa badedquio tantiatiapimbo adquidën iquec. Nuquin Papa tantienquio yec abi yacno puduedtiapimbocquid iquendac.

²⁵ Adquiecbidi shëcuë pistsëcquid puduedte nidaidën capuquid dapan badedquio tantiatiapimbo iquec. Tantiamiac puduedec. Adembidi Nuquin Papan shubu abentsëquën puduedmianquid icsho aton na dadpen icquidën badedquio tantiatiapimbo icoaic. Aden aid tantiatiapimbocquid ambibi tantiacpadequi puduedte bunec –quepanëdash Esus.

²⁶ Aden chuisho tantiash iccuededquido nadpanëdash: –¿Tsutsi Nuquin Papa yacno puduedquid icpec? –quepanëdash Esus caic.

²⁷ Adoquien: –Matses ambibi tantiacpadeq puduedtiapimbocnoc Nuquin Papambien abi yacno yuedanquid matses tantiamendac –quepanëdash Esus.

²⁸ Adoquien Petedo: –Mibëd icnu, quequin ëbëd icquidbëdta con natedi nianondambi, icbo –quepanëdash Esus caic.

²⁹ Adoquien: –Abimbo mimbi chioque. Tantiata. Chuinu. Nuquin Papabëd shubu abentsëquën tabadaid chuibanuequin aton shubu icnuc aton chidobëdta aton bacuëbo nianacsho ³⁰ ambi nianaidtedimbo tambanquin daëd uabanquin Nuquin Papan nëbi bëdambo icmeshumbi abi yacno nidacsho bëdambohëd icmiaid mibi iquendac –quepanëdash Esus Petedo chiec.

Ëbi unës uaindac, quequin Esusën chiaid
(Mat 20.17-19; Mad 10.32-34)

³¹ Adashic, abëd icquido uano buanash: –Edusaden yacno nuquibi nidoaic. Ambo choacsho Nuquin Papan ëbi chuiquin dada uamiampicpaden icsambocquin ëbi nabanendac. ³² Anoshon bedshun buanshun isadaidbon isadaidpembo ëbi menendac. Aden meniäc bedshun ëbi mamënsumbededquimbi, icsamboen chuibededquimbi, dacuishtuabededquimbi, dacuesbededtsëcquien mëyanshun ëbi cuenstendectanquin unës uaindac. ³³ Adoquid daëdec ushtanec uincuenendabi –quepanëdash Esus abëd icquido chiec.

³⁴ Aden abi unëste Esusën chuisho abëd icquidon bëdamboen tantienquio yec tabadpanëdash.

Bëshuaid bëdamiaid
(Mat 20.29-34; Mad 10.46-52)

³⁵ Adashic, Edusaden yacmi nidequi Edico caid shubu dadpen yacno anoentsëqui Esus chonobien podqued cuëmambi bëshuaid tsadpanëdash. Matses cuensho tantiash: “Mitsana bedtequid bec cho,” quepanëdash bëshuaid.

³⁶ Adec tsadquimbi matses dadpen cuen-cuensho tantiashun: –¿Atotsi quec cuen-cuene? –capanëdash. ³⁷ Adoquien choquid abentsëc: –Nasaded yacnoësh choquid Esus cuenec nec –quepanëdash.

³⁸ Adsho tantiashun bëshuaidën: –Dabid, tsusedpan mado mibi icquin ëbi tantiaquin nata –capanëdash Esus cuënquin.

³⁹ Adshobien: –Adec cuëdenquio yec tsad –capanëdash choquidon.

Adoquien bëdiactëc cuëmboedëmbi comapenquien: –Tsusedpa Dabidën mado mibi icquin ëbi tantiaquin nashunta –caoapanëdash bëshuaidën.

⁴⁰ Adoac nidtuidshun Esusën: –Aidi bec cho –cac abi yacno bësho isun:

⁴¹ –¿Atotsimbi mibi nashumpeba? –capanëdash Esusën bëshuaid chuiquin.

Adoquien: –Bëshuaid nebique. Ëbi bëucshune, Icbo –capanëdash.

⁴² Adoaquien: —Mimbi tantiacpadomboen padpidemboen is —cac
⁴³ badedquio isbenshun bëshuacboedën Esus tsibanquimbi Nuquin Papan
 naid chuibanquin isbanec onquec nidpanëdash. Aid bëdänsho isun Esusbëd
 nidanequidotedishuntsen Nuquin Papan naid chuibededpanëdash.

19

Saqueyo, ancanquidën utsin na bedtequid bedmianiaid dapa

¹ Adec nidequi Edico caid yacno datambidanec Esus nidpanëdash. ² Edico
 yacnocquid Saqueyo cuëmëdquid icpanëdash. Aidi ancanquidën utsin na
 bedtequid bedmianiaid dapa iquec aton na dadpen icquid icpanëdash.

³ Adoaid icquimbi utsi, Esus cuenec, qesho tantiaash, ¿Mitsipadquidquio Esus
 neque? Isnu, abibi quianec nidquimbi matses ënapen icquid dadpen Esus
 datsidadacsho bushcuctsëcquid icquin Esus Saqueyon isenquio icpanëdash.

⁴ Adash, Nëid podquedën Esus choec, quianec podqued cuëman nidquidën
 cuëte dapan dectatoash isec cuidin tsadpanëdash.

⁵ Adec tsadnubien aid podquedënquio choec niduntidshun Saqueyo
 bushcuctsëcquid istuidshun Esusën: —Nëbi mibi yacno nuquibi tabadec
 nidnu. Baded bud —cac ⁶ Saqueyo badedi budpanëdash. Budanec nidquin
 Esus buanec aton shubuno choshon: —Mibi ëbëd icte bunsho isash bëdambo
 iquebique. Pudued —Saqueyon cac Esus puduedpanëdash.

⁷ Adec puduedsho isash Esus tsibananquido: —Icsaquidën shubun Esus
 puduedosh —quecuedëpanëdash.

⁸ Adnubien, aton shubu nuntanuësh nidtoash Saqueyo: —Chuinu. Tania,
 Icho. Nëbi con na mais uaquin aton na nibëdquid menenun nabono.
 Adoshombic, con matses: “Con na mimbi ampioc,” qesho tantiaashun ëmbi
 ampiaidbëdta daëd-daëdquiecnuc daëd uaquin menebanembi —quepanëdash
 Esus chieci.

⁹ Adoaquien: —Chian anëdënquequid nësiatsemboedi aton tsusedpa
 Abadauan yanampicpaden tantiaquid Saqueyo yanacsho nëbi mënchicaid
 iquec. ¹⁰ Icsambocquid Saqueyo icbocpadquid nibënquin istuidshun
 nësecanushe qeshun mënchicnuec chopobi —quepanëdash Esus Saqueyobëd
 icquido caic.

Aton na bedtequid 10ted icquid meniaid

¹¹ Aden Esusën chuisho tantiaashun Edusaden yacno choash chuiquid dapa
 Esus yantsiash, quequin utsibon icsamboen tantiaapanëdash. ¹² Aden tan-
 tianubi tantiaquidquio icquin utsi chiacbimboen aido tantiamenuen Esusën
 nadopanëdash: —Chuiquid dapan mado: ‘Ënden caniaid iquebique. Nëbi
 ëbitsen chuiquid icnuec chuiquid dapa yacno nidaid utsi yacno nidendabi.
 Anoshon chuiquid icmiac nëmbo choaindabi,’ ¹³ qeshun ambi namiaido
 10ted icquido chomeshun aton na bedtequid abentse-abentsen menebam-
 posh. Aden menebanash: ‘Ëbi nidän ëmbi meneboed bëdamboen nabanquin
 daëd uata ma choshon dadpen bedoapanuna,’ quianec chuiquid ictiadquioc-
 quid abi chuiquid dapa yacno nidposh.

¹⁴ “Adec aid nidambic abi yacnocquidon abi chieshënquido nadposh:
 ‘Aidi ëbitedi chuiquid icmenushe qeshun chuiquid dapa yacno chuitanta,’
 qeshun abëd icquido chuimenuen chuiquid dapa yacno nidmeposh.

¹⁵ “Adoaqui, Chuiquid icnu, quianec nidboed chuiquid icmeposh. Aden
 chuiquid icmiac aton shubuno choash, Con na bedtequid ¿tedsi daëd ua-
 pashba? abibi qeshun ambi meneboedo chomeposh.

¹⁶ “Adoac bëyuc choquid: ‘Mitsana bedtequid abentsëc icboedi utsi 10ted
 icnuc daëd uaombi, icho,’ queposh.

17 “Adoaquien: ‘Ëmbi meneboed abentsëc bedshun bëdamboen mimbi daëd uaque. Nëbi mimbi daëd uaidtedquiobi shubu dadpen icquid 10ted uano-uanoecquido chuiquid icta,’ caposh abi chuiquidën.

18 “Adnubien utsi: ‘Mitsana bedtequid abentsëc icboedi utsi 5ted daëd uaopmbi,’ queposh.

19 “Adoaquien: ‘Mimbi daëd uaidtedquiobi shubu dadpen icquid 5ted uano-uanoecquido chuiquid icta,’ caposh abi chuiquidën.

20 “Adnubien utsitsen: ‘Mimbi abentsëc menetsëcboed ëmbi dashcute cuëshaidën dayun uaboed në iquec, icbo. 21 Mitsana bedtequid mimbi tantiactedimbo daëd uatiapimbo ictsiabi, queshun dayun uaombi. Utsin na utsin nitsinaidbidi bedbanquid mibi icsho isash chushcanushe quiash dacuëdec tsadteniobi,’ queposh.

22 “Adoaquien: ‘Ëmbi chiaid niacquid mibi neyoc. Mimbi mua uaquin chiaidtedimbocsho mibi cuidtequid iquendac. ¿Utsin na utsin nitsinaidbidi bedbanquid mibi icsho isombi, ëbi chiec quecta icco? 23 ¿Aden tantiaquin atotsieshun ëmbi chiaid nanuequin ëmbi meneboed daëd uamequin utsi menenquo icco? Aden meniac daëd uashun bedtsenombi,’ queposh abi chuiquid.

24 “Aden aton na daëd uaisa chuishumbic iccuededquido chuiquin: ‘Ëbi chieshënnquin con na daëd uainquiocquin ambi dayun uaboed bedshun ëmbi abentsëc meniaid 10ted icnuc daëd uaboed meneta,’ caposh abi chuiquidën.

25 “Adoaquien: ‘Aton na dadpen iqueque. Aid menenda, chuiquid,’ queposh iccuededquido.

26 “Adoaquien: ‘Chuinu. Tantia. Ëmbi chiapaden nabanquin daëd uacsho isun ëmbi meneboed daëd uaquin menembi. Ëmbi chiapaden chieshquin daëd uainquiocsho isun ëmbi meneboed bedshunembi. 27 Ademibidi ëbi chieshënc abi chuiquid dapa ëbi icmete bunesabo nëmbo bec cho. Bëshun ëmbi isnubi abitedi cuesuneta,’ caposh abi chuiquidën —quepanëdash Esus.

*Chuiquid dapabimboec yec Edusaden yacno Esus choaid
(Mat 21.1-11; Mad 11.1-11; Uan 12.12-19)*

28 Aden chuibanashic Esus Edusaden yacmi nidequi anoentsëqui choash nidtuidpanëdash. 29 Uano macuësh Odibos caid potsembo shubu daëdpactsëc icquid Bedpaque caid icnubi shubu daëdpactsëc icquid utsi Betania caid icpanëdash. Adec nidtuidash abëd icquid daëd caic: 30 —Nëid podquedën nidquimbi shubu daëdpactsëc yacno choshon cabayobitsecquidën bacuë caniaid catsadabicquid tënëshaid mimbi istuidendac. Aid istuidshun tënëshaid tëchicshun nëmbo bëta. 31 Aden chicsho isash: “¿Atotsi canun mimbi aid chicpe?” quepec. Adsho tantiashun: “Con Icho bunaid nec,” quequin chuita —quepanëdash Esus.

32 Adoac nidshun istuidtanquin 33 cabayobitsecquidëmpi tënëshaid tëchicsho isash: —¿Atotsi canuen aid tëchique? —capanëdash icbon.

34 Adoaquien: —Con Icho bunaid nec —queshun Esus yacno nimbanquin abi tënëshaidën buampanëdash Esusbëd icquidon.

35 Aden bëshun, Chuiquid dapa Esus nepanui, quec onqueshun Esusbëd icquidon aton dashcute bëntsecquid chictanquin cabayobitsecquid capuchshun Esus catsadunash nidnubien iccuededquidonsen aton dashcute bëntsecquid chictanquin podqued ansambanec nidanepanëdash. Chuiquid dapa Esus nepanui, queshun aidontsen adopanëdash.

³⁷ Adec nidanec macuësh Odibos caid budtuidequi iccuededquidtedimbo bëdambo iquec comapenen Nuquin Papan nadatiamboquin naid ambi isboed naden chiec comapenec onquecuededpanëdash:

³⁸ —Nuquin Papan chomiaid ambi chuiquid dapa icmiaid ambi bëdambo icmiaidquibidi nec. Nuquin Papa yacno abëdi bëdamboec tabadequi ic-saisatedi iquendac —quepanëdash iccuededquido comapenec cuëdcuededec.

³⁹ Adec cuëdcuededsho tantiashun padiseyobon: —Adec onquenda, quequin mibëd icquido chuita —capanëdash Esus chuiquin.

⁴⁰ Adoaquien: —Ëmbi naid chiec aitedi cuëdcuededenquiocnoc cuënote podqued cuëman samëdquido onquianendac —quepanëdash Esus padiseyobo chiec.

⁴¹ Adashic, adanec nidequi Edusaden anoentsëqui choquin anocquido abi tantiesabo tantiec shubiec Esus nadpanëdash: ⁴² —Ëbi bëdambo icmequid Esus nec, quec nëbi ëbi tantiaquid mibi ictsiandac. Tantiesa icquin mibi chuiquid mimbi nibënacpadquid mimbi istuidtiapimbo iguendac. ⁴³ Yuecashi choquin uimanëmënuquidon mibi cuentiapimbochoc tsicatabudcuendac. ⁴⁴ Aden mibi tsicatabudcuenshun min bacuëbobëdtabi naimbudquin mibi unës uashun nendac. Min shubutedi nibëdquidac. Nuquin Papan chomiaid ëbi tantiesa icsho cuidtequido mibi nendac —quepanëdash Esus. Edusaden uano icnuc abi tantiesabo tantiec unësquio icnuc anocquido chiacimboec adpanëdash.

Nuquin Papa tabadte shubu uashunaid yacnoshon cuemiaid

⁴⁵ Adashic, Edusaden yacno Nuquin Papa tabadte shubu uashunaidën puduedshun nuntanshunquo aton na bedtequid bednun menebanquido Esusën cuemepanëdash. ⁴⁶ Cuemec: —Nuquin Papan chuipampid nad iqueque. Tantia: “Ëbi tabadte shubu uashunaid ëbi chiec onquianete shubu iquendac,” quepampic. Aden Nuquin Papan chuipampid icnubi ampequido tabadte shubu Nuquin Papa tabadte shubu uashunaid mibitedishun icmebededayoc —quepanëdash Esus aitedi cuemec.

⁴⁷ Adoshombic, badiadquidën-badiadquidënquiec Nuquin Papa tabadte shubu uashunaidën puduedtenequin Nuquin Papan chiaid tantiamenuen Esusën chuibampanëdash. Anoshon chuibansho isun isadaidbo tsusiobon: ¿Mitsipadentsimbi Esus cuesunepeba? quequin caimbededpanëdash. ⁴⁸ Aden caimbededquimbi Esusën chiaid tantianu quec dadpen Esus datsidadacsho isun ashunquo isadaidbon Esus cuesunemenuen bedtiapimbo icpanëdash.

20

¿Tsundan chuibanta caid mibi ne? (Mat 21.23-27; Mad 11.27-33)

¹ Adashic, Nuquin Papa tabadte shubu uashunaidën puduedshun, Nuquin Papa yacno yuedanquid iquec, quequin Esusën chuibanubien isadaidbo tsusiobo cho-chopanëdash. ² Cho-choshon: —¿Tsundan chuibanta caid mibi neque? Tantianu. Ëbitedi chui —capanëdash.

³ Adoaquien: —Ëmbia tantianu. Ëbi chui. ⁴ ¿Nuquin Papan ëmbi chiaid chuibanshun mentobanta caidta Uan icpondash? Padenquo mibi quenuc, ¿Matsesën nata caidta nepondash, quequinda mimbi tantie? —quepanëdash Esus isadaidbo tsusiobo caic.

⁵ Aden chiac isadaidbo tsusiobo onquecuededec nadpanëdash: —Nuquin Papan nata caid Uan pado nepondash, ëbitedi guesho tantiash Esus nadpendac. ¿Atotsieshun Uanën chuisho mibitedishun tantienquo icponda?

6 Matsesën nata caid Uan pado niondash, ëbitedi quesho tantiashun icuededquidon cuënoten nuquitedi se-sependac. Nuquin Papan chuimaid, Uan icpondash, quequin icuededquidon tantiec –quepanëdash isadaidbo tsusiobo.

7 Adec onquecuededash: –¿Tsuentsin nata caid Uan pado icpondash? quequin tantiambo iccombi –quepanëdash tsusiobo.

8 Adoquien: –Mimbi chienquo yacpadembi ëmbitsen ëbi chuita caquid mibi chienquo icoaimbi –quepanëdash Esus.

Neshcashunquidon icsambocquin naid

(Mat 21.33-44; Mad 12.1-11)

9 Aden isadaidbo tsusiobo chuishumbic, Utsi chuinu, quiacimboen Esusen nadopanëdash: –Tied icbon aton tied nitsinshun aton tied cuësh-cuëshquin ambi ëbi neshcashunta caidtedi istuidash tied icbo nidposh. Nidaid utsin yuec tabadshumbic: ¹⁰ ‘Tiedën caniquid ënden bacuëpash. Ëbi neshcashunquidën musucaid con na bedmenü,’ quesun ambi namiaid aton tied yacno icbon nidmeposh. Nidmiac ambi bedtan caid tied yacno chosho isun cuestanquin tiedën caniquid bacuë ambi musucaid menenquiocquin abi neshcashunquidon icbon chomiaid nidmeoposh. ¹¹ Adoshombic, icbon aton tied yacno ambi namiaid utsi nidmeoposh. Aid chosho isun adem-bidi cuestanquin icsamboen nashun ambi musucaid menenquiocquin icbo neshcashunquidon aidtsen nidmeoposh. ¹² Adoshombic, ambi namiaid utsitsen icbon nidmeoposh. Aidi chosho isun chiuë-chiuëpambocnoc cuestanquin tied tsitsuno icbo neshcashunquidon aidi netamposh.

¹³ ‘Netamboedi nidoanec icbo yacno choacsho isash: ‘¿Mitsipadentsimbi napeba? Con madombobi ëbi cudasaid con tied yacno nidmembi. Aidi con tied yacno chosho bëdamboen ispec,’ quequin aton mado nidmeposh.

¹⁴ ‘Aden nidmiac aton mado aton papan tied yacno chosho isash icbo neshcashunquido nadposh: ‘Tied icbo unësan aton natedi bedquid aton mado nepec. Aden bednushe aidi cuesunenuna. ¹⁵ Aden cuesunian icbo unësan aton natedi nuquin na ictsiandac,’ quecuededshun tied tsitsuno icbon mado buanshun icbo neshcashunquidon cuesuneposh –quequin chiashic Esus:

“ ‘Min mado cuesuniosh,’ quequin utsin chiac ¿atotsi tied icbon napec?

¹⁶ Naden napec. Abibi aton tied yacno nidshun abi neshcashunquido cuesuneshun aton tied ambi cuësh-cuëshaid abi neshcashunquid utsibo aton tied yacno tabadmendac –quepanëdash Esus.

Adsho tantiash: –Adoenquo icpashun –quepanëdash iccuededquido.

¹⁷ Adoquien iccuededquido bëisequi Esus nadpanëdash: –¿Nuquin Papan dada uamiaiðen naden chienquioda icpampic? Ai, aidiën chuipampid nad iquec: “Shubu uanuequidën isuidaid buintad utsin ambia nitsinaid icposh.” ¹⁸ Buintad sec uebudec podquëd-podquëdendac. Adembidi buintad uebudquin matses tish-tishendac. Adembidi, abi yacno puduedmianquid tantiaidquid Nuquin Papan cuëshëdmiac comapenen cuidte yacno tabadendac –quepanëdash Esus.

¹⁹ Aden Esusën chuisho tantiash: –Nuqui naid chiacimboen chiec Esus niosh –quiash isadaidbo tsusiobo Esus bedte buncuededquin iccuededquid dadpen icnuc Esus bedtiapimbo icpanëdash.

Sesadën shocoshëmpi neque. Mene, quequin chiaid

(Mat 21.45-46; 22.15-22; Mad 12.12-17)

²⁰ Adec Esus bedte bunquin isadaidbo tsusiobon ambi Esus ista caido Esus yacno nidmepanëdash. Ambi ista caido, Bëdambocquid nebi, quequin ismiacimboecquid icsho Esusën chuibanacno tsusiobon nidmepanëdash. Esus yacno nidshun ëmbi ista caidon chuimiac Esusën icsamboen chuishiash.

Aden chuisho isadaidpembo ancaquidën Esus bedpashun, quequin tanti-aquin nidmepanëdash. ²¹ Aden nidmiac choash Esus ista caid abentsëc: —Mimbi tantiamequin chuibanaid bëdambo iquec, quequin tantiembi, Abitedi Nuquin Papan chiaid abimbo chuibanquid mibi nec. ²² Adquid mibi icquin ëbi chui. Tantienu. ¿Ancanquid Sesad cuëmëdquid isadaidpembo icquin ambi piucquid shocoshëmpi bec cho caid isadaidbon menetiadquidida nepec? —quepanëdash isadaidbo tsusiobon ista caid Esus caic.

²³ Aden chuisho tantiashun choboedën icsamboen tantiaid tantiaquin Esusën nadopanëdash: ²⁴ —Piucquid shocoshëmpi ancanquidën bec cho caid sananquin abuc cadota —cac sananquin abuc cadoshò isash: —¿Tsuntsin podo bitsi dada uaid aidën icpec? —quepanëdash Esus.

²⁵ Adoaquien: —Ancanquid Sesadën na nec —quepanëdash tsusiobon ista quequin chomiaid.

Adoaquien: —Ancanquid, Bec cho, queshe meneta. Nuquin Papan naden nata cac adobanta —capanëdash Esusën. ²⁶ Aden chiac, Bëdamboen tantiaquidbimboec onquec, quequin tantiaquin icsamboen chuimetiapimbo yec tsusiobon chomiaid otacquo tabadcuededpanëdash.

Uincuen uaid chido bedesa nec, quequin chiaid
(Mat 22.23-33; Mad 12.18-27)

²⁷ Adashic, saduseyobo caido yec ²⁸ unësaid uincuen uate nibëdec quequin chuiquido Esus yacno chopanëdash. Aido choash: —Unësaidën chido bedshun aidën tishmiaid unësaidën bacuëbobimboecquid iquendac, quequin Moisesën dada uapampic. ²⁹ Aden Moisesën dada uaid icnuc dada 7ted iccuededposh. Aided dada icnuc bëyuc tishaidën aton chido bedshun bacuë tishmiabi yec unësposh. ³⁰ Aton buchi unësan aidën chido bedash adecbidi bacuë tishmiabi yec unësoaposh aton utsi. ³¹ Adembidi, bëyuc tishaid tsibanquidën—tsibanquidënquien chido abentsëqui bedto-bedtoec bacuë tishmiabi yec unësbuneposh. ³² Yucash chidotsen unësoaposh. ³³ Adec chido abentsëcshun bënë dadpen icboedi uincuen uate ushë icnuc ¿mitsicquid chidon bënë icpeque? Èbi chui. Tantienu —quepanëdash saduseyobo Esus caic.

³⁴ Adoaquien: —Nidaidënshun dadan aton chido bedec. Adecbidi, Min bënëbëd nidta, quequin aton papan chiac aton champi aton bënëbëd nidec.

³⁵ Uincuen uate ushë choan Nuquin Papan bëdamboen isaïdo abëdi tabadquin chido bedenquo iquendac. Adëmbidi, aton champi menenquo aton papan iquendac. ³⁶ Adecbidi, Nuquin Papan uaido mayan bëdabo unësesa yacpadquiequi Nuquin Papan uincuen uatequid unësenquo iquendac. Nuquin Papan uincuen uatequido aton bacuëbo nendac. ³⁷ Adembidi chuinu. Tantia. Cuëtëmpi nëdënquiacbimboecquid isun Moisesën dada uapampid nec. Cuëtë nëdënquiacbimboecsho isun Nuquin Papa chuiquin nadopampic: “Tsusedpa Abadauanën papa cain cuënaïd mibi nec. Adecbidi tsusedpa Isaquën papa cain cuënaïd mibi neoaic. Adecbidi tsusedpa Acobon papa cain cuënaïd mibi nec,” quequin Moisesën chuiampic. ³⁸ Moisesën tsusedpabo ambi chuiboed ënden unësampidën nami chodquiaidën papa cain Nuquin Papa cuëntiapimbo iquec. Aton nami chodquiash abi tantiaquidquid icquin tantiec tsadquidën papa cain Nuquin Papa cuënac —quepanëdash Esus saduseyobo chiec.

³⁹ Aden Esusën chuisho tantiash Nuquin Papan naden nata quequin chiaid tantiamequid padiseyobo utsi—utsiec nadpanëdash: —Bëdamboen mimbi chuibanoc —quepanëdash Esus chiec. ⁴⁰ Aden Esusën chuisho tantiashun Esus chuimetiapimbo utsibo icpanëdash.

¿Tsuntsin mado Quidistu nepec? quiaid
(Mat 22.41-46; Mad 12.35-37)

⁴¹ Aden utsibon abi icsamboen chuimetiapimbo icscho isun Esusën nadopanëdash: —Ëbi abia yampid icscho ¿mitsipadentsi tantiaquin tsusedpa, Dabidën mado Quidistu caid nec, quequin matsesën chuipec? ⁴² Dabidën ambibi Sadmo caid dada uaquin naden chuipampic: “Icho utsi yec con mado mibi chiembique. Tantia, quequin chiec icbo dapa nadpampic:

‘Ëquë con dayun abiucquoio cainec tsadec cho

⁴³ ma mibi chieshënnquidtedi mimbi namiaid ma icpanu,’ ”

quequin Nuquin Papan Esus chiaid Moisesën dada uapampid nec. ⁴⁴ Aden Dabid padon dada uaquin ¿mitsipadomboentsibi con icbo cashumbi con mado ëbi caoapampic Dabidën? —quepanëdash Esus abi chieshënnquido caic.

Naden nata quequin chiaid tantiamequidpadquid iquenda, quequin chiaid (Mat 23.1-36; Mad 12.38-40; Duc 11.37-54)

⁴⁵ Aden chuishun iccuededquidon tantianubi abëd icquido Esusën nadopanëdash: ⁴⁶ —Nuquin Papan naden nata quequin chiaid tantiamequidpadquid iquenda. Aido ancanquidbimboecsho utsibon ispashuni quequin nabanesa dasiuidacpadec dashcute ënapen icquid dasiuidcuededpec. Adomboembidi tantiec matses dadpen iccuededacno nidash capuequi, Ëbi bëquedquidon ëbi chuiquid dapabimboecsho isash onquequin chuipashuni quec tabadec. Adomboembidi tantiec Nuquin Papan chiaid chuibante shubun puduedash, Tsusio dapabimboecsho ispashuni, quec tsusiobo tsadacno tsadtene. Adomboembidi tantiec, Pëc cho cac chosho isash chuiquid dapabimboecsho ispashuni, quec tsusiobo tsadacno tsadtene. Adquidpadquid iquenda. ⁴⁷ Aidon bëdamboen nabanacimboen nianten natedi bedbanec. Aidombidi Nuquin Papa abimbo tantiacimboec yuen chiec onquec. Aden bëdamboen nabanacimboecquido Nuquin Papan comapenen cuidendac. Adoesa bëdiactsëc cuidendac —quepanëdash Esus abëd icquido chiec.

21

Nianten piucquid shocoshëmpi meniaid

(Mad 12.41-44)

¹ Adashic, Nuquin Papa tabadte shubu uashunaid yacno tabadtuidash tsadquin Esusën isbanpanëdash. Ambi isaido Nuquin Papa tabadte shubu nacnemete cuidnu, quequin menequin aid shubun shocosh tabëcaidën aton na bedtequid utsin-utsinquien sandobededpanëdash. Aton na bedtequid dadpen icquidon dadpen sandobededsho isquimbi ² nianten aton na nibëdquidëmbi aton na bedtequid shocosh daëd ictsëcquid sandosho ispanëdash. ³⁻⁴ Adosho isash: —Chuinu. Tantia. Nianten aton na bedtequid abitedimbo sandoposh. Adosho, Dadpen menequid nec, quequin Nuquin Papan niantie isec. Utsibon aton na dadpen abi icnubi dadpen menesho, Daëdpactsëc menequido nec, quequin Nuquin Papan aido isoaic —quepanëdash Esus.

Abitedi naimbudte ushë choec quequin chuite

(Mat 24.1-35, 42-44; Mad 13.1-37)

⁵ Adashic, Nuquin Papa tabadte shubu uashunaidbëdtabi matsesën dectanaid didiquesho isec: —Nuquin Papa tabadte shubu bëdaidquio iquec —quepanëdash utsibo.

⁶ Adoaquien: —Mimbi nëbi isaid yuecash nidbëdquidendac. Matses utsibon nëid shubutedi chic-chicbudendac —quepanëdash Esus.

⁷ Adoaquien: —¿Mitsipadën Nuquin Papa tabadte shubu uashunaid chic-chicquin tauapec? ¿Aid ushë anoentsëqui yanuc mitsipadquid ismiente icpeque? Tantianu. Chui —quepanëdash utsibo.

⁸ Adoaquien: —Cho-choshon muaquin chuisho tantienquiocta. Adquid cho-choash: “Nuquin Papan Chomiaid Quidistu nebique. Èbëd iquec cho,” queded-quededendac. Aden chuiquid tsibanenda. ⁹ Adecbidi: “Cuesnancuededec,” qesho tantiaish dacuëdenda. Nuquin Papan chiampicpadequi cuesnancuededteba iquendac. Aid icnubi abitedi naimbudte ushë badquio choenquio iquendac —quepanëdash Esus.

¹⁰ Aden chiequi abi onquebudec: —Adecbidi, abi ancaquid dapan nidmiac nidaid utsin icquidobëd cuesnancuededendac. ¹¹ Adecbidi, nidaid utsi-utsiec yacno canchednuec ishucud-ishcudendac. Adecbidi, utsi-utsiec yacno bunquioite iquendac. Adecbidi, utsi-utsiec yacno daicsabudnete iquendac. Adecbidi, mibi dacuëdmetequid iquendac. Adecbidi, mimi isacmaid abucësh natiambo icsho mimi isbededendac.

¹² “Aidtedi choabicnuc ëbi tantiaquid utsi-utsien bedshun mëyanendac. Adobanshumbic, Icsamboen naquid nec, quequin muaquin icsaquid cuid-nuequid yacno mibi buanendac. Utsi-utsien ancanquid yacno buanac ¹³ aidotsen tantiaquid yantsiash qeshun ëbi chuibanta. ¹⁴ Aden buanaqui, ¿atotsimbi ancanquid cape? quequin tantiec tsadenda. ¹⁵ Nuquin Papan Mayanën tantiamiacpadomboen mimi chuibanendac. Adoac, Icsambocquid mibi nec, quetiapimbo mibi chieshënquido iquendac. ¹⁶ Adembidi, Nuquin Papan chiaid tantiesan min shubun icquidën mibi bedshun cuid-nuequid yacno buanash: ‘Cuidquin cuesuneta,’ quependac. Aton papambi adotsiash. Animbi aton mado adembidi adotsiash. Utsi aton buchimbi adoatsiash. Utsi aton chuchumbi adoatsiash. Utsin abëdtan isedquidëmbi adoatsiash. ¹⁷ Èbi tantiaquid chieshënquid dadpen iquendac. ¹⁸⁻¹⁹ Aden nabanquin mibi cuesunemenu, cac chieshenquio yec, Èsus tantiaquid nebi, quequid icta. Adquid iquec unësash ënëdenquio yec Nuquin Papabëd mibi tabadendac.

²⁰ “Adecbidi shubu dadpen icquid Edusaden caid yacno cuesanquid dadpen cho-choshon tsicatebudsho isash, Edusaden yacno naimbudte ushë choec, quequin mimi tantiendo. ²¹ Aden tantiec ma Cadidia yacnocquido macuësh dapa yacno cuempanuna. Adecbidi, Edusaden yanocquido ma auëshquio cuempanuna. Adecbidi, dëuequido Edusaden yacno ma nidenquiocpanuna. ²² Aid ushë icnuc Nuquin Papan chiacpadomboen cuidtequid iquendac. ²³ Aid ushë chonoc matses utsibon Edusaden yacno tsicatebudac pete naimbudnuc bacuë usunquidobëd bacuë chishmequido mëyadec natiquendiendac. Edusaden yacnocquido abi tantiesabo icsho Nuquin Papan natiambocquin cuidte iquendac. ²⁴ Edusaden yacnocquid utsi-utsien chështen cuesendac. Utsi-utsien bedshun nidaid utsi yacno buanshun matses utsibon yuatequido iquendac. Isadaidpembo Edusaden yacno tsicateboedo Edusaden yacno tabadendac. Nuquin Papa, Chën, quenquiocnoc adec tabadendac. Chën, quenuc nidendac.

²⁵ “Adec Nuquin Papa, Chën, quian badiadën ushë, inchëshën ushë uispa chedo aidtedi ambi nadatiambocquin naid ismientequid iquendac. Aid ismiente icsho isash, Uinsadpambo iquec, quec comapenec dacuëdec matsestedi tabadcuededendac. Acte natiambo chëuëdsho isash adquiecbidi comapenec dacuëdec matsestedi tabadcuededoaindanc. ²⁶ Adecbidi, uispa utsi-utsiec paëdted-paëdtednubi utsi-utsiec tididiquendac. Adsho isash matses dacuëdec padishendac. ²⁷ Adnubini Nuquin Papan chomiaid matsesaid

ëbi dasiuidaid bëchomauanquieç ushë chënquiacimboec uëshëmbo yec nadati-ambocquin nabanquidquio abu ushun ëbi budsho matsstedishun isbede-dendac. ²⁸ Natiambocquin naid tauadoacsho isun, Nuquin Papa yacno ëbi yuedte ushë chote anoentsëqui yanec, quequin bédambocquin abuc isteneta —quepanëdash Esus.

²⁹ Aden chuishumbic ambi chuiboed ushë chote tantiamenuen nadopanëdash: ³⁰ —Cuëtëmpi bacuëacsho isash, Ènden suc seccuduquiac nëbi seta taëec, quequin matsesën tantiec. ³¹ Adembidi ëmbi chuiboed icsho isun, Nuquin Papabéd tabadte ushë choec, quequin mimbi tantiec. ³² Abimbo chiembique. Tantia. Èmbi chuibamboed naimbudabicnuc con tan matses isadaidbo naimëdbudenquio iquendac. ³³ Abubëdta naimbudtequid nidaid nendac. Èmbi chiaid abimbo iquendac.

³⁴⁻³⁵ “Adembidi chuinu. Tantiata. Nidaidën capuquidën, Nëbi ëbi sec, quequin tantienquio yec capusho badedquio siac cuentiapimbo iquec. Adembidi, Natiate ushë choec, quequin tantienquio yec chieshquin badiadquidën-badiadquidënquien paëmbocquid actenepec. Adecbidi aton na bednuc abi buntequiduidi tantiec tabadpec. Adobanubien aid ushë choendac. ¿Matses-tedi cuidte ushë choenda icitc? Ai, aid ushë choendac, quequin caimbudec bédamboec tabadta. ³⁶ Ènenquiocquin aid ushë chote caimbunec tabadquin Nuquin Papa naden chuidoneta. Chieshmane mibi tantiaquidquio ëbi icmë, Papa. Adembidi natiambocquin cuidte ushë chonoshe queshun ëbi mënchicta, Papa. Aid ushë chonoc ëbi bedshun mimbi chomiac matsesaidën dayun tsadquidquio ëbi icmeta, Papa, quec onquedeneta —capanëdash Esusën.

³⁷ Aden chuishumbic, badiadquidën-badiadquidënquien Nuquin Papa tabadte shubu uashunaid yacno nidshun matses tantiamenuen Esusën chuided-chuidedpanëdash. Adecbidi inchëshquidën-inchëshquidënquieç macuësh Odibos caid yacno nidash tabadtenepanëdash. ³⁸ Adembidi, badiadquidën-badiadquidënquien Esusën chuibansho tantianuequido Nuquin Papa tabadte shubu uashunaid yacno choded-chodedpanëdash.

22

Esus bedmenu, quequidquio Udas

(*Mat 26.1-5, 14-16; Mad 14.1-2, 10-11; Uan 11.45-53*)

¹ Adashic, nami abaicquid pete tantiate ushë, Pascuas caid, anoentsëqui yampanëdash. ² Aid ushë choabicnuc isadaidbo tsusiobobéd Nuquin Papan naden nata quequin chiaid utsibo tantiamequido iccuedetenequin, ¿Mitsipaden Esus bedshun cuesuneque? Isnu, quequin isted-istedpanëdash. Aden isted-istedtanquin Esus tantiec datsidquido dadpen icsho isash dacuëdquin Esus bedenquio icpanëdash. ³ Adnubien Udas cashumbic Iscadiote caid Esusbéd icquid dapudedshun Satanasën tantiamiac ⁴ Esus chieshëquid yampanëdash. Adquid yanash padiseyobo tsusiobo yec isadaidbo tsusio utsibo yec Nuquin Papa tabadte shubu uashunaid isquido yec quec Esus chieshëquid utsibo iquec quianec aido yacno Udas choash, Esus bedmete bunebi, quequin chuiapanëdash. ⁵ Aden chiac isadaidbo tsusiobo bédambo iquebi quetanquin: —Esus bedmiacsho mibi piucquid menenu —capanëdash Udas chuiquin. ⁶ Adoaquien: —Adonuna —quianec Esus yacno nidoash abéd capuquimbi Esus tantiec datsidquido nibédacnoshon abi chieshëquido, isadaidbo tsusiobo, Esus bedmëmbi, quequin isted-istedpanëdash Udasën.

Ènquin nidaidëshun Esusën pebanaid

(*Mat 26.17-29; Mad 14.12-25; Uan 13.21-30; 1Cod 11.23-26*)

⁷ Adnubien, nami uabicquid pete tantiate ushë chopanëdash. Aid ushën isadaidbon bëyuc tishaid bacuë unës uanushe queshun obeca bacuëded cuesuneshun shubu shëcuë ëcnoshcaid isun unës uainquiocquin Nuquin Papan uaido mayan bëdabon matanampid tantiate ushë icpanëdash. ⁸ Aid ushë chonoc Uambëdta Petedo chuiquin: —Matante ushë tantianuequin obeca bacuë cuesuniaid penun nacnenta —capanëdash Esusën.

⁹ Adoaquien: —¿Mitsishumbimbi aid nacnempe? —quepanëdash Uambëd Petedo.

¹⁰ Adoaquien: —Nëbi shubu daëdpactsëc yacno nidshun matsun acte bëquid dada mimbi bëquedendac. Aid bëquedshun tsibananec shubun aid puduedacno nidshun ¹¹ shubun puduedabi naden shubu icbo chuita: ¿Mitsishumbimbi matante ushë tantiaquin ëbëd icquidobëdtan pepe? quiosh Esus, quequin chuita. ¹² Aden chiac abuc dectatoshon abuc quënëcquid mibi aidëmbi ismendac. Ashunquio penun nacnenta —capanëdash Esusën.

¹³ Aden Esusën chiac nidaneshun Esusën chiacpadomboen istuidshun matamepampid ushë tantiaquin penun Uambëdtambi Petedon nacnempänëdash.

¹⁴ Adashic, inchëshën choash abëd icquidobëd pete sante cuate dayun uequi Esus: ¹⁵ —Ëbi mëyante yanabicnuc bëyuc tishaid cuesunianquidën cuesunenquiocquin matanampid tantiaquin pec mibëdi tabadtiadquio yanobi. ¹⁶ Matanampid tantiaquin obeca cuesuneshun nuqui pebocpadomboen mibëdtambi nidaidënsnun padpiden penquio iquendambi. Matses icsaquid icsho cuidnushe queshun obecaded cuesuniaidpadquiocquid yanshun Nuquin Papa yacno choash tabadquidobëdtambi ashunquio pendambi —quepanëdash Esus.

¹⁷ Adoshombic dëshote sananec Nuquin Papa chiec onqueshun actanquin abëd icquido menec: —Në, aniactse-aniactsen acban mibitedishun. ¹⁸ Tiedën caniquid ënë nidaidënsnun padpiden aquenquio iquendambi. Nuquin Papa yacno choash tabadquidobëdtambi ashunquio aquendambi —quepanëdash Esus.

¹⁹ Adoshombic, pete bedshun Nuquin Papa chiec onqueshun cuësh-cuështanquin menebanquin: —Mibi icsaid bedshunacsho ëbided cuidquin mëyanquin cuesuniaid tantiaquin pebeded —capanëdash Esusën.

²⁰ Adoshombic pete utsi petanquin dëshoten sicaid cushtoshon menec: —Ënden, Icsambocquin naombi, queshun obecaded cuesunemenuen isadaidbon menedeniac. Aden cuesuniaidën intac siquec unëso isun, Obeca cuesuneboed ëbi icsaquid icsho cuidnushe queshun cuidequid nec, quiampicpaden abi chiec. Padnuen nëbi unës uashun siac aton intac siquec matses icsaid bedshunash Esusded cuidadac, quequin tantiatequidquio nendac.

²¹ Ëbi chieshënquido ëbi bedmenuequin chuiquid pete sante dayun ëbëdi uec. ²² Nuquin Papan chiampicpaden ëbi matsesacsho unës uaid iquendac. Ëbi chieshënquido bedmenuequin chuiquid comapenen cuidte iquendac —quepanëdash Esus.

²³ Aden Esusën chuisho tantiaash abëd icquido: —¿Midacquidien capec? —quecuededpanëdash.

²⁴ Adashic: —Dosedet nuqui iquec. ¿Tsudain chuiquid icpec? quequin utsibon ispec —quepanëdash Esusbëd icquido.

Aden chuitanec, Chuiquid nec, quequin utsibon ëbi ispec, Esusbëd abitedi nëishash comapenec chushcanampänëdash. ²⁵ Adec chushcanansho tantiaash Esus nadpanëdash: —Isadaidpembo ancaquidën comapenen aton matses namebanquin daëdpactsëc menebanec. Aden meneshun, Ëmbi namiaido

bëdambo icmequid nebi, quequin muaquin chiec. ²⁶ Mibitedi adquid iquenda. Nadquidquio icta. Chuiquid nebi, quec tsyuec caniquidbimboecquid icta. Chuiquid icquin utsi namiacpaden nabanta. ²⁷ Abi pemequid abi nashunquid nec. Adembidi pec tsadquid utsibo chuiquid nec, quequin utsibon ispec. Aden tantienda. Nēbi mibēdi pec tsadequi mibi nashunquid nebi. ²⁸ Ēbi chieshēnquido icnuc ēbi nianesa ²⁹ icsho con Pan ēbi chuiquid icmiacpadquid chuiquid mibitedi icmendambi. ³⁰ Aden chuiquid icmiac ēbēd icquin ēbēdtambi peshun aquec mibitedi tabadendac. Chuiquid icquin abuc tsadte icquidēn tsadquin isadaidbon naid bēdabēdta ambi naid icsa cuidte ēbēdtambi mimbi chuibanendac –quepanēdash Esus abēd icquido caic.

Esus ěmbi isacmaid nec, quequin Petedon chiaid
(Mat 26.31-35; Mad 14.27-31; Uan 13.36-38)

³¹ Aden chuishumbic Esusēn nadopanēdash: –Mibi chuinu. Bëdamboen tantia, Simon. Mibitedi Satanasēn yuatiadquio iquec. Aden yuanuequin piacho macuesquin nainshun bitsi secacbimboen mēyantānquin ēbēd icboedi mibi cuēshēdmetiadquio iquec. ³² Aden mibi Satanasēn yuatiadquio iquec, quequin tantiaquin Nuquūn Papa naden chiombi. Simon ēbēd icquidquio iqueque. Yuadnushē qeshun Satanasēn niac-niacmete chiaid Petedo tantienquio icmeta, Papa, quequin chiombi. Adec ēbēd icboedi cuēshēdtsembosh choashun comapenen ēbi tantiaquin ēbēd icquid utsibo adomboembidi comapenen ēbi tantiameta, Simon –capanēdash Esusēn Petedo chuiquin.

³³ Adoquien: –Mibi caic, Quēnēn nauednu, quenuc mibēdi nauedadebi. Adecbidi mibi caic, Unēs uanu, quenuc adecbidi mibēdi unēs uadebi, Icho –quepanēdash Petedo Esus caic.

³⁴ Adoquien: –Chuinu. Tantiata, Petedo. Cachina bēnē cuēdanabicnuc nēid inchēshēmbi, Esus ěmbi isacmaid nec, mibi queded-quededendac –quepanēdash Esus.

Buanenda, queboedēmbi, Buanta, quequin chiaid

³⁵ Aden Petedo chuishumbic abēd icquidtedi chuiquin: –Mitsana bedtequid buanenquio yec shictoadte buanenquio yec dashcute utsi buanenquio yec quec nidaneta, ěmbi cac nidash Ľmibitedi bunecta tabado? –capanēdash Esusēn.

Adoquien: –Padenquio –quepanēdash abēd icquido.

³⁶ Adoquien: –Ēnden adquid buanenda, queboedi, Ēbi nibēdnuc mitasana bedtequid shictoadtebēdtabi buanta. Chēshte bednu, qeshun mitasana bedtequid nibēdnuc min dashcute abentsēc menequin chēshte bedshun adembidi buanta, caimbi nēbi. ³⁷ Nuquin Papan ēbi chuiquin dada uamiampid nad iqueque. Tantiā. Chuinu: “Icsambocquidbēdta unēs uaindac,” quepampic. Aden Nuquin Papan ēbi chuiquin dada uamiampicpadomboemi nēbimbobi naimbudembi –quepanēdash Esus.

³⁸ Adoquien Esusēn chuiboed tantienquio yec abēd icquido: –Nē, chēshte daēd iqueque. Is, Icho –quepanēdash.

Aden abēd icquidon tantienquiosho isash: –Ai, padi –quepanēdash Esus.

Macuēsh Odibos caid yacnoshon Esusēn Nuquin Papa chiaid
(Mat 26.36-46; Mad 14.32-42)

³⁹ Adashic, Edusaden caid yacnoēsh macuēsh Odibos caid yacno abi nidteniācpadēn nidnuc abēd icquidon tsibanampanēdash. ⁴⁰ Adec nidequi abi tabadteniācno choshon Esusēn: –Chieshēmēnquidēn ēbi namete bunacpaden natiāpimbocquid ēbi icme, Papa, quequin Nuquin Papa chuideneta –capanēdash abēd icquido chuiquin. ⁴¹ Aden chiashic

abiuidtsëqui uano nidash danëshën nidaidën sebudash Nuquin Papa chiec nadec yuec Esus onquetan-onquetampanëdash: ⁴² —Mëyanquin mibi unës uanu, ëbi chieshënquidon casho tantiash bunenquio yec, Adoenda, quepatsiac mibi Papa. Adoshombic mibi bunacpadomboen nameta, Papa —capanëdash Esusën Nuquin Papa chuiquin. ⁴³ Aden Esusën baded-badedquien chuishobi Nuquin Papan uaid mayan bëda choshon Esus chieshtomenquio icpanëdash. ⁴⁴ Aden uidën uaqi adec uëshquec Nuquin Papa chuiquiequi ichacbed intacash nidaidën siquepanëdash.

⁴⁵ Aden Nuquin Papa chiashic nidtoash abëd icquido yacno choaquimbi ambi chuisho tantiaboed tantiec uimabudash ushec uesho istuidshun: ⁴⁶ —¿Atotsi quiaish ushe? Nidtoashon ëbi chieshënquidën nametiadquio yac-paden natiapimbocquid ëbi icmeta, Papa, quequin adenuidi Nuquin Papa chuideneta —capanëdash Esusën abëd icquido chuiquin.

Esus bedaid

(Mat 26.47-56; Mad 14.43-50; Uan 18.2-11)

⁴⁷ Adec Esus onquenubien Esusbëd icboedi, Esus bedmenu, quec bëyucanec matses dadpen bëec Udas chopanëdash. Adec choquimbi abi tanchoc-canuesho isash: ⁴⁸ —¿Ëbi matsesaid icsho bedmenuen tanchoccaquinda ëbi chieshënquido isme, Udas? —quepanëdash Esus.

⁴⁹ Aden Udasën nac Esus bednuesho isash Esusbëd icquido: —¿Cho-choquido nuquida cuesten cuespe? —quec ⁵⁰ onquetanquin abentsëcshun isadaidbo tsusio dapan yuan pabiate opioc pateshunepanëdash.

⁵¹ Adosho isash: —Padi. Chën. Adoenda —quetanquin Esusën tsusio dapan yuan pabiate patiacno mishquin bédamepanëdash.

⁵² Adoshombic, isadaidbo tsusio dapabo Nuquin Papa tabadte shubu uashunaid isquido tsusiobobëdta tsusio utsibo caic: —¿Matses cuëshëdmequid nec, queshunda utsin-utsinquien chështe sananubi utsin-utsinquien cuëste sananec cho-chopec? ⁵³ Badiadquidën-badiadquidënquiec Nuquin Papa tabadte shubu uashunaid yacno icsho ëbi bedenquio mimbi icpoc. Mimbi ëbi bedte ushë nêidquibi nendac. Satanasën tantiamiacpaden utsibo ismenquiocquin inchëshëmbi mimbi icsa uanuen ëbi bedendac —quepanëdash Esus.

Ëmbi isacmaid nec, Petedo quiaid

(Mat 26.57-58, 69-75; Mad 14.53-54, 66-72; Uan 18.12-18, 25-27)

⁵⁴ Aden mimbi icsa uanuen naindac, quequin Esusën chiacsho bedanquin isadaidbo tsusio dapan shubu yacno Esus buanubi Petedo uano tsyuec chopanëdash. ⁵⁵ Adec choec umanuc cuëte dëtsiadaoid cuëec utsibo tabadacno Petedo cuëte cuëec tsadpanëdash. ⁵⁶ Ambo Petedo tsadsho isash tsusion yuaid chido anoentsëqui choshon bédamboen isec: —Nêid bëboedbëd icboedi nec —quepanëdash.

⁵⁷ Adoaquien: —Bëboed ëmbi isacmaidquio nec —quepanëdash Petedo.

⁵⁸ Adashic, yuecpactsëcshun Petedo isec utsitsen: —Ma mibi bëboedbëd icquid neyoc —quepanëdash.

Adoaquien: —Aidbëd iquenquio iccobi —quepanëdash Petedo.

⁵⁹ Adashic yuec-yuecpactsëc ictanec utsitsen: —Nêid Cadidia yacnoshon tishaid iquec. Ma bëboedbëd icquidi neyoc —queoapanëdash.

⁶⁰ Adoaquien: —Mimbi chiaidbëd icquidpenquio nebi —quepanëdash Petedo. Aden chuinubien cachina bënë cuëdampanëdash. ⁶¹ Adec cuëdanubi aton Ichon bidiadshun Petedo bëspanëdash. Adosho isun: “Nëbi, cachina bënë cuëdanabicnuc, ëmbi isacmaid nec, quequin tedesteden mimbi chiendac,”

quequin aton Icbon chuiboed tantiash ⁶² unësquio yec umanuc nidash Petedo shubiquiopanëdash.

Esus sondadon mamëshunaid
(*Mat 26.67-68; Mad 14.65*)

⁶³ Adshumbic Esus cuenushe qeshun abi isquidon, sondadon, Esus mamëshumbedequin cuesbededpanëdash. ⁶⁴ Adoshombic, dashcute cuëshaidën bëpucshun cuestanquin Esus sondadon nadopanëdash: —Mibi tantiaquidquio icquin ¿midaquidën mibi nëbi cuesequé. Tantienu. Chui —capanëdash Esus chuiquin. ⁶⁵ Aden cuesbededquin Esus icsamboen chuipanëdash.

Isadaidbo tsusiobo yacno Esus buanaid
(*Mat 26.59-66; Mad 14.55-64; Uan 18.19-24*)

⁶⁶ Adshumbic badiadnubi isadaidbo tsusiobo iccuededacno Esus buan-shun ⁶⁷ nënantanquio nidtomesho isash: —Nuquin Papan chomiaid, Quidistu caid, nebi, quecta ique? Tantienu. Chui —quepanëdash isadaidbo tsusiobo Esus caic.

Adoaquien: —Èmbi abimbo chuisho mibitedishun tantienquio iquendac. ⁶⁸ Ademibidi, ¿Mitsipadquidquio Nuquin Papan chomiaid neque? Tantienu. Èbi chui, cac ècbedenquio mimbi iquendac. ⁶⁹ Nad iqueque. Chuinu. Tantia. Matsesash nidaidën tabadboedi ambi nadatiambocquin naidënquio Nuquin Papan dayunquio tsadendabi —quepanëdash Esus isadaidbo tsusiobo tantia-mequin chiec.

⁷⁰ Adoaquien: —¿Nuquin Papan madombobi nebi, quequinda chio? —quepanëdash isadaidbo tsusiobo Esus caic.

Adoaquien: —“Esus Nuquin Papan madombobi nec,” quequin abimbo chuiquid mibi nec —quepanëdash Esus isadaidbo tsusiobo caic.

⁷¹ Adoaquien: —Nuquin Papan madombobi nebi, quequin ambibi chiec Esus muc nec. Aden chuisho icsambo iqueque. Unës uatiad, quequin tantia-shun, Esus icsaosh, quequin chuitiadquiocquin chuita, cainquio iquembi utsibo chuiquin. Adquid iquec, quequin nuqui tantiec —quepanëdash isadaidbo tsusiobo.

23

Pidato yacno Esus buanaid
(*Mat 27.1-2, 11-14; Mad 15.1-5; Uan 18.28-38*)

¹ Aden ambibi chiec Esus muc nec, isadaidbo tsusio abentsëc qesho tantia-sh isadaidbo tsusiobotedi nidtoshon Esus bedshun Pidato yacno buampanëdash. ² Aden Pidato yacno Esus bëec choash: —Esusën chuibansho tantia-sh, Cuëshëdmianquid nec, quequin mibi yacno bëombi. Nëid ancanquid dapa Sesadën, Shocoshëmpi bec cho, cac menenda quiosh. Aidbidi, isadaidbo chuiquid dapa nebi, quiosh —quepanëdash isadaidbo tsusiobo Pidato chiec.

³ Adoaquien Pidato: —¿Isadaidbo chuiquid dapada ne? —quepanëdash Esus caic.

Adoaquien: —Mimbi chiaidquio abimbo iquec —quepanëdash Esus.

⁴ Adsho tantiash: —¿Atotsi nashoembi cuidpe? Ambi icsamboen naid nibëdec —quepanëdash Pidato isadaidbo tsusiobo chiec.

⁵ Adoaquien: —Ambi tantiamiaidënquio Cadidia yacnocquido nëishmiac comapenec cuëdcuededosh. Anoshon tantiameshumbic Edusaden yacno choshon adomboembidi tantiaméaposh —quepanëdash isadaidbo tsusiobo Pidato caic.

Edodes yacno Esus buanaid

⁶ Aden chuisho tantiash: —¿Nidaid Cadidia yacnoësh choquidta Esus nec? —quepanëdash Pidato.

⁷ Adoaquien: —Ai. Cadidia yacnoësh choquid Esus nec —quepanëdash. Aden chiac Esus ancaquid Edodes nec, quequin Pidaton Edodes yacno Esus buamepanëdash Edusaden yacno Edodes choash tabadec, qesho tantiashun.

⁸ Aden Edusaden yacno abi yacno bëacsho isash Edodes, Yuen Esus iste bunec nëbi bëdambo iquebi, quequin ëquëducshun tantiapanëdash. Nadatiambocquin nabanquidquo nec, quequin isquidon chiac Edodes Esus isec, Nadatiambocquin napashun. Isnu, quequin ambibi tantiec ⁹ Esus chuimenu quec Edodes onquepanëdash. Adoaqui Esusën ëcbedenquo icpanëdash. ¹⁰ Adnubien isadaidbo tsusiobo: —Esus icsambocquid nec —quepanëdash comapenec onquec Edodes chiec. ¹¹ Adoac Edodesbëd sondado Esus icsamboen chuiquin mamënsumbededshumbi chuiquid dapan dash-cutëbimboecquid abichobicquid Esus dasiunshun Pidato yacno buameoapanëdash. ¹² Mimbi tantiacpaden Esus cuidta, quequin Pidato chuita, quequin Edodesën chuitanquin Pidato yacno Esus padpiden buamepanëdash. Adoac Edodesbëd Pidato bëdambo yampanëdash.

Esus cuesten dectameta quiaid

(*Mat 27.15-26; Mad 15.6-15; Uan 18.39-19.16*)

¹³ Adashic, isadaidbo tsusiobobëdta isadaidbo utsibo chomeshun ¹⁴ Esus ismetanquin Pidaton nadopanëdash: —Nëid dada bëash: “Cuëshëdmianquid nec,” quequin mimbi ëbi chioc. Adoac aibdëdi onquiash, ¿Cuëshëdmianquidta nedic? quendabi. ¹⁵ Aden ëmbi tantiacpadomboen tantiaquin Edodesën ëbi yacno chomeoposh. Esus unës uainquioctiadquidi nec. ¹⁶ Aden tantiaquin mëyanshun aidi nidmenuna —quepanëdash isadaidbo tsusiobo caic.

¹⁷ Aden chiac naden isadaidbon tantiapanëdash. Setan-setanquien icsambocquid con matses quënën nauedaid abentsëc ambi nidmiacpaden nëbi adquid utsi Pidaton nidmetsiash, quequin tantiec isadaidbo nadec cuëdcuededquin: ¹⁸ —Nëid Esus caid unës uatiadquidi nec. Mimbi quënën nauednëdaid Badabas cuëmëdquid puduemeta —capanëdash comapenec cuëdcuededquin isadaidbon. ¹⁹ Ancanquid bunenquicoquin utsibo cuëdcuededmiondaid utsi cuesuniondaidbidi Badabas icsho quënën nauedmepanëdash.

²⁰ Adec isadaidbo cuëdcuededsho tantiash Esus nidmetiadquio iquec: —Esus cuidenquioctiadquidi nec —quepanëdash Pidato isadaidbo caic.

²¹ Adnubien: —Cuesten dectame —capanëdash isadaidbon yuec comapenec cuëdcuededquin.

²² Adec cuëdcuededsho tantiash: —¿Atotsi canun, Cuesten dectame, cai? ¿Atotsi icsamboen nasho isun mimbi chieque? Chui. Tantanu. Ma unës uainquioctiadquidi neyoc. Aden tantiaquin mëyameshun Esus nidmimbi —quepanëdash Pidato.

²³ Adoaquien: —Cuesten dectame —quepanëdash cuëdcuededoic isadaidbo Pidato, Ai, camenuc.

²⁴ Adoac iccuededquidon chiacpaden namenuen ²⁵ Pidaton: —Utsi cuesuniondaid Badabas puduemeshun Esus cuesten dectameta —capanëdash Pidaton cuesten dectamënuquid chuiquin.

Esus mëyanaid

(*Mat 27.32-44; Mad 15.21-32; Uan 19.17-27*)

²⁶ Pidaton, Esus cuesten dectameta, cac sondadon abi dectante cueste Esus buamequimbi Simon, Sidene yacnoshon tishaid, chosho bëquëduitanquin

Esus dectante cuate Simon buamiac Esus tsibambëpanëdash. ²⁷ Adec Esus nidsho isun matses dadpeshun shubiquin tsibanampanëdash. Adembidi abi tsibanquid chidobo icpanëdash. ²⁸ Adec chidobo abi tsibanec shubisho tantiash bidiadshun isec Esus: —Ëbi tantiec shubienda, Edusaden yacnocquidon chidobo. Mibibi tantiadec min bacuëbobëdta tantiec shubicuedta. ²⁹ Yuecash mëyantequid ushë choendac. Aid ushë chonoc bacuë tsishtiapimbocquid caic utsibo nadendac: “Bacuëbo nibëdquid icquin min bacuëbo natiasho isenquio mimbi iquec. Adquid yec bëdamboshë mibitedi iquec.” ³⁰ Mëyantequid ushë chonoc matses utsibon natiambocquid mëyanaqui naden mimbi Nuquin Papa chiendac:

“Natiambanqueque. Acte quiusudquid macuësh dapa catashmetabi, Papa, mibi quendac.

Adecbidi, Acte quiusudquid macuësh masiametabi, Papa, utsi queoaindac.”

³¹ Ëbi buansho isec shubiequi, Ëbi mëyantequid ushë choec, quequin tantiesa mibi ipec. Nëdënquenquioctiadquidi achuëshquiocquid nëdëncasho isash: “¿Tanunquiocquid badedquio nëdënquenquio ipec,” quecta mibi icti? Adembidi: “Cuidenquioctiadquidi nec,” queboedëmbi ëbi icaisa unës uasho isash: “¿Ëbitedi icsambocquid comapen cuidenquio ipec,” queoapecta mibi ique? Ai, quequin tantiatiad —quepanëdash Esus.

³² Adnubien Esusbëdta icsambocquid dada daëd nidmequimbi ³³ macuësh mapi canite caid yacno choshombi ëquë daëd dectambudcuentanquin nënantanquio Esus dectampanëdash. ³⁴ Dectanac diadequi Esus Nuquin Papa caic: —Ëbi unës uanuequidon tantienquiocquin unës uainquioctiadquidi cuestas dectanoshibiquë. Aidon icsamboen nambo yacimbocëc bëpiscudta, Papa —quepanëdash. Adnubic Esusën dashcute bednuequin sondadon dada uashun tëchun sandoshon cadotanequin dada uatempì puduemebanquin isquin Esusën dashcute bedbampañdash.

³⁵ Adnubien matses dadpeshun isnubi Isadaidbo tsusiobo isec tabadquin mamënshumbedec: —¿Utsi-utsien Nuquin Papa yacno yuedanquidta nec? Aidi matses mënichtequid Nuquin Papan chomiadquio iquec abibi budtiadquidi diadpec. ¿Ada budequë? Isnu —quec onquecuededpanëdash.

³⁶ Adembidi sondadon mamënshumbedequin paëmbocquid mucambocquid sananquin Esus ismequimbi: ³⁷ —Isadaidbo chuiquid dapa iquec unësenquio iquebi, quiash nëid bednush bud —capanëdash sondadon.

³⁸ Adnubic, abi dectanad cuestas mapino abuc matoccaid Pidaton Esus chuiquin dada uamiai nad icpanëdash: “Nëid, isadaidbo chuiquid dapa nec,” quequin dada uashun Esusën mapino dectamepanëdash.

³⁹ Adnubien, Esus icsamboen chiec icsambocquid Esusbëdta dectamboed abentsëc: —¿Nuquin Papan chomiad, Quidistuda ne? Adquid icquin mimbi budmiac ëbi daëdi mibëd budebi —quepanëdash abëd diadquid.

⁴⁰ Adec Esusbëdta dectamboed abentsëc onquesho tantiash aibëdta dectamboed utsi: —¿Aidi unës uatequid yacpadquid mibi yec, Nuquin Papan ëbi cuidendac, quec dacuëdënenquioda mimbi icpe? ⁴¹ Icsamboen nabanacsho cuidaid ëbi daëdi nec. Aidi bëdambocquid nabanquid icsho cuidenquioctiadquidi nec —quepanëdash.

⁴² Aden chiashic Esus caic: —Mibi yacno choash chuiquid dapa icquin ëbi bëdamboen tantiaquin nata —quepanëdash Esusbëdta dectamboed utsi.

⁴³ Adoaguen: —Abimbo chinu. Tantia. Nëid ushëmbi abuc ëbi bëdamboec tabadacno ëbëdi mibi iquendac —quepanëdash Esus abëdta dectamboed abentsëc chiec.

*Esus unēsaid**(Mat 27.45-56; Mad 15.33-41; Uan 19.28-30)*

⁴⁴ Adec onquenubi ushë cuembo yanuc bëtinacimboec inchëshquio yashic ushë budtsan chënquedoapanēdash. ⁴⁵ Inchëshquio icnubi Nuquin Papa tabadte shubu uashunaid yacno puduedtemaid quēnēn dashcute bitsipambocquid tsincabudquin dectanēdaid tembi daēdquio yec canchedbudcuempanēdash. ⁴⁶ Adnubien unēsbudec comapenec cuēdec: —Mibi yacno ēbi yuedta, Papa —quīash Esus unēsbudpanēdash.

⁴⁷ Adec Esus unēsō isequi ambi isboedtedi tantiaquin Nuquin Papan naid chiec sondado chuīquid: —Abimbo chiosh. Cuesten dectanaid Esus caid bēdambocquid niosh. Aidi unēsēnquioctiadquidi unēs uaposh —quepanēdash.

⁴⁸ Ambo tabadquin isquid utsibo Esus unēsō isash unēsquio yec aton shubuno nidānapanēdash. ⁴⁹ Aido nidnubien nidaid Cadidia yacnoēsh choshon chidobon Esus tsibanamboedon dadabēdtambi uano tabadquin isbededpanēdash.

*Esus nauedaid**(Mat 27.57-61; Mad 15.42, 47; Uan 19.38-42)*

⁵⁰ Adnubic, ambobi dada, Ose cuēmēdquid, isadaidbo tsusio utsibobēd iccuededquid abentsēc bēdambocquid icpanēdash. ⁵¹ Isadaidbo tsusio utsibo, Esus unēs uatiadquidi nec, quenubi, Padi. Unēs uainda, quepanēdash Ose. Aidi nidaid Udeya caid shubu dadpen icquid Adimateya caid yacnoshon tishaid icpanēdash. Aidi Nuquin Papan chomiaid chuīquid dapa iste bunquin cainquidquio icpanēdash. ⁵² Aidi Esus unēsō isash Esusēn dada nauedtiadquio yec Pidato yacno nidshun ambi tantiacpaden Osen chuīpanēdash. ⁵³ Aden chiaquien Pidaton: —Adotan —cac nidshun Esusēn dada imbudshun dashcute ushumbocquidēn dataneshun buanshumbic ambi macuēsh cuēnote shēcūē nacnenaid chucanquio Esus Osen badedquio nauedpanēdash. ⁵⁴ Inchëshbudtsēqui seis yanuc chonoadtemaid ushë nec, qeshun Esusēn dada Osen nauedpanēdash.

⁵⁵ Adnubien: Nauednu, quequin Osen buansho isun Cadidia yacnoēsh Esusbēd choboedon chidobon tsibanashun shēcūēn Esusēn dada Osen nauedsho aidon isbededpanēdash. ⁵⁶ Aden isash aton shubuno nidāneshun noadte bēda Esusēn dada danoshcanu qeshun danoshquete chidobon nacnempanēdash. Nacnenash inchëshbudtsēqui seis icnuc Nuquin Papan chiapadec chonoadtemaid ushë nec, quīash Esus nauedacno nidenquio yec tabadpanēdash. Nuquin Papan chiapadec tabadpanēdash.

24*Esus uincuenta**(Mat 28.1-10; Mad 16.1-8; Uan 20.1-10)*

¹ Adashic, sabado inchëshbudtsēqui seis yanuc chonoadtemaid ushë naimēdan badiadnuc danoshcanu ambi nacnemboed buanec Esus naued-bocno isec chidobo nidānapanēdash. ² Ambo choshon Esus nauedshun bētashaid cuēnote shēcniacsho isashi ³ shēcūēn puduedash aton Icho Esusēn dada nibēdsho isec tabadpanēdash. ⁴ Adec tabadnubien dada daēd dashcute dasiuidacimboec dasiuidash chēnquec chopanēdash. ⁵ Aid isash dacuēdcuededequi isenquio yec chidobo tabadpanēdash. Adsho isash dada daēd: —¿Atotsi canuen unēsacsho nauedac uincuemaiid nibēne? ⁶ Nēmbo nauedboedi nibēdec. Aidi uincuenaccosh. ¿Aidi Cadidia yacno mibēdi tabadquin chuīsho tantienquioda icco? ⁷ Naden Esusēn mibitedi chiondash: “Matsesaid ēbi icsho bedshun icsambocquid ēbi menendac. Aden meniac

cuesten dectanac daëdec ushtanec uincuenoaiibi,” quequin Esusën chiondash —quepanëdash dada daëd chidobo caic. ⁸ Aden chiac chidobon Esusën chiaid abi bēpiscudaïd padpiden tantiapanëdash.

⁹ Aden tantiash Esus nauedaïd shēcuē yacnoësh puduenanec Esus taniaquid dadpen tabadacno choec puduedshun ambi isboedbēdtabi ambi tantiaboed chidobon chuibampanëdash. ¹⁰ Madia shubu dadpen icquid Mactada caïd yacnoshon tishaid yec Uana yec Madia utsi Uambēdtan Acobon tita yec chido utsibo yec quec choshon Esusën Ēbi chuibeneta caïdo chuïpanëdash. ¹¹ Aden chuïsho tantiash: —Mimbi chiaïd tantiatiapimbo iquebi —quecuededpanëdash iccuededquido. ¹² Adnubien Petedo nidtoanec tinqanec nauedaïd shēcuē yacno chōash shuebudquin shēcuē anisquin dataniaïd dashcuteuïd uesho ispanëdash. Aden isadnuc nidequi: —¿Atodain nechitec? —quepanëdash Petedo tantienquio yec.

Emaus yacmi nidte
(Mad 16.12-13)

¹³ Adashic abi ushēmbi Edusaden yacnoësh utsibobēd iccuededboed dada daëd shubu daëdpactsēc icquid Emaus caïd yacno nidpanëdash. ¹⁴ Adec nidequi ambi Edusaden yacnoshon isboedbēdta ambi tantiaboed chiec onquepanëdash. ¹⁵ Aden chiec onquec nidshobi Esusën aid daëdi chinunash aidobēd nidpanëdash. ¹⁶ Aden abi chinuntuidsho isac utsibimboec Esus isadpanëdash.

¹⁷ Adec nidequi Esus: —¿Atotsi chuïbanec onquec nide? —quepanëdash. Adsho tantiash unēsquio yec mamēnenquio yec nidtuidpanëdash.

¹⁸ Adec nidtuidash Quēdeyopas cuēmēdquid: —¿Edusaden yacno tabadtuïdquin anoshon naboed mimbiuidtsēqui tantiamboda icco? —quepanëdash Esus caic.

¹⁹ Adoaquien: —¿Atotsi naid chiec ne? —quepanëdash Esus.

Adoaquien: —Esus Nasaded yacnoësh choquid chiec nebi. Aïdi Nuquin Papan ambi chiaïd chuïmiaïd icquin ambi chuïbaniaïd ambi nabanaïdbidi Nuquin Papabēdtan matses dadpeshun bēdamboen isaïd icposh. ²⁰ Nuquin tsusio dapabobēdtan nuqui chuïquid utsibon Esus bedshun: “Unēs uata,” quequin isadaïdpembo chuïquid meniäc cuesten dectanquin unēs uaposh. ²¹ Nēbi chuïquid dapa isadaïdpembo iquenquïcpashun, quequin Esus isadaïdbo yec isadaïdbo chuïquid dapa ictsiash quequin ēbitedishun tantiapombi. Ēmbi caboedi unēs uaposh. Aïdi unēs uan daëdec ushobi. ²² Adec daëdec ushun dacuēdanquiecnuc chidobon naden chuïbededposh: “Esusën dada nauedbocono badiadnuc nidshun isac ²³ nibēdosh. Ambobi icnubi Nuquin Papan uaido mayan bēdabo daëd icsho isac, ‘Mimbi nibēnaïd nibēdec. Uincuenac,’ quiosh,” quequin chidobon chuïposh. ²⁴ Aden chidobon chuïsho tantienquio yec ebēd icquido Esusën dada nauedbocono nidshun chidobon chuïbocpadembi unēs uaboed nibēdsho isposh —quepanëdash ambi chinuaido Esus chiec.

²⁵ Adoaquien: —Ma bēdiactsēc tantiaquid mibi daëdi neyoc. Nuquin Papan ambi chiaïd chuïmiaïdon dada uampid bēdiactsēc tantiatsec tantiesabidi ma mibi neyoc. ²⁶ ¿Bēdamboec tabadacno chuïquid dapa icnuec Esus mēyanaidba iquendactiosh? —quepanëdash Esus. ²⁷ Aden chuïbanquin Moisesën dada uampidbēdtabi Nuquin Papan ambi yuecshun nanun chiaïd chuïmiaïdon dada uampid tantiamequin Esusën chuibampanëdash.

²⁸ Aden chuïbanequi shubu daëdpactsēc icquid Emaus caïd yacno anoentsēqui choshon datanshobimboecnuc Esus isun: ²⁹ —Inchēsheque.

Nëmbö ëbi yacno tabadec cho –abi daëdshun cac nidash aidobëd tabadpanëdash.

³⁰ Adashic, shubu nuntan pete sante dayun abëdi uequin pete bedshun Nuquin Papa chuishun cuësh-cuëshshun Esusën menebampanëdash. ³¹ Aden nasho isun badedi, Esus nec, quequin tantianubi Esus nibëdquio yampanëdash. ³² Adsho isash: –¿Podquedën choquin Nuquin Papan chiaid dada uampid chuisho tantiash, Bëdambo yanobi, quenquiodabi ëbi daëdi ictio? –quepanëdash Esus yuedquido.

³³ Aden chuitanequi Emaus yacno choboed daëd badedi Edusaden yacno nidoapanëdash. Edusaden yacno choash Esusbëd icquido 11tedbëdi ut-sibo iccuededacno puduedacsho isash: ³⁴ –Abimbo iquec. Nuquin Icho uincuenpaccosh. Uincuenanec choquin aidëmbi Simön ismetuidpösh –quepanëdash iccuededquido. ³⁵ Aden iccuededquidon chuisho tantiashun Emaus yacnoësh choaböed daëdshun Esusën abi chinunshun chiaidbëdta ambi pete bedshun Esusën cuësh-cuëshbamboed chuipanëdash.

Abëd icboedo yacno Esus chote
(*Mat 28.16-20; Mad 16.14-18; Uan 20.19-23*)

³⁶ Adec onquecuedednubi nënantanquio choshon Esusën: –Nuquin Papan bëdamboen isaïdo yec dacuëdenquio yec tabad –capanëdash.

³⁷ Adec aid chosho isash: Podo bitsi nec, quec dacuëdequi abëd icquido tabadpanëdash. ³⁸ Adsho isashien Esus: –¿Atotsi quiash, ¿Esusida nepec? mibitedi quepe? ³⁹ Con mëdantebëdta con taë is. Èbibi nebique. ¿Mëtoccaid taëbëd chiüë nibëdecta ye? Mishec cho. Èbi yacpadquid canitebëd nami icquid podobitsi nibëdec –quepanëdash Esus abëd icquido chiec.

⁴⁰ Aden chuitanquin abi bëchun shuin mëtoccacid chiüë aton mëdantebëdta aton taë Esusën ismepanëdash. ⁴¹ Aden ismiac, Aidquiobi nec, quenquio yec abëd icquido mamëncuededquin isec bëdambo yanec, Adec uincuentequidshenda dectampaccosh, quequin tantiec tabadpanëdash. Adec tabadsho isun: –¿Ada pete iquec? –Esusën caquien ⁴² nuëcquid shëaid cuëshë menepanëdash. ⁴³ Aden meniac bedshun Esusën pepanëdash abëd icquidon isnubi.

⁴⁴ Aden piash: –Mibëd icquimbi naden chuipombi: “Nuquin Papan ëbi chuiquin ambi naden nata quequin Moises dada uamiampidbëdta ambi yuechshun nanun chiaid dada uamiampid naimbudtenendac,” quequin chuibanombi –quepanëdash abëd icquido tantiamenuc. ⁴⁵ Aden chuishumbic abëd icquido tantiamequoquin: ⁴⁶ –Nuquin Papan dada uamiampid nad iquec: “Nuquin Papan chomiaid, Quidistu caid, matsesën mëyanquin unës uaqui daëdec ushash uincuenendac. ⁴⁷ Aid tantiashun mibi icsaid mimbi ënsho isash, Icsaquid nec, quenquio yec mibi icsaid Nuquin Papa bëpiscudendac, quequin Edusaden yacnocquidoba ëbi tantiaquidon chuibanendac. Aden Edusaden yacnocquido chuishumbic nidaid utsi-utsiec yacno nidshun adomboembidi chuibanoindac. ⁴⁸ Mëyanquin unës uaqui ëbi uincuenacsho mibitedishun ispec. ⁴⁹ Aden isun tantiaquido mibitedi icsho Nuquin Papan ambi mibitedi menenu caid aton Mayan chomendambi. Aidi Nuquin Papan nadatiambocquin natequid iquec. Aid mibitedi meniabicnuc Edusaden yacnoshon aidi caïmbudta,” –capanëdash Esusën.

Esus abuc indote
(*Mad 16.19-20*)

⁵⁰ Adashic, bëyucanec nidequi Betania yacno anoentsëqui choash nidtuid-shun aton mëdante abuc sananquin ismec: —Nëidtedi bëdamboen ista, Papa — quepanëdash Esus. ⁵¹ Aden chiacsho abëd capucuenequido niamequin Esus aton Papan abuc indopanëdash. ⁵² Aden indosho isash, Èbitedishun icbo nec, quequin ismec shuebudash: —Bëdambo iquebi —quianec Edusaden yacno nidanepanëdash. ⁵³ Adec Edusaden yacno nidoash tabadec Nuquin Papa tabadte shubu uashunaid yacno badiadquidën-badiadquidënquiec nitted-nittedquin Nuquin Papan naid chuidenepanëdash.

Padi. Aiteded dada uaombi, Teyopido.

UANËN DADA UAID

Nuquin Papa tantiamanquid chiaid

¹ Èndenquimboshë matses uabi yec abitedimbo uabi yequi Nuquin Papabëd Esus icpampic. Nuquin Papapadquidquibidi yec: —Nadquio Nuquin Papa iquec —quec tantiamanquidquio nec. ² Aidëmbi Nuquin Papabëd icquin ³ abitedimbo uapampic. Abubëdta nidaid uashun aidën icquidtedi uapampic. Ambi uacmaid utsi nibëdec. ⁴ Aidquio Nuquin Papa yacno tabadmianquid nec. Nuquin Papapadquidquibidi yec: —Nadquio Nuquin Papa iquec —quequin paposhquiäcbimboecnuc tantiamanquidbidi Esus nec. ⁵ Adembidi matses ambi icsamboen naid tantiamequid nec. Adquid icquin: —Con Pamboen bëdamboshë icquidquio nendac. Aidën chiaid niacniaquec mibi icsamboec tabadec —quequin chuisho tantiatiapimbo icquin matsesën Esus chieshëmpondash.

⁶ Aden Esusën chuibeniabi icnuc con shënision acten mentoanquidëmba Nuquin Papan chiacpadomboen ambi chiaid chuibampondash. ⁷ —“Nuquin Papa yacnuësh abi tantiamequidquio choendac,” quequin Uanën chuibansho tantiashun ma dadpeshun ambi chuiboed tantianu —quequin Nuquin Papan con shënisio abi chuibanquid icmepanëdash. ⁸ Nuquin Papa yacnuësh choacmaidëmbi con shënision: —Nuquin Papan chomiaid Esus nec —quequin chuibampondash. ⁹ Aden ambi chuiboedquio Nuquin Papa tantiamenuec matsespanëdash Esus.

¹⁰ Adash matsesbëd tabadsho ambi matses uaidombi tantienquio icquin chieshëmpondash. ¹¹ Aden con matses isadaidbon Esus tantienquio iccondash. —Isadaidbo con matses nec —Nuquin Papa quenëdacpadquiec: —Isadaidbo con matses nec —queoapondash Esus. Adsho ambi con matses caidonquibi dadpeshun Esus tantienquio icpondash. ¹² Utsibombien daëdpactsëcshun: —Nuquin Papan Madombo Esus nec —quequin tantiasho Nuquin Papan: —Con mado nec. Con champi nec —cabempanëdash. ¹³ —Con matsesuidien Nuquin Papan: “Con mado nec. Con champi nec,” capec —¿quequidta adopanëdash? Padënquio. —Nuquin Papan mado nebi —quequin ¿ambembi chuiquidta con mado capanëdash? Padënquio. Nuquin Papan Mayanën tantiamiacpadomboen aton Madombo Esus tantiasho dada con mado caquin chido con champi capanëdash. Adembidi Esus tantiasho adoendac.

¹⁴ Adec Nuquin Papa tantiamequidquio Esus matsespanëdash. Nuquin Papan Mado abentsëqui yec bëdamboshë icpondash. Èbëd tabadquin nadatiambo icquin nabanquin matses bëdamboen nashumbampondash. Aden Nuquin Papambo tantiamepondash Esusën. ¹⁵ Aid con shënision chuipondash. —Èmbi chuiboedquio nec. “Èbi icsaquid icnuc bëdamboshë icquidquio choec,” èmbi caboedquio nec. “Èmbia Nuquin Papan chiaid chuibambon aidëntsen tsyuec choshon chuibanendac. Èbi bëyuc tishaidi tishabi icnubi aid ënden icpampic,” èmbi caboedquibidi Esus nec —quepondash con shënisio.

¹⁶ Con shënision chiacpadquidquio icquin abi tantiaquido Nuquin Papan bëdamboen isaïdo icmeshun adenuidi Nuquin Papa nuqui bëdamboen ismec. ¹⁷ Èndenquimboshë Nuquin Papan chiaid dada uaquin Moisesën Nuquin Papan matses icsaïdo cuidte tantiamepampic. Padnuen Esuquidistun Nuquin

Papan bĕdamboen iste tantiamequin: –Nadquo Nuquin Papa iquec – quequin matses bĕdamboen tantiamepondash. ¹⁸ Ambi isacmaidquo icsho matsesĕn Nuquin Papa bĕdamboen tantiatiapimbo iquec. Padnuen aton Mado abentsĕcshunquo aton dayun tsadquidĕnquiobi matsesun Nuquin Papa bĕdamboen tantiamepondash. Aidquo chuinu. Tantia.

*Tsusiobon chuimiac Uan acten mentoanquidĕn chiaid
(Mat 3.11-12; Mad 1.7-8; Duc 3.15-17)*

¹⁹ Con shĕnisio Nuquin Papa tantiabenquid acten mentobenequid niondash. Aden acten mentobenesho isash Moisesĕn chiampid namequido aid chuimenuc cho-chopondash. Edusaden yacnocquido isadaidbo tsusiobon: –Chuimetan –cac cho-choquin con shĕnisio chuituidpondash. ²⁰ –ĵTsuntsin chiac nai? ĵMimbembida nai? “Bĕdamboshĕ icquidquo Nuquin Papan chomendac,” quequin nuquin tsusedpan ĵdada uapampidta ne? –cauidpondash. Adoquĕn: –Padenquo. Aidpenquo nebi –quepondash.

²¹ Adshobien: –ĵTsumintsi ne? ĵ“Naden naindami,” quequin Nuquin Papan chiaid chuibanquidquo unĕspampid Edias uincuenaidta ne? –caquĕn: –Padenquo. Aidpenquo nebi –queoapondash. Adshobien padpiden: ĵTsumintsimbo ne? “Moisespadquidquo choendac,” ĵcapampidta ne? –caquĕn: –Padenquo. Aidpenquo nebi –queoapondash con shĕnisio.

²² Adshobien padpidemboen: –ĵTsumintsimbo ne? ĵMimbenquiobienda nao? Ĕbi: “Chuimetan,” caboed chiec nidnu. Baded ĕbi chui –caquĕn: ²³ –Nuquin Papan tantiamiac nuquin tsusedpa Isayasĕn naden chuipampid nebi.

“Nuquin Papan bĕdamboshĕ icquid chomiabi icnuc aid bĕyuec utsiba choendac. Aidĕn shubu nibĕdacno capucuenequin chuibanendac naden.

‘Chuiquid dapambo choeque. Podqued andĕdbanshunta,’

quiachimboen chuiquin: ‘Nuquin Icho choeque. Icsaid ĕnash bĕdamboec tabadta,’

quequin chiendac bĕyuc choshon,”

quequin chuipampid nebi –quepondash con shĕnisio.

²⁴ Adnubien con tsusedpabon chiampid namequidon padiseyobo caidontsen aton chuiquid dapan chiacpadomboen con shĕnisio chuituidpondash. ²⁵ –Utsibon: “ĵAdquidta ne?” cac: “Adquidpenquo nebi,” queuidequi mibi iccoc. “ĵMitsipadquidquo icquin acten mentobano?” mibi caimbi –caquĕn: ²⁶ –Nuquin Papan chiacpadomboen abi tantiabenquido acten mentobenec nebi. Ĕmbi aden bĕdamboen nanuc utsimbien bĕdamboenshĕ naindac. Aidi mibĕdi tabadshobi ma mimbi tantienquo icboc. ²⁷ Ĕmbia Nuquin Papan chiaid chuibanombi. Aidĕntsen tsyuec choshon comapenen tantiaquin Nuquin Papan chiaidquo chuiquin Nuquin Papambo tantiamendac. “Aidi bĕdamboshĕ icquid icnuc ĕbi icsaquid icsho ĵatotsieshun: ‘Aid choec,’ quequin chuiquidquo Nuquin Papan icmiosi?” quec tsadebi –quepondash con shĕnisio padiseyobo chiec. ²⁸ Acte Odan caid uquĕ cuĕmatsiucuešh shubu dadpen icquid Betania caid yacnuĕsh adpondash.

Abided cuidadtequid nendac, Esus caid

²⁹ Badiadshun padpiden con shĕnision matses acten mentobanoapondash. Aden mentobanubien Esus chopondash. Chosho isashien: –Is. Nuquin Papan namiaidquo obeca bacuĕbimboecquid choeque. Aidi isadaidbon obeca bacuĕded cuidquin unĕs uacimboc matses icsaid bedshunec abided cuidadec unĕsendac. ³⁰ Ĕmbi chianeboedquo nec. “Ĕbi bĕyuc tishaidi tishabi

icnubi aidi ënden icpampic,” quiaſh: “Ëbi bēdapabi icnuc bēdamboshē icquidquo choendac,” quepobi. ³¹ Aid chosho con matses isadaidbo tantiamenuen Nuquin Papan acten mentobenequid icmiondashi. Adonaidēmbi ěmbibi badedquo tantienquo iccombi. “Nuquin Papan chomiaid nec,” quequin tantienquo iccombi –quequindash con shēnisio.

Esus mentoaid

(Mat 3.16-17; Mad 1.9-11; Duc 3.21-22)

³² Adashic abi onquec: –Nuquin Papan naden ismiac tantiabēnombi. Aton Mayan aton dada nibēdquēc dēbimbimboec budec: “Matsadtoendac,” quebocpadequi Esus matsadtosho ispombi. ³³ Adsho isash: “Adquidshenda caposh Nuquin Papan: ‘Acten mentoanquid icta,’ ěbi caboedēn. ‘Con Mayan dēbimbimboec budec matsadtoedēn abi tantiaquidobēd con Mayan tabadmendac,’ Nuquin Papan caboedshenda nepec,” quiobi Esus caic. Ěmbēmbi tantienquo ictsenombi. ³⁴ Aden ismiac: “Nuquin Papan Madombo Esus nec,” quequin tantiombi. Aden tantiaſhun: “Nuquī caimboed Nuquin Papan chomiaidquo Esus nec,” quequin mibi chiec nebi –quepondash con shēnisio.

Nēid dada uaquid Uan Esusbēd yanaid

³⁵ Adashic badiadash ambi acten mentobambocono con shēnisio nidoapondash. Aid tsibanequi nidoapondabi. ³⁶ Adececidquid isquien Esus cuempec. Cuensho isashien con shēnisio: –Is. “Nuquin Papan namiaidquo obeca bacuēbimboecquid nec,” ěmbi caboed cueneque –quepondash.

³⁷ Adsho tantiatanequini con shēnisio bēd icconadai utsi bēd Esus chinunec nidpondac. ³⁸ Nidquid chinunac bidiadquin istanequien: –¿Atotsi quec ne? –quepondash Esus. Adshobimbi: –Mibi isec nebi, Dabi. ¿Mitsimbo mibi ushaque? Isnu –capondambi. –Chuiquidquo nec –quequin con onquetembi Dabi caondambi. ³⁹ Adoac: –En isec cho –cac abi ushacno isec nidondabi. Ushē abucquid icnuc puduedash yuec tabadec onquetaniash inchēshtsēcnubi chondabi.

⁴⁰ Ěbēdtañ Esus chinunondaic Andedes niondash. Shubu dadpen icquid Betsaida caid yacnuēsh caniquid niondash. Aton buchi Petedo niondash. Petedobidi Simon capondash. ⁴¹ Adnubien Andedes aton buchi chiec nidpondash. Adececidquid Nidquid istuidash: –Nuquin tsusedpabon chuiampid Nuquin Papa yacnuēsh choquid Mesias caid istuidombique. En isec cho, buchi –capac caondash. Nuquin Papa yacnuēsh choquid Quidistu cashumbic con onqueten Mesias caic.

⁴² Aden chiaquien aton buchi Esus isec chopondash. Chosho isash Esus: –Uanēn mado mibi nec. Mibi Simon nec. “Nidaic moco utsi uatiapimbo yacimboec mibi chieshtoenquo icquid yanendac,” quequin mibi nidaic moco cuēnendambi –quepondash Esus Petedo caic. Con onqueten nidaic moco cain Sepas capondash Esusēn. Quidieco matsesēn onqueten Petedo capondash.

Esusēn Uedipebēdta Natanaid istuidaid

⁴³ Badiadash: –Con nidaic Cadidia caid yacno nidnu –quianec nidpondash Esus. Adececidquid Nidquid Uedipe istuidpondash. Istuidshun: –Nuquibi icnu. Cho –caquien Uedipe chopondash. ⁴⁴ Betsaida yacnuēsh caniquidbidi nepondash aid. ⁴⁵ Esusbēd icquid yanashic dada utsitsen Natanaid caid chiec nidpondash Uedipe. Adececidquid Nidquid istuidshumbien: –Isec cho. Moisesēn chiapticpadomboen chuiquin nuquin tsusedpabon utsi bōn: “Bēdamboshē icquid choendac,” quequin dada uapampicpadequi choshe. En isec cho. Shubu dadpen icquid Nasaded caid yacnuēsh caniquid

neque. Osen mado nec —quepac caondash. ⁴⁶ Adsho tantiash: —¿Nasaded yacnuështa dada bédambo icquid chopatsiash? Auëshquio dada bédambo icquid chotiapimbo iquendac —quepac caondash Natanaid. Adsho tantiash: —En isquiec cho —quepac caondash Uedipe.

⁴⁷ Adoac choshobien Esusën: —Is. Isadaidbombo neque. Muesambo nec —caquien ⁴⁸ Natanaidën: —¿Mitsipaden ëbi tantie? Mabi mimbi isacmaid-quo nepayoc —capondash. Adoquien: —Uedipen bedtanabi icnubi mibi cuête icueda caid tayun tsadsho tantiombi —capondash Esusën. ⁴⁹ Adsho tantiashumbien: —Nuquin Papan Madombobien mibi nec. Comapenen tantiaquid yec nuquin matses isadaidbo chuiquid dapambo mibi nendac —capondash Natanaidën: —Istiapimbo yacno chiosh —quequin tantiashun. ⁵⁰ Adoquien Esusën: —“Cuête icueda caid tayun tsadsho mibi tantiombi,” ëbi quesho ¿tantiash: “Nuquin Papan Madombobien nec,” badedquo que? Padpiden comapenen tantiaquin nabansho isun mimbi ëbi tantiaquiot-siandac. ⁵¹ Tantia. Mibi chuinu. Isadaidbo tsusedpa Acobon Nuquin Papan abi yacnoshon uaido mayan bédabo Nuquin Papa yacno dectatonesho isash: “Aidbéd tabadte Nuquin Papan ëbi tantiametiadquo iquiec,” quequin tantiapampicpadomboen mimbi ëbi tantiendac. “Matsesun Nuquin Papan Madon matses abéd tabadte tantiamec,” quequin mimbi ëbi tantiendac —quepondash Esus abéd icquido chiec.

2

Esusën ambembi actequid uaid

¹ Aden Natanaid chiash aton nidaid Cadidia caid yacnobi Esus tabadpondash. Ambo tabadec daëdec ushtsambi shubu dadpen icquid Cana caid yacnocquidën isadaidbon aton chido bedquin ismequin pemenuen aton shubuno matses dadpen cho-chomepondash. Adoac cho-chomiaidobéd Esusën tita puduedpondash. ² Esutsen puduedpondash. ³ Adec puduedash tabadquin uba chinaid actequid uesquin acbededpondash. Adsho isumbien anin Esus chuipondash. —Actequid naimëdoshe. Comapenen tantiaquid icquin mimbi tantiapadomboen nata, mado —capondash. ⁴ Adoquien: —¿Atotsi quequin mimbi ëbi chuipe, tita? Chiata. Con Pan tantiacpadënquo naimbique —quepondash Esus. ⁵ Adsho tantiatanquin anin yuabo actequid cushtobanquido chuipondash. —Con madon chiacpadomboen nata —capondash.

⁶ Ambobi tëchu dapa 6tedi tabëcaid icpondash. Mëpamëdtembo acte nua 120 ditedos cactembi anidboedi acte naimëdaid icpondash. ⁷ Adnubien Esusën: —Në tabadquidën acte cushtoban —cac cubu-cubuctsëcquo icnuc acte cushtobampondash yuabon. ⁸ Cushtobanacsho isun Esusën: —Ueshun buanshun mibi ancaquid acmetan —cac acmetampondash.

⁹ Adoac acquin tanaquien actequid bédamboshë icquid icpac caondash acte icboedi. —Nibëda damboedquo ¿mitsimbo bedpash? —quepac caondash yuabo ancaquid. Adsho tantiashun yuabon: —Esusënquobien naccosh —quequin tantiapac caondash. Adnubien yuabo ancaquidën chido bednuequid chuipondash: —Aidën actequid bëpash —queshun. ¹⁰ —Nuquin matsesën actequid bédambo icquidba isedanquido acmequid nendac. Adquid acmiac matses nua cubudacsho isash: “Actequid icsactsëcquidtsen acmënu,” quequid yendac. Aden mimbi nambo. Bédambo icquidquo ma mimbi nëbi acmianeyoc —quepondash yuabo ancaquid chido bednuequid chiec. Adnubien yuabon actequid bédamboshë icquid abitedi acmebampondash.

¹¹ Aden comapenen tantiaquid icquin ambembi actequid uaquin Esusën tauamboen ismebempondash. —Nuquin Papa yacnuësh choquid yec

comapenen tantiaquidquo nebi —quequin aden tauamboen ismebenondash nidaid Cadidia caid yacnoshon shubu dadpen icquid Cana caid yacnoshonquo. Adosho isun: —Con matsesèn chiampid Nuquin Papan chomiendien nec —quequin tantiabenondambi.

Esusèn chushcaquin cuemiaid

(*Mat 21.12-13; Mad 11.15-18; Duc 19.45-46*)

¹² Aden ambembi actequid uatanec nidec shubu dadpen icquid Capedanaun caid yacno Esus nidondash. Aton tita yec aton buchi yec abèd icquido yec èbi yec quec Esusbèd nidaniondabi. Ambo daèd pactsec ushec tabadondash. ¹³ Ambo ushcuidanec nidequi shubu dadpen icquid Edusaden yacnoshon Esus nidaniondashi. —Nuquin matses tsusedpabo unès uainquo icquin Nuquin Papan matamiampid inchèsh tantiaquin obeca bacuè pec nèbi tabadeque. Isec nidnu. Nid —quianec nidanepondash. ¹⁴ Nidashic Nuquin Papa tabadte shubu uashunaid dapa daquènè uaidèn puduedondash nuntanquo puduedabi. Puduedshun isquien matses dadpen nèish yua chedobèd tabadpec. Baca bènè yec obeca yec dèbimbimboecquid quènèmpin sauedaid yec quec tabadpondash. Aton yua menequin piucquid bednuec utsibo tabadnubi utsibo ambi tabècaid dayun tabadpondash. Aido nidaid utsi yacnuèsh choquido aton piucquid dadpen bedshun ampshunquin daèd pactsec menequido niondashi. ¹⁵ Adec tabadsho istanquimbien Esusèn cueshcate badedquo nacnentanquin cuesquin niacumpondash umanuc abitedimbo. Aden umanuc niacuntanquin tabècaidtsen bidiacbanquin piucquid siabudshumbampondashi. ¹⁶ Adotanquimbic dèbimbimboecquid yuaquidotsen chushcapondashi. —Baded mitsana buanec nid. ¿Piucquid bednuen shubu uaidta nedic? Ma con Pa tantiate shubu neyoc —quequin chushcapondashi.

¹⁷ Adsho isun naden tantiondambi. —Adquidshenda Nuquin Papan chiaid chuiquin con tsusedpan dada uapampic. “Aton Papan shubu cudasquidquo nendac,” quequin Esusèn nate chuiquin dada uapampic —quequin tantiondambi.

¹⁸ Aden nicacsho isumbien con matses chuiquidon: —¿Tsuentsin chiac nao? “Nuquin Papan chomiaid icquin naombi,” quequin comapenen tantiaquin nabanquin èbi isme —caquien ¹⁹ ismenquo icquin ompoacimboen Esusèn chuipondashi. Abibi cadequi: —Mimbi nèid shubu icsa uabocsho padpiden nacnenoaindambi bèdambo icnuc. Daèdec ushquin nacnenquin nainendambi —quepondashi Esus. ²⁰ Adsho tantiashe Nuquin Papa tabadte shubu uashunaid dapa ca danec: —¿Badedquioda nacnempatsia? Nèid nacnenquin seta dadpenquioshè 46tedquioibi matamiac cadenec —quepondashi con matses chuiquido.

²¹⁻²² Yuecquo ictaneshun Esusèn aden chiaid tantiondambi. Unès uacsho chococac daèdec ushash Esus uincuenaccondashi. Uincuenacsho isash: —Abibi cadecshenda Esus nepondashi. Abibi cadec: “Daèdec ushquin nacnenquin nainendambi,” quecshenda nepondashi. Aden chuiquinshenda con tsusedpabon dada uapampic —quequin tantiondambi.

Dadpeshun Esus tantiauidaid

²³ Nuquin Papa tabadte shubu uashunaid daquènè uacnoshon cuemeshumbic Edusaden yacnoshontsen comapenen tantiaquin nabanquin Esusèn ismepondashi. Adsho isun matses dadpeshun: —Nuquin tsusedpabon chiampid Nuquin Papan chomiaidien Esus nechitec —queshun Esus bèdiactsec tantiatsècondashi. ²⁴ Aden tantiatsècsho ambembi tantiashe: —Ai, èbi tantiaquidquo nec —quenquo icquin: —Èbi bèdiactsec tantiatsec —quequin tantiapanèdash. ²⁵ Utsin chiambobi ambembi tantianèdash.

Aden matses abitedishun otacquo tantiaid ambembi tantiaquidquo Esus niondash.

3

Esusën Nicodemo caid chiaid

¹ Adnubien Edusaden yacnobi Nicodemo caid icpondash. Tsusedpabon chiampid namequido padiseyobo chuiquid dapa niondash. Tsusio utsi-bobëdtan aton matses namequid niondash. ² Inchëshên Esusbëd onquenuc chopondash. Choshombic aïdëmbi: —“Nuquin Papan icmiacpadquid chuiquidquo mibi nec,” quequin tantiembi. Mimi comapenen tantiaquin nabansho isun: “Nuquin Papan namiaidënuidsëquien adotsiash,” mibi caombi —quepondash.

³ Adsho tantiashun: —Ai, adquid nebi —quenquo icquin Esusën ompoacbimboen chuipondash naden. —Tantia. Mibi bëdamboen chuinu. Chuca uac Nuquin Papa yacno tabadtequid mibi ictsiandac. Chuca uabi yec mibi padenquo ictsiac ⁴ —quesho tantiashien: —¿Mitsipaden tsusiobi chuca uapatsiash? Chidon padpiden usundoshon tishtiapimboen iquec —quepondash Nicodemo. ⁵ Adsho tantiashun Esusën: —Nuquin Papan Mayanën tantiamiac: “Nuquin Papa tantiaquin ëbi icsaid ëntiadquio iquebi,” quiaish bëdamboec tabadquid Nuquin Papabëd tabadtequid nendac. Adquid chuca uaid caimbi. Chuca uabi icquid Nuquin Papa yacno tabadtiapimbo iquendac. ⁶ Chidon tishaiduidtsëqui yec Nuquin Papabëd tabadtiapimbo iquendac. Nuquin Papan Mayanën chuca uaid Nuquin Papabëd tabadendac. ⁷ “Chuca uaiduidtsëqui Nuquin Papabëd tabadendac,” ëbi quesho tantiash: “¿Midapaden chie?” quepequien mibi iquec. ⁸ Tantia. Mibi chuinu. Cunquequid isadenquo icquid nec. Isadenquo icquimbi cuncac cuëte ishçudsho isash: “Abi cunquec,” mibi quepec. Adquiobidi isadenquo Nuquin Papan Mayan iquec. Isadenquo icquimbi aïden chuca uaid bëdamboec tabadsho isun: “Nuquin Papan Mayanën nac,” quequin mimbi tantiatsiac. “Nëid utsitsen tantsiash,” quequin mimbi tantienquo icnubi Nuquin Papan tantiacpadomboen aton Mayanën utsitsen chuca uatsiandac —quepondash Esus.

⁹ Adsho tantiash: —¿Midapadec? —quepondash Nicodemo. ¹⁰ Adoaquien: —¿Tantienquioda ique? Ma isadaidbo Nuquin Papan chiaid chuibanquid mibi neyoc. ¹¹ Ënden ushë utsin mibi chedo chiombi. Ëmbi isondaidquo chuiquinc ëmbi tantiondaidquo chuiquinc caombi. Adsho tantiash: “Tantiadendquo iquec,” ma mibi queboc. ¹² ¿Ëmbi chuiboed tantiadendquo icnubi padpiden chuiquin ëmbi Nuquin Papan abi yacnoshon naid chuishomenda tantiatsia? ¹³ Nuquin Papa yacno matses nidtanambo iquec. “Istanombi. Nadquo iquec,” quequin chuitiapimbo matses iquec. Ëmbien Nuquin Papa yacnuësh chondaidënuquin: “Nadquo iquec,” quequin Nuquin Papa tantiamendac. ¹⁴ ¿Atotsi canuen nuquin tsusedpa Moisesën nisibimboecnuc shocosh nactenaid dectampampic? “Nuquin Papan chiapadec ma aid isec nisin piaid bëdanu,” quequin cuesten dectampampic. Adomboembidi matses cuidmenquo icnuc cuesten dectamëdendabi ëbided cuidadec unësec. ¹⁵ Ëbi tantiaquido unësacsho cuidenquo icquin Nuquin Papa yacno ëbëd tabadmenuec adendabi —quepondash Esus Nicodemo chieç.

Nuquin Papan matses abitedi tantiaquin naid

¹⁶ Aden Esusën abided cuidadec unëste chuipondash. Nuquin Papan: —Ma adec abided cuidadec unësnu —quequin Esus chomepanëdash. —Unësquo

iquec —quequin matses abitedi tantiaquidquo icquin Nuquin Papan cudasenquo icquin matsesmeshun aton Mado abentsëcquiobi abided cuidpanëdash. —Ëmbi adoaid con Mado tantiaquid unësacsho icsaido cuidacno nidmenquo icquin ëbëdi tabadmendambi —quequin aton Madoded cuidpanëdash. ¹⁷ ¿Matses cuidnuenda Nuquin Papan Esus matsesmepanëdash? Padenquo. Matses cuidenquo icnuen napanëdash.

¹⁸ Aden aton Mado Esus tantiaquido cuidenquo icquin Esus tantiesabo cuidendac: —Con Mado chieshëmpec —qeshun. ¹⁹ Nuquin Papan matsesmi-aidën Esusën abi icsaid chuisho matses icsambo icquidon tantiatipimbo iquec. Ambi icsamboen naid ëntiapimbo icquin Esus tantiatipimbo iquec. ²⁰ Adquidon: —Ëbi icsaid Esusën utsibo tantiamenushe. “Icsambo iquec,” ëbi canushe —qeshun Esus chieshëmpec. ²¹ Nuquin Papan chiapadec tabadquidombien Esus chieshënenquo iquec. —Nuquin Papan namiapadec tabadquid nebique. Ma Esusën ëmbi bëdamboen naid chuibampanuna —quiash Esus tantiate bumpec.

Uan acten mentoanquidën Esus chuioaid

²² Adec Nicodemobëd onqeboshien Esus nidpondash. Edusaden yacnuësh nidec aid nidaidëmbi Udeya caidën capucueniondash. Abëd nidshobini Nuquin Papan chiaid Esusën chuibampondash. Adec nidshun Nuquin Papa tantiabenquido acten mentobeniondambi. ²³ Adnubien adomboembidi con shënisionsen acten mentobeniac caondash. Enon caid yacnoshon Sadin caid aonoentsëqui chunquen diadacnoshon matses dadpen acten mentoac caondash con shënision. ²⁴ Chieshëmënnquidon quënën nauedabi adoac caondash.

²⁵ Adnubien con shënisioëd icquido con matses utsibëd: —Mimbi icsamboen chiec —quec chushcananac caondash. Con shënisioëd icquido: —Uanèn Nuquin Papa tantiabenquido bëdamboen acten mentobamposh —qesho tantiash: —Padenquo. Esusëmbien bëdamboen acten mentobaniosh —quepac caondash. ²⁶ Adshumbien con shënisioëd icquidon: —Nuqui chuiquid chiec nidnu. Nid —quianec nidquin con shënisio chuituidpac caondash. —Acte Odan caid uquë cuëmatsiucshun ¿mitsicquid: “Nuquin Papan chomiaid nec,” mimbi cadio? Aidën mimbi naid dëniacquin matses dadpenquo acten mentobeniac caosh. ¿Ada bëda icpec? —caquien: ²⁷ —“Nuquin Papan chiapadomboen Esusën nash. Adomboembimbi naic,” qeshun Esus chieshëntiapimbo iquendabi. ²⁸ “Nuquin Papan chomiaidpenquieni nec,” quequin mibi chiondambi. “Nuquin Papan chomiaid bëdamboshë icquid choendac,” quequin bëyuc choshon aid chiec nebi,” quiondabi mibi chiec. ²⁹ “Ëmbi chuiboed nec,” quiash Esus chosho istanec cuishonquepobi. “Con matses aton chido bedmiombi,” quiash cuishonquiachimboec cuishonquepobi. ¿Aden chido bedmequidën: “Min bënëbëd nidenda,” caquinda ictiosh? Padenquo. Bënëbëd nidmiash bëdambo yacchimboec Esusbëd nidanesho isash bëdambo iquebi. ³⁰ Ëmbibi Nuquin Papan chiapadomboen Esus tantiamequin ënquin chuibanuc ëmbi acten mentoaido daëdpactsëc yanendac. Ëmbi chuiboedquo Esus tantiaquidoen dadpenquo yanendac. Aidquido bëdamboshë iquec —quepac caondash con shënisio abëd icquido chiec.

Nuquin Papa yacnuësh choquid chiaid

³¹ Adshumbic con shënision naden chuipac caondash. —Esuscho bëdamboshë iquec. Nuquin Papa yacnuësh choquid abipadquid utsi nibëdec. Padnueni matses yec: “Nuquin Papa isondambi. Nadquido iccondash” quequin chuitiapimbo iquebi. Esusëmbien ³² ambi isondaidbëdta ambi tantiondaidquido chuipac. Aden chiaqui matses dadpen: “Abimbo caic,”

quenquo icpec. ³³ Esus tantiaquidon: “Nuquin Papa muesambo nec. Ambi: ‘Bëdamboshë icquid choendac,’ quequin dada uamepampidquo Esus nec,” capec. ³⁴ Nuquin Papan chomiaidquo icquin Nuquin Papan chiaidquo Esusën chuibanec. Nuquin Papan aton Mayan abëd tabadmiaid icquin comapenen tantiaquin ismebanquin chuibanec. ³⁵ Ambi tantiaidquo icsho aton Papan abitedishun Icbombo icmiac. ³⁶ Adnuc: “Abitedishun Icbombo Esus nec,” quequin aton Mado tantiaquido unësacsho Nuquin Papan abëdi tabadmendac padpidec unësenquo icnuc. Esus chieshënguideoen Nuquin Papa yacno isenquo yec icsaido cuidquiacno nidendac —quequin con shënision chuipac caondash.

4

Acte uequid chido Esusën chiaid

¹ Esusbëd icquin Nuquin Papa tantiabenquido acten mentobanondambi. Adnubien con matses chuiquido padiseyo caidon: —“Uan acten mentoanquidën naid dëniacquin Esusën matses dadpenquo acten mentobanosh,” quiosh —qeshun Esus chieshëmpac caondash. ² Esusën nainquo icnuc ëmbimbo nasho isun chiaqui aden Esus chieshënac caondash. ³ —Mibi adosh —cac: —Con nidaidën nidnu —quianec nidondash Esus. Aid nidaid Udeya caid yacnuësh nidec aton nidaid Cadidia caid yacno nidondash.

⁴ Aid podquedën nidequi nidaid utsi yacno Samadia caid yacno nidpondash. ⁵⁻⁶ Adec nidquin ushë cuembo icnuc shubu dadpen icquid Sicad caid yacno istuidpondash. Aid anoentsëqui con tsusedpa Acobon tied uampid icpondash. Aid tied caic: —Ëbi unësan nëid tied: “Con na nec,” cata, mado —quequin aton mado Ose chiampid tied niondash. Ambo aidën uëdëshcampid acte uete icpondash. Aid dayunquiobi: —Tiboquenu —quec Esus tsadtuidpondash. ⁷⁻⁸ Adec tsadtuidnubini: —Pete bedtanu —quianec shubuno nidanepondac. Esus abentsëqui nianec nidaniondabi. Adec nidan Samadia yacnocquid chido acte uec choquin Esus tsadsho istuidpaccondash. Choshobien Esusën: —Acte beccho. Acnu, champi —caquien: ⁹ —“Acte beccho,” ¿caquindabi ique? Ma isadaidbo mibi nepayoc. ¿Isadaidbo icquindabi: “Acte beccho,” cai? capac caondash acte uequid chidon. —Samadia yacnocquidbëd onquesambo isadaidbo nec —quequin tantiec adac caondash.

¹⁰ Adshobien Esusën badedquo cuembo chienquo icquin chuipac caondash. —Nuquin Papan bëdamboen isquin naidbëdta ëbi tantiaquin: “Acte beccho,” mimbi ëbi catsiac. Adsho acte bëdambo icmianquid mibi acmetsiambi —quepac caondash Esus. ¹¹ Adoquien acte uequid chidon actembo ca danquin: —¿Mitsipaden acte ueshun ëbi menetsia? Ma min tëchu nibëdpayoc. ¿Midapaden mimbi uetiapimboen acte uquëduquo iquec? ¿Mitsimbo acte bëdambo icmianquid ueshun ëbi acmetsia? ¹² Nëid acte nuquin tsusedpa Acobon uëdëshcapampid nec. Aton yuabobëd tan aton bacuëbon acpampid nec. Nuquin tsusedpa bëdambo icquin nampid icnuc ¿mitsipadquidquo icquin nai? ¿Bëdamboshë icquid icquinda mimbi acte bëdamboshë icquid ëbi acmepatsia? —capondash acte uequid chidon. ¹³ Adoquien: —Nëid acash mibi bundoac. ¹⁴ Ëmbi acmiac mibi bundoenquo ictsiac. Acte bëdambo icmianquid acmiac ënëdenquo yec tabadquid mibi yantsiac —quepac caondash Esus badedi cuembo chienquo yec. —Ëbi tantiaquidobëd con Mayan tabadmiaic bëdambo yanec unësacsho ëbëdi tabadmendambi —quequin tantiec adac caondash.

¹⁵ Adsho tantiashun padpiden acte ca danquin: —Adquidquo ëbi acme. Bundoenquo yec nëmbo acte uec choenquo ictsiabique —caquien: ¹⁶ —Min

bënë bedtan —capac caondash Esusën. —Nuquin Papan chomiaidquo yec comapenen tantiaquid mibi nec —camenuen adoac caondash. ¹⁷—Min bënë bedtan —caquien acte uequid chido: —Con bënë nibëdec —quepac caondash. Adshobien Esusën: —Abimbo mimbi caic. Min bënë nibëdec. ¹⁸Dada mëdante auc abentsëctedquiobi min bënë icpadenec. Aidon mibi niambudnian nëbi mibëd icquid min bënëpenquo nec. Abimbo mimbi caic —quepac caondash Esus.

¹⁹ Adsho tantiash: —Isambobi comapenen tantiaquidien mibi nechitec. Mibipadquidquo chiec: “Nuquin Papan chomiaidquo nendac,” quepec con matses. Adquid icquin en ëbi chui. ¿Mitsishunquiemi Nuquin Papa bëdamboen tantiape? ²⁰ Con matses: “Nëmboen Nuquin Papa iquec. Nëid macuësh dapanshunuidtsëqui Nuquin Papa tantiac bëdambo ictsiash,” quepec. Min matsesien: “Edusaden yacnoshonuidtsëqui Nuquin Papa tantiac bëdambo ictsiash,” quepec —quepac caondash acte uequid chido. ²¹ Adsho tantiashun Esusën: —Tantia. Mibi bëdamboen chuinu. Nëbi nëid macuësh dapanshunuidtsëqui Nuquin Papa tantienquo icquin Edusaden yacnoshonuidtsëqui tantienquo icquin nidaid utsi-utsiec yacnoshon adembidi Nuquin Papa tantiabedendac. ²² Min matsesën Nuquin Papan chiaid daëdpactsëc tantiatsëcshun Nuquin Papa bëdiactëc tantiatsec. Con matses isadaid-bombien Nuquin Papan chiaid dadpen tantiashun: “Nuquin Papan chomiaid nuquin matses bëdambo icmianquid nuquin matsesën tishendac,” quequin bëdamboen tantiec. ²³ Nëbien utsin-utsinquien muainquo icquin: “Con Icho nec,” quequin Nuquin Papa tantiendac. Ambi chiacpadec bëdamboec tabadsho isash: “Adquid ëbi tantiaquidquo nec,” quetsiash Nuquin Papa. ²⁴ “Nuquin Papa tantiaquid ictiadquo iquebi,” quequidën Nuquin Papan Mayanën tantiamiacpadomboen abi tantiaquin ambi chiacpadomboen naquid nendac —quepac caondash Esus acte uequid chido chiec.

²⁵ Adsho tantiash chido: —“Nuquin Papan matses bëdambo icmequid chuiquid dapa chomendac,” quequin chuisho tantiondambi. Aid mesias caidi utsibon quidistu caposh. Aidëmbi nuqui tantienquo yaidtedi tantiametsiash. Aidbimboecquidien mibi nechitec —caquien: ²⁶ —Mimbi chidquibini nec —quepac caondash Esus chido chiec.

Esus Samadia yacnocquido chiec tabadaid

²⁷ Adnubini pete bedtanec chopondac. Adshun isquien chidobëd onquepec. Adsho isash: —¿Atotsi chiec chidobëd onquepec? —quepondabi utsibëd otacquo onquec. —¿Atotsi chiec chidobëd onquo? —cainquo iccondambi Esus. ²⁸ Adec ëbi chonobi tëchu nianec acte uec choquid chido nidpondash aton matses chiec shubuno nidec. ²⁹ —Isec cho. Ëmbi isacmaid dadan ëmbi naid abitedi chioshi. ¿Nuquin Papa yacnuësh choquid Quidistu caidta nioshe? En isec cho —catuïdac: ³⁰ —En isnu. Nid. Aidien nechitashe. Isnu —quianec matses dadpen cho-chopondash.

³¹ Aido choabi icnubi: —Në pete, Icho —ëmbi caquien: ³² —Padi. Mimbi tantienquo yaid con na utsi iquec —quepondash Esus petepenquo chiequi. ³³ Adsho tantiashini pete ca danec: —¿Utsibonda pete bëshumpash? —quecuededpondac ëbitedi. ³⁴ Adsho tantiash Esus: —Ëbi cuishoncamete utsi iquec. Ëbi chomiondaid Nuquin Papan chiacpadomboen naic bëdambo iquebi pete piacbimboec. Ambi chiaidtedi nainuec dayacquio iquebi —quepondash. ³⁵ Adashic padpidec: —“Ushë daëd-daëdquiecnuc nidmeshun nadquid adosbiecquid ëshëacsho bedembi,” quepec nuquin matses. Adosbiecquid ëshëacpaden ¿yuecshunda nëmbo icquidon ëbi tantiabempec? Padenquo. “Nëidon Esus tantiendac,” mimbi cacmaidobi cho-choeque. Is. ³⁶ Acte

uequid chido ěmbi chuiboeděn chiac matses dadpen cho-choeque. Chuibana. ěbi tantiash Nuquin Papaběd tabadtequid yanendac. Adsho isash nuqui cuishonquendac piucquid bedashbimboec. ³⁷ Tied icbon: “Con na peta,” cac ambi nidtsinacmaid matsesěn bedec. ³⁸ Aden ambi nitsinacmaid bedacbimboen mimbi naic. Utsibomba Nuquin Papan chĭaid chuibanědaido němbo icquido mimbĭtsen chuibanec. Adoac němbo icquidon Nuquin Papabědta ěbi tantiabenec. Cho-choeque. Is. En chuiban –capondash Esusěn aběd icquido chuiquin.

³⁹ Adnubien Esusběd onqueboed chidon chuitanaido cho-chopondash. –“Comapenen tantiaquin ěmbi naid abitedi chĭoshi,” quioshe. Nuquin Papa yacnuěsh choquĭdien nechĭtashe. Isnu. Nid –quianec cho-chopac caondash. ⁴⁰ Cho-choquimbi badedi: –ěbi yacno ushquin chĭec cho –quequin beduanac Samadia yacno tabadquin chuibampondash Esusěn. Aid matses chĭec ambo daědec ushpondash. ⁴¹ Aden Esusěn chuĭsho tantĭashien: –Nuquin Papa yacnuěsh choquĭd Esus nec –quĭampondash anocquido dadpen. ⁴² Adashic acte uequid chido chĭec: –Mimbi chuĭshouidi tantĭaboeděmbi němbi aiděnquĭo chuĭsho bědamboen tantĭaquioc. “Nuquin Papa matses bědamboen ismequid nec,” quequin tantĭembi –quĭampondash Samadia yacnocquido dadpen.

Chuiquid dapan mado Esusěn bědamĭaid

⁴³ Daědec ushanec Samadia yacnuěsh Esus nidondash. Abi caniondacno nĭdaid Cadidia caid yacno nidpondash. ⁴⁴ –ěmbi chĭacpaden abi caniondacnosh Nuquin Papan chĭaid chuibanquĭděn chuĭsho aton matsesěn tantĭenquĭo ĭquec. Con nĭdaiděn nidsho con matsesěn abi chuĭquid dapa icmetiapimbo icpebi –quianec aton nĭdaiděn chopondash. ⁴⁵ Adsho isun: –Tantĭesa nendac –Esusěn caboedombi abi bědiactĭěc tantĭatĭěccondash. –ĭChoecta icco? Nuquin Papan nuquin tsusedpabo uněs uainquĭo icquin matamĭampid ĭchěsh tantĭanuec Edusaden yacno nidshun mimbi nadatĭambo icquin nabansho isondambi –quepondash abi bědiactĭěc tantĭatĭěcquido Esus chĭec.

⁴⁶ Adec aton nĭdaiděn nĭdequi ambi actequid uaondacno Cana yacno nidpondash Esus. Adnubien shubu dadpen icquid utĭi Capednaun caid yacno con matses chuĭquid dapa icpac caondash. Aiděn mado uněs-tĭadtsěcquĭo yampac caondash. ⁴⁷ Adashic: –Esus Udeya yacnuěsh choac caoshe. Istanu –quianec chopac caondash uněstĭadtsěcquĭo icquĭděn papa. Adec Esus yacno choshombien: –Con mado uněstĭadtsěcquĭo iccoshe. Bědamec cho –caqui ⁴⁸ nĭdenquĭo yec abi datsĭdadquido chĭec: –ěbimbo mimbi tantĭenquĭo ĭquec. ěmbi bědametueidtsěqui mimbi tantĭec. ěmbi comapenen tantĭaquin nabansho isunuidtsěqui: “Nuquin Papan chomĭaidĭen nechĭtec,” quequin mimbi tantĭec –quepondash Esus.

⁴⁹ Adec onqueshobien abi niachĭidanquin padpiden: –Baded cho. Con mado uněstĭadtsěcquĭo iccoshe –capondash. ⁵⁰ Adoquĭen Esus: –Padi. Mĭn mado uněsenquĭo ye. Nĭdec nĭd –quesho tantĭash: –Abimbo caic –quianec nidpondash. ⁵¹ Adec nĭdquimbi abi chuĭnuec cho-chosho aton yuabo běquedac caondash. Aden běquedaqui yuan: –Mĭn mado bědanosh –quesho tantĭashun: ⁵² –ĭMĭtsimbo ushě ĭcnuc con mado bědanosh? –cac: –Ĕnden ushě yaquěduidtsěcnubi da una yantĭěcnubi bědanosh –quepac caondash aton yuabo. ⁵³ Adsho tantĭash: –Aděnquĭoshendabi: “Mĭn mado uněsenquĭo ye. Nĭdec nĭd,” caposh Esusěn –quepac caondash uněstĭemboeděn papa. Adshun: –Nuquin Papan chomĭaidquĭo yec comapenen tantĭaquin nabanquĭduĭo Esus nec –quequin aton shubun icquidobědtambi Esus

tantiapac caondash. ⁵⁴ Adec Udeya yacnuësh choash Cadidia yacnobidi ambi uba chinaid actequid uaquin ismequin tauaondacnobidi tabadquin bédamequintsen Esusën ismepondash.

5

Esusën dada icsatsaid bédamiaid

¹ Yuecquio ictanec Esus: —Edusaden yacno cuédënuec nuquin matses choeque. Nuquitsen nidnu. Nid —quianec nidanepondash. ² Shubu dadpen icquid Edusaden caid dacuenadquin daquënë uaid puduedte shëcuë dadpen icnu abentsëc obeca puduedte caid icpondash. Aid anoentsëqui acte tiquidimbo icquid icpondash. Aid con onqueten Betesada capondash. Ambobi daicsaido tabadte shubumpi mëdantetedi icpondash. ³ Acte nënantanquio icnuc dacuenadquieq shubumpi tabadquidën matses dadpen tabadpondash daicsaidouidquio. Bëshuaido yec capuenquio icquido yec canite tsasiaido yec quec tabadpondash. ⁴ —“Nuquin Papan abi yacnoshon uaid mayan bédan tèccuascaid acten abia mentoadquid bédanquid,” quedeneque. Tëccuascaic ma chobono —quiash cainec tabadpondash.

⁵ Adnubien Esusën ënden caniaidquio ambobi uesho istuidpondash. Èndenquimboshë aton dada icsabudash seta dadpen 38tedquiobi matamec capuenquio yec icsabudtsaidquio nepondash. ⁶ Adsho istuidshun: —Èdenquio daicsabudaid nec —quequin tantiashun: —¿Bédanteda bune? —catuidpondash Esusën. ⁷ Adoaquien: —Ai ¿mitsipadequini bédampe? Èbi bēdiactšëcquio nidnuc utsiba badedquio mentoadteniosh. Èbi buanquin mentoquid nibëdec —quepondash daicsatsaid. ⁸ Adshobien Esusën: —Min ushte nactnantanquin buanec nid —cac ⁹ badedquio aton dada bédantanquin aton ushte buanec nidpondash. Aid ushë chonoadenquio icte ushë niondash.

¹⁰ Aden buanshobien con matses chuiquidon: —¿Chonoadenquio icte ushënda ushte buampaid? Chonoadte ushëmbien ushte buanquid. Tsusedpabon dada uapampid ma mimbi niacpayoc —quequin chushcapac caondash. ¹¹ Adoaquien: —Èbi bédameboedën: “Buanec nid,” cac mambi naiyoc —quepac caondash Esusën bédameboed. ¹² Adsho tantiashun: —¿Tsuntsin naosh? —caquien: ¹³ —Tsaudi. Èmbi isacmaid èmbi isquiambobi badedquio nidaccosh matses dadpen icnu —quepac caondash bédameboed.

¹⁴ Adshumbic Nuquin Papa tabadte shubu uashunaid daquënë uacno puduedshun ambi bédameboed daicsacboed Esusën istuidpondash. Istuidshumbien: —Tantia. Mibi chuinu. Èmbi bédameboedquio mibi neque. Mimbi icsamboen naid ènash bédambo icta. “Nuquin Papan cuidquiac bédanenquio yec daicsabudquiochitomane,” quiash adta —capondash Esusën.

¹⁵ Adoaquien bédameboed abi: “¿Tsuntsin naosh?” caboedo chiec nidpac caondash. Nidshumbic: —Èbi bédameboed Esus niosh —quequin chuituidpac caondash. ¹⁶ Aden chuisho tantiatanequien: —Chonoadenquio icte ushënuidi bédamepac caosh. Icsambo iquec —quequin con matses chuiquidon Esus chieshëmpac caondash. ¹⁷ Adnubien: —Mibi adosh —quesho tantiashun abi chieshënuquido istuidshun Esusën naden chuipondash. —Mimbi Nuquin Papa caid con Pa ènenquio icquin matses nashunquidquio nec. Adecbidi ènenquio icquin matses nashunquidquio nebi. Chonoadenquio icte ushëmbidi con Pabëdtan adoquid nebi —quepondash Esus. ¹⁸ Adsho tantiatanequien: —“Chonoadenquio icte ushën naquid icsambo iquec,”

nuqui caboedquo: “Nuquin Papambo con pa nec,” quiosh. Adquid ic-samboshë iquec. “Nuquin Papapadquidquo nebi,” quechitequien nioshe. Cuesunequimbien ictiad –quepac caondash con matses chuiquido.

Nuquin Papan Mado nebi, quiaid

¹⁹ Adec abi chieshënquido abi cuesunete bunshobien padpiden istuid-shun chuipondash Esusën. –¿Ëmbimbo naidtambi nadio? Padenquio. Con Pan nasho isun aidën nacpadomboen mambi naboc. Adomboembidi Con Pan nacpadomboen naimbi. Ëmbentsëqui natiapimbo iquebi. ²⁰ Ëbi tantiaquin Con Pan ambi naidtedimbo ëbi tantiamec. Ambentsëqui nainquio iquec. Aidën tantiamiacpadomboen bëdiactsëc naquin nëid capuenquio icquid bëdamiombi. Adembidi ambi tantiamiacpadomboen naquin dacuëdampamboeuc naindambi ma isquionoeshun. ²¹ Con Papadquidquo yec unësaid uincuequidquo nebi. Matses ëmbi tantiaidotedi ëbëdi tabadmenuen uincuemendambi. ²² ¿Ëbi tantiesabo cuidnuen ambiuidtsëqui chuiquidta con Pa nedic? Padenquio. Ëmbien ambi chiacpadomboen naden chiendac. “Nëid nuqui tantiaquid neque. Nuquibëdi tabadmenuna. Nëid ëbi tantiesa icsambo icsho cuidnuna,” caindambi con Pa. ²³ Aidëmbi: “Ëbi tantiacpaden ma con Madotsen bëdamboen tantianu,” qeshun aden matses cuidte chuiquid icmiondashi. Ëbi adquid icmiondaid icsho ëbi tantiatipimbo icquidon ëbi chomiondaid Nuquin Papatsen tantienquio iquec. ²⁴ ¿Muectabi nedi? Abimbo chuinu. Tantia. Ëbi chomiondaid con Pabëdtan ëbi tantiaquid unësascho cuidenquio icquin ëbëdi tabadmendambi. Cuidtequid icboedi ëbi tantiaash ëbëdi tabadtequid yanendac –quepondash Esus.

²⁵ Adashic padpidec onquec: –Tantia. Mibi padpiden chuinu. Unësaidën tantienquio yachimboen ëbi tantienquio icboedombi ëbi tantiabensho bëdamboen tantiamequin bëdamboec tabadquid icmendambi. Adshun aido unësascho uincuemeshun ëbëdi tabadmendambi. ²⁶ Con Pan icmiacpadequi unësaid uincuequidquo nebi. Abibi unëstiapimbo icquid icquin unësaid uincuequidquo con Pa nec. Ambi icmiacpadquequi abi yacpadquidquo iquebi. ²⁷ Adec unëstiapimbo iccondaidi matesash icsaisambo icsho Con Pan matses icsaido cuidquid icmiondashi. ²⁸ Ëbi adsho tantiaashun: “¿Abimbobida capeba? Muequien nechitec,” ëbi cainda. ¿Muectabi nedi? Padenquio. Con Pan tantiacpadënquio ëmbi cuënac unësaidotedi uincuenendac. ²⁹ Adec uincuenascho ëbi tantiaquido ëbëdi tabadmequin ëbi tantiesabo icsaido cuidacno nidmendambi. ³⁰ Ëmbentsëqui nainquio iquembi. Con Pan chiacpadomboen naquin matses cuidte chiendambi. Matsesën naidtedi tantiaquid icquin adoendambi. Ëmbi naid nainquio icquin Con Pa bëdambo icmenuen aidën chiacpadomboen naimbi –quepondash Esus abi chieshënquido chiech.

Utsintsen ëbi chiech, quequin Esusën chiaid

³¹ Adshumbic Esusën abi chieshënquido chuioapondash. –Nuquin matsesën naden chiech. “Abentsëcshun chiaid icsambo iquec. Daëdshun chiaid abimbo iquec,” quequin chiech. Aden chiaid tantiec ëbiuidtsëqui: “Nuquin Papan Mado nebi,” qesho tantiaashun: “Abimbo mimbi caic,” mimbi ëbi catiapimbo iquec. ³² Ëbi tantiaquin abimbo chuiquid ma utsi iqueyoc. Nuquin Papambini: “Con Madombo nec,” caindac. ³³ Aden ëbi chuiquid utsi actën mentoanquid Uan pado icpadenec. Aidëmbi ëbi abimbo capadenec. “¿Nuquin Papa yacnuësh choquidta ne?” quequin mimbi chuitanac: “Padenquio. Esusuidi Nuquin Papa yacnuësh choquid nec,” quepadenec Uan pado. ³⁴⁻³⁵ Aden chieshtoenquio icquin bëdamboen chuipadenec. Chuisho

tantiatsash mibi bédambo icuidtsëccondac. “Èmbi Uan padon naid chuisho tantiashun: ‘Abimbo mimbi caic,’ èbi capashun. Èbi adoshò bédamboen istsiambi,” quequin mimbi tantiondaid Uan caombi. Matses icquimbi Uanèn èbi bēdiactsc tantiamequin chuipadenec. ¿Adquid matsesēnuidtsēquidabi abimbo chuipéc? ³⁶ Con Pambien: “Con Mado neque. Matses ismenu,” qeshun comapenen tantiaquidquio icmepondashi. Ambi adomiaid icquin comapenen tantiaquin nabanquin èmbi ismesho isash: “Ai, adquid nec,” quetiadquidi mibi nec. ³⁷ Èbi chiechidi onquequin Nuquin Papan nuquin tsusedpabo dada uamepampic. Adecbidi Nuquin Papa onquesho ¿ada mimbi tantiapadio? ¿Nuquin Papada istio? Padambo mimbi iquec. ³⁸ Ademibidi ambi dada uamequin chiampidquio ma mimbi bédamboen tantienguio yoc. Aid bédamboen tantiashumbien Nuquin Papan chomiondaid èbitsen mimbi tantiatsiac. ³⁹ Mibi nadpec. “Nuquin Papan chiaid nuquin tsusedpabon dada uampid tantiaquidquio nebi. Aid isbanquid yec Nuquin Papabéd tabadtequid nebi,” mibi quepec. Ma èbimbo chuiquin Nuquin Papan dada uamepampid neyoc. ⁴⁰ Aden dada uamepampid isbanquidombi mimbi èbi tantienguio iquec. Èbi tantiashoembi mibi Nuquin Papa yacno èbéd tabadmetsiandac. ⁴¹ “Èbi adsho tantiashun ma matsesēn èbi: ‘Bédambo mibi iquec,’ canu,” ¿quectabi ique? Padenquio. Con Pan chiacpadomben nanuembimbi aden chioc. ⁴² Èbi tantienguio icsho isun: “Nuquin Papa tantiesabo nec,” quequin mibi tantiembi. ⁴³ Èmbien Nuquin Papan chiacpadomben naic. Aden nasho mimbi èbi tantienguio iquec. Utsi: “Nuquin Papa yacnuësh choquid nebi,” quec muaquidien mimbi badedi tantiatsiac. ⁴⁴ Mibibi tantiadec: “Mibi bédambo iquec,” cananteuidi bunquin mimbi Nuquin Papa tantiatiapimbo iquec. Aden mimbi Nuquin Papa: “Mibi bédambo iquec,” cametiapimbo iquec —quepondash Esus abi chieshēnquido chiech.

⁴⁵ Adashic padpidec: —¿Èmbentsēquidambi: “Èbi tantiesabo neque. Cuidnuna,” quequin mimbi naid Nuquin Papa chuipéc? Padenquio. Mimbi tantiaidēnquio Moisesēntsen: “Nēido icsambo iquec,” mibi caindac. ⁴⁶ Aidēn chiampid bédamboen tantiaquimbien mimbi èbi tantiatsiac. Aidēn chiampidi mabi neyoc. ⁴⁷ Aden Moisesēn chiampid tantienguio icquin èmbi chuiboedtsen mimbi tantiatiapimbo iquec —quequin Esusēn abi chieshēnquido chuipondash: —Moisesēn chiampid tantiaquidquio nebi —quequido chuiquin.

6

*Esusēn pete uatanquin 5000tedi pemiaid
(Mat 14.13-21; Mad 6.30-44; Duc 9.10-17)*

¹ Yuecquio ictaniash Edusaden yacnuësh nidec Cadidia yacnobidi Esus nidpondash. Ambo nidash chian dapa Cadidia caidbidi budash cano antabēdtoshon potiacpondash. Aid chiambidi matses utsibon Tibedias capondash. ²⁻³ Poteshun nandoash pudundoanec macuësh dapa dectatoash macuësh poctsebi tabadtuidpondash. Ambo tabadquin èbi chedo chuipondash. Adnubien Esusēn matses dadpen bédamesho isboedo Esus isnuéc chochopondash. ⁴ Nuquin Papan isadaidbo unēs uainquio icquin matamiampid inchēsh tantianuec pec tabadte ushē nēbi yanuc niondash.

⁵ Aido cho-chosho istanequien Esus: —Uedipe, piucquid buanshun ¿mit-simbo pete bedtane nēido pemenun? —quepondash Uedipe chiech. ⁶ —¿Atoda queque? Tantienu —quiash adpondash Esus. —Pete bedabi icnuc èmbibi pete uanu —quequin otacquo tantiequi adondash. ⁷ Adoquien Uedipe: —Ma aitedquio pemetiapimbo yoc. Inchēshēn ushē 8tedquioibi nidmec

chonoadshun bedaidtedimbo piucquid menequin pete bedshun: “Pemenu,” cac aidtedquio pemiadenquio ictsiash –quepondash Uedipe.

⁸ Adnubien Andedesën Petedon utsin: ⁹ –Ma në madompin panëmpi Stedtsëc icpayoc, Icho. Nuëcquidëmpi daëdquioibi icctsec. Matses dadpenquio iquec. Aidtedtsëcquid pemetiapimbo iquec –caquien ¹⁰ Esusën: –Padi. Aidi bëdambo iquec. Abitedi: “Nëmo tabad,” caban –cac: –Nëmo tabad –cabanac sebad-sebadpambo icquidën uasinën matses dadpenquioshë tabadbudpondash. Dadauidtsëqui tambanac 5000ted icpondash. Chido bacuëbobëdta tambanambo icpondambi.

¹¹ Adshumbien Esusën madompin pete pamba bedtanquin Nuquin Papa chuipondash. –Pete uaquid yec mibi bëdamboshë iquec. Mimbi uaid nëid pete bëdambo iquec, Papa –quec onquetanquin: –Meneban –cac abëd icquidon tabadquido abitedi menebampondash. Adotanquimbic nuëcquidëmpitsen bedtanquin ademibidi Nuquin Papa chuitanquin menebanoapondash. Adoac utsibon ambi piactembi pebedednubi utsibon ambi piactembidi pebededpondash. ¹² Aden ambi piactembi pebededacshobien Esusën: –Napi uaid secainda. Sandoshon dayun ua –cac ¹³ tsitsan dapan napiuaid sandoshon dayun uapondambi tsitsan 12tedquioibi sandoid icnuc.

¹⁴ Aden pemiaquien pemiaido: –Comapenen tantiaquin Esusën pete dadpenquio icmiac. Moisesën chuipampidshenda nepec. “Nuquin Papan bëdamboshë icquid chomendac,” capampidshenda nepec. Aidien nuqui chuiquid dapa icmetiad –quepac caondash Esus tantiamenquio yec. ¹⁵ Adsho ambembi tantiashien: –Abi chuiquid icmenuen ëbi “Bednu,” caique. Nëbi abi chuiquid ictiapimbo iquebique. Cuenu –quianec abentsëqui cuempac caondash Esus macuësh dapa dectatoec nidec.

Esus acte bëntse choaid
(Mat 14.22-27; Mad 6.45-52)

¹⁶ Esus cuembon inchëshbudtsëqui chian budondabi ëbitedi. ¹⁷ –Capednaun yacno nidnu –quec cano antabëdtoshon potenubi inchëshpondash Esus acte bëntse chopanushta. ¹⁸ Adnubien cunquequid dapa cunquetuidpondash. Acte comapenec tēcguasquenuc ¹⁹ uncadenquio yampondash. Ënapen nidabi nëbi 6 quidometedos cactiontsëqui nidshun isquien matsesbimboec acte bëntse chopec. Adsho istanec dacuëdquiondabi. ²⁰ Adshobini: –Ëbi neque. Dacuëndenda –capondash. ²¹ Adoac: –Esus nec –quetanquin badedi antsadtomiondambi. Aid antsadtometanquin badedquio potepondambi. Nandoash ambobi ushondabi Capednaun yacno.

Pemiaidon Esus istuidoaid

²² Adnubien abi pemebocnobi matses ushpac caondash. Badiadnuc isucunshun isaquien Esus nibëdec. Nibëdsho isashien: –Ma cano abentsëcquidëmbi abëd icquidon potepaboc. Ma aibdëd nidenquio icpaboc. ¿Mitsimbo nidpash? –quepac caondash pemiaido. ²³ Adnubien shubu dadpen icquid Tibedias caid yacnocquidon cano dadpen bëbëpac caondash. Pete pemebocno anoentsëqui nando-nandosho isash: ²⁴ –Potequimbien Esusën yashe. Nëid canobi antabëdtoshon potenuna –quetanec antabëdtoshon potiac-potiacpac caondash.

Potiac-potiacash Capednaun yacno pudundoshon ²⁵ Nuquin Papan chiaid chuibante shubun abitedi puduedshun Esus istuidpondash. Istuidshun: –¿Mitsipaden potio, tsusio? –caquien: –Naden –quenquio yec: ²⁶ –Tantia. Mibitedi chuinu. ¿Ëbimbo tantianuecta chodio? Padenquio. Ëmbi pete uasho isash: “Nuquin Papan namiaidën naoshe. Istanu,” ¿quecta ictio?

Peteuidtsèqui tantiaquin ma mimbi èbi nibèneyoc. ²⁷ Peteuidtsèqui tantiaquin pete bednuen naquidquo ma mibi neyoc. Aidquo chodquetequid nendac. Chodquetiapimbo icquid tantiaquin bédamboen nata. Aden nash èmbi icmiacpadquie Nuquin Papabéd tabadtequid mibi yanendac. Nuquin Papan: “Con Mado neque. Ismenu,” quequin namiacpadamboen comapenen tantiaquid icquin mibi adquid icmetsiambi —quepondash Esus. ²⁸ Adsho tantiash: —“Nuquin Papan chiacpadamboen nata,” quepequien mibi iquec. Adamboen natiadquo icquin ¿atotsimbi nape? —caquien: ²⁹ —Nuquin Papan chiacpadamboen natiadquo icquin ambi chomiondaidquo tantiata —quepondash Esus ambi pemiaido chiech.

³⁰ Adoaquien: —¿Mimbi aden chuishouididambi: “Adquid nec,” quequin tantiape? ¿Atotsi utsi comapenen tantiaquin mimbi èbi ismepatsia? ³¹ “Èndenquimboshè pete nibèdacnoshon Moisesèn con tsusedpabo nibedbèdi sequiaid pete pemianepampic,” quequin dada uapampid isombique. Adquid nacnenquin èbi isme —quepondash pemiaido peteuidtsèqui tantiech. ³² Adoaquien Esus: —Nuquin tsusedpa Moisesèn nainquien icpampic. Con Pambien aden pemepampic. Nèbi ambi chomiondaid petebimboecquid utsien Nuquin Papan mibi tantiametiadquo iquec. ³³ Aid petebimboecquidèn matses bédambo icmetsiash pete piacimbocnuc —quepondash Esus abibi cadequi.

³⁴ Adsho tantiash petembo ca danec: —Ènenquo icquin adquid èbi pemeta —quepondash pemiaido ambi peboeuidtsèqui tantiech. ³⁵ Adshobien Esusèn: —“Èbiuidtsèqui petebimboecquid icquin matses bédambo icmequid nebi,” caimbi. Èbi tantiaquid ènenquo icquin bédambo icmendambi petebèdi acte bundoenquo yacimbocnuc. ³⁶ Èmbi chuibocpadamboen ma mimbi èbi tantienquo icboc. Èmbi comapenen tantiaquin nabansho isumbi ma mimbi èbi tantienquo icboc. ³⁷ Utsibombien èbi tantiendac. Nuquin Papan tantiamiaidtedishun èbi tantiasho bédamboen isquin cacumenquo iquendambi. ³⁸ ¿Èmbi tantiacpadamboen naquidtabi nedi? Padenquo. Nuquin Papan chiacpadamboen nanuec mabi abi yacnuèsh chondac. ³⁹ Aden aidèn chiacpadamboen nanuen èbi tantiaquido unèsacsho uincuemeshun cuidenquo icquin èbèdi tabadmendambi. Unèsaid abitedi uincuemete ushèn adondambi. ⁴⁰ Nuquin Papa bunacpaden èbi tantiaquido uincuemeshun Nuquin Papa yacno èbi tabadacnombo tabadmendambi —quepondash Esus ambi pemeboedo chiech.

⁴¹ Adec: —Nuquin Papa yacnuèsh chondaidec petebimboecquid nebi —quesho tantiashien con matses chuiquido: ⁴² —¿Adquidida nepec? Ma icsamboen chuipayoc. ¿Nuquin Papa yacnuèsh choaidta nedic? ¿Nuqui isacmaidta nedic? Ma Esus cuèmedquid neyoc. Ma Osen mado neyoc. Anitsen tantiembi. Matsesèn tishaid Nuquin Papa yacnuèsh choquid ictiapimbo iquec —quecuededpondash.

⁴³ Adshobien Esusèn: —Shoshquetsècquin èbi icsamboen chienda. Abimboembi caoc. ⁴⁴ Èbi chomiondaidèn Nuquin Papan tantiamiabi yaido icquin mimbi èbi tantiatiapimbo iquendac. Nuquin Papan tantiamiaid icquin mimbi èbi tantiatiasiach. Aden Nuquin Papan èbi tantiamiaido unèsacsho unèsaid uincuemete ushèn uincuemendambi. ⁴⁵ Aden Nuquin Papan tantiamete chuiquin nuquin tsusedpan dada uapampic. “Nuquin Papanbien ambi bédamboen iste matses tantiamendac,” quequin chuipampic. Aden Nuquin Papan tantiamiaido èbi tantiaquido yantsiash. ⁴⁶ “Ambi tantiamiaidèn matsesèn Nuquin Papa ispash,” quenquo iquebi. Èmbiuidtsèqui abèd

icquin Nuquin Papa isondambi. Aden abĕd icquin abi isondaiddi matseson-
abi –quepondash Esus: –Matsesi nec –abi caquido chiec.

⁴⁷ Adashic padpidec: –Abimbo caombi. Ēbi tantiaquido Nuquin Papa yacnombo ĕbĕdi tabadmendambi. ⁴⁸ Petebimboecquid icquin aden tabadmendambi. Adecbidi bĕdamboec tabadmianquid nebi. ⁴⁹ Nuquin tsusedpabon pete utsi nibĕdacnoshon mana caid pepampic. Aid pequidi tsusiobudash unĕspampic unĕstiapimbo icquid yanabi. ⁵⁰ Petebimboecquid utsien Nuquin Papa yacnuĕsh chondaiddi nĕmbobi iquec. Aid piash ĕmbi chiacpadquiec padpidec unĕsenquio yec Nuquin Papabĕd tabadtequid yanendac. ⁵¹ Adquidquio nebi. Con nami piash matses unĕstiapimbo icquid yanendac. Adquidquio matses icmenuec ĕbided cuidadquin con nami menendambi –quepondash Esus ompoacximboen chiec. –Ēbi tantiaquido nĕbi bĕdamboen tabadmeshun unĕsacsho Nuquin Papa yacno ĕbĕdi tabadmendambi padpidec unĕstiapimbo icnuc –quequin tantiec: –Petebimboecquid icsho ĕbi piash matses unĕstiapimbo icquid yanendac –quepondash Esus. –Ēbi tantiaquido cuidmenquio icnuec ĕbided cuidadec unĕsendabi –quequin tantiec: –Con nami menendambi –quepondash Esus.

⁵² Adec: –Con nami piash matses unĕstiapimbo icquid yanendac –quesho tantiahsien namimbo ca danec con matses chuiquido onquecuededpondash. Utsi-utsiec: –ĵMitsipaden Esusĕn aton nami nuqui pemepatsiash? Aidquio tantiatiapimbo iquebi –quecuedednubi utsi-utsiec: –ĵAtotsi chuitadquio yec niosh? Chuisho tantianu –quecuededpondash. ⁵³⁻⁵⁴ Adsho tantiahsun Esusĕn ambi chiacpadomboembidi chuiĕaopondash. –Tantia. Mibi chuinu. Matses tantiaquidquio nebi. Aden tantiaquiec ĕbided cuidadec unĕsendabi. Ēbi adec unĕso isun con nami pequinc con intac acquinc cash nidaidĕnuĕsh bĕdamboec tabadquid yanash Nuquin Papabĕd tabadtequid mibi yanendac. Adquid icsho unĕsaido uincuemete ushĕnquio uincuemendambi ĕbĕdi tabadmenuen. Ēmbi chiacpadomboen nainquio yash Nuquin Papabĕd tabadtiaximbo mibi iquendac. ⁵⁵ Ai, con nami petebimboecquid nec. Con intac actebimboecquid nec. ĵPetebĕdi acte naimĕdanda mibi bĕdambo icpatsia? Adecbidi con intac chididiquec con nami icsabudec ĕbided cuidadec unĕsaid tantienquio yec mibi bĕdamboec tabadtiaximbo iquendac. ⁵⁶ Aden ĕmbi namibĕdta intac chuisho bĕdamboen tantiahsun ĕmbi chiacpadomboen matsesĕn natiadquio yanendac. Adsho isun aibĕd tĕshnanenquio icquin bĕdamboec tabadquid icmendambi. ⁵⁷ Nuquin Papa unĕstiapimbo icquid yec matses uincumequidquio nec. Aidĕn chomiac ambi namiacpadomboenuiddi naquin ĕbi tantiec tabadquid unĕsacsho uincumequin unĕstiapimbo icquid icmendambi. ⁵⁸ Aden ĕmbi naid tantiamenuec: “Nuquin Papa yacnuĕsh chondaiddi petebimboecquid utsi iquec,” quioĕi. Ēbi adquid icsho isash ĕbi tantiaquid Nuquin Papabĕd tabadtequid yantsiash. Nuquin tsusedpabon pepampidpadquidpenquio nebi. Adquid pequidi tsusiobudash unĕspampic. Ēbi tantiaquiddien padpidec unĕstiapimbo icquid yanendac ⁵⁹ –quepondash Esus Nuquin Papan chiaiddi chuibante shubunuĕsh Capednaun yacnuĕsh.

Abi tantiauidquidon Esus nianondaiddi

⁶⁰ Adec: –Con nami pequinc con intac acquinc cash mibi bĕdambo ictsiac –Esus quesho tantiahsien abĕd icquido utsi-utsiec: –Aidĕn chiacpadomboen natiapimbo iquebi. Icsamboen chiec –quepondash Esus tantiamenquio yec. ⁶¹ Adec onquesho ambembi tantiahsun Esus onqueoapondash. –ĵĒmbi

chuiboed tantiash chieshtotiadquioda ique? ⁶² Nuquin Papan matsesmi-aid yequi unēsash ēbi iccondacno ēbi nidacsho isash ¿atoda mibi quendac? Abimbo caombi. Nuquin Papa yacnuēsh chondaidini nec. ⁶³ Namimbo intacquibēda ca danequien mibi nec. ¿Namimbo pequinc intacquo acquinc casha mibi bēdambo icpatsia? Padenquo. Nuquin Papan Mayanēn ēmbi chuiboedbēda ēbi tantiamequin matses bēdamboec tabadquid icmetsiash. Adoaid unēsash Nuquin Papa yacno ēbēdi tabadtsiash —quepondash Esus cuembo chiec. ⁶⁴ Adashic padpidec: —Ēmbi aden bēdamboen chiaqui utsin-utsinquien mimi ēbi tantienquo yanendac —quepondash abi tantiauidquido chiec. Aido tauamboec abēdi nidnuc: —Nēidēn ēbi tantienquo yanendac. Nēid utsin ēbi chieshēnquido ēbi bedmendac —quequin ambembi Esusēn tantiapānēdash.

⁶⁵ Adashic padpidec: —Ēbi tantiauidquido tantiaquin naden chiombi. “Nuquin Papan tantiamiabi yaidēn ēbi tantiatipimbo iquendac. Nuquin Papan tantiamiaidēnquien ēbi tantiatsiash,” quequin chiombi —quepondash Esus. ⁶⁶ Adsho tantiashun dadpenshun Esus nianondash. ⁶⁷ Aden nianaquien Esusēn abēd icquido 12ted icquid chuipondash. —¿Mimbitsendabi niampe? —caquien ⁶⁸ Petedo: —Padenquo. ¿Tsudabēd icnuendambi mibi nianuc? Mibipadquid utsi nibēdec. Mimbuidtsēquien: “Ēbi tantiaquid bēdamboen isquin unēsacsho uincuemeshun ēbēdi tabadmendambi,” quequin chuihoc. ⁶⁹ “Abimboen caosh,” quequin mibi tantiembi. “Nuquin Papa yacnuēsh chonēdaid yec bēdamboshē icquidquien nec,” caombi mibi. Mibi niantiapimbo iquebi —quepondash Petedo Esus caic. ⁷⁰ Adoquien Esus: —Ai, mibi adquid icnuc utsien icsambo iquec. Mibitedi: “Nuquibi icnu. Cho,” cabampondambi. Ēmbi adondaid abentsēc Satanasēn namiaidquio yec icsamboshē iquendac —quepondash Esus. ⁷¹ —Simon Iscadien mado Udasēn ēbi chieshēnquido ēbi bedmendac —quequin ambembi tantiash adondash Esus.

7

Aton utsibon Esus tantienquo yaid

¹ Abi tantiauidquidon nianac Cadidia yacnouidi yuec Esus capucuenepondash. —Nidaid Udeya caid yacnocquido con matses chuiquidon ēbi cuesunetiadquio iquec —quiash Udeya yacno nidenquo icpondash. ² Adnubien con matses abitedi: —Edusaden yacnuēsh cuēdēntanu —quiampondash. Adanec nidaid utsi Udeya caidēn nidec 7tedec ushec cuēdēnuec matses dadpen nidacno Edusaden yacno nidanepondash. Cuēdēnuec Esus nidenquo icpondash. ³ Adec nidenquo icsho isumbien aton utsibon: —Edusaden yacno nidec nid. Mibēd icfiadquio icquid ano icnushe. Comapenen tantiaquin nabanquin aido ismec nid. ⁴ ¿“Ma matses dadpenshun ēbi tantianu,” quequinda matses daēdpactsēc yacnoshonuidi napec? Matses dadpen yacno nidshun comapenen tantiaquin nabanquin ismec nid —capondash aton utsibon. ⁵ —Nuquin Papan chomenēdaidquio nec —quequin tantienquo icquimbi adopondash aton utsibon.

⁶ Adoquien Esus: —Matses dadpen nidnuc nidtiadquio yec mibia nidta. Abitedishun isnuc nēbi nidtiapimbo iquebique. ⁷ Mibien anocquidon chieshēntiapimbo ye. Mibia nidta. “Nuquin Papan chiaid niac-niaquec mibi icsaic,” ēmbi cac chieshēnondashibique. ⁸ “Cuesunenushe,” quiash nēbi nidtiapimbo iquebique. Mibia nidta. Nuquin Papan tantiacpadec nidendabi ⁹ —quiash anobi Cadidia yacno Esus tabadpondash.

Esustsen Edusaden yacnuēsh cuēdēnuec nidaid

¹⁰ Aden aton utsibo nidanemias h yuec-yuec pactsëc ictanec abitsen Esus nidpondash Edusaden yacnuësh cuëdë nec nidec. Abitedi ismenquo yec tsyuec Esus nidpondash. ¹¹ Adnubien con matses cuëdëncuededacnoshon abi chieshënquidon Esus nibëmpac caondash. —¿Mitsimbo icpec? ¿Ada nëmbo chosh? —quequin chuibenepac caondash. ¹²⁻¹³ Adsho tantiash con matses Esus chieshënquido dacuëdë nec utsibo tantiamenquo yec shoshquetsëcquie onquepac caondash. Utsi-utsiec: —Esus bédamboshë icquid nec —quenubien utsi-utsiec: —Ma icsambo icquid neyoc. “Nuquin Papa yacnuësh chondaidini nec,” quec ma muequi neyoc —quec onquecuededpac caondash.

¹⁴ Adnubien con matses cuëdë nec taëbon abentsëc choec ushash Nuquin Papa tabadte shubu uashunaid daquënë uaidën Esus puduedpondash. Puduedshumbic Nuquin Papan chiaid chuibampondash. ¹⁵ Adsho tantiash: —¿Mitsipaden tantiashun chuipen naic? Nuquibëdtan Nuquin Papan chiaid isbanambo aidën iquec —quepondash con matses chuiquido. ¹⁶ Adsho tantiash Esus: —Ëmbembi chienquo icquin ëbi chomiondaidën chiaidquo chiec nebi. ¹⁷ Nuquin Papan chiacpadomboen natiadquo icquidën bédamboen tantiatsiash. Ëmbi Nuquin Papan chiaid chuisho tantiash: “Nuquin Papan chiaidquo chiec nec,” quequin tantiatsiash. Ëmbembi chuisho tantiash: “Ambembi chiaid nec. Nuquin Papan chiaidpenquien nec,” quequin tantiatsiash Nuquin Papa tantiaquidën. ¹⁸ Ambembi chuiquidën: “Mabi matsesën bédambo canu,” quequinuidtsëqui chuibantsiash. Adquidpenquien nec. Ëmbien: “Ëbi chomiondaidquo ma matsesën tantianu,” quequin ambi chiaidquo chiendac. ¹⁹ Mimbien adoenuquo iquec. Mimbi tantiaid nuquin tsusedpa Moisesën: “Cuesunenda,” quequin Nuquin Papan chiaidquo dada uapampic. Ëbi: “Cuesunenu,” caquin aidën chiaid ma mimbi niac-niaqueyoc —quepondash Esus abi chieshënquido chiec.

²⁰ —Mimbi ëbi: “Cuesunenu,” caoc —Esus qesho tantiashumbien ano tabadquidon: —Podobitsi icsa dapuduedash mibi tantiadenquo yec onquepec. ¿Tsuntsin mibi cuesunepatsiash? —capondash. ²¹ Adoenu Esus: —Nëidën ëbi cuesunetsiash —quequin chienquo yec: —Chonoadenquo icte ushën comapenen tantiaquin dada bédamepondambi. Aden bédamiacsho isash: “Adopenshenda naic. Chonoadenquo icte ushën daicsatsaid bédamequin Nuquin Papan chiaid niac-niacposh,” ma mibi quepondac. ²² ¿Ëmbentsëquidambi chonoadenquo icte ushën nadi? Ma min matsesën adoapaboc. Mimbi tantiaid Moisesën chiaid tantiaquin dada bacuë tishacsho 7tedec ushun shui dëbid dëteshunequid mibi nec. Moisesën aden tauambo iquec. Moises tishabi icnubien Nuquin Papan chiacpadomboen naquin: “Nuquin Papan yambo nebique. Ismenu,” qeshun Abadauanëmbien shui dëbid dëteshunequin tauapampic. Yuecquo ictaneshun adembidi Moisesënsen adopampic. Nëbi adembidi naic chonoadenquo icte ushëmbi chonoadquimbi ma mimbi shui dëbid dëteshuneyoc. ²³ Aden Moisesën chiampid niaquenquo icquin shui nacnenquin mimbi bédamboen naic. Ëmbitsen daicsatsaid dada abichobi bédamequin mambi bédamboen naondac. ¿Atotsi quequin ëbi chushcai? ²⁴ Chonoadenquo icte ushën dada bédamequid icsho: “Icsambo mibi iquec,” mimbi ëbi capec. Aden ëbi bédamboen tantienquo icquin mimbi icsamboen chiec. Ëbi bédamboen tantiaquioshon ëmbi naboed bédamboen chui —quepondash Esus abi chieshënquido chiec.

²⁵ Adec Esus: —Chonoadenquo icte ushĕn naondambi —quesho tantiashien anocquido Edusaden yacnocquido nadec onquecuededpac caondash. —Nuĕn chuiquidon: “Cuesunetiad,” caboedien nĕid nechitec. ²⁶ En is. Abi chieshĕnquidobĕdi tabadquin chieque. Chuiho ma chuiquidon chushcainquo icboc. “Nuĕn Papa yacnuĕsh choquid Quidistu caid Esus nec,” quequin tantiashumbien nachitec —quetanequien ²⁷ aidobidi: —Nuĕn Papa yacnuĕsh choquid ictiapimboen aid iquec. Abi caniacno tantiambi. Nuĕn Papa yacnuĕsh choquid abi caniacno tantiadenquo ictsiash —quepondash ano tabadquido.

²⁸ Adsho tantiashun Esusĕn Nuĕn Papa tabadte shubu uashunaid daquĕnĕ uacnoshon chuibanquin abitedi tantiamenuen naden chuipondash. —“Ēmbi isondaaid nec. Aton nidaaid Cadidia caid yacnuĕsh caniquid nec,” ¿quequindabi bĕdamboen tantiapadi? Ma mimbi padenquo yoc. Ēbemi chondaaidpenquo nebi. Ēbi chomiondaaid abi iquec. Ma mimbi aidquiobi tantienquo yoc. ²⁹ Ēmbien aidquo tantiendac. Aidbĕd tabadondaidquo nebi. Adsho aidĕn: “Nid,” cac chondaaid nebi —caquien ³⁰ —“Con pa Nuĕn Papanbo nec,” quechitequien nec —queshun abi chieshĕnquidon: —Cuesunemenuembien bedtiad —quetanquin: —Bednu —caqui bedadenquo icpondash. —Nĕbi ma Esus unĕs uainquo icnu —Nuĕn Papa quenuc bedmenquo icquin Esusĕn mĕtampanĕdash. ³¹ Esus cuesunetiadquo icnubien utsibon dadpenshun Esus tantiabempondash. —Nĕidpadquid utsi nibĕdtsiandac. Nuĕn Papan chiaid chuiquin nuĕn tsusedpabon dada uapampicpadomboen comapenen tantiaquin Esusĕn matses bĕdamebamposh. Nuĕn Papa yacnuĕsh choaid Quidistu caid Esus nec —quequin dadpenshun Esus tantiabempondash.

Ēbi istuidenquo iquendac, quequin chiaid

³² Aden Esus chiec sho-shoshquetsĕcquiec onqueshobien Esus chieshĕnquidon padiseyo caidon tantiapac caondash. Adshun abĕdan chuiquid utsibo chuipac caondash. —Ēmbi chuibocpaden Esuien bedtiad. Icsamboec onquioshe —cac: —Ai, adembien ictiad —quepac caondash. Adshumbic abĕd icquido sondado chuiquin: —Baded bedtan —capac caondash. ³³ Adoac nidanequin tantiatuidaquien nadec Esus onquepondash. —Yuec-yuecpactsec mibĕd icashic ĕbi chomiondaaidbĕdtsen tabadoaic nidendabi. ³⁴ Ēbi nibĕnquin ĕbi istuidenquo mimbi iquendac. Ēbi nidacno mibi nidiapimbo iquec —quepondash Esus.

³⁵ Adsho tantiash abi chieshĕnquido: —Nuqui istuidmenquo icnuec ¿mitsimbo nidpanuec nec? Matses utsi yacno tabadnuec con matses utsi-utsiec nidequi nidaniondacno nidshun ¿anocquidoda chuipatsiash?

³⁶ Tantiadenquo yec onquepec. ¿Atotsi quepec? “Ēbi nibĕnquin mimbi ĕbi istuidenquo iquendac. Ēbi nidacno mibi nidiapimbo iquec,” quepequien iccosh. ¿Atotsi quepash niosh? —quepac caondash Esus chieshĕnquido.

Aton Mayan abĕ tantiaquidbĕd tabadmete chiaid

³⁷ Adnubien cuĕdĕnec ĕnĕdte ushĕnquiobi con matses abitedimbo cuĕdĕnuec cho-chopondash. Cho-choash tabadbudnubien nidtoash comapenec onquequin Esusĕn chuipondash. —Acte natia bunac bimboec Nuĕn Papa tantiate bunquin ĕbi bĕdamboen tantiata. ³⁸ Adsho Nuĕn Papan chuiquin dada uamepampicpadomboen naindambi. Nuĕn Papa tantiamequid utsi ĕbi tantiaquidobĕd tabadmendambi. Adoac mibĕd tabadquin mibi bĕdamboen tabadmequin utsibotsen Nuĕn Papa tantiate bumetsiash —quepondash Esus. ³⁹ —Nuĕn Papabĕdta ĕbi tantiamequidquo Nuĕn Papan Mayan

nec —quequin tantiec adondash. Adquid abi tantiaquidobëd tabadmequin chomiabi aden chuipondash Esusën. Nuquin Papa yacno nidambien abi tantiaquidobëd Nuquin Papan Mayan tabadcuendondash.

¿Nuquin Papan chomiaidta nepeba? Esus caid

⁴⁰ —Nuquin Papa tantiate bunquin ëbi tantiaata —Esus quesho tantiashien Esus chiec ano tabadquido onquecuededpac caondash. Utsi-utsiec: —“Nuquin Papan chiaid chuiquidquo choendac,” quequin nuquin tsusedpa Moisesën chiampidien Esus nechitec —quenubien ⁴¹ utsi-utsiec: —Nuquin Papa yacnuësh choquid Quidistu caidien Esus nechitec —quenubien utsi-utsiec: —¿Cadidia yacnuështa Nuquin Papa yacnuësh choquid chopadic? ⁴² Padenquo. Nuquin Papan chiaidquido naden dada uapampic. “Nuquin Papan chomiaid nuquin tsusedpa Dabidën tsyuecquid nendac. Dabid caniampicnoshon shubu daëdpactsëcquid Beden caid yacnoshon aidi tishendac,” quequin chuipampic. Ma Esus muequi neyoc. Beden yacnoshon tishaidpenquo nec —quepac caondash. ⁴³ Adec dadpen: —Bëdambo icquid nec —quenubi aidtedbidi: —Icsambo iquec —quepac caondash. ⁴⁴ Adnubien: —Icsambo iqueque. Cuesunemuenmbien bedtiad —queuidpac caondash. Adshun Esus bedabi icpondash.

Isadaidbo chuiquid dapabon Esus chieshënaid

⁴⁵ Adnubien: —Esus bedtan —caboedo sondado bedabi Esus chieshënquido chiec chopac caondash. Chosho: —¿Atotsi quiash bedabi cho? —caquien: ⁴⁶ —Ma bëdamboenshë chuiboc. “Adomboen chuibanquid utsi nibëdec,” queshun bedtiapimbo iccobi —quesho ⁴⁷ tantiashien: —Aid muasho tantiashun: “Abimbo caic,” ¿cainda icco? ⁴⁸ ¿Adambi Esus muasho tantiadio? ¿Ada tsusiobon tantiadiosh? Padenquo iccosh. ⁴⁹ Utsibombien tantiash. Adquidon ëmbi bëdamboen tantiapadomboen Nuquin Papan chiampid tantiënquo iquec. Icsambo aido iquec. Aido cuidchitoshon. Esus icsambo iquec —quepac caondash con matses chuiquido padiseyobo Esus chieshë nec.

⁵⁰ Adnubien inchëshën puduedash Esusbëd onquiondaid Nicodemo caid abitsen chuiquid yec nadpac caondash. ⁵¹ —¿Abibi chuimiabida cuidpec? Nuquin Papan chuipampid nad iquec. “Icsambo iquec,” caidi abibi chuimequin: “¿Atotsi nao?” cac chuisho tantiashun cuidquid yendac,” quepampic. Adoac bëdambo ictsias. Chuimiabi cuidac icsambo ictsias —quepac caondash Nicodemo abëdtan chuiquid utsibo chiec. ⁵² Adoquien chuiquido: —Esus yacpadec Cadidia yacnuësh caniquid mibi nepanui. Aid tantiaquidien mibi nec. Nuquin Papan chiampid isbanta. Aid isbanshun: “Cadidia yacnuësh Nuquin Papan chiaid chuibanquidquo choenquo iquendac,” quequin mimi tantiatsiac. Ma Esus muequi neyoc —quepac caondash chuiquido Nicodemo chushcaic. ⁵³ —¿Chuimiabida cuidpec? —quetsëcscho aden Nicodemo chushcanec abitedi nidaniac caondash aton shubuno ushec nidec.

8

Bënëpenquo chudmequid cuënoten seshunetsenaid

¹ Nicodemo chushcabon Esus macuësh dapa Odibos caid yacno ushec nidondash. ² Adtanec choashic Nuquin Papa tabadte shubu uashunaid daquënë uaidën puduedpondash. Puduedsho isash matses dadpen chochëc abi datsidadsho Esusën chuipondash.

³ Aden chuinubien con matses tsusiobon aton bëënëpenquo chudmesho istuidshun chido bëpondash. Moisesën dada uampid chuibanquidobëdtan tsusedpabon chiampid namequido padiseyobon Esus yacno bëshun chido

nënantanquo nitsimpondash. ⁴ Adshumbien Esus chuipondash. —Aton bënëpenquo chudmesho istuidshun nëid bëombi. ⁵ Nuquin Papan chiaid Moisesën naden dada uapampic. “Aton bënëpenquo chudmesho istuidshun cuënoten seshunequin unës uaquid,” quepampic. ¿Adembidida mimbi tantie? —quepondash chido bëquido. ⁶ —¿Atotsi Esus quepatsiash? Nuquin Papan chiampidquo chienquo icsho: “Mimbi icsamboen chiec,” catiad —quiash adondash. —¿Adembidida mimbi tantie? —caquien Esusën ëcbedenquo icquin shuebudshun mëdanten nidaid dada uapondash. ⁷ Adshobien padpiden: —¿Adembidida tantie? —cado-cadoac nidtotanec: —Nuquin Papan chiaid niaquesambo icquin en mimbia cuënoten se —quetanec ⁸ padpidec shuebudshun mëdanten nidaid dada uaoapondash.

⁹ Adnubien: —Nuquin Papan chiaid niaquesambo icquin en mimbia cuënoten se —cac: —Nuquin Papan chiaid niaquesamboen nibëdchitec. Setiapimbo iquec —quetanec nidanepondash. Tsusioboba nidanebon caniabot-sen tsyuec nidanepondash chidoidtsëqui Esusbëd icnuc. ¹⁰ Adec nidanian Esusën nidtoquin isquien nibëdec. Nidaniac. Abi bëboedo nidaniacsho istanquin: —¿Mitsimbo nidosh, champi? ¿Mibi cuënoten sequidta nibëdosh? —Esusën cac: ¹¹ —Ai, nibëdosh —quesho tantiashien: —Ëmbimbo mibi cuënoten senquo iquembique. Mibi icsaid ënash bëdamboec tabadec nid, champi —capondash Esusën. Adoac chido nidondash.

Pabiate cuembo icnuc tantiamequid

¹² Yuec ictaniash Nuquin Papa tabadte shubu uashunaid daquënë uaidën Esus padpidec puduedoapondash. Puduedshumbien abi chieshënquido tantiamequin padpiden chuoapondash. —Pabiate cuembo icnuc con Pan bëdamboen iste matses tantiamequidquo nebi. Ëmbi tantiamic ëbi tanti-aquido icsateuidi bunenquo yanec bëdamboec tabadte buncuenendac. Adec ëbëd tabadtequid yanendac —quepondash Esus.

¹³ Adsho tantiash abi chieshënquido: —Mibentsëqui: “Adquid nebi,” quesho tantiatiapimbo iquebi. Muequien mibi nechitec. Matses daëdshun chiac bëdambo ictsias —quepondash. ¹⁴ Adsho tantiash Esus: —Ëbibi abimbo cadebi. “Con Pa yacnuësh chondash anobidi nidendabi,” quec muainquo iquebi. “Aton papa yacnuësh choash anobidi Esus nidoaindac,” quequin ma mimbi ëbi tantienquo icboc. ¹⁵ Cadidia yacnuësh choquid matsesuidien mimbi ëbi danec. Adquid danquin mimbi icsamboen chiec. Ëmbien abimbo chiec. Abimbo chuiquid icquin: “Nëid icsambo iqueque. Cuid-nuna. Nëid bëdambo iqueque. Cuidenquo icnuna,” quequin nëbi chienquo iquembi. ¹⁶ Aden chuiquin abimbo chuitsiambi. Ëmbentsëqui chienquo icquin ëbi chomiondaid Nuquin Papabëdtambi chuiquin abimboshë chuitsiambi. ¹⁷ Nuquin Papan chiaidquo Moisesën naden dada uapampic. “‘Ic-saosh,’ quequin daëdshun chuisho tantiash: ‘Abimbo chiec,’ quequid yendac. Adecbidi: ‘Bëdambo iquec,’ quequin daëdshumbidi chuisho tantiash: ‘Abimbo chiec,’ quequid yendac. Abentsëcshun chuishoen mua caquid yendac,” quequin Nuquin Papan chiaidquo Moisesën dada uapampic. ¹⁸ Aden Moisesën dada uampid tantiashun ëmbentsëqui chienquo iquembi. Ëbi chomiondaid con Pabëdtantsëqui chiembi —quepondash Esus.

¹⁹ Adsho tantiashun abi chieshënquidon: —¿Mitsimbo papa icpec? —capondash. Adoquien: —Con Pa ëbëda ma mimbi tantienquo icboc. Ëbi tantiaquimbien mimbi con Patsen tantiatsiac —quepondash Esus abi chieshënquido chiec. ²⁰ Abi chieshënquido onquecuededec quënë tabadnubi aid quënë cachoctsëqui Nuquin Papa tantiaquin piucquid menequin

nauedte tabëcacoshon Esusën chuipondash. Adec Esus anoentsëqui tabadsho abi chieshënquidon bedabi icpondash. Nuquin Papa: —Ma ëmbi tantiacpadënquio matsesën unës uanu —quenuc Esus bedabi icpondash.

Utsibon Esus tantiauidaid

²¹ Adnubien Esusën abi chieshënquido padpiden chuioapondash. —Nidendabi. Èbi nidan ëbi nibënquin mimbi ëbi istuidenquio iquendac. Ambi chiaid niac-niacquido icsho Nuquin Papan bëdamboen isambobi mibi unësendac. Adash ëbi nidacno mibi nidtiapimbo iquendac —quequin chuipondash Esusën. ²² Adsho tantias Esus chieshënquido: —¿Abibida Esus cuesuniadpec? Abibi cuesuniadash Nuquin Papan icsaido cuidacno nidtsiash. Ambo nuqui nidtiapimbo iquec. ¿Aden chiecta: “Èbi nidacno mibi nidtiapimbo iquec,” quepec? —quepondash abi chieshënquido. ²³ Adsho tantias Esus: —Mibi matses nec. Èbien con Pa yacnuësh chondaidquo nec. ²⁴ “Adquid icsho ëbi tantienquio icquid unësacsho Nuquin Papan ambi icsaido cuidacno nidmendac,” quequin tantiaquin: “Nuquin Papan bëdamboen isabi mibi unësendac,” mibi caombi —quepondash Esus.

²⁵ Adsho tantias abi chieshënquido: —¿Mitsipadquid icquin ëbi aden chie? —quepondash Esus caic. Adoaquien: —Èmbi chianeboedquiobi mabi neyoc —queoapondash Esus. ²⁶ Adashic padpidec: —Mimbi naid dadpen chuiquin mibi cuidte chiendambi. Èmbembi chienquio icquin ëbi chomiondaid muesanquio chiaidquo chiendambi. Aidën chiaiduidi matses abitedi chiendambi —quenubien ²⁷ Esus chieshënquidon: —Abi chomiondaid Nuquin Papambo nec —quequin tantienquio icpondash. ²⁸ Aden tantienquio icsho isun Esusën padpiden chuioapondash. —Matsesmiaidquo icshobi ëbi cuesten dectanshumbic mimbi ëbi tantiaabenendac. “Ambi chiacpadquidshenda nepadenec. Ambembi chiaid chienquio icquin aton Papan chiaidquo chuiquin aidën chiacpadomboenshenda napadenec,” quequin ëbimbo mimbi tantienquadac —quepondash Esus. ²⁹ Adashic padpidec: —Nëbi ëbi chomiondaid ëbëd iquec. Aid bëdambo icmenuen ambi chiacpadomboen nasho isun ëbi nianenquio iquec —quepondash Esus.

³⁰ Adsho tantias hun: —Abimboen Esusën caic. Nuquin Papa yacnuësh choquidien nec —qeshun Esus tantiauidtsëccondash dadpenshun.

Satanasën yuabo nec, quequin Esusën chiaid

³¹ Adsho isumbien Esusën abi bëdiactsëc tantiauidtsëcboedo chuipondash. —Èbi tantiaquidën ëmbi chiacpadomboen natiadquo iquendac. ³² Nuquin Papabëdta ëbi aden tantiasho icsamianquidën yua icboedi aidën yuapenquio mibi icmetsiambi —quepondash Esus abi tantiauidtsëcboedo chie. ³³ Adec Esus: —Yua —quesho tantias hien: —Abadauan yampidën tsyuecquido yec utsin yuacmaido nebi. Tantienquio icquin mimbi icsamboen chie. ¿Atotsieshun: “Mibi yuapenquio icmetsiambi,” quequin ëbi chio? —capondash abi tantiauidtsëcboedon Esus chuiquin.

³⁴ Adoaquien: —Tantia. Mibi abimbo chuinu. Uidën uacbimboen icsambo icquidën ambembi abi icsaid ëntiapimbo iquec. Abembi bëdambo ictiapimbo iquec. ³⁵ ¿Mitsipadquid nuquin matsesën yuaid icpec? Aton madopen yec icsambo icsho icbon cuemequid. Aton madombo bëdamboen isquid. ³⁶ Aden con Pan aton Madombo icsho ëbi bëdamboen isquin ëbi tantiaquidotsen bëdamboen isendac. Aden ëbi tantiaquido bëdamboen isquin bëdamboec tabadte bumequin abi yacno ëbëd tabadtequido icmendac —quepondash Esus.

Satanasën madobimboequido chiaid

³⁷ Adshumbic Esusèn abi chieshènquido chuihoapondash. —“Con tsusedpa Abadauan icpampic,” quequin mimbi abimbo chioc. Adboedëmbi ëbi cuesunetiadquio mibi iquec. Ëmbi abimbo chuisho tantiate bunenquio icquin ëbi cuesunetiadquio mibi icpec. ³⁸ “Con Pabëd tabadquin isondambi,” quequin ëmbi bëdamboen chuisho tantienquio icquin min papabimboecquidën chiapadomboen mimbi naindac —quepondash Esus abi chieshènquido chiec. ³⁹ —Min papabimboecquidën chiapadomboen mimbi naindac —queshobien: —Con tsusedpa Abadauanën nacpadomboen mambi napaboc —capondash Esus chieshènquidon. Adoquien Esus: —Ma mimbi adoenuo yoc. Abadauanën nacpadomboen naquin mimbi bëdamboen natsiac. ⁴⁰ Bëdamboen natiapimbo icquin mimbi ëbi cuesunetiadquio iquec. Nuquin Papan chiaidquio abimbo chuisho mimbi adotiadquio iquec. Nuquin Papan chiaid tantie ma Abadauan cuesuniantiapimbo icpampiyoc. ⁴¹ Min papabimboecquidën namiacpadomboen naquidien mibi nec —capondash Esusèn abi chieshènquido chuiquin. Adoquien: —Mambi Nuquin Papauidtsëqui tantieyoc. Utsi tantiatiapimbo icquin Nuquin Papauidtsëqui con pa caimbi —quepondash Esus chieshènquido.

⁴² Adsho tantiashien Esus: —Nuquin Papambo tantiaquimbien mimbi ëbitsen tantiatsiac. Ëbemi choenquio iccondabi. Nuquin Papan: “Matsesbëd tabadec nid,” caquini chondac. Adoaid icsho Nuquin Papa tantiaquidën ëbitsen tantiatsiash. ⁴³ ¿Mitsipadquid yec ëmbi chiaid tantiash: “Tantiadenquien icpec,” quepe mibi? Ëmbi abimbo chuisho tantiate bunenquio yec pamumëdadbimboec mibi iquec. ⁴⁴ Min papabimboecquid Satanas nec. Aid bunacpadenuidi mimbi natiadquio iquec. Èndenquimboshë Nuquin Papan tauamboen mates uanubi min papabimboecquid cuesunianquidquio nepampic. Aton padibi nec. Nuquin Papan chiapadomboen namenquio yec chieshë nec muaquidquio nec. Aton padibi icquid yec mates muamequidquio nec. Aidën madobimboecquin mimbi ëbi tantiatiapimbo icpec. ⁴⁵ Ëmbi Nuquin Papan chiaidquio abimbo chuisho mimbi tantiatiapimbo iquec. Icsambo icquidën ambembi chuisho mimbi tantienquio yaquien bëdambo ictsiash. Mabi icsambo icquidpenquio neyoc. ⁴⁶ ¿Tsuentsimbini: “Mibi icsaoc,” capatsiash? Mabi adotiapimbo yoc. Icsaisambo nebi. Adquid icquin Nuquin Papan chiaid ëmbi abimbo chuisho ¿atotsi quequin tantienquio mimbi icpe? ⁴⁷ Nuquin Papa tantianuequidën Nuquin Papan chiaidquio chuisho tantiatsiash. Nuquin Papa tantiesabombo ma mibi neyoc. Adquid icquin Nuquin Papan chiaid abimbo chuisho mimbi tantiatiapimbo iquec —quepondash Esus abi chieshènquido chushcaic.

Esus chieshènquido cuënoten siantiadpambo yanaid

⁴⁸ —Nuquin Papa tantiesabombo ma mibi neyoc —Esus quesho tantiashien abi chieshènquido: —Ma mibi podobitsi icsa dapudedash neyoc. Tantiadenquio yec mibi onquec. Samadia yacnocquidobimboec icsamboshë ma mibi iqueyoc —caquien ⁴⁹ Esus: —Mabi podobitsi icsa dapudedambo yoc. “Ma matsesën con Pa tantianu,” quequin mambi abimbo chuiboc. Adshobi: “Nuquin Papan chiaidquio abimbo mimbi chiec,” catiadquidi mimbi ëbi: “Muec nec,” capec. ⁵⁰ “Mabi: ‘Bëdambo iquec,’ canu,” quenquio iccobi. Con Pambien: “Ma matsesën con Mado: ‘Bëdambo iquec,’ canu,” ëbi caindac. “Bëdambo iquec,” canesabotedi aidëmbi cuidendac. ⁵¹ Tantia. Mibi bëdamboen chuinu. Ëmbi chiapadomboen naquidquio unësenquio ictsiash —quepondash Esus ompoacbimboen chiec. —Ëbi tantiaquido unësaçsho uincuemeshun Nuquin Papa yacno ëbëdi tabadmendambi padpidec unëstiapimbo icnuc —quequin tantieç adondash.

52 —Unësenquoio ictsiash —quesho tantiash Esus chieshënquido: —Ma mimbi tantiadenquoio icnuc chuipayoc. Adsho: “Mayan icsa dapudedashien nec,” mibi caombi. “Ëmbi chiacpadomben naquidquoio unësenquoio ictsiash,” quepequien mibi iquec. Nuquin tsusedpa Abadauan yec Nuquin Papan chiequid chuibanquido yec quequido Nuquin Papan bédamboen isaidombo abitedi unëspampic. 53 ¿Aido Nuquin Papan namiampidombo icnuc Nuquin Papan namequiaidquioda ne? ¿Mitsipadquid mibi nepe? Muequien mibi nechitec —quepondash.

54 Adoquien Esus: —Ëmbembi: “Mabi: ‘Bédambo iquec,’ canu,” quequin ëmbi nac icsambo ictsiash. Mimbi: “Aiduidtsëqui tantiembi,” caboedëmbini: “Nëid con Mado Esus bédambo iquec,” quequin ëbi comapenen tantiaquin namec. 55 “Tantiembi,” mimbi caboed Nuquin Papa ma mimbi tantienquoio yoc. Ëmbien Nuquin Papa tantiaquiec. “Aid tantienquoio iquembi,” quec mibi yacpadecc muatsiabi. Mambi con Pa tantiaquin ambi chiacpadomben nayoc. 56 Mimbi: “Con tsusedpan nacpadomben naimbi,” caboed Abadauan: “Nuquin Papa yacnuësh choash bédambo icmianquidquoio mattsëbëdi tabadendac,” quequin tantiec cuishonquepadenec. Nuquin Papan tantiamiac ëbi aden tantiapadenec —quepondash Esus. 57 Adsho tantiashun Esus chieshënquidon: —Ma mimbi min seta 50tedi matamiambo yoc. Adash ma mibi tsusiobudabi iqueyoc. Abadauanën mibi tantiatiapimbo icpampic —caquien 58 Esus: —Abimbo caimbique. Tantiata. Abadauan tishabi icnubi ëndenquimboshë ictenebi. Nuquin Papapadquidquoio nebi —quepondash Esus. 59 Adsho tantiash nëishtanequien: —¿Icsamboenda chuipec? ¿Nuquin Papada muauapebac? —quetanquin cuënote dapa bedtanequin: —Seshunenu —cac siadenquoio yec ompodanec cuempondash Esus.

9

Esusën bëshuaid bédamiaid

1 Yuecquoio ictaniash chonoadenquoio icte ushën capucuenequien Esusën dada bëshuaid istuidpondash. Anin bëshuacshobi tishnëdaid niondash. 2-3 Aid istuidshumbimbi: —En chui, Icho. Tiantianu. ¿Atotsieshun Nuquin Papan bëshu uapanëdash? ¿Aton papabëd ani icsasho isun Nuquin Papan cuidquien bëshu uanëdaidta nepec? —caquien: —Padenquoio. Utsi icsasho isun Nuquin Papan nambo icpanëdash —quepondash Esus. Adsho tantiashun padpiden: —¿Tishabi icnubi: “Abibi icsaindac,” quequin tantiashun Nuquin Papan bëshu uanëdaidta nepec? —caondambi. Adoquien: —Padenquoio. “Abibi icsaindac,” quequin tantiashun Nuquin Papan bëshu uambo icpanëdash. “Ma con Madon comapenen tantiaquin ismenu,” quequin ambi tantiacpaden Nuquin Papan bëshu uapanëdash. Adoacsho anin tishnëdaid nec. 4 Nëbi ambi chiacpadomben nanuna. “Nainabi inchëshmane,” quiash comapenec chonoadnuna. Inchëshën mattses chonoadesa —quepondash Esus. —“Con Pan tantiaidtedi nainabi unëshmane,” queshun unëshabi icquin con Pan chaidtedi nainendambi —quequin tantiec: —“Nainabi inchëshmane,” quiash comapenec chonoadnuna —quiondash Esus. 5 Adashic: —Mattsëbëd icquin Nuquin Papa bédamboen tantiamquidquoio nebique. Nëidtsen tantiamenu 6 —quetanquin nidaidën uicchun cuishtucatanquin nidaidbëdta uicchun cabiuntsëcshun bëshuaid bëbitaccapondash.

7 Adotanquimbic: —Acte tiquidimbo icquid Sidoe caidën bëpamëdec nid —cac nidash bëpamëdtanec bédamboen isec aton shubuno nidpac caondash. Aid acte con onquent Sidoe quequin buanaid caic. 8 Aton shubuno nidshobi aton shubu anoentsëcquidon bëshuacboed istuidpac caondash. Adembidi utsibon: —Bëshuaid nebique. Piucquid beccho —quedonetsec tsadtsëcsho

isboedontsen istuidpac caondash. Istuidshun: —¿Nuqui isboedquiobida nepec? “Beccho,” ¿quedoneboedquiobida nepec? —cabededpac caondash. ⁹ Utsi-utsiec: —Ai, aidquiobi nec —quenubi utsibo: —Padenquio. Aid-bimboecquidien nec —quesho tantiash: —Aidi nebi —quepac caondash bëshuacboed. ¹⁰ Adsho tantiashun: —¿Mitsipadec bédano? —caquien: ¹¹ —Esus caidën bédamioshi. Nidaidën uicchun cuishtucashun nidaidbêdta uicchun cabiunshun bëbitaccashun: “Acte tiquidimbo icquid Sidoe caidën bëpamêdec nid,” cac nidash bëpamêdec bédanobi. Nêbi bédamboen isembi —quepac caondash bëshuacboed. ¹² Adsho tantiashun: —Mibi bédamequid ¿mitsimbo iquec? —cac: —Tsaudi —quepac caondash bëshuacboed.

Bëshuaid bédameboed chuimiad

¹³ —Bédamioshi —quesho tantiashun: —¿Abimboda capec? Ma con chuiquidon chuimenu —quequin padiseyobo yacno bëshuacboed buampac caondash. ¹⁴ Buanacshobien padiseyobon: —Chonoadenquio icte ushën nac caosh —quequin tantiaquin: ¹⁵ —¿Mitsipadec bédano? —caquien: —Esusên nidaidbêdta uicchun cabiunshun bëbitaccac bëpamêdec bédanshun nêbi bédamboen isembi —quepac caondash bëshuacboed.

¹⁶ —Bëpamêdec bédanobi —quesho tantiashien chuiquido onquecuededpac caondash: —¿Utsi-utsiec: —Nuquin Papa tantiaquid icquin Nuquin Papan chiaid niac-niaquenquio ictsiash. Chonoadenquio icte ushën nêid bédamequin ma Nuquin Papan chiaid niac-niacpayoc —quenubien utsibo: —¿Nuquin Papa tantiesanda aden bédamepatsiash? Ma comapenen tantiaquin nactempaboc —quepac caondash. Adshumbic abitedishun: —Esus icsambo iquec —cainquio icquin ¹⁷ bëshuacboed chuipac caondash. —Mibi bédamequid ¿tsutsi mimi cape? —caquien: —Nuquin Papan: “ ‘Yuecshun naden naindambi,’ quequin chiaidquio chuiquidien nec,” caimbi —quetanec bëshuacboed nidpac caondash.

¹⁸ Aid nidnubien Esus chieshênquido: —Bëshupenquien niash. Muequien niashe. Anibêdta amë chuimenun chomenuna —quetanquin ¹⁹⁻²⁰ chomeshun bëshuacboed cain: —¿Min madoda niosh? —capac caondash. Adoac: —Ai, con mado niosh —queshobien: —¿Bëshuacshobida tishonda? —capac caondash. Adoac: —Ai, bëshuacshobi tishondaid nec —ani queshobien: —Bëshuaid ¿mitsipadec bédanosh? —capac caondash. ²¹ Adoac: —Tsaudi. Bédansho isambo iccombi. ¿Tsunambien bédamechitash? Dada ênden caniaid neque. Aidi chuime —quepac caondash bëshuacboedên tita amêbêdi. ²² —“Nuquin Papa yacnuësh choquid Esus nec,” quequido Nuquin Papan chiaid chuibante shubun puduedmenquien ictiad —quequin chuiquidion chiaid tantiash dacuêdec: ²³ —Dada ênden caniaid neque. Aidi chuime —quepac caondash.

²⁴ Adoac padpiden bëshuacboed chomeoapac caondash padiseyobon. Chomiash: —“Nuquin Papan bédamioshi. Nuquin Papa bédambo iquec,” ¿quecta icco? Ma Esus Nuquin Papan chiaid niac-niacquid neyoc. Ma icsamboshê icquid neyoc —quepac caondash. ²⁵ Adsho tantiash bëshuacboed: —Icsamboshê icquidien Esus nechitec. Aden tantienquio iquembi. Mabi bédameboc. Isenquio icboedêmbi mambi nêbi bédamboen iseyoc. Adenuidtsêqui tantiembi —quepac caondash. ²⁶ Adsho tantiashun: —¿Mitsipaden mibi bédamiosh? —caquien: ²⁷ —Mambi mibi chuipaboc. Ma mimbimbobi tantienquio icboc. ¿Atotsi quequin padpiden: “Èbi chui,” cai? ¿Esus tantiatiadquioda icti? —capac caondash bëshuacboedên.

²⁸ Adsho tantiash nêishtanquin chushcapac caondash. —Mibi Esus tantiaquidquio nec. Mibi icsambo iquec. Èbien nuquin tsusedpa Moises

tantiaquidquo nec. ²⁹ “Moisesien Nuquin Papan chuiquin namepampic,” quequin tantiemi. ¿Tsuntsin chiac mibi bédamequidén napash? Ma mibi bédamequid ëmbi tantiacmaidquo neyoc —quepac caondash chuiquido. ³⁰ Adoquien bëshuacboed: —¿Abida cai? “Dadpenquo tantiemi,” ma mibi quepaboc. Adboedi: “Ëmbi tantiacmaidquo nec,” ¿quecta ique? Mibi tantiacmaidëmbini bédamiosh. Ma bédambo yoc. ³¹ Abi icsaid ënabi icquidén chianesho Nuquin Papan tantienquo ictsiash. Abi tantiaquin ambi chiapadomboen naquidén chianiac tantiashun Nuquin Papan nashuntsiash. ³² Anin bëshuacshobi tishaid bédamenquo ictenec. Adquid bédamequid nibédpadenec. ³³ Nuquin Papa tantienquo icquin Esusën ëbi bédamenquo ictsenpash. Nuquin Papa tantiaquimbini bédamiosh. Ma Esus bédambo icquid neyoc —quepac caondash bëshuacboed. ³⁴ Adsho tantiash nëishquioshon: — Bëshuacsho tishaid yec mibi icsamboshë iquec. Icsactsëcquidén chuitiapimbo iquebique. Baded nidec nid. Nëmbo padpidec puduedenda —quequin cuemepac caondash. Aden Esus chieshënquidon bëshuacboed Nuquin Papan chiaid chuibante shubun padpiden puduedmenquo icpac caondash.

Ambi bédameboed istuidoashun Esusën chiaid

³⁵ Adnubien: —Mimbi bédameboed cuemiac caosh —quesho tantiashun Esusën ambi bédameboed istuidpondash. Istuidshumbic: —Nuquin Papan matsesmiadquo caic: “Nuquin Papa yacnuësh choquid nec,” ¿quequina mimbi tantiapè? —capondash Esusën ambi bëshuaid bédameboed chuiquin. ³⁶ Adoquien: —¿Tsutsi neque? Isnu —cac: ³⁷ —Ëbi nec. Mibi bédameboedi nebi —caquin: ³⁸ —Ai, Nuquin Papa yacnuësh choquid Quidistu caidien mibi nec. Comapenen tantiaquin nabanquidquo yec mibi bédamboshë iquec —quetanec ismenuec danëshën tinquebudpondash.

³⁹ Adsho isumbic Esusën matses abi datsidadsho chuipondash. —Nuquin Papa matses bédamboen ismequid nebi —quiash matsesbéd tabadec Nuquin Papa yacnuësh chondabi. Ëmbi bëshuaid bédamiac tantiesa icboedëmbi ëbi tantiaho Nuquin Papan bédamboen isec. Utsibo: “Nuquin Papa tantiaquiemi,” quec muaquidon ëbi tantiatiapimbo icquin Nuquin Papa tantienquo iquec —quepondash Esus. ⁴⁰ Adsho tantiash nëishtanec: —¿Nuquin Papa tantiesabodabi nedi? —quepondash Padiseyobo. ⁴¹ Adsho tantiashien: —Nuquin Papa tantiesambo icsho ëmbi tantiamiac Nuquin Papabëdta ëbi tantiaho Nuquin Papan mibi bédamboen istsiash. “Nuquin Papa tantiaquiemi,” quec muaquin ambi chiaid bédamboen tantienquo icsho Nuquin Papan mibi bédamboen istiapimbo iquec —quepondash Èsus abi chieshënquido chiec.

10

Obecabimboecquido chiaid

¹⁻² Adshumbic abi chieshënquido Esusën padpiden chuioapondash ompoacbimboen chuiquin. —Tantia. Mibitedi chuïnu. ¿Mitsipaden nuquin matsesën aton yua obeca dadpen dayun uaqun napec? Obeca daquënë uaidën puduedte shëcuënquo obeca icbo puduedquid. Daquënë uaid mayadec puduedquidien ampequid nendac. ³ Obeca icbon: “Puduednu. Shëcne,” cac ambi: “Con yua ista,” caidën shëcnequid. Adshumbic puduedtanquin ambi aton yua cuëmbanacpaden cuëmbanquin: “Cho,” caquid icbon. Adoac icbo tsibanquid obecan. ⁴ Adshobic icbon daquënë uaidën tabadquid abitedi niecumesun abi buanec bëyuc nidsho aton yuan tsibanquid. “Con icbon ëbi cuëmbocpadomboen cuënec. Con icbo nec,” quequin icbo tsibanquid obecan. ⁵ Utsibon cuënaquien tsibanenquo yec dacuëdec cuenquid

obeca. Icbouidtsëqui tsibanquid obeca nec –Esus quesho tantiashien: 6 – Tantiadenquio yec mibi onquec –quepondash Esus chieshënquido.

7 Adsho tantiashun Esusën chuipondash. –Tantia. Mibi bëdamboen chuinu. Obeca daquënë uaid puduedte shëcuëbimboecquid nebi. 8-10 Shëcuënuidi obeca puduedquid. Adecbidi ëbiuidtsëqui tantiash Nuquin Papa yacno matses puduedtsiash. Èbi tantiesain Nuquin Papa yacno puduedtiapimbo iquendac. Èbi tantiaquido cain obeca caombi. Aido bëdamboen dayun uaquin bëdamboec tabadquid icmendambi. Aido unësacsho uincuemeshun Nuquin Papa yacno ëbëdi tabadmendambi. Adec ëbi bëdambo icnuc ampebimboecquid abi iquec. Èbi tantiaquido icsamete bunquido aido nendac. Ma adquido mibi neyoc. Nuquin Papan chiaid ma mimbi icsamboen chieyoc. Adoac mimbi chiaid tantiaquidon Nuquin Papa tantienuo iquec. Aido Nuquin Papan cuidtequidombo nendac. Padnuen ëbi tantiaquidon mimbi chiaid tantienquio icquimbi ëmbi chiaiduidtsëqui tantiendac –quepondash Esus abi chieshënquido chieic.

Èbi tantiaquido dayun uaimbi, quequin chiaid

11 Adashic Esus padpidec onqueoapondash. –Obeca icbobimboecquid nebi. Ico cudasacimboc ëbi tantiaquido cudasnuec ëbided cuidadec unësendabi. 12-13 Utsiboen adenquio ictsiash. Piucquid bednuen obeca isquidimboc iquec. ¿Mitsipadopaid obeca isquidën? Bëdi dapa chosho isun: “Con napenquio nec,” quetanquin badedi obeca nianquid. Obeca nianacsho bëdin acshun siaquid. Aden utsi acsho isash acshun secabi icquid niquequid obeca. Obeca isquidën ichonpenquio nianacimboc ma mimbi icsamboen napayoc. Nuquin Papa tantiate bunquido ma mimbi Nuquin Pamambo tantiamenquio iqueyoc –quepondash Esus abi chieshënquido chieic.

14-15 Adashic abi onquec: –Èmbien matses bëdamboen tantiamequin ëbi tantiaquido dayun uaindac. Nuquin Papabëd ëbi tantianacpadquieic ëbi tantiaquidobëdtsen tantiananquiebi. Aden ëbi tantiaquido tantieic Nuquin Papa cuidmenquio icnuec ëbided cuidadec unësendabi. 16 ¿Nëid matses isadaidbouidtsëqui tantiectabi adec unëspadi? Padenquio. Matses utsi-bontsen Nuquin Papan tantiamiaido icquin ëbi tantiendac. Aidobëdta nëid matses con matses caquin abitedi bëdamboen dayun uaindami. 17 Con Pan tantiamiacpadec ëbided cuidadec unësendabi. Aden ambi chiacpadom-boen ëmbi nasho con Pan ëbi tantiaquieic. Unësash ëbemi uincuenendabi. 18 Matsesën ambemi ëbi unës uatiapimbo ictsiash. Èmbi tantiacpadquiequi matsesën unës uadendabi. Adecbidi uincuentiadquio yec ëbemi uincuenendabi. Aden con Pan namiacpadomboen naindami –quepondash Esus.

19 Adsho tantiash con matses chuiquido naded onquecuededpac caondash. 20 Esus chieshënquido: –Podobitsi icsa dapuduedash tantiadempambo yec onquepec. ¿Atotsi quequin aid tantie? Aidquio tantiatiapimbo iquendabi –quenubien 21 utsibo: –Podobitsi icsa dapuduedashta ¿adec onquepatsiash? Bëdamboequien onquiosh. ¿Podobitsi icsa dapuduedaidënda aden bëshuaid bëdampeatsiash? Bëdambo icquidëmbien adotsiash –quepac caondash.

¿Quidistu caidta ne? quequin chiaid

22 Yuec ictanec con matses cuëdënuec Edusaden yacno cho-chopondash. “Nuquin Papa tabadte shubu uashunaidnoshon tsusedpabon icsa uaquido cuemenëdaid ushë tantieic cuëdëntanu,” quianec cho-chopondash. Ambo iquenuampamboec icpondash aton padibi. 23 Iquenuampamboec icnubien Esus Nuquin Papa tabadte shubu uashunaid daquënë uaidën puduedash shubunquio puduedabi quënë cachoqui capupondash. Aid quënë cachoc:

“Sadomonĕn nacnenaid nec,” caondash. ²⁴ Ambo Esus capusho isashien con matses chuiquido Esus natia datsidadshun: —En sebadĕnquo chui. Tantienguo yec tsadiatapimbo iquebique. Mimi cuembo chuisho tantiatiadquo iquebi. ¿Nuquin Papan chomiaid Quidistu caidta ne? —capondash con matses chuiquidon. ²⁵ Adoquien Esus: —Mambi mibi chuipaboc. Ma mimbimbobi ĕbi tantienguo icboc. Con Pan: “Adota,” cac comapenen tantiaquin nabandeniombi. Mibi bĕdamboen tantiamenuen adodeniombi. ²⁶ Adosho isash mibi: “Ai, Nuquin Papa yacnuĕsh choquidien nec,” queti-adquidĕmbi mimi ĕbi tantienguo iccoc. Nuquin Papan tantiamiabi yaido icquin mimi ĕbi tantiatiapimbo iquec. ²⁷ Con Pan tantiamiadien ĕbi tantiaquid yanendac. Adshun obecan aton icbo tsibanacimboen ĕmbi chiacpadomboen natiadquo yanendac. ²⁸ Aido unĕsacsho uincuemeshun Nuquin Papa yacno ĕbĕdi tabadmendambi padpidec unĕstiapimbo icnuc. Unĕsabi icsho: “Con na nec,” qeshun bĕdamboen dayun uaindami. Ĕmbi adoacsho bedshunacimboen icsambo icquidĕn yuaquin Nuquin Papan cuidtequido icmeoatiapimbo iquendac. ²⁹ Con Patsen ĕbi tantiaquido dayun uaindac. Abipadquid utsi nibĕdquiecnuc con Pan ĕbi tantiaquido dayun uasho adem-bidi mĕnchictiapimbo iquendac. ³⁰ Aden ĕbi bedshuntiapimbo icquin con Patsen bedshuntiapimbo iquendac. Con Papadquidquo nebi —quepondash Esus.

Cuĕnoten seshunetiadpambo yanoaid

³¹ —Nuquin Papapadquidquo nebi —Esus qesho tantiaash nĕishtanquin cuĕnote dapa bedshun abi chieshĕnquidon Esus seshunetiadquo icoapondash. ³² Adsho isash: —Sianenda. Con Pan namiacpadomboen comapenen tantiaquin nabanombi. ¿Ĕmbi adobansho isboedĕmbidabi seshunepe? —quepondash Esus. ³³ Adoquien: —¿Bĕdamboen nabanshodambi: “Mibi seshunenu,” cadi? Padenquo. “Con Papadquidquo nebi,” quequin Nuquin Papa muauasho mambi mibi nayoc. Matses icquin mimi aden icsamboen chuisho tantiaashumbimbi mibi seshunec —quepondash abi chieshĕnquido.

³⁴ Adshobien Esusĕn: —Nuquin Papan chiaidquo nuquin tsusedpan naden dada uapampic. “Nuquin Papa nadec onquec: ‘Min matsesĕn ĕmbi chiacpadomboen nasho: Ĕbipadquid nec, caombi,’ queposh Nuquin Papa,” quequin dada uapampic. ³⁵ Matses caic: “Ĕbipadquid mibi nec,” quequin Nuquin Papan chuipampid isun mimi: “Nuquin Papan icsamboen chiac,” quequin chiambo iquec. “Muesambo icquin Nuquin Papan icsamboen chuitiapimbo iquec,” qeshun mimi chushcambo iquec. Nuquin Papa adoambobi ¿ĕbida chushcai? ³⁶ Nuquin Papan namiacpadec abi yacnuĕsh chondaid nebi. Adquid yec: “Nuquin Papan Madombo nebi,” quobi. Ĕbi adsho tantiaashun ¿atotsi quequin ĕbi chushcai? ¿Nuquin Papadambi muauadio? Mambi abimbo caboc. ³⁷ Ĕmbi chiaidquo tantiatiapimbo icquimbi ĕmbi naidquo tantiaata. Ĕmbi Nuquin Papan namiacpadomboen comapenen tantiaquin nabanenquo icsho isun mimi ĕbi mua catsiac. ³⁸ Con Pan namiacpadomboen nasho isun: “Ai, ambi chuibocpadquidshenda nepec,” ĕbi cata. Ĕmbi chiaiduidtsĕqui tantiatiapimbo icquin adota. Adshun: “Ai, Nuquin Papapadquidquibidien Esus nec,” quequin mimi tantiabentsiac —quepondash Esus.

³⁹ Adsho tantiaash padpidec nĕishtanquin abi chieshĕnquidon: —Bedchitono —caqui bedadenquo icpondash. ⁴⁰ Adashic acte Odan caid potiaash con shĕnision tauaquin matses acten mentodenecono Esus nidoapondash. Ambo

ëbi chedobëdi tabadpondash. ⁴¹ Adshumbic Esusën comapenen tanti-aquin ismequin ambo icquido chuibampondash. Adsho tantiashun: —Uan padon chuidenedshenda nëid nepec. Ambibi comapenen tantiaquin ismi-ambobi comapenen tantiaquin nabanquid chuipadenec. Esusën adoban-sho isun: “Nëid chuiquinshenda Uan padon abimbo capadenec,” caimbi —cabededpondash anocquidon. ⁴² Adshumbic: —Nuquin Papa yacnuësh choquidien Esus nec —quequin Esus tantiabempondash.

11

Dasado caid unësaid

¹ Udeya yacnuësh Esus cuembon Dasado Esusën utsibimboecquid unëstiadsëcquio yanac caondash. Shubu dadpen icquid Betania caid yacnocquid niondash. Aidbëd icquid aton chuchu daëd icpondash. Abentsëc Madta icnuc utsi Madia icpondash. ² Madian aton manëdaidën ucbanquin Esus tanoshcabi icnuc adec aton utsi unëstiadsëcquio yanac caondash. ³ Adnubien aton chuchun: —Esus chuitan —cac aton matsesën Esus chuituidpondash. —Mimbi con utsi caidquio unëstiadsëcquio yanoshe. En isec cho —catuidpondash. ⁴ Adoaquien Esus: —Chiata. ¿Unëshash chodquequionoshida Dasado nepadiash? Padenquien iquec. “Ma matses: ‘Nuquin Papa bëdambo iquec. Ambi chomiondaid aton Madombotsen bëdambo iquec,’ quenu,” qeshun naindambi —quepondash. ⁵ Adbosh Dasado aton chuchubëdta tantiaquidquio yequi ⁶ badedquio nidenquio yec anobi daëdec ushpondash Esus.

⁷ Daëdec ushumbic Esusën: —Nuqui icbocno Udeya caidën padpidec nidnu. Nid —capondashi. ⁸ Adoaquimbi: —Icho, ma mibi anoshon cuënoten seshunetsempondash. ¿Anobidida nidtiad? ¿Ada: “Seshunequionoshe,” cadec? —capondambi. ⁹⁻¹⁰ Adoaquien cuembo chienquio icquimbi: —Badiadën capuec tocoshquetanec uebudesa. Inchëshëmbien tocoshquetanec uebudquid —quequin Esusën chuipondashi. —Nëbi ëbi unës uatiapimbo iquec. Badiadën nidacbinboen con Pan tantiaidtedi nainabi icsho ëbi unës uatiapimbo iquec. Inchëshën uebudacbinboen ambi tantiaidtedi nainshobini ambi tantiacpadënquiobi matsesën ëbi unës uaindac —quequin tantiec adondash Esus.

¹¹ Adshumbic Esusën padpiden ompoacbinboen chuiopondash. —Ëmbi con utsi caid Dasado ushtoaccoshe. Isucumec nidnu. Nid —quesho ¹² tantiashini: —Ma ushnu. Ushash isuncunqid —quepondac. ¹³ Esusën Dasado unësaid chuinubi Dasado ushe dantsëccondambi. ¹⁴ Adnubien Esusën seabadënquio chuipondash. —Dasado unësaccosh. ¹⁵ “Bëdamec nidtiadquidi niobi” ¿quepectabi ique? Padenquio. Mibi caic: “Ma nëidon ëbi bëdamboen tantianu,” qeshun Dasado unëso istanambo iccombique. Nëbi mibi ismec nidnu. Nid ¹⁶ —caquien: —Ai, abëdquiobi unësec nidnu. Nid —quiampondash Tomas anin abi ushëmbi daëdpambo tishaid. Adanec abitedi nidondash.

Unësaid uincuemequidquio nebi, quiaid

¹⁷ Adashic unësacno aoentsëqui Esus chopondash. Choshon: —Unësacsho chococash daëd-daëdquiec ushobi —quetsëcquiec onquecuededsho tantiatuidpondash. ¹⁸⁻¹⁹ Esus choabi icnuc con matses chuquido Dasado unësacnuësh sedenquenuec Edusaden yacnuësh cho-chopac caondash. Unësaid nëbi ictsëcnic tedes quidometedos tiontsëcquidën badedquio cho-chopac caon-dash. Cho-choash unësaidën chuchubëd sedenquec tabadpac caondash. ²⁰ Adnubien: —Esus choec —quesho tantiash Madta bëquedec chopondash aton chibi Madia shubuno sedenquec tsadnubi. ²¹ Choequien Esus bëquedec: —Mibi icnuc con utsi unësenquio ictsenosh, Icho. Con utsi unësosh. ²² Mimbi

chiacpadomboen Nuquin Papan nēbi natsiash —quepondash Madta: —¿Ada con utsi uincuemetsia? —quequin chuitiadquio yequi. ²³ Adoquien Esusēn: —Min utsi uincuenendac —capondash. ²⁴ Adsho tantiash: —“Ai, yuecash unēsaido abitedimbo uincumete ushēn con utsi uincuenendac,” quequin tantiembi —quepondash Madta. ²⁵ Adsho tantiashun Esusēn: —Ēbibi mates unēsaid uincuemequidquio nebi. Ēmbi tantiacpadēnquio uincuenendac. Aden ēbi tantiaquido unēsacsho uincuemendambi. ²⁶ Ēmbi adoac Nuquin Papa yacno ēbēdi tabadendac padpidec unēstiapimbo yec. Ēmbi aden chuisho tantiash: “Ai, abimbo mimbi caindac,” ¿quequinda tantie? —capondash Esusēn. ²⁷ Adoquien Madta: —Ai, adembi tantiembi. “Nuquin Papa yacnuēsh choquid Quidistu caidien mibi nec. Nuquin Papan Madombo mibi nec. Con tsusedpabon dada uaquin chuipampidquien nec,” mibi caombi —quetanec ²⁸ nidpondash aton chibi chiec. Nidshun: —Nēmbo cho, chibi. Chuinu —cac aton chibi choshobien: —Esus chosh. Mibi iste bunoshe. En isec cho, chibi —caquien ²⁹ Esus bēquednuec badedi choquin istuidpondash. ³⁰ Shubu dadpen yacnombo choabi icsho Madtan bēquedacnobi Esus tabadsho Madiantsen istuidpondash. ³¹ Adec Madia nidsho isun chococacnobi sedenaca nide danquin abēd sedenqueuequidon tsibanampac caondash. ³² Adnubien Madia Esus istuidtanec dayumbudec sedenquiampondash aton utsi tantiec. Adec shubitanec ēnēdash: —Mibi unēsquio iccoc, Icho. Bēdambo icquid mibi nec. Mibi icnuc con utsi unēsenuio ictsenosh —quepondash Madia Esus caic. ³³ Adnubien Madia tsibanec cho-choec con mates chuiquido sedenqueutidpondash. Madiabēd sedenqueuedesho istanec: —Ai, unēsquio icnuc nec —quiash Esus abitsen shubiantiadtsēcquio icpondash. ³⁴ Adec shubiantiadtsēcquio tsadacnuēshien Esus: —¿Mitsimbo mimbi chococaye? En isnu. Nid —quepondash. Adoac: —En isec cho —quianec nidnubien ³⁵ shubinidequi nidpondash Esus. ³⁶ Adec shubinidsho isumbien: —Ma Dasado unēsquio icnuc shubieyoc —cabampondash con mates chuiquidon. ³⁷ Adnubien utsibo: —¿Atotsieshun bēshuaid bēdamiondaidēmbi Dasado unēsō bēdamenquio icposh? —quepondash.

Esusēn Dasado uincuemiaid

³⁸ Nidquimbi chococacno istuidequi Esus shubiantiadtsēcquio yanoapondash. Nidaid cuēnoteuidpambo icquid macuēsh tsimpiduc shēcūē uaidēn unēsaid nauedshun cuēnote dapan bētinacuēsh shubiantiadtsēcquio iccondash. ³⁹ Adashien Esus: —Cuēnote bidiacquin shēcūē shēcne —quepondash. Adsho tantiash unēsaidēn chuchu Madta: —Padi. Ēnden pisenashe. Chococash mabi daēd-daēdquiec ushboc —quepondash. ⁴⁰ Adoquien Esus: —Dacuēdenda. Mambi mibi chuiboc. Mimbi: “Nuquin Papan Madombobien mibi nec,” ēbi casho: “Ēmbi comapenen tantiaquin nabansho mimbi isendac,” mambi mibi capaboc. En na. Baded bēcune —cac ⁴¹ cuēnote shēcūē bētinaid shēcnequin bēcunepondash.

Adsho istanquimbien Esusēn abuc isquin Nuquin Papa chuipondash comapenec onquequin. —Papa, ēmbi nēbi chuisho mimbi tantiec. Ēmbi chuibocpadomboen mimbi naindac. Mibi bēdambo iquēc, Papa. ⁴² Ēmbi otacquio chianiaid mimbi tantioc. Ēbi datsidadaido tantiamenuen nēbi comapenec onquequin mibi chiembi. “Mibi chuitanquin ēmbi comapenen tantiaquin nabansho isun: ‘Nuquin Papan chomiaidien nec,’ quequin ma nēidon ēbi tantianu,” qeshun comapenec onquequin mibi chiembi, Papa. Padi, aidtedtsēqui mibi chiombi, Papa —quepondash Esus. ⁴³ Adtanquimbien comapenen cuēnquin: —Dasado, puduenec cho —capondash. ⁴⁴ Adoquien

Dasado badedquoio puduenanec chopondash abi dashcute dataniacchobi. Unèsacsho uesquin dashcuten datanetanquin dashcuten abi bèpucacchobi chopondash. Adec chosho istanquin: —Baded dashcute dachic. Ma nidnu —capondash Esusèn.

Nèbien Esus unès uametiad, quiaid
(*Mat 26.1-5; Mad 14.1-2; Duc 22.1-2*)

⁴⁵ Aden Esusèn ènden unèsaidquiobi uincuemesho isashien Madia tsibanec sedenquec cho-choboedo abentse-abentsec: —Nuquin Papan chomiaidien Esus nec —quiampondash. ⁴⁶ Adnubien utsin Edusaden yacno nidshun Esus chieshènquido padiseyobo chuituidpac caondash. —Esusèn unèsaid uincuemiosh —quepondash. ⁴⁷ Adsho tantiatanquimbien chuiquid dapam abèdtan chuiquid utsibo cho-chomepac caondash padiseyobo yec tsuno dapabo yec quenuc. Aden cho-chomiash tabadec onquepac caondash. —¿Mitsipadotiad? Nuquin matses ismequin comapenen tantiaquin dadpen nabampac caosh. ⁴⁸ Aden Esusèn nabansho isun nuqui èmiabi icsho nuquin matsesèn abitedishun abi chuiquid dapa Esus icmetsiash. Adnubien nuqui yuaquido Doma yacnocquidon ambi chuiquid icmiacmaidquoio chuiquid yansho isun nèishun nuqui acshun siatsiash. Nuquitedi acshun siatanquin Nuquin Papa tabadte shubu uashunaid dapatsen uesquin chic-chictsiash. ¿Mitsipadotiad Esus? —quepac caondash chieshèmènquido.

⁴⁹ Adnubien abèdtan chuiquido chuiquid dapambo aid setan icquin Caipas caidèntsen chuipac caondash. —¿Midapadotsècquien mimbi chiendac? Tantiadentsècquio icnu ma mimbi chuipaboc. ⁵⁰ Tantia. Mibi bèdamboen chuinu. ¿Atotsi quec: “Abitedi unès uaindac,” mibi quepe? Ma nuquin matses abitedi unès uainquio icnueshun Esusded unès uamenuna —quepac caondash chuiquid dapambo abèdtan chuiquido chieci. ⁵¹ Aden chuiquin ambembi chiampo Nuquin Papan oncamiac Nuquin Papan chiaidquoio aden chuipac caondash. —Nèid setan abèdtan chuiquido chuiquid dapambo nec —queshun Nuquin Papan aden oncamiacqui Caipas onquepanèdash. —Matses cuidmenquoio icnuec con Madoded cuidadec unèsendac —queshun Nuquin Papan Caipas aden oncamepanèdash. ⁵² Aden Caipasèn chuinëdaid tantiaquin èmbitsen chuinu. Tantia. ¿Isadaidbouidsèqui cuidmenquoio icnueta Esus abided cuidadec unèstiondash? Padenquoio. —Matses utsitsen abi tantiaquid yansho isun abèdi tabadmenuec Esusded cuidadec unèspondash —quequin tantiembi. Nèbi Caipasèn chuisho tantiaishun tsusiobon chiaid chuinu. ⁵³ Aden Caipasèn Esus unès uamete chuisho tantiaishien Esus chieshènquido: —Nèbimbobien Esus unès uametiad —quecuededpac caondash.

⁵⁴ —Tsusiobon mibi adosh —quesho tantiatanequien chieshèmènquido ismenquoio yec Esus cuempondash. Cuenequi nidaid utsin nidash masi dapa yacno anoentsèqui shubu dadpen icquid Epadain caid yacno nidpondash. Ambo tabadquin èbi chedo Esusèn chuibampondash. ⁵⁵ Epadain caid yacno tabadnubien Nuquin Papan con tsusedpabo unès uainquoio icquin matamiampid inchèsh tantiec cuèdènuec Edusaden yacno con matses nidanepac caondash. Cuèdènec taèabi icnuc mishtemaid mishquidoba Edusaden yacno nidanepac caondash. —Mabi tsusion nesmenu. “Mishtemaid mishquid tsusion nesmiabi icquid cuèdèntemaid,” quedeneque —quianec nidanepac caondash. ⁵⁶⁻⁵⁷ Adshumbien Edusaden yacnoshon Nuquin Papa tabadtè shubu uashunaid daquènè uaidèn puduedtanquin Esus iste bunquin nibèntuidpac caondash mishtemaid mishquidon. Nibèntuidshobien: —Nuqui chuiquido nadpac caosh. “Esus istuidshun èbi chuita. Bedshun unès uamechitono,” quepac caosh —quesho tantiaishien: —¿Ada Esus chopeba? “Unès uamenushe,” quiash choenquien icchitec —quecuededpac caondash.

12

Madia Dasadon chuchun Esus tanoshcaid (Mat 26.6-13; Mad 14.3-9)

¹ Aden mishtemaid mishquidon abi nibënbien Edusaden anoentsëqui ambi Dasado uincuemiondacno Betania yacno Esus chopondash. Seist-edec ushash Nuquin Papan matamiampid inchësh tantiec cuëdë nec taënushi nidondash. ² Ambo chosho isash: —Esus bëdambo iqueque. Pemenu —queshun: —Pec cho —cac puduedash tabadpondash nëidtedi. Nëidic Esus. Nëidic Dasado. Nëidic shubu icbo. Nëidic Esusbëd icquid ëbi chedobi. Nëidic Dasadon chuchu daëd. Aidedi icpondash. Adec penuec tabadsho Madtan pete menebampondash. ³ Adnubien Madian: —Esus bëdamboshë iquec. Ismenu —quetanquin bëdamboshë nuadquidën Esus tanoshcapondash. Tanoshcatanquin aton manëdaidën taucpondash. Aden tanoshcaid shubu anuestsëcquiec comapenec nuadpondash. Pucquid dadpenquo menequin bedaid nidondash. Sedunten cushtoaid bëdambo nuadquid nado caid nidondash. ⁴ Adsho isun Esus bedmequidën Udasën Madia chushcapondash. ⁵ —Padi. Mimbi uesqueque. Utsi uain nata. Nëid danoshcate meneshun piucquid dadpenquo seta abentsëc matamec chonoadaidtedquiobien bedtiad. Adoshombien piucquid nibëdquido aid piucquid menetiad —capondash Udasën. ⁶ Adomboen chuisho tantiashun Udas bëdambo icquidquo danondambi. Esusbëd icquido ëbitedishun piucquid bedshun sauedten sauedshun dayun uaquidquiemi danondac. Pucquid bëdamboec dayun uashumënenquo yequi abibi ampeshumënashi adondash Udas. Aden ambi ampiaid tantiequi: —Pucquid nibëdquidoen menetiad —quequin muaquin Madia chushcapondash. ⁷ Adshobien Esusën: —Padi. Chushcainda. Ma nanu. Ma nuquin matsesën unësaid bëdambo nuadnuc danoshcapaid yoc. “Nëbi con Mado unësendac,” quequin Nuquin Papan tantiamicpadomboen ëbi unëso chococate tantiaquin Madian ëbi tanoshcaquin naic. ⁸ Pucquid nibëdquido dadpen iquec. Nibëdenquo iquendac. Èbien mibëd icboedi nëbi nibëdquido yanendac. Èbi tantiec Madia bëdambo iquec —quepondash Esus Udas chiec aidi: —Abi chieshëncquido Esus bedmenu —quepanuda.

Dasadotsen cuesunetiadquo yaid

⁹ Adnubien: —Betania yacno Esus choaccosh —cac Edusaden yacnuësh matses dadpen Esus isec cho-chopondash. Ambobidi Dasado Esusën uincuemiondaid icsho aidtsen isnu ec cho-chopondash. ¹⁰⁻¹¹ Cho-choshon Dasado uincuemiondaid isumbien abentsëcshun abentsëcshunquien: —Comapenen tantiaquin nabanquidquo yec Nuquin Papapadquidquiobidien Esus nec. Nuquin Papan chomiaidien nec —quequin Esus tantiabempondash. Esus tantiabenshumbic abi chuiquidon chiaid tantienquo yampondash. Adsho isash nëishtanequien chuiquid dapabo: —“Uincuemiaid Dasado isun Esus tantiabenosh,” quioshe. Dasadotsembien unës uatiad —quianac caondash chieshëmëncquiec.

Chuiquid dapa ismiacimboen Esus ismiad (Mat 21.1-11; Mad 11.1-11; Duc 19.28-40)

¹² Madian tanoshcaboc ushash Esus Edusaden yacno puduanec nidondash. Nidshobien Edusaden yacnuësh cuëdë nec cho-choboedon: —Esus choec —quesho tantiatanquin ¹³ niste podobieccquid bedbëtsenec Esus bëquedec cho-chopondash. Esus bëquedshumbien: —Chuiquid dapa nec —quequin ismequin ambi bedbëtsemboed uic-uiccabededpondash. Aden uic-uicaiqui:

“Mibi bēdamboshē iqueque. Ēbi bēdamboen ista. Nuquin Papan chomiaid yec mibi bēdamboshē iquec. Con matses isadaidbo chuiquid dapambo mibi nendac,” quecuededpondash Esus caic. ¹⁴ Ambi podquedēn choquin bedbētsemboed cabayobitsecquidēmpi catsadtoanec Esus chosho isash adcuededpondash. Adec aid catsadte Nuquin Papan tantiamiacpadomboen con tsusedpan dada uaquin naden chuiampic. ¹⁵ “Edusaden yacnocquido chiec: ‘Dacuēdenda, Edusaden yacnocquido. Is. Cabayobitsecquidēmpi catsadtoanec mibi chuiquid dapambo choeque,’ quepec,” quequin Nuquin Papan chiaid dada uapampic. ¹⁶ Adec Esus catsadtoanec chosho isun aden chuiampid fantienquo iccondambi. Esus abuc nidambimbi ēbitedishun tantiabenondac. —Esus chuiquinshenda nuquin tsusedpan dada uapampic. Aidēn chiacpadomboen niste podo uic-uiccaquin: “Bēdambo iquec,” quequin nuquin matsesēn Esus ismebededpondash —quequin tantiabenondambi.

¹⁷ Esus cabayobitsecquidēmpi catsadtoanec choabi icnuc Esusēn Dasado uincuemesho isboedon: —Uincuemesho isombi —quequin matses dadpen chuibenepanēdash. ¹⁸ Adsho tantiashun: —Unēsaid uincuemequid Nuquin Papan chomiaiden neque. Istanu —quianec Esus bēquedec chochoshon aden niste podo uic-uiccaquin ismepondash. ¹⁹ —Esus bēdamboshē iquec. Nuqui chuiquid dapa nendac —quecuededsho tantiashien Esus chieshēnquido padiseyobo: —¿Midapadoendac nuqui? Tantia. Abitedishun: “Nuqui chuiquid dapa nendac,” cabededpeque. ¿Mitsipaden Esus cuesunetiad? —quepac caondash.

Matses utsibo: Esus isnu, quiaid

²⁰ Edusaden yacno cuēdēnec cho-chobedo matses utsibo isadaidpembotsen icpondash. ²¹ Adnubien adquido matses utsibon Esus iste bunquin shubu dadpen icquid Betsaida caid yacnuēsh caniquid Esusbēd icquid Ūedipe chuituidpac caondash. —Esus istiadquo iquebi —quesho tantiashien: —Chiata. Chuitambono —quianec nidshun ²² Esusbēd icquid utsi Andedesba chuibētsenec Andedesbēd choequi Uedipe Esus chiec chopondash. —Matses utsibon mibi istiadquo iquec —caquien ²³ aid matses utsibo isadaidpembo tantiamenuec Esus comapenec onquepondash. —Nuquin Papan matsesmiondaidquo icquin nēbimbobimbi ambi chiaidtedi nainendac. Ēmbi adoacsho Nuquin Papan: “Mibi bēdambo iquec,” ēbi caindac —quepondash Esus abi unēs uate chiequi. ²⁴ Adshumbien ompoacimboben chuipondash. —Tantia. Mibi chuinu. ¿Mitsipadquo pete ēshē chococaid icpec? Chococac caniasch bacuēec bēdambo icpaid yoc. Chococabi bēdambo ictiapimbo iquec. Adoachimboen chococabi yac matses bēdambo icmetiapimbo iquendabi. Unēsacsho chococac matses bēdambo icnequid nendabi —quepondash Esus. ²⁵ Adashic padpidec: —Ambi naiduidi naquin ēmbi chiaid niacquido Nuquin Papan cuidtequido nendac. Ambi naiduidi nainquo icquin ēmbi chiacpadomboen naquido ēbēdi tabadtequido yanendac. ²⁶ Adquid ēmbi chiacpadomboen natiadquo yec ēbi yacpadec chieshtoenquo ictsiash. Adquidquo unēsash uincuenash ēbēdi tabadsho Nuquin Papan: “Nēid con Mado tantiaquid bēdambo iquec,” capendac —quepondash Esus.

Esusēn abi unēs uate chiaid

²⁷ Adashic abi unēs uate tantiec Esus nadpondash. —Unēsquioshē yanuc: “Mimbi tantiacpadomboen natiapimbo iquebi, Papa,” ¿quectabi icti?

Mabi con Pan chiacpadomboen nanuec chondac. Aden nanuec nebi — quepondash Esus. ²⁸ Adtanequien Nuquin Papa chiec: —Nuqui tantiacpadomboen nēbi nainembi, Papa. Ēmbi aden nainacsho: “Nuquin Papa bēdambo iquec,” matses cameta, Papa —quenubien abucūēshquo Nuquin Papa comapenec onquepondash. —Ai, ěmbi namiaid mibi icsho: “Nuquin Papan namiaid nec. Nuquin Papa bēdambo iquec,” matses camepombi. Nēbi padpiden adomeoaindambi —quepondash Nuquin Papa.

²⁹ Abucūēsh onquesho bēdamboen tantiabi yec utsibo: —Abu cuēdtoec nec —quenubien utsibo: —Nuquin Papan abi yacnoshon uaid mayan bēdan Esus chuiplash —quecuededpondash. ³⁰ Adsho tantiash Esus: —Ěbi tantiamenueta onquediash? Padenquo. Mibi tantiamenequien niosh. Aden tantiashun ěmbi bēdamboen chuisho tantiata. ³¹ Nuquin Papa chieshēnquid Satanasēn yuaido matses dadpenquioshē iquec. Nēbi Nuquin Papan tantiacpadomboen aido utsi-utsien Satanas bedshunendambi: “Chēn. Con na neque,” quequin. ³² Ěbi abuc dectanac aden matses ěbi tantiaquid icmendambi —quepondash Esus. ³³ —Ěbi cuesten dectanquin unēs uaindac —quequin tantiec: —Ěbi abuc dectanendac —quepondash Esus.

³⁴ Adsho tantiash abi datsidadquido: —“Ěbi dectanendac,” quiosh. “Unēsebi,” quepequien iccosh —quiashien Esus chiec: —“Nuquin Papa yacnuēsh choquid Quidistu caid unēsesambo nendac,” quequin Nuquin Papan chiaid nuquin matsesēn chuinubi: “Unēsebi,” ĥquecta icco? “Unēsebi,” quequid Nuquin Papa yacnuēsh choquid ictiapimbo mibi iquec. “Nuquin Papan matsesmiaid nebi,” quequid ĥtsutsi mibi nepe? —quepondash Esus datsidadquido. ³⁵ Adoquien Esusēn: —Nadquid nebi —quenquo icquin ompoacimboen naden chuipondash. —Mibi bēdamboen tantiamequid nēbi isadenquo iquendac. Aid nibēdnuc bēdamboen mimbi tantienquo iquendac. Nidabi aidēn chuisho bēdamboen tantiata. ³⁶ Nuquin Papan bēdamboen iste tantiamequid tantiata. Adsho bēdambo icmequin Nuquin Papan cuidtiapimbo icquid mibi icmendac —quepondash Esus abibi cadequi. Adtanec nidpondash aidon istiapimbo icnuc.

Isadaidbon Esus tantienquo yaid

³⁷ Ěmbi dadpen chuiquin dada uabanacpadomboembi Esusēn comapenen tantiaquin dadpen nabansho isun con matses isadaidbon Esus tantiatadquidi Esus tantienquo icpondash. ³⁸ Aden Esus tantienquo icte con tsusedpa Isayasēn Nuquin Papan tantiamiacpadomboen chuiquin dada uapampic.

“Nuquin Papa yacnuēsh choash nadec onquendac.

‘Mimbi chiaidquo chuibansho tantiashun: Muequien mibi nec, ěbi caindac, Papa.

Mimbi namiacpadomboen comapenen tantiaquin dadpen nabansho isash: Nuquin Papa yacnuēsh choquidien nec, quetiadquidi adenquo iquendac, Papa,’ quependac,” quequin Esusēn chuite Isayasēn dada uapampic.

³⁹ Nuquin Papan pamumēdacimbocnuc icmiac con matsesēn Esus tantienquo icpondash. Aden chuiquin Isayasēn padpiden dada uapampic.

⁴⁰ “Isadaidbon ěbi tantiatiapimbo icsho isun

‘Ma adembi tantienquo icpanuna,’ caimbi.

Ma adequi pabiate shēcuē nibēdacimboc icchitono.

Ěbi tantiasho abi icsaid bēpiscudquin bēdamboen ismane,”

quequin Nuquin Papan ambi con matses caido nëishëshun chushcaid Isayasën dada uapampic. ⁴¹ Nuquin Papambo Esusbëd uinsadpambo yec tabadsho isondaid icquïn Isayasën aden Esus tantienquoio icte chuipampic.

⁴² Con matses dadpeshun Esus tantienquoio icnubi con matses chuiquidon abentsëcshun abentsëcshunquien Esus tantiauidpac caondash. Adoboedi: —“Nuquin Papan chiaid chuibante shubun puduedenda,” canushe —quiash dacuëdquin: —Esus tantiaquid nebi —quequin chuitiadquidi utsibo chienquoio icpac caondash. ⁴³ —Ma con matsesëmbi ëbi bëdamboen isnu —quequïnuidtsëqui tantiaquin aton matses chuitiapimbo icpac caondash. —Ma Nuquin Papan ëbi bëdamboen isnu. Aton Mado tantiaquid nebi que —quetiadquidi adenquoio yac caondash.

Cuidenquoio icte chiec nebi, quiaid

⁴⁴ Abi tantiauidboedo Nuquin Papan chiaid isbanquido cho-choash abi datsidadacsho chuinuec Esus padpidec comapenec onquepondash. —¿Ëbi tantianuequidën ëbiuidtsëquida tantiapadic? Padenquoio. Ëbi tantiaquidën ëbi chomiondaitsen tantiatsiash. ⁴⁵ Adembidi con Papadquibidi ëbi icsho isun: “Ai, adquibidien Nuquin Papa iquec,” quequïn tantiatsiash. ⁴⁶ Nuquin Papan matses bëdamboen iste tantiamenuec matsesbëd tabadec chondabi. Adec matsesash: “Ëbi tantiaquido ma Nuquin Papan bëdamboen isquin bëdamboen tabadmenu,” quiash nebi. ⁴⁷ “Ëmbi aden chuisho tantiatiapimbo icquido nëbi cuidnu,” ¿quectabi icti? Padenquoio. Nëbi Nuquin Papan bëdamboen isquin cuidenquoio icte chuinuequini nec. ⁴⁸ Nuquin Papan cuidte ushëmbien ëbi tantiesabon: “Nuquin Papan chiaidshenda chuipadene. Aid tantienquoio yec icsabudquiopobi,” quequin ambibi tantiendac. Adsho Nuquin Papan cuidendac. ⁴⁹ ¿Ëmbembi chuiquidambi nadi? Padenquoio. Ëbi chomiondaid con Pan chiaidquoio chiequini nec. ⁵⁰ “Ëbi tantiaquid ëbëdi tabadendac padpidec unësenquoio yec,” queshun Nuquin Papan chiquidtsëqui chiequini nec —quepondash Esus.

13

Esusën abëd icquido tapanaid

¹⁻² Esusën comapenen tantiaquin nabanaid chuiquin aitedi chiombi. Nëbi abi tantiaquido tantiaquieci abided cuidadec unësaid chuiquin unësash abi uincuenaidtsen chuinu. Tania. Nuquin Papan con tsusedpabo unës uainquoio icquïn matamiampid inchësh tantiaquin pec tabadte ushë nëbi yanuc inchëshën Esusbëd pec bëdamboec tabadondabi. Padnuen Udas Simon Iscadioten mado Satanasën tantiamiacpadomboen Esus bedmete tantieci tsadpanëdash. Adnubien Esus: —Nëbi con Pa yacno nidebi nëido nianec. ³ Con Pabëd tabadec ambi tantiacpadec abëdi abitedishun Icbombo iccondaiddi nëbi anobidi nidoash adquibidi icoaindabi. Adquid icquïn nëido bëdamboec tantianante ismenu —quequin tantiaquin ⁴ yuan nachimboen nadopondash. Uequin peboedi nidtotanec dashcute bëntse icquid dachiquidtanec daucudte tsibidiquepondash. ⁵ Tsibidiquetanquin pada-padaid dapan acte cushtotanquin abëd icquido tapambampondash. Daucudten tauchanquin tapambanondash.

⁶ Aden tapambanquimbi: —Mibitsen tapanu —cac Petedon: —¿Icbonda yua tapampaid? Ëbi tapanenda, Icho. Padi —capondash. ⁷ Adoquien Esusën: —Ëmbi nasho nëbi mimbi tantienquoio iquec. Yuecshun mimbi tantiendac. En tapanu —caquien: ⁸ —Padi. Mibi bëdamboshë icquid nec. Ëbien icsaquid nec. Yua namiacimboen mibi tapametiapimbo iquebique. Padi —caoapondash

Petedon. Adoaquien: —Ëmbi tapanabi yac con yuambo mibi ictiapimbo ictsiac —capondash Esusën. ⁹ Adsho tantiashun Petedon: —En na, Icho. Tapantanquimbi mapinobëdtabi ëbi mëpanta —caquien: ¹⁰ —Padi. Nesboed mibi nec. Taënouidsëqui bëchishacsho tapanembi. Ëmbi bëchish ucac mibi bëdambo iquec. Abentsëc icsambo iquec —quepondash Esus. —Bëchish ucacimboben ëmbi nasho Nuquin Papan mibi bëdamboen isendac icsaid ucudacimboecnuc —quequin tantiec: —Ëmbi bëchish ucac mibi bëdambo iquec —quepondash Esus. ¹¹ —Udasën ëbi unës uamenuen bedmendac —quequin tantiec: —Abentsëc icsambo iquec —quepondash Esus.

¹² Aden tapambanash dasiuidash samëdquin pebededquin abëd icquido Esusën chuipondash. —Ëmbi naboeð çada tantie? Tantia. Mibi chuinu. ¹³ “Ëbi chuiquidquo mibi nec,” mimbi ëbi capec. Adembidi: “Con Icho mibi nec,” mimbi ëbi capec. Bëdamboen mimbi chieç. Adquid nebiue. ¹⁴ Ëmbi nabocpadomboen mimbitsen nata. “Ëbëd icquid tantiaquiquin tapanquin nashunu,” qeshun naombique. Adecbidi nashunanta. Naden tantiashun nata. “Esus tantiaquido tantiaquiembi. Con buchibimboecnuc nashunu,” quiash nashunanta. ¹⁵ Ëmbi nabocpadomboen namenuen adombique. Mimbitsen nata. ¹⁶ En chuinu. Tantia. çIcbon chiacta chieshpadic? ç“Nid,” cacta nidenquo icpadic? Icbon chiacpadomboen yuan naqid yendac. Adomboen tantiaquin ëmbi chiacpadomboen nata. ¹⁷ Ëmbi aden chuisho tantiashun ëmbi chiacpadomboen naic mibi bëdambo iquendac —quepondash Esus.

¹⁸ Adashic padpidec: —Mibitedi caic: “Bëdambo iquec,” quetiapimbo iquendabi. Tauamboen: “Nuquibi icnu. Cho,” ëmbi caondaïdo con yuabotedi tantiembi. Abentsëc icsambo iquec. “Aid con yuapenguo nec,” quequin ëmbi tantiaidi nec. Nuquin Papan tantiamiac aidën icsamboen nate chuiquin nuquin tsusedpan dada uapampic naden. “Ëbëdtan planeboedëmbi ëbi unës uamenuen bedmendac,” quequin dada uapampic. ¹⁹ “‘Abi unës uametebi chioshi. Nuquin Papapadquiqiobi icquimbien naosh,’ quequin ma tantianu,” qeshun mibi chiombi. ²⁰ Mibipadquidën nate mibi chuinu. Tantia. Mibipadquidën ëbi chuibansho tantiash: “Ai, abimbo caic,” qeshun utsibon ëbi tantiatsiash. Adembidi ëbi tantiashun ëbi chomiondaïd Nuquin Papatsen tantiatsiash —quepondash Esus.

Abi bedmequid Esusën chiaid

(*Mat 26.20-25; Mad 14.17-21; Duc 22.21-23*)

²¹ Adshumbien abi bedmequid Udas tantiac unësquo icnuc Esusën chuipondash. —Tantia. Mibitedi chuinu. Ëbëd icquidëmbi ëbi chieshënquido ëbi bedmendac —quesho ²² tantiash abëd icquidobëd bëisanec: —çTsutsi capec? Nëidien cachitec —quecuededpondabi otacquo tantiec.

²³ Ëbi tantiaquidquo yec con cachochsëqui Esus uepondash. ²⁴ Adec Esusën dayuntsëqui ueshobini: —“çTsutsi cai?” ca —capondash Petedon mëdquin onquenquo icquin. ²⁵ Adoaquimbi cachoc isquin: —çTsutsi cai, Icho? —capondac. ²⁶ Adoaquien Esus: —En istac. Pete cuëshën ënë puntanquin menequin mibi ismenu —quetanquin pete cuëshën ënë puntanquin Udas Simon Iscadioten mado menepondash. ²⁷ Adoac penubi Satanasquo Udas dapudedquopanëdash ambi tantiaidquo namenuc. Adshobien Esusën: —Mimbi tantiacpadomboen baded nëbimbobi naic nid, Udas —capondash.

²⁸ Adsho tantiashini ëbitedi: —Tantiadenquo yec onquepec. çAtotsi quiash: “Baded naic nid,” quepec? —quepondac. ²⁹ Utsi: —Udas nuqui piucquid dayun uashunquid nec. “Piucquid buanshun pete bedtan,” quepequien

iccosh —quenubien utsi: —“Piucquid nibëdquido piucquid menetan,” quepequien iccosh —quecuededpondash. ³⁰ Pete cuëshëmpi pesho: —Nëbimbobi baded naic nid —caquien Udas nidpondash. Inchëshëmbi nidpondash Esus bedmenuen chiec nidec.

Tantiananquiota, quequin chiaid

³¹ Abi bedmenuen chiec Udas nidbombien Esus: —Nuquin Papan matsesmiaidquio icquin ambi tantiaidtedi nëbimbobimbi nainendac. Èmbi nainsho isash con Pa bëdambo iquendac. ³² Èbitsen bëdambo icmenuen con Pan comapenen tantiaquin ismendac. ¿Yuecshun quectabi icti? Nëbimbobimbi caindac —quepondash Esus. Abi unës uatebëda abi unësash uincuenash Nuquin Papa yacno nidte chiec adpondash. ³³ Adashic ëbi chedo padpiden chiëc: —Nëbimbobi nidebique. Chuiquid dapabo ëmbi chiondacadpadoemboen mibi chuoanu. Tantia, mado. Èbi nidacsho mimbi ëbi istuidenquio iquendac. Èbi nidacno mibi nidtiapimbo iquendac. ³⁴ Aden tantiaquin Nuquin Papan chiaid utsi mibi chuinu. Èbi nidan ëmbi chiacpadoemboen nata. Èmbi mibi tantiaquiacpadquiec tantiananquiota. ³⁵ Èbi tantiaquido tantianansho isun: “Adec tantiananquido Esus tantiaquidombo nec,” quequin utsibon tantiatsiash —quepondash Esus.

Petedo: Èmbi isacmaid nec, quete chiaid (*Mat 26.31-35; Mad 14.27-31; Duc 22.31-34*)

³⁶ Adec —Nidebi —quesho tantiashun Petedon: —¿Mitsimbo nide, Icho? —capondash. Adoaquien Esus: —Nëbi mibi nidtiapimbo yacno nidebi. Yuecash ambo mibitsen nidendac —quepondash Esus. ³⁷ Adsho tantiash Petedo: —¿Atotsi quetiadquio yec: “Nëbi ëbëdi nidtiapimbo mibi iquec,” quepo mibi? Mibëd nidec dacuëdenquio ictsiabi. Mibi chieshënquidon: “Unës uanu,” mibi casho tantiash: “Èbien natiad,” quetsiandabi —quepondash Petedo.

³⁸ Adsho tantiashien Esus: —“Èbien natiad,” ¿quecta icpatsia? Padenquio mibi ictsiac. Cachina bënë cuëdanabi icnuc mibi chieshtouidendac. “Èmbi isacmaid Esus nec,” mibi quendac. Adashic padpidec adecbidi. Adashic padpidec adecbidi. Cachina bënë cuëdanabi icnuc mibi adendac —quepondash Esus. Adsho tantiashini Esusbëd icquido ëbitedi dacuëdcuededpondac.

14

Nuquin Papabëd tabadmendambi, quiaid

¹ Èbitedi dacuëdcuededsho isashien Esus: —Dacuëdenda. “Èbi dayun uaquid nec,” quequin mimbi Nuquin Papa tantiacpadoemboen ëbitsen tantiaquiota. ² Mimbi tantiacpadquio Nuquin Papan shubu iquec. Quënë dadpenquioshë iquec. Tsucustiapimbo iquec. Adpenquio icsho mibi aden chienquio ictsiambi. Adquid tantiaquin: “Èbi tantiaquido ëbëdi tabadmendambi,” quequin chiombi. ³ “Adquid iquec,” quiash ëbia nidshun con Pa chiendambi. “Èbi tantiaquido neque. Nuquibëdi tabadmenuna,” quequin chiendambi. Adashic ëbi yacno mibi buanuec choaindabi. ⁴ Èbi nidan ëbi nidacno nidte mimbi tantiec —quepondash Esus.

⁵ Adsho tantiashun Tomasënsen: —¿Mitsimbo nide, Icho? Tantiambo iccombi. Podqued tantienquio iquembique. Èbi chui —caquien ⁶ Esus: —Nuquin Papa yacno nidte tantiamequidquio nebi. Nuquin Papan chi-aiduidtsëqui chiec muesambo nebi. Adquid icquin ëbi tantiaquid Nuquin

Papabëd tabadmendambi. Ëbi tantiesan Nuquin Papa tantiatiapimbo ictsiash. Ëbi tantiaquidënuidtsëqui Nuquin Papa tantiatsiash. ⁷ Ëbi caic: “Nuquin Papan Mado nec,” quequin mimbi Nuquin Papatsen tantiendac. Nëbi abipadquid ëbi icsho isun Nuquin Papambo isachimboen mimbi tantiendac —quepondash Esus.

⁸ Adshobien Uedipentsen: —Nuquin Papa ëbi isme, Icbo. Nuquin Papa iste bunebique. Aid isash bëdambo ictsiabi —caquien ⁹ aidtsen Esusën: —¿Tantienuioda ique, Uedipe? Yuec mibëdi tabadobi. ¿Mimbi isacmaidtabi nedi? ¿Mibi chianenquiodambi ictio? Nuquin Papapadquidquibidini nec. Ëbi adquid icsho isun: “ ‘Adquidquibidi Nuquin Papa iquec,’ quequin Nuquin Papatsen mimbi tantiendac,” quequin mibi chiombi. ¿Atotsi quequimbini: “Nuquin Papa ëbi isme,” cai? ¹⁰ “Nuquin Papapadquidquio nebi,” ëbi qesho tantiash: “Ai, abimbo caic,” ¿quenquioda icco? Ëmbembi chienquio iccombi. Con Pan chiaidquio chiequini nec. Adembi Ëmbembi nabanenquio iccombi. Ëbëd tëshnanenquio icquin con Pan namiaquimbi naoc. Ëmbembi nainquio iccombi. ¹¹ “Con Papadquidquio nebi,” ëbi qesho tantiashun: “Ai, abimbo caic,” cata. Ëmbi chiaid tantiatiapimbo icquin ëmbi comapenen tantiaquin dadpen nabamboedquio tantiata. Aden ëmbi nabamboed tantiaquin: “Nuquin Papan chomiaidënuidtsëquien adotsiash,” quequin tantiata. ¹² Tantia. Mibi chuinu. Ëmbi nacpadomboen ëbi tantiaquidontsen comapenen tantiaquin nabanendac. Ëmbi chuibanac daëdpactsëcshun ëbi tantiabentsëccosh. Con Pa yacno nidshun ëmbi chomiaidën con Mayanë namiac mibipadquidën ëbi chuibanac dadpenshun ëbi tantiabenendac. ¹³ Ëmbi chiacpadomboen naquidën: “Ëbi nashunta, Icbo,” qesho tantiashun ambi chiacpadomboen nashunendambi. “Nuquin Papa bëdamboshë iquec,” camenuen ¹⁴ ëbi tantiaquidën chiacpadomboen nashunendambi —quepondash Esus abëd icquido chiec.

Nuquin Papan Mayan tabadte chiaid

¹⁵ Adashic abëd icquido padpiden chiec Esus: —Ëbi abimbo tantiaquidën ëmbi chiacpadomboen natiadquio iquendac. ¹⁶ Adotiadquio icsho isun con Pabëd icquin con Pa chiendambi naden. “Nuqui tantiaquido bëdamboen tantiamenuen nuquin Mayan aidobëd tabadmenuna, Papa,” ëmbi cac Nuquin Papan con Mayan mibëdi tabadmendac. ¹⁷ Adoac mibi nianenquio yec mibëdi tëshnanenquio iquendac. Mibëd icquin ëbi chiuquini mibi abimbo tantiamendac. Aid isadenquio icsho ëbi tantiesabon aid tantiatiapimbo iquec. Mimbien aid tantiec. Con Pan ëbëd icmiaidquio nec. Ambi namiaid ëbi icsho aid tantiashumbimboen mimbi tantiec. Ëbi nidan choash mibëdi tëshnanenquio yec tabadendac con Mayan. ¹⁸ ¿Shiadimpi mëyadacbitsec icnudambi mibi niampe? Padenquio. Nuquin Papan Mayan con Mayambi nec. Mibëd aid icnuc ëbëd yachimboequi con Mayan tantiadendac. ¹⁹ Nëbi ëbi nidacsho ëbi tantiesabon ëbi isenquio icnuc mimbi ëbi isendac uincuenacsho. Adec uincuenaid icquin con Mayan mibëd tabadmequin mibi unësacsho uincuemeshun ëbëdi tabadmendambi. ²⁰ Ëbi uincuenaid ushëmbi mimbi naden tantiendac. “Esusën Nuquin Papa tantiaquiec aidbëd tëshnanenquio icquin aidën chiacpadomboenuidi naindac. Adechidi Esusbëd tantiananquiec aidbëd tëshnanenquio icquin aidën chiacpadomboen natiadquio yec tabadebi,” quequin mimbi tantiendac. ²¹ Ëmbi chiacpadomboen naquid ëbi

tantiaquidquo nec. Èbi tantiaquidquo mibi icsho con Pabèdtan mibi tantiaquidquin: “Adquo aton Papabèd Esus iquec,” camequin mibi bédamboen tantiamendambi — quepondash Esus.

²² Adsho tantiashun Udas utsin abi bedmequidènpenquo: — “Nuquin Papa yacnuèsh choash con matses chuiquidquo yanshun abitedi ismequin tantiamendac,” quequin Nuquin Papan chiaid nuquin tsusedpabon dada uapampic. Nuquin Papa yacnuèsh choquid icquin ¿atotsieshun èbiuidtsèqui tantiamè, Icho? — caquien ²³ Esus padpidec: — Èbi tantiaquiduidtsèqui naden tantiamendambi. Èbi tantiaquid èmbi chiacpadomboen naquid nec. Aden nasho con Pabèdtan tantiaquidquin aibdèdi con Mayan tabadmendambi. Adoac con Mayanèn tantiamiac èbèd iquec con Pabèd iquec quiacbimboec tantiadendac. ²⁴ Èbi tantienquo icquidoen èmbi chiaid niac-niacquido nendac. ¿Èmbiuidtsèqui chiaidta adquidèn niac-niacpadic? Mambi Nuquin Papan chiaidquo chuiboc. Aidèn chiaidquo adquidèn niac-niaquec — quepondash Esus abèd icquido chiec.

²⁵ Adashic padpidec Esus onquiondash. — Mibi bèdiactsèc tantiamequin mibèd icquin con Pan chiaid chuibanombi. ²⁶ Con Pa yacno nidshun èmbi: “Nuquin Mayan aidobèdi tabadmenuna, Papa,” cac con Pan con Mayan matsesbèd tabadmendac. Adoac èmbi naidbèdta èmbi chiondaidtedimbo mibi bédamboen tantiamendac. ²⁷ Con Pa yacno nidshun con Mayan mibèdi tabadmequin dacuèdenquo icquid mibi icmendambi. Adoac dacuèdenquo yec bédamboec tabadta. Èbi tantiesabo dacuèdacimboec dacuèdenda. Conapenec dacuèdtanec uinte paèdtanec aido tabadnubi mibi dacuèdenquo yec bédamboec tabadta. ²⁸ “Nèbimbobini con Pa yacno nidendac. Adtanequic choaindabi,” quepobi mibi chiec. Èbi adsho tantiash èbi tantiaquidombo cuishonquetsiash. “Esus abi namequid aton Papabèd tabadec nidec,” quiaish èbi tantiec cuishonquetsiash. ²⁹ Nidnumbi mibi chiec nebi. “Unèsash uincuenendabi. Adashic con Pa yacno nidendabi,” quiobi. “Èmbi chiacpadec èbi adsho isun ma nèidon: ‘Esusèn abimboshenda capondash. Ambi chiondacadquid Nuquin Papan Madombo nec,’ quequin tantianu,” quiaish adobi. ³⁰ Nèbi ènquimbi chuinu. Èbi tantiesabon icbo Satanas èbi unès uamenuc choec. Ambembi aidèn èbi unès uametiapimbo iquec. ³¹ Con Pan tantiacpadequini unèsendac. Èbi adec unèso isash: “Nuquin Papa tantiaquin ambi chiacpadomboen naic abided cuidadec Esus unèsac,” quequin ma matses abitedishun tantianu,” quiaish adebi. Nèbimbobimbi naique. Nidec nidnu. Nid — quepondash Esus.

15

Shancuinbiecquid uba caid chiaid

¹ — Nidec nidnu. Nid — quetanquimbi padpiden chuipondashi ompoacimboen chuiquin. — ¿Mitsipadquo shancuinbiecquid uba caid icpec? Mapictsèc ictsequi cuidi-cuidipambo yanquid. Adquidic shancuin bacuèbimboec didiquequid. Uba dadan aton cuidi canimequin bédambo icmequid. Adomboembidi èbi tantiaquido bédambo icmendambi. Nuquin Papan uba icbobimboecquid nec. ² Uba aton icbon cuidi utsiuc bacuèesa icsho pateshunepaid yoc. Adoacimboen èbi tantiauidtsècboedon ambi ic-samboen naid èntiapimbo icsho con Pan ambi icsaido cuidacno nènendac. Uba icbombidi bédamboen bacuèmenuen dadpen cuidi icquid cuidi dadpen pateshun siaquid. Adomboembidi èbi tantiaquido bédamboshè icmenuen Nuquin Papan aidon icamboen naid èmetsiash. ³ Èmbi chiacpadomboen naic

mibi bĕdambo iquec. Aden ĕbi tantiasĥo Nuquin Papan mibi bĕdamboen isec. ⁴ Ĕbi ademĕbidi tantiaquin ĕmbi chiacpadomboen nata. Adsho isash mibi bĕdamboen tabadmec mibĕd iquendabi. Uba cuidi padquĕdaid bacuĕtiapimbo iquendac. ⁵ Adeĕbidi ĕbĕdi tĕshnanash matses bĕdambo ictiapimbo iqueque. Ĕbĕd tĕshnanenquo yec bĕdamboec tabadta. Bĕdamboec tabadquin mimbi utsibo ĕbi tantiametsiac. ⁶ Uba icĕon cuidi utsiuc bacuĕesa icsho pateshun tsindoshon nĕdĕncapaid yoc. Adoacĕimboen ĕbi tantiesabo unĕsacsho Nuquin Papan ambi icsaido cuidacno nĕsecaindac —quepondash Esus.

⁷ Adshumbic Esusĕn padpiden chuipondash. —Ĕbi tantiaquin ĕmbi chiacpadomboen naquidĕn: “Ĕbi nashunta, Papa,” cac ambi chiacpadomboen Nuquin Papan nashuntsiash. ⁸ Nuquin Papan adoshonac: “Nuquin Papa bĕdambo iquec,” mimbi catsiac. Ademĕbidi utsibotsen: “Nuquin Papa bĕdambo iquec,” camenuen bĕdamboec tabadquin ĕbi tantiameta. Mimbi adosho: “Ai, ĕbi tantiaquidquo nec,” caindambi. ⁹ Con Pan ĕbi tantiaquiacpadomboembi mibi tantiaquiembi. Adoaid icquin ĕbitsen tantiaquioquin ĕmbi chiacpadomboen nata. ¹⁰ Abi tantiaquioquin ambi chiacpadomboen nashobini con Pan tantiaquiec. Ademĕbidi ĕbi tantiaquidĕn ĕmbi chiacpadomboen nasho ĕmbitsen aid tantiaquidambi. ¹¹ “Ĕbi cuishonquiacpadquiecĕbidi ma ĕbi tantiaquiec cuishonquequiono,” qeshun aden mibi chiembi —quepondash Esus abĕd icquido chiec.

Tantiananta, quequin Esusĕn chiaid

¹² Adashic abĕd icquido padpiden chiec Esus: —Ĕmbi mibi tantiaquiacpadquiec tantiananta. ¹³ Nadquiec caimbi. “Min utsi cuesnu,” cashunac: “Ĕbien natiad,” quiacĕimboec tantiananta. Aden mibi tantiec ĕbided cuidadec unĕsendabi. ¹⁴ Ĕmbi chiacpadomboen nasho mibi con utsi caimbi. ¹⁵ Ĕmbi con yua caboedobi mibi con utsi caimbi. Iĕon: “Tantia. Chuinu. Nadono. ĤAda bĕda icpeĕ?” quequin aton yua chienquo icquin aton utsien aden chuipaid. Con Pan: “Ma abi tantiaquido chuinu,” caidtedi mibi chiomĕbique. Mibi con utsi caimbi. ¹⁶ “Esusbĕd iquec nidnu,” Ĥquequina mimbembi tantiadionda? Ĕmbien mibi: “Nuquibi icnu. Cho,” caondac. “Utsibo tantiamequin ma nĕidon ĕbi chuibenĕnu. Adoac utsibotsen ĕbĕd tabadtequid yanendac,” qeshun mibi cho caondambi. Aden ĕmbi chiacpadomboen naquidĕn Nuquin Papa chuiquin: “Min Mado Esus tantiaquid ĕbi icsho ĕmbi chiacpadomboen ĕbi nashunta, Papa,” mimbi cac mimbi chiacpadomboen Nuquin Papan mibi nashuntsiash. ¹⁷ Ĕbi adsho tantiasĥo ĕmbi chiacpadquiec tantiananta —quepondash Esus.

Esus tantiaquido chiesĥĕntia chiaid

¹⁸ Adashic padpidec Esus onquepondash. —Ĕbi tantienquo icquidon chiesĥĕnac: “Aden Esusba chiesĥĕnondash,” quequin tantiaata. ¹⁹ Ĕbi tantiesabo icsho ĕbi chiesĥĕnquidon mibi bĕdamboen istsiandac. Adquid iccondaidi ĕmbi: “Cho,” cac ĕbi tantiaquid mibi yanondac. Adeĕ ĕbi tantiaquid icsho mibitsen chiesĥĕnoaindac. ²⁰ “Yuan icĕon chiacpadomboen napaidd yoc,” quequin ĕmbi Ĥchuiĕoedta tantie? Aden ĕmbi chiacpadomboen nasho ĕbi chiesĥĕnquidon mibitsen chiesĥĕnoaindac. Ademĕbidi ĕmbi chiaid tantiatiapimbo icquidĕn mimbi chiaidtsen tantiatiapimbo icoaindac. Padnuen ĕmbi chiaid tantiaquidĕn mimbi chiaidtsen tantiadac. ²¹ Ĕbi chiesĥĕnquidombi ĕbi chomiondaidquo tantiaquin ĕbi chiesĥĕnenquo ictsiash. Ma ĕbi chomiondaid Nuquin Papa tantienquo icquin aidon ĕbi chiesĥĕmpayoc. Adomboembi ĕbi tantiaquidotsen chiesĥĕnoaindac.

22-23 ¿Ēbi chieshĕnquidon ĕbiuidtsĕquida chieshĕmpadic? Ma ĕbi chieshĕnquin Nuquin Papatsen chieshĕneyoc. Adquid icsamboshĕ iquec. Nuquin Papa yacnuĕsh choshon ambi chiaid ĕmbi chiabi icnuc ĕbi chieshĕnquido ĕbi chieshĕnec icsainquio ictsenash. Nuquin Papa yacnuĕsh choshon mambi Nuquin Papan chiaidquio chuibamboc. Adnuc Nuquin Papan ĕbi chieshĕnquido: “Mibi icsamboshĕ iquec,” caindac. ²⁴ Adembidi Nuquin Papa yacnuĕsh choshon ĕmbi comapenen tantiaquin nabanquin ismiabi icnuc Nuquin Papan: “Con Mado chieshĕnec mibi icsambo iquec,” cainquio ictsenosh. Ŭsibon nabanacmaidquio comapenen tantiaquin mambi nabamboc. Adosho isash ĕbi chieshĕnquido: “Icsapenquio iquebi,” quetiapimbo iquendac. Ēmbi nabansho isun ĕbi chieshĕnquin con Patsen chieshĕnec. ²⁵ “Aden matsesĕn ambembi ĕbi chieshĕmpac,” caimbi. Ēmbi aden chuite chuiquin Nuquin Papan nuquin tsusedpa dada uamepampid ĕbi chieshĕnquidon isbanaidi nec —quepondash Esus.

²⁶ Adashic padpidec: —Ēmbi con Pa yacno nidshun: “Nuquin Mayan ĕbi tantiaquidobĕd tabadmenuna, Papa,” cac: “Ai,” queshun Nuquin Papan chomiac mibĕdi tabadquin abimbo chuiquin ĕbi tantiamequiendac. ²⁷ Adoac mimbisen ĕbi chuibanendac. “Yuec aidbĕd tabadondashun Esus tantiembi,” queshun mimbi ĕbi chuibanendac. Aden mimbi chuisho ĕbi chieshĕnquidon mibitsen chieshĕnendac. Adoac dacuĕdenda.

16

¹ “Chieshtonoshe,” queshun mibi aden chiombi. Mibitsen chieshĕnac dacuĕdenda. Mibĕd con Mayan tabadmembique. ² Ēbi tantiaquido caquin: “Isenda. Esus tantiaquid neque. Nuquin Papan chiaid chuibante shubun puduedmenda,” caindac. Shubu utsi-utsiec yacnuĕsh adendac. Adomboembidi mibi chieshĕnquin utsi-utsien cuesun secash: “Nuquin Papa tantiaquidquio icquin Esus tantiaquido cuesun secaombi,” quependac. ³ Aden Nuquin Papa ĕbĕdta tantienquio icquidon ĕbi tantiaquidotsen chieshĕnendac. ⁴ Mibi chieshĕnac: “ ‘Ai, adenshenda Esusĕn chuipondash. Ēbi tantiaquido cuesun secaindac, quepondash,’ ma nĕido quenu,” queshun nĕbi mibi chiembi. “Ēbi icnuc ĕbi tantiaquido cuesun secadenquio iquec. Ēbi nidambien aido cuesun secabenendac,” quequin tantiaquin ĕnden aden mibi chienquio iccondambi. “Nĕbi nidebi,” queshun nĕbi mibi chiembi —quepondash Esus.

Nuquin Papan Mayan chote chiaid

⁵ Adashic: —Nĕbi ĕbi chomiondaibĕd tabadec nidendabi —quepondash Esus. Adsho tantiashe padequimbo tabadpondabi. Adec ĕbi padequimbo tabadsho isash Esus padpidec onquepondash. —“¿Mitsimbo nide?” ¿quenquioda ique? ⁶ Ai, ĕmbi chuiboed tantiac unĕsquio icnuen mimbi ĕbi chienquio icchitec. ⁷ Ēbi nibĕdnuc mibi bĕdambo iquendac. Ēbi nidenuquo icnuc con Mayan mibi bĕdamboen tantiamenuc choenquio ictsiash. Nidshumbimbi mibĕdi tabadmenen chomendac. ⁸ Adoac matses ambi icsamboen naid tantiamequin ĕbitsen tantiamendac. Adomboembidi Nuquin Papan cuidtetsen tantiamendac. ⁹ Aden Nuquin Papan Mayanĕn tantiamiac: “Esus tantienquio yec icsambo icchitebi,” quendac matses. ¹⁰ Adembidi ĕbi bĕdamboshĕ icquid tantiamiac: “Nuquin Papan Madombo yec Esus bĕdamboshĕ icquid nec. Aid abentsĕqui tantiasheeni Nuquin Papan bĕdamboen istsiash,” quendac matses. Ēbi isadenquio yec con Pa yacno nidan con Mayanĕn tantiamiac matses adendac. ¹¹ Adembidi Nuquin Papan cuidte tantiamiac: “Matses yuaquid Satanas ambi yuaido Esus tantienquio icquidobĕdta Nuquin Papan

cuidendac,” quendac matses. Con Mayanën tantiamiac adec matses onquendac —quepondash Esus.

¹² Adashic abëd icquido chiec Esus: —Mibi dadpenquoio chuitiadquo icquimbi nëbi dadpen chienquoio iquembi. Nëbi ëmbi chuisho mimbi tantiatipimbo iquec. ¹³ Nuquin Papan Mayan choshombien mibi abimbo chuiquin ëbi tantiamendac. Ambembi chienquoio icquin Nuquin Papan chiaiduidi chiendac. “Nadquoio iquendac. Adecbidi nadquid choendac,” quequin mibi dadpen tantiamendac. ¹⁴ Adembidi ëmbi naidbëdta ëmbi chiaidtedi tantiamequin: “Esus bëdamboshë iquec,” camendac. ¹⁵ ¿Ëbiuidtsëqui tantiamenunda con Mayanën adopec? Padenquoio. Ëmbembi chiaid mambi chiambo yoc. Nuquin Papan chiacpadomboenuidi naquin ambi chiaiduidtsëquimbi chuibandenioc. “Con Mayanën ëbëdta con Pa tantiamendac,” quequin tantiec: “Ëmbi naidbëdta ëmbi chiaidtedi tantiamendac,” quiobi —quepondash Esus abëd icquido chiec.

Abi nidte Esusën chiaid

¹⁶ Adashic padpidec: —Nëbi isadenquoio yanebi. Adashic yuepactsëc yash isadcuenendabi —quepondash Esus. —Nëbi unësash uincuenash padpidec isadebi —quequin tantiec adondash. ¹⁷ Adsho tantiaishini ëbitedi: —¿Atotsi quepec? Tantiadenquoio yec onquepec. “Con Pa yacno nidash ëbi nibëdnuc mibi tabadendac,” ma quepaboc. ¿Atotsi chuitiadquoio yec: “Nëbi isadenquoio ictanec yuepactsëc yash isadcuenendabi,” queposh? ¹⁸ ¿Atotsi quepec nec? —quepondabi Esushëd icquidobëd onquec. Esus tantiamenquoio yec sho-shoshquetsëcquieq onquepondabi. ¹⁹ Adsho ambembi tantiaish: —Ëbëd icquidon ëbi chuitiadquoio iquec —qeshun Esusën: —“¿Atotsi chuitiadquoio yec nio?” quequin ëbi chuite mibi buneque. ²⁰ Tantia. Mibi Chuinu. Ëbi unëso isash mibi sedenquenubi ëbi tantienquoio icquido cuishonquendac. Adec sedenqueboedobi mibitsen cuishonquienandac. ²¹ ¿Mitsipadquoio bacuë tishec chido icpec? Bacuë cuiddiquenuc natiamboshë icboedi bacuë tishash cuishonquepaid yoc. ²² Adecbidi nëbimbobi ëbi unëso isash mibi natiaquienandac. Adboedi yuepactsëcshun ëbi padpiden isash mibi cuishonquendac ënëdenquoio yec. ²³ Adnubini con Pa yacno nidendac. Ëbi adnuc mibi bëdambo iquendac. Ëbi nidan: “Ëbi nashunta,” ëbi catiapimbo icquimbi Nuquin Papa mimbi chianendac. Ëbi tantiaquidën: “Min Mado Esus tantiaquiembique. Ëbi nashunta, Papa,” cac ëbi tantiaquin con Pan mibi nashunendac. ²⁴ Aden mimbi Nuquin Papa chianenquoio iccoc. Nëbi adomboen chianeta. “Min Mado Esus tantiaquid icsho ëbi nashunta, Papa,” quequin chianeta. Mimbi adoac mimbi chiacpadomboen mibi nashunquin Nuquin Papan mibi cuis-honcamendac —quepondash Esus abëd icquido chiec.

Esusën abëd icquido ënquimbi chiaid

²⁵ Adashic abëd icquido padpiden chiec: —Ompoacimboen dadpen chuibanionmbi. Yuepactsëcshun: “Con Pa nadquoio iquec,” quequin mibi sebadënquoio chiendambi —quepondash Esus. —Uincuenashun aden chien-dambi —quequin tantiec adondash Esus. ²⁶ Adashic padpidec: —Con Pa yacno ëbi nidan mimbi: “Min Mado Esus tantiaquid nebique. Ëbi nashunta, Papa,” quequin Nuquin Papa mimbibi chianendac. “Ëmbiuidtsëqui: ‘Ëbi tantiaquid nashunta, Papa,’ cac ëbiuidtsëqui tantiaquin Nuquin Papan mibi nashuntsiash,” ¿quectabi ique? Padenquoio. ²⁷ Mibitsen tantiaquin Nuquin Papan mimbi chianiac mibi nashunendac. “Nuquin Papa yacnuësh choquid

Esus nec,” quequin ëbi tantiaquid mibi icsho con Pan mibitsen tantiaquiquin mibi nashunendac. ²⁸ Matsesbëdi tabadec Nuquin Papa yacnuësh chondash nëbi con Pa yacnobidi nidendabi —quepondash Esus.

²⁹ Adsho tantiashini ëbitedi: —Adquidshenda mibi nepec. Ma nëbi mimbisebadënquo chieyoc. ³⁰ Mibi: “Nëbi isadenquo yanebi,” quioc. Adashic: “Yuecpactsëc yash isadcuenendabi,” mibi qesho tantiash mibi tantiamenquo yec sho-shoshquetsëcquieci: “¿Atotsi quepec?” quecuedepobi. Mibi chuimetiadquo iccobi. Ëmbi chiambobi ma mimbibi tantiapaboc. Comapenen tantiaquidquo icquin ma mimbisebadimbo tantiapayoc. Aden tantiaquid yec Nuquin Papa yacnuësh choquid mibi nec —quepondabi ëbitedi. ³¹ Adsho tantiash Esus: —Ai, nëbi mimbisebadimbo tantiaquieci. ³² Aden ëbi tantiaquidquibi ëbi chieshënquin bedsho isanec mibi niquendac ëbi nianec. Mimbisebadimbo con Pan ëbi nianenquo iquendac. ³³ “Ëbi nidan Nuquin Papan Mayan mibëd tabadendac. Ëbi tantiaquid Con Pan tantiaquieci,” quequin dadpen chuibanombi. “Ëbi tantieci dacuëdenquo yec ma tabadnu,” qeshun mibi aden chuibanombi. Ëmbi chiaid tantiashun chieshëmënquido dacuëdenenda. Satanasën: “Icsamenu,” cac icsainquo iccondabi. Aden Satanas yuametiapimbo icquid icquin mibi cudasquin yuametiapimbo iquebique. Dacuëndenda —quepondash Esus abëd icquido chieci.

17

Esusën Nuquin Papa chiaid

¹ —Dacuëndenda —qeshumbic ëbi tantiamenuen abuc isquin Esusën Nuquin Papa chuipondash. —Nuqui tantiactedi ëbi naimeta, Papa. Ëbi naimetanquin comapenen tantiaquin ëbi bëdambo icmeta. Aden mimbisebadimbo icmiac mibitsen bëdambo icmendambi, Papa. ² Ëndenquimboshë mimbisebadimbo ëbi chiondac naden chuiquin. “Nuqui matses uaidon abitedishun Icho mibi nec, Mado,” quequin mimbisebadimbo chiondac. Mimbisebadimbo adonaid icquin mimbisebadimbo tantiactedi matses nuquibëd tabadtequido icmendambi, Papa. ³ Matsesën nadosho adoendambi. “Abipadquid utsi nibëdnuc Nuquin Papa iquec. Ambi chomiondaidquo Esus nec,” quequin tantiasho nuquibëd tabadtequido icmendambi, Papa. ⁴ Mimbisebadimbo chiacpadomboen naquin nëbimbobimbi nainec. Ëmbi adoacsho isash matses: “Ambi chomiaid tantiasho Nuquin Papan nuqui bëdamboen isec. Nuquin Papa bëdamboeshë iquec,” quependac, Papa. ⁵ Nuqui tantiactedi ëmbi nainacsho mibi yacno nidmeshun mibëdi ëbi tabadmeoata nuqui matses uabi tabadtenecpadembi. “Nuquibi abitedimbo namenuna,” ëbi cata, Papa —quepondash Esus Nuquin Papa chieci.

Esusën abëd icquido Nuquin Papa chiaid

⁶ Adshumbic Esusën abëd icquido ëbitedi chuiquin aton Papa chuioapondash. —Mimbisebadimbo tantiactedi mimbisebadimbo tantiaquid icmiacsho mimbisebadimbo bëdamboen iste chuibanombi. Aden mimbisebadimbo chiaidquido chiac: “Ai, adotiadquido iquebi,” quiosh, Papa. ⁷ Adembidi aidon: “Nuquin Papan namiaidquido nec. Ambebbi nainquo iquec,” quequin ëbi tantiaposh. ⁸ Mimbisebadimbo chiaid ëmbi chuisho tantiashun mimbisebadimbo comapenen tantiaquin nabamiaid nasho isun: “Ma Nuquin Papan chomiaidquido nepayoc,” caposhi ëbëd icquidon, Papa. ⁹ Ëbi tantienquo icquido mibi chienquo iquemi, Papa. Ëbi tantiaquidquidotsëqui mibi chieci nebi. Mibi tantiaquido icsho mimbisebadimbo tantiamiac ëbitsen tantieci aidon. ¹⁰ Adsho isun: “Nuqui tantiaquido nec,” caimbi, Papa. Aidon:

“Mibi bēdambo iqueque. Con Icho mibi canu. Mimbi chiacpadec bēdamboec tabadtiadquio iquebi,” quequin bēdambo icmioshi, Papa. ¹¹ Mibi bēdamboshē iqueque. Ēbi mibi yacno nidan ēbi tantiaquido dayun uata, Papa. Ēbi chieshēnquidon chieshtomenushe. Nēido bēdamboen dayun uata. Mimbi ēbi icmiacpadquidbidi comapenen tantiaquid mibi neque. Ma nuqui tantiananquiacpadquiec ma ēbi tantiaquido tantiananu. Nēido bēdamboen dayun uata, Papa. ¹² Aidobēd icquin mimbi chiaidquio bēdamboen chuibanquin chieshtomiambo iccombi. Aden bēdamboen dayun uaquin ēbi tantiaquido cudasēnquin Satanas yuamiambo iccombi. Udas abentsēquien Satanasēn yuatsaccosh. Mimbi chiaid matsēsēn dada uapampicpadomboen ēbi bedmenuen Satanasēn Udas yuaccosh. Adoac ēbi bedmequid yanash mimbi cuidtequid iquendac.

¹³ Nēbi mibi yacno nidendabi, Papa. “Ēbi nidan dacuēdec ēbi tantiaquido chieshtonoshe,” queshun mibi otacquo chienquio iquembi. “Ēmbi abi dayun uate chuisho tantiash ēbi yacpadec ma cuishonquenu,” quequin mibi otacquo chienquio iquembi, Papa. ¹⁴ Mimbi chiaidquio nēido chuibanombi. Adoac ēbi tantiaquido yansho ēbi chieshēnquidon nēidotsen chieshēmpēc. Ēbi yacpadec mimbi chiaid niac-niacte bunenquio icshobidi nēido chieshēnquiec, Papa. ¹⁵ Aden tantiash: “Ēbi tantienquio icquidobēdi ēbi tantiaquido tabadmenda,” ¿quectabi ique? Padenquio. “Ēbi tantiaquido chieshtomenda,” caimbi, Papa. Satanasēn yuanushe. Bēdamboen dayun uaquin chieshtomenda, Papa. ¹⁶ Ēbi tantiesabo tabadacpadec tabadenquio icquin ēmbi nabocpadomboen natiadquio iqueque. ¹⁷ Mimbi chiaidquio pausunquioquin bēdamboen tabadme, Papa. ¹⁸ Mimbi ēbi: “Matses chiec nid,” caondacpadomboen aid: “Ēbi chuibeneta,” caindambi. Adoac nēidon ēbi chuibenendac, Papa. ¹⁹ Nēido tantiaquiec nēbimbobini mimbi chiacpadec ēbided cuidadec unēsēndac. “Adomboembidi ēbi tantiaquidon ma Nuquin Papan chiacpadomboen nanu,” quishash ēbi tantiaquido min yuabombo icmenuec adebi, Papa —quepondash Esus aton Papa chiec.

Esusēn abi tantiaquid utsibo Nuquin Papa chiaid

²⁰ Adashic padpiden Nuquin Papa chiec Esus: —Ēbēd icquido mibi chuishumbic nēbi aidobēdta ēbi tantiaquid utsibotsen mibi chuinu, Papa. Ēmbi chiaidbēdta ēmbi naidtedi ēbēd icquidon utsibo chuibanac aidotsen ēbi tantiaquido yanendac. Adec ēbi tantiaquido dadpenquio yanendac. Ēbi tantiaquidotedi tantiaquin mibi chiec nebi, Papa. ²¹ Nuqui tēshnanenquio yacpadequi nuquibēd tēshnanenquio icquid icmeta, Papa. Nuqui tantiananquiacpadec ēbi tantiaquidotedi shubu abentsēquēn tabadacimbocnuc tantianameta, Papa. Adsho isash nuqui tantienquio icquido nadtshash. “Esus tantiec bēdambo iquec. Aden Nuquin Papanuidtsēqui bēdambo icmetsiash. Nuquin Papan chomiaidquien Esus nechitec,” quetsiash. ²² “Mibēd ēbi tantiananquiacpadquiec ma ēbi tantiaquido tantiananquiono. Ma chieshēnanenquio icnu,” quequin mimbi ēbi namiacpadomboen ēbi tantiaquido namiombi, Papa. ²³ Nuqui tēshnanenquio yacpadec aidobēd tēshnanenquio iquendabi. “Chieshēnanenquio yec tantiananquiec ma bēdamboec tabadnu,” quec aidobēd tēshnanenquio iquendabi, Papa. Adec ēbi tantiaquido bēdamboec tantianansho isun matsēsēn naden tantiatsiash. “Ambi chiacpadquid Nuquin Papan chomenēdaid icquin Esusēn abi tantiaquido aden bēdamboen tabadmec. Ambi chomenēdaid aton Mado tantiaquiacpadomboen Nuquin Papan aid tantiaquido tantiaquiec,” quequin matsēsēn tantiatsiash, Papa. ²⁴ Mimbi ēbi tantiaquido icmiaido nuqui

tabadacnombo tabadmeta. “Nuqui matses uabi icquin mimbi: ‘Ëmbi tantiaidquo mibi neque. Nuquibi nanuna, Mado,’ cac nuqui bédamboshê yec tabadtenecpadequi nuqui tabadsho ma ëbi tantiaquidon isnu,” queshun mibi: “Nuqui yacno tabadmeta, Papa,” caimbi. ²⁵ Icsaisambo mibi icsho icsambo icquidon mibi tantiatiapimbo icnubimbi mibi tantiaquiec. Mibi yacnuësh choquid icshobini ëbêd icquidon: “Ai, Nuquin Papa yacnuësh choquidien nec,” quequin tantiaposh, Papa. ²⁶ Aden tantiamenuen yuec ëbêd icquidobêd tabadquin mimbi naid chuibanombi. Ëbi nidan ëmbi chomiaidên con Mayanên adembidi ëbêd icquido tantiamendac. “Mimbi ëbi tantiaquiapadomboen ma nuqui daëdi tantiaquish ma tantiananquiono,” queshun con Mayan aidobêd tabadmendambi. Adoac ëbêd icacimboec con Mayan tantiadendac, Papa –quepondash Esus Nuquin Papa chiec.

18

Esus bedmiaid

(*Mat 26.47-56; Mad 14.43-50; Duc 22.47-53*)

¹ Aden Nuquin Papa yuen chianec Esus nidpondash. Ëbi chedobêd nidquin acte Sededon caid potiash tiedno cuête odibos caid nitsinacno ëbitedi chiec tabadtenebocnombo chopondash. ² Ambo tabadnubien Udas: –Ëbi abêd tabadtenebocno tiednoen nidchitash –quianec Esus bedmenuc ³ chopondash. Aden chieshêmênquido chuiquid dapabo chuitanshun matses dadpen bêpondash nëidtedi. Nêidic con matses chuiquid dapabobêd tan padiseyobon namiaido sondado chedo. Nêidic con matses yuaquido Doma yacnocquido sondado dadpen. Nêidic aid sondado chuiquid. Aidtedi Udasên bêpondash. Tabotebêdta cueste sanambededtsêcquiec cho-chopondash. Utsibombic chêshte.

⁴ Adec cho-chosho isash bêquedbanec nidquin: –Ëbi unês uamec –quequin tantiaquin Esusên: –¿Atotsi quec ne? ¿Tsutsi nibêne? –cac ⁵ –Nasaded yacnuësh caniquid Esus bednuec nebi –quepondash sondado chuiquid. Adshun isac aibêd Esus bedmequid Udas icpondash.

⁶ Adshobien Esusên: –Nê iquebi –capondash. Nuquin Papapadquidquibobi icquin adoac dacuêdec: –Auchidi cuenu –quec uebudcuededpondash bednuequidotedi. ⁷ Adshobien padpiden Esusên: –¿Tsutsi nibêne? –cac: –Nasaded yacnuësh caniquid Esus bednuec nebi –queoasho tantiaishun: ⁸ –“Nê iquebi,” caombi. Ëbiuidtsêqui bedta. Ëbêd icquido bedenda –capondash Esusên. ⁹ –“Mimbi ëbi tantiaquid icmiaido Safanas chieshtomiambo iccombi, Papa,” quequin ëmbi Nuquin Papa chuibocpadomboen nêido chieshtometiapimbo iquebi –quequin tantiec: –Nêid bedenda –quepondash Esus.

¹⁰ Adnubien Petedon abi tsidiadaid chêshte chictanquin chuiquid dapan yua abiucquo pateshunepondash. Aid yua Madco niondash. ¹¹ Adosho isashien Esus: –Padi. Chên. Min chêshte naued. Nuquin Papan chiacpadeq paëmbo icnuc unêsendabi –quepondash Esus.

Anasên shubuno Esus buanaid

(*Mat 26.57-58; Mad 14.53-54; Duc 22.54*)

¹² Adshobien sondado chedon Esus bedpondash. Aden bedshun: –Cuidmenun chuiquid dapa yacno mibi buanu –catanquin catanepondash. ¹³⁻¹⁴ Aden cataneshun buanquin con matses chuiquid dapambo Caipas caidên cucun shubunoba buanondash. Aid setambi chuiquid dapambo Caipas iccondash. Esus chieshênec: –Nuquin matstededi unês uamenquo icnuen Esuseded unês uamenuna –queboed Caipas niondash. Aton cucu

chuiquid dapabidi niondash. Aidi Anas niondash. Anasën shubunoba Esus buampondash. Ashunquo Caipas ismenuen buampondash.

Petedon: Ĕmbi isacmaid Esus nec, quequin chiaid
(Mat 26.69-70; Mad 14.66-68; Duc 22.55-57)

¹⁵ Esus buansho isun Petedobēdtan chinunondambi. Chinuntuidash nidēqui Caipasën shubuno choash daquēnē uaidēn puduednuesho tantiashun shēcuē isquid chidon puduedmiondashi. Ambi isondaic icsho aden puduedmiondashi. ¹⁶ Ĕbi puduedmequin Petedo ambi isacmaid icsho puduedmenquo icpondash. Adsho istanquin: —Ĕbēd icquid neque. Shēcneshun. Ma puduednu —capondambi. ¹⁷ Adoac puduedmeshun shēcuē isquid chidon: —ĔNē bedboed Esusbēd icquidta mibi ne? —capondash Petedo chuiquin. Adoquien Petedo dacuēdec: —Padenquo —quepondash muequi. ¹⁸ Adnubien iqendoshon daquēnē uacnoshon cuēte dētsiadoshon sondado chedobēd anocquido yuabo cuēte cuēc tabadpondash. Adsho isashien Petedotsen cuēte cuēnuec nidpondash Ĕbi shubunquo puduednuc.

Caipasën Esus chuimiai
(Mat 26.59-66; Mad 14.55-64; Duc 22.66-71)

¹⁹ Adec Ĕbi puduednubien Caipasën Esus chuimepondash. —Mibēd icquid ĩtedtsi iquec? ĩĔbēd icquido dēniaquecta icpec? Mibēd icquido ĩmitsipaden chuibano? —capondash. ²⁰ Adoquien Esusën chuipondash. —ĩOmpoquindambi chuibandio? Nuquin Papa tabadte shubu uashunaid daquēnē uaidēn puduedshun mambi chuibandeneboc. Nuquin Papan chiaid chuibantē shubun-shubunquieci puduedcuenequin mambi chuibeneboc. Ompoquin chiambo iccombī. ²¹ Mimbi: “Icsamboen naosh,” caid Ĕbiuidtsēqui chuimenda. Ĕbēd icboedotsen chuime. Ĕmbi chiaid abitedi tantiashun aidombi mibi chuitsiashe. Aidotsen chuime —quepondash Esus. ²² Adsho tantiashun: —ĩChuiquid dapada adopaid? —quetanquin sondado chuiquidēn mēdanten bēcuespondash Esus. ²³ Adoquien: —ĩIcsamboendambi chuidio? ĩAtotsimbi icsa uaoque? En chui. Mambi abimbo chuiboc. ĩAbimbo chuiquidta cuespaid? —quepondash Esus. ²⁴ Adondash Esus Anasën abi cataniacchobi Caipasën shubuno bēc.

Petedon: Ĕmbi isacmaid Esus nec, quequin chuioaid
(Mat 26.71-75; Mad 14.69-72; Duc 22.58-62)

²⁵ Adnubien Petedo abi cuēte cuēc tsadsho abēdtan cuēte cuēc tabadquidon: —Esusbēd icquidien mibi nechitec —capondash. Adoquien Petedo: —Padenquo. Mabi aidbēd icambo yoc —quepac caondash. ²⁶ Adshobien chuiquid dapan yua utsin Petedon pateshuneboedēn matsesën: —Esus bedacnobimbi mibi ischitoc —caquien ²⁷ padpidec: —Padenquo. Mabi ano nidambo yoc. Ĕmbi isacmaidquo ma Esus neyoc —quenubien Esusën chuibodquo cachina bēnē cuēdampac caondash.

Pidato caidēn shubuno Esus buanai
(Mat 27.1-2; Mad 15.1-5; Duc 23.1-5)

²⁸ Adnubien Caipas aton chuiquid utsibobēd: —Nuquin matses yuaquido ancaquid Pidato caid ismenuembien Esus buantiad. Aid Esus unēs uamenuembien natiad —quecuededpondash. Badiadnubi Pidaton shubuno Esus buampondash. Buanashic: —Matses utsin shubun puduedshun mishtemaid mishash Nuquin Papan matamiampid inchēs tantiec con matsesbēd pec tabadtiapimbo icchitomane —quiash Pidaton shubun puduedenquo icpondash. ²⁹ Adnubien Pidaton aton shubunuēs puduentanquin

Esus bëquido chuipondash. —¿Atotsi quequin nëid bëo? ¿Icsamboen naquidta nepec? —caquien ³⁰ —¿Bëdambo icquidtambi mibi ismenuen bëdio? Con matses chuiquid dapa ictiadquio icquin icsamboen naoshe. Cuidquiota —quepondash chieshëmënquido. ³¹ Adoaquien Pidaton: —Mimbi cuidta. Min matsesën: “Icsamboshë icquid naden cuidquid yendac,” cacpadomboen nata —caquien: —Padi. Èmbi cuidquin unës uacsho isash min matses chieshtonoshe. Min matsesën: “Con matsesënuidtsëqui unës uaquin cuidaquien bëdambo ictsiash,” queshun ëbitedi chieshënushe —quepondash Esus chieshënquido Pidatombo Esus unës uametiadquio yec. ³² Ènden abi chieshënquidon bedabi icnuc: —Èbi cuesten dectanquin unës uaindac —quequin Èsüsën chiacpadomboen namenuc adpondash.

³³ Adnubien aton shubun puduetanquin Pidaton Esus chuimeoapondash. —Cho. Chuinu. ¿Min matses isadaidbo chuiquid dapada ne? —caquien ³⁴ Esusën: —¿Mitsipadquid chuiquid cai? ¿Utsibon tantiacpadquidta cai? ¿Mibipadquidta cai? —capondash. ³⁵ Adoaquien Pidaton: —¿Isadaidbodabi nedi? Padenquio. Èmbi tantiacpadquid caimbi. ¿Atotsieshun min matses chuiquid dapabon mibi bëosh? ¿Atotsi icsa uasho naosh? —caquien ³⁶ Esusën Pidaton bëyuc chuiboed tantiaquin: —Mibipadquid chuiquid dapapenquio nebi. Nidaidën con yua sondado nibëdec. Nidaidënuësh mibipadquid icquin con yuabo ëbi bedquido cuesun siametsenombi. Aden ëbi bedenquio ictsenosh. Mibipadquidpenquio nebi. Abucshun chuiquid dapambo nebi —quepondash Èsus.

³⁷ Adsho tantiashun Pidaton: —Chuiquid dapambo nebi ¿quecta ique? —caquien: —Ai, adquid nebi. Chuiquid dapambo icnuc matespondabi. Chuiquid icquin matses uaquid tantiamenuen abimbo chuibanombi. Adoac abimbo chuisho tantiate bunquidon ëbi tantiatsiandac —quepondash Esus.

³⁸ Adsho tantiash Pidato: —¿Tsuntsin matses uaquid quequin abimbo chuipatsiash? —quetanec puduëshun Esus chieshënquido chuioapondash. —¿Icsambo icquidta Esus nedic? Ma icsapenquio icquid necoc. ³⁹ Nëid cuidtiapimbo icquin chuinu. Nuquin Papan matamiampid inchësh tantiate ushën min matses quënën nauedaid abentsëc cuemedeniøndambi. Adem-bidi abentsëc cuemëmbi. ¿Mitsicquidimbi cueme? ¿Nëid mibi chuiquid dapa Esustambi cuemepe? —caquien: ⁴⁰ —Padenquio. Esus nainda. Utsibi cuemeta. Badabas caid cuemeta —quecuededpondash. Badabas caid Doma yacnocquido cuesun siaquin cuemete bunquidquio icnuc adcuededpondash Esus chieshënquido Esus unës uamete bunquiec.

19

Esus cueshcaid (*Mat 27.27-31; Mad 15.16-20*)

¹ —Badabasquio cuemeta —quesho tantiatanquin Pidaton: —Në Esus cueshcanuen buan —capondash. Adoaquien buanshun sondadon canite cuëshë dëdectanquin nacenaid cueshcanten Esus companen cueshcapac caondash. ² Cueshcatanquin pinchuc-pinchucpambo icquid mauete nacenaid Esus mauemepac caondash. Adotanquimbic chuiquid dapan dashcubimboecquid umucquid dasiuintanquin: ³ —Adec dasiuidquid chuiquid dapambo nec —quequin sondadon Esus mamëshunpam caondash. Aden mamëshunquimbic: —Isadaidbo matses chuiquid dapambo Esus neque. Is —quetanquin mëdanten bëcuesbanepac caondash. Adotanquin Pidato yacno-bidi buanoapac caondash.

*Esus unës ua, quiaid**(Mat 27.15-26; Mad 15.6-15; Duc 23.13-25)*

⁴ Buanoacsho istanequien Pidato padpidec puduenoash Esus bëquido chieic: —Mimbi bëboed Esus icsapenquio iquec. Icsambo icquid icsho: “Unës uata,” catsiambi badedi. Icsapenquio icquid icsho adotiapimbo iquebi. Padi. Cueshcaquin cuidombique —quepondash Pidato. Adnubien ⁵ Esus puduempondash. Pinchuc-pinchucpambo icquid mauemetanquin dashcute umucquid dasiui nac dasiuidpamboec puduenshobien Pidaton: —Is. Mimbi bëboed choeque —cac ⁶ chosho istanequien: —Cuesten dectanquin unës uata. Cuesten dectanquin unës uata —quecuededpondash Esus chieshënquido comapenec cuèdec. Adoquien Pidaton: —Mimbi cuesten dectanquin unës uatan. Èmbimbo adotiapimbo iquebi. Icsapenquio icquid icsho Esus unës uatiapimbo iquebi —capondash Pidaton.

⁷ Adoquien Esus chieshënquidon: —Con matsesën: “Nuquin Papa muauaquid unës uaquid yendac,” cacpadomboen natiadquio iquebi. Esusën: “Nuquin Papan Madombo nebi,” quequin Nuquin Papa muauaoshe. Unës uaquimbien ictiad —quepondash. ⁸ —“Nuquin Papan Madombo nebi,” quiosh —quesho tantiashien Pidato dacuèdquieac yampac caondash. ⁹ Adash aton shubun Esusbëdi puduedoashun Pidaton Esus chuiuoapondash. —¿Tsumsimbo ne? ¿Mitsiuèshquio chonda? —caqui Esusën ècbedenquio icpondash.

¹⁰ Aden ècbedenquio yac nëishashien Pidato: —¿Chuitiapimboda ique? ¿Tantienquioda ique? Èmbi: “Cueme,” cac mibi cuemetsiash. Èmbi: “Cuesten dectanquin unës ua,” cac mibi adotsiashe. En chui —caquien Esus: ¹¹ —¿Mibembida chuiquid yano? Nuquin Papan chuiquid icmiac mibi nec. Nuquin Papan chuiquid icmiabi adquid ictiapimbo mibi ictsiac. Chuiquidpenquio icquin mimbi èbi cuesten dectanquin unës uametiapimbo ictsiac. Èbi cuesten dectanquin unës uamenuac mibi icsambo icnuc èbi bëboedo chuiquid dapabo icsamboshë iquec —quepondash Esus.

¹² Adsho tantiashien Pidato: —Esus unës uatiapimbo icchitebi. Cuemetiadquio iquebi —quetanquin padpiden Esus chieshënquido chuitanoapondash. —Esus cuemenu —caquien: —Icsambo iquec. Min matses abitedimbo chuiquid dapambo Sesad caid: “Èbentsèqui chuiquid dapambo nebi,” quiac caosh. Aid dëniaguec Esus chuiquid dapa icte bunquieac. Esus cuemequin mibi chuiquid dapambo mimbi nëishmeque. Esus cuesten dectanquin unës ua —quecuededpondash. ¹³ Adsho tantiashun Esus puduemeoataneac cuènote nacnenaid abuc tsadunaidèn cuidte chuinuac tsadten tsadtopondash Pidato. Aid cuènote nacnenaid con onqueten Cabata capondash. ¹⁴ Nuquin Papan matamiampid inchësh tantiate ushë badiadash icnuc niondash. Aid tsadten tsadtoshon Pidaton: —Në mibi chuiquid dapa iquec —capondash iccuededquido chuiquin. ¹⁵ Adoquien: —Cuesten dectanquin unës ua. Nëbimbobi buanshun cuesten dectanquin unës ua —quecuededpondash Esus chieshënquido. Adoquien: —¿Mibi chuiquid dapadambi cuesten dectanquin unës uape? —Pidaton caquien Esus chieshënquido: —Mibi chuiquid dapambo Sesad caid aiduidtsèqui chuiquid dapa caimbique. Esus cuesten dectanquin unës ua —quecuededpondash Esus chieshënquido. —Nuquin Papa yacnuèsh choshon nuqui yuaquido cuemepashun —queboedobi adondash abi yuaquidi chiequi.

¹⁶ Adoquien Esus chieshënquidon chiapadomboen: —Esus cuesten dectanquin unës uatan —capondash Pidaton aton sondado chuiquin.

*Cuesten dectanquin Esus unës uaid**(Mat 27.32-56; Mad 15.21-41; Duc 23.26-49)*

¹⁷ Adoac buanquin: —Nëidën dectanu —qeshun sondadon cuate daëd napotiaid Esus chiadtomebidampondash. Abi dectantebi Esus chiadtomebidanec nidquimbi macuësh mapi canite caid yacno buampondash. Aid macuësh mapi canite cain con onqueten Cocata capondash. ¹⁸ Ambo nidshun aton dashcute dachictanquin bëchun shuin mëtoccaquinc tatoccaquinc catanquin cuate daëd napotiaid ambi bëboedëmbi Esus dectampondash. Icsambo icquid daëdpambo cuesten dectanaid uquë diadbudcueneç diadnuç Esusquo nënantanquio dectampondash.

¹⁹⁻²⁰ Adnubien Pidaton: —Nasadë yacnuësh caniquid yec Esus isadaidbo chuiquid dapa nec —quequin cuate pada uaidën dada uapac caondash. Aton matses Doma yacnocquidon onqueten dada uaquinc con onqueten dada uaquinc matses utsi Quidieco matsesën onqueten dada uaquinc catanquin Esus dectanaid cuesten dectampac caondash. —Ëmbi dada uaboed isash: “Isadaidbo chuiquid dapa icsho Esus cuidac,” ma abitedi quenu —qeshun Pidaton adopac caondash. Aden dada uashun dectanaid isashien Esus chieshënquido nëishquiopac caondash. —Shubu dadpen icquid Edusaden caid anoentsëqui Esus dectanaid icnuç matses utsin onqueten-onquetenquien dada uaid matses dadpeshun isnushe —quias ²¹ Pidato chieç nidpac caondash. —Icsamboen chuiquin ma mimbì dada uapacboç. ¿Con matses chuiquid dapada Esus nedic? Adquidpenquio nec. Utsi uain dada uata. “‘Isadaidbo matses chuiquid dapa nebi,’ quequid Esus nec,” quequin cuate cuëshë utsin dada uata —caquien ²² —Padi. Mambi ëmbi tantiaobedquio dada uaboc. Utsi uain dada uaoatiapimbo iquebi —quepac caondash Pidato.

²³ Adnubien Esus dectanquido sondado daëd-daëdquieç icpondash. Esusën dashcute 5ted icsho sondadon bedbanquin abentse-abentsen bedbededpondash abentsëc abi icnuç. Aid abuçshun bedanquin abichobi daëdcaid tuscabi icquid niøndash. ²⁴ Adquid icsho isun: —Canchenquio icquin çtsundanquio bedeqe? Isnuna —qeshun abi cuëmëdquidtedi dada uabanshun tëchun sandoshon cadotanequin dada uaidëmpi abia puduemiaid isun aid dashcute bedondash. Aidon nate Nuquin Papan tantiamiac con tsusedpan naden dada uapampic. “‘Abentse-abentsen con dashcute bedosh. Con dashcute utsi bednu, quequin dada uaidëmpi abia puduemiaid isnuen naosh,’ quependac,” quequin dada uapampic.

²⁵ Adnubien Esus dectanaid cuate tayun nëidtedi icpondash. Nëidic Esusën tita. Nëidic Esusën tita utsi. Nëidic Madia Codopasën chido. Nëidic Madia utsi Mactada yacnuësh choquid. Aidtedi chido icpondash. ²⁶ Në chido tabadnuç ambobi uquëtsëc tabadondabi. Adec ambi tantiaidquio ëbi icsho isun Esusën aniba chuipondash. —Nëid con mado cata, tita. Ma mibi bëdamboen dayun uanu —capondash Esusën. ²⁷ Adshumbic ëbitsen chuiquin: —Con ta tita cata. Adshun bëdamboen ëbi dayun uashunta —cac con shubunobi buanondambi bëdamboen Esus dayun uashunuen.

²⁸ Adboshien unësquionoshi Esus: —Con Pan chiacpadomboen nainembi. Matses tantieç ëbided cuidadec unësebi —quequin tantieç con tsusedpan dada uaquin chuiampicpadec: —Acte bundobi —quepondash Esus. ²⁹ Adsho tantiaishun matsun actë mucambo icquid anidquid shapu-shapupactsëcquidën punshun cuate dëdectanshun abuç sananquin ëccuëscadonetsëcquin chishmepondash. ³⁰ Adoac acte mucambo icquid chishtanequien: —Con Pan chiacpadomboen nainquiombi —quepondash. Adtanequi tëdquëdbudpondash Esus unësequi.

³¹ Adnubien Esus chieshënquido: —Badiadash Nuquin Papan matamiampid inchësh tantiante ushë iguec. Chonoadenquio icte ushë nec. Aidën cueten dectanquin unës uaid chococac icsambo ictsiashe. Nëbimbobi chococamenu —qeshun Pidato chuitampac caondash. —Baded nidte podquënquin unës uame. Inchësheque —cac ³² Pidaton aden chiac sondadon nidte podquëntanondash. Esusbëdta dectanaid ëquë diadquidba nidte podquënshumbic utsiuc diadquidtsen. ³³ Adotanquin isquien Esus ënden unësac. Adshobien nidte podquënenquio icpondash.

³⁴ Adotanquimbic: —Unësabi icnushe —qeshun: —Unës uaquiobono —quetanquin sondadon cudan podo ansequin Esus uinte masepondash. Adoac nua intac chididiquiondash actebëdi. ³⁵ —Adosho ëmbimbo isondambi —caimbi. —Ëmbi dada uaid isun ma Esus tantianu —qeshun abimbo chuiquin dada uaombi nëid dada uaqin. ³⁶ Nuquin Papan tantiamiac con tsusedpan: “Canite podquënenquio iquendac,” quequin dada uapampic-padomboen canite podquënenquio icpondash Esus. ³⁷ Adembidi podo ansete dada uapampic. “Ambi podo anseboed isec tabadendac,” quequin dada uapampic.

Esus unësacsho chococaid
(*Mat 27.57-61; Mad 15.42-47; Duc 23.50-56*)

³⁸ Adnubien shubu dadpen icquid Adimateya yacnocquid Ose chopondash. Esus tantiaquid aid niondash. Esus chieshënquido dacuëdëenquin: —Esus tantiaquid nebi —quequin utsibo chienquio icboedëmbi Pidato chuitampac caondash. —Esus chococanun buanendambi —cac: —Ai —cac Esus buampondash. ³⁹ Aidbëdi Nicodemo inchëshën Esusbëd onquiondaid nidpac caondash. Bëdambo nuadquid mida adoebëdta cabiunaid unësaid dabiunte bëac caondash. Nuamboshë. Yuëmbo icnuc ³⁵ quidostembi icnuc bëac caondash. ⁴⁰ Adshumbien Osebëdtambi Esus nua dabiunquin uesquin dataniac caondash dashcuten. Adshumbic padpiden dabiunoaquin. Adshumbic padpiden dataneoquin. Adshumbic padpiden dabiunoaquin. Adshumbic dataneoquin. Chococanun con matsesën adoquid. ⁴¹⁻⁴² Adashic: —Badiadash Nuquin Papan matamiampid inchësh tantiante ushën unësaid chococac icsambo ictsiashe. Badedquio chococanu —qeshun tied nèbi ictsëcquidën Esus buampac caondash. Buanshumbic cuënote dapa shëcuë uaid chucan matses chococabi icquidën Esus nauedpac caondash. Shëcuën nauedtanquin bëtimpac caondash cuënote dapambidi.

20

Esus uincuenaid
(*Mat 28.1-10; Mad 16.1-8; Duc 24.1-12*)

¹ Esus chococan daëdec ushash badiadnuc dominco caid ushën ënden inchëshquio icnobi Mactada yacnocquid Madia chedo Esus chococacnuësh sedenquec nidpac caondash. Nidshun isquien shëcuë bëtinaid cuënote dapa bëcunepamboen shëcniac. ² Cuënote dapa bëcunepamboen shëcniacsho istanec titinguianec choquin chuituidpondashi. —Esus padoen buanchitacosh. ¿Mitsimbo buampash? —quepondash Madia Petedobëdta ëbi chuituidec.

³ Adoaquini: —Istanu —quianec ⁴ titinguianec chococano Petedobëdi nidpondac. Petedo nianec ëbia nidpondabi. ⁵ Adshumbimbi puduedenquio icquin shëcuë anshuebudshun anispondac. Adshun isquien dashcute dataniaiduidtsëqui uec. ⁶ Aden ëmbi anisnubien Petedo choequi badëdi shëcuën puduedpondash. Aidëntsen dashcute dataniaiduidtsëqui istuidondash. Esus nibëdondash. ⁷ Në dataniaid uenubi udictsëc dashcutempi

bëpucaid bédamboen shëbunaid uiondash. ⁸ Aid puduedsho istanec tsyuec puduedshun ëmbitsen isondambi. Adash: —Uíncuenac. Nuquin Papan Madombobi nec —quepondabi Petedobëdtsëqui onquec. ⁹ —Nuquin Papan tantiamiac con tsusedpabon aden Esus uincuenta chuiquin dada uapampic —quequin tantiquio icboedi adondabi. ¹⁰ Aden istanec ëbi ushboconbidi chiec choapondabi.

Esusèn Madia Mactada yacnocquid ismiaid
(*Mad 16.9-11*)

¹¹ Adnubien ëbi chuiamboed Madia chococacnobidi isec nidoapac caondash. Nidash shëcuë cuëmano tsadec sedenquetuidpac caondash. Adec shëcuë cuëmano tsadec sedenquetanec shëcuë anshuebudshun isaquien ¹² Nuquin Papan abi yacnoshon uaido mayan bëda daëd ushumbo icquid dasiuidquid Esus yebocno tabadpec. Esus nibëdec. Mapi icbocno abentsëc tsadnuc utsi taë icbocno tsadpac caondash. ¹³ Adshumbic aidën: —¿Atotsi quiaish sedenque, champi? —caquien: —Con Icho pado ¿midambo buanac? Istiadquio iquebi. ¿Mitsimbo buampashba? Unësquio iquec —quetanec ¹⁴ auchbidi nidnuec bidiadshun isaquien Esusquio icpec. Utsi dansho ¹⁵ Esusënsen: —¿Atotsi quiaish sedenque, champi? ¿Tsutsi nibëne? —caquien Madian tied neshcaquid danquin: —¿Con Icho padoda buano? ¿Mitsimbo buano? Èbi isme. Shëcuë utsin chococanun buanu —capac caondash Madian Esusquio bi chuiquimbi.

¹⁶ Abi adoshobien Esusën: —Èbi nebi, Madia —cac bëisquotanequien: —Esus nec. Èbi chuiquidquio nec —quetanquin con onqueten cuënquin: —Dabi —capac caondash. Adotanquimbien Esus dayumbudpac caondash unësquio icsho. ¹⁷ Aden abi dayumbudshobien Esusën: —Èbi dayunenda. Padpidec nidenquio icte danquin ëbi dayunenda. Èmbi chuibocpadecon Pa yacno nidabi yuec-yuecpactsec tabadtanec nidebique. Èbëd icboedo ëmbi con utsibo caboedo ëmbi chuibodquio chuitan. “‘Nuquin Papa yacno nidendabi,’ quiosh,” catan —quepac caondash Esus. ¹⁸ Adoquien ëbi chiec Madia chopondash. —Nuquin Icho Esus isombi. Uincuenaccosh. Ambi chuibod chuinu. Tantia —quequin Esusën abi chiaidquio chuituidpondashi Madian Mactada yacnocquidën.

Uincuenshun Esusën abëd icquido ismiaid
(*Mat 28.16-20; Mad 16.14-18; Duc 24.36-49*)

¹⁹ Madian aden chuituidboed inchëshbudtsëqui shubun tabadpondabi Esusbëd icboedobëdi. Esus chieshënkuido dacuëdënquin amanucüesh utsi puduedtiapimbo icnuc bédamboen bëtashash tabadnubien shëcuënuësh puduedenquio icboedi nuntanquio bi Esus isadcuempondash. Adtanequien: —Dacuëdenda —quepondash. ²⁰ Adtanquin abi bëchun shuin mëtoçcaid abi podo ansiäidbëdta ismiaquini cuishonquiampondac: —Nuquin Icho uincuenac —quiaish. ²¹ Adec cuishonquesho isashien ambi chuibocpadecbidi: —Dacuëdenda —quetanec: —Tantia. Mibi chuinu. Con Pan: “Matses chiec nid,” ëbi caondacpadomboembidi: “Èbi chuibeneta,” mibi caimbi —quepondash Esus. ²² Adtanquin ëbi chedo dabushcabampondash. Dabushcabanashic: —Nuquin Papan Mayan mibëd tabadendac. ²³ Mibëd icquin Nuquin Papan tantiaidquio tantiaimequin Nuquin Papan Mayanë mibi utsibo chuibamendac. Adoac mimbi aden chuibanaido caic: “Nuquin Papan chiaid niaquec icsambo icboedi Esus tantiaquid yansho Nuquin Papan nëid bédamboen isec,” quequin mimbi chiacpadomboen Nuquin Papan bédamboen istiasish. Utsien: “Nuquin Papan

chiaid niaquec icsauidequi icsho nëid Nuquin Papan bēdamboen istiapimbo iquec,” quequin mimbi chiacpadomboembidi Nuquin Papan bēdamboen istiapimbo ictsiash —quepondash Esus ēbi chedo chiec. Adtanequi isadenquo yanoaondash.

Esusēn Tomas ismiaid

²⁴ Adec Esus isadenquo yanoanubien Esusbēd icboed utsi Tomas abi ushēmbi anin daēd tishaid chopondash. ²⁵ Choshobi: —Esus isombi —cac: —*¿Aidquiobida nepash? Utsien nechitash. Bēchun shuin mētoccaid shēcuē isun aid shēcuē mēdanten bēmishquinc подо ansiaid bēmishquinc caquioshombimbi: “Ai, nuquin Icbo uincuenac,” quequin tantiatsiac. Padambobi: “Con Icbobien niash,” quetiapimbo iquebi —quepondash Tomas. ²⁶ Tomas adbon 7tedec ushash shubu nuntambidi tabadoapondabi. Tomas chedobēdi tabadondabi. Puduedtiapimbo icnuc padpiden bētashoash tabadnubien shēcuē shēcniabi Esus isadcuenoapondash. Adashic: —Dacuēdenda —queoapondash. ²⁷ Adtanequen: —Is con mēdante, Tomas. Shēcuē bēmishec cho. Nē подо ansiaid iqueque. Aidtsen bēmishec cho. Adshun: “Uincuenabien icchitash,” queboedēmbi: “Uincuenaccosh,” quequin tantiata —caquien ²⁸ mishenquo yec badedi: —Tso. Con Icbombo ma mibi neyoc. Nuquin Papapadquidquobidi ma mibi neyoc —quepondash Tomas. ²⁹ Adsho tantiashien Esus: —Ēbi isun: “Nuquin Papapadquidquobidi mibi nec,” quequin mimbi ēbi tantiec. Utsibombien ēbi isabi: “Ai, Esus Nuquin Papapadquidquobidien nec,” quequin ēbi tantiasho Nuquin Papan bēdambo icmendac —quepondash Esus Tomas chiec. Adtanec isadenquo yanoaopondash.*

³⁰ Comapenen tantiaquidquo yec abembi uincuenash Esus adpondash. Ēnden unēsabi icquin adembidi comapenen tantiaquin nabampondash. Aden ambi comapenen tantiaquin nabanaidtedi uesquin chiambo iccombi. ³¹ Padi, aidtedi chiombi. —“Nuquin Papan chomiaidquo yec Nuquin Papan Madombobien Esus nec,” quequin aid tantiash ma Nuquin Papa yacno abēd tabadtequido icpanu —quequin aidtedi dada uaombi.

21

Chian cuēmanuēsh Esus isadoaid

¹ Tantia. —Edusaden yacnuēsh isadboshic chian Tibedias caid cuēmanuēshsien Esus isadpondash —quequin mibi chuinu. ² Esus uincuenash daēdec isadan con nidaid Cadidia caid yacno nidanepondabi. Nidaniash nēidtedi tabadpondabi. Nēidic Petedo. Nēidic Tomas anin abi ushēmbi daēd tishaid ēmbi caboed. Nēidic Cana yacnoquid Natanaid. Nēidic ēbēdta tishaidquo. Nēidic ēbi. Nēidic Esusbēd icboed utsi daēd. Aidtedi icpondabi. ³ Adnubien Petedo: —Ēmbi bedtenecpaden nēshaidēn nuēcquid bedtanu —quepondash. Adshobimbi: —Nid. Nuquitedi nanu —capondac. Adash chian yacno nidash cano antabēdtoanec nēnantan nidpondabi. Adshun nēshaid dapa nēneshun yuecshun cadoshon isac nibēdec. Adshumbic padpiden nēneoashun cadoshon isac nibēdoaic. Inchēshbudtsēc tauash nuēcquid bedambobi ambi badiadpondabi.

⁴ Badiadquionobi acte cuēman masi dapan Esus nidsho istuidpondambi. Utsiembi dampondac. ⁵ Adshobini Esusēn cuēmpondash. —Con utsibo *z*tedtsi bedo? —cac: —Padambo. Nibēdosh —capondambi. ⁶ Adsho tantiashun: —Mimbi nēniauc nēnenquo icquin cano utsiuc nēshaid nēne. Adoac nuēcquid bedadec —cac ambi chiauc nēshaid nēnetanquin: —Indono —cac nēshaid indotiapimbo yuēmboshē icpondash. Nuēcquid dadpen bedac.

⁷ Adsho isumbimbi: —Ma Esus neyoc, Petedo. Nuquin Icho nec —capondac. Adoquien aton tsitsumi icquiduidtsĕqui icnuc abi dachiquidboed aton dashcute utsi dasiuidtanec acte nĕpudunash Petedo tan-tanidec nidpondash Esus isnuec. ⁸ Ēbien utsibobĕd canombi tsyuec nidondac nĕshaid shoyombanec. Cuĕma anoentsĕqui nuĕcquid bedash 100 metedos cactionsĕc nidondabi. ⁹ Tsyuec choash pudundoshon isquien pambĕdi nuĕcquid cuĕten shĕadtsec. ¹⁰ Adnubien Esusĕn: —Mimbi bedboed daĕdpactsĕc beccho. Penu —cac ¹¹ Petedo: —Ai, bedtanu —quianec nidash cano anidtosyon nĕshaid cubu-cubuctsĕcquio icquid indopondash. Acte cuĕmano tsindoshon isac dadpenquioshĕ 153tedi nuĕcquid icpondash. Nua-nuaic tsadquido icpondash. Nĕshaid tĕsĕdtiadtsĕcquio icnuc indondambi.

¹²⁻¹³ Adshumbic ambi: —Pec cho —cac cho-choash tabadsho pamba menebantanguin nuĕcquidtsen Esusĕn menebampondashi. Adoac: —ĵTsutsi ne? —quenquo icquin: —Esus nec. Comapenen tantiaquin nuĕcquid nuqui bedmiosh —quequin tantiondambi ĕbitedishun. ¹⁴ Adec uincuenash shubu nuntan tabadnuc daĕdec isadondashic chian cuĕmanuĕshsen isadoapondash Esus.

Esusĕn Petedo chiaid

¹⁵ Aden chian dapa cuĕmanshun Esusbĕdtan piondambi. Adshumbic Onas caidĕn mado Petedo Esusĕn chuipondash. —Tantia. Mibi chuinu, Petedo. Nĕidon ĕbi bĕdiactsĕc tantianuc ĵada ĕbi tantiaquie? —caquien: —Ai, mibi tantiambi. Aden ĕmbi tantiaid mimbi tantiec —quepondash Petedo. Adsho tantiaquie: —Ēbi tantiaquin con obecabimboecquido ĕbi dayun uashunta —quepondash Esus. —Obeca icbon aton yua dayun uacbimboen ĕbi tantiaquido ĕbi dayun uashunquin ĕmbi chiaidbĕdta ĕmbi naidtedi chuibanta —quequin tantiec adpondash. ¹⁶ Adshumbic padpiden: —ĵAda ĕbi tantiaquie, Petedo? —cac: —Ai, mambi mibi tantieyoc —quesho tantiaquie padpidec: —Ēbi tantiaquin con obecabimboecquido ĕbi dayun uashunta —queoapondash Esus. ¹⁷ Aden daĕden chuishumbic padpiden Esusĕn: —ĵAda ĕbi tantiaquie, Petedo? —cac shubiantiadtsĕcquio yanondash Petedo. —Unĕs uabi icnuc: “Ēbi isacmaid Esus nec,” quequin ĕmbi chuiboctedembidi Esusĕn chiebi —quiaish shubiantiadtsĕcquio yanondash. Adashic: —Mibi con Icho nec. Ma mimbi abitedimbo tantieyoc. “Petedon ĕbi tantiaquie,” quequin ma mimbi tantieyoc —quepondash Petedo. Adsho tantiaquie Esus padpidec: —Ēbi tantiaquin con obecabimboecquido ĕbi dayun uashunta —queoapondash Esus.

¹⁸ Adashic Petedobidi chiuoic: —Tantia. Utsien chuinu. Cania yec mibibi tsisiuidondac. Adanec mibi bunacno mibi nidtedniondac. Tsusiobudsacschoen tsiumeshun utsibon ĕquĕ mĕdimbudcuentsĕcshun mibi nidte bunacmanombo mibi buanendac —quepondash Esus. ¹⁹ —Aden mimbisen Nuquin Papan chiacpadomboenuidi nabansho ĕbi chieshĕnquidon mibi unĕs uaindac —quequin tantiec adpondash Esus. Adashic: —Ēnenquo icquin ĕbi tantiaquie —quetanguimbic: —Cho. Nidnu —cac ĕbitedi puduanec nidondabi.

²⁰ Tsyuec nidshobini Petedon bidiadquin ispondash. Adshumbic: —Nĕid Esusĕn tantiaidquo nec. Esus bedmiaid inchĕshĕn Esus aton cachocttsĕqui uesho aidĕn: “ĵTsutsi cao, Icho?” capondash. ²¹ ĵMitsipadec aid unĕspatsiash? —quesun: —Ma nĕid. ĵMitsipadec unĕspec? —capondash Petedon ĕbi unĕste Esus chuimequin. ²² Adoquien Esus: —Ēbi bunacpadequi aidi unĕsendac. “Ēbi Nuquin Papa yacnuĕsh choabi yacpadec ma unĕsenquo icnu,” ĕbi quiacpadec unĕsenquo ictsiash. Adecbidi: “Ēbi choabi icnuc ma unĕspanu,” ĕbi quiacpadec unĕstsiash. “Nadec unĕsendac,” quequin mibi chienquo

iguembique. Ënenquo icquin ëbi tantiata –quepondash Esus. ²³ Adec: – Unësenquo ictsiash –Esus qesho tantiash ëbi caic: –Esusën tantiaidquo yec Uan unësenquo iquendac –quecuededpondash Esus tantiaquido. ¿Adenda Esusën chuidiondash? Ma padenquo iccondac. –Ëbi bunacpadequi aidi unësendac. “Ëbi Nuquin Papa yacnuësh choabi yacpadec ma unësenquo icnu,” ëbi quiacpadequien unësenquo ictsiash. “Adecbidi ëbi choabi icnuc ma unësnu,” ëbi quiacpadec unëstsiash –quequien iccondash.

²⁴ Aden Esusën nabanonaid ënquin chiombi. Ëmbi isonaidquo chuiquin abimbo chuiquin aidtedi dada uaombi. ²⁵ Esusën naidtedimbo chuiquin dada uambo iccombi. Ëmbi tantiaidtedi naombi. Ambi naidtedimbo ambi chuibanaidtedimbo chuiquin dada uaqin dada uate dadpenquioshë naimbudnetsiambi. Padi. Aidtedi dada uaombi.

ESUS CHUIBENEQUIDON NAID

Esus aton Papan abuc indote

¹⁻² Ducas nebi. Mibi Esus tantiamenu, quequin ënden dada uaondambi, Teyopido. Esusën tauain ismebanaid bedanquin abi abuc indoaid dënainquin dada uaondambi. Abuc nidnun Esusën ëbi chuiheneta quequin abëd icquido chuipanëdash aton Mayanën tantianubi. ³ Cuesten dectanac unësash uincuenshun: “Uincuenobique. Is,” quequin Esusën utsi-utsien ismebanpanëdash ma abimbo iquec quequin tantiaquin ëbi chuibenepanueshun. Ushë abentsëc nidmequin utsi choaid abi choaqui usudnuc 40ted ushquin aden ismeben-ismebënequin Nuquin Papa yacno tabadaid iquec quequin Esusën chuided-chuidedpanëdash. ⁴ Aden ismequimbi Edusaden caid yacnoshon ambi ëbi chuiheneta caidobëdtan pec tabadquimbi Esusën nadopanëdash: —Edusaden yacno tabadquin ëmbi chianeboed, con Mayan, Nuquin Papan mibi menetequid caimbudta. ⁵ Acten mentoanquid Uan pado icpondash. Padnuen ëmbi chianeboed Nuquin Papan aton Mayan mibitedi menendac —quepanëdash Esus.

⁶ Adshumbic, padpidec Esusbëd icquin abëd icquidon: —Yuen matses utsibon namiaido nuquin matses nec. ¿Nëbimbobida mibi nuquin matses chuiquid dapa icpeque? Tantianu. Chui —capanëdash Esus chuiquin. ⁷ Adoaquien: —Nuquin matses chuiquid icmete ushë choaid tantiesa mibi nec. Nuquin Papanuidtsëqui tantiacpadën adquid iguendac —quepanëdash Esus abëd icquido chiec. ⁸ Aden chuishumbic: —Aton Mayan Nuquin Papan meniac aidënquio tantiamequin pausunac ëbi chuibenequidquio mibi iguendac. Edusaden caid yacnoshomba mimi ëbi chuibanendac. Adshumbic, nidaid Udeya caid yacnoshontsen ëbi mimi chuibanendac. Adshumbic, nidaid Samadia caid yacnoshontsen, adembidi nidaid utsi-utsiec yacnoshontsen adembidi ëbi chuibanendac —quepanëdash Esus abëd icquido chiec.

⁹ Aden chuibanquin Esusën nabanquin nainanec macuësh yacno choachsho aton Papan Esus abuc indopanëdash abëd icquidobëdtan abi tantiaquid utsibon isbedednubi. Aden isec tabadnubi abu ushun Esus bëtimpanëdash.

¹⁰ Adec Esusbëd choboedo isec tabadnubien dashcute ushumbocquid dasiuidquid daëd choash tabadec: ¹¹ —Nidaid Cadidia caid yacnoësh choquido, ¿atotsi quiaish abuc isec tabadec ne? Abuc indosho mimi isboed Esus abu ushun choec budsho mimi isendac padpiden —quepanëdash ushumbocquid dasiuidquid abuc isbededquido chiec.

Matias Esus chuibeneta quequin iccuededquidon chiaid

¹² Aden Esus abuc indosho isash abëd macuësh Odibos caid yacno choboedo Edusaden caid yacno nidoapanëdash. Chonoadtemaid ushë nec, quec aidtionsëqui capunëdash. Aido Edusaden yacno choash abuc quënë yacno abi tabadbocno dectatoash tabadoapanëdash. ¹³ Aid quënë nuntan Esusën ëbi chuibeneta caido nëdted icpanëdash: nëdic Petedo, utsibic Uan, utsibic Acobo, utsibic Andedes, utsibic Uedipe, utsibic Tomas, utsibic Badtodome, utsibic Mateyo, utsibic Adpeon mado Acobo cuëmëdquid, utsibic isadaidpembo namequin chuiquid bunesa, Simon cuëmëdquid, utsibic Acobo utsin mado Udas cuëmëdquid. Aidedi Esusën ëbi chuibeneta caido aid quënë nuntan tabadnubi ¹⁴ utsibo Esusën tita yec Esus tantiaquid chido utsibotedi yec Esusën utsibo yec quec ambobidi iccuededquin Nuquin Papa chiec abentsëc onquiacbimboec onquecuededpanëdash.

¹⁵ Adashic Esus tantiaquid 120ted iccuedednubi nēnantanquio nidtoshon Esusēn ēbi chuibeneta caid abentsēcshun Petedon naden chuipanēdash: ¹⁶⁻¹⁷ —Udas pado chuibanu. Tantiata. Esusbēd icquin piucquid dayun uaquid icquimbi Esus chieshēnquido Udasēn Esus bedmepondash. ¹⁸ Aden Esus bedmeshun ambi piucquid bedboed menequin aton tiedēmpi bedashic aid tied nantanuēsh tētaniadash pobidisquiash paēdec aton pucu tishidpac caondash. ¹⁹ Pucu tishidec intac chiuidaid tied icsho tantiaquin Edusaden yacnocquidtedishun Aquedama cain aton onqueten cuēmbededpondash. ²⁰ Adembidi ēndenquimboshē Udas pado tishabicnuc chuiquin Nuquin Papan Mayanēn tantiamiacpadomboen tsusedpa Dabid caidēn Udas cuidte tantiec cuēdēnte Sadmo caid naden dada uapampic:

“Ma adequi aton shubu mosadpanuna ma aidbidi aton matses nibēdquid shubu icpanuna.”

Aden Udas pado cuidte chuiquin cuēdēnte Sadmo caid utsitsen naden Dabid Padon dada uoapampic:

“Aidēn icsain nacpaden tanenquiocquin ma utsin bēdamboen napanuna,” quequin Dabid padon dada uapampic —quepanēdash Petedo. ²¹ Aden chiashic abi onquec: —Udas pado nibēdnuc Esus chuibeneta quequin abentsēc nuquitedishun chuinuna. Nēid quēnē nuntan nuquibēd capuquido dada dadpen iquec. Nuqui Esus chuibeneta caid nadquid ictiad. Chuinu. Tantiata. ²² Esus Uan padon acten mentosho isash niamēdenquio yec Esusbēd capucueneshun Esus indosho isquidquio icsho, Esus chuibeneta, quequin nuqui chuitiad. Adoac Esusēn ēbi chuibeneta caidobēdtan Esus uincuemiaid chuibantiad —quepanēdash Petedo iccuededquido chiec.

²³ Aden Petedon chuibanac daēd istuidash Petedobēd iccuededquido, Petedon chuibocpadquid nēid daēd iquec, quequin chuipanēdash aidon. Ambi istuidaid abentsēc Ose cashun Badsabas cashumbic Ūstus, quequin cuēnaid nepanēdash. Utsibic, Matias cuēmēdquid icpanēdash. Nēid daēd Petedon chuibocpadquid nec, qesho tantiasahun: —Nēnantanquio tabadec cho —cac abi daēdi choash tabadsho isash ²⁴ Nuquin Papa chiec nadec iccuededquido onquepanēdash: —Nēnantanquio chomeboed nēid daēd iqueque. Is, Papa. ¿Mitsicquidimbi Esus chuibeneta, cape? Ēbitedi tantiamē, Papa. ²⁵ Udas pado tautidtiadpambo chian anēdēnquiacno nidboedēn nauidaid namenu, quequin mīmbi bēdamboen isaid abentsēc ēbi isme. Papa. Aden mīmbi ismiac ma aidēntsen Esus chuibenepanuna —quepanēdash Nuquin Papa chiec. ²⁶ Aden chuitanquimbic aid daēd abi cuēmēdquid abentse-abentsēn dada uatempin dada uashumbic tēchun sandoshon cadotaniac dada uatēmpi abia pudue-naid istanquin, Matias cuēmēdquid nec, quequin isbededboshic, Esusēn ēbi chuibeneta caido onseted ichoedi nēbi Matiasbēd doseted yanosh, quequin chuibededpanēdash nuntan iccuededquidtedishumbi.

2

Aton Mayan Esus tantiaquidtedi menebanaid

¹ Adashic isadaidbon ambi aton tiedēn caniquid abia ēshēaid bedaid tanti-aid ushē chotsēcnubi Esus tantiaquidtedi shubunuēshi iccuededoapanēdash.

² Ambo iccuededquimbi badedquio shubu nuntan cunquequid dapa choec natiambo cunquiacimboecsho abitedishun isbededpanēdash. ³ Aden aid isbedednubi cuēte dētsisidacimboecquid budec mais-maisec Nuquin Papan Mayan matsadtocuededpanēdash abi isquidtedi. ⁴ Nuquin Papan ma aidobēd tabadnueshun aton Mayan Esus tantiaquidtedi menebanac matses utsi-utsiec onquetenquio onquecuededpanēdash ambi matsadtomiaidotedi.

5 Aden Nuquin Papan aton Mayan menenubien isadaidbo utsibo Edu-saden yacno cho-choash dadpen tabadpanēdash. Aido Esus tantiesabo yequi aton tsusedpabon chiampicpaden nanuec nidaid utsi-utsiec yacnoēsh Edusaden yacno cho-chopanēdash. 6 Ambo cho-choash tabadnubi Nuquin Papan aton Mayan meniaid-meniaidquieic nēmbobi choquidon onqueten-onquetenquieic onquesho tantiash nēbi cho-choboedo utsi-utsiec: 7 –jPadtec! Dacuēdanquiopaic. Ēbipadquieicshenda onquepec. ¿Onquequidotedi nidaid Cadidia yacnoquidoda nepec? 8 ¿Mitsipaden con onquete bedash onquecued-edpec nec? 9 Ēbitedi nidaid utsi-utsiec yacnoēsh cho-choquido nebi. Padtia yacnoēsh choquido; utsibic, Media yacnoēsh choquido; utsibic, Edan yacnoēsh choquido; utsibic, Mesopotamia yacnoēsh choquido; utsibic, Udeya yacnoēsh choquido; utsibic, Capadosia yacnoēsh choquido; utsibic, Ponto yacnoēsh choquido; utsibic, Asia yacnoēsh choquido; 10-11 utsibic, Pidiquia yacnoēsh choquido; utsibic, Pampidia yacnoēsh choquido; utsibic, Equipito yacnoēsh choquido; utsibic, Dibia Sidene udictsēcuēsh choquido; utsibic, shubu dadpen icquid Doma caid yacnoēsh choquido; utsibic, acte nēnantan nidaid nacnēdquid Quideta caid yacnoēsh choquido; utsibic, Adabia caid yacnoēsh choquido. Isadaidbobēd isadaidbopadquio icnuequido Edusaden caid yacno tsusedpabon chiampicpaden nanuec cho-choboedo ēbitedi nebi. Ēbibimboec onquequidtedishun Nuquin Papan naid chuibanasho tantiambi. 12 ¿Mitsipaden tantiaquin oncamiaquien adec onquepec? –quepanēdash Edusaden yacno cho-choquid.

13 Adnubien: –¿Bēdamboec onquepequida onquec? Paēmbocquid cubudquin acshun tantienquiocquido neapanui –queoapanēdash utsibo.

Iccuededquido Petedon chuibanaid

14 Adec onquesho tantiashun Esusēn ēbi chuibeneta caido cho-choquin Petedon nidtoshan tantiamenu quequin naden cho-choboedo comapēnec onquequin chuipanēdash: –Mimbi icsamboen tantiaid chiembique. Tantiata. 15 Ushē abuctotsēcnubi ēbitedishun paēmbocquid acamboccombi. 16 Utsin-utsinquieic onqueten onquesho mimbi tantiaid Nuquin Papan ēndenquimboshē chiampicpadec onquec nebi. Tsusedpa Oedēmbi Nuquin Papan ma matsesbēd tabadnueshun aton Mayan menenun chiaid naden aidēn dada uampic:

17 Nēid nidaid naimbudnubi

Con Mayan matses utsi-utsien menendambi.

Aidon madobobēdtan aidon champibontsen ēmbi yuecquio icshun nanun chiaid chuibanendac.

Adembidi caniabontsen ushquin ēmbi chiacpaden isendac.

Adembidi tsusiobontsen ushquin ēmbi chiacpaden isendac.

18 Aden con Mayan meniac ambi tantiacpadomboembidi ēmbi chuiquin namiaidon dadan chidobēdtan

ēmbi yuecquio icshun nanun chiaidquibidi chuibanoindac.

19 Adembidi, con Mayanēn tantiamiac ēmbi yuecquio icshun nanun chiaid matsesēn chuibanubien abucuēsh uinsadpamboctequid icnubi nidaidēnshun ismete intacimboectequidbēdtabi nēdēnquetequid cuēte pushudquidbimboectequid abembi pushudquidbēdta adquidtedi mibi ismendambi.

20 Adquid icnuc badiadēn ushē chēnquenuicocnoc

inchēshacimboectequid inchēshēn ushē piu-piupambo yec intacimboecsho

mimbi isbedendac.

Ēmbi ismiaidtedi icambi matses cuidte ushē choendac.

21 Ismequimbi con Icbombo nec ēbi caquidquio mēnchiquendambi,

quequin Nuquin Papan chuimiapaden Oedën dada uapampic.

²² “Adembidi Nuquin Papan chomiaid chiembique. Tantiata, isadaidbo. Nasaded caid yacnoësh choquid, Esus, Nuquin Papan chomiaid icquin nada-tiambocquin nabanquin ismebansho mimbi isondac. ²³ Aidi Nuquin Papan tantiampicpaden Esus bedshun mimbi isadaidpemo chuiquid menequin, Unës uata, cac cuesten dectanquin Esus unës uapanëdash. ²⁴ Aden mimbi nac unësacsho icsaisa chococacno yuec ictiapimbo iquec, qeshun Nuquin Papan Esus uincuemepanëdash. ²⁵ Adembidi ëndenquimboshë tsusedpa Dabid padon Esus chuibanquin naden dada uapampic:

‘Con Icho abuc nidec bëyucanquid ëbëd tsadac bimboecsho isec nebi.

Aidi con dayun tsadquid icsho isquin natiaic cametequid dacuëdënenquo iquendambi.

²⁶⁻²⁷ Aid unësash uincuenta tantiec ëbitsen uincuenendabi, Papa, quec cuëdë nec bëdambo iquebi.

²⁸ Nuquin Papa yacno tabadacpadec nidaidën tabadquin ismiac mibi yacno nidash mibëdi tabadec bëdamboshë iquebi mimbi camiaid iquendabi,’

quequin Esus tantiaquin Dabid padon dada uapampic.

²⁹ “Adomboen tantiaquin dada uash Dabid unësacsho chococapampid nëbi shëcuë iquec. ³⁰ Dabid Nuquin Papan ambi yuecquo icshun nanun chiaid chuiquid icquin nadopampic. Yuecquimboshë yash mibi ëndenquimbo unësampid icnuc min tsyuecquid chuiquid dapabidi iquendac, quequin Nuquin Papan chiaid abimbo iquec, quequin tantiaquiopampic Dabid padon. ³¹ Aden Nuquin Papan nanun chiaid tantiaquin Esus uincuenta isacimboen dada uaqin, Nuquin Papan Chomiaid unësacsho chococaqui aton nami chodquenquo yec uincuenendac, quequin chuiampic Dabid padon. ³² Ai, Dabid padon chiampicpadembi Nuquin Papan Esus uincuemepanëdash. Aid uincuemiacsho isondaic icquin mibitedi chuibanec nebi.

³³ Aid uincuenash Nuquin Papan dayunquo tabadendac nëbi. Ambo choacsho matses tantiaquin Nuquin Mayan ma aibëd tabadnueshun matses mimbi meneta, aton Papan cacpaden abi tantiaquidtedi menebanquiac on-quete utsin-utsinquec onquesho nëbi mibitedishun tantiec. ³⁴ Dabid padon nami chodquiash abuc nidambocpampic. Aden aton namibi abuc indote chienquiocquin Esus chuiquin Nuquin Papan yuecquo icshun nanun chiaid naden Dabid padon chuibampic:

‘Nuquin Papa Icho Dapa icquin abipadquid icbo cain: Nëbi ëbëdi tsadec cho.

³⁵ Mibi chiehënenquido dëniacquidquo mibi icmenun nabono. Chiata,’ quequin Nuquin Papan nanun chiaid Dabid padon dada uapampic.

³⁶ “Aden tantiaquin Dabid padon chuiampic Esus mimbi cuesten dectanquin unës uaid uincuemequin matses icsaid bedshunash abided cuidadquid Nuquin Papan icmepondash. Adoac ëmbi chiaid abimbo iqueque. Esus tantiaquidquo icta, isadaidbo —quepanëdash Petedo.

³⁷ Aden Petedon chuisho tantiaish iccuededquido abi icsaid tantiec unësquo yec: —Esus tantianequin ¿atotsi nuqui nape? —quepanëdash utsi-utiec Petedobëdta Esusën ëbi chuibeneta caid utsibo chiech.

³⁸ Adoaquien Petedo: —Mibi icsaid ënshun, Esus con Icbombo nec, quequin abimbo tantiaquin acten mentometa ma ëbi icsaid Nuquin Papa bëpiscudnu qeshun. Adoacsho aton Mayan mibi menendac. ³⁹ Adembidi tantiaisho isun min tsyuecquidtsen menendac. Adembidi nidaidtedi yacnocquidën tantiaisho isun aton Mayan meneoaindac ambi chiampicpaden —quepanëdash Petedo Esus isquidquo.

⁴⁰ Aden chuibanequi: —Mimbi icsamboen tantiaid ënta. Aden ënash Esus tantiaquidquio icta —quequin chuibudquin Petedon ëmpañëdash.

⁴¹ Aden chuisho tantiaish, Tantiaguiembi, quepañëdash utsi-utiec. Aid ushëmbi dadpenquioshë tedes midted Esus tantiaquid yampañëdash. Adquid icsho isun acten mentobampañëdash.

Esus tantiaquido iccuedëdaid

⁴² Adashic, Esus tantiembi, queboedo tantiabënabi iquec Esusën ëbi chuibeneta caidon Esus chuibansho tantiec tabadequi Nuquin Papa chiec onquedenepañëdash. ⁴³ Adec tabadcuëdedsho isash: —¡Padtembol Dacuëdampambo iquec —quec utsibo tabadpañëdash. Adnubien Esusën ëbi chuibeneta caidon nadatiambocquin nabampañëdash. ⁴⁴ Adnubien Nuquin Papan aton Mayan meniaidtedi tabadcuenequi, Con na nec, quenquiocquin aton na cudasenquiocpañëdash. ⁴⁵ Aton na menequin piucquid bedshun utsin na nibëdsho isun menepañëdash. ⁴⁶ Adecbidi badiadquidën-badiadquidënquiec Nuquin Papa tabadte shubu uashunaid yacno nidash iccuedëpañëdash. Adecbidi shubu utsi-utsiec yacno nidash iccuedëquin Esus unësaid tantiaquin panëmpi cuësh-cuëshun peded-pededpañëdash. Adembidi bundoshon pebededopanëdash. Adobanequi ëbi icsaid bedshunash Esus cuidadaid tantiec bëdambo iquebi, quec ⁴⁷ Nuquin Papan naid chiec cuëdëncuedëpañëdash. Adec tabadsho isash, Bëdamboquido nec, quec utsibotsen Esus tantiaquid yanash abi tantiaquid utsitedibëd iccuedëpañëdash.

3

Caputiapimbo icquid bëdamiad

¹ Adnubien abi nidteniäcpadën ushë budec 3 yanuc Petedo Uambëd Nuquin Papa tabadte shubu uashunaid yacno Nuquin Papa chiec nidpañëdash. ² Ambo nidnubien caputiapimboquid aid shubu shëcuë Bëdaidquio caid yacno utsibon buampañëdash. Anin tishacchobi yec caputiapimboquid icpañëdash. Aidi badiadquidën-badiadquidënquien buandenequin aid shëcuë cuëmano nanded-nandedac uequimbi cho-chosho isun: —¿Adabi piucquid menetsia? —capanëdash. ³ Ambo Petedobëd Uan chosho isquin: —¿Adabi piucquid menetsia? —capanëdash caputiapimboquidën uequin.

⁴ Adoäquien Uambëd nidtuidash nidquin Petedon: —Ëbi daëdi is —capanëdash caputiapimboquid bëisquin. ⁵ Adoäquien, Ëbi menepashun, quequin abi daëdi isobien, ⁶ Petedon: —Piucquid con na nibëdec. Ëmbi tanti-aidën ëbi tantiamëbocpaden naimbique. Nasaded yacno iccondaidën Esusën bëdamiäcpadëch bëdanash nidtoash nidec nid —capanëdash. ⁷ Aden chuishon caputiapimboquidën mëdante abiucquio bedtanquin Petedon nidtopanëdash badedquio nidtopañëdash caputiapimbochoedi. ⁸ Bëdambo yec nidtoash capupañëdash. Adec bëdanash Petedobëd Uan chedobëd capuashic Nuquin Papa tabadte shubu uashunaidën puduedash, Nuquin Papan bëdamioshi, quec pudundotan-pudundotanec: —Cuishon —quepañëdash. ⁹ Adec capusho isquidon nadobededpañëdash: ¹⁰ —Nuquin Papa tabadte shubu uashunaid shëcuë, Bëdaidquio caid yacno uetsequi, Piucquid ëbi menepashun, queboedi capueque. En is. ¡Adpaidie. Is! Tantiädempamboctequid nec —quequin isbededpañëdash.

¹¹ Adec capuequi Petedobëdta Uan mëdinec Sadomonën tacpan quënë uabicquid yacno puduednubien iccuedëquid tsibanash anotsen tanti-adempambo yec tabadoapanëdash. ¹² Adec tabadsho isun Petedon naden

chuibampanēdash: —¿Atotsi quiash padtec quequin ēbi daēdi comapenen bēise? ¿Ēbi daēdshun nacta nēid capupadic? ¿Ēbi bēdambocquid icquindambi nadio? Padenquoio. Nuquin tsusedpabon Papa caidēn bēdamiaid nec. ¹³ Aidi Abadauan padon Papa caid nec. Aidbidi Isac padon Papa caid neoaic. Aidbidi Acobo padon Papa caid neoaic. Aidon Papa caidēmbi ambi nidaidēn chomiaid Esus nēbi aton Papabēd tabadoaic. Aton Papa yacno nidoabicsho Esus bedshun Pidato meniaquien, Nēid dada icsaisa neque. Nidmenu, quequin tantiaquin Pidaton chiaqui, Icsambocquid nec. Unēs uaquimbien ictiad, quequin mibitedishun chuipondac. ¹⁴ Icsaisa nec, quequin utsin isnubi Esus bunenquiocquin icsaquid cuidenquiocquin nidme, quequin mimbi chuipondac. ¹⁵ Abia uincuentaquid mibi chuiquid daba mimbi unēs uacshobien Nuquin Papan aidi uincuemepondash. Aid uincuenacsho ēbitedishun isondambi. ¹⁶ Esusēn ēbi bēdamepec, quequin tantiash nēid taē icsacboedēn Esus tantiash capusho mibitedishun isec.

¹⁷ “Utsibo, Nuquin Papan chomiaid nec, quequin tantienquiocquin mibi chuiquidobēdan mimbi Esus unēs uamiondac. ¹⁸ Ēmbi matses chuiquid daba icmenu caid matsesēn mēyanaid iquendac, quequin ambi chuimi-aidtedi Nuquin Papan dada uamiampicpaden mimbi naondac. ¹⁹ Nēbi mimbi icsamboen tantiaid ēnquin Nuquin Papa tantiata ma mibi icsaid bēpiscudpanuna; adecbidi ma abēdi tabadebi, quequin tantiec mibi bēdambo icpanuna; ²⁰ adecbidi ma ambi chuiquid daba icmiaid Esus mibi bedmenuen chomepanuna. ²¹ Nuquin Papan abitedi icsaisa icmete ushē choabincuc ambi chiampicpadequi nēbi Esus abuc aton Papabēd tabadec. ²² Adembidi chuiquin Moisesēn dada uampid nad iqueque. Tantiata:

‘Chuiquid Dapa ēbipadquid ambi chuimiaid utsi yuecshun Nuquin Papan chomendac. Isadaidbobidi aid iquendac. Aid choshon chuibansho tantiashun bēdamboen nabanta.

²³ Ambi chiaid tantiesa Nuquin Papan nēsecaindac,’ quequin Moisesēn dada uampic.

²⁴ “Adomboembidi Samuedēn chuibampampic. Adomboembidi Nuquin Papan chuimiaid utsibon chuibanoampic. ²⁵ Nuquin Papan chuimiaidon tsyuecquido mibitedi nec. Tsusedpa Abadauanēn tsyuecquidobidi mibitedi neoaic. Aidon tsyuecquido icsho Nuquin Papan Abadauan chiampicpaden chuioaid mibitedi nec. Naden Abadauan Nuquin Papan chuipampic:

‘Mibi ēndenquimbo unēsampin aton matsesbēdta matses utsi-utsien min tsyuecquidēn bēdambo icmendac.’ ²⁶ Nuquin Papan Abadauan chiampicpadec aton tsyuecquid choacsho mimbi unēs uapondac. Aidi Nuquin Papan uincuemiac ma isadaidbomba abi icsaid ēnsho ma ambi bēdambo icmiaid icpanuna —quepanēdash Petedobēd Uan.

4

Ambi naid Petedobēdta Uan isadaidbo tsusiobon chuibamiaid

¹ Aden Petedobēdta Uanēn chuibanubien isadaidbo tsusiobo cho-chopanēdash. Utsi-utsiec Nuquin Papa tabadte shubu uashunaid yacno cho-choquid bēdamboen tabadmequidquio icnubi utsi-utsiec saduseyobo icpanēdash. ² Esus unēs uacsho Nuquin Papan uincuemiacpadembi matsesēn unēsacsho uincuemioaindac, quequin Esus chuibenequidon chuibanubi chopanēdash aido. ³ Choshon Petedo Uambēdta bedash: —Inchēsheque. Badiadshun nēidēn chiaid tantianush nidnu. Nid —quianec puduanquimbi Petedobēdta Uan quēnēn nauedmepanēdash isadaidbo

tsusiobon. ⁴ Aid daëdi bedabicnuc Petedobëdtan Uanën chuibansho tantiaquido Esus tantiaquid dada dadpen sinco midted yampanëdash.

⁵ Adashic, badiadash isadaidbo chuiquido yec tsusio utsibo yec abi ancaquido yec quec Edusaden yacnoësh iccuededpanëdash. ⁶ Nëidtedi icpanëdash: ancanquid dapa daëd Anasbëdi Caipas icpanëdash. Nëidic aton shubun icquido abipadquido: nëidic Uan, utsibic Adecandedo, aidtedi chochoash iccuededpanëdash. ⁷ Iccuededshumbic Petedobëdta Uan bëmeshun nënantanquio nidtomesun: —¿Tsutsi chuiquin caputiapimbocquid bëdamio? —capanëdash tsusiobon.

⁸ Adoaquien Petedo Nuquin Papan Mayanën comapenen tantiamiac napanëdash: ⁹ —Caputiapimbocquid tantiaquin bëdamiaid isec ¿mitsipaden nao, quecta mibitedi tabadpe? Ancanquidbëdtabi chuiquid utsibo isadaidbo utsibo mibitedi chiembique. Tantiata. ¹⁰ Caputiapimbocquid Esuquidistu Nasaded yacno iccondaidën bëdamiaid niosh. Mimbi unës uacsho Nuquin Papan uincuemaiidën nac nëid caputiapimbochoedi nëbi nidtoash capusho mimbi isec. ¹¹ Aid bëdamequid mimbi tantienquio yaid Nuquin Papa yacno yuedanquidquo nec. ¹² Nuquin Papa yacno yuedanquid utsi nibëdec. Nuquin Papa yacno tabadte bünec aid tantiaquid icta —quepanëdash Petedobëd Uan.

¹³ Adec Petedobëd Uan dacuëdenquio yec comapenec onquesho tantias tsusiobo: —Aid daëdi tsusiopenquio iquequi adecbidi Nuquin Papan chiampid tantiabenabicquid iquequi Esusbëd icquid aid daëd icquin ¿mitsipadomboen caputiapimbocquid bëdamepashba? —quec tantiadempambo yec tsusiobo tabadpanëdash. ¹⁴ Aden ambi bëdameboed aidbëdi icsho isash, Icsamboen mimbi naoc, quetiapimbo tsusiobo tabadpanëdash. ¹⁵ Adshun Petedo Uambëdta nidmiash, Tiantianu, quec onqueuededec tsusiobo: ¹⁶ —¿Mitsipadomboen aid daëd nuqui napeba? Nadatiamboquin nasho Edusaden yacnocquidtedishun isbededposh. Ad icnuc, Caputiapimbocquid bëdanambo iquec, ëbitedi quetiapimbo iquebi. ¹⁷ Dadpenshun tantianushe queshun, Esus padpiden chuibanoainda, quequin aid daëdi chuinuna —quecuededpanëdash tsusiobo. ¹⁸ Adshun Petedobëdta Uan chomeoashun: —Padpiden Esus chuibanoainda. Aidën chiaid chuiquin tantiamenda —capanëdash tsusiobon.

¹⁹ Adoaquien: —¿Mitsicquidën chiaid ëmbi natequid icpec? ¿Nuquin Papan chiaid niacquindambi mimbi chiacpaden nadi? ²⁰ Nuqui isboed nuqui tantiaboedbidi chuitequidquo iquendac —quepanëdash Petedo.

²¹⁻²² Adoaquien: —Ëmbi chiacpaden nainquiocsho isun mibi daëdi mëyantsiambique. Baded nid cueschitomane —capanëdash tsusiobon. Abi tishaid seta 40ted icquid caputiapimbocho bëdamepanëdash. Aid Nuquin Papan bëdamicsho isash utsibo cuëdëncuededpanëdash. Adsho tantias Petedobëdta Uan mëyantiadquiocboedi adotiapimbo yec tabadpanëdash tsusiobo.

Isadaidbo tsusiobon chiaid Esus tantiaquidon chuioid Nuquin Papa chiaid

²³ Tsusiobon nidmiac nidash iccuededbocnombo choash puduedshun tsusiobon chuiboed Petedobëdtan Uanën chuiopanëdash. ²⁴ Adoac abentsëc onquiacimboen naden Nuquin Papa chuipanëdash: —Con Icbombo mibi nec. Ábubëdta nidaid acte chedo uashun aidënquio icquidtedimbo mimbi uabampampic. ²⁵ Adembidi ëndenquimboshë mimbi tantiacpaden min Mayanën tantiamiac mimbi chuimiaid, Dabid padon naden dada uapampic:

“¿Atotsieshumbini ëbi dëniactiapimbo icquidombi isadaidpembo comapenec nëishash ëbi dëniacte buncuededpec? Adquiecbidi ¿Atotsi quiash ëmbi chomiaid icsamboen nanushbimboec isadaidbo onqueuidoapec?

²⁶ Ancanquidobëd chuiquid utsibo ëmbi chomiaid aton Icbobi mëyanuec iccuededec.”

²⁷ Ai, mimbì Dabid pado dada uamiampicpadembi ënabi Edusaden yacno isadaidpembo ancaquid daëd Edodesbëd Ponsio Pidato icnubi isadaidbo chedo iccuededquin mimbì Chomiaid icsaisa Esus icsa uanuec onqueuededpondash. ²⁸ Mimbì tantiampicpadembi unës uapondash, Papa.

²⁹ Adquidën Petedobëdta Uan chushcasha mimbì tantioc. Cuesambocquid ëbitedi icmequin mimbì chiaid ëbi chuibame, Papa. ³⁰ Icsaisan Esusën bëdamiacpaden nadatiambocquin naban, Icho –quepanëdash Esus tantiakuído Nuquin Papa caic.

³¹ Adoac abi iccuededacno ishcutpanëdash. Adec ishcutnuc ambocquid Nuquin Papan Mayanën comapenen pausunac dacuëdenquiocquin Nuquin Papan chiaid chuibanpanëdash.

Abentsëc yachimboec tabadaid

³² Aden chuibanequi abentsëc onquiacbimboec tabadec Esus tantiaquido, Con na nec, quenquë yec, Nuquin Papan na nec, quec tabadcuenapanëdash.

³³ Adequì tabadcuenequimbi dacuëdenquiocquin, Esuquidistu uincuenacsho isombi, quequin chuibenapanëdash. Adec Esus tantiaquido tabadsho utsibon bëdamboen isbededquin aidën chuibanesho bëdamboen tantiaapanëdash. ³⁴⁻³⁵ Adembidi nidaid icbo utsin-utsinquien aton nidaid menequin piucquid bedshun Esus chuibenequido menapanëdash. Adembidi, shubu icbo utsin-utsinquien aton shubu menequin piucquid bedshun meneoapanëdash. Aden meniac aton na nibëdquid icsho isun Esus chuibenequidon menebanac bunenquo tabadpanëdash. ³⁶ Adecbidi ambo acte nënantanquo nidaid nacdëquid shubu uaidënsun Chipide caid yacnoshon tishaid Edusaden yacno chosh Ose tabadpanëdash. Aidi, Bëdamboen mimbì naoque. Adobanta, quedenesho Bednabe cuëmpanëdash. ³⁷ Aidëmbi aton nidaid menequin piucquid ambi bedaidtedimbo Esus chuibenequido meneoapanëdash.

5

Ananiasbëd aton chido Sapida muaid

¹ Adnubien dada utsi Ananias cuëmëdquid aton chido Sapidabëdtan aton nidaid menequin piucquid bedpanëdash. ² Bedshun aton chidon isnubi musucbanshun ambi musucaid utsi dayun uash Esus chuibenequido yacno nidshun abitedi meniachimboen menapanëdash Ananiasën. ³ Adnubien, Piucquid abitedi meniachimboen Ananiasën mua uaposh, quequin Nuquin Papan Mayanën tantiamiac naden Petedon Ananias chuipanëdash: –Satanasën tantiamiaid icquin ¿mitsipaden tantiaquin Nuquin Papan Mayanën isnubi mua uaquin ëbi menio? ⁴ ¿Min nidaid meniabi icnuc mitsanapenquioda nediosh? Mitsana niosh. Adecbidi, ¿aidi menequin piucquid bedaid mitsanapenquioda nediosh? Aidtedi mitsana niosh. ¿Mitsipaden tantiaquin piucquid abitedi meniachimboen meniano? Aden bëquin abimbo chienquiocquin Nuquin Papambobi mimbì mua uaboc ⁵ –Petedo qesho tantianec Ananias unësequi uebudpanëdash. Adsho isash Esus tantiaquidtedi dacuëdpanëdash. ⁶ Unësacsho isun dashcute cuëshën dataneshun buanshun caniabon chococatampanëdash.

⁷ Bēnē chococambic ushē abuctoan unēsboedēn chido aton bēnē unēsaid tantienquo yec choapanēdash. ⁸ Choasho isumbien: —¿Ada min nidaid menequin nēidtedi piucquid bedo? —Petedo qesho tantiashien:

—Ai, aitedi bedombi —quepanēdash Sapida.

⁹ Adoaquien Petedo: —¿Nuquin Papan Mayanēn ēbi muasho tantiapec, quequin tantienquiocquinda min bēnēbēdtambi min piucquid abitedi meni-acbimboen meniāno? Nēbi min bēnē chococaboedon mibitsen buanendac —Petedo quenubic ¹⁰ Petedon tayumbi uebudec Sapida unēsapanēdash. Aidsen unēsacsho buanshun aton bēnēbēdtabi chococatampanēdash. ¹¹ Adoac aid daēdi unēsaid tantiash Esus tantiesatedi Esus tantiaquidobēd comapenec dacuēdcuededpanēdash.

Bē-bēaidtedi bēdanaid

¹² Adashic Sadomonēn tacpan caid yacnoēsh Esus tantiaquido iccuedednubi Esus chuibenequidon nadatiambocquin nabampanēdash. ¹³ Adomboen nabansho isash Esus tantiesabo dacuēdec tacpan yacno chotiapimbo yequi: —Esus tantiaquido bēdamboshē iquec —quecuededpanēdash. ¹⁴ Adec tabadequi utsi-utsiec dadpen dadabēdi chido Esus tantiaquido yampanēdash. ¹⁵ Adec Esus tantiaquid yanshun, Daicsaido Petedon bēdamepec, quequin tantiaquin daicsaido bē-bēshun Petedo capuacno nambededpanēdash. ¹⁶ Adembidi dēuequidon Edusaden yacno daicsaid bē-bēnubi mayan icsan mēyanaido bē-bēoapanēdash. Aden bē-bēaidtedi bēdampanēdash.

Esus chuibenequido tsusiobon quēnēn nauedmiaid

¹⁷ Adnubien isadaidbo ancaquidbēd tsusio dapa utsibo saduseyobo caid isec otacquo tabadboedi matses dadpen Esus chuibenequido yacno cho-chosho isash nēishcuededpanēdash. ¹⁸ Adec nēishcuededshun Esus chuibenequido bedmeshun quēnēn nauedmepanēdash. ¹⁹ Aid inchēshēmbi Nuquin Papan uaid mayan bēda choshon quēnē shēcuē bētashaid bēcadoquin abitedi puduemec: ²⁰ —Mibi puduemiomambique. Nuquin Papa tabadte shubu uashunaid yacno niddan. Ambo puduedshun Esus tantiaquid uincuentequid chuibanoata —quepanēdash Nuquin Papan uaid mayan bēda.

²¹ Badiadnuc Nuquin Papa tabadte shubu uashunaidēn puduedshun Esus tantiaquid abi uincuentequid chuibanoaic tabadoapanēdash aitedi. Chuibanubiēn isadaidbo tsusio dapan abēd icquidobēdtambi tsusio ut-sibotedi cho-chomeshun: —Esus chuibanquido bedtan —cac ²² quēnēn nauedaid puduenushe quequin isquido chuiquid nidshun isquien Esus chuibenequido nibēdec. ²³ Adsho isash choaquin: —Quēnē shēcuē bēdamboen bētashquin quēnēn nauedaid puduenushe quequin isquido shēcuē cuēmano capusho isombi. Shēcuē bēcadoash puduedshun isaquien ēnden puduen-puduenac —quepanēdash quēnēn nauedaid puduenushe quequin isquido chuiquid. ²⁴ Aden chuisho tantiash isadaidbo tsusiobon: —¿Atodain nechitec? —quepanēdash Nuquin Papa tabadte shubu uashunaid isquido chuiquid chiec. ²⁵ Adnubien dada utsi choshon: —Mimbi quēnēn nauedboedon Nuquin Papa tabadte shubu uashunaid yacnoshon chuibanooasho tantiombi. ¿Ada tantio? —capanēdash. ²⁶ Adoaquien quēnēn nauedaid puduenushe quequin isquido chuiquid capitan caidēn ambi namiaidobēdtan tantiec nidshun bedtanquin bēoapanēdash. Matsesēn cuēnoten ēbi se-senushe qeshun mēyanenquiocquin Esus chuibenequido bēoapanēdash.

²⁷ Aden bëquin Nuquin Papa tabadte shubu uashunaid nuntan tsusiobo iccuededacno yuedpanëdash. Bësho isash tsusio dapambo: ²⁸ — Esus chuibenenda, quequin chiambocquidëmbimboen Esus chuibanquin Edusaden yacnocquidtedi mimi tantiamebanoc. Adoquimbic, Esus unës uaid tsusiobon naid nec, quequin mimi chuibanoc —quepanëdash tsusiobo.

²⁹ Adsho Esus chuibenequido utsibon tantianubi Petedonuidi: —¿Matesën nata caidodabi nedi? Nuquin Papan nata caid icquin nabanemi. ³⁰ Mimi cuesten dectanquin unës uaondaid Esuquidistu Nuquin Papan padpiden uincuemepanëdash. Nuquin Papa caid tsusedpabon Papa caidquio nec.

³¹ Esus uincuemeshun aton dayunquio tsadmequin matses bëyucanquin Chuiquid abi yacno matses Puduedmequidquio icmepac. Aden nabanaid isadaidbo aidi abimbo tantiaquid icpashun ma abi icsaid Nuquin Papa bëpiscudpanuna. ³² Esuquidistun nabansho isbempondambi. Adembidi abi unësash uincuenacsho ispondambi. Nuquin Papan Mayan icsaisan Esuquidistu tantiaquidobëd icquidëmbi adomboen ëbitedi tantiameoaic —quepanëdash Petedo.

³³ Aden Petedon chuisho tantias tsusiobo: —Icsambo iquec —quiash Esus chuibenequido cuesunete bumpanëdash. ³⁴ Adnubien isadaidbo utsi padiseyobo, Nuquin Papan Moises dada uamiampid chuibanquin tantiamequid utsibon bëdamboen isaid, Camadied cuëmëdquidën: —Chiata. Bëboedtedi buantan —cac ³⁵ buanambic: —Icsamboen nanushe qeshun bëdamboen tantiaquiota. Aido cuesunete mibi buneque. Cuesunenushe chiata. ³⁶ Èndenquio utsi Teyudas cuëmëdquid icpondash. Aidi tsusio dapa icneququin chuisho tantias dada dadpen 400ted abëdi capupanëdash. Teyudas cuesuniacsho isash abëd icboedtedi udi nidaniacsho padpiden isenquio icpanëdash. ³⁷ Adashien matses tambanta caid ushëmbi utsi Udas cuëmëdquid Cadidia yacno icnëdaidbëd matses dadpen capupanëdash. Udstsen cuesuniac abëd icnëdaidtedi padpidec choenquio yec adecbidi udimbo nidaneapanëdash. ³⁸ Adec umanuc buamboedo chuiquid nibëdanaque. Aidbëd icboedö mishenda. Cuesunemenda. Aidën chuibanaidbëdtabi ambi naid matsesën naiduidtsëqui icnuc badedquio ënëdendac. ³⁹ Aido Nuquin Papan namiac chuisho mimi ëmetiapimbo iquendac. Nuquin Papa chieshënushe qeshun aido nidmeta.

⁴⁰ Aden Camadiedën chiac: —Adonona —qeshun: —Buamboedo bëoata —cac bëacsho cushcanten cuesmepanëdash. Aden cuestanquin: —Esus chuibanoinquio yec nidtan —qeshun puduemepanëdash. ⁴¹ Puduemiatic Esus mëyanaid tantiec nidequi abi chuibansho mëyanaid yec bëdambo iquebi, quec tabadpanëdash. ⁴² Adshumbic badiadquidën-badiadquidënquien Nuquin Papa tabadte shubu uashunaid yacnoshon matses bëyucanquin chuiquid, Nuquin Papan bëdamboen isaidquio Esus nec, quequin chuibanpanëdash aidon. Shubu utsi-utsiec yacno nidshun adomboembidi chuibenepanëdash.

6

Niante chidobo pete menbanquid icta caid

¹ Adashic badiadquidën-badiadquidënquiec Esuquidistu tantiaquid dadpen-dadpenquiec yanubi isadaidbo quidiecon onqueten onquequido comapenec onquec: —Niantebo menenquiocquin pete mimi uesquin pepaboc —quepanëdash. ² Adoquien Esuquidistu tantiaquid utsibo abi yacno cho-chomias Esus chuibenequido 12ted: —Niantebo pemebanuec Nuquin Papan chiaid chuibanquin ëntiapimbo iquebique. ³ Niantebo meneta canuen nadquidquio istuidshun chuita. Nuquin Papan aton Mayan meniac

tantiamic bēdamboec tabadsho mimbi bēdamboen isaidquo istuidta. Adquid 7ted istuidshun, Niante chidobo pete menebanquid icta, cata. ⁴ Aidedtshun niante pemebanubimbi Nuquin Papa chuido-chuidoendac. Adembidi Nuquin Papan chiaid chuibenendambi —quepanēdash Esus chuibenequido.

⁵ Adoaquien: —Mimbi bēdamboen chioc —quepanēdash Esuquidistu tantiaquid utsibo. Aidēn chuibocpadembi aidedi istuidpanēdash. Nēdic, Nuquin Papan Mayanēn pausunaid, ambi chiacpadomboen Nuquin Papan naindac, quequin tantiaquidquo Esteban cuēmēdquid; utsibic, Uedipe; utsibic, Pēdocodo; utsibic, Nicanod; utsibic, Timon; utsibic, Padmenas; utsibic, isadaidpembo yequi isadaidbo tanquid Antioquiya yacnoshon tishaid Nicodas cuēmēdquid. ⁶ Aidedi istuidshun Esuquidistu tantiaquid utsibon aido bēdamboen isquin buanec Esus chuibenequido yacno choash puduedash tabadquin Nuquin Papa chiec onquequimbi dada 7tedi mamishquin, Nēditd bēdamboen nameta, Papa, quequin Esus chuibenequidon chuipanēdash.

⁷ Adashic Edusaden yacnoshon Esus chuibenequidon Nuquin Papan chiaid chuiban-chuibansho tantiashtsi-utsieci Esuquidistu tantiaquid dadpen yampanēdash. Adecbidi isadaidbo tsusiobo dadpen bēdamboen tantiashtsi Esuquidistu tantiaquido yampanēdash.

Esteban bedaid

⁸ Adnubien Nuquin Papan Mayan meniaidēnquo. ambi comapenen tantiamiaidēnquo, Estebanēn nadatiambocquin ismebampanēdash. ⁹ Aden nadatiambocquin ismenuc bēdamboen tantiengquo yec utsibo comapenec onquecuededpanēdash. Nēdic, Sidene yacnoēsh choquido; utsibic, Ade-candedia caid yacnoēsh choquido; utsibic, Sidisia caid yacnoēsh choquido; utsibic, nidaid Asia caid yacnoēsh choquido aidedi Edusaden yacno choash tabadec Estebambēd comapenec onquepanēdash. ¹⁰ Comapenec onquequin Esteban Nuquin Papan aton Mayan meniaid icsho aidēn comapenen tantiamiac onquesho dēniacquec utsibo onquetiapimbo icpanēdash. ¹¹ Onquequin dēniactiapimbo icquin utsibo naden aidon chuipanēdash: —Tsujiobo naden chiec nidtan: Estebanēn nuquin tsusedpa Moises caidēn dada uampidbēda Nuquin Papan chiampid chuca uain chuisho tantiombi, quequin muaquin chuita. Aden chiacsho mibi piucquid men-emi —cac chiec nidpanēdash. ¹² Aden chiac tsusiobobēd Moisesēn dada uapampid paquiacquidobēd isadaidbo utsibotedi nēishcuededshun Esteban bēdshun tsusiobo iccuededacno buanquin yuedshun ismepanēdash. ¹³ Ambo abi dēniactiapimboquidon Esteban muaquin chuita caboedon naden chuibededpanēdash: —Nēid dada Nuquin Papa tabadte shubu uashunaidbēda Nuquin Papan Moises dada uamepampid ēnenquiocquin muaquin chuibanec. ¹⁴ Naden Estebanēn chioshe. Tantia: Nasaded yacno iccondaidēn, Esuquidistu caidēn Nuquin Papa tabadte shubu uashunaid yuecshun chic-chiuequendac. Adembidi nuquin tsusedpa Moises caidēn dada uampid naden nata quequin chiaid natiapimboctequid nec, quequin Estebanēn chuibanosh, quequin muaquin chuipanēdash Esteban dēniactiapimboquidon chomiaidon. ¹⁵ Aden Estebanēn chiaid muaquin chuiquin naimbudquimbi tsusiobobēdtambi comapenen Esteban bēisquin Estebanēn bētantiante ushēbimboec ushumbo yec chēnquesho isbededpanēdash.

7

Estebanēn chuibanaid

¹ Adec Estebanēn bētantiante ushēbimboec chēnquesho isec tsusio dapambo Esteban chuiquin: —¿Abimboda mimbi naid chuiposh? ² —caquien yuecquid

onquequin Estebanën naden chuipanëdash: —Chiembique, Tantiaguota. Tsusedpa Abadauan nidaid Adan caid yacno nidabi yec nidaid Mesopotamia caid yacno tabadsho Nuquin Papan abi uëshëmbo yec dasiuidteniäid matsesën istemaid bëchomaoanquieq icquid Abadauan ismepampic. ³ Aden ismec naded onquepampic: “Min utsitedi nianec nidaid utsi yacno mibi ëmbi ismenu caid yacno nidta.” ⁴ Adsho tantiash Candeyabon nidaid yacnoësh nidashic nidaid Adan caid yacno choash Abadauan tabadpampic. Ambo tabadashien aton papa unësan Adan yacno nëbi nuqui tabadbocono Nuquin Papan nuquin tsusedpa Abadauan chomepampic. ⁵ Aden chomeshun Nuquin Papan naden Abadauan chuipampic: “Nëid nidaidën mibi capuacno mitsanapenquio nec. Yuecshun mibi menenun nanuna. Mimbi tishmi-ambochoedi min chidon tishaid abentsëc min madombo nëid nidaid menendambi. ⁶ Nëid nidaid bedabi yec mimbi tishmiäidën tishmiäid caidaido matses utsibon nidaidën tabadendac. Ambo tabadshobi anocquidën aido yuashun seta dadpen 400ted matamequin mëyanendac. ⁷ Adoacsho aidotsen cuidquin mëyanoaindambi,” quepampic Nuquin Papa. Adashic abi Nuquin Papa onquec: “Min madon tishmiäid caidaido abi mëyanacnoësh nidashic nëid macuësh yacno choshon ëmbi chiacpadomboen nabanendac.” ⁸ Aden chuishumbic, Nidaid menenun nanuna, quequin Nuquin Papan naden Abadauan chuioapampic: “Dada bacuëbëdta dada caniaidtedi shui dëbid dëtemeta. Adobansho isun, Èmbi chiaid bëdamboen naquidquio aitedi nec, quequin ismendambi,” quepampic Nuquin Papa. Nuquin Papan chiaid tantiashun Abadauanën ambia dëtemeshun dadatedi aidëmbidi shui dëbid dëtemeopampic. Adoshombic yuecquio icshun Abadauanën aton mado tishmeshun Isac cuënquin 7tedec ushun Isaquën shui dëbid dëtemeopampic. Adoshombic adembidi Isaquën aton mado tishacsho Acobo cuënquin aitedecbidi ushun Isaquëtsen Acobon shui dëbid dëtemeopampic. Adoshombic, canishun Acobon tishmiäido 12ted icpampic. Abentse-abentsen tishmeshun aitedecbidi ushun aton madon shui dëbid dëtemeopampic. Adoquien yuecash Acobon madotedi tsusiobudnepampic —quepanëdash Esteban isadaidbo tantiamenu quequin chiec.

⁹ Aden chiec abi onquec: —Aid 12ted nuquin tsusedpabo icpampic. Acobon mado, chido utsin tishaid, Ose icpampic. Aidi aton papa cudasaidquio icsho isash nëishumbic aton utsibon bedshun piucquid bedquin matses utsi menepampic. Adoac Ose bedboedon Equipito yacno choshon piucquid bedoquin Equipito yacnoquid Ose meneoapampic. ¹⁰ Adoac, Yuanu, qeshun natiämiaid Ose icsho isun Nuquin Papan aid dayun uaqin dacuëdenquio icmequin comapenen tantiavidquio bëdamboen chuividquio Ose Nuquin Papan icmepampic. Adquidquio icsho isun Equipito yacnoquido ancaquidën Padaon caidën Equipito yacnoquido chuividquio Ose icmepampic.

¹¹ “Yuecash Equipito yacnoquido chuivid, Ose, icnubi nidaid Equipito caid yacnoquidbëd nidaid Canan caid yacnoquido natiambo buncued-edpampic. Adnubi nidaid Canan yacno nuquin tsusedpabo Isadaidbon pete nibëdquieq yampampic. ¹² Adshumbic, Equipito yacno quënë uashun dayun uaid pete iqec, qesho tantiashun Osen papan Acobon ambi tishmiäido nuquin tsusedpabo chuiquin: ‘Equipito yacno pete iqec, qesho tantiombique. Bedtan,’ cac Osen utsibo aton papan chiacpadec pete bedec nidnepampic. ¹³ Adanec Acobon madotedi aton utsibo Equipito yacno choacsho isun, Min utsi nebi, quequin chienquiocpampic Osen. Aton utsibon pete bedash abi yacno choashun ambi bedtamboed naimëdsho isun, Padpidemboen bedoatan, cac nidash Equipito yacno choacsho, Min utsi nebi, capampic Osen. Adoshon Equipito yacnoquido ancaquid

Padaon yacno buanshun: ‘Con matses isadaidbo nec,’ Ose qesho tantienquicoaedēmbi Padaonēn tantiabempampic. ¹⁴ Aton utsibo Padaon chuiban-shumbic Osen aton utsibo chuiquin: ‘Nuquin pabēda nuquin matses bedtan,’ capampic. Adoac bedoanec Equipito yacno choapampic. Abēd icquido 75ted icpampic. ¹⁵ Adashic, Equipito yacno yuec tabadashi tsusio budashi Acobo unēspampic. Auēshquiobidi nuquin tsusedpabo Acobon madotedi adecbidi unēsoapampic. Unēsacsho Equipito yacno chococapampic. ¹⁶ Adashic, yuecquio yash Equipito yacnoēsh nidquin unēsaidon tishmiaid caidaidon aton mēdimbon canite buampampic. Canite buanshumbic Siquen caid yacno nidshun ēndenquimbo matses utsi, Amod caid, piucquid menequin tsusedpa Abadauanēn tied bedshunēdacno chococapampic.

¹⁷ Aden chuishumbic Estebanēn nadopanēdash: —Equipito yacnoēsh tsusedpabo nidabi icnuc Nuquin Papan, Nidaid menenun nanuna, quequin chuipampid ushē chote anoentsēc yanuc nuquin tsusedpabo dadpen yanec caidpampic. ¹⁸ Dadpen caidsho isun Equipito yacnocquido ancaquid utsin Ose pado tantienquio icpampic. ¹⁹ Aidēmbi mua uaqin chuiquin natiamequin nuquin tsusedpabon dada bacuē tishacsho bedtemaid nec, quequin nemepampic. ²⁰ Adnubien dada bacuē Moises tishacsho Nuquin Papan, Aid bēdaidquio iquec, quequin ispampic. Aidi icuschun ushē abentsēc choaid nidmequin Equipito yacnocquido ismenquiocquin aton mado Moises anin ompopampic. ²¹ Ompoaqui Moises shubisho tantianshun tsitsan ambi danoshcaidēn aton mado acte nantan anin nuntampampic. Aden nuntanambien Equipito yacnocquido ancaquidēn champi nesec budquin tsitsanēn Moises noadtsēcsho istuidshun bedash, Con mado caimbi, quepampic ancanquidēn champi. ²² Bedtsac canitsequi aidēn shubu nuntan tabadec Equipito yacnocquid matsesēn naid mēquiddec aidēn chiaid Moises paquiadpampic. Aden Equipito yacnocquidon naidtedi naquin aidēn chiaidtedi Moisesēn tantiabenquiopampic.

²³ “Adashic, Equipito yacnocquidobēd tabadquin abi tishaid seta 40ted matamiashic isadaidbon tishmiaido con matses isnu, quianec aton matses chonoadacno nidquin Moisesēn istuidpampic. ²⁴ Istuidnubi Equipito yacnocquid dada abentsēcshun isadaidbo dada abentsēc mēyanquin cuesunesho isun Equipito yacnocquid cuidnuequin Moisesēn cuesuneoapampic. ²⁵ Ēmbi adoshō isun, Equipito yacnoēsh nuqui bēyucanquin buanquid Moises nendac, quequin con matsesēn tantiapatsiash, abibi quetsēcquiec nidnubi aton matsesēn tantienquio icpampic. ²⁶ Badiadash aton matses yacno padpidec nidquin aton matses daēd cuesnansho istuidshun, Ēmenu, abibi quec choquimbi: ‘¿Atotsi quec min matsesbēd cuesnane?’ Moisesēn catuidpampic. ²⁷ Adoaquien Moises cuēscatanec: ‘¿Ēmbi nasho cuidquin ēbi chuiquid tsuntsin mibi icmioshe? Chui. Tantanu,’ quetanequi: ²⁸ ‘¿Equipito yacnocquid mimbi cuesunebocpadenda ēbitsen cuesune?’ quepampic cuesnanquid Moises caic. ²⁹ Aden chuisho tantiashien, Equipito yacnocquido ancaquidēn tantianushe quianec dacuēdec Equipito yacnoēsh Moises cuempampic. Adec cuenashi nidaid utsi Madian caid yacno nidash tabadpampic. Ambobi tabadquin chido bedshun dada bacuē daēd tishmepampic Moisesēn.

³⁰ “Adashic, seta dadpen 40tedbidi matamec nidaid Madian caidēn tabadec cuētempuiidquio yacno matses nibēdquiec yacno macuēsh dapa Sinai caid anoentsēcqui Moises chopampic. Ambobi tabadquimbi cuētempī nēdēnquiacimboecquid nēnantanquio Nuquin Icbon Chomiaid tabadsho Moisesēn ispampic. ³¹ Aid istanequien tantiadempambocquid nepanushe. Isbono, quianec anoentsēcqui Moises chosho Nuquin Icbon naden chuipampic:

32 'Min tsusedpa Abadauanën Papa cain cuënaid nebi; min tsusedpa utsin Isaquën Papa cain cuënaidbidi nebi; min tsusedpa utsin Acobon Papa cain cuënaidbidi nebi,' qesho tantiash dacuëdec uëdëquec istiapimbo yec Moises nidtuidpampic. 33 Nidtuisho isec Nuquin Icho Moises chiec nadpampic: 'Nëmbo ëbi icsapenquio icquid icnuc caputemaid nidaid iqueque. Min tapucudte chicshun tantiata. 34 Min matses ëbi cudasaido Equipito yacnocquidon mëyanac uëshquec shubiquiosho tantiashun aido Equipito yacnoshon buanta mibi canuec chobi. Nëbi Equipito yacno mibi nidmeoaimbi,' quepampic Nuquin Icho Moises chiec.

35 "Aden cuëtampi nëdënquiacimboecquid nënantanquio icboedën Nuquin Papan Chomiaidën isadaidbo bëyucanquin buanquid icta cac: '¿Ëmbi naid icsho cuidquïn ëbi chuiquid tsuntsin mibi icmioshe? Chui. Tiantianu,' abi caondaïdo bëyucanquin buanquid Moises icpampic. 36 Adquid Nuquin Papan icmiac Equipito yacnoshon aton matses bëyucanquin buanun Moisesën nadatiambocquïn ismepampic. Adoshombic, isadaidbo buanquin Acte Piu yacnoshontsen nadatiambocquïn ismeopampic. Adoshombic, matses nibëdquiec yacno seta dadpen 40tedbidi matamec abi tabadcue-niacnoshontsen nadatiambocquïn nabanquin isadaidbo Moisesën ismeopampic. 37 Aidëmbi naden chuipampic: 'Yuecquio icshun ëbipadquid mimbi tishmiaidën tishmiaïdon caïdaïd Nuquin Papan chuïquidquïo icmendac,' quequin Moisesën chuipampic. 38 Isadaidbo bëyucanquin chuïquid Moises matses nibëdacno isadaïdbobëd macuësh dapa Sinai caïd yacno choash Nuquin Papan chomiaïdobëd Moises tabadpampic. Ashunquïo Nuquin Papan abëdi tabadte tantiamenuequin cuënote pada-padamocquïdën ambi naden nata quequin dada uaid Moises menepampic. 39 Aden aid dada uaid bedshun bëyucanquin chuïsho tantiesä yanec nuquin tsusedpado Moises bunenquïo yec Equipito yacno nidoate bumpampic. 40 Adashic, Moises macuësh yacno yuecquïo tabadnubi Moisesën utsimbo Adon cuëmëdquid aton matses utsibon naden chuïbededpampic: '¿Moises nuqui Equipito yacnoshon bëyucanquin bëboed mitsi nidpash nec? Nibëdpequïen iquec. ¿Atotsi quec nidpash? Nuquin Papan uacpadquïocnoc nacentä. Nacnenash bëyucanquin chuïquid aid iquendac,' tsusedpabon cac 41 bacan bacuëbimboecnuc Adonën nacnempampic. Ambi nacnenaid tantiaquin isadaïdbon nidaidën capuquid yua cuesuneshun cuëdënëmbededpampic.

42 Adquid cuëdënësho tantiash isadaïdbobëd ictiapimbo iquec Nuquin Papa, Padi. Adenda, quenquïo icpampic. Adquido Nuquin Papan ëndenquimbo tantiaquin naden chuipampic: 'Adomboen mimbi nacnenaid tantiec tabad.' Adembidi Nuquin Papan yuecquïo icshun nanun chiaïd isadaïdbo chuïquin naden dada uamepampic:

'¿Matses utsi nibëdquïo yacnoshon seta dadpen 40ted matamequin ëbi tantiaquinda nidaidën capuquid yua cuesuneshun pambid tauïdenio? Padenquïo.

43 Ëmbi uaid badiadën ushë, ëbitedishun bëyucamembi, qeshun aidpadquid nacnenshun Modoc cuënquin aton shubumpi nuntan namposh. Aïdbëdtabi uispa dapatsen ëbitedishun bëyucamembi, qeshun aidpadquïdbidi nacnenshun Dempan cuëneç danëshën sebudec shuebudshun, Mibi tantiaquid nebi, quequin adquid mimbi chuipoc.

Aden nasho isun ëmbi menenu caïd nidaid yacno mibi nidmenquïo icquin nidaid utsi, Babïdonia caïd udi mibitedi nidmeoaindambi.'

Aden ambi chiaïd niacquïdo isadaïdbo tantienquïo icquïdobi Nuquin Papan chuipampic –quepanëdash Esteban isadaïdbo chiec.

⁴⁴ Aden chiec yuec onquebudec: —Matses utsi nibēdacnombo nidanequin tsusedpabon Nuquin Papa tabadte chichanshun buampampic. Aidēmbi Moises ismiacpadembi isadaidbon Nuquin Papa tabadte shubu uashumpampic. ⁴⁵ Adashic, tsusedpabo aid shubu uaquidotedi unēsān ambi tishmiaidontsen aid shububidi adomboembidi chichanshun buanoapampic. Adoshombic, isadaidpembo utsi-utsien cuemenu, quequin aidon nidaid yacno aid shubu chichanaid bēshun bēyucanquid Osue cuēmēdquidbēdtan nuquin tsusedpabon aid nidaid nēnantanquio shubu uaoampic. Aden aid shubu nacnenoanubien isadaidbo chuiquid dapa nuquin tsusedpa Dabid yampampic. ⁴⁶ Aidi Nuquin Papan bēdamboen isaidquio aid nidaidēn tabadquin Nuquin Papa tabadte buantiapimbocquid shubu uashuntiadquiocquīn shubu uate bēbēmepampic. ⁴⁷ Aid shubu uabi Dabid unēsambic ambi tishmiaidēn, Sadomon cuēmēdquidēn, Nuquin Papa tabadte nainquin shubu uashumpampic. ⁴⁸ Aden matsesēn shubu uaidēn Nuquin Papa tabadenquio iquec. Adembidi Nuquin Papan chuimianaidēn naden chuipampic:

⁴⁹ “Abutenquiobi con tsadte dapa iquec. Adecbidi nidaidtenquiobi ēmbi tincatequid nendac.

¿Adquid icnubidabi matsesēn nidaidēn shubu uashun tabadmepadic?
¿Nidaidēnuidi tsadpectabi tiboquendac?

⁵⁰ ¿Tauaquoquimbi abitedi uambodambi ictionda?”

quequin Nuquin Papan chuimianaidēn dada uapampic —quequin chiashic Esteban abi onquec: ⁵¹ —Pacuēnēdacbimboen Nuquin Papan chiaid tantiash icsaquin ēnesa mibitedi nec. Aton Mayanēn tantiamenū cac tsusedpabotedishun chieshēmpampicpadembi mibitedishun chieshēnoaic. ⁵² ¿Nuquin Papan ambi yuecquio icshun naden nanuna quequin chiaid ambi chuimianaidtedi min tsusedpabon mēyanenquioda icpampic? Adembidi, Nuquin Papan chomiaid choendac, quequin chuiquido tsusedpabon cuesunepampic. Aidon nacpaden Nuquin Papan chomiaid mibitedishun unēs uamiondac. ⁵³ Nuquin Papan chiaid ambi uaidon mayan bēdabon meniaqui Nuquin Papa chieshēnquido mibi nec —quepanēdash Esteban isadaidbo chuiquin ēnec.

Esteban se-siaid

⁵⁴ Adec Esteban onquesho tantiashun nēishēnshun Esteban iccuededquidon chushcapanēdash. ⁵⁵ Adoaquien Nuquin Papan Mayan meniaidquio icquin Estebanēn abuc isquin Nuquin Papa uēshēmbo yec matsesēn istiapimbo bēchomaoanquiec ictequid abichobi dasiuidteniaid chēnquenubi Nuquin Papabēd tancandaēdquiec Esuquidistu nidtuidsho ispanēdash. ⁵⁶ Aden isequi: —Abuc shēcuē uaid shēcniaye. Is. Umbo Esuquidistu, matsesondaid, Nuquin Papabēd tancandaēdquiec tsadsho isembi —quepanēdash Esteban.

⁵⁷ Adsho tantiash tsusiobo comapenec sidquianec pamumēdanec titinquequin Esteban bedshun ⁵⁸ cuēnoten se-senuen shubu nibēdacno udi buampānēdash. Aden Esteban buanshun aton dashcute Saudo se-siāquidquidēn taēno sampanēdash Esteban se-senuequidon. ⁵⁹ Sanshun se-siaquic Estebanēn Esuquidistu cuēnquin naden chuipānēdash: —Ēbi yued, Icbo —quiashic, ⁶⁰ danēshēn sebudash comapenec nadec onquec: —Ēbi se-sequido icsaid cuidenquio yec bēpiscudta, Icbo —quepanēdash. Adec onquetanec Esteban unēsapanēdash.

¹ Esteban se-senu caquien, Ai, adota, quiash isec uano Saudo tsadpanēdash. Esteban se-siaid ushēmbi Edusaden yacnoshon Saudon Esus tantiaquid utsi-utsien comapenen mëyanquin tauadopanēdash. Adosho isash Esus chuibenequido ambobi tabadnubien Esus tantiaquid utsibo nidanc uano-uanoec nidaid Udeya yacno utsi-utsiec choash tabadnubien Samadia caid yacno choash utsibo tabadoapanēdash. ² Adnubien Nuquin Papan chiapadomboen naquin Esteban chococaic comapenec sedenquec shubipanēdash. ³ Adnubien Saudo Esus tantiaquidtedi naimbudte bunquin shubu utsi-utsiec yacnoshon dadabēdtabi chido chedo bedmeshun quēnēn nauedmepanēdash.

Samadia yacnoshon Esus chuibanaid

⁴ Adashic Edusaden yacnoēsh nidanc shubu dadpen icquid utsi-utsiec yacno choshon abi tantiaquidon Esus chuibenepanēdash. ⁵ Adembidi niantē chidobo aton na nibēdsho menequid, Uedipe cuēmēdquid nidaid Samadia caid yacno choshon adembidi Esus chuibanoapanēdash. ⁶ Aidēn nadatiambocquin nabanquin Esus chuibancho amocquido iccuededquin bēdamboen tantianpanēdash. ⁷ Aidēmbi nadatiambocquin nabanac mayan icsa dapuedaid ichoedi mayan icsa sidquianec cuempanēdash. Adecbidi canite icsaidbēdta caputiapimbocquid dadpen bēdampanēdash. ⁸ Adsho isash Samadia yacnocquido, Bēdambo iquebi, quec tabadpanēdash.

⁹ Adnubien Samadia yacno ēnden chondaid, Nadatiambocquin nabanquid dapa nebi, quequin mayan icsan tantiamiacpaden Simon cuēmēdquidēn nabampanēdash. ¹⁰ Adosho isash: “¡Eee! Abimboshenda caposh. Nēid dada Nuquin Papan ambi nadatiambocquin nabante tantiamiaid nec,” quequin anocquidobēdtan abi chuiquidon comapenen tantianpanēdash. ¹¹ Aden yuen Simonēn ismiac, Isnuequid dadpen badiadquidēn-badiadquidēnquec abi yacno choash iccuededpanēdash. ¹² Adnubien, Nuquin Papa yacno puduedmianquid Esus nec, quequin Uedipen chuibancho tantiaquid yampanēdash dadabēdi chido chedo. Adsho aitedi acten mentomepanēdash. ¹³ Simontsen: —Esus tantiaquid nebi —quesho acten mentoauqui Simon Uedipebēd capuquimbi Uedipen nadatiambocquin nabansho isun, Adopenshenda nabanec, quequin ispanēdash Simonēn.

¹⁴ Adashic yuecash Samadia yacnocquido Edusaden yacno nidash nadpanēdash: —Nuquin Papan chiaid Samadia yacnocquidon tantiabededec. Aden chuisho Esus chuibenequidon tantiashun Uambēdta Petedo Edusaden caid yacnoēsh nidaid Samadia caid yacnoshon nidmepanēdash. ¹⁵⁻¹⁶ Adec aid daēd nidaneshun: —Esus tantiaquid acten mentoaiduidi nēidtedi nec —anocquido qesho tantiaquid: —Nēidtedi min Mayan mene, Papa —quec onquequin ¹⁷ Petedobēdtan Uanēn mēdanten Esus tantiaquido mamishbampanēdash. Aden mamishbanubi aitedi Nuquin Papan aton Mayan menepanēdash.

¹⁸ Aden Petedon nasho isash Simon: —Ma adquec mëquiadneshun mibi piucquid menenu. ¹⁹ Mimbimatses mamishacpadembi ēmbi mamishaidtedi ma Nuquin Papan Mayan meniaid icpanuna —quepanēdash.

²⁰ Adoquien Petedo: —¿Piucquid menecta mibi mëquiadpe? Adoquin mimbimantianuc tauiantiadpambo chian anēdēnquiacno ma mibēdi min piucquid icpanu. ²¹ Mimbim Nuquin Papan chiaid icsamboen tantiaquin ēmbi nacpadomboen natiapimbo mibi iquendac. ²² Mimbim icsamboen tantiaid ēnta. Aden icsaid ēnsho isash Nuquin Papa mibi icsaid bēpiscudendac. ²³ Mayan icsan yua icquin tactauitishidaid mishaid mucambo yacpadec icsamboen mimbimuaquin chuibanaido icsaindac.

²⁴ Adoaquien: —Ēbi tauiantiadpambo chian anēdēnquequid nēnenushe quiash mibi Uambēd Nuquin Papa chiec bēdamboec onquebudneta — quepanēdash Simon.

²⁵ Adec Samadia yacno tabadquin Petedobēdtan Uanēn: Esus ispondambi, queded-quededquin Nuquin Papan chiaid chuibanashic Edusaden yacno nidquimbi utsi-utsiec yacnoshontsen chuiopanēdash aidēmbidi.

Uedipe Etiopia caid yacnoquidbēd icaid

²⁶ Adoshombic, Samadia yacno Uedipe icsho Nuquin Papan uaid mayan bēdan nadopanēdash: —Nēuēshquio puduanec nidec Edusaden datambidanec acte dapa yacno shubu dadpen icquid Casa caid yacmi matses nibēdacno podquedēn nidash nidtuidtanec chotan.

²⁷ Adoac nidtoanec nidquimbi Nuquin Papan uaidēn mayan bēdan chuibocno choquin Etiopia caid yacnoēsh choquid Uedipen bēquedtuiddanēdash. Ancanquid chido Candase cuēmēdquid aton na dayun uashunquid aid dada nepanēdash. Aidi Edusaden yacno nidash tabadquin Nuquin Papa chianec

²⁸ padpidec Etiopia yacno nidequi aton nidaid cano cabayon nimbanubi antsadtoshon Nuquin Papan chiaid dada uamepampid isec onquequin chuibanec tsadpanēdash. ²⁹ Adnubien Nuquin Papan Mayanēn: —Nidaid cano chinunta —cac ³⁰ Uedipen titinquequin chinumpanēdash.

Aden Etiopia yacnoēsh choquid dada uaid isec onquesho isash: —¿Isbanec onquequinda tantiaquie? —quepanēdash Uedipe.

³¹ Adoaquien: —Tantiamequid nibēdnuc ¿mitsipadentsimbi tantiape? Ēbēdi antsadtoec cho —cac Uedipe abēdi antsadtopanēdash.

³² Aidbēdi antsadtoshon Etiopia yacnoēsh choquid Nuquin Papan dada uamiampid isec onquesho Uedipen naden tantiaipanēdash:

“Obeca cuesunenuen nimbambocpadomboembidi mētaneshun nimbanoaposh Nuquin Papan chomiaid unēs uanuequin.

Adecbidi obeca bacuē abi datasnuequid icnuc cuēdenquo yacpadec abi unēs uanuequid icnuc cuēdenquo icoaposh Nuquin Papan Chomiaid.

³³ Aidi Icsaisa icsho mēyansho isec, Icsambocquidta neque. Isnu, quenquiocposh aton matses.

Aidi chido inesa yec ambi tishmiaid nibēdnuc ¿Tsuntsin ambi naid chuipadic?”

³⁴ Aidtedtsēqui abi isec onqueboed Uedipe ismeshun Etiopia yacnoēsh choquidēn: —Ēbi isec onqueboed ¿mitsicquid chiequini onquepo? ¿Abibi chiadaidtabi isec onquepo? ¿Utsida chuibaneque? Ēbi chui. Tantanu —capanēdash Etiopia yacnoēsh choquidēn Uedipe chuiquin.

³⁵ Adoaquien, Matsestedi icsaid bedshunash abided cuidadec Esus unēsaid Nuquin Papa yacno puduedmianquid nec, quequin dada uapampidēn chiec, quequin Etiopia yacnoēsh choquid tantiamenuen chuibampanēdash Uedipen.

³⁶ Adoanec nidquimbi Etiopia yacnoēsh choquid Esus tantiaquid yanshun actempi istuidshun: —Actempi iqueque. Is. ¿Adabi mentoe? —capanēdash.

³⁷ Adoaquien Uedipe: —Esus tantiaquidquo nebi, qesho mibi acten mentono —capanēdash.

Adoaquien: —Nuquin Papan mado Esuquidistu nec, quequin aid tantiaquid nebi —qeshun Etiopia yacnoēsh choquidēn: ³⁸ —Nidtuidd —cac nidaid cano nidmequidēn cabayo nidtuiddmian acte budshun Etiopia yacnoēsh choquid Uedipen mentopanēdash. ³⁹ Adashic, acte nantanuēsh abi daēdi dectatosho Nuquin Papan Mayanēn Uedipe buampanēdash. Adoac Uedipe

padpiden isenquio yequi, Esus tantiec bēdambo iquebi, quec Etiopia yacno nidoapanēdash.

⁴⁰ Adnubien Uedipe Nuquin Papan Mayanēn nidaid utsi Asoto caid yacno buampanēdash. Ambo capucuenequin shubu dadpen icquid yacno-yacnomboen Esus chuibēec onquec choequi shubu dadpen icquid Sesadeya caid yacnotsen choapanēdash.

9

Saudon tantiante paucaid

¹ Adnubien Edusaden yacnoēsh Esus tantiaquid utsi-utsiec nidanenubien Saudo Edusaden yacno tabadpanēdash. Ambo tabadec chushquec Esus tantiaquidtedi cuesunemetiadquio yec isadaidbo chuiquid dapabo yacno Saudo choash ²shubu dadpen icquid yacno-yacnomboec nidshun Esus tantiaquido bedmeshun tanemeshun Edusaden yacno bēmete bunebi. Damasco caid yacnoshontsen adote bunebi. ¿Ada mimbi adota quequin dada uashun ēbi menetsia? Mimbi adota, quequin dada uaid bedshun Damasco yacno nidshun ismiac anocquido chuiquid adota queoatsiash, quequin Edusaden yacnoshon Isadaidbo chuiquido chuipanēdash Saudon.

³ Aden chiac dada uaid bedash Edusaden yacnoēsh puduanec nidec Damasco anoentsēqui yanshobi abucūēsh bed-bedquequin Saudo dēcatepanēdash.

⁴ Aden dēcatiac Saudo paēdash uesho isun nadec abucūēsh onquec: —Saudo, ¿atotsieshun ēbi tantiaquido mimbi mēyampeba? Ēbitsen mēyantiadpambocquin mimbi aido mēyanec —quepanēdash.

⁵ Adoaquien: —Icho, ¿Tsutsi mibi ne?

⁶ Adoaquien: —Mimbi mēyanaid Esus nebi. Ēmbi chiaid chieshēnec mibi tabadeque. Nidtoash Damasco yacno nidtan. Anoshon ēmbi nata cacpadomboen anocquid mibi chuimembique. Nidtan.

⁷ Adec abucūēsh onquenubi Saudobēd cho-choquido nidtuidshun tantiequid onquequid isenquio yec tabadtuidpanēdash. ⁸ Onquec ēnēdan nidtoash Saudo istiadquio iquequi bēshupanēdash. Adsho isun mēdīnanquin Damasco yacno buampanēdash. ⁹ Adequi Damasco yacno choash 3tedec ushec isenquio yec buna mēmunquec Saudo tsadpanēdash.

¹⁰ Adashic, Saudo puduedash tabadacno ēdibictēc tabadquid Esus tantiaquid Ananias cuēmēdquid icpanēdash. Aid usho Esusēn: —Chuinu. Tantiacaquien:

—¿Atoda? Nēbi uebi, Icho —quepanēdash Ananias.

¹¹ Adoaquien: —Nidtoash podqued cuembocquid caid yacno nidtan. Ambo choash Udasēn shubun puduedshun shubu dadpen icquid Tadso caid yacnoshon tishaid Saudo cuēmēdquid Nuquin Papa chiec onquec tsadsho mimbi istuidendac. ¹² Adec aid ushacimboec tsadsho mibi choshon aidi padpiden ismenuen mimbi mēdanten mamishac isoshe. Aidi istan —capanēdash Esusēn.

¹³ Adoaquien: —Con matses dadpenshun Saudon naid icsa chuibansho tantiombi, Icho. Aidēmbi Edusaden yacnoshon mibi tantiaquido mēyamepac caoshe. ¹⁴ Aidbidi Edusaden yacnocquido chuiquid dapanquio dada uaid sananquin nēmbotsen mibi tantiaquido bedmeshun tanemenuc aidi chopac caosh —quepanēdash Ananias Esus chiec.

¹⁵ Adoaquien: —Aidi ēbi chuibeneta caidquio icmeshun ēmbi bēdamboen isaid neque. Aid dacuēdēnenquio yec nidshun istanta. Aidēn isadaidbo

abi chuiquidobēdta isadaidpembo abi chuiquidobēdtabidi ēbi chuibenchuibeneccapueudac. ¹⁶ Ēbi chuibenesho mibi mēyantequid iquendac, quequin Saudo tantiamembi —quepanēdash Esus.

¹⁷ Adsho tantianec Ananias nidash Udasēn shubun puduedshun Saudo mamishec: —Con utsi, mibi podquedēn chosho chuiquidēn Nuquin Ibonquo, Esusēn mibi padpiden ismenuen Nuquin Papan Mayan mibi menenuembidi chomiaid nebi —quepanēdash Ananias Saudo chiec.

¹⁸ Aden Ananiasēn chuinubi nuēcquid bitsibimboecquid ēshēnuēsh paēdnubi bēshuacboedēmbi, Saudon, bēdamboen ispanēdash. Aden isec capusho isun acten mentopanēdash. ¹⁹ Adecbidi Saudo penquo yec padishacboedi piash padpidec uidēncuenoapanēdash.

Damasco yacnoshon Saudon Esus chiaid

²⁰ Adeccuidēncuenash Saudo Esus tantiaquidobēd tabadpanēdash. Ambo tabadec Nuquin Papan chiaid chuibante shubu yacno nidshun: —Esuquidistu Nuquin Papan madombo nec —quequin chuipanēdash Saudon.

²¹ Aden chuisho tantiaash tantiadempambo yec tabadec: —¿Edusaden yacnoshon Esus tantiaquido mēyameboedida nec? ¿Adecbidi nēmo choshon tanemeshun isadaidbo Edusaden yacnoquido chuiquid dapabo yacno buamenuc choabida ictic? —quepanēdash Damasco yacnoquido.

²² Aden anocquidon tantianubi Nuquin Papan Mayanēn oncamiac Pabadon, Nuquin Papan Chomiaidquo Esuquidistu nec, quequin isadaidbo tantiamenuen Nuquin Papan chiampid Saudon comapenen chuidedchuidēpanēdash.

Isadaidbo Esus tantiesa abi cuesunete bunsho isash Saudo cuenaid

²³ Adembidi yuec ushqin Saudon ēnenquiocquin chuibansho tantiaash, Icsamboen chiec, quiash isadaidbo utsibo yec abi cuesunete bunsho isun tantiaquidēn chuisho Saudon tantiapanēdash. ²⁴ Adnubien Saudo cuesunenuen shubu dadpen icquid abichōbi tsicateguin daquēnē uaidēn shēcuē cuēmanoshon abi chīshēnquidon caimpanēdash Saudo puduensho bednu quequin. ²⁵ Aden cainsho isun Saudo cuesunenushē qeshun chiac inchēshēmbi onquenuiocquin tsitsan dapan Saudo antsaduntanquin tsicaiaid quēnē cachoc Saudo budmepanēdash.

²⁶ Budanec Saudo Edusaden yacno nidoash Esus tantiaquidobēd tabadnuesho isash, Saudon mua uaquin ēbi bednushe quish dacuēduedpanēdash aido. ²⁷ Adnubien, Saudobēd Esus tantiaquid utsitedi yacno choshon Bednaben yuedpanēdash. Aden yuedshun: —Saudon Damasco yacno nidquin Nuquin Icho ispac caosh. Nuquin Icho Saudobēd onquepac caosh. Adanec Damasco yacno choshon dacuēdenquiocquin Esus chuibampac caosh, quequin Saudon naid Bednaben chuibampapanēdash.

²⁸ Aden Bednaben chuibanac Esus tantiaquido Saudo dacuēdenquiocnobi aidobēdi capuquin Saudon anoshombidi Esus chuibanoapanēdash.

²⁹ Ambo capuquin isadaidbo quidiecon onqueten onquequido istuidshun Saudon adēmbidi Esus chuibanacsho tantiaashun aid cuesunenuequin aidontsen cainoapanēdash. ³⁰ Aden Saudo cuesunenuen, cainec qesho tantiaashun Sesadeya caid yacnoshon Esus tantiaquidon Saudo buanshun abi tishondacno Tadso caid yacno Saudouidtsēqui nidmepanēdash.

³¹ Adashic Saudo nidmian cuesunenushē quenquo yec Esus tantiaquido nidaid Udeya caid yacnoquido yec nidaid Cadidia caid yacnoquido yec nidaid Madadia caid yacnoquido yec quec dacuēdenquo yec tabadpanēdash. Adeccuidēncuenash Saudo Esus tantiaquido yec quec dacuēdenquo yec tabadpanēdash. Adeccuidēncuenash Saudo Esus tantiaquido yec quec dacuēdenquo yec tabadpanēdash. Adeccuidēncuenash Saudo Esus tantiaquido yec quec dacuēdenquo yec tabadpanēdash. Adeccuidēncuenash Saudo Esus tantiaquido yec quec dacuēdenquo yec tabadpanēdash.

tabadquin Esus chuisho tantiesa ichoedi Esus tantiaquid dadpenquoio yampanēdash.

Petedon Ananias Dodcastsen bēdamiaid

³² Adnubien, utsi-utsien isbidanec nidequi Dida caid yacnotsen Esus tantiaquid utsibo isec Petedo nidoapanēdash. ³³ Ambo choshon dada, Eneyas cuēmēdquid, seta dadpen 8ted matamec canite tsasiaid Petedon istuidshun: ³⁴ —Esusēn mibi bēdamiaque. Nidtoson min uete buanun nactana, Eneyas —Petedon cac Eneyas badedquoio nidtoash capupanēdash. ³⁵ Eneyas capusho isash Dida yacnocquidobēdi nidaid Sadon caid yacnocquido Esus tantiaquid yampanēdash.

³⁶ Adnubien Dida uditšec shubu dadpen icquid Ope caid yacnocquid, Esus tantiaquid utsi, chido, Tabita cuēnshumbi quidiecon onqueten Dodcas cain cuēnaid tabadpanēdash. Aidi bēdambocquid icquin badiadquidēnbadiadquidēnquien pete nibēdquido menedenepanēdash. Adembidi aton na nibēdquido Dodcasēn menedenepanēdash. ³⁷ Aidi Petedo Dida yacno icnubi icsabudec unēsō isun abēd icquidon dapanshun shubu abuc quēnē icquidēn nampanēdash. ³⁸ Aden nanshun, Petedo Dida yacno tabadec, qesho tantishun aid chomenuequin dada daēd Petedo tabadacno nidmiac aid daēdi Petedo tabadacno choshon Dodcas unēsboed chuishun: —Nidtuidentquoio yec badedquoio ēbēdi cho —cac ³⁹ abēdi badedquoio Ope yacno Petedo nidpanēdash. Adecc nidec Ope yacno chosho isun abuc quēnē icquidēn puduedmepanēdash. Ambo puduedsho isun shubiquimbi niantebon Dodcasēn tuscaboed dashcute dadpen Petedo ismepanēdash.

⁴⁰ Adosho isun abitedi puduemias danēshēn sebudash Nuquin Papa chiec onquetanec nidtoson unēsboed isquin: —Nidto, Dodcas —Petedon cac uincuenequi Petedo isec Dodcas badedi uētsēdtopanēdash. ⁴¹ Uētsēdtošo isun mēdinquin nidtomeshun niantebobēdta Esus tantiaquid utsibo cuēnquin chochomeshun uincuemboed ismepanēdash. ⁴² Aden Dodcas ismesho isash aton shubuno nidanequin Dodcas uincuenaid chiac Ope yacnocquido dadpen Esus tantiaquid yampanēdash. ⁴³ Adnubien Petedo Ope yacnocquid nidaidēn capuquid bitsi uashun chodcashun nacnenquid Simombēd yuec Petedo tabadpanēdash.

10

Petedo Codnedion chomiaid

¹ Adnubien shubu dadpen icquid Sesadeya caid yacno Codnedio cuēmēdquid isadaidpembo nidaid Itadia caid yacnoēsh Sesadeya caid yacno choash tabadpanēdash. Aidi sondado dadpen 100tedi chuiquid icpanēdash.

² Aidi aton shubun icquidobēdi Nuquin Papa tantiaquid icquin isadaidbo aton na nibēdquid icsho isun menebanquid icpanēdash. Adeccbidi Nuquin Papa chiec onquianedenepanēdash. ³ Adquid yec ushē budtsambi tedes yanuc Nuquin Papa chiec onquequimbi ushacimboecquin Nuquin Papan uaid mayan bēda Codnedion ispanēdash. Nuquin Papan uaid mayan bēda choshon: —Codnedio —capanēdash.

⁴ Adsho tantias dachuēdquin comapenen isec: —¿Atotsibi name, Icho? —quepanēdash Codnedio.

Adoquien: —Abi chiec mibi onquedenesho Nuquin Papan tantiec. Adembidi aton na nibēdquid tantiaquin menedenequid mibi icsho Nuquin Papan bēdamboen isaid mibi neque. Chuinu. Tantiata. ⁵ Nēbi Simon cuēnshumbic Petedo cuēnoaid ma bednu mimbi namiaido Ope yacno nidmetan. ⁶ Simon utsi nidaidēn capuquid bitsi uashun chodcashun nacnenquidbēd tabadec.

Aidën shubu acte cuëmambi iquec —quepanëdash Nuquin Papan uaid mayan bëda Codnedio chiec.

⁷ Aden chianec Nuquin Papan uaid mayan bëda nidambi Codnedion aton yua daëdbëdta sondado abentsëc chomeshun ⁸ Nuquin Papan uaid mayan bëdan chuibocpaden Petedo bedmenuen ambi namiaido Codnedion nidmepanëdash.

Petedon ushacbimboec tsadquin isaid

⁹ Adashic, ushë cuembocno Ope anoentsëqui Codnedion nidmiaido chonobi Petedo Nuquin Papa chiec onquenuc shubu macano pada-padapambocquid yacno dectatopanëdash. ¹⁰ Adec dectatoash shubu icbon codocanubi Petedo bundoec ushacbimboec tsadquimbic ¹¹ abu posonianec abi yacmi dabidiete dapabiecquid bucun dënëshbudcuenaïd budsho Petedon ispanëdash. ¹² Aidënquo ambi petequid ambi petemaid chedo nidaidën capuquid tacbidën capuquidbëd pôdochoquid chedo antabëdpanëdash. ¹³ Adnubien: —Nidtochon cuesuneshun pe, Petedo —capanëdash abucuësh onquequin.

¹⁴ Adoaquien: —¿Abida cai? Èmbi petemaid tauishun mibi shëdmetemaidquo antabëdquid nec. Adquid piamboccombi, Icho —quepanëdash Petedo.

¹⁵ Adoaquien padpidec abucuësh onquec: —Nuquin Papan bëdambo icmiaïd icsambo iquec cainda —quepanëdash. ¹⁶ Adotanquimbic antabëdquid abuc buanshun adomboembidi abentsëc chotsëcnuc budmequin adembi Petedo chuishun abuc shëcuë uaid yacno badedquo buanshun puduedmeopanëdash.

¹⁷ Adosho isash Petedo ambi isboed tantiec tsadnubi Codnedion chomiaïdo Simonën shubu istuidash shëcuë cuëmano choec nidtuidpanëdash. ¹⁸ Choec nidtuidash: —¿Nëmboda Simon Petedo tabadec? —quetuidpanëdash.

¹⁹ Aden chuituidnubi ambi isboed tantiec Petedo tsadsho Nuquin Papan Mayanën: —Dada abentsëc chotsec choshon mibi nibë nec. ²⁰ Èmbi chomiaïdo neque. Budash cacuidenquo yec aidobëdi nidan —capanëdash.

²¹ Aden chiac budshun Codnedion chomiaïdo isash: —Mimbi nibënaïd nebi. ¿Atotsi quec cho? —quepanëdash Petedo.

²² Adoaquien: —Codnedio cuëmëdquidën chomiaïd nebi. Aidi sondado dadpen chuiquid bëdambocquidquo nec. Adquid icquin Nuquin Papan chiacpaden nabansho isun isadaïdbon bëdamboen isaidquo nec. Aidi Nuquin Papan chomiaïd mayan bëdan naden chuipac caosh. “Simon cuënshumbic Petedo cuënoaïd bedmetan. Bëac chuibansho tantiaïta,” quequin Nuquin Papan uaid mayan bëdan ëbi chuiposh quequin Codnedion ëbitedi chuioposh —quepanëdash Codnedion chomiaïdo Petedo chiec.

²³ Adoaquien: —Pudued —quepanëdash Petedo.

Adashic badiadanec Codnedion chomiaïdobëd Petedo nidsho isash Esuquidistu tantiaquid Ope yacnocquid utsin-utsinquien tsibanampanëdash.

²⁴ Adec nidanec Sesadeya caïd yacno chopanëdash. Adnubien, Nëid ushëmbien chochitec, quequin tantiaishun Codnedion aton shubun icquido abi isedquid chedo Petedon chuibansho tantiamenuen aton shubu nuntan iccuededmepanëdash. ²⁵ Aden iccuededmiac tabadnubi utsibobëd choec Petedo chedo puduedsho isash, Mibi bëdambocquid icnubi adesa nebi, quequin Petedo ismëc danëshën sebudec shuebudash Petedo bëisenquo yec Codnedio uepanëdash.

²⁶ Adec uesho isash Petedo: —Mibipadquid nebique. Nidtotä —quepanëdash Codnedio caic.

²⁷ Adtanec Codnediobéd onquetanec quēnē utsin puduedshun isadaid-pembo dadpen Petedon istuidpanēdash. ²⁸ Aden aido isec: —Isadaidbo nebi. Adquid yec isadaidpembobéd capuesa neyobi. Adecbidi min shubun puduedesa neyobi. Adesa icboedi Nuquin Papan, Matses utsibo ëmbi bédamboen isaid icsambo iquec cainda, quequin ismequin ëbi tantiamiac ²⁹ mimbi ëbi bedmiaido choacsho isash, Mibéd capuesa nebi, quenquoio yec chobi. Adecbidi nēmbō choash isadaidpembon shubu nec. Nēmbō puduedtiapimbo iquebi, quenquoio yec puduedobi. Nēbi Tantanu. Chui. ¿Atotsieshun ëbi chomio? —quepanēdash Petedo Codnedio chiec.

³⁰ Adoaquien Codnedio: —Abentsēc choec ushanec ushē budec tedes yanubi Nuquin Papa tantiec buna mēmumec con shubu nuntanūesh Nuquin Papa chiec onquec tsadobi. Adnubien dashcute shocosh bed-bedquiabimboec dasiuidquid ëbi yacmi Nuquin Papan budmiac onquec: ³¹ “Codnedio, mibi Nuquin Papa chiec onquesho Nuquin Papan tantiec. Adembidi aton na nibédquido mimbi menebansho aidēmbi bēpiscudenquoio icquin tantiec. ³² Nuquin Papa bédamboen tantianuen Simon cashumbic Petedo caid Ope yacnocquidbéd tabadquid ma chono queshun mimbi namiaido nidmeta. Aidi Simon cuēmēdquid utsi nidaidēn capuquid bitsi uashun chodcashun nacnenquidbéd tabadec. Aidēn shubu acte cuēmambi iquec,” quec Nuquin Papan uaid mayan bēda onqueposh. ³³ Aden chiac: “Petedo bedtan,” quequin ëmbi namiaido nidmiombi. Adoac bédambocquid yec cacuidanenquoio yec badedquoio mibi choc. Adec mibi choacsho isash bédambo iquebi. Nuquin Papan nuqui isnubi ambi mibi tantiamiacpaden chuibansho tantiec tabadnuna —quepanēdash Codnedio Petedo chiec.

Codnedion shubu nuntanshun Petedon chuibanaid

³⁴ Aden Codnedion chuiban cac Petedon naden chuipanēdash: —Matses utsi nec, quenquiocquin Nuquin Papan yuedaid matses utsi-utsiec nec, quequin nēbi abimbo tantiemi. ³⁵ Nuquin Papan chiaid tantiashun matses utsin-utsinquien chieshēnenquiocquin bédamboen nabansho isun, Aidedi Nuquin Papan abi yacno yuedendac, quequin tantiemi. ³⁶ Èndenquimboshē Nuquin Papan dada uamequin con tsusedpabo isadaidbon tishmiaido caidaido naden chuipampic: Esuquidistu abentsēqui matsestedi chuquid icnubi utsibéd bédamboec tabadendac. ³⁷ Nidaid Cadidia yacnoshon Uan padon chuibanquin acten mentoquien Esuquidistun ambi naid tauapon-dash. Mibitedishun aid tantiondac. ³⁸ Ma abéd tabadnueshun Nuquin Papan aton Mayan meniac nadatiambocquin Esuquidistun nabampondash. Adquid icquin Esuquidistu shubu dadpen icquid Nasaded yacnoshon tishaïd yec capuquin bédamboen nabanquin abi chieshēnquidēn Satanas caidēn mēyanaido Esuquidistun bédamebampondash. Adoshō mibitedishun isbam-pondac. ³⁹ Isadaidbon nidaid, Udeya caid yacnoshon shubu dadpen icquid Edusaden yacnoshombidi Esuquidistun nabansho ispondambi. Aidi cuesten dectanquin isadaidbon unēs uaqui ⁴⁰ uincuenash, Uincuenobi, quequin Esuquidistun ismebempōndashi. ⁴¹ Aidi uincuenashun matsestedi ismenquiocquin aidbēdtan peshun acquidotedictēsēqui Esuquidistun ismepon-dashi. ⁴² Abēdi icshobi, Èbi chuibanquin matses icsaid cuidte chuibante ushē choec quequin chui, cac nebi. ⁴³ Adembidi Nuquin Papan chuibanacpadom-boen dada uampidon Esuquidistu tantiaquin, Nuquin Papan chomiaïd Quidistu nec, quequin chuiquin dada uampic. Aden chuiquin dada uampid abimbo tantiaquid icquin abi icsaid ēnsho isash abi icsaid Nuquin Papa bēpiscudendac. Esuquidistu chuiquin aden dada uapampic —quepanēdash Petedo Codnedion shubun iccuededquido tantiamequin chiec.

Isadaidpembo Nuquin Papan aton Mayan meniaid

⁴⁴ Aden Petedon chuibanshobi abitedi tantiaquid icsho isun Nuquin Papan ma abèd tabadnueshun aton Mayan menepanèdash. ⁴⁵⁻⁴⁶ Aden meniac isadaidpembo nèbi Esuquidistu tantiaquido yanshun abi onquiamaidènquo utsin onqueten onquequin Nuquin Papa chiec cuèdèmpanèdash. Adsho tantiash Petedobèd cho-choboedo isadaidbo aton tsusedpabon nacpaden shui dèbid dètemequido: —¡Padtec! Tantiadempamboctequid nec. Isadaidpembotsen Nuquin Papan aton Mayan meniac —quepanèdash isadaidbo Petedobèd cho-choboedo.

⁴⁷ Adoaquien: —Nuquin Papan aton Mayan meniaido icquin Esuquidistu tantiaquido neque. ¿Adquid icsho acten mentoenda ictic? ⁴⁸ Aid, acten mentometa —capanèdash Petedon.

Aden acten mentoalui: —Nuquibi tabadnuna —cac Petedobèd cho-choboedo acten mentoaidobèd daèdpacksèc ushec tabadpanèdash.

11

Isadaidbo Petedon ambi naid chiaid

¹ Adnubien utsibo Sesadeya caid yacnoèsh puduanec nidequi nidaid Udeya caid yacno choshon, Sesadeya caid yacnoquidon isadaidpembon Nuquin Papan chiaid bédamboen tantiash Esuquidistu tantiaquido yanosh, quequin chuipanèdash. Anoshon chuibètsenec Edusaden yacnotsen choshon adomboembidi chuiopanèdash. ² Aden chuisho anocquidon Esuquidistu tantiaquid utsibon tantiash tsusedpabon chiapadomboen shui dèbid dètemequido yec Petedo nèmbo choacsho isun, Aidi ambi nabanaiid chuimenu, quequin caimpanèdash. Aden cainubic Petedo choacsho isash ³ comapenec onquecuededec: —Isadaidpembo shui dèbid dètemesabo icnuc aton shubun puduedtemiaidquio nec, quequin tsusedpabon chiaid niaquec aidon shubun puduedshun mimbi pepac caoc. ¿Midapaden tantiec puduedshun mimbi piaye? Chui. Tiantanu —quepanèdash Edusaden yacno tabadquido.

⁴ Adoaquien Petedon nadopanèdash: —Aidobèd èbi tabadboed chuibanu. Tantiata. ⁵ Ope yacnoèsh Nuquin Papa chiec onquequin ushacimboen naden ispombi. Abuc posonianec èbi yacmi dabidiete dapabiecquid dènèshbudcuenaid budposh. ⁶ Aidènquo nidaidèn capuquid tacbidèn capuquidbèd podochoquid chedo antabèdsho ispombi. Aidèn antabèdquid nuqui petequidbèd nuqui petemaid icposh. ⁷ Adquid icsho isnubi: ‘Nidtoson cuesuneshun pe,’ caposhi. ⁸ Adsho tantiashun: ‘Aidtedi èmbi petemaid tauiquin mibi shèdmetemaidquio nec. Adquid pesambo nebi, Icho,’ capombi. ⁹ Adoaquien abucuèsh padpidec onquequin: ‘Nuquin Papan bédambo icmiaid icsambo iquec cainda,’ caposhi. ¹⁰ Adomboembidi abentsèc chotsècnc tabècaido abuc buanshun padpiden budmeshun adembidi chuishun buanshun abitedi abuc puduedmeoaposh. ¹¹ Abuc buanoabombic dada abentsèc chotsec Sesadeya caid yacnoèsh choquido shubu shècuè cuèmano nidtuidash nidpac caosh. ¹² Aidtedi icnubi Nuquin Papan Mayan: ‘Aidobèdi cacuidenquio yec nidan,’ qesho tantiash aidobèdi nidpobi. Aidobèd Ope yacnocquido dada 6ted Esuquidistu tantiaquido puduanec nidec Codnedion shubun èbèdi puduedposh. ¹³ Puduedacsho isash Codnedio: ‘Nuquin Papan chomiaidèn ambi uaid mayan bédan naden chuiposhi: Simon cuèshumbic Petedo caid Ope yacno tabadeque. Aid bedmenuen mimbi namiaido nidmeta. ¹⁴ Aidèmbi mibèd icquidtedi Nuquin Papa yacno puduedmianquid chuibanendac, quequin Nuquin Papan uaid mayan bédan chuiposhi,’ quequin Codnedion chuioposhi.

15 “Adoac Esuquidistu chiombi. Aden chuinubi aton Mayan ëbitedi Nuquin Papan meniacpadembi aidotsen meneoaposh. 16 Aden meniacsho isun Nuquin Icho Esuquidistun chiondaid ëmbembi tantiatsëcquieq tsadpobi. Nad icpondash: Uan padon acten mentopondashi. Nuquin Papan ambi aton Mayan meniaid mibi iquendac, quequin chuipondash Nuquin Icho Esuquidistun. 17 ¿Aden isadaidpembotsen Esuquidistu tantiaquid yansho Nuquin Papan aton Mayan aidotsen menesho, Padi. Menenda, caindambi icti? —quepanëdash Petedo shui dëbid dëtemequid utsibo chieq.

18 Aden Petedon nainquin chuibanac tantiadempambo yec tabadec isadaidbo shui dëbid dëtemequido: —Isadaidpemo abi icsaid ënsho isun Nuquin Papan aidotsen abëd icquid icmeoapac —quepanëdash Nuquin Papan naid chieq.

Antioquiya yacnoshomba Esus tantiaquido iccuedaid

19 Esteban cuënoten seshuniash: “Esuquidistu tantiaquido cuesunenu,” qesho tantiash ëbitsen cuesunenushë quianec Edusaden caid yacnoësh Esuquidistu tantiaquid utsi-utsieq nidanepanëdash. Nidequi nidaid Penisia caid yacno choash utsi-utiec tabadnubi utsi-utiec acte nënantanquio nidaid nacnëdquid Chipide caid yacno choash tabadnubi utsi-utiec shubu dadpen icquid Antioquiya caid yacno choash utsi-utiec tabadquin aton matses isadaidboudi Esuquidistu chuibanpanëdash. 20 Adshumbic, utsibo Chipide caid yacnoësh Antioquiya yacno cho-choquidobëdtan nidaid Sidene yacnoësh Antioquiya yacno cho-choquidon isadaidpemo Esuquidistu tantiamenuen chuibanpanëdash. 21 Aden chuibanu, qesho Nuquin Papan bëdamboen tantiamiac aidon chuibanaid tantiashun isadaidpemon: Èbi icsaid ënu, quequin ënash Esuquidistu tantiaquid dadpen yampanëdash.

22 Adec isadaidpemo Esuquidistu tantiaquid dadpen yanosh, qesho tantiashun Esuquidistu tantiaquid utsibon Edusaden yacnocquidon Antioquiya yacno Bednabe nidmepanëdash. 23 Aidi Edusaden yacnoësh puduanec nidequi Antioquiya yacno choshon anocquido Esuquidistu tantiaquido Nuquin Papan bëdambo icmiaid icsho isash: —Cuishon. Bëdambo iguec. Adembi tantiaquin chieshenquiocquin Esuquidistu tantiata —quepanëdash Bednabe. 24 Bednabe bëdamboquid icsho Nuquin Papan aton Mayan meniac Esuquidistu bëdamboen tantiaquidquido icquin Esuquidistu chuibanac Esuquidistu tantiaquid utsi-utiec dadpen yampanëdash.

25 Adashic Antioquiya yacnoësh puduanec Saudo bednuec nidequi shubu dadpen icquid Tadso caid yacno choshon 26 Saudo istuidash Antioquiya yacno aibdëdi Bednabe choapanëdash. Ambo choash seta abentsëc matamec anocquid Esuquidistu tantiaquidobëd iccuedequin Esuquidistu chuibanquin aid daëdshun tantiamepanëdash. Aden chuiban-chuibanac Esuquidistu tantiaquid dadpen yansho isun, Quidistubo nec, quequin Antioquiya yacnoshomba Esuquidistu tantiesabon Esuquidistu tantiaquido cuëmpañdash.

27 Bednabebëd Saudo Antioquiya yacno tabadnubien Edusaden yacnoësh Antioquiya yacno Nuquin Papan yuecquido icshun nanun chiaid chuiquido cho-chopanëdash. 28 Cho-choshon abentsëcquido Accabo cuëmëdquid Nuquin Papan Mayanën oncamiac: —Yuec-yuecpactsëc yash nidaidtedi yacnocquidon pete nibëdendac —quepanëdash. Aden chiambic shubu dadpenquioshë icquid Doma yacnocquido ancaquid Qüëdaudio cuëmëdquid icnubi pete nibëdquieq yampanëdash. 29 Adnubic, Udeya yacnocquidon pete nibëdec, qesho tantiashun Esuquidistu tantiaquidon Antioquiya yacnocquidon aton piucquid adquido menenuen ambi dayun uaidtedi Edusaden yacno buamepanëdash. 30 Esuquidistu tantiaquido Edusaden yacnocquido

chuiquido nëid piucquid menetanta ma pete bunquido menenueshun, quequin ambi dayun uaidtedi Bednabebëdta Saudo menequin Edusaden yacno buamepanëdash Antioquiya yacno tabadquin Esus tantiaquidon.

12

Acobo cuesuniaidbëdta Petedo quënë nauedaid Nuquin Papan puduemaiad

¹ Adnubien Edusaden caid yacno tabadquid domanobo ancaquid Edodes cuëmëdquidëmbi Esuquidistu tantiec iccuededquido utsi-utsien comapenen mëyanuequin bedmeshun quënë nauedmepanëdash. ² Aido quënë nauedmeshun Esuquidistun ëbi chuibeneta caid abëd capucueboed Acobo cuëmëdquid chështen cuesunemepanëdash. Acobon utsimbo Esuquidistun ëbi chuibeneta caid abëd capucueboed utsi Uan nepanëdash. ³ Adoac, Acobo cuesuniosh, qesho tantias isadaidbo utsibo, Esuquidistu tantiesabo: —Bëdamboen Edodesën naosh —quepanëdash aido. Adec onquesho tantias Edodes: Isadaidbon pan bidisquesa tantiaid ushë choec, quequin Esuquidistun ëbi chuibeneta caid utsi, Petedo cuëmëdquid, bedmeshun quënë nauedmepanëdash. ⁴ Aden quënë nauedmeshun Petedo cuenushë qeshun sondado 4ted quënë nuntan tabadmehun pan nami uambocquid petequid tantiaid ushëtedi naimëdambi ambi naid icsa Petedo chuimenuquin Edodesën caimpanëdash. Adnubien quënë nuntanshun Petedobëdta mëtaniaid sondado daëd uenubi utsi daëdshun shëcuë ëctabëdquin Petedo isec tabadpanëdash. Aid isquidotedi badiadnuc puduedshun isanec ushë abuctotsan nidnubi utsibotsen 4tedbidi choshon isanec ushë cuembocnoc nidoanubi utsibotsen 4tedbidi choshon isanec ushë budtsan nidnubi utsibotsen 4tedbidi choshon isanec inchështsëcnubi badiadnuc isboedo choapanëdash. Adecbidi isboed utsibo inchëshëmbi padpiden isec choapanëdash. ⁵ Adnubien Esuquidistu tantiaquido iccuededash Nuquin Papa Petedo quënë nauedaid chiec yuec onquepanëdash.

⁶ Adshumbic, Badiadshun Petedo bëmëmbi, quequin Edodesën tantianubi aid inchëshëmbi Petedo bucn mëtaniacchobi ushnubi ⁷ Nuquin Icbon chomiaid, ambi uaid mayan bëda, nibëdquiochobedi Petedon dayun choan quënë nuntan comapenec chënquepanëdash. Aidën Petedon dayun choshon shictodo macuesquin: —Baded nidto —cac nidtonobi seccuduquec shocosh bucu mëtaniaid mëchiquidpanëdash. ⁸ Adtanquimbien Nuquin Papan uaid mayan bëdan: —Chinëshëdtanec tapucudta —cac Petedo chinëshëdtanec tapucudpanëdash.

Adsho isash: —Min dashcute bëntsecquid dasiuidshun ëbi tsiban —quianec nidsho ⁹ Nuquin Papan uaid mayan bëda nidsho isacbimboecquin abimbo tantienquiocquin Petedon tsibanampanëdash. ¹⁰ Adec nidquimbi sondado abëdta mëtaniaidën tantienquio icnubi datanshun shëcuë isquid daëdshumbidi tantienquio icnubi aidoatsen datanoashumbic umanuc puduenunubi shocosh shëcuë abëmbi shëcniadpanëdash. Adsho isash puduenash podqued abentsëcquidën nidquimbic Nuquin Papan uaid mayan bëda abëd icboedi badedquio nidquin Petedo niampanëdash. ¹¹ Abëd icboed nibëdnubien Petedo padpiden tantiaquie: —Edodesbëd isadaidbo, Esuquidistu tantiesabo, ëbi cuesunete bunsho isun Nuquin Papan ëbi puduemenuen ambi uaid mayan bëda chomiosh. Abimbo iccosh —quianec Petedo nidpanëdash. ¹² Adec nidequi Nuquin Papan abi puduemeboed tantiequi Uan cashumbic Madcos caidën títan shubu yacno Petedo chopanëdash. Aidën tita Madia cuëmëdquid icpanëdash. Ambobi Esuquidistu tantiaquid dadpen iccuededec Nuquin Papa chiec onquepanëdash. ¹³ Adnubien choshon Petedon shëcuë tosh-toshcasha tantias chido yua Doda cuëmëdquid

isnuec nidtopanēdash. ¹⁴ Aid shubu shēcuē yacno choshon Petedon cuēnsho tantiash bēdamboshē iquequi shēcnenquio yec auchidi titinquec: —Petedo shēcuē yacno choash nidec —quequin iccuededquido chuituidpanēdash.

¹⁵ Adsho Nuquin Papa chiec iccuededquidon abimbo tantienquioquin: —Muequi mibi nec. Aidida ispash neba —quepanēdash iccuededquido.

Adoaquien: —Ma aidquiobi nebec. ¿Utsida neque? Mimbimbo mua quenun istan.

Caquien: —Petedo dayun uaquin isquid, Nuquin Papan uaid mayan bēda ischitashien nec —quepanēdash tantiesa.

¹⁶ Adnubi padprien Petedon tosh-toshcasha shēcnequin isash: —¡Tso! Abimbo caic —quēcuededpanēdash.

¹⁷ Adnubien mēdante uic-uiccaic Petedo: —Onquenuio yec tabadquin tantiata. Ēbi nashunquin Nuquin Icbon naboed chuibanu —quepanēdash Petedo abi quēnēn nauedacnoshon Nuquin Papan puduemaiāid chuibanec. Aden chiash: —Ēbi puduemaiāid Esuquidistun utsi, Acobobēda Esus tantiaquid utsibo chuitanta —quianec puduenanec utsi yacno Petedo nidpanēdash.

¹⁸ Adashic, badiadnubi quēnē nuntan Petedobēd icboed sondadotedi: —¿Mitsimbo nuquibēda mētaneboed icpec? Nibēdeque. Is —quēc dacuēdpanēdash.

Adashic, Petedo nibēdec, quequin sondadon chiac ¹⁹ Edodesēn: —Nibētan —cac nidshun sondadon istuidenquiocsho isun quēnē nuntanshun Petedo isquido ambi quēnēn tabadquin nabamboed chuimeshumbi aidotedi Edodesēn cuesunemepanēdash.

Edodes unēsaid

Adashic, Edodes nidaid Udeya caid yacno abi tabadacnoēsh puduanec shubu dadpen icquid Sesadeya caid yacno choash tabadpanēdash.

²⁰ Sesadeya caid yacno anoentsēcbidi shubu dadpen icquid utsi Sidon caid icpanēdash. Tido caid yacnoquidbēd Sidon caid yacnoquido Edodesbēd chushcananquido icboedi padenquio yanec tabadpanēdash. Adec chushcananenquio yec tabadquin, Sesadeya yacno Edodes choash tabadosh, quesho tantiash Edodesēn yua Bēdasto cuēmēdquidbēd onquenuec cho-chopanēdash. Choshon, Ēmbi pete nibēdsho isun Edodesēn menioshi. Nēbi aid chushcainquio iquēmbi, quiosh, quequin cho-choquidon chuituidpanēdash. Aden chiac adomboembidi Bēdaston Edodes chuioapanēdash.

²¹ Aden adomboembidi Bēdaston chuioasho tantiashun Edodesēn: —Ēmbi chiacpadēn chochoata, quiosh Edodes, quequin chuita —cac cho-choquido Bēdaston chuioapanēdash. Aden chiac Edodes onquesho tantianuec ambi chiacstedec ushash dashcute nac-nacquiocquid dasiuidash abembi onquenuc tsadten abuc tsadtoash onquec taēpanēdash.

²² Aid onquesho tantiash: —Nidaidēnshun tishaid onquaiāidpenquio nec. Abuc tabadquid nuquin papa caidien Edodes nechitec —quēc iccuededquido comapenec cuēdcuededpanēdash.

²³ Aden chuisho tantiash, Mimbimbo Nuquin Papa caidpenquio nebique. Aidi abia yampid abentsēcquiobi iqueque. Aiduidi tantiata, quequin chuitiadquidēmbi chienquio icsho tantiashun Nuquin Papan chomiaidēn ambi uaid mayan bēdan daicsa uac chichan dadpen yanec Edodes badedi unēsapanēdash.

²⁴ Adnubien Esuquidistu tantiaquidon ambi tantiaid Esus chuibanachuibanac Esus tantiaquid utsi-utsiec dadpen yampanēdash.

²⁵ Adnubic Antioquiya yacnoquidon Esuquidistu tantiaquidon aton picquid ambi menenuen dayun uaid Bednabebēda Saudo meniac buanec Edusaden yacno choshon anocquido Esuquidistu tantiaquido menetanshic

auëshquio puduanec Antioquiya yacno nidoapanêdash. Aidobêdi Uan cashumbic Madcos caid nidpanêdash.

13

Saudobêdtabi Bednabe nidmiaid

¹ Adashic, Esuquidistu tantiaquid utsi-utsiec Nuquin Papan yuecquio icshun nanun chiaid chuiquido Antioquiya caid yacno tabadnubi Esuquidistu tantiamenuen chuibanquido tabadoapanêdash. Nêidic, Bednabe; utsibic, Simon, Dada Chêshê caid; utsibic, Sidene yacnoêsh choquid, Dusio cuêmêdquid; utsibic, Cadidia yacnoêsh choquid, tsusio dapa, Edodesên shubun icquid ichoedi, Manain cuêmêdquid; utsibic, Saudo cuêmêdquid. ² Aidedishun Esuquidistuidi tantianuen buna mêmunsho Nuquin Papan Mayanên: — Saudobêdtan Bednaben aid daêdshun êmbi chuibocpaden ma napanuna — capanêdash. ³ Adoaquien, buna mêmunquin nainash Nuquin Papa chiec onqueshun abêd icquid utsibon mêdanten Saudo Bednabebêdta mamishquin nadopanêdash: —Nidaid utsi-utsiec yacno nidshun Nuquin Papan chiacpaden Esuquidistu chuibenetan —capanêdash abêd icquidon.

Chipide yacnoshon Esuquidistu chuibanaid

⁴⁻⁵ Esus tantiaquidon mamishquin chiaquien Nuquin Papan Mayanên nidmiac Saudobêd Bednabe Antioquiya yacnoêsh puduanec nidpanêdash. Aid daêd nidsho isash Uan cashumbic Madcos cain cuênaid nidpanêdash dada uate buanshunec. Aidedti nidanec acte cuêman shubu dadpen icquid Sedusia caid yacno choash cano antabêdtoanec acte nênantanquio nidaid nactnêdquid Chipide caid yacno nidtampanêdash. Chipide yacno choash nidequi shubu dadpen icquid Sadamina caid yacno choapanêdash. Adec choash tabadec aton matses isadaidbo iccuedadacno choash puduedshun Nuquin Papan chiaid dada uamiampid Saudon Bednabebêdtan chuibanpanêdash. ⁶ Adoshombic, Sadamina yacnoêsh nidquin chuibidanec Chipide cuêma utsiuc shubu dadpen icquid Pabos caid yacnotsen choash tabadoapanêdash. Ambo tabadquin isadaidbo Badesus istuidpanêdash Pabadobêd icquidon. Satanasên tantiamiaid icquin abimbo chiacbimboec, Nuquin Papan yuecquio icshun nanun chiaid chuiquidquio nebi, quequin muaquin chuipanêdash Badesusên. ⁷ Aidi Pabos yacnocquido tsusion shubun tabadpanêdash. Anocquido tsusio cobednadod caid Sedquio Paudo cuêmêdquid icpanêdash. Aidi tantiaquiono, quec tabadquin, Isêdquido chosh, qesho tantiash, Aidon chuibanaid tantianu, qeshun Saudobêdta Bednabe chomeshun tsusion yuedpanêdash. ⁸ Yuedac Pabadon Esuquidistu chuibanpanêdash. Saudo quequin isadaidbon cuênubi Pabado quequin isadaidpembon cuêmpanêdash. Aden Pabadon Esuquidistu chuibansho tantiec tsusio tsadsho isun Badesusên tantiamenquiocnuen utsi uain chuiopanêdash. Ambi ompoaid ismianesa Badesus icsho Edimus cuêmpanêdash. ⁹ Aden utsi uain chuisho tantiaishun Nuquin Papan Mayanên tantiamiac Edimus bêssequi Pabado: ¹⁰ —Satanasên bacuê yec bêdamboen naidbêdta bêdamboen chiaid tantiesa mibi nec. Nuquin Papan namiaid nebi, quequin ompoaid ismenquiocquimbi Nuquin Papan chiaid utsi uaquin muaquin mimbi adenuidi chuibaneeque. Tanta. ¹¹ Nêbi con Icbon mibi mêyanquin bêshu uaindac. Ushê chênqesho mimbi yuen isenquio iquendac —quepanêdash Pabado Edimus chîec.

Aden chuibon Edimusên êshê cuen-cuempambo yec inchêshbudacimboc yanash: —¿Tsuntsimbini mēdinshun buampeba? —quequin nibêdacno mishquin uēmbampanêdash. ¹² Aden Edimus bêshu uacsho isec: —Nuquin

Icbon chiaid abimbo iquec —quiash tsusio Sedquio Paudo cuëmédquid Esuquidistu tantiaquid yampanédash.

Nidaid utsi, Pisidia caidën shubu dadpen icquid Antioquiya caid utsi yacno Bednabe Pabadobëdi choash tabadoaid

¹³ Adashic, Chipide yacnoësh puđuanec nidaid Pampidia caid yacno Pabadobëd icquido canon potepanédash. Aden potiaşh nidaid Pampidia caid yacno choaşh Pabadobëd Bednabe pudundonobi Uan cashumbic Madcos caidbidi Edusaden yacno nidoaic cuëshëdpanédash. Adec Pabadobëd Bednabe pudundoanec nidquin shubu dadpen icquid Pedque caid ¹⁴ isbidanec nidaid Pisidia caid yacno shubu dadpen icquid Antioquiya yacno chopanédash. ¹⁵ Ambobi tabadequi chonoadtemaid ushën Nuquin Papan chiaid chuibante shubun puduedaşh tabadpanédash. Ambo tabadnubien Nuquin Papan Moises dada uamiampid isec onquequin chuibanshumbic Nuquin Papan yuecquio icshun nanun chianiaid dada uamepampidtsen isec onquequin nainambic tsusion: —Isedquido iqueque. Aid daëdi tabadacno nidshun, ¿Ëbitedi bédambo icmenuen chuibanquin tantiametiadquio ada mibi icpe? cata —tsusion cac ambi namiaid nidshun tsusion chiacpaden Pabadobëdta Bednabe chuituidpanédash.

¹⁶ Adoquien abi tsadacnoësh nidoaşhi Pabado: —Nuquin Papan naid mibi chiembique. Tantiaquiota. ¹⁷ Nidaid Equipito caid yacno nuquin tsusedpabo tabadshobi Nuquin Papan bédamboen isec cudasquin ambi tishmiaid dadpen caidmepampic. Adoshombic, Nuquin Papan ambi nadatiambocquin naidënquio bëyucanquin tsusedpabon tishmiaidën tishmiaid caidaido Equipito yacnoshon buanubi ¹⁸ tsusedpabon Nuquin Papan chiaid chieshëmpampic. Adoquien matses nibédacno seta dadpen 40ted matamec tabadquin, Nuquin Papan tsusedpabon ëbi chieshënaid cuidnu, quenquiocquin buampampic. ¹⁹ Aden buanquin nidaid Canan caid yacno buanshun anocquido isadaidpembo istuidmeshun matses utsibo utsi-utsiectsëcquie7 7ted icquido naimbudmeshun aidon nidaidtedi nuquin tsusedpabo menebampampic. ²⁰ Aden menebudquin dadpenquioshë seta 450ted matamequin ambobi tabadmepampic.

“Adashic, isadaidbo chuiquid utsi-utsien icmeshumbic Nuquin Papan ambi yuecquio icshun nanun chianiaid chuiquid Samued cuëmédquid tsusedpabo chuiquid icmepampic. ²¹ Aidi isadaidbo chuiquid icnubic, Matses utsibo ancaquidpadquid bunebi, quequin tantiaşhun seta dadpen 40ted matamec tabadquin Nuquin Papan Sis padon mado, Benaminën tsyuecquid Saudo cuëmédquid, isadaidbo ancaquid icmepampic. ²² Adashic, yuecash Saudo, con shënisio, Nuquin Papan chiaid tantesa uaşho isun utsitsen Dabid cuëmédquid tsusedpabo ancaquid icmeoapampic. Aidi Nuquin Papan chiacpadomboen nabanquidquio icsho isash Nuquin Papa: ‘Dabid, Isain mado, ëbi bédamboshë icmequid, ëbi bunacpaden nabanquidquio mibi nec,’ quepampic Nuquin Papa —quepanédash Pabado aton matses Antioquiya yacnocquido tantiamenuen chieç.

²³ Aden chieç abi onquec: —Dabidën tishmiaidën tishmiaid caidaid, Nuquin Papan chomiaid, Esuquidistu matses icsaid bedshunash abided cuidaşh abi yacno isadaidbo puduedmequid Nuquin Papan icmepanédash. ²⁴ Aidën nadatiambocquin nabanquin ambi nabanaid tauabicnuc Uan padon, acten mentoanquidën: ‘Mimbi tantiaid icsa ënshun acten mentome,’ capanédash. ²⁵ Adec onquetanequic matses acten mentobudquin nainec: ‘¿Mitsipaden ëbi isquin cuëmpatsia? Nuquin Papan Chomiaid mimbi cainaidpen nebi. Mimbi cainaidquio choendac. Aidi chosho isun: ¿Ëbi icsambocquid icsho atotsieshun mibi choec? quequin

chuiquidquo Nuquin Papan icmioshi, caindami, quepanēdash Uan acten mentoanquid —quepanēdash Pabado.

²⁶ Aden Uan padon chiapaden chuibanashic: —Abadauanēn tishmi-aidēn tishmiad caidaido nuqui icsho nuquitedi icsaid bedshunash abided cuidadec Esuquidistu unēspane-dash. Adsho Nuquin Papan uincuemequin abi yacno nuquitedi puduedmequid icmequin ambi chiampicpaden napanēdash. ²⁷ Padnuen, Aton madombo Nuquin Papan chomiaid Esus nec, quenquiocquin Edusaden yacnocquidobēd aton tsusio dapabo, Icsambocquid neque. Unēs ua, quequin chui-pane-dash. Aden chuiquin utsibēd iccued-edte ushēn-ushēnquien abi isec onquiaid Nuquin Papan dada uamiampic-padembi aidon napanēdash. ²⁸ Esuquidistu icsaid nibēdquidquo caiqui, Icsambocquid neque. Aid unēs uatiadquidi mibi nec, quepanēdash Isadaidbo Pidato caic. ²⁹ Adoquien Nuquin Papan dada uamiampicpaden nabanambien Esuquidistu cuestas decanquin unēs uacsho chicshun, Ēbi unēsacsho nēidēn Ēbi nauedec, quequin ambi shēcuē uain nacnenaaid chucanquio Osen Esus nauedpane-dash. ³⁰ Adoacsho Nuquin Papan Esuquidistu uincuemiac ³¹ capusho Cadidia yacnoēsh Edusaden yacno abēd capucuenoedon aidi isbepane-dash. Aden isun aidombi Esuquidistu chuibededec. Adembidi aid isboedobēdtambi abimbo chuibanquidquo nebi —quepanēdash Pabado.

³² Aden chiashic: —Abi chiembique. Tantia. Nuquin Papan chometequid ambi chuiampid tsusedpabon isenquiocnobi ³³ Nuquin Papan uincuemiacsho nuqui isondaaid aidi nec. Aidi chuiquin Nuquin Papan dada uamiampid nad iqueque. Tantia. Chuinu.

‘Con madombo mibi nec.

Nēbi Ēmbi uincuemiaqui Ēmbi chiactedi mimbi naimbudoc.

Adoshō isun Ēbipadquiocnoc chuiquid dapa mibi icmembī.’

Aden Ēndenquimboshē aton mado tantiaquin Nuquin Papan chiampic.

³⁴ Adecbidi ambi uincuemetequid Esuquidistun nami chodquesa icpane-dash. Aid chuiquin dada uamiampid nad iqueque. Tantiata. Chuinu. ‘Dabid chiampicpadembi mibi icsaisa icsho Ēmbi bēdamboen isaid mibi nec, mado,’

quequin Nuquin Papan dada uamepampic. ³⁵ Ambi dada uamiampid utsi nad iquec:

‘Icsaisa icsho aton nami chodquesa icmenuna,’

quequin Nuquin Papan chiampic.

³⁶ “¿Aden dada uamequin Dabid pado chiecta onquepampic? Paden-quo. Aidi Nuquin Papan bunacpadomboen naimbudquin nabanash Dabid unēsacsho isun aton mēdimbon nami chodquiacno Dabid chococ aidiēn namitsen chodquepampic. ³⁷ Nuquin Papan uincuemetequidēn namien chodquesa icpane-dash. ³⁸ Aidi icsainquiocquid yec Ēbitedi icsaid bedshunash abided cuidadpane-dash. ³⁹ Adoac abi tantiaquidquiot sen icsaisabidi Nuquin Papan isec. Nuquin Papan naden nata quequin dada uamiampidtedi mat-sesēn natiapimbo iquec. Aden ambi chiapaden natiapimbo yec, Nuquin Papan bēdamboen isaid nebi, quetiapimbo icboedēmbi, Matses icsaquid icsho cuidnushe quiash abided cuidadec Esus unēspane-dash, quequin tantiasho, Esuspadquid icsaisa Nuquin Papan nuqui isec. ⁴⁰ Nuquin Papan chomiaid choec, quequin tsusedpabon tantienquo icampidpadquid iquenda. Aido chuiquin Nuquin Papan dada uamiampid nad iqueque. Tantia.

⁴¹ ‘Ēmbi Ēndenquimboshē dada uamiampicpadembi adquid chomembi.

Ēmbi chomiaid isquidon chiac mimbi tantienquo icpec.

Adquid yec, Tantiadempambo iquec, quec mamēnshumēnquid Ēbēdi tabadti-apimbo iquendac.

Adquid icmane gueshun tantiaquiota'
—quepanēdash Pabado iccuededquido chiec.

⁴² Aden chuibudashic Pabado Nuquin Papan chiaid chuibante shubu yacnoēsh abēd choboedobēd puduenanec nidsho isash: —¿Iccuededte badiad utsi chonoc iccuededquin chuinuecta mibi choape? —quepanēdash iccuededquid utsibo Pabado chiec. ⁴³ Aden chianec Pabado bēd Bednabe nidsho isun isadaidbo utsin-utsinquiem bēdtan isadaidpembo isadaidbopadquid icnuequid utsin-utsinquien tsibanampanēdash. Aden abi tsibanansho isash: —Nuquin Papan bēdamboen isaid yec bēdamboec tabadta —quepanēdash Pabado Bednabebēd.

⁴⁴ Adashic, chonoadtemaid ushē icnuc Nuquin Papan chiaid tantianuec Antioquiya yacnoquid dadpen iccuededoapanēdash. ⁴⁵ Dadpen iccuededsho isash isadaidbo tsusiobo: Ēmbi chuibansho tantianuec aittedi choenquio iccosh, quequin tantiec nēishpanēdash. Adec nēishash: —Mimbi Nuquin Papan chiaid icsamboen chuibanec —quepanēdash Pabado caic.

⁴⁶ Adoquien, dacuēdenquio yec Pabado bēd Bednabe: —Mibitedi con matses icsho, Nuquin Papan dada uamiampid chuibanu, queboedēmbi tantiesa icsho isun mibi chuibanenquio iquemi. Mibi tantiesa yec Nuquin Papabēd tabadte buneshabidi icnuc isadaidpembo Esuquidistu chuibanendambi. ⁴⁷ Nuquin Icbon naden tantiamioshibique. Tantia. Chuinu. “Isadaidpembo ēmbi chiaid chuibanquid mibi icmēmbi ma nidaidtedi yacno ēbi tantiaquido ēbi yacno puduedquid ma icpanuna,” quequin chioshi —quepanēdash Pabado abi chieshēnquido isadaidbo Nuquin Papan dada uamiampicpaden chiec.

⁴⁸ Adsho tantiaish isadaidpembo: —¡Padtec! Nuquin Papan chiaid bēdamboshē iquec —quecuededpanēdash. Adoquien, Nuquin Papan ebēdi mibi tabadmendambi, quequin chiaid ambi tantiamiactedi Esuquidistu tantiaquid yampanēdash.

⁴⁹ Adec Esuquidistu tantiaquid yanash auēshquio dadpen nidequi nidaid dēuequid utsi-utsiec yacno choash tabadquin aidontsen Esuquidistu chuibanapanēdash. ⁵⁰ Adosho tantiaish, Pabado icsambocquid nec, quequin isadaidbo tsusiobon Antioquiya yacnoquidon chidobobēdta anocquido chuiquid dapa nēishmeshun Pabado bēdta Bednabe mēyantannuquin ashunquio nidmepanēdash. ⁵¹ Aden nidta cac puduanec nidtuidash, Esuquidistu ēmbi chuisho tantiesabo aido nec, quequin nidaid putu tasequequin ismiash nidanec shubu dadpen icquid Iconio caid yacno chopanēdash. ⁵² Pabado bēd Bednabe Antioquiya yacnoēsh nidan Antioquiya yacnoquid Esuquidistu tantiaquido: —Bēdambo iquebi —quecuededpanēdash. Adembidi aittedi aton Mayan Nuquin Papan menapanēdash.

14

Iconio yacno

¹ Adashic, Pabado bēd icquido Iconio yacno choash tabadpanēdash. Ambo tabadec Nuquin Papan chiaid chuibante shubu yacno nidash puduedpanēdash. Ambo puduedshun Esuquidistu chuibanac isadaidbobēd isadaidpembo dadpen Esuquidistu tantiaquid yampanēdash. ² Aido Esuquidistu tantiaquid yanubi isadaidbo utsibo Pabado chuibanaid tantiatipimbo icquin Esuquidistu tantiaquido muaquin chuiquin isadaidpembo utsibo nēishmepanēdash. ³ Aido nēishmiambi Iconio yacno yuec tabadquin Pabado Bednabebēdtan dacuēdenquocquin Esuquidistu chuibanpanēdash. Aden chuibansho isun Nuquin Papan ambi nadatiambocquin tantiadempambocquid ismequid Pabado bēdta Bednabe icmepanēdash. ⁴ Aden icmiac

aid daëdshun nadatiambocquin nasho isash, Isadaidbo tsusiobon chuibocpadec Pabadobëd Bednabe icsambocquid nec, utsi-utsiec quenubien, Ambi chiaid abimbo iquec, utsibo quepanëdash. ⁵ Aden chuishumbic, Pabadobëdta Bednabe cuestanquin cuënoten se-senuequin Esus tantiesabo isadaidpembon aton tsusio dapabobëdta cainubi adembidi isadaidbon aton tsusio dapabobëdta cainoapanëdash. ⁶⁻⁷ Aden caimbededosh, quequin tantiaquidën chiac cuenec nidequi nidaid Dicaonia caid yacno Pabadobëd Bednabe choash shubu dadpen icquid Disteda caid yacno choash tabadquin Pabadobëdta Bednaben Esuquidistu chuibampanëdash. Adtanec auëshquio puduanec nidec shubu dadpen icquid Dedbe caid yacnotsen choash tabadquin adomboembidi Esuquidistu chuibampanëdash. Adtanec auëshquio puduanec nidshun dëuequiec shubu dadpen icquid utsi-utsiec yacnocquidotsen chuibampanëdash.

Disteda yacno

⁸ Disteda yacno tabadnubien anocquid taicsaidi anin tishaid caputi-apimbo icpanëdash. ⁹ Aidi Pabado Esuquidistu chuibansho tantiec, Esuquidistun ëbi bëdamepatsiash, quec otacquio tsadpanëdash. Aden caputi-apimbocquidën tantiacpadomboen Nuquin Papan Pabadotsen tantiamiac ¹⁰ caputiapimbocquid comapenen bëisquin: —Nidto —Pabado cac badedi nidtoash taicsaid bëdanash capupanëdash.

¹¹ Aden taicsaid bëdamic capusho isash anocquido aton onqueten cuëdcuededquin: —Disteda yacnocquidon tantiaid matsesbimboec yanash abucuësh budoshe. Nëid daëdi isec cho —capanëdash. ¹² Adtanequi Bednabe otacquio tsadquid icsho isash ambi tantiaid abentsëc Upited icnuc Upited cain Bednabe cuënkimbi Pabado chuiquidquo icsho isun ambi tantiaid utsi Medcudio icnuc Medcudio cain Pabado cuëmpañëdash Disteda yacnocquidon. ¹³ Aden cuënsho tantiaishun baca bënë daëd bëec: Mibi daëdi tantiaquido Disteda yacnocquido nec, quequin, Ismenu, quequin ambibi tantiacbimboecnuc nacnenaïd Upited caid dayun uaquido baca cuesunenu, quepanëdash.

¹⁴ Aden baca cuesunenuen bësho isun abi dasiuidaid aton dashcute bëntsecquid shoyonquin cancheuidashic iccuededquidon nënantanquio nidash Pabadobëd Bednabe comapenec nadpanëdash: ¹⁵ —Ëbi daëdi mibipadquid matsesquo nebi. Mimbï tantiacmaid nebiq. Baca cuesunenda. Chiaid bëda mibitedi naden chuinuëc chobi. Nuquin Papa caid abentsëcquiobi iquec. Aidëmbi abubëdta nidaid uashumbic aidënuoicquidtedi uabanampidquio neque. Aiduidtsëqui tantiaquin ambi uaidbimboecnuc matsesën nacnenaïd tantiesä icta. ¹⁶ Èdenquimbo Nuquin Papan, Adoenda, cainquiocnoc matsesën ambi tantiacpaden nabampampic. ¹⁷ Aden, Adoenda, cainquiocquimbi, Abitedishun icbo icquin bëdamboquid nebi, quequin ismequin ue secamedenequinc, cuëte bacuëmequinc, nuqui penun tiedën nitsimbeniaïd canimequinc caquin Nuquin Papan nac bëdamboen nuquitedi pebededec. Aden nabanquin Nuquin Papan, Bëdambo iquebi. Cuishon, camiaïdo nuquitedi nec —quepanëdash Pabadobëd Bednabe Disteda yacnocquido chiec. ¹⁸ Aden chuido-chuidoiqui baca cuesunenuo icpanëdash Disteda yacnocquidon.

¹⁹ Adnubien Antioquiya caid yacnocquidobëd Iconio yacnocquido Disteda yacno cho-choshon, Pabado icsambocquid nec, quequin chiac Disteda caid yacnocquido nëishcuededpanëdash. Adec nëishcuededshun Pabado cuënoten sesiash, Ünësosh, qeshun nimbanquin buanshun shubu nibëdacno Pabado netampanëdash. ²⁰ Ambo netanambic, Esuquidistu tantiaquido cho-choshon tsicatenubi Pabado nidtoash Esuquidistu tantiaquidobëd Disteda yacno

choec shubun puduedpanēdash. Badiadash puduanec shubu dadpen icquid Dedbe caid yacno Pabadobēd Bednabe nidoapanēdash.

Nidaid Sidia caid shubu dadpen icquid Antioquiya yacno choaid

²¹ Adec Dedbe yacno choash tabadquimbi Pabadobēdtan Bednaben chuibanac Esuquidistu tantiaquid dadpen yampanēdash. Auēshquio puduanec nidoaic padpidec Disteda caid yacno choash tabadquin, Dadpen tantiameguiono, quequin chuibanpanēdash. ²²⁻²⁴ Aden chuibanshumbic: —Natiavianquid iquendac. Adquid icnuc Nuquin Papa yacno puduedash Esuquidistu tantiaquid yec ambo nuquitedi tabadendac, quec nēbi dayacquo yec tabad —capanēdash Pabaton. Adotanquin ambia Esus tantiaquid utsi-utsien Pabadobēdtan Bednaben: —Bēdamboec tabadquin ismequin Esuquidistu tantiaquid utsibo chuiban —capanēdash. Adotanec, ambi chuiboedobēd Pabado Bednabe chedo Nuquin Papauidi tantiec buna mēmūnquin chiec onquepanēdash. Aden Nuquin Papa chuiquin naimbudquin, Nēmbocquid mibi tantiaquido bēdamboec dayun uata, Papa, quequin chianec Pabadobēd Bednabe chedo Disteda yacnoēsh nidoapanēdash. Adecbidi Iconio yacno choashun adomboembidi chuibanapanēdash. Adecbidi Antioquiya yacno choashun adomboembidi chuibanapanēdash. Antioquiya yacnoēsh puduanec nidec nidaid Pisia caid datambētsenec nidaid Pampidia caid yacno choash nidec ²⁵ shubu dadpen icquid Pedque caid yacno choash tabadquin Esuquidistu chuibanash shubu dadpen icquid Atadia caid yacnotsen chopanēdash. ²⁶ Auēshquio cano antabēdtoanec nidec shubu dadpen icquid Antioquiya caid yacno, Nuquin Papan Mayanēn nidta, quequin chiondacnombo choapanēdash. ²⁷ Ambo choash tabadquin anocquido Esuquidistu tantiaquid utsibobēd iccuedeshun Nuquin Papan tantiamiacpaden abi capucueniacnoshon ambi nabanaidtedi Pabadobēdtan Bednaben chuibanpanēdash. Isadaidpembo dadpen Esuquidistu tantiaquid yamposh, quequin chuipanēdash. ²⁸ Adtanequi yec Antioquiya yacno Esuquidistu tantiaquid utsibobēdi Pabado Bednabe chedo tabadpanēdash.

15

Edusaden yacnocquido iccuededec tantianu quiaid

¹ Pabadobēd Bednabe Antioquiya yacno choabicnubien nidaid Udeya caid yacnoēsh choquido Esuquidistu tantiaquid utsibo Antioquiya yacno choash tabadquin, Nuquin Papan naden nata quequin chiaid Moises dada uamiampicpaden shui dēbid dētemesa abi yacno Esuquidistun yuedtemaid nendac, quequin chuipanēdash. ² Adnubic Pabadobēd Bednabe Antioquiya yacno choash tabadquin aidon chiaid tantias: —Nuquin Papan aden chi-ambo iqueque. Aden chienda —quepanēdash.

Adsho comapenec cuēdquin chushcapanēdash. Adsho tantiasun abi chuiquidon, Edusaden yacno nidshun chushcanamboed chuitanta, quequin Pabadobēdta Bednabe chuishumbic Esuquidistu tantiaquid utsibo chuioaquin aido nidmepanēdash. ³ Adoac Antioquiya yacnoēsh puduanec nidec nidaid Penisia caid yacno choash tabadquin, Isadaidpembotsen Esuquidistu tantiaquid yamposh, quequin chuipanēdash. Adsho tantias: —Aid tantiec bēdambo iquebi —quepanēdash anocquid Esuquidistu tantiaquid. Adtanec auēshquio nidegui nidaid Samadia caid yacno choash tabadquin adomboembidi chiac adquiecbidi, Bēdambo iquebi, quepanēdash anocquido. ⁴ Auēshquio puduanec nidec Edusaden yacno choash tabadquin anoshontsen Nuquin Papan chiacpadec capuquin ambi nabanaidtedi Pabadobēdtan Bednaben chuibanapanēdash. ⁵ Aden chiac Esuquidistu

tantiaquido, Nuquin Papan naden nata quequin chiaid tantiamequido: — Nuquin Papan naden nata quequin chiacpaden isadaidpembotsen shui däbid dëtemetiadquidi nec. Nuquin Papan naden nata quequin Moises dada uampid nabantiadquid neoaic —quepanëdash.

⁶ Adoquien Esuquidistu ambia tantiaquido tsusiobobëd Esuquidistun ëbi chuibeneta caido: Tantiabono, quiash onquecuededpanëdash. ⁷ Adec yuec onquecuededash nidtoash Petëdo nadec onquepanëdash: —Chuinu. Tantiata. Ènden Nuquin Papan naden chuipondashi: “Isadaidpembo Esuquidistu tantiaquid icmetë bunebique. Aidotsen chuibanta,” quequin chuipondashi. Aden ëmbi chuiasho mibitedishun tantiondac. ⁸ Èmbi isadaidpembo Esuquidistu chiac abi tantiaquid aido yampondash. Matsësën tantiaid tantiaquid icquin Nuquin Papan, Esuquidistu tantiaquid nec, quequin aton Mayan nuqui meniäcpadembi isadaidpembo meneoapon-dash. ⁹ Utsibo nec, quenquiocquin aidotsen tantiamequin paucoapon-dash. ¹⁰ Aden Nuquin Papan nasho isun, ¿Atotsieshun Nuquin Papan naid icsambo iquec quiäcpaden tsusedpabon natiapimboctequid nuquitsen natiapimboctequid isadaidpembon nabanta cate nuqui bumpe? ¹¹ Padenquio icnuna. Matsestedi icsaquid icsho cuidnushe quiash abidëd cuidadac, quequin tantiaquiec unësash abëdi tabadendac, quequin nuqui tantiacpaden isadaidpembo Esuquidistu tantiaquido yanshun tantiec —quepanëdash Pe-tëdo.

¹² Aden Petëdon chuiquin ënambic Pabadotsen Nuquin Papan tantiamiac ambi nadatiambocquin naquin isadaidpembo ismebanaid chuipanëdash. Adembidi Bednaben chuiopanëdash. ¹³ Aid daëdshun chuibanquin nainan Esusën utsi Acobo, Esus tantiaquido tsusio dapa, nadpanëdash: —Èmbitsen chuinu. Tantiata. ¹⁴ Isadaidpembo tantiaquin aido Esus chuibanta, quequin Nuquin Papan chiacpaden Simon Petëdon chiac isadaidpembo Esus tantiaquid yansho Nuquin Papan aidtedi nuquibëdta aton matses icmiac. ¹⁵ Adomboembidi Nuquin Papan chuimiäidën dada uampid nad iqueque. Tantia. Chuinu:

¹⁶ “Isadaidbobëd yuec tabadenquiochoedi padpidec choash aidobëd icoaind-abi.

Dabid padon tsyuecquido isadenquiochoedi isadcuenendac

¹⁷ ma aton Icho matsestedishun istuidpanuna;

ma adembidi isadaidpembon ëmbi cuënaidon aidbidi istuidpanuna,

¹⁸ quec Nuquin Icho ambi ènden tantiampicpadomboen chiaid nec”

—quiashic abi Acobo onquec: ¹⁹ —Nuquin Papan chiampid tantiaquin nuquin tsusedpabon naden nata quequin chiacpaden nata isadaidpembo cainquio ictiad. ²⁰ Nëiduidtsëqui dada uaqin isadaidpembo chuibanuna nuquibi: Nuquin Papan uaidbimboecnuc nacnenaid tantiaquin pete sanaid penda; adembidi, min chidouidtsëqui chudta; adembidi, min bënëuidtsëqui chudmeta; adembidi, Nëish tëtaniaid intacchobi codocaid penda, quequin isadaidpembo chuibanuna. ²¹ Adec Moisesën dada uaid iccuededquin isec nuqui onquedenec. Aid icnuc, Adomboembidi nata, quequin isadaidpembo chuinuna —quepanëdash Acobo iccuededquido chiec.

²² Adashic Esuquidistu tantiaquido iccuededec onquec ënëdshun ëmbi dada uaid Antioquiya yacno buanuec Edusaden yacnocquid daëd nidta, quequin Pabadobëdta Bednabe nidmepanëdash. Abentsëc Udas cashumbic Badsabas cuënaid; utsibic, Sidas cuëmëdquid. Aid daëdi Nuquin Papan chiaid comape-nen tantiaquidquio icpanëdash. ²³ Isadaidpembo chuiquin Edusaden yac-noshon Esuquidistu tantiaquidon naden dada uapanëdash:

“Esuquidistun ëbi chuibeneta caidobëdi ambia Esuquidistu tantiaquido Edusaden yacnocquido yec min utsibimboecquido nebi. Isadaidpembo Esuquidistu tantiaquido Antioquiya yacno tabadquidobëdta nidaid Sidia yacno tabadquido, nidaid utsi Sidisia yacno tabadquido chedo mibitedi chuiquin dada uaombique. Isec onqueta. ²⁴ Èbëd icquido nëuëshquio nidash mibi yacno choash puduedshun, Isadaidbon naden nata quequin chiaid natiadquidi mibi nec, quequin mibi icsamboen chiosh, quequin utsibon chioshi. ²⁵ Aden chuisho tantiashun nëmbocquidobëd iccuededec onquequin abentsëcshun tantiacbimboen dada uaombi. Aidi nëmbocquid daëdi Pabado Bednabebëdta buantan, quequin chiembi. ²⁶ Unësmame, quenquio yec capucuenequin Esuquidistu chuibanquido Pabadoëd Bednabe nec. ²⁷ Adquid aid daëd icsho isun aid chedobëdta Udas Sidas chedo mibi yacno nidmembi. Adoac ëmbi dada uacpaden ma mibitedi chuiopanuna abimbo iquec camenuen. ²⁸ Nuquin Papan Mayanën ëbitedi tantiamiacpaden isadaidbon naden nata quequin chiapaden nata mibi caisa nebi. ²⁹ Nëidtedtsëqui ëbitedishun nata caid nec: Nuquin Papan uaidbimboecnuc nacenaid tantiaquin utsibon abi yacnoshon sanaid penda; adembidi, min chiduidtsëqui chudta; adembidi, min bënëuidtsëqui chudmeta; adembidi, mimbi nëish cuesuniaid intacchobi codocashun penda. Adoac ëmbi chiapaden nabanec mibi bëdambo icpec. Padi aitedtsëqui chiembi.”

³⁰ Aden dada uaquin nainshun ambi nidtan caboed meniac Antioquiya yacno nidoapanëdash. Antioquiya yacno choash puduedshun Esuquidistu tantiaquido Edusaden yacnocquidon dada uaid menepanëdash. ³¹ Aden meniac isbanash: —Mimbi bëboed dada uaid isash bëdambo iquebi —quepanëdash isadaidpembo Antioquiya yacnocquido.

³² Adnubic Udasën Nuquin Papan chiaid chuibanquin Esuquidistu tantiaquido Antioquiya yacno tabadquido bëdamboen tantiamepanëdash. Adombombidi chuibanquin Sidasën tantiaméopanëdash. ³³ Aden dadpen ushquin chuibanshun: —Edusaden yacno nidoaibi —caquien:

—Ai, mibi nidsho isash unëshquio icquimbi mibi chomequido yacno nidtan, mibi caimbi —quepanëdash Esuquidistu tantiaquido Antioquiya yacno tabadquido. ³⁴ Adec aido Edusaden yacno nidnubien ³⁵ Pabado Bednabe chedobëdta Antioquiya yacno tabadquin Esuquidistu tantiaquid utsibo Nuquin Papan chiaid bëdamboen tantiamenuen chuibanpanëdash.

Pabadoëd Bednabe cuëshëdaid

³⁶ Adashic, yuecash Pabado Bednabe caic: —¿Midapadec nuqui capucuenequin Nuquin Papan chiaid chuibeneboedo tabadeque? Isec nuquibi nidnu. Nid —quepanëdash.

³⁷ Adoaquien: —Ma Madcosbidi nidoanu. Chuita —quepanëdash Bednabe.

³⁸ Adoaquien: —Chieshec aidi cuëshëdondashe. Padi. Nuqui daëdtsëqui nidnu. Nid —quepanëdash Pabado.

³⁹ Adoaquien Bednabe aden tantienquio yec Pabadoëd comapenec onquiash Madcosbëd cano antabëdtoanec Chipide yacno nidoapanëdash. ⁴⁰ Adnubien Pabado Sidas abëd Edusaden yacnoësh choaed caic: —Nuquibi nidnuna —quepanëdash.

Adec aid daëd nidnuesho isash anocquid Esuquidistu tantiaquido: —Ma Nuquin Papan mibi daëd bëdamboen nidmequin ma mibi bëdamboen namepanuna —cac Pabadoëd Sidas nidpanëdash. ⁴¹ Adanec nidaid Sidia caid yacno choash capucuenequin Esuquidistu tantiaquido iccuededacno puduedshun bëdamboen tantiamenuen chuibanpanëdash. Aden chuibeneshumbic nidaid Sidisia yacno choshon Esuquidistu tantiaquido

shubu utsin-shubu utsinqueic iccuededacnomboec puduedcuenequin Pabadon chuibanoapanēdash.

16

Pabadobēa Timoteyo nidaid

¹ Adec nidec shubu dadpen icquid Dedbe caid yacno choash tabadquin adomboembidi chuibanoash nidequi shubu dadpen icquid Disteda caid yacno Pabadobēd Sidas choapanēdash. Ambo Esuquidistu tantiaquid Timoteyo cuēmēdquid tabadpanēdash. Aidēn tita isadaidbo Esuquidistu tantiaquid icnubi aidēn papa isadaidpembo quidieco matses icpanēdash. ² Timoteyo bēdambocquid nec, quequin Disteda yacnocquidon Pabado chuipanēdash. Adomboembidi shubu dadpen icquid Iconio yacnocquidon chuioapanēdash. ³ Aden dadpeshun chuisho tantiash Timoteyo buante bumpanēdash Pabado. Adec, Timoteyo buanu, qeshun ēbi capucueniacno isadaidbo dadpen iqueque. Aidon Timoteyo isash, Aidēn papa quidieco matses icnuc aton madobidi isadaidpembo nec, aido quenushe qeshun Pabadon Timoteyon shui dēbid dētemepanēdash. ⁴ Aden nashic nidec Esuquidistu tantiaquid utsibo yacno-yacnomboec choash puduedshun Esuquidistu tantiaquido Edusaden yacnocquidon dada uaqin chiaid Pabadon chuioapanēdash. ⁵ Adembidi Nuquin Papan chiaid chiac ēnden Esuquidistu tantiaquidon tantiabenquiocnobi utsi dadpen Esus tantiaquid yanoapanēdash.

Ushquin Masedonia yacnocquid Pabadon isaid

⁶ Adanec nidaid Sidisia caid yacnoēsh nidsho Nuquin Papan Mayanēn: —Nidaid Asia caid yacno Esuquidistu chuibanuec nidenda —cac Pabadobēd icquido nidaid Pidiquia caidtsen datambidanec nidaid Cadasia caidbidi datambidanec ⁷ nidaid Misia caid yacno chopanēdash. Ambo choash nidaid Bitinia yacno nidnuesho, Ambo nidenda, quequin Nuquin Papan Mayanēn aido tantiameoapanēdash. ⁸ Adoac nidaid Misia datambidanec shubu dadpen icquid Todoas caid yacno ēbi tabadacnobi chopondash. ⁹ Ambo choash tabadec inchēshnuc ushquin nidaid Masedonia caid yacnocquido Pabadon ispondash. Adec ushquin isquin nidaid Masedonia yacnocquido: —Ēbitedi Esuquidistu chuibanec cho —quec onquesho Pabadon tantiapondash. ¹⁰ Aden tantiash: —Nuquin Papan nidaid Masedonia caid yacnoshontsen Esuquidistu chuibanta caid nebique. Nacnenuna —Pabadon cac buanun nacnempondash. Esuquidistu tantiaquid yanash ēbitsen Pabadobēd nidpondabi.

Didia cuēmēdquid Esuquidistu tantiaquid yanaid

¹¹ Adanec Todoas yacnoēsh puduanec cano antabēdtoanec cuebi nidequi acte nēnantanquo nidaid nacdēdquid Samotodasia caid yacno choash Pabadobēd icquido tabadtuidpondash. Badiadash auēshquo puduanec cano antabēdtoanec nidquimbi potebidanec nidaid Masedonia caid yacno ēbitedi chopondabi. Aid nidaidēn acte cuēmambi shubu dadpen icquid Niapodis caid yacno puduodanec ¹² nidequi shubu dadpenquo icquid Pidipos caid yacno domanobo dadpenquioshē tabadacno yuec ushec tabadpondash.

¹³ Pidipos yacno tabadashic isadaidbo iccuededte badiadēn Nuquin Papa chiec utsibo onquedeniacno istuidnuec puduanec shubu nibēdacno nidequi acte utsi cuēmambi choapondash. Ambo choshon iccuededquido chidobo istuidshun Esuquidistu Pabadon chuibanpondash. ¹⁴ Pabadon chuibanacno chido Didia cuēmēdquid shubu dadpen icquid Tiatida caid yacnoēsh choquid icpondash. Aidēn piucquid bednuen dashcute cuēshaid

umu-umumbocquid menebenepondash. Aidi Nuquin Papa tantiaquid icquin Pabadon chuibanubi Nuquin Icbon tantiamiac Esuquidistu tantiaquid Didia yampondash. ¹⁵ Aibdē aton shubun icquido Esuquidistu tantiaquido yansho isun acten mentobampondash. Aido acten mentobanamibic Didian: —Esuquidistu tantiaquid mibipadquid nebique. Con shubuno ushec cho —cac nidash Didian shubun puduedāsh Pabadobēd icquido tabadpondash.

Pabadobēdta Sidas quēnēn nauedaaid

¹⁶ Adashic padpidec Nuquin Papa chiec onquedeniacno Pabadobēd icquido nidoasho chido yuaidēn bēquedtuiddpondash. Aidēn mayan icsan tantiamicpaden yuecash nad iquendac, quequin chuisho piucquid dadpen aid chido matsesēn meniac aid chidon ambi bedaidtedi abi yuaquid meneoapanēdash. ¹⁷ Pabadobēd icquido bēquedtuiddshun tsibambēc choec aid chido: —Nēid dadatedi Nuquin Papan namiaidquio nec. Abi yacno puduedmianquid iquec, quequin chuibanquid nēid dadatedi nec —quec ¹⁸ badiadquidēn badiadquidēnquiec comapenec cuēdpondash.

Adec cuēdtonesho tantiate bunenquio yec amibidi bidiadquin mayan icsa dapuduedaid chido chuiquin comapenen Pabadon: —Esuquidistun nadatiambocquin naidēnquio dapuduenta —cac badedquio mayan icsa dapuduempōdash. ¹⁹ Aden dapuduemiāc chido bēdanacsho isun abi yuaquidon: —Nēbi nadquio iquendac, quequin chuitiapimbo nuquin yua iquec. Aden chienquiocquin piucquid bedfiapimbocquin nuqui meneoatiapimbo iquec, quequin tantiaash nēishun Pabadobēdta Sidas bedshun nimbānquin abi chuiquido yacno chido yuaquidon buampondash. Piucquid bedhūequin aton na bēshun utsibon sambānaid anoentsēqui abi chuiquido icsho isun chido yuaquidon Pabadobēdta Sidas ambo buampondash. ²⁰⁻²¹ Aden abi chuiquid tsadacno bēash: —Nēid dada daēd isadaidbo nec. Nēmbo choshon abi chuiquidon naden nata quequin chiaid chuibanec. Ēbitedi domanobo icquin ambi chiaid ēbitedishun natemaid icnuc matsestedi chushquecuedosh —quepondash chido yuaquido abi chuiquido chiec. ²² Aden chuisho tantiaquidon chiac dadpen cho-choash iccuedquidquin Pabado bēquidon chiacpadomboen aidontsen chuiocabi chuiquido: —Bēboedon dashcute chichshun cueshcaten cuesta —cac sondadon cuespondash. ²³ Aden comapenen cuesmeshun buameshun quēnēn nauedmeshun ambi quēnēn nauedaaid ista caid chuiquin Pidipos yacnoquido chuiquidon: —Puduenanec cuenushe queshun nēid daēdi bēdamboen isquiota —capondash. ²⁴ Adsho tantiaashun ambi ista caidēn Pabadobēdta Sidas nēnantanquio quēnēn nauedquid tsadunshun cūeste shēcuē uaidēn tausunash puduentanquin quēnē bēdamboen bēdashpanēdash.

²⁵ Aden bēdashash aton shubu dayunquiocquidēn puduedambic inchēshpotsembo Pabadobēd Sidas Nuquin Papa chiec onquepanēdash. Adecbidi Nuquin Papan naid chiec cuēdēmpānēdash. Adec cuēdēnsho utsibon tantianubi ²⁶ comapenec nidaid ishcutnubi mētaniaidtedi mēchiqidpanēdash. ²⁷ Adnubien ista caid isec tsadboedi ushtanec isuncunquin isac shēcuē bēdashaid ēnden shēcniac. Adsho isash ista caid: —Quēnēn nauedaaido puduenpudempacnuī —quetanec: —Chuiquid dapabon ēbi cuesunemetsiash —queshun siadnuequin chēshte abi tsiusudaic chichsho ²⁸ istanquin Pabadon: —Quēnēn nauedaaidtedi nēmbo iquebique. Seshuniadenda —quequin comapenen cuēmpānēdash.

²⁹ Adoaquien, seshuniadtsemboedēn: —Tabote bec cho —cac ambi namiāidēn tabote bedtanquin meniac bedshun sananec badedi quēnēn puduedash dacuēdec uēdēquec Pabadobēd Sidas tabadacno choash danēshēn sebudec shuebudpanēdash. Mibi daēdi bēdamboquid icnubi adquidpenquio

nebi, quequin tantiaquin ismepanēdash. ³⁰ Adsho isun Pabadon nidto-
miaquí seshuniadtsemboed bëyucanec nidquin aton shubun Pabadobēda
Sidas yuedash: —¿Nuquin Icho yacno puduednsh mitsipadequibi ëbi icsaid
ciudadpeque? Chui. Tiantianu —quepanēdash seshuniadtsemboed.

³¹ Adoaquien Pabado: —Mibibi cuidadtiapimbo iquec. Mibēda min
shubun icquido icsaquid icsho cuidnush quiaash abided ciudadec unēsash
Esuquidistu aton Papa yacno puduedash abi tantiaquido yuedquid neque.
Mibi icsaid ënash, Esuquidistu con Icho nec, quequin abimbo tantia ³² —
qeshumbic seshuniadtsemboedēd icquido Esus tantiamenuen Nuquin
Ichon chiaid Pabadon chuipanēdash.

³³ Adoaqui Pabadobēda Sidas cuesaid chiuē acten bëpanshunquin nainac-
sho aton shubun icquido Esuquidistu tantiaquido yansho isun aitedi
Pabadobēdan Sidasën acten mentobampanēdash. ³⁴ Aden mentobanaqui
aton shubun yuedshun pemepanēdash. Adashic, Nuquin Papan chiaid
abimbo tantiaquid yec ambi bēdambo icmiaido seshuniadtsemboedēd ic-
quido icpanēdash.

³⁵ Adashic, badiadash Pidipos yacnoquido chuiquidon: —Nauedaid
shubu yacno nidshun quēnën nauedboed daēd pudueme, quequin chuitanta
—cac quēnē yacno nidshun ista caid adomboembidi chuiopanēdash. ³⁶ Aden
chiac ista caidēn: —Quēnën nauedboed daēd pudueme, quequin chuiquid
dapabon chiosh, quequin aidon chomiaidēn chioshibique. Dacuēdenquo yec
nid —capanēdash Pabadobēda Sidas chuiquin.

³⁷ Adoaquien Pabado: —Ëmbi naid chuimenquiocquin ëbi daēdi domanobo
icsho utsibon isnubi cuesmeposhi. ¿Nēbi puduemenuen utsibo isenquiocno-
bida ëbi daēdi nidmepoc? Padenquo caimbi. Ëbi daēdi puduemenuec ma
chuiquid dapabo abibi chopanuna —quepanēdash.

³⁸ Aden chiac puduenanec nidequi abi chuiquido yacno choshon, Mimbi
quēnën nauedmeboed daēd domanobo nec, quequin chuisho tantiaash chuiquid
dapabo comapenec dacuēdcuededpanēdash. ³⁹ Adec dacuēdec nidequi
nauedaid shubuno choash: —Domanobo nec, quequin tantienquiocquin
mibi quēnën nauedmiombi —qeshun puduemetanec: —Pidipos yacnoēsh
nidtan —capanēdash Pabadobēda Sidas chuiquin. ⁴⁰ Adoaquien, pudue-
nanec nidequi Didian shubu yacno choash puduedshun Esuquidistu tan-
tiaquido iccuededsho isun bēdamboen tabadmenuequin Pabadon chuiban-
panēdash. Aido chuibidanec Pabadobēd icquido nidoapanēdash.

17

Tesadonica caid yacnoquido isadaidbo nēishcuededaid

¹ Pidipos yacnoēsh puduanec nidequi Pabadobēd icquido shubu dadpen
icquid Ampipodis caid datambidanec shubu dadpen icquid Apodonia caid-
sen datambidanec shubu dadpen icquid Tesadonica caid yacno choash,
Nuquin Papan chiaid chuibante shubu iquec, qesho tantiaash Tesadonica
caid yacno Pabadobēd icquido tabadpanēdash. ²⁻³ Ambo tabadec isadaidbo
iccuededte badiadēn abi nidteniacpadec Nuquin Papan chiaid chuibante
shubu yacno choshon Pabadon Esus tantiamenuen Nuquin Papan ënden
chiampid chuibampanēdash. Nuqui icsaid bedshunash abided ciudadec Es-
uquidistu unēsaid ambi uincuemetequid Nuquin Papan Chomiaidquo nec.
Aidi nuqui Quidistu caid neoaic, quequin chuipanēdash Pabadon. Sabado
3ted matamequin adomboen chuibampanēdash. ⁴ Aden chuibanaqui Esus
tantiaquid utsi-utiec yampanēdash. Nēdic, isadaidbo utsi-utsiec; utsibic,
Nuquin Papa tantiaquid quidieco matses dadpen; utsibic, anocquido
chuiquid dapabon chido utsi-utsiec aido Esus tantiaquid yampanēdash.

⁵ Aden Pabadon chuibanac Esus tantiaquid dadpen yansho isash isadaidbo utsibo nëishun utsibon piucquid bednuequin aton na sambanshun ismiacno nidshun tantiesabo, icsambocquid dadpen, iccuededmeshun aidotsen nëishmiac natia chushqueuededpanēdash. Adec chushquec nidequi Pabadobēda Sidas bednuec Ason cuēmēdquidēn shubuno puduedec nidpanēdash. ⁶ Ambo choshon Pabadobēd Sidas nibēdsho isun Esuquidistu tantiaquido Asombēd icquido bedshun abi chuiquid dapabo yacno Pabado chieshēnquidon buanec abi chuiquid dapabo yacno choash: —Nidaid utsi-utsiec yacno capucuenquin chuitemaid chuibanquido nēmbō ⁷ choacsho Asonēn aid daēd yuedaccosh. Nuqui ancaquid Sesadēn chiaid niacquin ancanquid utsi Esus cuēmēdquid iquec, quequin chuibanec —quepanēdash Pabado chieshēnquido abi chuiquido chiec.

⁸ Aden, Ancanquid utsi iquec, quequin Pabadobēdtan Sidasēn chiec, qesho tantiash chuiquid dapabo iccuededquidobēd comapenec chushquecuededpanēdash. ⁹ Adtanec abi chuiquid Asombēd icquido caic: —Nēbi, ¿Atotsi tantiaquin Pabadobēdta Sidas yuedo? quequin mibi chuimetiapimbo iquembi. Yueshun mibi chomeshun chuimembi. Ēmbi chuimiabi Tesadonica yacnoēsh nidenda. Ēmbi chiacpaden nanuequin piucquid ēbi mene —capanēdash Tesadonica yacnocquido chuiquid dapabon Asombēd icquido chuiquin. Adoaquien piucquid meniac bedshun: —Min shubuno nidfan —cac nidanepanēdash Asombēd icquido.

Bedeya yacnotsen tabadaid

¹⁰ Adshumbic bednushe qeshun aid inchēshēmbi Tesadonica yacnocquido Esuquidistu tantiaquidon Pabadobēdta Sidas shubu dadpen icquid Bedeya caid yacno nidmepanēdash. Aden nidmiac Bedeya yacno choash tabadec Nuquin Papan chiaid chuibante shubu yacno Pabado nidpanēdash. ¹¹ Anoshontsen, Esus Nuquin Papan Chomiaid Quidistu nec, quequin tantiamenuen Nuquin Papan ēnden dada uamiampid Pabadon chuibanooasho tantiashun bēdamocquid icquin, Abimbobida chuibanoshe. Isbono, quequin Nuquin Papan chiampid isban-isbampanēdash Bedeya yacnocquidon. ¹² Aden isbanec, Abimbo caic, quish Esuquidistu tantiaquid dadpen isadaidbōbēd isadaidpembo Esuquidistu tantiaquido yampanēdash. Adecbidi isadaidpembo chuiquid dapabo quidieco matses utsi-utsiec aton chido chedobēd Esuquidistu tantiaquid yampanēdash.

¹³ Adnubien, Bedeya yacnoshontsen Pabado chuibanec, qesho tantiash Tesadonica caid yacnocquido, isadaidbo, Asombēd icquido bedmeboedo, Bedeya yacno choshon anocquidotsen nëishmiac comapenec chushquecuededpanēdash. ¹⁴ Adsho tantiashun Esuquidistu tantiaquidon Bedeya yacnocquidon acte dapa cuēmano Pabado nidmepanēdash. Adnubi Sidasbēd Timoteyo nidenguio yec Bedeya yacno tabadnubien ¹⁵ Bedeya caid yacnoshon utsibon bēyucanquin Pabado buampanēdash. Aden buanec nidequi shubu dadpen icquid Atenas caid yacno chopanēdash. Ambo choash abia bēyucanquido: —Ēbi chobocnobidi Bedeya yacno nidoaibi —qesho tantiashun Pabadon:

—Mibi yacno choash, Badedquio Atenas yacno chota, quish Pabado, quequin Sidasbēdta Timoteyo chuita —capanēdash. Aden Pabadon chiaquien Bedeya yacnocquido abi yacno nidoapanēdash.

Atenas yacnotsen Pabado tabadaid

¹⁶ Abia bēyucanquido Bedeya yacno nidambi Atenas yacno Pabado tabadquin, Sidasbēd Timoteyo choec, qeshun cainec capuquimbi Atenas yacnocquidon nacnenaid isbampanēdash. Aidon Nuquin Papan

uaidbimboecnuc nacnenaid dadpen tabëcaid papa cain cuënaid ambi tantiaido icsho isash, Nuquin Papa Abentsëcquiobi iquec, quequin tantiesha Atenas yacnocquido nec, quequin tantiec Pabado unësquo yampanëdash. ¹⁷ Adec unësquo yec Nuquin Papan chiaid chuibante shubu yacno nidshun Esuquidistu tantiamenuen Nuquin Papan chiampid Pabadon chuibampanëdash. Adembidi anocquidon piucquid bednuen aton na sambanshun ismiacno nidshun adomboembidi Pabadon chuibanoapanëdash. Isadaidbobëd onquequin Esuquidistu Pabadon chuipanëdash. Adembidi isadaidpembobëd onquequin Esuquidistu chuoapanëdash. ¹⁸ Anoshon chuibansho tantiashe epicudeyo cuëmëdquidën chuinëdacpaden tantiaquido Pabadobëd onquepanëdash. Adembidi tantiashe estoico cuëmëdquidën chuinëdacpaden tantiaquido Pabadobëd onquepanëdash. Aido Pabadobëd onquequin Pabadon Esus chuisho tantienquo yec: —¿Atodain comapenec onquequin nëid dadan chuipash? — quepanëdash. Adnubien utsi: —Matses utsibon papa cain cuënaid chuibanec nepanui —quepanëdash. Pabadon Esuquidistu unësash uincuenaid chuisho tantiashe adpanëdash. ¹⁹⁻²⁰ Adec onqueshumbic, Utsin tantiaid tantianu, quec Adeyopaco caid yacno iccuedednuequidon bëyucanquin bëash Pabado: —Mimbi chiaid ëmbi tantiacmaid nec. ¿Midapadquidquo mimbi chuibanec? Tantianu. Chuiban —quepanëdash abi bëquido caic. ²¹ Abi bëquido Adeyopaco caid yacno nidash Atenas yacnocquido dadpen utsi-utsiec yacnoësh cho-choquido badiadquidën-badiadquidënquec utsin-utsinquien ambi tantiacpaden chuibansho tantianuec iccuededpanëdash.

²² Aden mimbi tantiacpaden chuibanta caquien nënantanquo nidtoshon naden Pabadon chuibampanëdash: —Chuibanu. Tantiata. Mimbi papa cain cuënaid mimbi tantiaid iquec, quequin tantiemi. ²³ Capucuenequin mimbi tantiaidbimboecnuc nacnenaid dadpen isombi. Mimbi papa cain cuënaid dadpen tabëcaid icnubi mimbi cuënacmaid abentsëc iccosh. Aid mimbi cuënacmaid icnuc abibimboecnuc nacnenaid nibëdosh. Aton shubumpiuidtsëqui iccosh. Mimbi cuënacmaid mimbi tantiacmaid mibi chuibanu. Tantiata.

²⁴ “Ëmbi Nuquin Papa cain cuënaid nidaidbëdtabi abu uashumbic aidënquiocquidtedi uaquidquo nec. Abitedi uaquidquo yec abitedishun ichombo aidi nec. Aidi tabadmenuequin matsesën shubu uashunaidën tabadesha nec. ²⁵ Aidi abitedishun Icho icnuc abitedi aton na nec. Adquid icsho, Con na mibi menenu, matsesën aid catiapimbo iquec. Aidën tantiacpadec ëbitedi nëmbobi tabadebi. Aidën tantiacpadec ëbitedi tiboquebi. Aidën tantiacpaden ëbitedishun bedbanoaimbi. ²⁶ Aidëmbi bëyuc dada uampidën tsyuequido ëbitedi nec. Aid bëyuc dadan tsyuequido dadpen yanash matses utsi-utsimboec dadpen iquec. Adquid yec nidaid utsi-utsiec yacno tabadquido nec. Nuquin Papan tantiacpadequi seta taënuec ue yanendac. Adecbidi, inchështanec badiadoaic. Adecbidi, ushë nidash choaic. ²⁷ Aidëmbi naden tantiec: Matses tantiaquin abitedi uaquin nashundenembi. Aden ambi matses abi tantiaquin nabanaid isash matses, ¿Tsuinsin nabanaid nepec? qeshun ëbi tantiaquin Icho ëbi capec, quequin tantiaquin Nuquin Papan nuqui nashunec. Aden nashunquin Nuquin Papan nadatiambocquin nabanaid nuqui ismedenec. ²⁸ Aidën nac tiboquequid ëbitedi nebi. Aidën nac capuquidbidi ëbitedi nebi. Adembidi min matsesën dada uampid adomboen chiaid nad iqueque. Tantia. Chuinu: Nuquin Papan bacuëbidi ëbitedi nebi, quequin min mëdimbon chuipanëdash.

²⁹ “Nuquin Papan bacuëbo ëbitedi iquec tiboquequid icquin matsesën nacnenaid tiboquesha papa cain cuënenquioctiadquidi matses nec. ³⁰ Ënden matsesën ambi nacnenaid aden cuësho tantiashe Nuquin Papa, Chën.

Adoenda, quenquicochoedi nēbi, Mimbi icsamboen tantiaid ěnta, quequin chiec. ³¹ Matsesěn naid chuibante ushě chonoc matses icsaidbědta ambi bědamboen naid chuibanquin Nuquin Papan chomeshun matses icmiaiděn cuidbanendac. Ambi abipadquid matses icmiaid, Nuquin Papan matsesěn naid chuibanquid icmenu caid uněsacsho isun ambi chiampicpaden nanuequin Nuquin Papan uincuemepondash –quepanědash Pabado Adeyopaco yacno iccuededquido Esus tantiamenuc.

³² Adec aidi uněsacsho Nuquin Papan uincuemepondash, quequin Pabadon chuisho tantiash utsi-utsiec māměnshuměnubi utsi-utsiec: –Aiděn chuiboed padpiden tantianuna –quepanědash. ³³ Adoaquien, Pabado Adeyopaco caid yacnoěsh nidpanědash. ³⁴ Adec nidshun yuec ushquin chuisho tantianu quec Pabadoběd iccuededquin utsin-utsinquien padpiden-padpidemboen tantiabededpanědash. Aden Pabadon chuibanac utsi-utsiec Esuquidistu tantiaquid yampanědash: Něidic, Dionisio cuěmědquid Adeyopaco caid yacno iccuededquido chuiquid nepanědash. Utsibic, chido Damadis cuěmědquid adecbidi Esuquidistu tantiaquid yampanědash. Aidoběd utsi-utsiec Esus tantiaquid yampanědash.

18

Codinto yacno Pabado tabadaid

¹ Adec Atenas caid yacno tabadash auěshquio puduanec nidec shubu dadpen icquid Codinto caid yacno Pabado chopanědash. ² Ambo isadaidbo Aquida cuěmědquid nidaid Ponto caid yacnoshon tishaid Pabadon istuidpanědash. Isadaidbotedi nidaid Itadia yacnoěsh nidtan, ancanquiděn cac aton chido Pidisida cuěmědquidběd Codinto yacno choash Aquida icpanědash. ³ Nidaiděn capuquid yua bitsi shubumpi nacnenquid abipadquid Aquidaběd aton chido icsho isun aidoběd tabadquin Pabadon shubumpi nacnenpanědash. ⁴ Codinto yacno tabadec aton matses isadaidbo iccuededte badiad icnuc Nuquin Papan chiaid chuibante shubuno nidshun, Esuquidistu Nuquin Papan madombo nec, quequin tantiamenuen Nuquin Papan chiaid dada uamiampid Pabadon chuibampanědash.

⁵ Ambo tabadnubi Sidasběd Timoteyo nidaid Masedonia yacnoěsh choambic shubumpi nacnenenquiocquin isadaidbo Esuquidistu tantiamenuen Pabadon chuibampanědash. ⁶ Adsho, Aid tantiatiapi, quequin isadaidbon Esuquidistu icsamboen chuisho tantiash abi daěd dasiuidaid běntsecquid chicshun ishcunec Pabado: –Esuquidistu mibitedi chiombi. Aid tantiesa yec uněsash Nuquin Papa yacno puduedenquio mibitedi iquendac. Adquid Nuquin Papan cuidquin něsecatequid nendac. Něbi padpiden mibi chienquio iquemi. Isadaidpembon tantiatsiash, quequin aido chuibanemi –quepanědash Pabado isadaidbo tantiesa chiec.

⁷ Aden chiashic Nuquin Papan chiaid chuibante shubu yacnoěsh pudueanec aid dayuntsěqui shubu icquiděn Pabado puduedpanědash. Aid shubu icbo Usto cuěmědquid Nuquin Papa tantiaquid icpanědash. ⁸ Uston shubunoshon Esuquidistu Pabadon chuibanac Quidispo cuěmědquid Esuquidistu tantiaquid yampanědash. Aidi Nuquin Papan chiaid chuibante shubun iccuededquido chuiquid dapa icpanědash. Aidběd aton shubun icquidtedi Esuquidistu tantiaquid yampanědash. Adecbidi Codinto yacnocquid dadpen Esuquidistu tantiaquid yampanědash. Adsho adquidtedi acten mentobampanědash.

⁹⁻¹⁰ Adashic, yuecash inchěshěn Pabado usho Nuquin Papa: –Codinto yacnocquid dadpen Esuquidistu tantiaquid yanendac. Aden ěmbi chiac dacuědenquiocquin comapenen chuideneta. Mibi dayun uaquidquio nebi.

Aden dayun uasho ëbi tantiesabon mibi natiametiapimbo iquendac — quepanëdash Pabado caic. ¹¹ Aden chiac Codinto caid yacno seta abentsëc matamiash ushë 6ted nidmec tabadquin Nuquin Papan chiaid Pabadon chuidonepanëdash.

¹² Adnubien nidaid Acaya caid yacnoçquidon chushcaid chuisho tantiashun matses icsambocsho cuidte chuiquid Cadion cuëmëdquid icnubi isadaidbon Pabado bedshun abi chushcaid Cadion chuinen buampanëdash. ¹³ Ambo bëquin puduedmiash: —Ancanquidën chiaid niacquin matsesën tantiatemaid nëid dadan chiosh —quepanëdash Pabado chieshënquido Cadion caic.

¹⁴ Adoquien Pabado onquetsenubi Cadiomba onquedopanëdash: —Tantiata, isadaidbo. Mibi chuinu. Nëidën icsamboen nabanaid mibitedishun ëbi chuisho tantiatsiambi. ¹⁵ Aden chienquo yec, Nëidi mibi onquiaidbëdta min matsesën Nuquin Papa cain cuënaid icsamboen chuiquid nec, mibi quepec. Adecbidi, Mimbi natemaid chuiquidquo nëid dada nec, mibi queopec. Aden mimbi chuisho tantiashun, Èbi chienda caimbi. Domano chuiquidën naden nata quequin chiaid niaquesa nëid nec, quequin isembi. Aden ëmbi isac mibi chushquiaid mibi chuiqua yacno nidshun chuitanta. ¹⁶ Aden chuishumbic Cadionën: —Aidtedi umanuc puduemeta —cac isadaidbo Pabado bëboedo Cadionën namiaidon puduemepanëdash. ¹⁷ Adoac puduëshumbic Nuquin Papan chiaid chuibante shubun iccuedquido chuiquid utsi Sostenes cuëmëdquid bedshun isadaidbon comapenen cuespanëdash. Adosho isun chiac Cadion, Icsamboen naic, quenquo yec otacquo tsadpanëdash.

¹⁸ Adnubien Codinto caid yacno yuec tabadashic Esuquidistu tantiaquido nianec nidaid Sidia yacno nidoaic Pabado puduampanëdash. Abëdi Aquida aton chido chedobëd Codinto yacnoësh nidec shubu dadpen icquid Senquedeya caid yacno chopanëdash. Ambo tabadquin, Nuquin Papan ëbi dayun uaid cuidquin Edusaden yacno choshon piucquid menembi, quequin ismenuequin aton manëdaid Pabadon matasmepanëdash. ¹⁹ Ambo ushë abentsëc nidmec tabadash cano antabëdtoanec acte dapa potiash Epeso yacno choshon Aquida aton chido chedobëd, Nëmbobi tabadnu, quepanëdash. Adsho tantiashun aid daëdi nianec Nuquin Papan chiaid chuibante shubu yacno nidshun isadaidbo Esuquidistu tantiamenuen Nuquin Papan chiaid chuibampanëdash Pabadon. ²⁰ Aden chuibansho tantiashun: —Adomboembidi chuibanuec çada ëbëd yuec tabadtsia? —iccuedquidon caquien: —Nëbi padenquo iquebi. ²¹ Nuquin Papan shubu dadpen icquid Epeso caid yacno Esuquidistu chuibanuec nidoata cac choatsiabi —quianec auëshquo puduanec nidequi cano antabëdtopanëdash Pabado.

²² Canon nidequi shubu dadpen icquid Sesadeya caid yacno choash Edu-saden yacno Esuquidistu tantiaquido iccuededacno nidshun isanec nidequi shubu dadpen icquid Antioquiya yacno Pabado choapanëdash. ²³ Ambo choash yuec tabadashic padpidec puduanec, Esuquidistu tantiec iccuededquido tantimequiono, quëc nidequi nidaid Cadasia caid yacno choash tabadquin chuibanashic auëshquo nidequi nidaid Pidiquia caid yacno choash tabadquin Esuquidistu tantiec iccuededquid dadpen bëdamboen tantiamenuen chuibanoapanëdash Pabadon.

²⁴ Adnubien isadaidbo Apodos cuëmëdquid shubu dadpen icquid Adecan-dedia caid yacnoësh Epeso yacno chopanëdash. Aidi dadpen tantiaquid yec Nuquin Papan chiampid tantiaquid nepanëdash. ²⁵ Uan pado acten mentoanquid Esuquidistu chiec onquiaiduidi tantiaquin chuibanquid Apodos icpanëdash. ²⁶ Aidi Nuquin Papan chiaid chuibante shubu yacno nidshun

dacuēdenquiocquin ambi tantiaid chuibanpanēdash. Aden chuisho tantiaid, Ēbi yacno isec cho, qeshun Aquidan aton shubu yacno buanshun Esuquidistu choaid ambi nadatiamboquin naidbēdtabi abi unēsash uincue-naid chuibanpanēdash Aquidabēdtan aton chidon Apodos tantiamequin.

²⁷ Aden Esuquidistu bēdamboen tantiaid Epeso yacno yuec tabadquin Esuquidistu Apodosēn chuibanpanēdash. Adec yuec tabadquin chuibanashic, Nidaid Acaya caid yacno nidnu, quepanēdash. Adec nidnuesho tantiaidshun, naden dada uashun Apodos menepanēdash Epeso yacnocquidon: Nēid dada uaid sananquid Apodos cuēmēdquid Esuquidistu tantiaquid nec. Ēmbi isaid neque. Yuedta, quequin dada uashun, Apodos Epeso yacnocquidon menepanēdash ma nidaid Acaya caid yacnocquido Esuquidistu tantiaquido Apodosēn menenu, qeshun. Aden meniac puduanec nidec nidaid Acaya caid yacno choash puduedshun Esuquidistu tantiaquido bēdamboen tantiamenuen chuibanpanēdash. ²⁸ Aden chuibanquimbic isadaidbo Esuquidistu tantiasabo icsho isun abēd onquequin, Esuquidistu Nuquin Papan Chomiaid nec, quequin Nuquin Papan chiampid Apodosēn chuibanpanēdash.

19

Epeso yacno Pabado abēd icquido tabadaid

¹ Codinto yacno Apodos icnubi Pabado nidaid Pidiquia caid yacnoēsh puduanec podquedēn choec macuēsh dapa dectatocuētsenec shubu dadpen icquid Epeso caid yacno choapanēdash. Ambo choshon Esuquidistu tantiaquido istuidshun: ² —¿Esuquidistu tantiaquido icshoda Nuquin Papan aton Mayan mibitedi menepanēdash? —capanēdash Pabado.

Adoaquien: —Nuquin Papan Mayan iquec, quequin tantiamboocombi —quepanēdash Epeso yacnocquido.

³ Adoaquien Pabado: —¿Atotsi canuen mibi acten mentobampanēdash? —quepanēdash.

Adoaquien: —Uan padon chiaid tantiaquid icsho acten mentondashi —quepanēdash Epeso yacnocquido Pabado chiech.

⁴ Adoaquien: —Mibi icsaid ēnta, qeshun abimbo tantiaquidtedi acten mentobanquin, Ēbi tsibanec choquid Esus tantiaquid icta, quequin Uan padon chuipanēdash —quepanēdash Pabado Epeso yacnocquido chiech.

⁵ Aden chiac, Esuquidistu tantiaquid nebi, quequin Epeso yacnocquidon chuisho tantiaidshun padpiden acten mentomepanēdash. ⁶⁻⁷ Aden aidtedi acten mentoacsho mēdanten Pabado mamishbanac aid doseted Nuquin Papan aton Mayan menepanēdash. Aden meniac abi onquiactemēdenquid onquec Nuquin Papa chiech cuēdēmpanēdash Epeso yacnocquido.

⁸ Adashic Nuquin Papan chiaid chuibante shubun puduedshun Pabado Nuquin Papabēd tabadaid chuibanpanēdash. Cuembo tantiamenuquin ushē choaid 3ted nidmequin badiadquidēn-badiadquidēnquien dacuēdenquiocquin Nuquin Papan chiaid Pabado chuibanpanēdash. ⁹ Aden chuisho tantiaidshun pamumēdabimboec tabadquin, Tantiatiapibi, quequin utsin-utsinquien chieshēmēnquioquin Esuquidistu icsamboen chuipanēdash. Aden chiac Esuquidistu tantiaquidobēd Pabado, Nidnu, quianec Nuquin Papan chiaid chuibante shubu yacnoēsh puduanec nidec Tidano cuēmēdquidēn chuibante shubu yacno choshon adomboembidi tantiamenuen matsesbēd onquequin Nuquin Papan chiaid chuibanpanēdash. ¹⁰ Seta daēd matamequin adomboembi chuibanpanēdash Pabado. Aden chuibansho tantiaidshun nidanesun chiac nidaid Asia caid yacnocquidon tantiapanēdash. Adoac isadaidbobēd isadaidpembo Esus tantiaquido yampanēdash. ¹¹ Epeso yacno Pabado

tabadsho Nuquin Papan nadatiambocquid icmiacsho ¹² Pabadon dada cuëscashun dashcute cuëshë buanshun daicsaid mishbanac bëdampanëdash. Adembidi Pabadon dada cuëscabanaidën nënquid mishac bëdampanëdash. Adembidi pashuaidtsen pamishac bëdanoapanëdash. Adembidi mishac mayan icsa dapuduempanëdash.

¹³ Adnubien mayan icsa dapuduemenuen Pabadon chiacpaden tanquin isadaidbo utsibon: —Esus Pabadon chuiboedënquo dapuduen —capanëdash. ¹⁴ Pabado tanuequido isadaidbo chuiquid Esqueba cuëmëdquidën mado 7ted icpanëdash. ¹⁵ Aden chiaquien mayan icsa: —Esus iquec, quequin ëmbi tantiaid aidi nec. Pabado iquec, quequin ëmbi tantiaidbidi aidi nec. ¿Mibitedi tsutsi neque? Tantuanu. Chui ¹⁶ —qeshun nebudquin dashcute ched-chedcapamboen mayan icsan cuesactaniaqui shubu nuntanuësh puduenanec cuempanëdash Esqueban mado. ¹⁷ Adec cuensho isquidon chiac Epeso yacnocquid isadaidbobëd isadaidpembo dacuëdedpanëdash. Adec dacuëdquien, Dacuëdampambo iquec. Esuquidistu bëdamocquid nec, quequin tantiabededpanëdash. ¹⁸ Esuquidistu tantiesa ichoedi Esuquidistu tantiaquid yanec dacuëdenquo yec Esuquidistu tantiaquido iccuededacno nidshun abi icsaid chuibanpanëdash. ¹⁹ Adquid dadpeshun icsamenuen ambi ompoquin naid ismenquiochoedombi, Nëbi adquid ictiapibi, quequin cuëte dëtsiadotanquin ambi ompoquin tantiamiaid dada uatetedi tantianuen bedash utsitsen icsabudnushë qeshun abitedi tauipanëdash. Aden tauiboed menequin piucquid dadpen bedtsiandac, quepanëdash. ²⁰ Aden abi icsaid dada uate tauisho isquidon chuibanac Esuquidistu tantiaquid dadpen yampanëdash.

²¹ Adashien Pabado: —Edusaden yacno nidnuequin nidaid Masedonia caid yacnocquido isbidanquin nidaid Acaya caid yacnocquidotsen isbidanec nidec Edusaden yacno choash tabadashic shubu dadpen icquid Doma caid yacnotsen nidtiadquo iquebi —quepanëdash Pabado. ²² Aden chiash Asia caid yacno abi tabadquin Masedonia caid yacno abia Timoteyobëdta Edasto nidmepanëdash Pabado.

²³ Aid daëdi nidan Epeso yacno tabadquin Esuquidistu Pabadon chuibanaguien tantiesabo nëishpanëdash. ²⁴ Adquid Demetedio cuëmëdquid Diana caidbimboecnuc nacnemequid icpanëdash. Aidëmbi ambi nacnemaiad menequin piucquid dadpen bedbampañdash. ²⁵ Aden Esuquidistu tantianu quesa icquin ambi Dianabimboecnuc nacentu caidobëdta abipadquid Diana nacnemequid utsibo iccuededmeshun Demetediön nadopanëdash: —Nuqui tantiaid Dianabimboecnuc nacneshun menequin piucquid dadpen nuqui bedbanec. ²⁶ Aden nanubi nidaid utsi yacnoësh Pabado cuëmëdquid nëmbo choshon utsi comapenen chuibanac Epeso yacnocquid dadpembëdta nidaid Asia caid yacnocquid dadpeshun tantiec. Dianabimboecnuc nacnenaid tiboquesa iquec. Adquid matsesën tantiaid abimbo ictiapimbo iquec, quequin Pabadon chiec. ²⁷ Aden chiac matses dadpeshun tantiaish Dianabimboecnuc nacnenquido icsambo iquec, quetsiash ëbitedi caic. Adecbidi, Dianabimboecnuc nacnenaibëd abi tabadte shubu uashunaid icsambo iquec, queoapec. Adecbidi Dianabimboecnuc nacnenaid tiboquesa icsho matsesën tantienquo ictiadquidi nec, queoapec Pabado. Aden chiac nidaid Asia yacnocquidon dadpeshun Diana tantiaibodombi padenquo yampec. Aidëmbi tantienquo yanshun aidbimboecnuc nuqui nacnenaid bedenquo iquendac —quepanëdash Demetedio.

²⁸ Aden chiac ambi chomeboedtedi, Piucquid ëbi menequin ëmbi nacnenaid matsesën padpiden bedenquo ictsiash, quec nëishash: —Epeso yacnoc-

quidon tantiaid Diana bēdambo iquec — quec comapenec cuēdcuededpanēdash. ²⁹ Adec comapenec cuēdcuededsho tantiash Epeso yacnocquid utsibo aidobēd cuēdcuededpanēdash. Adec cuēdcuededquin nidaid Masedonia caid yacnoēsh Pabado bēd chobero Cayobēda Adistadico bedshun iccuededte shubu yacno cuēdcuededquidon buampanēdash. ³⁰ Aden aid daēd bedshun buansho isquidēn chiac Pabado, Iccuededte shubu yacno nidnu, qesho tantiashun: —Padi. Ambo nidenda —capanēdash Esuquidistu tantiaquidon. ³¹ Adembidi, anocquido chuiquid utsin-utsinquien Pabado chuiopanēdash.

³² Adnubien cuēdcuededquidon Cayobēda Adistadico bedshun buansho isash matses dadpen, ¿Atotsieshun aid daēdi bēo? quequin tantienquoio yec tabadpanēdash. ³³ Adnubien, Nuqui tantiacpadomboen chuitan, quequin isadaidbon Adecandedo cuēmēdquid nēnantanquoio tsicunepanēdash. Aden tsicunequien nidtoash: —Tantia. Chuinu —quequin ³⁴ daēdpactsēc chiec onqesho tantiash onqueboedi ēnēdash tabadnubi: —Isadaidbo aid nec —qesho tantiash: —Epeso yacnocquidon Diana cain ambi tantiaidbimboecnuc nacnenaid bēdambo iquec —quec baded-badedquiec cuēdcuededpanēdash.

³⁵ Adec cuēdcuededshobien Epeso yacnocquidon naden nata quequin chiaid dada uaquidēn ēnēdmenuequin nadopanēdash: —Epeso yacnocquidon tantia. Chuinu. Diana caidbimboecquid abucuēsh paēdaidbimboecnuc nacnenaid nuqui comapenen tantiaidbēda abi tabadte isquido nuqui nec. Adquid Epeso yacnocquido nec, quequin nidaid utsi yacnocquidon tantiec. ³⁶ Aden utsibon tantiec, quequin tantiaquin icsamboen nainda. ³⁷ Dada daēd mimi nēmo bēboed Diana caidēn shubun puduedambocosh. Adembidi ampiambo iccosh. Adecbidi, Diana caid chiec icsamboec onguenquiocosh. ³⁸ Adenquoio icnuc Demetediobēd icquido abi chushquiaid chuinec Epeso yacnocquidon naden nata quequin chiaid tantiaquid yacno nidshun ³⁹ mimi tantiacpaden chuita cuēdcuededenquiocquin. ⁴⁰ Comapenec cuēdcuededec qesho tantiash ancanquid dapan Epeso yacnocquido bēdamboen tabadmeta caid yacno nidshun chiac, Ancanquid dapan chiacpadec Epeso yacnocquido tabadenquoio iqueque. Cuēdcuededquido chome, nuqui catsiash. Aden chomiac ¿atotsi nuqui chuipe? ⁴¹ Aidēn nuqui chomenushe quiash min shubuno nidaneta —capanēdash Epeso yacnocquidon naden nata quequin chiaid dada uaquidēn. Aden chiac Demetediobēd iccuededquido nidanepanēdash.

20

Masedonia yacnocquido isbidanec nidequi Quedesia yacnocquido isbidanec nidaid

¹ Natia cuēdcuededboedo nidanian Esuquidistu tantiaquido chomias Pabado: —Nidaid Masedonia caid yacno nidoaibique. Bēdamboec tabadta —quianec Epeso yacnoēsh puduanuc abēdi nidondabi. ² Auēshquoio puduanec nidquin nidaid Asia caid yacnocquid utsi-utsien chuibidanec nidaid Quedesia caid yacno choapondash Pabado. ³ Ambo choash ushē abentsēc chotsēcncuc nidmec tabadash: —Nidaid Sidia caid yacno nidnu —quepondash. Adsho tantiashun: —Ambo nidacsho mibi cuesunenuquin isadaidbon cainec —cac nidaid Masedonia caid yacno Pabado nidoapondash. ⁴ Nidaid Masedonia caid yacno choash Pabado tabadnubien abēd capuquido bēyucanec nidaid Asia caid yacno nidpondash. Abēd capuquido nēitded icpondash. Nēidic, shubu dadpen icquid Bedeya yacnoēsh choquid Sopated cuēmēdquid; utsibo shubu dadpen icquid Tesadonia yacnoēsh choquido Adistadico cuēmēdquidbēd Secundo cuēmēdquid; utsibic, shubu dadpen icquid Dedbe caid yacnoēsh choquid, Cayo cuēmēdquid; utsibobi, nidaid

Asia yacnoësh choquido: nëidic, Timoteyo cuëmédquid, utsibic Tiquico cuëmédquid, utsibic Tedopimo cuëmédquid. Aidedi icpondash. ⁵ Aidedi bëyucanec Asia yacno nidec shubu dadpen icquid Todoas caid yacno choash tabadquin Pabado caimpondash. ⁶ Aidedi nidan pan nami uainquioctequid pete ushëtedi tantiec tabadanec Pabado béd cano antabédtoanec nidec 5tedec ushun bëyucamboed istuidpondash. Ambo shubu dadpen icquid Todoas caid yacno 7tedec ushec Pabado béd icquido tabadoapondash.

Eyutico unësascho uincuemiaid

⁷ Todoas caid yacno tabadequid dominco ushën Esuquidistu tantiaquidobéd iccuededquin Pabado béd icquidon Esuquidistu unës uate tantiaquin pan cuësh-cuëshun pebededpondash. Aden piashic Pabado, Badiadash nidebi, quiash yuec onquepondash inchëshspotsembo yantsëcquiec. ⁸ Aid onquiacno shubu abentsëquën tacpan uaid 3tedi icpondash. Abuc tacpan yacno dectatoash quën tabadnubi tabote dadpen chênquepondash. ⁹ Pabado onquenubi nëbi caniaid, Eyutico cuëmédquid, iste shëcuë yacno tsadec ushëcasmash ushtotanec abucüësh paédpondash. Adec paédsho isash budbudshun unësascho isbedednubien ¹⁰ Pabadotsen budquin dayumbudec: — Unësboedi abi tiboquianequ. Shubicuededenda —quepondash. ¹¹ Aden chiash abuc quën yacno padpidec dectatoashun abitedishun pebededpondash. Aden piash tabadec Pabado utsibéd onquecuededpondash badiadbudtsëcquiec. Adec badiadbudbon Pabado béd icquido shubu nuntanuësh puduem-puduenubien ¹² paédboed aton shubuno utsibobéd nidpondash bédambo yec.

Todoas yacnoësh puduanec Mideto yacno chote

¹³ Adashic Pabado: —Podquedën nidebique. Shubu dadpen icquid Ason caid yacno nidshun anoshon ëbi cainta —quianec nidpondash Pabado. Adanec aid nidnubi Todoas yacnoësh abéd capuquid utsibobéd puduanec nidequi cano antabédtoanec Ason yacno nidoapondabi. ¹⁴ Adec nidequi Ason yacno choshon istuidac Pabado ëbëdi cano antabédtoanquin potiash shubu dadpen icquid Mitidene caid yacno choapondash. ¹⁵ Auëshquio puduanec nidec badiadash acte nënantan nidaid nactédquid Quio caid datambidanec nidash badiadash acte nënantan nidaid nactédquid utsi Samos caid datambidanec shubu dadpen icquid Mideto caid yacno choapondash. ¹⁶ Ambo choash: —Edusaden yacno badedquio nidebi. Adec ambo nidnuequin nidaid Asia caid yacno tabadenquiocquin shubu dadpen icquid Epeso caid datanembi. Isadaidbon chidon bëyuc tishampid dada bacuë unësmenquiocquin matante tantiaid ushë chonoc Edusaden yacnombo tabadebi quequin Epeso datanembi —quepondash Pabado.

Epeso yacnocquido tsusiobo Pabodon chuibanaid

¹⁷ Adashic Mideto caid yacno tabadtuidshun Epeso yacnocquido Esuquidistu tantiaquido tsusiobo Pabodon chomepondash. ¹⁸ Aden chomeshun naden aido chuipondash: —Chiembique. Tantiata. Èbi ënden nidaid Asia caid yacno choash mibéd yuec tabadquin nabanaid mibitedishun istenepondac. ¹⁹ Isadaidbo utsibon Esuquidistu tantiesa icquin cuesunete bunquin mëyampondashi. Aden mëyanaqui Nuquin Icbon ëbi chuibeneta capaden ëbi bunaid tantienquiocquin ambi chiaid mibitedi chuibanondambi. Tantiesa icsho isash shubiquiondabi. ²⁰ Esuquidistu mibitedi bédamboen tantiamenuen matses dadpen iccuededacnoshon chuibanondambi. Adem-bidi shubu utsin-utsinquec puduedcuenequin chuibanondambi. ²¹ Nuquin

Papan chiaid abimbo tantiaquin mibi icsaid ënshun aton Mado Esuquidistu tantiaquid icta, quequin isadaidbobëdta isadaidpembo chuibanondambi.

²² “Aden chuibanshobi Nuquin Icbon Mayanën: Edusaden yacno nidta, quequin chuioposhi. Aden aidën chuibocpadequi nidebi. ¿Atotsi ëbi capatsiash Edusaden yacnocquidon? quec dacuëdenquio yec nidebi. ²³ Shubu dadpen yacnoshon-yacnoshonquien Nuquin Papan Mayanën ëbi naden chuided-chuidedec: Mibi mëyanquid Edusaden yacno iquendac. Adecbidi mibi nauedte quënë iquendac, quequin chioshi. ²⁴ Aden Nuquin Papan Mayanën chuisho tantiasihi, Èbi cuesunepanundac, quenquio yec Edusaden yacno nidoaibi. Esuquidistun ëbi chuibeneta cacpaden naimbudquin utsi-utsiec yacno nidshun Esuquidistu abimbo tantiaquid Nuquin Papanëd tabadte iquec, quequin chuibanembi.

²⁵ “Nëshunquio Nuquin Papan chiaid ëmbi chuibansho mibitedishun tantibenondaidon nëuëshquio ëbi nidacsho mimbi isoainquio iquendac. ²⁶ Èmbi nëshunquio Esuquidistu mibitedi chuibanac, Esuquidistu chiampo iccoshi, quetiapimbo mibitedi iquendac. ²⁷ Tantienuioctsiash, quenquiocquin Nuquin Papan tantiacpaden chuibanombi. ²⁸ Aden chuibanash nëbi nidebi. Èbi nidan Esuquidistu tantiaquido nabanec tabadaid isbanta. ¿Nuquin Papan chiacpadectabi tabadeque? Isnu, quequin isbanta. Adembidi Esuquidistu tantiaquid utsibo bëdamboen isban icsamboen nabanec tabad-nüşe qeshun. Nuquin Papan Mayanën aido isbanquin chuiquid mibi icmioshe. Adota. Aido Nuquin Papa yacno tabadmenuec Esuquidistu unëspanëdash. ²⁹ Èbi nidan abimbo chiacbimboen chuiquid Esuquidistu tantiaquido chuiquid icnuec choendac. ³⁰ Adembidi mibëdi iccuededquin utsin-utsinquien Nuquin Papan chiaid abimbo chiacbimboen muaquin chiendac. Esuquidistu tantiaquid chuiquidquio icnuequin adoendac. ³¹ Adquid Esuquidistu tantiec iccuededquido cuëshëdmequid neque. Ista. Adquid iquendac, quequin mibëdi tabadquin ënenquiocquin chuibanondambi. Adquid choec, quequin mibitedi chiec shubiondabi.

³² “Bëdamboen chuibanombi, quequin tantiaquin mibi nianembi. Esuquidistu tantiaquid iquec, quequin ambi chiaid Nuquin Papan mibi tantiamendac. Aden tantiamequin mibi bëdambo icmeshun abëdi tabadmendac. ³³ Mibëd tabadec, Min piucquid bec cho, quesa niondabi. Adecbidi, Min dashcute bec cho, quesa niondabi. ³⁴ Èmbibi shubumpi nacnenshun menequin piucquid bedshun con na bedondambi. Adembidi nacnenshun bedshun ëbëd capuquido menebanondambi. ³⁵ Adembidi chonoadshun aton na bedshun natiapimboçquid meneta, quequin mibitedi ismebanondambi. Nuquin Icho Esuquidistu nidaidën tabadec nadpanëdash: ‘Utsin natiapimboçsho menequid Nuquin Papan bëdambo iquebi camiaid nendac. Nabanenquio yec bedshumënnquidquio icsho Nuquin Papan bëdambo iquebi camenquio iquendac,’ –quequin Esuquidistun chiacpaden Epeso yacnocquido tsusiobo chuipondash Pabadon.

³⁶ Aden chiashic Pabado Nuquin Papa chuinuec utsibobëd danëshën seabducuededash onquecuededpondash. ³⁷ Aden Nuquin Papa chiec onqueshumbic nidtocuededshun abitedishun Pabadon chuiboed tantiaquin Pabado dayumbededquin shubi uabededpondash. ³⁸ Èbi padpiden mimbi isoainquio iquendac, Pabado quesho tantias shubicuededpondash. Adec shubiquin dayumbudash unësquio yec Epeso yacnocquido tsusiobo Pabodobëd cano yacno nidanepondash.

21

Edusaden yacno Pabado nidoaid

¹ Epeso yacnoçquido tsusiobo acte cuëman tabadnubi cano antabëdtoanec Pabadobëd capuquido nidquimbi cuebi potiaş acte nënantan nidaid nacnëdquid Cos caid yacno choapondash. Badiadnuc auëşquio puduanec nidec acte nënantan nidaid nacnëdquid utsi Dodas caid yacnotsen choashic puduanec nidequi shubu dadpen icquid Patada caid yacno choapondash.

² Ambo choashic nidaid Penisia caid yacno cano dapa utsin nidnuequid istu- idash antabëdtoanec Pabadobëd capuquido nidoapondash. ³ Adec nidquimbi acte nënantan nidaid nacnëdquid Chipide caid datambidanec nidaid utsi Sidia caid yacnotsen choash shubu dadpen icquid Tido caid yacno choapondash. Ambo choshon ambi ansandoshon bëaid icbo yacno buamepondash. ⁴ Aden buan-buanubi Esuquidistu tantiaquido yacno nidanec puduedash 7tedec ushec Pabadobëd capuquido tabadpondash. Ambo tabadnubi, Edusaden yacno Pabado cuesunenuquid iquec, quequin Nuquin Papan Mayanën tantiamiac aidon, Edusaden yacno nidenda, quequin Pabado chuipondash.

⁵ Aden chiaqui cano icbo nidnuesho isash padpidec cano antabëdtoanec, Nidnu, quepondash Pabado. Aid nidnuesho isash Esuquidistu tantiaquido bënëbëdi aton chido aton bacuëbo chedo Pabadobëd acte cuëmano choash Nuquin Papa chiec onquecuededpondash. ⁶ Adec Nuquin Papa chiec on- qeshun, Nidec nid, cac Pabadobëd icquido cano antabëdtoanubien Tido yacnoëş acte cuëmano choboedo aton shubuno nidaneoapondash.

⁷ Adec cano antabëdtoanec auëşquio nidec shubu dadpen icquid Tode- maida yacno choash Pabadobëd capuquido tabadtuidpondash. ⁸ Adec anocquidobëd tabadec badiadash caño antabëdtoanec nidec Sesadeya caid yacno choash Uedipen shubun puduedpondash. Esuquidistu tantiaquidon chido niante meneta caid utsi 6tedibëd Uedipe icpondash. ⁹ Aidën champibo 4tedi aton bënënen bedambocquidtedi icpondash. Aidon Nuquin Papan naden nanun chiaid tantiaquin chuibanquid icpondash.

¹⁰ Adec Uedipebëd yuec tabadnubi Nuquin Papan naden nanun chi- aid chuiquid utsi Accabo cuëmëdquid nidaid Udeya yacnoëş chopondash.

¹¹ Adec choshon Pabado n tsiute bedash tataniadash mëtaniadash Accabo nadpondash: —Nuquin Papan Mayanën naden ëbi chioshe. Tantiata. Chuinu. Ëmbi nabocpadomboen isadaidbon Edusaden yacno tabadquidon nëid tsiute icbo bedshun tataneshun mëtaneshun buanshun, Unës uata, que- quin isadaidpembo menendac —quepondash Accabo Pabado chiec.

¹² Aden Accabon chuisho tantiaş shubiquin Pabadobëd choboedon Uedipen shubun icquidobëdtan, Edusaden yacno nidenda, quequin Pabado chuiopondash. ¹³ Adoaquien: —¿Atotsi canuen shubiquin ëbi icambo icme? Edusaden yacno nidshun Nuquin Icho Esuquidistu chuibanşo ëbi taneshun unës uatsiaş, quequin tantiaquin abi Esuquidistu chuibanuna — quepondash Pabado. ¹⁴ Adoaquien, Nidenda, caqui niacbidanec, Edusaden yacno nidebi, queopondash Pabado.

Adec, Nidebi, qesho tantiaşun: —Ma Nuquin Icho bunacpadec nidpa- nuna —capondash.

¹⁵ Aden chiashic Sesadeya yacnoëş puduanec Edusaden yacno Pabadobëd capuquido nidoapondash. ¹⁶ Adec nidşo isash Sesadeya yacnoçquid Esuquidistu tantiaquid utsi-utsiec Pabadobëd nidquin Menason cuëmëdquidën shubu yacno buanac puduedpondash. Aid shubu icbo Chipide yacnoëş choash Edusaden yacno tabadquid Esuquidistu tantiaquenquidbidi nepondash.

Pabadon Acobo isaid

¹⁷ Adec Edusaden yacno choacsho Esuquidistu tantiaquidon Pabadobëd capuquidtedi Pabadobëdtabi yuedpondash. ¹⁸ Aden yuedac tabadash badiadash Acobo isec nidoapondash. Acobobëd Esuquidistu tantiaquido tsu-siobotedi icpondash. ¹⁹ Adec nidec ambo puduedshun, Mibi isec chobi, quequin, Ëmbi Esuquidistu chuibanubi Nuquin Papan tantiamiac isadaidpembo dadpen Esuquidistu tantiaquido yanosh, quequin Pabadon chuipondash.

²⁰ Aden chuibanac Nuquin Papan naid bëdambo iquec, quiash Pabado caic nadpondash: —Nëmbo Esuquidistu tantiaquid isadaidbo dadpen iquec. Aido Nuquin Papan Moises dada uamiampid, Naden nata, quequin chiaid tantiaquido nec. ²¹ Adquidombo icquin, Min bacuëbon shui dëbid dëtemenda, quequin isadaidpembo Pabadon chiec, qesho tantiash, Nuquin Papan, Naden nata, quequin chiaid niacmequid Pabado nec, quequin icsamboen tantiec aido tabadec. ²² Aden chiec tabadquin mibi nëmbo choaid tantiash mibi cuesunete buntsiash. Mibi cuesunete bumenquo icmenuequid ?Atotsi nuqui napeba? ²³ Naden nac bëdambo ictsiashe. Tantia. Chuinu, Pabado. Nëmbo ëbëd icquido Nuquin Papauidi tantiec tabadnuequid daëd-daëdquiec iquec. ²⁴ Nuquin Papan ëbi bëdamboen dayun uadenesho ismenu, quiash nidaid Quedesia yacnoësh, Ëbi matas, qesho matasac mibi: “Edusaden yacno choash Nuquin Papa tabadte shubu uashunaid yacno nidash puduedshun shubu nacnenuëquid piucquid menembi,” quepondac. Nëmbimbi Edusaden yacno mibi choaac. Nëid dadatedibëd Nuquin Papa tabadte shubu uashunaid yacno nidshun mimbi ënden chiondacted piucquid meniac, Pabado icsambo iquec, quequin chuiboedombi, Nuquin Papan, Naden nata, quequin chiacpaden naquidquo Pabado nec, quequin tantiasiash. ²⁵ Ëmbi isadaidpembo Esuquidistu tantiaquid utsibo dada uaquin naden chuioaombi: “Nuquin Papan, Naden nata, quequin chiaid dada uamiampid nëidtedictsëqui mimbi natequid nendac. Nëidic, Nuquin Papan uaidbimboecnuc nacnenaid tantiaquidon pete sanaid penda; adembidi, min chidouditsëqui chudta; adembidi chidon min bënëuidi chudmeta; adembidi, nëish cuesaid intacchobi codocaid penda.” Aden dada uabanquin isadaidpembo chiombi —quepondash Acobo Pabado chiec.

²⁶ Aden chiaquien badiadash Nuquin Papa tabadte shubu uashunaid yacno dada 4tedbëd choash Pabado, Nëidted dadabëdtambi ëmbi Nuquin Papan chiaccted piucquid meniombi, quepondash Nuquin Papa tabadte shubu uashunaid yacnocquid chiec. Aden chianec nidoapondash.

Pabado bedaid

²⁷ Adashic 7tedec ushquin naimbudnubi Pabado Nuquin Papa tabadte shubu uashunaid yacno nidoaic puduedash capusho nidaid Asia caid yacnoësh choquidon isadaidbon ispondash. Aden isash Pabado bedmete bunec, Isadaidbo utsibo nëishmenu, quec: ²⁸ —Isadaidbotedishun tantiata. Nëidëmbi Nuquin Papa tabadte shubu uashunaidën puduedtemaid isadaidpembo yuedquin nëid shubu bëda icsa uameboed neque. Bednu. Uidën uaic cho —quequin abimbo chiacbimboec onquecuededpondash. ²⁹ Epeso yacnoësh choquid isadaidpembo Tëdopimo Pabadobëd Nuquin Papa tabadte shubu uashunaid dayun capusho isash abimbo chiacbimboec onquecuededpondash.

³⁰ Aden chiac, Icsambocquid bednu, quianec titinquec cho-choshon Pabado bedshun nimanuc buanuc buanec Nuquin Papa tabadte shubu uashunaid isquidon shëcuë bëtashpondash. ³¹ Aden Pabado buanec, Cuesunenu, quec cuëdcuededsho tantiashun chuitanac ³² abi chuiquidbëd sondado cho-chosho isun Pabado cuesbededquin isadaidbon ëmpondash.

³³ Adec choshon sondado chuiquidën bedtan cac Pabado bedshun shocosh bucun mëtanemepondash. Aden mëtanemiash: —¿Tsutsi nëid nepec? ¿Atotsi icamboen naosh? —quepondash sondado chuiquid. ³⁴ Adoaquien icuededquid utsi-utsitsëcquien chiec onqueduedednubi utsi-utsitsëcquien utsi uain chiec cuëdcuededpondash. Adec dadpen cuëdcuededsho: —Tantiatiapibi ye. Quënën nauedmenu. Buanec nid —quepondash sondado chuiquid sondado chiec. ³⁵ Aden Pabado buanec nidec nauedte shubun dectatonobi cuëdcuededquidon tsuscuededtsëcquien Pabado bednuesho isun Pabado abuc cadoanquin sondadon buampondash. ³⁶ Aden cadoanquin buansho isash cuëdcuededquido: —Aidien cuesunetiad —quepondash sondado chuiquid chiec.

Ambi nabanaid icuededquido Pabadon chiaid

³⁷ Adec abi buanec shubun puduedtsenubi Pabado: —¿Ada ëbi onquesho tantiatsia? —quepondash Quidieco matsesën onqueten Pabado sondado chuiquid chiec.

Adoaquien: —¿Quidieco matsesën onqueten onquequidta mibi ne?

³⁸ Chuiquid dapa icnuequin Equipito yacnocquid matses dadpen cuëte nibëdacno buanaccondaidien nechitec, qeshun mibi bedombi.

³⁹ Adoaquien: —Isadaidbo nebi. Nidaid Sidisia caid shubu dadpen icquid Tadso caid yacnoshon tishaid yec con matses chuibante bunebique. ¿Adabi oncame? —quepondash Pabado.

⁴⁰ Adoaquien: —Ai, onqueta —capondash sondado chuiquidën.

Adoac abuc dectatoten nidtoash nidec, Otacquio tabad, quequin ismequin Pabadon mëdante uic-uiccapondash. Aden nasho isash isadaidbo otacquio tantiec tabadsho isash: —Ebedeyon, nuquin onqueten mibi chuinu —quec nadec Pabado onquedopondash:

22

¹ —Ëmbi naid mibitedi chiembique. Isadaidbo tsusiobobëdtan isadaidbo utsibon tantiata.

² Adec aton onqueten Pabado onquesho tantiash isadaidbo otacquio tantiec tabadpondash.

³ Aden tantiec tabadsho isash Pabado: —Ëbibi Isadaidbo nidaid Sidisia caid yacnoshon shubu dadpen icquid Tadso caid yacnoshon tishaid nebi. Aden ashunquo tishaqui Edusaden yacno choash canipondabi. Adec nëmbo Edusaden yacnoësh canidosho nuqui tantiamequid Camadiedën nuquin tsusedpabon naden nata quequin chiaid tantiamepondashi. Aidon naden nata quequin chiaid tantiaquin adomboembidi nadeniombi mibitedishun nacpadembi. ⁴ Aden nabanquin Esuquidistu tantiaquido Nuquin Papan chiaid niacquido nec, quequin dadabëdta aton chidë chedo bedmeshun mëyamequin quënën nauedmeshun unës uamepondambi. ⁵ Ëmbi adobanquin naondaïd tsusio dapatedishun tantiec. Adondash, quequin chuitiadquio icquin aidon chuishiash. Adembidi Damasco yacno nidshun Esuquidistu tantiaquid anocquido bedmeshun Edusaden yacno bëmenu, qesho tantiashun Edusaden yacnocquido tsusiobon, Ai, adotan, quequin dada uaid bedondambi Damasco yacnocquid tsusiobo ismenuen.

⁶ “Adash, ushë abuctoan Damasco caid aonentsëqui choshobi abucuësh shocosh tabote dapa bed-bedquiacbimboec chënquequin dëcatepondashi.

⁷ Adec chënquequin dëcatiatic nidaïdën paëdshun nadec abucuësh onquesho tantiapondambi. ‘¿Atotsieshun ëbi mëyane, Saudó? Ëbi chui. Tantanu,’ capondashi.

⁸ “Adoaquimbi: ‘¿Con Icbomboda mibi ne?’ capondac.

“Adoaquien: ‘Nasaded yacno iccondaïd mimbi mëyanaid Esus nebi,’ capondashi.

⁹ “Adnubic ëbëd icquïdon shocosh bed-bedquiacbimboec chënquesho isequi con Icbon chuïsho tantienquïo yec tabadpondash.

¹⁰ “Aden dëcatiac uequin ëmbentsëqui tantiec: ‘¿Atotsimbi nape, Icho?’ quepondabi.

“Adoaquien: ‘Nïdtoash Damasco yacno nidtan. Anoshon ëmbi nata quequin chiaïd utsin mibi chiendac,’ capondashi Nuquin Icbon. ¹¹ Adoaquini nidtoquin shocosh bed-bedquiacbimboec chënquequïdën bëshuacsho isun ëbëd icquïdon mëdïnanquin Damasco yacno buampondashi.

¹² “Adec Damasco yacno choash bëshuash ëbi tsadnubi Ananias cuëmëdquïd ëbi isec chopondash. Aïdi isadaïdbon naden nata quequin chiaïd naquïdquïo icsho isadaïdbo utsibon bëdamboen isaidquïo icpondash.

¹³ Èbi yacno choshon aïdën: ‘Saudò, abuc is,’ cac cuedoquimbi Ananias ispondambi.

¹⁴ “Adsho isash Ananias: ‘Nuquin tsusedpabon Papa cain cuënaïdën, Nuquin Papan ambi tantiacpaden nata quequin chuïquin mibi tantiamendac. Adembïdi ambi chomiaïd, Icsa Nibëdquïd mibi ismëndac. Aïdën chuïsho mimbi tantiendac. ¹⁵ Aden aïd isquin tantïashun utsi-utsien dadpen mimbi isaidbëdta mimbi tantïaïd mimbi chuïbenendac,’ quequin ¹⁶ chuïshumbic Ananiasën: ‘¿Atotsianuen cainec tsade? Esuquïdistu tantïaquïd icquin mibi icsaïd chuita ma mimbi icsamboen tantïaïd ma paucpanuna. mibi paucacbimboen utsibo ismenuen acten mentometa,’ capondashi Ananiasën.

¹⁷ “Adoaqui, Edusaden yacno nïdoash Nuquin Papa tabadte shubu uashunaid yacno nïdec puduedash Nuquin Papa chïec onquec ushacbimboec tsadpondabi. ¹⁸ Adec tsadquimbi Nuquin Icho ëbi chïec onquesho isnubi nadpondash: Mimbi ëbi chuïbansho tantïenquïocquïd yec nëmbocquïdo mibi cuesunete buntsiashe. Edusaden yacnoësh badedquïo nidtan, quequin Nuquin Icbon chuïpondashi.

¹⁹ “Adoaquimbi: ‘Aïdon isnubi mibi tantïaquïd dadpen bedmeshun quënën nauedmïondambi. Adembïdi, aïdon isoanubi mibi tantïaquïd utsiutsien comapenen mëyamïondambi. ²⁰ Adembïdi, mibi chuïbanquïd Esteban cuëmëdquïd utsibon cuënoten se-sequin unës uanubi se-sequïdon dashcute chicshun sanacno tsadquimbi, Unës uata, capondambi. Isadaïdbo tsusiobon ambobïdi icquin ëbi onquesho tantïapondash. ¿Adondacshobi cuesunependabi iquec?’ quepondabi Nuquin Icho chïec.

²¹ “Adoaquini Nuquin Icbon: ‘Isadaïdpembo yacno mibi nidmembique. Nïdta,’ capondash –quepondash Pabado ambi nabanaïd iccuededquïdo chïec.

Pabado cuestsenaid

²² Pabadon ambi nabanaïd chuïbansho tantiec iccuededquïdo otacquïo tabadboed, Isadaïdpembo, quec Pabado onquesho tantïash: –Tantïatiapibi. Adec onquequïd isadaïdbo utsibëd tabadenquïo ictïadquïdi nec. Aïd unës uata –quec cuëdcuededpondash iccuededquïdo.

²³ Adec cuëdcuededec aton dashcute bëntsecquïd canchepamboec dachïquïdshun nïdaïd putu bedtanquin abuc secapondash Pabadon chuïboed tantïatemaïd nec, quequin ismequin. ²⁴ Adnubien, Cuesunenushë shubu nuntan buanta, quequin sondado chuïquïdën chïac Pabado nuntan sondadon buanacsho isash, ¿Atotsi nasho isash isadaïdbo nëïd cuesunete bumpeba? Ambi naïd icsa chuïmenuen comapenen paëmboecnoc cuesta, quequin sondado chuïquïdën chuïpondash. ²⁵ Adoaquien cueste nidtsinacno Pabado

buanshun cuestebēdta tanenuen podon bedshun shoyonaqui Pabado: —¿Atotsi canumbini shoyonquin nai? ¿Domanobon nidaidēnshun tishaid icsho ěmbi naid chuimiabida ěbi cuese? —quepondash Pabado sondado chuiquid chiec.

²⁶ Adsho tantiash sondado chuiquid puduanec nidec abi chuiquid comandante caid yacno choash: —¿Atotsi natseno? Bēboed: “Domanobon nidaidēnshun tishaid nebi,” quiosh —quepondash sondado chuiquid comandante chiec.

²⁷ Adoaquien Pabado yacno nidshun comandanten: —¿Domanobon nidaidēnshun tishaidta mibi nepe? —capondash Pabado chuiquin.

Adoaquien: —Ai, domanobon nidaidēnshun tishaidquio nebi —quepondash Pabado.

²⁸ Adoaquien: —Domanobon nidaidēnshun tishaidpenquio ěbi icsho, ¿ada adquid ěbi icmetsia? quequin piucquid meniondambi —quepondash comandante Pabado chiec.

Adoaquien: —Con tan tishaid yec domanobo nebi —quepondash Pabado comandante chiec.

²⁹ Aden Pabaton chuisho tantiash ambi naid chuimenuen cuestsemboedo nidanepondash. Aden chuisho tantiash Domanobobi Pabado shocosh bucun mētanemechitombi, quequin tantiec comandante dacuēdpondash.

Isadaidbo tsusiobo iccuededacno Pabado buanaid

³⁰ Adshumbic, badiadshun ambi mētanemeboed chicmeshun isadaidbo tsusiobo iccuededacno Pabado buamepondash. ¿Atotsi nasho isash isadaidbo nēid cuesunete bumpeque? Tantiabono, quequin comandanten Pabado buameshun isadaidbo dadpen iccuededacno pūduedmeshun nēnantanquio Pabado niddtomepondash.

23

¹ Aden nidtomaquien isadaidbo tsusiouidi comapenen isec: —Utsibo, ěmbi naid chuibanu. Tantiata. Nuquin Papan isnubi ambi naden nata quequin chiaid nabanquidquio icteniobi —quepondash Pabado.

² Aden chuisho tantiashun: —Muaquin chieque. Ęccues —Isadaidbo tsusio dapan Ananiasēn cac Pabaton dayunquio icquidēn Pabado ěccuespondash.

³ Aden ěccuesaquien Pabado: —Mibi icsaid nibēdacbimboec mibibi tsadsho Nuquin Papan mibi ěccuesmendac. Nuquin Papan naden nata quequin chiaid tantiemi, quequimbi ěbi ěccuesmequin Nuquin Papan chiaid ma mimbi niacpaboc —quepondash Pabado isadaidbo tsusio dapa caic.

⁴ Aden Pabaton chuisho tantiash aton dayunquicquidquio: —¿Aden Nuquin Papan isadaidbo tsusio dapa icta caid chiash dacuēdenquioda ique? —quepondash.

⁵ Adoaquien: —Ęmbi chuiboed Nuquin Papan isadaidbo tsusio dapa icta caid nec, quequin tantiamboccombi. Aidi Nuquin Papan isadaidbo tsusio dapa icta caidquio icsho ěmbi chuibocpaden chienquio ictsenombi. Mimbi abimbo chioc. Ęmbi mibi chuiquid icmiaid icsamboen chienda, quequin Nuquin Papan dada uamiampic —quepondash Pabado.

⁶ Aden chuishumbic, iccuededquid utsi-utsiec saduseyobo icnubi utsi-utsiec padiseyobo iquec, quequin tantiash: —Tantia. Chuinu. Padiseyobo nebi. Ębibi padiseyobon tishmiaid nebi. Adquid yec, Unēsash uincuentequid iquec, quequin tantiaquid nebi. Aden tantiaquid icsho, Icsambocquid nec, quequin ěbi mimbi chiec —quepondash Pabado iccuededquido caic.

⁷ Aden Pabaton chiaquien saduseyobo, Uincuenta nibēdendac, quequin ěmbi

tantiacpaden Pabadon tantienquo iquec, quec comapenec onquecuedednubi padiseyobo, Uincuenta iquendac, quequin èmbi tantiacpaden Pabadon tantiec, quec comapenec onquecuededpondash. ⁸ Unēsash uincuentaquid nibēdec, quec saduseyobo. Adecbidi, Nuquin Papan uaid mayan bēdābēd ambi uaid utsi mayan nibēdec, queoaic saduseyobo. Padiseyobo, Uincuentaquid iquec, quec. Adecbidi Nuquin Papan uaid mayan bēda, ambi uaid utsi mayambidi iquec, queoaic.

⁹ Aden ambi tantiacpaden chuibanec comapenec onquec saduseyobobēd padiseyobo natiambo cuēdcuededpondash. Adec onquec cuēdcuedednubi padiseyobo, Nēid dada bēdambocquid nec. ¿Mayanèn chioshi, queshodambi muc nec capadi? Adecbidi, ¿Nuquin Papan uaid mayan bēdan chioshi, queshodambi muc nec caopadi? Padenquo iquembi. Pabadon chuiboed abimbo iquec, quepondash padiseyobo saduseyobo caic. ¹⁰ Adec comapenec onquec natiambo chushcanansho tantiashun comandanten: —Podon shoyonquin canite dēchicnushē queshun mēnchicshun shubu nuntan bēoata —cac sondadon Pabado mēnchicpondash.

¹¹ Aden mēnchicshun shubu nuntan sondadon yuedaquien Pabado ushash badiadash padpidec inchēshēn Pabado ushnubi Nuquin Icho chopondash: —Mimbi Edusaden yacnoshon ēbi chuibanacpaden shubu dadpen icquid Doma caid yacnoshontsen mibi chuibamembique. Dacuēdenquo yec dayacquo icta —capondash Nuquin Icho Pabado chuiquin.

Pabado cuesunenu quequin ompoquin cainaid

¹²⁻¹³ Adec Pabadobēd Nuquin Icho onquebombien badiadash isadaidbo 40ted Pabado cuesuniabi icquin buna mēmunembi, quequin abimbo chiembi, quepondash. ¹⁴ Aden nanu quish isadaidbo tsusiobo yacno nidash: —Pabado cuesuniabi icquin buna mēmunembi, quequin muenquiocquin chuibanombi.

¹⁵ Èbitedishun ompoquin Pabado cuesunenuquin cainubien mimbi comandante chuitanta caid naden chuimeta: Pabadon naid bēdamboen tantianuna. ¿Ada padpiden isadaidbo tsusiobo iccuedede shubuno bēmeoatsia? quequin chuitan Pabado bēmeoatsiashe. Aden Pabado sondadon bēsho Pabado cuesunenuna —quepondash Pabado cuesunenuquido isadaidbo tsusiobo caic.

¹⁶ Aden aidon chuishobien Pabadon piaquēn tantiashun Pabado yacno nidshun chuioapondash aton piaquēn.

¹⁷ Adoquien Pabadon sondado 100ted chuiquid cho, cata cac nidshun aton piaquēn chiac Pabado yacno sondado chuiquid chopondash. Adec chosho isun: —Nēid con piac nec. Aidi comandante chuite buneque. Aid yacno buanta —Pabadon cac ¹⁸ buampondash.

Aden Pabadon piac comandante yacno buanash sondado 100ted chuiquid: —Quēnēn nauedboed Pabado cuēmēdquidēn ēbi chomeshun: “Con piac comandante chuite buneque. Aid yacno buanta,” cac bēombi —quepondash sondado 100ted chuiquid comandante chiec.

¹⁹ Aden chiaquien Pabadon piac mēdinanquin udictsēc buanash comandante: —¿Atotsi ēbi chuinuec cho? —quepondash comandante.

²⁰ Adoquien Pabadon piac: —Badiadshun isadaidbon ambi namiaid mibi yacno chomec. Aden chomiac nēmbo choshon naden chiec: “¿Ada isadaidbo tsusiobo iccuedede shubuno Pabado mimbi bēoapatsia? Aidēn naid chuibanasho bēdamboen tantianuna,” quiosh cata, quequin chomioshi, quequin mibi chiendac isadaidbo tsusiobon chomiaid. ²¹ Isadaidbon muaquin chiendac. Con cu Pabado buamenuen mibi aden chiendac. Comandanten Pabado bēmetsiashe, quequin tantiaquin Pabado con cu cuesunenuquin caineque. Nidmenda. Con cu cuesunenuquid: “Pabado cuesuniabi icquin buna

mëmunembi,” quiosh. Con cu cuesunenuen nëbimbobi podqued cuëmanshun ompodshon cainec —quepondash Pabadon piac comandante chiec.

²² Adoquien comandanten: —Isadaidbon chiaid mimbi chuiboed utsi chienquoio yec nidec nid —capondash Pabadon piac chuiquin. ²³ Aden Pabadon piac nidmeshun sondado 100ted icquido chuiquid daëd chomiash comandante nadpondash: —Ënden inchëshan Sesadeya yacno ma mibëdi mimbi namiaid sondado 200ted nidnu mitsana buanuequin nacnenta cata. Adomboembidi, cabayo catsadquid 70ted icquido chuiquin nacnenta, quequin chuiyoata. Adomboembidi shocosh sianten senuequin sananquid 200ted icquido chuiquin mitsana nacnenta, quequin chuiyoata. ²⁴ Adembidi Pabadobëd icquido cobednadod Pediques yacno buanun cabayo nacnenta —capondash comandanten sondado 100ted chuiquid daëd chuiquin.

²⁵ Aden chuishumbic naden comandanten dada uapondash Pediques cobednadod caid chuiquin: ²⁶ “Quëdaudio Disias nebi. Chuiquid dapa cobednadod caid, Pediques, mibi bëdambocquid icsho chuinu. Pabado ëmbi bedboed mibi yacno buamenuen dada uaimbique. Ëmbi dada uaid isec onqueta. ²⁷ Nadquoio iccoshe. Tantia. Chuinu. Pabado isadaidbon bedshun cuesunetsensho isun, Aidi domanobo nec, quequin utsin chiacpaden tantiaishun sondado dadpembëd choquin mënichiccombi. ²⁸ Aden mënichicshumbic, ¿Atotsieshun Pabado cuesunëte bumpec? quequin tantianuen isadaidbo tsusiobo iccuededacno Pabado buamiombi. ²⁹ Ambo buameshun isadaidbon chuisho tantiapombi. Aton tsusedpabon naden nata quequin chiaid niacquid Pabado nec, quequin isadaidbo tsusiobon chuiposh. Adembidi, ambí nabanaid Pabadon chuisho tantiaishun quënën nauedenquoictiadquidi nauedmepondash, quequin tantiaishumbi quënën nauedmeoapombi. ³⁰ Aden Pabado quënën nauedmeoashumbic, Podqued cuëmanshun Pabado cuesunenuenuequin isadaidbon cainec, quesho tantiaishun badedquio mibi yacno buamiombi. Adembidi, Pabado icsambocquid nec, quequin aid cuesunenuenuequido mibi yacno nidmëmbi. Adoac ma ambibi Pabadon naid icsa mibi chuipanuna.”

Aden Pabado chuiquin dada uashun ambi dada uaid Pabado buanquid menequin: —Pabadobëdta nëid cobednadod Pediques menenuen buanta —capondash comandanten.

³¹ Aden comandanten dada uashun meniac aidën chiacpaden Pabado buanec sondado aid inchëshëmbi shubu dadpen icquid Antipatidis caid yacno chopondash. ³² Ambo choash badiadshun sondado cabayo catsadquidonuidquoio Pabado buanec nidnubi sondado utsitedi aubidi nida-neoapondash. ³³ Adec Pabado buanec nidequi Sesadeya yacno choshon abi chuiquid comandanten Quëdaudio Disiasën dada uaidbëdta Pabado Pediques menepondash cabayo catsadquidon. ³⁴ Aden meniaquien dada uaid isbanash: —¿Mitsicquid nidaidën icquid mibi ne? —capondash Pediquesën Pabado chuimenuen.

Adoquien Pabado: —Nidaid Sidisia caid yacnoshon tishaid nebi —quepondash.

³⁵ Adoquien: —Mibi icsambocquid nec, quequin chuiquido isadaidbo choacsho mimbi nabanaid chuimëmbi —quepondash Pediques Pabado chiec. Aden chiec onqueshumbic ënden chuiquid dapa Edodes cuëmëdquidën, utsibo abi chushquaid chuimiondaid shubuno Pediquesën buamiac ashunquoio Pabado nauedsho isun: —Puduenanec cuesushe ista —capondash sondado chuiquin.

24

Pediquesën tantianubi Pabadoon ambi naid chiaid

¹ Adashic, 5tedec ushash isadaidbo tsusio dapa Ananiasbëd tsusio ut-sibo Pabado icsaid Pediques chuineuc Sesadeya caid yacno chopondash ambi tantiacpaden chuinuequid Tedtudo cuëmëdquid bëquin. ² Aido chosho isun Pediquesën Pabado chomiacsho isun isadaidbo tsusiobon tantiacpaden chuinuequidën Tedtudon naden Pediques chuipondash: —Mibi chuinu. Tantia. Chuiquid bëdamboquid icquin mimbi bëdamboen nabanac isadaidbo bëdamboec tabadec. ³ Mimbi aden nabansho isun, Bëdamboquid mibi nec, quequin mibi chiemi. ⁴ Aden chuishun mibi chieshmenquiocnequid isadaidbon chushcaboed badedquio chuinu. Tantiata.

⁵ “Nëid mimbi bëmeboed Pabado caidbëd ictiapimbo iquebi. Nëid Nasaded yacno iccondaïd tantiaquido tsusio nec. Aidëmbi nidaidtedi yacno nidshun ambi tantiaid chuibanquin isadaidbo comapenen chushcamequin cuëdcedemiac cuëshëd-cuëshëdposh. ⁶ Aidëmbi Nuquin Papa tabadete shubu uashunaidën puduedtemaid matses puduedmesho isun Pabado bedpombi. Bedash Nuquin Papan naden nata quequin chiampicpadembi cuidte bumpobi. ⁷ Aden cuidnu quenubien comandante Disias cuëmëdquid choshon Pabado mënichanquin buamposh. ⁸ Pabadoon ambi naid chuisho mimbibi tantiaishun, Isadaidbo tsusiobon abimbo chiosh. Icsambocquid nec, quequin mimbi chuioapatsiac —quepondash isadaidbo tsusiobon tantiacpaden chuinuequid Pabado icsambocquid nec, Pediques camenuc.

⁹ Aden Tedtudon chuiquin nainan isadaidbotedi, Ai, Tedtudon chiacpadec iccosh, quequin chuibededpondash.

¹⁰ Adsho tantiaishun, Onqueta, quequin mëdante uiccaquin Pediquesën ismiac Pabado naded onquepondash: —Chuiquid dapan tantia. Èmbitsen chuinu. Dadpen seta matamequin con matses isadaidbo abi chushquiaid tantiaishun mimbi bëdamboen tantiacpaden namedenioc. Adquid mibi nec, quequin tantiaquin, Èmbi naid chuibanec bëdambo iquebi, quec dacuëdenquio yec onquebique. Tantiata. ¹¹ Edusaden yacno choash ambobi 12tedec ushobi. Èbi anoshon isboedon, Abimbo iquec, quequin nëmbo choshon mibi chuitsiash. Edusaden yacno choash Nuquin Papa shubu uashunaidën puduedec Nuquin Papa tantianuec choapobi. ¹² Ambo puduedash utsibëd chushcananenuio yec tabadsho istuidash, Icsambocquid nec, queposh. Adembidi chuibanquin utsibo nëishmequin chushcamenquio iccombi. Pabado icsambocquid nec, quequido Pabadoon chiaid abimbo iquec, quetiadquidi nec. ¹³ Èmbi naid Tedtudon chuibanboed, Abimbo iquec, quetiapimbo iquec tsusiobo. ¹⁴ Nëiduidtsëqui abimbo iquec. Chuinu. Tantia. Nuquin tsusedpabo chuimiapaden Nuquin Papan chomiaid tantiesa isadaidbo tsusiobo icnubi aid tantiaquid nebi. Adembidi Nuquin Papan naden nata quequin chiaid dada uamiampid tantiaquin nabanquidquio nebi. ¹⁵ Adembidi, matses unësascho Nuquin Papan uincueniac abi tantiaquid abëdi tabadnubi abi tantiesa chian anëdënnequid nësecaindac, quequin tantiemi isadaidbo tsusiobon tantiacpadembi. ¹⁶ Aden tantiaquin Nuquin Papan, Bëdamboen mimbi naoc, capashuni, quequin bëdamboen nabanec tabadec nebi. Adembidi, matstedishun, Bëdamboen mimbi naoc, capashuni, quequin adomboembidi bëdamboen nabanec tabadec nebi.

¹⁷ “Adequi nidaid utsi-utsiec yacno capucuenec tabadcuenequin, Edusaden yacnocquid isadaidbo bunec tabadec, qesho tantiaish piucquid

menenuec choapobi. Adembidi, Nuquin Papan bēdamboen dayun uabeniōshi, quequin piucquid menenuec choapobi. ¹⁸ Aden menenuec abi tabadte shubu uashunaidēn puduedash ēbentsēqui capusho ēbi chushcaboedon istuidposhi. Bēdamboec tabadsho istuidposhi. ¹⁹ Ēbi capusho istuidquo isadaidbo nidaid Asia caid yacnoēsh choquid nioš. Aido, Pabado icsamboec tabadsho isombi, quepac caosh. Ambi chiaid abimbo icnuc nēshuntsen adomboembidi chuitiadquidi nec. ²⁰ Adembidi isadaidbo tsusiobon: ‘Padiseyobo yec bēdamboecquid nec,’ quequin ēbi anoshon chiacpadembidi nēshuntsen adomboembidi chuoatiadquidi nechitec. ²¹ Anoshon nēiduidtsēqui chiec comapenec cuēdobi: ‘Unēsash uincuentequid iquec,’ quequin chuisho tantiashun, Icsamboecquid nec, quequin isadaidbo tsusiobon ēbi mibi chiec caimbi —quepondash Pabado Pediques chiec.

²² Aden Pabaton chuisho tantiash Pediques tantiauidquid iquec: —Nēbi mimbi aitedquio chuibansho tantiembi. Comandante Disias nēmo choan mibi padpiden chuimembi —quepondash Pediques Pabado chiec. ²³ Aden chuishumbic naden Pediquesēn sondado chuipondash: —Shubuno Pabado buanshun puduednushe queshun ista. Abi menenuequid abi isnuequid chedo chosho isun yuedta —quepondash Pediques ambi Pabado ista caid chiec.

²⁴ Adashic, daēdpactsēc ushash Pediquesbēd aton chido, Dusidia cuēmēdquid chopondash. Aton chido isadaidbo icpondash. Adec aton chidobēdi choshon abi yacno Pediquesēn bēmiacsho ambi tantiaid Esuquidistu Pabaton chuibanac Pediquesēn tantiauidpondash. ²⁵ Aden chuibanquin Pediques Pabaton nadopondash: Ūtsin abi utsibēd chushcananaid chuibanacsho Nuquin Papan chiacpaden aido nametiad, quequin chuipondash. Adembidi, Icsamane quequin Nuquin Papan chiacpadenuidi nabanta, quequin Pediques chuoapondash Pabaton. Adembidi, Esuquidistu tantiengquo icsho chian anēdēnquequid Nuquin Papan nēsecanushe quequin Esuquidistu tantiata, quequin Pabaton chuoapondash. Aden Pabaton chuisho tantiash: —Padi. Ēmbi naid nibēdsho isun padpiden chuimenuen mibi bēmeoaimbique. Nēbi nidec nid —cac Pabado nidpondash. ²⁶ Adshumbic, adembidi abi yacno Pabado Pediquesēn bēmeded-bēmededpondash. Nidtiadquio icquin piucquid Pabaton ēbi menetsiash, quequin tantiaquin Pabado bēmiash aibdēd Pediques onquepondash.

²⁷ Adashic, seta daēd matamiash Podsio Pesto cuēmēdquid cobednadod yampondash. Aidi cobednadod yanac nidnuequin, Nidta, cainquiocquin Pediquesēn Pabado shubu nudan niampondash naden tantiaquin: Pabado shubun nauedshun ēmbi niansho isash, Bēdamboecquid nec, quequin isadaidbon ēbi cain chuibededpec, quequin Pediquesēn Pabado shubun nauedshun niampondash.

25

Pabaton ambi naid Peston chuimiai

¹ Pesto cobednadod yanash Sesadeya yacno choash 3tedec ushanec Edu-saden yacno nidpondash. ² Adec Pesto Edusaden yacno choash tabadsho isadaidbo tsusiobo, Pabado chushcaquido: ³ —;Ēbitedi bēdambo icmenuequin Pabado Edusaden yacno ada bēmeoatsia? —quepondash Pesto chiec. Pabado bēsho cuesunenuequidon cainshun cusesunepēc, quequin tantiaquin isadaidbo tsusiobon aden Pesto chuipondash.

⁴ Aden chuisho tantiash Pesto: —Sesadeya yacnoshon nauedaid Pabado iquec. Ambo nidebi. ⁵ Pabaton icsamboen naosh, quec utsi-utsiec ēbēdi

nidshun anoshon Pabado naid icsa ëbi chuita —quepondash isadaidbo tsusiobo caic.

⁶ Adashic, 10tedec ushash Edusaden yacnoësh puduanec nidec Pesto Sesadeya yacno choash ushash badiadash matses chushquiaid tantiec tsadte daran tsadtoshon Peston Pabado bëmepondash isadaidbo tabadnubi. ⁷ Aden bëmiacsho isash Pabado dëcatec isadaidbo Edusaden yacnoësh choboedo Pabado naid chiec abimbo chiacbimboec onquecuedepondash.

⁸ Aden isadaidbon chiaquien: —Ëmbimbo isadaidbon naden nata quequin chiaid niacamboccombi. Adembidi, Nuquin Papa tabadte shubu uashunaid yacno nidash aid shubun puduedtemaid isadaidpembobëd puduedambocobi. Adembidi, empedadod Doma yacno tabadquid, Sesad cuëmëdquidën chiaid niacamboccombi —quepondash Pabado.

⁹ Adoaquien: —¿Edusaden yacno buanec anoshon adombidida isadaidbo tsusiobo chuiotsia? —quepondash Pesto Pabado chiec. ¿Edusaden yacno Pabado ada bëmeoatsia? quequin isadaidbon chiacpaden nanuec Pesto adpondash. ¹⁰ Adoaquien Pabado: —Domanobo ancaquidën empedadod caidën, Sesad cuëmëdquidën, Mibi yacnoquido bëdamboen tabadmequid icta, caid icquin mimbimbo chushcananquid bëdamboen tabadmeta. Isadaidbo icsamboen tantiaquin nainquioccombi. Abimbo Pabado chiec, quequin mimbi tantiec. ¹¹ Icsambocquidquio iquec Pabado unës uame, qesho tantiash, Adoanenda, quenquioctsiabi. Isadaidbon abimbo chiacbimboen chuisho tantiash, Pabado buanshun cuidta, quetiapimbo mibi iquec. Isadaidbo yacno buanta, mibi quenuc, Empedadod ëmbi naid chuite bunebi, quequin dada uaindambi —quepondash Pabado Pesto chiec.

¹² Aden Pabado chuisho tantiash Pesto udictsëc nidash abipadquidbëd onquiash choash: —Sesad ëmbi naid chuite bunebi, mibi qesho aid yacno mibi buamenuna —quepondash Pesto Pabado chiec.

¿Atotsimbi Pabado napatsia? quequin Peston Aquidipa caid

¹³ Adashic daëdpactsëc ushash ancanquid utsi Aquidipa cuëmëdquidbëd aton chuchu Bedenise cuëmëdquid Pesto isedec chopondash. Sesadeya yacnoquido cobednadod Pesto yanosh, quequin chiac aid isec chopondash.

¹⁴ Adec isedec choash dadpen ushec tabadsho isash Pabado chiec Pesto nadpondash: —Pediquesën quënën nauedmiaid Pabado cuëmëdquid chuinu. Tantiata. Aidi abi iquec shubu nuntan. ¹⁵ Aid ambo icnubi Edusaden yacno nidobi. Ambo ëbi choacsho isun, Pabado icsambocquid neque. Aidi unës uata, quequin isadaidbo tsusiobon chuiposhi.

¹⁶ “Adoaquien, Mibi abëdi chushquiaid Pabadontsen chiamoocno unës uata quetiapimbo iquebi. Domanobon naden nata quequin chiacpadpenquioquin adotiapimbo iquebi, quequin isadaidbo tsusiobo chiombi.

¹⁷ Aden chiac nëmbo choshon abi chushquiaid aidon chuisho tantiec tsadnuen Pabado bëmiombi. ¹⁸ Aden Pabado bëmiacsho ëmbi tantiacpaden abi chushcaquidon Pabado naid chienquiocpash.

¹⁹ Ëmbi tantiaidpenquio Esuquidistu unësash uincuenaid Pabado tantiaid icsambo iquec, quequin chuiposhi isadaidbo tsusiobon. ²⁰ Aden ambi tantiaidquio bëdamboen tantienquio yec nadpobi Pabado caic. Min matsesën naden nata quequin chiaid tantienquio iquembique. Edusaden yacno buamiac mimbi naid anoshon chiac bëdambo ictsiash, quequin chiombi. ²¹ Adoaquien:

“Empedadod, Sesad yacno nidshun ëmbi naid chuitadquio iquebi,” queposh Pabado. Aden chiac quënë yacnoshon aid puduedmetiapimbo iccobi. Nëmbo Pabado quënën tabadec —quepondash Pesto Pabado chiec Aquidipa tantiamenuquin.

²² Adoaquien Aquidipa: —Èbi aidèn chuibansho tantiate bunebi — quepondash.

Adoaquien Pesto: —Badiadshun aidëmbi chuisho mimbi tantiendac — quepondash.

Aquidipa ambi naid Pabodon chiaid

²³ Aden Peston chiaquien badiadash bëdaidquio dasiuidash Aquidipabëd aton chuchu choash iccuededte quënën puduedash sondado chuiquido chuiquid utsibobëd aid daëdi tabadpondash. Aido tabadsho isun Peston Pabado bëmepondash. ²⁴ Bëmiac Pabado nënantanquio nidtonobi Pesto nadpondash: —Ancanquid Aquidipan mibëd iccuededquidon ëmbi bëmeboed mibitedishun isec. Aidi chuinu. Tantiata. Isadaidbon, Nëid dada icsambocquid neque. Unës uame, quequin chioishi. Èbi Edusaden yacno choacsho isun adoposh. Adomboembidi nëshun Sesadeya yacnoshontsen aidombidi chuioposhi. ²⁵ Aden chuisho tantiashun nëid ambi naid chuimeoapombi. Aden Pabodon chiaidtsen tantiashun, Nëid unës uatiapimbo iquebi, quequin tantiapombi. Aden ëmbi tantianubi, Empedadod yacno nidshun ëmbi naid chuite bunebi, quequin Pabodon chuiposhi. Adoac Doma yacno aidi buamenuna. ²⁶ Aden buamenuen çatotsimbi dada uaquin empedadod chuipatsia? quequin tantienquiocquin Pabado ambi naid chuimeoaimbi ma aden chiac mibitedishun tantiaoapanuna. Aden tantiashun, Naden dada uata, mimbi cac dada uatsiambi. ²⁷ Ambi icsamboen naid nibëdnuc Doma yacno buametiapimbo iquebi —quepondash Pesto ancanquid Aquidipabëd iccuededquido chiec.

26

¹ Aden Peston chiaquien: —Mibibi onquequin mimbi naid chui. Tantienu —quepondash Aquidipa Pabado caic.

² Adoaquien Pabado nadpondash: —Ancanquid dapa Aquidipa mibi tabadnubi isadaidbon ëbi chushcaid chuibanec bëdambo iquebi.

³ Isadaidbon naden nata quequin chiaidbëdta abi onquiaid mimbi tantiec. Aden tantiaquid mibi icsho ëmbi nabanaid ëmbi chuibansho tantiata. Chuinu.

⁴ “Èbi tishondacnoësh canidosho con matsesën isadaidbon istenepondashi. Nëbi caniquid iquec Edusaden yacno choash tabadsho adembidi aidon istenepondashi. ⁵ Èbi padiseyobo icquin padiseyobon naden nata quequin chiaid niaquesa nebi. Padiseyobon, Pabado adquid nec, quequin chuitadquidi nec. ⁶ Unësash uincuente iqueque. Aid cainec tabad, quequin Nuquin Papan nuquin tsusedpabo chiampicpaden chuiquin dada uamiaid tantiaquid ëbi icsho isash, Icsambocquid nec, quec isadaidbo.

⁷ Nuquin tsusedpa Acobo isadaid caidën madobon tsyuecquidon, Unësacsho Nuquin Papan uincuemetete iquendac, quequin chiaid tantiaquin caimbudec. Aidon cainacpaden cainembi, quesho, Icsambocquid nec, capebi isadaidbo tsusiobon. ⁸ Nuquin Papan nadatiambocquid uincuemetete chiaid mimbi tantienquio icpe.

⁹ “Ènden ëmbitsen tantiauidquid shubu dadpen icquid Nasaded yacno ictened, Esus cuëmëdquid tantiaquid icsambocquid nec, quequin unës uamembi, queshun adobampondambi. ¹⁰ Edusaden yacnoshon adquid dadpen mëyamepondambi. Isadaidbo tsusiobon, Adota, cac ëmbibi Esus tantiaquid bëdambocquid icsho bedshun quënën nauedmepondambi. Unës uanu, quesho tantiaid, Ai, unës uatiadquio iqueque. Adota, quepondabi. ¹¹ Nuquin Papan chiaid chuibante shubu utsi-utsiec yacno nidtednidtedondabi aido mëyamenuc. Esus, Nuquin Papan madopenquio nec, aido

camenuen mëyamepondambi. Adembidi nidaid utsi yacnoshontsen adquid istuidshun mëyameoapondambi.

12 “Adobanec isadaidbo tsusiobon, Adota, quequin dada uaid buanec nidaid Sidia caid shubu dadpen icquid Damasco caid yacno nidondabi. 13 Adec nidquimbi ushë cuembo yanec ushë comapenec chënquequidën ëbëd icquidobëdta ëbi dëcatesho isondambi. Abimbo iquec, quequin mibi chuiu. Ancanquid dapan tantiata. 14 Aidën dëcatiac ëbitedi nidaidën uebudcuedondabi. Adec uequimbi con matsesën onqueten ebedeyon onqueten abucüesh onquesho naden tantiondambi: Saudo, çatotsieshun ëbi tantiaquido mimi mëyampe? Èbitsen mëyantiadpambocquin mimi aido mëyanec, quec onquequin chiondashi.

15 “Adoaquimbi: ‘çTtsutsi mibi ne, Icho?’ caondac.

“Adoaquien, Mimi mëyanaid Esus nebi. 16 Èmbi namiaid mibi icmenuec chobi. Esus isombi, quequin çëbi chuibeneta caid nëbi mibi yanec? Èbi chuibenequin mimi isaidbëdta ëmbi yuecshun ismetequid chuibeneta. 17 Aden ëbi chuisho mibi cuesunete bunquid isadaidbobëd Isadaidpembo icsho mibi mënchiquendambi. Adquid chuibanta, quequin mibi nidmimbi. 18 Aden chuibanac utsin-utsinquien pashuac bimboe boedëmbi tantiendac. Icsambocquid nebi, quequin tantienquico boedi, Icsaobique. Èbi pauc, Papa, quependac adquid. Mayan icsan yua icboedi Nuquin Papan bacuë iquendac. Adquid yanash abi icsaid paucac Nuquin Papan bëdambo icmiaid ëbi tantiaquid utsibëd iquendac, quequin Esusën chuipondashi.

19 “Aid abucüesh onquesho tantiashun chieshenquiocquin chuibenimbi caimbi, mibi chuiquin Aquidipa. 20 Damasco yacnoshomba chuibanondambi. Anoshomba chuibanshumbic Edusaden yacnoshontsen chuibanooandambi. Anoshon chuibanshumbic nidaid Udeya caid shubu utsi-utsiec yacnoshontsen chuibanondambi. Isadaidboba chuibanombi. Isadaidpembotsen chuibanombi. Mibi icsaid ënquin Nuquin Papa abimbo tantiaquin ambi chiapaden nabanta, quequin chiombi. 21 Aden chuibanquid yec Nuquin Papa tabadte shubu uashunaid yacno puduedash capusho isun isadaidbon bedshun cuesunetsenoshi. 22 Padnuen ëbi dayun uaquid Nuquin Papa icquin isadaidbon cuesunenushe queshun cudasëmposhi. Adoac nëid ushënquio mibëdtabi mimi namiaido mibi chuibanec nebi, ancanquid Aquidipa. Moisesën, Nadquio iquendac, quequin dada uampicpaden chuiquid nebi. Nuquin Papan chuimiaid utsibon, Nadquio iquendac, quequin chiampicpaden chuiquidbidi nebi. Aidon chuipampid nadquio iqueque. Tantia. 23 Nuquin Papan Chomiaid, Quidistu, mëyanac unësash uincuenaid yec ëbi tantiaquid ëbëdi tabadendac, quequin aton matsesbëdta isadaidpembo Quidistun chiendac, quequin chiampicpadeç chopanëdash —quepondash Pabado iccuedequido chieç.

24 Adec Pabado onquesho tantiash: —Min tantiate icsabudash mibi onquec. Mimi tantiaid dadpen iquec tantienquio yec onquechitequien mibi nec —quepondash Pesto Pabado caic.

25 Adoaquien Pabado: —Bëdamboen tantiec onquebi. Èmbi chiaid abimbo iquec, caimbi mibi ancaquid Pesto. 26 Ancanquid Aquidipan ëmbi chuibamboed abimbo iquec quequin tantiec. Aden aidën tantiasho dacuëdenquiocquin aid chiemi. Èmbi chuibamboed ompoenquiocquin isquidon chuisho aidëmbi tantiapondash. 27 Nuquin Papan ambi naden nanun chiaid dada uamiampidon chiaid chuisho mimi tantioc —capondash Pabado Aquidipa chuiquin.

²⁸ Adoquien Aquidipa: —¿Mimbi chuiboedtedtsëqui tantiashtabi Esquidistu tantiaquid yampe? —quepondash Aquidipa Pabado chiec.

²⁹ Adoquien Pabado: —Esuquidistu tantiaquid ëbipadquid mibëd icuededquidtedibi Nuquin Papan icmepashun. Nëid ushënquo daëdpactsëc chiombi. Aidtedtsëqui chiac tantiatipimbocsho isun yuen chuibantsiambi ma Esuquidistu tantiaquid mibitedi yanueshun. Padnuen ma mëtaniaid ëbipadquid ma mibitedi iquenquiocpanuna —quepondash Pabado.

³⁰ Aden Pabado chuibanaquien ancanquid Aquidipa nidtopondash. Nid-tosho isash Pestobëd Bedenise icuededquid utsibo chedo nidtocadoedpondash. ³¹ Adec nidtocadoedash puduenash onquecuededec: —Chuibaamboed icsamboen nainquioccosh. Adoenquiocsho unës uainquioctiad. Adembidi ënden quënën nauedenquiocpatecnëdan —quepondash ancanquido.

³² Aden chiash: —Empedadod chuite bunebi Pabado quiambocsho quënën nauedacnoshon aidi mimbi nidmetsenosh —quepondash Aquidipa Pesto chiec.

27

Doma yacno Pabado buanaid

¹ Adashic, Nëbi mëtaniaido nidaid Itadia caid yacno buanac bëdambo iqueque. Pabadobëdta mëtaniaid utsibo buanta, quequin sondado 100ted chuiquid Peston chuipondash. Aid sondado 100ted chuiquid Udio cuëmëdquid icpondash. Domanobo ancaquid tantiec aid cuëmëdacpadec Aucustobo nebi quec sondado 100tedbëdi abi chuiquid abibi cuëmëdpondash.

² Aden buanta cac Pabadobëdta utsibo bedshun acte cuëmano buanshun cano dapa Adadamitio cain cuënaid istuidpondash. Aid cano dapa istuidashien, Icho, nidaid Asia caid cuëman shubu dadpen icquid utsi-utsiec yacno nidtuidebi, quequin chuisho tantias Pabadobëd antabëdtopondabi. Adec antabëdtosho isash puduampondash. Pabadobëd icquid utsi Adistadico icpondash. Aidi nidaid Masedonia caid shubu dadpen icquid Tesadonica caid yacnoësh choquid icpondash.

³ Adec cano antabëdtoanec nidquin shubu dadpen icquid Sidon caid yacno buampondash. Ambo choash, Mitsana nibëdeque. Mibi yuedquid yacno nid. Aidon mibi menetsiash, quequin Pabado bëdamboen tantiaquin sondado chuiquidën, Udion, chuipondash. ⁴ Adshumbic Sidon caid yacnoësh puduanec nidquin potesho cunquequidën bëquedtuidac ushë choacmi cuenadtanquin acte nënantan nidaid nactnëdquid Chipide caid datampondash.

⁵ Adembi nidaid Sidisia caid ëquë datanash nidaid Pampidia caid ëquëtsen datanec nidaid Disia caid yacno choash nidquin shubu dadpen icquid Mida caid yacnotsen canon buampondash. ⁶ Ambo choshombic sondado chuiquidën cano utsin nidnuequin nibënquin istuidpondash. Nidaid Equipito caid yacno shubu dadpen icquid Adecandedia caid yacnoësh choboedi nidaid Itadia caid yacno buanu caid istuidpondash. Aden aid istuidshun Pabadobëd icquido aid canontsen antabëdtomepondash. ⁷ Adec Mida yacnoësh puduanash nidquin potec dadpen ushacsho cunquequidën cano bëquedtuidpondash. Aden bëquedac bëdiactsëc nidquimbi shubu dadpen icquid Nido caid ëquëbitsen datambidanec acte nënantan nidaid nactnëdquid Quideta caid yacno buanoapondash. Uquë cuëma utsiuc Sadmon caid icpondash.

⁸ Ushë choacmi Quideta yauc cuenadtanec choquin shubu dadpen icquid Buenos Puedtos caid yacno buampondash. Udictsëc shubu dadpen icquid Dasia caid iccondash.

⁹ Cunquequidën bëquedac yuenquo potiactanetsëcquien buampondash. Comapenec cunquequidën nuqui bëquedendac, quequin tantiaquin Pabado nadopondash: ¹⁰ —Chuinu. Tantiata. Nëuëshquo puduanquin potesho

cunquequid dapan bëquedshun cano chic-chictsiash. Acten mentoadmane quequin potenquio iquembi, quequin chuita –capondash Pabado sondado chuiquid chuiquin. ¹¹ Aden Pabado chiaquin sondado chuiquidën niacbidanquin cano icbobëdtan cano nidmequidën nidnu quequin chiaid tantiapondash. ¹² Cunquequid dapa cunquenubi Buenos Puedtos yacno tabadec iquen uanquid dapanquio nuqui iquenendac, quiash shubu dadpen icquid Penise caid yacno nidnuna. Ambo choash nuqui tabadendac cunquequid dapa cunquenubi, quequin utsitedishun chuipondash.

Acte dapa potesho cunquequid dapanquio cano bëquedte

¹³ Nuqui iquenendac, quequin tantiaquin bëdiactsëc cunquesho isun abi bunacpaden nanuequin cano uidën uate shocosh yuëmbocquid indoash puduanquin Quideta cuëma anoentsëqui buampondash. ¹⁴ Adec nidequi uidictsëc yanshobi ushë cho-choaid ëquëctscshun Quideta caid nidaid mananucüesh cunquequid dapa choquin bëquedtuiddquin ¹⁵ icbon cano nidmetiapimbocnobi cano buampondash. ¹⁶ Aden cunquequidën buanaqui acte nënantan nidaid nacrëdquid utsimpi Quëdauda caid ëquëbictsc cuedaquimbi canompi cano dapan nëshun buanaid buanashe qeshun anandopondash. ¹⁷ Aden canompi anandoshon cano dapa canchednushe qeshun uidën uaquin datanebanshumbic cano buante dashcute abi decante cuestebëdtabi imbudshun dashcute chicacsho cunquequidën cano comapenen buampondash. ¹⁸ Aden cano cunquequid dapan buanui badiadnuc acte natiambo tëccoasqesho isun ambi ansandoshon bëboed acte nësiapondash. ¹⁹ Adshumbic 3tedec ushun bucu dënëshun cano dashcute indotetedi nësiaoapondash. ²⁰ Aden nësecanec nidquimbi inchëshën ushëbëdta uispa abu chëshën bëtinacsho isenquio iccondambi. Adembidi badiadën ushë isenquio iccondambi. Dadpen ushqin aidtedi isenquiocondambi. Aished isenquiocnobi acte comapenen tëccoascapondash. Ad icsho isash, Bënudchitequien nuqui iquec, abitedimbo quecuededpondash.

²¹ Adequi nuqui iquec, qeshun buna mëmumbededequi abitedi nidanepondabi. Adec canon nidnubi Pabado nidtoash nadpondash: – Chuinu. Tantiata. Quideta caid yacnoësh puduanenda caombi. Adsho tantiaboshi tantienuio yec mibi puduampoc. Èmbi chiapaden nabanuc mimbi ansandaiddedi abi ictsiandac. Adecbidi, Unësebi, quenquio nuqui ictsiandac. ²² Padnuen acte tëccoasquenubi nuquitedi unëshenquio iqueque. Dacuëdenquio yec dayacquio icta. Canouidi canched-canchedendac. ²³ Nuquin Papan namiaidquio nebi. Adquid icsho inchëshën ambi uaidën mayan bëdan ambi chomiaidën naden chiohi: ²⁴ “Ancanquid dapa, empedadod caid mates chushquiaid tantiec tsadte yacno mibi nidtoendac. Mibi ambo nidmequin canon mibëd icquidtedi acte yacnoshon mënchiquembique. Dacuëdenquio yec tabad,” caposhi Nuquin Papan uaid mayan bëdan. ²⁵ Aden aidën chiac dayacquio icta. Nuquin Papa ambi chiapaden nabanquid nec, quequin tantiembi. ²⁶ Adembidi, acte tëccoasquequidën nuqui acte nënantan nidaid nacrëdquid cuëmamo buanshun cano cancheshunendac, quequin tantiombi –quepondash Pabado canon antabëdtoaido chiech.

Cano canched-canchedaid

²⁷ Adashic, Buenos Puedtos caid yacnoësh ënden nidboshi 14tedec ushec acte Adidia caid yacnoshon cunquequidën buampondash. Aden acte tëccoasquequin buanubi inchëshpotsembo yanuc, Cuëma anoentsëquien nuqui choendac, quequin cano nidmequidon tantiapondash. ²⁸ Aden tantiaquin, ¿Tionda iqueque? Tanu, qeshun yuëmbocquid shocosh bucu dëdectanshun

pumbudquin tampondash. Aden tanshun, Aidtiompenquo iquec, quequin chuipondash. ²⁹ Nidaid cuēnote dapa cunquequidēn buanquin cano semenushe qeshun cano uidēn uate dapa yuēmbocquid tsitsumi tsidectanshun acte nēnequin uidēn uash ma badiadbono quiash tabadpondash. ³⁰ Adec tabadnubi cano nidmequido cuenueshun dēbiate yacnoshontsen cano uidēn uate yuēmbocquid dēdectanuequin abimbo chiachimboen canompi anandoaed nēnetsempondash. Cano dapa mentoadtsiash, qeshun cuenuequin adopondash. ³¹ Adec aido nidtsenubien Pabado: —Cuenuequido canompin nidnuc cano dapan nidquido nuqi mentoadendac—quepondash sondado chuiquid caic. ³² Aden Pabado chiaquien abi decante bucutedi sēnac canompi nēpaēdpondash cuenuequido nidtiapimbo yec.

³³ Adashic, badiadte anoentsēc yanubi Pabado nadpondash: —Catodtseted ushec, Mentoadtsiabi, quequin tantiaded-tantiadedtsēcquin mimbi piambococ. ³⁴ Mibi mentoadenquo iqueque. Min manēdaid abentsēc paēdenquo iqueque. Penquicoeodi unēschifomane quenquiocquin peta —quepondash Pabado. ³⁵ Aden chuishumbic utsitedi ismequin pan bedshun Nuquin Papa chuishun pan cuēshun Pabado pepondash. ³⁶ Aden Pabado pesho isun, Nuquitsen penuna, qeshun abitedishun pebededpondash. ³⁷ Cano antabēdtoquido 276ted icpondash. ³⁸ Aidtedshun peshumbic, Cuēmano nidec, quequin ambi sandoaid utsitedi tiedēn caniquid ēshē acte nēsiapondash, Cano yuēmbo iquec, qeshun.

³⁹ Adshumbic, badiadnuc ambi isacmaid nidaid istuidpondash. Acte cuidiantanquid cuēmambi masi icsho isun ambo cano nidmenueshun ⁴⁰ uidēn uaid tebanac acte nēpaēdpondash. Adembidi, cano dēbidiadmete bucutedi secudoashun cano dēbiateno buanquin dashcute shoyontanquimbi cadoapondash, Cunquequidēn acte daēd naccuēscananacno buampashuni, quequin. ⁴¹ Aden cano nidmenubi cano dēbiaten masi setuidec dēchiquidtiapimbo yec cano dapa dētocquepondash. Adec dēchiadash acte tēccoasquequidēn cano dapa canche-canchequin tauapondash.

⁴² Adsho isash sondado, Mētaniaidtedi cuentsiashe. Cuesunenu, qesho ⁴³ tantiash Pabado cuesunenushē qeshun: —¡Chēn! —capondash sondado chuiquidēn. Aden chuishumbic, Acten tantanec mēquiadquido tantanec nidanenubi ⁴⁴ tantantiapimbocquido cano cuēsh-cuēshēdaid bedbanash noadec tantanquido tsibanec nidta, quequin chuipondash sondado chuiquidēn canon antabēdtoquido chuiquin. Aden ambi chiacpadquiec nidanec mentoadenquo yec abitedi nidaid yacno choash decatocuededpondash abitedi.

28

Madta caid yacno Pabado bēd icquido choaid

¹ Adec nidaid yacno choash decatoneshun, Nēid acte nēnantan nidaid nacnēdquid Madta caid nec, qesho tantiabededpondash. ² Ambo tabadquidon abitedi bēdamboen yuedpondash. Iquen uampamboec ue sequenubi Madta caid yacno chosho isun cuēte dētsiadoshon, Cuēc cho, quequin chuipondash. ³ Adnubic Pabadontsen cuēte tanunquiocquid bedtanquin tsindoquin masandopondash. Aden masandoaid nēdēnquiacnoēsh puduenquin nisin Pabado mēpepondash. ⁴ Aden mēpiash ēcchiquidenquo yec mēdiadsho isashien anocquido: —Nisin piad cuesunianquid nepanui. Mentoadenquo yec actenuēsh decatocasho nisin piac unēschitequien iquec. Abi icsaid cuidtequidien nechitec.

⁵ Adec onquecuedednubien Pabado comapenen uicac nisi cuēte dētsiadaidēn nēpaēdpondash. Adnubien Pabado abi bēdambo icpondash.

⁶ Aden Pabadon uicac nisi paëdsho isun Pabadon mëdante mëbidisquetsiashe. Isnu, quequin isbededpondash. Aden tantiaquin yuen cainquin mëbidisquenquiocsho isash, Nisin mëpeboed utsibon papa cain cuënaid nepanui, quecuededpondash Madta caid yacnocquido.

⁷ Madta caid yacnocquido tsusio dapan shubu anoentsëqui icpondash. Tsusio dapa Pudio cuëmëdquid icpondash. Aidëmbi aton shubu yacno canon choboedotedi yuedshun abentsëc chotsëcnuc ushquin ëbitedi bëdambo icmepondash. ⁸ Adnubien Pudion papa chumbo yec pienec aton madon shubu nuntan uepondash. Adec Pudion papa uec qesho tantiasb Pabado aid isec nidshun ashunquiobi Nuquin Papa chuishumbic Pudion papa damishquin bëdamepondash Pabadon. ⁹ Pudion papa bëdanacsho isash Madta caid yacnocquido nënquidbëd daicsaid chedo cho-chopondash. Èbitsen bëdametsiashe, quiashe cho-chosho aidotsen bëdamepondash Pabadon. ¹⁰ Adosho isun canon choquido bëdamboen tabadmepondash anocquidon. Nidnuesho tantiashe menebampondash mitsana nibëdec quequin.

Doma yacno Pabado choash tabadaid

¹¹ Adashic ushë 3ted nidmiashe Madta caid yacnoësh puduampondash. Madta caid yacno choash cano icbo, Iguenoampamboec icnuc nëmbo tabadnuna, quiashe tabadash: —Nidnu. Nid —quianec aton cano antabëdtosho isun Pabadobëd icquido sondado chuiquidën antabëdtomepondash. Aid cano shubu dadpen icquid Adecandedia caid yacnoësh chopondash. Cano icbon papa cain cuënaid daëd ambi tantiaidbimboecnuc cano dëdectanquin nacnenaid icpondash. Ambi papa cain cuënaid abentsëc Castod icnuc utsi Podus icpondash. Adembidi aton cano cuëmpondash icbon. ¹² Aidën puduanec nidequi acte nënantan nidaid nacnëdquid utsi yacno choash shubu dadpen icquid Sidacusa caid yacno choash 3tedec ushquin tabadmepondash. ¹³ Ambo tabadash puduanquin aid acte nënantan nidaid nacnëdquid cuëma anoentsëqui potequi nidaid Itadia caid cuëmano choashun shubu dadpen icquid Dequio caid yacno buampondash. Ambo choash ushash badiadash puduanec nidec cano tsitsumishun cunquequidën buanac badiad utsin shubu dadpen icquid Puteyodi caid yacno chopondash. ¹⁴ Ambo choshon Pabadobëd icquidon Esuquidistu tantiaquid abi istuidacsho abitedi yuedpondash. Sietetedec ushec Esuquidistu tantiaquidobëd tabadashic auëshquio puduanec podquedën nidequi shubu dadpenquio icquid Doma caid yacno chopondash Pabadobëd icquido. ¹⁵ Podqued Apio caidën choec, quequin chuituidac Esuquidistu tantiaquid Doma yacnocquid utsi-utsiec Pabado bëquedec nidanepondash. Adecbidi Esuquidistu tantiaquid utsibo shubu dadpen icquid Tabednas Abentsëc chotsec quequin cuënaid yacnocquido Pabado bëquedoaic nidaneoapondash. Aido cho-chosho isashien, Èbi dayacquo icmenuen nëitdedi mimbi chomioc, Papa, quec dayacquo iquebi, quiampondash Pabado. ¹⁶ Adec aido bëquedec choash auctidi nidec Pabadobëd Doma yacno choapondash. Doma yacno choacshobien Pabado quënën nauedenquiocquin shubun tabadmepondash sondado abentsëcshun abëd tabadquin isnubi.

Doma yacnoshon Pabadon Esuquidistu chuibante

¹⁷ Adec aton shubun tabadec 3tedec ushun isadaidbo tsusiobo chuinuquin, Aido chome, capondash. Aido chomiacscho isun Pabadon nadopondash: Chuinu. Tantiata. Nuquin matses icsamboen nainquioccombi. Adembidi nuquin tsusedpabon naden nata quequin chiaid niacambo iccombi. Adoenquiocshobi Edusaden yacnoshon nuquin matsesën bedshun domanobo chuiquid meniondashi. ¹⁸ Aden meniac domanobo chuiquidën,

Mimbi naid chuiban, cac chuibanondambi. Aden chuibansho tantiash, Unēs uainquiociadquidi mimbi naic, quepondash domanobo chuiquid ěbi caic. ¹⁹ Aden domanobo chuiquidĕn tantianubi nuquin matses tsusiobon, Unēs uatiad, quequin chiac, Ēmpedadod, Sesad yacno nidshun ěmbi naid chuite bunebi, quequin chuipondambi, Con matses icsambo iquec, quenquiocquin. ²⁰ Ēmbi chuiboed mibi chuinuequin mibitedi chomiombi. Unēsash uincuenta nec, quequin tantiaquin nuquin matsesĕn cainacpaden cainquid icsho mĕtaniaid nebi—quepondash Pabado isadaidbo tsusiobo chiec.

²¹ Adoaquien: —Nidaid Udeya caid yacnoshon mimbi naid chuiquin dada uaid bedamboccombi. Adembidi, Edusaden yacnoĕsh choquido, Pabado icsambocquid nec, quequin chienquioccosh. ²² Padnueni mimbi tantiaid chuisho tantiate bunec. Utsi dadpen Quidistubo icsambocquid nec, quec—quepondash isadaidbo Doma yacnocquido tsusiobo Pabado caic.

²³ Aden Pabaton tantiaid tantianuec, Nĕidted ushash padpidec choindabi, quianec nidanepondash tsusiobo. Adec nidaniash ambi chiatedec ushash Pabado tabadacno choapondash isadaidbo tsusiobobĕd utsibo dadpen. Adec cho-choash tabadsho isun: —Matses icsaquid icsho Nuquin Papan cuidnushe quiaish abided cuidadec Esuquidistu unĕspanĕdash. Aid tantiaquid yec Nuquin Papabĕd tabadendac, quequin Pabaton chuibampondash. Aido Esuquidistu tantiaquid icmenuequin Nuquin Papan ambi naden nata quequin chiaid Moises dada uamiampidbĕdtabi Nuquin Papan naden nanun chiaid ambi utsibo dada uamiampid chuibampondash Pabaton. Ambi dada uamiampidĕn chiaid Nuquin Papan madombo Esuquidistu nec, quequin badiadnubi chuiquin tauashun inchĕshbudtsĕqui chuiquin ěmpondash Pabaton. ²⁴ Aden chuibanac utsi-utsiec, Abimbo iquec, quenubi utsi-utsiec, Tantiatiapibi, quepondash. ²⁵ Aden abentsĕc tantiacbimboen tantiatiapimbo yec comapĕnec onquesho tantiashien Pabado nadpondash. —Nuquin Papan Mayanĕn Isayas dada uamequin nuquin tsusedpabo naden chuipampic:

²⁶ “Isadaidbo caid yacno nidshun naden chuita. Mibitedishun tantiaded-tantiadedquimbi abimbo tantienquo iquendac; Adembidi Ēmbi nadatiambocquin nabanaid isted-istedquimbi abimbo isenquo iquendac.

²⁷ Bĕdamboen tantiaboedobi nĕbi min matses pamumĕdacbimboec tabadec; pashuacbimboen tantiec tabadoaic; ushacimbocbidi tabadoaic. Adec tabadenquiocquin ěmbi nabansho mimbi istsiac. Adembidi ěmbi chiaid mimbi tantiatsiac. Aden tantiashun mibi icsaid mimbi ĕntsiac. Adquiduidi ěmbi bĕdambo icmiaid nendac.”

²⁸ Adesa mibi icnuc isadaidpembo Esuquidistu chuimembi. Aden aidi chuisho aidon tantiendac—quepondash Pabado ²⁹ Nuquin Papan dada uamiampicpaden chuiquin isadaidbo Doma yacnocquido tantiamenuec. Aden chuisho tantiash isadaidbo nidanepondash.

³⁰ Adembidi seta daĕd matamec tabadquin Pabaton Esuquidistu chuibampondash. Aton shubun tabadquin abi isedec choquidtedi Pabaton yuedpondash. ³¹ Utsi, Chĕn, quenquiocnobi dacuĕdenquiocquin, Nuquin Papabĕd tabadte iquec, quequin huibampondash. Adembidi Esuquidistu tantiamenuen chuibampondash Pabaton.

Padi. Esuquidistun, Ēbi chuibeneta, caidon naid chuibanquin aidtedi dada uaombi, Teyopido.

DOMA YACNOCQUIDON ISTE

Tauamboen chiaid

¹ Esuquidistun yuambo Pabado nebi. Aidën: —Ëbi chuibeneta —caidquio nebi. Adembidi Nuquin Papantsen: —Con Mado chuibeneta —caidquio nebi. ² Aton Mado tishabi icnuc Nuquin Papan: —Con Mado nadquid iquendac —quequin abi chuibanquido dada uamedenepampic ëndenquimboshë. ³ Aden Nuquin Papan chiampicpadquid chidon tishaid yec isadaidbo chuiquid dapa Dabid icpamidën tsyuecquid Esus nec. ⁴ Aid abipadquid icsaisa icsho Nuquin Papan: —Con Mado yec abitedishun Icho neque. Matses tantiamenu —quequin uincuemepac caondash. Aidquiobi Nuquin Icho Esuquidistu nec. ⁵ Aidën: —Pabado chuibeniac isadaidpembon matses utsibontsen ma ëbi tantiaquin ëmbi chiacpadomboen nanu —quequin ambi naid chuibenequidquio Esusën icmepondashi. ⁶ Abi chuibanquid utsi mibi yacnoshon chuimequin Nuquin Papan mibitsen Esus tantiaquido icmiac. ⁷ Aden: —Unësquio iquec —quequin Nuquin Papan tantiaido mibi nec. Shubu dadpen icquid Doma yacnocquido Esus tantiec iccuededquido icsho mibitedi chuiquin dada uaic nebi. Nuquin Papa mibi chianemi. —Bëdamboen isquin min Mado Esuquidistubëdtan Doma yacnocquido bëdambo icmeta, Papa —quequin chianemi.

Doma yacnocquido iste Pabado bunaid

⁸ Tantia. Mibi chuinu. Esuquidistun tantiacpaden Nuquin Papa mibi chianemi. —Mibi bëdamboshë iquec, Papa. “‘Doma yacnocquido Esus tantiec tabadosh,’ quequin nidaid utsi-utsiec yacno chiac caosh,” quiosh. Mimbi nac aido bëdambo iquec, Papa —quequin Nuquin Papa chianemi. ⁹ Aden mibi bëshunenquio icquin Nuquin Papa chianemi. ¿Muctabi nepe? Padenquio. —Pabado abimbo chiosh —quetsiash Nuquin Papa abi tantiaquidquio icquin ëmbi aton Madon naid chuibenenuc. ¹⁰ Nadembidi Nuquin Papa chianemi. —Doma yacnocquido istantiadquio iquebi. Mimbi nidmiac nëbi nidtsiabi, Papa —quequin chianemi. ¹¹ Aden mibi istantiadquio iquebi. Mibëd icquin Nuquin Papan chiaid chuibantsiabi. —Nuquin Papan Mayanën tantiamiacpadomboen chieshtoenquio icquin Esus tantiaquionona —quequin mibi chuibantsiabi. ¹² —“Chieshtoenquio icquin Esus tantianuna,” quec chuinanec bëdamboec tabadec aidobëd bëdambo ictsiabi —quiash mibi iste bunebi.

¹³ Tantia, con utsibo. Mibi yacno ëbi nidtsemboed mimbi tantiabien icchiteque. Mibi chuinu. —Shubu dadpen icquid Doma yacnocquido istanu —queuid-queuidobi. —Nidnu —queshobi Nuquin Papan nac nidenguio iccobi. —Ëmbi Esusën naid chuibanac matses utsibon dadpenshun Esus tantiabencpadomboen ma Doma yacnocquidon utsibontsen Esus tantianu —quiash mibi yacno nidtiadquio iquebi. ¹⁴ Esuquidistun chiapadomboen ambi naid matses abitedi chuibantiadquio iquebi. —Dadpen tantiaquidobëdtabi tantienquio icquidotsen chuibenenu. Adembidi dada uaquidobëdtabi dada uainquio icquidotsen chuibenenu —quiash nebi. ¹⁵ Aden chuibenequi shubu dadpen icquid Doma yacno nidshun mibitsen Esusën naid chuibantiadquio iquebi.

¹⁶ Esusën naid chuibenec bëdambo iquebi naden tantiaish. —Nuquin Papan tantiacpadec matses cuidmenquio icnuec Esus abided cuidadec unësa caondash. Aid tantiaisho Nuquin Papan matses cuidenguio iquec.

Abia chiaidon isadaidbon Esus tantiasho cuidenquo icquin isadaidpembo matses utsibontsen Esus tantiasho Nuquin Papan cuidenquo iquendac — quiash Esusēn naid chuibenec bēdambo iquebi. ¹⁷ Esusēn naid chuisho tantiash nuqui naden tantiec. —Nuquin Papan chiaid niac-niacboedombi Esus tantiasho Nuquin Papan nuqui bēdamboen isbenec ambi chiaid niac-niacacmaidbimboecnuc —quequin nuqui tantiapec. Adembidi chuiquin Nuquin Papan isadaidbo tsusedpa dada uamepampic. “Nuquin Papa ambi chiacpadomboen naquidquo nec,’ quequin abi tantiec tabadquid Nuquin Papan bēdamboen isec,” quequin dada uamepampic.

Matses utsibo icsamboec tabadaid

¹⁸ —Abi tantiesa cuidquid Nuquin Papa nec —quequintsen nuqui tantiec. Ambi chiaid niac-niaquec icsamboecuidi tabadte bunquin matses dadpenshun Nuquin Papan cuidte tantiatiapimbo iquec. ¹⁹ Abi tantiametequid ambi uaid isun Nuquin Papa tantiatiadquidi Nuquin Papa tantiate bunenquo matses icpec. —Adquidshenda Nuquin Papa nepec —matses camenuen Nuquin Papan abitedi uapampic. ²⁰ Nidaid uaquinc cuēte uaquinc aben icquid uaquinc yua uaquinc matses uaquinc capampic Nuquin Papan. Aden Nuquin Papan uaid isash: —Nēid uaquidien nadquo icchitec. Nibēdantiapimbo icquidien nechitec. Abipadquid utsi nibēdnuc comapenen tantiaquin nabanquidquo yec abitedishun Ichoen nechitec —quetiadquidi adenquo matses iquec. Adquid Nuquin Papan cuidendac.

²¹ Ambi uaid isash: —Nēid uaquid bēdambo iquec. Aidēmbien ēbi nashunchitec —quetiadquidi pamumēdacbimboecquin Nuquin Papa tantiatiapimbo matses iquec. ²² —Dadpen bēdamboen tantiambi —quequimbi tantienquo matsesēn iquec. ²³ Aden unēstiapimbo icquid Nuquin Papambo tantiatiapimbo icquimbi unēsquid-uidquo tantiaquin aidbimboecnuc nacnenshun papa quequin chianec. Utsibon matsesbimboecnuc nacnenshun: —Ēbi bēdamboen ista, papa —quequin ambi nacenaid chiec. Utsibombic aben icquid nidaidēn capuquidbimboecnuc nacnenshun ademibidi chiec. Utsibombic uicchen podochoquidbimboecnuc nacnenshun ademibidi chiec. Utsibombic aben icquid tachidēn siuidquidbimboecnuc nacnenshun ademibidi ambi nacenaid chiec. Ēnden adquo matses yampicpadomboembidi nēbi adomboembidi matsesēn naic.

²⁴ Adsho isash Nuquin Papa: —Ma bēdamboec tabadnu —queuidboedi icsamboecuidi matses tabadsho isash: —Ma ambi tantiacpadequi icsamboec tabadpanu —quiampampic. Adnēdambic nēbi abi bunacpadeq icsamboec tabadec utsin chido chudteuidi bunquieq dada. Adecbidi aton bēnēpenquo chudmeteuidi bunquieq chido. ²⁵ —Abitedi uaquidquo Nuquin Papa nec —quequin abimbo tantiatiadquidombi Nuquin Papan uaidobi utsi-utsien chuiquin papa cabededpec. —Nuquin Papambobien bēdambohē iquec —quequin ēnenquo icquin chuitiadquidi aidon padenquo icpec.

²⁶ Adsho isash: —Ma abi bunacpadeq icsamboec tabadpanu —quiampampic Nuquin Papa. Adnēdambic nēbi icsabudquieq dada bunenquo yequi chido daēdi dachudnanec. ²⁷ Adecbidi chido bunenquo yequi dada daēdi chichudnante natia bunquiopec. Aden ambi chiaid niac-niaquec icsamboec tabadsho Nuquin Papan cuidendac.

²⁸ Adec abi tantiate bunenquo icsho isash: —Ma bēdamboec tabadnu —queuidboedi Nuquin Papa: —Ma abi icsate bunacpadequi tabadpanu —quiampampic. Adnēdambic nēbi pabiate shēcuē nibēdacbimboecquin Nuquin Papan chiaid niac-niaquec icsamboec tabadpec bēdambo ictiadquidobi. ²⁹ Nadquido icsamboec tabadquido nec. Nēidic aton chidopenquo chudquidō. Nēidic aton bēnēpenquo chudmequido. Nēidic

icsamboshē icquido. Nēidic aton na dadpen bedteuidi bunquido. Nēidic chieshquido. Nēidic matses utsibobimboec icte bunec chieshēmēnquido. Nēidic cuesunianquido. Nēidic chieshēmēnquido. Nēidic muaquido. Nēidic icsa uate bunquido. Nēidic utsibo icsaiduidi chuquido. ³⁰ Nēidic ambenquiobi chuishunquin chieshēnquin muauaquido. Nēidic Nuquin Papa chieshēnquido. Nēidic mamēnshumēnquido. Nēidic utsibo nashunenquio icquin aton nauidi naquido. Nēidic: —Ēbiuidtsēqui bēdambo iquebi — quequido. Nēidic: —¿Icsaquin atotsimbi utsi nape? —quec icsate bunquido. Nēidic anibēdtan amēn chiaid niac-niacquido. ³¹ Nēidic piushbimboecquin Nuquin Papan chiaid tantienquio icquido. Nēidic aton matses tantienquio icquido. Nēidic nēishash baded nēish bēdanenquio icquido. Nēidic utsibo bēdamboen istiapimbo icquido. Adquidtedi Nuquin Papan chiaid niac-niacquec icsamboec tabadquid nendac. ³² —Abi icsaid ėntiapimbo icquido Nuquin Papan cuidquin chian anēdēnquiacno nēsecaindac —quequin tantiequi ėnēdenquio yec icsaded-icsadedquec. Utsibotsen icsasho isash cuishonquec. —Bēdambo iquec. Ēbipadquidquio nec —quepec.

2

Matsesēn naid Nuquin Papan abimbo chuite

¹ Aden icsamboec tabadaid ėmbi chuisho tantiasht: —Adquid icsamboshē iquec —¿quecta ique? —Aden naic aid icsaic —queboedi nibitsen adcebidi icsapec. —Icsaquidpenquio nebi —quec mibi muaic. ² Nuquin Papambien matsesēn naidtedi tantiaquid icquin: —Nēido icsambo iqueque. Icsano nidmenu —quequin abimbo chiendac. ³ —Matses utsibo icsambo iquec —queboedombi mimbitsen Nuquin Papan chiaid niac-niacpec. Adash: —Nuquin Papan nuqui cuidenquio iquec —¿quecta ique? Mibitsen Nuquin Papan cuidendac. ⁴ Ambi uaido matses abitedi icsambo icsho isash unēsquio icquin matses bēdamboen iste bunquin icsaidobi Nuquin Papan baded cuidenquio iquec. —“Icsaboedi nēbi Nuquin Papan chiacpadec bēdamboec tabadtiadquio iquebi,” quequin ma matsesēn ėbi tantianu —queshun Nuquin Papan matses baded cuidenquio iquec. Abi icsaid ėnenquio icsho isun cuidendac. ¿Adsho tantiashta mibi nadpe? —Mua. Nuquin Papan ėbi cuidtiapimbo iquec. Ambi chiaid niaquesambo nebi —¿quecta ique? Adec onquec mibi muapec.

⁵ —Nuquin Papan chiaid niacboedēmbi ėnta —caqui: —Padi. Ēmbi naiduidi naic bēdambo iquebi —quequin ėnenquio icquin Nuquin Papan chiaid niac-niacbudec icsamboecuidi mibi tabadec. Aden mimbi Nuquin Papa cuidmendac. Nuquin Papan matsesēn naidtedi chuite ushēmbi mimbi icsamboen naidtedi chuishun Nuquin Papan mibi cuidendac. ⁶ Matsesēn naidtedi tantiaquin matses cuidendac. Bēdambo icquido abēdi tabadmecquin icsaido icsano nidmendac Nuquin Papan. ⁷ Abi tantiec bēdambo icquido: —“Mibi bēdambo iquec,” mabi Nuquin Papan canu —quiash abēd tabadte bunec Nuquin Papan chiacpadec bēdamboec tabadec nec. Aido unēsacsho Nuquin Papan abēdi tabadmendac padpidec unēstiapimbo icnuc. ⁸ Icsaquidoen Nuquin Papan chiaid chiaqui tantiate bunenquio icquin aton nauidi naic icsamboecuidi tabadsho Nuquin Papan comapenen cuidendac. ⁹ Adoac icsamboec tabadquido abitedi natiacuededec tabadendac. Shubiquiendac. Con matses isadaidbo Nuquin Papan chiaid ambia tantiampidi icsasho cuidquin matses utsibotsen icsasho Nuquin Papan cuidendac. ¹⁰ Abi tantiec bēdamboec tabadquido unēsacsho abi yacno tabadmeshun: —Nēid bēdamboec tabadquid niondash —quequin utsibo tantiamequin Nuquin Papan bēdambo icmendac. Ambia Nuquin Papan chiaid tantiondaido Isadaidbo abi tantiaquid icsho abēdi tabadmecquimbi matses utsibotsen abi tantiaquid icsho Nuquin Papan

abēdi tabadmendac. ¹¹ Icsamboec tabadquido icsano nidmequin bēdamboec tabadquido abēdi tabadmendac. —Isadaidbouditsēqui bēdamboen isembi —quenquo icquin adoendac.

¹² Nuquin Papan chiaid tantiacmaido matses utsibo icsamboec tabadsho Nuquin Papan cuidendac. Isadaidbo Nuquin Papan: —Naden nata —quequin chiaid tantiashi aidēn chiaid niac-niaquec icsamboec tabadsho adembidi cuidendac. ¹³ Ambi: —Naden nata —quequin chiaid tantiashumbic adomboen naisa bēdamboen istiapimbo icquin ambi chiacpadec tabadquid Nuquin Papan bēdamboen istsiash. ¹⁴ ¿Ada Nuquin Papan chiaid tantiacmaidon matses utsibon bēdamboec tabadte tantienquo iccuededpec? Ma bēdamboec tabadte abentse-abentsen ambembi tantieyoc. Aden tantiaquin Nuquin Papan chiacpadomboen abentse-abentsen bēdamboen naic Nuquin Papan chiaid tantiashumbimboen. ¹⁵ Adec bēdamboec tabadec: —Bēdambo iquebi —quequin ambembi tantiec. Icsamboec tabadec: —Icsachitobi —quequin adembidi ambembi tantiec. ¹⁶ —Adec matses abitedi bēdamboec tabadte tantiequi adquiec tabadenquo iquec —queshun Nuquin Papan chiacpadēn Esuquidistun matses cuidendac. Matsesēn otacquo tantiaidbēdta matsesēn ompoquin naidtedi ambembi tantiashun Esusēn matses cuidendac. Esus chuibanquin aden aidēn cuidte chiombi.

Isadaidbon Nuquin Papan chiaid niac-niacaid

¹⁷ Tantia, con matses isadaidbo. Mibi chuinu. Mibi nadpec. —Isadaidbo nebi. Nuquin Papan ambi chiaid con tsusedpa Moises dada uamepampic. Aidēn tsyuecquid icsho Nuquin Papan ēbi bēdamboen isec. Utsibon Nuquin Papa tantienquo icnubi Nuquin Papambo con matsesbēdtambi bēdamboen tantiembi. Bēdambo iquebi —mibi quepec. Adboedi mibi icsaic. ¹⁸ Nuquin matses tsusiobon chuibanac Nuquin Papan ambi chiaid Moises dada uamepampid mimbi tantiec. Nuquin Papan chiacpadec utsibo bēdamboec tabadsho isash: —Aido bēdamboec tabadec —queboedi mibi bēdamboec tabadenquo icpec. ¹⁹ Adecbidi: —Nuquin Papan chiaid tantiacmaido Nuquin Papan chiaidquo chuibanquid nebi. Paposhguiachimboecnu tantiamequidquid nebi —mibi quepec. Adboedi aidēn chiaid niaquec mibi icsaic. ²⁰ —Chuisho tantiabi icquido nēbi tantiabentsēquidobēdta Nuquin Papan chiaid chuibanquid nebi. Abitedimbo tantiaquid icquin Nuquin Papan abimbo chiampidquo chuibanquid nebi —mibi quepec. ²¹ Adec: —Nuquin Papan chiaid niac-niaquenda —queboedēmbi aidēn chiaid mimbi niac-niaquec. —Ampenda —queboedēmbi mimbitsen ampepec. ²² —Utsin chido chūdenda —queboedēmbi utsin chido mimbitsen chudpec. Papa quequin matsesbimboecnu matses utsibon nacenaid isash: —Nuquin Papa tantienquo yec nēid nacenquid icsambo iquec —queboedēmbi aidēn nacenaid tantiate shubun puduedshun mimbi ampepec. ²³ —Nuquin Papan ambi chiaid con tsusedpa Moises dada uamepampid bedshun con matses isadaidbonuidtsēqui Nuquin Papa tantiec —queboedēmbi ambi chiaid niac-niaquec mibi icsamboec tabadec. ²⁴ Adec mibi icsamboec tabadte chuiquin Nuquin Papan naden dada uamepampic. “Isadaidbo icsamboec tabadsho isun matses utsibon: ‘Ambi Nuquin Papa caidtsembien icsambo icchitec,’ capendac,” quequin dada uamepampicpadquiec mibi icsamboec tabadsho isun matses utsibon Nuquin Papa bēdamboen tantienquo iquec.

Nuquin Papa tantiaquidquo icte chiaid

²⁵ —Nuquin Papan matses nebi —quequin Isadaidbon Nuquin Papan aton tsusedpa chiampicpadomboen aton bacuēbo shui dēbid dēteshun secaic. Adonēdaid ambi chiaid niac-niaquenquo yec bēdamboec tabadsho Nuquin Papan bēdamboen istsiash. Isadaidbo utsibon ambi chiaid niac-niacsho

Nuquin Papan bēdamboen istiapimbo iquec ambi con matses cacmaido-bimboecnuc. ²⁶ Nuquin Papan con matses cainquo icpampido matses utsiboen ambi chiacpadec bēdamboec tabadsho Nuquin Papan bēdamboen istsiash ambi: —Con matses nec —caidobimboecnuc. ²⁷ Adec matses utsibo Nuquin Papan chiacpadec bēdamboec tabadsho isash isadaidbo naded chiadpec. —Matses utsibo bēdamboec tabadnubi Nuquin Papan Moises dada uamepampid isban-isbanshumbi isadaidbon Nuquin Papan chiaid niac-niacpec. Isadaidbo matses dadpen icsambo iquec —cadpec. ²⁸ ¿Shui dēbid dēteshun secaquido isadaidbotedi Nuquin Papa tantiaquidomboda nedic? Padenquo. ¿Matses ismenuen Nuquin Papa chiacpadomboen nashumbic ompoquin icsamboen naquido Nuquin Papa tantiaquidquioda nedic? Padenquo. ²⁹ ¿Ambi Moises dada uamepampiduidi ěmbimbo nanuequid Nuquin Papa tantiaquidquioda nedic? Padenquo. Nuquin Papa tantiaquidquien aton Mayanēn tantiamiacpadec bēdamboec tabadec. Adquid: —Mibi bēdambo iquec. Con matses mibi canu —capec Nuquin Papan matsesēn adoenquo icnubi.

3

Nuquin Papan isadaidbo tantiec, quequin chiaid

¹ Aden: —Abi tantiec bēdamboec tabadquid Nuquin Papan con matses catsiash —quequin ěmbi chuisho tantias: —¿Isadaidbo yecta icsambo icpec? —¿quecta ique? —Padenquo iquec —caimbi. —¿Ada aido ambi con matses caido Nuquin Papan nashunac? —¿quecta ique? ² Ai, aido nashunquiac. —Ěmbi chiaid dada uaid ma aidomba tantianu —quequin con matses isadaidbo tsusedpabo ambi chiaid Nuquin Papan dada uamepampic. ³ Aden dada uamiampid Nuquin Papan chiaid chuibanac con matses isadaidbo: —Nuquin Papan chiacpadomboen nanuna —queboedombi muaquin utsin-utsinquien nainquo icpampic. ¿Ada con matses isadaidbo utsi-utsiec muaquido icsho isun Nuquin Papan ambi chiacpadomboen nainquo icpat-siash? ⁴ Padenquo. Ma ambi chiacpadomboen naquidquo Nuquin Papa neyoc. Muesambo nec. Matses abitedimbo muaquidquo icnuc Nuquin Papan abimbo chuiquidquo nendac. Aden chuiquin Nuquin Papan con tsusedpa dada uamepampic.

“Nuquin Papa abimbo chuiquidquo nec.

‘Nēid bēdambo iquec. Nēid icsambo iquec, quequin Nuquin Papan abimbo chuibanendac, quequin ma matsesēn tantianu,’ quequin Nuquin Papan: ‘Mibi icsaoc,’ quequin ěbi chuiboed chiombi,” quequin dada uapampic.

⁵ Ěbi adsho bēdamboen tantiata. Icsamboen tantienda. —Nuquin Papan chiaid niac-niaquec ěbi icsasho isash: “Adquidpenquo Nuquin Papa nec. Icsaisambo nec,” quetsiash con matses. Adec icsaquimbi ěmbi con matses Nuquin Papa bēdambo icte tantiameshobi Nuquin Papan ěbi cuidac icsambo ictsias —quequin icsamboen tantienda. ⁶ Matsesēn naid chiec Nuquin Papa muatiapimbo iquec. Abimbo chuibanendac. Icsaido chiec: —Mibi bēdambo iquec. Mibi cuidenquo iquembi —quetiapimbo Nuquin Papa iquec. Muesambo nec. ⁷ Nadembidi icsamboen tantienda. —Ěbi muaquidquo icnubi: “Adquidpenquo Nuquin Papa nec. Bēdamboshē iquec. Muesambo nec,” quetsiash con matses. Adec muaquimbi Nuquin Papa muainquo icte con matses tantiametsiambi. Aden ěmbi abi tantiameshobi Nuquin Papan ěbi cuidac icsambo ictsias —quequin icsamboen tantienda. ⁸ Aden icsamboen chiec nuqui nadtsiac. —Nuquin Papa tantiamenuequi icsaquionona —nuqui quetsiac. ¿Adendambi chuidio? Padenquo. —Pabado chedo: “Nuquin Papa

tantiamenuequi icsaquionona,' quiosh," quequin mibi muauaosh —quequin chuituidoshi. Ēbi muauaquido Nuquin Papan cuidchitoshon.

Matses abitedi icsaquido nec, quiaid

⁹ Tantia, con matses. Mibi padpiden chuinu. ¿Atotsibi quio? ¿Ada tantio? ¿Utsibon Nuquin Papan chiaid niac-niacnubida nuquiuidi Nuquin Papan chiaid niac-niaquesa icpe? Padenquio. Nuquin Papan chiaid niaquesamboen nibëdec. Matses utsibo con matses isadaidbobëd abemi bëdamboec tabadiapimbo iquec. Abitedimbo icsamboec tabadquido nec. Aden mibi chiombi. ¹⁰ Aden chuiquin Nuquin Papan dada uamepampic naden. "Nuquin Papan chiaid niaquesambo nibëdec. Abitedimbo icsaquido nec.

¹¹ Nuquin Papa tantiaquin ambi chiacpadomboenuidi naquidquio nibëdec. Nuquin Papa tantiate bunquidquio nibëdec.

¹² Bënudshun podqued tantienquio yacimboen Nuquin Papa tantienquio icquin matses abitedishun ambi chiaid niac-niaquec.

Adsho isun Nuquin Papan: 'Abitedimbo icsambo iquec,' capec.

Ambi chiaid niaquesambo nibëdec.

Abitedimbo icsapec.

¹³ Nadquido iquec. Nëid icsamboec chuishumënquido. Unësaid ënden chococacno shëdec: 'Pisenac,' quequin tantiacimboen adquido onquesho tantias: 'Icsambo icquido nec,' quequin matsesën tantiec.

Nëidic muaquido.

Nëidic nisin pequin icsa uacimboen icsa uate bunec icsamboec onquidquido.

¹⁴ Nëidic nëishash chieshëmëdec: 'Unëschitoshon,' quequin icsamboenuidi chuiquido.

¹⁵ Nëidic intac mëyamec badedquido cuesunianquido.

¹⁶ Nëidic abëd icquido natiamec chieshëmënquido.

¹⁷ Adquidtedi cuesnante bunec bëdamboec tabadiapimbo iquec.

¹⁸ Nuquin Papan cuidnushe,' quenquido icquid Nuquin Papa tantiesabo nec," quequin dada uamepampic.

¹⁹ Aden ambi: —Abitedi icsambo iquec —quequin chiaid Nuquin Papan con matses isadaidboba tantiamenuen con tsusedpa dada uamepampic. Aden dada uamiampid tantiashun: —Icsaquidpenquio nebi —quequin isadaidbon Nuquin Papa chuitiapimbo iquec. —Icsaquido abitedi nec —quequin Nuquin Papan matses utsibo abitedibëdtabi isadaidbotsen chiac: —Abimbo chiec —quiaish dacuëdec ëcbedanenquio tabadendac matses abitedi. ²⁰ Aden ambi chiaid niaquesambo nibëdnuc: —Ambi chiaid niaquesa icsho Nuquin Papan nuqui bëdamboen isec —quequin nuqui abimbo chuitiapimbo iquec. Nuquin Papan chiaid isash: —Ambi chiaid niac-niaquec icsamboequien nuqui tabadchitec —quequin nuqui tantiapec.

Nuquin Papa matses bëdamboen ismete chiaid

²¹ Aden ambi chiactedi natiapimbo yec matses icsasho isun Nuquin Papan abi matses bëdamboen ismete chuiquin isadaidbo tsusedpa Moisesbëdta tsusedpabo utsibo dada uamepampic ëndenquimbo. Aden ambi dada uamepampicpadomboen nëbi Nuquin Papan abi matses bëdamboen ismequid matsesmpac caondash. ²² Adoac Nuquin Papa abi tantiaquido bëdamboen ismenuec Esuquidistu abided cuidadec unëspac caondash. Nëbi aidquido tantiasho Nuquin Papan matses bëdamboen isec. Isadaidbobëdtambi matses utsibotsen Esus tantiasho adoendac. ²³ Adec matses abitedi Nuquin Papan chiaid niac-niaquec icsaquido yec Nuquin Papapadquid icsaisambo

nibēdec. ²⁴ Adquid bēdamboen istiapimbo icquin matses bēdamboen iste bunquin aton Mado Esuquidistu abided unēs uamequin Nuquin Papan cuidpac caondash. Nēbi abided cuidadaid Esus tantiasho nuqui bēdamboen isec icsaisabimboecnuc. ²⁵ —Icsaido cuidquid icquimbi nuqui cuidenquio icnuen Nuquin Papan nac —nuqui camenuen Nuquin Papan nuqui icsaid bedshumequin Esused unēs uamequin cuidpac caondash. Esus tishabi icnuc Nuquin Papan abi tantiaquido cuidenquio icpampic: —Yuechshun con Madoded cuidendambi —quequin tantiaquin. ²⁶ Nēbi adecbidi: —Icsaido cuidquid nebi —quequimbi Nuquin Papan ambi chiacpacdec nuqui icsaid bedshunec abided cuidadaid Esus tantiasho adembidi nuqui bēdamboen isquin cuidenquio iquendac.

²⁷ Ēmbi aden chuisho tantiash: —Ambi chiacpadomboenuidi nasho Nuquin Papan bēdamboen isebe —quequin mimbi abimbo chuitiapimbo iquec. Matsesēn Nuquin Papan chiacpadomboenuidi natiapimbo icsho bēdamboen istiapimbo ichoedi nēbi Esus tantiasho Nuquin Papan nuqui bēdamboen isec. ²⁸ Aden matsesēn ambembi naquin Nuquin Papa bēdamboen ismetiapimbo iquec. Padnuen utsin: —Matsesash ēbi icsaid bedshunec abided cuidadaid tantiasho Nuquin Papan ēbi bēdamboen isec —quequin Esus tantiasho Nuquin Papan bēdamboen isec. ²⁹ ¿Isadaidboudida Nuquin Papan bēdamboen ispatsiash? Padenquio. Matses utsibo isadaidpembobi Nuquin Papan bēdamboen istsiash. ³⁰ Matses abitedi uaquid icquin ambi chiacpadomboen isadaidbon Esus tantiasho Nuquin Papan bēdamboen isec. Adembidi matses utsibon Esus tantiasho Nuquin Papan bēdamboen isec. ³¹ Adoaido: —Nuquin Papan chiaid niac-niaquec icsamboec tabadnuna —¿quecta icpec? Padenquio. Esus tantiaquido icquin Nuquin Papan chiacpadomboen natiadquio nuqui yanec.

4

Nuquin Papan Abadauan bēdamboen isaid

¹ Tantia. Aden Nuquin Papan bēdamboen iste chuiquin isadaidbo tsusedpa Abadauan caid ēnden icpampidtsen mibi chinu. ¿Atotsieshun Nuquin Papan Abadauan bēdamboen isbempampic? ² Bēdamboecuidi tabadsho Nuquin Papan bēdamboen isaid yec Abadauan: —Bēdamboecuidi tabadquin Nuquin Papa bēdamboen ismembī —quetsempampic. Abadauan bēdamboecuidi tabadambo. Adsho: —Bēdamboecuidi tabadsho Abadauan bēdamboen isembi —quenquio icpampic Nuquin Papa. ³ Nuquin Papan tantiamiac naden Abadauanēn nampid chuiquin dada uapampic. “Nuquin Papan: ‘Min mado min chidon tishendac,’ cac: ‘Abimbo mimbi caic,’ Abadauan qesho: ‘Adquid bēdamboen isendambi,’ qeshun Nuquin Papan bēdamboen isbempampic icsaisabimboecnuc,” quequin chuiampic. ⁴ Matsesien adenquio iquec. —Ambi chiacpadomboen nasho ichon yua bēdamboen isquid —nuqui quepec. ⁵ Nuquin Papambien nadotsiash. Matses icsaboedi: —Bēdambo icquid icquin ambi chiacpadomboen Nuquin Papan naindac —quequin abi tantiasho Nuquin Papan bēdamboen isbentsiash icsaisabimboecnuc. ⁶ Adembidi Nuquin Papan tantiamiac ambi bēdamboen iste chuiquin con tsusedpa Dabidēn dada uapampic naden.

⁷ “ ‘Ambi chiaid niac-niacboedēmbi; Bēdambo icquid icquin Nuquin Papan ambi chiacpadomboen naindac, quequin abi tantiasho Nuquin Papan ēbi bēdamboen isec ēbi icsaid bēpiscudacimboen. Icsaisabimboecnuc ēbi bēdamboen isquin ēbi cuidenquio iquendac,’ quiash matses bēdambo yec cuishonquec.

8 ‘Abi tantiaquid icsho isash ëbi icsaid bëpiscudash:

Ëmbi chiaid mimbi niac-niaccoque. Mibi cuidnu, Nuquin Papan ëbi cainquio iquendac,’ quiash matses bëdambo iquec,” quequin Dabidën chuipampic ëndenquimbo.

9 ¿Shui dëbid dëteshun secaido isadaidboudida Nuquin Papan bëdamboen ispec? Padenquio. Matses utsibotsen bëdamboen istsiash. Tantia. Ëmbi chuiboebidi chuoanu. Abi tantiaquid icsho Nuquin Papan Abadauan bëdamboen isbempampic ambi chiaid niac-niacacmaidbimboecnuc.

10 ¿Ambi chiacpadomboen shui dëbid dëteshun secacshoda Nuquin Papan Abadauan bëdamboen isbempampic? Padenquio. Shui dëbid dëteshun secabi icsho Nuquin Papan Abadauan bëdamboen isbempampic.

11 Bëdamboen isbenshumbic: —Abadauan, ëmbi chiacpadomboen nabenta. “Nuquin Papan bëdamboen isaïdo nebi. Aid bëshunchitomane,” qeshun min matsestedî shui dëbid dëteshun secabanta —capampic Nuquin Papan. Adoac Abadauanën nabempampic. Aden shui dëbid dëtiammaid icquin Abadauanën Nuquin Papa tantiacpadomboen nëbi shui dëbid dëtiammaidon Esus tantiasho Nuquin Papan bëdamboen isendac ambi chiaid niac-niacacmaidbimboecnuc.

12 Abadauanën tsyuecquido isadaidbo Abadauambimboecquido Nuquin Papa tantiaquido abi iquec. —Shui dëbid dëtemenëdaïd icsho Nuquin Papan bëdamboen isebe —quenquio icquin Nuquin Papabëda Esus tantiasho isadaidbo Nuquin Papan bëdamboen isaïdo abi iquec.

Nuquin Papan Abadauan chiaid

13 Ëndenquimboshë Nuquin Papan Abadauan naden chuipampic. —Abadauan, mibi nibëdanan yuecshun min tsyuecquid abentsëcshun utsibo bëdambo icmendac. Nidaïd utsi-utsiec yacno tabadquido adoendac —quepampic Nuquin Papa. —Min tsyuecquid abentsëqui tantiasho matses bëdamboen isendambi —quequin otacquo tantiaquin Nuquin Papan adopampic. ¿Ambi chiacpadomboenuidi Abadauanën nashoda Nuquin Papan aden chuipampic? Padenquio. Nuquin Papan chiac: —Ai, abimbo caic —qeshoen Abadauan bëdamboen isbenshun Nuquin Papan adopampic.

14 ¿Nëbi: —Moisesën chiaid niaquesa icsho Nuquin Papan bëdamboen isebe —quec muaquidoda Nuquin Papan bëdamboen ispadic? Padenquio. Adec muaquidobi bëdamboen isquin ambi Abadauan chiaid niactsiash. Adotiapimbo icquin ambi chiacpadomboen Abadauanën tsyuecquid tantiaquidoen bëdamboen isec. 15 —Moisesën chiaid niaquesambo nebi —queboedombi aïdën chiaid niac-niacsho isun Nuquin Papan cuidendac. Ambi chiaid niaquesambo nibëdec. Nuquin Papan: —Bëdamboec tabadta —quequin chiaid nibëdnuc ambi aden chiaid matsesën niactiapimbo ictsiash. Ambî: —Bëdamboec tabadta —quequin chiaid abi iquec. Aid niaquesambo nibëdec.

16 Nuquin Papan naden Abadauan chuipampic. —Abadauan, ëmbi chuïsho tantiash: “Mimbi abimbo caic,” qesho mibi bëdamboen isquin min tsyuecquido bëdambo icmendambi —quequin chuipampic. Nëbi ambi chuipampicpadomboen naquin Esus tantiaquido Nuquin Papan bëdamboen isec. Nuquin Papan ambi chiaid dada uamepampidën Moisesën tsyuecquido isadaidbon Esus tantiasho Nuquin Papan bëdamboen isec. Abadauanën Nuquin Papa tantiacpadomboen matses utsibontsen Esus tantiasho adem-bidî bëdamboen isec. Esus tantiaquidtedishun papabimboecquid Abadauan nec. Ambî Nuquin Papa tantiacpadomboen naqui tantiec. 17 Ambî aden Abadauan chiampid chuïquin Nuquin Papan isadaidbo tsusedpa naden dada uamepampic. “Mibi unësan yuectaneshun min tsyuecquido nidaïd

utsi-utsiec yacno tabadquido icmendambi. Aton papabimboecquid mibi iquendac,” quepampic Nuquin Papa. Adoquien: —Abimbo mimbicaic —quequin Nuquin Papa Abadauanën tantiapampic. —Comapenen tantiaquin unësaid uincuemquidquico icquin ambi chiacpadomboen ëbi bacuë tishmendac —quequin Abadauanën Nuquin Papa tantiapampic. Nëbi ambi Nuquin Papa tantiacpadomboen Esus tantiaquido: —Nuquin papabimboecquid Abadauan nec —quepec.

¹⁸ Nuquin Papan: —Min tsyuecquido dadpenquico iquendac —cac: —¿Mitsipadoac aidfedi con tsyuecquido icpec? Ma con bacuëbo nibëdpayoc. Tsusiombo icquin bacuë tishmetiapimbo iquebi —queuidboedi Abadauan nadpampic. —Ai, abimbo mimbicaic —quepampic aton mado nibëdnubi. Adshun tsusioctscquoico icquimbi aton mado tishmepampic. Nëbi aton tsyuecquido dadpenquico icquic Nuquin Papan chiampicpadequi. ¹⁹ —Con seta dadpenquico 100tedi icnuc tsusiobudtsëcshun ëmbimbo bacuë tishmetiapimbo iquebi. Con chido ëndenquico machobudtsëccondaid icquin bacuë usundotiapictscquoico icquec —quequin tantiequi: —Nuquin Papan abimboen caosh —quepampic. ²⁰⁻²¹ —Nuquin Papa mue nec —quenquico yec: —Nadatiambo icquid icquin ambi chiacpadomboen Nuquin Papan naic —queshun Nuquin Papa tantiatscboedëmbi aid tantiaquiopampic. Adshun: —Mibi bëdamboshë icquec, Papa —quequin Nuquin Papa chuipampic. ²² Adsho tantiahsun Nuquin Papan bëdamboen isbempampic icsaisabimboecnuc.

²³ Aden Nuquin Papan ambi Abadauan bëdamboen isaïdo isadaïdbo tsusedpa dada uamepampic. ¿Abadauanën naiduidi tantiamenuenda anda dada uamepampic? ²⁴ Padenquico. Nuquitsen Nuquin Papan ambi bëdamboen iste tantiamenuen aden dada uamepampic. Nuquin Icho Esusbëdta abi uincuemquid Nuquin Papa tantiahsu nuquitsen bëdamboen isec. ²⁵ Nuquin Papan tantiapadec nuqui cuidmenquico icnuc nuqui icsaïd bedshunec abided cuidadec Esus unëspanëdash. Aden Nuquin Papa abi tantiaquido bëdamboen ismenuec unëssh uincuempanëdash Esus.

5

Esus tantiaquido Nuquin Papan bëdamboen isaïd

¹ Aden Esus tantiahsu Nuquin Papan bëdamboen isaïdo yec abi cuidte dacuëdënenquico yec abëdi nuqui bëdamboec tantiananec. ² Èmbi chuïbocpaden abi tantiaquido nuqui cuidmenquico icnuc abided unësqin Esusën Nuquin Papa nuqui bëdamboen ismepec. Adoac nuqui nadpec. —Nuqui bëdamboen isquin unëssachsho nuqui abipadquid icsaisa icmequin Nuquin Papan abëdi nuqui tabadmendac —quec nuqui cuishonquec. ³ Nadectsen nuqui cuishonquec. —Esus tantiaquid icsho utsibon chieshënaquico Esus tantiatscboedi chieshtoenuico icquin Esus tantiaquidquico yanëbi —quectsen nuqui cuishonquec. ⁴ Aden chieshtoenuico icquin Esus tantiahsu Nuquin Papan nuqui bëdambo capec. Adoac: —Esus tantiaquid icsho Nuquin Papan ëbi bëdambo icmec. Unëssachsho abi yacno ëbi tabadmendac ambi chiacpadomboen —quepec nuqui. ⁵ Adec: —Abi yacno ëbi tabadmendac —quequin Esus tantiaquid ¿ada Nuquin Papan cacumepec? Padenquico. Aton Mayan nuquibëd icmiac paposhquiabimboen nuqui naden tantiec. —Nuquin Papan ëbi bëdamboen tantiaquin abi yacno ëbi puduedmendac —quequin nuqui tantiec.

⁶ Aden matses tantiaquico Nuquin Papan tantiapadec Esus nadpanëdash. Matses abitedi abembi bëdamboec tabadtiapimbo icsho isun Nuquin Papan uesquin cuidtsenubi abi tantiaquido cuidmenquico icnuc abided cuidadec Esus unëspanëdash. ⁷ ¿Ada adquid matses icpadic? Padenquico. ¿Cuesanquidën

matses bēdambo icquid caic: —Cuesnu —quesho tantiashunda dadpenshun: —Aid cuesenda. Ēbiquien cuesta —capatsiash? Padenquo. Bēdamboshē icquid cuesmenquo icnuen: —Nēid cuesenda. Ēbiquien cuesta —cachitembien ictsiash abentsēcshun. Icsambo icquid icshoen aden chienquo ictsiash. ⁸ Padnuen matses abitedi icsamboecuidi tabadnuc nuqui cuidmenquo icnuec Esuquidistu abided cuidadec unēspaniedash. —Nuquin Papan ēbi tantiaquiec —matses camenuen Nuquin Papan aden Esus namepaniedash.

⁹ Nēbi abided cuidadaidquo Esus tantiasho Nuquin Papan nuqui bēdamboen isec icsaisabimboecnuc. Aden bēdamboen isquin Nuquin Papan nuqui cuidtiapimbo iquendac. ¹⁰ Matsesēn abi chieshēnsho isun aido cuidte bunenquo icquin Nuquin Papan aton Madoded cuidpaniedash. Aden aton Madoded cuidash nēish bēdanshun Nuquin Papan aton Mado tantiaquid bēdamboen isec. Nēbi Nuquin Papan uincuemenedaid icquin Esusēn nuqui bēdamboen tabadmec. ¹¹ Adembidi aidēn tantiamiacpadomboen nuqui: —Ēbi cuidenquo icnuen aton Madoded cuidquid bēdamboshē iquec —quequin Nuquin Papa tantiec nuqui cuishonquec.

Adanēn naidbēda Esusēn naid chiaid

¹² Nuqui bēdamboen ismequid Esus tishabi icnuc abia matses uaidēn Adanēmba Nuquin Papan chiaid niac-niaquec icsasho cuidquin aidba Nuquin Papan unēsquid icmepampic. Adembidi Adanēn tsyuecquido matses abitedi Adan icsacpadecebidi icsate tantiaquimbi Nuquin Papan unēsquidoidquo matses icmepampic. ¹³ Nuquin Papan: —Adec icsainda —quequin ambi chiaid Moises dada uamiabi icnubi matses abitedi icsapampic. —Ēmbi Moises chuimiaid mimbi niac-niaquec —Nuquin Papa quetiapimbo icnubi matses icsapampic. ¹⁴ Nuquin Papan chuiboedquiobi niaquec Adamba icsasho Nuquin Papan cuidac unēsec taēpampic. Adan unēsambic aidēn nacpadomboen nabi icsa utsi naiqui matses abitedi icsasho adembidi unēsquidoidquo Nuquin Papan icmepampic. —Naden nata —quequin Moises dada uamequin Nuquin Papan chiabi icnubi aidēn chiaid niactiapimbo yec utsi naic icsashobi adopampic. Ambia Nuquin Papan chiaid niacampid Adampadquidpenquo Esuquidistu nec.

¹⁵ Matses abentsēcshun Adanēmba Nuquin Papan chiaid niacsho cuidquin aidba unēsquid icmeshun aton tsyuecquido matses unēsquidoidquo Nuquin Papan icmepampic. Adecebidi Nuquin Papa matses bēdamboen ismequid abentsēc iquec. Esusuidtsēqui abi tantiaquidotedi cuidmenquo icnuec abided cuidadec unēsac caondash. Nēbi aid tantiasho Nuquin Papan nuqui bēdamboen isec. ¹⁶ Adanēn nachimboen Nuquin Papa matses bēdamboen ismequidēn nambo. Adan abentsēqui icsaquin Nuquin Papa cuidmiac abi unēsacpadquiec matses abitedi unēsquidombo yanac. Nuquin Papa bēdamboen ismequidēmbien matses icsaid bedshunec abided cuidadquin Nuquin Papa abi tantiaquidotedi bēdamboen ismec icsaisabimboecnuc. ¹⁷ Ambi chuiboedi niacquin Adanēn Nuquin Papa cuidmiash unēsquid yanacpadecec matses unēsquidoidquo iquec. Esuquidistunuidtsēqui nac Nuquin Papan matses bēdamboen isendac. Nēbi aid tantiasho Nuquin Papan nuqui bēdamboen isquin bēdamboec tabadquid icmendac. Adec bēdamboec tabadec unēsash Esusbēdan Nuquin Papan namiacno bēdamboshē yacnombo nuqui tabadendac.

¹⁸ Adec matses abentsēqui icsasho aidbēda aton tsyuecquido matses abitedimbo cuidquin Nuquin Papan unēsquidoidquo icmepampic. Padnuen Nuquin Papan chiacpadece abentsēqui abided cuidadaidēn Nuquin Papa abi tantiaquido bēdamboen ismequin Nuquin Papa yacno tabadmendac. ¹⁹ Nuquin Papan chiaid niac-niaquec Adan icsaic taēambic aton tsyuecquido

abitedimbo icsaquidoudquio yanac. Padnuen Nuquin Papan chiaid niaquesambo icquin Esusën Nuquin Papa nuqui bēdamboen ismec. ²⁰ ¿Matses bēdamboen isnuenda Nuquin Papan ambi: —Bēdamboec tabadta —quequin chiaid Moises dada uamepampic? Padenquio. Matses abi icsaid tantiamenuen ambi chiaid Moises dada uamepampic. Aden chiaid chuisho tantiaash: —Icsaobi —quequin tantiaquin abided cuidadaid tantiaasho Nuquin Papan matses bēdamboen isec. ²¹ Taēec matses icsasho cuidac unēsquidoudquio yanac. Adsho isun matses bēdamboen isnuen Nuquin Papan ambi chiaid niaquesambo Esusded cuidac. Nēbi Nuquin Ichō Esuquidistu tantiaasho Nuquin Papan nuqui bēdamboen isec icsaisabimboecnuc. Nuqui unēsacsho abēdi tabadmendac padpidec unēstiapimbo icnuc.

6

Esus tantiaquid bēdamboec tabadquid, quiaid

¹ Nuquin Papan bēdamboen iste ěmbi chuisho tantiaashun naden tantienda. —Icsaido cuidmenquio icnuec abided Esus ciudadec unēspaneđash. Aid tantiaasho Nuquin Papan bēdamboen isquin nuqui cuidtiapimbo iqueque. Aden bēdamboen isaqui icsaquionona —quequin tantienda. ² Esus tantiaquido adesambo nec. Esus tantiec icsateuidi nuqui bunenquio yanec. ³ ¿Tantienuioda ique? Naden chuiquin mimbi acten mentomiac. —Ěbi cuidmenquio icnuec abided ciudadec unēsaid Esus tantiaquid nebique. Ambi chiacpadec tabadtiadquio iquebique. Utsibo ismenu —quequin mimbi acten mentomiac. Adec Esus unēsaid tantiequi icsaboedobi icsate bunenquio nuqui yanec. ⁴ Aden Esus abided ciudadec unēsaid tantiaasho Nuquin Papan utsiacbimboecnuc nuqui icmec. Esus unēsacsho comapenen tantiaquin Nuquin Papan uincuempac caondash. Adembiđi comapenen tantiaquin Nuquin Papan utsiacbimboecnuc nuqui icmec. Adoac icsateuidi bumboedobi adte bunenquio yanec Nuquin Papan chiacpadequi nuqui bēdamboec tabadcuene.

⁵ Adec abided ciudadec unēsaid tantiec icsate bunenquio yanquid yec Esus uincuemiabimboen comapenen tantiaquin Nuquin Papan utsiacbimboecnuc icmiaidtsen nuqui nec. ⁶⁻⁷ Esus tantiabi yec icsaquido ichoedi matses icsaid bedshunec Esus unēsaid tantiec nuqui icsate bunenquio yanec. Mētaniaid abibi mēnchiquidtiapimbo yacbimboec matses abembi icsaic enēdtiapimbo iquec. Adhoedi Esus tantiec nuqui icsate bunenquio yanec.

⁸ Adec Esus unēsaid tantiec icsainquio yanec nuqui nadpec. —Nuquin Papan uincuemiaidēn Esusën nuqui bēdamboen tabadmec. Unēsacsho Nuquin Papa yacno abēdi nuqui tabadmendac —nuqui quepec. ⁹ Nuquin Papan uincuemiab Esus padpidec unēstiapimbo iquendac. Aton dada unēsquid ichoedi unēstiapimbo icquid yanac. ¹⁰ Matses icsaido cuidmenquio icnuec abided abentsequi ciudadec Esus unēsac caondash padpidec unēsenuio yec. Adsho uincuemiab Nuquin Papan chiacpadomboen nabanec aiddēd tēshnanenquio yec tabadec.

¹¹ Ěbi adsho tantiaash nadta. —Ěbi cuidmenquio icnuec abided ciudadec unēsacsho uincuemiaid Esus ěbēdi iquec. Aid tantiec icsainquio yanebi. Ambi nacpadec tabadtiadquio iquebi —queta. ¹² Icsamboec tabadenquio icnuna. Nuqui icsate bunaid nainquio icnuna. ¹³ —Icsaquionona —quesho tantiaash: —Padi —quenuna. Unēsacbimboen Nuquin Papa tantienquio ictenedēmbi uincuenabimboen Nuquin Papa nuqui tantiabennonadaque. Ambi chiacpadec bēdamboequien tabadtiad. ¹⁴ —Nuquin Papan ambi: “Bēdamboec tabadta,” quequin chiaid Moises dada uamiactedi nuquin ěmbimbo Nuquin Papa bēdamboen ismembī —quenquio icquin Esus tantiaasho

Nuquin Papan nuqui bēdamboen isec. Ambi bēdamboen isaïdo yec nuqui icsate bunenquïo nuqui yaneque. Bēdamboec tabadnuna.

¿Tsuntsin yuabo Esus tantiaquido icpec? quequin chiaïd

¹⁵—Aden Nuquin Papan nuqui bēdamboen isec —quequin ěmbi chuïsho tantiashun naden icsamboen tantienda. —Nēbi abided cuidadaïd Esus tantiasho ěbi bēdamboen isec. ěbi cuidtiapimbo iqueque. Ambi chiaïd niac-niaquec icsabudquïonona —quequin tantienda. Esus tantiaquid adesambo nec.

¹⁶ ¿Tantienguïoda ique? Icbon chiacpadomboen yuan naquid. Icsamequïdēn tantiacpadomboen icsamboen naquid aton yua nendac. Aidēn yua icquin icsaïd ěntiapimbo yec unēsash icsano nidendac. Nuquin Papan yuain ambi chiacpadec bēdamboec tabadcuēndac. ¹⁷ Mibi adec tabadsho isun: —Esus chuibanac icsaïd ěntiapimbo icboedi Esus tantiabenash Doma yacnocquido bēdamboec tabadcuēnac. Aden namec mibi bēdambo iquec, Papa —quequin Nuquin Papa chiombi. ¹⁸ Satanasēn yua icquin mimbimbo mibi icsaïd ěntiapimbo icsho Nuquin Papan nac ambi chiacpadquïec mibi bēdamboec tabadcuēnac.

¹⁹—Mates icquin: “Nuquin Papan chiaïd tantiadenquïo iquec,” canushe —quequin bēdamboen tantiāmenuēn mimbi tantiāïd yuān naïd mibi chiombi. Satanasēn yua yec icsateuïdi bunquïec mibi icsaded-icsadedondac. Adec icsamboshē iccondaïdi nēbi Nuquin Papan chiacpadequïen bēdamboec tabadtiad. ²⁰ Satanasēn yua yec icsaquïec Nuquin Papan chiacpadec bēdamboec tabditiapimbo mibi iccondac. ²¹ ¿Ada bēdamboec tabadonda? Ma mibi chieshēmēnquïec tabadteneyoc. —Ěbi chieshēmēnquïec tabadondaïd tantiashun: “Mibi icsambo iquec,” ěbi canushe —queshun mimbi naondaïd ma mimbi chienquïo iccondac. Icsaïd ěnabi yec unēsash icsano mibi nidtsenac. Adecbidi icsaïd ěnenquïo icquïdo unēsash icsano nidendac. ²² Nēbi nuqui Esus tantiasho Nuquin Papan aton yuabo nuqui icmiac. Adoac icsaïd ěntiapimbo icboedi nēbi nuqui bēdamboec tabadcuēnec. Adquid unēsacsho Nuquin Papan abēdi tabadmendac. ²³ Icsaïdo cuidquin Nuquin Papan icsano nidmendac. Abided cuidadec unēsāïd Esuquïdistu Nuquin Ico tantiasho Nuquin Papan nuqui bēdamboen isequin unēsacsho abēdi tabadmendac.

7

Bēdamboec tabadte chuïnuen chïdo bēnēchoquïd Pabadon chiaïd

¹ Con utsibobimboecquïdo mibi neque. Tantiā. Padpïden mibi chuïnu. Naden chiaïd mimbi tantianēdac. —Nuquin Papan dada uamiac Moisesēn chīampicpadomboen matsesēn naquid. Unēsun aidēn chiaïd natiapimbo iquec —quequin mimbi tantianēdac. ² Nuquin Papan chiacpadomboen inaidēn aton bēnē nianesa. Dada utsi chudmesa chïdon. Bēnē unēsambien niantē dada utsin bedadquïd. ³ Bēnē unēsabi icnubi aton bēnē nianquin dada utsi bedanec cuēnacsho: —Icsambo iquec. Nuquin Papan cuidtequïd nec —cabededtsiash. Bēnē unēsambien dada utsin bedadquïd chïdo. Aden bedacsho Nuquin Papan: —Mibi cuidnu —cainquïo ictsiash.

⁴ Adecbidi ambi chiaïd niac-niacsho Nuquin Papan cuidtsenaïdo nuqui iccondac. Adondaïdi abided cuidadec unēsāïd Esus tantiasho Nuquin Papan: —Mibi cuidnu —nuqui cainquïo iquēndac. Aden Nuquin Papan uincuemēnēdaïdēn Esusēn aton yua nuqui icmequin bēdamboec tabadquïd icmenuen nuqui icsaïd bēdshumpanēdash. ⁵ Esus tantiabi yec nuqui bunacpadeuïdi nuqui icsapadenec. —Adenda —quequin Nuquin Papan chiaïd tantiashi: —Adequï icsaquïonona —quiash nuqui icsaquïodenec. Adquid yec unēsacsho icsano nidmequin Nuquin Papan nuqui cuidtsenēdash. ⁶ Esus

tantiabi yec nuqui nadondac. —Moisesën chiacpadec bédamboec tabadsho Nuquin Papan nuqui bédamboen istsiash. Ambi chiaid niac-niacsho nuqui cuidendac —quiondaidi nëbi Esus tantiec nuqui adenquoio iquec. Nëbi Nuquin Papan Mayanën tantiamiacpadec nuqui bédamboec tabadec.

Icsaquid nebi, quequin Pabadon chiaid

⁷ —Nuquin Papan ambi chiaid Moises dada uamepampid icsambo iquec —¿quectabi ique? Icsapenquoio iquec. Nuquin Papan ambi chiaid Moises dada uamiaid isun: —Nuquin Papan chiaid niac-niaquec icsachitobi —quequin nuqui tantiec. “Útsin na isash: ‘Con na adquid nibèdec,’ quec chieshëmënenda,” quequin Nuquin Papan Moises dada uamiaid isun: —Adec icsachitobi —quequin tantiabenondambi. Nuquin Papan ambi chiaid Moises dada uamiaibi icruc: —Nuquin Papan chiaid niac-niacchitombi —quequin tantienquiembi icnsenchitondac. ⁸ Útsin na isash: —Adquid con na nibèdec —quiash chieshëmëntsëchoedi Nuquin Papan: —Adenda —quequin chiaid tantiashi icsaquid yec utsin na comapenec bunqueic chieshëmënquiondabi. Nuquin Papan chiaid nibèdnuc: —Adec icsachitobi —quequin tantienquoio icnsenondambi. ⁹ Nuquin Papan chiaid tantiabi yec Nuquin Papan cuidte dacuèdënenquoio yec: —Bédambo iquebi —nuqui quedenec. Adshumbic Nuquin Papan ambi chiaid Moises dada uamiampid isash: —Nuquin Papan chiaid niac-niaquec icsachitobi. ¹⁰ Adquid Nuquin Papan cuidendac —nuqui quianondac. —Ma bédamboec tabadte tantianu —quequin ambi chiaid Nuquin Papan Moises dada uamiampic. Aid dada uaid isashi: —Bédamboec tabadenquoio iccobi. Icsachitobi. Adquid Nuquin Papan cuidendac —nuqui quianondac. ¹¹ —Ambi chiacpadomboenuidi nashobini Nuquin Papan bédamboen isec —quec muadenedi Nuquin Papan chiaid abimbo tantiash: —Icsachitobi. Ambi chiaid niac-niacchitombi. Adquid Nuquin Papan icsano nidmequin cuidendac —nuqui quianondac. ¹² Aden nuqui abimbo tantiamequid Nuquin Papan chiaid bédambo iquec. Icsaisambo icquin Nuquin Papan bédamboen chupampic.

¹³ ¿Nuquin Papan chiaid isbanashta matses Nuquin Papan cuidtequido yanactic? Padenquoio. Matses Nuquin Papan cuidtequido yanambic Nuquin Papan ambi chiaid dada uamepampic. —Nëid isash: “Icsamboequini tabadchitec,” ma matses quenu —queshun Nuquin Papan Moises dada uamepampic. Ambi chiaid niac-niacquido icquimbi ambi chiaid tantiash nuqui nadondac. —Icsamboequini tabadchitec. Nuquin Papan nuqui bédamboen istiapimboen icchitec. Èbien cuidchitec —nuqui quianondac. ¹⁴ Nuquin Papan Mayanën tantiamiacpadomboen con tsusedpan Nuquin Papan chiaid dada uapampic. Adembidi aton Mayanën namiac Nuquin Papan chiacpadec nuqui bédamboec tabadtsiac. Aidën namiabi mëtaniaid abibi mënchiquidtiapimbo yacbumboen icsaquido icquin Nuquin Papan chiacpadomboen natiapimbo nuqui iquec. ¹⁵ —Nuquin Papan chiacpadomboen nanu —queboedombi natiapimbo nuqui iquec. Adecbidi: —Útsibo icsacpadec icsainquoio iquendabi —queboedobi nuqui adec icsachitec. Adash: —¿Atotsieshumbimbi adopoba? —quepec nuqui. ¹⁶ —Nuquin Papan chiaid bédamboen icchitec. Aidën chiaid niacte bunenquoio iquebi —queboedëmbi aidën chiaid niac-niaquec: —Bédamboen chiaidimbi niac-niacchitec —quebi. ¹⁷ Bédamboecuidi tabadtiadquidini icsaquid yec èbembi icsadenechitec. ¹⁸ —Bédamboec tabadnu —queboedi icsaquid yec èbembi bédamboec tabadtiapimbo iquebi. Icsaquidini nec. ¹⁹ —Bédambo icte bunebi —queboedi èbembi bédamboec tabadtiapimbo iquebi. —Icsate bunenquoio iquebi —queboedi èbenquiobi icsaded-icsadedebi. ²⁰ Icsate bunenquoio icboedi icsaquid yec èbembi bédamboec tabadtiapimbo iquebi.

21 —Adquid nebi. Nuquin Papan chiacpadec bēdamboec tabadtiadquidi badedquio icsaded-icsadedebi —quequin tantiembi. 22 —Nuquin Papan chiaid bēdambo iqueque. Ambi chiacpadec ēbembī bēdamboec tabadnu —queboedi 23 icsaquid yec ēbembī bēdamboec tabadtiapimbo iquebi. Mētaniaid abembī mēnchiquidtiapimbo yacimboben ēmbī naid ēntiapimbo iquebi. —Nuquin Papan chiacpadec bēdamboec tabadnu —queboedi bēdamboec tabadtiapimboeni icchitec. 24-25 Adquid yec shubitiadquio icchitebi. Icsaquid yec: —¿Mitsipadequini bēdamboec tabadpeba? —queboedi: —Abi tantiasho Esuquidistumbini bēdamboen tabadmec —quianondabi. Adshun Nuquin Papa naden chiembi. —Ēbi bēdamboen tabadmequid Esus mimbi ēbi tantiamiac. Mibi bēdambo iquec, Papa —quequin Nuquin Papa chiembi.

8

Nuquin Papan Mayanēn namiaid

1 Aden matses bēdamboen tabadmequid Esuquidistu tantiasho: —Mibi icsambo iqueque. Cuidnu —cainquo iquendac Nuquin Papan. 2 Icsaquido yec bēdamboec tabadtiapimbo icsho Nuquin Papan cuidtequido icboedēmbi Esus tantiasho Nuquin Papan aton Mayan meniac aidēn tantiamiacpadec nuqui bēdamboec tabadanendac. 3 —Moisesēn chiacpadec bēdamboec tabadec unēsash Nuquin Papa yacno tabadebi —queboedi icsaquido yec abembī bēdamboec tabadtiapimbo matses iquec. Adsho isun matses bēdamboen iste bunquin Nuquin Papan aton Madombo Esus matsesmiac. Adoac Nuquin Papan tantiacpadec matses icsaid bedshunec abided cuidadec unēspaneḏdash. 4 —Abided cuidadaid con Mado Esus tantiasho bēdamboen isquin con Mayan matses menendambi. Adoac aidēn tantiamiac ēmbi Moises chuimiampicpadec bēdamboec tabadendac. Matses abi icsate bunacpadec icsainquo yec bēdamboec tabadendac —qeshun Nuquin Papan Esusede cuidpac caondash.

5 Adec Nuquin Papan Mayanēn tantiamiaid Esus tantiaquid Nuquin Papan tantiacpadec bēdamboec tabadte bunec. Padnuen icsaquid: —Ēbi bunaid nanu —quequin ambibi tantiacpadec icsaic. 6 Aden abi bunaidquio naic icsamboec tabadquid Nuquin Papan cuidendac. Padnuen Nuquin Papan Mayanēn tantiamiacpadec tabadquid Nuquin Papan cuidte dacuēdēnenquo yec bēdambo yec unēsash Nuquin Papa yacno tabadendac. 7 —Icsate bunquidēn ēbi chieshēnec. Ambi naiduidtsēqui naquin ēmbi chiacpadomboen natiapimbo iquec —qeshun Nuquin Papan cuidendac. 8 Adquido chuiquin: —Mibi bēdambo iquec —catiapimbo Nuquin Papa iquec.

9 Esus tantiaquidien adesa nec. Esus tantiasho Nuquin Papan aton Mayan nuqui meniac aidēn tantiamiacpadec nuqui bēdamboec tabadendac. Nuquin Papan aton Mayan meniacmaid Esus tantiesa nec. Nuquin Papan Mayan Esusēn Mayambidi nec. 10 Abided cuidadaid Esus tantiasho bēdamboen isquin Nuquin Papan aton Mayan meniaid yec abēd tabadtequido nuqui nec. Icsaquido yec matses abitedi unēsquidombo icnubi Esus tantiaquid unēsasho Nuquin Papan abēdi tabadmendac. 11 Esus uincuemequidēn Nuquin Papan ambi aton Mayan meniaido unēsasho nuqui uincuemequin nuquin dada utsi uaindac. Aton Mayan nuquibēd tabadsho isun nuqui adoendac.

12 ¿Ēbi adsho tantiashta Esus tantiaquid abi bunacpadequi icsapec? Padenquo. Bēdamboec tabadte bunec. 13 Utsiboen abi bunacpadec icsamboecuidi tabadec unēsasho cuidquin Nuquin Papan icsano nidmendac. Nuquin Papan Mayanēn tantiamiacpadec tabadquin nuqui icsaid nuqui ēnec. Adash unēsash Nuquin Papa yacno nuqui tabadendac.

14 Aden aton Mayanën bēdamboec tabadmiaido Nuquin Papan: —Con mado nec. Con champi nec —capendac. 15 ¿Icbo icsambo icquidēn yua dacuēdmiaimbimboenda Nuquin Papan Mayanën nuqui dacuēdmec? Padenquio. Nuqui bēdambo icmec. Aidēn tantiamiacpadomboen Nuquin Papanuidtsēqui papa nuqui capec. 16 Aden Nuquin Papan Mayanën: —Nuquin Papan mado nec. Adecbidi aton champi nec —nuqui catsiash. Adoac: —Ai, Nuquin Papan mado nebi —dada quenubi chido: —Adecbidi Nuquin Papan champi nebi —quepec. 17 —Con mado nec. Con champi nec —queshun nēbi Nuquin Papan nuqui bēdamboen isquin unēsacsho abēdi tabadmequin nuqui bēdamboeshē icmendac. Utsibon chieshēnac chieshtoenquo yec unēsacsho Nuquin Papan abēdi tabadmequin Esus bēdamboeshē icmiac. Adembidi Esus tantiaquid icsho utsibon chieshēnaqui chieshtoenquo icquin Esus tantiequi unēsacsho Nuquin Papan abēdi tabadmequin nuqui bēdamboeshē icmendac. Nuquin Papa yacnombo Esuquidistun natedi nuquin na nendac.

Nuquin Papan bēdamboeshē icmete chiaid

18 Adec Nuquin Papa yacno nuqui bēdamboeshē icte tantiaquin nuqui nidaidēn natiaic tabadaiduidi ma nuqui tantiatiapimbo iqueyoc. 19 Aden Nuquin Papan nuqui bēdamboeshē icmete tantiec ambi uaid utsitedi nidaidēn icquidtedi aben icquidtedi: —Nēbimbobi bēdambo icmepashuni —queded-quededec tabadec. 20 Abia matses uaid Adan icsasho cuidquin ambi uaid nidaidēn icquidtedi Nuquin Papan unēsquiduidquo icmepampic aidon: —Padi —catiapimbo icnuc. 21 —Yuecshun ěmbi Esus tantiaquido uincuemequin aton dada utsi uacpadēn ěmbi uaido utsi nidaidēn icquidtedi chod-quete icboedi utsi uain bēdamboeshē icmendambi —quequin tantiaquimbi unēsquiduidquo icmepampic. Aden Nuquin Papan chiaid tantiaquin ambi uaidon nidaidēn icquidtedishun aton dada abi bēdambo icmete tantiaquin cainec tabadec. 22 Unēstiapimbo icte bunec unēsquid yec: —¿Tedectsicshun Nuquin Papan nuqui utsi uapeba? Nēbimbobi Nuquin Papan utsi uapashuni —queded-quededec Nuquin Papan uaidtedi. Bacuē tishquid bacuē paēmbo icnuc: —Badedquo tishmepashuni —quiacbimboec adpec. 23 Nuquin Papan meniaidēn aton Mayanën tantiamiacpaden nuquitsen naden chiec. —Con dada utsi uaqin unēstiapimbo icquid icmepashuni. Ambi chiacpadomboen naquin: “Con mado neque. Con champi neque. Utsibo ismenu,” quequin nuquin dada utsi uaqin Nuquin Papan unēstiapimbo icquid icmendac —queded-quededquin nuquin dada utsi uate tantiaquin nuqui cainec. 24-25 —Esus tantiaquido unēsacsho Nuquin Papan nuquin dada utsi uaindac —quequin tantiaquin nuqui Esus tantiabonondac. Nuquin dada utsi uabi icnubi: —Nēbimbobi dada utsi uapashuni —nuqui queded-quededendac yuec. Nuquin Papan nuquin dada utsi uaqin nuqui adenquio iquendac.

26 —Aden aton dada utsi uate tantiaquin yuen cainec chieshtonoshe —queshun Nuquin Papan Mayanën nuquibēd icquin bēdamboen tantiamec. —¿Mitsipademimbimbi Nuquin Papa chuipeba? —quec nuqui shubitiadquio icsho isun Nuquin Papan Mayanën abi chiec. Unēsquio icnuc onquengquio icquin chiec: —Mimbimbi tantiacpadomboen aid matses bēdambo icmeta, Papa —quequin Nuquin Papan Mayanën nuqui comapenen chuided-chuidedec. 27 Aden Nuquin Papan: —Ma Esus tantiaquido bēdambo icnu —quequin tantiaidbidi aton Mayanën onquengquio icquin chuisho Nuquin Papan tantiec. Otacquo tantiaidtedi tantiaquid icquin Nuquin Papan aden aton Mayanën chiaid tantiec.

Nuquin Papan nuqui bēdambo icmiaid

28 Aden tantiaquid nuqui naden tantiec. Ambi tantiamiacpadomboen abi tantiaquido bēdambo icmete bunquin Nuquin Papan bēdamboen nashunec.

Unēsquoio yec tabadsho aden naic. Natiambo icsho adembidi naic. Cuis-honquesho adembidi naic. ²⁹ Ēndenquimboshē nidaid uabi yequi Nuquin Papa nadpampic. —Ēmbi tantiactedi ēbēdta con Mado tantiaquid icmequin Esuspadquoio icnuc bēdambo icquid icmendambi. Aden abi tantiaquido aton utsibobimboecnuc icmendabi —quequin ambi tantiampicpadquoio icnuc bēdambo icmenuen Nuquin Papan naic. ³⁰ Ēndenquimboshē nidaid uabi yec: —Yuecshun naindambi —abi quāmpicpadomboen Nuquin Papan nuqui Esus tantiamiac. Adoac nuqui cuidmenquoio icnuc abided cuidadaid Esus tantiasho Nuquin Papan nuqui bēdamboen isec isaisabimboecnuc. Nuqui bēdamboen isquin nuqui bēdamboen tabadmec. Unēsacsho nuqui unēstiapimbo icquid icmeshun abēdi tabadmendac.

³¹ ¿Embi aden chiaidtedi tantiashta Esus tantiaquido dacuēdpec? —Nuqui cudasquin Nuquin Papan nuqui bēdambo icmendac. Ēbi chieshēnquidēn: “Cuid,” cac Nuquin Papan ēbi cuidenquoio ictsiash —quec nuqui dacuēdenquoio iquec. ³² Nuquin Papan nuqui tantiaquieic. Aton Madombo cudasenquoio icquimbī nuqui cuidenquoio icnuc aton Madoded cuidquin unēs uamepanēdash. Adshumbic Esus tantiasho ēnenquoio icquin bēdamboen isquin nēbi bēdambo icmequin unēsacsho abēdi tabadmequin nuqui bēdamboeshē icmendac. ³³ ¿Nuquin Papan nuqui bēdamboen isquidēmbida nuqui cuidpec? Padenquoio. ¿Utsibo nuqui caic: —Icambo iquec —queshobida Nuquin Papan nuqui cuidpec? Padenquoio. ³⁴ ¿Esusēmbida nuqui cuidpec? Abi tantiaquido cuidmenquoio icnuc abided cuidadec Esus unēsac caondash. Unēsacsho Nuquin Papan uincuemiac Nuquin Papa yacnoshon aidēmbi abi tantiaquido chianec. —Ēbi tantiaquido bēdamboen isquin cuidenda, Papa —quequin Nuquin Papa chianec tabadec. ¿Adquidēnquiobida nuqui icsano nidmequin cuidpec? Padenquoio. ³⁵ Nuqui bēdamboen isquin ēnenquoio icquin Esusēn nuqui tantiaquieic. ¿Shubisho isunda Esusēn nuqui tantienquoio icpec? Padenquoio. ¿Dacuēdshoda Esusēn nuqui tantienquoio icpec? Padenquoio. Adembidi nuqui tantiaquieic. Utsibon chieshēnsho bēdamboen isquinc pete natia bunsho bēdamboen isquinc nuquin dashcute nibēdsho bēdamboen isquinc nuqui Esusēn caindac. —Ēbi acshunendac —quesho bēdamboen isquinc chieshēmēnquidon: —Cuesunenu —casho bēdamboen isquinc nuqui caindac Esusēn ēnenquoio icquin. ³⁶ Aden utsibon Esus tantiaquido chieshēnte chuiquin Nuquin Papan dada uamepampic naden.

“Mibi tantiasho ēbi: ‘Cuesunenu,’ caded-cadedec uimanēmēnquidon.

Aben icquidbimboecnuc: ‘Cuesunenu,’ caded-cadedebi, Papa,” quequin Nuquin Papan chiaid dada uapampic Esus tishabī icnuc.

³⁷ Aden utsibon nuqui chieshēnsho Esuquidistun nuqui bēdamboen tantiaquieic. Shubisho abi nuqui tantiamec. Adoac Esus tantiatsec shubiquimbi chieshtoenquoio icquin nuqui Esus tantiaquieic yanendac. ³⁸⁻³⁹ Nuquin Papan ēnenquoio icquin nuqui tantiaquieic. Nuquin Icho Esus tantiasho Nuquin Papan nuqui bēdamboen isec. Unēsacsho nuqui bēdamboen tantiatshash. Unēsabi icsho nuqui bēdamboen isec. ¿Nuquin Papan abi yacnoshon uaid mayan bēdan: —Aid tantienda —cashoda nuqui Nuquin Papan tantienquoio yampatsiash? Padenquoio. Adembidi nuqui tantiaquiotsiash. ¿Podobitsi icsabon icbo Satanasēn: —Aid tantienda —cacta Nuquin Papan nuqui chieshēmpatsiash? Padenquoio. Adembidi nuqui tantiaquiotsiash. Nēbi nuqui bēdamboen tantieic. Yuecshun adembidi nuqui bēdamboen tantieic. Comapenen tantiaquidtedishun nuqui caic: —Aid tantienda —caqui adembidi Nuquin Papan nuqui tantiaquiotsiash. Abuc nidacsho Nuquin Papan nuqui bēdamboen tantiatshash. Nidaid uquēducquoio nidacsho adembidi nuqui

bêdamboen tantiatsiash. Nuquin Papan uaid utsi abitedishun nuqui caic: — Aid tantienda —caqui adembidi Nuquin Papan nuqui bêdamboen tantiatsiash ênenquo icquin.

9

Pabaddon aton matses isadaidbo chiaid

¹⁻² Aden con matses isadaidbo tantiaquid Nuquin Papa nec. —Aden abi tantiaquidi con matsesên bêdamboen tantienquo iquec —quiash shubiti-adquo iquebi. Muainquo iquebi. Esus tantiaquid icsho Nuquin Papan Mayanên tantiamiaid icquin abimbo chiembique. Tantiata. ³ Con matses isadaidbo tantiec unêsquo yec tsadebi. Nuquin Papan: —Min matses abitedi cuidenquo icnuen mibiuidtsêqui Esusbêd tabadmenquo icquin icsano nid-mequin cuidnu —capatecnêdani. Adoac: —Ai, con matses cuidenquo icnuen êbided cuid —quetsenondabi. ⁴ Con matses tsusedpa Acobo caid Nuquin Papan Isadaid caidên tsyuecquidotedi isadaidbo tantiaquin Nuquin Papan nadopampic. —Con matses mibi caimbique. Mibêdi tabadebique. Mibi ismenu —quequin con matses tabadacno abu ushu bêchamauanqueicquid chomequin ismepampic. Adashic nadpampic. —Ëmbi chiacpadec bêdamboec tabadsho mibi bêdamboen isquin bêdambo icmendambi. Mibi nianenquo iquendambi —qeshun ambi: “Naden nata,” quequin chiaid Moises dada uamepampic. Adoac abi tabadte shubu uashunash Nuquin Papa tantiec isadaidbo tabadpampic. Adshumbic matses cuidmenquo ictequid chuiquin: —Mibi bêdambo icmendambi —quequin Nuquin Papan con matses chuiampic êdenquimboshê. ⁵ Abadauan chuiquin Isac chuiquinc Acobo chuiquinc capampic. Ambi chiacpadomboen Isadaidbon chidon tishac Esuquidistu matsesac caondash. Nuquin Papapadquidquobi yec abitedishun Icho yec matsesac caondashe. Esus chuiquin: —Nuquin Papa padquobi yec mibi bêdamboshê iquec —canuna ênenquo icquin.

⁶ Ëmbi chiacpaden Esus tantienquo icsho Nuquin Papan con matses dadpen bêdamboen istiapimbo iquec. ¿Aden tantiashatabi nadpe? —Nuquin Papa muapampic. Ambi chiacpadomboen nainquo icquin con matses bêdamboen istiapimbo iquec —¿quectabi ique? Padenquo. Nuquin Papan abimbo chuiampic. Isadaidbo dadpenhshun Nuquin Papa bêdamboen tantienquo iquec. Ambi tantiactedishun abi tantiasho ambi chiacpadomboen Nuquin Papan bêdamboen isec. ⁷ Êdenquimboshê con tsusedpa Abadauanên mêdaidtedi adembidi Nuquin Papan bêdamboen isambo. Abadauanên mado abentsêqui Isac caic: —Aidên tsyuecquido ëmbi mibi cuênacpadomboen con matses caindambi —quequin Nuquin Papan chuiampic. ⁸ ¿Abadauanên bacuêbotedishun tsyuecquidotedida Nuquin Papan con matses caido nepec? Padenquo. Ambi chiacpadomboen Isaquên tsyuecquido Nuquin Papan con matses caido nec. ⁹ Naden Nuquin Papan Isac tishte chuiampic. “Ëmbi tantiacpadên choashun ëmbi namiac Sadan min chidon dada bacuê tishendac,” quepampic Nuquin Papa Abadauan chiech.

¹⁰ Aden ambi: —Adoendambi —quequin chiacpadomboen naquidquo Nuquin Papa nec. Aden Nuquin Papan Isaquên bacuê abi ushëmbi daéd tishte chuiampic. Adnubiën con tsusedpa Isaquên aton chido Debeca caid bedshun chudquin dada bacuê daéd usundomepampic Nuquin Papan chiacpadomboen. ¹¹⁻¹² Aid dada bacuê daéd tishabi icshobi Nuquin Papan ani naden chuiampic. “Ëmbi tantiacpadquid min madon utsimpi bêyucquidimboecquid nendac,” quepampic. Aid daéd tishabi bêdamboec tabadtiapimbo icnubi: —Tishacsho ëmbi tantiacpadembi tsyuec tishsaidëmpi abentsêqui bêdamboen isendambi —quequin tantiec adpampic

Nuquin Papa. ¹³ Adembidi Isaquën mado chuiquin Nuquin Papan ambi chiaid dada uamepampic. “‘Acobouidtsëqui tantiaquioquin aton buchimpi Esau bëdiactsäc tantiatsendambi,’ quepampic Nuquin Papa,” quequin dada uamepampic.

¹⁴ ¿Ëmbi aden chuisho tantiash: —Nuquin Papa icsambo iquec —quecta mibi ique? Ma Nuquin Papa icsapenquio icquid neyoc. Icsaquido yec matses abitedi ambi cuidtequido icsho Nuquin Papan ambi tantiactedi bédamboen isec. ¹⁵ Aden Nuquin Papan con tsusedpa Moises chuiampic.

“Embi tantiactedi matses bédamboen isendambi. Aidedi cuidenquio iquendambi,”

quequin chuiampic. ¹⁶ ¿—Ëmbemi nasho Nuquin Papan bédamboen istsiash —quec matses bunacpadenda Nuquin Papan matses bédamboen ispec? Padenquio. Ambi tantiactedishun abi tantiasho Nuquin Papan bédamboen isendac. ¹⁷ Aden ambi tantiacpadomboen ambi naid Nuquin Papan Equipito yacnocquido chuiquid dapa padaon caid chuiampic. “‘Matses abitedishun ma nadono. Padaon caid icsasho Nuquin Papan cuidec. Nuquin Papa abitedishun Icho yec nadatiambo icquidquio nec, ma ëbi canu,’ quequin mibi chuiquid dapa icmiondambi. Mibi icsasho pacuënëdacbimboecnuc mibi icmëmbi,” quequin Nuquin Papan padaon chiaid Moisesën dada uapampic.

¹⁸ Aden ambi tantiacpadomboen utsi-utsien icsaido pacuënëdacbimboecnuc icmequin abi tantiamenquio iquec. Adembidi utsi-utsien bédamboen isquin abi tantiamec.

¹⁹ ¿Ëbi adsho tantiashta mibi nadpe? —¿Atotsieshun Nuquin Papan matses cuidpec? ¿Abitedishun Icho icquin Nuquin Papan namiacta matsesën nainquio icpadic? —¿quecta ique? ²⁰ ¿Matses icquinda mimbi Nuquin Papa chushcapatsia? ¿Ambi uaido icquimbida nuqui nadope? —¿Atotsieshun ëbipadquid matses uao, Papa? —¿capenda nuqui ique? ²¹ ¿Ada abi nacnenquid matsun chushcapadic? Padenquio. Matsü nacnenquidën ambi tantiacpadomboen nacnenendac. —Nëid nidaid tëshë tëchu bédambo icquid acte uetequid nacnenu. Nëid nidaid tëshë matsumpi icsactsëcquid opa acmete nacnenu —quequin matsü nacnenquid. Aden ambi tantiacpadomboen nidaid tëshun nacnenquid.

²² Adembidi nuqui uaquid Nuquin Papan ambi tantiacpadomboen naindac. —Abitedishun Ichombo yec comapenen tantiaquidquio nebi. Adquid icquin icsaido cuidquid nebi que. Ismenu —queboedëmbi ambi cuidtequido baded cuidenquio iquec. Ambi ëndenquimboshë tantiacpadomboen aido icsano nidmendac. ²³ —Ma ëmbi bédamboen isaidon naden tantianu. —‘Icsaisambo icquin matses bédamboen iste bunquin Nuquin Papan icsaido badedi cuidenquio iquec,’ quequin ma tantianu —queshun icsaido badedi cuidenquio iquec. Ambi ëndenquimboshë tantiacpadomboen ambi bédamboen isaido abëdi tabadmendac.

²⁴ Aden ambi tantiacpadomboen Esus tantiasho Nuquin Papan nuqui bédamboen isec. Isadaidbon abi tantiasho bédamboen isquinc isadaidpembo matses utsibon abi tantiasho bédamboen isquinc nuqui caindac. ²⁵ Ambi matses utsibotsen aden bédamboen iste chuiquin Nuquin Papan con tsusedpa Oseyas caid dada uamepampic naden.

“Utsibo ëmbi con matses cacmaidobi con matses cabenendambi. Adembidi ëmbi bédamboen tantiacmaidobi matses utsibo bédamboen isbenendambi,”

quequin Nuquin Papan chiaid dada uashun ²⁶ nadentsen dada uapampic. “Matses utsibo ambi con matses cacmaidobi ambi tantiacpadën aido abentse-abentsen Nuquin Papan bédamboen isendac.

Bédamboen isquin: ‘Con mado nec. Con champi nec,’ caindac,”

quequin Nuquin Papan matses utsibo bēdamboen iste chuiquin dada uapampic.

²⁷ Ambi con matses caidombi abi tantiatipimbo icsho isash Nuquin Papa chushquiaid con tsusedpa Isayasēn naden dada uapampic. “Masitedi dadpenquo caidnēdaido isadaidbo daēdpactsēcshun abi tantiasho bēdamboen isquin aiddtedsēqui Nuquin Papan cuidenquo iquendac. ²⁸ Ambi chiacpadomboen ambi tantiacpadēn matses abi tantiesabotedi Nuquin Papan uesquin cuidendac isadaidbo yec matses utsibo yec quenuc,” quequin Isayasēn dada uapampic. ²⁹ Nuquin Papan chiaid padpiden dada uaquin isadaidbo cuidte Isayasēn chuiampic naden.

“Shubu dadpen icquid Sodoma caid yacnocquidobēdta shubu dadpen icquid utsi Comoda caid yacnocquido Nuquin Papan uesquin cuidac aton tsyuecquido nibēdquieic iquendac.

Adembidi con matses Nuquin Papan uesquin cuidtsempanēdash. Abitedishun Icho icquin con matses nibēdquiecnuc cuidtsempanēdash. Dadpen cuidquin daēdpactsēc cuidabi icpanēdash,” quequin dada uapampic Isayasēn.

Isadaidbo bēdamboen istiapimbo icte chiaid

³⁰ Aden Isadaidbo dadpenshun abi tantienquo icsho Nuquin Papan bēdamboen istiapimbo iquec. Padnuen matses utsibo: —Mabi Nuquin Papan bēdamboen isnu. Ambi chiacpadec bēdamboec tabadnu —quesabobi: —Ēbi cuidmenquo icnuec cuidadeq unēsaid Esus bēdamboshē iquec —quesho Nuquin Papan bēdamboen isec icsaisabimboecnuc. ³¹ Isadaidboen: —Moisesēn chiampiduidi ěmbembi nasho Nuquin Papan bēdamboen isebe —queboedombi nainquo icsho Nuquin Papan bēdamboen istiapimbo iquec.

³² ¿Atotsieshun Nuquin Papan isadaidbo bēdamboen istiapimbo icpec? —Ambi chiacpadomboenuidi ěmbembi naquin Nuquin Papa bēdamboen ismembi —queboedombi adotiapimbo icquin Nuquin Papa bēdamboen ismequidquo Esus chieshēnec. Adsho Nuquin Papan bēdamboen istiapimbo iquec. ³³ Esus tishabi icnuc isadaidbon Esus chieshēnte chuiquin Nuquin Papan con tsusedpa naden dada uamepampic.

“Buintad bēdambo icquid istuidash: ‘Nēidquo shubu uanun nitsinembi,’ quiacbimboen

Edusaden yacno ěbi bēdamboen ismequidquo isadaidbobēd tabadmendambi.

Adec tabadsho anocquidon chieshēnendac.

Aid chieshēnquid nadquo iquendac. ‘Cuēte mabud iquec,’ quequin tantienquo yec nidec tocoshquetanec uebudacbimboec

ěbi bēdamboen ismequid tantienquo yec unēsash icsano nidendac.

Aid tantiaquido: ‘Nēid tantiasho Nuquin Papan abi yacno nuqui tabadmendac,’ quequid unēsacsho ěbi yacno tabadmendambi,”

quequin Nuquin Papan ambi chiaid dada uamepampic.

10

¹ Con matses isadaidbo tantiac unēsquo icnuc Nuquin Papa chianiombi. —Con matses isadaidbo abided cuidadaid Esus tantiameta, Papa. Esus tantiasho bēdamboen ista, Papa —quequin Nuquin Papa chianiombi. ² Esus tantiaibi ěmbi chuidenecpadomboen chiec: —Nuquin Papan chiacpadomboenuidi naquin Nuquin Papa bēdamboen ismembi —quetsēcboedombi con matsesēn Nuquin Papa bēdamboen ismete tantienquo iquec. ³ —Abided cuidadaid Esus tantiasho Nuquin Papan bēdamboen isebe —quetiadquidi icsamboen tantiec. —Nuquin Papan: “Bēdamboec tabadta,” quequin chiaid

Moisesën dada uactedi naquin Nuquin Papa bēdamboen ismembi —quequin icsamboen tantiaquin Nuquin Papan tantiacpadomboen nainquo icquin Esus tantienquo iquec. ⁴ Esusuidtsēqui Nuquin Papan: —Bēdamboec tabadta —quequin chiaid Moisesën dada uactedi naquidquo nec. Adec icsaisa yec matses icsaid bedshunec abided cuidadec unēsac caondash. Nēbi Esus tantiasho Nuquin Papan matses bēdamboen isec icsaisabimboecnuc.

⁵ Nuquin Papan chiaid dada uaquin Moisesën chuiampic naden. “Ambi chiacpadomboenuidi naquid Nuquin Papan bēdamboen isquin abēdi tabadmetsiash,” quequin Nuquin Papan chiaid Moisesën dada uapampic. ⁶ Aden ambi chiacpadomboenuidi natiadquidombi natiapimbo icsho Nuquin Papan matses bēdamboen istiapimbo icpanēdash. Nēbi abided cuidadaid Esus tantiasho nuqui bēdamboen isec. Adoac Esus tantiaquido nadenquo iquec. —Nuquin Papa yacno nidshun ŷtsuntsin Nuquin Papa nuqui bēdamboen ismepatsiashba? —quenquo nuqui iquec. —Esusquo Nuquin Papa bēdamboen ismequidquo nec —quequin nuqui tantiec. ⁷ Aden tantiec: —ŷTsuntsin Nuquin Papa bēdamboen ismequidquo uincuemepatsiashba? —quenquo nuqui iquec. —Abided cuidadec unēsacsho Esus uincuemiac caondash —quequintsen nuqui tantiec. ⁸ Aid tantiasho Nuquin Papan nuqui bēdamboen isec. Ambi bēdamboen iste chuiquin Nuquin Papan naden dada uamepampic. “Nuquin Papan chiaid chuisho tantiash: ‘Abimbo chiec. Aid tantiemi,’ qesho Nuquin Papan matses bēdamboen isendac,” quequin dada uamepampic. Nēbi Nuquin Papan chomiaid abided cuidadaid Esus tantiasho Nuquin Papan nuqui bēdamboen isec. Aden nuqui bēdamboen ismequid Esus chuibenecquid nebi. ⁹ —Nuquin Papan uincuemaiad Esus abitedishun Icho neque. Con Icho Esus canu —quequin chuisho Nuquin Papan nuqui bēdamboen isquin cuidenquo iquendac. ¹⁰ —Ēbi cuidmenquo icnuec abided cuidadaid Esus tantiemi —quequin otacquo tantiaquidēn: —Esus tantiaquid nebi —quequin utsibo abimbo chuisho bēdamboen isquin Nuquin Papan cuidenquo iquendac.

¹¹ Ambi chiaid Nuquin Papan dada uamiacpaden: “Aid tantiec: ‘Nēid tantiasho Nuquin Papan abi yacno nuqui tabadmendac,’ quequid unēsacsho ēbi yacno tabadmendambi.”

¹² Isadaidbo yec matses utsibo yec quequido Esus tantiaquidtedi adoenac. Aden abitedishun Icho icquin abi tantiaquidtedi Esusën bēdambo icmendac. ¹³ Aden Esusën nate chuiquin con tsusedpan Nuquin Papan chiaid dada uapampic. “ ‘Abitedishun Icbombo icsho mibi tantiaquid nebique. Ēbi bēdamboen ista, Icho,’ qesho bēdamboen isquin cuidenquo iquendac,” quequin dada uapampic.

¹⁴ ŷMitsipaden matsesën Esus tantiabempec? ŷEsusën naid chiabi yacta matsesën tantiapec? Padenquo. Esusën naidquo chuibanaquien tantiendac. ŷEsusën naid chuisho tantiash: —Mua —quequidta Esus tantiaquid nepadic? Padenquo. —Abimbo caic —qeshun: —Min Mado Esus tantiebique. Ēbi bēdamboen ista, Papa —quequidien Esus tantiaquid nec. ¹⁵ ŷMitsipadoaidēn Esusën naid chuibampec? ŷ—Chuita —cacmaidēnda chuibampec? Padenquo. Nuquin Papan: —Con Mado chuibeneta —caidien Esusën naid chuibanquid nendac. Aden chuibante chuiquin Nuquin Papan naden dada uamepampic. “Nuquin Papan matses bēdamboen iste chuibanquid chosho isash: ‘Bēdambo iquec,’ quec matses cuishonquendac,” quequin dada uamepampic.

Isadaidbo dadpeshun Esus tantienquo yaid

¹⁶ Adquidēn Esusën naid chuibanac isadaidbo dadpeshun Esus tantienquo iquec. Daēdpactsēcshun tantiec. Abi tishabi icnuc aden abi tantiesabo Esusën chuite Nuquin Papan con tsusedpa Isayas caid dada uamepampic

naden. “Mimbi chiaidquio ëmbi chuibansho ¿tsuntsin tantiapec, Papa? Daëdpactsëcshun: ‘Abimbo mimbi chiec. Mibi tantiacquin mimbi chiapadomboen naimbi,’ ëbi caindac, Papa,” quequin Esusën aton Papa chuite Isayasën dada uapampic. ¹⁷ Aden Esusën naid chuibansho tantiashun: —Abimbo caic —qeshun utsibon Esus tantiec.

¹⁸ ¿Esusën naid chuisho tantiabida con matses isadaidbon icpadic? Ma tantiapaboc. Nuquin Papan chiaid dada uampicpadomboen “nidaid utsi-utsiec yacno nidshun Nuquin Papan chomiaidën naid chuibanquidën chuibanendac.” Aden chuibansho ma con matsesën tantiaboc. ¹⁹ Aden Nuquin Papan chiaid chuisho tantiash: —Tantiadenquio yec onquec —¿quepecta icnëdash con matses? Padenquio. Tantiashi abi bëdamboen tantiata bunenquio icsho isun matses utsibo bëdamboen isbente chuiquin Nuquin Papan ambi chiaid isadaidbo tsusedpa Moises dada uamepampic naden.

“Isadaidboudi ëmbi bëdamboen iste mimbi danubi ëmbi con matses cacmaidobi matses utsibo bëdamboen isbenendambi.

Ëmbi matses utsibo bëdamboen iso isash: ‘¿Atotsieshun Nuquin Papan matses utsibo bëdamboen ispec?

Icsambo iquec,’ quec mibi chushquendac.

Matses utsibobi ëbi tantiabi icquido ëbi tantiamendambi.

Aido bëdamboen isquin mibi nëishëmendambi,”

quequin Nuquin Papan Moises dada uamepampic. ²⁰ Adembidi dacuëdenquio icquin Isayasën Nuquin Papan matses utsibo bëdamboen iste dada uapampic.

“ ‘Nuquin Papa tantiatiadquio iquebi,’ quenquio icquidombi ëbi tantiabenosh.

‘¿Mitsipadembimbi Nuquin Papa bëdamboen ismepeba?’ quesabobi ëmbi bëdamboen iste tantiamiombi,”

quequin Isayasën Nuquin Papan chiaid dada uapampic. ²¹ Isadaidbotsen chuiquin Nuquin Papan chiaidquiobidi Isayasën naden dada uapampic. “

‘Mibi tantiac unësquio iqueque. Ëbi bëdamboen tantiata,’ cadeniaqui: ‘Padi, mibi tantiatiapimbo iquebi,’ quequin ënenquio icquin ëmbi chiaid mimbi niac-niacpec,” quequin Nuquin Papan chiaid Isayasën dada uapampic.

11

Ambi chiactedi isadaidbo Nuquin Papan bëdamboen isaid

¹ ¿Ambi chiaid niac-niacsho isadaidbotedida Nuquin Papan chieshëmpec? —Con matses catiapimbo iquebi —¿quecta iquec? Padenquio. Isadaidbombo

nebi. Ëndenquimboshë con tsusedpa Abadauan campidën baban tishmiaid Benaminën tsyuecquidon tsyuecquid yec isadaidbombo nebi. Adquid icsho

Nuquin Papan chieshënenquio iquebi. ² Ëndenquimboshë nidaid uabi icquimbi Nuquin Papan: —Con matses caindambi —quequin con matses isadaidbo

tantiapampic. Adshun abitedi chieshënenquio iquec. ¿Ediasën chiampid tantienquioda ique? Aton matses isadaidbo nëishëshun Nuquin Papa naden

chuiampic. ³ “Mimbi con matses caidotedi icsamboshë icquec, Papa. Mimbi chiaid chuibanquidobi cuesun secac. Papa quequin mibi menequin

ismete cuënote nacnenaid uesquin chic-chicpac, Papa. Icsamboshë iquec. Ëbiuidtsëqui bëdambo iquec. Mimbi chiaid chuibansho tantiashun ëbi cue-

sunetiadquio iquec, Papa,” quequin Ediasën Nuquin Papa chuiampic.

⁴ Adoac ¿mitsipadomboen Nuquin Papan chuiampic? “Ëbi tantiacquido abi iquec. Ëmbi namiacpadomboen isadaidbo dadpenshun 7000tedishun ëbi

tantiec. Ëbi tantiesabon papa quequin nacnenaid Bad caid tantienquio

icquin ëbi tantiec,” quequin Nuquin Papan Edias chuipampic. ⁵ Adembidi nëbi con matses isadaidbon ambi tantiatedishun Esus tantiasho Nuquin Papan bëdamboen isec. ⁶ ¿Ambembida con matsesën Nuquin Papa bëdamboen ismepec? Padenquo. —Ëmbi chiacpadomboenuidi nasho matses bëdamboen isembi —¿quecta icpec Nuquin Papa? Padenquo. Aden naquid nibëdsho bëdamboen istiapimbo icboedëmbi ambi tantiatedishun icsaboedon Esus tantiasho Nuquin Papan bëdamboen isendac.

⁷ Isadaidbon ambi tantiatedishun Esus tantiasho Nuquin Papan bëdamboen isec. Isadaidbo utsiboen bëdamboen istiapimbo iquec. Aido: —Nuquin Papa bëdamboen ismete bunquin ambi chiacpadomboenuidi ëmbimbo nanu —queboedombi nainquo icsho Nuquin Papan bëdamboen istiapimbo iquec. Abi bëdamboen ismequidquo Esus chieshënsho Nuquin Papan pacuënëdac bimboecnuc isadaidbo icmepanëdash. ⁸ Aden ambi isadaidbo pacuënëdac bimboecnuc icmete chuiquin Nuquin Papan dada uamepampic naden.

“Nuquin Papan pacuënëdac bimboecnuc icmiac Nuquin Papan chiaid chiaqui tantiatiapimbo iquec,”

quequin dada uamepampic. ⁹ Adembidi ambi isadaidbo pacuënëdac bimboecnuc icmete chuiquin Nuquin Papan con tsusedpa Dabid naden dada uamepampic ëndenquimboshë.

“ ‘Ëbi bunaiduidi naic ëbibi bëdambo iquebi,’ quequidëmbi Nuquin Papa bëdamboen tantienquo iquec.

Adsho Nuquin Papan cuidpashun.

Cuidadnushi abimbo chiaid danec: ‘Ëmbembi naic bëdambo iquebi,’ quendac. Adec abi tantienquo yec icsasho Nuquin Papan cuidpashun.

¹⁰ Pacuënëdac bimboecnuc icmequin Nuquin Papan abimbo tantiamenquo icpashun.

Natiamequin shubimepashun,”

quequin Nuquin Papan chiaid Dabidën dada uapampic.

Nuquin Papan matses utsibo bëdamboen isbenaid

¹¹ ¿Aden pacuënëdac bimboecnuc icmiac Esus tantiatiapimbo icsho isadaidbo padpiden bëdamboen tantiametiapimboda Nuquin Papa icpec? Amba tantiacpadomboen bëdamboen tantiamendac. Nëbi isadaidbo dadpen bëdamboen istiapimbo icquimbi matses bëdamboen iste bunquin Nuquin Papan matses utsibo Esus natiamequin bëdamboen isbenec. —Ëmbi adosho isash isadaidbotsen ma nadnu. “Nuquin Papa bëdamboen ismete bunquebique. Ëmbitsen Esus tantianu,” ma quenu —queshun Nuquin Papan aden matses utsibo ambi bëdamboen iste tantiamiac. ¹² Amba chomiaid Esus tantienquo icsho isadaidbo dadpen bëdamboen istiapimbo icquimbi matses utsibon Esus tantiasho ambi con matses caido isadaidbo bimboecnuc Nuquin Papan bëdamboen isbenec. Amba tantiacpadën ambi tantiamiacpadomboen isadaidbo dadpenshun Esus tantiabensho Nuquin Papan bëdamboen isendac. Adshumbic matses utsibobëda isadaidbo Nuquin Papan bëdamboen icmendac.

¹³ Tantia, matses utsibo. Mibitsen chuinu. Nuquin Papan icmiacpadomboen matses utsibo Esusën naid chuibenequidquo nebi. Ëmbi chuibeneboed con matses isadaidbo chuibanombi naden. —Esusën naid ëmbi chuibeniac matses utsibon Esus tantiabenosh. Adsho Nuquin Papan aido bëdamboen isbenosh —quequin con matses chiombi. ¹⁴ —Aden Nuquin Papan matses utsibo bëdamboen isaid ëmbi chuisho tantiash Nuquin Papa bëdamboen ismete bunquin Esus tantiatsiash. Adsho Nuquin Papan

bëdamboen istsiash —qeshun con matses aden chiombi. ¹⁵ Aden isadaidbon Esus chieshënsho isun Nuquin Papan matses utsibo Esus tantiamequin bëdamboen isbenac. Ambi tantiacpadëmbi isadaidbontsen Esus tantiasho Nuquin Papan bëdamboen isbenendac. Isadaidbontsen Esus tantiabededscho isumbic Nuquin Papan matses unësaidotedi uincuemendac. ¹⁶ Con tsusedpa Abadauan abi tantiaquidquo icsho Nuquin Papan bëdamboen isquin: —Con matses mibi caimbi. Adembidi min tsyuecquidotsen ëmbi chiactedi con matses caindambi —quequin ambi chiacpadomboen isadaidbotedi Nuquin Papan con matses caindac. Ambi nitsinaid cuëte caniacsho: —Tapunuidtsëqui con na nec. Dada con napenquo nec —¿capenda icbon iquec? Padenquo. —Abichobi con na nec —caquid. Adembidi Nuquin Papan isadaidbotedi con matses caic. Caniec taëquid cuëte tapumbimboecquid abia con matses caid Abadauan nec. Cuëte cuidibimboecquido Nuquin Papan con matses caidobidi Abadauanën tsyuecquido isadaidbo nec.

¹⁷ Aden ambi con matses caidombi ambi chomiaid chieshënsho cuëte cuidi utsi pobinun pateshuniacimboen Nuquin Papan isadaidbo dadpen bëdamboen istiapimbo iquec. Matses utsibo Esus tantiamequin cuëte dada utsi pobiacimboen aton matses icmequin ëbipadquid isadaidbo ambia Esus tantiaquidobëdta Nuquin Papan mibi bëdamboen isec. ¹⁸ Adoac icsamboec onquenda. —Isadaidbo dadpen bëdamboen isenquo icquin Nuquin Papan ëbien bëdamboen isec. Isadaidbo icsambo iquec. Èbien bëdambo iquec —quequin icsamboen chienda. Aden icsamboen chuitiadquo icquimbi nëid chiaidtsen tantiata. Cuëte tapunabi icnuc dada yec podò yec quec cuëte ictiapimbo ictsindac. Adechidi isadaidbo tsusedpa Abadauan abia tishabi icnuc aton tsyuecquido isadaidbo nibëdtsempampic. Isadaidbo nibëdnuc isadaidbon chidon Esus tishenquo ictsempañëdash. Èmbi aden chiac isadaidbo chiec icsamboec onquenda.

¹⁹ ¿Èbi adsho tantiashta mibi nadpe? —Ambi con matses caido chieshëmënsho isun cuëte cuidi pateshuniacimboen nëbi isadaidbo dadpen Nuquin Papan bëdamboen isenquo iquec. Èbipadquid matses utsiboen bëdamboen isbenac —¿quecta ique? ²⁰ Abimbo mimbi caic. ¿Atotsieshun Nuquin Papan isadaidbo bëdamboen istiapimbo icpec? Ambi chomiaid Esus tantienquo icsho Nuquin Papan aido bëdamboen istiapimbo iquec. Padnuen Esus tantiasho mibi bëdamboen isec. Adoac: —Èbi bëdambo icnubi isadaidbo icsambo iquec —quenda. —Esus tantienquo icsho isadaidbo cuidacpadomboen ëbitsen Nuquin Papan cuidpanundac —quequin Nuquin Papa Esusbëdta tantiaquiota. ²¹ Ambi con matses caidon Esus tantienquo icsho Nuquin Papan bëdamboen istiapimbo iqueque. Adembidi matses utsibon Esus tantienquo icsho Nuquin Papan mibi bëdamboen istiapimbo iqueque. Esus tantiaquiota.

²² Aden Esus tantiasht nadec onqueta. —Esus tantiasho bëdamboen isquid yec Esus tantienquo icsho isun cuidquid Nuquin Papa nec —cata. Esus tantienquo icsho cuëte cuidi pateshuniacimboen cuidquin isadaidbo bëdamboen isenquo iqueque. —Esus tantienquo yansho adembidi ëbitsen cuidpanundac —qeshun chieshtoengquo icquin Esus tantianuna. ²³ —Padi, aid tantiatiapimbo iquebi —queboedombi isadaidbon Esus tantiabensho abëdi tabadmenuen Nuquin Papan bëdamboen isendac. Ambi cuëte cuidi pateshuneboedi abibidi pobioachimboen padpiden bëdamboen isendac. ²⁴ Min matses abitedi Nuquin Papa tantiesabo icnëdash. Nëbien cuëte icsan cuidi pateshuniad pobiacimboen Esus tantiamequin Nuquin Papan mibi bëdamboen isec. Adoac Esusbëdta Nuquin Papa mimbi bëdiactsec tantiatsec. Con matses isadaidbo tsusedpabo Nuquin Papa tantiaquido dadpenquo

icpampic. Nuquin Papan tantiamiac Esus chote chuiquin ënden dada uapampic. Ambi tantiacpadën ambi cuëte bëda cuidi peteshuniaid abibidi pobioac bimboemi Esus tantiamequin Nuquin Papan con matses isadaidbo bëdamboen isendac. Adoac cuëshëd-uidboedombi Nuquin Papabëdta Esus bëdamboen tantiaquiendac.

Ambi chiacpadën Nuquin Papan isadaidbotsen bëdamboen isoaid

²⁵ Tantia. —“Isadaidbo icsambo iquec,” quequin chuinushe —qeshun mimbi tantiacmaid Nuquin Papan chiaid mibi chuinu. Nuquin Papan pacuënëdac bimboecnuc icmiac con matses dadpen Esus tantiate bunenquio iquec. Daëdpactsëcshun Esus tantiec. Nuquin Papan tantiatedishun matses utsibo dadpeshumba Esus tantiambic ²⁶ paphoshquiabimboen con matses isadaidbo dadpeshun Esus tantierendac. Aden tantiasho Nuquin Papan con matses bëdamboen isendac. Aden ambi isadaidbo bëdamboen iste chuiquin Nuquin Papan naden dada uamepampic.

“Icsambo icquidobi cuidmenquio icnuec Nuquin Papa yacnuësh choquid isadaidbon chidon tishaid iquendac.

Aidëmbi isadaidbo Nuquin Papa tantiaquid padpiden icmendac.

²⁷ ‘Aden ëmbi chiacpadomboen ëmbi chomiaid tantiasho abi icsaid bëpiscudquin isadaidbo bëdamboen isendambi,’ quependac Nuquin Papa,”

quequin ambi chiaid Nuquin Papan dada uamepampic.

²⁸ Nëbi Esus chieshënsho isadaidbo bëdamboen istiapimbo icquin Nuquin Papan matses utsibo mibi Esus tantiamiac. Ambi nëbi bëdamboen istiapimbo yaido isadaidbo ünësquio icnuc Nuquin Papan tantiaquiec. —Ëmbi aton tsusedpabo chiampicpaden aido con matses caimbi —qeshun adoec.

²⁹ Aden ambibi chiampid niactiapimbo icquin con matses isadaidbotedi tantiaquin Nuquin Papan con matses caic. ³⁰ Min matsesën isadaidpembon Nuquin Papa tantienquio yac bimboen nëbi isadaidbon Nuquin Papa tantiamequid Esus tantienquio iquec. Aden Esus tantiatiapimbo icsho isun Nuquin Papan Esus tantiamequin matses utsibo bëdamboen isbenac.

³¹ Con matsesëmbien abided cuidadaid Esus chieshënquin Nuquin Papan chiaid niac-niacpec. Adoboedombi: —Abided cuidadaid Esus matses utsibon tantiacpadomboen tantianu —quequin Esus tantiabensho Nuquin Papan aidotsen bëdamboen isendac. ³² Aden matses abitedishun ambi chiaid niacniacsho isun: —Abitedimbo icsaquiec —quequin matses bëdamboen istiapimbo ichoedëmbi nëbi Esus tantiasho Nuquin Papan bëdamboen isendac isadaidbo yec matses utsibo abitedi yec quenuc.

³³ Aden Nuquin Papan bëdamboen iste chuisho tantiasn nadnuna. Nuquin Papa bëdamboshë iquec. Abipadquid utsi nibëdec. Matsesën naidtedi tantiaquidquio nec. Abitedimbo tantiaquid icquin ambi natiapimbo ictequid nibëdnuc bëdamboen naquidquio nec. ¿Ada adquid icsho Nuquin Papan naidtedi matsesën tantiapadic? Padenquio. Ambi naidtedi matsesën tantienquio iquec. ³⁴ “¿Nuquin Papan otacquo tantiaidtedida matsesën tantiapadic? Padenquio. ¿Mimbi tantienquio iquec. Ëmbi chiacpadomboen nata,” quequinda matsesën Nuquin Papa chuipadic? Padenquio. Ambi tantiacpadomboembi Nuquin Papan naindac.” ³⁵ “¿Ada matsesën Nuquin Papa menepadic? Padenquio. ‘Në. Con na bedquin mitsana ëbi cuidquin mene, Papa’ ¿quequinda Nuquin Papa chuipadic? Padenquio. Matsesën: ‘Con na nec,’ caidtedi Nuquin Papan na nendac.” ³⁶ Abitedimbo uaquidquio yec abitedishun Icbombo Nuquin Papa nec. —Uesadec nibëdanushe —quequin abitedimbo isquidquio nec. Aton na abitedi nec. Adec abitedishun Icbombo icsho: —Nuquin Papa bëdamboshë iquec —canuna ënenquio icquin.

12

Esus con Icbo cain ambi chiacpadomboen naid

1 Con utsibobimboecquido mibi neque. Tantia. Mibi chuinu. Nuqui cuidmenquo icnuec abided cuidadaid Esus tantiasho Nuquin Papan nuqui bēdamboen isequē. Nuquin Papa bēdamboen tantiatiadquio icquin nadonoña. —Ēbi bunaid nainquo yec mibi bēdambo icmenuēc mimbi chiacpadec bēdamboec tabadtiadquio iquebique. Min yuambo ēbi icme, Papa —quequin Nuquin Papa chuinuna. 2 Esus tantiesabon nacpadomboen nainquo icquin Nuquin Papan Mayanēn pausunacpadomboen Esus tantiaquin nuqui icsate bunaid ēnuna. Aden nuqui icsate bunaid ēnquin Nuquin Papa bunacpadec bēdamboec tabadquin nuqui tantiendac. Aden naic nuqui bēdambo iquendac.

3 Tantia. Nuquin Papan tantiamiacpadomboen mibi chuinu. Nadenda. —Ēbiuidtsēqui bēdambo iquebi. Utsibo abitedi icsambo iquec —quenda. Nuquin Papan Mayanēn tantiamiacpadec mibibi datantiadec: —Adquid nebi —quequin abimbo chuita. 4 Nuquin Papan Mayanēn tantiamiacpadomboen naquid Esus tantiaquidēn. Adquid yec ¿ada Esus tantiaquido abitedi chuiquid dapa yampatsiash? Padenquo. ¿Mitsipadquio min dada icpec? ¿Abichobida bedantequid icpec? Padenquo. Mēdanteuidtsēquien bedantequid iquec. ¿Abichobida istequid icpec? Padenquo. Ēshēuidtsēquien istequid iquec. ¿Abichobida shēdtequid icpec? Padenquo. Dēbiatēuidtsēquien shēdtequid iquec. 5 Min dada yacbimboec Esus tantiaquido iquec. Abentse-abentsec chuiquid dapa yanubi abentse-abentsec utsibo nashumbanequid yanec. Esus tantiaquidodeti yec bēdamboec tantiananquin nashunanquido yanec.

6 —Ma utsibo nashunu —queshun Nuquin Papan Mayanēn namiaid nec Esus tantiaquido. ¿Atotsi naquid Nuquin Papan Mayanēn mibi icmiac? Nuquin Papan ambi tantiaidquio oncamiaid iquendac. Adquid icquin Nuquin Papan Mayanēn tantiamiaiduidi chuibanta. 7 Utsibic: —Utsibo nashunquid icta —caid iquendac. Adquid icquin bēdamboen nashumbanta. Utsibic Nuquin Papan: —Ēmbi chiaid bēdamboen tantiashun chuibanta —caid iquendac. Adquid icquin Nuquin Papan chiaid tantiatsēcquido bēdamboen tantiameta.

8 Utsibic: —Chieshtoenquo icquin Esus tantiec bēdamboec tabadnuna —quequin bēdamboec tabadquin ismequid iquendac. Adquid Nuquin Papan icmiaid icquin Esus tantiaquido bēdamboec tabadte tantiameta. Utsibic aton na nibēdquido aton na menequid Nuquin Papan icmiaid iquendac. Adquid icquin cudasenquo icquin menianeta. Utsibic: —Esus tantiaquido chuiquid dapa icta —caid iquendac. Adquid icquin Esusēn namiacpadomboen Esus tantiaquido bēdamboen nameta chieshenquo icquin. Utsibic dada icsaido yec isedanquido yec aton shubu nibēdquido yec aton pete nibēdquido yec macho yec tsusioctēc yec quesho bēdamboen nashunquid iquendac. Adquid icquin Esusēn chiacpadomboen chieshtoenquo icquin nashumbanta.

Esus tantiaquidon nadoquid, quiaid

9 —Mibi tantiac unēsquo iquec —quequin utsibo chuiquin abimbo chuinuna. Muainquo icquin utsibo tantiaquionona. Chieshēmēnenquo yec bēdamboec tabadnuna. Utsibon: —Icsanuna —caqui: —Padi —quiash ic-sainquo yec bēdamboec tabadnuna. 10 —Ēbēdtan Esus tantiaquido con utsibobimboecquido nec —quiash bēdamboec tantianuna. —Nēid con buchibimboecquid bēdambo iquec. Aidēn chuisho bēdamboen tantianuna —canuna nuquibēdtan Esus tantiaquido chuiquin. 11 Nuquin Papan chiacpadomboen naic chieshtoenda. Nuquin Papan Mayanēn tantiamiacpadec Esus tantiec chieshtoenquo yec bēdamboec tabadnuna. 12 —Unēsacsho abi

yacno Nuquin Papan ëbi tabadmendac —quec cuishonquenuna. Esus tantiaquido icsho utsibon chieshënaqu chieshtoenugio icquin Esus tantianuna. ¿Atotsi natiamante utsi icpec? Adquid tantiec shubiquimbi chieshtoenugio icquin Esus tantianuna. Baded-badedquien Nuquin Papa chian-chianuna. ¹³ Nuquibëdëtan Esus tantiaquido aton na nibëdsho isun nuquin nabi menenuna. Isedanquido bëdamboen isnuna. Pemequinc nuquin shubun ushmequinc canuna. ¹⁴ Esus tantiaquido yec nuqui chieshënuquidobëdi chieshënanenquio icnuna. Chieshënanenquio icquin Nuquin Papa naden chuinuna. —Ëbi chieshënuquido bëdamboen tantiameta. Chiesh bëdameta, Papa —quequin Nuquin Papa chuinuna. ¹⁵ Utsi bëdambo yec cuishonqesho isash aidbëdi cuishonquenuna. Utsi unësquio icnuc shubisho isash aidbëdi shubinuna. ¹⁶ Cuesnanenquio yec chieshëmënenquio yec bëdamboec tabadnuna. —Con nauidtsëqui naimbi —quenquio icquin utsibobëdëtan bëdamboen nanuna. —Ëbiuidtsëqui bëdambo iquebi. Ëmbi tantiacpadomboenuidi naimbi. Utsibon chiaid natiapimbo iquebi —quenquio yec bëdamboec tabadnuna. —Chuiquid dapabëduidtsëqui onquequid nebi —quenquio yec matses abitedibëd onquec bëdamboec tabadnuna.

¹⁷ Chieshënaqu cuidnanenda. —Ma utsibo: “Bëdamboec tabadquido nec,” quenu —quiash bëdamboecuidi tabadnuna. ¹⁸ Uimanëmënuquido icshasho isun aid chuiquin: —Bëdamboequien tabadtiad —canuna. Adquidobëd chieshënanenda. ¹⁹ Ëmbi tantiaido mibi neque. Tanta. Chuinu. Nuqui chieshënuquidobëdi cuidnanenquio icnuna Nuquin Papan naden chiaid tantias. “Matses cuidnanac icsambo iquec. Ëbentsëcquiobini icsaido cuidquid nec,” quequin Nuquin Papan chiaid dada uapampic. ²⁰ Nuqui chieshënuquidobëdi cuidnanenquio icquin bëdamboen isnuna. “Pete bunsho pemequinc acte bunsho acmequinc canuna. Nuqui chieshënuquido: ‘Bëdambo icquidi chieshë nec icsachitobi,’ quiash ma nëish bëdanu,” quiash ²¹ adec cuidnanenquio icquin nuqui chieshënuquido bëdamboen isnuna.

13

Chuiquid dapan chiacpadomboen Esus tantiaquidën naquid

¹ Aton matses chuiquid dapan chiacpadomboen Esus tantiaquidën naquid. Adembidi aton nidaid pais caidën tabadquidotedi chuiquid dapabon chiacpadomboen naquid. —Nuquin Papan adquid chuiquid dapa icmiabi yac nibëdtsiash. Nuquin Papan chuiquid dapa icmiaidien aido nec —qeshun aidon chiacpadomboen naquid Esus tantiaquidën.

² Nuquin Papan chuiquid dapa icmiaidën chiaid niacquid Nuquin Papan chiaidbidi niacquid nec. Aden ambi chiaid niacasho chuiquidon cuidquid.

³ Bëdamboec tabadquidon chuiquid dapan cuidte dacuëdëntiapimbo iquec. Adquido cuidenquio icquin ambi chiaid niacquid chuiquid dapan cuidquid. Chuiquid dapa cuidmetiapimbo yec bëdamboec tabadta. Adsho isun: —Mibi bëdamboec tabadec —catsiash chuiquid dapabon. ⁴ —Ma matses bëdamboec tabadnu —quequin Nuquin Papan chuiquid dapa icmiaidën mibi bëdamboen tabadmetiadquio iquec. Nuquin Papan icmiaci icsambo icquido cuidquid nec. Adquid icnuc: —Icsasho chuiquid dapan ëbi cuidpanundac —quiash icsaquid dacuëdendac. ⁵ Ëbi adsho tantiasun chuiquid dapabon chiacpadomboen nanuna. —Cuidnushe —qeshun adonona. —Pabiate cuembo icquin Nuquin Papan chiacpadomboen natiadquio iquebi —qeshun adonona.

⁶ Bëdamboen tabadmenuen Nuquin Papan chuiquid dapa icmiaidon: —Ëmbi chiacpadomboen nata —cac naquid Esus tantiaquidën. ⁷ Aden chuiquid

dapan chiacpadomboen nanuna. Aid bēdamboen isnuna. Aidēn: —Nata —cac nanuna chieshenquo icquin.

Utsibo tantiaquionona, quiaid

⁸ —Ĕmbi nashumbocpadomboen ěbi cuidquin nashunenquo iquec —camenda. Abi nashunquidobēd cuidnanquid Esus tantiaquid. Esus tantiacquidbidi bēdamboec tantiananquid. Adec bēdamboec tantiananquin Nuquin Papan Moises chiampicpadomboen nuqui bēdamboen natsiac. ⁹ “Ambi naiduidtsēqui nainquo yec abibi datantiadacimboc ma matses bēdamboec isnanu,” quequin Nuquin Papan Moises naden dada uamepampic. “Min chidopenquo chudenda. Adem bidi min bēnēpenquo chudmenda chidon. Cuesunenda. Ampenda. Utsin na isash: ‘Adquid con na nibēdosh,’ quec chieshēmēnec tabadenda,” quequin Nuquin Papan na tsusedpa Moises dada uamepampic. Aidēn chiacpadomboen natiadquo icquin nuquibi datantiadacimboc utsibotsen tantiaquionona. ¹⁰ Utsibo bēdamboen isquin aido icsa uatiapimbo nuqui ictsiac. Aden utsibo bēdamboen tantiasho Nuquin Papan: —Aden naic ěmbi Moises chiacpadec bēdamboec tabadec —caindac.

¹¹ —Nēbien abi tantiaquido abi yacno buanuec Esus chochitec —quequin Nuquin Papan chiacpadomboen nanuna. Ushacimboc nainquo icboedi nēbi ushash isucunacimboc dayacquio yec chieshtoenquo icquin Nuquin Papan chiacpadomboen nanuna. Esus tantiabenash: —Yuecashien Esus choec —quiondaidi: ¹² —Nēbien Esus chochitec —quedonetsēcquiec bēdamboec tabadnuna. —Satanasēn yuanushe —qeshun Esus tantiaquin nuqui icsaid ēnshun bēdamboen nanuna. ¹³ Icsainquo yec: —Bēdambo iquebique. Ma isnu —quiash bēdamboec tabadnuna. Tantiadenuen actequid paēmo icquid aquenquo icquinc utsin chido chudenquo icquinc utsin bēnē chudmenquo icquin chido utsi mēismenquo icquinc canuna. Adec bidi utsin na isash: —Con na adquid nibēdec —quiash chieshēmēnec tabadenquo icnuna. Adem bidi utsin mibi bunaid nasho isash: —Aden ěbi namenquo icpec —quec chieshēmēnenquo icnuna. Icsainquo yec bēdamboec tabadnuna. ¹⁴ —Icsate bunchitebi. ¿Mitsipaden naiquini icsape? —quenquo yec Esus tantiaquiec abi tabadacpadquiec bēdamboec tabadnuna. Nuqui icsate bunaid ēnquionona.

14

Esus tantiaquido utsibo bēdamboen isaid

¹ Nuquibēdtan Esus tantiatsēcquidon nuqui nacpadomboen nainquo icsho bēdamboen isnuna. Ambi chiaidquo chuiquin Esus tantiaquidon natetedi Nuquin Papan uesquin chiabi iquec. —Naden nac bēdambo iquec. Naden nac icsambo iquec —quequin uesquin chiabi iquec. Aden Nuquin Papan chiacmaid chiec nuquibēdtan Esus tantiatsēcquido: —Ĕmbi natemaid nec —qeshobi: —Icsamboen chiec —cainquo icnuna. ² Esus tantiaquidquo: —Pete abitedi pambidbēda pesho Nuquin Papan nēishēnenquo iquec —quenubien Esus tantiatsēcquid: —Padi. Pambid pesho isun Nuquin Papan nēishēnushe. Esus tantiaquidēn nitsinaid pequid. Pambid isuidquid —quepec. ³ Pambid pequidobēdtan pambid isuidquidombi Esus tantiasho Nuquin Papan aid daēdi bēdamboen isec. Padnuen pambidbēda pete utsi abitedi pequidēn pambid isuidquid mamēnshunac icsambo ictsiash. Adem bidi pambid isuidquidēn: —Pambid pequid icsambo iquec —cac icsambo ictsiash. ⁴ ¿Icbonpenquoda: —Yua icsambo iquec —capadic? Icbombien adoquid. Adem bidi: —Mibi bēdambo iquec —caquid icbon. Nuquibēdtan Esus tantiaquid Nuquin Icbon yua icsho: —Ĕmbi nacpadomboen nainquo yec mibi icsambo iquec —cainquo icnuna. —Nēid icsambo iquec. Nēid bēdambo

iquec —quequin Nuquin Icho Esusën ambentsëqui abi tantiaquido chiendac. Aidën namiacpadomboen abi tantiaquidon bédamboen naindac.

⁵ Esus tantiaquido utsi-utsiec: —Aid badiadquidënuidtsëqui Esus tantiec cuëdënac bédambo ictsiash —quenubien utsibo: —Badiadquidën badiadquidënuieqieq Nuquin Papa Esusbëdta tantiec cuëdënebi —quecuededpec. Adquid daëd icsho Nuquin Papan nëishënenquo iquec. Esus tantiaquid ambi tantiacpadënquiobi cuëdënac bédambo ictsiash. ⁶ Aden Esus tantiaquin nac bédambo ictsiash. Adembidi Esus tantiaquin: —Mimbi pete uaid bédambo iqueque. Aid penu, Papa —quequin pambid pequido iquendac. Utsibombic adembidi Nuquin Icho tantiaquin: —Mimbi pete uaid bédambo iqueque. Aid penu —qeshun utsi pequimbi pambid ísuidquid iquendac.

⁷ ¿Esus tantiaquid ambi naid-uidi naquidta nedic? Padenquo. ¿Ambi tantiacpadën unësquidta nedic? Padenquo. ⁸ Nuquin Icho Esusën chiacpadomboen natiadquo yec nuqui tabadec. Ambi tantiacpadën nuqui unësendac. Unësabi yec tabadec Esusën yuambo ichoedi unësash adecbidi aton yuambo nuqui iquendac. ⁹ Adec Nuquin Icho icnuec abided cuidadec unësash Esus uincuempanëdash. Unësabi yec nuqui tabadnuc Nuquin Icbombo ichoedi nuqui unësan adecbidi Nuquin Icbombo iquendac.

¹⁰ —Adquid Nuquin Icho iquec —qesho ¿tantiashunda nuquibëdtan Esus tantiaquid mamënshuntiad? Padenquo. ¿Nuquin Papan chiacmaid chiec: —Ëmbi nacpadomboenuidi nainquo yec icsambo iquec —quequina chushcatiad? Padenquo. Nuquin Icho Esusbëdtan Nuquin Papanuidtsëqui matsesën naidtedi chiendac. —Nëid bédambo iquec. Utsi icsambo iquec —quequin chiendac matses abitedishun tantianubi. ¹¹ Adote chuiquin Nuquin Papan ambi chiaid naden dada uamepampic. “Tantia. Abimbo caimbique.

Naden matses abitedishun ëbi chiendac.

‘Abitedishun Icbombo mibi nec.

Bédamboshë icquidquo mibi nec.

Abitedishun naid tantiaquid icquin mimbiuidtsëqui: Nëid icsambo iquec.

Nëidien bédambo iquec, quequin abimbo chiendac,’ quequin matses abitedishun ëbi chiendac,”

quequin Nuquin Papan dada uamepampic. ¹² Aden ambi cuidte ushën Nuquin Papan: —¿Enda? ¿Mitsipadec tabado? —cabanac nuquitedishun nuqui naidtedi chui banendac.

Utsibo icsamenquo icnuna, quiaid

¹³ Ëbi adsho tantiashun Nuquin Papan: —Adoenda —quequin chiacmaid nuqui tantiaid chienquo icnuna. —Ëmbimbo natemaid naic aido icsambo iquec —nuquibëdtan Esus tantiaquido cainquo icnuna. Adenquo icquin nadonona. —Ëmbi ambi natemaid nasho isash chieshtoshon Esus tantienquo yanushe. Ambi natemaid naquin ismenquo iquemi —qeshun Esus tantiaquidtedi bédamboen isnuna. ¹⁴ Nuquin Icho Esuquidistu tantiaquidquo icquin ëmbien naden tantiec. —Nëbi Nuquin Papan: “Petemaid nec,” caid nibëdec —quequin tantiemi. Ëbi adnubi utsibo: —Petemaidquo nec. Aid pec icsamane. Aid petiapimbo iquebi —qeshumbi adquid pec: —Icsachitobi —quetsiash. ¹⁵ Adsho tantiashun aido bédamboen tantiaquin ambi petemaid nuqui pemenquo ictsiac. Ambi petemaid pemequin mimbi aido tantienquo iquec. —Ëmbi petemaid piash icsachitobi —quequin Esus tantienquo yanushe. Ambi petemaid pemenda. —Nëid petemaid nec —quequido aidotsen tantiaquin cuidmenquo icnuec abided cuidadec Esus

unësaque. Aido tantiata. ¹⁶ —Nuquin Papan chiaid niaquenquo icquin Esus tantiaquido utsibon: “Aden naic icsatsiash,” caid naimbi. Ĕmbi tantiacpadomboen naimbi —qeshun mimbi tantiacpadomboen naquin utsibo icsamboen chuimenda. —Is. Esus tantiaquid icsambo iqueque. Ĕmbi natemaïd naique —camenda. ¹⁷ ¿—Nadquid petemaïd nec. Nadquid actemaïd nec —quequin petebëdta acteuidi tantiata Nuquin Papan chiapadec Esus tantiaquido bëdamboec tabadpatsiash? Padenquo. Aton Mayan nuquibëdi tabadmiac chieshëmënenquo yec cuishonquec Esus tantiaquido bëdamboec tabadendac. ¹⁸ Adec Esuquidistun chiapadec tabadsho isun Nuquin Papan: —Bëdambo iquec —caindac. Matsesëntsen: —Aido bëdambo iquec —caindac.

¹⁹ Ĕmbi chiapadec chieshëmënenquo yec bëdamboec isnanuna. —Esus tantie chieshtoenquo yec bëdamboec tabadnuna —quec chuinanuna. ²⁰ —Nuquin Papan bëdamboen isaidon Nuquin Papa Ĕsubëdta tantienquo yanushe —qeshun utsibon petemaïd pequin aido chieshtomenda. Nuquin Papan: —Matsesën petemaïd nec —caïd nëbi nibëdnubi Esus tantiatsëcquidën petemaïd pequin aid chieshtomec mibi icsatsiac. ²¹ —Ĕbëdta Esus tantiaquido icsamemane —qeshun ambi petemaïd pambid penquo icquinc ambi actemaïd acte paëmbo icquid aquenquo icquinc ambi natemaïd utsi nainquo icquinc cac bëdambo ictsias. ²² Nuquin Papan: —Matsesën natemaïd nec —cacmaïd tantiaquin: —Ĕmbimbo petequid nec. Ĕmbimbo actequid nec. Ĕmbimbo natequid nec. Aden nasho Nuquin Papan ëbi cuidenquo iquec —quequin mimbi tantiaïd caic: —Natemaïd nec —quequido naden chienda. —Ĕmbi nacpadomboen nainquo yec mibi icsambo iquec —cainda. Adembiïd aïdon: —Ĕmbi natemaïd nec —caboed naquin ismenda. Chieshtonoshe. ²³ Adquid ambi: —Aïd pesho Nuquin Papan nëshënhitëmbini ictsias —caboed piash —Icsachitobi —quetsias. Adsho Nuquin Papantsen: —Aï, adec icsaic —catsias. —Aden naic icsachitequini ictsiac —nuqui caïdtedi naic nuqui icsatsiac.

15

Nuqui bunaiduidi nainquo icnuna, quiaïd

¹ Esus tantiaquidënquo Esus tantiatsëcquid chieshënenquo icquid. —Natemaïd nec —quequin Nuquin Papan chiabi icnubi Esus tantiatsëcquid: —Esus tantiaquin ëmbimbo natemaïd nec —qesho tantiashun ambi natemaïd naquin ismequin chieshtomenda. Aïd tantiaquin ambi natemaïd nainquo icquin nuqui bunaiduidi nainquo icnuna. ² —Esus tantiatsëcboedëmbi ma Esus bëdamboen tantiabenquiono —quequin nuquibëdta Esus tantiatsëcquidën natemaïd nainquo icnuna. —Aden naic mibi bëdambo iquec —camenuen ambi natemaïd nainquo icnuna. ³ Esuquidistun ambi naïduïd nainquo icquin Nuquin Papan chiapadomboenuïd naic abi chieshënquido yacnobi chopanëdash. Esus tishabi icnuc Esusën chuite chuiquin Nuquin Papan con tsusedpa naden dada uamepampic. “Mibi chieshënacpadomboen chieshënquin ëbi icsamboen chuishunec, Papa,” quequin Esusën abi chuite Nuquin Papan dada uamepampic. ⁴ Aden con matses isadaïdbobëdta matses utsibo abitedi bëdamboen tantiamenuen Nuquin Papan ambi chiaïd dada uamedenepampic. —Nëïd isban-isbanquin ëbëdta Esus ënenquo icquin tantie ma matsë bëdamboec tabadnu. Adec bëdamboec tabadec: “Unësash Esusbëdi Nuquin Papa yacno tabadendabi,” ma matses quenu —qeshun ambi chiaïd dada uamepampic. ⁵ Aden matses chieshtoenquo icnuc bëdamboen tabadmequid Nuquin Papa mibi chianembi. —Chieshtoenquo icquin Esus

tantiaquid icmequin dayacquo yacimboecnuc matses bédamboen tabadmequid mibi nec, Papa. Adquid icquin Doma yacnocquidon Esus tantiasho bédamboec isanquid icmeta, Papa. ⁶ Mimi adoa: “Nuquin Papa chuina,” cac aidon abitedishun: “Ai, adonona,” qeshun mibi naden chuitsiash, Papa. “Con Icho Esuquidistun Papa mibi nec. Mibi bédamboshê iquec,” quequin mibi chuitsiash, Papa —quequin Nuquin Papa mibi chianembi.

Nuquin Papan matses utsibo Esus tantiamiaid

⁷ Tantia. Padpiden mibi chuinu. —Nuquin Papa bédambo iquec —nuqui camenuen Esuquidistun nuqui bédamboen isegue. Bédamboec isanuna. Isadaidbo yec isadaidpembo yec quec bédamboec isanuna. ⁸ Esuquidistu matses abitedi bédambo icmenuec matseshêd tabadpanêdash. Esus chote chuiquin Nuquin Papan dada uamepampicadec isadaidbobêdi tabadquin Esusên aido nashumpanêdash. —Nuquin Papan abimbo chuipampic —quequin tantiamenuen adopanêdash. ⁹ —“Icsaboedombi Esus tantiasho Nuquin Papan bédamboen isquin cuidenquo iquec. Nuquin Papa bédambo iquec,” ma isadaidpembo matses utsibo quenu —quecbidi Esus matsespanêdash. Aidên abi chuite chuiquin Nuquin Papan naden dada uamepampic.

“Isadaidpembo matses utsibobêdtan mibi naden chiendambi.

‘Nuquin Papa bédambo iquec,’ caindami mibi.

Adecbidi mibi bédamboen tantiec cuêdênendabi,”

quequin Esusên abi chuite Nuquin Papan dada uamepampic. ¹⁰ Nadembidi isadaidpembon matses utsibon abi tantiabente chuiquin Nuquin Papan con tsusedpa dada uamepampic.

“Matses utsibo isadaidpembo mibi chuinu.

Nuquin Papan con matses caidobêdi cuishonqueta.

‘Nuquin Papa bédambo iquec,’ quec cuishonqueta,”

quequin Nuquin Papan chiaid dada uapampic. ¹¹ Nuquin Papan chiaidbidi con tsusedpan padpiden naden dada uapampic.

“Isadaidpembo matses utsi abitedi mibi chuinu.

‘Nuquin Papa bédambo iquec,’ cata.

‘Nuquin Papa bédambo iquec,’ quec cuêdênucuededec tabadta,”

quequin dada uapampic. ¹² Adembidi isadaidpembon matses utsibon Nuquin Papabêdta Esus tantiabente chuiquin Nuquin Papan con tsusedpa Isayas naden dada uamepampic.

“Dabidên papa Isai caid ênden unêsampidên tsyuecquid yuecash iquendac.

Nidaid utsi-utsiec yacno tabadquidotedi chuiquid dapa icquin bédamboen namendac.

Aid caic: ‘Nêidên nuqui cuidmenquo iquendac,’ quependac isadaidpembo matses utsibo,”

quequin dada uapampic.

¹³ Aden chiampid mibi nec. Nuquin Papa Esusbêdta tantiaquido icsho mibi Nuquin Papa chianembi. —Mibêdi matses tabadmequidquo mibi neque. Mibi tantiamequin Doma yacnocquido cuishoncameta, Papa. Adembidi dacuêdenquo icnuc bédambo icmeta. Aden min Mayan aidobêdi tabadmequin: “Esus yacno Nuquin Papan nuqui tabadmendac,” cameta, Papa —quequin Nuquin Papa chianembi.

Matses utsibo Esus chuibanquid nebi, quiaid

¹⁴ Con utsibo mibi caimbique. Tantia. Mibi chuinu. —Nuquin Papan Mayanên tantiamiacpadec bédamboec isanec bédamboec tabadtiadquo icquidien nec. Aidên tantiamiacpadomboen Nuquin Papan chiaid bédamboen

tantiec: “Nuquin Papan chiacpadec bēdamboec tabadnuna,” quec chuinanquidien nec —quequin mibi tantiombi. ¹⁵ Aden tantiash: —Nēishēnushe —quenquo icquin: —Bēdamboec tabadta —quequin chuiquin nēid dada uaimbi. Nuquin Papan: —Esus chuibeneta —caid icquin mimbi ėnden tantiadbidi Esusēn naidquico bēdamboen mibi tantiamenuen dada uaimbi. ¹⁶ Nuquin Papan icmiacpadquid Esusēn naid chuibenequidquo nebi. Adquid icquin isadaidpembo matses utsibo Esus tantiaquido Nuquin Papan bēdamboen iste chuibeniombi. Adoac matses utsibon Esus tantiabensho isun aton Mayanēn bēdamboen tabadmesho: —Bēdambo iquec —caindac Nuquin Papan.

¹⁷ Aden: —Esuquidistu bēdamboshē iquec —quequin matses utsibo dadpen Esusēn naid chuibeniombi. ¹⁸⁻¹⁹ Esuquidistun ėbi namiaiduidtsēqui mibi chiec nendabi. Aidēmbi namiac matses utsibo Esusbētan Nuquin Papan naid chuibenequimbi Nuquin Papan Mayanēn tantiamiacpadomboen comapenen tantiaquin nacenquin ismebeniombi. Adosho isun Esus tantiabenshun dadpenshun Nuquin Papan chiacpadomboen natiadquo yanosh. Shubu dadpen icquid Edusaden yacnuēsh ėnapen nidash nidaid utsi Ididico caid yacno nidshun chuibeniombi. Ambo nidtanec choaobi Edusaden yacnobidi. ²⁰ Esusēn naid chiacmanouidquo Esusēn naid chuibenatiadquo iquebi. Utsibon Esusēn naid chuibanacno nidiapiombo iquebi. Esusēn naid chuisho tantiacmaido Esus chuite bunquiebi. ²¹ Aden nate chuiquin Nuquin Papan con tsusedpa naden dada uamepampic.

“Nuquin Papan chomiaidēn naid chuisho tantiacmaidon tantiabenenadac. Adshun paposhquiacbimboen bēdamboen tantiendac,” quequin dada uamepampic. ²² —Aden Esusēn naid chiamo yacnoba chuibeneta —quequin Nuquin Papan chiacpadec mibi yacno nidabi iccobi. —Doma yacnocquidon Esusēn naid tantiash —quiash mibi yacno nidabi iccobi. Nēbi mibi yacno nidiadquo iquebi.

Mibi yacno nidiadquo iquebi, quiaid

²³ —Nēbi Ididico yacno Esusēn naid uesquin chuibeniac —quiash mibi yacnotsen nidiadquo iquebi. Ēdenquimbo taēec mibi yacno nidte bunondaiddi seta dadpen matamiashic adi nēbi mibi iste bunquiebi. ²⁴ Nidaiddi utsi Espania caid yacno nidquimbi mibi isbidanendambi. Doma yacno nidash mibēdi cuishonquendabi. Ambo yuec-yuecpamboec tabadash: —Nidnu —quesho: —Ai, nidec nid. Mibi podqued ismequid mibēdi nidendac —ėbi caindac mimbi. Aden tantiec mibi yacno isbidantiadquo iquebi. ²⁵ Nēbini Edusaden yacnoba nidendac. Anocquido Esus tantiaquido utsibon meniaid menenuc nidendabi. ²⁶ —Edusaden yacnocquido Esus tantiaquido utsi-utsiec aton piucquid nibēdeque. Nuquin nabi ma buanshunu. Menenuna —queshun Esus tantiaquido icquin Acaya yacnocquidobēdtambi Masedonia yacnocquidon: —Con na buanshun meneta —caphoshi. ²⁷ Aden ambi tantiacpaden nasho: —Bēdambo iquec —caombi. Edusaden yacnoshon Esusēn chiac isadaidbomba Esus tantiapanēdash. Adshumbic aidon chuibeniac matses utsibontsen Esus tantiapanēdash. Aden abi nashunquin chuiquido Edusaden yacnocquido caic: —“Piucquid nibēdec,” quiac caoshe. Menenuna —quesho: —Bēdambo iquec —caombi. ²⁸ Aden piucquid bedshun: —Edusaden yacno buanec nid. Anoshon meneta —quequin meniac aid buanec nidendabi. Buanshun Edusaden yacnoshon Esus tantiaquido aton na nibēdquido menebanash nidaiddi utsi Espania yacno nidquin mibi isbidanendambi. ²⁹ Mibēdi tabadquin ėmbi Esus tantiamequin chuisho Esusēn nuqui bēdambo icmendac.

³⁰ Ĕmbi tantiaidombo mibi neque. Tantia. Chuinu. Nuquin Icbo Esuquidistun aton Mayambēdtan tantiamiacpadec nuqui bēdamboec tantiananec. Ĕbi tantiaquin Nuquin Papa chianeta. —Ĕnenquo icquin Esus tantiamequin mimbi chiacpadomboen Pabado name, Papa. ³¹ Udeya yacno nidsho Esus chieshēnquidon Pabado cuesnushe. Bedmenda, Papa. Piucquid buanacsho Edusaden yacnocquido Esus tantiaquido bēdamboen bedmeta, Papa. “Mates utsibon isadaidpembon meniaid bedtemaid nec,” quequin bedenquo icnushe. Bēdamboen bedmeta, Papa —quequin Nuquin Papa chianeta. ³² Aden Nuquin Papan tantiamiacpadomboen naquin anoba istanec mibi yacnotsen nidendabi. Mibi istuidash cuishonquendabi. Nuqui bēdamboec tabadendac Esus tantiamenane. ³³ Aden mibi tantiaquin: —Nuqi dacuēdenquo icnuc bēdambo icmequid Nuquin Papa mibēd icpashun —caimbi.

16

Mibi unēsquo iquec, quequin chiaid

¹ Nuquibēdtan Esus tantiaquid nuquin chuchubimboecquid Pebe caid neque. Mibi yacno mimbi isacmaid aid nidsho bēdamboen ista. Shubu dadpen icquid Senquedeya caid yacnoshon utsibo bēdamboen nashunquidquo nioshe. ² Pebe bēdamboen ista. Utsibobēdta ēbitsen bēdamboen nashunoshe. —Nuquibēdtan Esus tantiaquid nec —queshun bēdamboen isquin aidēn: —Ĕbi nashunta —cacpadomboen aid nashunta.

³ Aquida caidbēdta aton chido Pidisida caid chuiquin: —Mibi caic: “Unēsquo iquec,” quiosh Pabado —cata. Aidon ēbēdtan Esusēn naid chuibeniondashe. ⁴ Aden Esusēn naid chuibenesho: —Cueschitomane. Aden chienda —Esus chieshēnquidon caqui aidon adembidi ēbēdtan Esusēn naid chuibeniondash. Adsho isun: —Mimbi bēdamboen naoc —caondambi. Adembidi aidon chiondaidon isadaidpembon chiondash. ⁵ Aquidan shubuno Esus tantiec cuēdēnec cho-choquidotsen chuita. —Mibi caic: “Unēsquo iquec,” quiosh Pabado —cata. Utsibic nidaid utsi Asia caid yacnoshon ambia Esus tantiabendonaid Ĕmbi tantiaidquo Epeneto caidtsen adembidi chuita. ⁶ Nēidtedi chuiquin: —“Mibi unēsquo iquec,” quiosh Pabado —cabanta. Nēidic Madia caid mibi nashunquidquo. ⁷ Nēidic con mates isadaidbo Andedonico caid. Nēidic con mates Unias caid. Aidon ēbēdtambi Esusēn naid chuibenesho chieshēmēnquidon bedshun quēnēn nauedondash. Aidombien ambia Esus tantiabempac caondash Ĕmbi padabi icnubi. Adsho aidoba Esusēn: —Ĕbi chuibeneta —cac chieshtoenquo icquin Esus chuibenequido nec.

⁸ Nēidteditsen chuiquin: —“Mibi unēsquo iquec,” quiosh —cata. Nēidic Esus tantiaquid utsi Ampidias caid Ĕmbi tantiaidquo. ⁹ Nēidic Esusēn naid chuiquid utsi Udbano caid. Nēidic Ĕmbi tantiaidquo utsi Estaquis caid. ¹⁰ Nēidic Apedes caidtsen. Utsibon chieshēnaqui chieshtoenquo icquin Esus tantiaquidquo nec. Nēidic Adistobudo caidēn shubun icquidotedi. Aidtedi: —Mibi caic: “Unēsquo iquec,” quiosh Pabado —cabanta. ¹¹ Nēidotsen adembidi chuita. Nēidic con mates utsi Edodion caid. Nēidic Nadsiso caidēn shubun icquido Esus tantiaquidtedi. ¹² Nēidic chido Tidipena chedo Tidiposa caidbēdi. Aido Esus tantiec dayacquo icquin ambi chiacpadomboen nabanquido nec. Nēidic chido utsi Pedsida caid con chu ichobimboecquidquo. Aidtsen Esus tantiec dayacquo icquin ambi chiacpadomboen naquidquo nec. ¹³ Nēidic Dupo caid Nuquin Papan Esus tantiamiaidquo. Nēidic aton tita con tabimboecquidquo. ¹⁴ Nēidic Asinquidito caid. Nēidic Pedeconte caid. Nēidic Edmes caid. Nēidic Patēdobas caid. Nēidic Edmas caid. Nēidic abēd

icquido Esus tantiaquido. ¹⁵ Nēdic Pidodoco caid aton chido Udiabēdi. Nēdic Nedeyo caid aton chuchubēdi. Nēdic Odimpas caid. Nēdic abēd icquido Esus tantiaquido. Aidedi chuiquin: —Mibi caic: “Unēsquo iquec,” quiosh Pabado —cabanta.

¹⁶ Esus tantiaquido yec bēdamboec isnanta. —Mibi tantiembi —cananta. Nēmbo icquido Esus tantiaquidtedi mibi caic: —Unēsquo iquec —quiosh.

¹⁷ Ēmbi tantiaido mibi neque. Tantia. Mibi chuinu. ¿Ada mibēdtan Esus tantiaquido chieshēmequin cuēshēdmequido icpec? ¿Ada Nuquin Papan chiaid mimbi tantiaid chienquo yec mibi icsamenuec muaquido icpec? Adquidobēd onquec tabadenda. ¹⁸ Nuquin Icho Esuquidistun chiacpadomboen nainquo icquin ambi petequid-uidtsēqui aidon chieque. Aidon: —Mibi bēdambo iqueque. Ēmbi chiaid tantiata —quequin ambi chiacpadomboen namequin Esus tantiatsēcquid icsamec. ¹⁹ —Doma yacnocquido abi tantiec Esusēn chiacpadec bēdamboec tabadosh —quequin mimbi naid chuibenesho dadpeshun tantiac caosh. Adsho tantiash bēdambo iquebi. Adecbidi Nuquin Papan chiaid tantiec bēdamboec ma mibi tabadpanuna. Utsin: —Icsaic chó —caqui: —Padi. Nuquin Papan chiaid niacmane —quiash aidbēdi icsainquo icta. ²⁰ Nuqui bēdamboen tabadmequid Nuquin Papa nec. Aidēmbi matsē icsamequidquo Satanas chedo comapen cuidendac. Nēbi Satanasēn mibi icsametiadquo icsho tantiashun: —Satanas yuamenquo icnuen Nuquin Icho Esusēn abibi tantiamequiopashun —mibi caimbi.

²¹ Nēmbo icquidtedishun mibi tantiec. Mibi caic: —Unēsquo iquec —quiosh Timoteyo ēbēdtan Esusēn naid chuibeneguidquo. Adembidi con matsēsēn chiosh. Dusio caid yec Ason caid yec Sosipated caid yec quec adosh.

²² Pabadon —Naden na —cac nēid dada uaquidquo Tesio caid nebi. Esus tantiaquid icquin ēmbitsen mibi tantiembi. Padi. Aidedtsēqui ēmbimbo tantiaquin chuishun Pabadon chiaidbidi dada uaoaimbi.

²³ Nēidteditsen mibi caic: —Unēsquo iquec —quiosh. Nēdic Cayo caid. Aidēn shubun ushobi. Adnuc Esus tantiaquido iccuedednuec aton shubun pudued-puduedosh. Nēdic Edasto caid. Aid nēmbocquidon bedtequid bedbeneshun dayun uaquid nec. Nēdic nuquin utsibimboecquid Cuadto caid. Aidededishun mibi aden tantiosh. ²⁴ Doma yacnocquido mibi tantiaquin: —Nuquin Icho Esuquidistun bēdamboen isquin mibi bēdamboen tabadmepashun —caimbi.

²⁵ —Nuquin Papa bēdambo iquec —canuna. Esuquidistu chuibanquin ēmbi: —Aid tantiasho Nuquin Papan mibi bēdambo icmendac —quequin chiacpadomboen Esus tantiamequin Nuquin Papan mibi bēdamboen tabadmetiadquo iquec. Ēndenquimboshē Esus tishabi icnuc matsēsēn Esus chote bēdamboen tantiambo icpampic. ²⁶ Adnubien Nuquin Papan unēsambo icquin con tsusedpabo utsi-utsien Esus chote chuiquin dada uamepampic. Nēbi: —Esusēn naid chuisho tantiaquin ma nidaid utsi-utsiec yacno tabadquidon Esusēn chiacpadomboen nanu —queshun Nuquin Papan Esusēn naid chuibeneguido icmiac. ²⁷ Aden namec Nuquin Papa bēdambo iquec. Abipadquid utsi nibēdec. Ambi natiapimbo ictequid nibēdec. Abite-dimbo tantiaquid nec. Nuqui cuidmenquo icnuec abided cuidadaid Esuquidistu tantiasho Nuquin Papan nuqui bēdamboen isequē. —Nuquin Papa bēdambo iquec —canuna ēnenquo icquin. Padi. Aidedi chuiquin dada uaoimbi.

CODINTO YACNOCQUIDON ISTE 1

Pabadon Codinto yacnocquidon iste dada uaid

¹ Pabado nebi. Nuquin Papa bunacpadomboen Esuquidistun ëbi chuibeneguid icta cac nebi.

Esuquidistu tantiaquidbidi, Sostenes, nuqui con utsi caid ëbëd iquec.

² Aidbëd icquimbi Esuquidistu tantiec iccuededquido mibitedi chuiquin dada uaimbi. Matses icsaquid icsho cuidnushe quiash abided cuidadec Esuquidistu unëspanëdash quequin abimbo tantiaquid yec Nuquin Papan cuëmbanaido mibitedi nec quequin mibitedi chuiquin dada uaimbi. Nuquin Papan bëdambo icmenu caïdo mibitedi nec quequin dada uaimbi. Abi tantiaquid utsibobëd abi tantiaquid nuquitedi nec.

³ Matses icsaquid icsho cuidnushe quiash abided cuidadec Esuquidistu unëspanëdash, quequin abimbo tantiasho isun Nuquin Papan bëdamboen isaidquo nuqui nec. Adquido yec utsibobëd bëdamboec ma tabadpanuna.

Mibi tantiaquin Nuquin Papa chuided-chuidedaïd

⁴ Mibi tantiaquin Nuquin Papa naden chuided-chuidedembi. Matses icsaquid icsho cuidnushe quiash abided cuidadec Esuquidistu unësaid chuibanac abi tantiaquido Codinto yacnocquido yanacsho bëdambocquidbimboecnuc mimbi isec, quec bëdambo iquebi, Papa, quequin chuided-chuidedembi. ⁵ Aden Nuquin Papan bëdamboen isaido icquin ambi bëdamboen tantiamiaïdobidi mibitedi nec. Matses icsaquid icsho cuidnushe quiash abided cuidadec Esuquidistu unësaid mibi Nuquin Papan tantiamiac nëbi mibitedi bëdamboec tabadquin Esuquidistu chuibanoadic.

⁶ Esuquidistu tantiesabo iccondaidi ëmbi Esuquidistun naid chuibanac tantiaquid mibitedi yanondac. Adquido yanash bëdamboec tabadquin ismequido mibitedi nec. ⁷ Adquido yec Esuquidistu choate caimbudec Nuquin Papan abi bëdamboec tabadaïd tantiamiaïbi iccoshï quetiapimbo mibitedi iquec. ⁸ Aden abi bëdamboec tabadaïd tantiamiequin Nuquin Papan mibitedi chieshenquo icmec ma Esuquidistupadquid icnu quequin mimbi caimbudacpadquo icpanuna aid padpidec choanuc. ⁹ Adquid mibitedi icmequin ambi Esuquidistubëd icquido icta caïdo ambi cuëmbanaido Nuquin Papan mibitedi icmiac. Adoshon mibi badedquido Esuquidistupadquid yanenquicsho isun chieshebi, quesa Nuquin Papa icquin abi mibitedi bëdambocquid icmebanec.

Esuquidistu tantiaquid cuëshëdabimboec chushcananquido

¹⁰ Adembidi chuinu. Tantiata. Esuquidistu tantiaquid nebi quec Nuquin Papan bëdambo icmiaïd ënacimboc tabadenda. Adec tabadec Esuquidistu tantiaquid utsitedi tantiananec ma cuëshëdabimboec chushcananesa yampanuna. ¹¹ Esuquidistu tantiaquido Codinto yacnocquido chushcananec quec. Chido, Quëdoen shubunöesh choquido nëmbo ëbi isec choshon aden chiec. ¹² Mibi onquiaïd chuinu. Tantiata. Pabadon tantiamiaïd nebi, quec chushquiabimboec utsi-utsiec tabadnubien; Apodosën tantiamiaïd nebi, quec chushquiabimboec utsi-utsiec tabadnubien; Petedon tantiamiaïd nebi, quec chushquiabimboec utsi-utsiec tabadec.

¹³ ¿Esuquidistu tantiaquido cuëshëdmenuenda ëbipadquidon chuibandiondash? Padenquo. Naden chuinu. Tantiata. ¿Matses icsaquid icsho cuidnushe quiash ëbida cuidadec unëspanëda? Padenquo. Adembidi ¿Esuquidistu

tantiaquid nebi quequin ëbi mimbi chuishodambi mibitedi acten mento-
bandionda? Padenquoio. ¹⁴ Esuquidistu tantiaquid icsho Quidispobëdta
Cayo aid daëdtsëqui naondambi quec tantiec tsadebi. ¹⁵ Utsi padenquoio
iccondambi ma Pabadon ëbi acten mentondacsho aid tantiaquid nebi,
quetiapimbo ma mibitedi icpanuna. ¹⁶ Ai, Estepanäsën shubun icquido-
bidi acten mentondambi. ¿Utsidambi acten mentoponda? Padenquoio ic-
condambi. ¹⁷ Ëbi tantiaquido acten mentoban, Esuquidistun cainquoio yaqui
Matses icsaid bedshunec abided ciudadec Esuquidistu cuesten dectanac
unëspanëdash quequin chuibeneta, Nuquin Papan cac aden chuibenec nebi.
Ëmbibi tantiaid chienquiocquin ma matses icsaquid icsho cuidnushe quiash
abided ciudadec Esuquidistu cuesten dectanac unëspanëdash quequin ma
utsibontsen tantiapanu qeshun chuibenec nebi.

Esuquidistu abitedi tantiaquidquo nadatiambocquin nabanquidquibidi

¹⁸ Nuquin Papabëd icquido icmenuec matses icsaquid icsho cuidnushe
quiash abided ciudadec Esuquidistu unëspanëdash quequin chiac, ¿Adpecta
iquec? quequin tantiesa yec Nuquin Papa yacno puduedtiapimbo iquec.
Adec adquido onquenubi nuquien Nuquin Papa yacno puduedtequido
yec Nuquin Papan nadatiambocquin nac matses icsaquid icsho cuidnushe
quiash abided ciudadec Esuquidistu unëspanëdash quequin tantiec. ¹⁹ Abi
yacno puduedtemaïdo chuiquin Nuquin Papan dada uamiampid nad iquec:
“Comapenen tantiaquidon ambibi dadpen tantiaidtedi ëmendambi.
Adquidon tantiatipimbo yacpadembi natiamequin nabanendambi,”
quequin Nuquin Papan dada uamiampid aidëmbi nëbi naid nec.

²⁰ Esuquidistu tantiesa ambibi tantiaidtedi naimëdan ¿mitsimbo adquido
tabadpec? ¿Nidaid abubëd aidën icquidtedimbo mitsipadquidquo icpec?
quequin isbanquin, Nadquoio icpec, quequin comapenen adquidën tantiec.
Aden tantiashic ambi tantiaid Nuquin Papan ëmiac ¿mitsimbo adquido tabad-
pec? ¿Midaquidën bëdamboën tantieque? Adquidën tantiaid tantianu, quec
onquecuededquid ¿mitsimbo tabadpec Nuquin Papan aidon tantiaid ëmiac?
Adquidon dadpen tantiaquimbi matses icsaquid icsho cuidnushe quiash
abided ciudadec Esuquidistu unëspanëdash, quequin utsin-utsinquien tanti-
auidec. ¿Adsho isun Nuquin Papan abi yacnoda puduedmepadac? Padenquoio
iquec. ²¹ Nuquin Papan nadatiambocquin nac matses icsaquid cuidnushe
quiash abided ciudadec Esuquidistu unëspanëdash quequin chuisho
ambibi dadpen tantiaquidon tantiauidec. Ëmbi tantiaidpenquoio tantiatipibi
quequin tantiatipimbo iquec. Adquido tantiatipimbo icnubi ëbi yac-
padquidon Esuquidistu chuibanac abi tantiaquid utsibo yanec. Nuquin
Papa yacno puduedtequidtedi adquido nendac. ²² Adquidon aden tan-
tianubi Nuquin Papan nadatiambocquin nabantequid iste bunquin isadaid-
bon tantiauidec. Quidieco matsesëmbien, Ëbi ënden tantiec papuduedaid
daëd uanu queboedëmbi Nuquin Papan chiaid tantiauidoac. ²³ Adec tabad-
nubi matses icsaquid icsho cuidnushe quiash abided ciudadec Esuquidistu
cuesten dectanac unëspanëdash, quequin ëbi yacpadquidon chuibanoac.
Adoquien, Nuquin Papan chomiaid nec, quequin isadaidbon cuesten
dectanenquioctsenëdash, quequin tantienquoio yec tabadec. Isadaidpembo,
Esuquidistu mimbi chuiboed ëmbi tantiacpadpenquoio iquec. Adoac mimbi
Esus chuibanaid ëmbi ënden tantiaidbëdta daëd uatiapimbo iquebi quec
tabadec. ²⁴ Adquidon tantiauidnubi isadaidbo utsi-utsiec adecbidi isadaid-
pembo utsi-utsiec Nuquin Papan cuëmbanaido icquin naden tantiec: Nuquin
Papan tantiampicpadquiequi matses icsaquid icsho cuidnushe quiash
abided ciudadec Esuquidistu cuesten dectanac unëspanëdash. Aidi matses
icsaquid icsho cuidnushe quiash abided cuidtequid icmequin Nuquin Papan

nadatiambocquin naid nendac, quequin nuqui tantiec. ²⁵ Abitedi tanti-
aquidquid icquin ambi abentsęc tantiatsaid Nuquin Papan chiac dadpen
tantaquidēn dēniactiapimbo iquec. Adecbidi, Nuquin Papan nadatiamboc-
quin nainquiocquin bēdiactsęc natsęcnubi adomboen tantaquin matsesēn
dēniactiapimbo iquec.

²⁶ Utsibo, ¿mitsipadquidquio mibi icponda? Nadquid mibi icpondaque.
Chuinu. Tantia. Daēdpactsęc tantiatsęcquido mibi icpondac. Namequid-
penquio mibi icpondac. Chuiquid dapan bacuēpenquio mibi dadpen icpon-
dac. Adquid icsho Nuquin Papan mibitedi tantaquin, Con bacuē caid nec,
quequin mibi cuēmbanondash. ²⁷ Ai, daēdpactsęc tantiatsęcquido Esuquidistu
tantaquido icsho Nuquin Papan cuēmbanaido mibitedi nec. Adquid ambi
cuēmbanaido icnubi dadpen tantaquid iquequi Esuquidistu tantiesa icsho
Nuquin Papan cuēmbantemaid nebi quequin tantiec natiaic ma shubiquiopa-
nuna. ²⁸ Adembidi utsibon tantiauidtsaido Nuquin Papan cuēmbanaido
neoaic. Adecbidi, ¿Ada matses utsi iqueque? Isnu quenquiocquin matsesēn
tantiambo yaid Nuquin Papan cuēmbantequid icnuc ²⁹ ěmbi comapenen tan-
tiaquin nabansho Nuquin Papan cuēnoshi quequin matsesēn chūitiapimbo
iquec. ³⁰ Nuquin Papan tantiamiac Esuquidistu tantaquid mibitedi nec.
Abipadquid Nuquin Papan Chomiaid Esuquidistu yec abi tantaquiditdi
Nuquin Papa bēdamboec tabadaid tantiamequid nendac. Aidi Nuquin Pa-
pan chomeshun matses icsaquid icsho cuidnushē quiash abided cuidadec
unēsaid isun Nuquin Papan cuīdtiapimbo nuqui iquec. Icsaisa icsho Nuquin
Papan aid bēdamboen isquin adomboembidi nuquitsen isoaic. Adecbidi, aidi
abi yacno bēyucanec puduedash tsadacpadec adecbidi nuquitsen tabadoain-
dac. ³¹ Aden nuqui tantaquin Nuquin Papan dada uamiampicpaden, Ębibi
bēdambo ictiapimbocquid icsho mimbi bēdambo icmiaid nebi, Icbo, quequin
ěmbi naid chienquiocquin Esusēn naidquio chuibanuna nuquitedi.

2

¹ Adembidi chuinu. Tantia. Mibi yacno nidshun dadpen tantiembi
quenquiocquin daēdpactsęqui cuembo chuibanondambi. ² Esuquidistubēdta
abi cuesten dectanaid chuinu quequin aiduidi mibitedi chuibanondambi.
³ Codinto yacnocquido dacuēdampambo iquec quequin uēdęequimbi mibi
chuibanondambi. ⁴ Ęmbibi dadpen tantiacpadomboen chuibanenquioc-
combi. Nuquin Papan Mayanēn tantiamiacpadomboen ěmbi chuibanubi
aiděmbi nadatiambocquin mibitedi tantiamiondash ⁵ ma Pabaddon tantiamiac-
padomboen tantiamioshi, quetiapimbo mibitedi icpanuna.

Nuquin Papan Mayanēn tantiamiaid

⁶ Nuquin Papan tantiamiac comapenen tantaquin ěbi yacpadquidon
chuibanoaic. Aden chuibeniac Nuquin Papan chiaid tantiabene-
papuduedquidon bēdamboen tantiec. Aden Nuquin Papan ěbi yacpadquid
tantiamiaido matsesēn ambibi comapenen tantiacpaden chuibanesambo
nuqui nec. Adembidi matses chuiquid dapabon comapenen tantiacpaden
chuibanesambo ěbi yacpadquido nec. Matsesēn dadpen tantiaid
uesadendac. ⁷ Adnubien Nuquin Papan comapenen tantaquin, Esuquidistu
chuibeneta, quenquiocpampiděmbi nēbi, Chuibeneta, cac Esuquidistu ěbi
yacpadquidon chuibanec. Ushē uabi tabadquin matses bēdambo icmequid
con mado nendac, quequin Nuquin Papan tantiapampic. ⁸ Esuquidistu
nuqui bēdambo icmetequid Nuquin Papan chomiaicsho adquid nec quequin
chuiquid dapabon tantienquiocpanēdash. Aidon, Nuquin Papan Chomiaid
Esuquidistu nec, quequin abimbo tantaquin cuesten dectanenquio

ictsenēdash. ⁹ Aidpadquid chuiquin Nuquin Papan ēndenquimboshē dada uamiampid nad iquec:

“Nuquin Papan abi tantiaquido ambi cuēmbanaido abi yacno tabadmenun nacnenaid bēda tantiesan istiapimbo iquec.

Adecbidi Nuquin Papa yacno nadquio ictsiash, quetiapimbo matses iquec.”

¹⁰ Adnubien Nuquin Papan Mayanēn Nuquin Papan abi yacnoshon bēdamboec tabadte nacnenaid iquec quequin nuqui tantiamiac.

Nuquin Papapadquid aton Mayan icquin Nuquin Papa tabadacpadquiec tabadaid nuqui tantiamiaoic. ¹¹ Matsesēn ambi tantiacpaden chiabi yac utsin tantienquio iquec. Adembidi Nuquin Papan ambi tantiacpaden chiamoocnōc matsesēn tantiatiapimbo iquec. Abipadquid aton Mayanēnuidquio tantiec. ¹² Con mayan ēbipadquidquio menenu quetiapimbo matses iquec. Nuquin Papambien abipadquid aton Mayan nuqui menec ma aidēnquio abi yacno bēdamboec tabadaid nuqui tantiamepanuna. ¹³ Aden aidēnquio tantiamiac adomboembidi ēbi yacpadquidon chuibanoaic. Ēmbibi tantiacpadpenquiocquin Nuquin Papan Mayanēn tantiamiacpadomboen chuibanembi. Adomboembidi ēbi yacpadquidon chuibanuoic. Aden Nuquin Papan chiaid chuibanac Nuquin Papan aton Mayan meniaidon tantiaquiec. ¹⁴ Nuquin Papan abipadquid meniacmaidon aidēn chiaid tantiatiapimbo iquec. Aden Nuquin Papan Mayanēn chiaid tantiatiapimbo icquin Nuquin Papan matses bēdambo icmenu queshun Esuquidistu chomiac matses icsaquid icsho cuidnushe quiash abided cuidadec cuesten dectanac unēspanēdash quequin aidon tantiatiapimbo icoaic. Ēmbi tantiacpadomboen Nuquin Papan chienquio iquec, quendac Nuquin Papan abipadquid meniacmaido. ¹⁵ Nuquin Papan Mayanēn tantiamiaidombien naden utsibo tabadaid tantiec. Matses bēdamboec tabadsho isun, Nuquin Papan Mayanēn tantiamiacpadec tabadquidquio nec, quequin nuqui tantiec. Adembidi utsi icsamboec tabadsho isun, Nuquin Papan Mayanēn tantiamiacmaid nec, quequin nuqui tantiec. Nuquin Papan Mayanēn Nuquin Papan chiaid tantiamiacmaidon nuqui naic tabadaid isash Nuquin Papan chiaipadquiec tabadquid nec quetiapimbo iquec adquid. Adecbidi Nuquin Papan chiaipadpenquio yec tabadquid nec quetiapimbo Nuquin Papan Mayanēn tantiamiacmaido iquec. ¹⁶ Nuquin Papan chuimiampid nad iquec:

“Nuquin Papa Abia Yampid yec abitedi tantiaquidquio nec.

¿Adquid Nuquin Papa icsho abi chuiquin

ismequid mitsicquid icpec? Adquid nibēdec.”

Nuquin Papan tantiacpadomboen aton Mayanēn tantiamiaido icquin Esuquidistu tantiacpadomboen nuqui tantiabanc.

3

¿Esuquidistu tantiaquid utsi icsambo iquec, quecta iquec?

¹ Adembidi chuinu. Adembi tantiaata. Mibi yacno tabadquin Nuquin Papan chiaid tantiababicquid mibitedi icsho daēdpactsēc chuibanondambi. Codinto yacnocquido bacuē uidēnabi yachimboecquido nec queshun Nuquin Papan chiaid daēdpactsēc mibitedi chuibanondambi.

² ¿Nēbi tishaidēnda pambid pepec? Padenquio. Mibitedi adquidbimboecsho tantienquio icnushe queshun Nuquin Papan chiaid daēdpactsēc chuibanondambi. Ēnden iccondacpadquio mibitedi adquibidi icoapec.

³ Esuquidistu tantiesa yec tabadondacpadec mibi tabadoaic. ¿Esuquidistu tantiaquid utsi icsambo iquec, quecta iquec? Nuquin Papan Mayanēn tantiamiacmaidpadquid yec nēishec chushcananec mibi. ⁴ Pabardon tantiamiaid nebī, quec utsi-utsiec chushquenubien; Apodosēn tantiamiaid

nebi, quec chushqueoaic utsi. Adec chushquec Nuquin Papan Mayanën tantiamiabi yac bimboecquido mibitedi nec.

⁵ ¿Mitsipadosho mimbi ëbi isponda? Adembidi, ¿Mitsipadosho mimbi Apodos isoaponda? ¿Ëmbembidambi mibi chuibamponda? ¿Ambembida Apodosënsen chuibanpanëdash? Padenquo. Tantia. Chuinu. Nuquin Papan chiacpadomboen Esuquidistu chuibenequid ëbi daëdi nebi. ¿Pabodon chuibanubi Nuquin Papan Esuquidistu tantiamiondashi quequinda mibitedishun tantiape? Ai, ëmbi adobanubi Nuquin Papan Esuquidistu mibitedi tantiamiondash. ⁶ Tiedën caniquid ëshë siabi yac dëyuctiapimbo yac bimboecquid icquin Codinto yacnocquido Nuquin Papan chiaid dadpen tantiatiapimbo iquec, qeshun matses icsaquid icsho cuidnushe quiash abided cuidadaid Esuquidistu nec quequin adquid chiaidba mibitedi chuibanondambi. Yuecash Apodosten mibi yacno chopanëdash. Adec choshon tiedën caniquid dëyuctsash tanunquiocnoc canitiapimbo yac bimboecquido Codinto yacnocquido icnushe qeshun Apodosën chuibanoapanëdash. ⁷ Tied nitsinshun taneshcain tiedën caniquid canimesa icho nec. Adquiobidi Nuquin Papan chiaid chuibanquid matses tantiamesa nec. Nuquin Papambien tantiamec. ⁸ Tied icbon con tied nitsinec cho cac nashunec. Aden nabanquin nainacsho icbon abi nitsinshunquid cuidec. Adembidi con tied taneshcaic cho cac nashunoaic. Adembidi abi neshcashunquid cuidoaic. ⁹ Nuquin Papan chiacpaden Esuquidistu chuibenequid Apodos nendac. Adembidi Nuquin Papan chiaid chuibenequidtedi nec. Adquid ëbipadquid icnubi Nuquin Papan tied bimboecquid mibitedi nec. Nuquin Papan shububimboecquidbidi mibitedi nec.

¹⁰ Nuquin Papa tabadte shubu uashunun buintad teshun abia tabëcac bimboen Esuquidistuba chuibanondambi ma matsesën tantianueshun. Buintad tabëcac bimboen Esuquidistu ëmbi chuibanan utsibon adomboembidi aïdbidi chuibeneoaic. Bëdamboen chuibenenequin ¿Nuquin Papan tantiacpadomboendambi chuibanegue? Tantanu, qeshun Nuquin Papan chiaid isted-istedtiad ambi chuibeneta caïdon. ¹¹ Shubu uashunquidën shubu uïdën uatequid nitsinan shubu uashunquid utsibo adomboen tabëcoanu quesa nec. Adquiecbidi Nuquin Papa tabadte uashunu qeshun buintad tabëcac bimboen Esuquidistu ëmbi chuibanan adquid nec, quequin utsi chuibantiapimbo utsibon iquec. ¹² Buintad tabëcaïd tabadac bimboecquido icmenuequin Nuquin Papan chiaïdquïo abimbo chuibanoaic. Utsimbien abipenquiocnoc chuibanoaic. ¹³ Adashien yuecash Esuquidistu choanuc ¿Ëbi chuibanquidën ëmbi chiacpadomboenda naoshe? Nëdëncadoquin tanu, quependac. ¹⁴ Aden nëdëncaquin tanac Nuquin Papan chiaïd bëdamboen chuïquïdon chuibanac Esuquidistu tantiaquïdombï yec buintad taidacmaid nidac bimboec abi nidendac. Adsho isun abi bëdamboen chuibanquïdo Nuquin Papan menetequïd nendac. ¹⁵ Adomboembidi utsibon abipenquïo icnuc chuibanac Esuquidistu tantiatiapimboquïdo taidaid bescashun secac bimboen secatequïd nendac. Adnubi abipenquïo icnuc chuibanquïdo taidtsenac bimboec abentsëqui ambi chuibanaido nibëdnuc Nuquin Papa yacno puduedendac. Adquïdo Nuquin Papan menetemaido nendac.

¹⁶ Esuquidistu tantiaquïdo Nuquin Papan Mayan tabadtequïd nec. ¿Adquïd iquec Nuquin Papa tabadtequïdbidi nebi quequin tantiatiapimboda mibitedi icpe? ¹⁷ Ai, Nuquin Papa tabadtequïdbidi mibitedi nec. Adquïd icsho mibi icsabudmenuequïdo Nuquin Papan ënenquïocquin comapenen cuidendac. Abi tabadtequïd Nuquin Papan cuëmbanaido ambi bëdambo icmebanaidobidi nec. Esuquidistu tantiaquïdo Nuquin Papa tabadtequïd nec caindac.

¹⁸ Adec abi tabadte yequi Esuquidistu tantiesan tantiacpadquiec mibi tabadec. Adec tabadec, Esuquidistu tantiaquid nebi, quec mibibi mua uadec. Esuquidistu tantiaquidquio icnuec Esuquidistu tantiesan tantiacpadec tabadenquiocquin Nuquin Papan tantiacpadomboen tantiaquiota. ¹⁹ Esuquidistu tantiesan tantiacpadquiec tsadquidën ëbi yacno tabadte tantiatipimbo iquec, quequin Nuquin Papan tantiec. Aden tantiaquin ambi dada uamiampid nad iquec: “Ambibi comapenen tantiaquin nabanaid ënabi icnubi icbo unësendac.” ²⁰ Adecbidi: “Adquidën tantiaidbidi ënëdtequid nec,” quequin Nuquin Papan tantiec. ²¹ Ad icnuc, Pabodon tantiamiaid nebi, quenda. Adecbidi, Apodosën tantiamiaid nebi, quenda. Abia Yampidën shubu abentsëquën tabadquid mibitedi icnuc aidën natedi mitsana nec. ²² Aidën bacuëbo icquin mibitedishun con utsi ëbi caic. Adembidi Apodosten mimbi adoaic. Adembidi Petedotsen mimbi con utsi caoaic. Nidaid abubëda uashumbic aidënuquidtedimbo uabanquid yec aidtedishun icbo Nuquin Papa nec. Adecbidi aton bacuë mibitedi icnuc aidtedimbo mitsana nec. Esuquidistu uincuenacpadec uincuentequido mibitedi neoaindac. Nidaidën tabadec unëstëquidbidi mibi nec. Nëid ushën mibi nidaidën tabadte ushë nec. Yuecash abuctsen mibi tabadendac. Abitedi Nuquin Icbon natedi nec. Aidën cuëmbanaido mibitedi icnuc aidtedi mitsanabidi nec. ²³ Mibitedishun icbo Esuquidistu nec. Esuquidistun icbo, Edoen, aton Papa nec.

4

Esuquidistu chuishunquido

¹ Icbo Esuquidistu chuibenequid Pabado nec. Adquidbidi Pabado yacpadquidtedi nec, quequin mimbi tantiaata. Ènden Abia Yampidën Nuquin Papan Esuquidistu chuibeneta, quenguicpampidëmbi nëbi aid chuibeneta cac chuibanec nebi. Adembidi Pabado yacpadquidon chuibenec, quequin mibitedishun tantiaata. ² Nuquin Papan, Esuquidistu chuibeneta, cacpadomboen niaquenuquocquin ëbipadquidon chuibenetiad. ³ Nuquin Icbon, Èbi chuibeneta, caid ëbi icnuc ¿Pabodon bëdamboenda chuipec? quequin tantianuna, ¿mimbi cactabi dacuëdpe? Padenquio. Adembidi, Nuquin Papan chiacpadomboen chiombi, quetiapimbo iquebi. ⁴ Ambi chiacpaden niaquenuquio iccombi, quetiapimboconobi abitedi isquidquio abitedi tantiaquidquio Nuquin Icbo icquin ëbi chuibanec bëdamboec tabadsho isun aidën chiendac. Adembidi ëbi chuibanec icsamboec tabadsho isun chiendac. ⁵ Icsamboen natsiash, quec tsadenda. Nuquin Icbo choashun icsambocquid cuidendac, quequin cainta. Aidëmbi choashun matses icsamboen ismec tabadaid abi ompoec tabadaidbëda chuibanashun cuidendac. Adembidi, matsesën ëquëduchshun tantiaid chuibanquin cuidendac. Adembidi, utsibo bëdamboec tabadaid chuibanquin chuoaindac, Bëdamboen mimbi naoc, quequin.

⁶ Adembidi chuinu. Tantiata. Pabadopadquid Apodos nec, quequin ma mibitedishun tantianueshun chuibanombi. Aden tantiabanc, Pabadopadquid utsi nibëdec, guesa ma icpanuna. Adecbidi, Apodospadquid utsi nibëdec, guesa ma utsibotsen icpanuna. Nuquin Icbon padpadquid utsi nibëdec, quequin tantiec tabad. Adecbidi, Codinto yacnocquidopadquid utsi nibëdec, quenda. ⁷ ¿Mitsicquidën adquid mibi icmebampashba? ¿Abembida mibi adquid icpeba? Nuquin Icbon tantiamiac nabanash, ¿atotsi quiash, ëmbi tantiacpaden naombi, quepe mibi?

⁸ Nuquin Papan chiaid dadpen tantiaquid nebi, quequin nua cubudquin peshun isuidacpadomboen ambi chiaid nëbi mibitedishun tantiauidpec. ¿Adpecta Nuquin Papan bëdambo icmiaido tabadpadic? Nuquin Papa yacno

enden puduedacimboec yash chuiquid dapa nebi, quiacimboec mibitedi tabadpec mibi Esuquidistu chuibanquidtedi adec tabadtiapimbo icnubi. Mibitedibéd ébi yacpadquido ébi chedo enden chuiquid dapa yacpadquido icmiondac, Cuishon, quetsiabi. ⁹ Adecbidi, Bédambo iquebi, quec mibi tabadnubi naden tantiec tsadebique. Tantia. Chuinu. Émbi chuiheneta caido unéseque. Is, Nuquin Papa quiacimboecnuc ambi abi yacnoshon uaido mayan bédabobédtan matsesfedishun isbededacimboecquid nebi, quequin émbibi tantiec tsadebi aden isbededec aido tabadenquiocnobi. ¹⁰ Esuquidistu chuibenequidon chuibansho tantiauidash, Pabiante icsachitashien nec, quequin mamênshumbededashic Codinto yacnoquidon ambibi tantiaquin chuibansho tantiaquidquio nec, quepec Esus tantiesabo. Adecbidi, utsibo dacuédampambo iquec, quiash uédéequin Esuquidistu chuibenequidon Nuquin Papan chiaid chuibanubi cuesambo yacimboen mibitedishun chuibampec. Esuquidistu tantiesan yuedaido mibitedi icnubien utsin yuedtemaid Esuquidistu chuibenequido nec. ¹¹ Esuquidistu chuibenequid yequi pistséc petsec abi bunec tsadebi. Adecbidi, acte acash bunec tsadquid nebi. Adecbidi dashcute icsactsécquid dasiuidquid nebi. Adquiecbidi Esuquidistu chuibenequid utsibo iquec. Utsin mëyandedmëyandedaid nebi. Quenenash iquenquo icquin capucuenequin Esuquidistu chuibeneq nebi. ¹² Con pete bednuequin shubumpi nacnenguidquio iquec chonoadsho isquin utsibon mamênshunaid nebi. Aden mamênshunubi chonoadebi. Adecbidi Pabado icsambocquid nec, quequin chiaqui aido cuidenquiocquin bédamboen ista, Papa, quequin aido chiembi. Utsin mëyanaqui dayacquio yec cacuidanesa nebi. Adquidbidi Esuquidistu chuibenequid utsibo nec. ¹³ Adembidi, utsin ébi mua uaquin chiaqui cuidnanenquiocquin bédamboen chiembi. Adembidi émbi Esuquidistu chuibeni-aqui icsactsécquid nec, quequin ambi secanu caidimboecnuc ébi ispec. ¹⁴ Adecbidi, Bédambo iquebi, quec mibitedi tabadnubi mëyamboc tsadebi. Adec ébi tabadaid émbi chiac Codinto yacnoquido unésquio yampec, quenquiocquin ébi tabadaid mibitedi tantiamenuen dada uaombi. Pabadoñ chiaid abimbo iqueque. Bédamboec tabadnuna mibi camenuen dada uaombi, con bacuébo. Mibi tantiac unésquio iquec. ¹⁵ Mibi chuibanquid utsi dadpen nëbi icnubi Esuquidistu émbia chiac mibitedi aid tantiaquid icpondac. Mibi chuibanquid utsibo min papa ictiapimbo iquec. Esuquidistu tantiaquid ébia yanshun Esuquidistu chuibanac mibitedi Esuquidistu tantiaquido yampondac. Émbi chuibanacpaden chiaid tantiaquido con bacuébo émbi caitedi nec. Adquid mibitedi icnuc papa nebique. ¹⁶ Émbi nacpadomboen naic tabadta quequin mibitedi chiembi. ¹⁷ Mibi émbi nacpadquiec tabadte tantiamenuequin Timoteyo mibi yacno nidmembi. Aidi émbi chuibanac Esuquidistu tantiaquid icpondash. Adquid iccondacsho émbi con mado caid aidi nec. Aidi Esuquidistu tantiaquidquio icquin utsi-utsiec yacnoshon émbi chuibeniapadomboen chuibanoaquin Timoteyon mibi padpiden tantiamendac. Esuquidistu tantiaquid utsibo iccuededacnoshon chuibanacpadomboen ismequin chuibanquid aibidi nec.

¹⁸ Mibi utsi-utsiec Pabado choainquio iquec quequin abimbo tantiacimboen chuibanec. ¹⁹ Aden adquidon chuinubi Nuquin Papa bunuc badedquio mibi yacno nidebique. Ista. Mibi yacno puduedshun abi onquiaid tantianu quenquiocquin abi naic tabadaid isnuna caindambi. ²⁰ Nuquin Papa tantiaquido ambibi tantiacpadec onquesa nec. Nuquin Papan Mayanén tantiamiacpadec onquequid Esuquidistu tantiaquido nec. Adquid Ichon tantiamiacpadomboen nabanec tabadquid nec. ²¹ ¿Mibi yacno puduedshun atotsimbi adquid napeque? Chui. ¿Cuesnu quiacimboendambi adquid

comapenen chushcaquin tantiamepe? ¿Adenquiocquindambi ëbëd icquid nec quequin chuibanquin adquid tantiamepe?

5

Esuquidistu tantiaquid ambi chudtemaid chudquid cacumeta caid

¹ Mibëd Esuquidistu tantiec iccuededquid abentsëc ambi chudtemaid chudquid iquec quequin chiec onquec. Aden naisa isadaidbo nec. Adembidi naisa isadaidpembo nec. Aton papa icbon chido, anin dauid, bedshun chudesa aido nec. Mibëd icquid abentsëc adquid iquec quec. ² Adquid mibëdi icnuc, Bëdambo icmiaido nebi, quenquioctiadquidi mibitedi nec. Adquid icsaquid mibëd icsho isash unësqüo icquimbi aidi cacumepatecnëdan. ³ Mibëd ictiapimbo yequi mibëd yacbimboecquin dada uaquin icsaquid cacumetiadquidi mibi nenëdac quequin chuibanombi. ⁴ Esuquidistu tantiaquid nuquitedi nec, quec mibitedi iccuededec Nuquin Icbo Esuquidistun tantiamiacpadomboen Pabadon naden natsiash quequin ⁵ icsaquid nidme ma Satanasën mëyanac icsa bunesa yanacsho Nuquin Icbo Esuquidistu choashun ma abi yacno yuedpanuna.

⁶ Esuquidistun ënden bëdambocquid icmiaidtedi nebi, quenda. Icsaquid abentsëc mibëd tabadquin abi icsamboec tabadaid ismiac acte maisacimboec mibitedi adquiobidi ictsiac. ⁷ Ënden mibitedi Esuquidistu tantiesabo yec icsaquin ismec maisaccondacpadec maismane qeshun icsaquid nidmeta. Ëbi cuidmenquiocnoec abided cuidaced Esuquidistu unëspanëdash, quiash aid icsaisa yacpadquiec tabadta. ⁸ Aden ambi naid tantiec icsaondacpadpenquo yec ma tabadpanuna. Aidquio tantiembi, quec abimbo tantiadonec ma tabadtenapanuna.

⁹ Ambi chudtemaid chudquidbëd iccuededenda, quequin ënden dada uaondambi. ¹⁰ Esuquidistu tantiesabëd iccuededenda, quenquiocquin Esuquidistu tantiaquid adquid icsho isash iccuededenda, quequin dada uaondambi caimbi. Ambi chudtemaid chudquid Esuquidistu tantiesa dadpen iquec. Adecbidi, utsin na bunquin mua uain bedquid dadpen iquec. Adecbidi, matsesën Nuquin Papan uaidbimboecnuc nacnenaïd tantiaquid Esuquidistu tantiesa dadpen iquec. ¿Adquido ismane quiash mitsimbo mibi tabadpe? Nuquin Papa yacno adquid nibëdec. Nuquin Papa yacno nidash icsaquid isenquo yec mibi tabadendac. ¹¹ Esuquidistu tantiaquid nebi, quequid icsadenesho isash adquidbëd iccuededenda caimbi. Esuquidistu tantiaquid nebi, qeshun ambi chudtemaid chudquin ënesabëd iccuededenda. Adecbidi, muaquin bedbanquidbëd iccuededenda. Adecbidi, Esuquidistu tantiaquid nebi, qeshun matsesën Nuquin Papan uaidbimboecnuc nacnenaïd tantiaquin ënesabëd iccuededenda. Adecbidi, Esuquidistu tantiaquid nebi, qeshun ambi tantiacpadpenquiocquidën chuisho mamënsnumënquin ënesabëd iccuededenda. Adecbidi, Esuquidistu tantiaquid nebi, qeshun cuesanguin ampequin ënesabëd iccuededenda. Adecbidi, Esuquidistu tantiaquid nebi, quiash ëmbi chuibocpadquid icsaquidbëd iccuededenda. Adem-bidi aidobëdtan penda.

¹² ¿Esuquidistu tantiesa abi icsaid chuiquin cacumeta, quequindambi chuipe? Padenquo. Esuquidistu tantiaquid mibëd icquid icsadenequin ënenquiocsho isun Nuquin Papan chiaïd comapenen tantiaquin mibi icsaid ënta, quequin chui. ¹³ Nuquin Papambien Esuquidistu tantiesa icsaid chuiquin cuidendac. Mimbi Esuquidistu tantiaquid icsadenequid cacumeta.

6

Ēbi chushcananaid tantiashun mimbi tantiacpaden chui caid

¹ Esuquidistu tantiaquid daëd nêishash chushcananec, queoaic. Adquid chuinu. Tantia. Nêishash chushcananash Esuquidistu tantiesa yacno nidshun, Ēbi chushquiaid chuisho tantiashun ¿midapaden mimbi chieque? Ēbi chui, quequin mimbi chuipec. ¿Atotsi quiash Esuquidistu tantiaquid yacno nidtiadquidi Esuquidistu tantiesa yacno nidshun mimbi adquid chui, cape?

² Yuecshun, ¿Midapaden mimbi Esuquidistu tantiesan naid chieque? Tantanu. Chui, abi tantiaquido Nuquin Papan caquien ¿nuqui chiacpaden aido Nuquin Papan cuidendac, quequin tantienquioda mimbi icpe? Yuecshun tantiesan naid chiemi, qëshun ¿Atotsieshun Esuquidistu tantiaquidbêd chushcananash tantiesa yacno nidshun mimbi chuibampe? ³ Yuecshun, ¿Ēmbi uaido mayanën naid midapaden mimbi chieque? Tantanu. Chui, Nuquin Papan caquien ¿nuqui chiacpaden aido cuidendac, quequin tantienquioda mimbi icpe? ⁴ Adquidon naid ěmbi chiacpadomboen Nuquin Papan cuidendac, quequin tantiaquin ¿atotsieshun Esuquidistu tantiaquid daëd nêishash chushcananasho tantiashun, Esuquidistu tantiesa yacno nidshun, Ēbi chushquiaid chiacsho mimbi tantiacpaden ěbi chui, mimbi capec?

⁵ ¿Esuquidistu tantiaquid utsibo nibêdpecta ictic? ¿Esuquidistu tantiaquidên icsamboen chuinushe qeshunda Esuquidistu tantiesa yacno nidshun, Ēbi chushquiaid chiacsho mimbi tantiacpaden chui, mimbi capec? ¿Bêdamboec tabadaid Esuquidistu tantiaquid utsibon comapenen tantienquioctsiash, quequinda mimbi tantiape? ⁶ Mibipadquid Esuquidistu tantiaquid utsibo yacno nidenquo yec mibipadquidpenquo Esuquidistu tantiesa yacno nidshun utsibêd chushcananaid mimbi chieque. Adenda.

⁷ Ēbi chushcananaid ěbi daëdshun chiacsho tantiashun mimbi tantiacpaden chui. Tantanu, quequid mibêd icnuc Nuquin Papan bêdambocquid icmiabicquid mibitedi nec. Esuquidistu tantiaquid utsin mibi icsamboen nasho isash ¿atotsi quiash nêishash chushcanampe? Adembidi, Esuquidistu tantiaquid utsin muaquin mitsana bedacsho isash ¿atotsi quiash nêishash chushcanampe? ⁸ Cuidnante bunec mibi adpec. Naden natiad. Ēbêd chushcananquid Esuquidistu tantiaquid nec, quec abi cuidte bunenquo yec abi yacno nidshun abi icsaboed tantiamequin Nuquin Papan chiaid chuiban.

⁹ ¿Icsadenequin ěnesa Nuquin Papa yacno puduedesa nec, quequin tantienquioda mimbi icpe? Esuquidistu tantiesabo tabadacpadquiec tabadec ic-sate bunquid yec Esus tantiaquid nebi quec mibibi mua uadenda. Ambi chudtemaid chudquin ěnesa Nuquin Papa yacno yuedtemaid nendac. Adembidi, Nuquin Papan uaidbimboecnuc nacenaid tantiaquin ěnesa abi yacno yuedtemaido nendac. Adembidi, ambi inacmaid chudquido abi yacno yuedtemaido nendac. Adembidi, aton bënëpen chudmequin ěnesa, adecbidi dada daëd chichudnanquin ěnesa, adecbidi chido daëd dachudnanquin ěnesa Nuquin Papa yacno yuedtemaido nendac. ¹⁰ Adembidi, ampequin ěnesa Nuquin Papa yacno yuedtemaid nendac. Adembidi, muaquin utsin na bedquin ěnesa, adembidi, ambi tantiacpadpenquiocquidên chuisho mamëshunquin ěnesa, adembidi, cuesunianquin ampequin ěnesa. Adquido Nuquin Papan ambi abucshun nacenaidên tabadtemaido nendac. ¹¹ Ēnden mibi adquo iccondaidi nêbi utsi-utsiec padenquo icsho isash Nuquin Papa mibi cuidenquo yec mibi icsaid bēpiscudac. Adembidi, Nuquin Papan mibitedi bêdambo icmebanuequin abipadquid aton Mayan mibitedi meniac.

Aidi meneshun Esuquidistu icsapenquiocquid isacpaden Nuquin Papan mibitedi isoaic.

Ĕmbi chudtemaid chudmane qeshun adquid isuidteneta quiaid

¹² Ĕmbi natemaid naden nata caid nibēdec qeshun naic bēdamboquid icti-apimbo iquebi, quiash padenquoio yec tsadebi. Aden nabanquin ĕntiapimbo icmane quiash padenquoio iquec tsadebi. ¹³ Matsesēn chebudaid pucu yacno budash dada bēdambo icmianquid nec. Yuecash matsesēn dada chodquetequid nendac. Padnuen, ĕbi tabadte ma icpanueshun Nuquin Papan matses uapampic. Abi tantiaquid abi tabadte iquec. Adecbidi adquidbēd Nuquin Papa iquec. Ad icnuĕ mimbi chudtemaid chudquid icta, quenquoio Nuquin Papa icpampic. Ambi chudtemaid chudquid Nuquin Papa tabadte ictiapimbo iquec. Aden naquid chian anēdēnquequid nēsecatequid nendac. ¹⁴ Nadatiambocquin Esuquidistu Nuquin Icho Nuquin Papan uincuemepanēdash. Aidēmbi nuquitsen abi tantiaquid icsho uincuemendac. ¹⁵ ĤAbi tantiaquid icquin, Esuquidistubēd daēdash tabadquid nebi, quequin tantienquioda mimbi icpe? Ai, aiddēdi daēdtequid nuqui nec. ĤAdquidbēd daēdashabi icsaquidbēd daēdoape? Padenquoio iquebi. ¹⁶ ĤDadpen chudmequid chudash daēdabimboecquid nec, quequin mibitedishun tantienquioda icpe? Aid daēdi dada abentsēc yacimboecquid nec, quequin Nuquin Papan dada uamiampid nec. ¹⁷ Nuquin Icobōd daēdaiĕien Icbon tantiacpadquieĕ tabadquid nec.

¹⁸ Ĕmbi inacmaid chudmane qeshun chido utsi isuidteneta. Padenquoio yec icsaquidbēd daēdquid mibi iquendac. Ambi chudtemaid chudquid aton namibēd ĕquēduĕuēsh daēdaid nec. Nami umanucuēsh icsaid namibēd daēdtiapimbo iquec. ¹⁹ Nuquin Papan Mayan tabadtequid Esuquidistu tantiaquido nec. ĤNuquin Papan ĕbēd tabadmaiaid abipadquid nec, quequin tantienquioda mibitedishun icpe? Ĕbibibi nuquin icho nec, quetiapimbo matses iquec. Adecbidi, Con icho nibēdec. Ĕmbi tantiacpaden naimbi, quetiapimbo mibi iquec. ²⁰ Nuquin Icho cuesten decnan matses icsaquid icsho cuidnushe quiash abided cuidadec unēsquid Nuquin Papan icmiac abi tantiaquid yec aidēn na mibitedi nec. Adoaidi ambi chiacpaden ismec bēdamboec tabadteneta.

7

Dada chidobēdi daēdaid

¹ Nēbi mimbi dada uaboed isombi. Aid isun ĕmbi tantiacpaden chiem-bique. Tantiata. Chido inquid dadatedida ictiad quequin mimbi tantiacpe. Padnuen, Chido bedenquoio iquembi, qesho chido ĩnta cainda caimbi mibi. ² Esuquidistu tantiesa yec ambi chudtemaid chudquid Codinto yacno tabadquid utsibo dadpen iquec. Aidpadquid icmane quiash chido abentsēc inquid dada ictiad. Adecbidi dada abentsēcshun ĩnaid chido ictiad. ³ Con chido ĕmbi ĩnaid nec, quequin aĕuidi chudmequid icta. Adecbidi con bēnē ĕbi inquid nec, quequin aĕuidi chudmequid chido nec. ⁴ Chidon dada daēdash aton bēnēn dadabidi nec. Adecbidi dadan dada chidon dadabidi nec. ⁵ Aid daēdi daēdabi yacimboec, Padi, quenda. Adboedi, Nuquin Papa chuĕnuēc nēĕdtedi ushquin padenquoio nuqui iquec, qeshun ĕnta. Aidtedec ushquin padenquiocshon, Ĕmbi yuen ĕntiapimbochsho isun Satanasēn icsamenushe qeshun padpiden nata. ⁶ Ĕnta quenquoio iquebi. Nēĕdtedi ushquin padenquoio iquembi quiash mibi daēdi aidtedecuidi ushec ĕnēdta caimbi. ⁷ Padnuen, chido inesa ĕbi yacpadec dadatedi icpashun. Dada

utsi-utsiec Nuquin Papan icmiacpaden chido inquid icnubi utsi-utsiec chido inesa iquec.

⁸ Chido inesa ëbi tabadacpadec dada utsitedi tabadec bédambo ictsiash. Adecbidi dadan inaidpen bédambo ictsiash chido. Dada bënua adecbidi bédambo ictsiash. ⁹ Adquid icquin isuidtiapimbo yec comapenec chudte bunquin chido inta. Adecbidi chido bënua dada isuidtiapimbo iquec dadan inaid icta.

¹⁰ Daëdash niamënenda. Ëmbibi chienquiocquin Nuquin Icbon aden chuinëdacpadembi chiembique. Tantia. ¹¹ Min bënë nianash utsin inaid iguenda. Dadan inaid icnu quec mimbi niamboedën inaid icoata. Adembidi chido inquid min chido bunenquiocquin abi icsaid dada uashun ismequin nidmenda.

¹² Nëbi Nuquin Icbon naden chuiban cainquiocnobi ëmbia Esuquidistu tantiaquid icquin Esuquidistu tantiaquid utsibo ëmbi chuibocpadembi mibitedi chuioaimbique. Tantia. Dada aton chidobëdi Esuquidistu tantiesa icboedi aton bënë Esuquidistu tantiaquid yanuc aton chido padenquo yec, Con bënë nianu, quenquo ictsiash. Adquid icsho isash. Con chido icsambocquid nec, quenquo yec abëdi tabadquid bënë. ¹³ Adecbidi chido utsi aton bënëbéd Esuquidistu tantiesa icboedi aton chido Esuquidistu tantiaquid yantsiash. Aden Esuquidistu tantias, Con bënë icsambocquid nec, quenquo yec bënë nianec nidesa chido. ¹⁴ Esuquidistu tantiabi yec daëdacpadec aton chido Esuquidistu tantiaquid yanash aidbéd abentsëc yacimboec tabadec bënë. Adec bédamboec tabadsho isun Nuquin Papan chido bédamboen tabadmequin bënëtsen bédambo icmebampec. Chido Esuquidistu tantiaquid icquin aton bënë padenquiocnobi aton bacuëbo tantiec, Icsambocquidën bacuëbo nec, utsibo quenushe quiash bënëbéd abentsëc yacimboec tabadquid chido. Adecbidi dada Esuquidistu tantiaquid icquin aton chido padenquiocnobi adomboembidi aton bacuëbo tantiec aton chido Esuquidistu tantiesabéd tabadquid dada. Adec abentsëc yacimboec tabadsho isun, Bédambocquidën bacuëbo nec, quequin utsibon ispec.

¹⁵ Utsimbic ambi bedboedën aton chidon Esuquidistu tantias, isun aton chido nidta catsiash. Adoaquien, Mibéd tabadte bunebique. Ëbi nidmenda, quetsiash chido bënë caic. Adoaqui, Nidec nid, cac cacuidenquo yec nidquid chido. Chido utsibic aton bënë Esuquidistu tantiaquid yansho isash, Mibi nianu, quetsiash. Adoaquien, Mibi unësquo iquec, quetsiash bënë. ¹⁶ Adnubien dadan nidta caid aton chido Esuquidistu tantiaquid yec bédambocquid icsho isash Esuquidistu tantiaquidtsen yantsiash bënë. ¿Adquid yantsiash, quequin tantienquioda mimbi icpe? Adecbidi, chidon nianu caid aton bënë bédambocquid icsho isash Esuquidistu tantiaquid chidotsen yantsiash. Adecbidi ¿Adquidtsen yantsiash, quequin tantienquioda mimbi icpe?

¹⁷ Mibi Esuquidistu tantiaquid yanash Nuquin Papan tantiacpadec tabadnu quiash adequi tabadta. Adomboembidi Esuquidistu tantiec iccuédquid utsibo chuibanombi. ¹⁸ Esuquidistu tantiesa shui dëbid dëteshunaid yec Esuquidistu tantiaquid yanash ëbi shui dëbid dëteshunacmaidbimboecnuc nacnemenu quenquo yec tabadta. Adecbidi, Esuquidistu tantiesa shui dëbid dëteshunacmaid yec Esuquidistu tantiaquid yanash shui dëbid dëtemenu quenda. ¹⁹ Shui dëbid dëteshunaidta nec, quenquo yec Nuquin Papa tsadec. Adecbidi, Shui dëbid dëteshunacmaidta nec, quenquo yec Nuquin Papa tsadec. Adquid nec quenquo yec, Ëmbi chiacpadomboen nadenequidta nec, quec Nuquin Papa tantiec tsadec. ²⁰⁻²¹ Adec Nuquin Papa tantiec tsadnuc yua Esuquidistu tantiaquid yanash yuapen icnu quenquo yec tabad. Adecbidi,

utsin yuapenquoio yec utsin yua icnu quenquoio yec tabadoa. ²² Yua Esuquidistu tantiesia icboedi Esuquidistu tantiaquid yansho isun, Yua nec, cainquoio icquin Nuquin Icbon cuënenadac. Adembidi, utsin yuapenquoio Esuquidistu tantiesia icboedi Esuquidistu tantiaquid yanash Nuquin Icbon namiaidquoio nendac. ²³ Matses icsaquid icsho cuidnushe quiaash abided cuidadec unësquid Esuquidistu Nuquin Papan icmiac aid tantiaquid iquec, Con icbo nec, quiaash utsin yuaid iquenda. ²⁴ Adembidi chuinu. Tantiata. Nuquin Papan mibi cuënucc matses yec Esuquidistu tantiaquid yanash, Èbèd tabadquid con Icho nec, quec matses yec bèdamboec tabadta.

²⁵ Chido inesa bèdta dadan inacmaid chuita quequin mimbi dada uaid isun aidotsen chiembi. Aido tantiaquin naden chuita Nuquin Icbon cainquoio yaqui Nuquin Icbon èbi chuibeneta caid icquin naden mibitedi chiembique. Tantiata. ²⁶ Natiatequid icnuc Esuquidistu tantiaquid chido inesa yec adequi tabad. Adecbidi, dadan inacmaid yec adequi tabadta chido. ²⁷ Chido inquit yec chido inesa icnu quenda. Adecbidi, chido inesa yec chido inu quenda. ²⁸ Chido inesa icboedi chido inquit yanash Nuquin Papan chiaid niaquesa nec. Adecbidi, dadan inacmaid icboedi dadan inaid yanash Nuquin Papan chiaid niaquesa chido nec. Natiaic cametequid icnuc, ¿Mitsipadentsimbi con chidobèdta con bacuëbo bèdambo icmepeba? quec chido inquit tabadec. Chido inesa in aden tantienquoio yec tabadec. Natiaic cametequid choec quec chido inesa yec adequi tabad. Adecbidi, dadan inacmaid yec adequi tabadta, quequin mibi chiembi ma natiamianquiecc quenquoio yec ma mibi tabadnueshun.

²⁹ Èmbi chuiboed mibi bèdamboen tantiamembique. Tantiata. Nidaidèn yuec tabadnu, quetiapimbo nuqui iquec. Nuquin Papa chieshènte ushè chonoc abi tantiaquid dadpen mèyansho isash Esuquidistu chote anoentsèqui yanegue. Abi yacno utsibo puduedtiapimbo icnushe qeshun min chido icnubi Nuquin Papa bunacpadomboen nabanec tabadta. ³⁰ Adecbidi, unësquio yec shubiquimbi Nuquin Papa bunacpadomboen nabanec tabadta. Adecbidi, bèdambo yequi Nuquin Papa bunacpadomboen nabanec tabadta. Adecbidi, mitsana icnubi aid tantienquoio yec Nuquin Papa bunacpadomboen nabanec tabadta. ³¹ Yuecshun èmbi nidaidènshun bedaid Nuquin Papan èmendac, quequin tantiaquin ambi chiacpadomboen nabanec tabadta.

³² Natiatequid nibèdpashun, qeshumbic natiamiantequid iquendac, quequin tantiembi. Aden tantiaquin chido inesa icta caombi. Chido inesa Esuquidistu tantiaquid icquin Nuquin Papan tantiacpadenuidi nanu qeshun aden nabanec tabadpec. ³³ Chido inquidien, Nuquin Papan tantiacpadenuidi nanu quiaash, ¿mitsipadentsimbi con chidobèdta con bacuëbo bèdambo iquebi camepeba? quec tabadec. ³⁴ Adquid Nuquin Papan tantiacpadenuidi nanu quetiapimbo iquec. Dadan inacmaidien Esuquidistu tantiaquid Nuquin Papan tantiacpadenuidi nanu quec adequi tabadpec. Dadan inaidien, Naden nashunacsho con bènèn bèdamboen istsiashi, quec tabadec. ³⁵ Aden mibi chuibanquimbi chido inesa chido bednu qesho, Chèn, caisa nebi. Nuquin Papan chiacpadomboen nabamboedèmbi utsi uain tantianushe qeshun èmbi tantiaid chuibanec nebi. Nuquin Papan tantiacpadomboen bèdamboen tabadmenuequin aden tantiaquin chuibanec nebi.

³⁶ Adembidi, Min champi bednu queboed chudte bunec mèmuntiapimbo icsho isun, Inec cho, camp. Min champi inec ic satiapimbo mibi iquec. Adecbidi, dadan inacmaid macho budsho isash, Bacuë tishtiapimbo yantsiash, quiaash, Con champi inec cho, quiaash ic satiapimbo adquid icoaic.

³⁷ Adecbidi, min champi inu queboedi, Bedenquio iquembi, quesho tantiashun menenda. Aden bedmenquio yec mibi bēdambo icpec. ³⁸ Con champi bedec cho, queshun bedmiash, Bēdambo iquebi, quenubi, Con champi dadan inacmaid iquec quec bēdamboshē utsi icpec.

³⁹ Dadan inaid icquin min bēnē nianenda. Min bēnē unēsān utsin inaid icnu quiash adta. Esuquidistu tantiesan inaid iquenda. ⁴⁰ Bēnua utsin inacmaid icnu quiash bēdamboshē iquec aid. Ēmbi tantiacpaden ěmbi chuiboed Nuquin Papan Mayanēn tantiamiacpaden chiaid nec.

8

Nuquin Papan uaidbimboecnuc nacnenaid tantiaquin pambid dasanaid

¹ Nēbi Nuquin Papan uaidbimboecnuc nacnenaid tantiaquin pambid dasanaid chuinnun naden chiembique. Tantiata. ¿Matsesēn nacnenaidta nuqui tantiaid ictic? Padenquio. Aden tantiaquin ěmbi tantiacpadpenquio icquid utsibo nec quequin mamēnshumpec. Aden tantiaquin mamēnshunquin utsi tantienquio iquec. Utsien, Naden nabanquindambi utsibo bēdamboen tabadmepeba, quequin tantiaquidquio nec. ² Ēmbibi tantiembi quequid tantiabenabictsēquid nec. ³ Nuquin Papa tantiaquidien Nuquin Papan tantiaidquio nendac.

⁴ Aden chuishun ¿Nuquin Papan uaidbimboecnuc matsesēn nacnenaid tantiaquin pambid dasanaidtambi pepe? quequin mimbi chuiquin dada uaboed isun chuinu. Tantiata. Nuquin Papan uaidbimboecnuc matsesēn nacnenaid nanac uec. Aden nanac uequid Nuquin Papa ictiapimbo iquec. Nuquin Papapadquid utsi nibēdquieic. ⁵ Nidaidēn samēdquid papa cain utsin cuēnaid dadpen iquec. Adembidi abuc samēdquid Papa cain utsin cuēnaid dadpen iquec. ⁶ Papa cain nuquin cuēnaidien Abia Yampidquio nec. Adquid utsi Nuquin Papa cainquio nuqui iquec. Aidi abitedimbo uabampampidquio nec. Aidquio tantiec nuqui tabadec. Adembidi Nuquin Icho cain cuēnaidquio Esuquidistu nec. Aidēmbi aton Papabēdtan abitedimbo uabampampid nec. Aidi cuesten dectanac abided cuidadac nuqui cuidtidquid icnubi Nuquin Papan cuēmbanaido yec ambi tantiaido nuqui nec.

⁷ Adembidi aid abentsēqui nuqui tantiaidquio icnubi Nuquin Papan uaidbimboecnuc matsesēn nacnenaid utsibon tantiaid iquec. Aden nacnenaid tantiaquin pambid dasanaid aidon pepec. Aden peboedēmbi Esuquidistu tantiaquid yanshun nacnenaid tantiaquin pambid dasanaid ěmbi pesho isun, Icsaosh, Nuquin Papan canushe, queshun adquid petiapimbo yanebi. ⁸ Nuqui piaid Nuquin Papa tantiamianesa nec. Ad icnuc Nuquin Papan uaidbimboecnuc matsesēn nacnenaid tantiaquin pambid dasanaid penquiocsho isash, Aid bēdamboquid nec, quenquio Nuquin Papa iquec. Adecbidi, nacnenaid tantiaquidēn dasanaid pesho isash, Aid bēdamboquid nec, quenquio icocai Nuquin Papa.

⁹ Padnuen Nuquin Papan uaidbimboecnuc matsesēn nacnenaid tantiaquin pambid dasanaid ěmbi bedshun pesho isash, Esuquidistu comapenen tantiaquidēn tantiaid nacnenaid nec, Esuquidistu tantiabenabictsēquid quenushe queshun padenquio iquembi. ¹⁰ Aid pesho isash, Nacnenaid papa cain cuēnaid nepec, queshun, Aid tantiaquin ěmbitsen pambid dasanaid penu, quetsiash Esuquidistu tantiabenabictsēquid. ¹¹ Padnuen ěmbi piaid Nuquin Papa tantiamianesa nec quequin mimbi tantiec. Aden tantiaquin nacnenaid tantiaquin pambid dasanaid mimbi pec. Aden tantiaquin mimbi penubi Esuquidistu tantiabenabictsēquidēn Nuquin Papa tantiamiantequid nacnenaid tantiaquin pambid dasanaid nec, quequin pec. Esuquidistu comapenen tantiaquid mibi icquimbi nacnenaid tantiaquidēn dasanaid ěbi

icsainquo ictequid nec quequin pequin Esuquidistu tantiabenabictsēcquido mimbi icsameyoc. Mimbi icsamiaido tantiec Esuquidistu unēsphanēdash. ¹² Ad icnuc Esuquidistu tantiabenabictsēcquid mimbi icsamequin Nuquin Icbon chiacpadomboen niacquid mibi neyoc. ¹³ Padnuen Esuquidistu tantiaquid utsibon icsamboen tantiaquin penushe qeshun padpiden penquo iquemi ma icsainquo icpanu qeshun.

9

Esuquidistu tantiaquidon natequid

¹ Esuquidistu chuibeneta cacmaid Pabado nec quequidotsen chuinu. Tantia. ¿Matsesēn nata caidtabi nedi? Padenquo. Esuquidistun ēbi chuibeneta caid nebi. ¿Aduidida nepeba quecta mibi icpe? ¿Nuquin Icbon chiacpadomboen ěmbi chuibanac mibitedi abi tantiaquido yanenquioda ictionda? ² Ai, ěmbi Esuquidistu chuibanac Esuquidistu tantiaquid mibitedi yanondac. Utsi-utsiec yacnocquid ěmbi chuibanacmaid icnubi, ěmbi chuibanado mibitedi nec, quequin tantiemi. ěmbi chuibanac Esuquidistu tantiaquid mibitedi yanshun, Esuquidistun ěbi chuibeneta caidquio nebi, quequin Pabado chiaid abimbo iquec, quequin bēdamboen tantiaquidquio mibi nepec tantesa uainquiocquin.

³ Aden ěmbi Esuquidistu chuibanac abi tantiaquid mibitedi icquimbi utsinutsinuen ěbi icsamboen chiec. Naden ěbi chieque. Tantia. Pabado Bednabebēdan chuibanasho pemenuoctiad, quequin chiec. Aden chiec onquequid ěmbibi tantiaquin naden aido chiembique. Tantia. ⁴ ¿Esuquidistu chuibanec bundoenquiodabi icpe? ⁵ Adembidi, Esuquidistu chuibanec utsibo aton chido Esuquidistu tantiaquid buanec capucuenesho isash, Bēdambo iquec, mibi quec. Adembidi utsibon aton chido buanubi Petedon aton chido buanasho isash bēdambo iquec quiashic Esuquidistu chuibanec ěbēd capuquimbi Bednaben aton chido buanasho isash, Icsambo iquec, quec mibi. ¿Esuquidistu chuibanec ěbēd capuequi aton chido buante bunenquioda Bednabe icpadic? ⁶ Adembidi, ¿Mibi pemembique. Penuequin nabanenda, capenda Esuquidistu chuibenecquid utsibo mimbi ique? Bednabebēda ěbi chiec, ¿Penun daēdshun shubumpi nacentiad, quepecta mibi ique?

⁷ Ad yenquo utsibo iqueque. Tantia. Chuinu. ¿Sondado icquinda aton na buanashon pepec? Padenquo. Abi nashunquidombien pemeshun acmec. ¿Icho abi nashunquid aton tiedēn caniquid pemedasa nepadic? Padenquo. Pemeshumbien acmepaid. ¿Baca shuma chinshun icbon aquenquioda icpadic? Acquimbien icbon icquid. ⁸ ¿Aden chuiquin ěmbibi tantiaidambi chuipo? Padenquo. Nuquin Papan Moises dada uamiampid ěmbi chiaid nec. ⁹ Nad iqueque. Tantia. Chuinu: “Min tiedēn caniquid ěshē chicnueshun min baca tsuc-tsucmequin dēpuquenda ma penu,” quequin Nuquin Papan chiaidquio nec. ¿Bacanuidi ma penu quequin Nuquin Papan chiaidta nepadic? Padenquo. ¹⁰ Matsesbēdtambi ma penu quequin Nuquin Papan chiaidquio nec. Adembidi ambi piaid tantiaquin nabanquido icbo nec. Penuequin tiedēn caniquid icbon faneshcaic. Adembidi, penuequin ěshēacsho bedquid icbo nec. ¹¹ Adembidi, ¿Nuquin Papan chiaid mibi paquiacquid yec pete bec cho quenquiotiadquidtabi nedi? ¹² Mibi chuibanquid utsibo menebanquimbi ěbia mibi chuifquidquio icsho menetiadquid menianenquo mibi icpoc. Aden ěbi menenquo yaqui ěmbi chiaid tantienquo icnushe quash, Bec cho, quetiapimbo iquebi mibi caic. Aden chuibanec bundoquec capucuenec nebi. ¹³ Nuquin Papa tabadte shubu uashunaid yacnoshon nashunquidēn ashunquio peshun aqec. Adembidi ashunquio nashunquid

utsibon matsesën Nuquin Papa menenun bëaid tauishun pambid tëshë bedshun peshun aquec. ¿Aden peshun acpec, quequin tantienquioda mimbi icpe? ¹⁴ Adomboembidi Esuquidistu chuibansho abi tantiaquidon yuedec, quequin Nuquin Papan chiaid nec.

¹⁵ Èbi yuedtiadquidi nec, quequin tantiequi ¿adabi pemenun yuedpec? guesa nebi. Adembi, Èmbi dada uaid buamiacscho isun èbi yuedtsiash, quequin dada uainquo iccombi. Bunqueic unësbuged mibi caic, Bec cho, quenquo iquendabi. ¹⁶ Èbibi Esuquidistu chuibenenu quenquioccobi. Ambi èbi chuibeneta cac Esuquidistu chuibenec nebi. Abi chiesha yanash unësquo ictsiabi. ¹⁷ Èmbibi, Esuquidistu chuibenu, quiash, Bec cho, quetsiandabi. Esuquidistun èbi chuibeneta caid yec ambi namiaidquo nebi. ¹⁸ Esuquidistu chuidenesho isash, ¿atotsi Pabaton bedpash, quepecta mibi ique? Naden Esuquidistu chuibenec nebi. Tantia. Bec cho, quenquiocquin Esuquidistu chuibenec nebi. Aden Esus chuibanac abi tantiaquid yansho isash bédambo iquebi.

¹⁹ Bec cho, guesa yec utsin yuacmaid nebi. Adquid yequi utsibo chuinec nidanec shubu utsin puduedcuenequin aidon namiaidbimboecquin aidbéd tabadquin chuibanec nebi. Adec tabadquin èmbi chiac ma aidotsen Esuquidistu tantiaquido yampanuna. ²⁰ Adecbidi, isadaidbo Esuquidistu chuibanuec aidobéd tabadquin mimbi natemaid èmbi natemaidpenquo nec, quenuocquin ambi natemaid nainquo iquemb. Adequic tabadquin èmbi chuibanac ma isadaidbotsen Esuquidistu tantiaquido yampanuna. ²¹ Adecbidi, isadaidpembo chuibanuec aido tabadacpadec abèdi tabadquin Esuquidistun chiacpadec niaquenquo yec tabadec nebi. Èmbi adoac isadaidpembotsen ma Esuquidistu tantiaquido yampanuna. ²² Adecbidi, Esuquidistu tantiabenabictsécquido chuibanuec èmbi tantiabenabi iccondapaden bëyuc tauain chiaidquo tantiamenuen chuibanec nebi. Èmbi adoac ma aidotsen Esuquidistu tantiabenquidquo yampanuna. Adequi tabadquin Esuquidistu chuibanec nebi. Èmbi adoac utsibo ma Esuquidistu tantiaquidquo yampanuna. ²³ Adec tabadequi ma èmbi Esuquidistu chuibeniac Esuquidistu tantiaquido yanash Nuquin Papa yacno nuquitedi tabadendac.

²⁴ Titinquecuededquido icnuc bëyuc abia titinquec choquid iquendac. Adquid icsho isun, Mibi badedquo titinquoic, quequin titinqueta quequidèn titinquec abia choquid menendac. Adembi, Nuquin Papan menete bèda iquec. Aid bednu, queshun Icbon chiacpadomboen nabanta, caimbi mibi. ²⁵ Badedquo titinquenequid bedte bunaid chodquetequid icnuc, Aid bednu, queshun abi bëdiactséc titincamete pete icsa actequid icsabèda isuidec titinquenequid iquec. Nuquien chodquetemaid bednuequin icsaid isuidec. ²⁶ Utsien, Bednu, quenquo yec titinquec. Adembi, Bednu, quenquo yec utsibéd mēdanten senanu quequin nibédacnoshombi mēdanten seded-sededec. Aden tantiaquin naisa nebi. ²⁷ Utsibon ma tantianu queshun Esuquidistu chuibenesho unësacscho Nuquin Papan menete bèda bedtiapimbo icmane quiash icsaid mēmunc tsadebi.

10

Isadaidbon chieshampicpadec tabadenda quiaid

¹⁻² Abi yacno abi tantiesha chosho puduedmenquo icchitoshe quiash Nuquin Papan chiaid chieshēnenquo yec bédamboec tabad, quequin tantiamenuen, Naded nuquin tsusedpabo tabadampic, quequin chiembique. Tantiata. Equipito yacnoshon ambi mēnchicaidobéd Moises puduanec

Nuquin Papan bëyucamiaid abu ushu tëdion nidanequin tsusedpabon Acte Piu potepampic. ³ Adec nidaniash yuecash aidtedi comapenec bundoacsho Nuquin Papan nadatiambocquin abucshun nebudaïd tsusedpatedishun pebededpampic. ⁴ Adembidi acte bundoacsho isun cuënote cuesquin acte chomiaïd acash, Èbi bëdambo icmequin Nuquin Papan ambi yuecshun chometequid Quidistubëd tan nadatiambocquin naid nec, quequin tsusedpabon utsin-utsinguien tantiabempampic. ⁵ Aden tantiabenubïen abëd icquid utsibon padenquio icpampic. Aden tantïesa Nuquin Papan nidaïd Canan caïd menenu caïd yacno niduidequi unësbudnepampic adquidtedi.

⁶ Tsusedpabo chïeshampicpadquid icnushe qeshun Nuquin Papan aïdo chuiquin dada uamepampic. ⁷ Ad icnuc tsusedpabon Nuquin Papan uaidbimboecnuc nacenashun papa cain tantiampicpaden tantienda. Naden Nuquin Papan aïdo chuiampic. Bacabimboecnuc ambibi nacenaid tantiaquin peshun acash baidacuededpampicpaden tantiaquin nainda. ⁸ Adembidi, tsusedpa utsibon ambi chudtemaïd chudampicpaden chudenda. Aden nasho abi ushëmbi tsusedpabo dadpen 23,000ted Nuquin Papan cuesunemepampic. ⁹ Adecbidi, ¿Ambi chiaïd niacshodabi Nuquin Papan cuidpeba? quiampicpadec adenda. Aden tantiaquido nisin pebededac unësbudnepampic. ¹⁰ Adecbidi, Equipito yacnoshon mënchicaïdo abi mënchicquid chïeshëc nadpampic. Equipito yacno iquec bëdambo iccondaïdi nëmbo choash bunec capuebi. Anobidï tabadec nidebi, queded-quededsho ambi abi yacnoshon uaid mayan bëdabo Nuquin Papan budmiaïdën aidtedi cuesunepampic.

¹¹ Abi tsibanquido tantiamenuequin tsusedpabo tabadnëdaïd icsa Nuquin Papan chuiquin dada uamepampid ëmbi chuiboed nec. ¹² Tsusedpabo Nuquin Papa chïeshëc icsapampicpadec icsamane quequin mibi tabadte tantiata. ¹³ Ènden tsusedpabo chïeshëmete icpampid abi iquec. Adaid natiatëquid icnuc chïeshënushe qeshun Nuquin Papan mibi tantiaquin uidën uac mibi icsainquio yec chïeshëtoenquio yec dayacquio iquendac.

Nuquin Ico Esuquidistu unësaïd tantiaquin acshumbic mayan icsa tantiaquin mimbi actiapimbo iquec quiaïd

¹⁴ Nuquin Papan chiaïd niacmane quiash, Nuquin Papan uaidbimboecnuc matsesën nacenaid tantianu, quenda. Dacuëdec cuenacimboc aïd nanacno nidenda. ¹⁵ Tantiabenquid icsho mibi chïec nebi. Pabado chiaïd abimbo iquec quequin tantïec aïd nanacno nidenquio yec Esuquidistu chuibansho tantïec iccuededteneta. ¹⁶ ¿Iccuededquin sicaïd acnun Nuquin Papa chïec onqeshun acted-actedquin matses icsaïquid icsho cuidnushe quïash abided cuidadec Esuquidistun intac chididiquaïd tantïen icquinda nuqui acti? ¿Adembidi, pete cuësh-cuëshun Nuquin Papa chïec onqeshun aton dada mëyanaid tantïen icquinda nuqui pedi? ¹⁷ Esuquidistubëd abentsëc yacimbocquido nebi, quequin tantiaquin pete cuësh-cuëshun meniac abentsëcshun piacimbocn abï tantïec iccuededquidon pebededec.

¹⁸ Aden nuqui pebededacimbocn isadaïdbo icsaïd cuidnuen nidaidën capuquidded cuesuniaïd pambid tauiquin Nuquin Papan shëdtequid pambid bedshun cuesunequidbëd tan nidaidën capuquid icbon pepanëdash. ¹⁹ Aden ëmbi chïac ¿atotsi Pabado ëbi tantiamete bumpec, quepecta mibi iquec? Mibi naden tantiamëmbique. Tantiã. ¿Nuquin Papan uaidbimboecnuc matsesën nacenaid tibopecta iquec? Padenquio. ²⁰ Adec adquid tibopecta icnuc mayan icsa tantiaquin Esuquidistu tantïesan Nuquin Papan uaidbimboecnuc matsesën nacenaid yacnoshon pambid dasanec. Aden aïd pambid penu, qeshun mayan icsabëd yacimbocquid nebi, quequin

pec. Adquidbēdtan penda. ²¹ Nuquin Icho Esuquidistu unēsaid tantiaquin acshun mayan icsa tantiaquin actiapimbo mibi iquec. Adembidi, Esuquidistu unēsaid tantiaquin pete peshun mayan icsa tantiaquin pambid petiapimbo iquec. ²² ¿Aid tantiaquin acshun pequin Nuquin Papa nēishmenquioda mimbi icti? Ai, abitedi tantiaquidquo icquin abitedi isquidquo icquin Nuquin Papan mibi cuidendac.

Ēmbi natemaid naden nata caid nibēdec, quiash nanueboedi Esuquidistu tantiaquid utsi icsamemane quiash nainquiocte chiaid

²³ Nēid mishtemaid nec. Nēid petemaid nec. Nēid actemaid nec, quequin ěmbi chuitequid nibēdec, quiash Esuquidistu tantiaquid utsi icsamemane quiash nainquio yec tsadebi. Matsesēn ambi nacnenaid tantiaquin pambid dasanaid ěmbi tantiamaid nec, quiash pambid dasanaid petiadquo iquequi Esuquidistu tantiabenabictsēcquidēn, Nēid nacnenaid nuquin papa caid nec, quequin penushe quiash penquo yec tsadebi. ²⁴ Utsi tantienquiocquin nacnenaid pambid dasanaid piash bēdambo iquebi, quenda. Naden natiad. Matsesēn nacnenaid pambid dasanaid ěmbi pesho isun utsibon icsamboen tantiatsiash, quequin penda.

²⁵ Aton na sambededacno nidshun pambid bednuequin, ¿Nuquin Papan uaidbimboecnuc matsesēn nacnenaid pambid dasanaid bedaidta nec? quenguicquin bedta. ²⁶ Abu nidaidbēdta uashun aidēnquo icquidtedi Nuquin Papan uampidquo nec. Aidedimbo aton na nec. Nacnenaid yacnoshon pambid sambededaid aton na nec. Aidēn bacuēbo iquec aid pambid pequido mibi nec. ²⁷ Aden tantiec Esuquidistu tantiesan, Pec cho, cac, Ai, quiānec nidec puduedshun, Mimbi codocaid matsesēn nacnenaid tantiaquin pambid dasanaid bedaidta nec, quenda. ²⁸ Adnubien mibi puduedacno isedquid utsi Esuquidistu tantiabenabictsēcquid tsadquin, Matsesēn nacnenaid papa cain cuēnaid tantiaquin dasanaid nēid pambid nec, cac aid pambid penda. ²⁹ Ēmbi papa cain cuēnaid nec, quequin utsin tantianushe queshun aid pambid penda. Matsesēn nacnenaid con pa nec, quequin cuēnaid tantiesa icquin ¿atotsieshumbimbi matsesēn nacnenaid tantiaquin pambid dasanaid penquo iqueque? Chuinu. Tantia. ³⁰ Nuquin Papa ěmbi tantiaidquo icnuc penun aidi chuisho isash ¿atotsieshun matsesēn nacnenaid papa cain tantiaquin pepec utsibo quepec? ³¹ Edoen utsibo tantiamenuen bēdamboen nabanec tabadteneta. ³² Aden naic, Esuquidistu tantiaquid isadaidbo isadaidpembobēdta Esuquidistu bēdamboen tantiabemequiono, quec bēdamboec tabadta. ³³ Naden naic ěbide bēdambo iquebi, quenda. Naden ěmbi nabanuc ěbēdi utsi bēdambo ictsiash, quequin tantiata ma Nuquin Papa yacno puduedtequid utsibo yanu queshun.

11

¹ Ambia tantiaquidēn Esuquidistu icmiacpadquiec tabadec nebi. Adecbidi ěmbi chuiquin ismiacpadquiec tabadteneta mibitedi.

Nuquin Papa tantiaquin iccuededquin naid

² Mimbia tantianēdaidquo mibi nec, quequin mimbi chiaid tantiaquin nabanec nebi, quequin mimbi dada uashun bēmiaid isash bēdambo iquebi. Adembidi, Esuquidistu tantiabenēdaidon chuibanaid mimbi chiacpadomboen tabadec, quequin mimbi dada uaid bēmiaidon chuibansho tantias bēdambo iquebi.

³ Mimbi natequid utsi chuinu. Tantiata. Abi tantiaquid chuiquid Esuquidistu nec. Adembidi chido chuiquid dada nec. Adembidi Esuquidistu chuiquid aton Papa, Nuquin Papa caid, Edoen nec. ⁴ Adquid Nuquin

Papa nec, quequin, Aid chuinu, qeshun aton mauete chicquid dadan. Aid chuinen mauec tabadquin, Ēbi chuiquidpenquo Esuquidistu nec, quiacimboen ismequid nec. Adembidi Nuquin Papan chiaid tantiamequin chuibanquidēn aton mauete chiquec. ⁵ Chidoen, Ēbi chuiquid Esus nec, quequin ismec mapucudash tsadec. Adec mapucudenquo yec tsadquin Esuquidistu tantiaquido iccuededacnoshon Nuquin Papa chienda chidon. Adembidi anoshon Nuquin Papan chiaid chuibanenquo ictiad. ⁶ Ēbi chuiquid nibēdec, quiacimboec tabadsho matasmetiad. Matasmias ma mapucudpanu chido. ⁷ Nuquin Papa aton madobēd onquec: Nuquibimboecnuc matses uanuna, quiampicpaden dadaba uapampic. Nuquin Papabimboec icquid nebi, quiash tsadquid dada. Ēbi chuiquid Abia Yampid nec, quequin ismenuec aid chiecon quec mauete maueta dada nec. ⁸⁻⁹ Dadaba Nuquin Papan uapampic. Dadabēd icquid uanuna qeshun dadan shictodo chicshun chido uashun, Mibēd nashunanquid nec, quequin dada menepampic. ¹⁰ Adquid icmiac dada ěbi chuiquid nec, quequin nashunec chidon. Adsho isash Nuquin Icbon abi yacnoshon uaido, mayan bēdabo abi chuiquid chieshēnquio yec Icbon chiapadquieci tabadec. ¹¹ Nēid chido nec. Nēid utsi dada nec, quenubi nashunanquid abi daēdi nec. ¹² Dadan shictodo chicshun chido uapampic. Adecbidi chidon tishaid dada nec. Ambi tantiampicpaden Nuquin Papan naidtedi nec. ¹³ ¿Nuquin Papa chuinec ěbi chuiquid nibēdeque. Matasadnu quiash chido bēdamboeda icpadic? ¹⁴ Chido isadacpadec isadnu quec icsambo dada ictsias. ¹⁵ Chido isadacpadec dada icsho isash, Chido nec, quetsias. Dada isadacpadec chido isadenquio iquec. ¹⁶ Ēmbi chuiboed tantias, Icsamboen chiosh, quetsias. Adquid naden chuinu. Tantia. ¿Ēmbentsēquidambi aden chie? Padenquo. Ēbipadquiocquin chuibenquidon adomboembidi chuibanec. Adembidi Esuquidistu tantiec iccuededquid utsibon tantiabedec.

Nuquin Icho unēsash uincuenaid tantiaded-tantiadedta quiaid

¹⁷ Adecbidi, Mimbi naidtedi bēdambo iquec, quetiapimbo iquebi. Adquid chuinu. Tantiata. Esuquidistu tantiabenquid utsibo icmenu, quenquio yec mibi iccuedec. ¹⁸ Abentsēc yacimboec iccuededesa Esuquidistu tantiaquido Codinto yacnocquido nec, quiosh. Adsho tantias, Abimbo capec, quiobi. ¹⁹ Nēidtedi ěmbi bēdamboen isaido nec. Utsitedi ěmbi icsamboen isaido nec, quiash cuēshēdabimboec mibi tabadcuededec. ¿Adec tabadshoda Nuquin Papan mibi bēdamboen ispec? Padenquo. ²⁰ Adec tabadquin Esuquidistu unēste tantienquiocquin utsin-utsinquien peshun acted-actedec. ²¹ Utsibo cainenquiocquin abia choquidon nua pebededec. Adoac utsibo choash bunec tabadnubi abia choquido paēmbocquid nua acash tantienquio yec tabadec. ²² ¿Min nuntan pete nibēdpecta iquec? Mitsana iquec. Adec mitsana min shubuno icnuc ¿Esuquidistu unēste tantiec utsibobēd iccuedednu, quenquiocquinda mibia choshon pebededpe? ¿Natiastianquieci pete nibēdchitec pete nibēdquid camenuenda mimbias pebedede? Aden pebededquido ¿atotsimbi chuipe? ¿Bēdamboen mimbi nabanec quepectabi iquec? Padenquo. Aden naquin Esuquidistu unēsaid tantienquiocquin mimbi pec.

²³ Nuquin Icbon chiapadomboen mibitedi chuibanondambique. Tantiata. Chuinu. Nēid inchēshēmbi ěbi chieshēnquido ēbēd icquidēn ěbi bedmendac, quequin Esuquidistun abi unēste tantiaquin nadopanēdash. Pete bedshun ²⁴ Nuquin Papa chuishun cuēsh-cuēshun naden abēd icquido chuipanēdash: “Pete cuēshaid bedash matses icsaquid icsho cuidnushe

quiash ëbided cuidadec unëste tantiaquin pebededta,” quepanëdash Esuquidistu. ²⁵ Aden chuishumbic aid pebededsho isun pete utsi pebededquin nainshun ademibidi dëshote bedshun sananquin naden Esuquidistun chuipanëdash: “Esuquidistu unësqin ëbi chian anëdënquiacno nësecatequid icsho mënchictequid Esuquidistu iquec, quequin tantiaquin sicaid acbededta. Sicaid acquin ëbi mënchictequid iquec quequin tantiaquin acban.” ²⁶ Aden Esuquidistun ismenëdacadomboen petë cuëshëmpi pebededshumbic sicaid acbededta. Nuquin Icho unësaid tantiaded-tantiadeddquin aid padpidec choabincuc adobanta. ²⁷ Abi unëste tantienquiocquin pete cuëshun peshun acquin Esuquidistun chiaid niacquid nec. ²⁸ ¿Pete cuëshëmpi penun Esuquidistubëd tabadacpadquiectabi tabadpe? quequin mibi utsibëd tabadte tantiata. ²⁹ Esuquidistu unësaid tantienquiocquin peshun acquid Nuquin Papan cuidendac. ³⁰ Aden adquidon peshun acac utsi-utsiec padishec; utsi-utiec daicsambo yanec; utsi dadpen ënden unësad. ³¹ ¿Adabi Nuquin Papan chiaid niaquenguo yec tsadpe? quequin tantiec tsad. Aden tantiec tsadshumbic, Icsaobi, Papa, qeshun mibi icsaid chuiban. Aden chuishun Esuquidistu unësaid tantiaquin pete peshun sicaid acta. Aden mibi icsaid chuishun pesho isun Nuquin Papan mibi natiaic camenguo iquendac. ³² Adesa icsho Nuquin Papan natiaic camiaid mibi iquendac. Abi tantiesabëdta chian anëdënquequid nësecadenquo mibi icmenuen Nuquin Papan mibi natiaic camec ma ëmbi chiacpadomboen nabamenuequin. ³³ Adembidi Esuquidistu unësaid tantianuec iccuededquin utsibo choabi iquec quequin aido cainta. ³⁴ Bundoshon min nuntanshun pe. Aden pesho isash, Icsamboen naique. Cuidnu, quetiapimbo Nuquin Papa iquec.

Padi. Esuquidistu unësaid tantianuequin naden nata quequin chiombi. Mibi yacno nidash puduedshun ëmbi chuiboed daëd uain chiendambi.

12

Nuquin Papan Mayanën tantiamiaid

¹ Nuquin Papan Mayanën tantiametequid chuinu. Tantiata. ² Ënden mibitedi Esuquidistu tantiesa yec Nuquin Papan uaidbimboecnuc ambi nacnenaid matsesën ismec, Nëid papa cain cuënaid nec, qesho tantiaquido mibitedi iccondac. ³ Adquid iccondaidi Esuquidistu tantiaquid mibi yanacsho naden chiembique. Tantia. Nuquin Papan Mayanën tantiamiaido: Esus Nuquin Icbopenquo, Nuquin Papan Chomiacmaid nec, quetiapimbo adquido iquec. Adecbidi, Nuquin Papan Mayanën tantiamiacmaido: Esuquidistu con Icho nec, quetiapimbo icoaic.

⁴ Nuquin Papan Mayanën, Naden nata, quequin tantiametequid Esuquidistu tantiaquido iquec. Adec ambi tantiametequid dadpen icnubi aid abentsëcquiobi tantiamianquid Nuquin Papan Mayan nec. ⁵ Adecbidi, utsi nashunquido Esuquidistu tantiaquido icnubi utsi nashunquidon Icho abentsëcquiobi Esuquidistu nec. ⁶ Adecbidi, nadatiambocquin nabanquid utsi-utsiec icnubi Nadatiambocquin namianequid abentsëcquiobi Nuquin Papa iquec.

⁷ Esuquidistu tantiaquid utsibëd tantiananquin namenu, quequin aton Mayan Nuquin Papan nuqui menec. ⁸ Nuquin Papan Mayanën tantiamiac ambia comapenen tantiaquidquo icquin chuibanquid utsi-utsiec iquec. Nuquin Papan Mayanën tantiamiac ambi tantiaid chuibanquid utsi-utsiec iquec. ⁹ Nuquin Papan Mayanën tantiamiacpaden ëmbi chiacpadomboen Nuquin Papan naic, quequin tantiaquid utsi-utsiec iquec. Nuquin Papan Mayanën tantiamiac bëdamequid utsi-utsiec iquec. ¹⁰ Nuquin

Papan Mayanën tantiamiac nadatiambocquin nabanquid utsi-utsiec iquec. Nuquin Papan Mayanën tantiamiac Nuquin Papan nanun chuipampid tantiaquin chuibanquid utsi-utsiec iquec. Nuquin Papan Mayanën tantiamiac matses bédamboec tabadsho isash, Nuquin Papan Mayanën tantiamiaid nec, quequin tantiaquidquo utsi-utsiec iquec. Adembidi, utsi icsamboec tabadsho isun, Mayan icsan namiaid nec, quequin tantiaoaic. Nuquin Papan Mayanën tantiamiac nidaidën icquid onquiacmaidën onquequid utsi-utsiec iquec. Adembidi Nuquin Papan Mayanën tantiamiac nidaidën icquid onquiacmaidën onquesho tantiaquidën tantienquiocsho isun aidon onqueten chuibanquid utsi-utsiec iquec. ¹¹ Aden Nuquin Papan Mayanën tantiamiac nabanquido nuquitedi nec. Ambi tantiacpaden abentse-abentsen Nuquin Papan Mayanën aden tantiamiec.

Dada abentsëc yacpadquiec Esuquidistu tantiaquidtedi iquec

¹² Uidënaid dadpen icnubi matsesën dada abentsëc iquec. Adquibidi Esuquidistu tantiaquid dadpen icnubi ambi tantiaid abentsëcquiobi Esuquidistu iquec. ¹³ Ad icnuc isadaidbo yec isadaidpembo yec utsin yuaid yec utsin yuacmaid yec quec Esuquidistu tantiaquid iquec abi tantiaquido nuquitedi iquec. Adquid nuqui icsho Nuquin Papan aton Mayan memaïdo nuqui nec.

¹⁴ Matsesën dada abentsëqui icnubi uidënaid dadpen iquec. ¹⁵ ¿Médantepadquidpenquio yec matsesën dada uidënacmaidta taë icpec? Padenquio. Dada uidënaid taë iquec. ¹⁶ Adecbidi, ¿ëshëpadquidpenquio yec matsesën dada dëccuësquiacmaidta dëbiate icpec? Padenquio. Dëbiate dëccuësquequid iquec. ¹⁷ Matsesën dada êshëuidpambo icquin ¿atontsin tantiapatsiash? Adecbidi, aton dada pabiateuidpambo icquin ¿atontsin shëdpatsiash? ¹⁸ Nuquin Papan tantiampicpadquiequi matsesën dada uidënaid nec. ¹⁹ Dëccuësquequid abentsëc icnuc dada nec quetiapimbo iquec. ²⁰ Uidënaid dadpembëd dëccuësquequid dadpen icnuc matsesën nami abentsëqui iquec.

²¹ Matsesën dada ad icnuc, ¿Médante bédambo icnubi êshë padenquio iquec, quepecta mibi ique? Padenquio. ²² ¿Isadesa uidënaid uquëducquid nibëdnuc matsesën dada bédamboda icpatsiash? ²³ Uidënaid uquëducquid ismenquiocquin ompoaidquio utsi nec. ²⁴ Nami isaidquio ompodesa nec. Nuquin Papan tantiampicpadquiequi ompoaid nibëdnuc matses cuëdenquio yec unësec. ²⁵ Ad icnuc, Icsambo icmianeque. Tësnu, quetiapimbo icho iquec. Ompoaid ompodesa aidbëdi iquec bédambo yec nashunanquid aïtedi nec. ²⁶ Abentsëc paëmbo iquec matsesën dada bédambo iquenquio iquec. Adquitedi bédambo iquec matsesën dada abichobi paëpenquio iquec. Adecbidi, Esuquidistu tantiaquido abentsëc yac bimboec iquec abentsëc icsacsho isash abitedi unësquio iquec. Abentsëc, Bédambo iquebi, quenuc aidbëd abitedi bédambo iquec.

²⁷ Adquidtedi matsesën dada abentsëc yacpadquiec Esuquidistu tantiaquidtedi aidën dada abentsëc yac bimboecquid nuqui nec. Abi tabadtequid iquec. ²⁸ Abi tabadtequid nadquid iqueque. Chuinu. Tantia. Ambi chiacpaden ambi ëbi chuibeneta caidoba iquec. Nuquin Papan chuipampid comapenen tantiaquin chuibanquid utsi iquec. Esuquidistu tantiaquid icsho isun nadec tabad quequin chuibanquin ismequid utsi iquec. Nاداتiambocquin nabanquid utsi iquec. Bëdamequid utsi iquec. Utsi nashumbanquid utsi iquec. Esuquidistu tantiaquid iccuededquido namequid utsi iquec. Abi onquiacmaidën onquequid utsi iquec. Adquidtedi nuqui iquec abentsëc yac bimboec nuqui tabadec. ²⁹ ¿Esuquidistu tantiaquidtedida

ambi ëbi chuibeneta caid icpadic? Padenquo. ¿Esuquidistu tantiaquidtedida Nuquin Papan chiampid comapenen tantiaquin chuibanquid icpadic? Padenquo. ¿Esuquidistu tantiaquidtedida, Nadec tabad, quequin ismequid icpadic? Padenquo. ³⁰ Adecbidi, ¿Esuquidistu tantiaquidtedida bêdamequid icpadic? Padenquo. ¿Esuquidistu tantiaquidtedida abi onquiacmaidên onquequid icpadic? Padenquo. ¿Utsi onquiacmaidên onquesho tantiaquidên tantienquiocsho isun aidon onqueten onquequin chuibanquidtedida icpadic? Padenquo. ³¹ Nuquin Papan Mayanên tantiamete utsi-utsiec icnuc, ¿Atotsibi icte bumpe? quequin tantiaquiota. Esuquidistu tantiaquid tantiabemenuequin ëmbi abia chuibambocpadquid icte bunquiota.

Utsi tantiaquidquo

Ëmbi chuiboetedi Esuquidistu tantiaquido Nuquin Papan Mayanên tantiamete bêdambo iquec. Padnuen ambi tantiamequin bêdamboshê icmetequid iqueque. Aid tantiauidquidba chuiboshombic aid tantiaquidquo chuinu. Tantiata.

13

¹ Matses utsi-utsiecquid onquiacpadquiec anquiadquid, adecbidi Nuquin Papan abi yacnoshon uaid, mayan bêda onquiacpadquiec onquequid icquimbi utsi tantiesa icquin chuibansho abipenquo chuisho utsibon tantien-dac. ² Utsibic, Nuquin Papan Mayanên tantiamiac chuibanquid adembidi Nuquin Papan chienquo icampid Nuquin Papan Mayanên tantiamiac tantiaquid aidi niosh. Aidëmbidi Nuquin Papa nadatiambocquin naquidquo nec, quequin tantiaquin, Mananuc macuësh dapa icboedi acte nantan nënitsinoa, Papa, cacpadomboen nënitsinoac nidquid isquid icquimbi utsi tantiesa icsho, Bêdambocquid mibi nec, Nuquin Papan catiapimbo iquec. ³ Utsibic, aton na nibêdsho menequidquo niosh. Adembidi, Esuquidistu tantiesa nebi cata, cac padenquiocsho mëyanaid niosh. Adquid icquimbi utsi tantiesa icsho, Bêdamboen mimbi naoc, Nuquin Papan catiapimbo iquec. ⁴ Padnuen Nuquin Papan Mayanên bêdamboshê ictequid tantiamiaid nadquo iqueque. Chuinu. Tantiata. Utsi tantiaquidquo utsi tantiamequionec chushcanesa nec. Utsi tantiaquidquo nashundenequid nec. Utsi tantiaquidquo utsin na isash adquidquo con na bêpashun quesa nec. Utsi tantiaquidquo dëniacanquidquo yec dëniacanquidquo nebi abibi quesa nec. Utsi tantiaquidquo ëbentsëqui tantiaquidquo nebi quiacimboen nabanesa nec. ⁵ Utsi tantiaquidquo utsi icsamboen tantiaquin nabanesa nec. Utsi tantiaquidquo, Ëmbentsëqui tantiacpadomboenuidi utsitedishun nabantiad, quesa nec. Utsi tantiaquidquo badedquo nëshesa nec. Utsi tantiaquidquo abi icsamboen nasho cuidesa nec. ⁶ Utsi tantiaquidquo utsi icsambocsho isash, Unësquo iquebi, quec tsadquid nec. Adecbidi, utsi bêdambocsho isash, Bêdambo iquebi quec tsadquid neoaic. ⁷ Utsi tantiaquidquo utsi icsaid chienquo yec tabadquid nec. Utsi tantiaquidquo ambi nanaid nibêdsho isash ampiash badedquo quenquo yec ¿mitsimboembi nampoba? quec onquequid nec. Utsi tantiaquidênquo utsi icsadenesho isun, Tantiamiac Nuquin Papan chiacpadomboen natsiash, quequin chuibanendac. Aden chuishun bêdamboen nasho isnuen cainquid nec. Mëyanaqui chieshenquo yec dayacquio yec tabadtenequid utsi tantiaquidquo nec.

⁸ Utsi bêdamboen tantiaid ënëdtiapimboctequid nec. Nuquin Papan chiaid chuibantsaidien ënëndac. Adecbidi, matses onquaidtedi ënëndac. Adecbidi Nuquin Papan ambi uaidtedi ëmiac matsesën isquin tantiaid ënëdoaic. ⁹ Nabanaidtedi tantiabenabictsëcquidquo nuqui nec. Adecbidi Nuquin Papan chiampitdedi tantiabenabictsëcquidquo nuqui neoaic.

¹⁰ Nidaidën tabadquin aidtedi tantiabenabictsäcquidquio nuqui icboedi Nuquin Papa yacno puduedash abitedi tantiaquidquio nuqui iquendac.

¹¹ Bacuë yec bacuëmpi onquiacpadec onquepadenebi. Adembidi, bacuëmpin tantiabenabi yacpaden tantiapadenembi. Adquid icquin caniaidën tantiacpadpenquiocquin tantiapadenembi. Adquid icboedi caniaish bacuëmpin tantiacpadpenquiocquin tantiabenondambi. ¹² Nëbi isnanten bëisadquin Nuquin Papabimboecquid nuqui isec. Yueshun abi yacno puduedshun aidquobi Edoen Nuquin Papa nuqui bëistuidendac. Nëbi Nuquin Papa isenquiocquimbi ambi chiaid tantiatsembi. Ambi tantiacpaden yueshun bëisquin nuqui tantiabenendac aid.

¹³ Nidaid ënëdnuc nëidtedi ënëdtemaid iqueque. Chuinu. Tantia. Ambi chi-acpaden nabanquidquio Nuquin Papa nec, quequin tantiaid ënëdtemaid nec. Adecbidi Nuquin Papa yacnoësh abipadquid bëdambocquidquio iquendabi, quequin cainquin tantiaid ënëdtemaidquio nendac. Adecbidi, utsi tantiaid ënëdtemaidquio neoaindac. Aidtedi ënëdtemaid icnuc nidaidën tabadquin, Utsi tantiembi, quequin ismiac utsi dadpen Esuquidistu tantiaquid yanash mibëdi Nuquin Papa yacno tabadendac. Adquid bëdamboshëcquid nec.

14

Mimbi chiaid chuibanquid ëbi icme, Papa, quaid

¹ Utsi tantiaquid icta. Nuquin Papan Mayanën adquid icmiosi, quequin ambi tantiamëte utsi bunquiebique. Adec bunsho mimbi chiaid comapenen bëdamboen chuibanquid ëbi icme, Papa, quequin chuiban. ² Aden tantiamiac tantiamenu qeshun tantianuequidën onqueten chuiban. Aton onqueten onquenquiocsho aidon tantienquio iquec. Padnuen onquaidtedimbo Nuquin Papan tantieque. Aden nidaidën icquid onquiacmaidënquo Nuquin Papan Mayanën tantiamiacpadec onquequin Nuquin Papa chieç onqueta. ³ Ma Esuquidistu utsibon tantiabenu, qeshun Nuquin Papan chiaid chuibanec. Adembidi matses ma bëdamboec tabadnu qeshun chuibanec. ⁴ Nuquin Papan Mayanën tantiamiac nidaidën icquid onquiacmaidën onquequin onquequiduidtsëqui tantiabenquid yanec. Padnuen Nuquin Papan chiaid Nuquin Papan Mayanën tantiamiac Esuquidistu tantiaquido ma Nuquin Papan chiaid tantiabenu qeshun chuibanec. ⁵ Nuquin Papan Mayanën tantiamiac nidaidën icquid onquiacmaidën Esuquidistu tantiaquidtedi onquepashun. Aden chuishumbic adec onquenquiocquin Nuquin Papan chiaid chuiban caimbi. Nuquin Papan chiaid comapenen tantiaquin chuibanac Nuquin Papan chiaid utsibon tantiabenendac. Padnuen nidaidën icquid onquiacmaidën chuibanac tantianuequidën tantienquio iquendac. Aden tantienquiocsho isun abi daëdi onquaid tantiaquin chuibanquid nibëdnuc nidaidën icquid onquiacmaidën chuibanenda caimbi.

⁶ Adembidi chuinu. Utsibon tantia. ¿Mibi yacno choash puduedshun nidaidën icquid onquiacpadec onquenquiocquin ëmbi chuibanasho tantienquio yec, Bëdambo iquebi, quecta mibi tabadpe? Padenquio. Nuquin Papan chiaid dada uamiampid min onqueten ëmbi chuibanasho mimbi tantiampeç. Min onqueten chuibanenquio yec ëbibi onquiacbimboecsho mimbi tantienquio ictsiandac. ⁷ Shoncatempi abibi shoncadiapimbo iquec. Adembidi, aid shoncaisan shoncasho tantiatiapimbo utsin iquec. Adembidi aid cuëdëmesan tentencate cuëdëmesho tantiash, Adomboen cuëdëmenquio ic-cosh, quec. ⁸ Adembidi, utsibo yacno ma cuesnanu qeshun chomenuequin sondadon tantiabocpadpenquiocnoc shoncac choenquio iquec. ⁹ Adecbidi, utsi onquiacmaidën onquequin chuisho ¿mitsipaden tantiapatsiash? Utsibon tantienquio iquec. Aden chuibanec nibëdacno onquiacbimboec onquepec.

¹⁰ Onquete utsi-utsiec dadpen iquec. Aton onqueten onquequin chuibansho matsesën tantiec. ¹¹ Utsin onqueten chiac tantiatipimbo yec, Onquequin chuibanquid con matsespenquio nec, quequin tantiec. ¹² Ad icnuc, Nuquin Papan Mayanën ëbi tantiamuepec, qeshun, Esuquidistu tantiaquido ma tantiabenguido yampanu qeshun mimi chiaid chuibanquidquio ëbi icme, Papa, quequin Nuquin Papa chuita.

¹³ Nidaidën icquid onquiacmaidën onquequid nebi, quequin tantiec. Adec onquequin chuibanquin iccuededquidon onquetenquio ëmbi chui-boed chuioaquid icme, Papa, ma tantiapanu, quequin Nuquin Papa chuita. ¹⁴ Nuquin Papa chiec ëbi onquiacmaidën onquesho utsibon tantienquio iquendac. ¹⁵ Aden abi onquiacmaidën onquequin utsibon tantienquio icscho ¿mitsipadentsimbi tantiamepe? Naden naimbi. Iccuededquido onquiacmaidën onquequin Nuquin Papa chuishumbic tantiamenun iccuededquidon onqueten onquequin chuibanooanuna. Adecbidi, iccuededquid onquiacmaidën Nuquin Papan naid chiec cuëdënashic tantiamenuec iccuededquidon onqueten cuëdënoanuna. Adembidi abi onquiacmaidën onquequin chuibanshun iccuededquidon onqueten chuibanooatiapimbo icquin abi onquiacmaidën onquequin chuibanenguido iquembi. Adecbidi abi onquiacmaidën cuëdënenquio iquebi. ¹⁶ Iccuededquido onquiacmaidën onquequin Nuquin Papa chuibanuc ¿mitsipadec, Ai, abimbo iquec, quepec aido? Aton onqueten onquequin Nuquin Papa chuibansho tantias, Mibi bëdambo iquec, Papa, quequin chiendac. ¹⁷ Abi onquiacmaidën onquequin Nuquin Papan naboad chuibanac Esuquidistu tantiadonequidquio mibëd iccuededquido yantiapimbo iquec.

¹⁸ Èbibi utsin-utsinguec onqueten onquequidquio icnubi mibitedi adesa nec. Padnueni adec onquec bëdambo iquec, Papa, quequin chuidedchuidedembi. ¹⁹ Padnuen chuinuec Esuquidistu tantiaquido iccuededacno puduedash ma tantianu quiash aton onquete daëdpactsëc tantias anquiadquid icquin aitedictsëqui chiendambi aido onquiacmaidën onquenquicquimbi.

²⁰ Adembidi chinu. Utsibon tantia. Bacuëbo tantiabenebictscëquid yacpadquec icsaid tantiesa icta. Ènden caniaidën tantiabenshun ismiacpaden bëdamboec tabadquin ismeta. ²¹ Nuquin Papan chiampid nad iqueque. Tantia: “Èmbi chuiban cac aton matsesën chuibanac tantiate bunesa icquin niacquid isadaidbo niosh. Adshobimbi matses utsi yuamiac isadaidbo onquiacmaidën onquequin chiac tantiesa icquin ëmbi chiacpadomboen nate bunenquio icoposh,” quequin Nuquin Papan dada uamiampid nec.

²² Adoaidi Nuquin Papan Mayanën tantiamiac abi onquiacmaidën onquequin chuibanquin Nuquin Papan chiaid tantiabenguido Esuquidistu tantiaquid icmetiapimbo iquec. Padnuen adec onquequin chuibansho tantias, Nuquin Papan naid nec, quequin Esuquidistu tantiesa icboedi abi tantiaquid yantsias. ²³ Padnuen Esuquidistu tantiaquido iccuededacno Esuquidistu tantiesa puduedshun abi onquiacmaidën abitedi onquecuedesho tantias, Aidon tantiate icsabudpash, quepec. ²⁴ Padnuen Esuquidistu tantiaquido iccuededacno Esuquidistu tantiesa puduedshun aton onqueten abentsëcshun-abentsëcshunquien Nuquin Papan chiaid chuibansho tantias, Icsaobi. ²⁵ Nëbi ëbi bëdambo icmequid Esuquidistu tantiate bunebi, qeshun abi icsaid ambi chienquicoed Nuquin Papa chiasic, Nëmbo iccuededquidobëd mibi iquec, Papa, quequin chuibampec Esuquidistu tantiaquid yanshun.

²⁶ Adembidi chuinu. Adembi tantiata. Esuquidistu tantiaquid iccuededec cuëdënu, utsi quenubien; Nuquin Papan chiaid tantiamequin chuinu, utsi quenubien; naden Nuquin Papan ismioshibique. Chuinu, utsi quenubien; mibi onquiacmaidënuquo onquequin chuinu, utsi quenubien; mibi onquiacmaidën chuisho tantiombique. Min onqueten chuinu, utsi quetsiash. ²⁷ Aided, Chuinu, qesho ¿mitsicquid chuïta nuqui cape? queshun naden chiac bëdambo ictsiash. Chuinu. Tantia. Mibi onquiacmaidën onquequin chuinuequid daëd icnuc bëdambo ictsiash. Abentsëc chotsëcncuc adecbidi bëdambo ictsiash. Aided icquin abentsëcshun-abentsëcshunquien onquequin chuïban, cata. Aden abentsëcshun onquequin chuïsho abi onquiaid tantiaquidën iccuededquidon onqueten chuïbanta, cata. ²⁸ Padnuen abi onquiaid tantiaquin chuïbanuequid nibëdncuc, Tsadquin Nuquin Papauidi otacquiocquin chuïta, cata.

²⁹ Adecbidi, Esuquidistu tantiaquido iccuededacno Nuquin Papan chiampid comapenen tantiaquin chuïbanquid daëd icnuc bëdambo ictsiash. Abentsëc chotsëcncuc adecbidi bëdambo ictsiash. Aided icquin abentsëcshun chuïbanubi, ¿Nuquin Papan Mayanën tantiamiacpadomboenda chuïbaneeque? Isnü, quequin chuïbanuequid utsibon Nuquin Papan chiaid isban. Adembidi, utsin chuïbanubi adomboembidi isbanoaic utsibon. ³⁰ Abentsëcshun chuïbanubi Nuquin Papan Mayanën tantiamiac utsi: Ëmbitsen chuïbanu, qesho tantiashun ma aidën chuïbanu quiash ambia chuïbanquid ënëd. ³¹ Adquidën iccuededquidtedi tantiamenuequin abentsëcshun-abentsëcshunquien chuïbanta. Aden chuïbansho tantiash ma chieshenquo yec bëdambo icpanu. ³² Nuquin Papan Mayanën tantiamiaid utsibëd bëdamboec tabadquid nec. ³³ Nuquin Papan tantiamiacpadequi utsi onquenubi onquenquo utsibo tabadec. Onquenu, utsi quenuc, Ai, onqueta, queshun onquenquiocquin cainec tabadec chuïbanuequid utsibo. Esuquidistu tantiec iccuededquido utsi-utsiec yacnocquido adecbidi tabadquido nec.

³⁴ Esuquidistu tantiaquido iccuededacno otacquo tabadquid chido. Chuïbanacnoësh onquenu, quenda chido. Nuquin Papan chiäcpadec ëbi chuïquid dada nec, quec chido. ³⁵ Anoshon chiaid tantienquo yec tsadquin cainec shubuno nidash, Tantienuquo iccombique. Nuqui tantiaboed ëbi chui, qesho tantiashun chiec aton bënë. Tantienuiocquin cainenquo iquec chido icsambo iquec. ³⁶ ¿Mimbia Nuquin Papan chiaid chuïbanquidoda ne? Padenquo. ¿Chuïbanac Esuquidistu tantiaquido mibitedictsëquida yanondac? Padenquo. ³⁷ Nuquin Papan chiaid chuïbanquidquo nebi, mibi quenuc, Nuquin Papan tantiamiacpaden Pabado chuïbanquin dada uaid nec, mibitëdi quepec. ³⁸ Aden mimbi tantianubi, Pabado dada uaosh, quenquo utsibo icpec. Aido Nuquin Papan tantiamiacmaido iquec. Adquid icsho isun, Pabado dada uaid nec, quequin tantiamenu, quenda.

³⁹ Adembidi chuinu. Adembi tantiata. Nuquin Papan chuipampid comapenen tantiaquin chuïbante bunquiota. Aden chuïbanquid mibi icnuc utsi onquiacmaidën onquequin chuïnuesho, Ai, cata. ⁴⁰ Adecbidi, Nuquin Papan Mayanën tantiamiac chuïbanuequid dadpen icnuc utsibo bëdamboen tantiamenuequin abentsëcshun-abentsëcshunquien chuïbanta.

15

Esuquidistu uincuenaid

¹ Adembidi chiembique. Tantia. Matses icsaquid icsho cuidnushe quiash abided cuidadec Esuquidistu unësaid ëmbi chuïbansho tantiash, Ai, abimbo

iquec. Aid tantiembi, mibi quiampondac. Aden tantiadonec chieshenquo yec mibitedi tabadec. ² Aden, Aid tantiabenu, qesho Nuquin Papan mibitedi bēdambo icmenuequin tauapondash. Mibi chieshenquiocsho isun adquid icmeshun abi yacno mibi yuedendac. Padnuen, Esuquidistu tantiaquid nebi, quequin abipenquiocnoc chuiquid ambi bēdambo icmebanacmaid nec. Adecbidi, ambi yuednu cacmaidquio adquid nec.

³ Utsin ēbi tantiamiacpaden mibi chuibanondambi. Adembidi chuinu. Tantia. Nuquin Papan chiapadomboben matses icsaquid icsho cuidnushe quiash abided cuidadec Esuquidistu unēsspanēdash. ⁴ Unēsacsho shēcūē nacenaidēn nauedshun bētashacsho daēdec ushtanquin ambi chiampicpaden Nuquin Papan uincuen uapanēdash. ⁵ Aden uincuemiac choquin, Uincuenobi, quequin Petedo Esuquidistun ismepanēdash. Adshumbic adembidi abēd 12ted icquido ismeoapanēdash. ⁶ Adshumbic adembidi abi tantiaquid dadpen 500ted iccuededsho choquin, Uincuenobi, quequin Esuquidistun ismeoapanēdash. Aid uincuenacsho isquido dadpen abi tabadnubi utsiutsiec padenquio iquec. ⁷ Aden aitedi ismeshumbic aton utsi Santiacotsen Esuquidistun ismeoapanēdash. Adshumbic, ambi ēbi chuibeneta caitedi ismeoapanēdash. ⁸ Aden aido ismequin nainshun yuecshun ēbitsen ismeoapondashi. Icsactsēcquiocquid nec, quenquiocquin ismebenondashi tsyuecquio. ⁹ Abi tantiaquid mēyanquin cuesunemequidquio ichoedi abi tantiaquid yanacsho Esuquidistun, Ēbi chuibeneta, cainquioctiadquidēmbi adquid ic̄ta caid nebi. ¹⁰ Esuquidistu tantiaquid yansho isun ēbi chieshaid cuidenquio yac Nuquin Papa bunacpadomboben Esuquidistu chuibenequid nebi. Adquid Nuquin Papan icmiosi, quequin chieshenquiocquin ma dadpenshun Esuquidistu tantianu quequin chuibenembi utsibon aden chuibenenquiocnobi. ¿Ēmbentsēquidambi chuibenedio? Aton Mayan Nuquin Papan meniāc aibēd icquin chuibeniombi. ¹¹ Adembidi, ēbi yacpadquidon Esuquidistu chuibanac utsitsen abi tantiaquido yampondash.

Matses unēsash uincuenaid

¹² Adec Esuquidistu unēsash uincuenondash, quequin chuinubi ¿mitsipaden tantiec uincuenta nibēdec quec utsi-utsiec onquepec? ¹³ Uincuenta nibēdnuc Esuquidistu uincuenenquio ic̄tsempanēdash. ¹⁴ Esuquidistu uincuentequid ic̄miambocnoc abi chuibanquid muambo ic̄tsiandac. Esuquidistu tantiaquid nebi, quiaidbidi muambo ic̄tsiandac. ¹⁵ Nuquin Papan naid chuibanquidtedi muaquidquio icoatsiandac. Aden tantienquiocquin ēbi yacpadquidon chuibanendac. Unēsash uincuentequid nibēdnuc ēbitedishun Nuquin Papan Esuquidistu uincuen uapanēdash quequin chiāid abipenquio ic̄tsiandac. Unēsash uincuenta nibēdnuc Nuquin Papan uincuemaiāid nibēdtsiandac. ¹⁶ Unēsash uincuenta nibēdnuc Esuquidistu uincuentiapimbo ic̄tsempanēdash. ¹⁷ Aid uincuenambo ic̄nuc matses icsaquid ic̄sho cuidnushe quiash abided cuidadquid Esuquidistu nec, cainquio mimbi ic̄tsiandac. Matses icsaquid ic̄sho cuidnushe quiash cuidadquid nibēdtsiandac. ¹⁸ Aid uincuenambocnoc abia tantiaquido tsusedpabo Nuquin Papa yacno puduedtiapimbo ic̄tsempanēdash. ¹⁹ Nidaidēnuidi Esuquidistu tantiec tabadte ic̄nuc abi tantiaquido Esuquidistun bedoanendac quequin caimbudaqui ambi tantiaid choenquio ic̄tsiandac.

²⁰ Ēmbi chuiboedtedi adtiapimbo iquec. Esuquidistu Nuquin Papan uincuen uapanēdash, quequin chiaid abimbo iquendac caimbi. Nuquin Papan ambi abia uincuemaiāid abi yacno puduedmequin ambi uincuemetequid dadpen iquendac, quequin chiaid abimbo iquec. ²¹ Unēstequid bēyuc dada yanampicpadec matsestedi adecbidi

iquec. Adecbidi, unēsash uincuentequid Esuquidistu yanacpadec abi tantiaquidtedi adquiobidi iquendac. ²² Bēyuc dada Adan caidēn tsyuecquidtedi adecbidi unēstequido nec. Esuquidistun bēdambo icmiaid uincuentequido neoaic. ²³ Esuquidistubimboecquid dadpen iquendac, quequin Nuquin Papan aidba uincuemiambien yuecshun Esuquidistu choashun abi tantiaquidtedi bedoanendac. ²⁴ Aden bedoanquin abi tantiaquidtedi bēyucanec choquin Nuquin Papa Edoen caid ismequin, Nēidtedi min shubu abentsēquēn tabadquido nec, quequin chiendac abi chieshēnquidtedi chēn quetiapimboconoc. Aido ambi nebudachimboecquido iquendac. ²⁵ Abi chieshēnquido utsitedibēd chuiquid icquin abi chieshēntiapimboconocquid aido Esuquidistun icmebanendac. ²⁶ Adoshombic ēnquimbi unēstequid nibēdquidquio Esuquidistun icmeoaindac. ²⁷ Adoacsho abitedi chuiquid Esuquidistu Nuquin Papan icmendac. Abi namiaidtedi utsitedi icnubi adquidpenquio aton Papa iquec. ²⁸ Aden Esuquidistun namiaidombo abitedi icmeshumbic aton Madotsen Nuquin Papan namiaid iquendac. Adquid abitedi icnuc Edoen Nuquin Papa Chuiquid Dapa Abentsēcquiobi nendac.

²⁹ Unēsash uincuentequid nibēdnuc, ŷatotsieshun, Ēnden unēsaid uincuenendac, quequin tantiembi quequin utsibon acten ambibi mentomepec? ³⁰ Adecbidi unēsash uincuentequid nibēdnuc ēbi unēs uate utsibo comapenec buncuededsho isun ŷatotsieshun, Uincuentequid iquec, quequin ēbi yacpadquidon chuibampec? ³¹ Unēsash uincuentequid iquec, quequin tantiembi. Aden tantiaquin Esuquidistu, Nuquin Icho, ēmbi chuibanac Esuquidistu tantiaquido mibitedi yampondac, quequin tantiembi. Aden tantiaquin unēsmane quenguioquin Esuquidistu unēsash uinciente iquec, quequin chuibenec nebī. Aden badiadquidēn badiadquidēnquien chuibanubi ēbi unēs uate utsibo bunec. ³² Uincuentequid nibēdnuc, ŷatotsi quenuequini Epeso yacnoshon, Uinciente iquec, quequin chuibansho mēyanaqui chieshenquio yec dayacquio tsadpe? quetsiabi. Adecbidi uinciente nibēdnuc: “Unēsash nibēdquiec iquebi, quequin nua peshun aquembi,” quetsiabi. ³³ Aden tantienquio iquembi. Adembidi tantienda. “Uinciente nibēdec quequidbēd capuenda aidēn tantiapadec icmane quiash.” ³⁴ Adquidpadquid icquin mimbi icsamboen tantiaid ēnquin Nuquin Papan chiaidquio tantiaata. Esuquidistu tantiec mibēd iccuededquid utsi-utsiec, Nuquin Papa nadatiambocquin uincuemianquidquio nec, quequin tantiesa nec. ŷAdquid mibēdi icnuc Nuquin Papan bēdambo icmiaido mibitedida icpe? Padenquio.

Uincuemequin dada chuca meniaid

³⁵ ŷMitsipadec unēsaid uincuempec? utsi quepec. Adecbidi, ŷmitsipadquid uincuentequidēn dada icpec? utsi queoapec. ³⁶ Adquidēn icsamboen tantieque. Chuinu. Tantia. Mimbi tiedēn chococaid tauibēd ēshē chococatequid napi dēyuctequidpadpenquio iquec. ³⁷ Mimbi tiedēn chococaid utsi-utsiec iquec. Adecbidi mimbi tiedēn siaid utsi-utsiec iquec. Mimbi chococaid mimbi siaidbidi dēyuctequid utsi-utsiec iquec. ³⁸ Nuquin Papan tantiampicpadec aton dada yanec. ³⁹ Abipadquidpenquio ambi uaidtedi iquec. Abipadquidquio matsesedi iquec. Abipadquidquio nidaidēn capuquidtedi iquec. Abipadquidquio podochuquidtedi icoaic. Abipadquidquio acten icquidtedi icoaic. ⁴⁰ Abuc tabēcaid icnubi nidaidēn icquid iquec. Abuc tabēcaid abipadquid chēnquesho isec nidaidēn icquid tabadec. ⁴¹ Badiadēn ushē comapenquiec chēnquenubi inchēshēn ushē dauebudquio chēnquiec. Aid

daëdi nua isadnubi uispa pistsëc isadoaic. Uispa utsi-utsiec iquec. Abi bedquec chënquetequid utsi-utsiecbidi iquec.

⁴² Aidedi ënëndendac. Adecbidi tishac matses unësacsho chococac nami chodquec. Adecec nami chodquian Nuquin Papan tantiacpadec uincuntequidën dada chuca chodquesa nendac. ⁴³ Tishac icsaquad matses iquec. Adsho uincuemequin ambi icsaisa icmiaid nendac. Nidaidënshun tishac chonoadec uimabudquid matses nec. Yuecash unësacsho uincuemiac uimabudenquiocquin nabanendac. ⁴⁴ Nidaidënshun tishac daicsambo yanash unësacsho uincuemequin dada chuca icmetequad nendac. Nidaidënshun tishac matsesën tantiacpadquid icboedi Nuquin Papan uincuemiac aidën tantiacpadquid iquendac.

Nidaidënshun tishac matsesën tantiacpadquid icboedi abuc buanac anocquidën tantiacpadquid iquendac. ⁴⁵ Adembidi Nuquin Papan chuiquin dada uamiampid nad iquec: “Bëyuc matses Adan caid nácnenshun Nuquin Papan bushcac taëec tiboquequid yampampic.” Nuquin Papan tsyuec chomiaid Esuquidistu nec. Aid tantiaquid abipadquid Nuquin Papan menec. ⁴⁶ Nuquin Papan matsesën tantiacpadquidba icmiac Esuquidistu tantiaquid icsho isun abipadquid meniac icbon tantiacpadquid yanec. ⁴⁷ Bëyuc matses uanu, queshun nidaid putu bedshun nácnenaid nepampic. Bëyuc matses Adan caidën tsyuecquid Nuquin Papan abi yacnoshon budmiaid nepanëdash. ⁴⁸ Nidaid putu bedshun bëyuc matses nácnenshun nidaidën tabadquid icmepampic. Adquiecbidi abipadquid matsestedi yanac. Nuquin Papan abi yacnoshon Chomiaid tantiaquidtedi aton Mayan menec. Aden meniac abipadquid aido iquendac. ⁴⁹ Adecbidi bëyuc matses isadacimbocquid nidaidën tabadquidtedi nec. Nuquin Papan abucshun chomiaid isadacimbocquid abëd icquido iquendac.

⁵⁰ Adembidi chuinu. Tantiata. Matsesën dada nami intacchoquid chodquetequid icnuc Nuquin Papan shubu abentsëquën tabadtiapimbo adquid iquec. Chodquetequid chodquetemaid ictiapimbo iquec.

⁵¹ Nuquin Papan chienquiocpampid chuinu. Tantiata. Abi tantiaquid unësabicquidbëdta ënden abi tantiaquid tsusedpabo dada chuca Nuquin Papan menendac. ⁵² Ambi namiaidën abucshun shoncanubi ëshë badedquio bëbedquiacimbocquid badedquio unësesambo Nuquin Papan abi tantiaquido icmendac. ⁵³ Chodquetequid icboedi chodquesa yanendac. Unëstequid icboedi unësesa yanendac. ⁵⁴ “Adquid icmiac unëstequid nibëdquidendac.

⁵⁵ Ad icnuc ¿mitsishunquio unëstequid istuidpec? Adembidi, ¿mitsishunquio unësmetequid istuidpec?”

⁵⁶ Icsaquad unëstequid nec. Nuquin Papan nadomboen nata quequin chi-aid niacquid icash unëstequid matses yanac. ⁵⁷ Adquid nuqui icsho isun Nuquin Papan Nuquin Icho Esuquidistu chomeshun nuqui cuidenquiocquin aidi icsaisa cuidquid nuqui bëdambo icmëbanec. Adoac abi yacnoësh icsaisa unësesambo nuqui iquendac. Aden Nuquin Papan naindac, quequin, Bëdamocquid mibi nec, Papa, quequin nuqui chuided-chuidendac.

⁵⁸ Adembidi chuinu. Tantiata. Adenuidi tantiaquin utsi uaqun utsin chuisho tantienquio yec tabad. Adecec tabadquin Nuquin Papan chiacpadomboen naban Esuquidistupadquid Nuquin Papan ëbi icmendac, quequin tantiaquin.

¹ Nuquin Papan bēdambo icmebanaid utsibo menenun mimbi piucquid bedbanaid chuiquin dada uaimbique. Isec onquecuededta. Nidaid Cadasia caid yacnocquido Esuquidistu tantiaquido ěmbi chuibanacpadomboen mimbitsen nabanta. Naden Cadasia yacnocquido chiombi. ² Abentsĕcshun-abentsĕcshunquien mimbi bedaid musucbudcuenshun dominco ushĕn mimbi musucacted dayun uata. Aton na daĕdpactsĕc icquidĕn daĕdpactsĕc dayun uanubi mitsana dadpen icquidĕn dadpen dayun uata. Aden musucbudcuenshun mimbi dayun uaid icnuc ěbi choacsho isash, ¿Tĕtsimbi menepeba? quenquio mibitedi iquendac. ³ ěbi choshombic utsibo bēdamboen tantiaquin piucquid dayun uaidtedi mimbi menenun buantan caido isun, ěmbi isaïdo neque. Yuedta, quequin dada uashun aido menembi ma buanueshun. Aden ěmbi meniac buanquin utsibo ismetuidpec. ⁴ Adecbidi ambo nidtiadquio iquebi, ěbi quenuc mimbi menenun buantan caido ěbĕdi nidendac.

Utsi-utsien chuibanaid

⁵ Nidaid Masedonia caid yacno Esuquidistu tantiec iccuededquid utsi-utsiec yacno isedbĕquimbi mibi isbĕtsenembi. ⁶ Aden isedbĕequi mibi isedash tabadebi. Iquenoanquid chonobi mibĕd tabadtsiabi. ¿Aid ěnĕdan nidnu, qesho, adabi utsi yacno mimbi nidmepatsia? ⁷ Nĕbi mibĕdi yuec tabadti-apimbo iquebi, quiash mibi yacno nidenquio iquebi. Yuecash mibĕdi yuec tabadnuec mibi yacno nidebi. Nuquin Papa bunuc adendabi. ⁸ Nĕbi padenquio iquebi. Epeso yacnocquidobĕd iquebi. Nuquin Papan abipadquid aton Mayan matses meniaid ushĕ tantiate choan nĕuĕshquio nidebi. ⁹ Nĕmbo Nuquin Papan chiaid tantianu quequid dadpen iquec. Adsho comapenen Esuquidistu chuibanec nebi ma tantiapanueshun. Aden chuibancho tanti-auidash utsibo ěbi chieshĕnquido nĕmbo iquec.

¹⁰ Mibi yacno ěbi nidenquio icnubi Timoteyo mibi yacno nideque. Aid bēdamboen ista. Pabado yacpadquiocquid Nuquin Papan namiaidquibidi Timoteyo nec, quec chieshesa icta. ¹¹ Nuquin Papan namiaidquibidi Timoteyo icsho, ěbĕd icquidta nec, quenquiocquin yuedta. Yuedac tabadash, Nidnu, qesho, Ai, nidec nid. Mibi nidsho isash unĕsquio iquebi, quequin nidme ma ěbi yacno choanu. Utsibobĕd Timoteyo choaic quequin caĕnec tsadebi.

¹² Nĕbi nuqui con utsi caid Apodos mibi chuinu. Tantia. Codinto yacno Esuquidistu tantiec iccuededquido nuquin utsibobĕdtan istanta, quequin Apodos comapenen chiombi. Adoac, Nĕbi Codinto yacno nidte bunenguio iquebi, quiosh aid. Yuecash Codinto yacno nidec bēdambo ictsiash, quiash yuecash aidi mibi yacno nidendac.

¹³ Icsamane quequin chieshenquiocquin Nuquin Papan chiaid tantiadoneta. Esuquidistu tantiabenquido yanta. Adecbidi, natiatequid icnuc chieshtoenuio yec dayacquio yec tabadteneta. ¹⁴ Adec tabadquin utsi bēdamboen tantiaquin nabanta.

¹⁵ Adembidi chuinu. Tantia. Nidaid Acaya caid yacno Estepanasĕn shubun icquido abia Esuquidistu tantiaquido icpondash. Adquid yanshun, Esuquidistu tantiaquid utsibo nashumbanquido nuquibi iquendac, qeshun adobanec. ¹⁶ Aidon namiaïdo icta. Adembidi, comapenen nashumbanquidtedishun namiaïdo icta. ¹⁷ Codinto yacno Esuquidistu tantiec iccuededquidtedi ěbĕdi ictiapimbo nobi mibi yacnoĕsh nĕidtedi chosh. Estepanas yec Podtunato yec Acaico yec quec choash puduedsho isash bēdambo iquebi. ¹⁸ Mibitedi chuibanquin aidon unĕsquiocquidi bēdambo icmioshi. Mibi yacno

padpidec nidash puduedshun chuibanquin adembidi mibitedi bēdambo icmendac aidon. Aido mibi yacno choacsho isun, Pabado chuibanquin mimbi bēdambo icmiacpaden nabanec tabadta, quequin chuiban.

Esuquidistu tantiaquidon mibitedi tantiaquin chuibanaid

¹⁹ Codinto yacnocquid mibitedi tantiec tabadebi, quequin dada uaqin chuita, nidaid Asia caid yacno Esuquidistu tantiec iccuededquidon cac chiembi. Adembidi, Aquidan aton chido Pidisidabēdtan chui cac chuioaimbi. Adembidi, aidon shubun Esuquidistu tantiec iccuededquidotedishun chui cac adembidi chuioaimbi. ²⁰ Aden utsibon chiaid chuishumbic, Esuquidistu tantiaquid utsibotedibēd bēdamboec tabadta, caimbi.

²¹ Ēm̄bi chuibanac ěm̄bi chiaid utsin dada uashumboec nec. Nēshun bedanquin dēnainquin dada uaimbique. Tantia.

²² Nuquin Icho tantiesa nēbimbobi ma Nuquin Papan comapenen cuidquin ma nēsiatequid icpanuna. Adechidi abi tantiaquido bednuec badedquio Esuquidistu chopashun, quec tsadebi.

²³ Ēbi icsaquid icsho cuidenquiocquin Nuquin Icho Esuquidistuded Nuquin Papan cuidpanēdash, quequin tantiaquid nebi, quequin abimbo chulquid ma ambi tantiacpadquid Nuquin Papan mibi icmepanuna.

²⁴ Esuquidistun shubun icquido nuquibi icsho ěm̄bi bēdamboen isaído mibitedi nec.

Padi aiteded dada uaombique. Isec onquecuededta.

CODINTO YACNOCQUIDON ISTE 2

¹ Pabado nebi. Nuquin Papa bunacpadomboen Esuquidistun, Ēbi chuibeneta, caid nebi. Esuquidistu tantiaquidbidi Timoteyo nuqui con utsi caid ěběd iquec. Aid ěběd icnubi Esuquidistu tantiec Codinto yacnoěsh iccuededquidon mimbi iste dada uaimbi. Ĕmbi dada uaid mibitedishun isbanshun utsibo meneta ma isnueshun.

² Matses icsaquid icsho cuidnushe quiash abidedc Esuquidistu uněspanědash, quequin tantiaquioshō isun Nuquin Papan bědamboen isaidquio nuqui nec. Adquido yec utsiboběd ma bědamboec tabadpanuna.

Bědambo icmianquidquio Nuquin Papa

³ Nuquin Papa nad iqueque. Tantia. Chuinu. Ĕbi uněsquo icsho isash bědambo icmianquidquio Nuquin Papa nec. Adquid icsho, Mibi bědambo iquec, quequin aidquio chuidonenuna. ⁴ Natiamiaid icsho tantiaquin chieshtomenquiocquin aiděmbi nuqui dayacquo icmec. Aden ěbi tantiaquin Nuquin Papan nac, quequin natiamiaid utsi icsho tantiaquin, Bědambo iquebi, camenuna nuqui. ⁵ Adembidi natiamiaid Esuquidistu icsho isun Nuquin Papan chieshtomenquiocnuen chuiquin dayacquo icmiacpadomboen Esuquidistu tantiaquid utsi tantiaquin chieshtomenquiocquin dayacquo nuqui icmendac. ⁶ Adembidi ěbipadquidobědtan Esuquidistu chuibansho utsibon měyanac natiamiaid icsho Nuquin Papan, Bědambo iquebi, cameposhi. Aden Pabado tantiaquin Nuquin Papan nashunosh, quequin chiac utsin ěbi měyansho isun adomboembidi chieshtomenquiocquin Nuquin Papan ěbi dayacquo icmec, quec tabadta. ⁷ Utsin měyanaid icquimbi Esuquidistu tantesa uainquo iquec, quequin mibi tantiec tsadebi. Ĕbi měyanacpaden mibi měnyansho isun Nuquin Papan bědambo icmiaid mibi iquendac.

⁸ Nidaid Asia caid yacnoshon ěbi natiameboed mimbi tantiamboen icchitec, quequin ěbi adoboed mibi chuibanu. Tantia. Dayactiapimboenoc natiamioshi. Adoac, Uněsebi, quiobi. ⁹ Uněs uatiad, utsibo qesho tantiaash, Ĕbibi měnchiquidtiapimboequimbi matses uněsacsho uincumequiděn ěbi měnchictsiash, quequin tantiec tsadobi. ¹⁰ Ai, uněs uanu, cac natiapobi. Adsho Nuquin Papan měnchicaid nebi. Adembidi aiděmbi ěbi měnchictene. Uněs uatsensho isun ěbi měnchicacpaden ěnenquiocquin napashun, quequin tantiec tsadebi. ¹¹ Ĕbi tantiaquin mibitedishun chiac Nuquin Papan měnchicmiaid nebi. Aden mimbi chiac uněs uanu, qesho tantiaashun mimbi Pabado měnchiccoc. Mibi bědamboquid nec, Papa, quequin ma dadpenshun ambi naid chuipanuna.

Něbi mibi yacno nidenquio iquebi, quiaid

¹² Bědamboec tabadquin ismequid nebi, quequin tantiec bědambo iquebi. Adaid chuinu. Tantia. Nuquin Papan ěbi tantiamiacpaden ismec utsiboběd bědamboec tabadobi. Adquiecbidi mibědi tabadobi. Matsesěn tantiamiacpadpenquo yec tabadobi. ¹³ Ma tantiamenushun abimbo chuiquin mibi dada uashunec nebi. Ĕmbi dada uaid bedshun isec, Pabado bědamboec tabadec, quequin ěnenquiocquin tantiapashun mibitedishun. ¹⁴ Ĕběd Pabado bědamboec tabadosh, quequin tantiec bědambo iquebi, quec utsi-utsiec. Adecbidi, Codinto yacnocquido utsi-utsiec bědamboec tabadosh, quequin

utsibon chuisho tantiash bēdambo iquebi. Esuquidistu choanuc adquequi Codinto yacnocquido tabadpashun, quec tsadebi.

¹⁵ Aden ēbi bēdamboec tabadaid tantiaquin Codinto yacnocquidon chiec, quequin tantiec, Aidoba istanu, quiobi. Aden istanac, Bēdambo iquebi, quepashun, caimbi mibi. ¹⁶ Mibi isbidanec nidaid Masedonia caid yacno nidashic padpiden mibi isbētsenec choaibi. Aden isbētsenembi, qesho tantiashun nidaid Udeya caid yacno mimbi ēbi nidmetsiac, quequin mibi chiombi. ¹⁷ ¿Uquēducshun, Nidenquo iquebi, quequin muaquindambi chuidio? Adenquiocquin chiombi.

¹⁸ Ambi chiacpadomboen nabanquidquo Nuquin Papa nec. Aid chuinu. Tantia. Abimbo chuiquidquo yec utsi yantiapimbo iquec. Adquidquo icquin ambi, Esuquidistu chuibeneta, caidquo yec adomboen chuiquid nebi. Utsi uain chuinu, quesa nebi. ¹⁹ Ambi chiacpadomboen nabanquidquo Nuquin Papan Madombo, ēmbi chuibeniaid, Esuquidistu nec. Aidi Sidasēn chuibeniaidbidi nec. Aidi Timoteyon chuibeniaidbidi nec. Esuquidistu abimbo chuiquidquo yec utsi yantiapimbo iquec. Abi chuibenequidquo adquidbidi nec. ²⁰ Con Madon naden naindac, quequin Nuquin Papan chiacpadomboen Esuquidistun ēnden nabanac. Aden abi nabanec. Ambi chiacpadomboen naquidquo Esuquidistu nec, quequin tantiaquin ambi naid ēbipadquidon chuibanec. Aden chuibanac abi tantiaquidquo yanash, Abimbo iquec. Esuquidistun ambi chiacpadomboen naindac, quec tantiec nuqui tabadec. ²¹ Nuquin Papan tantiamiac: Esuquidistu tantiaquid nebi, quiash, Tantiasa nebi, quetiapimbo nuqui iquec. Adquid icmiac aton Madombo chuibanquid nuqui nendac. ²² Adembidi aton bacuē icmiad nuqui nec. Adembidi aton Mayan Nuquin Papan meniaid nuqui nec. Ēbēd tabadquid aido nendac, quequin tantiamenuen Nuquin Papan aton Mayan meniac ma aidēmbi nuqui bēdambo icmepanueshun.

²³ Nuquin Papan tantianubi mibi yacno nidnu quiobi. Adashic, chushcachtomane quiash mibi yacno nidenquo iccobi. ²⁴ Ēmbi Esuquidistu chuibanac abi tantiaquid dadpen iquec. Aidon icbopenquo nebi. Aidon icbopenquibidi Esuquidistu chuibanquid utsibo nec. Esuquidistu tantiec bēdambo iquebi ma quenu, quequin chuibenequidquo nebi. Esuquidistu tantiaquid nebi, abimbo quequin aid tantesa uainquo mimbi iquendac.

2

¹ Aden tantiaquin comapenen chuiquin unēsquo icmenushe quec mibi yacno nidenquo iquebi caombi. ² Mibi unēsquo ēmbi icmiac ¿tsuntsin ēbi bēdambo icmepatsiash? ¿Ēmbi icsambo icmeboedēnda ēbi bēdambo icmepadic? Padenquo. ³ Aden tantiaquin mimbi iste dada uaombi ma ēbi bēdambo icmequid unēsquo icmetiapimbo iquebi, qeshun. Bēdambo iquebi, quequin ēbi tantiec adquibidi mibi icoatsiac, quequin tantiombi. ⁴ Unēsquo yec shubiquimbi mibi dada uashun, Meneta, caondambi. Unēsquo icmenu, quenquiocquin mibi comapenen tantiaquin dada uaondambi.

Abi icsaboed bēpiscudnueshun yued quiaid

⁵ Anocquidēn ēbi unēsquo icmedenequimbi adembidi comapenquiec unēsquo mibi icmeoaosh. Aidi mibi chiondambi. ⁶ Aidi mibi dadpeshun cacumiac abi icsaid ēnosh quec. ⁷ Adoachso abi icsaid bēpiscudshun aidi yuedoquin bēdambo icme. Yuedenquo yac natiamianquiec unēsquadquo yantsiash. ⁸ Nuquibi iccuedednuna, quequin aid tantiaquin yued caimbi. ⁹ ¿Ēmbi chiacpadomboen nabanquidquioda neque? Isnu, quequin icsaquid cacumeta, quequin dada uaondambi. ¹⁰ Aden ēmbi dada uacpaden mimbi

cacumiac abi icsaid ěnsho isun abi icsaid nibĕdabimboec bĕpiscudshun yued. Adsho tantiashun adomboembidi naimbi. Aidbĕdi abentsĕc yacimboecquido yanosh, quesho tantiash abi icsaid bĕpiscudebi Esuquidistun tantianubi. ¹¹ Nuqui chieshĕnquidĕn Satanasĕn aidi icsamenushe queshun abi icsaid ěmboed yuedta. Yuedenda, Satanasĕn quequin tantiamiac onquesho tantienda.

Nuquin Papan con Mayan meniaid adquid ěbĕdi tabadtequid nec, quiaid

¹² Esuquidistu chuibanuec shubu dadpen icquid Todoas caid yacno ěbi chonoc, Tantienu, quec cho-choquid dadpen icpondash. ¹³ Adquid dadpen icnubi ěmbi con utsi caid, Tito, mibi yacnoĕsh choabi icnuc ambo yuec tabadtiapimbo iccobi. Adash, Bĕquednu, quianec nidaid Masedonia caid yacno nidoapobi.

¹⁴ Bĕdambocquid mibi nec, Papa. Mimbi Esuquidistu tantiaquid ěbi yacpadquido icmeshun mimbi, Esuquidistu chuibeneta, caid ěbĕdi nec. ěmbi chuibanaid noadte bĕdabimboecquid nec. Noadte bĕda pushudec noadsho uano-uanoec tabadquidon shĕdec. Adembidi, Esuquidistu ěbi yacpadquidon chuibenesho uano-uanoec tabadquidon tantiec. ¹⁵⁻¹⁶ Esuquidistu chuibanac noadte bĕdan danoshquiaid shĕdabimboen utsibon tantiec. Adembidi, Esuquidistun ěbi chuibeneta caido Icho isabimboen Nuquin Papan tantiec. Adomboembidi Esuquidistu chuibenequido utsibon isoaic. Aden isec Esuquidistu tantiaquid yanash ěnĕdenquio yec abĕd icquido aitedi iguendac. Aden nuqui isquin Esuquidistu tantiesa icsho Nuquin Papan nĕsiatequid iguendac. ¿Tsutsi Esuquidistupadquidquio icpec? Adquid nibĕdec. Adesa icsho ambi, ěbi chuibeneta, caidquio nebi. Adquid icquin chuibenenubi ¹⁷ piucquid bedte bunquin utsin-utsinquien Esuquidistu chuibanec. Adesa ěbĕpadquido iquec. Piucquid bednuequin ěbi yacpadquidon Esuquidistu chuibanenquio iquec. Nuquin Papan, Esuquidistu chuibeneta, cac aid chuibenec nebi Nuquin Papan tantianubi. Ambi namiaidquio nebi.

3

¹ ¿Pabado bĕdamboec tabadquin Esuquidistu chuibenequid nec, mibi camenuendambi aden mibi chuibandio? Padenquio. Adembidi, ¿Utsi yacno nidnun bĕdamboec tabadquin Esuquidistu Pabado chuibanosh, quequin dada uata, ěmbi cac mimbi dada uaidtambi buampe? Padenquio. ² Mibĕdi tabadquin chuibanac Esuquidistu tantiaquid yansho isun Codinto yacnocquido mimbi chuibanaido nec, quequin chĕshĕten pinchuquĕn tansiabimboecnuc paucudtiapimboecnoc Nuquin Icbon tantiamioshĭ. Adembidi icsamboec tabadoedi nĕbi bĕdamboec tabadsho isun Pabado Esuquidistu chuibanaido Codinto yacnocquido nec, quequin adomboembidi tantiabedec utsibon. ³ ¿Abi tantiaquid icsho isun bĕdamboec tabadmenuequin ambi cuĕnote bedshun dada uampicpadquidta mibi meniondash? Padenquio. Esuquidistu tantiasho isun unĕstiapimboquid aton Mayan abĕpadquidquio mibĕdi meniondash.

⁴ Nuquin Papan tantiacpadomboen Esuquidistun, ěbi chuibeneta, cac chuibanac Esuquidistu tantiaquid mibĕdi yanacsho tantiec ěmbi chuibanaido aitedi nec, quequin tantiemi. ⁵ ěmbibi tantiacpaden chuibanesa nebi. Nuquin Papan tantiamiacpaden chuibanquid nebi, quequin tantiemi. ⁶ ěmbibi Esuquidistu chuitiapimbo icsho Nuquin Papan Mayanĕn tantiamiac Esuquidistu chuibenequidquio nebi. Ambi, Nadomboen nata, quequin dada uamiampicpadomboen chuibanta caidpenquio nebi. Ambi nadomboen nata, quequin dada uamiampidtedi

natiapimbo yec aibdēdi matses tabadtiapimbo iquec. Aton Mayan meniaidbēd tabadtequid nec.

Abi tantiaquido bēdambo icmetequid aton Mayan

⁷ Nuquin Papan nadomboen nata quequin chiaid cuēnoten dada uacpaden nainquio yec matses abi yacno tabadtiapimbo iquec, quequin dada uapid meniāc abi chēnquiācpadec Moisesēn bētantiāte comapenec bēchomauanqueic chēnqueboedi macuēsh budec bēdiāambo chēnquesho isadaidbon bēstiapimbo icpampic. ⁸ Nēbi Esuquidistu tantiaquid bēdambo icmequid aton Mayan abipadquid meniāid ēnēdenquiocquidquio nec. ⁹ Ēmbi nadomboen nata quequin chiaid niācquid ēbēdi tabadtiapimbo iquec, quequin dada uaid Nuquin Papan meniāc buanshun Moisesēn aton matses ēnēdenquiocnoc tabadmetiapimbo icambien matses icsaid bedshunash icsaisa abided cuidadec unēsash uincuenquidēn abi tantiaquido ēnēdtiapimboconoc tabadmendac. ¹⁰ Nēbi Esuquidistu unēsaid tantiaquid ēnēdtiapimbocquid nec, quequin chiac ambi dada uaid meniāmpid ēnēdācbimboecquid nendac. ¹¹ Ai, nadomboen nata quequin chiaid Moisesēn bedshun meniāid ēnēdtequid icnubi bēdambo icmiāntequid Nuquin Papan chomiāid icsaisa ēnēdtiapimbo iquec.

¹² Aden tantiaquin, Esuquidistu nuqui tantiaid icsaisa yec ēnēdtiapimbocquid nec, quequin chuibenecquid nebi. ¹³ Moises Nuquin Papabēd onquec bēchomauanqueicboedi auēshquio nidec ushmagushmactscēcquio yanash matses ismenquiocnuec bēpucudpampic. Adesa icquin ompoenquiocquoin utsibon ma tantianu, quequin Esuquidistu chuibenecquido nuqui nec. ¹⁴ Nuquin Papan dada uaid Moisesēn bēaid tantiate bunesa abēd icquido icpampic. Adquiobidi pamumēdācbimboec isadaidbo abi tabadec. Nuquin Papan cuēnoten dada uacpadquid isec onquec nēbi adquiobidi utsi-utsiec tabadec. Esuquidistu tantiesā yec adequi tabadec. Abi tantiaquid ambi paucshun tantiamiaido nendac. ¹⁵ Nadomboen nata quequin dada uaid Moises menepampid isec onquec pamumēdācbimboecquid isadaidbo utsi-utsiec iquec. ¹⁶ Esuquidistu tantiaquid icsho Nuquin Papan Mayanēn paucquin tantiamiaid nendac. ¹⁷ Nuquin Icbo icsaisa icquin ēnden nadomboen nata quequin dada uapampicpaden naquidquio nec. Adquid Esuquidistu nec, quequin tantiaquin chuibenec nebi. ¹⁸ Paucac, Ēbi icsaid bedshunash Esuquidistuded cuidadpanēdash, quequin nuqui tantiec. Aidēnquiobi icsaisa icquin abipadquid nuqui meniāc aton Mayanēn adquid nuqui icmebanec.

4

Nuquin Papan nadatiāmbocquin nadenequin Esuquidistu chuibenemiaid

¹ Aden Nuquin Papan nuqui tantiaquin, Esuquidistu chuibanta, caidquio icquin chieshenquiocquoin aidi chuibanec nuqui nec. ² Icsash ompodquid icboedi nēbi muesa icquin Nuquin Papan chiaid utsi uainquio yec nuqui bēdamboec tabadec. Nuquin Papan isec, quec adequi nuqui tabadec. Adec tabadec ēbipadquid utsi yansho isash Nuquin Papan chiaid tantiate utsibo bunquiopec. ³ Esuquidistu chuibansho utsin-utsinquien bēdamboen tantiatiapimbo iquec. Adquid Nuquin Papabēd tabadtiapimbocquid nec. ⁴ Nuquin Papapadquid Esuquidistu tantiaquid icnushe qeshun icsamianuequidēn Satanasēn pamunācbimboen utsi-utsien tantiamenquio iquec. ⁵ Ēmbibi naid chiesā nebi. Matsesēn Icbo Esuquidistu nec, quequin chuiquid nebi. Aid mibi tantiamenuechuiquin mibi nashunquid nebi. ⁶ Abitedi uanuna,

queshun, “Inchëshquio icboedi uëshëmbo yanquiota,” capampic Nuquin Papan. Adomboembidi Nuquin Papan chiaid pamumëdacimboen tantienquiochoedi Nuquin Papan paucquin tantiamiac Esuquidistu Nuquin Papanquid nec, quequin nuqui tantiec.

⁷ Aden tantiec abipadquid yanabicshobi Nuquin Papan nadatiambocquin nabanquin Esuquidistu chuibenecquid icmiondashi. ⁸ Aden chuibansho mëyanaqui abi chuibenec nebi. Padpiden-padpidemboen natiamaqui, ¿Atotsimbi napeba? qesho Nuquin Papan dayacquio icmedenebi. ⁹ Èbi chieshëncquid dadpen icnubi èbi bëdambo icmequid aidi iquec. Comapenen cuestanec, Unësec, qeshun nianaqui abi Esuquidistu chuibenembi. ¹⁰ Esuquidistu mëyanquin unës uacpaden mëyanquin unës uatsen-unës uatseshobi dayacquio icmedenioshi. Adoacsho uincuenaidën dayacquio icmedeniaid nec, quequin utsibon isbededebi. ¹¹ Adembi Esuquidistu chuibansho unës uatsiashi, quequin chuibenec nebi. Aid chuibansho unës uatsenaqui abipadquid unësesa yanebi, quec bëdamboec tabadebi. ¹² Aden tantiaquin aid chuibanac abi tantiaquid yanash aibëdi tabadec unësesa mibitedi yanendac. ¹³ Ambi chiacpadomboen Nuquin Papan naindac, quequin tantiaquin chiombi, quequin Nuquin Papan dada uamiampicpaden tantiaquin Esuquidistu chuibanec nebi. ¹⁴ Aden tantiaquin Nuquin Papan Esuquidistu uincuemiacpaden aibëdi tabadmenuen mibitedibëdtabi èbëdicquidtedi uincuemendac, quequin chiembi. ¹⁵ Aid tantiaquid ma mibi icpanueshun chuibansho mëyanaid nebi. Mëyanaqui utsi dadpen Esuquidistu tantiaquido ma yanu qeshun chuibenec nebi. Aden chiac abi tantiaquid icsho isun, Mimbi naidtedi bëdambo iquec, Papa, quequin ma Nuquin Papan utsibon chuipanuna.

¹⁶ Aden tantiec dayactiapibi quenquio iquebi. Tsusio budquimbi badiadquidën-badiadquidënquien Esuquidistu tantiadonequidquio yanebi. ¹⁷ Natiamiantequid ënëdendac. Natiamiaid yashic Nuquin Papa yacno tabadec bëdamboshë iquendabi. Esuquidistupadquid icsaisa yec unësesa yanash ënëdtiapimbo iquendabi. ¹⁸ Aden tantiec, Èbi natiamiaid iquec, quiashic, Nuquin Papabëd tabadendabi, quequin comapenen tantiec tsadebi. Èmbi isaitedi ënëdendac. Nuquin Papa yacnocquid ëmbi isacmaidtedibëd ënëdtemaid iquendabi.

5

Nuquin Papabëd tabadte iquendac quiaid

¹ Con nami shë nibudash unësash nibëdnuc Nuquin Papabëd tabadec nami chuca uaid iquendabi. Nami chuca uaid ënëdtemaid matsesën nacnenacmaid nec, quequin tantiembi. ² U abucquio nidabi yec uëshquequid nebi. Adquiochso nami chuca uaid ënden meniondac, Cuishon, quetsiabi. ³ Aden meniac ëbibimboec isadsho isendac, quec tsadebi. ⁴ Nami chodquequid icnuc uëshquec nuqui tabadec. Nami chuca uaid chodquesa menepashuni mabi unësesa icpanu quec nuqui tabadec. ⁵ Con Mado Esuquidistu tantiaquid èbëd abuc tabadmenuen ëbipadquid unësesa icmenu, quequin Nuquin Papan aton Mayan menetequid nuqui nec.

⁶ Aton Mayan meniac iquec nami chodquetequid abi iquequi chieshenquio yec dayacquio yec nuqui tabadec. Adec tabadash abuc Nuquin Icbobëd tabadendabi, quequin nuqui tantiec. ⁷ Aton Mayan meniac nuqui isacmaid Esuquidistu cainec nuqui tabadec. Èmbi isaïd ëmbi caintemaid nec. ⁸ Aden aid cainsho nami chodquesa badedquio menepashuni. Aden

meniac Nuquin Icbobēd iguendabi, quequin nuqui tantiec. ⁹ Aden tantiec nidaidēn tabadequi Nuquin Papa bunacpadquieci tabadnuna. Abuc nidash tabadec abi bunacpadquieci tabadoaindabi, quequin tantiembi. ¹⁰ Adembidi abi tantiaquidtedishun naid ambi chuibante ushē chonoc Nuquin Icbon chuibanendac, quequin tantiembi. Utsi-utsien, Mimbi bēdamboen nabanoc, quequin chuibanendac abitedishun naid cuidquin.

Ma utsibotsen abi tantiaquid icpanu quequin chuibanaid

¹¹ Aden ambi tantiacpaden nabansho, Bēdamboen mimbi nabanoc, Nuquin Icbon ēbi caindac, quequin tantiaquin ma utsibotsen Esuquidistu tantiapanueshun mibi chuibenec nebi. Aid tantiaquin nabanec bēdamboec tabadsho Nuquin Papan tantiec. Ai, adec Pabado tabadsho ispombi, quequin adembidi mimbi chuipashun, quec tsadebi. ¹² Aden tantiaquin, Mibi bēdambo iquec, ēbi camenuen mibi dada uashunenquo iquembi. Ēbi chienquiocquin, Bēdamboec tabadquin ismiacimboecquidēn ēbi icsamboen chuisho aido chuita, quequin mibi dada uashunembi. ¹³ Aido, Pabaton tantiate icsabudosh quec. Adembidi, Nuquin Papan chiacpadomboen ēmbi nabansho isun muaquin aidon chuibanec. Adec muatsiash quenquiocquin ma Esuquidistu tantianu qeshun aid chuibenec nebi utsibon chuibenenuiocnobi. ¹⁴ Chian anēdēnquequid icsambocquid nēsianushe quiash matses icsaid bedshunash abided cuidadec icsaisa Esuquidistu unēspaneḍdash, quequin ma utsibon tantiapanueshun chuibenec nebi. ¹⁵ Ma ēmbi naid chiac ēbi tantiaquido ma ēbēdi icpanu, quiash unēsash uincuempaneḍdash Esuquidistu.

¹⁶ Adec unēsash Esuquidistu uincuempaneḍdash, quequin matses unēsash uincuenta iquec, quequin abi tantiaquidon tantiec. Ēnden, matsesquo Esus nec, quiondaidi nēbi, Nuquin Papan Chomiaid yec matses tantiec unēsash uincuempaneḍdash, quequin tantiembi. ¹⁷ Abi tantiaquid ambi tantiamiaid nec. Ēnden matsesēn tantiacpadquieci icboedi Esuquidistun tantiacpadquieci bēdamboec tabadec abi tantiaquidquo. ¹⁸⁻¹⁹ Nuquin Papan ēndenquimboshē tantiamicpaden Esuquidistun naid nec. Nuquin Papan chiaid niacquid nuqui icboedēmbi matses icsaid bedshunash abided cuidadec Esuquidistu unēspaneḍdash, quequin tantiaquin ma aidquo utsibon tantiapanu qeshun ambi naid nuqui chuibenec. ²⁰ Nuquin Papan Esuquidistu chuibeneta cac nebi. Adquid icquin chiac abi tantiaquid yanash, Ēbi icsaid bedshunash Esuquidistuded cuidapanēdash, quequin abēd icnuequin aid tantiaquiota. ²¹ Ambi cuidtiadquid nuqui icnubi Esuquidistu icsaisaded Nuquin Papan cuidpanēdash ma Esuquidistu ambi cuidaidpadquid tantiaquidtedi icsaisa yampanueshun.

6

¹ Matses bēdambo icmenu, quequin Nuquin Papan chiaid bēpiscudmane qeshun ambi tantiamiacpaden nabanec tabadta. ² Nuquin Papan chiampid chuinu. Tantia.

“Mibi bēdambo icmete ushē chonoc cuēnsho tantiombi. Tantiasia icboedi nēid ushēnquo mibi tantiamiombi.”

Aden Nuquin Papan chiampicpadomboen bēdamboen tantia. Nēbi Nuquin Papan bēdambo mibi icmenu cac, Ai, cata. Nēid ushēnquo ambi aton bacuē icmete ushē nendac.

Pabado natiamiaid

³ Icsamboec tabadquimbi Pabaton Esuquidistu chuibansho, Tantiatiapibi, utsibo quetiapimboen bēdamboec tabadec nebi. ⁴ Nuquin Papan chuimiaid yec naded tabadebi: Chieshenquo yec dayacquiocquin

ambi chiaid chuibenec bēdamboec tabadec nebi. Natiamiaid yec adequi tabadebi. ⁵ Utsin cuesaqui adequi bēdamboec tabadebi. Quēnēn nauedaqui adequi bēdamboec tabadebi. Nuquin Papan chiaid ěmbi chuibanac cuesnanubi padenquo yec bēdamboec tabadebi. Natia chonoadbudequi adequi bēdamboec tabadebi. Utsi tantiaquin nabanec natia ushcasequi adequi bēdamboec tabadebi. Bunquieci bēdamboec tabadebi. ⁶ Icsainquo yec bēdamboec tabadebi. Nuquin Papan chiaid tantesa uainquo yec bēdamboec tabadebi. Tantiatiapimbo yec utsibo tabadsho isun adembi Nuquin Papan chiaid chuibenec nebi. Naden chiac tantiatsiash, queshun chuibenembi. Adembi, Nashunquin chiac tantiatsiash, quequin adquid nashunembi. Nuquin Papan Mayanēn natiamiaid yec bēdamboec tabadebi. Muainquiocquin utsi abimbo tantiec adecbidi tabadebi. ⁷ Abimbo chuibanec tabadebi. Nuquin Papan nadatiambocquin nac adequi bēdamboec tabadebi. Nuquin Papan chiacpadomboen nabanec nebi ma utsibo abi icsaid ěmpanueshun. ⁸ Ĕbi chiec: Pabado bēdambo iquec, quenubi adequi tabadebi. Utsin ěbi chuioaic: Pabado icsambo iquec, quenubi adequi bēdamboec tabadebi. Ĕbi icsamboen chuinubi adequi bēdamboec tabadebi. Ĕbi bēdamboen chuinubi adequi bēdamboec tabadebi. Muaquid nec, quenubi abimbo chuiquid nebi. ⁹ Ĕbi isquiděmbi, Ĕmbi isacmaid Pabado nec, caqui ěmbi chuibansho tantiaoboedo nec caimbi. Ĕbi unēs uate bunubi abi chuibanec capucuenembi. Mĕyanaqui unēsabi yec nidebi. ¹⁰ Unēsquo icmiaqui Esuquidistu tantiec bēdambo iquebi. Con na nibēdsho isun adembi Esuquidistu chuibanec nebi ma Esuquidistu tantiec utsibo bēdambo icpanueshun. Con na nibēdsho isash Nuquin Papan bacuē yec aton natedi con na nec, quequin tantiec tsadebi.

¹¹ Chuitiapibi, quenquiocquin ěbi natiaboedtedi mibi chuibanombi. Mibi comapenen tantiaquin ěmbi nabanaid mibi chuibanombi. ¹² Mibi tantiaquoquin chuibanquid ěbi icnubi ěbi tantiaquin chienquo mimbi iquec. ¹³ Pabadon con bacuē caido nebi, quequin mimbi naid mimbi tantiaidbēdta ompoenquiocquin ěbi chuiban, caimbi mibi.

Esuquidistu tantiesabēdtambi icsain nainda quiaid

¹⁴ Esuquidistu tantiesabēdtan icsamboen nainda. Adembi, chido Esuquidistu tantiesa bedesa dadan. Adecbidi, Dada Esuquidistu tantiesa con champi imenu, quesa aton papa. ¿Nuquin Papan bēdambo icmiaidēnda ambi chiaid niacquidbēdtan nabampadic? ¿Nuquin Papan Mayanēn tantiamiaidēnda Icho chieshēnquidbēdtambi chieshēmpadic? ¹⁵ ¿Esuquidistu Satanaspadquidta nedic? Padenquo. ¿Esuquidistu tantiaquid abi tantiesapadquidta nedic? Padenquo. ¹⁶ ¿Nuquin Papan ambi uaidbimboecnuc matsesēn nacenaid tantiaquidta aton Mayan Nuquin Papan meniaid icpadic? Padenquo. Abi tantiaquid aton Mayan menec. Nuquin Papan dada uamiampid dada uanu. Ista.

“Ĕbēd icquidbēd iquendabi;

Aidbēdi capuebi;

Aton papa nebi;

Con matses adquido nec,

¹⁷ Con matses icquin ěbi tantiesan ěmbi chiaid niacacpadomboen nainda.

Adecbidi aid icsacpadec tabadenda.

Adecbidi icsainquo yec tabad.

Adquid ěbēd iquec cho caindami.

¹⁸ Adquidon papa iquendabi;

Adquid ěmbi con madobēd con champi caid iquendac, quec Nuquin Papa.”

Abi tantiaquido nadatiambocquidēn aden chiec.

7

¹ Naden nanuna, quequin Nuquin Papan chiac nuqui naid icsatedibêdtabi nuqui tantiaid icsatedi ênu, quequin Nuquin Papan chiacpadomboen nabanec tabadtenenuna.

Unêsquo icboedi mimbi naid tantiash bédamboshê iquebi quiaid

² Adembidi, êbêdtabi êbipadquid tantiaquiota. Icsamboen nashunesa nebi. Adecbidi icsamianesa nebi. Adecbidi muaquin utsin na bedesa nebi. ³ Pabado tantienquo yec icsaobi mibi camenuen nêid chuiquin dada uainquo iccombi. Mibitedi tantiec tsadebi, quequin padpiden chiembi. Abimbo caimbi. Unêsequi mibi bëshuntiapimbo iquendabi. ⁴ Mimbi chiacpadpenquoicboedêmbi naosh, quequin choquidên chioshi. Aden chuisho tantiashun, Nuquin Papan chiacpaden nabanquidquo nec, quequin mibi chiec nebi. Unêsquo icboedi mimbi naid tantiash bédamboshê iquebi. Utsin natiamiaid icshobi bédambo iquebi, mimbi êbi camioc.

⁵ Nidaid Masedonia caid yacno choash quenentiapimbo iccobi. Esuquidistu tantiesan nac natiapobi. Esuquidistu tantiaquid icboedêmbi tantesa uatsiash, quec quenenuenquo iccobi. ⁶ Unêsquo icsho êbi tantiaquin Nuquin Papan Tito padpiden chomiosh êbi bédambo icmeoanuen. ⁷ Choashun mimbi aid tantiaquin nabanaid Titon chioshi. Adembidi, êbi iste mibi bunaid chioshi. Mimbi dada uaid isash unêsquo icquin, Codinto yacnocquidon mimbi chiacpaden nabanosh, quequin Titon chioshi. Aden chiac bédamboshê yanobi ad yenquo icboedi.

⁸ Mimbi dada uaid isash Codinto yacnocquido unêsquo iccosh, qesho tantiash, Icsambo icchitobi, quenuquo iquebi. Aden dada uaic icsambo iccobi, quetiapiambo yequi mibi unêsquo yacpadequi unêsquo iccobi. Yuec mibi ad yenquo iccoc. ⁹ Adecbidi nêbi bédambo iquebi. Êmbi mibi unêsquo icmiac mibi icsaid ênquin Nuquin Papan chiacpaden nabanec, quec utsibo. Aden chuisho tantiaquin mibi unêsquo icmêquin mibi icsabudmiambo iccombi. Unêsquo icmiaqui mibi bédambo yanoc. ¹⁰ Unêsquo icmiac, Nuquin Papan chiaid niacombi, quiash unêsquo icquin mibi icsaid mimbi ênac. Adsho isun Nuquin Papan ênêdtiapimbo cnoc aïdbêd mibi icmendac. Aden unêsquo icmiaqui, Bédambo iquebi, mibi quendac. Adecbidi mibi icsacpadec icsainquo mibi icpendac. Padnuen Nuquin Papan chiacpaden niacquin ênesa abi natiamiaiduidi tantiec Nuquin Papa yacno puduedtiapiambo iquendac. ¹¹ Padnuen mibi unêsquo icmiac nêbi ambi chiaid comapenen tantiate bunec mibi. Aid padpiden tantiaquin, ¿atotsi quiashini icsao? quequin mimbi chuipoc. Nuquin Papan cuidnushe quequin mibi icsaid mimbi ênoc. Adembidi, Êbi padpiden bédamboen is, quequin Nuquin Papa mimbi chioc. Icsashun chienquoicboedêmbi nêbi cuembo bédamboen chuinu, quequin mimbi chuibanoc. Aden mibi icsaid ênacsho isun mibitedi icsaquin êntiapimbo icquidên nacpaden naisa nec, quequin tantiembi. ¹² Icsaquid ambi icsa uanaidbêdtabi chuinen mibitedi dada uainquo iccombi. Abentsêc icsash abitedi unêsquo iquec. Adquiecbidi êbi unêsquo icmete bunesa mibitedi nec, quequin Nuquin Papan tantiamiac adomboembidi mibitedishun tantiapoc, quequin ¹³ êmbi tantiacpaden naquin mimbi bédambo iquebi camiaid nebi.

Adembidi Tito yuedquin mimbi bédambo iquebi camiaidbidi niosh. Êbi yuedenquoictsiash queboedi niosh. Yuedoshi, Tito qesho tantiash bédamboshê iquebi. ¹⁴ Mibi nidmembidi, Tito, qeshun, Êbi yuedquin nashunacpadomboen Codinto yacnocquidon mibi yuedtsiash quequin chiombi. Aden chiac mibi yacno Tito choacsho êmbi chuibocpadomboen mimbi

nashunac. Aden tantiash, Abimbo chiombi, quepobi. Ęmbi mibi muainquiocquin chuibanacpadec adquiobidi mibi nabanec tabadaid abimbo icosh. Adomboembidi Titon mibi isbanosh. ¹⁵ Ębitedi chushcatsiash, quequin mibitedishun Tito yuedpanēdac. Aden yuedac, Naden nata, quiosh Pabado, cac cacuidanenguiocquin mimi nabanoc, quec Tito. ¹⁶ Adoaidi ambia tantiaquid icquin Ęmbi chiac mibitedishun nabanendac, quequin tantiembi. Aden tantiec bēdambo yec tsadebi.

8

Aton na nibēdquid icsho aton na dadpen icquid menequid

¹ Nuquin Papan tantiamiac nidaid Masedonia caid yacnocquidon, Esuquidistu tantiec iccuededquidon, nēbi bēdamboen nabanec tabadaid chuinu. Tanta. ² Natiamiaqui bēdambo iquebi quec aido tabadec. Adec tabadquin Esuquidistu tantiaquid utsibo tantiaquin menenuquin aton na daēdpactsēc musucshun dayun uaosh. ³ Ęmbi, Meneta, cainquiocnobi aton na bedtequid naimbudtsēcquien menenuquin bedbanosh. ⁴ Esuquidistu tantiaquid utsibo, nidaid Udeya caid yacnocquido, aton na nibēdec natiaic, quequin chiac Masedonia caid yacnocquidon, Aido menenuna, quequin comapenen chuiposhi. ⁵ Mitsana daēdpactsēc icnuc utsibo mimi menetiapimbo icpec, quequin chuinu quenubi Nuquin Icbon tantiamiac, Codinto yacnocquidon chiacpadomboen bedbanshun menenuna, quequin aidon chioshi. ⁶ Adomboen menenun bedbamposh. Adosho isun Tito nadombi. Mimi Ęnden nidaid Udeya caid yacnocquidon natiaid chuibanac Nuquin Papan tantiamiacpadomboen menenueshun Codinto yacnocquidon tauain bedbanshun dayun uapondash. ¿Ambi chiactedta bedbanoshe? Isnu, qeshun istanta, quequin Tito chiombi. ⁷ Naden naquid Codinto yacnocquido nec, quequin mibi tantiembi. Nuquin Papan Mayanēn tantiamiaidquio yec comapenen Esuquidistu tantiaquido nec. Esuquidistu tantiaquid aid chuibanec. Nuquin Papan chiaid ambia tantiaquidquio Pabado nec, quequin tantiaquin, Naden nata, quequin Ęmbi chiacpadomboen badedquio comapenen naquidquio mibi nec. Adembidi ěbi tantiaquin naquido nec. Adquid mibi nec, quequin, Natiamiaido menenuen bedbanquin dayun uaimbi, mibi quiacpadomboen nabanquiota, quequin mimi iste dada uaimbi.

⁸ Meneta, quenquio iquebi. Natiamiaido tantiaquin menenu, abi quiacpadenda Codinto yacnocquidon menebampashe. Isnu, quianec, Codinto yacno nida, quequin Tito chiombi. ⁹ Nuquin Icho Esuquidistu abuc tabadec abitedishun Icho icboedi nuquitsen abuc abēdi tabadmenuec matsesash nidaidēn tabadnuc aton na nibēdpadenec. Aidēn matses tantiaquin nabanacpaden utsibo tantiaquin nabanta.

¹⁰ Ęmbi tantiacpaden mibi adembi chuinu. Tanta. Mibi bunacpadomboen, Menenun bedbanshun dayun uanuna, qeshun seta utsin mitsana bedbanshun dayun uaquin mimi tauapondac. ¹¹ ¿Aden nanuna, qeshun mimi chiacted ěnquina bedshun dayun uao? Padenquiocquin adota. ¹² Mitsana daēdpactsēc icnuc daēdpactsēc musucshun menesho isash, Dadpen meneta, quenquio Nuquin Papa iquec.

¹³ Aton na nibēdquid icsho, Natiacquin meneta, quenquio iquebi. Aton na nibēdquid icsho aton na dadpen icquidēn menec. ¹⁴ Mitsana dadpen icquid mimi musucshun meniac aton na nibēdquid bēdambo iquebi, quepec. Aden meniac mibēdi aton na nibēdquid bēdambo iquendac. ¹⁵ Nuquin Papan dada uamiampid nad iquec. Chuinu. Tanta. Petequidēmpi Nuquin Papan

mana caid meniaid chuiquin: “Shubun tabadquid dadpeshun aitedadtedquien bedbanshun peshun napi uaid nibēdosh. Adecbidi, aton shubun daēdpactsēc tabadquidon aited bedbanshun peshun napi uaid nibēdosh.” AdeC Nuquin Papan meniaidtedi bēdambo yampicpadec aton na dadpen icquidbēdi ambi meniaido bēdambo yampec.

Tito Codinto yacno nidte

¹⁶ Nēbi Tito mibi chuinu. Tantia. Ēbi mibi tantiamiacpadomboen Nuquin Papan Titotsen mibi tantiamiac. Aden Titon mibi tantiaشو isec, Mibi bēdambo iquec, Papa, quec tsadebi. ¹⁷ ¿Codinto yacno tsutsi nidpatsiash? quequin ěmbi chiac, Ēbibi nidebi, quiosh Tito. ¹⁸ Tito mibi yacno nidnuesho tantiaشun nuqui con utsi caid utsi Titobēdi nidta caombi. Aidi Esuquidistu chuibanquid nec, quequin utsibon chiec. Bēdamboquid nec. ¹⁹ Nidaid Masedonia caid yacnoquidon, Esuquidistu tantiec iccuededquidon ěmbi dayun uaid Pabado bēdtan buanec nid caidbidi Titobēd nidquid nec. ²⁰ Aid daēd ěbēdi nidsho isash, Nuqui na buanquin ampetsiash, quetiapimbo utsibo iquec. ²¹ Nuquin Papan tantiamiacpaden aidobēdtambi bēdamboen Masedonia yacnoquidon dayun uaid buanshunquin mitsana bedbidanec Udeya yacno nidebi. Ampenquiocquin buanec ma quenueshun aidobēdtambi buanshunembi.

²² Tsyuec nidebi, quequin utsibobēdta Tido mibi yacno nidmembi. Ēmbi nata cac bēdamboen nabanquid aitedi nec. Mimbi chiacpadomboen nashunquido Codinto yacnoquido nec, quec aido mibi yacno nidec. ²³ Mibi nashunquin ěbēdtambi Esuquidistu chuibanquid Tito nec. Aidbēdi Esuquidistu tantiaquid utsi nidec. Esuquidistu tantiec iccuededquidon nēuēshquo puduanec Codinto yacno nidta caboedi Titobēd nidec. ²⁴ Naden mibi chuiquin aido chiombi: Abi yacno choacsho isun Codinto yacnoquidon mibi nashunendac. Ēmbi chiacpadomboen nashumbanta ma mimbi nashumbanacsho aido nidmequidon Masedonia yacnoquidon tantiapana.

9

¹ Ēnden Esuquidistu tantiaquid utsibo tantiaquin nashunta quequin ěmbi chiac, ² Adonona, qeshun mitsana bedbanquin mimbi tauaondac. Adsho isun nidaid Masedonia yacnoēsh Esuquidistu tantiec iccuededquido mimbi menuequequin chuibocpadomboen chiombi. Abentsēcshun-abentsēcshunquien menebanquin dayun uanuna, quequin seta utsin mimbi chuibocpadomboen ěmbi chiac Masedonia yacnoquidotsen, Adomboembidi nabanembi, queoaposh. ³ Aden aidon chuisho tantiaشun nuqui con utsi caido mibi yacno nidmembi mimbi chiondacaden bedbanambo icnushe qeshun. ⁴ Nidaid Masedonia caid yacnoēsh Esuquidistu tantiec iccuededquido ěbēdien tsyuec mibi yacno nidchitec. Aidobēdi mibi yacno choshon ěmbi chiacpaden mimbi bedbanambocsho isash, Abimbo chiacimboen chuichitombi, quec natiaic bēpiutsiabi. Adquiecbidi mibi icoaic. ⁵ Adquo icnushe qeshun utsiboba mibi yacno nidmembi. Aido mibi yacno choacsho mimbi chiondacted bedbanquin dayun uaid mimbi ismetiac, Abimbo chiombi, quequin. Aido chonoc mimbi chiacted bedbanquin dayun uambochoedēmbi nēbi mimbi bedhampec. Aden mimbibi bedbanquin mibi menete bunacteduidtsēqui mimbi menec. Utsimbic, Menetiapibi, queboedēmbi utsin, Bec cho, cac aton piucquid tantiec unēsquo icquin menetsiash. Aden tantiaquin menenda.

Nuquin Papan na dadpen bedmiaidēn aton na nibēdquid menequid

⁶ Nuquin Papan chiaid chuinu. Adembi tantiata. Tied icbon daëdpectsëc nitsinac caniaash ëshëacsho aidtedtsëcbidi bedpec; dadpen ambi nitsinac caniaash ëshëacsho dadpen bedpec. ⁷ Adquibidi aton na icquid iqueque. Tantia. Chuinu. Nëidted meneneuquin ambi chiacted menequid. Ëmbi meniaid tantiash bëdambo iquebi, quepec adquid. Utsimbic, Menetiapibi, queboedëmbi utsin, Nëidted bec cho, cac menepec. Aden utsin chiacted meniash, Bëdambo iquebi, quetiapimbocquin menec. ⁸ Mitsana menete bunquin mimbi chiacted menesho isun Nuquin Papan uesadmenquiocquin mimbi bedmec ma utsi-utsien menebampanueshun. ⁹ Nuquin Papan dada uamiampid adomboembidi chiaid nad iquec: “Nuquin Papan dadpen bedmïoshi, quequin tantiaquin aton na nibëdquid utsi-utsien menebanec.

Aden menequid tantiaquin ënenquiocquin ambi naboad Nuquin Papan chuibanendac.”

¹⁰ Ambi meniaido menequidën bëdambo icmec, quequin ambi chiacpadomboen Nuquin Papan matsesën na daëd uaindac. Adecbidi ambi uaid tiedën caniquid ëshë abentsëc siaid dadpen yanec. Matsesën petequid adquiecbidi dadpen yanoaic. Adecbidi utsi menequid mibi icsho isun Nuquin Papan mibi bedmedenec ma mimbi meniaido dadpen icpanueshun. Aden mimbi dadpen menebanac aidontsen ambi bedaid musucshun utsi meneoapec.

¹¹ Aden mimbi meniac utsibotsen, Bëdambo iquebi, quec tabadec. Adecc tabadquin mimbi meniaid tantiaquin, Nuquin Papa bëdambo iquec, quequin mimbi meniaidon chiendac.

¹² Nuquin Papa tantiaquid icquin aton na nibëdquid Esuquidistu tantiaquid dadpen icsho menebanquin mimbi bëdambo icmiaid dadpen iquendac. Adembi, Nuquin Papa bëdamboshë iquec, quequin aidon chuibanendac. ¹³ Meniacsho isash, Esuquidistu tantiaquid nebi, quequin abimbo chuiquidquid aid nec, quequin mimbi meniaidbëdtambi utsibon mibi chuibanendac. ¹⁴ Adquidquid nec, quequin utsibon mibi chiecc. Mimbi tantiamiacpadomboen nabanquidquid Codinto yacnocquido nec. Aido bëdambo icme, Papa, quequin mimbi meniaidon adomboembidi chiendac. ¹⁵ Aden aidon chuinubi naden nuqui Nuquin Papa chiecc. Mimbi chomiaid Esuquidistu ëbi bëdambo icmenuec ëbi icsaid bedshunash abided cuidadec unëshash uincuempanëdash. Aidpadquid utsi nibëdec, Papa, quequin nuqui chiecc.

10

Ëmbi dada uacpaden mibi yacno choshon adomboembidi nabanembi quiaid

¹ Comapenec chushquenquiocquin matses bëdamboen tabadmenuequin chuibanquid Esuquidistu icpanëdash. Mibi yacno choshon Esuquidistupadquid icnuequin ëbi chieshënquid bëdamboen tabadmenuequin chuibanendambi. Ëbi chieshënquido nadec onquequin ëbi naden chiecc, quec. Nuquibëd tabadquin dacuëdacimboecquin comapenen Pabaddon chushcainquid iquec. Utsi yacno nidshun dada uaquin comapenen chushcaic, quiosh. Mibi chiecc adosh. ² Adsho tantiash mibi yacno choash tabadquin chushcante bunenquid icquimbi, Ambibi tantiacpaden nabanquid Pabado nec, quequido bëdamboen chuibanembi. ³ Esuquidistu tantiaquid yanshun ic-saquidën tantiacpaden nabanesa nebi. ⁴ Mibi yacno choshon matsesën tantiacpadenquocquin Nuquin Papan tantiamiacpaden ëbi chieshënquido Satanasën icsamboen tantiamiaido Nuquin Papan chiaid chuibanendambi. ⁵ Satanasën tantiamiaidon Nuquin Papan chiacpadomboen niaquec. Utsibon Edoen Nuquin Papa caid nibëdec, queshun ëmbibi tantiacpaden naic

bēdambo iquec, quequin tantiamiaido nec. Aden tantiaquid icscho isun ambi icsamboen tantiec pamumēdacimboc yeaid ēmenu quequin Nuquin Papan chiaid ēmbi chuibanubi abi pamumēdacimboc yeaid padpidec pausudtiapimbocnoc paucbanshun ambi tantiacpaden Nuquin Papan pausunendac ma ambi chiacpadomboen namenuequin. ⁶ Aden chuibanshun Nuquin Papan chiacpadomboen utsin-utsinquien abi icsaid ēnabicsho isun comapenen cuiendambi.

⁷ Ambī isaiduidi tantiec utsi-utsiec onquec. Aido onquiaid chuinu. Tantiā. Esuquidistu tantiaquid nebi, quequi, Pabado icsactsēcquio isadtsec, quepec aido. Aden chuiquido, Esuquidistu tantiaquid nebi, ēbi qesho tantiash, Muec nec, quetiapimbo iquec. ⁸ Abi tantiaquid ēbi yansho, Esuquidistun, Ēbi chuibeneta, cashumbic abi tantiaquido abi tantiadonequid icmenuequin chuibanquidbidi icmiondashi. Adquid icmiac ambi chiaid ēbi chieshēnquido tantiamenuen chuibanubi aidon tantiaid icsa paucshun ambi tantiacpaden Nuquin Papan pausunendac. Adoacsho isash, Abi chuibanquid Esuquidistun icmioshi, quequin tantiec, Adesa nebi, quetiapimbo iquebi. Aden tantiaquin ēmbi chiacpaden naimbi mibi yacno choshon caimbi. ⁹ Adquid nebi, quequin, Dacuēdampambocquid Pabado nec camenuen dada uainquio iquēmbi. ¹⁰ Mibi aden dacuēdmenu, quenquio icnubi ēmbi dada uaondaīd bedshun isun naden utsin ēbi chiosh quec. Chuiquidēn comapenen chushquequin chiacpadomboen Pabado dada uaic. Nēmboc choshon ambi dada uaqin chiacpaden chuitiapimbo icpec. Chichompibictsecsho ēbi isun, Chuiquidida nepec, quetsēcquin istseccombi. Tantiatiapimbocnoc chuibanondash, quequin aidon ēbi chiec. ¹¹ Aden ēbi chiec onquequidēn bēdamboen tantiata. Chuinu. Ēmbi dada uacpaden mibi yacno choshon adomboembidi nabanembi caimbi.

¹² ¿Esuquidistun, Ēbi chuibeneta, caid nebi, quepecta ēbi chieshēnquido iquec? ¿Adenda Esuquidistun, Ēbi chuibeneta, caidēnquio utsi icsamboen chuipec? ¿Esuquidistun, Ēbi chuibeneta, caid nebi, quequin abimbo chuiquidquio yec muaquin chuiquidpadquid nebi, quepectabi ique? Padenquio iquebi. Esuquidistun, Ēbi chuibeneta, caid nebi, quec muaid chuiquin abipadquid utsibēdtambi icsamboen nabanash, Nuqui bēdamboen naoc, cananec. Ambia icsamboen nabanquidēn chuibanquīn ismiac ambibi tantiacpaden nabanec abipadquid yanquidon. ¹³ Ēbien Nuquin Papan tantiamiacpaden chuibanquid nec. Ambī tantiamiacpaden mibitedi chuibanquid nebi. ¹⁴ Codinto yacno nidshun anouidi tabadquin Esuquidistu chuiban, Nuquin Papan cac mibēd tabadquin chuibanondambi. ¹⁵ Adembidi, Utsi yacno nid, Nuquin Papan cac nidshun utsibon chuibanondash. Aden aidon chuibanac anocquidotsen Esuquidistu tantiaquid yanondash. Aido Esuquidistu tantiaquid yansho isash ēmbi chuibanaido nec, quenquio iquebi. Mibēdi tabadquīn ēmbi chuibanac aid tantiaquid mibitedi yanondac. Adsho isash Esusquidistu tantiadonequidquio yampashun, quec mibi tantiec tsadebi. ¹⁶ Esuquidistu ēmbi chuiban-chuibanac aid tantiadonequiec mibitedi tabadsho isash Esuquidistu utsin chuibanacmanombo chuibanoc nendabi caombi. ¹⁷ Aden Esuquidistu chuibanac, Ēbi bēdambo ictiapimbocquid mimbi bēdambo icmiāid nebi, Papa, quequin ma Nuquin Papa Esuquidistu tantiaquidtedishun chuipanuna. ¹⁸ Bēdamboen nabanombi, abibi qesho Nuquin Papan bēdamboen istiapimbo iquec. Ambī, Bēdamboen mimbi naoc, caiduidi ambi bēdamboen isaidquio nec.

Pabado muesa icnubi muaquido

¹ Nēbi ěmbi dada uaid isash, tantiesa onquiachimboen mamēmenuequin Pabadon chiec, quenquicpashun caimbi mibi. Aden tantiatsiash, quequin abi dada uaimbi. Nēid bedash ěmbi abia dada uaondaaid isec mibi onquiapadec nēbi nēid mimbi iste dada uaid isec onqueta. ² Nuquin Papan tantiamiacpadec mibitedi cudasquidquo nebi. Adec cudasquin aton champi utsin, Bednu, cashunac utsin, Bednu, cac Bedadenda, quequin amēn aton champi chiacbimboen, Esuquidistun bednu caid yec icsamenuequidēn, Bednu, cac, Bedadenda, caimbi. Esuquidistu ěmbi chuibanaido mibitedi bedec choeque. ³ ěmbi chuibanac Esuquidistu tantiauidquimbi nisi bēdambo isadacimboecquidēn muaquin chiac Eban Nuquin Papan chiaid tantesa uampicpaden mimbi Esuquidistu tantesa uatsiac, quec tsadebi. ⁴ Adec ěbi tsadnubi Codinto yacno choshon utsin Esuquidistu ěmbi chuiboed utsi uain chuisho badedquo tantiec aidon. Adembidi, Mayan utsi iquec, quesho tantiash, ěbi mene, quec mibi. Adembidi, Mibi bēdambo icmequid Esus utsi iqueque. Aid tantiata, quequin ěmbi chiaid utsi uain chuisho, Abimbo iquec, quequin tantiec mimbi. Aden utsibon ěmbi chuiboed utsi uain chuisho tantiec, quesho tantiash Esuquidistu tantesa uatsiash, quec tsadebi. ⁵ Esuquidistun ěbi chuibeneta cac Nuquin Papan tantiamiacpaden chuibenec nebi. Aden chuibenenubi mibi, Bēdamboenshē utsibon chuibanacpaden Pabadon chuibanenquo iquec, quesho tantiash, Icsamboen chiombi, quetiapimbo iquebi. ⁶ Utsibon bēdamboenshē chiacpadec Pabado onquenquo iquec, mibi quenuc Esuquidistun, ěbi chuibeneta, quequin ambia tantiaquidēn tantiamiacpadomboen mibitedi chuibanombi bēdamboen tantiaquin.

⁷ ¿Codinto yacnocquido ma Esuquidistun bēdambo icmepanueshun chuibanecui, Bec cho, quenquo yectabi icsape? ⁸ Mibi Esuquidistu chuibanu quiash Esuquidistu tantiec iccuededquid utsibon na ampiacimboec tabadobi. Aidon aton na meniaqui aido nashunenquo yec mibi yacno nidash tabadquin mibi nashunquin Esuquidistu chuibanondambi. ⁹ Adec mibi yacno tabadquin Esuquidistu chuibanec bunec tsadec, Bec cho, quenquo iccondabi. Nidaid Masedonia caid yacnoesh choquidēmbini meniondash. Aden ěnden, Bec cho, mibi cainquo iccondacpadec nēbi adquiecbidi tsadebi. ¹⁰ Esuquidistun chuimaidquo nebi. Adquid icquin adquid nebi quequin chiembi mibēdi nidaid Acaya caid yacnocquid utsitedi, Padi. Aden chienda, quetiapimbocnoc. ¹¹ ¿Atotsi quiashini, Bec cho, quenquo icpe? ¿Mibi tantienquiocquindambi mibi, Bec cho, cainquo icpe? Mibi tantiec tsadebi. Codinto yacnocquido Pabadon tantiaid nec, quequin Nuquin Papan tantiec. ¹² Aden mibi tantiaquin, Bec cho, cainquiocquin Esuquidistu chuibenec nebi mimbi bēdamboenshē chuibanquid caid: Pabado nabanec tabadacpadec tabadebi, quetiapimbo icnubi.

¹³ Aido Esuquidistun ěbi chuibeneta caid nebi quec muaic. Adec muaquin mibi yuaic. Aidon abi tabadaid icsa ompoec. ¹⁴ Aido tantiamequin ismequid Satanac nec. Nuquin Papan abi yacnoshon uaid mayan bēda aibēdi tabadquido icsaisa yacpadquid nebi, quequin abipenquiocnoc chuiquin ismequid tantiamiac ¹⁵ adquiecbidi ambi namiaidtedi bēdamboquidimboec capucuededec. Cuidte ushē chonoc aido icsaid Nuquin Papan comapenen cuidquin chiendac.

Pabadon abi mēyanaid chuibanaid

16 Adembidi chuinu. Tantia. ¿Mamëmenuequin tantiesa onquiachimboendambi ëbi icaid chuibandio? ¿Utsin aden chuibansho tantianu, quepecta mibi ictsia? Aden chuibanenquiocquin ëbi icaid chuibanuna, 17 Chuita, Nuquin Icbon cainquiocnobi. 18 Abi icaid utsin-utsinquin chuibanec, quequin tantiaquin adomboembidi ëbi icaid chuibanuna. 19 Bëdamboen tantiaquidquio nebi, qeshun mamëmenuequin ambembi chiacimboen chuisho tantiec mimbi. 20 Ambembi chiacimboec, Yuanu, qesho tantiash icsamboen tantiaquidimboec mibi yuadte bumpec. Ambembi chiacimboec, Bec cho, qesho icsamboen tantiaquidëmbimboen menebanec mimbi. Muaquin chuiquin mitsana bedshunaqui cacuidenquio yec tabadec mibi. Aden mitsana ambembi isash, Mibi chuiquid nebi, qesho tantiash, ¿Tsuutsin mibi adquid icmiosh? quenquiocquin aidën chiapaden nabanec mimbi. Aton yuabimboecnuc mibi mëyanaqui, Min yuapenquio nebi, quenquio iquec mibi. 21 Nuquin Papan yua icca cac, Padi, quetsiash, quequin aden mibi chuitaidquidëmbi chienquio iccondambi.

Mibi yuanuequidon ambembi abi icaid chuibanac. Adomboembidi Pabadon abi icaid chiec, Codinto yacnocquido quetsiash, quequin tantiaquin ëbi icaid chuibanu. Tantia. 22 ¿Mimbi bëdamboen chuiquid nec caid, Isadaidbo nebi, quepecta iquec? Adembidi, Èbi isadaidbo nebi, caimbi. ¿Abaduanën tsyuecquid nebi, quepecta aidio iquec? Adembidi, Èbi Abaduanën tsyuecquid nebi, caimbi. 23 ¿Esuquidistu chuibanquid nebi, quepecta aidio iquec? Èbibi Esuquidistun ëbi chuibeneta caidquio nebi. Esuquidistu chuibanquid ëbi yapadquid utsi nibëdec. ¿Mibi mamënshumenuequindambi aden chuipadi? Padenquio. ¿Èbi yapadquid utside iqueque? Tantiata. Chuibanu. Utsi bëdiactsec chonoadnuc comapenec chonoadobi. Adecbidi quenën nauedaid utsi icnubi quenën nauedeniaid nebi. Adecbidi utsi bëdiactsec cuesaid icnuc yuen cuesto-cuestoid nebi. Mëyanac unëstsenobi, utsi quenubi aden mëyanac unëstsen-unëstsemboedi nebi. 24 Isadaidbon cueshcanten 39ted tambanquin cacuestoniondashi. Yuecshun aitedembidi. Yuecshun aitedembidi. Yuecshun aitedembidi. Yuecshun aitedembidi yuenquio cacuestonioshi. 25 Adembidi cuesten cuesoshi. Yuecshun padpiden. Yuecshun padpiden. Adembidi cuënoten sesioshi. Adecbidi cano dapa ëbi antsadnubi bincudec cano dapa mentoadosh. Yuecash adecbidi. Yuecash adecbidi. Adecbidi cano dapa abentsëc bidid-adecc mentoadan abentsëc ushec cano cuëshë bedash mentoadmane quiaish noadpondabi. 26 Adecbidi quenenenquio yec capucuenuequin Esuquidistu chuibeniombi. Adec utsi-utsiec yacno nidnubi acte mauanaid icposh. Adecbidi ampequid icposh. Adecbidi con matses isadaidbobi ëbi mëyante bumposh. Adecbidi isadaidpemo adquidbidi icposh. Matses dadpen yacno adquidbidi icposh. Unës uachitoshe, quenquio yec matses nibëdacno capucueniobi. Adecbidi acte dapan capucueniobi. Esuquidistu tantiaquid nebi, quequin abimbo chiacimboen chuiquidën unës uachitoshe, quenquio yec capucueniobi. 27 Con na bednuec chonoadec uëshquiobi. Padpiden-padpidemboen ushenquio icquin chuibanombi. Piasec acte bunquin adembidi Esuquidistu chuibanombi. Iquenguimbi chuibanombi. Dashcute icsactsecquid dasiuidquimbi chuibanombi. Yuedenquio yaqui adembidi chuibudombi. 28 Èmbi chuiboed Esuquidistu tantiabenabicquido icpec, quequin capucuenuequin chuibeniombi. Utsi yacno nidshun, Èmbi chuiboedo bëpiscudnushe qeshun mibitedi chuiquin dada uaombi. 29 Esuquidistu tantiaquid chieshec dayactiapimbo icpec. Adquiobidi iccobi, quequin tantiec tsadebi. Esuquidistu tantiaquid icsaosh, qesho tantiash unësquio yec, Nëbimbobi icsamianquid comapenen cuidta, Papan, quec tsadebi.

³⁰ Aidedtē ēbi icaid icnuc chieshenquoio yec ēbi dayacquio yaid chuibanombi. Nēbi ēbi cuenondaid chuinu. Tantia. ³¹ Abia Yampidēn, Nuquin Icho Esuquidistun Papan nabanaid ēnenquiocquin chuitequidquoio iquec. Aidēn nabanaid chuibanec muesa Pabado nec, quequin ēbi cuenondaid Nuquin Papan tantiec. ³² Ēbi cuenondaid nad icpondashe. Chuinu. Tantiata. Damasco yacnocquido ancanquidēn Adetas cuēmēdquidēn Pabado Damasco yacnoēsh puduēsho bedtā quequin shubu dadpen daquēnē uaid dapa shēcuētedi sondado ēctabēdmepondash. ³³ Adec daquēnē uaid shēcuē cuēmanquoio sondado tabadnubi bednushe queshun abuc daquēnē uaid iste shēcuēnshun tsitsan dapa antsadunshun daquēnē uaid cachoc budmepondashi. Budmiac ancanquidēn bedadtiapimbo yec cuempondabi.

12

Nuquin Papan Pabado ismiaid

¹ Ēbi icaid chuibanquin ēmbi dada uaid isbanash, Esuquidistun ēbi chuibeneta caidquoio Pabado nec, quequin Codinto yacnocquidon tantiatsh, quequin adobamboedtedi chuibanquin dada uaombi. Ēbi icaid chuibanquin ēmbi dada uaid isash, Abi natiamiaid dadpen icpec, quetsiash, quenquiocquin dada uaombi. Adembidi Nuquin Papan ēbentsēqui ismiondaid chuinu. Tantia. Nad iccondashe. ² Ēndenquimbo seta 14ted matamequin Nuquin Papan bēdamboshē yacno indopondashi. Intacchobi abuc indopondashi, quetiapimbo iquebi. Tantienuo iquēmbi. Adecbidi ēmbi tantiateuidi indoac, quetiapimbo icoaibi. Tsaudi, tantienuo iquēmbi. Nuquin Papambien tantiec. ³ Abuc bēdamboshē yacno indopondashi, quequin abimbo chiēmbi. ⁴ Abucshun utsi chuitēmaidquoio tantiapondambi. Ēmbi tantiondaid chuitiapimbo icpebi. ¿Mitsipadentsimbi ēmbi abucshun tantiaobod con onqueten chuiatsiaba? ⁵ Bēdambocquid icsho Nuquin Papan abi yacno indondashi, quetiapimbo iquebi. Natiamiantequid dadpen icnuc ambo abuc nidabi yec bēdambocquid nebi, quetiapimbo iquebi. ⁶ Abuc nidshun ēmbi isondaaid chuibanquin dada uaid isash, Bēdambocquid Pabado nec, quequin tantianushe queshun padenquoio iquēmbi. Ēbi bēdamboec tabadsho isash, Pabado bēdamboec tabadec, quesho tantiashe bēdambo ictsiabi. Adecbidi chuibanquoio tantiashe, Abimbo chuiquidquoio Pabado nec, quesho tantiashe adecbidi bēdambo ictsiabi.

Satanasēn natiamiaid

⁷ Bēdambocquid yansho Nuquin Papan abuc indoshon ismiondashi, quequin Pabado chuinushe queshun Satanasēn chomiaidēn ēbi natiamēded-natiamēdedsho isash, Chēn, quenquoio Nuquin Papa iquec. Satanasēn chomiaidēn natiamiac pinchuquēn siadaid namīn nidaēdaid chictiapimbo yachimboec con dada bēdanenquoio iquec. ⁸ Adec con dada bēdantiapimbo icnubi, Ēbi natiamēquid cueme, Icho, quequin chiondambi. Adshumbic, padpiden. Adshumbic padpiden adomboembidi chuided-chuidedondambi. ⁹ Adoquien, Padi. Bēdambocquid icmenuequin naid nec. Mibi dayacquio icmequid con Mayan mibēdi iquec, quequin Nuquin Icho chiondashi. Adoquien, Bēdanambo icsho Nuquin Icho ēbi dayacquio icmec quequin tantiec bēdambo iquebi, quec tsadebi. ¹⁰ Aden tantiec con dada icsambo icnubi Esuquidistu chuibenec capuebi. Ēbi icsamboen chuiquin mamēnshunaqui adecbidi Esuquidistu chuibenec capuebi. Utsin natiamiaqui adquiecbidi Esuquidistu chuibenec capuebi. Utsin mēyanaqui adquiecbidi Esuquidistu chuibenec

capuebi. Adquid icnuc natiapimbo icsho isun Nuquin Papan ëbi dayacquo icmiac tsadtiapimboquin chuibenec capuebi.

Esuquidistu tantiabemenuen chuibanombi quiaid

¹¹ Ëbi yacpadquid utsi nibëdec, quequin chienquiocquidquid niobi. Esuquidistu chuibanquid utsibon chiaid tantiateguiddquo iquec, qeshun mibëd icquidon ëbi icsamboen chiosh qesho tantiashun Pabado Esuquidistu chuibeneguid nec, quenquo utsibo iccosh, qesho tantiashun ëbi icaid chuibanquin dada uaombi. Bëdamboen tantiacimboen chuibanquid dadpen iquec. Aidon icsactsëcquid isadtsec, quequin ëbi chiec onquenubi Esuquidistu chuibeneguidquid nebi. ¹² Natiamiaqui chieshenguicquid Esuquidistu ëmbi chuibancho mibitedishun tantiapondac. Adembidi nadatiambocquid ëmbi nabansho mibitedishun isbededpondac. Adosho isun Esuquidistu ëbi chuibeneta caidquid Pabado nec, quequin chuitiadquidëmbi padenquid mimbi icpondac. ¹³ ¿Esuquidistu tantiec icquededquid utsi tantiaguin nashunquimbi mibi padenquidambi ictio? Utsibon meniaid niondabi. Mibëdi tabadec bunec, Bec cho, quenquo iccondabi. ¿Bec cho, qeshoda ëbi bëdamboen mimbi tantiatsemponda? ¹⁴ Ënden mibëdi tabadondabi. Yuecash padpidec mibëdi tabadoapondabi. Nëbi padpidec mibi yacno nidendabi. Mibëdi tabadec adecbidi, Bec cho, quenquo iquendabi. Mitsana bunesa nebi. Esuquidistu tantiaquidquid ma icpanu quequin mibëdi tabadquin chuibanendambi. Aton bacuëbo tantiaquin amën anibëdtan ambia tantiaquid icquin tied uaic adembidi shubu uaic bacuëmpibon nabantiapimbo icnubi. ¹⁵ Adquibidi mibitedi tantiec Esuquidistubëd icquid yampec quec chonoadec tsusiobudquimbi chuibenendambi. ¿Ëmbi mibitedi comapenen tantiasho isunda mimbi ëbi tantienquo yampe? ¹⁶ Bec, cho, quenquo yec mibëdi tabadondabi. Adsho isash, ¿Piuquid bedenquo icpecta Pabado tabadash? Muiquin chuiquin bedpash icnui, quec mibi. ¹⁷ ¿Mitsipadentsimbi bedpa? ¿Ëmbi mibi yacno nidmiaidonda muiquin chuiquin mitsana bedpash? Padenquo. ¹⁸ Titobëdta utsi mibi yacno nidmiondambi. ¿Adoac mibi yacno choash tabadquin muiquin mitsana ampequinda ictiosh? Ma padenquo icboc. Aidbëdi abentsëc yacimboen tantiaquidquid nebi. Aduidequi tabadquid ëbi daëdi nebi. ¹⁹ ¿Pabado ampesa nec mibi camenuendambi dada uaguin chuibampo? Padenquo. Esuquidistu tantiaquid icquin mibi aid tantiabemenuen chuibanombi. Ëmbi chuibanaid abimbo iquec, quequin Nuquin Papan tantiec. ²⁰ Mibi yacno choash ëbëdi abentsëc yacimboen tantienquo icnushe qeshun dada uaimbi. Comapenec chushcanansho istuidmane qeshun adembidi mimbi iste dada uaimbi. Mitsana nibëdnuc utsin na dadpen icsho isash chushcanansho tantiatuidmane qeshun mibi dada uashunembi. Utsi muiquin chuisho tantiamane qeshun adembidi dada uaimbi. Abipenquo chuisho tantiamane qeshun adembidi dada uaimbi. Bëdambo icquid ëbi icnubi utsi padenquo iquec qesho tantiamane qeshun adembidi dada uaimbi. Mimbi tantiapadpenquicquid icsho isash comapenec cuëdcedsho tantiamane qeshun adembidi dada uaimbi. ²¹ Ai, mibi yacno choashun adquid icsho isun, Ëmbi Esuquidistu chuibanaiido nec, quequin Nuquin Papa chuitiapimbo yec natiac bëpiuacimboec tsadmane qeshun dada uaimbi. Icsadenequidën abi icsaid ënabi icsho isash aido unësacimboecquid nec, quish unësquo icmane qeshun dada uaimbi. Aidon naid utsin istemaidquid nec. Mibibi ambi chudtemaid chudted-chudtedec icsambo yequi, Bëdamboquid nebi, quec muacuedec.

13

Icsaid ënesa chuiquin cuidendambi quiaid

¹ Mibi yacno daëdec puduedashic padpidec puduedendabi. Choshon, Icsadenequid iquec, quequin daëdshun-daëdshunquien chuisho tantiendambi. Abentsëcshun: Icsaquid iquec, quequin chuisho tantiatipimbo iquendabi. ² Tauamboec puduedshun Esuquidistu chuiabanec abi tantiaquido mibitedi yanondac. Padpidec puduedoashun icsadenequid icsho isun, Mibi icsaid ënta, cac padenquiocsho padpidec puduedoashun Nuquin Papan tantiamiacpadomboen mibi adquid utsibobëdta comapenen chuiquin cuidembi, quequin chiondambi utsitedishun tantianubi. ³ Esuquidistun tantiamiacpaden Pabadon dada uaid nec, quequin ¿mitsipadentsimbi tantiape? quequid comapenec onquequin chuiabanembique. Tantiaguota, caïmbi. Esuquidistun nadatiambocquin nacpaden ëmbi nasho mibitedishun ispondac. Aidën tantiamiac padpidec puduedshun adomboembidi mibi ismeoaimbi. ⁴ Aidi masesash nadatiapenquo icquidimbocesho isun cuesten dectampanëdash. Adoacsho Nuquin Papan uincuemiac unësesa yanquiopanëdash. Aid tantiaquidquio icquimbi ëmbibi nadatiambocquin nabantiapimbo icpebi. Abi chuiquid Nuquin Papan icmioshi. Aidëmbi ëbëdi icquin icsadenequid comapenen chuiquin naquidbidi ëbi icmeoaindac.

⁵ Esuquidistu tantiaquid nebi, qeshun ¿mitsipadentsimbi aid tantiape? Adecbidi, ¿Ambi chiacpadectabi tabadpe? qeshun tantiabono, quequin Nuquin Papan chiaid isbanta. Aden isbanshun, Ambi chiacpaden niacniaccomb, qeshun Esuquidistu ëbëd ictiapimbo iquec, quequin tantia. Aid mibëd icnuc ambi chiaid niac-niaquenquo mimb, iquendac. ⁶ Adecbidi, Pabado Esuquidistun ëbi chuiabeneta caidta neque. Isnü, quequidën ëbi nabanec tabadsho isun, Pabadon abimbo chiosh, capashuni mimbi. ⁷ Aden tantiaquin Codinto yacnocquido bëdamboen tabadmeta, Papa, quequin chuidedchuidedembi. ¿Mibi bëdamboec tabadsho isash, Pabadon chuibaniaido nec, quequin mibi isquidon chuitsiash, quequindambi Nuquin Papa chuidedchuidedpadi? Padenquo. Esuquidistun ëbi chuiabeneta caid Pabado nec, quequin tantiesha utsi-utsiec icnubi, Nuquin Papan chiacpadomboen nabanquidquio Codinto yacnocquido nec, quequin utsibon chuisho tantiatiaquido iquebi. ⁸ Nuquin Papan chiaid abimbo iquec, quequin ambi chiaidquio chuiabanquidquibidi nebi. Ambi chiaid utsi uain chiesa nebi. ⁹ Mibi bëdamboec tabadsho isash bëdambo iquebi, quec tsadtsiabi. Mibi comapenen chuitiapimbo iquebi. Codinto yacnocquido icsaisambo icmeta, quequin Nuquin Papa chuidedchuidedec nebi. ¹⁰ Aden mibi tantiec tsadquin mimbi iste dada uaimbi. Mibi yacno nidabicquin dada uaimbi ma puduedshun icsaquid nibëdsho isun comapenen chienquo icpanu quequin Esuquidistun tantiacpaden Nuquin Papan nua pausunaid ma icpanueshun chuiabanec nebi. Mibi comapenen chuitiapimbo iquebi. ¹¹ Nëbi ënquin dada uaimbi. Icsaisa icnu quec Nuquin Papan chiacpadec bëdamboec tabadta. Ëmbi dada uain chiaid isquin adobanta. Abentsëc yacmiboen tantiaquin nabanec tabadteneta. Adec tabadsho isash tantianquidquio utsibëd bëdamboec tabadquidquio Nuquin Papa mibëdi iquendac. Aidënquo mibi adquidquibidi icmendac. ¹² Èbi isec cho cananta. ¹³ Mibi tantiec tabadebi, quec nëmbo tabadquido Nuquin Papan bëdambo icmebanaido. ¹⁴ Nuquin Icho Esuquidistun bëdambo icmiaido nebi, quequin mibitedishun tantiaquota. Adembidi, Nuquin Papan tantiaid nebi, quequin tantiaquota. Adembidi aton Mayan ëbëd iquec, quequin tantiaquota.

Padi. Aidedi dada uaimbi.

CADASIA YACNOCQUIDON ISTE

Pabadon tauamboen chiaid

¹ Pabado nebi. Esus chuibenecquidquio nebi. Matsesën: —Adquid icta —¿caidtabi nedi? Padenquio. Esuquidistun: —Ëbi chuibeneta —caidquio nebi. Aid uincuemenedaid Nuquin Papantsen: —Con mado Esus chuibeneta —caidquio nebi. ² Nidaid utsi Cadasia caidën tabadquidon Esus tantiaquidon mimbi iste dada uaic nebi. Mibi tantiac unësquio iquec. Adem-bidi tantiec nëmbo icquido Esus tantiaquidtedi: —Unësquio iquec —quiosh. ³ Mibi tantiaquin Nuquin Papa chianembi naden. —Min Mado Esuquidistubêdta bédamboen isquin Cadasia yacnocquido bédambo icmeta, Papa —quequin Nuquin Papa chianembi. ⁴ Matses bédambo icmequid Esus nec. —Ëbi tantiesabo tabadac bimboec icsamboec tabadboedëmbi ëbi tantiasho bédamboec tabadquid icmendambi —quiash Nuquin Papan chiacpadec abi tantiaquido cuidmenquio icnuec abided cuidadec Esus unëspac caondash. ⁵ Aidën Papa tantiaquin: —Nuquin Papa bédamboshë iquec —canuna ënenquio icquin.

Esusuidi tantienquio yanaid

⁶ —Esus tantienquio yanosh —quequin mimbi naid chuisho tantias shubitiadquio iccobi. ¿Ëbi chonobida badedquio Esus tantienquio yano? Nuquin Papan tantiamiac abided cuidadec unësaid Esus tantiec mibi tabadondac. Aden Nuquin Papa aton Mado Esusbêdta tantiaboedëmbi çnëbida Nuquin Papa tantienquio yano? Utsibon icsamboen chiaquien mimbi Esus tantienquio yanac. ⁷ ¿Aidon chiaidta bédambo icpec? Aidon chiaid ma Nuquin Papan chiaidpenquio neyoc. Esusquio chienquio icquin muaquin chuisho tantiasshun: —Abimboen cachitec —qeshun mimbi Esus tantienquio yampac. ⁸ —Aton Mado Esusuidtsëqui tantiasho Nuquin Papan nuqui bédamboen isec —quequin abimbo chiondambi. —Nuquin Papan chiaid abimbo chienquio icsho Nuquin Papan cuidpashuni —quequin aden abimbo chiondambi. Nuquin Papan abi yacnoshon uaid mayan bédantsen muaquin chuisho tantiasshun aidtsen: —Nuquin Papan cuidpashun —catsiambi. Utsibontsen muaquin chuisho tantiasshun aidtsen: —Cuidpashun —quiobi. ⁹ Tantia. Adem-bidi mibi chuinu. Ëmbi chuibanac mimbi Esus tantiabonondac. Mibi tantiondaid Esusquio chienquio icsho: —Nuquin Papan cuidpashun —caimbi mibi muauaquin chuiquido. ¹⁰ —¿Matsesën: “Mibi bédambo iquec,” mabi canu —quequindambi aden chuibampadi? Padenquio. Nuquin Papan chiacpadomboen mambi natiadquio yoc. —Bédambo iquec —Nuquin Papa camenuen mambi chuibampabóc. Matsesën chiacpadomboenuidi natiapimbo iquebi. Aenuidi naic Esuquidistun yuambo ictiapimbo ictsiabi.

Esusën chiaidquio chiec nebi, quiaid

¹¹ Tantia, con utsibo. Mibitedi chuinu. —Esus tantiassho Nuquin Papan matses bédamboen isbentsiash —quequin ëmbi chuiboed amben chiaidpenquio nec. ¹² Matsesën chiabi Esuquidistun tantiamiac ambi chiaidquio chuibanombi.

¹³ Tantia. Aden Esusën ëbi tantiamiondaid mibi chuinu. Con matses isadaidbon chiacpadomboenuidi natiadquio icquin Nuquin Papa tantiesabo danquin Esus tantiaquido comapenen chieshënnquin cuesun secatiadquio

icpadenebi. Ęm̄bi adodened Ęm̄bi chuisho mimbi tantiondac. ¹⁴ Nuquin Papa tantiatiaquido icquin con matsesĕn chiaid abitedimbo natiadquido ictenebi. Ębĕdta tishaidon caniabon bĕdiactsĕc natiadquido icnubi con tsusedpabon chiaiduidi natiadquido ictenebi. Adquid icquin Esus tantiaquido comapenen chieshĕndenembi. ¹⁵ Adshobini Nuquin Papan aton Mado Esus tantiamiondash. Ębi tishabi icnubi ĕbi caic: —Con Mado Esus tantiameshun bĕdamboen isquin ¹⁶ Pabado: “Matses utsibo isadaidpembo con Mado Esus chuibeneta,” caindambi —quequin ambi chiacpadomboen Esus tantiamiondashi. Adoac: —Esusĕn chiaid ĕbi chui —quequin matses chiambo iccondambi. ¹⁷ Shubu dadpen icquid Edu saden caid yacnocquido Esusbĕd icnĕdaido ambia Esus chuibanĕdaido chuitanambo iccondambi. Utsibo chienquio yec nidaid utsi Adabia caid yacno matses nibĕdacno badedquido nidtanondabi. Adashic yuec-yuecpambo ictanec auĕshquio choec shubu dadpen icquid Damasco caid yacnobidi choaondabi.

¹⁸ Adashic ambo nidash seta abentsĕc chotsecnuc matametane c Edu saden yacno Petedo isec nidtanondabi. Adec nidash 15tedec ushec aibĕd tabadondabi. ¹⁹ Ambobi Nuquin Icho Esusĕn utsi Acobo caid isondambi. Esusbĕd icnĕdaid utsi isambo iccondambi. Aid daĕdtsĕqui isondambi. Utsibo padambo. ²⁰ Abimbo chuiquin nĕid dada uaic nebi. Ęm̄bi aden chuibansho tantiash: —Ai, abimbo caic —quec Nuquin Papa.

²¹ Aden Edusaden yacno istanec choashic yuec-yuecpambo ictanec nidaid utsi Sidia caid yacno nidondabi. Auĕshquio nidshun nidaid utsi Sidisia caid yacno istanondambi. ²² Nidaid utsi Udeya caid yacno Esusbĕd icnĕdaido yacno yuec tabadambo iccondabi. Adsho anocquidon Esus tantiaquidon isabi iccondashi. ²³ Ęm̄bi naid chuishouidi tantiapac caondash. —Nuquipadquid Esus tantiaquido cuesun secatiadquido icnĕdaidĕm̄bi Esus tantiabenshun Esusquio chuibeniosh —quequin ĕm̄bi naid chuishouidi tantiapac caondash. ²⁴ Aden ĕm̄bi naid chuisho tantiash: —Nuquin Papan nac Pabado bĕdambo iquec. Adomboen Pabado tantiamec Nuquin Papa bĕdamboshĕ iquec —quepac caondash Udeya yacnocquido.

2

Edusaden yacno nidoaid

¹ Yucash seta 14ted matamiash Edusaden yacnobidi nidoapondabi. Ębĕdi Bednabe caid nidpondash. Titotsen buanondambi. ² Adec Nuquin Papan tantiamiacpade c ambo nidshun Esus tantiaquido chuiquid dapabo caidouidsĕqui cho-chomeshun ĕm̄bi naboe chuibanondambi. —Ęm̄bi chibabi yac aidon: “Muequi neque. Pabadon chuisho tantienda,” canushe —queshun naden chiondambi. —Nuquin matsespenquio isadaidpembo matses utsibo Esusquio chuibeniom̄bi. “Esusuidi tantiasho Nuquin Papan nuqui bĕdamboen istsiash,” quequin chuibeniom̄bi. ¿Adembidida mimbi tantiape? —capondambi Esus tantiaquido chuiquid dapabo chuiquin. Ęm̄bi adoac: —Ai, adembidi tantiem̄bi —quepondash aid. ³ Ębĕd icquid Tito caid isadaidpembo icshobi: —Shui dĕbid dĕteshune —cainquio iccondash chuiquid dapabon abi utsibon: —Adotiad —canubi. ⁴ Adec: —Shui dĕbidien dĕteshunetiad —quequido Esus tantiaquid damianquiec Esus tantiaquidombo tabadacno puduedpondash. —Esus tantiaquidon: “Esusuidtsĕqui tantiasho Nuquin Papan nuqui bĕdamboen isec,” quequin con tsusedpan chiaid niacsho tantianu —quiash ĕbi yacno puduedpondash. Adec puduedshun tantiashic: —Mimbi icsamboen chiec. Nuquin tsusedpa Moisesĕn chiampidtedi nasho Nuquin Papan bĕdamboen istsiash —quepondash. ⁵ Adec aidon: —Nuquin tsusedpan

chiampicpadomboenuidien nametiad —quesho: —Padi. Mimbi icsamboen chiec —quequin aidën chiacpadomboen nainquo iccondambi. —Ma matses utsibon: “Esusënuidtsëqui Nuquin Papa ëbi bëdamboen ismec,” quequin ma Esusquo tantianu —queshun nainquo iccondambi.

⁶ Aden Esus tantiaquido chuiquid dapa caidon Esus tantiaquidën natequid utsi chienquo iccondashi. —Esus tantiabenacsho isun nuquin tsusedpan chiacpadomboentsen nameta —quequin chienquo iccondashi. ¿Esusbëd icnëdaidën: —Moisesën chiaidtsen nameta —cactambi nametsemponda? Padenquo ictsenondambi. ¿Atotsi Nuquin Papan aido capec? —Esusbëd iccondaidquo neque. Bëdamboen isnu —¿capenda iquec? Padenquo. ⁷ Naden Petedo chedon chiondashi. —Nuquin Papan chiacpadomboen mimbi matses utsibo isadaidpembo Esusën naid chuibeniatic. Nuquin Papan chiacpadom-boembidi Petedon nuquin matses isadaidbo Esusën naid chuibeniash. Petedon nacpadomboen mimbi bëdamboen nac —capondashi. ⁸ —Nuquin Papan namiaid icquin Petedon nuquin matses isadaidbo dadpen Esus tantiamioh. Adembidi Nuquin Papan namiaid icquin mimbitsen matses utsibo dadpen Esus tantiamiac ⁹ —queshun bëdamboen ispondashi. —Adembidi nanuna. Mimbi isadaidpembö Esusën naid chuibenenubi adembidi isadaidbombo chuibenendambi —quepondash. Adshumbic: —Esus tantiaquidquo mibi nec —queshun chuiquid dapabon Bednabebëdta mëdimbampondashi. Nëidic Petedo. Nëidic Acobo. Nëidic Uan. Aidtedishun chuiquid dapabo icquin adondashi. ¹⁰ Nadentsen chuipondashi. —Aton na nibëdquido bëdamboen isnuna —capondashi. Adsho tantiaish: —Ai, adonona —quepondabi. Adanec nidpondabi.

Antioquiya yacnoshon Petedo chushcaid

¹¹ Adash yuectaniash ëbi iccondacno shubu dadpen icquid Antioquiya caid yacno Petedo chopondash. Auëshquo icsashobimbi bësqiuquin chush-capondac. ¹² Abëdtan Esus tantiaquido matses utsibon codocaid pec bëdamboec tabadboedi aton pete isuidanec aiodbëd cuëshëdec Petedo ic-sapondash. Ambo choash Esus tantiaquido con matsesëmpenquo codocaid pec bëdamboec tabadondash. Adnubien Acobon: —Ambo istan —cac con matses Moisesën chiampid tantiaquido cho-chopondash. Aido cho-chosho isash: —Moisesën chiampid niacquin matses utsin codocaid pesho chush-canushe —quec dacuëdquin isadaidpembon pete meniaid isuidampondash Petedon. Adec abëdtan Esus tantiaquido matses utsibobëd cuëshëdec ic-sapondash. ¹³ Adsho isash anocquido isadaidbotsen abëdtan Esus tantiaquido matses utsibobëd tabadenquo yec cuëshëdpondash. Adsho isash ëbëd icquid Bednabetsen adechbidi cuëshëdec icsapondash. ¹⁴ Adec icsaquin Esusën chiacpadomboen nainquo icshobimbi Petedo chushcapondac Esus tantiaquidtedishun tantianuc. —¿Ada mimbi bëdamboen naoque? Tantia. Chuinu. Isadaidbo tsusedpan chiaid matses utsibo mimbi namec. Isadaidbo icquimbi matses utsibon codocaid pec aibëdi mibi bëdamboec tabadoc. Aidon piaid pec bëdamboec tabadboedi nëbi aibëd mibi cuëshëdoc. Adsho isash mimbi nianaïdo: “Petedon matses isadaidbo tabadacimboec tabad-shouidien Nuquin Papan nuqui bëdamboen ischitotsiash,” quepec icsamboen chiec. Aden mimbi icsamboen tantiamëque. Tantia. ¿Atotsiequin mimbi naoque? —capondambi Petedo chushcain.

Nuquin Papan bëdamboen iste chiaid

¹⁵ Naden con matses Petedo chiondambi. —“Moisesën chiampicpadom-boen naisabo matses utsibo icsambo iquec,” quequin nuquin matses isadaidbon tantiec. Nuquien isadaidbon chidon tishacsho tsusion shui dëbid dëteshun secanëdaïdo nec. ¹⁶ Adquid icquin: “Moisesën chiaiduidi naquin

Nuquin Papa bēdamboen ismembi,” quedenedi nēbi nuqui utsien chiec. “‘Abided cuidadaid Esusēnuidsēqui Nuquin Papa ēbi bēdamboen ismec,’ quequin Esus tantiasho Nuquin Papan nuqui bēdamboen isec,” quequin nuqui tantiec. Adshun matses utsibobēdtambi nuqui Esus tantiaquiec. “Moisesēn chiaid niaquesa nibēdsho isun Nuquin Papan matses abitedi bēdamboen istiapimbo iquec,” quequin tantiashun nuqui bēdamboen ismequid Esus nuqui tantiabenondac —quequin Petedo chiondambi.

17 Adashic Petedobidi chui-oaic: —“Esusuidi tantiasho Nuquin Papan nuqui bēdamboen istsiash,” qeshun Esus tantiabenondacsho nuquin matsesēn icsambo capondashi. “Nuquin tsusedpan chiacpadomboen nainquio yec mibi icsambo iquec matses utsibobimboec,” capondashi nuquin matsesēn. ¿Ada Esuquidistun matses icsambo icmepec? ¿Ambi chiacpadomboen naicta nuqui icsape? Padenquio. 18 “Nuquin tsusedpan chiacpadomboen nashoen Nuquin Papan nuqui bēdamboen isec,” quequin nuquin matsesēn chiaid nec. Esus tantiaquin aden chuitiapimbo yanondabi. Adec Esus tantiaquid icboedi: “Padpīden con tsusedpabon chiaiduidi naquin Nuquin Papa bēdamboen ismembi,” qeshun abi bēdamboen ismequidquio Esus tantienguiyo yequini icsambo icchitotsiac. 19 Con tsusedpa Moisesēn chiactedi natiadquio ictenebi. Adquid bēdamboen iste danquin abitedi natiadquio icquimbī abitedi nainquio iccondambi. Adshun: “Moisesēn chiactedi ambembi matsesēn natiapimbo iquec,” qeshun ěmbimbo naid ěnondambi. Nēbini Esus tantiec Nuquin Papan chiacpadec tabadec. 20 “Abi con tsusedpa Moises chuimiactedi nashouidi Nuquin Papan nuqui bēdamboen istsiash,” quedenedi Esus tantiec adenquio yanondabi. Nēbi ěmbi tantiadquio nainquio yec Esuquidistubēdi cuēshēdenquio yec bēdamboec tabadebi. “Ēbi tantiec ēbi cuidmenquio icnuec abided cuidadec unēsac caondash,” quequin tantiashoeni Esusēmbi bēdamboec tabadquid icmec. 21 “Abided cuidadaid con Mado Esusuidi tantiasho matses bēdamboen isendambi,” quequin Nuquin Papan chuipanēdash. Aden Nuquin Papan chiaid niactiapimbo iquebi. Moisesēn dada uapampid ambi chiaid niaquesa icsho Nuquin Papan bēdamboen istsenac. Ambi chiaid niaquesa nibēdec. Adquid Nuquin Papan chiaid niaquesa icnuc: “Matses cuidmenquio icnuec ěbided cuidadec unēsnu,” queboedi Esus padenquio ictsempañēdash —capondambi Petedo chuiquin.

3

Nuquin Papan aton Mayan tabadmiaid

1 Tantia. —Cadasia yacnocquido piushbimboecquin tantienguiyo yanosh —quequin chuisho tantiashun mibitedi chuinu. ¿Tsuntsin: —Tantienda —cac Esus tantienguiyo yano? —“Cuesten dectanac abided cuidadaid Esusēnuidsēqui Nuquin Papa nuqui bēdamboen ismec,” quequin Esus tantiasho Nuquin Papan nuqui cuidenquio iquec —quequin mibi chuibanondambi. ¿Esus tantiatiapimboda ique? 2 Mimbī tantiadid ēbi chui. Tantanu. ¿Atotsi quiash Nuquin Papan Mayan mibēdi tabadanondash? ¿Nuquin Papan ambi chiaid Moises dada uamepampid mimbi nabanuda mibēd tabadanondash? Padenquio. ěmbi chiondaid Esusquio mimbi tantiabensho isashien mibēd tabadanondash. 3 ¿Pabiate shēcuē choquidida mibi nendac? Tantia. ¿Atotsieshun tantienguiyo ique? Mibēdi tabadquin Nuquin Papan Mayanēn mibi bēdamboec tabadquid icmec. ¿Nēbi Esus tantienguiyo yanecta mibi bēdamboec tabadpatsia? Mibembi bēdamboec tabadtapiamboen mibi iquec. 4 ¿Aden Nuquin Papan aton Mayan mibēdi tabadmiaid icquimbida Esus tantienguiyo

yano? ⁵ Nuquin Papan aton Mayan mibēdi tabadmequin comapenen tanti-aquin nacnenquin mibi ismiondash. ¿Atotsieshun Nuquin Papan aton Mayan mibēdi tabadmec? ¿Con tsusedpa Moisesēn chiampid nashoda Nuquin Papan aton Mayan mibēdi tabadmec? Padenquo. Ēmbi chiondaidquo Esusquo tantiasho Nuquin Papan aton Mayan mibēdi tabadmec.

Nuquin Papa tantiaquidquo Abadauan chiaid

⁶ ¿Tsutsi Nuquin Papa tantiaquidquo icpampic? Abadauan nepampic. Nuquin Papan chiac Abadauan: —Abimbo mimi caic —quesho: —Adquid bēdamboen isembi —queshun Nuquin Papan bēdamboen isbempampic. ⁷ Adec Abadauan: —Nuquin Papan abimbo caic —quequin tantiapampicpadom-boen nēbi matsesēn Esus tantiasho Nuquin Papan bēdamboen isendac ambi Abadauan ispampicpadomboen. ⁸ —Esus tantiaquido iquendac —quequin naden Nuquin Papan Abadauan chuipampic ěndenquimbo. “Abadauan, mibi unēsān yuecquimbo ictaneshun min tsyuecquid abentsēc tantiaquidtedi bēdambo icmendambi. Nidaid utsi-utsiec yacno tabadquidon min tsyuecquid abentsēc tantiasho bēdambo icmendambi,” quequin Nuquin Papan chiaid con tsusedpan dada uapampic. ⁹ Abi tantiaquidquo icsho ambi Abadauan bēdamboen isampicpadomboen nēbi aton Madō Esus tantiasho Nuquin Papan nuquitsen bēdamboen isec.

¹⁰ Utsiboen Nuquin Papan cuidtequido nendac. —Moisesēn chiampicpadomboenuidi nasho Nuquin Papan bēdamboen istsiashi —quequidēmbi abitedimbo nainquo icsho Nuquin Papan cuidendac. Aden ěnden Nuquin Papan chiaid dada uapampic. “Ambi chiactedi nainquo icsho Nuquin Papan cuidendac,” quepampic. ¹¹ —Ambembi Moisesēn chiampicpadom-boenuidi nasho matses bēdamboen isendambi —¿quecta icpanēdash Nuquin Papa? Padenquo. Ambi chiaid niacquidquidquo icsho bēdamboen istiapimbo icquin Nuquin Papan naden chuiquin dada uamepampic. “‘Nuquin Papa ambi chiacpadomboen naquidquo nec,’ quequin abi tantiec tabadquidien Nuquin Papan bēdamboen isec,” quequin dada uamepampic.

¹² Ěmbembi Moisesēn chiactedimbo nanuequidta Nuquin Papambo tantiec tabadpec? Padenquo. “Moisesēn chiactedi naquid Nuquin Papabēd tabadēdac,” quequin chiampicpaden ambembi matsesēn natiapimbo iquec. Natiapimbo icsho Nuquin Papan bēdamboen istiapimbo iquec.

¹³ Aden Nuquin Papan matses abitedimbo bēdamboen istiapimbo ic-nuc Esuquidistu: —Ēbided cuidshun ěbi tantiaquido ma con Pan cuiden-quo icnu —quiash abided cuidadec unēsac caondash cuesten dectanac. Aidquo chuiquin Nuquin Papan con tsusedpa dada uamepampic. “Cuesten dectanaid Nuquin Papan cuidaidquo nec,” quequin Nuquin Papan chiaid dada uapampic. ¹⁴ Adec matses utsi-utsien abi tantiaquido cuidmenquo icnuec abided cuidadec Esus unēsac caondash. Ěndenquimbo con tsusedpa Abadauan chiec: —Yuecshun bēdambo icmendambi —quequin Nuquin Pa-pan chuipampicpadomboen abi tantiaquido bēdambo icmequin aidobēdi aton Mayan tabadmenuec Esus unēsac caondash.

Abadauamba chuishun Moisesetsen Nuquin Papan chiaid

¹⁵ Tanta, con utsibo. Mibitedi chuinu. Min matsesēn nadoquid. —Naden naindami —quequin dada uashun: —“Abimbo chiaidquo nec,” ma isquidon canu —queshun abi cuēmēdquidtsen dada uaquid. Aid dada uaid dada uaquidbēdtambi utsintsen utsi uatiapimbo icquid: —Chuiquidēn cuidnushe —queshun. Adembidi ambi chiaid utsi uatiapimbo icquid ic-quin ¹⁶ Nuquin Papan: —Nadomboen naindami —quequin Abadauan chuipampic. —Mibi nibēdanān yuecquimbo ictaneshun min tsyuecquid

abentsēcshun matses bēdambo icmendac —quepampic. —Min tsyuecquid abentsēc tantiaquidtedi bēdamboen isendambi —quequin tantiec adpampic. Esus caiqui: —Min tsyuecquid abentsēc —quec adpampic. —Min matses tsyuecquido dadpen —quenquo icpampic. ¹⁷ ¿Ada tantie? Ēndenquimboshē Nuquin Papan Abadauan chuiquin: —Min tsyuecquidēn matses bēdambo icmendac —capampic. Adshumbic yuecquo ictaneshun seta dadpenquo 430ted matameshun Moises utsitsen chuiquin Nuquin Papan dada uamepampic. Ambi Abadauan chiampid niaquenquo icquin Nuquin Papan ambi chiaid utsi Moises dada uamepampic. Muenquo icquin Abadauan chuipampic. ¹⁸ ¿—Ēmbi chiaid ěmbi Moises dada uamiacpadomboen nashouidi mibi bēdamboen isembi —queshunda Nuquin Papan Abadauan bēdamboen isbempampic? Padenquo. Moises tishabi icnuc ambi chiac: —Nuquin Papan abimbo caic —abi casho Nuquin Papan Abadauan bēdamboen isbempampic. Adashic: —Yuecshun min tsyuecquidēn matses bēdambo icmendac —quepampic. Aden ambi ěndenquimboshē chiampicpadomboen nēbi matses bēdambo icmequin Esus tantiaquido Nuquin Papan bēdamboen isec.

¹⁹ ¿Atotsieshun Nuquin Papan ambi chiaid Moises dada uamepampic? —Ēmbi chiaid isash: “Icsamboequien nuqui tabadchitec,” quequin ma matsesēn tantianu —queshun Moises dada uamepampic. Nuquin Papan Abadauan chiampid Esuquidistu choabi icnuc adopampic. Nuquin Papan abi yacnoshon uaido mayan bēdabon Moises chuiuampampic. Adoac Moisesēn aton matses Nuquin Papan chiaid chuibampampic. ²⁰ Nuquin Papanquo Abadauan chuipampic. Abadauan caic: —Chuitan —cainquo icquin Nuquin Papanquo Abadauan chuipampic.

Matses abi icsaid tantiamete chiaid

²¹ Aden Nuquin Papan Abadauamba chuishumbic Moisesēn chuipampic. ¿Ambi: —Min tsyuecquid tantiaquido bēdamboen isendambi —quequin Abadauan chiampid niacquinda Nuquin Papan Moises chuipampic? Padenquo. ¿Matses bēdamboen isnuenda Nuquin Papan ambi: —Naden nata —quequin chiaid Moises dada uamepampic? Padenquo. —Matses bēdamboen isnu —queshun ambi chiaid Moises dada uameshun ambi chiaid niaquesa bēdamboen isun unēsacsho abēdi tabadmetsiash. —Ēmbi chiaid niaquesa nibēdendac —quequin tantiaquin ambi: —Naden nata —quequin chiaid Moises dada uamepampic. ²² —Ēmbi chiaid isun: “Nuquin Papan chiaid matses abitedishunquien niac-niacchitec. Mētaniac abembi mēnchiquidtiapimbo yacbimboec abembi bēdambo ictiapimboen icchitec,” quequin ma matsesēn tantianu —queshun Nuquin Papan Moises dada uamepampic. Adec matses abitedi icsamboec tabadsho bēdamboen istiapimbo icquimbi ambi Abadauan chiampicpadomboen naquin Esuquidistu tantiaquidoudtsēqui Nuquin Papan bēdamboen isec.

²³ Esus choabi icnuc nadquo matses icpanēdash. Moisesēn chiacpadomboenuidi natiadquidi abembi bēdamboec tabadtiapimbo icpanēdash. Mētaniac mēnchiquidtiapimbo yacbimboec aidēn chiacpadec bēdamboec tabadtiapimbo icpanēdash. Nuquin Papan Esus tantiamiabi icnuc adquo matses icpanēdash. ²⁴ Aden: —Ambi chiaid niaquec icsamboec tabadsho Nuquin Papan ēbi bēdamboen istiapimbo iquec. ¿Nuquin Papan bēdamboen ismequidta nibēdpeba? —nuqui camenuen ambi chiaid Moises dada uamepampic. Aden nuqui icsaid tantiameshun Esusēn tantiamiac: —Esus tantiasho Nuquin Papan nuqui bēdamboen isec icsaisabimboecnuc —nuqui quendac. ²⁵ Aden tantiec: —Isadaidbo tsusedpan chiacdedi nashouidi Nuquin Papan matses

bëdamboen istsiash —quenquo nuqui iquec. —Esus tantiasho Nuquin Papan nuqui bëdamboen isquin bëdamboen tabadmec —quequin nuqui tantiec.

Nuquin Papan con mado con champi caido

²⁶ Aden Esus tantiasho Nuquin Papan: —Con mado mibi nec. Con champi mibi nec —nuqui capec. ²⁷ Adec: —Esus tantiaquid nebi —quesho acten mentoaid yec Esuspadquo ictiadquo nuqui iquec. ²⁸ Aden Esus tantiasho Nuquin Papan nuqui bëdamboen isec. Isadaidbo yec isadaidpembo yec matses yuaido yec matses yuapenquo yec dada yec chido yec quequin Esus tantiasho nuqui bëdamboen isec. —Matses utsibo bëdamboen istiapimbo iquebi —quenquo icquin matses utsibombi aton Mado Esus tantiasho Nuquin Papan bëdamboen isec. ²⁹ Adembidi abi tantiasho ambi Abadauan bëdamboen isampicpadomboen Esus tantiasho Nuquin Papan nuqui bëdamboen isquin bëdambo icmec ambi Abadauan chiampicpadomboen. Adec Abadauanën tsyuecquidobimboecquido nuqui nec.

4

Yuabimboecquid isadaidbo yaid

¹ Tantia, con matses. Mibitsen chuinu. Aton na dadpen dayun uaquidën nuquin matsesën nadoquid. —Ëbi unësan con madon con na abitedi bedendac. Bacuë icquimbi con madon con na abitedi bedtiapimbo iquec. Canishumbien con madon con na bedendac —quequin tantiaquidën amën aton mado aden chuiquid. Aton papa unësan caniabi yec utsibon yuabimboec aton mado iquec. ² Caniabi icquin utsibon chiacpadomboen naindac aton madon. Adashic aton papan chiacpadece canishun aton papan na bedash yuabimboecheodi adquidpenquo yanendac. ³ Adquo yuabimboecquido con matses isadaidbo icpanëdash. Tsusedpabon yuabimboecquido icquin Nuquin Papan bëdamboen iste bëdamboen tantienquo icpanëdash. —Tsusedpabon chiacpadomboen Nuquin Papan: “Naden nata,” quequin chiaiduidi nanu —quiashi abembi bëdamboec tabadtiapimbo icpanëdash. ⁴ Adnubien ambi ëndenquimbo tantiampicpadën Nuquin Papan Esus chomepanëdash. Isadaidbon chidon tishaid icquin Nuquin Papan: —Naden nata —quequin chiaid naquidquo Esus nepanëdash. ⁵ Adec Nuquin Papan chiaid niaquesambo Esus icnubien ambi chiaid niacash matses abitedi Nuquin Papan cuidtequido nepanëdash. Adsho isash matses cuidmenquo icnuec abided cuidadec Esus unësa caondash. Nëbi Esus tantiasho: —Con mado mibi nec. Con champi mibi nec —quequin Nuquin Papan nuqui bëdamboen isec.

⁶ Adec: —Con bacuëbo nec —queshun Nuquin Papan nuquibëdi Esusën Mayan tabadmec. Adoac bacuën amë: —Ëbi, papa —cacbimboen Nuquin Papan nuqui chianec. ⁷ Esus tantiabi Moisesën dada uapampiduidi namenuquido yuabimboecquido icboedi nëbi Esus tantiasho Nuquin Papan: —Con bacuëbo nec —nuqui capec. Aden nuqui bëdambo icmec ambi Abadauan chiampicpadomboembi.

¿Utsin yuameteda bumpe? quiaid

⁸ Tantia. Nëbi matses utsibo mibi chuioanu. Ënden Nuquin Papambo tantiesca icquin matses uaquidpenquiobi utsi mimbi tantianpanëdac. Papa quequin mimbi tantianëdaidën yuabo yec mëtaniacimboecquido mibi icpanëdac. ⁹ Nëbi Nuquin Papan mimbi tantianbenondac. ¿Mimbembida adonda? Padenquo. Aidëmbi mibi tantiamepanëdash. Aidën tantiamiaidombo icquin ¿atotsiequin aid tantienquo yanoai? ¿Moisesën dada uapampiduidi namenuquido tanshoda Nuquin Papan mibi bëdamboen ispec? Padenquo. Adquid

mētaniac bimboecquid nec. ¿Mētaniac bimboecquid icoatiadquioda ique? ¹⁰ Aden Nuquin Papa tantienquo icquin mimbi icsamboen chiec. —Aid badiadēn adenda. Aid inchēshēn ushēn adenda. Aid setambi adenuidsēqui nanuna. Nuquin Papan cuidnuse —quequin mimbi icsamboen chiec. Mimbi chiacpadomboen naquid Nuquin Papan bēdamboen iste danquin mimbi icsamboen chiec. ¹¹ Mibi caic: —Adosh —quesho tantiash shubitiadquio iquebi. —¿Ēmbi chiondaidonda Esus tantienquo yampash? —quequin tantiac mibi unēsquo iquec.

¹² Con utsibobimboecquido mibi neque. Tantia. Mibitedi chuinu. Isadaidpemo yec mibi: —Moisesēn chiampiduidi nanu —quenquo yac bimboec yanon dabi. —Ēmbi Moisesēn chiampid naquin Nuquin Papa bēdamboen ismembī —quedenedi ēnēdondabi. Nēbi Esusuidi tantiaquid nebi. Adembidi Esusuidi tantia.

Ēbi adsho tantiash chieshenda. Tauamboen ēmbi Esus chuisho mimbi ēbi chieshēnquo iccondac. ¹³ Mibi yacno tauamboec choshon daic-sabudtsēshumbi mibi Esusēn naid chuibanondambi. ¹⁴ Istiapicpambo yec daicsabudacshobi mimbi ēbi cacumenquo iccondac. Ēbi mibi yacno puduedsho isash mibi cuishonquiondac. Nuquin Papan abi yacnoshon uaid mayan bēda choac bimboecnuc mibi cuishonquiondac. Nuquin Icho Esuquidistu choac bimboecnubidi mibi adondac. ¹⁵ —Min ēshē chichshun ēbi mene —ēmbi cac mimbi ēbi menetsenondac. Aden ēbi mimbi tantiaquiondac. Adondaidi ¿atotsi quiash chieshcueno? ¹⁶ ¿Nēid abimbo chuiquindambi mibi chieshēmpē? Padenquo iquembi. ¿Aden chuisho mimbidabi chieshēmpē?

¹⁷ Ista. Esus chienquo icquidon ambi chiacpadomboen mibi name-tiadquio iqueque. ¿Mibi tantiaquioquin bēdamboen namenuenda mibi chuipec? Padenquo. Ēbi chieshēmenuembien ambi chiacpadomboen mibi nametiadquio icchitec. Mibi abibi tantiamenuen naic. ¹⁸ Ēmbien mibi tantiaquin Nuquin Papan chiacpadomboen namenuen yuen chuibanondambi. Aden chuibanac mimbi ēmbi chiaidquio tantiabenondac. Ēbēd icquimbi Esus bēdamboen tantiaboedombi ēbi nīdtsēcnubi mimbi badedi utsi tantiac. ¹⁹ Aden mimbi naid tantiac mibi unēsquo iquec. Anin bacuē tantiac bimboen mibi tantiaquiembī. —Esusbimboec icpashun. Aid tantiec ambi chiacpadec bēdamboec tabadpashun —quequin mibi tantiembī. ²⁰ Mibēd icquin bēisquioquin mibi chuitsiambi. Mibēd iquenquo icquimbi mibi bēisquioquin chiac bimboen dada uaquin mibi naden chiembī. —¿Atotsieshun Esus tantienquo yanoao? —caimbi.

Abadauanēn mado daēd chiaid

²¹ ¿—Moisesēn chiacpadomboenuidi naquin Nuquin Papa bēdamboen ismembī —quequido icquinda mimbi Moisesēn chiampid bēdamboen tantiaque? Tantia. Mibi chuinu. ²² Naden chuiquin Moisesēn dada uapampic. Abadauanēn madombo daēd icpampic. Aton chidon yuaid chido bēdshun tishmiad abentsēc icnuc aton shanunquo aton chidon tishaid abentsēcbidi icpampic. ²³ Abadauanēn chudac badedquio bacuē usandochon chido yuaidēn aton mado tishpampic. Abadauanēn chidombo naido icsho: —Mimbi bacuē tishendac —quequin ambi chiacpadomboen Nuquin Papan naidopenquo icmiac aton mado tishpampic. ²⁴⁻²⁵ Aidi Sada nepampic. Chido yuaid Acad nepampic. Aidēn tishaid yec aton mado yuabidi nepampic. Icbon chiacpadomboenuidi napampic. Yuaidēn madobimboecquido Moisesēn dada uapampiduidi namenuequido nec. Adquibidi Edusaden yacnocquido iquec. Esus tantienquo yec Moisesēn chiaiduidi tantiate bunquiec. Nidaid utsi Adabia caid yacno macuēsh dapa

Sinai caidënsnun Nuquin Papan ambi chiaid Moises dada uamepampic. Aid macuësh matses utsin Acad capec. Aden tantiaquin: —Chido yuaid Acad caidën madobimboecquido Moisesën dada uapampiduidi namenuequido nec —caombi. ²⁶ Edusaden caid utsi iquec. Nuquin Papa tabadacnombo Edusaden caoapec. Ambo Esus tantiaquido yec nuquibi tabadendac. Yuaidën madobimboecquido Moisesën dada uapampiduidi namenuequidoen padenquo iquendac. ²⁷ Nuquin Papan ambi chiaid dada uamepampicadec Esus tantiaquido dadpenquo iquendac. Naden dada uamepampic.

“Tantia, chido. Naido icsho mibi chuinu.

Bacuë tishtiapimbo yequi bëdambo icta.

Bacuë paëmbo icnuc tishacmaid yequi cuishonqueta.

Bënë choquidën bacuë dadpen tishquidën bacuën tsyuecquido daëdpactsëc yanubi

Bacuë nibëdquidën min matses dadpenquioshë yanendac,”
quequin ambi chiaid Nuquin Papan dada uamepampic.

²⁸ Tantia, con utsibo. Mibi chuinu. ¿Ada Nuquin Papan Abadauan chiampid tantie? —Min chido naido iccondaidën tishaid Isac cuëmëdquidën tsyuecquid tantiaquid bëdamboen isendambi —quequin Nuquin Papan Abadauan chuipampic. Abadauan chiacpadomboen aton Mado Esus tantiasho Nuquin Papan: —Con mado nec. Con champi nec —nuqui caindac. ²⁹ Ènden Nuquin Papan naidopenquo icmiampidën mado chieshënuquin chido yuaidën madon aton utsibi chieshëmpampic. Adembidi Nuquin Papan Mayanën tantiamiaido Esus tantiaquido Moisesën dada uapampiduidi namenuequidon chieshëndac. ³⁰ Aden Abadauanën mado bëyucquidën aton utsi chieshënshe isun ¿atotsi Nuquin Papan Abadauan chuipampic? “Tantia, Abadauan. Mibi chuinu. Min chidon yuaid aton madobëdtabi cueme. Min mado utsi Sadan madon tsyuecquido dadpenquo caidmequin bëdamboen tabadmemb. Yuaidën madoembi padenquo iquendac,” quequin Nuquin Papan Abadauan chiaid dada uapampic Moisesën. ³¹ Sada caidën mado Isac caidpadquid yuapenquo nuqui nec. Esus tantiasho Nuquin Papan: —Con mado mibi nec. Con champi mibi nec —nuqui caic. —Esusënuidtsëqui Nuquin Papa ëbi bëdamboen ismec —quequin Esusquo tantiaquid yec: —Èmbembi Moisesën chiactedi naquin Nuquin Papa bëdamboen ismemb —quenquo icnuna.

5

Esus tantiasho Nuquin Papan bëdamboen iste chiaid

¹ Aden: —Esusënuidtsëqui Nuquin Papa ëbi bëdamboen ismec —matses camenuc abided cuidadec Esus unëspac caondashe. Aidquo tantiaata. Muaquidën: —Moisesën chiacpicpaden nasho Nuquin Papan nuqui bëdamboen istiashe. Aidën chiacpaden nanuna —quequin chuisho tantienda. Aden muaquin chiacpaden naic isadaidbo tsusedpan yuabimboec mibi yantsiaque.

² Mimbisondaid Pabado nebique. Tantia. Mibitedi chuinu. Moisesën chiactedi naquid Nuquin Papan bëdamboen iste danquin Esus tantienquo yanec muaquidën chiacpadec shui dëbid dëteshuniadacsho isun Esusën Nuquin Papa mibi bëdamboen ismetiapimbo ictsiashe. Adenda. ³ Aden Moisesën chiaid abentsëc natsëcshun aidën chiaid utsitedi nainquo icsho Nuquin Papan mibi bëdamboen istiapimbo ictsiashe. Moisesën dada uapampiduidi namenuequido tanenda. ⁴ Aido Esus tantiesabo nec. Aden abi bëdamboec ismianquid Esus tantienquo icsho Nuquin Papan aido bëdamboen istiapimbo iquec.

⁵ Esus tantiaquidoen Nuquin Papan Mayanën tantiamiacpaden naden tantiec. —Esus tantiashouidi ambi chiaid niac-niacacmaidbimboecnuc bédamboen isquin Nuquin Papan: “Mibi bédambo iquec,” nuqui caindac —quequin nuqui tantiec. ⁶ Shui dēbid dēteshuniadēn Esus tantiasho Nuquin Papan bédamboen isec. Adembidi shui dēbid dētiacmaidontsen Esus tantiasho Nuquin Papan bédamboen isoaic. Aden Esus tantiabenash: —Ambi chiacpadomboen Nuquin Papan matses tantiaquid ēbi icmendac —quequin aden utsibo tantiasho isun Nuquin Papan: —Adquid con Mado tantiaquid nec —caindac.

⁷ —Bednu —quequin nadancacimboen aiduidtsēqui tantiaquin mimbi Esusquo tantiondac. ¿Tsuentsin muaquin chiac Esus tantienquo mimbi yanoape? ¿Atotsiequin abimbo chiaid niacpe? ⁸ ¿Nuquin Papan nacta Esus tantienquo yano? Padenquo. Ma aidēmbi mibi Esus tantiametiadquo yoc. ⁹ Muaquido tantienda. Nadquo aid iquec. Tosh bedquid abentsēcshun bedmebanac abitedi toshoqueuededec. Adembidi muaquid abentsēcshun chiac matses dadpeshun abimbo tantienquo yantsiashe. Muaid tantienda.

¹⁰ —Nuquin Icho Esusēn tantiamiac ēmbi chiacpadomboen Cadasia yacnocquidon tantiatsiash —quequin mibi chiec nebi. Mibi muaquin chuiquid Nuquin Papan cuidendac.

¹¹ —“Con tsusedpan chiacpaden shui dēbid dēteshuniaduidtsēqui Nuquin Papan bédamboen istsiash,” queposh Pabado —quequin ¿tsundanquieni muauapac caosh? ¿Adendambi chuidio? Aden ēmbi chuisho adembidi chuiquid chieshēnenquo ictsenoshi. Esus chienquo icsho ēbi chieshēnenquo ictsenosh. Abi tantiaquid cuidmenquo icnuec abided ciudadec unēsaid Esusuidi chuisho mabi chieshēmpaboc. ¹² Mibi muaquin chuiquido Moisesēn dada uapampiduidi namenuequido caic: —Auēshquo cuemepashun —cambi.

Esus tantiaquido bédamboec tabadte chiaid

¹³ —Ēbi cuidmenquo icnuec abided ciudadec unēsaid Esusquo tantiasho Nuquin Papan ēbi bédamboen isec —camenuen Nuquin Papan mibi Esus tantiamiac. Adoac: —Esus tantiasho Nuquin Papan cuidtiapimbo iquebique. Ēbi icsate bunaid nanu —quenda. Nēbi Esus tantiaquin mibi icsate bunaid ēnquin mēmunta. Esus tantiaquido yec tantiananquiec nashunanta. ¹⁴ Adomboen Nuquin Papan Moises naden chuimiapadomboen mimbi natsiac. “Mibibi min dada datantiadacimboen utsibotsen bédamboen tantiaquiota,” quequin Nuquin Papan ambi chiaid Moises dada uamepampic. ¹⁵ —Opa penantiadpambo yacimboec nēishnanash chushcananosh —quiosh mibi caic. Aden naic mibi icsacuededeque. Esus tantienquo mimbi yaneeque. Bédamboec tabadta.

Nuquin Papan Mayanën bédamboen tabadmete

¹⁶ Nuquin Papan Mayanën tantiamiacpadomboen naic bédamboec tabadta. Aden mibi icsate bunaid mimbi nainquo ictsiac. ¹⁷ Nuqui icsate bunaid naiqui Nuquin Papan Mayanën tantiamiacpadec bédamboec tabadtiapimbo nuqui ictsiac. Nuquin Papan Mayanën tantiamiacpadomboen tantiaquin nuqui icsate bunaid ēnquin nuqui mēmuntsiac. ¹⁸ Nuquin Papan Mayanën tantiamiacpadomboen tantiec: —Esusēnuidtsēqui Nuquin Papa ēbi bédamboen ismec —queshun: —Moisesēn chiacdedimbo naquin ēmbimbo Nuquin Papa bédamboen ismembī —quequin tantienquo nuqui iquec.

¹⁹ Nadquo icsateuidi bunquid matses iqueque. Tantia. Chuinu. Nēidic aton chidopenquo chudquido. Nēidic aton bēnēpenquo chudmedquido. Nēidic dada daēd chichudnanquido. Nēidic opabimboec chudnante bunquin matses ismequin adoquido. Nēidic tsienbēdta shui chuibudquin icsamete

bunquido. ²⁰ Nēdic Nuquin Papan chiaid niac-niacquin ambi matsesbim-boecnuc nacenaidi papa caquido. Nēdic nēnēchoquido. Nēdic dauē icsa bedash icsa uanquido. Nēdic chieshēmēnquido. Nēdic chieshēmēnec chush-cananquido. Nēdic cudasquido. Nēdic nēishēmēnquido. Nēdic ambi naiduidi naquido. Nēdic abitedi cuēsh-cuēshēdmianquido. Nēdic: —Utsin chiaid tantiatiapimbo iquebi. Ēmbentsēqui bēdamboen chiembi —quequido. ²¹ Nēdic utsin na natiambo bunec chieshēmēnquido. Nēdic tantiadenuen paēmbō icquid acquido. Inchēshēn ushenquo icquin adoquido. Adquidtedishun icsamboen naic. Adec abi icsaid ēntiapimbo yec unēsash Nuquin Papa yacno tabdatiapimbo iquec. Aden mibi chuibanondambi ēnden.

²² Padnuen Nuquin Papan Mayanēn namiaid yec nadquiec tabadquid. Nuquin Papabēda matses tantiaquiec tabadquid. Esus tantiec cuishon-quec tabadquid. —Nuquin Papan ēbi bēdamboen isec —quec bēdambo yec dacuēdenquo yec tabadquid. Utsibon chieshēnaqui chieshēmēnenquo yec tabadquid. Nēishēmēnenquo yec tabadquid. Bēdamboen isquin utsibo nashunec tabadquid. Muainquo yec tabadquid Nuquin Papan namiaid.

²³ —Con nauidi naimbi. Ēbiuidtsēqui bēdambo iquec —quenguo icquin utsibo bēdamboen tantiec tabadquid. Abi icsate bunaid ēnquin mēmunc tabadquid. Adquo yec Nuquin Papan Mayanēn namiaido Esus tantiaquido bēdamboec tabadtsiash. ¿Adec bēdamboec tabadsho isunda: —Adec tabadenda —quequin Nuquin Papan Moises dada uamepampic? Padenquo. —Icsamboec tabadenda —quequin icsamboec tabadquid chuiampic. Nuquin Papan Mayanēn tantiamiacpadec tabadquin aden chuiampid nuqui niaquenguo iquec. ²⁴ Adoenquo icquin cuesten dectanac abided cuidadec unēsaid Esus tantiaquin nuqui icsate bunaid ēnquin nuqui mēmuntsiac. ²⁵ Aden icsamboen nainquo yec bēdambo icnuna. Nuquin Papan Mayanēn Esus tantiamiaid icquin aidēn tantiamiacpadomboen nanuna.

²⁶ —Ēbiuidtsēqui bēdambo iquec —quenda. Adenquo yec nuqui chuiquid dēniacte bunenquo yec bēdamboec tabadnuna. —Ēbi bunacpaden ēbi namianenquin ichitēc. Utsien namechitēc —quec chieshēmēnec tabadenda. Nēishnanenquo yec bēdamboec tabadnuna.

6

Esus tantiaquido bēdamboec isnante chiaid

¹ ¿Nuquin Papan Mayanēn tantiamiacpadomboen bēdamboen tantiaquidta icpec? Adquidēn abēdtan Esus tantiaquidēn icsamboen nasho isun: —Padi. Esus tantiaquid adesambo neque. Bēdamboec tabadta —caquid yendac. —Nēishec ēbitsen icsamane —qeshun nēishenquo icquin aden chuiquid yendac. Abibi datantiadec: —Icsaquid nebi. Esus bēdamboen tantienquo yec adecbidi icsatsiabi —quequin tantiec: —Bēdamboec tabadta —quequid yendac. ² Adec bēdamboec isnanc: —Bēdamboec tabadnuna —quec chuinan-quiota. Adecbidi nashunanquiota. Aden naquin Nuquin Ico Esuquidistun chiacpadomboen mimbi natsiac.

³ Utsien: —Utsibēd onquetiapimbo iquebi. Ēbiuidtsēqui bēdambo iquebi —quec abibi muauadquid icsambo iquec. ⁴ Adenquo yec mibibi datantiadta. —¿Nuquin Papan chiacpadectabi bēdamboec tabadpe? —quec mibibi datantiadta. Adashic: —Ai, Nuquin Papan chiacpadec tabadebi —quiash adecbidi bēdambo icta. —Utsitedi icsambo icnubi ēbiuidtsēqui bēdambo iquebi —quenda. ⁵ ¿Mimbi utsibon naid chuibanshoda Nuquin Papan: —Mibi bēdambo iquec —capatsiash? Padenquo. Mimbi bēdamboen naid isun: —Mibi bēdambo iquec —catsiash.

⁶ Esus tantiaquidon nadoquid yendac. Nuquin Papan chiaid abi chuibanquid nashunquid yendac. ⁷ Piacbo sequidbimboec matses iquec. Tantienuo icquidèn icbompin uestsaidi siac canienquio ictsiash. Padnuen tantiaquidèn èshè bédaidquio siac bédamboec canitsiash. Tantienuo icquidbimboec icsambo icquid iquec. Ambi icsamboen naid icbompin uestsaidbimboec iquec. Icsauidequi tabadec unèsash Nuquin Papa yacno nidtiapimbo iquec. Padnuen Esus tantiaquid ambi chiapadomboen naic unèsash Nuquin Papa yacno nidendac. Èbi adsho tantiash: —Icsaido Nuquin Papan cuidenquio ictsiash —quec muaic tabadenda. Ambi chiapadomboen mibi cuidendac. ⁸ Ambi chiaid niac-niaquec abi icsate bunaiduidi naquid cuidendac. Nuquin Papan Mayanèn tantiamiacpadomboen naquidien bédamboec tabadec unèsash Nuquin Papa yacno tabadendac. ⁹ Èmbi aden chuisho tantiash bédamboec tabadta. Bédamboec tabadec chieshtoenquio icsho isun ambi tantiapadèn Nuquin Papan abèdi nuqui tabadmendac. ¹⁰ Adec bédamboec tabadquèn utsibo bédamboen isquin nashununa. Aden utsibo bèdiactsèc tantiec Esus tantiaquido yec tantiananquiec nashunanquionona. —Shubu abentsèquèn tabadquidobimboec Esus tantiaquido iquec —qeshun adonona.

Pabadon ènquimbi chiaid

¹¹ Is. Nua-nua icnuc dada uaquin èmbimbo ènquimbi dada uanu. ¹² Muaquin chuiquidon mibi con tsusedpan chiapadomboenuidi nameitiadquio iqueque. Aidon chuisho tantienda. Con matses isadaidbo: —Mibi bédambo iquec —camenuen mibi adometiadquio iqueque. —Esusuidi chuisho con matsesèn chieshènquin cuidnushe. Moisesèn chiapadomboen namenu —quequin mibi shui dèbid dèteshunemetiadquio icchitec. Aido muasho tantienda. ¹³ Aden mibi: —Adota —caquidombi Moisesèn chiactedi nainquien icchitec. Adquid yec: —Is. Bédambo iquebique. Èmbi chiapadomboen nèidon naosh —quenuembien mibi shui dèbid dèteshunemetiadquio icchitec. Aidon chiapadomboen nainda. ¹⁴ Èbien adtiapimbo iquec. Esus tantiesabimboec: —Èbibi bédambo iquebi —quetiapimbo iquebi. Esusuidtsèqui bédambo iquec. Abi tantiaquid cuidmenquio icnuec abided cuidadec unèspac caondash cuesten dectanac. —Aidquio tantiec bédambo iquebi —caimbi. Aden Esus tantiec: —Èmbimbo Moisesèn chiactedi naquin Nuquin Papa bédamboen ismembimbo —quec ènèdondabi. Adecbidi Esus tantiec èbi bunaid ènash icsate bunenguio iquebi. ¹⁵ —Moisesèn chiactedi naquiduidi Nuquin Papan bédamboen istsiash —quetiapimbo iquebi. Shui dèbid dèteshunaidèmbi Esus tantienquio icsho Nuquin Papan cuidtsiash. Adembidi shui dèbid dètiacmaidèn Esus tantienquio icshobidi cuidtsiash. Nuquin Papan Mayanèn chuca uaidien Esus tantiaquid Nuquin Papan bédamboen isquin bédamboen tabadmec. ¹⁶ Èmbi aden chuisho tantiash: —Ai, abimbo mimbi caique. Adonona —qesho: —Aido Nuquin Papan bédamboen isquin bédambo icmèpashun —caimbi. Adquido Nuquin Papan: —Con matsesquio nec —caindac.

¹⁷ —Abimbo chienquien icchitec —èbi cainda. Esusèn chiaidquio chiombi. Aidquio tantiaquin ambi chiapadomboen nabanta. Èmbi Esusèn chiapadomboen tanto isun chieshènquin cuesaniondashi. Cuesondayid bish abi iquec. ¹⁸ Tantia, con utsibo. Mibi Nuquin Papa chianembi naden. —Mimbi nabocpadomboen con Icbo Esuquidistubèdtan Cadasia yacnocquido bédamboen ista, Papa —quequin Nuquin Papa chianembi. Padi. Aidtedi chuiquin dada uaombi.

EPESO YACNOCQUIDON ISTE

¹ Pabado nebi. Nuquin Papa bunacpadomboen Esuquidistun, Ēbi chuibeneta, caid nebi. Adquidquio icquin mibitedi Nuquin Papan bēdamboquid icmenu caidombo icsho chuiquin dada uaimbique. Epeso yacnocquido mibitedi Esuquidistu tantiaquidombo yec isec onquecuedēta.

² Aden Nuquin Papan bēdamboquid icmenu caidombo icquin ma Nuquin Papan Nuquin Icho Esuquidistubēdan ēnenquicoquin ēbi bēdamboen isec, quequin mibitedishun tantiapashun. Adembidi, Nuquin Papan bēdambo icmenu caido yec abēd iquebi, quequin tantiapashun mibitedishun.

Nuquin Papan abēd abuc bēdamboec tabadacpadquiocnoc icmiaid

³ Edoen, Nuquin Papa, Nuquin Icho Esuquidistun Papa bēdamboquid nec. Esuquidistu adquidquibidi neoaic. Aid tantiaquid icsho abēd abuc bēdamboec tabadacpadquidquio nuquitedi icmiac. Adoaid yec, Mibi bēdamboquid nec, Papa, quequin chiec nuquitedi onquedenec. ⁴ Nidaid abubēda uabicquin aidēnquiocquidtedi uabicquin, Nēidtedquio Esuquidistu tantiaquido icsho ēmbi cuēmbanaido iquendac, quequin Nuquin Papan tantiapampic. Ambi tantiampicpaden ma nuqui icsaia icmepanuna. Aden nuqui tantiaquin ⁵ abi bunacpadomboen Nuquin Papan, Esuquidistu tantiaquido con bacuēbo icmendambi, quiampicpadomboen nēbi adobanec.

⁶ Esuquidistu tantiaquid nuqui icsho abēd icquid nuqui icmenuen Nuquin Papan abi yacpadquidquio icmebanec. Adoac, Bēdamboquid mibi nec, Papa, quequin Nuquin Papa nuqui chuidenec. ⁷ Matsestedī icsaid bedshunacsho Nuquin Papa cudasaidquio Esuquidistu icsamboquidbimboecnuc cuesten dectanquin unēs uapanēdash. Adosho isash, Nēbi Esuquidistu tantiaquid ēmbi bēdamboen isaidquio nec. Mibi cuidenquio yec mibi icsaid bēpiscudobi, quec Nuquin Papa. ⁸ Naden nanuna, quequin ambi tantiampicpadomboen aton bacuē icmebanac abēd icquido nuqui nec. ⁹ Abi bunacpadomboen, Icsaquid cuidte bedshunash unēsquid con Mado Esuquidistu iquendac, quequin ambi mates tantiamenquio icpampid nēbi ambi cuēmbanaido Nuquin Papan tantiamebanec. ¹⁰ Adoaid iquec con mado abun icquido nidaid yacnocquidobēd chuiquid abentsēqui iquendac, quequin Nuquin Papan tantiampicpadquibi adquidquio icmenu caidquio Esuquidistu iquendac.

¹¹ Esuquidistu tantiaquid icsho isun ambi tantiampicpadomboen, Con bacuē icmiaido nec, quequin Nuquin Papan cuēmbanaido ¹² abia tantiaquido nuqui bēdamboec tabadsho isash, Nuquin Papa bēdambo iquec, quequin chiec ma utsibo cuēdēmpanuna. ¹³ Mibi icsaid bedshunash abided cuidadec Esuquidistu unēsapanēdash, quequin chuibanac abi tantiaquido mibitedi yansho isun, Esuquidistun na nec, quequin aton Mayan mibi meniaid abi iquec. ¹⁴ Aidēmbi mibi bēdambo icmiac Nuquin Papabēd tabadendac. Mibitedi bēdamboec tabadsho isash Nuquin Papa bēdambo iquec, quequin chiec ma utsibo cuēdēmpanuna.

¹⁵ ¿Bēdamboecta Epeso yacnocquido Esuquidistu tantiaquido tabadpec? quec tantiec tsadquimbi, Esuquidistu tantiec Epeso yacnocquid dadpen yanosh, quequin utsibon chuisho tantiombi. Adembidi, Epeso yacnocquido Esuquidistu tantiaquid yanash abipadquid utsibo tantiec abēd icte bunanec iccuededec, quequin chuisho tantiapombi. ¹⁶ Aden tantiaishun mibitedi bēpiscudenquicoquin badiadquidēn-badiadquidēnquien naden Nuquin

Nuquin Papa chiec onquianiaid

¹⁵ ¿Bēdamboecta Epeso yacnocquido Esuquidistu tantiaquido tabadpec? quec tantiec tsadquimbi, Esuquidistu tantiec Epeso yacnocquid dadpen yanosh, quequin utsibon chuisho tantiombi. Adembidi, Epeso yacnocquido Esuquidistu tantiaquid yanash abipadquid utsibo tantiec abēd icte bunanec iccuededec, quequin chuisho tantiapombi. ¹⁶ Aden tantiaishun mibitedi bēpiscudenquicoquin badiadquidēn-badiadquidēnquien naden Nuquin

Papa chian-chianembi. ¹⁷ Esuquidistun Papa, icsaisambo, tantiaquidquo mibi cadoque. Mibi bédamboen tantiaquid yacpadquionoc min bacuëbo Epeso yacnocquido min mayan icmeban, Papa. Adquido min Mayanën icmiac mibi tantiadonequidombo ma icpanuna. ¹⁸ Adecbidi, Abuc ebëdi mibi iquendac, quequin mimbi chiacpaden tantiamequin pausunac mibëd icnuequin cainquidombo Epeso yacnocquido ma icpanuna, Papa. Aidën tantiamiac, Mibi yacno Esuquidistu tantiaquid utsibobëd bédamboec tabadendabi, quequin Epeso yacnocquidon ma tantiapanuna, Papa. ¹⁹ Aden tantiamiac Nuquin Papan nadatiambocquin nabanquin Esus unësacsho uincuemenedacpaden ëbi uincuemendac. Adembidi nadatiambocquin nabanquin Esus tantiaquid ëbi icmiac. Adembidi ëbi bédamboequid icmebanec, quequin ma Epeso yacnocquidon tantiaquiopanuna, Papa. ²⁰ Esuquidistu unës uacsho uincuemeshun mibi yacno aidi indoshon min dayunquo mimbimbi tsadumpanëdac, quequin tantiec Nuquin Papan nadatiambocquin naidquionec, quequin adomboembidi ëbi indoapec, quequin tantiacpadomboen ma Epeso yacnocquidon tantiapanuna, Papa. ²¹ Nadatiambocquin nabanquin Esuquidistu abuc buanshun abitedi chuiquid dapa aidi mimbi icmioc. Mibipadquid utsi nibëdec, quequin Esuquidistu min dayunquo tsadunquin utsibo mimbi ismepanëdac, Adquid nebi, chuiquid utsi quetiapimboconoc. Nuquin Papan nadatiambocquin nac ënenquiocquin abitedi chuiquidquo Esuquidistu iquendac, quequin Epeso yacnocquidon ma tantiaquiopanuna. ²² Abitedishun con icbo caidquio Esuquidistu nec. Abi tantiaquidtedi aton shubun icquido nec. Aidon con icbo quequin chuidoniaidquio nec. ²³ Ambi ëndenquimbo tantiampidtedi abi tantiaquido yanash aton shubun icquidombo nuqui iquendac. Nuqui Chuiquid Abentsëcquiobi Esuquidistu icquin abëd icquido nua pausunaido yec abi yacpadquio ictequid yec abentsëc yac bimboec abëdi nuqui tabadendac.

2

Nuquin Papan Esuquidistubëd icmiaido

¹ Mibi icsaquid yec Nuquin Papabëd ictiapimbo iccondac. Adboedi nëbi aidëmbi ënenquiocquin abëd icquido mibitedi icmiac. ² Ënden Nuquin Papa chieshënquin mimbi tantiacpadomboen nabanondac. Adquid icsho Nuquin Papa chieshënquid dapan Satanasën yuaido mibi iccondac. Aidën Nuquin Papan chiaid niacacpadomboen mibitedishun niacbededpondac. ³ Adquiduidquio yec nuqui tantiacpadec icsadeneq nuqui tabadpadeneq. Adeq tabadquin Nuquin Papan chiaid niactenepondac nuqui. Aden niacsho isun adquid utsibobëdta Nuquin Papan cuidnu caido nuquitedi icpondac. ⁴ Adeq cuidnu queboedëmbi nuqui tantiec nësquiocquin Nuquin Papan companen nuquitedi tantiamepondash. ⁵ Ambi cuidnu caido icsaquido yec abëd ictiapimbo nuqui tabadpondac. Adeq tabadsho Esuquidistu tantiaquido nuqui icmebanquin abëd icquido Nuquin Papan nuquitedi icmiac. ⁶ Esuquidistu nuqui icsaid bedshunacsho abided cuidquin unës uapanëdash. Unësacsho isun uincuemeshun abi yacno Nuquin Papan indopanëdash. Adshun abi tantiaquidtedi abuc Esuquidistubëdta ambi indoac bimboecquido icsho Nuquin Papan nuqui bédamboen isec. Adecbidi abuc Esuquidistubëd icquid nendabi, quequin tantiec nuqui tabadec. ⁷ Nuqui icsaquido icsho Nuquin Papan Esuquidistu tantiaquid nuqui icmeshun, Cuidnu, quenquiocquin Esuquidistubëd icquido nuqui icmec. Ma adquid icsho isash utsibo, Nuquin Papan naid nec, ma quepanuna. ⁸ Nuquin Papan, Cuidnu, quenquiocquin Esuquidistu nuqui tantiamiac abi tantiaquidombo nuqui yanondac, Ëmbibi tantiembi, quetiapimbo nuqui icnubi, Mibi tantiamiombique.

Ēbi cuidquin mene, quenquiocquin Nuquin Papan nuqui tantiamiosh. Adoac Esuquidistu tantiaquid yec abēd icquido nuqui nec. ⁹ Icsaquido icquin bēdamboen naic nuqui icsaid cuidadtiapimbo nuqui iquec. Bēdamboen naic cuidadpebi, quiash abi icsaquid yequi, Bēdamboequid nebi, quec tabadsho isun utsibon icsamboen tantianushe qeshun Nuquin Papan icsaisa aton Madoded cuidpanēdash. ¹⁰ Nuquin Papan uaido nuqui nec. Aidēmbi Esuquidistu tantiaquido nuqui icmebanec ma ambi tantiampicpadomboen utsibotsen nuqui tantiaquin ma nashumpanueshun.

Esuquidistubēd abentsēc yachimboecquido

¹¹ Nuquin Papan, Cuidnu, quenquiocquin comapenen tantiamiaidquio mibitedi icquin mibi ēnden tabadaid tantia. Shui dēbid dētemesa isadaidpembo nec, quequin isadaidbon shui dēbid dētemequidon mibi cuēnondash. Nuquin Papan matsesquio nebi, quequin shui dēbid dētemequidquio isadaidbo nec. ¹² Adquidquio isadaidbo icnuc, Nuquin Papan chomiaid choec, quequin tantiesa mibitedi icpondac. Adquido yec Nuquin Papan matses nebi, isadaidbo quiacpadec adtiapimbo mibitedi iccondac. Adecbidi, Ēbi yacno yuedanquid iquendac, quequin Nuquin Papan chiaid tantiesa mibitedi icpondac. Adecbidi, Abēdi ēnēdenquio yec tabadebi, quequin chuitiapimbo mibitedi icoapondac. Adecbidi, Abia yampid Nuquin Papambo iquec, quequin tantiesa mibitedi icpondac. ¹³ Adec aid tantiesa yec icsaquid yec, Nuquin Papa yacno puduednu, quetiapimbochoedi, Matses icsaid bedshunash abided cuidadec Esuquidistu unēspanēdash, quequin tantiaquid icsho aidēnquio abi yacno yuedendac. Nēbi aid tantiaquid yec abi tantiaquid utsibobēd abēdi tabadachimboecsho Nuquin Papan nuqui bēdamboen isec.

¹⁴ Isadaidpembo isash isadaidbo, Ēbēd icquidpenquio nec, quequin tantiec datamēncuenepondash. Adecbidi isadaidbo isash adquiecbidi isadaidpembo datamēncuenepondash. Adquido icchoedi ēbi icsaid bedshunash Esuquidistu unēspanēdash, quequin isadaidbo utsin-utsinquien tantiec. Adembidi isadaidpembo utsin-utsinquien aid tantiec. Adec aid tantiaquid yanash datamēncuenequio yec matses abentsēc yachimboecquido yanac. ¹⁵ Esuquidistu matsesash nidaidēn tabadquin isadaidbo icquin isadaidbon, Naden nata, quequin chiacpadomboen utsitedishun natiapimbochnobi Esuquidistu uesquin nabampanēdash icsainquiocquin. Adec tabadquin naimbudsho icsaquidimboecnu unēs uapanēdash. Aden unēsmesho isec Nuquin Papa, Padi. Chēn, quenquio icpanēdash. Ēbi yacno isadaidbo isadaidpembobēdtabi con madon yuedendac, quiash chēn quenquio icpanēdash. Datamēncueneboedi aido Esuquidistu tantiaquid yanash datamēnenquio yanac. ¹⁶ Naden nata, quequin chiaidtedi nuqui natiapimbochno nuqui icsaid bedshunash Esuquidistu unēspanēdash, quequin tantiaquido isadaidbobēdi isadaidpembo yanac. Ambi tantiaid Esuquidistu yanash datamēncueneboedi adec datamēnu quetiapimbo yanec Esuquidistun shubun icquido yanoaic. ¹⁷ Matsestedi bēdamboen iste Nuquin Papa bunec quequin ambi chuibeniacpadec abided matses icsaid bedshunash unēsquin isadaidbo isadaidpembobēda Nuquin Papan bēdamboen isaido icmepanēdash. ¹⁸ Adoac nēid isadaidbo nec. Nēdic isadaidpembo nec, quenquiocquin, Esuquidistu tantiaquid nec, quequin Nuquin Papan abi tantiamenuequid aton Mayan meniac. Aden meniac aidēn tantiamiac, Mimbi ēbi tantiec, quec Nuquin Papa chiec Esuquidistu tantiaquidombo onquedenec.

¹⁹ Aden chiec onquec ambi yuedtiapimbo icchoedi nēbi Esuquidistu tantiaquido yanash Nuquin Papan shubun ēnden icnēdaidobēd tabadtequid

mibitedi iquec. ²⁰ Adquid icsho aton Mayan meniac Nuquin Papa tabadte Esuquidistu tantiaquido nec. Abi tabadte nadquio isadeque. Chuinu. Tantia. Esuquidistu abia yampid abi yacno yuedanquidquio yec abia nitsinaid cueste nidquidbimboecquid nec. Nuquin Papan chiaid chuibampampidobëd Esuquidistun ëbi chuibeneta caido shubu nitsinaidbimboecquid neoaic. ²¹ Aided abia icquid icnuc isadaidbobëd isadaidpembo Esuquidistu tantiaquid dadpen yansho Icbon tabëcshun tanebanaidbimboecquido neoaic. Abi tabadte Icbopadquid icsaisa yampec. ²² Mibi Epeso yacnocquido Esuquidistu tantiaquid utsibobëd Nuquin Papan Mayan meniaid yec Nuquin Papa tabadtebidi mibi nendac.

3

Isadaidpembo Esuquidistu chuibenequid Pabado

¹ Isadaidpemboëdi ma Nuquin Papa tabadte icnu quequin Esuquidistu chuibenesho quënën nauedaid icquin aidën chiacpadomboën mibi chuibanquidquio nebi. ² Isadaidpembo yacno nidshun Esuquidistu chuibeneta Nuquin Papan cac nebi. Esuquidistu chuibenequid Pabado nec, quequin mimbi tantiec. ³ Ëbi yacno yuedanquid Esuquidistu iquec, quequin Nuquin Papan tantiamiacpaden ënden dada uaquin mibi chiondambi. ⁴ Ëmbi dada uaondaïd bëdamboen isec onquequin Nuquin Papan ëbia Esuquidistu tantiamiacpaden mimbi tantiapec. ⁵ Ëndenquio Nuquin Papan Esuquidistu nidmëmbi, quequin chienquiocpampidëmbi nëbi ambi, Esuquidistu mattses tantiameta, caid aton Mayan nec. Adoac Nuquin Papan, Esuquidistu chuibeneta, caidtedi ambi naden nanuna, quequin chienquiocpampidëmbi aton Mayanën tantiamiac. ⁶ Ambi nëbi tantiamiaid nad iqueque. Tantia. Chuinu. Isadaidpembo Esuquidistu tantiaquido isadaidbo Esuquidistu tantiaquidobëd Nuquin Papa yacno ënëdenquio yec tabadtequido nendac.

⁷ Nuquin Papan, Cuidnu, quenquiocquin nadatiambocquin ëbi ismi-aid yec ambi Esuquidistu chuibeneta caid ambi namiaid icsho ambi nadatiambocquin nabamiaidquio nebi. ⁸ Esuquidistu tantiacbicquid utsi bëdiactsëc icsaquid icnubi comapenec icsaquidquio icsho Nuquin Papan Esuquidistu tantiaquid icmeshun Esus bëdambo yaidbëdtabi abëd tabadte bëdaïdquio tantiamequiopondashi. Adëmbidi ambi, Esuquidistu chuibeneta, caidquio nebi. Adquid icquimbi Esuquidistun mattses bëdamboen tabadmenu, quequin tantiaid dadpen icnuc aïdtedi uesquin chuitiapimbo iquebi. Aïdtedi mattsesën bëdamboen tantiatiapimbo icoapec. ⁹ Ëbëdtambi abitedi uampidquio Esuquidistu aid tantiaquido ëbi yacno yuedquid iquendac, quequin Nuquin Papan tantiamenquiocboedi nëbi mattses tantiamenuen Esuquidistu chuibeneta caidquio nebi. ¹⁰ Aden ëbipadquidon Esuquidistu chuibeniac icsaquid icboedi Esuquidistu tantiaquid dadpen yanac. Adsho isun aïdtedi Nuquin Papan Esuquidistubëd abentsëc yacbimboecquid abipadquid ambi tantiampicpadomboen icmëbanec. Aden icmëbansho isun abí yacno tabadquin namequidon tantienquiocboedëmbi nëbi tantien- dac. Nuquin Papan, Yuecshun naden nanuna, quequin ambi bëdamboen tantiampicpadomboen nabanac nëbi abëd icquid dadpen iquec, quequin Nuquin Papan abi yacnoshon uaidon tantiec. ¹¹ Mattses bëdambo icmete- quid Esuquidistu iquendac, quequin ambi tantiampicpadomboen Nuquin Papan Esuquidistu Nuquin Icho icmëpanëdash. ¹² Aton mado Esuquidistu ëbi icsaid bedshunash unëdash uincuenash Nuquin Papan dayunquio iquec, quequin tantiec dacuëdenquio yec Nuquin Papa chiec nuqui onquec. ¹³ Adecbidi, Esuquidistu chuibenesho bedshun Pabado quënën nauedac, quequin tantiec chieshenquiocquin Esuquidistu tantiaata, Epeso yacnocquido mibi caimbi.

Ëmbi chuibanac Esuquidistu tantiaquid yansho Nuquin Papan abëdi tabadmenuequin Nuquin Papan ambi, Bëdambocquid icmenu, caid mibitedi neque. Chieshenda. Adembidi Pabadon chiac ëbipadquid isadaidpembo utsi-utsiec dadpen Esuquidistu tantiaquid yampec, quequin tantiec tabadta.

Epeso yacnocquido tantiec Nuquin Papa chiec Pabado onquaid

14-15 Nuquin Papan isadaidpembo Esuquidistu chuibeneta cac, chuibenesho quënën nauedaid icquin ëmbi chiac Esuquidistu tantiaquid isadaidbobëd isadaidpembo Nuquin Papan matses yanash aton shubun icquido nec. Nuquin Papan cuëmbanaido nec, quequin tantiec danëshën sebudash aid naden chiec onquebi. ¹⁶ Mibi icsaisa icquin mimbi tantiacpaden Epeso yacnocquido nua pausun, Papa, ma natiamiantequid icnuc Esuquidistu tantiesa yanenquiocpanuna. ¹⁷ Aden pausunac ma aido Esuquidistu tantiadonequidombo icpanuna. Aido mimbi tantiamiac ënëdenquo yec utsibëd tantianec tabadquid ma Epeso yacnocquido icpanuna. ¹⁸ Aden pausunac, Ëbi utsibobëdta comapenen tantiaquid Esuquidistu nec. Ambì bëyuc matses uaid tantiaquinc, aidën tsyuecquid ënden icpampido tantiaquinc, nëbi tsyuec tishaido tantiaquinc, tishabicquido tantiaquinc caquin aitedi icsaid bedshunacsho Nuquin Papan cuidpanëdash, quequin ma Epeso yacnocquidon tantiaapanuna, Papa. Adembidi abuc bëdamboshë yacno icboedëmbi matses icsaid bedshunacsho Nuquin Papan cuidpanëdash, quequin ma Epeso yacnocquidon tantiaquiopanuna, Papa. ¹⁹ Aden tantiaquidquo yec Esuquidistu unësnëdash, quequin tantiec papuduedash Esuquidistun matses tantiacpadquidquo Nuquin Papan ma mibitedi icmebampanuna.

²⁰ Nadquid Nuquin Papan ëbi icmetsiash, quequin nuqui tantiatipimboconobi nadatiambocquin nabanquin ambi tantiacpadomboen abi yacpadquidquo nuqui icmebanendac. ²¹ Adoac ma abi tantiaquidon ënenquiocquin Nuquin Papan Esuquidistubëdtan naid chuibampanuna. Ma aidon tsyuecquidontsen adembidi chuiopanuna. Ma nuquin tsyuecquidon tsyuecquidontsen adembidi chuiopanuna. Ambì uaid utsidedi naimëdec, quenubi ma adomboembidi Nuquin Papan Esuquidistubëdtan naid matsesën chuibanoapanuna. Ai, ma ënenquiocquin adopanuna.

4

Abentsëc yacimboecquido Esuquidistu tantiaquido

¹ Nuquin Papan isadaidpembo Esuquidistu chuibeneta cac chuibenesho bedshun quënën nauedaid icquin naden mibi chiembigue. Tantia. Esuquidistu tantiaquido aton shubun icquido yec icbo bëdamboec tabadacpadquiec tabadteneta. ² Utsi icsambocsho isun, Icsaisa Nuquin Papapadquid yanabicquid nebi, quequin tantiaquin abëd onquequin abi icsaid ëmenuequin chuiban. ³ Nuquin Papan Mayanën abi utsibëd bëdamboec tabadaid tantiamiacpadquiec Esuquidistu tantiaquid utsibobëd bëdamboec tabadteneta. ⁴ Esuquidistu tantiaquidtedi abentsëc yacimboecquid nec. Abentsëcquiobi mibitedi meniaid aton Mayan iquec. Adquiecbidi Nuquin Papa yacno nidash aidbëd tabadec abipadquid yec icsaisa iquendabi, quequin abuc indotequid mimbi caintequid abentsëcquiobi iquec. ⁵ Abentsëcquiobi mibitedishun con Icbo caid iquec. Abentsëcquiobi mibitedishun tantiaidquido Esuquidistu iquec. Esuquidistu tantiaquinc, Nuquin Papa tantiaquinc, aton Mayan tantiaquinc casho acten mentoaidtedi abentsëc yacimboecquid nec. ⁶ Abia yampid Nuquin Papa Esuquidistun Papambo abentsëcquiobi iquec. Abitedi uaquidquo yec abitedi Chuiquid Dapambo nec. Aidbidi Esuquidistu tantiaquido bëdambo

icmequid neoaic. Aidēmbi Esuquidistu tantiaquidobēd tabadnuequin abipadquid meniac nuquibēd aton Mayan iquendac.

⁷ Esuquidistun ambi tantiacpadomboen abi tantiaquid abentse-abentsen pausunec. Aden pausunac aid tantiec tabadendac. ⁸ Ēndenquio chiampicpadembi nēbi pausumbanec. Naden ėnden chiampid neque. Tántia. Chuinu. “Nuquin Papan abucquio indoac, Ēbi tantiaquidtedi ēbēdi tabadendac, quequin Esuquidistun bedbanshun buanachimboecquido aido nec.

Nadquidquio iquendac, quequin ambi tantiacpadomboen pausumbanac,” quequin ėnden chiampid nec. ⁹ “Abucquio indoac,” quequin ¿mitsipadomboen tantiampampiba? mibi quepec. Aidquio chuinu. Tántia. Esuquidistu abia yampid yec abucquio tabadboedi, Matses icsaid bedshunash ēbided cuidadnu, quianacsho nidaidēnshun chidon tishpanēdash. ¹⁰ Aid nidaidēnshun tishacsho unēs uacsho uincuemequin Nuquin Papan aidquio abuc abi yacno indoshon abitedi chuiquidquio Esuquidistu icmepanēdash. Adquid icmiac ma ēbi tantiaquidobēd icpanueshun abipadquidquio aton Mayan aido menebanec. ¹¹ Aden aid menebanec aidēnquio Esuquidistu tantiaquido utsi-utsien nadquid icmebanec: Esuquidistu chuibenequid utsi-utsien icmebanquimbi, Nuquin Papan naden nanuna, quequin chiāid chuibanquid utsi-utsien icmebanoaic. Adquid icmebanquin utsi-utsien Esuquidistu chuibenequidon, Esuquidistu chuibanta, caidbidi aido icmebanquin utsi-utsien abēd iccuededquido isbanquin chuiquin tantiaquid icmebanoaic. ¹² Bēdamboec tabadtenequido ēbi tantiaquidtedi icmeta, cac aidēn tantiacpadomboen adquido icmebanac ¹³ ma shubu dapan icquid dadpen yanec abentsēc yacimboec abi tantiadonequido icpanuna. Aden Nuquin Papan mado tantiadonec ambi uesquin pausunaidquio yec abipadquidquio iquec icsaisa iquendac.

¹⁴ Ambi pausunaidquio icquin abimbo chiachimboen utsibon chuisho tantiabenabicquidēn badedquio tantiacpaden tantienquio nuqui iquendac. ¹⁵ Tántiananec abimbo chuinanquido Esuquidistu tantiadonequido icmiac chuiquid Esuquidistupadquid yanash abēdi abentsēc yacimboecquid nuqui yanendac. ¹⁶ Ēbi chuiquidquio Esuquidistu nec, quequin ambi chiacpadomboen nabanquidquio abi tantiaquidtedi yec abēdi abentsēc yacimboecquid nuqui iquec. Esuquidistun pausunacpadomboen abentsēcshun-abentsēcshunquien nabanequi tantiananquiec abi tantiaquidtedi Esuquidistupadquidquio abēdi abentsēc yacimboecquid yanendac.

Esuquidistun nua pausunacpadquiec tabadteniaid

¹⁷ Esuquidistubēd abentsēc yacimboecquid abi tantiaquidtedi iquendac, quish, aidpadquid icnu, quec ėnden icsamboec tabadnēdacpadquiec tabadenda caimbi mibi. Esuquidistun ēbi chuibeneta caidquio icquin dada uaquin mibitedi aden chiembi. Esuquidistu tantiesan ambibi tantiacpadomboenuidi tantiec. Adecbidi ambibi tantiacpadomboen nabanec. ¹⁸ Pashuachimboen tantienquio iquec. Nuquin Papabēd tabadte iquec, utsibo qesho tanties a yec, Tantiatiapibi, quepec aido. ¹⁹ Icsaquid nebi, quequin badedquio chienquio aidon iquec. Adquid icsamianquidēn yuaid yec, Icsanu, quiacpadec tabadec. Adec icsasho utsin istemaid nec. ²⁰ Adpenquio Esuquidistun tantiaquidquid pausunaid iquec. ²¹ Esuquidistu chuibansho Epeso yacnocquidon tantiaposh, quequin chuisho tantiapondambi. Mibi, Aid tantiaquid nebi, qesho tantiashun Esuquidistu chuibenequidon, Abēd icquid yec abipadquid yanebi quec adquiecbidi tabadteneta, quequin mibi chuipondash. ²² Adoac mimbi tantianēdacpadec tabadoainda. Mibi ėnden

icsamboec tabadacpadquiequi mibi icsaded-icsadedondac. Icsaquid yequi, Bëdambocquid nebi, quec mibi muadenepondac. ²³ Mibi icsate bunaid ënta. ²⁴ Adsho isun ma Esuquidistun tantiacpadomboen tantiapanu queshun Nuquin Papan Mayanën mibi nua pausunendac. Adoac adomboembidi mimi tantiapec. Adecbidi aid bunacpadquieq bunoapec. Adoaid yec mibi bëdambocquid icnuec icsaisa yanec mibi bëdamboec tabadtenendac. ²⁵ Adquid icnuec Esuquidistun shubun icquido nebi, quec muainquo yec Esuquidistu tantiaquid utsibobëd abimbo chuinanquidombo icta. ²⁶ Nëishëc icsainda. Nëishash abi ushëmbi bëdanta. ²⁷ Satanasën yuanushe quiash badedquio bëdanta. ²⁸ Ampequid icboedi Esuquidistu tantiaquid yanshun ampnda. Adquid icboedi chonoadquin mitsana bedshun utsin na nibëdsho isun menequid icta.

²⁹ Icsaquid onquiacbimboec onquenda. Utsi tantiaquin bëdambocquid icmenuequin chiec onqueta ma Nuquin Papan aidtsen bëdambo icmepanu quiash. ³⁰ Esuquidistu tantiaquid mibi icsho isun Nuquin Papan, Con bacuëbo yec ëbëdi tabadendac, quequin ambi tantiametequid aton Mayan mibi meniac. Aidi mibi icsaisa icmenuequidën mibi icsasho isec unësquio yampec. Aid unësquio icmenda. ³¹ Utsi icsamboen chuinu, quequin tantiaid ënta. Adecbidi comapenec nëishash bëdanta. Utsi cuestiadquio yec nëishboedi adecbidi bëdanta. Nëishash chushqueboedi adecbidi bëdanta. Utsi icsamboen tantiaquin chuiboedi adecbidi bëdanta. Utsi icsamboen tantiaid adembidi ënoata. ³² Adembidi bëdambo icmenuequin utsi bëdamboen tantiaquin nabanta. Adecbidi utsin chieshënquin mibi icsamboen nasho isash chieshnanec cuidnanenda. Esuquidistu mibi icsaid bedshunash abided cuidadec unësopanëdash. Adquidquio icsho isun Nuquin Papan bëdamboen isaidquio Esuquidistu icpanëdash.

5

¹ Nuquin Papan bacuëbo yec ² tantiananec tabadteneta. Nuquin Papan chiampicpadquieq Esuquidistu nuqui tantiaquin nuqui icsaid bedshunash abided cuidadec unësopanëdash. Adquidquio icsho isun Nuquin Papan bëdamboen isaidquio Esuquidistu icpanëdash.

³ Esuquidistu tantiaquid yec, Mimi inacmaid isec chudnu, quesambo icta, dada. Adecbidi, Ëbi inesa chudmenu, quesambo icta, chido. Opabimboec iquenda. Adecbidi, utsin na isash, Bednu, quesambo icoata. Esuquidistu tantiaquid nebi, quequin adoenda. ⁴ Adecbidi, Esuquidistu tantiaquid yec tsienbëdta shui icsamboen chiec onqueboedi adec mibi onquiaid ënta. Adecbidi, utsi icsamboen oncaisambo icta. Adecbidi, bëdamboec onquequid utsi uain chuiquin mamënshunesambo icta. ⁵ Chudtemaid chudnu, quequiduidi chudquid yec opabimboecuidi tabadquid Nuquin Papa yacno Esuquidistun shubun icquid ictiapimbo iquec. Adecbidi, Bednu, quequiduidi bedquid yec Nuquin Papa yacno Esuquidistun shubun icquid ictiapimbo iquec. Aden nabanquid Nuquin Papabëd Esuquidistu con icbo nec, quetiapimbo icoaic. ⁶ Ambembi chiec onquiaid tantiesha icta. Adquid Nuquin Papan chiacpadomboen naisa nec. Adquid Nuquin Papan comapenen cuidendac. ⁷ Adquidbëd icsainda.

⁸ Ënden Esuquidistu tantiesha icquin inchëshquiocnoc isacbimboen tantienquo icboedi nëbi Esuquidistu tantiaquid mibitëdi yansho ambi tantiamebaniaido icquin badiadnuc isucunacbimboen tantiaquiota. Aden tantiec Nuquin Papan bacuëbo yec Nuquin Papan tantiamiacpadquieq bëdamboec tabadteneta. ⁹ Esuquidistun ambi tantiacpadomboen pausunac abi yacpadquieq nuqui bëdamboec tabadtenendac. Adembidi aid yacpadomboen

abimbo chuidenequid icta. ¹⁰ ¿Nadec tabadshodabi Nuquin Papan bēdamboen istciashe? Tanu, quequin adomboen nabanec tabadteneta. ¹¹ Utsibēd icsainda. Utsi icsadenenubi mibi bēdamboec tabadtenesho isun abi icsaid utsin ēmpec. ¹² Icsaquidēn ompoquin naid chuitemaid nec. ¹³ Adquidēn Esuquidistu tantiaquid bēdamboec tabadtenesho isun, Icsambocquid nebi, qeshun Esuquidistu tantiabempec. ¹⁴ Bēdamboec tabadquin ismedeniac icsambocboedēmbi bēdamboen tantiabentsiash. Esuquidistu tantiaquido chuiquin dada uaid nad iqueque. Tanta. Chuinu. “Unēsacimboen tantienquiochoedi isucunshun tantiabenacimboec bēdamboec tabadta.

Adquid icsho Esuquidistun mibi nua pausunendac.”

¹⁵ Adec bēdamboec tabadnuec Esuquidistun tantiamiacmaid tabadacpadec tabadenquio yec Esuquidistun tantiamiacpadquiec tabadteneta. ¹⁶ Icsaquid dadpen iqueque. Aidpadquid iquenda. Esuquidistun pausunaid mibidēdi bēdamboec tabadtenesho isec ma Esuquidistu tantiesia icboedi abi tantiaquid yampanuna. ¹⁷ Mimbi icsamboen tantiacpaden nabanenda. ¿Atotsi mimbi ēbi namepatsia? quequin Nuquin Papa chui. Aden abi chuisho Nuquin Papan mibi tantiamiacpaden adobanta. ¹⁸ Icsachitomane quequin nua paēmbocquid aquenda. Aden aquec icsaindac. Icsate bunenquioquin Nuquin Papan Mayanēn tantiamiacpadomboen nua pausunaid icquin bēdamboen nabanta.

¹⁹ Adec icsate bunenquioquin Esuquidistu tantiaquid utsibōēdtan Nuquin Papan chiaid chuiquinc, chuiquid dapa Dabidēn dada uampid sadmo caid utsi-utsien chuiquinc, cuēdēnte utsi chuiquinc cain chiec cuēdēnteneta. Adec cuēdēnquin Nuquin Icbon naid chuideneta. ²⁰ Esuquidistu tantiaquid icsho Edoenēn Nuquin Papan bēdambo icmiaidtedi yec aidēn naid chiec onquedeneta.

Utsi tantiaquin nashunta quiaid

²¹ Esuquidistu con icbo nec, quequin ambi chiaid niacmane qeshun utsi tantiaquin nashunta.

²² Adembidi Esuquidistun chiacpadomboen dadan inaidēn min bēnēn chiacpadomboen nabanta. ²³ Adembidi abi tantiaquidtedi chuiquidquido Esuquidistu nec. Abi yacno indoshon ēnēdenquio yec icsainquiocnoc tabadmendac. Adembidi aton chido chuiquidbidi aton bēnē nec. ²⁴ Esuquidistun chiacpadomboen abi tantiaquidon nabanacpadomboen aton bēnēn chiaid nauquidquido aton chido neoaic.

²⁵ Esuquidistu abuc tabadboedi abi abuc bēdamboec tabadtequid tantienquio yec unēs uanushe quenquio yec matses tantiec nidaidēnshun tishaid yec matses icsaid bedshunash abided cuidadec unēs panēdash. Abuc ēbēdi abentsēc yacimboecnuc tabadmenu, quec unēs panēdash. ²⁶ Adecbidi, Ēbi tantiaquido icsaisa icmenu, quiaish abided cuidadec unēs panēdash.

²⁷ Adecbidi, icsaid nibēdquid bēdaidquio abi tantiaquido icmeshun Nuquin Papa yacno yuedshun, Ēmbi yuedboed min shubun ictequid nendac, quequin ismemb, quec Esus unēs panēdash. ²⁸ Adomboembidi chido inquidēn abibi tantiadacpadomboen ma con chido tantiaquin, Bēdamboquid icmenu, quequin nashundeniash ma aidbēdi bēdamboquid icsho Nuquin Papa yacno Esuquidistun yuedpanuna. Aton chido tantiaquid abibi tantiadquidbidi nec. Aidbēdi abentsēc yacimboecquid neoaic. ²⁹ Abibi chieshēmēdesa dada nec. Bunquioquin peshun aquec. Adembidi iquenquin cuēte cuēc. Esuquidistun abi tantiaquido abēd icquido icsho aido tantiaquin nabanacimboen ³⁰ dadan abēd icquid aton chido icsho aidi tantiaquin nashunquid.

Dadaba uashun aidën shictodobi chicshun chido uapampic. Adoshon dadan nami aton canitebêdta chido uashun daëd uac abentsêc yac bimboec aid daëdi yanac. ³¹ Nuquin Papan ênden dada uampid nad iqueque. Tantia. Chuinu. “Aidbêd icnû, qeshun bedash aton papa aton titabêdta nianac bimboec daëdash aton chidobêdi abentsêc yac bimboec tabadtenec.” ³² Adec dada aton chidobêd daëdash abentsêc yac bimboecnuc ambi icmiampic-padec Esuquidistu tantiaquido aton shubun icquido abentsêc yac bimboec tabadendac, quequin chiec. ³³ Nêbi adomboembidi chido inquit ambi in-aidbêdta chuiôaimbique. Tantiata. Mibibi tantiadacpadomboen min chido bêdamboen tantiata dadan. Con bënë êbi chuiquid nec, quequin aidën chiaid tantiata chidon.

6

Bacuêbobêdta bacuêchoquid tantiamequin chuibanaid

¹ Bacuêbon Esuquidistu tantiaquid icquin papan chiacpadomboen chieshenquiocquin nabanta. Titan chiacpadomboembidi chieshenquiocquin nabanoata. Aidon, Nata, quequin chiaid cacuidenquiocquin nata. ² Nuquin Papan, Naden nata, quequin ambi chiaid cuênoten dada uaid Moises meniampid abentsêc nad iqueque. Tantia. Chuinu: “Êbi chuiquid nec, quequin tantiaquin papan chiacpadomboen nabanta. Adembidi tantiaquin titan chiacpadomboembidi nabanoata,” quequin Nuquin Papan chiampid nec. Aden naquid cuidte nad iquec, quepampic: ³ “Amên anibêdta chiacpadomboen naquid Nuquin Papan bêdambo iquebi camiaidquio iquendac. Adecbidi nidaidën yuec tabadnuequin adobanta,” quepampic.

⁴ Amên anibêdta con bacuêbo chieshemane qeshun bêdamboen chuiquin tantiamequin isme. Adembidi, aido pemeshun acme. Adembidi, Êmbi chiacpadomboen ma nabampanuëshun Nuquin Icbon chiaid tantiamenu, quequin adobanta.

Utsin yuaido yuaquidobidi tantiamequin chuibanaid

⁵ Yuan mimbi Esuquidistun chiacpadomboen nabanacpadomboembidi mibi yuaquidën chiacpadomboen nabanta. Abuc nidabicquin, Con icbo iquec, quequin chieshenquiocquin mibi yuaquidën chiacpadomboen nabanta. ⁶ Min icbon chuishun isnuc ambi chiacpadomboen bêdamboen mimbi nabanacpadomboembidi min icbon isenquiocnoc nabanoata. Esuquidistu con Icho nec, quequin aidën chiacpadomboen nanuna, quequin nidaidênshun min icbon chiacpadomboen nabanta. Aden nabanquin Nuquin Papa bunacpadomboen mimbi nabanendac. ⁷ Min Icho Esuquidistun aton Papan chiacpadomboen chieshenquiocquin nacpadomboen nidaidênshun min icbon chiacpadomboen chieshenquiocquin nabanta. ⁸ Bêdamboen nabanquido yuacmaidbêdta yuabo Nuquin Papan bêdamboen cuidquin menendac, quequin tantiaquin bêdamboen nabanta.

⁹ Yuaquidon min yuabo chieshênquiocquin bêdamboen chuibanta. Mibi cuesnu, quenquiocquin ancata. Min Icho abucquio tabadquid min yuabon Icbobidi nec. Aidën abitedi isec: Nêdic yua icsho daëdpactsêc pausunembi. Utsibic, abi yuaquid icsho nua pausunembi, qesa Nuquin Papa nec. Yuaquid isacpadomboen yua isec.

Satanas cuemetequid dasiuidaid

¹⁰ Nuquin Icho nadatiambocquin nabanquid iquec, quiash aidênquio nua pausunaid icta. ¹¹ Satanac cacumetequid dasiuiu, quiash, Nuquin Papa mibi nua pausunuesho, Ai, cata Satanasên mua uaquin bedchitoshe qeshun. ¹² Matses isadacpadpenquio nami intacbêd isadesa Satanasbêd

icquido nec. Aidedi Nuquin Papan abi tabadaid tēdion tabadmec. Aido icsamianquido nec. Matses yuanuequid Satanās nec. Nuquin Papan uaid tantiash bēdambo mibi iquendac, quequin muaquin aidon chiec. ¹³ Aden muaquin chuiquid aidedi iquec, quequin tantiec Nuquin Papan cacumetequidtedi dasiuidash tabadteneta. Adquid dasiuidquid icquin ambi comapenec natiatequid ushē chonoc Satanās mibi icsamenuēc choacsho bēcuniacimboen cacumec abi mibi nidtoash Esuquidistu tantiaquid yec nidendac. ¹⁴ Aid cacumec abi nidquid icnuec Nuquin Papan abimbo chi-aidquio nacnēshēdacimboec tabadteneta. Adembidi, Nuquin Papan abi bēdamboec tabadtequid shictoncacimboec tabadteneoata. Adec tabadec abi nidtoash mibi nidendac. ¹⁵ Adecbidi, Esuquidistu tantiaquid ēbēd icquid iquendac, quequin Nuquin Papan tantiamequin pausunaidēn tapucudacimboen adomboembidi chuibenequin Satanās cacumec nidacimboec abi mibi nidendac. ¹⁶ Esuquidistu tantiaquid Nuquin Papan dayun uaic, quequin Nuquin Papan tantiamequin pausunaidēnquo dēcatemēnquiash abi mibi nidendac. Aden Nuquin Papan tantiamequin pausunaidēnquo dēcatemēnquiash Satanāsēn abi tantiamenequin pian sedo-sedoacimboen pausantemaid yec abi mibi nidendac. ¹⁷ Adecbidi, Esuquidistu tantiaquid ēmbi yuedtequid nendac, quequin Nuquin Papan tantiamiac utsin machicti-apimbo yec shocosh mauete uaid mauiacimboec tantiec tabadteneta. Aden pausunac tabadquin Satanās, Esuquidistu mibi bedec choenquo iquendac, qesho cacumiash abi nidquin mimbi ēnenquiocquin, Esuquidistu choate cainembi, quequin abi mimbi caimbudendac. Adecbidi, shocosh siantebimboecquid Nuquin Papan chiaid nec. Ambi chiaid aton Mayanēn tantiamiaidquio icquin mimbi chuisho tantiash Satanās cuenendac. ¹⁸ Adecbidi, Nuquin Papan chiaid aton Mayanēn tantiamiaid icquin utsibo tantiaquin baded-badedquiec Nuquin Papa chiec onqueta. Satanāsēn icsamenushe quiash Esuquidistu tantiaquid utsibo Nuquin Papa chiec onquedeneta.

¹⁹ Ēbitsen tantiaquin Nuquin Papa chuioata. Dacuēdenquiocquin Nuquin Papan tantiamiacpadomboen Esuquidistu abi yacno yuedanquidquio nec, quequin Pabado chuime, Papa, quequin ēbitsen chuioa. ²⁰ Esuquidistun chuibeneta caid icquin abi chuibenesho mētaneshun quēnēn nauedaid nebi. Adoaid ēbi icnuc mimbi tantiacpaden chuibanquid Pabado icme, Papa, quequin chuioata.

Ēnquin chiaid

²¹ Nēbi ēbēd icquid chiembique. Tantia. Tiquico mibi yacno nidec. Aibidi Esuquidistu tantiaquid icsho nuqui con utsi caid nec. Nuquin Icbon chuimaidquio aidi nec. ²² Mibi yacno puduedshun ēmbi naidtedi ēbi tabadaidbēda mibi chuibanendac. Ēbi mimbi chuisho tantiash, Bēdambo iquebi, quepen-dac Epeso yacnocquido, quequin Tiquico mibi yacno nidmembī.

²³ Mibēd icquido Esuquidistu tantiaquid utsibobēd ma bēdamboec tabadpanuna caimbi mibitedi. Esuquidistun Nuquin Papabēdtan abi tantiamiantequidbēda utsi tantiatequid pausunaid ma icpanuna caimbi mibitedi.

²⁴ Ēnenquiocquin Nuquin Icho tantiaquidtedi ma abipadquid icpanuna.

PIDIPOS YACNOCQUIDON ISTE

Pabadon tauamboen chiaid

¹ Esuquidistun yuambo Pabado nebi. Esusën yuabidi Timoteyo caidbëd iquebi. Aidbëd icquin shubu dadpen icquid Pidipos yacnocquido Esus tantiaquidtedi mibi chuiquin dada uaimbi. Mibi nashumbanquido chuiquinc mibi chuiquid dapabo chuiquinc utsibotedi chuiquinc caimbi. ²—Con Icho Esusbëdtan Pidipos yacnocquido bëdamboen isquin bëdambo icmeta, Papa —quequin mibi Nuquin Papa chianembi.

Pabadon Nuquin Papa chianiaid

³ Nadembidi mibi tantiaquin Nuquin Papa chianembi. —Pidipos yacnocquido Esus tantiaquido mimbi bëdamboen namiaido nec. Aden namequid yec mibi bëdambo iquec, Papa —quequin chianembi. ⁴ Aden mibi tantiaquin Nuquin Papa chiec bëdambo yec cuishonquebi. ⁵ Ènden ëmbi chuibanac Esus tantiabengquin mimbi ëbi piucquid meniondac. —Esusën naid ma Pabadon matses utsibotsen chuibanu —qeshun meniondashumbic nëbi adembidi ëbi menete mimbi bëmëoac. Aden mimbi bëmëoaid isash mibi tantiec cuishonquebi. ⁶ Nuquin Papan tantiamiac mimbi Esus tantiabengondac. Adembidi Esus tantiamequin Nuquin Papan mibi bëdamboen tabadmec. Esus padpidec chote ushën abëdi tabadmenuen Nuquin Papan adembidi mibi bëdamboen tabadmendac. Adembidi mibi tantiec cuishonquebi. ⁷ —Èbëd tantiananquidombo nec —quiash adebi. Esus chuibenesho quënën nauedondashi. Aden quënën nauedacsho: —Mimbi icsamboen naid chiec cho —cac nidshun: —Abimbo chuibanombi —quequin chuiquid dapa chuide-niondami. Aden chiac puduemenquio icquin abi quënën tsadunebi. Adquid icsho chieshënenquio icquin mimbi ëbi bëdamboen tantiec. Nuquin Papan ëbi icmiacpadquid chieshtoenquio icquid icquin mimbi ëbi adoec. Adsho mibitsen tantiembi. ⁸ Esusën matses tantiacpadomboen mibi tantiac unësquio iquec. Mibi istiadquio iquebi. Èbi adsho tantiaish Nuquin Papatsen: —Abimbo caic —quendac. ⁹ Aden mibi tantiaquin Nuquin Papa chianembi. —Aido bëdiactëc tantianansho comapenen tantianamequio, Papa. Adembidi mibimbo tantiamequinc Esus tantiamequinc mimbi chiaid tantiamequinc cata. ¹⁰ Aden tantiamiac: “Nadec tabadec bëdambo ictsiabi. Adec tabadenquio yec icsambo ictsiabi,” quequin bëdamboen tantierendac, Papa. Aden tantiaquid yec chieshtoenquio icquin Esus tantiec bëdamboec tabadendac. Adsho abi chote ushën Esusën: “Icsambo icquid mibi nec,” catiapimbo iquendac. ¹¹ Adec con Icho Esus tantiec bëdamboec tabadsho isun: “Bëdamboen tabadmec Nuquin Papa bëdambo iquec,” quetsiash utsibo, Papa —quequin Nuquin Papa chianembi mibi tantiaquin.

Utsibon Esus chuibeniaid

¹² Quënën nauedac ëmbi Esus chuibenetiapimbo icnubi utsibon chuibeniac utsin-utsinquin Esus tantiabengac caosh. ¹³ Nëshun shubu dadpen icquid Doma yacnoshon: —Quënën nauedaid cuenushe —quequin ëbi isquido sondadon: —Esusën naid chuibanansho Pabado quënën nauedac —quequin tantiec. Aidon chiac nëmbo icquido utsitedishun adembidi tantiec. ¹⁴ Quënën nauedaquio dacuëdenquio iquebi. Èbi adquio icnuc: —Pabadon nacpadomboen dacuëdenquio icquin Esusën naid chuibanembi —quepac caosh Esus tantiaquido dadpen. Adshun dacuëdboedombi dacuëdenquio yanquin Nuquin Papan chiaidquio chuibeniac caosh.

15-16 Aidon ëbi bédamboen tantiaquin Esusën naid chuibenec. —Pabado tantiembi. Esusën naid chuibenesho bedshun quënën nauedac aidën natiapimbo icnuc ëmbiquien nanu —quequin ëbi bédamboen tantiaquin Esusën naid chuibeniac caosh. Utsibombien ëbi chieshënquimbi Esusën naid chuibeniac caosh. —Quënën tsadunac ma Pabado mëyadbudchitono. ¹⁷ Aidën chuibantiapimbo icnuc ëmbiquien nanu. Aden ëmbentsëqui chuibanac dadpeshun tantiashun: “Mibi bédambo iquec,” ëbi catsiash —quequin Esusquio tantienquio icquimbi Esusën naid chuibenec. ¹⁸ —Ëbi chieshëneg —¿quiashtabi nëishpe? Padenquio. —Ëbi chieshënquidon ëbi bédamboen tantiaquidobëdtambi Esusën naid chuibanac matses utsibo utsi-utsiec Esus tantiaquido yanec —quiash bédambo yec cuishonquebi. Adecbidi cuishonquebi: ¹⁹ —Pidipos yacnocquidon Nuquin Papa ëbi chianiac caosh —quiash. —Mëyadsho Pabado chieshtomenda, Papa. Abi quënën nauedquidon puduemequin nidmeta, Papa —quequin mimbi chiapadomboen namenuen Nuquin Papan Esuquidistun Mayan menequin cuesambo icmiac chieshtoenquio iquendabi. Adembidi aidën nac quënën tsadenquio iquendabi. ²⁰ Ëmbi naondacpadomboen dacuëdenquio icquin Esusën naid chuibantiadquio iquebi. Chieshtotiapimbo iquebi. —Ma utsibon: “Esuquidistu bédambo iquec,” canu —quiash aduidequi iquebi unësabi yec. Utsin: —Cuesunechitono —caqui adecbidi chieshtoenquio ictsiabi.

²¹ Unësabi Esuquidistu tantiec bédambo iquebi. Unësash Esusbëd tabadequic bédamboshë ictsiabi. ²² ¿Mitsipadtebi bumpeba? ¿Unëstedabi bumpeba? ¿Unësenquio yec tsadtedabi bumpe? Unësabi icquin ëmbi Esusën naid chuibanac utsibon Esus tantiabentsiash. ²³ Nuquin Papa yacno nidash Esus isec bédamboshë ictsiabi. Esus iste bunquiebi. ²⁴ Aden tantiequi: —Unësabi yec Pidipos yacnocquido Esus tantiaquido Esus bédamboen tantiamec ano nidtsiabi —quequin tantiec unëstiapimbo icoaibi. ²⁵ Unësabi yec mibi yacno nidoatsiabi. Aden tantiec: —Nuquin Papan nëbi ëbi unës uamenquio iquec —queoai. Mibëd tabadquin Esusën naid bédamboen chuibantsiambi. Adoac bëdiactsëc Esus tantiatsëcboedombi Esus tantiaquiec mibi bédambo ictsiac. ²⁶ Ëbi choacsho isash: —Pabado padpidec chomequid Esus bédamboshë iquec —mibi quetsiac. Adec mibi cuishonquetsiac.

Chieshtoenda, quequin Pabadon chiaid

²⁷ Ëbi ano nidtiapimbo icnuc Esusën chiapadec chieshtoenquio yec bédamboec tabadta. Quënën ëbi nauedboedën puduemiac mibi yacno nidshun mibi bédamboec tabadsho isash: —Pidipos yacnocquidon ëmbi chiapaden naic —quetsiandabi. Nëbi mibi yacno nidtiapimbo iquebi. Adnuc mibi istanquidon: —Chieshtoenquio icquin Esus tantiec cuëshëdenquio yec Pidipos yacnocquido bédamboec tabadosh. ²⁸ Esus chieshënquidon: “Esusën naid chienda. Cueschitomane,” caqui dacuëdenquio icquin Esusën naid adembi chuibanosh —quequin mimbi naid chuisho tantiash bédambo ictsiabi. Adec cuesambo yec nuqui: —Nuquin Papan icmiapadec dacuëdenquio iquebi. Ëbi dacuëdenquio icmequidën ambi chiapadomboen ëbi chieshënquido unësacsho icsambo icquido cuidacno nidmendac. Ambi chiapadec Esus tantiaquid yec unësashini Nuquin Papa yacno tabadendac —quequin nuqui tantiatsiac. ²⁹ —Con Mado Esus tantiasho utsibon chieshtënsiandac —quequin Nuquin Papan tantiacpadomboen utsibon mibi chieshëndac. ³⁰ Ëbi nacpadomboen mibi chieshënoaic. Mimbi isnuc ëbi chieshënondash. Adembidi ëbi chieshënoaic nëbi. Nëid dada uaid isquin: —Pabado padpiden chieshënoac —quequin mimbi tantiendac.

2

Utsi tantiec tabadta, quiaid

¹ Tantia, con utsibo. Mibitedi chuinu. ¿Mitsipadquio Esus tantiaquido icpec? Esuquidistu tantiaquiec dayacquio yacbimboec iquec. Adecbidi Esusën tantiaido yec bēdambo icquido nec. Adecbidi Nuquin Papan aton Mayan abēd icmequin bēdamboec tabadquid icmiaidobidi nendac. Adoaido matses tantiaquidombo nec. ² —Adquidbidi nebi —quec adquiecbidi bēdamboec tantianacuededta. Ēbi cuishoncamenuc adta. Abitedi: —Esusën chiacpadomboen nanuna —quecuededec chieshēnanenquio yec bēdamboec tabadta. ³ Nadeconquec tabadenda. —Ēbiuidtsēqui bēdamboshē iquec. Con nauidtsēqui nanu. Con nauidtsēqui bednu —quec mibiuidtsēqui tantiadec tabadenda. —Ēbi bēdapabi icnuc utsibo bēdamboshē iquec. Aido nashuntiadquio iquebi —quec bēdamboec tabadta. ⁴ Mimbi tantiacpadomboenuidi nainquio icquin utsin tantiacpadomboentsen nata. Mitsanauidi tantienquio icquin utsibo nashuntetsen tantiata.

⁵ Esuquidistun nacpadomboen naic mibi bēdamboshē ictsiac. Aidēn chieshtoenuio icquin Nuquin Papan chiacpadomboenuidi napanēdash.

⁶ Aton Papa Nuquin Papapadquidquio yec Esus abitedishun Icbombo napanēdash.

Aton Papabēd yec bēdamboshē ichoedi: —Padi icnuna. Nuquibi namec bēdambo iquebi —quenquio yec Nuquin Papan chiacpadomboen naic auēshquio chopanēdash.

⁷ Adecon aton Papan yuabimboecquid yanash ambi chiacpadece matsespanēdash chidon tishac.

⁸ Adashic matses yec aton Papan chiacpadecequi abided ciudadec unēspacaondash.

Matses icsamboshē icquido cuidacimboen cuesten dectanquin icsaisambobi Esus unēs uapac caondash.

⁹ Aden ambi chiacpadomboenuidi Esusën nasho isun Nuquin Papan uincuemeshun abi yacno chomeoashun abēdi Esus tabadmepanēdash.

Aden abitedishun Icbombo icmeopanēdash.

¹⁰⁻¹¹ —“Nuquin Icbombo Esuquidistu bēdamboshē iquec,” ma abitedi quenu —qeshun aden Nuquin Papan abitedishun Icbombo Esus icmeopanēdash.

—Ēmbi ēbi yacnoshon uaido mayan bēdabo yec nidaidēn tabadquido matses yec unēsacsho uincuemiaido yec quequido: “Nuquin Icho Esuquidistu bēdamboshē iquec. Abi abitedishun Icho icmeoaquid Nuquin Papatsen bēdamboshē iquec,” ma quenu —qeshun adopanēdash.

Utsibo Esus tantiamete chiaid

¹² Mibi tantiaquimbique. Tantia, con utsibo. Mibitedi chuinu. Esusën nacpadomboen mimbitsen bēdamboen nata. Ēbi mibēd icnuc mimbi nadeniondacadomboen ēbi nibēdnuc adembidi bēdamboen nata. —Nuquin Papa dacuēdampambo icquidēn chiaid niacmane —quiash ambi chiacpadomboen naic aibēdi tabadnush bēdamboec tabadta. ¹³ —Ma bēdamboec tabadnu —quequin Nuquin Papan ambi chiacpadece tabadte bumequin nuqui bēdamboen tabadmeque. Bēdamboec tabadta.

¹⁴ Adecon bēdamboec tabadec chushcananenda. Adecbidi: —Bēdamboen nanuna —cac chieshec tabadenda. ¹⁵ —Esus tantiaquido icsambo iquec —utsibo quenushc. Adenda. Nuquin Papan: —Con mado nec. Con champi nec —caido yec bēdamboec tabad. Matses dadpenquio icsamboshē icnubi adequid bēdamboec tabad. Adecon bēdamboec tabadquin icsambo icquido mimbi

Esus bēdamboen tantiametsiac paposhquiacbimboecnuc. ¹⁶ Mimbi adoac utsin: —Esus tantiasho Nuquin Papan ēbi bēdamboen isec. Nēbi bēdambo yanec unēsashini aibdēd tabadendac —quequin tantiatsiash. Aden mimbi chuibanaido Esus tantiaquido yansho isash cuishonquetsiabi. Esuquidistu nidaidēn padpidec chote ushēn bēdambo ictsiabi. —Ēmbi chuibanondaido Pidipos yacnocquido ambi Esus tantiamiaidobēd choeque. Is —quec bēdambo ictsiabi. ¹⁷ —“Bēdambo mibi iquec,” Nuquin Papan mabi canu —queshun Esus tantiaquin mimbi bēdamboen nac. Utsibo nashunquin Esusēn naid chieshtoenquo icquin mimbi chuibanac. Mimbi adoaid chuisho tantiashun: —Mibi unēs uanu —caquini bēdambo ictsiac. —Aido bēdambo iquec —queshun mibi tantiec bēdambo yec cuishonquetsiabi. ¹⁸ Ēbi unēs uaid chuisho tantiash adecbidi bēdambo icta. —Esus tantiec chieshtotiapimbo icsho Pabado unēs uac —quiash bēdambo icta.

Pabado Timoteyo chiaid

¹⁹ Con madobimboecquid ebēd icquid Timoteyo mibi yacno nidmetsiambi. —¿Midapadquiec Pidipos yacnocquido tabadeque? Istan, mado —quequin nidmetsiambi. Esuquidistun adembidi tantianuc adotsiambi. Adoac istanshun chuituidac bēdambo ictsiabi. ²⁰ Timoteyopadquid utsi nibēdec. Aid abentsēcshumbi ēmbi nacpadomboen mibi tantiaquiec. ²¹ Utsibombien aton nauidsēqui tantiaquin Esuquidistun chiacpadomboen natiapimbo iquec. ²² —Timoteyon bēdamboen naondash —quequin mimbi tantiec. Mimbi tantianubi ebēdtan Esusēn naid chuibanondash con mado icbobimboecquin. Aid bēdambo iquec. ²³ Adquid icsho mibi yacno: —Istan —catiadquio iquebi. Ēbi quēnēn nauedquido ēbi caic: —Unēs uanu —quesho tantiabono. Tantiashun: —Ēbi quēnēn nauedquidon chiaid Pidipos yacnocquido chuitan, Timoteyo —catsiandambi. ²⁴ Ēbitsen nēbi mibi yacno nidtiadquio iquebi. Ēbi caic Nuquin Icho: —Ma nidnu —quenec anobi nidtsiabi.

Epapadodito chiaid

²⁵ Epapadodito con buchibimboecquid mimbi: —Pabado nashuntan —cac Pidipos yacnuēsh chonēdaid nēmbio iquec. Utsibon chieshēnubi dacuēdenquo icquin ebēdtan Esusēn naid chuibanondash. Adonaidi nēbi: —Mibi iccondacno tabadec nid, buchi —caombi. ²⁶ Aid mibi tantiec unēsquo yec tsadposh. —Ēbi unēstsemboed con matses chuinuec Pidipos yacno nidaccosh —quiash mibi ismete bunquiec shubiantiadtsēcquio tsadposh. Adsho isun: —Min shubuno nidec nid —caombi. ²⁷ Adec unēstsenquiondash. Adshobien Nuquin Papan bēdamboen isquin bēdamepondash. Ēbitsen bēdambo icmenuen Nuquin Papan adopondash. Epapadodito unēsquo icnuc ēbi shubiec tsadsho isash: —Aid unēsān unēsquo icnuc Pabado mēyadnushe —queshun Nuquin Papan Epapadodito bēdamepondash. ²⁸ Adoacsho mibi yacno aid badedquio nidmetiadquio iquebi. Aibdēd iquec mibi bēdambo ictsiac. Mibi yacno nidsho isash ēbitsen bēdambo ictsiabi. ²⁹ Epapadodito nidacsho bēdamboen ista cuishonquequin. —Nuquin Icbon mibi bēdamiac. Aid bēdambo iquec. Mibitsen bēdambo iquec —quequin chuita matses dadpen tantiamenuen. Adquid Esus chuibanquido utsibo mibi yacno nidacsho adembidi bēdamboen ista. ³⁰ Esuquidistun chiacpadomboen naic ebēdi tabadec Epapadodito chondash. Chieshēmēnquido dadpen icnubi ēbi nashunec tabadec daicsabadash unēstsenondash. Chotiapimbo icquin mimbi: —Pabado nashuntan —cac choash nibēdantsenondashe. Mibi yacno nidacsho bēdamboen ista.

3

Esusuidtsëqui tantiasho Nuquin Papan bëdamboen isaid

¹ Nuquin Icho Esus tantiec cuishonquenuna. Aduidequi icac bëdambo ictsiash. Tántia, con utsibo. —Tantienuo yanushe —quequin ëmbi chiondaid dada uaqun padpinen mibi chuiouanu. ² Muaquidon chuisho tantienda. Aidon: —Shui dëbid dëteshun secaidouidi Nuquin Papan bëdamboen istsiash —quequin chuisho tantienda. Aden chiec icsa uanquidombo neque. Uimanëmënuquidoen nechitec. ³ —Shui dëbid dëteshun secaid nec —¿queshunda Nuquin Papan nuqui bëdamboen ispec? Padenquo. Aidon Esus tantienuo icsho bëdamboen isenuquo icquin aton Mado Esus tantiaquidoen Nuquin Papan bëdamboen isec. Aton Mayanën tantiamiac: —Nuquin Icho Esuquidistu bëdamboshë iquec. Abided ciudadec unësaid tantiasho Nuquin Papan nuqui bëdamboen isec. Embimbi naquin Nuquin Papa bëdamboen ismetiapimbo iquebi —quequin nuqui tantiec. ⁴ Matsesën tsusedpan chiaiduidi tantiasho Nuquin Papan bëdamboen iste icnuc nadtsiabi. —Tsusedpan chiaid utsibon daëdpactsëc nanuc ëmbimbo naquin dadpenquo nabanombi. Aden ëmbimbo dadpenquo nasho Nuquin Papan ëbi bëdamboen isec. Adembidi isadaidbombo icsho ëbi bëdamboen isoaic —quetsiabi. Nëbi adtiapimbo iquebi. ⁵ Isadaidbo nebi. Isadaidbon chidon tishacsho sietetedec ushun Moisesën chiampicpadomboen shui dëbid dëteshunëdaidquo nebi. Con matses tsusedpa Benamin yampid icnuc Ebedeyombo nebi. Isadaidbo caimbidi Ebedeyo capec. Adquid yec aidën onqueten onquequid nebi. Moisesën chiampid namequidquo padiseyobo caid niondabi. ⁶ Adquid icquin icşambo icquido danquin Esus tantiaquido cuesun secatiadquo iccondabi. Nuquin Papan chiapadomboen natiadquo iquequi adondabi. Moisesën chiampiduidi nate bunquiondabi.

⁷ Adquid icquin Esus tantiabi: —Embimbo naic bëdamboshë iquebi —quequin icşamboen tantiapondambi. Adondaidi Esus tantiabenash: —Embimbo naiquini icşambo iccoc. ⁸ Nëbi con Icbombo Esuquidistu tantiec bëdambo iquebi —quequin tantiabenondambi. Aiduidtsëqui tantiatiadquo icquin icsa secacimboben ëmbimbo naid ënondambi. ⁹ Esus tantiate bunquiebi. Adquid yec: —Moisesën chiampicpadomboen ëmbimbo naiquini bëdambo iquec —quetiapimbo yanashic nadondabi. —Nuquin Papambien aton Mado Esuquidistu tantiasho bëdamboen isquin ëbi bëdamboen tabadme —quequin tantiabenondambi. ¹⁰ Aden tantiabenshun Esusuidtsëqui comapenen tantiatiadquo iquebi. —Comapenen tantiaquin Nuquin Papan uincuemiaid icquin Esusën bëdamboen tabadmetsiashi —quec Esus tantiate bunquiebi. —Nuquin Papan chiapadomboenuidi nasho mëyanac Esus unësay caondash. Adembidi Nuquin Papan namiapadomboen nasho mëyanac chieshtotiapimbo ictsiabi. ¹¹ Unësambo icsho Esusën bëdamboen tabadmetsiashi. Unësaysho Nuquin Papan uincuemetsiashi —quec adec Esus tantiate bunquiebi.

Nuquin Papan chiapadomboenuidi nate bunaid

¹² Tántia, con utsibo. Mibitedi chuinu. —Nuquin Papan chiaid niaguesambo nebi —¿quetabi ique? Padenquo. Adquio ictiadquidi adquio yenquieni icchitec. —Bëdamboshë icmenuen Esuquidistun yuapondashi —quequin tantiec bëdamboshë icte bunquiebi. ¹³ Adec bëdambo yanabi yec: —Embimbo naboed naic bëdamboshë iquebi —quenquo icquin Esusquo tantiaquin ambi chiapadomboen natiadquo iquebi. ¹⁴ —Bednu —quequin

bedteuidtsēqui tantiec titinquiabimboen Esusquo tantiaquiec ambi chi-
acpadquiec bēdambo ictiadquio iquebi. —Adec tabadec unēsacsho Nuquin
Papan abi yacno ēbi tabadmec —quec bēdambo icte bunquiebi.

¹⁵ Nuquin Papan chiacpadomboen natiadquio icquin ēmbi chuibocpadom-
boen mimbi tantiatsiac. Utsien: —Padi. Pabadon chiaid abitedi nainquio
icquin abentse-abentsen naindambi —quesho Nuquin Papan ambi tantiaid
bēdamboen tantiametsiash. ¹⁶ Nēbi nuqui icbocpadquiec tantiananquiec
bēdamboec tabadnuna.

¹⁷ Ēbi yacpadquiec bēdamboec tabadta. Ēmbi chiacpadomboen utsibon
nasho isun adomboembidi bēdamboen nata. ¹⁸ Ēmbi chuideniondacadom-
boen mibi padpiden chiemi shubiquimbi. Mibi yacno utsi-utsiec icsam-
boec tabadpec. —Abided ciudadec cuesten dectamēdaid Esus tantiaquid nebi
—quetsēboedi icsamboec tabadec. Adquido Esus tantiaquidpenquio nec.
¹⁹ Peteuidtsēqui tantiec icsambo yequi: —Bēdambo iquebi —quec tabadec.
Nuquin Papa tantienquio icquin nidaidēn icquiduidtsēqui tantiec. Unēsash
Nuquin Papa yacno nidtiapimbo yec icsambo icquido cuidacno nidendac.
²⁰ Padnuen Nuquin Papan bēdamboen isaído yec aibēd tabadtequido nuqui
nec. Abi yacno buanuec abucuēsh Nuquin Icho Esuquidistu chosho isnuec
nuqui tabadec. ²¹ Choshon aidēmbi nuquin dada chuca uaindac aton dada
chuca uacpadomboen. Adoac unēstiapimbo icquiduidquio nuqui iquendac.
Abitedishun Icbombo icquin ambi chiacpadomboen abitedi namequidquio
icquin aden nuquin dada chuca uaindac.

4

Esus tantiec cuishonquiaid

¹ Ēmbi aden chuisho tantiash Nuquin Icbon chiaid niaquenquio yec
bēdamboec tabadta. Mibi tantiaquin mibi istiadquio iquebi. Mibi caic: —Ēmbi
chuibanondaido Esus tantiabenash bēdambo ictiadquio iccondash —quec
bēdambo iquebique. Adquiec chieshtoenquio icquin Esus tantiec bēdamboec
tabadta.

² Tantia. Nēbi chido daēd Ebodia caid Sintique caidbēdtatsen chuinu.
Amicananenda. Esus tantiaquido yec: —Ai, Nuquin Icho Esusēn tani-
acpadomboembien natiad —quec tabadta. ³ Tantia, buchi. Ēbēdtan
Esus chuibanondaid icsho mibitsen chuinu. Aid chido daēd chuiquin: —
Bēdamboec insanta —cata. Utsibon chieshēnubi ēbēdtan aid daēdshun Es-
usēn naid chuibeniondashe. Adembidi Quedemente caidēntsen ēbēdtan
chuibanondash. Adembidi utsibontsen. Adquidotedi Nuquin Papan: —
Esusbēda ēbi tantiaquido mibi neque. Ēbēd tabadec cho —caindac.

⁴ —Nuquin Icho Esus tantiaquiec bēdambo yec cuishonquenuna —caimbi.
Esus tantiaquiec cuishonquenuna. ⁵ —Ma utsibo: “Esus tantiaquido
chieshēmēnenquio yec bēdambo iquec,” ma quenu —quiash bēdamboec tabad-
nuna. Nēbi Nuquin Icho Esus choeque.

⁶ Adecbidi chishpiquiec tabadenda. —¿Atotsimbi napeba? ¿Atotsimbi
pepeba? ¿Nēbida con matses unēspeba? —quequin uesquin tantienda.
Padenquio icquin nuqui dacuēdquin tantiaidtedi Nuquin Papa chuinnuna. —
Ēbi nashunquin utsibotsen nashunta, Papa. Aden nashunec mibi bēdambo
iquec, Papa —quequin Nuquin Papa chuinnuna. ⁷ Aden nuqui chiac aidēmbi
nuqui bēdambo icmec dacuēdenquio icnuc. Adoac bēdambo icnuc utsibo: —
¿Mitsipadec dacuēdenquio yampash? —quetsiash. Nuquitsen: —¿Mitsipadequini
bēdambo yampo? —quetsiac. Adec: —Nuquin Papan ēbi nashunquidquio nec

—quequin Nuquin Papa chianequin Esus tantiaqueic nuqui dacuēdenquoio yec bēdamboec tabadtsiac.

Bēdamboshē iquec, caiduidi tantiata, quiaid

⁸ Tantia, con utsibo. Nēidtsen chuinu. ¿Atotsi abimbo chiaid icpec? Adquid tantiata. ¿Atotsi bēdambo icpec? ¿Tutsi bēdamboec tabadquid icpec? Adquidtsen tantiata. Aden: —Bēdambo iquec —caiduidi tantiata. ⁹ Adembidi ěmbi chuisho mimbi tantiondac. Aden ěmbi chiondai tantiaguin ěmbi naondacpadomboen nata. Adsho isash mibi dacuēdenquoio icmequid Nuquin Papa mibēd iquendac.

Pidipos yacnocquidon bēmiaid

¹⁰ Nēbi mimbi bēmiaid bedash bēdambo iquebi. Ęnden mimbi aden menianiondashumbic yuectaneshun nēbi ěbi tantiaguin mimbi meneoaid bēacsho bedombi. —Nuquin Icbon tantiacpadomboen padpiden Pidipos yacnocquidon ěbi ma menenuequin piucquid bēmiac —quiash bēdambo iquebi. ¿Ěbi tantienquioda mimbi ictionda? Ěbi tantiaguin ěnden bēmetiadquidi tśundan bētiambo icnuc mibi nepanēdac. ¹¹ —Con na nibēdeque. Beccho —¿quectabi ique? Padenquoio. Adtiapimbo iquebi. Con na icnuc bēdambo ictsiabi. Con na nibēdnubi adecbidi bēdambo ictsiabi. ¹² Con na dadpen icnuc bēdambo ictsiabi. Con na nibēdnubi adecbidi bēdambo ictsiabi. Con piucquid dadpen icnuc bēdambo ictsiabi. Con piucquid nibēdnubi adecbidi bēdambo ictsiabi. Peten cubudash adecbidi bēdambo ictsiabi. Buna natiambo icnubi adecbidi bēdambo ictsiabi. ¹³ ¿Ěbenquiodabi adti? Padenquoio. Esusēn namiaquini adquoio iquec. Aidēmbi namiac ambi chiacpadomboen naimbi. ¹⁴ Adnuc: —“Mēyadec,” quioish —queshun mimbi ěbi ma menenuequin bēmiaid bēdambo iquec.

¹⁵ Min nidaid Masedonia caid yacnuēsh nidsho Esus tantiaquido shubu utsinquidon uanocquidon menenquoio iccondashi. Adnubi tauamboen menequin mimbiuidtsēqui ěbi meniondac. Esus tantiabentsēcshun mimbi adondac. ¹⁶ Adoaguini shubu dadpen icquid utsi Tesadonica caid yacno nidondac. Ambo yuec tabadnubien: —“Pabado aton na nibēdec,” quioish —queshun mimbi piucquid bēmiacondac. Yuectaneshun adembidi. Adshumbic padpiden. ¹⁷ —Mimbi bēmiaid bēdambo iqueque. Utsi beccho —¿quequindambi aden chuipe? Padenquoio. —Pidipos yacnocquido Esus tantiaquido bēdambo iquec —Nuquin Papa camete bunquin: —Mimbi bēmiaid bēdambo iccosh —caimbi. ¹⁸ Utsi-utsien bedshumbeneshun mimbi bēmiaid Epapadoditon bēacsho bedondambi. Mimbi bēmiaidbēd daēdash ěbi bunaid dēniaquec con na dadpenguio yanac. —Mibi bēdambo iquec —Nuquin Papa camenuen mimbi bēmenēdac. Adsho isash Nuquin Papa: —Adquido bēdambo iquec —quependac. ¹⁹ Abitedishunquoio Icho Nuquin Papa nec. Comapenen tantiaquin Esuquidistu tantiaquido bēdamboen isquin nashunquidquio nec. ¿Ada mitsana nibēdnuc mēyadac bimboec tabadpe? Adec mēyadsho isun Nuquin Papan mitsana icmendac. Unēsquoio icsho aidēmbi mibi bēdambo icmendac. Adecbidi: —Chieshtotiadquio icchitebi —quesho Nuquin Papan nac mibi chieshtoenquoio iquendac. —Aid nibēdnuc unēsebi —mimbi caid Nuquin Papan icmendac. ²⁰ Ěbi adsho tantiashun: —Bēdamboshē mibi iquec, Papa —quequin Nuquin Papa chuinuna ěnenquoio icquin.

Pabodon ěnquimbi chiaid

²¹ Anocquido Esus tantiaquidtedi chuita naden. —Esus tantiaquido icquin Pabado chedon mibi tantiec —quequin chuiban. ²² Adembidi nēmbi Doma yacnoshon Esus tantiaquido abitedishun mibi tantiec. Chuiquid dapa Sesad

caidēn shubun icquido Esus tantiaquido icquin adembidi mibi tantiec.
²³ Mibi tantiaquin: —Con Icbo Esuquidistubēdtan Pidipos yacnocquido
bēdamboen isquin bēdambo icmeta, Papa —quequin Nuquin Papa chianembi.
Padi. Aidedi chuiquin dada uaombi.

CODOSAS YACNOCQUIDON ISTE

¹ Pabado nebi. Nuquin Papa bunacpadomboen Esuquidistun ëbi chuibeneta caid nebi. Timoteyo ëbëdi iquec. Esuquidistu tantiaquid icsho nuqui con utsi caid aidi nec. ² Aidbëdtambi ënenquiocquin Esus tantiec Codosas yacno iccuededquido, Nuquin Papan cuënaido, Con utsibo nec, quequin mibitedi chuiquin dada uaimbique. Isec onqueta.

Esuquidistu tantiaquido icsho Nuquin Papan ëbi icsaid cuidenquiocquin ambi bëdamboquid icmebanaid nebi, quequin tantiec mibitedi Codosas yacnocquido adquiec ma mibi tabadpanuna. Adechidi, Nuquin Papabëd icquido nebi, quequin tantiec ma tabadpanuna.

Nuquin Papa chuidoniaid

³⁻⁴ Nuquin Papa, Nuquin Icho Esuquidistun Papa chiec nadec onquebi. Bëdamboquid icquin mibipadquiocnoc Codosas yacnocquido Esuquidistu tantiaquido bëdamboquido mimbi icmebanec, Papa. Utsibo Codosas yacnoësh choshon utsi-utsiec Esuquidistu tantiaquid yansho. Adquid yanshun Esuquidistu tantiaquid utsibo bëdamboen tantiec, quequin chuisho tantias bëdambo iquebi, Papa, quequin mibitedi tantiec Nuquin Papa chiec onquedenebi. ⁵ Esuquidistu Nuquin Papa yacno yuedanquid nec, quequin, Nuquin Papan chïaid abimbo iquec, quequin chuibanac abi tantiaquido mibitedi yanac. Adquid yanshun, Abi yacno Nuquin Papabëd bëdamboec tabadendabi, quequin aid ushë chote cainquidombo icquin Esuquidistu tantiaquid utsibo mibitedishun tantiec. ⁶ Ëbi icsaid cuidtiadtsëcquo Nuquin Papa icnubi utsibon Esuquidistu chuibanac abi tantiaquid ëbi yanacsho isash Nuquin Papa ëbi icsaid cuidenquo yec ënden bëpiscudac, quequin mibitedishun abimbo tantiashun mimbi bëdamboec tabadquin ismebanendac. Aden mibitedishun ismebanac utsin-utsinquien Esuquidistu tantiaquid yanshun abi bëdamboec tabadaid adembi ismebanoaic. Adoac nïdaid utsin-utsinquiec tabadquidon Esuquidistu tantiashun adomboembidi ismebanoaic. ⁷ Epapadasën Esuquidistu chuibanac Esuquidistu tantiaquid mibitedi yampondac. Codosas yacno nidtiapimbocquin ëmbi, Ambo nidshun Esuquidistu chuibanta, cac Epapadas nidondash. Aidi ëmbi chiacpadomboen ëbi nashunquidquo nec. ⁸ Adquid yec mibi yacno nidshun chuibanash choashun, Nuquin Papan Mayanën pausunac utsi tantiaquid Codosas yacnocquido nec, quequin Epapadasën chioshi.

⁹ Aden Epapadasën chiac mibi tantiec baded-badedquiec Nuquin Papa chiec onquian-onquianebi. Mimbi tantiapadomboen min Mayanën pausunacsho Codosas yacnocquido bëdamboen tantiam, Papa, quequin chian-chianembi. ¹⁰ Aden mibi bunacpaden mimbi tantiamiac Codosas yacnocquido, Esuquidistu tantiaquid nebi, quiash utsibo ismenuec bëdamboec tabadec. Adec Codosas yacnocquido tabadsho isash, Bëdambo iquebi, ma Esuquidistu quepanuna. Adec bëdamboec tabadquin nabanquidquo utsi iquendac. Adec tabadquido mibi tantiadonequido yanendac, Papa. ¹¹ Adembi mimbi dayacquo icmenu caid Codosas yacnocquido iquec natiateguid icnuc aido chïeshenquo yec abi tantiec mibi nidendac. Aden chïeshenquiocnoc mimbi nidmiac, Bëdambo iquebi, Papa, quec, Cuishon, quec aido mibi chiec onquedenendac, Papa. ¹² Mimbi bëdamboquid icmebanac icsaquid nibëdacno mibi tantiaquid utsibobëd mibëdi tabadendabi, Papa, quequin tantiec, Bëdambo iquebi, quec ma Codosas yacnocquido mibi chiec onquepanuna, Papa.

13 Ënden adquidpenquoio yec Satanasën yuaido yec, Nuquin Papa tantianu, quesa nuqui iccondac. Aidën yuaido icsho Nuquin Papan nuqui mënichpoundash. Aden nuqui mënichquin abi cudasaidquoio aton Madombo Esuquidistu icsaisapadquid nuqui icmenuequin aids Nuquin Papan nuqui tantiampondash. 14 Abipadquid icmenuec matses icsaid bedshunash abided cuidadec unëspanëdash. Adoacsho Esuquidistu tantiaquid icsho cuidenquoio yec mibi icsaid bëpiscudendabi, quequin Nuquin Papan tantiampicpadquiequi bëpiscudendac.

Abia yampidquoio iquec abitedishun icbombo Esuquidistu nec quiaid

15 Nuquin Papa isadesa icnubi abipadquidquibidi matsesash Esuquidistu nuqui isendac. Abitedi uabi yec Esuquidistu aton Papabëdtsëqui Abia Yampid icquin utsi abitedi ambi uaid nec. Ambi uaidtedi aton na nec. Aidon icbo Esuquidistu nec. 16 Nidaid abubëdtabi uashun aidënquicquidtedi uanu quequin ambi uaido nec. Matsesën isaidtedi matsesën isacmaidtedibëd Esuquidistun uampidquoio nec. Mayantedi ambi uampidquibidi nec. Mayan utsi-utsiec chuiquid nebi, quenubi utsi-utsiec utsin icbo nebi, quepec. Adecbidi matses queoaindac. Aidotedi Esuquidistun uaido nec. Aidotedishun icbo Esuquidistu nec. 17 Esuquidistu abia yampidquoio iquec. Aidëmbi, Ëmbi uabanaido namebanu, quequin ambi chiacpadomboen namebanec. 18 Nidaid utsi-utsiec yacnocquido abi tantiec iccuededquidtedi chuiquidquoio Esuquidistu nec. Abitedi chuiquid icnu, quec Nuquin Papan Madombo Abia Yampid matsesash unëspanëdash. Adsho Nuquin Papan abia uincuemeshun abi tantiaquidtedi chuiquid abentsëcquiobi abipadquid icmepanëdash. 19 Utsi abipadquid ictiapimbo iquec. Aidën nabanacpaden natiapimbo utsi iquec. Ëbipadquidquoio con mado nec, quiash, Bëdambo iquebi, quec Nuquin Papa tsadec. 20 Aton Papapadquid icquin aton Papan tantiacpadomboen tantiaquid Esuquidistu nec. Adquid yec matses icsaid bedshunash ëbided cuidadec unëspebi, abi quiampicpaden matsesën cuesten dectanac unëspanëdash. Adoacsho isun ambi bëdamboen istiapimbochoedi Esuquidistu tantiaquid yansho isun aidtedi Nuquin Papan bëdamboen isec.

21 Ënden Nuquin Papan matsespenquoio mibitedi iccondac. Icsamboen tantiec icsaquid yec Nuquin Papa chieshënquido mibitedi iccondac. 22 Adquid icboedi, Ëbi yacno yuednu queshun Esuquidistu tantiaquidotedi cuidenquoio yec abi icsaid bëpiscudquin Esuquidistu icsaisapadquiocnoc aido isembi, quec Nuquin Papa tsadec. 23 Ënenquicquin Esuquidistu tantiaquid icsho abi yacno mibi yuedendac, quequin chuibansho mimi tantiondac. Adenuidi ënenquicquin tantiata. Adomboen chuibenesho utsin-utsinquien tantiapondash. Esuquidistun, Aden chuibeneta, caid nebi.

Esuquidistu tantiadoneta, quequin Pabardon chuibanaid

24 Ëbi tantiaquid Nuquin Papan bëdamboen isendac. Aden isac, Ëbëd icquido iquendac, quequin Esuquidistun ambia chuibansho matsesën mëyampanëdash. Adomboembidi Esuquidistu chuibansho mëyamposhi. Adoaiqui, Cuishon, quebi. Ënden abi tantiaquid yanacsho isun, Ëbi chuibeneta, quequin chuishumbic, Ëbi chuibansho mibi mëyante dadpen iquendac, quequin Esuquidistun chuioapondashi. Aden aidën chiondacpaden mëyanaid nebi. Ma abi tantiaquid dadpen yanu quequin chuibenembi ambi tantiactedi mëyante yanuc. 25 Ai, Nuquin Papan, Esuquidistu ambi naidbëdta chuibeneta, caidquoio nebi. Abi chuiquidquoio nebi. 26 Nuquin Papan ambi tantiampicpaden chienquicochoed nëbi aid tantiamiac Esuquidistu

tantiaquido yanec. ²⁷ Aden Nuquin Papan isadaidbo utsi-utsien abia Esuquidistu tantiameshun isadaidpembotsen chuibeneta caid isadaidbo nec. Esuquidistu tantiaquido icsho isun, Con matses yec ëbi yacno ëbëdi tabadendac, quequin Nuquin Papan aton Mayan Esuquidistu tantiaquid menec, quequin isadaidpembotsen chuibeneta caid nebi.

²⁸ Aden ëbëdtan ëbipadquidon Esuquidistu chuibeniac Esuquidistu tantiaquid yansho isash, Esuquidistu tantiec bëdamboec tabadteneta, quequin Nuquin Papan chiacpadomboen chuibenec nebi ma abi yacno chosho adquidquio Nuquin Papan yuedpanu qeshun. ²⁹ Badiadquidën-badiadquidënquien aton Mayanën nadatiambocquinn nac natiatequid icnuc ma Esuquidistu tantiadonequido mibitedi icpanu, quequin dayacquiocquinn chuibenec nebi.

2

¹ Aden dayacquiocquinn Nuquin Papa chuiquin mibitedi tantiembi. Adembidi chuibanquinn Daudiseya yacnocquido tantiembi. Adembidi utsi-utsiec yacno iccuededquido ëbi isacmaidobi Nuquin Papa chuiquin tantiembi. ²⁻³ Esuquidistu tantiadonequido ma yampanueshun dayacquiocquinn chuibenec nebi. Abentsëc yacimboec tantiananquidquio ma yampanueshun dayacquiocquinn chuibenec nebi. Adquidquio yanshun utsin abimbo chuisho tantias, Abimbo chuiquid nec, quequin ma bëdamboen tantiaapanuna. Adembidi, abimbo chiacimboen chuisho tantias, Icsamboen chiec, quequin ma tantiaquiopanuna. Nuquin Papan tantiamenquiochoed Esuquidistu nec, quequin tantiamequinn ambi comapenen tantiacpadomboen pausunaid ma mibitedi icpanueshun dayacquiocquinn chuibenec nebi. ⁴ Comapenen tantiaquid icquin, Utsi tantia, quequin Esuquidistupenquio chuisho ma tantienquio mibitedishun icpanu, quequin aden mibi tantiaquinn chiec nebi. ⁵ Mibëd icte bunquiequi mibi yacno nidtiapimbo yequi mibitedi tantiec tsadtenebi. Adec tsadnubi, Esuquidistu tantiaquido yanshun ënëdenquio yec iccuededquinn aiduidtsëqui tantiadonec, quequin mibi yacnoësh choquidon chuisho tantias bëdambo iquebi.

Esuquidistu tantiaquid iquec utsin chiacpaden naic abuc nidendabi, quequin tantienda.

⁶ Adechidi Esuquidistu tantiaquid yec abëd icquido iquec, Aidi con Icho nec, quec ambi chiacpadquiec tabadteneta. ⁷ Adec tabadquinn cuëte tapun uguëduccuicquidën cuëte uidënash canidoacimboen Esuquidistu tantiaquid icquinn tantiadonequiota. Aden Esuquidistu chuiquin ëbipadquidon mibitedi chuipondash. Aid tantiadonequid icquinn, Mibi tantiaquiec bëdambo iquebi, quequin baded-badedquien Esuquidistu chuidoneta. ⁸ Adembidi aid tantiadonequid icquinn aid tantiesan ëndenquio ambembi chiec onquiampicpaden nëbi icquidën adomboembidi chuisho Nuquin Papan chiacpadomboen chiesa nec, quequin tantiaquiota.

⁹ Matsesash Nuquin Papapadquidquibidi Esuquidistu icpanëdash. ¹⁰ Esuquidistubëd icquid icsho Nuquin Papan mibi adembidi abipadquid icmebanec. Mayan chuiquidtedi chuiquidbidi mibëd icquid Esuquidistu nec. ¹¹ Aidën, Èbëd icquid nec, quequin mimbi tantiaid icsa cuëte cuidi pateshuniacimboen mibi ëmebanec. Chështen tiacimboen nainquiocquinn bëdamboen tantiamequinn aton Mayanën mibi icsaid ëmendac. ¹² Adembidi Esuquidistu unësascho chococacimboecnuc abi tantiaquid paucnu quiacimboen acten mibitedi mentobanondash. Adembidi Nuquin Papan Esuquidistu uincumenëdachimboecnuc icsaisa icmenu, quequin acten mentotanquinn mibitedi cadobampondash.

13 Ènden Nuquin Papan matsespenquo icquin mimbi tantiaid icsa icnuc unèsacimboec icquin Nuquin Papan ènden, Naden nata, quequin chiaid tantienquiocquin niacquido mibitedi iccondac. Adquid icboedi Esuquidistu tantiaquid icsho isash, Con madobèd icquido nec, quec Nuquin Papa nauqui icsaidtedi bèpiscudac. 14 Ènden, Matses icsaid bèpiscudnu, quenquiocquin, èmbi naden nata quequin chiaid niacquid comapenen cuidnu, quequin Nuquin Papan dada uampid iquec, quequin Esuquidistun icsainquiocquin ambi chiaidtedi nabampanèdash. Adquid icshobi icsaquidbimboecnuc matsesèn unès uaquin cuesten dectanac matses icsaidtedi bedshunash abibi cuidadec unèsapanèdash. Aid unèsò isun, Matses icsaid cuidosh, quequin abi tantiaquidquìo icsaid ambi naden nata quequin dada uamiaid ucacimboen tantiec bèpiscudtenec Nuquin Papa. 15 Esuquidistuidi Nuquin Papan naden nata quequin chiaid niaquesa yec matses icsaid bedshunash abided cuidadec unèsash uincuenquìn Nuquin Papan chiaid niacquido mayan icsabo dèniaquec Esuquidistu abitedi chuiquid yampanèdash. Aden dèniacshun, Nèidtedi èbi tantiaquido chuiquid ictiapimbo iquec, quequin bedshun mètaneshun buanacimboen Nuquin Papa Esuquidistun ismepanèdash.

16 Aden chuiquid utsitedi dèniacquid Esuquidistu nec, quequin tantias, Nadquid peshun nadquid utsi acsho Nuquin Papan èbi bèdamboen isec, quenda. Adembidi, Nèid ushèmbi abi tantiec iccuededsho isun Nuquin Papan èbi bèdamboen isec, quenda. Adembidi, ushè chuca choaid usudsho isec cuèdèsho Nuquin Papan èbi bèdamboen isendac, quequin tantienda. Esuquidistuidi tantiaquidquìo icsho Nuquin Papan èbi bèdamboen isec, quequin tantia. 17 Matses icsaquid yec ambi naidènquo abembi bèdantiapimbo iquec, quequin tantiamenuequin Nuquin Papan ambi, Naden nata, quequin chiaid Moises menepampic. Èmbi bèdamboen isaidquìo matses bèdambo icmequid choendac, quequin tantiaquin ambi naden nata quequin chiaidba Moises menepampic. 18 Esuquidistun bèdambo icmiaid nebi, qeshun utsi icsamboen chiec onqesho tantienda. Ambibi chiec onqesho tantias, Esuquidistu tantesa uaindac. Adquidbèd Esuquidistu ictiapimbo iquendac. Adquidèn, Mibi chuiquidpenquo nebi, qeshumbic ambia tantiaquidbimboecquin ambi tantiaid Nuquin Papan uaid mayan bèda mibi tantiamenuequin chuibancho tantienquiocquin nadota. ¿Tsuntsin mibi adquid icmepash? cata. Aden chiaquien, Ushquin adquid isombique. Chuinu. Tanta, quequin ambembi chiec onqesho tantienda. 19 Adquidèn Esuquidistu abi tantiaquidon icombo nec, quequin tantienquo iquec. Adecbidi Nuquin Papan tantiaquidquìe Esuquidistu tantiaquid dadpen yanash aton utsibobèd tantiananec nashunanec aton icbopadquid yanec, quequin tantiesa adquid nendac.

20 Tantanu. Èbi chui. ¿Atotsi quish Esuquidistu tantiaquid yanash èbi icsaid cuidnuec Esuquidistudèd unèsash uincuenacimboec bèdamboec tabadebi, qeshumbic, 21 Nèid bedtemaid nec. Aid bedsho mayanèn mibi cuidendac, quequin utsi chuisho mimbi tantiape? Adembidi ¿atotsieshun mimbi tantiaid icsa unèsacsho chococabi yacimboen, Nèid petemaid nec. Aid pesho mibi cuidendac, qesho mimbi tantiape? Aden Esuquidistu tantienquo icquidèmbimboen, Nèid mishtemaid nec. Aid misho mibi cuidendac, qesho mimbi tantiapec. 22 Nadquid petemaid nec. Nadquid mishtemaid nec, quequin matsesèn ambibi chuiquin tantiamete nec. Ambibi petemaidbèdi ambi mishtemaid ènèdendac. 23 Matsesèn bèdamboen tantiacimboen chiaid aidtedi nec. Nèid èmbi tantiaid nec, qeshun aid bèdamboen ismenuen naden nanuna, quequin matsesèn chiec. Aden ambibi tantias, Naden nata, quequin mibi chuitiapimbo iquebi, qeshumbic namenuquin comapenen adquidèn chuibanec. Adecbidi, Damèyamèdsho èmbi

tantiaidën ëbi bēdamboen istsiash, quequin ambibi tantiash damēyamēdec. Adec damēyamē-dashic abi bunaiduidi tantiaquin ambi inacmaid dadan isuidtiapimbo iquec. Adecbidi abi inesa chidon isuidtiapimbo iquec.

3

Bēdamboec tabadaid chiaid

¹ Esuquidistu tantiaquid yec abia uincuemenēdac abuc nidash Nuquin Papa yacno icsate bunquid nibēdacno tabadacpadquiec tabadteneta. Adec tabadec, Nuquin Papan dayunquio Esuquidistu tsadec bēdambo iquec, quequin abēd icte bunquin Esuquidistu tantiadonec tabadta. ² Abuc abēdi ëbi icnuc aton na con na iquendac, quequin tantiaquin nidaidēnshun bednu, quequinuidi tantienda. ³ Esuquidistu unēsaid tantiaquin aidbēdtabi mibi icsaid chococashunacimboec icsatiapimbo yec nidaidën tabadta. Adecbidi Esuquidistu uincuenash abuc Nuquin Papa yacno nidash, Ëbi tantiaquidtedi bēdaidquio iquec. Aido ëbi cudasaidquio nec, quequin aidën dayun uaid nuqui nec. ⁴ Aidën padpidec choshon abi yacno buanac abipadquidquio bēdaidquio nuqui iquendac.

⁵ Adec abi yacnoësh abēdi bēdaidquio iquendabi, quequin mibi icsaidtedi cuesun secacimboen ëmbanta. Ëmbi inacmaid chudnu, quenquiocquin ënta dadan. Adembidi, Ëbi inesa chudmenu, quenquiocquin ënta chidon. Adembidi, Chudnu, quequinuidi tantiaid ënta dadan. Adembidi, Chudmenu, quequinuidi tantiaid ënta chidon. Adembidi mibi bunaid icsatedi ënta. Adembidi aton na daēdpactsēc icquidēmba ma bednu, quenquiocquin, Ëmbia bednu, quequin tantiaid ënta. Aden ënshun, aton na daēdpactsēc icquidēmba ma bednu, quequin tantiaquin abia bedmeta. Bednu, quequinuidi tantiad Nuquin Papan uaidbimboecnuc matsesën ambibi nacenaid tantiacimboecquid mibi bedte bunaid nendac. Mibi bunaiduidi tantiaquin mimbi Nuquin Papa tantiatiapimbo iquec. ⁶ Abi bunaid icsabēdta ambi tantiaid icsa ënesa icsho matsesën naid chuibante ushë choan adquidtedi Nuquin Papan comapenen cuidendac. ⁷ Adquid icboedi ⁸ nēbi adenquiocquin ënash bēdamboec tabadteneta. Adecbidi comapenec nēishboedi adenda. Adecbidi, cuesantiadquio yec nēishboedi adenda. Adembidi, utsi icsambo icmeboedēmbi adoenda. Adecbidi, utsi icsamboen chuiboedi adoenda. Adecbidi, tsienbēdta shui chedo chiec icsamboen tantiec onqueboedi adenda. ⁹ Adecbidi, mua uanamboedi ënēdta. Adquid icboedēmbi icsactsēcquid niacimboen mibi icsaid ënta. ¹⁰ Min tantiate chuca uacimbocnuc abi tantiadonequidquio icnuequin mibi tantiamequid tantiadedit. ¹¹ Adquid Nuquin Papan icmiac Esuquidistu tantiaquid utsibo naden mimbi tantienquio iquendac. Nēid isadaidbo nec. Nēidic isadaidpembu nec, quequin tantiesa mibi iquendac. Adecbidi, nēid shui dēbid dētemequid nec. Nēid shui dēbid dētemesa nec, quequin tantiesa mibi neoaic. Adecbidi, Nēid chotac nec. Nēidic mayu nec, quequin tantiesa mibi neoaic. Adecbidi, Nēid yua nec. Nēidic yuaquid nec, quequin tantiesa mibi neoaic. Adquid Esuquidistu tantiaquid icnuc abēd icquid aton matses nec. Abi tantiaquidtedi chuiquid dapa abentsēcquiobi Esuquidistu nec.

¹² Aden Nuquin Papan cuēnaido yec ambi bēdamboequid icmebanaidobi abi cudasaido yec ambi tantiamiaid nebi, quiaish bēdamboequid isadacimboec nadec tabadteneta. Utsibo natiamiaid icsho isun bēdambo icmenuequin nashumbanta. Adecbidi, Mimbia bedan bedembi, comaqid icta. Adecbidi, Mibia nashunu, quequid icta. Utsi icsaid ëmenuec comapenec chushquenquiocquin bēdamboen chuiban. Tantesa uasho isun ismeded-ismededta.

¹³ Mimbi nacpadomboen utsibon natiapimbocsho isun, Padi, quenquiocquin abi tantiamaban. Adecbidi utsin mibi icsamboen nasho isash cuidnannenquo yec bēpiscudta. Nuquin Papa ēbi icsaid cuidenquo yec bēpiscudosh, quec adta. ¹⁴ Adecec tabadtenec tantiananta. Adece tantiananec Esuquidistubēd abentsēc yacbimboec icsaisa mibitedi yanendac.

¹⁵ Adece Esuquidistubēd abentsēc yacbimboecnuc icmiaid nebi, quequin tantiec bēdamboec tabadtenenu, quec mibitedi tabadteneta. Adece tabadtenequin, Mibi bēdambo iquec, Papa, quequin chuideneta. ¹⁶ Nuquin Papan Esuquidistu tantiadonemiaido icta. Adquido yec abi tantiaquid utsibobēd Esuquidistu chuinanec, Bēdamboec tabadta, quec adquiecbidi tabadec ismenanta. Aden naic chuiquid dapa Dabidēn dada uampid sadmo caidbēdta cuēdēnte utsi Nuquin Papan mibi bēdambo icmiaidbēdtabi ambi naid utsi chiech cuēdēncuedeta. ¹⁷ Adece tabadquin Esuquidistu tantiaquid nebi, quequin Esuquidistun chiacpadomboen nabanta. Adecbidi, ambi chiaiduidi chiech tabadteneta. Adece tabadquin, Esuquidistun tantiamiaid yec bēdambo iquebi, Papa, quequin Nuquin Papa chuideneta.

Aton shubun icquidbēd tabadaid

¹⁸ Bēdamboec tabadnu, qeshun nadota. Chidon min bēnēn chiacpadomboen nabanta. Esuquidistu tantiaquid icquin adobanta.

¹⁹ Chido inquidēn, Con bēnēbēd tabadec bēdambo iquebi, camenuen yuacbimboecquin aid chuiquin min chido namenda. Mibibi tantiadquinuidi min chido namenda.

²⁰ Bacuēbon, Esuquidistu tantiaquid icquin papan chiacpadomboen cacuidenquiocquin nabanta. Adembidi, titan chiacpadomboen nabanoata. Adosho isashien, Cuishon. Bēdambo iquebi, quependac Nuquin Papa.

²¹ Anibēdtan min bacuēbo namenuc comapenen cuēdquin chieshmda.

²² Yuan mibi yuaquidēn chiacpadomboen nabanta. Aidēn aden chuishun isnuc adobanta. Aden chuishun min ichon isenquiocnoc adomboembidi nabanta. Aden nabansho mibi bēdamboen isendac. Nuquin Icho, Esuquidistu tantiaquid nebi, qeshun adobanta. ²³ Con Icho Esuquidistu nashunu, quiacbimboen mibi yuaquidēn chiacpadomboen chieshenquiocquin bēdamboen nabanta. ²⁴ Con Icho Esuquidistun abi yacno ēbi nidacsho isun ēmbi bēdamboen nabanaid cuidquin ambi ismiambo yaid menendabi, quequin tantiaquin adobanta. Nidaidēnshun abi nashunquid mibi neque. Adobanta. ²⁵ Min ichon chiacpadomboen nata. Abi chieshēnquid ichon cuidendac. Adembidi Nuquin Papan Esuquidistu tantiaquid nebi, qesho abi chieshēnesa mēnequin bēdamboen cuidendac. Abi chieshēnquid menenquiocquin comapenen cuidendac. Adenuidi tantiaquin cuidendac.

4

¹ Yuanquidēn, mimbi yuaido ambi nabanacpaden bēdamboen menebanta. Abuc con Icbombo iquec, quequin tantiaquin mimbi yuaido bēdamboen menebanta.

Chuibanaid utsi

² Esuquidistu tantiaquid utsibo natiatequidbēd abi icsaid iquec, quequin tantiec baded-badedquiech Nuquin Papa chiech onquedeneta. Aden chiech onquequin, Mimbi ēbi tantiaquin nabanaid tantiec bēdambo iquebi, Papa, quequin Nuquin Papa chuideneta. ³ Adecbidi ēbipadquid utsibobēdta ēbi tantiec Nuquin Papa chiech onqueta. Mimbi chienquiocnēdaid Esuquidistu tantiate bunquid dadpen ma icpanuna, Papa, quequin Nuquin Papa chuideneta. Esuquidistun, Ēbi chuibeneta, cac aid chuibenesho

bedshun mētaniaid nebi. ⁴ Pabado utsin onqueten onquesho cuembo chuime, Papa, ma aidontsen tantiapanu, quequin Nuquin Papa chuideneta. ⁵ Esuquidistu tantiesan ëbi tabadaid istenec, quequin tantiec bēdamboec tabadteneta. Adec tabadquin Esuquidistu tantiesatsen tantiamenuquin Esuquidistu chuideneta. ⁶ ¿Mitsicquid mimbi tantiaid ipcec? quetsiash tantiesa. Adsho tantiashun mibi onquaidbēd sa batambo iquec daēdacimboecnuc Esuquidistu mimbi tantiaid utsibo chuita ma aidon tantiapanu qeshun.

Abēd icquid chuibanaid

⁷ Nēbi ëbēd icquid utsi-utsien chuibanu. Tantiata. Mibi yacno nidshun Tiquicon ëbi tabadaid mibitedi chiendac. Aid Esuquidistu tantiaquidquo icsho ëmbi con utsi caid nec. Aidi Nuquin Icho nashunquid neoaic. ⁸ Ëbēd icquid utsibo naic tabadaid mibitedi tantiamenuquin aidi mibi yacno nidmembi. Adoac mibi yacno nidash puduedshun ëbi naic tabadaidbēdtabi Nuquin Papan chiaid chuibanac mibitedi ëbi tantiec unēsquicoeboedi cuishon queta. ⁹ Onesimobēd Tiquico mibi yacno nidec. Onesimo nuqui con utsi caidbidi nec. Onesimo mibi yacnoshon tishaid nec. Aidi chieshenquicquin ëbi nashunquid nec. Aid daēdshun ëbēd icquidon nabamboed mibitedi chuibanendac.

¹⁰ Nēbi mibi yacno nidesa chuinu. Tantiata. Adistadico ëbēd icnuec abembi quēnēn nauedadondaid nec. Aidëmbi, Codosas yacnocquido tantiec tsadebi, quequin chuisho tantiashun dada uaimbi. Adomboembidi Madcosēn chiec. Madcos Bednaben utsi nec. Aidi yuecash mibi yacno nidtsiash. Ambo chosho isun yuedta. ¹¹ Esus cashumbic Ustus caidēn, Codosas yacnocquido tantiec tsadebi, quequin chiacpadomboen dada uaimbi. Adistadico yec Madcos yec Ustus yec quec aidtedtsēqui isadaidbo nec. Aidon ëbēdtambi Esuquidistu chuibanquin ëbi bēdambo icmequido neoaic. ¹² Epapadas mibi yacnoshon tishaid Esuquidistu chuibanquidquo nec. Aidëmbidi, Codosas yacnocquido con utsibo tantiec tsadebi, quequin chiacpadomboen dada uaimbi. Icsamenuquid icnuc mibi bunacpaden tantiadonemequin mimbi Codosas yacnocquido abi tabadme, Papa, quec badiadquidēnbadiadquidēnquiec Nuquin Papa chiec onquec Epapadas. ¹³ Aidi mibi Codosas yacnocquido yec Daudiseya yacnocquido yec Yedapodis yacnocquido yec quequin tantiec chieshenquo yec Esuquidistu tantiadonequidombo ma icpanu quiash mibitedi chiec onquedenec. ¹⁴ Adembidi Ducasēn dauēchoquidēn Demasbēdtan, Codosas yacnocquido tantiec tabadebi, quequin chiacpadomboen dada uaimbi.

¹⁵ Codosas yacnocquidon nēid ëmbi dada uaid mibitedishun isun, Pabado mibitedi tantiec tsadec, quequin utsibo chuita. Adomboembidi Daudiseya yacnocquido chuioata. Adomboembidi chido Nimpas cuēmēdquidēn shubun Esuquidistu tantiec iccuededquido chuioata. ¹⁶ Adembidi, nēid ëmbi dada uaid isec onquequin mibēd iccuededquido tantiameshun Daudiseya yacno iccuededquido tsusiobo menequin, Nēid Pabadoen dada uaid isec onquequin mibēd iccuededquido tantiamēoa, quequin chui. Adembidi ëmbi Daudiseya yacnocquido tantiaquin dada uaid bedshunshun isec onqueshun mibēd iccuededquido tantiamēoa.

¹⁷ Adembidi Adquipo naden chuita. Nuquin Icbon Esuquidistun chiacpadomboen naimbudta, quequin chuita.

¹⁸ Mibitedi tantiaquin ëmbi nēid dada uaombique. Ëbi tantiec nidtipimbo yec Pabado quēnēn tsadeque. Aid puduemeta, Papa, quequin Nuquin Papa chiec onquedeneta. Nuquin Papan ma mibitedi bēdamboen ispanu, quec tsadebi.

Padi. Aidtedi dada uaombi.

TESADONICA YACNOCQUIDON ISTE 1

Pabadon tauamboen chiaid

¹ Pabado nebi. Shubu dadpen icquid Tesadonica caid yacnocquido Nuquin Papabēdta Nuquin Icho Esus tantiaquido mibi chuiquin dada uaic nebi. — Nuquin Papan Esuquidistubēdtan bēdamboen isquin bēdambo icmepashun —caimbi mibi. Ēbēd icquin Sidbano caidbēdtan Timoteyontsen: —Nuquin Papan adopashun —quequimbidi mibi tantiec. Sidbanobi Sidas caid nec.

Tesadonica yacnocquidon Esus tantiaid

² Naden mibi Nuquin Papa chianembi. —Tesadonica yacnocquido bēdamboen namequid yec mibi bēdamboshē iquec, Papa. ³ “Aidon Esus tantiaquin ambi chiapadomboen matses tantiaquin nashumbanosh. ‘Abi yacno abi tantiaquido buanuec Nuquin Icho Esuquidistu padpidec choec,’ quequin chieshtoenquo icquin Esusēn naid chuibanosh,” quetuidposh Timoteyo. Ma adembi aidon napanuna, Papa —quequin mibi Nuquin Papa chianembi. ⁴ Con utsibobimboecquido mibi neque. Tantia. Mibitedi chuinu. Mibi tantiaquin ambi tantiacpadomboen Nuquin Papan mibi Esus tantiamenēdash naden. ⁵ Ambembi chiaid chienquo icquin Esusēn naid mibi chuibanondambi. Aden chuibanac Nuquin Papan Mayanēn tantiamiacpadomboen: —Abimbo caic —qeshun mimbi Esus tantiabonondac. Adem-bidi Esus tantiamenuec Sidbanochedobēd bēdamboec ēbi tabadsho isun: — Adquid abimbo chuiquid nendac —quequin mimbi ēmbi chuisho tantiondac. ⁶ Aden Nuquin Papan Esus tantiamiaido yec ēbi Nuquin Icho yacpadec chieshtoenquo icsho isash mibitsen chieshtoenquo iccondac. Ēmbi Nuquin Papan chiaid chuibanac Nuquin Papan Mayanēn namiacpadec cuishon-quequin mimbi Esus tantiondac utsibon: —Padi. Chēn —quequin comape-nen chieshēnquionobi. ⁷ Adec mibi bēdamboec tabadaid chuisho tantia-sh min nidaidēn icquido Masedonia yacnocquido Esus tantiaquido mibi yac-padquiec tabadtiadquo icpac caosh. Adem-bidi tantia-sh nēid nidaid Acaya caid yacno tabadquidotsen adtiadquo icpac caosh. ⁸ ¿Anocquidonuidida mibi Esus tantiec bēdamboec tabadaid tantiapash? Padenquo. Mimbi chieshtoen-quo icquin Esusēn naid chuibanac nidaid utsi-utsiec yacno tabadquidon tantiac caosh. Adashic aido mibi caic: —Nuquin Papa tantiaquidombo nec —quecuededac caosh. Aden mimbi naid chuisho tantia-shun: —Tantia-sh —qeshun nēmo icquido mimbi naid chienquo iccombi. ⁹ Mimbi naid naden chuisho tantiombi. —Pabado chedon Esus chuibansho tantia-sh: “Nuquin Papapadquid utsi nibēdec,” qeshun Nuquin Papabēdta Esus tantiabēnac caosh. Adshun ambi papa quequin nacnenaid aidon tantienquo yanac caosh. Aden Nuquin Papan chiapadomboen natiadquo yanac caosh — quequin chioshi. ¹⁰ Adashic: —Adquid yec Nuquin Papa yacnuēsh aton mado Esus nidaidēn padpidec chosho istiadquo iquec. “Ēbi cuidmenquo icnuec abided cuidadec unēsacsho Nuquin Papan uñcuemiaid Esus choec,” qeshun aid istiadquo iquec —quequin mimbi naid chioshi.

2

Pabadon bēdamboen chuibanondaid

¹ Mibi yacnoshon tauamboen ēmbi chuibanac Esus tantiaquid yanshun mibitsen utsibo Esus chuibanondac. ² Shubu dadpen icquid Pidipos caid yacnoshon quēnēn nauedac ēbi mēyadec tsadboedi puduemeshun nidmiac

mibi yacno nidshun Esusën naid mibi chuibanondambi. Utsibo dadpeshun chieshënubi Nuquin Papan namiacpadomboen cuesambo icquin mibi Esus chuibanondambi. ³ ¿Ëmbi naidquio namenuendambi adodionda? Padenquio. ¿Ëbi tantiamenuendambi chuibandionda? Mambi padenquio iccondac. ¿Ambembi chiaidtambi mibi chuibandionda? ⁴ Mambi mibi abimbo chuibampondac. Matsesën naidtedi tantiaquidënquio Nuquin Papan: —Aidën abimbo chuibantsiashe. Con Mado Esusën naid chuibenequid icmenu —caidquio nebi. Adquid yec matses: —Mibi bédambo iquec —cameteuidi bunenquio iquebi. Nuquin Papa: —Mibi bédambo iquec —camenuembimbi ambi chiacpadomboen naic. ⁵ Ëmbi tantiacpadomboen mibi namenuc: —Mibi bédambo iquec —quenquio iccondabi. Min piucquid bednuen muaquin chiambo iccondabi. Nuquin Papan isnubi abimbo chiondambi. ⁶ ¿—Pabado bédambo iquec —matses camenuendambi chuibandionda? Mibi adometiapimbo icquin utsibotsen adometiapimbo iccondabi. Esusën naid tantiamenuembimbi bédamboen chuibanondac.

⁷ —Ëbi chuibeneta —Esuquidistun caidquio nebi. Adoaid icquin tsusio dapan chiacbimboen: —Nata —quequin ¿ancabudquindambi mibi chuibandionda? Mambi padenquio iccondac. Anin bacuë nëishmenquio icquin bédamboen namiacbimboembimbi nëishmenquio icquin mibi chuibanondac. ⁸ Mibi tantiaquioquin chieshtoenquio icquin Esusën naid chuibanec yec mibéd tabadondabi. Aden naic tabadec bédambo iccondabi. ⁹ ¿Ada tantie, con utsibo? Aden Esusën naid chuibanquin nidaidën capuquid yua bitsibi tuscaquin shubumpi nacnendeniondambi. Mibi caic: —Ëbi menianiac aton piucquid naimédnushé —quiash con piucquid bednuec chonoadteniondabi. Mimbidi isnubi adondabi.

¹⁰ Mibéd yec Nuquin Papan chiaid niaquenquio yec bédamboec tabadondabi. Utsibo: —Pabado chedo icsambo icquido nec —quetiapimbo icnuc aduidequi tabadondabi. Adshobini mimbi ispondac. Adembidi Nuquin Papan ispanédashi. ¹¹ Amën aton mado: —Naden na —quequin nëishmenquio icquin chiacbimboen mibi abentse-abentsen bédamboen chuibanquin ¹² mibi bédambo icmepondambi. —Nuquin Papan: “Icsatiapimbo icquid icmequin ëbèdi tabadmendambi,” quequin Esus tantiamiaido mibi nec. Adquid Nuquin Papan chiacpadec bédamboec tabadquid neque. Ambi chiaid niaquenquio yec bédamboec tabadnuna —mibitedi cadeniondambi.

¹³ Aden Nuquin Papan chiaidquio chuibanac: —¿Ambembida chuidiosh? Nuquin Papan chiaidquio ma Pabado chuibo —mibi quianondac. Aden Nuquin Papan chiaidquio tantiash Esus tantiaquido yanash aidquibidi chuisho tantiash mibi bédambo yanec. Mibi adaid tantiaquin Nuquin Papa chianembi naden. —Tesadonica yacnocquido aden bédamboen tabadmequid yec mibi bédamboshë iquec, Papa —quequin Nuquin Papa chianembi. ¹⁴ Nidaid Udeya caid yacnocquido yacpadquiec chieshtoenquio icquin mimbi Esus tantiec. Udeya yacnoshon Esus tantiaquido aton matses isadaidbon cuestiadquio icquin chieshënac chieshtoenquio iccondash. Adomboembidi aid matses mibi yacno tabadquin chieshënac mibi chieshtoenquio iccondac. ¹⁵ Isadaidbombidi Nuquin Papan chiaid chuibanquido cuesun secapampic. Adembidi Nuquin Icho Esus unës uapac caondash. Adomboembidi chieshënquin mibi yacnoshon cuemepondashi. Aden Nuquin Papa chieshënquinc matses abitedi chieshënquinc caquin ¹⁶ isadaidbon matses utsi isadaidpembo ëbi chuimetiapimbo icpondash. —Esus tantiasho Nuquin Papan bédamboen isquin mibi cuidenquio iquendac —quequin ëmbi chuisho: —Padi. Aid chienda. Cueschitomane —capondashi. Aden ambi chiaid ënenquio icquin niac-niacsho Nuquin Papan aido cuidquindac.

Pabado istante bunaid

¹⁷ ¿Mibi yacnoshon aden chieshēmēnquidon cuemiac mibi tantienquiodambi ictionda? Mibi unēsquo icnuc mibi istantiadquo iccondabi. ¹⁸ Adec: —Padpiden istanu —quesho Satanasēn nac padenquo iccondabi. Padpidec: —Nidnu —quesho adembidi. Padpidec: —Nidnu —quesho Satanasēn nacbidi padenquo iccondabi. Nēbi adecbidi mibi istantiadquo iquebi. ¹⁹ Nuquin Icbo Esuquidistu choan aibdēd tabadquin ¿tsutsimbi ispatsia? ¿Tsutsi isashini cuishonquepatsia? ¿Tsutsi isumbimbi: —Is. Ēmbi chuibanac Esus tantiabenondaido neque —capatsia? Mibibimbi caic. ²⁰ —Esus tantiec bēdamboec tabadosh —quesho tantiash mibi tantiec cuishonquebi. Adembidi mimbi naid isun: —Mimbi bēdamboen naondac. Mimbi chuibanac ēbi tantiabenondash —ēbi caindac Nuquin Ichon.

3

Istan, quequin Timoteyo chiaid

¹ Aden mibi tantiec: —“¿Mitsipadec tabadpec?” quequinuidtsēqui tantiec tsadiapimbo iquebique. Istan —caondambi Timoteyo chuiquin. Adshumbic shubu dadpen icquid Atenas caid yacno tabadec ēbēd icquid utsi Sidbano chuiquin: —Timoteyo nidan nuquiuuidtsēqui icnuna —caondambi. ² Ēmbi: —Nid —caondaid Timoteyo Esus tantiaquid yec nuquin utsi nec. Ēbēd tan Esus chuibenequidquo nec. Adquid icsho nadopondambi. —Tesadonica yacno nidshun Ēsus bēdamboen chuibantan. Adembidi: “Esus tantiec chieshtoenquo yec nadquiec tabadquid nendac,” quequin bēdamboec tabadquin ismetan, Timoteyo. ³ Aton matsesēn comapenen chieshēnac chieshtoshon Esus tantienquo yanushe. Chuitan —caondambi. Aden chieshēnte mibi chiondambi. —Nuquin Papan tantiacpadomboen Esus tantiaquid chieshēnendac —quequin mibi chiondambi. ⁴ Aden mibēd icquin chuide-niondambi. Adsho ēmbi chiapadomboen nuqui chieshēnondash. ⁵ —“Ēbi nidan chieshēnac ¿adecbidida Tesadonica yacnocquido chieshtoenquo icpatsiashba?” quequinuidtsēqui tantiec tsadiapimbo iquebique. Istan —caondambi Timoteyo chuiquin. —“Icsamequin tanu,” quequidēn Satanasēn namiac chieshtoshon Esus tantienquo yanushe. Istan. ¿Ada ēmbi Esus chuibanondaido bēdamboec tabadeque? —caondambi Timoteyo chuiquin.

Timoteyon chuituidaid

⁶ Adoac mibi yacno istanec choquin Timoteyon mimbi naid chuituidoshi naden. —Esus tantiaquid yequi tantianquidquo yamposh —quequin chuiposh Timoteyon. Adashic: —“Pabado chedo bēdambo iccondash. Aido padpiden istiadquo iquebi,” quiosh Tesadonica yacnocquido —queposh Timoteyo. Adembidi mibi istantiadquo iquebi. ⁷ Timoteyon chuiboed tantiash bēdambo yanobi. Nēmo icquidon chieshēnac shubiantiadtsēquico iccobi. Adboedi mibi caic: —Chieshtoenquo icquin Esus tantiosh —quesho tantiash bēdambo yanobi. ⁸ Mimbi aden naid tantiash dayacquio yacnimboec iquebi. ⁹ Aden tantiashun Nuquin Papa chianembi naden. —“Tesadonica yacnocquido bēdambo iccosh,” quesho tantiash cuishonquebi, Papa. Mimbiuidtsēqui namiac chieshtoenquo iquec. Aden namec mibi bēdamboshē iquec, Papa. ¹⁰ Aido istiadquo iquebi. Mimbi chiaid bēdiactsēc tantiasho aidobēd tabadquin bēdamboen chuibantsiambique. Ēbi ano nidmeta, Papa —quequin Nuquin Papa chianembi.

11—Nuquin Icho Esusbëdtan Nuquin Papan nëbimbobi ambo nidmepashuni —caimbi. 12 Adec mibëd ictiadquo icquin Nuquin Papa mibi chianembi. —Èmbi aido tantiaquiacpadomboen utsibobëd tantianameta, Papa. Bëdiactsëc tantianantsëcboedobi comapenec tantianamequiota, Papa. Adembidi utsibotsen bëdamboen ismeta. 13 Aden bëdamboec tabadquid icmeta, Papa. Mimbibi adoac chieshtoenuquo yec bëdamboec tabadtsiash. Adsho mimbibi mibi yacnoshon uaido mayan bëdadobëd nidaidën padpidec choshon con Icho Esusën: “Tesadonica yacnocquido icsambo iquec,” catiapimbo ictsiash. Adembidi: “Icsambo iqueque. Cuidnuna,” catiapimbo mimbibi ictsiac, Papa —quequin Nuquin Papa chianembi mibi chuiquin.

4

Chidobëd bëdamboec tabadte chiaid

1 Tanta, con utsibo. Chiaid utsitsen mibi chuinu. —“Bëdambo mibi iquec,” Nuquin Papa camenuec bëdamboec tabadta —quequin èmbi chiondacadquieci tabadta. Nuquin Icho Esus tantiaquieci adta. —Bëdamboec tabadosh —quesho tantiashun: —Adquiequi tabadta —caimbi mibi. 2 Nuquin Icho Esusën namiac aidën chiaidquo mibi chuibanondambique. Aid tantiaquieci bëdamboec tabadta. 3 Nuquin Papan tantiamiacpadquieci tabadquidën nadoquid yendac. Utsin chido chudenuquo icquin aton chidouidtsëqui chudquid yendac. Adembidi chidon dada utsi chudmenquo icquin aton bënëuidtsëqui chudmequid yendac. 4 Adec Nuquin Papan chiaid niaquenuquo yec abi bunaid mëmunec dada ambi inaidquo aton chidouidtsëqui chudec aibëd bëdamboec tabadsho: —Bëdambo iquec —catsiash Nuquin Papan. 5 Nuquin Papa tantiesabimboec tabadenda. Esus tantiesambien comapenec tsien bunquin aton chidopenquo chudendac. Adembidi Nuquin Papa tantiesa icquin chidon utsin shui bunquin aton bënëpenquo chudmendac. Adec tabadenda. 6 Bënë nidan aton chido abentsëqui uequid istuidshun chudenda. Adoquid Nuquin Papan cuidendac èmbi chiondacadomboen. 7 —Opabimboec chudnanec ma icsamboec tabadnu —quequinda Nuquin Papan Esus tantiaquido nuqui icmediac? Padenquo. —Ma bëdamboec tabadnu —quequimbien Esus tantiaquido nuqui icmiaque. Bëdamboec tabadnuna. 8 Aden chuiquin aton Mayan nuqui menequidën Nuquin Papan chiaid chieci nebi. Aden èmbi chuiboed niacquin Nuquin Papan chiaidquo mimbibi niactsiac.

Adecbidi tantiananquiota, quequin chiaid

9 —Bëdamboec tantiananta —quequin padpiden chienquo iquembi. Nuquin Papan tantiamiac Esus tantiaquido yec mibi tantiananec. 10 Min nidaid Masedonia caidën tabadquido Esus tantiaquido utsibotedi mimbibi tantieci. Mibi yacpadquiecbidi tantiananquiokin utsibotsen tantiaquiota. 11 Èmbi chiondacadquieci chieshëmënenquo yec bëdamboec tabadta. Utsi icsaiduidi chienquo yec bëdamboec tabad. Chieshenquo yec dayacquio yec chonoadta. 12 Adash bunenuquo mibi ictsiac. —Con na nacenambo iccombique. Mitsana beccho —mibi quenquo ictsiac. Mibi adquo icsho isash Esus tantiesabo: —Esus tantiaquido bëdamboec tabadec —quetsiash.

Esusën abi yacno abi tantiaquido buante chiaid

13 Tanta, con utsibo. —“Esusën abi tantiaquido uincuemendac,” quequin chuisho mimbibi tantiabi icnushe —queshun mibi bëdamboen chuinu. Esus tantiesabo: —Èmbi tantiaidquo padpidec isadenuquo iquec —quec yuecquo shubiabimboec shubienda. —Èbipadquid Esus tantiaquid Nuquin Papa

yacno istuidendambi —quec ma yuecquio shubianenquio icnueshun Esusën uincuemete mibi chuinu. ¹⁴ —Unës uaqui Esus uincuenacpadecebidi nuquit-sen uincuenendac. Esus tantiaquido unësacsho uincuemeshun Nuquin Papan abi yacno aton Mado Esus buamendac —quequin nuqui tantiec. ¹⁵ Tantia. Nuquin Icho Esusën chiaidquio mibi chuinu. Nuquin Icho Esus nidaidën padpidec chonoc aid istuidéc Esus tantiaquido unësabi icquido abia nidenquio iguendac. ¹⁶ Padenquio icnubien Nuquin Papa yacnuësh choec Nuquin Icho Esusba nua cuëdtuidendac. Adnubien Nuquin Papan abi yacnoshon uaido mayan bédabo chuiquid dapatsen nua cuëdtuidoaindac. Adnubien Nuquin Papan chiacpadomboen utsin nua shoncatuidendac. Adnubien Esusën abi tantiaquido unësaidotedi abia aton dada chuca uauin uincuemendac. ¹⁷ Adoquien aidobëdi Esus tantiaquido unësabi icquido tsidadash aidotedi abuctoendac Nuquin Papabéd tabadec nidec. Abitedi abuctoquimbi abi bëquedec Esus chosho istuidendac. Adash Esusbéd Nuquin Papa yacno nidash anobi nuqui quenenendac. ¹⁸ Èbi adsho tantiahsun nadota. Aton matses unësaid tantiec shubiquido bédambo icmenuen èmbi chuiboed chuita.

5

Esus chote chiaid

¹ Tantia, con utsibo. Mibi chuinu. —Nëidtedec ushash Esus padpidec choec —quequin chuitiapimbo iquebi. Adembidi: —Nëidted seta matamiash choec —quequin dada uatiapimbo iquebi. Tantienuio iguemi. Naden mibi chiondambi. ² —“Nëid inchëshëmbi ampequid choec,” quequin tantiatiapimbo yacimboec: “Aid ushën Nuquin Icho choec,” quequin tantiatiapimbo icnu Esus choaindac —quequin mibi chiondambi. ³ Esus tantienquio yequi matses dadpen: —Cuesnanenquio yec nuqui bédamboec tabadec —queshobien ambi: —Èbi cuidendac —cacmaidënquio padpidec choshon cuidquiendac. ¿Mitsipadquio chido bacuë usunquid icpec? —Aid ushënquio tishëmbi —quequin tantiatiapimbo yequi badedquio nëncuenec. Adecbidi ambi: —Choec —cacmaid Esus badedquio chosho abi tantiesabon cuenëntiapimbo iguendac. ⁴ ¿Esus chonoda nuqui dacuëdpe? ¿Esus tantiesaboda nuqui nedi? Esus tantiaquidoen nuqui nec. Adquid yec: —Nëbien Esus chochitec —quec bédamboec nuqui tabadnubi Esus chonoc nuqui dacuëdenquio iguendac. ⁵ ¿Pacuënëdacimboecquidoda nuqui nedi? Padenquio. Pabiate paposhquiachimboecnu Esus bédamboen tantiamiaido yec bédamboec tabadquido ma nuqui neyoc. Adecbidi bédamboec tabadnuna. ⁶ Ushquin pabiaten tantienquio yacimboen utsibon Nuquin Icho Esus tantienquio iquec. Adec tabadenquio icnuna. —Esus tantienquio icmane —queshun nuqui icsate bunaid nainquio icquin mëmununa. Nuquin Icho chosho istiadquio yec bédamboec tabadnuna. ⁷ Esus tantiesaboen inchëshën ushquin tantienquio yacimboec iquec. Adquiecbidi tantiadenuen acte paëmbo icquid acquido nec. ⁸ Adquidpenquio yec Esus tantiaquido yec bédamboec tabadnuna. Nuqui icsate bunaid nainquio icquin mëmununa. Sondado: —Shocosh tsasimbo icquid shictongneu. Sicsenushe —quiachimboec icnuna. —Satanasën Esus tantiamenquio icnushe. Esus tantiaquioquon matsetsen tantiaquionona. Adecbidi sondado: —Masenushe. Shocosh tsasimbo icquid mauete mauenu —quiachimboecbidi icnuna. Satanasën icsamboen tantiamenquio chieshtomenushe. —Esus tantiasho cuidenquio icquin Nuquin Papan abi yacno èbi tabadmendac —quequin bédamboen tantianuna. ⁹ ¿Cuidnuenda Nuquin Papan nuqui Esus tantiamediac? Padenquio. Abëdi tabadmenuen Nuquin Icho Esuquidistu nuqui tantiamiac. ¹⁰ Aidi

abi tantiaquid cuidmenquo icnuec abided ciudadec unēsac caondash. Aidēn padpīdec choshon abi tantiaquidotedi buanshun abēdi tabadmendac. Unēsaid uincuemaiodobēdta unēsabi icquidotedi adoendac. ¹¹ Ēbi adsho tantiaishun mimbi nabocpadomboembidi Esus tantiec bēdambo icnuec ěmbi chuiboed chuinanquiota. Adecbidi bēdamboec tabadec: —Adequi tabadnuna —cananta.

Bēdamboec tabadte Pabodon chiaid

¹² Esus mibi chuibanquido bēdamboen ista. —Nuquin Icbon chiacpadomboen chieshtoenquo icquin nuqui chuiquidēn nuqui bēdamboen chuibanec —quequin aido bēdamboen tantiata. Mibi nashunquidombo neque. Aidon: —Nuquin Papan chiaid niaquenquo yec bēdamboec tabadnuna —quequin chuisho bēdamboen tantiata. ¹³ —Nuquin Papan chiaid bēdamboen tantiaquidombo nec —quequin bēdamboen ista. Adec chieshēmēnenquo yec bēdamboec tabadta. ¹⁴ Mibēd icquido naden chuiban. Chieshquid icsho: —Mibitsen choaadta —cata. Dacuēdsho: —Dacuēdenda —cata. Esus bēdiactšēc tantiatsēcsho bēdamboen chuiquin Esus tantiamequiota. Dada padishquo icsho nashunta. Aden nēishenquo icquin abitedi bēdamboen ista. ¹⁵ Utsin chieshēnac cuidnanenquo yec bēdamboec tabadta. Mibēdtan Esus tantiaquidobēd bēdamboec isnanquin utsibotsen bēdamboen ista.

¹⁶ Aden Esus tantiec ēnēdenquo yec cuishonquianeta. ¹⁷ Adembidi Nuquin Papa chianequin: —Ěmbi chiacpadomboen ěbi nashunquin utsibotsen nashunta, Papa, —quequin chianeta. ¹⁸ ěMimbi chiacpadomboen Nuquin Papan nasho isunuidida mimbi: —Nuquin Papa bēdambo iquec —cape? Nadoac bēdambo ictsiash. Bēdamboec tabadquin: —Mibi bēdamboshē iquec, Papa, —cac bēdambo ictsiash. Daicsabudshumbic adembidi nac bēdambo ictsiash. Paēmbo icnubi adembidi. Mitsana icnuc adembidi. Mitsana nibēdnubi adembidi. Utsibon chieshēnaqui adembidi: —Mibi bēdamboshē iquec, Papa —cac bēdambo ictsiash. Aden Nuquin Papan: —Ma Esus tantiaquidon adono —quequin tantiacpaden mimbi natsiac. ¹⁹ Nuquin Papan Mayanēn Nuquin Papan chiaid tantiamiac pamumēdacimboc tabadenda. ²⁰ Aden Nuquin Papan Mayanēn tantiamiac utsibotsen chuisho: —Mue nec —badedquo cainda. Chuishoba tantiata. —Nuquin Papan chiaidquo chuinu —qesho mamēnshunenda. ²¹ Adenquo icquin: —ěNuquin Papan chiaidquibida chuibaneeque? Tantiabono —cata. Aden tantiaishun Nuquin Papan chiaidquo isbanta. Aden isbanquin abimbo chuisho tantiaishun: —Āi, Nuquin Papan chiaidquo chiec —qeshun aidēn chuisho bēdamboen tantiata. ²² Adembidi Nuquin Papan chiaid isbanquin icsamboen chuisho tantiaishun: —Nuquin Papan chiaidpenquo chiec —qeshun aidēn chuisho tantienda. Aidēn chiacpadomboen nainda.

²³ Mibi Nuquin Papa chianembi. —Matses bēdambo icmequid icquin mimbi chiacpadomboen aido name, Papa. Mimbi chiaidquo bēdamboen tantiamequin bēdamboen tabadme, Papa. Mimbi adoac bēdamboec tabadnuc choashun con Icbō Esusēn: “Aido bēdambo iquec,” catsiash, Papa —quequin Nuquin Papa chianembi mibi. ²⁴ Nuquin Papa nuqui Esus tantiamequid muēsambo nec. Adquid icquin ambi chiacpadomboen nuqui chieshtomenquo iqindac. ²⁵ Nuquin Papa ěbi chianeta. —Abēd icquidobēdta Pabado bēdamboen nameta, Papa —quequin Nuquin Papa chianeta. ²⁶ Ambocquid Esus tantiaquidotedi chuiquin: —Pabado chedon nuqui tantiaquiec —quequin chuiban. ²⁷ Nuquin Icbon tantiacpaden chuiquin dada uaombique. Ěmbi dada uaboed nēid isquin ambocquido Esus tantiaquidotedi

chuihan. ²⁸—Nuquin Icbo Esuquidistun bēdamboen ispashun —quequin mibi tantiemi. Padi. Aidtedi dada uaombi.

TESADONICA YACNOCQUIDON ISTE 2

Pabadon tauamboen chiaid

¹⁻² Pabado nebi. Tesadonica yacnocquido Nuquin Papabēdta Nuquin Icho Esus tantiaquido mibi chuioaquin dada uaimbi. —Nuquin Papan Esuquidistubēdtan bēdamboen isquin bēdambo icmepashun —caimbi mibi. Ēbēd icquin Sidbanobēdtan Timoteyon: —Nuquin Papan adopashun —quequimbidi mibi tantiec.

Nuquin Papan Esusbēdtan matses cuidte chiaid

³ —Esus tantiaquidēn: “Aden naic mibi bēdamboshē iquec, Papa,” quequin Nuquin Papa chianequid —quequin tantiaquin mibi Nuquin Papa chianembi naden. —“Esus bēdiactšēc tantiatsēchoedombi nēbi Esus tantiabededosh,” quiosh, Papa. “Adecbidi bēdiactšēc tantianamboedi nēbi comapenec tantiananosh,” quiosh. Aden aido bēdambo icmec mibi bēdamboshē iquec, Papa —quequin chianembi mibi. ⁴ Mimbi aden bēdamboen naid Esus tantiaquido utsibo chuibeniombi. —Dadpeshun chieshēnaqui chieshtoenuio icquin Tesadonica yacnocquidon Esus tantiec —quequin shubu utsin shubu utsinquien chuibeniombi.

⁵ Adec chieshtoenuio icquid icquin nuqui naden tantiec. —Ēbi chieshtomenquo icquid abitedishun naid tantiaquidquo nec. Adquid icquin icsambo icquido cuidquin bēdambo icquido Nuquin Papan bēdamboen isec —quequin nuqui tantiec. Adec chieshtoenuio icquin Esus tantiaho Nuquin Papan: —Adquido ěmbi namiacnombo chomeshun ěbēdi tabadmendambi —nuqui caindac. ⁶ Nuqui chieshēnquidon naidtsen tantiaquid icquin Nuquin Papan aido cuidendac. ⁷ Aden nuqui chieshēnquido cuidquin aidon nuqui natiamiaid nuqui bēpišcudmendac. Abi yacnuēsh mayan bēdabo ambi comapenen tantiaquin namiaidobēd choshon Nuquin Icho Esusēn adoendac. ⁸ —Icsaisambo yec matses cuidquid nebi —quequin tantiamenuc bēchamauanquiec choshon Nuquin Papa tantiesabo cuidendac. —“Nuquin Icho Esus tantiaho Nuquin Papan mibi bēdamboen istiaš,” quequin chuisho tantiatipimbo iquebi —quequin abi tantienquo icsho Esusēn cuidendac. ⁹ Cacumiachimboen abi yacno puduedmenquo icquin ambi icsambo icquido cuidacno nidmendac cuentiapimbo icnuc. Adoac Esus abitedishun Icho yec bēdamboshē isadsho isec tabadtiaipimbo iquendac. ¹⁰ Aden ambi icsaido cuidte ushēmbi Esus chosho abi tantiaquido: —Ēbi cuidmenquo icnuec abided cuidadaid Nuquin Icho bēdamboshē iquec —quequin aton Icho isec tabadendac. Ēmbi Esus chuibanac aid tantiabonndaiddo icquin mimbitsen Esus chosho isendac.

¹¹ —Aidbēdtambi Esus isendambi —quequin mibi Nuquin Papa chianembi naden. —Mimbi Esus tantiamiaido Tesadonica yacnocquido bēdamboen tabadme, Papa. Aido: “Esus tantiaquin ambi chiacpadomboen natiadquo iquebi,” qesho ambi chiacpadomboen name, Papa. Comapenen tantiaquidquo mibi neque. Adota, Papa. ¹² Aden mimbi con Icho Esuquidistubēdtan bēdambo icmiac Esus tantiec bēdamboec tabadtsiaš, Papa. Adec bēdamboec tabadsho isash utsibo mibi caic: “Abi tantiaquid icsho Esusbēdtan Nuquin Papan aden bēdamboen tabadmec. Aton Icho Esuquidistubēd Nuquin Papa bēdamboshē iquec,” quependac utsibo, Papa —quequin Nuquin Papa chianembi mibi tantiaquin.

2

Icsamboshë icquidba chote chiaid

¹ Tantia, con utsibo. Mibitedi chuinu. —Abi yacno tabadmenuen buanuec Nuquin Papa yacnuësh Nuquin Icho Esus ênden choac —quesho tantiash ² dacuêdtanenda. Mibi yacnoshon ¿tsuntsin adec muaquin chuiposh? Aidon: —Tantia. Nuquin Papan Mayanên tantiamiacpadomboen chuinu. Nuquin Icho Esus ênden choac —quec muapash. Ambembi chiaidien chuichitash. —Naden Pabadon chiaid iquec —quequin êmbi dada uaidbimboecquid isquimbien chuichitash. ³ Adec muaid tantiash: —Abimboen cachitosh —quenda. ¿Nuquin Icbobada chopadic? Padenquoio. Utsibain choendac. —Nuquin Papa caidên chiaid tantiatiapimbo iquebi —quec matses icsamboec tabadnubien Nuquin Papa chieshênquidquo icsamboshë icquidba choash matses dadpenquoio chuiquid dapa iquendac. Aid Nuquin Papan cuidtequidquo nendac. Aidba choabi icnuc Êsus choenquoio iquendac. Icsamboshë icquidbain choendac. ⁴ Aid chuiquid dapa yanashic Nuquin Papa dêniacte bunquieic Nuquin Papa tabadte shubu uashunaidên puduedshun: —“Comapenen tantiaquin êbi nashunquidquo nec,” quequin mimbi Nuquin Papa caid nibêdeque. Êbiuidtsêqui tantiata —caindac matses abitedi chuiquin.

⁵ Aden mibi chuideniondambi. ¿Tantienquioda ique? ⁶ Nuquin Papan tantiacpadênquoio chomenuen uidênuac icsamboshë icquid nêbi choenquoio iquec. Nuquin Papan tantiacpadênquoio choendac. Êmbi chiondacadquid abi chomenquoio icquid mimbi tantiec. ⁷ Nêbi isadenquoio icquidên Satanasên namiac matsesên Nuquin Papan chiaid niac-niacbededec. Padnuen icsamboshë icquid choabi iquec. Aid chomenquoio icquid nidabi icnubi icsamboshë icquid chuiquid dapa yantiapimbo iquendac. Abi chomenquoio icquid nidmiambien ⁸ icsamboshë icquid matses chuiquid dapa iquendac. Adnubien Nuquin Icho Esusên: —Êbien matsesên Icbombo nec —quequin matses abitedi tantiamenuec choshon icsamboshë icquid: —Unêsta —caquinuidtsêqui unês uashunendac.

⁹ Adec Esus choabi icnuc icsamboshë icquid chuiquid dapa yanendac. Adquid yanshumbic Satanasên tantiamiacpadomboen comapenen tantiaquin dadpenquoio nabanquin ismendac. —Comapenen tantiaquidquo nêbique. Istac —quequin ambembi chiaid tantiamenuen aden nadatiambo icquin nabanquin ismendac. ¹⁰ Adec icsauidequi tabadquid yec comapenec muasho tantiash: —Abimbo caic —quependac Esus tantiesabo Nuquin Papan cuidtequido yec. Aidon Esus chuibenequidên Nuquin Papa yacno tabadte abimbo chuisho pamumêdabimboen tantiatiapimbo icquin amebembi chiaiduidtsêqui tantiandac. ¹¹ Aden ambi chiaid niac-niacuidequi icsho Nuquin Papan: —Abi bunaidquoio ambembi chiaidquoio chuisho ma tantipapanuna —quequin namiac: —Mue nec —quequin tantienquoio iquendac. Utsi muasho tantiash badedi: —Abimbo chîec —quetsiash tantienquoio yec. ¹² Aden ambi chiaidquoio tantiatiapimbo icquin aid niac-niaquec icsateuidi bunsho Nuquin Papan cuidquendac.

Nuquin Papan tantiamiaid

¹³ Nuquin Icbon mibi tantiaquieic. Êndenquimboshë matses uabi Nuquin Papa nuqui caic: —Êbi yacno tabadmenuen Esus tantiamenuen aido bêdambo icmendambi —quepampic. Adshumbic aidên chiacpadomboen aton Mayanên namiac Nuquin Papan chiaidquoio tantiash Esus tantiec mibi bêdamboec tabadcuendonac. —Adquiobidi iccosh —quesho tantiashun Nuquin Papa chianembi naden. —Aden aido bêdamboen namequid yec mibi

bëdamboshë iquec, Papa —quequin chianembi mibi tantiaquin. ¹⁴ Nuquin Papan chiaidquo ëmbi chuibanac mimbi Esus tantiabenondac. Abi yacnoshon Nuquin Icho Esuquidistupadquo bëdamboshë icmenuen aden Nuquin Papan mibi Esus tantiamiac. ¹⁵ Èbi adsho tantiashun ëmbi chiondacadomboen chieshtoenquo icquin Esus tantiata. Èmbi mibi bëisquin chiondaidbëdta ëmbi dada uaqin abimbo chiondaid bëpiscudenda.

¹⁶ Nuquin Icho Esuquidistubëdta Nuquin Papan nuqui tantiaquin bëdamboen isec. Adembidi: —Nuquin Papa yacno Esusbëd iquendabi —quequin tantiamequin dayacquo yacimboecnuc nuqui icmec. ¹⁷ Adquid icsho chianembi naden. —Tesadonica yacnocquido chieshtomenquo icquin Esus tantiamequin bëdamboec tabadquid icme, Papa. Adembidi bëdamboec chuinanquid icmequin nashunanquid icme, Papa —quequin Nuquin Papa chianembi mibi tantiaquin.

3

Nuquin Papa ëbi chianeta, quiaid

¹ Tantia, con utsibo. Mibi chuinu. Nuquin Papa ëbi chianeta. —Nidaid utsi-utsiec yacno nidmeshun Pabado chedo matses dadpenquo Esusën naid bëdamboen chuibame, Papa. Mimbi bëdamboen chuimiãc ëmbi Esus tantibenondacadomboen utsibon dadpenshun Esus tantiabentsiash, Papa.

² Aden Esus chuibansho isun Esus tantiesabo chieshëmënquidon: “Pabado cueschitono,” casho cuesmenda, Papa —quequin Nuquin Papa ëbi chianeta.

³ Nuquin Icho bëdambo iquec. Muesambo icquin ambi chiacpadomboen nuqui bëdamboen dayun uaindac. —Èbi tantienquo yanushe —qeshun nuqui chieshtomenquo icquin Satanas nuqui yuametiapimbo iquendac.

⁴ —Aden Nuquin Ichon bëdambo icmiãc ëmbi chiacpadomboen naboedi adembidi Tesadonica yacnocquidon naindac —quequin tantiombi. ⁵ Aden mibi tantiaquin naden Nuquin Papa chianembi: —Con Icho Esuquidistun tantiamiacpaden: “Nuquin Papan ëbi tantiaquic,” quequin Tesadonica yacnocquido tantiameta, Papa. Esusën chieshtoenquo icquin nacpadomboembidi aido chieshtoenquo icquid icmeta, Papa —quequin Nuquin Papa chianembi.

Esus tantiaquido uspuenquo icquid

⁶ Tantia, con utsibo. Nuquin Icho Esuquidistun: —Èbi chuibeneta —caidquo icquin mibi chuinu. Esus tantiaquido utsi-utsiec ëmbi mibi chiondaid niãc-niaquec chieshuidequi icsho isash aibdëd chieshec tabadenda. ⁷ —“Èbëd iquec Pabado dayacquo iccondacadquic chieshenquo yequien tabadtiãd,” quiosh —quiosh mibi caic. Abimbo mimbi cac. Mibëd yec dayacquo iccondabi. Chieshenquo yec chonoadteniondabi.

⁸ Mimbi pete meniac ¿con piucquid mibi menenquiodambi ictionda? Bedquin mambi mibi menianepondac. —Èbi meniac aton na naimëdnushe —quiash con piucquid bednuec chonoadteniondabi. ⁹ —Esus tantiaquidon abi chuibanquid menenquo icquid —¿quectabi ique? Padenquo. Esusën naid chuibanquid ambi chuibanaidon meniaquien bëdambo ictsiash. —Chieshenquo icquin ëmbi nacnensho isun ma adembidi Tesadonica yacnocquidontsen nanu —quiashini chonoadteniondac. ¹⁰ Mibëd tabadquin naden chiondambi. —Aton na nacnenenquo yec chieshuidequi icsho pemenquo icquid —quequin chiondambi.

¹¹ Mibi caic: —Utsi-utsiec chieshuidequi tabadosh. Utsi icsaiduidquo chiec tabadosh —quetuidosh. ¹² Uspun tantia. Nuquin Icho Esuquidistun chiaid

mibi chuinu. Chieshuidequi tabadenda. Mitsanabi penuec chonoadta. ¹³ Nuquin Papan chiacpadomboen naic chieshtoenda. Chieshtoenquo icquin bēdamboen-uidi nata. ¹⁴ Nēid dada uaquin ěmbi chiaid niac-niacsho ista. Adec icsasho isash: –“Icsamboen naombi,” quequin ma tantiabenu –quiash abēduidi iquenda. ¹⁵ Aid chieshēnenquo yequi adta. Mibipadquid Esus tantiaquid icsho naden chui. –Esus tantiaquid adesa ye. Padi. Bēdamboequien tabādtiad –quequin chuita.

Pabadon ěnquin chiaid

¹⁶ Mibi tantiaquin Nuquin Papa chianembi naden. –Bēdambo icmianquidquo icquin Con Icbonquo ma aido dacuēdenquo icquid icmepanuna, Papa. Aidobēd ma Esus tēshēdenquo icpanuna, Papa –quequin Nuquin Papa chianembi. ¹⁷ –Ista. Ěmbimbo dada uaid nēid neque –quequin ěmbi nēidtedpactsēc dada uaid isun: –Pabadon chiaidquo nec –quequin mimbi tantiendac. ¹⁸ –Nuquin Icho Esuquidistun bēdamboen ispashun –caimbi mibi. Padi. Aidtedi dada uaombi.

TIMOTEYON ISTE 1

Tauamboen chiaid

¹ *Padabo nebi.* Nuquin Papa yacno yuedanquidën Esuquidistun: —Ëbi chuibeneta —caidquio nebi. Aton Mado tantiasho nuqui bédamboen isquidën Nuquin Papan: —Con Mado Esus chuibeneta —caidquio nebi. ² *Ëmbi chiondac* Esus tantiabenash con mado icbobimboecquid mibi neque. Mimbi iste nëid dada uanu. Mibi tantiec: —Nuquin Papan aton Mado Nuquin Icho Esuquidistubédtan con mado bédamboen isquin bédambo icmepashun —quiobi.

Chiaid utsi chienda, quequin chiaid

³ *Tantia.* Mibi chuinu, mado. Nidaid utsi Masedonia caid yacno nidquin ëmbi chuibidanondacpadquiec Epeso yacno icta. Mibi yacnoquidon: —Nuquin Papan chiaidquio chuinu —queboedombi aidquio chienquio icsho naden chuita. —Nuquin Papan chiaid chuiquimbi chiaid utsibédta nactusuaquin Nuquin Papan chiaid chienda —cata. ⁴ *Nadembidi chuibanta.* —Tsusedpabon ambembi chiampiduidi chiec tabadenda. Adembidi utsibon: “Nuquin matsesën mado nepampic. Aidën bababic nadec cuëmédpampic. Aidën tsyuecquiduidtsëqui bédambo iquec,” quequin dadpenquio ambembi chuibampac caosh. Aden chiaiduidi tantiec tabadenda —cata. —¿Adenuidi chuiquinda mimbi Nuquin Papan chiaidquio bédamboen tantiamepe? Adenuidi chuiquin mimbi Esus tantiamenquio iquec. Aden mimbi ambembi chiaid chuisho tantiash: “Mimbi icsamboen chiec. Ëmbimboen bédamboen chiec,” quec mibédi chushcananeque. Nuquin Papan chiaidquien chuitiad —cata. Nuquin Papan chiaid bédamboen chienquio icquido aden chuita. ⁵ *Adshumbic aidobidi naden chuita.* —“Matses ma bédamboec tantiananu,” quequin Nuquin Papan chiaidquio chuita. Adoac bédamboen tantiashun Esus tantiec bédamboec tabadec matses bédamboec tantianantsiash —cata, mado. ⁶ *Mimbi aden chiacpadomboen nainquio icquidoen Nuquin Papan chiaid bédamboen tantienquio yec abembi onquec.* ⁷ *Adquidon:* —Nuquin Papan ambi chiaid Moises dada uamepampid bédamboen tantiambi. Moisesën chiampicpadomboen namenuc aid chuibanquid icte bunebi —queboedombi Nuquin Papan chiaid bédamboen tantienquio icquin icsamboen chiec.

⁸ —“Naden nata,” quequin Nuquin Papan chiaid Moisesën dada uampic icsambo iquec —¿quequindambi chié? Padenquio. Ma aidi bédambo iqueyoc. —Nëid tantiashun ma abi icsaid ënu —quesun aid abimbo chiac bédambo ictsiash. ⁹ *¿Bédambo icquid chuiquinda Nuquin Papan Moises dada uamepampic? Padenquio.* Icsambo icquido chuiquimbien adopampic nadquido chuiquin. Nëidic Nuquin Papan chiaid niac-niacquido. Nëidic aton chuiquidën chiaid niac-niacquido. Nëidic Nuquin Papa tantiesabo. Nëidic Nuquin Papa mamënshunquido. Nëidic anibi cuesunequido. Nëidic amëbi cuesunequido. Nëidic cuesunianquido. ¹⁰ *Nëidic aton chidopenquio chudquido.* Nëidic aton bënëpenquio chudmequido chido. Nëidic aton chido bunenquio yec dada daéd chichudnanquido. Nëidic matses utsi bedshun yuaquido. Nëidic muaquido. Nëidic Nuquin Papan chiaid niac-niacquido utsibotedi. Adquid matses icsambo icquido chuiquin Nuquin Papan chiaid Moisesën dada uampic. ¹¹ *Adembidi Esus chuibenequidon:* —Adquid icsambo iquec —quequin chiec. Bédamboshë icquin Nuquin Papan aden Esus chuibenequido chuimec. Esus chuibenequidbidi icquin adembidi chiemi.

Nuquin Icbon Pabado bēdamboen isbenaid

¹² Tantia, mado. Mibi chuinu. Nuquin Icho Esuquidistun: —Pabadon ēbi bēdamboen chuibantsiash —quequin tantiashun: —Ēbi chuibenequid icta, Pabado —queshun ēbi bēdamboen namec. Adoaid icquin: —Ēbi namequid yec mibi bēdamboshē iquec, Icho —quequin Nuquin Icho Esus chianembi.

¹³ Ēnden adenquio iccondabi. Nuquin Papan Madopenquio danquin Esus icsamboen chuishunondambi. Abi tantiaquido chieshēnquin cuesun secate bunondabi. —Aton Mado Esus tantiasho Nuquin Papan ēbi bēdamboen istsiash —quenquio icquin adopondambi. Adshobini: —Pabadon abimbo tantiabi iquec —queshun Nuquin Icbon cuidenquio icpanēdash. ¹⁴ Adec icsambo icquid icsho Nuquin Icbon tantiamiac: —Ābi tantiasho ēbi bēdamboen isbentsiash —quequin Esusquio tantiabenondambi. Esus tantiaquin matses-
tsen tantiaquiembi.

¹⁵ Tantia, mado. Naden chiaid bēdambo iqueque. —Icsambo icboedēn abi tantiasho cuidmenquio icnuec Esus matsesac caondash —quequin chiaid bēdambo iquec. Ēbibic icsamboshē icpondabi. Utsibon Nuquin Papan chiaid bēdiactēc niac-niacnubi ěmbimbo comapenen niac-niaccondambi. ¹⁶ Adec ēbi yuec icsambo icsho Nuquin Icho Esusēn baded cuidenquio icquin abibi tantiamequin bēdamboen isbempondashi. —Pabado bēdamboen isaīd chiac utsibo: “Pabado icsambo icboedi Nuquin Papan bēdamboen isbenac. Adem-
bidi Esus tantiasho Nuquin Papan ěbitsen bēdamboen isendac,” quequin ēbi tantientadac. Adquid unēsacsho ēbi yacno tabadmendambi —queshun abi tantiamequin Esusēn bēdamboen isbempondashi. ¹⁷ Aden tantiaquin nadoembi. —Nuquin Papa ambiuidtsēqui abitedi namequid yec abitedishun Icbombo nec. Unēstiapimbo icquid nec. Isadenquio icquid nec. Adquid abentsēcquiobi icnuc abipadquid utsi nibēdec. Adquid icsho abitedishun: “Mibi bēdamboshē iquec, Papa,” capashun ēnenquio icquin —caimbi.

Matsesēn mibi chiondacadombota, quiaid

¹⁸ Mibi con mado icbobimboecquid neque. Ēmbi chiacpadomboen Nuquin Papan chiaidquio chuibanta, mado. Ēnden mibi Esus chuibanquid yanabi icnuc Nuquin Papan oncamiac nuquibēdtan Esus tantiaquidēn mimbi chuibante chuipondash. —Esus bēdamboen chuibanquin Timoteyon Esus tantiaquido bēdamboen namendac —quequin mimbi chuibante chuipondash. Aidēn chiacpadomboen chieshtoenquio icquin Nuquin Papan chiaidquio chuibanta. ¹⁹ Aden Nuquin Papan chiaid niaquenquio icquin Esus tantiaquiec bēdamboec tabadta. Utsiboen adenquio iquec. Icsamboec tabadquin Nuquin Papan chiaidquio niac-niacquin Esus tantienquio yanosh. ²⁰ Adecandedo caidbēdtan Imeneyo caidēn aden Esus tantienquio yanosh. Aid daēdshun Nuquin Papa muauaquin icsamboen chuisho nadopombi. —Adquid Satanasēn natiambo icmepashun —queshun: —Esus tantiaquido cho-choacno choenda —capombi. —“Nuquin Papa muauachitombi. Icsambo icchitebi,” quequin ma tantianu —queshun adopombi.

2

Nuquin Papa bēdamboen chianete chiaid

¹ Tantia. Utsibotedi chuinu. Matses abitedi tantiaquin Nuquin Papa chianenuna. —Matses abitedi min Mado Esusbēda mibi bēdamboen tantiamequin bēdamboen ista, Papa. Matses nashunquidquio yec mibi bēdamboshē iquec, Papa —quequin Nuquin Papa chianenuna. ² Adembidi Nuquin Papa chuiquin: —Chuiquid dapambo pedesidente caidtedibēda chuiquid dapa utsibotedi bēdamboen tantiameta, Papa. Adoac aidon bēdamboen namiac

cuesun secananenquo yec matses abitedi bēdamboec tabadtsiash. Adnubi abi chieshēnquido nibēdnuc Esus tantiaquido abi tantiec bēdambo ictsiash, Papa —quequin Nuquin Papa chianenuna. ³—Con matses Esus tantiameta, Papa —quequin nuqui aden chianesho tantiaash: —Bēdamboen chiec. Ēbi bunaidquo chiec —quendac Nuquin Papa nuqui cuidenquo icquin abē tabadmequid. ⁴ Matses abitedimbo cuidenquo icnuen matses bēdamboen iste bunquid yec: —Ma ěmbi chiaid tantiaashun abided cuidadec unēsaid ma tantiašanu —quec Nuquin Papa. ⁵ Nuquin Papan chiaidquo tantiaashun nuqui naden tantiec. —Nuquin Papa matses uaquid abentsēqui icnuc abipadquid utsi nibēdquic. Abēd ichoedi matsesun: “Nuquin Papapadquid icquin aid tantiaquid nebi,” quequin aton Madon matses chuipanēdash. Adecbidi aton Papa matses bēdamboen ismequid yampanēdash Esus. Aid abentsēqui Nuquin Papa bēdamboen ismequid nec. ⁶ Abi tantiaquid cuidmenquo icnuec abided cuidadec unēsac caondash —quequin chiaidquo nuqui tantiec. Nēbien Nuquin Papan tantiacpadomboen matsesēn aden chiaidquo chuiben-chuibenec. ⁷ Adomboembidi Esus chuibeneguidquo nebi. —Matses utsibo isadaidpembo ěbi chuibeneta —Esusēn caondaaid nebi. Adoaid icquin: —Ma Esus tantianu —quequin Nuquin Papan chiaidquo chuibenec nebi. Abimbo caimbi. Adquid nebi.

Esus tantiec cuēdēnacnoshon nate chiaid

⁸ Tantia. Datededi chuinu. Cuēdēnacno puduedshun Nuquin Papa chuinuec bēdamboequien tabadtiad. Nēish bēdanash chieshēnanenquo icquimbien Nuquin Papa chuitiad. ⁹ Chidobotsen chuinu. Esus tantiec Esus tantiaquido cuēdēnacno nidnuec: —Mabi isnu —quequin tantienquo yec bēdamboec dasiuidta. Bēdamboec tabadquid dasiuidacimbioec dasiuidta. Chido chishpidabimboec dasiuidenda. —Mabi isnu —quenquo yec Esusquo tantianuec Esus tantiaquido cuēdēnacno puduedta. ¹⁰ —Mabi isnu —quequin tantienquo yec: —Nuquin Papa tantiaquidquo nebi —quec utsibo nashumbanec bēdamboec tabadta.

¹¹ Esus tantiaquido cuēdēnacnoshon dadan Nuquin Papan chiaid chuibanho tantiaquid chidon. —Aidēn chiapadomboen natiapimbo iquebi —quequin tantienquo yec bēdamboen tantiec otacquo tabadquid chido. ¹² Esus tantiaquido cuēdēnacno puduedshun dada chuibanesa chidon. Adembidi dada ancaisa chidon. —Otaquien tabadquid chido —caimbi. ¹³ Dada Adan caidba Nuquin Papan matses uapampic. Adshumbic aton chido Eba caidtsen. ¹⁴ Aden dadabēdta chido nacnenacsho isumbien Satanasēn: —Icsamequin tanu —qeshun muauac icsaquin chidomba Nuquin Papan chiaid niacpampic. Adan padabi. Aden tantiaquin: —Dadan chido chuibanquid —caimbi. ¹⁵ Adecec abia icsasho isun Nuquin Papan cuidac paēmbo icnuc bacuē tishquid chido abitedi nec. Nēbi Esus tantiaquid yanash ambi tishaido bēdamboen namequid nendac. Esusēn chiapadomboen natiadquo icquin matses tantiaquid nendac. Nuquin Papan chiaid niaquenquo icquid nendac. Aton bēnēuidtsēqui chudmēquid yendac Esus tantiaquid chidon. Adquid Nuquin Papan bēdamboen isquin abēdi tabadmendac.

3

Esus chuibanquid chiaid

¹ Tantia. Utsitsen mibi chuinu. —Esus chuibanquid ictiadquo iquebi —qesho: —Bēdamboen nate mibi bunec —cata. ² —Nuquin Papan chiaid chuibanquid nadquien ictiad —quequin anocquido chuita. —Bēdamboec tabadquid nec —utsibon caidquo Nuquin Papan chiaid chuibanquid

nendac. Adquid chido abentsëc inquit nendac. Abi bunaid ënshun mëmunquidquo nendac. —Bëdamboen tantiaquidquo nec —utsibon caidquo nendac. Isedanguido bëdamboen isquid Nuquin Papan chiaid chuibanquidën. Nuquin Papan chiaid bëdamboen tantiaquid chuibanquid nendac. ³ Tantiadenuen acte paëmbo icquid aquenquo icquid nendac. Badedquo nëshenquo icquid nendac. Uimanëmënenquo icquid nendac. Chushcananteuidi bunenquo icquid Nuquin Papan chiaid chuibanquid. Piuquid bedteuidi bunenquo icquid nendac. ⁴ Aidën chiacpadomboen aton chidon aton bacuëbobëdta naquid. Chieshenquo icquin aton papan chiacpadomboen naquid aton bacuëbon. ⁵ ¿Ambi chiacpadomboen aton chidobëdta aton bacuëbo bëdamboen namenquo icquidã Esus tantiaquido bëdamboen namepatsiash? Padenquo ictsiash. ⁶ Ënden Esus tantiabendonaid chuiquin: —Ëbi chuibanquid icta. Ëbi bëdamboen chuiquin ëbi bëdamboen nameta — Esus tantiaquidon cac bëdambo ictsiash. Nëbimbo Esus tantiabenuid aden chienda. Chuibanquid icmiac adquidën Nuquin Papan chiaid badedquid niactsiash. Satanasbimboec: —Ëbiuidtsëqui bëdamboshë iquebi —quetsiashe. Adquid: —Ëbi chuibanquid icta —cainda. ⁷ Ënden Esus tantiabendonaid mibi chuibanquid icmenun Esus tantiesabon: —Bëdambo icquid nec —casha tantiatata. —Icsambo icquid nec —caid chuibanquid icmenda. Adquid chuibanquid icmiac icsasho Esus tantiesabon mamëshuntsiash. Adquid Satanasën badedi yuatsiashe. —Icsambo icquid nec —caid: —Ëbi chuibanquid icta —cainda.

Esus tantiaquido nashunquid chiaid

⁸ Tantia. Esus tantiaquido nashunquidtsen chuinu. —Nuqui chuibanquidën chiacpadomboen ëbitedi nashunquid icta —quequin nadquid chuita. Utsibon: —Bëdambo icquid nec —caidquid nendac. Muesambo nendac. Tantiadenuen acte paëmbo icquid aquenquo icquid Esus tantiaquido nashunquidën. Piuquid bunquin ampenquo icquid nendac. ⁹ Nuquin Papan chiaid bëdamboen tantiaquinc Esus tantiaquinc caic bëdamboec tabadquid Esus tantiaquido nashunquid. Adquid bëdambo ictsiash. ¹⁰ Esus tantiaquido nashunquid icmenuen: —¿Bëdambo icquidida nëid nec? —quequin chuimiac utsibo: —Ai, bëdambo icquid nec —abitedi qesho tantiaashun: —Esus tantiaquido nashunquid icta —cac bëdambo ictsiash. ¹¹ Adquidën chido: —Bëdambo icquid nec —utsibon caidquo nendac. Utsi icsaiduidi chienquo yec bëdamboec tabadquid adquidën chido. Tantiadenuen acte paëmbo icquid aquenquo icquid aton chidon. Ampenquo yec bëdamboec tabadquid. Adquidquo Esus tantiaquido nashunquidën chido bëdambo ictsiash. ¹² Esus tantiaquido nashunquidën chido abentsëqui inquit. Ambi chiacpadomboen aton chidon naquid. Adembidi aton bacuëbon. ¹³ Abi nashunquidën Esus tantiaquido bëdamboen nashunsho isun utsibon bëdamboen isendac. Adoaidën dayacquo icquin abi utsibo nashumbanquin dacuëdenquo icquin Esuquidistu tantiamendac. —Esus tantiaquido nashunquid adquidquo iquendac —quequin ënquin chiombi.

¹⁴ Tantia. Utsi mibi chuinu. Mibi yacno nëbi nidtiadquo iquebi. —Nidenquo icmane —qeshun nëid dada uaic nebi. ¹⁵ Ëbi mibi yacno badedquo nidabi icnuc: —“Esus tantiaquidon nadoquid,” quequin Pabadon chiacpadomboen nanuna —cata. ¿Tsutsi tantiaquido nuqui nepe? Unëstiapimbo icquid Nuquin Papambo nec. Aid tantiaquido yec shubu abentsëquën tabadquidobimboec nuqui iquec. Adquid icquin Nuquin Papan chiaidquo tantiaquin nuqui Esus chuibenec. ¹⁶ Ëndenquo abi bëdamboen ismequid ambi tantiamiabi icnëdaidi nëbi Nuquin Papan tantiamiaid Esus bëdamboshë iquec. Aid Nuquin Papan matsesmepeëndash.

Nuquin Papan Mayanën: “Nuquin Papapadquidquo icsaisambo Esus nec,”
quequin tantiamec.

Matsesën unës uaqon uincuenaid yec Nuquin Papan abi yacnoshon uaido
mayan bédabon isaidquio Esus nec.

Abi chuibenequidën nidaid utsi-utsiec yacno nidshun chuibeniác utsin-
utsinquien Esus tantiabenac caosh.

Aidquioibi Nuquin Papan abuc nidmeshun abëdi tabadmeoapanëdash.

4

Utsibon icsamboen chiaid

¹ Tantia, mado. Nuquin Papan Mayanën tantiamiaid mibi chuinu. —
Esus chote nëbi icnuc abi tantiaquidon utsin-utsinquien Esus tantienquio
yanendac. Satanasën yuabo podobitsi icsabon muaquin pausunac matsesën
chuisho tantiashun Esus tantienquio yanendac —quequin Nuquin Papan
Mayanën abimbo tantiamiosi. ² Aden muaquidon: —Abimbo caimbi —
quequin bédambo icquid damianquien aden muaquin chiendac. —Nuquin
Papan cuidnushe —quequin tantienquio iquendac. ³ Adquidon naden chien-
dac. —Dadan chido bedenda. Chidon dada bedmenda. Padenquio yec
tabadta —quequin icsamboen chiendac. Adembidi: —Aidquio petemaid
neque. Penda —quequin pete abentse-abentsen chiendac aid pete bédambo
icnubi. ¿Atotsi quequin Nuquin Papan pete uapampic? —Ëmbi chiaidquio
bédamboen tantiashun Esus tantiaquidon: “Nuquin Papan pete uaid bédambo
iquec,” quequin ma penu —quequin Nuquin Papan pete uampic. ⁴⁻⁵ Aidën
pete uaidtedi bédamboshë iquec. —Ëmbi pete uaid bédambo iqueque. Ma penu
—qeshun Nuquin Papan pete icmiaid ma petequid neyoc. —Mimbi pete
uaid bédambo iquec, Papan —qeshun pete isuidenquio icquin penuna.

Esus chuibanquid icquin bédamboen nata, quiaid

⁶ Esus tantiaquido ëmbi chuibocpadomboen chuibanquin mimbi
bédamboen natsiac, mado. Bacuëtsëcsho min matsesën Nuquin Papan
chiaidquio mibi chuibanëdash. Aidën chiaid tantiaquid icquin Esusën
chiacpadomboen nate bunquin ëmbi chiacpadomboen mimbi chuibantsiac.
⁷ Con tsusedpabon ambembi chiampidbëdta nëbi matsesën adembidi
ambembi chiaid tantienda. Nuquin Papan chiaidquio niactiapimbo yec
bédambo icte bunquiota. ⁸ Aton dada uidënquio icmenuec titinguetanequid
nuquin matses nec. Esus tantiaquido bédambo icnuec ¿mitsipadquio icpec?
Nuquin Papan tantiaquieci ambi chiaid niaquenquio yec bédamboeci tabadquid
nec. Adquid unësash Nuquin Papan yacno nidash bédamboshë icquid
iquendac. ⁹ Ëbi adsho tantiash: —Abimboen caic —queta. ¹⁰ Adec: —Abi
yacno abëdi tabadendabi —quequin Nuquin Papan chiacpadomboen
ënenquio icquin nanuna. —Esus tantiaquid unësacsho cuidenquio
icquin unëstiapimbo icquidën Nuquin Papan abëdi tabadmendac —quec
chieshtoenquio yec bédamboeci tabadnuna.

¹¹ Ëmbi chuiboech chuibanta, mado. —Nuquin Papan chiacpadomboen
nanuna —quequin chuibanta. ¹² Mibi nëbi caniaid neque. Bédamboeci
tabadta, mado. Ënden caniaidën: —Nëbi caniaid icquin Nuquin Papan chiaid
mimbi tantienquio iquec —canushe. Bédamboeci tabadta. —Esus tantiaquido
utsibotsen ma ëbi yacpadech bédamboeci tabadnu —quiaish adta. Bédamboen
chuibanquinc matses tantiaquinc Esus tantiaquinc Nuquin Papan chiaid
niaquenquio icquinc caic bédamboeci tabadta.

¹³ Ëbi ano nidabi icnuc Nuquin Papan chiaid adenuidi chuibanta. —
Nuquin Papan chiacpadech bédamboeci tabadnuna —quequin Nuquin Papan

chiaid isbanquin matses chuibanta. Aden bēdamboen tantiameta. ¹⁴ Ēnden mibi mamishquin chiondaid ¿ada tantie? Ēnden Esus tantiaquido icquin tsusio dapabon mibi mamishbededondash. Adshobien Nuquin Papan aido mimi chuibante chuimepondash. Adoac: —Nuquin Papan chiaid bēdamboen chuibanquid Timoteyo iquendac —quequin chuipondash. Chieshtoenguo yec adquid icta, mado. ¹⁵ Ēmbi dada uaquin chuiboedtedi isbanshun ēnenquio icquin ēmbi chiacpadomboen bēdamboen nabanta, mado. —Ēmbi adosho isun ma ēmbi chuibanaidon: “Nuquin Papan chiaid chuibanquidquio yanosh,” ma ēbi canu —queshun bēdamboen chuibanta, mado. ¹⁶ —Nuquin Papan chiaid niacmane —quec mibibi bēdamboec tantiadta, mado. —¿Adabi bēdamboec tabadpeba? ¿Adambi Nuquin Papan chiaidquio muainquio icquin chuibampoba? —quec mibibi tantiadta. Bēdamboec tabadquin Nuquin Papan chiaidquio ēnenquio icquin chuibanta. Aden Nuquin Papan chiacpadomboen naic aibdēd mibi tabadendac. Mimi chuibanaidobidi adoaindac.

5

Esus chuibanquidēn bēdamboen chuite

¹ Nuquin Papan chiaid chuibanquid icquin dada ēnden caniaid chushcainda, mado. —Esus tantiaquidēn nadoquid yendac —quequin bēdamboen chui: —Con pabimboecquid nec —quequin. Nēbi caniquid: —Con utsimboecquid nec —quequin adembidi bēdamboen chuiban, mado. ² —Con tabimboecquid nec —queshun macho bēdamboen chuiban. Chido machobudabi icquidtedi chibibimboecnuc isquin: —Nēid chudtiadquio icchitebi —quenquio icquin Nuquin Papan chiaidquio chuibanta, mado.

Chido niantembo chiaid

³ Tanta, mado. Esus tantiaquidon abēdtan Esus tantiaquid icsho niantembo chuinu. Niantembo matses nibēdquid: —¿Tsuntsimbini nashumpatsishba? —quequid Esus tantiaquidon nashunquid. ⁴ ¿Ada niantembo tishaido icpec? Aidēmbi ani nashuntsiash. ¿Ada aton baba icpec? Aidēmbi aton chichi nashuntsiash. Aidēmbidi aton shanuachotsen nashuntsiash. —Ēbi nashundenēd neque. Nēid nashunu —queshun nashuntsiash. Aden ambi chiacpadomboen nasho isash: —Bēdamboen naic —quetsiash Nuquin Papa. ⁵ Padnuc aton matses nibēdquidēnquio niantembo Nuquin Papa chianequid: —Nuquin Papan ēbi nashuntsiash —queshun. —Mimi ēbi tantiaquieque. Ēbi nashunta, Papa —quequin Nuquin Papa chianequid niantembo icsho abēdtan Esus tantiaquidon nashunquid. ⁶ Niantembo utsimbien ambi tantiaiduidi naic. Petebēdta acteuiddi tantiaquin abi bunaiduidi naic. Adquidēn unēsacimbimboecquin Nuquin Papa tantienquio iquec. Adquid Esus tantiaquidon nashunenquio icquid. ⁷ Ēmbi aden niantembo nashunte chuiboed Esus tantiaquido utsibotsen chuita, mado. —Aton matses nibēdquid niantembo nashunenquio icsho: “Esus tantiaquido icsambo iquec,” utsibon canushe —queshun chuita. ⁸ Aton shubun icquidotsen Esus tantiaquidon nashunquid. Abēd icquido menenquio yec pemenquio yec quec nashumēnenquio icquid icsamboshē iquec. Esus tantiesabo icsambo icnubi: —Esus tantiaquid nēbi —queboedi Nuquin Papan chiaid niac-niaquec aton matses nashunenquio icquid icsamboshē iquec.

⁹ —Nēidtedi chido Esus tantiaquido nashunquidombo iquec —quequin abi cuēmēdquid abi cuēmēdquidquien mimi dada uaondac. Nadquid chido: —Esus tantiaquido nashunquid icta —cata. Seta dadpenquio 60ted matamec machobudaidquio. Aton bēnēuidtsēqui chudmedenedquio. ¹⁰ —Matses

nashunquid nec –utsibon caid. Bacuë bēdamboen caniuadened machon. Isedanquido bēdamboen isquid. Esus tantiaquido nashundenequid. Matses daicsabudacsho nashunquid. Adec bēdamboec tabadquid: –Esus tantiaquido nashunquid icta –cata.

¹¹⁻¹² Utsi niante machobudabi icquid: –Adquid icta –cainda. –Esusuidtsēqui tantiaquin abi tantiaquido nashunembi –queboedēmbi dada bunquin ambi chuiboedi niacbidansho isun utsibon: –Icsambo icquid nec –catsiashe. ¹³ Adquid shubu utsin shubu utsinquien isedbenisedbenec uspumbo yanash onqueteuidtsēqui buntsiash. Utsibo icsaiduidi chuibeneguidquio ictsiash. ¹⁴ –Adquid niante machobudabi icquid dadan bedac bēdambo ictsiash –caimbi. Adoac bacuë tishoatsiash. Adshun codocaquinc sicaquinc daēdcaquinc catsiash. Adec bēdamboec tabadsho: –Icsambo icquid nec –Esus tantiesabon catiapimbo ictsiash. ¹⁵ Adquid niante machobudabi icquidēn utsin-utsinquien Esus tantienquio yanshun Satanāsēn tantiamiacpadomboen nac caosh. ¹⁶ Niantebēd icquid utsi ŷada Esus tantiaquid chido icpec? Aidēmbi niante nashunac bēdambo ictsiash. –Ēmbi nēid nashumbanuc niante utsi aton matses nibēdquidquio Esus tantiaquido utsibon nashuntsiash –qeshun abēd icquidēn nashunac bēdambo ictsiash.

Esus tantiaquido chuibanquid chiaid

¹⁷ Tantia, mado. Esus tantiaquidon abi chuibanquid nashuntetsen mibi chuinu. ŷAda Esus chuibanquidēn bēdamboen naosh? Adquidēn Nuquin Papan chiaid bēdamboen tantiamequinc Esus bēdamboen chuibanquinc casho ambi chuibanaidon bēdamboen isquin nashunquid. –Ma penu –qeshun meneguid. ¹⁸ Adembidi chuiquin Nuquin Papan ambi chiaid dada uamepampic. “ ‘Penushe,’ qeshun adosbitsecquid bitsi secamenuen manemiaid baca bēnē utsibon dēnēshquid. ‘Adec chonoadquidēn ma penu,’ qeshun isadaidbon dēnēshesa,” quequin Nuquin Papan dada uamepampic. Nadembidi Nuquin Papan chiaid dada uapampic. “ ‘Naic cho. Mibi bēdamboen cuidquin menenu,’ cac chonoadsho abi chōnoa uaquidēn meneguid,” quequin Nuquin Papan chuipampic. Adembidi Esus tantiaquidōn abi chuibanquid nashunquid.

¹⁹ Padnuc Esus chuibanquid caic: –Nuquin Papan chiaid niac-niacsho isombi –quequin matses abentsēcshun chuisho: –Abimboen cachitec –cainda. Daēdshun chuisho: –Abimboen cachitec –cata. Adembidi abentsē chotsecquin chuisho tantiata. ²⁰ Esus chuibanquidēn Nuquin Papan chiaid niacacsho: –Mibi icsaoc. Padi icnuna –cata. Esus tantiaquido dadpeshun tantianubi adota. –Aden chuisho tantiash dacuēdec: “Ēbitsen adembidi chushcapanundac,” qeshun ma utsibon Nuquin Papan chiaid niaquenquio icnu –qeshun nashun chushcata. ²¹ Esuquidistubēdtan Nuquin Papan nuqui isec. Adembidi Nuquin Papan abi yacnoshon uaido mayan bēdabon nuqui isegue. Ēmbi chuibocpadomboen nata. Min matsesēn mimbi tantiaidēnquiobi Nuquin Papan chiaid niacacsho adembidi chushcata. Shubu utsinquidon Nuquin Papan chiaid niacacsho adembidi. –Con matses ēmbi tantiaidquio neque. Chushcainquio iquembi –cainda.

²² Nuquin Papan chiaid chuibanquid icmenuen nuqui naondacpadomboen badedquio mamishenda. Ambi naid yuen isquioshon ambi chiaid yuen tantiaquioshon: –Bēdambo icquid nec –quequioshon nata. –Esus chuibanquid icta –mimbi badedquio caboedēn Nuquin Papan chiaid badedquio niacsho isash: –Ambi: “Adquid icta,” caidbēd Timoteyo icsamboshē iquec –utsibo quenushe. –Ēbēdtan chuibanquid icta –badedquio cainda. ²³ –Daicsabudteniaccosh. “Pucu paēmbō yan-yanebi,” quiosh –quiosh mibi

caic, mado. Acteuidi acashien mibi niaque. Actequid utsi paëmbo icquid pistsëc ac ma pucu bēdanuequin. ²⁴ Tantia. Mibi padpiden chuinu. —Ēbēdtan namembi —canuen matsesēn naid bēdamboen tantiaata. Utsi aton matses ismec icsasho: —Icsambo icquid nec —badedi catsiash aton matsesēn. Utsibic ismenquo yec icsasho: —Icsambo icquid nec —quequin badedquo tantienquo icquin yuecshun istuidshumbi adotsiash. ²⁵ Utsien ismequin bēdamboen nasho: —Bēdambo icquid nec —badedi catsiash aton matsesēn. Utsimbic ismenquo icquin bēdamboen nabansho: —Bēdambo icquid nec —quequin badedquo tantienquo icquin yuecshun istuidshun adembidi tantiaatsiash. Ēbi adsho tantiaashun: —Nuquin Papan chiaid chuibanquid icta —badedquo cainda.

6

Matses yuaido chiaid

¹ Matses yuabo Esus tantiaquido icsho naden chuita. —Min icbo Esus tantiesha icsho bēdamboen isquin ambi chiacpadomboen nashunta. “Pabadon chiaid icsambo iquec. Ambi Nuquin Papa caidtsen icsambo iquec,” quequin icsamboen chuinushe. Min icbon chiacpadomboen nata —quequin yuabo chuita. ² Utsibi chuiquin: —Min icbo Esus tantiaquidbidi icsho: “Ēbipadquidi nec. Ambi chiacpadomboen natiapimbo iquebi,” cainda. “Ēbipadquid icsho aid tantiaquin con icbon chiacpadomboen nanu,” quequin min icbo bēdamboen nashunta —quequin yuabo chuita. Ēmbi chuiboedtedi Esus tantiaquido chuiban. —Adota —quequin chuibanta, mado.

Piucquid bunquin utsibon ambembi chiaid

³ Mimbi: —Nuquin Papan chiaid niaquenquo yec bēdamboec tabadnuna —quequin Nuquin Icbon chiaidquid chuisho: —Aden chuisho tantiatiapimbo iquebi —quequin ambembi chiaid chuiquid icsambo iquec. Adquidēn chuisho tantienda, mado. ⁴ Aden icsamboen tantiaquidēn: —Ēmbi chiaiduidtsēqui bēdambo iquec —quequin icsamboen chuibanendac. —Mimbi icsamboen chuinuc ěmbimbo bēdamboen chiec —quec chushcanantiaquido iquendac. Abembi onqueteuidi bunendac. Adquid yec onquesho tantiaash: —Utsi onquetiapimbo icnuc abentsēqui onquebudec —quec utsibo nēishendac. Adquidbēd chushcananec muauananec icsamboec tantiaashunanendac. ⁵ Pabiate shēcuē nibēdacimboben Nuquin Papan chiaidquo bēdamboen tantienquo yec chushcananendac. Nuquin Papan chiaid chuibanquidēn piucquid dadpen bedte danec chuibanquidbidi ictiaquido iquendac.

⁶ Nuquien Nuquin Papa tantiaquieci bēdamboec tabadec nuquin na dadpen bedte bunenquo yec bēdambo ictsiac. ⁷ Tishac chucactscnuc nuquin na nibēdpanēdash. Adembidi unēsquin nuquin na nuqui buantiapimbo iquec. ⁸ Nuquin pete dashcutebēd icnuc utsi bunenquo yec bēdambo nuqui ictsiac. ⁹ Piucquid dadpen bedshun dadpen dayun uate bunquido Esus tantiauidtsash badedi chieshtotsiash. Abi bunaiduidquo bednuen mēmunenquo icquin icsamboen nabantsiash. Aden Nuquin Papan chiaid niac-niacquin icsamboen naic quenēnash adenuidi naic unēsash icsambo icquido cuidacno nidendac. ¹⁰ Adec piucquid natiambo bunquido aid bednuec baded-badedquieci icsadenendac. Adquido: —Esus tantiembi —queboedobi padenquo yanash: —Esus tantienquo yanchitombi —quec natiac tabadendac.

Bēdamboec tabad, quiaid

¹¹ Mibi Nuquin Papa tantiaquidquo neque. Piuquid bedteuidi bunenquo yec bēdamboec tabadte bunquiota, mado. Nuquin Papan chiaid ni-aquenquo yec chieshtoenquo icquin Esus tantiata. Matsesten tantiec nēshēmēnenquo yec bēdamboec tabadta. ¹² Utsibon chieshēnaqui chieshtoenquo icquin Esus tantiaquieci bēdambo icta. Unēsash Nuquin Papabēd tabadnuec adta. —Con Mado Esus tantiaquieci unēsasho ēbēdi tabadmendambi —qeshun Nuquin Papan Esus tantiamiac mimbi Esus tantiabempondac. Adshumbic: —Nuquin Papan Mado Esus tantiaquiemi —quequin matses dadpen mimbi tantiamiondaque. Adembidi aid tantiaquieci bēdamboec tabadta. ¹³ Abitedi uampidēn Nuquin Papan nuqui isequē. —Adquid nebi —quequin ancanquid dapa Ponsio Pidato chieci dacuēdenquo icnēdaidēn Nuquin Icho Esuquidistuntsen nuqui isequē. ¹⁴ Esus tantiaquin chieshtoenquo icquin aidēn naidquo chuibanta. Nuquin Icho Esuquidistu choabi icnuc ēmbi chuiboed niaquenquo yec bēdamboec tabadta. —Esus tantiaquido icsambo iquēci —utsibo quetiapimbo icnuc adta. ¹⁵ Nuquin Papan tantiapadēnquo aid ushēmbi Esuquidistu nidaidēn padpideci choendac. ¿Esus chomequid mitsipadquo icpec? Icsaisambo yec bēdamboshē icquid nec. Aid abentsēcquiobi abitedishun Icbombo nec. Aidēmbi chuiquid utsibo abitedi namendac. Aidquo chuiquid utsin dēniactiapimbo iquendac. ¹⁶ Aid abentsēqui unēstiapimbo icquid nec. Bēchamuanquieci cho istiapimbo yec utsibo tabadec. Aidi matsesēn istiapimbo icquid nec. Adquid icsho: —Mibiuidtsēqui abitedishun Icho yec mibi bēdamboshē iquēci, Papa —quequin Nuquin Papa chianenuna ēnenquo icquin.

Aton na dadpen dayun uaquido chiaid

¹⁷ Aton na dadpen dayun uaquido naden chuita, mado. —“Con na dadpenquioshē icnuc ēbiuidtsēqui bēdambo iquebi,” quenda. Nibēdantiapimbo icquid danquin mimbi dayun uaiduidtsēqui tantienda. Nuquin Papambo tantiaquiota. Aidēmbi matses bēdambo icmenuen aton na bedmec —cata. ¹⁸ Adquidobidi chuiquin: —Bēdamboec tabadquin utsibo nashumbanquiota. Adembidi cudasenquo icquin mitsana utsibo menianeta. ¹⁹ “Mimbi bēdamboen naoque. Ēbēdi tabadmequin mibi bēdambo icmendambi,” Nuquin Papa camenuen adota. Adash unēsasho Nuquin Papan abēdi mibi tabadmendac padpideci unēstiapimbo icnuc —quequin aton na dadpen dayun uaquido chuīta.

Pabadon ēnquin chiaid

²⁰ Ēmbi chuiboedquibidi adembidi bēdamboen chuibanta, mado. Nuquin Papan chiaid chienquo yec abembi onquesho tantienda. —Bēdamboen tantiaquin abimbo caimbi —quequidobi muasho tantienda. Adquidobēd chushcananenda. ²¹ Aden icsamboen chuisho tantiashun: —Abimbo caic —quequin utsin-utsinquin Esus tantienuquo yanondashe. Adquido tantienda. Chieshtoenquo icquin Esusquido chuibanta. —Nuquin Papan con mado bēdamboen ispashun —quequin mibi tantiemi. Padi. Aidtedi chuiquin dada uaombi.

TIMOTEYON ISTE 2

Tauamboen Timoteyo chiaid

¹ Pabado nebi. Nuquin Papan tantiacpadomboen Esuquidistun: — Ëbi chuibeneta —caidquio nebi. —Ambi chiampicpadomboen aton Mado Esuquidistu tantiaquid unēsacsho Nuquin Papan abēdi tabadmendac — quequin Esus chuibenecquidquio nebi. ² Con mado icbobimboecquid mibi neque. Mibi chuiquin nēid dada uanu, Timoteyo. —Nuquin Papan aton Mado Nuquin Icbo Esuquidistubēdtan bēdamboen isquin bēdambo icmepashu —quequin mibi tantiembi.

Chieshtoenquio icquin Esus chuiban, quiaid

³ Con tsusedpabon nacpadomboen Nuquin Papauidi tantiaquin ambi chiapadomboen natiadquio iquebi. Adquid icquin Nuquin Papa mibi chianembi. —Mibi tantiaquid Timoteyo bēdambo iquec, Papa. Adquio icmec mibi bēdamboshē iquec. Adquiouidi icmeta, Papa —quequin Nuquin Papa chianembi. ⁴ —Ëbi nidnu —quesho tantias mibi shubiondaid tantiec mibi iste bunquebi, mado. Ambo nidash mibi isec cuishonquetsiabi. ⁵ Naden mibi tantiembi. —Aton chichi Doida caidēn ani Eunisebēdtan aid daēdshumba Esus tantiabenquiacpadomboen Timoteyonsen nēbi Esus tantiaquiec — quequin mibi tantiembi. ⁶ Adquid icsho mimbi tantiondaid padpiden mibi chuinu. —Min Mayan nēidbēd tabadmequin cuesambo icmequin Esus chuibame, Papa —quequin mibi mamishquin Nuquin Papa chiondambi. Adoac aton Mayan mibēd tabadmiac. Adoaid icquin dacuēdenquio icquin Esus chuibanta, mado. ⁷ ¿Nuquin Papan aton Mayan nuquibēd icmiacta nuqui natia dacuēdpe? Padenquio. Comapenen tantiaquid yec nuquibēd icquin nuqui cuesambo icmec. Adembidi Nuquin Papan Mayanēn tantiamiac nuqui matses bēdamboen tantiec. Adembidi nuqui icsate bunaid namenquio icquin mēmunquidquio icnuc nuqui bēdambo icmec.

⁸ —Adoaid nebi —queshun dacuēdenquio icquin Nuquin Icbo Esus chuibanta. Adembidi dacuēdenquio icquin: —Pabado tantiaquiembi —cata. —Quēnēn nauedtsaid Pabado tantiatiaipi —quenda. Utsibon cuestiadquio icquin chieshēnaqui Nuquin Papan namiacpadec chieshtoenquio icquin Esus chuibanuna. ⁹ Nuquin Papan: —Bēdamboec tabadquid icmequin con Mado Esus tantiamembi —caido icquin adonona. ¿Nuqui bēdamboecuidi tabadshoda Nuquin Papan nuqui bēdamboen isbempondash? Padenquio. Ëndenquimboshē nidaidbēdta matses uabi Nuquin Papan: —Ëmbi chiaid niac-niaquec icsambo icboedēmbi con Mado Esus tantiasho cuidenquio iquendambi —quequin ambi chuipampicpadomboen nuqui Esus tantiamiac. ¹⁰ Aden ambi chuipampid tantiamiabi icshumbic nēbi Esuquidistu matsesmeshun matses tantiamiac. Adoac: —Abi tantiaquid unēsacsho icsaido cuidacno nidmenquio icquin unēstiapimbo icquid icmequin Nuquin Papa yacno abēdi Esuquidistun tabadmendac — quequin nuqui tantiec. ¹¹ Aden tantiaquin Esus chuibenecquidquio nebi. —Ëbi chuibeneta —Esusēn caonda yec Nuquin Papabēda Esus tantiamecquidquio nebi. ¹² Aden chuibeneshobini chieshēnquin quēnēn nauedondash. Adoqui chieshtotiapimbo icquin Esus tantiembi. — Ëmbi tantiaidquio comapenen tantiaquin nabanquidquio Esus nec. Adquid icquin: “Ëbi tantienquio yanushe,” quesahun abi tantiamequin ëbi chieshtomenquio iquendac. Nidaidēn choabi icquin Esusēn ëbi

chieshtoenquo icquid icmendac —quec dacuēdenquo iquebi. ¹³ Tantia, mado. Mibi chuinu. Ĕmbi abimbo chiondaidquo chuiban: —Nuquin Papan chiaidquo nec —qeshun. Esuquidistu tantiaquinc matses tantiaquinc caquin adenuidi chuibanta, mado. ¹⁴ Nuquin Papan Mayan nuquibēd iqueque. Aidēn namiac Ĕmbi chiondacpadomboen Nuquin Papan chiaidquo chuiquin Esus chuibanta, mado.

Onesipodo chiaid

¹⁵ Ĕmbi: —Cho —cac choenquo ichoed mimbi tantiac, mado. Nidaid utsi Asia caid yacnoquido dadpen adec choenquo iccosh. Edemoquenes caid choenquo iccosh. Adecbidi Piquedo caid chedo. ¹⁶ Onesipodo caidēn nēbi bēdamboen isposhi. Ĕbi quēnēn nauedacsho dacuēdenquo icquin isuanisuanquin bēdambo icmiosi. Adsho isun: —Aton shubun icquidobēdta aid bēdamboen ista, Papa —quequin Nuquin Papa chianembi. ¹⁷ Aidēmbi nēmbu shubu dadpen icquid Doma caid yacno choboshon: —¿Mitsimbo Pabado icpec? —quequin yuen nibēmbenequin istuidpondashi. ¹⁸ Mimbi isnubi Epeso yacnoshon aidēmbidi baded-badedquien nashundeniondashi. Adsho tantiashun: —Nidaidēn padpidec choshon Nuquin Ichon Onesipodo bēdamboen ispashun —caimbi.

2

Chieshtoenquo icquin chuiban, quiaid

¹ Chieshtoenquo icquin Esus chuibanta, mado. —Esuquidistun Ĕbi bēdamboen isec. Aidēn bēdambo icmiac dayacquio icquin naimbi —qeshun chieshtoenquo icquin Esus chuibanta. ² Matses dadpenshun tantianuc Ĕmbi chuibansho mimbi tantiondac. Ĕmbi aden chiondaid utsibotsen chuiban. Adshun mimbi chuiboedo abentse-abentsen chuida. —Nēidēn chieshtoenquo icquin Esus chuibantsiash —qeshun: —Mimbisen chuiban —cata, mado. ³ Sondado bēdambo icquidēn nacbimboen chieshtoenquo icquin bēdamboen nabanuna. Matsesēn chieshēnubi Esuquidistun chiacpadomboenuidi nanuna chieshtoenquo icquin. ⁴ Sondadon: —Mibi bēdambo iquec —camenuen aton chuiquid dapan chiacpadomboenuidi naquid. Ambi tantiaid nainquo icquinc utsibon chiacpadomboen nainquo icquinc caquin aton chuiquid dapan chiacpadomboenuidi naquidquo sondado nec. Adomboembidi Nuquin Ichon chiacpadomboenuidi nanuna, mado. ⁵ Ma nuquin matses titinquequidquo. ¿Mitsipadquo icpec? Aton uidēn tanec aton matsesēn chiaction abia titinquec chosho: —Bēdamboec titinquisosh —qeshun mauete menequid. Ambi chiaction titinquiabi icsho mauete menenquo icquid. Adembidi: —Mimbi bēdamboen naoc —Nuquin Icho camenuen ambi chiacpadomboen chieshtoenquo icquin nabanuna, mado. ⁶ Ma nuquin matses tied uaquidquo. ¿Mitsipadquo icpec? Chonoaquidēnquo dayacquio icquin aton tied uashun ambi nitsinaid pequid. Adembidi Esus chuibanquid icquin dayacquio icquin Esus chuiban-chuibanuna ēnenquo icquin. Adoac utsibon Esus tantiabentsiash. ⁷ Aden Ĕmbi chuiboed tantiata. Adsho Nuquin Ichon mibi bēdamboen tantiametsiash.

Esuquidistu tantiata, quiaid

⁸ Utsibon chieshēnubi Esus tantiata, mado. Aidi matsesash isadaidbo tsusedpa Dabidēn tsyuecquid nepanēdash. Nuquin Papan uincuemēnēdaidquo yec abi iquec. Aidquo tantiaquiōta. Aid chuibenequidquo nebi. ⁹ Aden chuisho chieshēnquin bedshun icsambo icquid uidēn uacimbosen shocosh nacnenaidēn mētaniac mēyadebi. ¿Ĕbi

aden uidën uacximboenda Nuquin Papan chiaid uidën uapadic? Padenquoio. Ëmbi chuibenetiapimbo icnuc Nuquin Papan chiaid chuibanquido utsibon adem bidi chuibenendac. ¹⁰ Adnubi: —Aden Nuquin Papan ambi tantiactedi Esuquidistu tantiamendac. Aid tantiaquido unësacsho cuidenquoio icquin abëdi tabadmendac —quec chieshtoenquoio iccobi quenën nauedondaïd yequi. ¹¹ Naden abimbo chiaidquoio tantiash chieshtoenquoio iccobi.

—Abi bunaid ënshun Nuquin Icbon chiacpadomboen naquid chieshëmëñquidën unës uacsho Nuquin Icbon abi yacno abëdi tabadmendac.

¹² Utsibon chieshënaqui chieshtoenquoio icquin Esus tantiec unësash abi yacno nidendac. Nidacsho chuiquid icmiac utsibo namendac.

“Esus tantiatiapimbo iquebi,” quequidobic: “Ëmbi tantiacmaido neque. Nëid nuquibëdi tabadmenquien ictiad, Papa,” quequin Esusën Nuquin Papa chiendac.

¹³ Aden abi tantiesabon ambi chiaid niac-niacsho isun Nuquin Icho Esusën ambi chiacpadomboen naquidquoio icquin icsaïdo cuidendac.

Adembidi ambi chiacpadomboen ambi tantiaquido bëdambo icmëndac —quequin chiaid tantiashun ambi chiacpadomboen naquin Esusën naïd chuibanuna chieshtoenquoio icquin.

Nuquin Papan chiaid isbanta, quiaïd

¹⁴ Ëmbi dada uaquin chuiboed mibëd icquido naden chuibanta, mado. —Nuquin Icbon nuqui isnubi Esusquoio chienquoio yec ambembi chiaid chiec mibi chushcananqueique. Adenda. Adec chushcanansho tantiash matses icsambo yaneeque. Padi —cata, mado. ¹⁵ —Mibi bëdambo iquec —Nuquin Papa camenuen bëdamboen nata. —Dacuëdtiapimbo iquebique. Ëmbi naïd ma Nuquin Papan isnu —qeshun adota. Ambi chiaïd bëdamboen isban-shun chieshtoenquoio icquin Nuquin Papan chiaïdquoio chuibanta, mado.

¹⁶ Ambembi chiaïd chuiquidobëd onquec tabadenda. Adec onquequido icsambo icboedi buëdanqueic Nuquin Papan chiaïd niac-niaquec icsamboshë yaneeque. ¹⁷ Tosho bedacximboec adquidën chiaïd tantiaquido dadpen yaneeque. Adquidën chuïsho tantienda. Aden chuiquid Imeneyo caïd nec.

Adquidbidi Pideto caïd nec. ¹⁸ Aidon Nuquin Papan chiaïdquoio chienquoio icquin muaquin chiec. —Esus tantiaquido unësabi icquido nëbimbobi uincuenacximboec icpec. Unësacsho aton dada chuca uaquin uincuemenuquoio iquendac —quequin muaquin chuïsho tantiashun utsibon Nuquin Icbon chiaïd tantienquoio yanac. ¹⁹ Aidon Esus tantiabien ichitash. Nuquin Papan Esus tantiamiac ënenquoio icquin Esus tantiatsempanëdash. Padnuc Esus tantiaquidombo dadpen iquec. Adquido chuïquin ambi dada uamepampicpadomboen: “ ‘Ëbi tantiaquidombo nec,’ quequin Nuquin Icbon tantiec.” Adnuc Esus tantiaquidën: —Con Icho Esus nec —qeshun ambi icsamboen naïd ënendac.

²⁰ Esus tantiaquido nadquoio iquec. Shubu dapan tsitsan tabëcaïd tabadacximboecquid nec. Tsitsan abentse-abentsec icsactëcquio icnubi utsi-utsiec bëdambo iquec. Icsactëcquidën icsa secanun sandoquid yendac. Bëdambo icquidën di nandoquid yendac. Adcebidi Nuquin Papan shubun tabadtequido iquec. Utsi-utsiec Nuquin Papan chiaïd natiadquoio yec Esus tantiaquidquoio icnubi utsi-utsiec abi icsaïd ënabi: —Esus tantianu —quetsëcquid iquec. ²¹ Esus tantiaquidquoio ictiadquoio yec: —Muaïd chuïsho tantiatiapimbo icquin nëbi Nuquin Icbon chiacpadomboen natiadquoio iquebi —quiash Nuquin Icbon yuambo yantsiash. Adsho Nuquin Icbon bëdamboen nametsiash.

²² Caniabon mēmunenquo icquin abi bunacpadomboen naquid tanenda, mado. Adenquo yec bēdamboec tabadte bunquiota. Nuquin Papan chiaid niacte bunenquo yec: —Nuquin Icho Esus nec —quequidobēdān chieshtoenquo icquin Esus tantiata. Matsetsen tantiec bēdamboec isnanec bēdamboec tabadta. ²³ Mibi yacnoshon ambembi chuiquidon: —Mimbi icsamboen tantiec —canuen: —¿Mitsipaden mimbi tantiapē? —cac chienda. Adquidēn chuisho tantiash matses chushcananondashe. Aidēn chiac chienda. ²⁴ Nuquin Papan chiaid chuibanquid chushcananenquo icquid nendac. Chieshēmēnenquo icquin aton matses bēdamboen isquid nendac. Adembidi nēishēnenquo icquin Nuquin Papan chiaid tantiamequid nendac. Utsibon chieshēnaqui chieshēnanenquo icquid nendac. ²⁵ Esus tantiesabon: —Mimbi Nuquin Papan chiaid chuisho tantiatiapimbo iquebi —cac adembi nēishenquo icquin Nuquin Papan chiaidquo chuibanendac. —Nuquin Papan ambi chiaidquo tantiamiac: “Icsamboen naombi,” quequin ma Esus tantiesan tantiabenu —quequin aden chuibanendac. ²⁶ —Aden Nuquin Papan ambi chiaidquo tantiamiac Esus tantienquo icboedēmbi Esus tantiabenshun abi yuaquidēn Satanasēn namiaid ēnenac. Aden Nuquin Papan chiacpadomboen naindac —queshun chieshtoenquo icquin Nuquin Papan chiaidquo chuibanendac abi chuibanquidēn.

3

Icsambo icquido iquendac, quiaid

¹ Tantia, mado. Mibi chuinu. Esus padpidec choabi icnuc matses dadpenquioshē icsamboshē iquendac. ² Nadquido iquendac. Nēidic utsi tantiatiapimbo yec abiuidsēqui datantiadquido. Nēidic piucquid bedte comapenec bunquidombo. Nēidic: —Is. Ēmbimbo naiduidi bēdambo iqueque —quequido. Nēidic utsibo chieshēnec icsamboec onquequido. Nēidic amēn chiaid niac-niacquido. Nēidic anin chiaid niac-niacquido. Nēidic aton na nashunaqui nashumēnenquo icquido. Nēidic Nuquin Papan chiaid niac-niacquidombo. ³ Nēidic aton matses tantiesabo. Nēidic chiesh bēdanesabo. Nēidic muauanquido. Nēidic abi icsate bunaid ēnenquo icquido. Nēidic cuesanquido. Nēidic bēdambo icquid chieshēnquido. ⁴ Nēidic bēdambo icquid damianquiashic cuesunianquidō. Nēidic bēdamboen tantienquo yec badedi icsa uanquido. Nēidic: —Ēbiuidtsēqui bēdambo iquec —quec abibi tantiadquido. Nēidic ambi naiduidi bunquin Nuquin Papa tantiesabo. ⁵ Nēidic: —Nuquin Papa tantiaquid nebi —quec muaquin aidēn chiaid niac-niacquido. Adquidtedi icsambo icquido nec. —Adquidbēduidi onquec tabadenda —caimbi.

⁶ Adquidon mibi yacnoshon shubu utsin shubu utsinquier isben-isbenac caosh. Adash chidoidquido icnubi shubun puduedshun ambembi chiaid chuibanac caosh. Aden chuisho tantiashun: —Padi —catiadquidi chidon: —Mimbi chiaid tantianu —quequin badedquido tantiac caosh. Nuquin Papan chiaid niacash adecbidi icsate bunquiec tabadac caosh aid chidobo. ⁷ Aden icsambo icquidēn ambembi chuidenesho tantianeshun Nuquin Papan chiaidquo tantiatiapimbo icpac caosh aid chidobo. ⁸⁻⁹ Aid chidobo chiec muaquido icsambo icpampidobimboec iquec. Icsambo icpampid abentsēc Canēs cuēmēdnubi utsi Mambades cuēmēdpampic. Isadaidbo tsusedpa Moisesēn Nuquin Papan chiaidquo chuisho tantiashun aidon: —Mue nec. Ēmbimbo comapenen tantiaquin ismenu —queboedombi bēdiactēsēc tantiaquin nacnenuidpampic. Adsho isun: —Abimbo canquio iccosh. Muachitosh —capampic matsesēn. Adembidi chido chiec muaquidon icsate bunquin ambi chiaid chuitiapimbo icsho Nuquin Papan bēdamboen istiapimbo

iquec. Adembidi aidon muaquin chuisho tantiashun matses dadpeshun: —Muequi nec —capendac.

Nuquin Papan chiaid isbanec bēdamboec tabadte

¹⁰ Ēbien muaquidpenquo nec. Ēmbi naid ma mimbi tantieyoc. —Ma Esus tantianu —quequin Esusēn naid chuibanec bēdamboec tabadondabi. Esus tantiaquidquo icquin matses tantiaquin Esusēn naid chuibeniondambi. Chieshēnaqui chieshtoengui icquin adembi chuibeniondambi. ¹¹ Ēmbi aden chuibancho isun chieshēnondashi. Shubu dadpen icquid Antioquiya caid yacnoshon ēbi: —Cuesnu —casha Nuquin Icbon nac padenquo icpondash. Adshumbic shubu dadpen icquid utsi Iconio caid yacnoshontsen adem-bidi. Adshobini shubu dadpen icquid utsi Disteda caid yacnoshonquo bedshun cuēnoten se-sequin unēs uatsempondash. Adsho Nuquin Icbon nac unēsengui iccondabi. ¹² Ēbipadquido Esus tantiaquidotedi bēdamboec tabad-tiadquo icsho adembidi utsibon comapenen chieshēnendac. ¹³ Padnuen chieshēmēnquidobēd bēdambo icquid damianquiec muaquido bēdiactšec ic-sambo icboedi muauananquiec buēdanquiec icsamboshē yanendac.

¹⁴ Mibi adquidpenquo nec, mado. —Ēmbi isondaaidon bēdambo icquidon abimbo chuibanondashi —quec Nuquin Papan chiaid niaquenquo yec bēdamboec tabadta, mado. ¹⁵ Ēnden bacuēmpi icquin Nuquin Papan chi-aidquo min matsesēn chuibancho mimbi tantianēdac. Adshun: —Aton Mado Esus tantiaquid unēsacsho abēdi Nuquin Papan tabadmendac —quequin mimbi tantiabenēdac. Aden Nuquin Papan bēdamboen iste tantiametembo Nuquin Papan chiaid nendac. ¹⁶ Nuquin Papan chiaid aton Mayanēn tantiamiac matsesēn dada uapampic. Aidēn chiaid abitedimbo bēdamboeshē iquec. Aid isec onquequin: —Nuquin Papan chiacpadec bēdamboec tabad-nuna. Esus tantiaquido yec icsainquien ictiad —quequin abi chuibanquidēn chuibanec. Adembidi: —Esus tantiaquido adesa. Padi. Bēdamboebien natiad —quequin chuibanec. ¹⁷ Nuquin Papan: —Ēmbi chiaidquo tantiashun Esus tantiaquinc matses nashunquinc caic Esus tantiaquido ma bēdamboec tabadnu —quequin ambi chiaidquo dada uamepampic.

4

Nuquin Papan chiaid chuisho tantienquo yaid

¹ Nuquin Papabēdan Esuquidistun mibi isequē. Bēdamboen nata. Esusēn nidaidēn padpidec choshon abitedishun Icbombo icquin unēsaido uincuem-aido unēsabi icquidobēdta chiendac. —Nēid ēbi tantiaquid ēbēdi tabadmimbi. Nēid ēbi tantiesa cuidembi —quequin chiendac. ² Aidēn chiacpadomboen naquin Nuquin Papan chiaidquo chuibanta, mado. Matsesēn tantiat-adquo icnuc adota. Tantiatiapimbo icnubi adembi chuibanta. Esus tantia-quido icsasho isun: —Esus tantiaquido adesambo neque. Bēdamboebien natiad —quequin nēishēmēnenquo icquin chuita, mado. Utsibo bēdamboec tabadsho: —Mibi bēdamboec tabadoc. Aduidequi tabadta —quequin chiesh-toengui icquin chuita. Bēdiactšec tantiatsēcquido: —Esus tantiaquidon nado-quid —quequin chuibanta, mado. ³ —Yuecshun Nuquin Papan chiaidquo matses dadpeshun tantiatiapimbo iguendac —queshun nata, mado. Aden tantiatiapimbo icquidēn Nuquin Papan chiaidpenquo chuisho tantias: —Mimbi ēbi bunaidquo chuisho tantianu. Ēbi chiec cho —quequin muaquid utsi-utsein abi yacno puduedmendac. ⁴ Pamumēdacimbocquin Nuquin Pa-pan chiaid tantienquo icquin tsusedpabon ambembi chiampiduidi tantien-dac. ⁵ Aidēn nacpadomboen nainda, mado. Nuquin Papan chiaidquo bēdamboen tantiaquid yec bēdamboec tabadta. Adsho utsibon chieshēnaqui

chieshtoenquo icquin Esusquo tantiata, mado. Adembidi Nuquin Papan bēdamboen iste Esus tantiesabo chuibanta. —Esus chuibanquidēn nadoquid —caidtedi nabanta, mado.

⁶ —Ēbi unēs uan ěmbi nacpadomboen: “Adota,” mibi caquid nibēdtsiash —qeshun mibi aden chiec nebi. Nēbi Nuquin Papan tantiacpadēn chieshēmēnquidon ěbi unēs uaic. ⁷ Utsibon chieshēnubi ěnenquo icquin Esusēn naid chuibeniombi. —Ēbi bunaid bednu —quec comapenec titinguacimboen dayacquo icquin Nuquin Papan chiaidtedi naombi. Chieshtoenquo icquin Esus tantiaquidquo nebi. Adshobini nēbi unēs uaic. ⁸ Unēs uacshobini matsesēn naid abitedimbo tantiacquidēn Nuquin Icbon: —Ēbi tantiaquin ěmbi chiacpadomboenuidi naic mibi bēdambo iccoque. Nuquin Papa yacno ěbēdi tabadmequin mibi bēdamboshē icmendambi —caindac. Abi chote ushēn choshon aden Nuquin Icbon ěbi chiendac. Adembidi abi chosho iste bunquidotedi abi tantiaquido Nuquin Icbon abēdi tabadmendac.

Timoteyo: Cho, caid

⁹ Nēbimbobi ěbi isec cho, mado. ¹⁰ Utsibo nidanebon ěbentsēqui tsadebique. Demas caid aton na bedteuidi bunec ěbi nianec shubu dadpen icquid Tesadonica caid yacno nidosh. Quedesente caidic nidaid utsi Cadasia caid yacno nidosh. Titobic nidaid utsi Damasia caid yacno nidosh. Aidedi nidanebon ¹¹ Ducas abentsēqui ěbēd iquec. Madcos bedbētsenec cho, mado. Ēbēdtan aidēmbi nēshunquo Esus chuibantsiashe. ¹² Tiquico caid Epeso yacno mibi yacno nidmiombi. ¹³ Shubu dadpen icquid Todoas caid yacno Cadpo cuēmēdquidēn shubun con na niamēdaccondashe. Con dashcute ěmbi dada uaidbēdta bedbētsenec cho, mado. —Abitedi buantiapimbo iquebi —qeshun nēish yua bitsi nacnenaid dada uaiduidtsēqui bēta.

¹⁴ Shocosh nacnenquidēn Adecandedo caidēn comapenen chieshēnondashi. Aid Nuquin Papan cuidendac, mado. ¹⁵ Nuquin Papan chiaid ěmbi chuisho tantiatiapimbo icquin icsamboen chuishunondashibique. Choquin aid isenda: —Ēbitsen icsamboen chuishunushe —qeshun. ¹⁶ Ēnden tauamboen bedshun: —Quēnēn nauednu —cac cuidte chuiquid dapa ěmbentsēqui chuibampondambi. —¿Mitsipadosho isun ěbi bedo? Icsamboen nambo iccombi —capondambi. —Ēbēd icboedon dadpeshun: “Bēdambo icquid nec,” quequin ěmbi naid chuibanac ěbi quēnēn nauedquidon ěbi nidmetsiash —qeshun ěbēd icboedo: —Chiec cho —caqui choenquo iccondash. Aden ěbi cacuidondaido tantiaquin: —Nuquin Papan aido cuidenquo icpashun —caimbi. ¹⁷ Nuquin Icbombini nianenquo iccondash. —Isadaidpembo matses utsibo ma ěmbi naid chuibenenu —quequin cuesambo icmepondashi. Adondaic icshobini chieshēmēnquidon: —Cuesnu —cabededpondash. Nuquin Icbon nac aid matsesēn unēs uainquo icpondashi. ¹⁸ Padpiden chieshēmēnquidon ěbi caic: —Ma mēyanac chieshtoshon Esus tantiēnquo yanu —casha Nuquin Icbon nac chieshtoenquo ictsiabi. —Nuquin Icbombidi abi yacno ambi matses dadpen namiacno abēdi ěbi tabadmendac —qeshun: —“Nuquin Icho bēdamboeshē iquec,” canuna ěnenquo icquin —caimbi.

¹⁹ Mibi yacnocquido: —Mibi caic: “Unēsquo iquec,” quiosh Pabado —quequin chuiban, mado. Nēdic Aquida caid. Nēdic aton chido Pidisida caid. Nēdic Onesipodo caid chedo. Aidedi aden chuiban. ²⁰ Mimbis ondaic Edasto caid shubu dadpen icquid Codinto yacno tēshēdondash ěbi chonoc. Utsibic Tēdopimo caid aton dada icsabudacsho shubu dadpen icquid Mideto caid yacno nianondambi. ²¹ Ue tsasi iquenuanguid taēnushe. Baded cho, mado. Doma yacnocquido nēmbo icquidon: —“Timoteyo unēsquo iquec,”

quequin dada ua —caposhi. Nēidic Eyobudo caid. Nēidic Pudente caid. Nēidic Dino caid. Nēidic Quēdaudia caid. Nēidic Esus tantiaquido nēmbō icquido utsibotedi. Aidedi adosh. ²² —Nuquin Icho Esusēn abēd icquin con mado bēdamboen ispashun —quequin mibi tantiembi. Padi. Aidedi chuiquin dada uaombi, mado.

TITON ISTE

¹ Pabado nebi. Nuquin Papan chiacpaden chuibenequid nebi. Adem-bidi Esuquidistun, Ēbi chuibeneta, caidbidi nebi. Aden chuibanac Nuquin Papan cuēnaido Esuquidistu tantiadonequidquo ma icpanuna. Adquid iquec ma bēdamboec tabadpanuna. ² Muesa Nuquin Papa nec. Adquid icquin, Ēmbi ėnden chiampicpadomboen ėnenquiocquin Esuquidistu tanti-aquido ėbēdi tabadendac, quequin ma aidon tantiapanueshun adomboen chiaid chuiquidquo Esuquidistun icmiondashi. ³ Ambi tantiampicpadēn ambi chuipampid Esuquidistu tantiamenuequin aidēn chuibeneta caid nebi.

⁴ Ēmbi chuibanac Esuquidistu tantiaquid mibi yampondac, Tito. Adquid yanshun Esuquidistubēd icquid nebi, quequin ėmbi tantiacpaden mimbi tantiec. Aden tantiaquid con madobimboecquid mibi icsho ismenuequin dada uaimbique. Isec onqueta.

Esuquidistu tantiaquid icsho isash ėbi icsaid cuidenquo yec Nuquin Papa bēpiscudac, quequin ma ėnenquiocquin mimbi tantiapanuna. Adecbidi Nuquin Papabēd tabadendabi, quequin tantiapanuna, Tito.

Quideta yacno nidshun Titon natequid

⁵ Ēmbi nauidboed mimbi naimenu, quequin mibi Quideta yacno ni-anombi ma mimbi ambi tantiaid icsa chiac ma Quideta yacnocquidon ėmpanuna. Adem-bidi, shubu dadpen icquid uano-uanoecquid yacno nidshun ėmbi chiacpadomboen Esuquidistu tantiadonequid istuidshun Esuquidistu tantiaquid utsibo isbanquin bēdamboen tabadmenuequin chuiquid icta, quequin adquidquidquo chuita, Tito. ⁶ Mimbi Esuquidistu tantiaquid utsibo isbanquin bēdamboen tabadmequin chuiquid icta caid nadquo ictiad, Tito. Bēdamboec tabadquid ictiad. Adecbidi chido abentsēc inquid ictiad. Aton bacuēbotedi Esuquidistu tantiaquidobidi ictiad. Adquidēn bacuēbo icquin bēdamboec tabadquin aton papan chiaidbēda aton titan chiaid chieshenquiocquin nabantiad. ⁷ Aidi utsibēd bēdamboec tabadquin, Nuquibi nanuna, queshun utsibēd onquenquiocquin ambibi tantiacpadomboenuidi nabanesa ictiad. Adecbidi badedquo nēishesa ictiad. Adecbidi paēmboecquid nua aquesa ictiad. Adecbidi cuesnante bunesa ictiad. Adecbidi muaquin bedesa ictiad. ⁸ Adecbidi Esuquidistu tantiaquid utsibo yuedquid ictiad. Adecbidi utsibobēd bēdamboec tabadte bunquid ictiad. Adecbidi utsi bēdamboec tabadsho tantiash, Cuishon, quec tabadquid ictiad. Adecbidi bēdamboen tantiaquin, Naden naic icsatsiabi, queshun naisa ictiad. Adecbidi, Naden naic bēdamboecquid yantsiabi, queshun adomboen naquidquo ictiad. Adecbidi abimbo chuiquidquo ictiad. Adecbidi, Nuquin Papan icsaisa icmebanaid nebi, quequin tantiec, Icsanu, quenquiocquin Nuquin Papan chiacpadomboen nabanquid ictiad. Adquid nec, quequin utsibon chuisho tantiashun adquid Esuquidistu tantiaquid utsibo isbanquin bēdamboen tabadmequin chuiquidquo icta, quequin chuita, Tito. ⁹ Aden utsibo isbanquin bēdamboen tabadmenuequin chuiquid icta, cashun nēid aidō chuita. Nuquin Papan chiaid chuca uainquiocquin bēdamboen chuiban. Aden mimbi chuisho tantiash ma utsibo bēdamboec tabadpanuna. Adem-bidi Nuquin Papan chiaid chuca uaquidēn chuibansho Nuquin Papan chiacpadomboen abimbo chuiban. Aden mimbi chiac, Icsamboen chiombi, quetsiash, quequin mimbi utsibo chuiquid icta caido chuioata, Tito.

¹⁰ Quidetabo nad iqueque. Chuinu. Tantia. Abi chuiquidën chiacpaden naisa Quidetabo dadpen iquec. Abimbo chiosh, camenequin abimbo chiacbimboec aido onquec. Dadpeshun isadaidbon nacpadomboen nanuequin, Shui dëbid dëtemeta, quequin Quidetabon chiec. ¹¹ Adquidon shubu utsin-utsinquec puduedshun ambi tantiaid icsa chuibanac utsin-utsinquien tantiaish cuëshëdec. Adembidi bedte bunquin adquidon muaquin chuibanec. Adquid tantiamenuen Nuquin Papan chiaid bëdamboen chuibanquin ambi muaquin chiaid ëmeta, Tito. ¹² Quidetabon matses ënden icnëdaid abentsëcshun naden aton matses chuipanëdash. “Quidetabo muaic chuinanquidombo nec. Aben icquid yuatemaibimboec uimanëmënkuido nec. Chonoadenquiocquin nua peshun nua actenequido neoaic,” quequin Quidetabo ënden icnëdaidën chuipanëdash. ¹³ Abimbo chuiquidënquo aden chuipanëdash. Aden chuipanëdash, quequin muaquin chuiquid ambi icsamboen tantiaid tantiamequin comapenen chuiban ma Esuquidistu abimbo tantiaquid adquid yampanueshun. ¹⁴ Aden mimbi chuibanac Esuquidistu tantiaquid yanash isadaidbon Nuquin Papan chiaid utsi uain chiampicpaden chuisho tantiesa ma icpanuna. Aden mimbi chuibanac abimbo chuiquidën chiacbimboen niacquidon chuisho ma tantiesa icpanuna. ¹⁵ Nuquin Papan Esuquidistu tantiamiaidën icbon chiaid bëdamboen isoaic. Adomboembidi ambi uabanaid isec. Adash abitedi bëdambo iquec, quec tsadec. Ambi tantiaid icsambocquid icnuc Esuquidistu tantienquiocquin, Nëid mishtemaid nec. Nëid utsi petemaid nec. Nëid utsi actemaid nec, quequin chuibanquidën chiaid tantiec. Aden tantiec aton tantiate icsabudec, İcsaobi, quequin tantienquo iquec. ¹⁶ Nuquin Papa tantiembi, qeshumbic Nuquin Papan chiacpadomboen niacquin tantiesa nebi, quiachimboec tabadsho utsibon adquid isec. Nuquin Papan chiaid niacquid adquid nec. Nuquin Papan icsamboen isaidquo adquid neoaic. Naid bëda natiapimbo icquid neoaic, Tito.

2

Esuquidistu tantiec iccuededquido tantiametequid

¹ Icsateuidi bunquid icnubi mimbi Esuquidistu tantiaquido abi tantiadonequidquo icmenuequin chuibanquin tantieme. ² Mimbi paëmbocquid nua aquenquo icteniaccpadomboen Esuquidistu tantiaquid tsusiobo chuibanquin tantieme. Adembidi, Mibi bëdamboecquid nec, utsibo camenu, quec bëdamboec tabadtenequin tsusiobo ismequin tantiemeoa. Adembidi, Naden naic icsatsiabi, qeshun mimbi nainquo yacpadomboen mimbi bëdamboen tantiaid aido chuibanquin tantiemeoa. Adembidi, Naden naic bëdamboecquid yantsiabi, qeshun adomboembidi naquid nebi, quequin tsusiobo chuibanquin tantiemeoa. Adembidi mimbia Esuquidistu tantiadoniaccpadomboen pausunaid icquin ma adquiobidi tsusiobotsen yampanueshun tantiamequin chuibanta. Adembidi, Esuquidistu tantiec utsibobëd tantiananec mibi tabadtenciaccpadomboen chuibanquin tantieme. Adecbidi, natiatequid iquendac, quequin Esuquidistu tantesa uainquiocquin abi choate mimbi caimbudaccpadomboen chuiquin tantiemeoa, Tito.

³ Adembidi, Esuquidistu tantiaquid ënden machoaido tantiamenuequin chuiban. Nuquin Papan bëdamboecquid icmiaid nebi, quec bëdamboec mibi tabadtenciaccpadomboen tantiamequin chuioa. Adembidi, utsi icsamboen chuiquid iquenda, quequin chuibanquin tantiemeoa. Adembidi, mimbi paëmbocquid nua aquenquo yacpadomboen chuiquin tantiemeoa. Mimbi bëdamboen nabanaid nëbi machocuenaaido ismequin tantieme, quequin ënden machoaido chui, Tito. ⁴ Aden chiac ënden machoaidon aton bënë

aton bacuëbo chedobëd abi tabadaid tantiamenuequin nëbi machocuenaido bëdamboen ismepec. ⁵ Adembidi aidën bëdamboen tantiaquin, Naden naic icsatsiabi, qeshun nainquio iquec. Naden naic bëdambo ictsiabi, quequin naquid, quequin ënden machoaidon nëbi machocuenaido chuibanquin tantiameoapec. Adembidi, Mibi inesa chudmenquio yec tabadta, quequin ënden machoaidon nëbi machocuenaido chuiquin tantiameoapec. Adembidi, aton shubun tabadquin ambi nabanacpadomboen ismequin aidon nëbi machocuenaido tantiameoapec. Adembidi, utsibo bëdamboen tantiaquin ambi nashunacpadomboen ismequin ënden machoaidon nëbi machocuenaido tantiameoaic. Adembidi, aton bënën chiacpadomboen nabanquin nëbi machocuenaido ismequin tantiameoaic. Aden ënden machoaidon abi ismiacpadomboen nëbi machocuenaidon naic tabadsho isash, Nuquin Papan chiacpadomboen naic tabadec chidobo, quequin utsibon ispec.

⁶ Adembidi, caniabo chuibanquin tantiamenuequin, Tito. Naden naic icsatsiabi, quequin nainquio iquembì, quequin mimbi bëdamboen tantiacpadomboen caniabo tantiamenuequin chuiöa. Adembidi, Naden naic bëdambo mibi icpec, quequin mimbi bëdamboen tantiacpadomboen aido tantiamenuequin chuiöa. ⁷ Bëdamboec tabadaid tantiamenuequin ismenu, quec mibibi bëdamboec tabadteneta. Mibibi icsainquiocquin ismequin tantiamenuequin. Adembidi mamënenquiocquin bëdamboen chuiquin tantiamenuequin. ⁸ Adec mibibi bëdamboec tabadtenequin ismequin Nuquin Papan chiaid abimbo mimbi chuibanac Esuquidistu tantiesä mibi chïeshëncquid mibi icsamboen chuitiapimbo yec tabadendac.

⁹ Adembidi yuabo chuiquin, Bëdambo iquebi, min icbo camenuequin ambi chiaidtedi chïeshenquiocquin nabanta, quequin tantiameta, Tito. ¹⁰ Adembidi, min icbon na ampenquiocquin bëdamboen dayun uaquin nashunquin min icbo ismeta, quequin yuabo tantiamenuequin. Aden Esuquidistu tanquin nabansho isun min icbo: Con yua Esuquidistu tantiaquid yec bëdamboshë yanac. Con yua bëdambo icmequidën chiaid tantianu, quendac icbo.

¹¹ Nuquin Papan matses abëd icmenuequin matses icsaid bedshuntequid Esuquidistu icmenuequin chomepanëdash. ¹² Aden chomiac nidaidën tabadquin utsibo tantiaquin Nuquin Papan chiacpadomboen naquin ismiac adomboembidi naic bëdamboec tabadquid. Nuquin Papan bëdamboen tantiamiac bëdamboen tantiasho, Aidën bëdambo icmiaid icquin naden naic bëdambo icpec, quequin naquid. Adembidi, Naden naic icsatsiabi, quequin nainquio icquin Nuquin Papan tantiamiacpadomboen naic nuqui tabadtenec. Adomboembidi Quidetäbo Esuquidistu tantiaquido chuiquin tantiamenuequin, Tito. ¹³ Nuquin Papapadquid con Icho Esuquidistu choaic, quequin cainbudec bëdamboec tabadebi, quequin chuiquin tantiamenuequin. ¹⁴ Nuqui cainaid: Ëmbi con utsibo caid ëbipadquid iquendac, quïash nuqui icsaid bedshunash abided cuidadec unëspanëdash. Adacsho aid tantiaquidquio yec bëdamboec tabadquid nec, quequin chuiquin tantiamenuequin, Tito. ¹⁵ Ëmbi chuiboedtedi chuibanquin tantiamenuequin. Mimbia tantiaquid icquin, Ëmbi chiacpadomboen nabanec tabadteneta, quequin Quidetäbo chuiöata. Mimbi chiacpadomboen nainquiocsho isun cuembo chuiöata. Adecbidi, utsibon mibi icsamboen chuitiapimbocon bëdamboec tabadteneta.

3

Utsi tantiaquin nabantequid

¹ Esuquidistu tantiaquidtedi bëpiscudmenquiocnuequin naden chuibanta, Tito. Min tsusiobon bëdamboen chiaid naquimbi adembidi mibi chuiquid

utsibon bēdamboen chiaid chieshenquiocquin naban. Adembidi, utsibo tantiaquin nashunta, quequin Quideta yacnocquido chui. ² Adembidi, Utsi muaquin chienda, quequin chuiōata. Adecbidi, Utsibobēd tantiananec bēdamboec tabad, quequin chuiōa. Adembidi, Mimbi naiduidi tantienquiocquin nabanta, quequin chuiōa.

³ Ēnden Esuquidistu tantiesa nuqui iccondac. Adquid icquin Nuquin Papan chiacpadomboen nainquio nuqui iccondac. Adquid icquin nuqui bunacpaden nabanec nuqui icsaded-icsadedondac. Utsibobēd icsamboec nuqui cuidnampondac. Adembidi, utsin bēdamboen isaid icsho isash nuqui nēishpondac. Adecbidi utsibobēd nēishash nuqui chushcanampondac.

⁴ Adquid nuqui icnuc matses tantiec abēd icquid icmenuec nuqui icsaid bedshunash abided cuidadec Esuquidistu chopanēdash. ⁵⁻⁶ Adec choash cuidadsho isun Nuquin Papan Esuquidistu nuqui tantiamiac. Adoac abi tantiaquid icsho isun adquidtedi Esuquidistun aton Mayan meniac. Adoac, Bēdamboen nasho abi yacno tabadmendac, quenquio yec nuqui tabadec. Aidēnquio nuqui icsate bunaid tantiamequioquin nuqui ěmec. ⁷ Adec aton Mayan nuquibēd icsho isun, Bēdamboecquid nec. Aidtedi ēbēdi tabadendac, quequin Nuquin Papan tantiec. ⁸ Ēmbi chuita, quequin chiaidtedi abimbo iquec, Tito. Aden tantiaquin Quideta yacnocquido chuiban Esuquidistu tantiaquid icquin ma adomboen nabanec bēdamboec tabadpanuna. Ēmbi chiacpadomboen Esuquidistu tantiaquidtedishun nadenec utsibobēd bēdamboec tabadquid nec, quequin chuita.

⁹ Adec tabadec min tsusedpabo chiec utsibēd nēishnanash icsamboec onquenda, quequin Quidetabo chuita, Tito. Adembidi, aton tsusedpabon naden nata quequin chuinēdaid chuiquin chushcanu qesho adembidi adenda, cata. Aden chiaid Nuquin Papa yacno mibi pudued-metemaidec nec, quequin chuita. ¹⁰ Adec onquequin Esuquidistu tantiaquido cuēshēdmenequin chuibanquid icsho bēdamboen tantiamenequin chuiban. Aden chiaqui niacbidanquin adomboembidi aidēn chuiōasho tantiasun aidi comapenen chuibanquin tantiamēoa. Aden chiaqui padpiden niacbidanquin adomboembidi chuiōasho tantiasun cacumēta, Tito. ¹¹ Adquid ambi icsamboen tantiacpadecuidi tabadquid neque. Adota. Mimbi chiaqui adecuidi tabadquid Nuquin Papa yacno nidtiapimbo yec abibi cuidadtequid nendac.

Utsibo chuiquin chiaid

¹² Nēbi utsibo chuinu. Tantia. Adtemas Tiquico chedo ēbēdi iquec. Abentsēqui Quideta yacno nidmēmbi. Aid mibi yacno choambien mimbi tantiamedonequin chuibanquin naimbudnu quiash Nicopodis yacno nidoata, Tito. Ue dapa sequenec Nicopodis yacno tabadnu, quianec nidendabi. ¹³ Matses icsasho cuidte chuiquid, Senas mibi isbidanec Apodosbēd udi nidec. Aid daēdi mibi yacno chosho yued. Nidnu, qesho aton na nibēdsho isun menequin bēdamboen nidme. ¹⁴ Peshun acnu, quequin Esuquidistu tantiaquidēn chonoadquin nabanquid. Utsi nashunquin adomboembidi nabanec tabadquid. Aden nabanec tabadsho isash utsibo Esuquidistu tantiaquidquibidi yanendac.

¹⁵ Mibi tantiec tabadebi, quequin Tito chuita, ēbēd icquidon cacpadomboen dada uaimbi. Adembidi mibēd icquido Esuquidistu tantiaquido tantiec ēbēd icquido tabadoaic.

Esuquidistun, Bēdambo iquebi, camiaido ma mibitedi icpanuna. Padi. Aidted chiombi, Tito.

PIDEMONËN ISTE

¹ Pabado nebi. Esuquidistun ëbi chuibeneta cac chuibansho quënën nauedaid nebi. Ëbëdi Timoteyo iquec. Aidi Esuquidistu tantiaquid icsho nuqui con utsi caid nec.

Ëbi yuedquid Esuquidistu chuibanquidquio mibi neque. Ëmbi dada uaid isec onqueta, Pidemon. ² Mibëd icquid, Apia, Esuquidistu tantiaquidquio icsho nuqui con chu caid nec. Adquipo mibëd icquidbidi nuqui con utsi caidbidi nec. Sondadon matses icsambocsho cacumiabimboen Esuquidistu tantiaquid icsamenuequid cacumequid Adquipo nec. Aido min shubun Esuquidistu tantiec iccuededquido iqueque. Ëmbi dada uaid bedash isec onquequin aido chuioata, Pidemon. ³ Esuquidistu tantiaquido icsho Nuquin Papan ëbi icsaid cuidenquiocquin ambi bédambo icmebanaid nebi, quequin mibitedishun ma tantiapanuna. Adecbidi, Nuquin Papabëd icquido nebi, quequin ambi tantiamiaidquio ma icpanuna.

Nuquin Papa chiec onquiaid

⁴⁻⁵ Pidemon Nuquin Icho tantiaquidquio nec. Adquid icquin Esuquidistu tantiaquid utsibo tantiaquin nashunquid nec, quequin utsibon chuisho tantias, Pidemon tantiec bédambo iquebi, Papa, quequin Nuquin Papa chiec onquebudebi, Pidemon. ⁶ Aden mibi tantiaquin Pidemon ambi tantiaid Esuquidistu chuibanquid icme. Aden aidën chuibansho mimbi Esuquidistu bédamboen tantiamiac Esuquidistu tantiaquid utsibo ma Pidemonën bédamboen tantiapanuna, Papa, quequin Nuquin Papa chiec onquebudebi.

⁷ Aden ëmbi Nuquin Papa chuibudacpadomboen mimbi naic. Pidemonën Esuquidistu tantiaquid utsibo tantiaquin nashunec, qesho tantias bédambo iquebi, Pidemon.

Onesimo tantiaquin chuidoniaid

⁸ Esuquidistun ëbi chuibeneta caid icquin aid chuibanac abi tantiaquid mibi icpondac, Pidemon. Adquid icquin Esuquidistu tantiaquid utsibo tantiaquin mimbi nashunacpadomboen ëmbi nidmiaidtsen bédamboen tantiaquin nashunta, quequin mibi chuitiadquio icquimbi padenquio iquembi. ⁹ Tantiananquid nuquibi icquin aden chienquio iquembi. Tsusio budobi. Adquid icquin Esuquidistu chuibansho padpiden quënën nauedoshi. ¹⁰ Quënën nauedaid icquin ëmbi Esuquidistu chuibanac aid tantiaquidbidi Onesimo yanash. Adquid yansho ëmbi con mado caid nec. Adquid yanash ¿Onesimo mibi yacno nidacsho ada ëbi bédamboen tantiaquin mimbi nashunondacpaden aidi bédamboen tantiaquin nashunoatsia? Pidemon. ¹¹ Ënden min yua icquin mimbi chiacpadomboen mibi nashunquio iccondaidëmbi nëbi Esuquidistu tantiaquid yanshumbini nëshunquio bédamboen nashunec. Mibi yacno nidshun adomboembidi Onesimon mibi nashunoaindac.

¹² Aidi mibi yacno nidmeoaimbi. Con dayunquio icquid nidmenu, quiash aid tantiec unësquio tsadebi, Pidemon. ¹³ Esuquidistu chuibansho quënën nauedshun tataniac caputiapimbochsho mimbi ëbi nashuntiapimbo iquec. Adec mibi nashumëntiapimbochnobi Onesimombini nashunosh, qeshun nidmetiapimbocquimbi mibi yacno nidmemb. ¹⁴ Onesimo ëbëdi tabadmenuequin chuita, mibi catiapimbo iquebi. Mimbibi aden chiac bédambo ictsiash. ¹⁵ Yuecash cuëshëdenquio yec Pidemombëd Onesimo tabadoaindac, quequin

Nuquin Papan tantiondacadquieci mibi yacnoësh cuenëdaid mibi yacno nidash Onesimo tabadtsiash. ¹⁶ Onesimo min yua iccondaidd Esuquidistu tantiaquid yansho mimbi con utsi caid aidi nendac. Ëbëd icquin natiapim-bocsho aidën nashunebi. Mibi yacno nidshun mimbi chuisho Esuquidistu tantiaquid icquin chieshenquiocquin bëdamboen mibi nashunendac.

¹⁷ Pabado ëbëd isedanquid nec, qeshun mimbi ëbi yuedondacpaden Onesimo yuedta, Pidemon. ¹⁸ Con na utsibëdtabi con na bedtequid Onesimon bedaccondash, quequin mimbi chiactedi mibi meneoaimbi. ¹⁹ Aidedi meneoaimbi, quequin ëmbibi dada uambique. Isec onquequin tantiaquiota. Ëmbi Esuquidistu chuibanac abi tantiaquid yanshun Onesimon bedaidtedi daëd uaquin ëbi nashunquin cuidtiadquidi mibi nec, Pidemon. ²⁰ ¿Aden ëbi nashunuequinda mimbi Onesimo ëbibimboecsho bëdamboen tantiaquin nashumpatsia? Aden mimbi aid nashunuc bëdambo ictsiabi. ²¹ Ëmbi chiactedi daëd uaquin mimbi natsiac, quequin tantiec tsadebi, Pidemon.

²² Nëidtsen chuinu. Tantia. Ëmbi tantienquiocnoc Pabado chonoshe qeshun abi ushondaid nacnenueshun nacnenfa, Pidemon. Mibi ëbi tantiec Nuquin Papa chiec onquiacpadomboen badedquio Nuquin Papan mibëd icmepashuni.

Utsibo chuinu quiaid

²³ Esuquidistu tantiaquid utsibo ëbëdi iquiec. Aidon chiaid chuinu. Tantia. Epapadas, abembi ëbëd icnuec quënën nauedadondaidën: Mibëd icquidotedi tantiec tsadebi, quequin Pidemon chuita, cac adomboen dada uaimbi, Pidemon. ²⁴ Madcos yec Adistadico yec Demas yec Ducas yec quec ëbëd icquido iquiec. Aidombidi: Mibëd icquido tantiec tabadebi, quequin Pidemon chuita, cac dada uaoaimbi. Aidedishun ëmbi Esuquidistu chuibanacpadomboen chuibanoaquido nec.

²⁵ Nuquin Icho Esuquidistun mibitedi bëdambocquid icmebanacpadquieci ma tabadoapanuna, Pidemon.

Padi. Aided dada uaombique. Isec onqueta.

EBEDEYON ISADAIDBON ISTE

Abi yacnoshon ambi uaidon Icbombo Esuquidistu nendac

¹ Ēndenquimboshē Nuquin Papan ěmbi chiacpadomboen chuibanta cac adomboembidi abēd icquido tsusedpabon chuibanoapampic. Abentsēc chuimeshun yuecshun ambi chiaid utsi tsusedpa utsitsen chuimeoa-pampic. Adoshombic yuecquiocshon ambi chiaid utsitsen tsusedpa utsitsen chuimeoa-pampic. Adembidi ambi abi yacnoshon uaid mayan bēda budmiac aidēn chiacpadomboen tsusedpabon chuioapampic. Adembidi natiambocquin uabanquin ismequin chiac adomboembidi chuioapampic.

² Nēbi tsyuecquio Nuquin Papan chiacpadomboen abipadquiocquidēmbi aton Madon chuibanec. Aidi Nuquin Papan ambi uaido con icbo cami-aidquo nec. Nidaid abubēdta uashun aidēnquiocquidtedi aton Papabēdta uabanampidquo aton Madombo nec. ³ Aidi, aton Papa bēdaidquo yampid-padquidquibidi aton Mado neoaic. Aton Papa yacpadquiocquin ismequid yec ambi nadomboen natiad, quequin nadatiambocquin ambi tantiacpadquiequi nidaid abubēd aidēnquiocquidtedi adquiouidi iquec. Aidi aton Papan chiaid niaquesambo yec matses icsaid bedshunash abided cuidadec unēsash, Ēmbi bēdambocquid icmebanaido matses nendac, quequin tantiashic abuc nidoash Nuquin Papabēd tabadoapanēdash aidquiobi. ⁴ Ad icnuc ambi abi yacnoshon uaido abipadquid nibēdec. Aidon con Icbombo caidquo nec.

⁵ ¿Ambi abi yacnoshon uaid mayan bēda isec:

“Con mado mibi nec.

Ēbi min papa nendac, quepecta Nuquin Papa iquec? Padenquo.

Adecbidi:

¿Nēidēn Papa nebi.

Adecbidi: Con mado nec, quepecta Nuquin Papa iquec aido caic? Padenquo.”

⁶ Abēd Abiambo Yampidi nidaidēn tabadash choasho isun Nuquin Papan ismequin:

“Nēid con Madombo Abentsēqui nec. Aidquo tantiec con Icho nec, quec cuishon quec, ambi naid chiec cuēdēn, cac aden ambi abi yacnoshon uaido mayan bēdabo chuibanec cuēdēncuededendac.”

⁷ Ambi abi yacnoshon uaido mayan bēdabo naden Nuquin Papan chiec:

“Ēmbi chiacpadequi cunquequid yanec.

Adecbidi, ěmbi chiacpadequi cuēte nēdēnquedote iquendac.”

⁸ Padnuen ambi uacmaid abipadquid aton Madombo utsi uatiapimbo iquec. Adquidquo icsho Nuquin Papan naden chiec:

“Ēnenquiocquin ěbēdta Chuiquid Abentsēcquio mibi iquendac.

Adecbidi nāmequid bēdaidquo mibi iquendac.

⁹ Ēbipadquid iquec bēdamboec tabadquin nabante bunquidquo mibi nec.

Adquid yec icsamboec tabadquin nabante bunesambobidi mibi nec.

Adquid yec ěbi yacpadquidquo Icho Abentsēcquibidi mibi nec. Mibēd icquido adquid nibēdec.

Mibi abentsēqui adquidquo iquec. Adquid iquec, Bēdambo iquebi, quec mibi cuishon quendac.”

¹⁰ Adembidi Nuquin Papan naden aton Mado chuioaic,

“Tauamboen nidaid abubēdta uashun aidēnquiocquidtedi mimbi uabampampic.

Aidtedishun icbombo mibi nec.

11-12 Aidededi enëndendac.

Mibien nibëdantiapimbo yec abi tabadendac.

Aidededi dashcute shëñibudaid niacbimboen chuca uaindac.

Mibien Abiambu Yampid yec abi enëdesa mibi iquendac.

13 Nëbi cainec ëbëdquoio tabadec cho.

Mibi chieshënquidtedi nibëdquoio icmenun nabono. Chiata,”

quequin Nuquin Papan chiampic. ¿Ambi abi yacnoshon uaido mayan bëda aden chuipampidta nepadic? Padenquoio. Esuquidistu aden chuipampic.

14 Ambi abi yacnoshon uaido mayan bëdabo Nuquin Papan, Èbëd tabadtequidombo nashunta, caido nec.

2

Ambi chiaid tantiesa icchitomane, qeshun tantiadonequiota caid

1 Adec abitedishun Icbombo aton Mado icnuc ambi chiaid chieshënchitomane qeshun tantiadonequiec tabadnuna. 2 Èndenquimboshë ambi, Naden nata, quequin chiaid ambi abi yacnoshon uaido mayan bëdabo chuimiapadomboenuidi naisa icsho isun Nuquin Papan cuidpampic. ¿Aden èndenquimboshë ambi chiaid chieshënquid ambi cuidpampicpaden 3 nëbi icquidtsen ambi chiaid chieshënsho isun cuidenquioda icpadic? Ambi chiaid niacquid ambi cuidtiadquidi icnubi aton Madoded cuidpanëdash. Adoac, Èbi yacno Yuedanquid nebi, quequin aton Madonquoio Esusëmba chiamiac adomboebidi abi tantiaquidontsen chuiopondashi. Aden Esusën chiaid tantiaquidon chuibanubien, 4 Èmbi chiaidquoio chuibanoapec, quequin ismenuequin aton Mayanën Nuquin Papabëd icquidën tantiamebanacpadomboen nadatiamboequin utsi-utsien bëdamebanquinc, mayan icsa dapudedmequinc, unësaid uincuemequinc caquin adquidën-adquidënquien nabedpanëdash.

Matses icnu quiash Esuquidistu matsespanëdash

5 Adembidi chuinu. Tantiata. Abi yacno Esuquidistu tantiaquido choash tabadsho isun, Nëido ëbi yacnoshon ëmbi uaido mayan bëdabo mibi chuiquid nec, quenquoio Nuquin Papa iquendac. 6 Èndenquimbo aden tantiaquin dada uaquin naden Nuquin Papa chiec Dabid pado onquepampic:

“Tantiaquiono. Èbi chui, Papa. ¿Atotsieshun matses mimbi uaid pistëcquoio icsho mimbi comapenen tantiatequid aido icpec? Papa.

Adembidi, ¿Atotsieshun Adanën tsyuecquido mimbi nashumpe? Papa.

7 Nëbi chuitan mimbi cac mibi yacnoshon uaid mayan bëdan adomboebidi chuioc matsesën nabanec.

Yuecquiocshon mibipadquid matses mimbi icmendac.

8 Adquid icmeshun mimbi uaidtedishun icbombobidi aid mimbi icmendac,” quequin abimbo chiampid nec. Nëbi abitedishun icbo matses mimbi icmi-ambo iquec. 9 Utsien Nuquin Papapadquidquoio yequi matsesun Nuquin Papan tantiamiapaden ambi abi yacnoshon uaido mayan bëdabon chiac nabamboedi nëbi aton Papabëd tsadec abitedishun Icbombo yanac. Aidi Nuquin Papan chiapadomboen nanuec nidaidënshun tishac matsesash matses tantiec matses icsaid bedshunash abided cuidadec unësash abitedishun Icbombo yampanëdash.

10 Nuquin Papa abitedi uaquidquoio icnuc ambi tantiacpadec iquec. Adquid icquin ambi, Matses icsaisa icmeshun con bacuë icmembu, quequin tantiacpaden ëbi yacno abi tantiaquid yuedquid con Madombo iquendac, quequin ambi chiampicpadquiequi aton Mado matsespanëdash. Aidi matses yec natiamanquequi icsaisa yec unësash uincuenash bëyucanec abi yacno

dectatonepanēdash ma Nuquin Papan, Matses con bacuē icmembali, quequin tantiaido ēbi tsibanec dectatonepanu quiash. ¹¹ Matses bēdambo icmequid Esuquidistun Papa ambi bēdambo icmebantequidon Papabidi nendac. Aton Papa Abentsēqui icnu Esuquidistu Nuquin Papa yacno choash, Con utsibo nec, quependac ¹² aton Papa chiec:

“Mibi chuiquin con utsibo tantiamenu, Papa.

Aidobēd tabadquimbi mibi chuinu. Tantia, Papa, quependac.”

¹³ Adembidi chuioaic:

“Mibi tantiaquin mimbi chiampicpadomboen nabanash choaobi, Papa.

Ēbi tsibantequid mimbi bēdaidquio icmiaidquio bēec choaobi, quequin mibi chiendambi, Papa,”

quequin matsesabi yec abuc tabadquin Esuquidistun chuiampic.

¹⁴ Matses namibēd intacchoquid yec unēstequid icsho mēnchicquid icnu quiash Esuquidistu matsesash unēstequid yampanēdash. Ma matses mayan icsan dacuēdmequin dēcatemēntiapimbo yampanu quiash matsesash unēstequid yampanēdash ¹⁵ ma mayan icsan ambi dacuēdmiaido ambi yuaido ichoedi matses ěmibi mēnchictequid ma icpanuna. ¹⁶ Ēmibi uaido mayan bēdabo unēstequid icsho mēnchicnu, quenquio yec matsesash Esuquidistu unēspanēdash. Abadauanēn tsyuecquido mēnchicnu, quiash matsespanēdash.

¹⁷ Aden ambi chiacpaden nanuec matsespadquid yampanēdash. Adec matsesash matses nēnacpadquieic nēmpañēdash. Abi bundoacpadquieic bundopanēdash. Abi natiacpadquieic natiatequid icpanēdash. Mayan icsan icsamenuequin tanaidbidi icpanēdash. Matses yanash icsaisa yec matses icsaid bedshunash abided cuidadec unēspanēdash matses Nuquin Papan bēdamboen istequid icmenuec. Adecbidi, Matses icsaisa yanabi yec chuibanec Nuquin Papabēd onquetiapimbo iquec, quec matses chuibanec Nuquin Papabēd aidi onquec. ¹⁸ Matsesacsho mayan icsan: Nuquin Papan chiaid niacmenu, quequin tanac niaquesa Esus icpanēdash. Adquid icquin nuquitsen mayan icsan: Nuquin Papan chiaid niacmenu, cac, Chieshnushe ēbi dayacquio icmec cho, cac badedquio choquin chieshesa nuqui icmendac.

3

Abi yacno yuedanquidquio icquin Moises dēniacquid Esuquidistu

¹ Adec matses icsaid bedshunash abided cuidadaid Esuquidistu tantiaquido aton shubun icquido nec. Adquid icquin Nuquin Papan, Ēbi chuibeneta, cashumbic adembidi ambi matses chuibanec ēbēd onquequid dapa icoata caid Esuquidistu nec, quequin aidquio tantiaquionona.

² Nuquin Papan chiacpadomboen chieshenquiocquin naquido Nuquin Papan shubun icquido abi tantiaquido iquendac, quequin Moisesēn chuidedchuidedampicpaden Esuquidistun adomboembidi chuibampanēdash. ³ Aidi

Abiambo Yampid yec, Ēbi tantiaquido con shubun icquido nendac, Esuquidistu quiacpadec adecbidi adtiapimbo Moises icoapampic. ⁴ Nēditēd con shubun ēbēdi tabadendac, quequid shubu icho nec. Aden Nuquin Papan chiacpadomboen aton shubun icquido bēdambocquid icmequid Esuquidistu nec. ⁵ Nuquin Papan shubun icquid ambi namiaidquio Moises icquin Nuquin Papan: Matses con shubun icquido icmequid iquendac, quequin min matses chuita, cacpadomboen chuiquid Moises icpampic. ⁶ Esuquidistu Nuquin Papan Madombo yampidquio aton Papan shubun icquid icquin aton Papan Moises chuimiampicpaden aton shubun icquido icmepañēdash. Aidēn shubun icquid nebi, qeshun chieshenquiocquin cainquidquio aton shubun icquidquio nuqui nendac.

Chieshenda

⁷ Aton shubun tabadnuequid naden Nuquin Papan Mayanën ambi chiaid mibi bēdamboen tantiamenuen chieque. Tantiata:

“Nēbimbobi Nuquin Papan chiaid chieshēnenquio yec tabadta.

⁸ Equipito yacnoēsh cuēte nibēdacno capuquin tsusedpabon, ¿Nuquibēdida Nuquin Papa iqueque? Tantiabono, qeshun ambi chiaid chieshēmpampicpaden chieshēnenda.

⁹ Cuēte nibēdacno seta 40ted matamec capucuenequin tsusedpabon Nuquin Papan nadatiambocquin naded-nādedsho isquimbi

¿Ambi chiaid niacshoda Nuquin Papan ēbi cuidpeba?

Isbono, quiacpadquiec tsusedpabo icsamboec tabadpampic.

¹⁰ Adec tabadsho isash nēishpondabi.

Ēmbi chiaid chieshēnec ambibi tantiacpadequi icsadenepampic.

¹¹ Adquid icsho isun chushcain: Ēmbi abitedi uabanquin nainash ēbi tabadacno aidtedi puduedmenquio iquembi, quequin chiacpadomboen naindambi. Abimbo caimbi,”

quequin Nuquin Papan isadaidbo chiampid nec.

¹² Abiambo Yampid Nuquin Papa abi iquec, quequin tantiasch chieshēdchitomane qeshun tantiadonequiota. ¹³ Nuquin Papan

chiacpadquiec tabadnuna, quec badiadquidēn-badiadquidēnquiec chuinanec onqueta ma adoac icsamianquidēn chiac Nuquin Papan

chiaid chieshēnenquiocpanuna. ¹⁴ Esusbēd icquid nebi, quiondapaden tantiadenequin caimbudec aton matses yec Esus yacno nidanetequidquio

mibi nendac. ¹⁵ Nuquin Papan chiampid utsitsen chuinu. Tantia:

“Nēbimbobi Nuquin Papan chiaid tantesa uampicpaden tantesa uainda.”

¹⁶ ¿Tsuntsin Nuquin Papan chiaid tantiaschun chieshēmpampic? ¿Equipito yacnoshon bēyucanquin Moisesēn buanaido Nuquin Papan chiaid tantiasch

chieshquido yanenquioda icpampic? ¹⁷ ¿Tsutsibidi seta 40ted matamec chiesho isash Nuquin Papa aidtedbidi seta matamec nēishted-nēishtedpampic? Adoac ¿Cuēte nibēdacnoēsh icsaquidtedi unēsbudnenquioda icpampic?

¹⁸ ¿Abitedi uabanquin nainash ēbi tabadacno puduedmenquio iquembi, quequin tsutsi Nuquin Papan chuipampic? ¿Ambi chiaid chieshēnquid

Nuquin Papan chienquioda icpampic? ¹⁹ Ai, tsusedpabon Nuquin Papan chiaid tantiasch, Bēdambo iqueque. Adonona, queboedombi, Nuqui nabocpadomboen nanuna, quequin ambi chiaid chieshēnsho Nuquin Papan

abi yacno puduedmetiapimbo icpampic.

4*Ēbi yacno puduedash ēbēd tabadtequid quiaid*

¹ Ēbi yacno puduedash ēbēd tabadtequid iquendac, quequin Nuquin Papan chiampicpadomboen nēbimbobi chuioaique. Abi yacno abēdi ic-

tiapimbo icchitomane quequin Esuquidistu tantiadonequionona. ² Ēbi yacno puduedash tabadtequid iquendac, quequin ēndenquimboshē Nuquin

Papan nuquin tsusedpabo chiampicpadomboen nēbi nuqui chuioaic. Aden ēndenquimbo chuisho tantiasch, Nuquin Papan chiaid abimbo iquec, quiasch tantienquio yanash, Aid cainu, quetiapiimbo tsusedpabo utsi-utsiec yampampic. ³ Ambi chiaid tantiaquidomboen nēbi aidbēdi tabadec.

“Ēnden yampidon tantienquiocsho isash, Abitedi uabanquin nainash ēbi tabadacno chotiapiimbo aido iquendac,”

quequin chushcaquin Nuquin Papan aden chuipampic. Tauamboec ambi tantiacpadomboen abitedi uabanquin nainash Nuquin Papa quenenash

tabadpampic. ⁴ Abi tabadaid chuiquin Nuquin Papan naden dada uamiampique. Tantia: “Seistedec ushquin abitedi uabanash badiad utsin ênash tabadpobi.” ⁵ Ashumbic nadentsen dada uamiampic:

“Ëbi ênash tabadacno ãmbi chiaid chieshênquido chotiapimbo iquendac,”
quequin chuiampic.

⁶ Aden chuimiãc êndenquimboshê ambi chiaid tantiesa icquin niãcniãcquec Nuquin Papabêd tabadtiapimbo icpampid icnubi ambi chiacpadomboen naquin cãmpampidobêd nêbi nidaid utsi-utsiec icquido Nuquin Papabêd tabadtequid nendac. ⁷ Ambi tantiacpadên Nuquin Papan chuimiãcpaden Dabid padon:

“Icsachitomane qeshun Nuquin Papan chiaid tantiaquiota,”

quequin dada uãpampic. ⁸ Chuiquid dapa Dabid tishãbocnoc Equipito yãcnoêsh nidaid Canan yãcno abi chuiquid dapa Osuebêd isadaidbo chochopampic. Capuec ênêdash nidaid Canan yãcno cho-choash isadaidbo ênêdenquio yec tabadte icnuc, Ëbi yãcno ênêdenquio yec tabadte iquendac, quequin Canan yãcno choash tabadquidon tsyuecquid Dabid pado Nuquin Papan chuimenquio ictsenãmpic. ⁹ Aden Dabid pado chuimiãid tantiaash abi tantiadonequidombo Nuquin Papabêd tabadquido nendac. ¹⁰ Aden uabanquin nainash Nuquin Papa tabadãcpadec ambi bêdambo icmenuequin tantiactedi nabanquin nainash aïdbêdi tabadendac. ¹¹ Nuquin Papabêd tabadnuequin ambi tantiacpadec icnuen nainu, qeshun Esuquidistu tantiaquionona. Nuquin Papan chiaid tantiesa yanash tsusedpabo puduedenquiocpãmpicpadec icmane qeshun adonona.

¹² Nuquin Papan chiaid ambia chuiãpãmpidquio abi iquec. Nadatiãmbocquïn tantiamete ambi chiaid nec. Shocosh siante abiuc dãedi cuênumbocquidên siaid uguêduc sênquin nami icsaid isendac. Adomboembidi Nuquin Papan chiaid chiac papuededquin matsesên tantiaïdtedi uguêduc sênãid isãcimbocnuc abi icsaid tantiamendac. Ambi, Naden nanuna, quequin chiabi yãidtedi abi bunquin ambi chiabi yãidtedibidi matses tantiamequin naden: Mimiã tantiaïd icsã nêid icnubi mimiã tantiaïd utsi bêdambo iquec. Adebidi, mibi bunaid icsã nêid icnubi mibi bunaid utsi bêdambo iquec, quequin tantiamebãshun mimiã tantiaïd icsã mibi bunaid icsãbêdtabi ênta, quequin Nuquin Papan chiaidênquio mibi tantiamendac. ¹³ Abitedi isquidquio Nuquin Papa nec. Adquid icquin matses ompodtiãpimbo-cnoc isendac. Adembidi, Ëmbi chiacpadomboenda matsesên nãbanoshe. Tãntianu, qeshun, abi yãcno tabadnuequin cãinquido bêsquioquin ambi nãbanãidtedi chuimendac.

Matses chuibanec Nuquin Papabêd onquequid dapa Esuquidistu

¹⁴ Adec Nuquin Papa abitedi isquidquio icnubi icsãmbocquid icquin ambemiã matsesên aïd chuitiapimbocho isun abi tantiaquido chuibanec Nuquin Papabêd onquequid dapa ênden abi yãcno dectatonêdaïd Esuquidistu nec. Aïdi Nuquin Papan Madombo nec, quequin tantiesa yãchitomane qeshun aïdquio tantiaquionona. ¹⁵ Matses chuibanec Nuquin Papabêd onquequid dapa matses yequi natiamãcmaidbimboec tsãdpondash, que-tiapimbo nuqui iquec. Matsesãcsho mayan icsã, Nuquin Papan chiaïd niãcmenu, cac niãquenquio Esuquidistun icpãnêdash. ¹⁶ Adquid nuqui chuibanec Nuquin Papabêd onquequid dapa iquec, quequin tantiec dacuêdenquio yec abi yãcno ênden Esuquidistubêd puduedquidêmbimboen Nuquin Papa êmbitsen chuïnuna. Icsashun Nuquin Papa chiac, Con mado Esus mibi icsãid bẽdshunash abided cuidãdpanêdash, quequin tantiec mibi icsãid bẽpiscudobi, quequin mibi tantiamec. Adembidi mibi natiamiaïd

abi chuisho Nuquin Papan Mayanën mibi chieshmenquiocquin dayacquoio icmendac.

5

¹Ëndenquimbo Nuquin Papan, Min matses chuibanec ëbëd onquequid dapa icta, caid isadaidbo utsi-utsiec icpampic. Adquid Nuquin Papan icmiac, Con matses icsapash icnui, qeshun nidaidën capuquid yua cuesunedenequin taudienepampic. Adembidi, Mibi bëdambo iquec, Papa, quequin ismequin, Nëid menenu, cac Nuquin Papan naden nata cain chiacpadomboen naquin aton matsesën bëaido cuesuneshun taudienepampic. ²Aton matses chuibanec Nuquin Papabëd onquequid dapan aton matses icsasho isun, Con matsesbëdi icsaquid nebi, quequin ³nidaidën capuquid yua utsi-utsien cuesunedenepampic.

⁴Aidi, Con matses chuibanec Nuquin Papabëd onquequid dapa icnu, quenquoio icpampic. Nuquin Papambi, Min matses chuibanec ëbëd onquequid dapa icta, caid nepampic. Min matses chuibanec ëbëd onquequid dapa icta, Nuquin Papan abia caid Adon cuëmëdquid icpampic. Aidi unësan abi tsibanquid-abi tsibanquidquien Nuquin Papan, Min matses chuibanec ëbëd onquequid dapa icta, caid icpampic. ⁵Adembidi Nuquin Papan, Matses chuibanec ëbëd onquequid dapa icta, caid Esuquidistu iquec. Ëbibi adquid icnu, quenquoio Esuquidistu icpanëdash. Aton Papambien:

“Mibi con Madombo neque.

Con shubun icquido mimi icmiaido chuibanec ëbëd onquequid dapa icta,” capampic aton Papan Esuquidistu chuiquin. Adembidi Esuquidistu chuiquoquin aton Papanquoio:

“Matsesash icsaisa yec min utsibo icsaid bedshunash cuidadec unësash uincuenash matses chuibanec ëbëd onquequid dapa icta,”

capampic. ⁶Ambi chiaid utsi nad icpampic:

“Matses chuibanec ëbëd onquequid dapa Medquisedec yampidpadquid mibi nendac.

Adquid yec ënëdenquioctequidquio mibi nendac.”

⁷Adec, Con Pan chiampicpadquid icnu, quish matsesacsho unës uaquin mëyante nendabi, quequin tantiec shubiec nadpanëdash. Matses icsaid bedshunash cuidadquid ëbi icmenda, quetiapimbo iquebi, Papa. Matses icsaid bedshunash cuidadquid iquendabi. Mimi chiacpadomboen natiadquio iquebi, Papa, quequin yuen chuidonepanëdash Esuquidistun. Aden abi chuisho aton Papan adquidquio icmepanëdash. ⁸Nuquin Papan Madombo iquequi matsesacsho mëyanac Nuquin Papan chiacpadomboen tantiabepanëdash. ⁹Aden tantiabesh matses icsaid bedshunash abided cuidadash Nuquin Papa yacno Yuedanquid yanguiopanëdash. ¹⁰Adoacsho isun, Nëbi matses chuibanec ëbëd onquequid dapa Medquisedecpadquid icta, cain Nuquin Papan Esus chuipampic.

Nuquin Papan chiaid ënden tantiaboedi tantiesa yanenda

¹¹Ambia matses chuibanec Nuquin Papabëd onquequid dapa Medquisedec nepampic. Aid chuiquin tantiamete dadpen iquec. Aidtedi chuitiadquiocquin mibi eme uacsho ¿mitsipadomboentsimbi chuibanquin mibi tantiamete? ¹²Mibia utsin tantiamiaid icquin ënden tantiabepatecnëdan mibitedishun. Adembidi mimi abia tantiaid utsibo tantiamepatecnëdan. Bacuën shuma chishquin tantiacpaden tantiaquid icquin Nuquin Papan chiaid tantiatipimbo mimi icpec. ¹³Shuma chishquid bacuëmpi, Bëdamboen nata, quequin chiaid tantiesa nec. ¹⁴Pete pequidëmbien, Nadomboen nata, quequin ismiac adomboembidi isbanec

mëquiadquidën icsa uainquiocquin nabanec. Adomboembidi Nuquin Papan chiaid tantiamiac tantiabenquidquo yanshun adomboen nabandene. Adquid yanshun utsin, Naden nata, caqui, Aden naic Nuquin Papapadquid yampebi, quequin nabanquid. Utsin, Naden nata, caqui, Aden naic icsatsiabi, qeshun nainquio iquendac.

6

¹ Aden Esus chuiquin abia tantiamiaid bëdamboen tantiashun abipadquid icnequin abi chuiquin tantiamiaid utsi tantiaquionona. Abia tantiamiaid nad iqueque. Tantia. Chuinu. Esus tantiaquid icta. Adquid icquin icsaid ënta. Adembidi, Nuquin Papan chiaid tantiaquidquo icta. ² Adembidi, Esus tantiaquin acten mentometa. Adembidi, Nuquin Papan abi tantiaquid aton Mayan menuequin mëdanten mamishaid icta. Adembidi, Abi tantiaquid unësash uincuenta iquec, quequin tantiaquidquo icta. Adembidi, Abi tantiesa cuidtequid iquendac, quequin tantiec bëdamboec tabadteneta. ³ Aidedi mimbi tantioc. Aidedi tantiaquioshon, Adembidi ambi tantiamiaid utsitedi tantianuna, quequin tantiaquin nabanta. ⁴ Aden Esuquidistu tantiasho isun aton Mayan Nuquin Papan meniaid icboedi ⁵ Nuquin Papan chiacpadomboen nadatiambocquin nabamboed, ⁶ Esus matsesquio yec ic-samboquid nepanëdash, quiash, Esus cuesten decan, quequidbimboecquid icscho Nuquin Papan aid isendac. Aidën oncain Esus mamëshunec. Aden Esus tantienquio yanacsho bëdamboen tantiamenuen chuiquin, Icsaobique. Èbi icsaid ënu, cametiapimbo Nuquin Papan iquendac.

⁷ Baded-badedquiec ue sequequin nidaid pachi uaidën tiedën caniquid caniacsho taneshcaquidën petequid nendac. Adecbidi Esuquidistu chuibanac abi tantiaquiosho Icbon yuedaio iquendac. ⁸ Echobëd cana shëta chedo ëshë idash dadpen yanushë qeshun nëdëncatequid nendac. Adecbidi icsamboen chiaid tantiaquid uquë nësiatequid nendac.

⁹ Aden mibi chuiquimbi, Nuquin Papan nësiatemaid mibi nec, quequin tantiembi. Esuquidistu tantiaquid yec abi tantiaquid utsibobëd tantiananec bëdamboec tabadquin ismequid nec, quequin mibi chuiquin utsibon chioshi. ¹⁰ Adoac abi tantiaquid utsibo tantiaquin mimbi nashundeniaid Nuquin Papan bëpiscudenquiocquin tantiec. ¹¹ Adecbidi utsibobëd tantiananec mibi bëdamboec tabadpashun. Adec tabadash abi yacno puduedsho, Bëdamboen mimbi nabanoc, Nuquin Papan mibi caindac. ¹² Aden nabanec chieshenquiocquin Nuquin Papan chiaid tantiaquioquin tsusedpabomba caimbudec unësash Nuquin Papa yacno puduedampicpade Esuquidistu tantiaquioquin ënenquiocquin caimbudequi ma Nuquin Papa yacno puduedpanuna.

Naden nanu quec Nuquin Papa muatiapimbo iquec

¹³ Èndenquimboshë Abadauan bëdamboec tabadsho isun ambia tantiaquidquo abi yampidquibidi icquin, Èmbibi tantiacpadomboen nanuna. Abimbo caimbi, quequin Nuquin Papan naden chuipampic: ¹⁴ “Mimbi tishmiaidën tsyuecquido dadpen iquendac, qeshun ëmbi chiacpadomboen nabanquin mibi, Bëdambo iquebi, camembi,” quequin Nuquin Papan Abadauan chuipampic. ¹⁵ Aden chuisho tantiashun caimbudquin tishpimpocquidëmbi Abadauanën chidon aton mado tishpampic.

¹⁶ Abimbo caimbi, quequin abitedi tantiaquidënu Nuquin Papan chiac utsi, Muenec, quetiapimbo iquendac. ¹⁷ Adembidi, Èbi yacno tabadte iquendac, quequin ënden yampidën Nuquin Papan chiaid chuca uatiapimbo iquebi, quequin Esuquidistu tantiaquido tantiamenuen abimbo caimbi,

quequin chuipanēdash. ¹⁸ Adec Nuquin Papa muatiapimbo icquin ambi chi-acpadomboen naquidquo Nuquin Papa nec. Adembidi, Ēbi yacno tabadte iquec, quequin chiaid chuca uatiapimbo iquec. Adquid Nuquin Papa icnuc abi yacno ěbi puduedmequid Esus iquec, quequin caimbudquid nuqui nendac. ¹⁹ Aden caimbudquin, Ēnden Nuquin Papa yacno puduedshun ěbi yuedquid iquec, quequin nuqui tantiec. ²⁰ Nuqui caintequid Esuquidistu ěnden Nuquin Papa yacno bēyucanec abi tantiaquido chuibanec Nuquin Papabēd onquenuec puduedash Medquisedecpadquid yampanēdash.

7

Medquisedec matses chuibanec Nuquin Papabēd onquequid dapa

¹ Medquisedec nad icpampic, Saden yacnocquido chuiquid dapa nepampic. Ambi Saden cain cuēnāidi yuecshun Edusaden cain cuēnoapampic. Aidbidi Nuquin Papan, Matses chuibanec ěbēd onquequid dapa icta, caid nepampic. Adquid icquin aton mado bedboedo tsibānshun cuesuniash Abadauan chosho bēquedshun, Nuquin Papan bēdamboen isaidquio mibi nec, quequin Medquisedequēn Abadauan chuipampic. ² Adsho tantias, Nuquin Papan con mado bedmiaid nebi, quequin ambi cuesunoēn na ambi bedboed musuctanquin abi chuibanec Nuquin Papa chiec onquequid dapa Medquisedec Abadauanēn menepampic. Bēdamboen tabadmequid icsho Medquisedec cuēmpampic. Adembidi, Saden yacnocquido chuiquid dapa icquin bēdamboen tabadmequid icsho Medquisedec cuēmpampic. ³ Aidi aton papabēd aton tita nibēdquid nec. Nēid ushēn tishaid nebi, quetiapimbo aid iquec. Abi unēste ushē adquiobidi iquec. Nuquin Papan Madombo aben icquidpadquid Medquisedec nec. Matses chuibanec Nuquin Papabēd onquequid dapa yanash adquidquidquid iquec. Utsi yantiapimbo iquec.

⁴ Aidi ěbi chuibanec Nuquin Papabēd onquequid dapa nec, quequin ismequin ambi bedaid aton na musuctanquin Abadauanēn Medquisedec menepampic. ⁵ Yuecquiocshon Nuquin Papan: Min matses chuibanec ěbēd onquequid dapa icta, caid mibi icquin min utsibon aton na musucaid bedshunta, quequin Debi chuipampic. Adoac adquid Debi icash unēsān aton tsyuecquid abentse-abentsec icpampic. Debi Abadauanēn tsyuecquid yec aton utsibonquio aton na musucaid bedquid icpampic. ⁶ Medquisedequēmbien tsyuecquidpenquio icquimbi Debin tsusedpa Abadauanēn na musucaid bedshun, Nuquin Papan bēdamboen isaidquio mibi nec, quequin Abadauan chuipampic. ⁷ Bēdambo mibi icmenu, quequin Nuquin Papan chiaid ambia chuiquid Medquisedec icpampic. ⁸ Yuecshun ambia chuibanec Nuquin Papabēd onquequid dapapadquiocquin aton matsesēn na musucaid bedquid Debi unēsāmpampic. Adēcbidi aton tsyuecquido unēsāmpampic. Padnuen Abadauanēn na musucaid bedquid Medquisedec unēsāsa yampampic. ⁹ Adquid icsho Debin buchisio Abadauan caidēn, Con tsyuecquid dadpen iquendac, quequin tantiaquin, Con na musucshun menenu, queshun Medquisedec menepampic. ¹⁰ Aton tsyuecquid tishambocnobi Debin buchisio Abadauan caidēn Medquisedec bēquedtuidshun menepampic.

Medquisedec yampidpadquid Esuquidistu

¹¹ Abadauanēn tsyuecquido Debipadquidon Nuquin Papan nadomboen nata quequin chiaid nadenequin aton matses bēdamboquid icmian Medquisedecpadquid choenquio ictsempampic. ¹² Debipadquidon aden nadeneshun aton matses icsaisa icmetiapimbo ican Medquisedecpadquid matses chuibanec Nuquin Papabēd onquequid dapa yampanēdash.

Debipadquidën Nuquin Papan nadomboen nata cain ëndenquimbo chiaid nadenepampic. Nëbi Nuquin Papan chiaid utsi naquid Medquisedecpadquid Esuquidistu nec. ¹³ Aidpadquid icquin Nuquin Papa nidaidën tabadte shubu uashunaidën puduedshun nambocpanëdash. ¹⁴ Aton tita Uda cuëmëdquidën tsyuecquid icnuc matsesash Udan tsyuecquid Nuquin Icbo Esuquidistu nec. Adquid icquin Debipadquidën nadeniampicpaden natiapimbo Esuquidistu icpanëdash. Adembidi ambi tantiaiduidi chiec Moises, Udan tsyuecquid Debipadquid nec, quenquio icpampic. ¹⁵ Medquisedecpadquid matses chuibanec Nuquin Papabëd onquequid dapa Esuquidistu yanan nadomboen nata quequin chiaid utsi iquendac, quequin nuqui tantiec. ¹⁶ Aton matses chuibanec Nuquin Papabëd onquequid Debi unësan Debin tsyuecquid aton matses chuibanec Nuquin Papabëd onquequid icpampic. Adquidpenquio Esuquidistu yampanëdash. Matsesash icsaisa yec unëssh uincuempanëdash. Adec uincuenquid yec unëstiapimbo iquec matses chuibanec Nuquin Papabëd onquequid dapa yanquiopanëdash. ¹⁷ Aid chuiquin Nuquin Papan nadopampic:

“Ënenquiocquin matses chuibanec Nuquin Papabëd onquequid dapa Medquisedecpadquid mibi nendac,”
quequin chuipampic.

¹⁸ Aden chiambien matses chuibanec Nuquin Papabëd onquequid dapa Debipadquidon Nuquin Papa nidaidën tabadte shubu uashunaidën puduedshun ënden nadomboen nata cain chiacpadomboen nadenequin aton matses icsaisa icmetiapimbo icpampic. ¹⁹ Adoaid Nuquin Papa yacno puduedtemaid matses icpampic. Nëbien bëyucanec puduedash Nuquin Papa yacno abi tantiaquido chuibanec Nuquin Papabëd onquec tabadec, quequin abi yacno yuedte caimbudec nidaidën Nuquin Papabëd tabadacbimboec nuqui tabadec.

²⁰ Abimbo caimbi. ¿Matses chuibanec Nuquin Papabëd onquenu quec puduedquid ënëdenquiocnoc mibi icmendambi, Mado, quenquioda Nuquin Papa icpampic? Ai, aden chuipampic. Aden Debi chienquiocquin aton madouditsëqui chuipampic. Debi unësan aton tsyuecquid aton matses chuibanec Nuquin Papabëd onquequid dapa icpampic. ²¹ Nëbi Nuquin Papan aton Madombo caic:

“Icbo icquin matses chuibanec ëbi chiec puduedoata, mado, quequin abimbo chiembi.

Aden chuiquin chuca uainquio iquembi.

Ëndenquio yampid yec ëbi yacno utsi puduedmenush ëbi chiec puduedash ënëdenquio yec tabadquid mibi nec, quequin abimbo chiembi,”

quequin chiampicpadec aton Madombo adquid yanquiopanëdash. ²² Adquid yec matses icsaid bedshunash abided cuidadash abi tantiaquido yuedec bëyucanquid Esuquidistu nec. Debibëd aton tsyuecquid adecbidi adquid ictiapimbo iquec.

²³ Debi adecbidi aton tsyuecquido unëstequidquio iquec yuen chuibanec Nuquin Papabëd onquequid dapa ictiapimbo iquec. ²⁴ Esusien abi yacno chuibanec bëyucanec puduedash ënëdenquio yec Nuquin Papabëd onquequid dapa nendac. Adquid utsi nibëdendac. ²⁵ Adec Nuquin Papa yacno ënëdenquio yec tabadquin abi tantiaquido chuibanec aton Papabëd onquedenenuec abi tantiaquido Nuquin Papa yacno ambi yuedtequid iquec abipadquid icsaisa yec tabadendac.

²⁶ Adec aidi abi yacno yuedanquid, icsa nibëdquid, icsa uatiapimbocquid, icsa nibëdquiec yacno tabadquid yec abi tantiaquido chuibanec Nuquin

Papabēd onquequid dapa yampanēdash. ²⁷ Debipadquidpenquoio yec, Matses icsaquid neque. Nuquin Papan chiampicpaden baded-badedquien nidaidēn capuquid yua cuesunenu, quenquoio icpanēdash Esuquidistu. Matses icsaid bedshunash abided unēspanēdash padpidec unēsenquoio icnush. ²⁸ Debibēdi abipadquid icsaquid icsho, Min matses chuihanec Nuquin Papabēd onquequid dapa aid icmeta, Nuquin Papan cac Moisesēn Debī adquid icnepampic. Nēbi Medquisedecpadquidien Bēdamboquid icpampid ēbēd onquec ēbi yacno Puduedquid Abentsēcquioibi mibi iquendac. Abimbo caimbi, quequin Nuquin Papan chiampidquio Esuquidistu nendac.

8

Matses chuihanec Nuquin Papabēd onquec abi yacno puduedquid

¹⁻² Adec Esuquidistu abi tantiaquido chuihanec Nuquin Papabēd onquequid dapa Nuquin Papa tabadacnombobi puduedoash aton Papa Abiambo Yampidbēdquio onquec tabadec. Debipadquidoen aton matses chuihanec nidaidēnshun Nuquin Papa tabadte shubu uashunaidēn puduedash auēshquio Nuquin Papabēd onquepanēdash.

³ Con matsesbēdi icsaposh icmanendac, queshun aid shubun puduednu queshun umanucshun nidaidēn capuquid yua aidon cuesunepampic. Adembidi Nuquin Papa tantiaquin menenuequin aton matsesēn bē-béaid bedshun nadenepampic. Esusien Nuquin Papa yacno puduedoanush, Ēbi icsaid ēbibi cuidadnu, quenquoio yec matses icsaid bedshunash abided cuidadpanēdash. ⁴ Aidi unēsabi yec nidaidēn tabadnuc Moisesēn chiacpadec Debipadquid matses chuihanec Nuquin Papa chiec onquequid icpanēdash. Adquid icnuc nidaidēnuēsh matses chuihanec Nuquin Papabēd onquequid dapa ictiapimbo Esuquidistu icpanēdash. ⁵ Nidaidēn tabadquin Nuquin Papa tabadte shubu uashunaidēn puduedshun Debipadquidēn nashumpampic. Ēndenquimbo Nuquin Papan shubu naden icchitec, quequin abi tabadte shubu uanu, qesho tantiashun: “Macuēsh yacnoshon chuibocpadomboen shubu uame,” Nuquin Papan cac Moisesēn chuiopampic. Aden chiac Nuquin Papa tabadte shubu uashumpampic. ⁶ Adnubien yuecash Nuquin Papa tabadacnombo aton Madombo abi tantiaquido chuihanec Nuquin Papabēd onquec puduedpanēdash. Aidi abi tantiaquido yuedquid nec. Aid ambo puduedabicnuc ambi naden nata cain chiaid Nuquin Papan Moises meniampicpadomboen naquin aton matses chuihanec Debipadquid Nuquin Papabēd onquec abi yacnombo yuedanquid ictiapimbo icpampic. Esuquidistuen Nuquin Papabēd abia yampid bēyucanec abi yacnombo nidoash abi tantiaquido chuihanec Nuquin Papabēd onquequid yec yuedanquidquio nec.

⁷ Ēndenquimbo nadomboen nata cain chiacpadomboen nadenequi matses icsaisa yanuc naden nata cain chiaid utsi Nuquin Papan chienquoio ictsempanēdash. ⁸ Nadomboen nata caqui ambi chiacpadomboen nadenequi matses icsaisa yantiapimbo icsho isash: “Yuecash ěmbi chiaid utsi iquendac. Aid isadaidbo chiendambi. Aidbidi Udan tsyuequido chiendambi.

⁹ Aidēn tsusedpabo Equipito yacnoshon bēyucamequin

ēmbi chiacpadpenquiocnoc chiaid utsi iquendac.
 Ēmbi abia naden nata cain chiaid Isadaidbon chieshēnsho
 utsibon natiacquin mēyansho isun isadaidbo mēnchicamboccondambi.

¹⁰ Ēnden chiaid adquio icnuc:
 Nēbi ēbēd tabadmetequid chiaid nendac, quequin isadaidbo chiemi.

Ëmbi nadomboen nata cain chiaid isadaidbo pausunendambi tantiate bunquionoc.

Aden tantiamiaash aton Papa iquendabi.

Adecbidi adquidquo con matses iquendac.

¹¹ Adoaid Nuquin Papa tantiaquid icta, quesa iquendac.

Abitedi ëbi tantiaquidquo iquendac.

Nëidtedishun ëbi tantierendac:

Nëidic, bacuëbo; nëidic, caniabo; nëidic, tsusiobo aidtedshun.

¹² Aido icsaidtedi padpiden tantienquo yec bëpiscudendabi,”

quequin Nuquin Papan chiaid utsi nendac. ¹³ Chiaid utsi nec, quequin ënden abia nadomboen nata cain chiaid ënëndendac.

9

Nuquin Papa tabadte shubu uashunaidën puduedshun naid

¹ Nuquin Papan ambi, Ëbi ismequin nadomboen nata cain chiaid dadpen dada uameshun isadaidbo menepampic. Nuquin Papan naden ëbi tabadte shubu uashun cacpadomboen abi nidaidën tabadte shubu uashumpampic.

² Nuquin Papa tabadte shubu uashunaid nitsinaid anquënë uaid daëd icpampic. Baded-badedquieq puduedte anquënë uaidën tabote dectantebëd pan sante cueste nacenaid icpampic. Icsaisa anquënë uaid nec caid niosh.

³ Aid nuntambidi bitsipambocquid daëdcashun dectanëdaid shëcuë anquënë uaid dayun uequid Isaisa Bëdaidquo cain chianiaidquo niosh. ⁴ Aid nuntan bëdambo noadquid sandoshon tauite shocosh icpampic. Ambobidi cueste dabitacaid shocosh icpampic. Aid cuesten sauedaid mana caid isadaidbon piampid dayun uaid icpampic. Aid sauedaid utsi Adonën cueste tiaid dëyucaid icpampic. Aid sauedaid utsi cuënote pada uashun Nuquin Papan nadomboen nata quequin dada uaid icpampic. ⁵ Aid sauedte matincash tabadquid ambi abi yacnoshon uaid mayan bëdambocquid bimboecnuc nacenaid daëd icpampic. Aid daëd Nuquin Papa icsaisambo bëchomauanquieq nac-nacquio ismiantequid icpampic. Nidaidën capuquid cuesuniaidën intac daseccaid isun Nuquin Papan matses cuidenquioctsiash, quequin aidën podon dëcatequin dectanaid diadpampic. Aid Icsaisa Bëdaidquo anquënë uaid sanaidtedi chiombi.

⁶ Aden shubu uashun aidën icquidtedi nambanash icsaisa anquënë uaidën baded-badedquieq puduedquidon Nuquin Papan Moises chiacpadomboen uesquin nabampampic. ⁷ Padnuen Isaisa Bëdaidquo anquënë uaidën setan-setanquieq matses chuibanec Nuquin Papabëd onquequid dapa puduedpampic. Baded-badedquieq puduedtemaid aid nec. Ëmbi con matseshëdtan Nuquin Papan chiaid niacposh icmanendac, quequin nidaidën capuquid yua cuesuneshun intac bedshun buanec nuntan bitsipambocnoc daëdcashun dectanëdaid shëcuë anquënë uaid dayun uequid Icsaisa Bëdaidquo caidën puduedquid abentsëqui nepanëdash. Unësaidën intac buanenquo yec puduedtemaid aid anquënë uaid nec. ⁸ Adec aid anquënë uaidën puduedquid isadaidbo abentsëqui icnubi Nuquin Papa yacno aton matses puduedte nibëdec, quequin Nuquin Papan Mayanën tantiamete nendac. ⁹ Adembidi, baded-badedquien nidaidën capuquid yua cuesunedenec, Ëbibi bëdambocquid nec, quetiapimbo icpampic. Adembidi aton matses icsaisa icmetiapimbo icpampic. ¹⁰ Adecbidi, Nëidic petequid nec. Nëidic actequid nec. Nëid nanush mëpamëdtequid nec, quequin chiacpadomboen nabanquin icsaisa icmetemaidbidi nendac. quequin Nuquin Papan Mayanën nuqui tantiamec.

Esuquidistu abided unësec intac chiuidaid

11 Ambi chiaid utsi tantiamenuc ambi uacmaid yec abipadquid Esuquidistu Nuquin Papabêd tabadboedi nidaidên budash matsesash icsaisa yec matses icsaid bedshunash abided cuidadec unêsash Nuquin Papa yacno matses chuibanec aton Papabêd onquequin chuiquid dapa iquec abi yacno Yuedanquid yampanêdash. 12 Nidaidên capuquid yua cuesuneshun intac bedshun buanec Nuquin Papa yacno puduedenquio Esuquidistu icpanêdash. Aidi abia yampidi icsaisa matses icsaid bedshunash abided cuidadec unêsascho cudan siac aton intac chiuidash Nuquin Papa yacnombo puduedoapanêdash. 13 Aidi matses icsaid bedshunash abided cuidadabicnuc nidaidênshun natemaid nasho matses cuêshêdmepanêdash. Adoac utsibêd ictiapimbochsho isun nidaidên capuquid yua cuesuneshun aidên intacbêdta sisapuc daêd uashun daseccac icsaisa icmiabi yequi aton shubun puduedoapanêdash. 14 Abia abêd yampid unêsesa aton Mayabêd iquec Esuquidistu icsaisambo yec, Matses icsaid bedshunash êbided cuidadebi, Papa, quianec unêsascho siac aton intac chiuidacsho isun uincuemaidên nuqui pauquec ma Nuquin Papan chiacpadomboen nate bunquidquio nuqui icpanueshun. 15 Adoaidi Nuquin Papan chiaid utsi chuiquin tantiamequid Esuquidistu icpanêdash. Ênden matses yampid icsaidbêdtabi nêbi matses icsaid bedshunash abided cuidadec unêspanêdash êbi tantiaquido êbêdi tabadmenu quiash.

16 Adnubien abi unêste tantiec, Êbi unêsan êmbi chiacpadomboen con na abitedi menebanta, matses quepec. Aden chuiquid unêsabi icnuc ambi chiacpadomboen utsibon menetiapimbo iquec. Icbon na abi iquec. Aid unêsan aidên na icboedi utsin na yanec. 18 Adembidi ambi nadomboen nata cain chiaid Moises menequin, Êmbi chiaidtedi nadenesho isun êmbi chiacnombo mibi buanemi, quequin Nuquin Papan chuipampic. Aden menequin chiac Moisesên nadopampic. 19 Nuquin Papan chuibocpaden chuishun nidaidên capuquid yua cuesuneshun intac bedshun actebêdta daêd uain cacushun cuête shubi madquênaid podo mêsequiabicquid bedshun sedquid piu uaid potaneshun daêd uaboed nênanshun Nuquin Papan chiaid dada uaidbêdta matses daseccabampampic: 20 “Nêid Nuquin Papan chuibocpaden mimbi natequidquio nec,” quequin ismequin Moisesêmba abitedi daseccabampampic. 21 Adoshombic Nuquin Papa tabadte shubu uashunaidbêdta aidên tabêcaidtedi daseccabampampic. 22 Cuesuniaiidên intac daseccatequid nec. Shubu chedo cuesuniaiidên intaquên daseccabicquid mishtemaid nec. Adecbidi cuesuniaiidên intac chiuidenquiocnec matses icsaid Nuquin Papa bêpiscudenquio iquendac.

23 Nuquin Papa yacnombo puduednush icsaisa unêsendac, quequin ismenuen matses chuibanec Nuquin Papabêd onquec nidaidên capuquid yua cuesuneshun intac bedshun buanec Nuquin Papa nidaidên tabadte shubu uashunaidên puduedpampic. 24 Esuquidistu matses icsaid bedshunash abided cuidadec unêsash nidaidênshun Nuquin Papa tabadtebimboecnuc shubu uashunaid yacno puduedenquio icpanêdash. Abi tabadacnombo abi tantiaquido chuibanec aton Papabêd onquec puduedash abi tabadec. 25 Ambo puduedash, Matses icsaid bedshunash êbided padpidec cuidadnu, quenquio yec tabadec. Nidaidênshun setan-setanquien Nuquin Papa tabadte shubu uashunaidên puduedquin aton intacpenquio bedshun daseccadenec. 26 Matses icsaid bedshunash abided cuidadec unêsambo yec Nuquin Papa yacno puduedoash padpidec nidaid yacno choash unêsash abuc Esuquidistu puduedoatsiandac. Adenquio iquec matsesash abi unêste ushênquibi matses icsaid bedshunash abided cuidadpanêdash nêid nidaid naimêdbudte anoentsêqui icnuc. 27 Nidaidên icquid unêste ushê abentsêc iquec. Unêsascho

ambi naid Nuquin Papan chuitequid ushë choendac. ²⁸ Adecbidi matses icsaid bedshunash abided cuidadec Esus unëste ushë abentsëc icpanëdash. Matses icsaid bedshunash cuidadoanu, quenquio yec aidquio padpidemboec choendac. Abi cainquido abi yacno puduedmenuec choaindac.

10

Abided cuidadec unëste abentsëquënnuobi

¹ Setan-setanquien nidaidën capuquid yua cuesuneshun intac bedshun buanec puduedsho isun matses icsaid bedshunash abided unësash abi tantiaquido chuinec bëyucanec Nuquin Papa yacnoësh yuedanquidquio choec, quequin nuquin tsusedpabon tantiabempampic. Nidaidën capuquid yua cuesuneshun intac buanquid aton matses icsaisa icmetiapimbo yec Nuquin Papa yacnombo abëd onquetiapimbo icpanëdash. ² Aidënquio daseccaquin matses icsaisa icmiac nidaidën capuquid yua padpiden cuesunenquio ictsempampic. Adecbidi, Icsambocquid nebi, quenquio matses ictsiandac. ³ Aton matses isaisa icmetiapimbocquin setan-setanquien nidaidën capuquid yuaded cuesunepanëdash. ⁴ Adshun yuan intac bedshun daseccaidën matses icsaisa icmetiapimbo iquéc.

⁵ Adoaquien Esuquidistu nidaidënshun tishac caniaash onquéc: “Nidaidën capuquid yua cuesunenubi ëmbi chiacpadomboen matsesën natiapimbo iquéc queshun yua cuesunete bunenquio mibi iquéc, Papa. Matsesën tishtequid mimbi icmiaidquio nebi, Papa.

⁶ Adecbidi nidaidën capuquid abichobi tauideniac matses abi icsambo iquéc, quiash, Padi. Adoenda, mibi quéc, Papa.

⁷ Adsho isun mimbi chuiquin dada uamiampicpadomboen naimbi, Papa.”

⁸ Mimbi dada uamiampicpadomboen matses chuiquidën nabanquimbi aton matsesbëd bëdamboec tabadenquiochso isash, Padi. Aid nainquiocquin ënta, quequin mimbi matses chuinuc ⁹ mimbi ënden nadomboen nata cain chiaid naimbi, Papa, quiash matses icsaid bedshunash abided cuidadec unësun Nuquin Papan ënden chiaid ëmepanëdash. Aden ëmian nëbi Nuquin Papan chiaid utsi iquéc. ¹⁰ Aden Nuquin Papa bunacpadomboen nash unëstiapimbo yanshun abi unëste ushënquio abi tantiaquid paucpanëdash.

¹¹ Aden matses icsaid paucpec, quetiapimbocnoc badiadquiën-badiadquidënquien nidaidën capuquid yua cuesuneshun intac bedshun daseccaquin icbo icsaidbëdta utsibo icsaid pauctiapimbo iquëndac.

¹² Esuquidistuen abided unësash abi tantiaquido icsaid pauctequid abentsëquobi iquéc aton Papabëdi ënëdtiapimbo yec abitedishun icbombo iquéc. ¹³ Ambobi tabadquimbi abi chieshënquido ambi chiacpadomboen naquidquio icmete ushë cainec. ¹⁴ Abided unëste ushënquio abi tantiaquid ambi icsaisa icmiaid abëd cuëshëdesambo yampanëdash.

¹⁵ Adembidi Nuquin Papan Mayanën Nuquin Papan chiaid utsi naden chiec:

¹⁶ “Nëbi ëbëd tabadmenun chiaid utsi nendac, quequin chiendambi.

Aidi aton pabiaten puduedmendambi paucudenquiocnoc.

Adembidi ëmbi chiacpadomboen nate bunquidquio icmendambi, quéc Icbo.”

¹⁷ Adshumbic Nuquin Papan chiaid utsi abi chiec aton Mayan:

“Abi icsaidtedi padpiden tantianu quenquio yec bëpiscudendabi, queoaic Icbo,”

quequin chuipanëdash aton Mayanën. ¹⁸ Adec abi icsaid bëpiscudash nidaidën capuquid yua cuesuneta quenquio Nuquin Papa iquéc.

Nuquin Papa yacno puduedte cainta

¹⁹ Adoaidi Esuquidistu unēsacsho isun cudan siac aton intac chiuidan, Ambi paucaid nebi, quec dacuēdenquo yec Nuquin Papan shubu icsaisa caid yacnombo puduedte ushē nuqui cainendac. ²⁰ Matsesash abided cuidadec unēsash Nuquin Papa yacno puduedoash tabadquid Esuquidistu nec. ²¹ Ambo nidash Nuquin Papabēd onquequin aton shubun icquido nuqui Esuquidistun chuibanubi, ²² Ambi paucaid ambi dapanacnimboeccquidbidi nebi, quequin tantiaquin abi yacno choachimboen nidaidēnshun Nuquin Papa chiec onquec tabadnuna. ²³ Nuquin Papa ambi chiacpadomboen naquidquo nec, quequin abi tantiaquid yec abi yacno puduedebi, quequin caimbudnuna. ²⁴ Aden tantiaquin abi tantiaquid utsibobēd tantiananec bēdamboec tabadquin nashununa. ²⁵ Aden nabanec abi tantiaquid utsibobēd iccuededtiapimbo iquebi, utsi-utsiec quiacpadec adenquo icnuna. Adec iccuededec, Nuquin Papan chiacpadquiec bēdamboec tabadnuna, quec chuinanta. Niacquid dadpen icsho isash, Matsesēn naid chuibanquin cuidte ushē badedquo choec, quiash baded-badedquiec chuinanta bēdamboec tabadte bunec.

²⁶ Ēbi icsaid bedshunash abided cuidadec Esuquidistu unēsapanēdash, quequin tantiash icsaded-icsadedquid iquec, Adquidquo Esus nec, queti-apimbo iquec. ²⁷ Aid cuidte ushē chonoc nēishun comapenen chushcaindac Nuquin Papan abi chieshēnquido nibēdamequin. ²⁸ Nadomboen nata cain Moisesēn chiaid niacsho isun daēdshun chiac niacquid unēsmiampic. ²⁹ Nuquin Papan abia naden nata cain chiaid niactenequid adomboen cuidnūshe quiash ēbi icsaid bedshunash abided cuidadec Esuquidistu unēsapanēdash, queboedi, Ēmbi tantiaboed Nuquin Papan Madopenquo matsesquo ēbipadquid icsacsho cuesuniac, quequin chieshēnsho ¿comapenen Nuquin Papan cuidenquioda icpadic? Adquid Nuquin Papan Mayanēn bēdambocquid icmenu quequin chiaid chieshēnquid nec. ³⁰ Nuquin Papan: “Ēmbimbo ēmbi chiaid chieshēnquid cuidendambi,” quequin chiaid nec, quequin nuqui tantiec. Adembidi: “Abi tantiaquid icboedēmbi tantienquo yansho cuidquidquo Nuquin Icho iquendac. ³¹ Abi cuidantequid dacuēdampambo iquec,” quequin Nuquin Papan chiaid nec.

³² Esuquidistu tantiaquid yanash mibi bēdamboec tabadondacpaden tantiamec chuinandeneta. Esuquidistu tantiabnacchuca icsho chieshēmēnquidon mēyanaqui, Esuquidistu tantiaquid nebi, quec dayacquio yec bēdamboec mibi tabadteniondac. ³³ Dadpen tabadnubi, ēmbi tantiaid Esus nec, qesho mibi utsibon mamēnshunondash. Adembidi aidon natiambocquin mēyana. Adomboembidi Esuquidistu tantiaquid utsi mēyansho isun, Aidbēd icquid nebi, quequin ismequin mimbi nashundenepondac. ³⁴ Esuquidistu tantiaquid utsi quēnēn nauedaid icsho isash abēdi tabadachimboec natiamianquiec unēsquo yec mibi tabadpondac. Adecbidi mibi chieshēnquidēn mitsana bedacsho isash Nuquin Papan ēbi menetequid ampetiapimbo iquec, quequin tantiec, Bēdambo iquebi, quec mibi tabadpondac.

³⁵ Adoaidi Nuquin Papan bacuē yec bēdambo iquebi, quiash dacuēdenquo yec bēdamboen nabanec mibi ēnden dayacquio iccondacpadquiec adquiecbidi tabadteneta. Adquid Nuquin Papa yacno puduedquid nendac. ³⁶ Utsin mēyanaqui Nuquin Papan chiaid chieshenquicoquin tantiaideneta. Adec tabadquin Nuquin Papa bunacpadomboen nabanash abi yacno tabadendac. ³⁷ Nuquin Papan chiaid nadquo iquec: “Chiata. Nēbien mimbi cainaid mibi mēnchictequid choendac.

³⁸ Adsho tantiec ambi pauctequid abi cainec tabadec nec.

Abi cainuidquido ambi puduedmetemaid nec.

Adquid, Cho, catiapimbo iquebi,”

quec Nuquin Papa. ³⁹ Aid cainuidash utsi tabadnubi abi choate nuqui cainec. Abi cainesa abi yacno puduedmenquiocquin Nuquin Papan chian anëdënquequid nësiatequid nendac. Nuquien abi cainquid yec Nuquin Papa yacno puduedtequid nec.

11

Nad iquendac, quequin tantiaquin cainquid

¹ Esuquidistu tantiaquidtedi con shubun icquido nec, quequin Nuquin Papan chiaid tantiaquin abi yacno tabadendabi, quequin abëd icte ushë nuqui cainendac. Aden cainquin, Con icbo ëmbi isacmaid nec, quequin aid isbenacimboen ëmbi tantiaid nec, quec tabadquidquio nebi. ² Adembidi tantiec tsusedpabo tabadsho isun, Bëdamboen mimbi tantiec, capampic Nuquin Papan aido chuiquin.

³ Adembidi Nuquin Papan: “Abubëdi nidaid yanquiota,” cashumbic: “Aidënquiocquidtedi yanquiota,” cac ambi tantiacpadquiequi yampampic, quequin nuqui tantiec. Aden tantiec ëmbi isaiddedi nibëdnuc çmitsipadomboentsi aiddedi icmëbampampiba? quenquio nuqui iquec. Nuquin Papan: “Yanquiota,” quequin tantiacpadquiequi abitedimbo yampampic.

⁴ Adembidi, Mibi tantiaquin mibi bunacpadomboen nidaidën capuquid con yua cuesuneshun tainu, quequin chuishun Abedën naid Nuquin Papan bëdamboen isaidquio icpampic. Aton utsin Cain caidën aden tantienquiocsho Nuquin Papan icsamboen isaid icpampic. Adosho isun Cainën aton utsimbo cuesuniambien Abedën Nuquin Papa tantiaquin naid chianetequidquio abi iquec.

⁵ Adnubien adecbidi abi tantiaquidquio Enoc icsho isun Nuquin Papan buanac unësesa icpampic. Bëdamboequid nec, quequin Nuquin Papan buanacsho nibënquin Enoc istuidambocpampic. ⁶ Abi tantiesa icsho isashien, Ëmbi bëdamboen isaidquio nec, quetiapimbo Nuquin Papa iquec, quequin tantiaid aid tantiaquid icsho, Abi yacno puduemetequid nebi, quequin tantiaquid ambi bëdamboen isaidquio nec.

⁷ Adnubien adembidi Nuquin Papa tantiaquin Noe caidën, Nuquin Papan chiacpadomboen nanuna, qeshun, Èbëd icquid unës uanushe qeshun, Con utsibo Nuquin Papan chiaid tantiesa yec unëstequid iquendac, quequin tantiaquin Noen cano dapa nacnempampic. Abi tantiaquin aden nasho Nuquin Papan bëdamboen isaidquio aidquio icpampic.

⁸ Adnubien adembidi, Nidaid utsi mibi menembique. Nidtan, Nuquin Papan cac abi capuacmanombo Abadauan nidpampic. ⁹ Adembidi Nuquin Papa tantiec abi capuacmanombo choash, Con nidaid iquendac, quiash yuedacmaidbimboec quenenenquio yec daëdcaid shubumpi buan-buanequi aid nidaidën tabadpampic. Adecbidi aton mado Isaactsen aid shububidi buanash tabadoapampic. Adecbidi Isaquën mado Acobotsen tabadoapampic. ¹⁰ Nuquin Papa yacno ambi tantiampicpadomboen shubu uaidën tabadendabi, quequin cainec quenenenquio yec nidaidën Abadauan tabatnenpampic.

¹¹ Adembidi Abadauanën Nuquin Papa tantiaquin aton chido Sada machobudash bacuë tishtiapimboquid icnubi, Nuquin Papan chiacpadquieq

con mado iquendac, quequin tantiacpadomboen Abadauanën chidon machobudquioshon aton mado tishpampic. ¹² Adoac Abadauan tsusiobudaidënquo tsyuecquid dadpen uispatedi yampampic. Masitedbidi yanoapampic.

¹³ Aden Nuquin Papan aid nidaid ëbi menendac, quequin tantiec chieshenquo yec Abadauan ambi isacmanombo choash, Con nidaid nendac, quequi Nuquin Papan meniabicnuc quenenash tabadenquo yec nidequi unëspampic. Adomboembidi tantiequi aton mado unësbudnepampic. Adomboembidi tantiequi aton baba ado unësbudnepampic. Adomboembidi tantiequi aidon tsyuecquido unësbudnepampic. ¹⁴ Nuquin Papa tantiaquid yec Nuquin Papabëd tabadendabi, quiash nidaidën quenënenquo yec aidtedi tabadpampic. ¹⁵ Ëbi tishondacnombo tantiec unësquo iquebique. Ambo nidoaibi, quiash nidtsempampic. ¹⁶ Adenquo yec, Nuquin Papa yacno tabadendabi, qesho tantias, Con matses nec. Adecbidi aton Papa nebi, quequin chuishun abi yacno abëd tabadte shubu uapampic Nuquin Papan.

¹⁷⁻¹⁸ Mimbi tishmiaidën tsyuecquid dadpen iquendac, quequin Nuquin Papan chiaid abimbo iquec, quequin Abadauanën tantiaquiopampic. Aden tantiasho isun, Ëmbi chiaid tantiaquidquoda Abadauan neque. Isnu, qeshun, Min mado abentsëc Isac caid cüesuneshun ëbi tantiaquin tauita, Nuquin Papan cac Nuquin Papan chiaid niacmane qeshun Abadauanën tauineuquin aton mado setsempampic. ¹⁹ Aden nanuequin, Nuquin Papan con mado uincuemendac, quequin tantiaquin aton mado setsenshumbic Nuquin Papan istuidmiaid, obeca bënëded seshun tauipampic aton mado uincuen uaidbimboecquid icnuc.

²⁰ Adnubien adembidi Nuquin Papan chiaid tantiaquin Isaquën aton mado abi ushëmbi tishaid daëd Acobobëdta Esau Nuquin Papan ambi chiacpadomboen nanun bëdambo icmete chiaid chuiopampic.

²¹ Adnubien adembidi Nuquin Papa tantiaquin tsusio budash unësbudquimbi aton cüeste bedash shuebudshun, Nuquin Papa bëdambo iquec, quequin Nuquin Papan ambi chiacpadomboen nanun bëdambo icmete chiaid aton baba Osen bacuë daëd Acobon chuiopampic.

²² Adnubien adembidi Osen Equipito yacno tabadec unësnun, Nuquin Papan nidaid menenun nabono, quequin chiaid tantiequi unësebique. Mibitidi: Aid nidaid yacno nidnu, qeshun con canite buanta, quequin chuiopampic Osen.

²³ Adnubien adembidi Nuquin Papan bëdambo icmiaid con mado nec, quequin tantiaquin aton mado Moises tishun aton titan aton papabëdtambi ompopampic. Equipito yacnocquid ancanquidën: Isadaidbon chidon dada bacuë tisho cüesuneta, quequin chiaid niacquin dacuëdenquiocquin aton mado adopampic.

²⁴ Adnubien adembidi Nuquin Papa tantiec Moises caniacsho, Ancanquidën champin mado mibi nec, caqui chieshënec, Aidën madopenquo nebi, queopampic. ²⁵ Ancanquid Nuquin Papa tantiesha nec. Con matses isadaidboen Nuquin Papa tantiaquido nec. Adquid icsho aidobëdtabi ancanquidën mëyanaid iquendabi, quianec Moises cuëshëdpampic. ²⁶ Yuecshun Nuquin Papa yacno yuedac bëdambo iquendabi, quequin tantiaquin Equipito yacnocquidon shubun yuedshun meniaid isuidec, Natiaic icsatiapimbo iquebi, quiash tabadquin Moisesën caimpampic. ²⁷ Adembidi tantiaquin, Equipito yacnoësh ëbi nidsho isash nëishun ancanquidën con matses nidmenquo icpec, quenquo yec Nuquin Papa isacbimboec Moises tabadtenepampic. ²⁸ Yuecsh Equipito yacno choashun adembidi tantiaquin, Bëyuec tishaid

unësmetequid ëmbi ëbi yacnoshon uaid mayan bëda ëmbi budmiaid min shubu datamenuen ëmbi chiacpadomboen nabanta, Nuquin Papan cac ambi chiacpadomboen naquidquid Moisesba icpampic. Ambi chiacpadomboen nabanquin nidaidën capuquid yua cuesuneshun shëcuë cuëmano abiuc daëdi abucbëdta intaquën ëcnoshcashun nami shuishun pan bidisquesabëdta pepampic. Adoacsho isun Nuquin Papan budmiaidën datampampic.

²⁹ Adnubien adembidi Nuquin Papa tantiec Equipito yacnoësh puduanec nidquin Acte Piu potec nidquid podqued nibëdboedi tanunquiocquidën uesadmiadën isadaidbon potepampic. Aden isadaidbon potenubi abëdtambi potenuc abi chieshënquido Equipito yacnocquido acte chomiaidën men-toadbudnepampic.

³⁰ Adnubien adembidi Nuquin Papa tantiec ambi chiacpadec matses utsi dadpen tabadacno Edico caid dacuenadtanepampic. Siete yacno cuëscain tambanec dacuenadtanec shubu dadpen daquënë uain tsasi uaid sec uebudpampic.

³¹ Adnubien adembidi Nuquin Papa tantiaquin Edico yacnocquido cuesunenun isquido isadaidbo chosho isun, Nuquin Papan matsesbo nec. Aido ëmbi yuedac ëbëd icquido cuesunenquiocpec, qeshun dadpen chudmequidën, Daba caidën, isadaidbo aton shubun yuedquin ompopampic. Adoac nidoash aton matses utsibobëd abia choquido choash Dababëd icquido cuesunianenquiocpampic Nuquin Papa tantienquio yec chiesho Daban matses utsibo cuesunquimbi.

³² Adecbidi Nuquin Papa tantiaquid dadpen icpampic. Nëdic Edeon, utsibic Badac, utsibic Sanson, utsibic Ecte, utsibic Dabid, utsibic Samued, utsibic Nuquin Papan nadomboen nanun nabono quequin chiaid chuibanquidtedi adquidtedi icpampic. Utsi dadpeshun Nuquin Papan chiacpadomboen naindac, quequin cainquido icpampic. Abitedi chuitiapimbo iquebi. ³³ Aido utsin-utsinquien: Abi ancaidobëdtabi ancanquid Nuquin Papa tantiesa nec, qeshun cuesunepampic. Adembidi, Mibi bëdambo icmenu, quequin Nuquin Papan chiaid tantiaquin cainec adquidquido icpampic. Adquid icsho isun, Pemenu, qeshun bëdi nibëdquid deon caid tabadacno buanshun nebudpampic. Adoshö isun piantiapimbo noc Nuquin Papan quiuëccac deonën penquiocpampic. ³⁴ Utsin-utsinquien adembidi Nuquin Papa tantiaquid icsho, Nëdëncashun tauinu, cac taboadaidën pichiquenquiocquid icpampic. Adembidi tantiec utsi-utsiec chështen senuesho isun mënchicquin cuemepampic. Adembidi tantiequi dayacquioctiapimboedi dayacquiocquid icpampic. Adembidi Nuquin Papa tantiaquin matses utsibon sondado cuesnanuequid choacsho cuemepampic. ³⁵ Adembidi utsin Nuquin Papa tantiaquin nianten bacuë unësboed uincuemetanquin ani menepampic. Adembidi tantiec tsadsho isun Nuquin Papa tantiesa nebi, camenuquin shoyombedtedtsëcquin cuesuniaqui, Nuquin Papan chiaid tantesa uainquio yec Nuquin Papa yacno nidebi, quiash unëspampic. ³⁶ Utsi-utsien shocosh bucun mëtaneshun quënëd nauedacsho isun mamënsunquimbi cueshcanten cuesaqui Nuquin Papabëd tabadte tantiec dacuëdenquio yec tsadpampic.

³⁷ Adembidi utsitsen cuënoten seshunepampic. Adembidi utsitsen sënten nacsënsunepampic. Adembidi utsitsen nidaidën capuquid bitsi nacnenaid dasiuidpampic. Aton na nibëdnubi mëyanaqui Nuquin Papa tantiaquidquio yec aidtedi tabadpampic. ³⁸ Nuquin Papa chieshënquid ëbëd tabadtemaido nec, quequin tantiec adpampic. Adoac quentiapimbo yec uano tabadnubien nidaid shëcuë uaidën utsi tabadpampic.

³⁹ Aidtedishun, Ebi yacno mibi chuibanec ëbëd onquequid bëyucanec yuedanquid iquendac, quequin Nuquin Papan chiaid tantiaquin cainec aidtedi unësbudnepampic. ⁴⁰ Aidtedi icnubi abi icsaid bedshunash abided

cuidadec unēsash uincuenash abi yacno nidoash Yuedanquid Abentsēcquiobi Esuquidistu yanabi icpampic adboedēmbi ma nuqui nēbi icquidobēdta yuedpanuna.

12

Aton bacuē Nuquin Papan dayacmenuequin namiaid

¹ Aden Nuquin Papa tantiec chieshesa dadpen icpampic, quequin dada uasho isun ēbi chieshtometequid utsi ēbi icsaidbēdtabi nainquiocquin ēnuna. Adembidi dayacquiocquin Nuquin Papan chiacpadomboen nabanec tabadnuna. ² Esuquidistu, abitedishun icbombo abia yampidquio ēbi chuibanec Nuquin Papabēd onquec bēyucanec abi yacno puduedash yuedanquid nec, quequin tantiaquin aid isacbimboen adonona. Aidi, Ēbi yacno matses yuednu, quiash aton Papabēd tabadteneboedi matsesash icsambocquid-bimboecnuc cuesten dectanac chieshenquio yec unēsacsho uincuen uaid yanash aton Papabēdi Icbombo iquec. Aidquio tantiec isacbimboec nidaidēn nuquiibi tabadnuna. ³ Abi chieshēnquidēn natiacquin mēyanaqui chieshenquiocquid Esuquidistu icpanēdash, quequin aid tantiec ma chieshtoenuquo icpanuna.

⁴ Ēbi icsaid padpiden nainquio icnu, queshumbi natiatequid icnuc mimbi ēnambo iccoc. ⁵ ¿Con bacuē cain Nuquin Papan mibi dayacquo icmenuequin chiaid bēpiscudecta icco? Nad iqueque. Tantia:

“Abuido, min Icbon dayacquo icmenuequin chiaid cacuidenda.

Adecbidi ambi natiamianquiopec camiaid icash chieshenda.

⁶ Ambi matiamianquiopec camiaid dayacquo icmenuequin nametequid con bacuēbo nec,” quequin Nuquin Papan chiampid nec.

⁷ Natiatequid mibi dayacquo icmetequid nendac. ¿Ēbi cudasaidquio con mado dayacquo icmenuequin namebanesa nebi, quecta aton papa icpadic? Padenquio. Ambi: Con bacuē nec, caid natiatequid icnuc, Dayacquo icmenu, quequin ancaquin chono uaic. ⁸ Natiatequid icnuc ambi dayacquo icmenu quequin namiaidpenquio yec, ambi, Con bacuē nec, caidpenquio mibi nec. ⁹ Ēnden dayacquo icmenu quequin mibi ancaquidēn mibi tishmequidēn chiacpadomboen natiatequid icnuc naquidquio mibi icpondac. Nēbi Nuquin Papan dayacquo icmenu quequin chiacpadomboen natiatequid icnuc naquidquio icnuna abēdi tabadnuen. ¹⁰ Abi tishmequidēn ambibi tantiacpaden dayacquo icmenu quequin aton bacuē yuen nametiapimbo iquec unēsendac. Padnuen Nuquin Papan abipadquid icsaisa icmenu quequin natiaquionoc nuqui namendac. ¹¹ Adoac nuqui natiaquieq tabadec. Adoaidi yuecash nuqui bēdamboec tabadendac. Adecbidi natiatequid icnuc dacuēdēnesa nuqui yanec. Adecbidi Nuquin Papabēd icquid nebi, quequin tantiaquidquio yec natiatequid dacuēdēnesa nuqui yanec.

¹² Aden tantiec dayacquo ictiapimbochoedi: Abipadquid iquendabi, quiash dayacquo yec tabadta. ¹³ Adenuidi naic tabadquin utsibo isme ma dayacquo ictiapimboquin niaquec cuēshēdte bumboedi bēdambo yampanuna.

¹⁴ Aden naic tabadec utsibobēd bēdamboec tabadnu, quiash adec tabadta. Adecbidi Nuquin Papa icsaisa yacpadquieq nuquiibi icnuna, quiash aid tantiec tabadec isanec chuinanec adquid yanta. Adoesa Icbobēd tabadtapiimbocquid nendac. ¹⁵ Nuquin Papan bēdambo iquebi camiaid icboedi chiesho isun, Mimbi icsamboec tabadeque. Mibi icsamboec tabadquin ismiac utsibo icsabudtsiashe. Bēdamboec tabad, quequin chuiban. ¹⁶ ¿Ada aton

chidopenquo chudquid icpec? Adecbidi, ¿Ada adembidi aton bēnēpenquo chudmequid icpec? quequin isnuequin adquid istuidshun Nuquin Papan chiaid chuiquin bēdamboen tabadmeta. Adembidi, Esaupadquid icnushe qeshun ¿ada Nuquin Papan bēdamboen tantiaid chieshēnquin isuidquid icpec? qeshun Nuquin Papan chiaid chuiban. Natia bundoshon aton utsi Acobon codocaid isun bednun Esaun: Unēsnnun tsusio icquin con pan bēdamboen tantiaid chuisho mimbi tantiaata, quequin aton papan bēdambo icmenu quequin chiaid chieshquin Esaun tantienquiocpampic. ¹⁷ Yueshshun, Aton utsi Acobo aton papan chuibanosh, qesho tantiaish shubiquin, Mimbi bēdamboen tantiaid ēbitsen chui, papa, cac chuitiapimbocquidēmbi, Ēnden nibēdquiocnoc uesquin min utsi chiombi, quequin Esau chuipampic aton papan.

¹⁸ Adembidi, Nuquin Papan nadatiambocquin uabanaid tsusedpapan isampicadomboen mimbi isabiccoc. Macuēsh Sinai caid yacno choshon aidon isbenampid nēid iquec: natia nēdēnquedote; utsibic, inchēshacimboc isadquid; utsibic, cunquequid dapabimboec isadquid; ¹⁹ utsibic, shocosh shoncaten shoncacimboc onquenec pabiate paēmboshē icpampic. Adec onquesho tantiaishun, Papa, mibi onquesho tantiac dacuēdampambo iqueque. Mibi chuitequid Moises icme, capampic. ²⁰ Adec macuēsh yacnombo icquin: “Ēmbi nadatiambocquin uabanaid ismenubi macuēsh yacno anoentsēqui choenda. Adecbidi matses adecbidi nidaidēn capuquid. Anoentsēqui choquid cuēnoten setequid nendac,” quequin chuipampic Nuquin Papan. ²¹ Aden Nuquin Papan nadatiambocquin uabansho isash: “Dacuēdampambo iquec, quiash, Dacuēdebi,” queopampic Moisessten uēdēquec.

²² Mibien dacuēdenquo yec Macuēsh Sion cashumbic Edusaden Chuca Bēdamboquid caid Nuquin Papa ēnēdesambo tabadacno choacimboc mibi tabadec caimbi. Aid nuntan Nuquin Papan abi yacnoshon ambi uaid mayan bēdabo tambantiapimbo yec dadpenquioshē tabadec. Aido, ēmbi nashunaidtedi, Esus tantiaquid chotequid iquec, quiash bēdambo iquebi, quec cuēdēdonec tabadendac. ²³ Abi tantiaquidtedi Nuquin Papan bacuē icho yacpadquiec aton shubu abentsēquēnuēshi Icbobēd onquec ēnden mibi taēpoc. Aidi mimbi naid cuidquid ambi chiacpadomboen nadenequid mibi unēsasa icsaisabidi icmequid Nuquin Papa nec. Aidbēd ēnden tabadacimboc abēdi onquec mibi taēpoc. ²⁴ Abēd icquin Nuquin Papan ambi ēnden chiaid ēmeshun ambi nēbi chuioaid, mibi chuibanec aton Papabēd onquec bēyucanec yuedanquid Esuquidistubēd ēnden mibi onquepoc. Mibi icsaid bedshunash abided cuidadec unēsō isun cudan siac intac chiuidnēdaid tantiec aibdēdi mibi onquepoc. Abedēn nidaidēn capuquid yua cuesuniampicpadquidēn intac chiuidēc unēsaid tantiec Icbobēd mibi onquetiapimbo iquec.

²⁵ Nuquin Papan chiaid niacchitomane quequin isquiota. Macuēsh Sinai yacno choquid Nuquin Papan ēnden chiaid chuiquid tantiate bunesa cuidpampic. ¿Adembidi ambi nēbi chiaid abi yacno yuedanquid aton Madombo Esuquidistu tantiesa Nuquin Papan comapenen cuidenquioda icpadic? ²⁶ Ēnden Macuēsh Sinai yacno Nuquin Papan chiacnoshonquo nidaid ishcumpampic. Nēbien: “Padpidemboen nidaidbēdta abu ēnēdmenuen ishcunoaindambi,” quec Nuquin Papa. ²⁷ Aden chuiquin ambi uaidtedi nēidēmenuen padpidemboen ishcunoaindac abi yacno choaidtedi icsaisa icmiaido yec ēnēdtiapimbo iccuedednuc.

²⁸ Adoaidi Nuquin Papabēd abi tantiaquido ambi bēdambo icmiaido yec abēd tabadte ēntiapimboenoc Nuquin Papan nadatiambocquin nabanaid

tantiec cuëdëndonec tabadta. ²⁹Nadatiambocquid Icsaisabidi icquin aidëmbi, Esuquidistu tantiata, quequin nëbi chiaid tantiesa chian anëdënquequid nësecaindac.

13

Nadomboen nata cain chiaid

¹ Esuquidistu tantiaquid yec aid tantiaquidtedi con utsibo nec, quia sh tantiananec nashunanta. ² Adembidi Nuquin Papa yacnoësh choquid abi tantiaquido nashuntequid ambi uaido mayan bédabo chosho yuedampic-paden mimi isacmaidquio Esus tantiaquid chosho yuedta. ³ Adembidi quënën nauedaid iquec utsi iste buntsiabi, qeshun quënën nauedaid istan-istanta. Adecbidi buntsiabi, qeshun menetan-menetanta. Adembidi utsin mëyanaid tantiec shubioata.

⁴ Adecc tabadec con chidopenquio chudnu guesa iquec chido utsi isuidquid icta. Adesa icsho Nuquin Papan mibi cuidendac. ⁵ Adecbidi, piuccquid con na bedtequid dadpen bednu, quec bunquiduidi iquenda. Adesa iquec: Con na icnu bédambo iquebi, quec tabadta. Adecc tabadquid Nuquin Papan ënden dada uamiampid naden chiec:

“Mibëdi iquebi.

Nianenquiocquin mibi dayun uanuna.”

⁶ Adsho tantiash:

“Con Icbombo ëbëdi iquendac.

Aidëmbi ëbi cudasquin dëcatiac chieshëmënquid dacuëdënenquio iquembi,”

nuqui quendac. ⁷ Adembidi nidaidën icquid mibi chuiquid dapabo Nuquin Papan chiaid mibi tantiamenuequin chuiquido bëshunenda. Aido Esus tantesa uainquio yec bédamboec tabadpanëdash. Aido tanec bédamboec tabadoata. ⁸ Con Icbombo Esuquidistu nec. Abia Yampidquio yec nëbi adquiobidi iquec. Aidi ënëdtiapimbo yec abi tabadec.

⁹ Adquid Esus icnuc Nuquin Papa chieshënquidën chuisho tantiesa icta. Aidën naden chiec, Nëid petequid icnubi nëid utsi petemaid nec, quequin chiec. Mimi piaidën mibi bédambo icmetiapimbo iquec. Padnuen matses icsaid bedshunash abided cuidadquidën, Nuquin Papan madonquio paucaid iquebi, quequin tantiaquidquio icsho isun Icbobëd tabadmequin ambi bédambo icmiaidquio nendac. ¹⁰ Matses icsaid bedshunash abided cuidadash uincuenash abi tantiaquidbëd ënëdenquio yec tabadquid Esuquidistu nec. Adecc tabadquid Esuquidistu icnubi, Matses icsapash, qeshun nidaidën capuquid yua cuesuneshun nibëdquiocnoc tauaidënquio matses Nuquin Papabëd tabadmetiapimbo iquec. Adembidi aidënquio nuqui icsaisa icmetiapimbo iquec.

¹¹ Isadaidbo icsapash, qeshun nidaidën capuquid yua cuesuneshun aidën intac bedshun, Nëid intac Icsaisa Bëdaidquio anquënë uaid nuntan buanshun daseccacsho isun abi yacno puduedäcbimboecsho Nuquin Papan isadaidbo isec, qeshun nuntan buanshun daseccapampic. Adnubien matses nibëdacno nami buanshun uesquin taupampic. ¹² Adembidi matses tabadenquio yacno Esus buanshun dectanac unësascho siac aton intac chididiepanëdash nuqui icsaisa icmenuec. ¹³ Adoaidi abi tantiaquid yec abëd icquid nebi, quequin ënden chiampicpaden nainquiocsho isun isadaidbo Esuquidistu tantiesan cacumiaquid chieshenquio yec tabadta. ¹⁴ Adquid iquec nidaidën yuec tabadesa icquimbien Edusaden Chuca caid Nuquin Papa ënëdtiapimbocquidbëd tabadaid cainquidquio nuqui nendac.

¹⁵ Matses icsaid bedshunash abided cuidadquid Esus Nuquin Papan icmiac, quequin tantiaquin, Mibi bédambo iquec, quequin Nuquin Papa

chuidenenuna. ¹⁶ Adodenequin utsibobēd tantiananquin nashunquin aton na nibēdquid menequid icta. Adsho isash, Con mado yec con champi yec quec bēdamboec tabadquid nec, quiash bēdambo iquebi, quependac Nuquin Papa.

¹⁷ Ambia Esus tantiashun chuiquidon chiacpaden nabanta. Nuquin Papan, Ēbi tantiaquid utsibo isbanta caid icquin aido Nuquin Papan, Icsambo iquec, canushe qeshun isted-istedec. Aidon chiacpadomboen naquin ma aido bēdambo iquebi camepanuna. ¿Chieshecta mibi bēdambo icpe? Padenquio.

¹⁸ Chieshenquiocquin ēbēd icquid Nuquin Papa chui. Bēdamboen nabanec tabadteniobi. Adequi tabadebī utsibo: Icsambocquid nec, quetiapimbocnoc. ¹⁹ Adembidi ēbi tantiaquin Nuquin Papa chuidoneta. Mimbī adonoc badedquio mibēd iquendabi.

²⁰ Adembidi utsibēd bēdamboen tabadmequid Nuquin Papan aton Mado matsesacsho utsibon unēs uashun siacsho isun uincuemiāc bēyucanec abuc puduedoash abitedishun Icbombo nec. Abi tantiaquido chuinuen yuedquid aidi Nuquin Papan icmepanēdash. ²¹ Adquid Esus icmeshun ambi tantiacpadomboen ma Nuquin Papan mibi icmepanuna. Adoac, Ēbi puduedmenuen Nuquin Papan naid nec, quequin ēnenquiocquin chuiquid ma icpanuna.

²² Mibi tantiamenuen ēmbi dada uaqin chiaid daēdpactsēcquio icsho bēdamboen isec onquequin tantiadoneta.

²³ Nēbi utsi chiembique. Tantia. Timoteyo quēnēn nauedboedi nēbi puduemiac aid badedquio nēmbo choan aibēdi mibi yacno nidendabi.

²⁴ Mibēd icquid Esus tantiaquid utsibobēdta mibi chuiquidtedi tantiec tsadebi quequin Pabadon dada uaosh, quequin chuita. Adecbidi ēbitsen tsadebi quequin chuiōata, queoapēc nēuēsh Itadia yacno tabadquido.

²⁵ Nuquin Papan bēdambo icmiaid ma mibitedi icpanuna. Padi. Aitedi dada uaombi.

SANTIACON DADA UAID

1 Santiacono nebi. Nuquin Papan namiaidquio, Nuquin Icho Esuquidistun namiaidquibidi nebi. Adquid yec Esus tantiaquido uano nidaniash tabadquido mibi tantiec tsadebi. Aden tantiaquin dada uaimbique. Isec onqueta.

Natiametequid

2 Utsibo, mibi u tabadnuc mibi nēnaid, mibi bundoaid, utsin mibi mēyanaid, mibi natiametequid utsi-utsiec iquendac. Adaid icnuc, chonoadbudec cuishon quec, Chieshenquiocquin nainembi, quiacpadquiec adecbidi tabadoata. 3 Adaid icnuc, ¿Ēbi tantiaquidquioda neque? Isnu, quequin, Nuquin Papan ěbi dayacquio icmec, quequin tantiec adecbidi tabadoata. 4 Aden tantiec tabadsho isun bēdamboec tabadte uesquin tantiabənquidquio mibi icmendac ma Esuquidistupadquid yampanueshun.

5 Mimi tantienquio yaid Nuquin Papa chuita. Aden chiaquien, Ma tantianu, queshun mibi nua pausunec Nuquin Papan. Icsambocquid mibi neque. Padi quenquiocquin mibi pausunec. 6 Ēbi tantieme, queboedi, ěbi tantiamenquiocpec quequin tantienda. Ēbi tantiemepec queboedi padenquio yanec cuēshēdec capuidequi yampec. 7 Adquid Nuquin Icbon pausuntipimbo icpec. 8 Adquid, Nuquin Papan ěbi tantiamec, queboedi capuidequi icquidbimboec icpec.

9 Shubu abentsēquēn tabadacpadquiec tabadquid icta. Adecec tabadec mitsana daēdpactsēc icquid yec, Con na daēdpactsēc iquec, quequin mitsanauidi tantienquiocquin naden tantiata. Nuquin Papan bacuē nebi. Abēdi cuēshēdenquio yec tabadebi, quequin aiduidtsēqui tantiec tabadeneta. 10 Aton na dadpen icquidombien aton na bēdiactsec tantiaquin naden tantiendac: Con na nēidic chodquec; utsibic chiuidec. Adecbidi con nami shēnibudequi Nuquin Papan bacuē nebi. Abēdi cuēshēdenquio yec tabadebi quequin tantiec tabadta. 11 Tanunquiocquidēn tiedēn caniquid unēsec podo tididiquec. Bēdamboeboedi nibēdquiec. Adquiecbidi icho aton nabi bedbanequi aton nami shēnibudequi unēsec. Icho ichoedi icho ictiapimbo yanec. Adecec icho ictiapimbo yanebi, quequin mitsana comapenen tantienda.

12 Adecbidi natiaic shubitequid icnuc Nuquin Papan chiaid niaquenquio yec dayacquio yec tabadquid Nuquin Papan bēdambo icmiaid nendac. Adquiecbidi, Ēmbi chiaid niaquenquio yec mibi tabadsho isembi. Ēbēd icquid mibi neque. Pudued. Nēuēshquio mibi unēstiapimbo iquec, quendac Nuquin Papa. 13 Mibibi icsash, Nuquin Papan namiac nebi, quenda. Nuquin Papa Icsapənquiocquid nec. Aidi icsa uantiapimbo iquec. Icsa uanesa nec. 14 Nidaidēn tabadquidien icsate bunec abibi icsaic. Adecbidi ambibi tantiapadec icsaoaic. 15 Icsamane quequin tantienquio yec unēsacsho abi yacno puduedmenquiocquin Nuquin Papan uquē nēsacaindac adquid.

16 Utsibo, Nuquin Papan chiaid chieshēnesa nebi, quec mibibi mua uadenda. 17 Nuquin Papan pausunaid bēdambouidi iquec. Utsi uaquin nami antiapimbo iquec. Adenuidi namec. Adquiouidi Nuquin Papa iquec. 18 Ēmbi chiaid tantiaquidquio icsho con bacuē nec, caimbi, quequin Nuquin Papan tantiampampic. Aden tantiaquin Nuquin Papan abi chuidonequidquio aton Mado Esus nidaidēn budmepadenece. Adece budash nidaidēn capusho isash abēd ichoedo abi tantiaquido nuquitedi nec. Adquid icsho ambi bēyuc bacuē

icmiaido, con nabo cain, Nuquin Papan cuëmbanoshi. Aden ambi bëyuc bacuë uaido icquin chuibanac ma tantiaquidquio dadpen yampanuna.

Nuquin Papan chiaid tantiaquin nabanta quiaid

¹⁹ Nëid bëdamboen tantiata. Chuinu. Nuquin Papan chiaid bëdamboen tantiaquid icta. Ambi chiaid bëdamboen tantienuiocquin aid badedquio chienda. Adecbidi badedquio nëishenda. ²⁰ Badedquio nëishquidën Nuquin Papan chiapadquieç bëdamboec tabadaid ismesa nec. Adquid, Bëdamboen mimbi naoc, Nuquin Papan catiapimbo iquec. ²¹ Bëdamboec tabadesa icquin mimbi icsamboen tantiapaden naid ënquiota. Aden ënu quiash, Icsaobique. Mimbi chiaid tantiaquiono. Èbi pausun, quequin Nuquin Papa chui. Aden chuisho Nuquin Papan mibi pausunec. Ambi pausunaid iquec aton Mado Esuspadquio yec cuëshëdenquio yec abëdi mibi iquendac.

²² Nuquin Papan chiaid tantiashun nainquio yequi Nuquin Papan chiaid bëdambo iquec, quec mibibi mua uadenda. Nuquin Papan chiaid tantiabocpadomboen nabanta. ²³ Nuquin Papan chiaid tantiashun naisa isnanten ²⁴ bëisadash bëpiscudacimboec bëpiscudendac. ²⁵ Padnuen Nuquin Papan nëbi chuiboed utsin comapenen tantiaded-tantiadedec. Aden tantiashun, Con Mado Esuquidistu tantiaquid con bacuë caimbi, quequin Nuquin Ichon chiapadomboen nabanec tantesa uainquiocquid adquid nendac. Aden tantiaquin nabanquid Nuquin Papan bëdambo icmendac. ²⁶ Padnuen, Nuquin Papan chiaid tantiaquid nebi, queboedi ana bëdamboen oncamesa abibi onquequid nec. Adquid, Esus tantiaquid nebi, quequin ambibi tantiaquin icsamboen chuiquid nec. Abipenquio chuiquid nec. Adquidbidi bëdamboec tabadaid ismesa nec. ²⁷ Nuquin Papan chiaid tantiaquid nebi, quequin utsi tantiaquin nashuntiad. Menampibo caniabictsëcquid chonoadsho isun nashuntiad. Natiaic camiaid icsho isun adembidi nashunoatiad. Adembidi shiadimpi machoabictsëcquido tantiaquin nashunoatiad. Adembidi niante machobo utsin bedabi samëdquido tantiaquin nashunoatiad. Aden naquid Esus tantesan nabanacpaden naisa nendac. Adquid icsho isash, Èmbi chiaid tantiaquin naquidquio nec. Con Madopadquidquio icsaisa nec, quendac Nuquin Papa.

2

Nëid bëdambo iquec. Nëidien icsambo iquec, qesa icta quiaid

¹ Utsibo, Nuquin Icho Esuquidistu Bëdaidquio nec. Aid tantiaquid mibi nec. Adquid icquin, Nëid bëdambo iquec. Nëidien icsambo iquec, quenquiocquin icsamboen nainquiocta. ² Mibi iccuededacno Esus tantiaquid mimbi isacmaid choec. Abentsëc bëdaidquio dasiuidash nac-nacquiocquid mësiuidquid puduednubien utsi icsactsëcquiocquid dasiuidtsash puduedec. Aid daëd chosho isun ¿mitsipadentsi mimbi tantiapatsia? ³ Bëdaidquio dasiuidquid isun naden mimbi tantiatsiac: Bëdamboquid nec. Aton na dadpen icquid nec, quiachimboen, Tsusion dayunquio tsadec cho, quequin mimbi aidi tsadumpec. Adshumbic, icsactsëcquiocquid dasiuidquid isun, Aton nain nibëdchitec, quiachimboen uano tsad mimbi caoapec. ⁴ ¿Nëid icsamboquid nec. Nëidien bëdamboquid nec, quiachimboen Esus tantiaquid utsibo mimbi tsadunenquioda ictio? ¿Aton na tantiaquin adoenquioda ictio? Aden naquin bëdamboen tantiaquin naisa mibi neyoc.

⁵ Nuquin Papan chiaid tantiesabimboecquin mimbi naid nec. Mimbi, Icsamboquid nec, quequin tantiaquin uano tsad caid tsadbudash nadpec: Icsamboquid nec, quequin ëbi isec, quequin tantiec aidi tsadpec. Aidbidi

Nuquin Papan tantiaid nec. Aidi Esus tantiaquid yec abi yacno puduedtequid iquendac. ⁶ Aidi bacuëbimboecnuc mimbi uano tsadumpec. ¿Utsibic tsusio dapabimboecnuc mimbi dayunquio tsadumbocpadquidën utsinutsinquenti chono uashun mibi daëdpactsëc menenquioda ictiosh? ¿Adquidon mua uain chuiquin mibi utsi-utsien quënën nauedmenquioda ictiosh? ⁷ ¿Adoanquidën baded-badedquien Esus quec onquequin mamënshunenquioda ictiosh?

⁸ Nuquin Papan chiaid nad iquec: “Utsin naden ëbi nashuntiadquio iquec quequin, mimbi tantiacpadomboen nashunta.” Nuquin Papan chiaicpadomboen tantiaquin nashunquidquio iquec mibi bëdambo icpec. ⁹ Nëid bëdambo iquec. Nëidien icsambo iquec, quiacbimboen naquid icnuc Nuquin Papan chiaid niacquid mibi iquec. ¹⁰ Nuquin Papan chiaid utsi-utsien nabanquid icquimbi ambi chiaid utsi niacquid mibi icoapec. ¹¹ “Mimbi inacmaid chudenda,” quequin Nuquin Papan chiaid nec. “Utsi cuesunenda,” quequin ambi chiaid utsi nec. Min chidouidi chudquid icquimbi utsi cuesunequid mibi iquec Nuquin Papan chiaid niacquid mibi nepec.

¹² Mibi tantiaquin mibi icsaid pauquec Esuquidistuded icsambocquidbimboec yec unësapanëdash. Aid tantiaquid icsho Esusën paucaid mibi nec. Adquid yec Icbon mibi tantiaquin nabanacpadomboen utsi tantiaquin nabanec bëdamboec tabadta. ¹³ Esuquidistu tantiaquid utsi icsambocquid nec quesa icta. Ëbi icsaid Esuquidistun paucac. Adomboembidi abi tantiaquid utsi icsaidbidi paucac quequin bëdamboen naban. Icsamboembidi nec quiacbimboen icsamboen nabansho isun Nuquin Papan adomboembidi mibi chuiquin cuidoaindac. Ëbëdta Esuquidistun paucaid nec quequin utsi tantiaquin nashumënquid icquin icsambocquid nec quiacbimboen icsamboen nashuntiapimboquid mibi nec.

Esus tantiaquid nebi quequin ambi tantiacpadomboen nabanquin isme quiaid

¹⁴ Utsibo, Nuquin Papan bacuë nebi, qeshun ¿Icbon chiaid nainquiocquinda utsi bëdambo mimbi icmepadi? Padenquio. ¹⁵ Esus tantiaquid abi dasiuidtebëd pete nibëdquid, Bec cho, qesho ¹⁶ menenquiocquin, Nidec nid. Dashcute bedash dasiuidta. Adembidi pete bedshun codocashun peta, ¿mimbi cacta bëdambo icpadic? Padenquio. ¹⁷ Adembidi, Nuquin Papan bacuë nebi, qeshun Icbon chiaicpadomboen naisa Icbon bëdambo icmiaidpenquio nec. Nuquin Papan bacuë nebi, qeshun naisa Nuquin Papa yacno puduedtiapimbo icoaic.

¹⁸ Adnubien, Esus tantiaquid nebi, quec onqueuidequi tabadquid icnubi, Esus tantiaquid nebi, quec onquenquiocquin Icbon chiaicpadomboen nabanquidquio iquec. ¿Mitsipaden aid daëdshun tantiacpadomboen mimbi tantieque? Chui. Tantianu, quequin mimbi chuitsiac.

Adoqui, Esus tantiaquid nebi, quequimbi Nuquin Icbon chiaicpadomboen naisa naden chuitsiambi. ¿Nuquin Icbon chiaicpadomboen nainquiocquin mitsipaden mimbi tantiaid mimbi tantiamepe? quetsiabi adquid chiec. Mimbi ambi chiaicpadomboen nainquiocquin ismetiapimboecnobi, Esus tantiaquid nebi, quequin chienquiocquimbi Esusën chiaicpadomboen naquin mibi ismemb, caimbi. ¹⁹ Nuquin Papa Abentsëcquiobi iquec, quequin mimbi tantieq. Aden tantiaid bëdambo iquec. Adembidi, Nuquin Papa Abentsëcquiobi iquec, quequin mayan icsatedishun tantiaoaic. Aden tantiaquin niacquido yec uëdëquec.

²⁰ Icsamboen mimbi tantieque. Tantia. Chuinu. Nuquin Papa Abentsëcquiobi iquec, qeshun Icbon chiacpadomboen naisa yec, Icho tantiaquid nebi, quetiapimbo iquec. ²¹ Nuquin Papa tantiemi, qeshun ambi chiacpadomboen naquidquo icpampid chuinu. Tantia. ¿Abadauan ëbi tantiaquidquioda neque? Tantuanu, qeshun, Min mado abentsëc mibi cudasaidquio ëbi tantiaquin cuesuneshun tauita, cac Abadauanën Nuquin Papan chiaid niacmane qeshun tauinuequin aton mado abentsëc setsempampic. Chështempi sanandosho isun, Padi. Chën. Ëmbi chiacpaden nanuesho mibi bëdambo iquec, quequin mibi bëdamboen isembi, ¿quequin chienquioda Nuquin Papan icpampic? ²² Abadauan Nuquin Papan chiaid cacuidenquio yec, Con Icho Nuquin Papa nec, quec abi onquiacpaden ismepampic. ²³ “Mimbi tishmiaidën tishmiaid dadpenquioshë iguendac,” quequin chiondashumbic Nuquin Papan yuecshun ademibidi: “Min mado abentsëc cuesuneshun tauita,” quequin chuioaqui, Nuquin Papa abimbo chuiquidquio nec, qeshun ambi chiaid niacchitomanë quequin, Abadauanën aton mado abentsëc setsempampic. Adosho isashien Nuquin Papa, “Ëbi tantiaquin naquidquio Abadauan nec. Adquid con matsesquio aidi nec. Aden aidi tantiaquin ëmbi yuecquiocshon nanuequin tantiäid Abadauan chiemi,” quepampic Nuquin Papa.

²⁴ Nuquin Papan bacuë nebi, qeshun ambi chiaid naquidquio Nuquin Papa tantiaquidquio nec. Nuquin Papan bacuë nebi, qeshun ambi chiaid naisa niacquid nec. ²⁵ Adashic, Nuquin Papan chiaid tantiashun naquid utsi icpampic. Aidi isadaidbon chidopenquio, Daba cuëmëdquid, dada dadpen chudmequid icpampic. Isadaidbon Icho nadatiambocquid nec, qesho tantiashien, Adquid abu nidaidbëdta aidënquiocquid Icbobidi nec, quequin Daban tantiapampic. Aden tantiaquin Daban matses cuesunenuequido isadaidbo abia puduedquin isquid chosho, Nadatiambocquidën matses nec, qeshun abi yacnoidtsëqui Daban puduedmepampic aton matses ismenquiocquin. Aden puduedmequin nadomboen tantiapampic. Abi puduedmequidbëd icquido cuesunenquiocpec, quequin Nuquin Papan tantiamiacpadomboen omposhon podqued utsin nidmepampic. Aden nidmiac yuecash isadaidbo dadpen cho-chonobi abia choamboedën chuibocpadquiobi Dababëd icquido cuesunianenquio yec isadaidbobëd icquidobimboec isec tabadpampic. ²⁶ Nuquin Papa tantiaquid Daba yanshun bëdamboen nasho isun mënchicaid Nuquin Papan con matses caidbëd tabadpampic. Padnuen, Esus tantiaquid nebi, qeshun Icbon chiacpadomboen naisa cuëshëdabimboec tabadec.

3

Anan icsamboen chiec onquiaid icsa ënta quiaid

¹ Utsibo, Nuquin Papan chiaid chuibanquid dadpen iquenquioctiad. Nuquin Papan chiaid tantiamenu, quequin ambi chiaidpenquiocnoc chuibanquid abi yacno chosho isun Nuquin Papan comapenen cuidendac. ² Chuibanquidtedishun chua-chuatsëquien chuibantsec. Nuquin Papan chiaid cuembo chuibanquid yec icsaisa yanec adquid. Bëdamboec tabadaid uesquin tantiaquin ismequidquio adquid nendac.

³ Cabayo anëshquin dëchëdëdcash uidën uash tsadquin nidmec. Aden uidën uaquin bidiacmec. ⁴ Ademibidi uncaten cano dapa tsibidiacoaic. Cunquequidën comapenen bëcunetiadquiocnobi ademibidi icbon nidmec. ⁵ Cabayo canobidi nua icnuc abi bidiacmete aniactëc iquec. Adecbidi icbo nua icnuc aton ana aniactëc iquec. Aniactëcquidi oncamequin icbon ambi naid dadpen comapenen chuibanec. Ademibidi oncamequin onquiaid icsa

chuiabanec. Nēdēnquiaid dētsisidash badedquoio nidacimbocue onquiaid icsa badedquoio nidoaic. ⁶ Ana onquiaid icsa chuiabanacpaden nabanec adecbidi icsabudquieic icbo. Adquid mayan icsan yua iquec adequi icsate bunec.

⁷ Nidaidēn capuquid podochoquidbidi matsesēn yuampicpaden abi yuaid iquec. Yua quenenash cuenenquiocquid. ⁸ Ad yenguo ana iquec. Quenenquo yec ana onquebudec. Onquiaid icsa adecbidi ēnēdtiapimbo iquec. Ana onquiaid icsa tantiabanec adecbidi icsabudquieic tabadendac.

⁹ Nuquin Icho bēdambo iquec, qeshumbic ana icbon, Nuquin Icbon uaid matses icsambo iquec, quequin chuiabanoaic. ¹⁰ Ana shēcuēn utsi bēdamboen chuishumbic utsi icsamboen chuioaic. Aden nuqui chienquio ictiad. ¹¹ ¿Acte batapenquiocquid choaidēnuēsh batambocquidta chopadic? Padenquoio. ¹² Adecbidi ¿cuēte bacuē batambocquidēn ēshē bēchi chopecta dēyuctic? Padenquoio. Adecbidi, ¿Isitodo dataniadāidēn bacuē batambo yecta dēyucpadic? Padenquoio. Aidi adesa yacpadquieic Esus tantiaquidēn ana shēcuēn utsi bēdamboen chuishun utsi icsamboen chiesha ictiad.

¿Tsutsi Nuquin Papan chiaid tantiabenquidquo icpec? quiaid

¹³ ¿Tsutsi Nuquin Papan chiaid tantiabenquidquo icpec? Adquid yec comapenen Esus tantiaquid nebi, quenquiocquimbi bēdamboec tabadquin ismequid utsi-utsien ma icmebampanuna. ¹⁴ Utsin tantiamenushe qeshun ēmbia chiacpadomboen ma napanu guesa icta. Nuquin Papan chiacpadomboen nabanquin ismequid icta. ¹⁵ Adembidi, utsin dēniacnushe qeshun namenun chuinuequid Nuquin Papan tantiacpadomboen pausunacmaid nec. Adquid mayan icsan tantiacpadomboen pausunaid nec. ¹⁶ Aden aidēn icsamboen tantiacpadomboen abēd icquidon adomboembidi tantiec. Aden tantiec, Utsi dēniacnu, quiash utsi-utsiec dēniacnuequido dadpen yanec. Adquid dadpen icnuc chuiquid dapa tantiate bunesa icpec. Cuesnante bunquieic. Ad icnuc icsateuidi bunquid yampec. ¹⁷ Nuquin Papan tantiacpadomboen pausunaid ad yenguo iquec. Ambi tantiacpadomboen pausunaid yec utsibēd bēdamboec tabadquid iquendac. Adembidi utsi tantiaquin nashunquidquo icoaindac. Adembidi ēbēdtan nabanec cho cac nabanendac. Adembidi, Icsambocquid nec, quenquiocquin bēdamboen nabanquin ismendac. Adembidi, Esus tantiaquid nebi, abi quiacpadomboen bēdamboen naic. Adecbidi utsibo chiech muaisa nendac. ¹⁸ Ambia tantiaquid utsibēd bēdamboec tabadquin ismiac adecbidi utsibēd bēdamboec tabadquid dadpen yanendac.

4

Ēbi nua pausun, quequin chiash Nuquin Papan dayunquoio tsadta quiaid

¹ ¿Atotsi quiash Esus tantiaquido cuididianante buncudedepc? Mibi icsate bunacpadequi mibi cuididianante bunec. Aiduidquo tantiabudequi mibi chushcanancudedec. ² Nēid bunebi, queboedēmbi bedtiapimbo yanquin mimbi cuesunec. Adecbidi, Utsi dēniacnu, quiash chushcananec. Mimbi naiduidi naquin Nuquin Papan tantiacpaden naisa mibi nec. ³ Aden naisa icquin Nuquin Papan chiaid niacmane quenquiocquin aidi mimbi chiech. Adec icsanueshun chuisho Nuquin Papan mibi menetiapimbo iquec.

⁴ Mimbi inaiduidi chudenquoio yacpadquiequi Nuquin Icbouidi tantienquoio yec Esus tantiesan icsate bunquin nacpadomboen mimbi nadenec. Adquid yec Nuquin Papan chieshēnquid nec. ⁵ Adenquiocquin Esus tantiaho isun aton Mayan Nuquin Papan Esus tantiaquidtedi meniāc bēdamboec tabadec. ¿Atotsieshun Esus tantiaquid aidi menepec quepecta mibi ique? Nad iqueque. Tantia. Chuinu. Con bacuē nec, quequin aton Mayan

Nuquin Papan Esus tantiaquido menec. Aden tantiaquin meniac, ¿Esuquidistu tantiaquido cudasquin dëcatenquioda aidën icpec? ⁶ Aidëmbi abi chieshenquoio yacpaden tantiamëbanac icsamane quiaish chieshenquoio yec bëdamboec tabadta. Nuquin Papan dada uamiampid nad iqueue. Tantiata: “Nuquin Papan chiaid niacquin ambibi naid nasho isun pausuntiapimbo Nuquin Papa iquec. Icsaobi. Ëmbibi bëdamboen tantiatiapimbo iquebique. Èbi tantiamë, Papa, qesho Nuquin Papan nua pausunac aton icbo chieshënenquiocquid iquëndac adquid.”

⁷ Aden Nuquin Papan chiaid icnuc, Icsaobique. Mibia Yampidën ëbi nua pausun, Papa, quequin chiasch Nuquin Papan dayunquoio tsadac bimboecquin ambi chiaid tantiata. Nuquin Papa chieshënuquid mayan icsan yuadenda. Adquidën yuatiapimbo iquebique. Nuquin Papan chiaidquoio nabanu, qeshun nabanuc mayan icsa cuenendac. ⁸ Aton dayunquoio tsadquid bimboecquid bëd tabadquidquoio Nuquin Papa nec. Icsash uano tsadquid icboedi bëchishash acten dapanudac bimboen mimbi tantiata icsa ënta. Adash, Tantiataid bëda pausumenu, quiaish Nuquin Papan dayunquoio tsadac bimboecquin chieshenquiocquin ambi chiaiduidi tantiatieneta. ⁹ Aden tantiec tsadboedi, Ëmbibi tantiambi, quec Nuquin Papa chieshënuquidën dayunquoio uano tsadashic, Con Icbo tantiec unësquoio iquebi, quiaish shubiec mamënenquoio yec tsadta. Mibibi uano tsadquid yash unësac bimboec icboedi choec isadcuënac bimboec Nuquin Papan dayunquoio tsadac bimboec yec chieshenquoio yec bëdamboec tsadoata. ¹⁰ Uano icboedi choash, Èbibi icsaobi. Nëbi icsate bunenquoio iquebi. Mimbi chiapadtiadquoio iquebi, Papa, quequin chui. Aden mimbi chuisho tantiash, Puduedash nëmbo ëbëd tsadac bimboec mibi yanoaic, quependac Nuquin Papa.

¹¹ Utsibo, Esus tantiaquidtedi min utsibimboecquid nec. Mibëd icquid icsamboec chuinanenquoio yacpadquieci Esus tantiaquid utsibëd icsamboec chuinanenda. Esus tantiaquid icsamboec chuinanquid Nuquin Papan chiaid niacquid nec. Aden chuiquid Nuquin Papan chiaid icsambo iquec quiac bimboecquid nec. ¹² Nuquin Papa Chuiquid Dapa Abentsëcquiobi iquec. Ambi chiapaden naquidquoio nec. Nuquin Papa abitedi Isquidquoio Abentsëcquiobi nec. Aden isquin: Nëid icsambocquid nec. Nëidien bëdambocquid nec, quequin Chuiquidquoio abentsëcquiobi aidi neoaic. Adquid icquin ambi chiaid nabanquid abëdi tabadmec. Ambi chiaid niacquidien abëdi tabadmenquiocquid uquë nësëcaindac. Nuquin Papan ambi chiapadomboen naquid bëdtabi ambi chiapadomboen naisa isquidquoio icquin ambi isacpaden cuidendac. ¿Adquidbidida mibi ne? Padenquoio. Adquidpenquoio icquin ¿atotsieshun, Icsambocquid nec, quequin mimbi chuipe?

Ma badiadshun nanun chiaid tantiesa neyoc, quequin chiaid

¹³ Tantiacquidquoio nebi, quiaish, Piucquid bednuc seta abentsëc matamec chonoadec nidebi, quequid chuinu. Tantiata. ¹⁴ Ma adquid badiadshun nanun chiaid tantiesa mibi neyoc. ¿Tëdtsi seta matamec mibi tabadpe? Badiadbudnuc cuen-cuëmpambo yash badedquoio nidac bimboec matses nidaidën tabadash adecbidi mibi nibëdanendac. ¹⁵ Naden nanu quenquiocquid nadembien tantiatiad: Nuquin Papa bunaid icnuc badiadash isedec nidebi, quietiad. Adecbidi, Nuquin Papa bunaid icnuc badiadshun tied neshcaimbi, quietiad. ¹⁶ Aden chienquiocquimbi mibi utsi dëniaquec onquaid mimbi chiec. Aden chiec icsaic. ¹⁷ Nuquin Papan chiaid tantiambi, qeshun adomboen natiadquidi naisa iquec icsaic.

5

Na dadpen bedbanquin dayun uaquido chiaid

¹ Nēbi aton na dadpen bedbanquin dayun uaquido chiembique. Tantiata. Mibi unēsun mimbi bedbanquin daēd uaid mimbi tantiaidquio buantiapimbo mibi iquendac. Aden mimbi bedbanquin daēd uaiduidtsēqui icsho isun Nuquin Papan mibi cuidendac. Adquid nebi, quequin tantiash shubita. ² Unēsosh, quequin chiac mimbi dadpen dayun uaid nibēnquin isac ēnden chodquiac. Adembidi mimbi bēdaidquio dectanaid capishton ēnden piac. ³ Min shocosh piucquid ēnden chiuidac. Adecbidi min piucquid utsi ēnden tiadac. Adenuidi tantiaquin bedbanquid unēsacsho abi yacno yuedquin, Bēdamboen mimbi naoc, quetiapimbo Nuquin Papa iquendac. Tanunēnquio shubu nēdēnquiash nibēdacpadquieq mimbi bedbanaid nibēdquiendac. Adenuidi tantiaquin, Esus ēbi bedec chonoshe qeshun ¿Nuquin Papa yacno puduedmenun tsutsimbi Esuquidistu chuibampe? quequin tantienquiocquin mitsana dadpen bedbanshun mimbi dayun uaoc. ⁴ Adembidi mimbi icsamboen naid utsi iqueque. Tantia. Min tied uaquido mimbi chono uaboedo bunec sidquieq. Aidi mimbi menenquio yaid Esuquidistu tantiaquido Nuquin Papan tantiaido nec. Adembidi, Con tiedēn caniquidtsen dayun uanu, quequin mimbi bedmiaido uēshquieq bunec sidquesho Nuquin Papan, Nadatiambocquid Abentsēcshun tantieq. ⁵ Aido bunec sidquenubi chonoadenquiocquin nua pec mibi tsadec. Adeq tsadquin min nami bunaiduidi tantiaquin mimbi bedbanoaic. Nua pec cubudacimboen mibi bunaiduidi bedbanquin dadpen dayun uaquido mibi nec. Aden nabanquin bēdamboec tabadaid ismesa mibi nec. Adeq tabadec unēsash abi yacno mibentsēqui chosho Esuquidistu tantiamibocquid nec, quequin Nuquin Papan mibi isendac. Aden isquin mimbi chono uaido mimbi cuidacpadomboen aidēmbi mibi cuidendac. ⁶ Mimbi chiaid mimbi chono uaidon niaquequiocquin nabanacshobi, Icsamboen mimbi naoc, quequin daēdpactsēq mimbi menebampoc. Aden nabanec mimbi cuesuniachimboec bunquieq chonoadequi unēsosh.

Ma Nuquin Icho chono quiash chieshesa icta quiaid

⁷ Nēbi utsibon chono uaido chuinu. Tantiata. Nuquin Icho choec quequin tantieq chieshenquio yec tabadta. Nitsinash ma caninu quianec pec nidash cainec icho tabadec. ⁸ Adembidi, Nuquin Icho ēbi bednuec choec, queq bēdamboec tabadquin caimbudta. ⁹ Adeq tabadquin Esus choate cainec Esuquidistu tantiaquid utsibobēd chieshēnanenda. Adeq utsibobēd bēdamboec tabadsho isun abitedi tantiaquidēnquio Chuiquid Dapan mibi menequin bēdamboen cuidendac. Adesain menenquiocquin cuidendac. Adembidi, Nēidēn bēdamboen naosh. Nēidēmbien icsamboen naosh, quequin ēbi Chuiquidēnquio chiendac, queq chieshenquio yec bēdamboec tabadta.

¹⁰ Utsibo, natiatequid icnuc Nuquin Papan chiaid ambi chuimiaido chieshenquiocpampic. Aidquio chuibanu. Tantia. ¹¹ Natiaid icnuc chieshenquiocsho isun Nuquin Papan bēdambo icmendac, quequin nuqui tantiondaid nendac. Natiaic cametequid icnuc Nuquin Papa chieshēnenquiocquid Obo icpampic. Aton na dadpen icboedi icsatequid utsi-utsiectsēcquieqquidēn uesac nibēdquiocsho isash, Con nabēd con nabo nibēdnuc Nuquin Papa bēdambo iqueq, queq chieshenquiocpampic Obo. Adquid icsho isun daēd uaquin Nuquin Papan meneopampic. Matses tantiaquin naquidquio Nuquin Papa nec, quequin ¹² abimbo chuiquidquio icta. Utsin: ¿Ada naden natsia? cac, Ai, quiacpadomboen nabanta. Adembidi, Padenquio, quiacpaden nabanoata. Mua uanec onquequid Nuquin Papan cuidendac.

Nëidic bēdampec quequin abimbo tantianuc quiaid

¹³ ¿Natiambo icsatequid icnuc dayactiapimbo icquidta icpec? Adquidēnquo Nuquin Papa chuitiad. ¿Bēdambo iquebi, quec tsadquidta icpec? Adquid Nuquin Papan naid chiec cuēdēntiad. ¹⁴⁻¹⁵ ¿Aton dada icsabudquidta icpec? Adquidēn ambia Esus tantiaquido chuiquin, Nuquin Papa ēbi chiec cho, catiad. Adsho tantiash choshon icsabudquid tantiaquin anoshonuidi Nuquin Papa chuidoneta. Aden chuidoneshun cuēte bacuē ēnē chinshun dashunquinquin, Mimbi utsibo bēdamenēdacpadomboen mimbi tantiacpaden nēidtsen bēdame, Icho, quequin chuita. Aden Nuquin Papa chuinun mibi icsaid icnuc, Icsaobi, quequin mimbi naid Nuquin Papa chui. Adembidi dada icsabudaid chuiquin, Mibi icsaid icnuc Nuquin Papa chui ma mibi paucnu, quequin chuita. Aden ambi naid icsa chiacsho paucacpaden ma aton dada bēdamepanuna. ¹⁶ Abi icsaid uesquin Nuquin Papa chiash bēdamboec tabadendac. Adquidēn chiac dada icsamboequid Nuquin Papan bēdamendac.

¹⁷ Edias nuquibimboecquid matses icpampic. Nuquin Papan nua pausunac Nuquin Papan tantiacpadomboen Ediasēn tantiapampic. Adquid icquin, Ue secamenda, Papa, cac adecbidi seta 3ted matamiash seta utsi choabicnuc ue sequenquo icpampic. ¹⁸ Adembidi, aidēmbi yuecshun, Ue secame, Papa, cac ue sequenuc tiedēn caniquid canipampic.

¹⁹ Esus tantiaquidēn Nuquin Papan chiacpadomboen nabamboedi adoesa utsi-utsiec yantsiash. Adsho isun Nuquin Papan chiaid tantiamequin ambi icsamboen tantiaid chuibanac Nuquin Papabēd yacbibimboec icoaindac. ²⁰ Aden mimbi chiac chieshenquo yec tabadsho isun Nuquin Papan uquē nēsatiapimbo adquid iquendac. Adecbidi abi icsaid bēpiscudoaic Nuquin Papa.

Padi. Mibi tantiaquin aiteded dada uaombi.

PETEDON DADA UAID 1

Petedon tauamboen chiaid

¹ Petedo nebi. Abëd icquid icsho Esuquidistun: –Èbi chuibeneta –caidquio nebi. Esus tantiaquidtedishun mimbi iste dada uanu. Isadaidbo icsho nuquin nidaidënsun ënden cuemenëdac mais-maisacchobi yec nidaid utsi-utsiec yacno mibi tabadec. Utsi-utsiec nidaid Ponto caid yacno tabadec. Utsi-utsiec nidaid Cadasia caid yacno tabadec. Utsi-utsiec nidaid Capadosia caid yacno tabadec. Utsi-utsiec nidaid Asia caid yacno tabadec. Utsi-utsiec nidaid Bitinia caid yacno tabadec. Aidedi nidaid yacno tabadquidon iste nëid dada uaic nebi. ² Èndenquio Nuquin Papa: –Èmbi tantiactedi matses ëbëdta Esus tantiamendambi –quepampic. Nëbi ambi tantiacpadomboen aton Mayanën Esus tantiamequin nuqui bëdamboec tabadte bumec. Adoac: –Icsambo icquid cuidmenquio icnuec abided cuidadaid Esus tantiasho Nuquin Papan ëbi bëdamboen isec. Aidën chiacpadomboen natiadquio iquebi –quequin Esus tantiec nuqui bëdamboec tabadec. Aden tantiaquin Nuquin Papa chianembi naden. –Ènenquio icquin aido bëdamboen ista, Papa. Adembidi dacuëdenquio icnuc bëdambo icmeta, Papa –quequin Nuquin Papa mibi chianembi.

Esus tantiaquid Nuquin Papa yacno tabadte chiaid

³ –Nuquin Icbo Esuquidistun Papa Nuquin Papa bëdamboshë iquec –canuna naden tantiaquin. Icsaquido cuidte bunenquio icquin utsiacbim-boecnuc nuqui icmenuen Nuquin Papan abided cuidadaid Esus nuqui tantiamiondash. Adoac nuqui naden tantiec. –Esuquidistu chococac uincuenash padpidec unëstiapimbo iquendac. Adembidi nuqui unësascho uincuemeshun Nuquin Papan abi yacno nuqui tabadmendac padpidec unëstiapimbo icnuc. ⁴ Ambi chiampicpadomboen bëdamboshë yacno Esusbëdquio ëbi tabadmendac. Unëstequid nibëdec icsabudtequid nibëdec chod-quetequid nibëdec quiacnombo Esusbëdquio nuqui tabadmendac –quequin nuqui tantiec. ⁵ Aden Esus tantiaquid icsho isash: –Con Mado Esus tantienquio yanushe –quiash nadatiambo icquin nabanquid yec Nuquin Papa nuqui cudasec. –Esus chote ushën ëbi yacno tabadmendambi –quëc Nuquin Papa nuqui cudasec.

⁶ Èmbi aden chuisho tantiasho mibi cuishonquendac. Esus tantiesabon chieshënac shubiantiadtsëcquio yec natiaboedi mibi bëdambo yanendac. –Nuquin Papabëd tabadec quenendabi –quëc yuec nuqui shubienquio iquendac. ⁷ Nuqui cudasquid yec çatotsi quiash Nuquin Papa: –Padi. Chën. Esus tantiaquido natiamënda –queboedi adenquio icted-ictedpec? Matsu nacnenquidën: –Ma tsasinu –quequin ambi nacnenauid tauiec. Adembidi Esus tantiaquid chieshtoenquio icquid icmete Nuquin Papa comapenec bunec. Matsu nacnenquidën: –çBëdambo icquidida neque? Isnu –quetanquin matsu tauiec. Adembidi: –çEsus tantiaquidquibida neque? Isnu –quequin: –Natiamënda –cainquio iquec Nuquin Papan. Aden natiamiaquid chieshtoenquio icquid icsho Esuquidistun padpidec choshon: –Mibi bëdambo iquec. Èbëdi tabadec cho –quequin utsibo tantiamequin chuishun abi yacno buanendac.

⁸ Aden mimbi isacmaidi Esus mimbi tantiaquiec. –Nëbi isadenquio icquidi Nuquin Papan Madombo Esus ëbi bednuec choendac –quëc mibi cuishonquianec. ⁹ –Abi tantiasho icsano nidmenquio icquin Esusën abi yacno ëbi yuedendac –quëc Esus tantiec mibi cuishonquianec.

Esus chote tsusedpabon chiampid

¹⁰ Ēndenquimboshē Nuquin Papan tantiamiac isadaidbo tsusedpabon Nuquin Papan chiaid chuiquidon Esusēn matses cuidmenquoio icte dada uapampic. Esusēn nate abitedi tantienquoio icquin daēdpactsēc tanti-aquin: —¿Mitsipadquid Nuquin Papan chomepeba? —queded-quededquin chuipampic nuquin tsusedpabo isadaidbon. ¹¹ Aidobēd icquin Esuquidistun Mayanēn tantiamiac Esus chote abentse-abentsen chuipampic. —Matsesēn chieshēnquin cuesten dectanac matses cuidmenquoio icnuec abided cuidadec unēsēndac. Adec unēsacsho uincuemiatic padpidec abitedishun Icho icoaindac —quequin Esus chote chuipampic. —¿Tsutsi chopec? ¿Tedeetsi yash chopec? —quequin abitedi tantiatiadquoio icquimbi daēdpactsēc isadaidbo tsusedpabon tantiapampic. ¹² Naden Nuquin Papan tantiamepampic. —Mibi nibēdanan Ēmbi chuiboed Ēmbi matsesmiacsho utsibon isendac —quequin tantiamiac Esusēn nate chuipampic. Aden chiampicpadomboen Esusēn naondash. Nuquin Papan Mayanēn tantiacpadomboen aid chuibenquidon aidēn naid mibi chiac caondash. Aden Esusēn naid Nuquin Papan abi yacnoshon uaido mayan bēdabontsen tantiatiadquoio icquimbi abitedi tantienquoio iquec.

Bēdamboec tabadte tantiamiaid

¹³ Ēmbi chuiboed Esus tantiaquido icquin paposhquiachimboen Esusuidi tantianuna. Nuqui icsate bunacpader icsainquoio yec bēdamboec tabadnuna. —Abi yacno tabadmenuen Esuquidistun abi tantiaquido beduanendac —quequin tantianuna Ēnenquoio icquin. ¹⁴ Ambi: —Con mado nec. Con champi nec —caido icquin Nuquin Papan chiacpadomboen nanuna. Ēnden Nuquin Papan chiaid tantiabi mibi bunaid naic mibi icsanēdacpader icsainda. ¹⁵ Mibi Esus tantiamequid icsaisambo Nuquin Papa neque. Ambi chiaid niaquenquoio yec bēdamboec tabadnuna. ¹⁶ Nuquin Papan ambi chiaid naden dada uamepampic. “Nuquin Papa icsaisambo nec,” quiash icsaisa ictiadquoio yec bēdamboec tabad,” quequin Nuquin Papan ambi chiaid dada uamepampicpader bēdamboec tabadnuna.

¹⁷ Papa quequin nuqui chianeboed Nuquin Papa matsesēn naidtedi chuiquid nendac. —Nēid ēbi tantiesa neque. Icsano nīdmenu. Nēid ēbi tantiaquid neque. Ēbēdi tabadmenu —quequin matses abitedi chiendac. —Abēdi tabadmenquoio icnushe —quiash Nuquin Papabēd icte bunec bēdamboec tabadnuna. ¹⁸ Nuquin tsusedpabon chiaiduidi naquin Nuquin Papa tantienquoio nuqui icpondac. Aden Satanasēn yuaido icsho Nuquin Papan nuqui bēdamboen istiapimbo icpanēdash. Adshun Satanas nuqui bedshunuen ¿piucquidida Nuquin Papan menapanēdash? Padenquoio. Adquid icsabudtequid menenquoio icquin ¹⁹ aton Mado Esus icsaisambo icsho matsesmepanēdash. Aden matsesmiacsho chieshēmēnguidēn cuesten dectanac Esus aton intac chididiquec abided cuidadec unēspondash. Nēbi aton Mado Esus tantiaquido bēdamboen isquin Nuquin Papan Satanas bedshunec. Aden Nuquin Papan bedshunaid yec bēdamboec tabadnuna. ²⁰ Ēndenquimboshē abitedi uabi Nuquin Papa nadpampic. —Ēmbi tantiacpadēn yuecash matsesash matses cuidmenquoio icnuec mibided cuidadec unēsta, Mado —quepampic. Aden ambi chiampicpadomboen badedquoio namenquoio icboedēmbi nēbi nameshun Esus tantiasho mibi bēdamboen isec. ²¹ Abi tantiasho Esusēmbi Nuquin Papatsen nuqui tantiamec. Adoac nuqui naden tantiec. —Esus unēsacsho uincuemeshun abēdi tabadmequin abitedishun Icbombo Nuquin Papan icmeoapanēdash. Ambi chiacpadomboen naquidquoio Nuquin Papa nec. Ēbi unēsacsho uincuemeshun abi yacno ēbi tabadmendac —quequin Nuquin Papatsen nuqui tantiec.

Esus tantiaquido tantiananquiote chiaid

²² Nuquin Papan chiacpadomboen naic bēdambo yanshun mibēdtan Esus tantiaquido utsibo mimbi tantiec. Adecbidi muenquio yec tantiananquionona. ²³ Esus tantiamequin Nuquin Papan chuca uaido nuqui neque. Adquid yec tantiananquionona. Nuqui chuca uaquid Nuquin Papa nibēdantiapimbo icquid icnuc ambi chiaid bēnudtiapimbo iquec. Aidēn chiaid tantiashun mimbi Esus tantiabempanēdac. ²⁴ Ambi chiaid bēnudtiapimbo icte Nuquin Papan nuquin tsusedpa dada uamepampic naden chuiquin. “Uasimbimboec unēsquid matses nec.

Cuēte bacuēec bēdamboshē isadboedi badedquio chodquequid nec. Adecbidi matses: ‘Con nabēdi bēdamboshē iquebi,’ queboedi badedquio unēsquid nec.

²⁵ Nuquin Papain nibēdantiapimbo icquid nec. Adnuc ambi chiaid bēnudtiapimbo iquec,” quequin abimbo chuiampic. Aidēn chiaidquio mibi chiac caondash.

2

Nuquin Papan chiaid iste bunquionona, quiaid

¹ Aden Nuquin Papan chiaid tantiash chieshēmēnec tabadenda. Utsi muauainda. —Esus tantiaquid nebi —quiashi icsamboec tabadenda. Utsin na isash: —Adquid con na nibēdec —quec chieshēmēnec tabadenda. Utsibo chieshēnec icsamboec onquenda. ² Adenquio yec Nuquin Papan chiaid iste bunquionona. Tishac chucactsēc bacuēmpi shuma chishte bunquiachimboec Nuquin Papan chiaid iste bunquionona. —Bēdiactsēc tantiaboedi aid isban-isbanquin Nuquin Papan chiacpadomboen natiadquio yantsiabi —qeshun Nuquin Papan chiaid isbanuna. ³ —Esus tantiec bēdambo iquebi —qeshun Nuquin Papan chiaid isbanuna.

Buintadbimboecquid Esus nec, quiaid

⁴ Nuqui tantiaid nadquio iquec. Shubu uanun buintadquio nacnitsinuen istuidshun: —Nēid bēdambo iqueque. Nēidquio naimbi —quiachimboen Nuquin Papan: —Ēmbi tantiaidquio yec mibi bēdambo iqueque. Ēmbi chiacpadomboen mibi namenu —capanēdash Esus. Adoaidi matses dadpenshunquio Esus chieshēnondash. Padnuen nuqui: —Nuquin Papa yacno puduedmianquid bēdambo iquec —quequin nuqui Esus tantiabempondac. ⁵ Aden Esus tantiaquido icsho isun Nuquin Papan aton shubun icquidobimboecnuc nuqui icmec. Adoac: —Con matses Esus tantieme, Papa —quequin Nuquin Papa chianequid nuqui yanec. —Nuquin Papa bēdamboshē iqueque. Ambi chiacpadomboenuidi natiadquio iquebi —quec bēdamboec tabadquidtsen nuqui yanec. Adsho isash: —Bēdambo iquec —quependac Nuquin Papa nuqui caic. ⁶ Aden aton Mado Esus tantiate chuiquin Nuquin Papan dada uamepampic naden.

“Buintad bēdambo icquid istuidash: ‘Nēidquio shubu uanun nitsinembi,’ quiachimboen Edusaden yacno ēbi bēdamboen ismequidquio isadaidbobēd tabadmendambi.

Aid caic: ‘Nēid tantiasho Nuquin Papan abi yacno nuqui tabadmendac,’ quequin abi tantiaquido unēsacsho ēbi yacno tabadmendambi,” quequin Nuquin Papan ambi chiaid dada uamepampic. ⁷ Aid tantiec: —Bēdamboshē iquec —quependac Esus tantiaquido. Utsibombien Esus chieshēnec. Ēndenquimbo Esus choabi icnuc aidēn nate chuiquin Nuquin Papan dada uamepampic naden.

“Buintad bēdambo icquid istuidashi: ‘Nēidquio shubu uanun nitsinembi,’ quetiadquidi isuidacimboen Nuquin Papan namiaid chieshēnac.

Aden buintad isuidaid utsin bedshun shubu uanun nitsinacimboen Nuquin Papan tantiamiacpadomboen utsibon ambi namiaid tantiosh,”

quequin Nuquin Papan dada uamepampic. ⁸ Adshumbic Esus chieshētetsen dada uamepampic naden chuiquin.

“Nuquin Papan abipadquidquio Edusaden yacno isadaidbobēd tabadmiacsho ambocquidon chieshēnendac.

Aid chieshēnquid nadquio iquendac. ‘Cuēte mabud iquec,’ quequin tantienquio yec nidec tocoshquetanec uebudacimboec

ēbi bēdamboen ismequid tantienquio yec unēsash icsano nidendac.”

quequin Nuquin Papan ambi chiaid dada uamepampic. Aden Nuquin Papan chiaid tantiatipimbo icquin Esussten tantiatipimbo iquec. —Adquid icsano nidmendambi —quequin Nuquin Papan tantiacpadec Esus tantiesabo yec unēsash icsano nidendac.

Nuquin Papan matses nuqui nec, quequin chiaid

⁹ Esus tantiesabo dadpen icnubi Nuquin Papan Esus tantiamiaido nuqui nec. Icsambo iccondaiddi nuqui Esus tantiamepondash paposhquiacimboecnuc. Adoac: —Nuquin Papa bēdamboeshē iquec. Ambi chiacpadomboenuidi natiadquio iquebi —quec bēdamboec tabadquid nuqui yanec. Adembidi: —Con matses Esus tantiameta, Papa —quequin Nuquin Papa chianequid nuqui nendac. Adecbidi: —Nuquin Papa bēdambo iquec —quequin utsibo chuibanquid nuqui nendac. ¹⁰ Ēnden abi tantiesabo icsho Nuquin Papan mibi bēdamboen istiapimbo icquin: —Con matses mibi nec —mibi catiapimbo icpanēdash. Nēbi Esus tantiasho Nuquin Papan mibi bēdamboen isquin: —Con matses mibi nec —mibi caindac.

Bēdamboec tabadte chiaid

¹¹ Ēmbi tantiaido mibi neque. Tantia. Mibi chuinu. —Nuquin Papa yacno tabadendabi —quiash Esus tantiesa icsate bunacpadec icsainda. —Esus tantienquio yamane —quiash bēdamboec tabadta. ¹² Esus tantiesabobēdi bēdamboec tabadnuna. —Ma aidontsen Esus tantianu —quiash adnuna. Adec mibi bēdamboec tabadsho isun mibi chieshēnquin icsamboen chuishumboedombi Esus tantiabenshun Nuquin Papa naden chiendac. —Mimbi namiado bēdamboec tabadsho isun Esus tantiabennombi. Mibi bēdambo iquec, Papa —quendac.

¹³ Bēdamboec tabadnuna. —Con Icbo Esus matsesēn chieshēnushe —qeshun matses chuiquid dapatedishun chiacpadomboen nanuna. Nuquin nidaidēn tabadquido abitedi chuiquid dapa pedesidente caidēn chiacpadomboen nanuna. ¹⁴ Aidēn: —Mibitsen matses chuiquid icta —caidon chiacpadomboentsen nanuna. Matses icsasho isun cuidquid neque. Adecbidi bēdamboec tabadsho isun: —Bēdambo icquid nec —caquid neque. Aidēn chiacpadomboen nanuna. ¹⁵ Aden Nuquin Papan chiacpadomboen naic bēdamboec tabadsho isun: —Icsamboec tabadquid nec —mibi caboedobi adtiapimbo yantsiash. Aden piushbimboecquin tantienquio icquin icsamboen chuiboedombi ambi icsamboen chiaid ēntsiash.

¹⁶ Satanasēn yuaido icsho Esusēn bedshunaid yec nēbi icsambo icquidēn yuapenquio yec bēdamboec tabadnuna. Icsanuec: —Utsin yuapenquio yec ēbi bunaiduidi naimbi —quenda. Nuquin Papan yuambo yec bēdamboec tabadnuna. ¹⁷ Matses abitedi bēdamboen isnuna. Esus tantiaquido icquin nuquibēdtan Esus tantiaquido utsitedi tantiaquionona. Dacuēdampambo

Nuquin Papa icsho tantiash bēdamboec tabadnuna. Chuiquid dapambo pedesidente caid bēdamboen isquin aidēn chiacpadomboen nabanuna.

Yuabo chiaid

¹⁸ Tantia, yuabo. Esus tantiaquido icsho mibi chuinu. Min icbon chiacpadomboen nata. Min icbo bēdambo icquid icnuc adota. Min icbo dacuēdampambo icquid ancanquidquio icnubi adembidi nata. ¹⁹ Adec Nuquin Papa tantiaquid yec bēdambo icsho cuesaqui chieshēmēnenquio icsho: —Aid yua bēdambo iquec —quequin Nuquin Papan mibi bēdamboen istiashe. Min icbon chiacpadomboen nata. ²⁰ ¿Icsamboec tabadquid cuesac chieshēmēnenquio icquidta Nuquin Papan: —Aid yua bēdambo iquec —capatsiash? Padenquio. Nuquin Papan chiacpadquiec bēdamboec tabadquidi cuesaqui chieshtoenuio icsho: —Aid yua bēdambo iquec —Nuquin Papan catsiashe. Bēdambo icta.

Chieshtoenuio yec Esus unēsaid

²¹ —Chieshēnaqui chieshtotiadquio iquebi —¿quecta ique? Tantia. Mibi chuinu. —Con Mado Esusbimboec ma icnu. Chieshēnaqui ma chieshtoenuio icnu —qeshun Nuquin Papan nuqui Esus tantiaquid icmepondash. Esus nadondash. Nuquin Papā nuqui cuidmenquio icnuc abided cuidadec mēyadec unēspondash. ²² Nuquin Papan dada uamepampicpadquio “muesambo yec icsaisambo icpondash.” ²³ Adquid icsho abi chieshēnquidon mamēnshunaqui Esusēn chushcainquio icpondash. Aidon matonbudnetanquid buanshun cueten dectanac: —Mibitsen cuidendambi —cainquio icpondash. Adenquio yec nadpondash. —Nuquin Papan matsesēn naidtedi tantiaquid icquin bēdambo icquid abēdi tabadmequin icsambo icquid cuidquin icsano nidmendac —quiash chieshēmēnenquio icpondash. ²⁴ Adash: —Ēbi tantiaquid ma icsaid ucudacimbboec bēdamboec tabadnu —quiash nuqui icsaid bedshunec abided cuidadec unēspondash. Adec aton Madoded cuidadec unēsascho isash nēish bēdānshun Nuquin Papan aton Mado tantiaquido bēdamboen isec. ²⁵ Yuan icbo cuenēnacimbboen Nuquin Icho nuqui tantienquio icpondac. Adoboedi nēbi: —Con Icbon ēbi bēdamboen dayun uaquin ēbi bēdamboen namendac —qeshun nuqui Esus tantieque. Bēdamboen nanuna.

3

Bēnēbēda chido chiaid

¹⁻² Tantia, chidobo. Bēnēchoquid icsho mibi chuinu. Esus tantiaquid icquin min bēnēn chiacpadomboen nata. —Esus tantiec ēbi bēdamboec tabadsho isun Nuquin Papan chiaid tantienquio icboedēmbi con bēnēn Esus tantiabentsiash. “Mimbitsen Esus tantiabenta,” quequin ēmbi chimbobi Esus tantiabentsiash —qeshun min bēnēn chiacpadomboen nata. ³ Bēdamboec tabadquid ictiadquio icquin casēdu payuteuidi tantienda. Adembidi dashcute bēdambo icquid dasiuidteuidi tantienda. —“Bēdambo isadec. Mibi bēdambo iquec,” mabi canu —quiash nacnemēdteuidi tantienda. ⁴ —Bēdambo mibi iquec —camenuec bēdamboec tabadta. Nēishēmēnenquio icquin bēdamboen nabanta. Chieshenquio icquin min bēnēn chiacpadomboen naquid icta. Mibi adquio icsho isash: —Mibi bēdambo iquec —quendac Nuquin Papa. ⁵ Ēndenquimbo isadaidbo tsusedpan chido Nuquin Papa tantiaquid yec adquio icpampic. Aton bēnēn chiacpadomboen naic bēdambo icpampic. ⁶ —Con bēnēn icbobimbboec iquec —quequin aton bēnēn Abadauan caidēn chiacpadomboen Sada caidēn napampic. Esus tantiaquid icsho mamēnshunaqui min bēnē dacuēdēnenquio icquin aidēn chiacpadomboen

naic bēdamboec tabadec Sadapadquoio mibi ictsiac. Adquid bēdambo iquec.
 7 Tantia. Bēnētsen chuinu. Abia uimabadquid icsho min chido bēdamboen ista. Mibēdtan Esus tantiaquid yec Nuquin Papa yacno mibēdi tabadtequid neque. Min chido bēdamboen ista. —Ēbi bēdamboen ista, Papa —quequin mimi chiaid Nuquin Papan tantienquoio icnushe. Min chido bēdamboen ista.

Bēdamboec tabad, quequin chiaid

8 Nēbi Esus tantiaquido abitedi chuinu. Tantia. —Nuquin Papan chiapadomboen nanuna —quiash bēdamboec isnanuna. Cuishonquequidbēd cuishonquec shubiquidbēd shubinuna. Adec tantiananquionona. —Ēmbi naiduidi naimbi —quenguio icquin utsibon chiaidtsen nanuna. 9 Mibi chieshēnaqui cuidnanenda. Mibi chieshēnquin icsamboen chuishunaqui cuidnanec icsamboec chuishunanenda. Adenquoio icquin Nuquin Papa chianeta. —Ēbi chieshēnquid bēdamboen isquin bēdamboen tabadme, Papa —quequin Nuquin Papa chianeta. —Ēmbi bēdamboen isaidon ma aton matses utsibo bēdamboen isnu —qeshun Nuquin Papan nuqui Esus tantiaquido icmiaye. Bēdamboec tabadnuna. 10 Adec bēdamboec tabadte chuiquin Nuquin Papan dada uamepampic naden.

“Bēdamboec tabadte bunquidēn nadoendac.

Adonante bunenguio icquidēmbi utsibo muauainquoio iquendac.

Chieshēnquin utsibo icsamboen chinguio iquendac.

11 Icsamboec tabadboedi bēdamboec tabadendac. Utsibo chieshēnansho isash: ‘Padi. Chieshēnanenda,’ quendac.

12 Adec bēdamboec tabadsho Nuquin Papan bēdamboen isendac.

Aden bēdamboen isaidon: ‘Ēmbi chuisho tantia. Ēbi bēdamboen ista, Papa,’ quequin abi chuisho Nuquin Papan tantiendac.

Icsamboec tabadshoen bēdamboen istiapimbo iquendac,” quequin Nuquin Papan dada uamepampic.

Cuesaqui dacuēdenda, quequin chiaid

13 ¿Bēdamboec tabadshoda bēdambo icquidēn badedquoio mibi cuespatsiash? Padenquoio ictsiash. 14 Bēdamboec tabadsho isun icsambo icquidēn cuesacsho mibi Nuquin Papan bēdamboen istisiashe. Mibi chieshēnquido dacuēdēnenda. 15 Dacuēdēnenguio icquin: —Con Icho Esuquidistu nec —quequin ambi chiapadomboen nanuna. Aden mimi Esus tantianuc utsibo: —¿Atotsieshun Esus tantie? —quesho: —“Abided cuidadec unēsaid Esus tantiasho Nuquin Papan ēbi bēdamboen isquin unēsacsho abi yacno ēbi tabadmendac,” qeshun Esus tantiembi —quequin Esus tantiesabo chuibanuna.

16 Aden nēishēmēnenguio icquin Esusēn naid chuibanuna. Aden bēdamboen chuinuec Esus tantiaquiec bēdamboec tabadnuna. —Ēbi bēdamboec tabadsho isash ēbi chieshēnquin muauaquid: “Bēdambo icquidi muauachitombi. Icsachitobi,” ma quenu —quiash bēdamboec tabadnuna. 17 —Ēbi tantiaquid utsibon chieshēnendac —quequin Nuquin Papan tantiacpadomboen Nuquin Papa tantiaquido utsi-utsien utsibon chieshēnendac. Bēdamboec tabadquid icsho utsibon chieshēnaqui nuqui chieshtoenguio icsho isash: —Mibi bēdambo iquec —quetsias Nuquin Papa nuqui caic. Icsambo icsho quēnēn nauedaidi nēishenguio icsho: —Mibi bēdambo iquec —cainquoio ictsiash Nuquin Papan.

Esus unēsaid tantia, quiaid

18 Chieshēnaqui Esusbimboec chieshtoenguio yec bēdamboec tabadnuna. Aid icsaisambo yequi nuqui icsaid bedshunec abided cuidadec unēspondash. Aden Nuquin Papa abi tantiaquido bēdamboen ismenuec abentsecquiobi

unēspondash padpidec unēsenquo icnuec. Aton dada unēsambi aton tantiate icnuec unēsabi icpanēdash. ¹⁹ Adec aton dada unēsambi aton tantiate icnuec ēndenquimboshē Noe caidēn matses abi tantiesabo icsho Nuquin Papan cuidquin unēs uampido uidēn uashun quēnēn sauedampicho Esus nidpanēdash. Amō nidshun Nuquin Papan cuidpampido Esusēn ambi naboed chuibanpanēdash. ²⁰ Naden Nuquin Papan aido cuidquin unēs uapampic. Ēndenquimboshē aton matsesbēd tabadec Noe bēdambo icnubi aton matses icsamboshē icpampic. Adnubien Nuquin Papan: —Matses icsaquito abitedi uesquin unēs uanuen nidaid abitedi acte mabudad-membique. Baded cano dapa nacnen —quequin Nuquin Papan Noe caid chuipampic. Adoac badedquo cano dapa nacnemēdenquo yacpadembi Nuquin Papan badedi cuidenquo icpampic: —Ma abi icsaid ēnshun ēbi tantianu —queshun. Adnubien cano dapa nacnentanec Noe chedo 8ted-pactsēc cano dapa antabēdtopampic. Adnubien aido antabēdtoaid cano dapa acten bedtoac nuadtopampic. Utsiboen acte mabudadmiaidēn mentoad-budnepampic. Noe abi tantiaquidquo icsho Nuquin Papan cuidenquo icpampic.

²¹ Adembidi Esus tantiaquo nuqui cuidenquo iquec. —“Esus tantiaquid nebi,” quequin utsibo ismequin acten mentomembi —queshun nuqui acten mentomec. ¿Bēchish ucquinda nuqui adodi? Padenquo. Nuquin Papa naden chuiquin: —Esus tantiaquin icsaid ucacimboen mimbi chiacpadomboen natiadquo iquebi, Papa —quequin nuqui adoec. Aden abi tantiaquo Nuquin Papan uincuenēdaidēn Esuquidistun nuqui cuidmenquo iquec.

²² Aidi uincuenash Nuquin Papa yacno nidash aidbēdi tsadoaic abitedishun Icbombo yanoac. Abitedimbo chuiquid dapa icquin ambi chiacpadomboen abitedi namendac. Nuquin Papan abi yacnoshon uaido mayan bēdabo bēdamboen namequimbic Satanas aton yuabo mayan icsabobēdta Esusēn cuidendac.

4

Bēdamboec tabadnuna, quiaid

¹ Nuquin Papan tantiacpadomboen nasho utsibon chieshēnquin mēyanaqui Esus chieshtoenquo icpondash. Adembidi chieshēmēnquidēn chieshēnaqui adecbidi chieshtoenda. Abided cuidadec unēsaid Esus tantiaquin nuqui icsaid nuqui ēnendac. ² Aden nuqui tantiacpadomboen nainquo icquin Nuquin Papan chiacpadomboen natiadquo nuqui iguendac. ³ Nuquin Papa tantiesabon nacpadomboen Nuquin Papan chiaid mimbi yuen niac-niacpondac. Utsin chido chudquinc utsin bēnē chudmequinc tantiaidenuen acte paēmo icquid acquinc: —Nēid papa canu —quequin matsesbimboecnuc nacnenquinc mimbi capondac. Adec icsateuidi bunec mēmuntiapimbo mibi icpondac. Adquid iccondaiddi nēbi bēdamboec tabadta. ⁴ Adec bēdamboec tabadsho isun mibēd icsaondaiddēn: —¿Atotsieshun nuqui naondacpadomboen nainquo ique? Mimi Nuquin Papa caid nibēdec —quequin mibi icsamboen chuiquin mibi mamēnshunendac. ⁵ Aden mibi mamēnshunquid Nuquin Papan cuidendac. Cuidnumbi matsesēn naidtedi tantiaquid icquin Nuquin Papan: —¿Mitsipaden nao? ¿Ada bēdamboec tabado? —cac ēnden unēsaidobēdtan unēsabi icquidotedishun ambi naidtedi uesquin chiendac. ⁶ Aden abēdi tabadmete tantiaquin Nuquin Papan namic Esus chuibenequidon chuibenepondash. Adoac Esus tantiaquido yanash Nuquin Papan Adan cuidquin unēsquid icmiacpadec unēsquid yec unēsashic Nuquin Papabēd tabadendac padpidec unēsenquo yec.

Utsibo nashununa, quiaid

7 Tantia. Mibitedi chuinu. Nuquin Papan cuidte nēbi iqueque. Esus tantiec nuqui icsate bunaid ēnash mēmumec bēdamboec tabadnuna. — Ma ěmbi abi chianesho Nuquin Papan bēdamboen tantianu —quiash adta. 8 —Tantiananquido chieshēnanec cuidnante bunenquio iquec —quiash ēnēdenquio yec tantiananquionona. 9 Nuquibēdtan Esus tantiaquido isedec chosho bēdamboen isnuna. Shubu utsinquido ēnapenuēsh chosho adembidi chieshēnenquio icquin min shubun yued. 10 Nuquin Papan tantiamiacpadomboen nuquibēdtan Esus tantiaquido nashuntiad. Esus tantiaquidquio icmenuen chieshenquio icquin nanuna. 11 ¿Ada Nuquin Papan Esusēn naid chuibanquid mibi icmiac? Adquid icquin Nuquin Papan chiaidquio chuibanquiota. ¿Ada Nuquin Papan mibēdtan Esus tantiaquido nashunquid mibi icmiac? Adquid icmiac: —Nuquin Papan namiacpadomboen matses nashunembi —quequin Esus tantiaquido nashunta. —“Ēbi nashunquid bēdamboen namequid Nuquin Papa bēdamboshē iquec,” ma ěmbi nashunaido quenu —qeshun utsibo nashununa. —Abitedishun icbombo yec Nuquin Papa bēdamboshē iquec —canuna ēnenquio icquin.

Chieshēnaqui chieshtoenquio icte chiaid

12 Ēmbi tantiaido mibi neque. Tantia. —¿Atotsieshun matsesēn ěbi chieshēmpeba? —¿quecta ique? ¿Mibentsēquida chieshēndic? Ma Esus tantiaquido dadpenquio chieshēmpayoc. 13 —Chieshēnquin Esuquidistu comapenen mēyanacbimboen Esus tantiesabon ěbitsen mēyanosh. Esus tantiaquid icshoeni adochitosh —quiash Esus tantiec bēdambo icnuna. —Utsibon chieshēnaidi abi tantiaquid ambi namiacno buanuec Nuquin Icho Esus choec —quiash abi chote ushēn cuishonquenush adnuna. 14 —Esuquidistu tantiaquid nec —qeshun chieshēmēnquidon natiamiaid mibi bēdambo iquendac. Nuquin Papan Mayan mibēd tabadquin Nuquin Papa yacno tabadte mibi tantiamequin mibi bēdambo icmendac. 15 Utsibo icsasho abi chuiquidēn natiamequin cuidquid. Cuesunianquid yec ampequid yec chieshēmēnquin icsamboen chuishunquid yec quec icsasho chuiquidēn cuidsho isun: —Bēdambo iquec —catsiambi. Adec icsainda. 16 Esus tantiaquid icsho ut-sibon chieshēnac dacuēdenda. Adec dacuēdenquio icquin: —Nuquin Papa bēdamboshē iquec. Aton Mado Esus tantiaquid icmiac bēdambo iquebi —quequin ēnenquio icquin Esus tantianuna. 17 —Nuquin Papan cuidte ushē nēbi icnuc ambi con matses caido Esus tantiaquido chieshēmēnquidon natiamendac —quiacpaden nēbi tauaquin mibi natiamec. Adsho isun: —Chieshēmēnquidēn chieshēnac ěmbi tantiacpadomboen abi icsaid ēntsiash —qeshun Nuquin Papan: —Natiamenda —cainquio iquec. Aden abi tantiaquido icsaid ěmete bunquin nashun ¿bēdiactsēcta abi tantiesabo cuidpec? 18 Naden chuiquin Nuquin Papan dada uamepampic. “Aden chieshēndeniac natiambo yan-yanequi unēsash Nuquin Papabēd abi tantiaquido tabadendac. Nuqui adnuc ¿bēdiactsēcta ambi chiaid niac-niacquido Nuquin Papan cuidpec? Padenquio. Comapenen cuidendac,” quequin dada uamepampic. 19 Nuquin Papan tantiacpadec mēyadec Esus tantiaquid ma nadpanuna. —Ēbi uaquidēn Nuquin Papan ambi chiacpadomboen ěbi bēdamboen namec. Aid tantiec bēdambo iquebi —quiash ma bēdamboec tabadpanuna.

5

Esus tantiaquido chuibanquid Petedon chiaid

1 Tantia. Esus tantiaquido chuibanquido icsho mibi chuinu. Mibipadquid Esus tantiaquido chuibanquid nebi. Paēmboeshē icmequin Esuquidistu unēs uasho isondambi. Aidēn padpidec nidaidēn choshon abi yacno buanuen

nuqui beduanegue. Tantia. ² Icbo yua cudasacimboec mibëd icquido Esus tantiaquido cudasta. —Esus tantienguo yanushe —queshun: —Nuquin Papan chiaid niaquenguo yec bëdamboec tabad —quequin chuibanta. —Esus tantiaquido chuibanquid icta —cac: —“Padi,” quetiadquio icquimbi naimbi —quenguo icquin: —Aden Esus tantiaquido nashumbantsiambi —quec Esus tantiaquido chuibanquidquio icta. —Piucquid dadpen bednun nanu —quenguo icquin Nuquin Papan chiacpadomboen natiadquio yec Esus tantiaquido chuibanquid icta. ³ —Nëidtedi Esus tantiaquido bëdamboen name —caidtedi bëdamboen isequi chushcanenda. Adenquio yec: —Ëbi yacpadeq ma tabadnu —quec bëdamboec tabad. ⁴ Aden Esus tantiaquido chuibanquidën bëdamboen namesho isun Nuquin Icbon nidaidën padpidec choshon utsibo ismequin: —Nëid bëdambo icquid nec —queshun chuibanquid ambi namiaidobëdta abi yacno buanendac.

Esus tantiaquidon nate utsi chiaid

⁵ Tantia, caniabo. Mibitsen chuinu. Mibi chuiquid dapabon chiaid niaquenguo icquin aidën chiacpadomboen nata. Aidedtedsëqui caniabo chuishumbic mibi yacnocquidotedi chuinu. —Ëbiuidtsëqui bëdambo iquebi. Ëmbimbo naiduidi naimbi —quenguo icquin utsin nacpadomboentsen nata. Aden chuiquin Nuquin Papan ambi chiaid naden dada uamepampic. “Nuquin Papa tantienguo icquin aton matses utsibo tantienguo icquin ambi naiduidtsëqui nasho: ‘Adquid icsambo iquec,’ catsiash Nuquin Papan.

Utsimbien Nuquin Papa tantiaquin utsibon naidtsen nasho Nuquin Papan bëdamboen isquin bëdambo icmec,”

quequin Nuquin Papan ambi chiaid dada uamepampic. ⁶ Aden Nuquin Papan chiacpadomboen nabanuna. Nadatiambo icquid yec abitedishun Icbombo Nuquin Papa neque. Utsibon chieshënaqui chieshtoenquio icnuna. Adec chieshtoenquio icsho ambi tantiapadën utsibo ismequin: —Ëbi tantiaquidquio mibi neque. Ëbëdi tabadec cho —nuqui caindac Nuquin Papan.

⁷ Aidën nuqui tantieque. —¿Atotsimbi pepeba? ¿Ëbida cuespeba? ¿Con matesta unëspeba? —quequin nuqui dacuëdaidtedi Nuquin Papa chuinuna.

⁸ Nuqui icsate bunacpadeq icsainquio icquin Esusuidi tantianuna. Esus tantiaquido icsho Satanasën nuqui chieshënquieq. Esus bedshunuen nuqui icsametiadquio icquin bëdin nëish nibënacimboen ambi icsametequid Satanasën ënenquio icquin nibëmbeneque. ⁹ Ista. Icsamenda. Chieshtomenda. —Satanasën icsamechitoshe —queshun Nuquin Papan chiaid niacniaquenguo icquin Esus tantiaquionona. —Ëbi chieshënacpadomboen Esus tantiaquid utsibo nidaid utsi-utsieq yacno tabadquido utsibon chieshënac caosh —queshun chieshtoenquio icquin Esus tantianuna. ¹⁰ Aden utsibon chieshënaido yec yuec-yuecpactsëc nuqui tabadec. Adshobien abi yacno buanquin nuqui bëdambo icmequidën Nuquin Papan Satanas nuqui icsa uamenquio iquendac. Adembidi Nuquin Papan nuqui bëdamboen isquid icquin dayacquio yacimboecnuc chieshtoenquio icquid nuqui icmendac.

¹¹ Ëmbi aden chuisho tantiashun: —Mibi bëdamboshë iquec, Papa. Mimbi tantiapadomboen abitedi mimbi namendac. Abitedishun Icbombo mibi nec, Papa —Nuquin Papa canuna ënenquio icquin.

Petedon ënquimbi chiaid.

¹² Esus tantiaquidquio Sidas caid nëidtedtsëqui ëmbi dada uaboed mibi yacno buamembi. —Esusquio isondambi. Aid tantiasho Nuquin Papan

matses bēdamboen isbenendac —quequin abimbo mibi chiombique. Chieshtoenquoio icquin Esus tantianuna. ¹³ Nuquin Papan tantiamiac nuquibēdtan Esus tantiaquido ěmbi Babidonia caid yacnocquidon: —Aido unēsquoio iquec —mibi caosh. Babidonia caidbidi Doma caic. Con madobimboecquid Madcosēn —Aido unēsquoio iquec —mibi caosh. ¹⁴ —Ěbēdtan Esus tantiaquido nec —quias: —Mibi unēsquoio iquec —cananuna. —Ma Nuquin Papan mibi Esus tantiaquidotedi bēdambo icmepanu —quequin Nuquin Papa chianembi. Padi. Aidedi chuiquin dada uaombi.

PETEDON DADA UAID 2

Tauamboen chiaid

¹ Petedo Simon caid nebi. Abëd icquid yec aton yuambo icsho Esuquidistun: —Ëmbi naid chuibeneta —caidquio nebi. Ëbëdtan Esus tantiaquido mibi neque. Mimbì iste dada uanu. Abi tantiaquido cuidmenquio icnuec abided cuidadaid Esus tantiasho Nuquin Papan bédamboen isaido nuqui nec.

² Ëbëdtan Esus tantiaquido icsho mibi tantiaquin Nuquin Papa chianembi naden. —Aidon Esus tantiatsëcsho mibëdta Esus tantiamequin bédambo icme, Papa. Aido bédamboen isquiota, Papa —quequin Nuquin Papa chianembi.

Nuquin Papan bédambo icmete chiaid

³ Comapenen tantiaquid icquin Nuquin Papan namiac aidën chiaid niacniacte bunenquio yec Esus tantiaquido bédamboec tabadec unësash Nuquin Papa yacno tabadendac. Abipadquid utsi nibëdnuc bédamboshë icquid icquin Nuquin Papan Esus tantiamiaido nuqui nec. ⁴ Abipadquidquio Esus chiondacadomboen abi tantiaquidobëdta Nuquin Papan aton Mayan tabadmequin bédambo icmec. Aden abipadquio icnuc bédambo icmiac icate bunenquio yanec nuqui bédamboec tabadec. Utsibo icsateuidi bunec icsaquionobi nuqui bédamboec tabadendac.

⁵ Aden Nuquin Papan Esus tantiamiaido yec dayacquio yachimboec ënëdenquio yec bédamboec tabadnuna. Adecbidi Nuquin Papan chiaidquio tantiec tabadnuna. ⁶ Aden Nuquin Papan chiaidquio tantiec nuqui icsate bunacpadec icsainquio icquin mëmununa. Aden mëmunquid yec nuqui chieshënuquidbëdi chieshënanenquio yec chieshtoenuquio icquin Esus tantianuna. Nuquin Papatsen tantiec bédamboec tabadnuna. ⁷ Aden Nuquin Papabëdta Esus tantiaquido yec nashunanquionona. Adec nashunanquioquin Esus tantiesabo tantianuna. ⁸ Ëmbi chuibloedtedi nabanquin chieshtoenuquio icquin adenuidi nanuna. Aden naquin Esus bëdiactsëc tantiatsëchoedëmbi chieshtoenuquio icquin nuqui Esus tantiaquitsiac. ⁹ Ëmbi chuibocpadomboen naisa pamumëdacimboec iquec. Adquidon: —Aton Mado Esus tantiasho icsaid ucudacimboecnu Nuquin Papan nuqui bédamboen isec —queboedombi bëpiscudquin tantienquio yanec.

¹⁰ Ëbëdtan Esus tantiaquido mibi neque. Tantia. Mibitedi chuinu. Ëmbi aden chuisho tantiash chieshtoenuquio icquin Esus tantiec bédamboec tabadnuna. Adec tabadquin naden nuqui tantiendac. —Ëndenquimboshë ëbi tishabi icnuc ëbi caic: “Esus tantiamendambi,” quequin ambi chiampicpadomboen Nuquin Papan nëbi tantiamiac Esus tantiabenombi —quequin nuqui tantiendac. Aden tantiec Esus tantienquio icquid nuqui yanenquio ictsiac. ¹¹ Adec bédamboec tabadash unësacsho: —Ëbi tantiaquid mibi neque. Ëbëdi tabadec cho —qeshun ambi namiacno abëdi tabadmequin Nuquin Icbo Esuquidistun nuqui bédambo icmendac padpidec unësenquio icnuc.

¹² Ëmbi aden chuibloedtedi mimbì tantiondac. Aden tantiabosh Esus tantiec mibi bédamboec tabadcuendac. Aden mimbì tantiondaidi mibi chuided-chuidedendambi. ¹³ —Nëbi unësendabi —queboedi ëbi unësabi yacpadembi mibi chuided-chuidedendambi. ¹⁴ —Adënuquio mibi unësendac —quequin Nuquin Icbo Esuquidistun chiacpadën nëbi unësebi. ¹⁵ —Ëbi unësan ëmbi chiondaid ma bëpiscudenquio icnu —qeshun mibi chuiquin dada uanu.

Nuquin Papan Esus chiaid

¹⁶ ¿Muaquindambi mibi Esus chuidionda? Padenquoio. —Nadatiambo icquin nabanquin Esusën ismedenepondash. Adquid yec abuc nidnush: “Padpidec nidaidën choaindabi,” quepondash Esus —¿quectabi muadionda? Padenquoio. Ëmbimbo isondaaidquoio mambi mibi chiondac. —Nüed con Madombo nec —quequin Nuquin Papan ismiac Esus isondambi. ¹⁷⁻¹⁸ Nadquoio iccondash. Macuësh dapan dectatoash Esus bëchamauanquiec iccondash. Adnubien Nuquin Papan: —Con Madombo nec. Ëmbi tantiaidquoio yec bëdamboshë iquéc. Nëid isec bëdambo iquebi —quequin abucshun dacuédampamboecnuc chuipondash.

¹⁹ ¿Ëmbentsëquidambi Esus chuibanquin nape? Padenquoio. Ëndenquimboshë Esus chote tantiamequin Nuquin Papan isadaidbo tsusedpabo dada uamepampic. Pacuënëdacbimboen utsibon tantienquoio icnubi paposhquiachimboecnuc Esus chote tantiamenuen dada uamepampic. Aden Nuquin Papan chiaid isec onquequin bëdamboen tantianuna: —Muaquidon chuisho tantiamane —queshun. —Abitedishun Icbombo nebi —quequin ismenuec padpidec Esus choabi yacpadembi Nuquin Papan chiaid bëdamboen tantianuna. ²⁰ —Nuquin Papan nadoendac —quequin ¿ambembi chiaidta nuquin tsusedpabon dada uapampic? Padenquoio. ²¹ Ambembi chiaid dada uainquoio icquin Nuquin Papan chiaidquoio dada uapampic. Nuquin Papan Mayanën tantiamiac abimbo chuipampic.

2

Muaquido iquendac, quequin chiaid

¹ Nuquin Papan chiaidquoio isadaidbo tsusedpabon chuinubien utsibo: —Nuquin Papan nadoendac —quec muapampic. Nëbi adquidbidi iquendac. Mibi yacno puduedash ambembi chiaid chiec muasho tantianshun: —Mibi muequi nec —badedquoio cainquoio mimbi iquendac. —Abided cuidadec unësaid Esus tantiaquid nebi —queboedi: —Esusën chiacpadomboen nati-pimbo iquebi. Adshobi Nuquin Papan ëbi cuidenquoio ictsiash —quequin muquin chiendac. Adquid Nuquin Papan icsambo icquido cuidacno nidmequin cuidendac. ² Aden muaquidën chuisho tantianshun Esus tantiauidtsëcboedombi dadpenshun aidën chiaid tantiendac. Adashic Nuquin Papan chiaid niac-niaquec muaquido tabadachimboec padpidec icsamboec tabadoaindac. Adsho isun: —Esus tantiaquidobi icsambo iqueque. Is —caindac utsibon. ³ Muaquido tantienda. Aidon piucquid comapenec bunquin ambembi chiaidquoio mibi chiec. ¿Muasho tantienquioda Nuquin Papan icpec? ¿Ada Nuquin Papa ushpec? Muasho tantianshun aido cuidendac. —Adquid icsano nidmequin cuidendambi —quequin ambi ëndenquimboshë tantiapampicpadomboen comapen Nuquin Papan cuidendac.

⁴ Ambi chiaid niac-niacsho icsano nidmequin cuidquid Nuquin Papa nendac. Ëndenquimboshë nidaid uabi icnuc ambi abi yacnoshon uaido mayan utsin-utsinquien: —Ëmbiquen abitedi namenu —quequin ambi chiaid niac-niacsho isun Nuquin Papan icsamboshë yacno nidmequin cuidpampic. —Chian anëdënquiacno nësecanumbi nabono —queshun aden tauamboen Satanas chedo cuidpampic. ⁵ Adshumbic yuecquoio ictanquin matses abitedishun ambi chiaid niac-niacsho isun nidaid abichobi mabudadmequin Nuquin Papan matses uesquin unës uapampic. Noeuidtsëqui padambo icpampic. —Bëdamboec tabadnuna —quequin Nuquin Papan chiaid chuibanquid icsho Noe chedo 8tedpactsëc Nuquin Papan cuidenquoio icpampic. ⁶ Adshumbic yuecquoio ictanquin matses utsibon Nuquin Papan chiaid niac-niacsho cuidquin nëdëncapampic. Shubu dadpen icquid nëid daëd icpampic. Nëidic Sodoma caid. Nëidic Comoda caid. Ambo tabadquido aton shububëdi

abucuësh taboadampamboec paëdquidën pichiquepampic matses nibëdquio yec. —Aden icsambo icquido cuidquid nebi —quequin Nuquin Papan adopampic. ⁷⁻⁸ Sodoma caid yacnocquid abentsëqui Dod caid pichiquenquio icnu Nuquin Papan cuemepampic. Bëdambo icquid yec: —Nuquin Papan chiaid niac-niaquec nëmbo icquido icsamboeuidi tabadec —quec shubiec tsadsho cuemetsaidi pichiquiambo ictsampic. ⁹ Aden abi tantiaquido daëd Noebëdta Dod Nuquin Papan cuidambo icpampic. Adembidi nëbi abi tantiaquido cuidenquio icquid Nuquin Papa nendac. Utsibon chieshënaidi abi tantiaquido bëdambo icmequid nendac. Icsambo icquido cuidquid icquimbi matses cuidte ushë choabi icnuc nëbi tauaquin icsambo icquido Nuquin Papan cuidendac.

¹⁰ Muaquido nadquio icsho Nuquin Papan cuidendac. Abi bunaiduidi naic icsaic. Adembidi pabiäte shëcuë nibëdäcbimboen abi chuiquid dapan chiaid niac-niacquinc Nuquin Papan chiaid niac-niacquinc caic. —Con nauidsëqui bunebi —qeshun ambi naiduidtsëqui naic. Dacuëdiadquidi dacuëdenquio icquin Esus tantiaquido chuiquid dapa caic: —¿Bëdamboen namequidta nedic? —quequin icsamboen chuishunec. ¹¹ Padnuen Nuquin Papan abi yacnoshon uaido mayan bëdabon adec muaquido chuishuntiapimbo iquec. Muaquido bëdiactsëc tantiaquido icnubi comapenen tantiaquido icquin mayan bëdabon Nuquin Papa naden chienquio iquec. —Aido bädëd cuid, Papa —cainquio iquec. —Ambi cuidte ambentsëqui tantiaquid Nuquin Papa nec —qeshun adoengquio iquec. ¹² Padnuen ëmbi chuiboedo muaquidon Nuquin Papambo tantienquio icquin Nuquin Papa muauaquin chuibanec. Adec icsamboec tabadsho Nuquin Papan cuidendac. ¿Ada bëdi cuidnushe quepadic? Padenquio. Adembidi abi cuidte tantienquio icsho Nuquin Papan cuidendac.

¹³ Nuquin Papan chiaid niac-niacmequin muaquidon utsibo icsamesho Nuquin Papan cuidendac. Icsateuidi bunquiec inchëshën icsash badiadënsen icsaic: —Bëdambo iquebi —quec adquido cuishonquec. Esus tantiaquin penuec mibi cho-choacno mibëd tabadec muaquidotsen chopac caosh. —Esus tantiaquidbidi nebi —quiash mibëd tabadec aid icsasho isash: —Esus tantiaquid abitedi icsaic —quependac utsibo. ¹⁴ Muaquido utsin chido mësmec tabadec. Nuquin Papan chiaid niac-niaquec icsaic ënëdenquio iquec. Adquid icquin Esus tantiatsëcquido icsamec. Utsin chido chudquinc muaquin piucquid dadpen bedquinc caic abi bunaidquio naic icsaic. ¹⁵ Nuquin Papan chiaid niac-niaquec icsateuidi bunquiec. Èndenquimboshë matses utsi Beyod caidën mado Badan caid Nuquin Papan chiaid chuiquid yequi piucquid dadpen bunec Nuquin Papan chiaid niactiadquio icpampic. ¹⁶ Adnubien abi catsadaid cabayobitsecquid asno caid matsesbimboec onquiampampic. Ambi chiaidquio chuimequin Nuquin Papan oncamiac: —¿Atotsieshun icsamboen nai? —cac aton icbo icsanuec niduidboedi: —Auchidi nidnu —quepampic. Adquio muaquido iquec. Piucquid comapenec bunec Nuquin Papan chiaid niactiadquio iquec.

¹⁷ —Mibi bëdambo icmete chuinu —quequin muaquidon chuisho tantiash: —Ai, mimi chiacpadte bunebi —queuidtsiash matses. Uispa dadpen icboedi badiadnuc abu chëshën bëtinacsho isash: —Tanunquien badiadec —queuidacimboec: —Ambi chiacpadquio bëdambo icnu —queuidtsiash matses. Adec muasho tantiash: —Adquid chian anëdënquiacno nësecaindambi —quendac Nuquin Papa. ¹⁸ Adec muaquido abembi onqueuidequi onquec. Utsin chiaid tantienquio icquin ambi tantiaiduidi chiec naden. —Mibi bunacpadec mibitsen icsata —cac Esus tantiatsëcquin Nuquin Papan chiaid nauidsëcquimbi abi icsaid ënuidboedi padpidemboec icsaquiec. ¹⁹ Muaquidon: —Nuqui bunaiduidi nanuna. Adec nuqui bëdambo ictsiaic —quequin chuibanec. Adboedi abi icsaid ambembi ëntiapimbo yec icsamboshë

iquec. Adec icsamianquidën chiacpadomboen naic matses icsaquid nendac. Adecbidi ambi naiduidi naic icsaquid matses nendac. ²⁰ Nuqui cuidmenquo icquid Esuquidistu tantiatsëcquin abi icsaid ênuidboedi padpiden Nuquin Papan chiaid niac-niaquec icsamboshë muaquido yanec. ²¹ Ênden Esus chiondac: —Ai, aid tantiemi —quetsëccondaïdi aden Esus tantienquo yanec icsamboshë yansho isun: —“Esus tantiemi,” quenquo icpatënëdan —caimbi. ²² Adquid chuipanëdash naden. —Ambi ucbudaid opan chequid. Opa nesmiaqui nidaïdën nocoshquec padpidec bëchishoaquid —quepanëdash. Adecbidi Esus tantiauidtsëcquido icsaid ênuidboedi muaquid padpidemboec icsadenechitequien iquec.

3

—Esus chote chiaid

¹ Tantia. Êmbi tantiaido mibi neque. —Pabiate cuembo icquin Nuquin Papan chiaid tantiaquiec bëdamboec tabad —quequin mibi chuiquin dada uaondambi. Adomboembidi mibi chuiquin nëid dada uanu. ² Esus chote chuiquin Nuquin Papan isadaïdbo tsusedpabo dada uamepampid ðada tantie? Adomboembidi nuqui cuidmenquo icquidën Nuquin Icbo Esusën chuibanondash. Aidën chiondaïd abëd ictened utsin mibi chuinëdash. Aden chiaid tantiata. Aidbidi chuinu. ³ Esus nidaïdën padpidec choabi icnuc Esus tantiesabon abi icsate bunaiduidi naquin Esus mamënshunendac. ⁴ —“Utsi uanuec padpidec nidaïdën choaindabi,” ðquenëdaïda chopec? Ma choenquo icpayoc. “Nëbi Esus choec,” quedenedi con mëdimbo abitedi unësbudniac. Esus choambobi —quependac Esus tantiesabo. Nadembidi chiendac. —Taëec nidaïd yanubi matses nidaïdën tabadpampic. Adecbidi aton tsyuecquido tabadpampic. Nëbi adecbidi matses nidaïdën tabadec. Êbi nibëdnuc adiquendac. Utsi uanuec Esus choenquo iquec —quependac Esus tantiesabo. ⁵ ðAbimboda capec? Aden chuiquin Nuquin Papan chiaid tantienquo iquec. Êndenquimboshë ambi uaidtedi nibëdnuc: —Ad icta —quequin Nuquin Papan chiac abu yec acte yec nidaïd yec quiampampic. Acteuïdrambo icboedi nidaïd nënantan yampampic. Aden Nuquin Papan abitedi uapampic. ⁶ Aden abitedi uambic yuecquo ictaniash matses icsambo icsho isun ambi chiacpadomboen ue dapa chomeshun nidaïd mabudadmequin aid matses Nuquin Papan uesquin unës uapampic. ⁷ Aden ambi chiacpadomboen Nuquin Papan naindac. Ambi icsambo icquido cuidte ushën abu nidaïdbëdta nëdëncaindac. Adembidi matses Esus tantiesabo cuidendac.

⁸ Êmbi aden chiac: —ðTedectsiash Esus chopeba? —ðquecta ique? Tantia. Mibi chuinu. Ambi tantiacpadëmbi Nuquin Papan Esus chomen-dac. Naden Nuquin Papan tantiec. —Dadpen seta icquid iquequi seta abentsëcbimboecquid nec. Adecbidi seta abentsëqui icquidquo iquequi dadpen seta icquidbimboecquid nec —quequin Nuquin Papan tantiec. ⁹ —Êndenquo: “Padpidec choendabi,” quenëdaïdi Nuquin Icbo Esus choenquien ichtec —quenubien Nuquin Papan: —Chiata. Cuidte bunenquo iquebique. ðtsibontsen Esus tantiaishun êmbi chiaid niac-niacboedi ênushë. Isbono. Ênacsho icsamboshë yacno nidmenquo ictsiambi —queshun Nuquin Papan Esus chomiabi iquec.

¹⁰ Adnubien matses: —Nëbi choec —quenquo icnuc Esus badedquo choendac. —ðNëid ushëmbi ampequidën con na ampec —quequinda tantiapec? Padenquo. Adembidi: —Nëbi choec —quequin tantienquo icnubi Esus choendac. Choshon acquimboen toncac abitedi nibëdanendac. Uispa yec inchëshën ushë yec badiadën ushë yec queboedi nibëdquiecnuc nëdëncaindac.

Nidaid abichobimbo nēdēnquenuc aidēn icquidtedi nēdēnquendac nibēdquo yec. ¹¹—Nuquin Icbon nac adquidtedi nēdēnquendac —quiash Esus tantiec bēdamboequien tabadtiad. ¹²⁻¹³ Esus chobon Nuquin Papan cuidquin ambi uaidtedi nēdēncaindac. Abu yec uispa yec inchēshēn ushē yec badiadēn ushē yec queboedi nēdēncaindac nibēdquiecnuc. Adshumbic ambi chiacpadomboen abu chuca nacnenquinc nidaid chuca nacnenquinc caindac. Adoshombic ambi chuca nacnenaidēn bēdambo icquidoudiquio nuqui tabadmendac. Ēmbi aden chuisho tantias: —Ma Nuquin Papan Esus chomenu —quequin utsibo tantiamequin Esusēn naid chuibanec bēdamboec tabadnuna.

¹⁴ Ēmbi tantiaido mibi neque. Tantia. —Choshon abi yacno Esusēn nuqui tabadmendac —quec chieshtoenquo yec bēdamboec tabadnuna. Choshon Esusēn: —Mibi icsambo iquec —cainquo icnuc Nuquin Papan chiaid niakenquo yec bēdamboec tabadnuna. ¹⁵ Adec tabadquimbi Ēmbi chuiboed tantiasun naden tantia. —“Utsitsen ma Esus tantiaquid yanu. Aden Esus tantiasho aid cuidenquo ictsiami,” qeshun Nuquin Papan Nuquin Icho chomiabi iquec —quequin tantiec tabadta. Adembidi mibi chuiquin nuquin buchibimboecquidēn Pabadon dada uapaccondash.

Nuquin Papan tantiamiac bēdamboen chiaccondash. ¹⁶ Ēmbi chuiboedbidi chuiquin dada uadenepaccondash. —Pabadon dada uaid abentse-abentsec badedquo tantiadenuio iquec —qeshun utsibon aidēn chiacpadomboen chienquien icchitosh. Nuquin Papan chiaid niac-niacquidquo icquidon Pabadon chiaidquo tantienquo icquin icsamboen chiosh cashnad-cashnadacbitsēcquiecnuc. Nuquin Papan chiaidquo nuquin tsusedpabon dada uapampidtsen isbanshun adembidi tantienquo icquin icsamboen chiec. Adquido Nuquin Papan cuidendac.

¹⁷ Ēmbi tantiaido mibi neque. Tantia. Chuinu. —Abimbo tantienquo icquin Nuquin Papan chiaid niac-niacquidon muauaic —ēbi qesho tantiasun: —Esus tantienquo yamane. Muasho tantiatipimbo iquebi —quequin ēnenquo icquin Esus tantianuna. ¹⁸ —Abi tantiaquid cuidmenquo icnuec abided cuidadec Esus unēspondash. Aid tantiasho Nuquin Papan nuqui bēdamboen isec —quequin Esus bēdiactsēc tantiatsēcshun comapenen Esus tantiaquionona. Adshumbic: —Nuquin Icho Esuquidistu bēdamboshē iquec —canūna ēnenquo icquin. Padi. Aidfedi chuiquin dada uaombi.

UANËN DADA UAIÐËMPI 1

Nuquin Papabêd ênêdenquoio yec tabadte chianiaidquoio

¹ Abia Yampidênquoio matsesun Esuquidistun chuibansho êbêd icquidobêdtan tantiapadenembi. Aidi êbêd icquidobêdtan ispadenembi. Aidi êbêd icquidobêdtan mishpadenembi. Aidi Nuquin Papabêd ênêdenquoio yec tabadte chianiaidquoio nec. Aidquoio chuiquin dada uaid nêid nendac. Aidquoio tantiaquido icquin bêdamboen ista. ² Aid, abuc Nuquin Papabêd ênêdenquoio yec tabadboedi nidaidênuêsh matses icnuec chopanêdash. Choshon abipadquoio yec Nuquin Papabêd ênêdenquoio yec tabadte ismequin chianiaidquoio êbêd icquidobêdtan isteneshun chuibanec nebi. ³ Aidi êbêd icquidobêdtan ispadened adembidi êbêd icquidobêdtan tantiapadened chuibanec nebi ma mibitedishun tantiash shubu abentsêquên tabadacimboec ma tabadpanu qeshun. Nuquin Papa tantiaquid icquin aton Madombo Esuquidistu tantiec Nuquin Icbobêd shubu abentsêquên tabadacpadec nuqui bêdamboec tabadendac. ⁴ Esuquidistu tantiaquidtedi shubu abentsêquên tabadacimboecquido nec, quequin chuiquin dada uaimbi ma aid tantiash, Cuishon. Bêdambo iquebi, quiacpadec ma mibitedi tabadpaneshun.

Nuquin Papa Bêdamboquid Abentsêcquiobi nec quiaid

⁵ Esuquidistun Nuquin Papa chuibansho nuqui tantiondacadomboen chuoaimbique. Tantiata. Nuquin Papa Bêdamboquid Abentsêcquiobi nec. Icsapenquiocquid aidi nec. ⁶ Adquid icnuc, Nuquin Papan shubun icquid nebi, queboedi ambi chiaid niacquin abipenquoio chuiquid nuqui nendac. ⁷ Nuquin Papan chiacadomboen nabanquidquoio iquec abi tantiaquid ut-sibobêd shubu abentsêquên tabadacimboecquid nuqui nendac. Adquid nuqui icmenuec nuqui icsaid bedshunash abided cuidadec Nuquin Papan Mado Esuquidistu unêspondash. Aid unêsñêdaidênquoio nuqui icsaidtedi paubantequid nendac. ⁸ Icsaisa nebi, quequi mua uadquin abipenquoio chuiquid nendac. ⁹ Icsaobique. Êbi pauc, Papa, qesho tantiashun, Con mado unêso isun abi tantiaquid icsaid bēpiscudnu, quequin ambi chiacadomboen niaquenquiocquin Nuquin Papan nuqui paucoindac. Naden Nuquin Papan naindac: Matses icsaid êmbi paucaid padpiden tantiamenu, quenquiocquin icsaisa nuqui icmendac. ¹⁰ "Matses icsaisa nibêdquiec", quequin Nuquin Papan dada uaimpid icnubi, Icsaisa nebi, quequin chieq, Muaquid Nuquin Papa nec, quiacimboec adquid onquepec. Aden chuiquid Nuquin Papan pausntemaid nendac. Adquid Esuquidistu tantiesa nec.

2

¹ Ma icsainquoio icnu qeshun con nabo quequin adembi mimbi iste dada uaimbique. Isec onqueta. Icsaobi, quiash cuenenda. Abi tantiaquid icsasho isun Esuquidistun Nuquin Papa chiendac. Êbi tantiaquid paucoata, quequin Nuquin Papan chiaid niaquesa icquin aton Madonquoio Esuquidistun nuqui icsasho aden chiendac. ² Aidi matsestedi icsaid bedshunash abided cuidadec unêspondash.

³ Ambi chiacadomboen nabanquin Esuquidistu tantiaquid nebi, qeshun nuqui tantiendac. ⁴ Esuquidistu tantiaquid nebi, qeshun Icbon chiacadomboen nainquiocquin abipenquoio chiendac adquidên.

⁵ Ambi chiacpadomboen nabansho isun abi tantiamiantequid Nuquin Papan nua pausunendac. Aden pausunaidën, Aidbëd icquid nebi, quequin nuqui tantiendac. ⁶ Aden pausunac Nuquin Papan Madonquio bëdamboec tabadquin nabanacpadomboen naimbi, quec nidaidën bëdamboec tabad.

⁷ Naden nata, quequin chiaid chuca chienquiocquin mimbi tauamboen tantiondaid mibi chuiquin dada uaimbi. ⁸ Mimbi tauamboen tantiondaid Esuquidistun, Naden nata, quequin chiaid chuca nendac. Nidaidën capuquin utsi tantiaquin nabanquin Esuquidistun ismiondashi. Adembidi Esuquidistupadquiocquin utsin ismiac mibi Esuquidistu tantiesa icboedi nëbi abipadquiocquin utsi tantiaquin nabante mimbitsen ismiac Esuquidistu tantiaquid utsi dadpen yanendac. Aidobidi aidën pausunac tantianec tabadquin nabanec nec. Chieshëmquid icboedi aidën pausunac tantianquidquio yanec.

⁹ Esuquidistu tantiaquid nebi, geshun abi tantiaquid utsi chieshënc Nuquin Papan tantiacpadomboen pausunacmaid adquid nec.

¹⁰ Esuquidistu tantiaquid utsi con utsibo nec, quequin tantianquidien Icbon pausunaid nendac. Adquid icsate bunenquio yec bëdamboec tabadquin ismequid nendac. ¹¹ Esuquidistu tantiaquid utsi chieshëncquid Nuquin Icbon pausunacmaid nec. Inchëshquio icnuc capuacbimboecquid adquid nec. Mayan icsan yua icquin ambi natiaquidquio yaid tantiesa nec.

¹²⁻¹⁴ Esuquidistu tantiaquid icsho Nuquin Papan cuidenquiocquin mibi icsaid paucac. Nuquin Papa Abia Yampidquio tantiaquidquio mibi nec. Ambi paucaid tsyuecquid utsi-utsiec icsho ëmbi con nabo caidtedi chuiquin dada uaid nëid nec. Abia Yampidënquio Esuquidistun chiac abi tantiaquidquio utsi-utsiec dadpen yanondash. Adquido chuiquin tsusiobo quequin ëmbi dada uaid nëid nec. Ëmbi tsusiobo caid ambia tantiaquidën ismiac caniabobimboecquin comapenen tantiaquin tantesa uainquiocquido utsi-utsiec iquec. Aden comapenen tantiec mayan icsan yua icboedi nëbi Nuquin Papan chiaid tantiabentsëcquido yanash nëbi Nuquin Papan chiacpadomboen nate bunquido mibi nendac. Adec bunquido mayan icsan yua ictiapimbo icquido mibi nendac. Adquid ëmbi caniabo caidtedi ëmbi chuiquin dada uaid nëid nec. Ëmbi dada uaid mibitedishun tantiatequidquio neque. Isec onqueta.

Icsate bunesa icta, quequin chiaid

¹⁵ Mayan icsan yuadenda. Icsate bunesa icta. Mayan icsa bunquid Nuquin Papapadquiocte bunesa nec. ¹⁶ Abia Yampidquio Nuquin Papa nec. Adquidpenquio mayan icsa nec. Aid Nuquin Papa chieshëncquid nec. Adquid icquin Nuquin Papan chiaid mua uaqun chuiquin chuca uaic naden: Icsamane quenquiocquin icsaquin nanu quequin adota. Adecbidi icsamane quenquiocquin utsi icsasho isun ëmbitsen nanu quequin adoata. Dadpen bednu quequin utsi dëniacnueshun adota. Adec icsamane quenquiocnoc mayan icsan Nuquin Papan chiaid matses chieshëmec. ¹⁷ Mayan icsan tantiaid ënëndendac. Aidën tantiacpadomboen tantiaquid icbobëd Nuquin Papa yacno tabadtiapimbo iquec. Nuquin Papan chiacpadomboen naquidien ënëndendac yec Icbobëd tabadendac.

Esuquidistu chieshëncquid dadpen choendac, quequin chiaid

¹⁸ Adembi chiembique. Ëmbi con nabo caidon tantiata. Nëbi nëid nidaid naimbudec. Adecbidi Esuquidistu chieshëncquid dadpen choendac, quequin chiondacadquiec ënden cho-choac. Dadpen cho-choacsho isun, Nëbi nëid nidaid naimbudendac, quequin nuqui tantiendac. ¹⁹ Esuquidistu chieshëncquid nuquibëd iccuededboedi ënden nidanepac. Nuquin Papan shubu abentsëquën tabadacpadpenquiocquid Esuquidistu chieshëncquid

iquec nidaniac. Nidaniacsho isun, Esuquidistu tantiesa iquec nuquibëd shubu abentsëquën tabadacpadpenquo icquido niosh, quequin nuqui tantiendac.

²⁰ Esuquidistu chieshënesa mibi nendac. Nuquin Papan aton Mayan meniäc abimbo chiaid tantiaquid mibi nendac. ²¹ Nuquin Papan chiaid abimbo iquec quequin tantiaquid icsho mibi chuiquin dada uaic nebi. Nuquin Papan chiaid tantiesa mibi icsho chuiquin dada uainquo ictsi-ambi. Abimbo chuiquid muatiapimbocquid nec, quequin mimbi tantiendac. ²² ¿Tsutsi muaquid nepec? ¿quepecta mibi ique? Nuquin Papan Madombo nidaidënsnun chidon tishac matsesash aton Papan chuimiäidquo nec, quesa muaquid nendac. Adquid Esuquidistu chieshënuquid nendac. Abentsëcquidquiobi Nuquin Papa nec, quesabidi adquid neoaic. Esuquidistu Nuquin Papan Madombo nec, quesabidi adquid neoaic. ²³ Nuquin Papan Madombo Esuquidistu nec, quesa Nuquin Papa tantiesabidi nec. Nuquin Papan Madombo Esuquidistu nec, quequin chiec Nuquin Papan tantiaid papuduedaid Nuquin Papa tantiaquid nendac.

²⁴ Tauamboen chiampid tantiadonec tantesa uainquiocquid yanta. Mimbi tauaquin tantiadoniaid tantesa uainquo yec Nuquin Papan Mado Esuquidistubëd shubu abentsëquën tabadacximboecquido mibi iquendac. ²⁵ Èbëd shubu abentsëquën nidaidën tabadacximboecquido èbëd abuc ènëdenquo yec tabadte iquendac, quequin Esuquidistun chiaid nendac.

²⁶ Esuquidistu tantiaquid mibi icsho Nuquin Papan chiaid niacmenuequid iquec, quequin chuioaimbique. Tantiata. ²⁷ Nuquin Icho Esuquidistun tantiamiaid icquin utsi uain chuisho tantiesa icta. Esuquidistun ambi tantiaid pausunac ambi chiaid tantiaquidquo mibi nendac. Ambi pausunaid iquec, Mibi utsi tantiamenu, cac, Padi. Esuquidistun chiaid tantiaquidquo nebi. Esuquidistun abimbo chiaid tantiasbëdambo iquebi, mibi quendac. Aden Esuquidistun tantiamiaidquo yec abëd cuëshëdesa icnuec adequi tabadta.

Nuquin Papan chiaid tantiaquid ambi bacuë icmiaid

²⁸ Adembidi con nabo quequin mibi chuioaimbique. Adembi tantia. Esuquidistun chiaid tantiadonequieç tabadteneta. Adec tabadquin Esuquidistu choasho isash cuenenquo yec, Èbi, ambi paucaid, bednuec choec, quependac mibi. Abëdi nidebi, quequin caindonec tabadta. ²⁹ Nuquin Papa bëdamboquid nec, quequin tantiaquin nuqui Nuquin Papan chiacpadomboen naquin, Ambi con bacuë caidquo nebi, quequin nuqui tantiendac.

3

¹ Matses tantiaquin naquidquo Nuquin Papa nec. Ma ëmbi unësquiocquin comapenen tantiaido èbëdi tabadpanuëshun con bacuëbo caimbi, quequin Nuquin Papan icsaisanquo tantiapampic. Aden chiampid abimbo iquec. Ambi con bacuë caido nuqui nec. Ambi con bacuë caidpenquo Nuquin Papa tantiesa yec aton Mado Esuquidistu tantiesabidi nec. Adecbidi Esuquidistu tantiaquid tantiesabidi nendac adquido. ² Nuquin Papan comapenen tantiaido mibi nec. Adquid icsho adembi mibi chuinu. Tantiata. Nëbi Nuquin Papan con bacuë caido nuqui nec. Aden ambi con bacuë caid icsho, Nadquidquo mibi icmendambi, ¿ada Nuquin Papa capec? Padenquo. Esuquidistupadquiocquin nabanquid Nuquin Papan nuqui icmec, quequin nuqui tantiadonetequidquo nendac. Esuquidistu nuqui bedec chosho isash, Nëbi aidpadquidquo Nuquin Papan nuqui icmendac, quequin tantiembi, nuqui quendac. ³ Aid choabicnuc, Abipadquid iquendabi, quequin caindonequido nëbi Esuquidistu icsainquo yec tabadacpadquieç tabadte bunquid nuqui nendac.

⁴ Nuquin Papan nadedc bēdamboec tabadta, quequin chiaid niacquid abibi icsaquid nendac. ⁵ Adnubien, Esuquidistu abuc tabadboedi nidaidēnshun chidon tishac matsesun nuqui icsaid bedshunash abided cuidadec unēspaniedash, quequin nuqui tantiendac. Icsapenquiocquid Esuquidistu nec. ⁶ Icbopadquidquio icnu quiash Esuquidistubē tabadacimboecquid icsadenesa nec. Icsadenequid, Nuquin Papan Esuquidistu tantiamiohi, quetiapimbo iquec. Esuquidistu tantiesa adquio iquec.

⁷ Con nabo, tantesa uamane qeshun muaquin chuibanaid tantiesa icta. Esuquidistu bēdamboec tabadacpadquiec tabadquid icsaisa nec. ⁸ Abia icsadenequid mayan icsa nec. Aidēn yua adquiecbidi icsadenendac. Mayan icsan yua matses icsho isash Nuquin Papan chiaid tantiaquidquio iquec Esuquidistu nidaidēn choash matses icsaid bedshunash abided cuidadec unēspaniedash ma abi tantiaquid yec mayan icsan yua icboedi aidēn yuadtiapimbo yampanuna. ⁹ Nuquin Papan con bacuē caido icsadenesa nec. Ambi con bacuē caido Nuquin Papapadquidquio yec icsadenetiapimboquid nendac. ¹⁰ Mayan icsan yua Nuquin Papan chiacpadomboen naisa nec. Utsi tantiesa adquid nec. Nuquin Papan chiacpadomboen naquid Icbon bacuē nec. Icbon bacuē yec utsi tantiaquidquio nendac.

Esuquidistu tantiaquido tantiananaid

¹¹ Esuquidistu tantiaquid utsibo tantiaquiota, quequin chiaid nuqui abia tantiondaid nendac. ¹² Aton utsimbo chieshēnquid Cain icpampidpadquid iquenda. Mayan icsan yua icquin aton utsi cuesunepampic. Aden cuesuniaiēn aton utsi Abedēn abi tantiaquin nadenesho Nuquin Papan aid bēdamboen isnubi Cainēn ambibi tantiacpaden nadenesho Nuquin Papan bēdamboen istiapimbo icpampic. Aden isac Cainēn aton utsimbo Abed chieshēnquin cuesunepampic. ¹³ Cainēn aton utsimbo chieshēnacpadomboen Nuquin Papa tantiesan Nuquin Papan con bacuē caidtedi chieshēnoaic. Nuquin Papa tantiesan mibi chieshēnsho isash, ¿Adquidshenda mibi nepec? quenda. Nuquin Papan chiaid tantiesabimboec adenda. ¹⁴ Esuquidistu tantiaquid tantienquiochoedi Esuquidistu tantiaquid yanash abi tantiaquid utsibo tantiaquidquio nuqui nendac. Aden abi tantiaquid utsibo tantiaquid icquin, Nuquin Papabēd tabadquidbimboecquid nebi, quequin nuqui tantiendac. Aton utsibo tantiesa cuēshēdacbimboecquid nec. ¹⁵ Aton utsibo chieshēnquid, Con utsi cuesunenu, quiacbimboecquid nec. Adquid Nuquin Papabēd tabadtemaid nendac, quequin nuqui tantiendac.

¹⁶ Matses tantiaquin nashunquidquio Esuquidistu icpondash. Nuqui tantiec, ma ēbēd ēnēdenquio yec tabadpanu quiash unēsmane, quenquio yec nuqui icsaquido icsho cuidnushe quiash abided cuidadec unēspondash. Abi tantiaquid icquin abi tantiaquid utsibo tantiaquin nashunec unēsmane quenquio yec nuqui tabadendac. ¹⁷ ¿Aton nachoquid icnuc Esuquidistu tantiaquid utsin na nibēdquiocsho isec, Con utsi menenquio iquembī, quequid Nuquin Papapadquiocquin tantiaquidta nepec? Adquid Nuquin Papan chiaid pausunacmaid nec. Nuquin Papapadquiocquin nashunu quesa adquid nec. ¹⁸ Ēmbi con nabo caid, Utsi tantiec bēdamboec tabadquidquio nebi, quec onquequinnuidi tantiec tabadenda. Utsi tantiembī, quequin mimbi chiacpadomboen nabanquin ismeta. ¹⁹ Aden mimbi chiacpadomboen nabansho isun Nuquin Papan tantiamiac dacuēdenquio yec Nuquin Papa chuinu quiash abi yacno puduedquidbimboecquin nuqui chuided-chuidedec. ²⁰ Utsien Nuquin Papan chiacpadomboen abentse-abentsen naquid, Nuquin Papa dacuēdampambo iquec. ¿Abi chuisho adabi tantiapatsiash? quequin tantiec tsadendac adquid. Adec tsadsho isun Nuquin Papan nadopec: Con Mado tantiaquid ēmbi paucaid, ēmbi con bacuē caid mibi nec. Mimbi chuisho

tantianuna. Muesa nebique. Dacuëdenquiocquin ëbi chuita, quependac Nuquin Papa adquid caic.

²¹ Nuquin Papa tantiaquido, adembi mibi chiembique. Tantiata. Nuquin Papan chiacpadomboen naquidënuquo Nuquin Papa bëisquidëmbimboen, Èbi menepec, quequin dacuëdenquiocquin chianendac. ²² Nuquin Papan ambi chiacpadomboen nabansho isun ambi tantiacpadomboen tantiamendac. Aden tantiamiac ambi tantiacpadomboen abi chuisho Nuquin Papan nuqui bëdamboen isquin menendac. ²³ Naden tantiata, quequin Nuquin Papan chiaid nad iquec: Abëd Abia Yampidquio, Esuquidistu, nidaidënsnun chidon tishac matsesaid Nuquin Papan chomiaid aton Madombo nec quequin nuqui tantiaidquio nendac. Adembiidi Esuquidistun chiacpadecec abi tantiaquid utsibobëd tantiananendac. ²⁴ Aden ambi chiacpadomboen naquidbëd Nuquin Papa iquec. Adquiduidquio Nuquin Papabëd ictequid nec. Abibimboecquid Nuquin Papan aton Mayan meniac ëbëd tabadquin tantiamiac, Nuquin Papabëd icquid nebi, quequin nuqui tantiendac.

4

¿Nuquin Papan chiaidquiobida chuibanoshe? Isnu, qeshun Nuquin Papan chiaidquio isteneta quiaid

¹ Utsibo, Nuquin Papa chieshënuquidën chuimiaindo dadpen iqueque. Aidën chuimiaindën chuisho tantianshun, ¿Nuquin Papan chiaidquiobida chuibanoshe? Isnu qeshun Nuquin Papan chuiquin dada uamiaidquio isteneta. ¿Adquiobida iqueque? Isnu, qeshun isteneta. ² Nuquin Papan pausunaidën naden chiendac: Nidaidënsnun chidon tishac matse-said Nuquin Papan chomiaid aton Madombo nec, quequin chuibanendac. ³ Nuquin Papa chieshënuquidën chuimiaindën naden chiendac: Nuquin Papan chomiaicmaid Esus niondash. Aid aton madopenquio nec, quequin chiendac. Aden chuiquid Esuquidistu chieshënuquid nec. “Èmbi chomiaid chieshënuquid choec,” quequin Nuquin Papan chiampid mimbi tantiec. Aden chuiquid ënden dadpen cho-choac.

⁴ Con nabo quequin Nuquin Papan aton Mayan meniac aidënuquo tantiamiac Esuquidistu chieshënuquidon chuisho, Tiantianu, quesa mibi nendac. Nuquin Papan meniaidën tantiamiac Nuquin Papan chiaid chiac dëniacpadquieci mibi chieshënuquid cuenendac. ⁵ Esuquidistu chieshënuquido Nuquin Papan chiacpadomboen naisa nec. Ambi tantiacpadenuidi chuibanec. Aden chuisho tantiesa Esuquidistu tantiaquid nec. ⁶ Aidën chuisho tantiesa nuqui nec. Nuquin Papan con bacuë caid nuqui nec. Adoac ambi tantiamiacpaden nuqui chuibanoshe Nuquin Papan tantiabenuquid utsibon tantiendac. Adsho isun Nuquin Papan tantiamiaid aido nec, quequin nuqui tantiendac. Nuquin Papa tantiesain Esuquidistu chuibanoshe, Tiantianu, quesa iquendac. Adsho isun, Abipenquio chuiquidën yua nec, quequin nuqui tantiendac.

Nuquin Papan ismiac adecbidi tantiananquidquio ma nuquitedi icoapanuna quiaid

⁷ Utsibo, Nuquin Papa tantiaquido adembi mibi chiembique. Adembi tantiata. Nuquin Papan ambia utsi tantiaquin nabanquin ismiac adecbidi nuqui abi tantiaquidobëd tantiananquin ma nabanoapanuna. Utsi tantiaquidquio Nuquin Papan bacuë nendac. Adquid Nuquin Papa tantiaquidquio nec. ⁸ Utsi tantiaquidquio Nuquin Papa nec. Adquid icnuc utsi tantiesa yec, Nuquin Papa tantiembi, quetiapimbo iquec. ⁹ Matses tantiaquin Nuquin Papan aton Mado Abentsëcquiobi Esuquidistu matsesmiac

matses icsaid bedshunash abided cuidadec unëspondash. Adoac abi tanti-aquido abëdi ënëdenquoio yec tabadendac. ¹⁰ Aden Nuquin Papan matses tantiaquin naid dëniactiapimbo nuqui iquendac. Aidëmbien nuqui tantiabudquin aton Mado Abentsëcquiobi nidaidën chomiac nuqui icsaquido icsho cuid-menquiocnoec abided cuidadec unëspondash. ¹¹ Nuquin Papa comapenen tantiaquidquo icquin Nuquin Icbopadquiocquin Esuquidistu tantiaquid utsi tantiaquiotiad. ¹² Nuquin Papa matsesën istiapimbocquid iquec. Abi tantiaquid utsi tantiaquiocsho isash Nuquin Papa nuquibëd tabadec. Aden aton Mayan meniac aidën tantiamiac Nuquin Papapadquiocquin nuqui tantiaquiendac.

¹³ Aton Mayan meniac ambi tantiamiaidquoio yec Nuquin Papa ëbëd iquec, nuqui quendac. ¹⁴ Nuquin Papan Madomboen nuqui isaidquoio icpadenec. Aden isboshon uquë nësiatiadquido nuqui icsho mënchicquid Nuquin Papan chomiaid chosh, quequin nuqui chian-chianec.

¹⁵ Esuquidistu Nuquin Papan Madombo nec, quequin tantiaquidquoio Nuquin Papan pausunquin aton Mayan meniaid nec. ¹⁶ Aden aid meniaid icquin, Ambi tantiaid nebi, quequin nuqui chuidonec.

Nuquin Papan matses tantiacpadomboen utsi tantiaquid Icbobëd icquidquoio nendac. Adecbidi Icbo abëd icquidquoio nendac. ¹⁷ Nëid uquë nësecatequid nec; nëid ëbëd icquid nec, quequin Nuquin Papan chuibante ushë chonoc, Abëd icquid nebi, quec dacuëdenquoio yec Nuquin Papa tantiaquid aton Madopadquiocquid Nuquin Papa yacno puduedendac. ¹⁸ Nuquin Papan tantiaid dacuëdenquoio iquendac. Ambi tantiamiaid dacuëdesa nec. Abi tantiesa, Ëbi icsaquid icsho cuidtsiash, quec dacuëdendac. Aidi utsi tantiesa yec dacuëdec.

¹⁹ Nuquin Papa Ambia Tantiaquid icquin ismiac tantiananquidombo nuqui nendac. ²⁰ Ëmbi isacmaidquoio Nuquin Papa icsho, Aid tantiaquid nebi, quequin Esuquidistu tantiaquid utsi ambi istëniacaid chieshënquid iquec mauquid nendac. Ambi istëniacaid chieshënquid iquec ambi isacmaidquoio Nuquin Papa chieshënquid nendac. ²¹ Nuquin Papan chiaid nad iqueque. Tantiata. Nuquin Papa tantiaquid nebi, quequin Nuquin Papa tantiaquid utsibo tantiatiad.

5

Nuquin Papan Madombo abimbo tantiaquid

¹ Nuquin Papan Madombo aton Papabëd abuc icboedi nidaidën chomiac matsesaid Esuquidistu nec, quequin tantiaquid Nuquin Papan con bacuë caid nendac. Ambi con bacuë caidënquoio Nuquin Papa tantiendac. Adem-bidi Nuquin Papan con bacuë caid utsibo nuqui tantiendac. ² Ambi con bacuë caidën Nuquin Papa tantiaquin ambi chiacpadomboen naquidquoio icquin ambi con bacuë caido nuqui tantiendac. ³ Aden tantiaquin Nuquin Papan, Naden nata, cac nabanendac. Ambi, Naden nata, quequin chi-aid natiamiantemaid nec. ⁴ Aden Nuquin Papan con bacuë caid icquin ambi chiacpadomboen nabanec tabadquin dëniacacbimboen icsamenuequid nuqui cuemendac. Adembidi Abia Yampid nidaidënshun chidon tishac matsesash tabadec aton Papabëd cuëshëdesa Esuquidistu nec, quequin tantiaquid nuqui icnuc icsamenuequid cuenendac. ⁵ Esuquidistu Nuquin Papan Madombo Yampid nec, quequin tantiaquidënquoio ismiac icsamenuequid cuenendac. Ai, icsamenuequidën yuadesa Esuquidistu tantiaquidquoio nendac.

⁶ Esuquidistu Nuquin Papan Madombo nec, quequin abimbo chiaid iqueque. Tantiata. Chuinu. Nuquin Papan chomiaid nidaidènsun chidon tishac matsesash capusho acten mentoacsho: “Èmbi bédamboen tanti-aidquo mibi nec. Mibi isash bédambo iquebi, Mado,” quequin Esuquidistu chuipondash Nuquin Papan. Adashic, yuec-yuecpambo yacsho cuesten dectanac diadec unèsec aton Papa chiec: “Èbi yuedta, Papa,” quiaish Esuquidistu unèsacsho nacsias aton intac chididiquepondash. Adashic, Nuquin Papa abimbo chuiquidpadquidquo icquin aton Mayanèn tantiamiac, Esuquidistu Nuquin Papan Madombo nec, quequin tantiaquin chiendac nuqui. ⁷ Nuquin Papa yec aton Mado yec aton Mayan yec quequin abucshun aitedishun abentsèc yac bimboecquin Esuquidistu Nuquin Papan nidmiac chosho nidaidènsun tishac matsesaid nec, quequin chuidèd-chuidèdec. ⁸ Adecbidi nidaidènuèsh Esuquidistu matsesacsho isun, Nuquin Papan Madombo nec, quequin ismenuec aton Mayan abucuèsh budash aibèd icpondash. Adembidi yuecshun ambi chiacpadomboen acten mentomi- acsho, Con madombo nec, quequin chuiopondash. Adembidi yuecshun ambi chiacpadec unèso isun, Con madombo nec, quequin inchèshac bimboecnu- icmequin Nuquin Papan nadatiambocquin ismebampondash. ⁹ Aden ismiac isonaidèn naden chiec. Aton Mayan budsho isombi. Adembidi Esuquidistu acten mentosho isombi. Adembidi, Unèso isombi, quequin isonaidèn chiec. Aden chuinubi Nuquin Papanquo, Con madombo nec, quequin ambia Esuquidistu chuiquidquo icsho tantiadonetequidquo nuqui nendac. ¹⁰ Adembidi Nuquin Papan Mayanèn tantiamiac, Esuquidistu Nuquin Papan Madombo nec, quequin tantiaquin adomboembidi chuiopaec nuqui. Esuquidistu Nuquin Papan madopenquo nec, quequid, Nuquin Papa muaquid nec, quiac bimboen chuiquid nendac. ¹¹ Con Madombo, Esuquidistu nec, quequin Nuquin Papan chiaid tantiaquidquo abi yacno nidash abèdi ènèdenquo yec tabadendac. Matses icsaid bedshunash abidèd cuidadec aton Mado unèspanèdash, quequin tantiaquid Nuquin Papa yacno tabadtequid nuqui nendac. ¹² Esuquidistu tantiaquid ènèdenquo yec Nuquin Papa yacno tabadendac. Aid tantiesia aibèd tabadtiapimbo iquendac.

Ma tantiaquidquo mibi icpanuequin chiaid

¹³ Nuquin Papan Madombo Esuquidistu nec, quequin tantiaquid, Icbobèd ènèdenquo yec tabadtequid nendac, quequin ma tantiaquidquo mibi icpanuequin mibi chuiquin dada uaimbi. ¹⁴ Adece abèd ictequid icquin ambi tantiamiacpaden chuisho, Nuquin Papan tantiec, quequin nuqui tantien- dac. ¹⁵ Abitedi tantiaquidquo icquin ambi tantiacpadomboen tantiamiac nuqui chuisho Nuquin Papan menendac.

¹⁶ Esuquidistu tantiaquid nebi, queboedi icsasho isun, Cuèshèdnushe queshun aid bédamboen tabadme, Papa, quequin chiacpaden Nuquin Papan naindac. Utsien, Esuquidistu tantiaquid nebi, queboedi, Icsaquionona, quiacpadec tabadsho isun, Cuèshèdnushe queshun aid bédamboen tabadme, Papa, cainda. Nuquin Papan chiaid tantiate bunesa aid nec. ¹⁷ Nuquin Papan chiaid niaquec icsaic. Padnuen, Nuquin Papan bacuè nebi, queboedi icsash, Icsaquid nebi. Padpidec icsatiapimbo iquebi, quequin chuisho tantiaquid Nuquin Papan padpiden paucoaindac. Aid cuèshèdenquo yec Nuquin Papabèd tabadendac.

¹⁸ Nuquin Papan con bacuè caid iquec icsadènesa nec, quequin nuqui tantien- dac. Nuquin Papan chiaid niacmane quiaish icsate bunesa nebi, quiacpaden nanuesho tantiamiequin pausunendac. Adoac Nuquin Papa chieshènquidèn adquido yuadtiapimbo iquendac. ¹⁹ Esuquidistu tantiec Nuquin Papan con bacuè caid nebi, quequin nuqui tantiec. Adesa Nuquin

Papa chieshënquidën yua nec, quequin nuqui tantiec. ²⁰ Nuquin Papan Madombo abuc abëd ichoedëmbi nidaidënsnun Nuquin Papa chuibanquin tantiamiac. Aidën aton Mayan abi tantiaquid meniac, Nuquin Papa Abentsëcquiobi iquec, quequin nuqui tantiendac. Aidbëdquiocquid nuqui nendac. Aton Madombo aton Papabimboecquid nec. Aid tantiec aidbëd ënëdenquio yec nuqui tabadendac, quequin nuqui tantiendac.

²¹ Con nabo, Nuquin Papabëdtactsëqui aton Madombo Esuquidistu tantiaquid icta. Utsin nacnenaid ismequin, Nuquin Papa neque. Nëid tantiaquiota, cac tantienda. Esuquidistu nebi, qesho adembidi tantienda.

Nëbi padi. Aided chiombi.

UANËN DADA UAIÐËMPI 2

Nuquin Papan chiaid abimbo iquec, quequid tantiaid

¹ Ëmbia Esuquidistu tantiondaidquio Uan nebi. Nèid chido Esuquidistu tantiaquid nendac, quequin Nuquin Papan tantiacpadquieic icquin mibèd Nuquin Papan chiaid tantieic iccuededquidobèdta mibi chuiquin dada uaimbique. Isec onqueta. Nuquin Papan chiaid abimbo iquec, quiosh, quequin mibi utsin chuisho tantiaish mibitedi tantieic tsadebi. ¿Ëbentsëquidabi mibitedi tantieic tsadpe? Padenquio. Aden chuisho tantiaish utsibotsen adechidi mibi tantieic tabadoaic. ² Nuquin Papan chiaid abimbo iquec, quequin ënenquiocquin nuqui tantiendac.

³ Uquë nësiatiadquido nuqui icsho isash abèdi ënëdenquio yec nuqui tabadmenuec nuqui icsaid bedshunash abided cuidadec Esuquidistu unëspendash. Adembidi ambi chiaid tantiaquido utsibobèdta bédamboen tabadmiaido nuqui nendac. Nuquin Papabèdta aton Mado Esuquidistun adquid icmiac, Ambi chiaid abimbo iquec, quequin tantieic utsibobèd tantiananquidquio nuqui nendac.

⁴ Mimbi chiac utsi-utsieic Nuquin Papan chiacpadomboen nabanec tabadsho isash bédambo iquebi. ⁵ Naden nata, quequin chiaid utsipenquio nèid dada uaid nendac. Esuquidistu tantiaquidtedi nuquibi tantiananuna. ⁶ Esuquidistu tantiaquid utsibèd tantiananquin Nuquin Papan chiacpadomboen nabanquido nendac. “Ëbi tantiaquidtedi tantiananta,” quequin Nuquin Papan chiampid mimbi tauamboen tantiondaid nendac. Mimbi tantiacpadquieic ma tabadpanuna.

Muaquin chuiquid

⁷ Muaquin chuiquid dadpen capueque. Adquidën chiaid tantiesa icta. Esus Nuquin Papan chomiacmaid matsesquio niosh, quequin adquidën chiendac. Adquid muaquin chuibanec Esuquidistu chieshënquid nec.

⁸ Adquidën chuisho tantiamane qeshun chieshenquiocquin Esuquidistu tantiaquiota. Nuquin Papa yacno nidshun ambi meniaidtedi bedembi, qeshun Ichon chiacpadomboen nadeneta. ⁹ Esuquidistu Nuquin Papan Madombo nec, quequin tantiembi, queboedëmbi, Ambi chiaid tantianu, quenquiocquin tantesa uatsëcquid nendac. Adquid Nuquin Papabèd tabadac bimboec ictiapimbo iquendac. Esuquidistu Nuquin Papan Madombo nec, quequin tantiaquidquio Nuquin Papan Madobèd tabadac bimboec tabadendac. ¹⁰ Esuquidistu Nuquin Papan Madombo nec, quequin chiesa chosho isun yuedenda. Adembidi, Bédambo icta, quequin adquid chienda. ¹¹ Adquid yuedquid ambi yuedaidbèdta muaquin chuiquin ismequid nendac.

Ënquin chiaid

¹² Dadpen dada uatiadquio icquimbi mibi yacno nidtiadquio icquin daëdpactsëc dada uaombi. Mibi yacno nidash mibèdi onquebi.

¹³ Mibitedi tantieic tsadebi, quequin chuita quiosh ëbèd Nuquin Papan chiaid tantieic iccuededquido. Adembidi dada uaombi.

Padi. Aidtedi dada uaombi.

UANËN DADA UAIÐËMPI 3

Cayon naid chuiquin utsibon chiaid

¹ Ëmbia Esuquidistu tantiondaidquio Uan nebi. Esuquidistun chuinëdaid abimbo iquec, quequin tantiaquid mibi icsho mibi tantiaquin dada uaimbique. Isec onqueta, Cayo.

² Mimbì Nuquin Papan chiaid tantiacpadquiec min nami bëdambo icpashun. Adembidi Nuquin Papan chiacpadec tabadquin ismiac ma utsibobëd bëdamboec tabadpanuna. ³ Mibëd icquidon nëmbo choshon naden chioishi. Esuquidistun chiacpadomboen nabanec tabadquid Cayo nec, quequin chuibanoshi. Aden chiaid tantiabosh, Bëdambo iquebi, quec tsadebi. ⁴ Mimbì chuibanac Esuquidistu tantiaquin muainquiocquin utsibon chuioaic, quequin chuisho tantiash bëdambo iquebi, quec tsadebi. Ëmbi con mado caidën bëdamboen naid chuisho tantiash bëdambo iquebi.

⁵ Mimbì yuedaidon naden chioishi, Cayo. Esuquidistu tantiaquid utsibo chosho isun yuedshun Cayon nashunec. Esuquidistun chiaid tantiaquid utsibo ambi isacmaid chosho isun adembidi yuedshun aido Cayon nashunec, quequin chioishi. ⁶ Mimbì yuedshun nashunaid utsi-utsiec nëmbo choshon mimbì abi tantiaquin nashunaid nëmbocquido Esuquidistu tantiec iccuededquidobëdta chuibanoshi. Bëdamboen mimbì naic. Adembidi nabanquin adquid mibëdi tabadash, Nidnu, qesho meneta ma buanueshun. Aido Nuquin Papan con bacuë caido ambi chuimaidquio nec. ⁷ Aido isadaidpëmbo chuinuec nidshun aquido yacno choshon Esuquidistu tantiesha nec quec ëbi yued quetiapimbo iquebi quec Esuquidistu tantiaquid mibi icsho isash, Ëbipadquid nec, quiash mibi yacno puduedendac. ⁸ Esuquidistun chiaid tantiaquid icquin Esuquidistu tantiaquid ambi chuimaido yuedtiad. Adoquin aidobëdtambi Esuquidistun nacpadomboen ismendac.

Diotedepesën icsamboen naid

⁹ Mibëd iccuededquido aden chuiquin dada uaondambi. Aden ëmbi dada uaid bedash: “Ëmbentsëqui namembi,” quec Diotedepes chieshondash. Aidi ëbëd icquidon chiaid tantiate bunesa nec. ¹⁰ Mibi yacno choshon Diotedepesën muaquin chiaid mibëd iccuededquido chiendambi. Aidi Esuquidistu tantiaquid utsibo yuedesa nec. Utsi: “Yuedmenu”, qesho tantiash: “Padi. Yuedenda,” quec yuedmianesa Diotedepes nec. Adembidi, Yuedmenu, quequido cuëshëdmequid aidi nec.

Demetedio caid bëdamboquid nec, quequin chiaid

¹¹ Aidën nacpadec icsainda, caimbi mibi. Nuquin Papan Icsaisanquio chiacpadomboen naquid aidën con bacuë caid nec. Icsaquidën nacpadomboen naquid Nuquin Papan chiaid tantienquio yec tabadquid nendac. ¹² Utsien Demetedio caid bëdamboquid nec, quequin utsibon chiec. Abimbo chiec. Aidi Nuquin Papan chiacpadomboen nabanec tabadquidquio nec, quequin ëbëd icquidobëdta chuioaimbi. Uanën chiaid abimbo iquec, quequin mibitedishun tantiendac.

Ënquin chiaid

¹³ Dadpen dada uatiadquiocquimbi daëdpactsëc dada uaombi. ¹⁴ Daëdec ushtanquin mimbì ispashuni. Mibi yacno nidash mibëdi onquendabi.

¹⁵ Esuquidistun chiaid tantiaquid utsibëd bëdamboec ma mibi tabadpanuna. “Mibi tantiec tsadebi, Cayo, quequin dada uata”, Esuquidistu tantiaquid utsibon nëmbocquidon chiac adembidi chuioaquin dada uaimbi. Esuquidistun chiaid tantiaquid anocquido adembidi chuïbanoata.
Padi. Aided dada uaombi.

UDASËN DADA UAID

Tauamboen chiaid

¹ Santiacon utsi Udas nebi. Esuquidistun yuambo nebi. Esus tantiaquidon mimi iste dada uanu. Mibi tantiaquioquin Nuquin Papan mibi Esus tantiamiac. Adoac aid tantiasho isash: —Ëbi tantienquoio yanushe —quiash Esus mibi cudasec. ²—Aido bēdamboen isquin bēdambo icme, Papa —quequin Nuquin Papa chianembi mibi tantiaquin.

Muaquido iquendac, quequin chiaid

³ Ëmbi tantiaido mibi neque. Tantia. Nuqui cuidmenquoio icnuec Esus abided cuidadec unēsaid tantiateuidi mibi chuitiadquoio iccobi. Adnuc: —Esus tantiaquido iccuededacno muaquido puduedosh —quesho tantia-boshon aid mibi chuinu. Mibi yacnoshon ambenquiobi chuisho: —Mua. Esusēn chiaidpenquoio mimi chiech. Aid tantiatipimbo iquebi —cata. Nuquin Papan tantiacpadomboen Esusēn abēd icquido chuibanēdaid nuqui tantiaid neque. Utsi tantienda. ⁴ Esus tantiaquido mimi danubi mibi icsamenuec mibi yacno muaquido puduedac caosh. Ambi ēdenquoio tantiacpadom-boen Nuquin Papan icsano nidmetequido aido neque. Muasho tantienda. —Nuquin Papan bēdamboen isaído icsauidequi icsho nuqui cuidtiapimbo iquec. Chido chishpidambo yec dada cuididimbo yec quec icsashobi nuqui bēdamboen isec —quec comapenec muaique. Muasho tantienda. Esuquidistu Nuquin Icho abentsēcshun chiaid niac-niaquec icsaïque.

⁵ Adquid Nuquin Papan comapenen cuidendac. Tantia. Nuquin Pa-pan cuidampid mimi tantianēdaid mibi chuinu. Equipito yacnoshon unēsmenuen ancanquidēn icsamboen chonoo uasho isun ashunquoio Nuquin Papan con matses isadaidbo tsusedpabo puduamepampic. Adoac yuetan-quin puduamiaiombi ambi chiaid niac-niacsho isun Nuquin Papan uesquin unēs uapampic. ⁶ Adembidi utsibotsen cuidpampic. Abēd ic-pampido ambi abi yacnoshon uaido mayan chedo abēdtan namequido icboe-dobi Nuquin Papan chiaid niac-niaccte buncuenash Nuquin Papabēd icte bunenquoio yampampic. Adec Satanas chedo abēd icte bunenquoio icsho isun puuentiapimbo yacno icsamboshē yacno Nuquin Papan nidmepampic. —¿Ada mibi bēdambo icti? Mibi icsamboshē iqueque. Mibi cuidnu —quetequid ushēn padpiden uesquin cuidnumbi adopampic. ⁷ Adembidi shubu dadpen yacnocquido cuidpampic. Shubu dadpen icquid Sodoma caid yacnoshon dadan aton chidopenquoio chudnubi adembidi chidon aton bēnēpenquoio chudmepampic. Dada aton dada utsibēdi chichudnanquidquoio icpampic. Shubu dadpen icquid Comoda caid yacnocquido adecbidi icsapampic. Shubu utsi-utsiec uanocquido adecbidi icsamboecuidi tabadpampic. Adsho isun cuidquin Nuquin Papan nēdēncapampic nibēdquiecnuc. Aido cuidampid tantiaquin: —Adembidi icsamboec tabadquido abitedi cuidquin Nuquin Papan chian anēdēnquiagno nēsecaindac —quequin nuqui tantiec.

Muaquido icsaid

⁸ Cuidte tantienquoio yec adecbidi muaquido icsamboecuidi tabadec. Aton dada utsibēdi chichudnanquido nec. Abi chuiquid dapabon chiaid niac-niacquinc Nuquin Papan chiaid niac-niacquinc caindac. Adembidi Nuquin Papan abi yacnoshon uaido mayan bēdabo caic: —¿Nadatiambo icquidta nedic? —quequin muauaic. ⁹ Mayan bēdabo chuiquid dapa Miqued caidēn adotiapimbo icpampic. Aidi Moises unēsacsho isash: —Chococanu —quesho

podobitsi icsabon icbon Satanasën: —Ëmbiquen bednu —catuidpampic. Adoac: —Icsano nidta —cainquoio icpampic Miqedën. Adenquoio icquin: —Nuquin Papanbien mibi cuidec —capampic Miqued caidën mayan bédabo namequid dapa icquin. ¹⁰ Muaquidombien ambi tantienquoio yaid icsamboen chuishunec. ¿Ada bēdi cuidnushē quepadic? Adembidi abi cuidte tantienquoio icquin ambi tantiaiduidi naic tabadsho Nuquin Papan cuidentac.

¹¹ Cain caidbimboecquid muaquido nec. Nuquin Papan chiaid niac-niacquin abi bunaoid naiqui icsaic. Badan caidën piucquid bednuen Nuquin Papan chiaid niactiadquoio yampampic. Adembidi piucquid bednuen muaquidon ambenquiobi chiec. Code caidën abi chuiquid dapan chiaid niac-niacpampic. Adembidi abi chuiquid dapan chiaid muaquidon niac-niaquec. Adsho Nuquin Papan comapenen cuidentac. ¹² Muaquido icsambo iquec. Mibi icsametiadquien icchitec. Esus tantiaquidon pebedacno puduedshun mibēdtambi muaquidon piac caosh. —Esus tantiaquidquio nebi —quiash puduedash dacuēdenquoio yec icsaiqui tabadec. —Esus tantiaquido chuibanquid nebi —¿quec muaquidonda Nuquin Papan chiaid chuipadic? Padenquoio. Ambi naiduidi naquin ambembi chiaid chiac matses nadquoio iquec. Uispa dadpen icboedi badiadnuc abu chēshēn bētinaçsho isash: —Tanunquien badiadec —queuidacimboec matses iquec. Pete ambi nitsinaid unēsacsho istuidash: —Pete nitsinuidombi —quiācimboc muaquidon chuisho tantiaquid: —Bēdamboen chiaid tantianu —queuidendac. ¹³ Acte tēccuasquequidën cuēmano nushan uaquin icsa uacimboben icsaquin muaquidon mibitsen icsamec. Abi capuaid tantienquoio yequi: —Ëbi capuaid tantiaquidquio nebique. Isec cho —queboedi bēnudtaniacimboben: —Nuquin Papan chiaid tantiamequidquio nebi —queboedēmbi tantiamenquoio iquec. Adec muasho cuidquin Nuquin Papan puduentiapimbo yacno icsamboshē yacno nidmendac.

¹⁴ Adquido con tsusedpa Enoc caidën chuipampic. Abia matses uaid Adanën madon baban tishmiaidën baba Enoc nepampic. Naden chuipampic. “Nuquin Papan abi yacnoshon uaid mayan bédabo dadpenquioshē Nuquin Ichobēd choendac. ¹⁵ ‘¿Ada mibi bēdambo icti? Icsambo icquid yec mibi icsauidequi iccoc. Mibi cuidnu,’ quequin matses icsambo icquido cuidnuec Nuquin Icho choendac. Nuquin Papa icsamboen chuishunquinc Nuquin Papan chiaid niac-niacquinc caquido cuidnuec choendac,” quepampic Enoc Esus matses cuidnuec chote chiec. ¹⁶ Aidën cuidtequido muaquido abi chuiquid dapabon chiaid cacuidec: —Icsambo iquec. Adtiapibi —quec chieshēmēnec tabadec. Abi bunacpadecuidi icsaquiec. —Ëmbentsēqui bēdamboen naic —queuidequi iquec. —Ëmbi tantiacpadomboen ma nanu —quiash matses chiec: —Ëmbi tantiaidquio mibi nec —quec muaic.

Esus tantiaquionona, quiaid

¹⁷ Ëmbi tantiaido mibi neque. Tantia. Esusbēd iccondaidon chiaid mibi chuinu. ¹⁸ Nadpondash. “Esus padpidec choabi icnuc Nuquin Papan chiacpadec bēdamboec tabadsho Esus tantiesabon mamēnshunendac. Nuquin Papan chiaid niac-niaquec abi bunacpadec icsaquiendac,” quepondash.

¹⁹ Adquido muaquido iquec. Aton padī yec icsaiqui chieshēmēnquin mibi cuēsh-cuēshēdmec. Nuquin Papan aton Mayan aidobēd tabadmenquoio iquec.

²⁰ Adquid icsapadec icsainquoio icquin Esus tantiatšēboedēmbi Nuquin Papan chiaid isban-isbanquin ēnenquoio icquin Esusbēda Nuquin Papa tantianuna. Nuquin Papan Mayanēn tantiamiacpadomboen Nuquin Papa chianenuna. ²¹ —Abi tantiaçsho bēdamboen isquin abi yacno Esusēn nuqui

tabadmendac –qeshun Esus chosho isnuen cainquin aibdëdta Nuquin Papa tantianuna. –Nuquin Papan ëbi tantiec –quequin ambi chiacpadomboen utsibo tantianuna. ²² Adshumbic Nuquin Papan chiaid tantiatsëcquido bëdamboen isnuna. Adquidon muaquidon chuisho tantiash: –¿Abimbobida capeba? –qesho tantiashun nëishenquo icquin Nuquin Papan chiaidquo tantiamenuna. ²³ Bacuëmpi cuëten pichiquetsensho: –Baded bed. Taidnushe –quiacimboen –Icsano nidmequin Nuquin Papan cuidnushe –qeshun utsibo Esus tantiamenuna. Icsaquidotsen bëdamboen isnuna. Esus tantiamenuen aido bëdamboen isec: –Ëbitsen icsamane –quiash aido icsapadec icsainda. ²⁴ Nuquin Papa bëdamboshë iquec. Aid tantiasho nuqui icsamenquo iquendac. Adshumbic: –Icsambo mibi iquec –utsibo quetiapimbo icnuc bëdambo icmeshun bëdamboshë yacno abëdi nuqui tabadmendac. Adoac nuqui cuishonquendac. ²⁵ Aden tantiaquin nadonona. –Abipadquid utsi nibëdnuc abentsëcquiobi Nuquin Papa iquec. Nuquin Icbo Esusedë cuidshun abi tantiaquido cuidenquo icquid nec. Abitedishun Icbombo Nuquin Papa nec. Nadatiambo icquin nabanquidquo nec. Abitedi chuiquid dapambo yec abitedi namequidquo nec. Bëdamboshë iquec –canuna ënenquo icquin. Esus tantiaquido icquin adonona. Padi. Aitedi chuiquin dada uaombi.

ESUSËN UAN ISMIAID

Nëidba chuiquin Uanën dada uaid

¹ Nuquin Papan tantiamiac Esuquidistun ismeboedquio chuibanquin dada uaic nebi. Esusbëd ictenedquio aton yuambo Uan nebi. —“Nuquin Papa aton Mado Esusbëdi abitedishun Icho icquin Satanas chedo ambi yuaido matsesbëdta cuidquimbi Esus tantiaquido abëdi tabadmendac,” quequin ma nuqui tantiaquidon tantianu —quequin Nuquin Papan chiac Esuquidistun ismeposhi. Esusën namiac abi yacnoshon uaid mayan bëdabontsen ismeposhi. ² Adoac Nuquin Papan chiaidbëdta Esuquidistun ismeboedquio chuibanquin dada uaic nebi. Abimbo caimbique. Tantia. ³ Nëid dada uaid tantiash chuibanquido ambi chiaidobëdi: —Ambi chiacpadomboen nëbi Esusën nanushe. Chieshtoenguo icquin abi tantiec bëdamboec tabadnuna —quiash bëdamboec tabadsho Nuquin Papan bëdambo icmendac.

Esus tantiaquidon iste dada uaid

⁴ Nidaid utsi Asia caid yacno tabadquidon Esus tantiaquidon mimi iste dada uaic nebi. Sietetedi shubu dadpen icquid yacno-yacnomboec tabadquido Esus tantiaquido mibi chuiquin dada uaic nebi. —Ambi nacpadomboen Nuquin Papan aton Mado Esusbëd tan bëdamboen isquin bëdambo icmepashun. Adembëdi aton Mayanën bëdambo icmepashun —quequin mibi tantiembi. Nidaid uabi yec ëndenquimboshë icpampidi nëbi adquid yec nibëdantiapimbo icquid Nuquin Papambo nec. Aton Mayanën abi bëisec tabadquidëmbi nuquibëdtsen icquin Nuquin Papan chiaid nuqui tantiamec. ⁵ Aton Mado Esuquidistu Nuquin Papan bëdamboen iste tantiamequidquio nec. Abia aton dada unëstiapimbo icquid icmequin uncuemiaidquio nec. Adquid yec abitedishun Icbombo nec. Ambiuidtsëqui chuiquid dapa abitedimbo namendac. Aidquio nuqui tantiaquidquio yec nuqui icsaid bedshunuec abided cuidadec unëspodash. ⁶ Abi tantiasho Esusën aton Papan yuabo nuqui icmec. Aden Nuquin Papan chiacpadomboen naquin: —Con matses bëdamboen ista —quequin Nuquin Papa chianequidquio nuqui nec. Adquido icquin: —Esus bëdamboshë iguec. Abitedishun Icbombo nec. Ambi chiacpadomboen abitedishun napashun —canuna ënenquio icquin. ⁷ Aidquio tantianuna. Nëbi chonoshe. Abitedishun Icbombo yec dacuëdampamboec chosho matses abitedishunquio isendac. Con matses ambi unëš uaondaidquio chosho istanec: —Padtemboshë. Ashibi cuidpec —quetanec cuidte tantiec dacuëdec natiaic shubiendac. Esus tantiesabo utsibotsen adecbidi abi cuidte tantiec natiaic shubiendac.

⁸ Adnubien Nuquin Papan chioshi. —Ëmbi tantiamaid nibëdec. Abitedi comapenen tantiaquidquio nebi. Nidaid uabi yec ictenedi nebi. Nëbi adquid yec nibëdantiapimbo icquidquio nebi. Adquid yec abitedishun Icbombo nebi —queposh Nuquin Papa. Aidquio tantianuna.

Dacuëdampamboecnuc Esusën ismiaid

⁹ Esusbëd ictened Uan nebi. Mibëd tan Esus tantiaquid yec min utsibimboecquid nebi. Mibi yacpadembidi Esus tantiasho Esus tantiesabon chieshëmpodashi. Adoac Esusën namiacpadec chieshtoenguo iquebi. Chieshtoesa yec Nuquin Papabëd tabadtequido nuqui nec. Esus tantiesabon chieshënuquin quënën nauedachimboen cuemenquio icnuen acte dapa nuacquid mad caid nënantan nidaid icquid Pacmos caidën tsadumpondashi. Adondac Pacmos caidën abi tsadec nebi. ¹⁰ Dominco ushën Esus tantiec tsadshobini Nuquin Papan Mayanën tantiameposh. Adoac cachocuësh

shoncate shoncacimboec comapenec onquesho tantiapombi. Ushenquo icquimbi ushquin isacimboen tantiombi. ¹¹ Naden chuiposhi. —Nëbi mibi dadpen ismenu. Adoac ëmbi ismeboedtedi dada uabanta. Nêdtedishun iste dada uata. Nêdic shubu dadpen icquid Epeso caid yacnocquidon. Nêdic shubu dadpen icquid Esmidina caid yacnocquidon. Nêdic shubu dadpen icquid Pedcamo caid yacnocquidon. Nêdic shubu dadpen icquid Tiatida caid yacnocquidon. Nêdic shubu dadpen icquid Sadis caid yacnocquidon. Nêdic shubu dadpen icquid Pidadepia caid yacnocquidon. Nêdic shubu dadpen icquid Daudiseya caid yacnocquidon. Aidtedishun iste dada uashun buame —quequin comapenec onquequin chuiposhi.

¹² Comapenec onquesho tantiatanec bidiadquin isquien tabote manitsinaid 7tedi icposh. Shocosh piu nacnenaiddquo neposh. ¹³ Aid nënantanquo Esusquo icposh. Con matses isadaidbo chuiquid dapabimboec dasiuidac-cosh. Dashcute ënapen icquid abitiombi datonquiacchosh. Abi shicton-quete bëshpiu-bëshpiuctsëcquid nuacquid dapambo icposh. ¹⁴ —Icsaisambo nec —camenuc aton mapi aton manëdaidbëdi abu ushubimboec ushumboshë icposh. —Matsesën naidtedi tantiaquidquo nec —camenuc cuëte isquidbimboec aton ëshë isquid-isquidquo icposh. ¹⁵ —Utsin: “Ëmbiquen abitedi namenu,” catiapimbo icnuc abitedimbo namequid nec —camenuc shocosh piu nacnenaiddimboec nac-nacquo aton taë icposh. —Nuquin Papapadquidquo nec —camenuc acte chododoquiacbimboec comapenec onqueposh. ¹⁶ Abiucshun uispa 7tedi sanamposh. Chëshste cuënumbo icquid ana shëcuënuësh cueshqueposh. —Matses icsaid cuidquidquo nec —camenuc adposh. Aton bëtantete ushëbimboec bëchamauanquiecposh. —Bëdambo icquidquo nec —camenuc ad icposh.

¹⁷ Dacuëdampamboecsho istanequini Esusën dayumbi uebudpaccoc unësanaciabimboec padishec. Adshobini Esusën camishquin bëdameposh. —Dacuëdenda. Nuquin Papapadquidquo nebi. Nidaid uabi yec ictenedi nëbi adquid yec nibëdantiapimbo icquidquo nebi. Adquid yec abitedishun Icbombo nebi. ¹⁸ Adquid yequi matsesën unës uaid yec uincunash padpidec unëstiapimbo icquid nebi. Adquid icquin ëbi tantiaquido unësacsho uincumeshun Con Pa yacno ëbëdi tabadmendambi. Ëbi tantiesaboembi icsaido cuidacno nidmendac —queposh Esus.

¹⁹ Adashic abi onquec: —Naden chuiquin dada uata. “Nëbi nadquid iquec. Nadquid utsi iquendac. Utsin nadotsiandac,” quequin ëmbi chui-boedbëda ëmbi ismeboedtsen chuiquin dada uabanta. ²⁰ Tantia. Ëmbi uispa 7tedi icquid abiucshun sanamboed mibi chuinu. “Nidaid Asia caid yacno 7ted shubu dadpen icquid yacno-yacnomboec ëbi tantiec iccuededquido chuibanquido 7tedbidi icoaic,” quequin tantiaquin uispa 7tedi ismec nebi. “Ëmbi namiaido nec,” quequin uispa sananquin ismec nebi. “Ëbi chuibanquidën chuibansho tantiec iccuededquidobëd iquebi,” quequin tantiaquin tabote manitsinaid 7tedi tabëcacno aid nënantanquo ëbibi iquebi —quequin aden ismeposhi Esusën.

2

Epeso yacnocquido Esusën chiaid

¹ Aden Esusën uispa 7tedi sananquin ismioshi. Tabote 7tedbidi manitsinaid tabëcacno aid nënantanquo abibi icquin ismioshi. —Ëbi tantiaquido chuibanquidën Icho yec ëbi tantiaquidobëd iquebi —quequin aden ismeposhi. Adshumbic naden chuiposhi. —Epeso yacnocquidon ëbi tantiaquidon

iste ěmbi naden chuiboed dada uata. “Tantia, Epeso yacnocquido. Mibitedi chuinu. ² Mimbi naidtedi tantiaquid nebi. Dayacquio icquin ěmbi chiacpadomboen mimbi dadpen nabanoc. Utsibo chieshtonobi chieshtoenquio icquin mimbi ěbi tantioc. Ěbi tantiaquido icsamenuen chiec: ‘Esusèn namiaidquio yec mibi chuinec chopobi,’ quequin muaquiden chuisho: ‘Mua. Nuquin Papan chiaidpenquio mimbi chuibanoque. Utsibo chienda,’ quequin mimbi aidon chiaid tantienquio iccoc. Aden mimbi bĕdamboen naoc. ³ Adembidi utsibon chieshĕnaqui chieshtoenquio icquin Nuquin Papan chiaidbĕdta ěmbi naid mimbi chuibanoc.

⁴ Aden bĕdamboen nasho isun mibi icsaid abentsĕc chuitsĕcnu. Tauamboen mimbi ěbi tantiaquiopadenec. Aden ěbi tantiaquidquio icquin mimbi utsibotsen tantiaquiopadenec. Adodenedĕmbi pacuĕnĕdabimboen ěbi bĕdiactsĕc tantiatsĕcquin utsibotsen mimbi bĕdiactsĕcbidi tantiatsec. Adec mibi icsacuededec. ⁵ Ěmbi chuiboed tantiaash: ‘Ai, abimbo caic. Tauamboen Esus tantiaquondaidi nĕbimbi bĕdiactsĕc tantiachitec. Adchitequini icsaoc,’ gueshun tauamboen mimbi naondacpadomboen ěbi tantiaquiota. Adem-bidi utsibotsen tantiaquiota. Adoenquio icshoembi mibi yacnoshon ěmbi chiaid mibi chuibanquid nibĕdmendac. Adnuc ěbi tantiec cuĕdĕnuec mibi pudued-puduedenquio ictsandac. ⁶ Mibi icsaid ĕnquin chiombi. Nĕbi mimbi naid utsitsen isash bĕdambo iccobi. Mibi cuĕdĕnacno puduedshun nicodaitabon mibi icsamenuen icsamboen chuisho tantiaashun: ‘Aido icsamboshĕ iquec,’ mimbi caoc. Adembidi aido bĕdamboen istiapimbo icoaibi. ⁷ Nĕbi ěbi tantiaquido utsibo chuinu. Ěmbi Epeso yacnocquido chuibocpadomboen con Mayanĕn mibitsen tantiametsiashe. Pabiatae cuembo icquin ěmbi chiaid tantiata. Satanasĕn: ‘Icsamenu,’ caqui chieshtoenquio icquin ěbi tantiaasho Nuquin Papa yacno ěbĕdi tabadmendambi. Tauamboen matses uashun Nuquin Papan aid dada tsadacno tied bĕdamboshĕ yacno tied nĕnantan icquid cuĕte matses unĕstiapimbo icquid icmete icmepampic. Aid cuĕte bacuĕ meniabcimboecnuc mibi padpidec unĕsenquio icnuc ěbĕdi tabadmendambi,” quequin ěmbi chuiboed dada uata –quequin Esusĕn chuiposhi.

Esmidina yacnocquido Esusĕn chiaid

⁸ Adshumbic Esusĕn padpiden chuioposhi. Aid nidaid uabi yec icpampidi nĕbi adquid yec nibĕdantiapimbo icquid nec. Adquid yec abitedishun Icbombo icshobi chieshĕmĕnquidon unĕs uacsho chococaqui uincuemaccondash. Adondaaid yec unĕsaid uincuemequidquio nec. Aidĕn naden chuiposhi. –Esmidina yacnocquidon ěbi tantiaquidon iste ěmbi naden chuiboed dada uata. “Tantia, Esmidina yacnocquido. Mibitedi chuinu. ⁹ Ěbi tantiaquido icsho utsibon chieshĕnac mimbi dayun uaid nibĕdquendac. Nĕbi mifsana nibĕdquid yequi con Pa yacnuĕsh dadpen dayun uaquidbimboec mibi bĕdamboshĕ iquendac. Chieshĕmĕnquidon mibi icsamboen chuishumboedtsen tantiembi. Mibi yacnoshon Satanasĕn namiac: ‘Isadaidbo nebi,’ quequidon mibi icsamboen chuishunosh. Nuquin Papan con matses caido yequi Nuquin Papan yuapenquio yec Satanasĕn yuaboen nec. ¹⁰ Aido tantiaash: ‘Ashibi mĕyampatsiashe,’ quec dacuĕdenda. Satanasĕn: ‘ĶAda Esus tantiaquido chieshtoenquio ictsiashe? Tanu,’ quequin namiacpadomboen chieshĕmĕnquidon mibi utsi-utsien quĕnĕn nauedbanendac. Adoac daĕdpacksĕc ushec mibi mĕyadendac. Puduenabi yec chieshtoenda. Chieshĕmĕnquidon: ‘Esus tantiaquido icsho mibi cuesunenu,’ caqui chieshtoenda. Aidon cuesunicasho mibi Nuquin Papa yacno puduedmeshun ěbĕdi tabadmendambi. ¹¹ Nĕbi ěbi tantiaquido utsibotsen chuinu. Ěmbi Esmidina yacnocquido chuibocpadomboen con Mayanĕn mibitsen tantiametsiashe.

Pabiate cuembo icquin ëmbi chiaid tantiata. Chieshtoenquo icquin ëbi tantiasho isun icsaido cuidquiagno nësecainquo iquendambi,” quequin ëmbi chuiboed dada uata —quequin chuiposhi Esusën.

Pedcamo yacnocquido Esusën chiaid

¹² Adoshombic ana shëcuënuësh chështe cuënumboshë icquid cueshqueboedën Esusën naden chuioposhi. —Pedcamo yacnocquidon ëbi tantiacquidon iste ëmbi naden chuiboed dada uata. “Tantia, Pedcamo yacnocquido. Mibitedi chuinu. ¹³ Mibi yacno Satanasën yuabo dadpen icnuc ëbi tantiec mibi chieshtoenquo iquec. Ënden Satanasën namiac mibi yacnoshon chieshëmëncquidon con yua Antipas caid cuesunepondash. Aidën chieshtoenquo icquin ëmbi naid chuibansho cuesuniacsho isumbic adembidi chieshtoenquo icquin mimbi ëbi tantiaquiopondac. Aden mimbi bëdamboen naid tantiambi.

¹⁴ Adondaid tantiaquin mibi icsaidtsen chuinu. Mibi cuëdëncuededacno Esus tantiaquido icsamequid utsi-utsiec puduedposh. Badan caidbimboecquido aido nec. Ëdenquimboshë matses utsibo chuiquid dapa Badac caidën: ‘Isadaidbo aguec cho,’ cac compenen tantiaquidën Badan caidën isadaidbo Nuquin Papan chiaid niacmenuequin chuitampampic. Aidën chiacpadomboen Badac caidën matses chidobon isadaidbo dada dadpen chudmebededpampic. Adshumbic ambi papa caid Nuquin Papapenquo tantiamenuen ambi papa quequin dasamboed nëish pichicaid pebededacno buampampic. Aden Nuquin Papan chiaid niac-niacmec icsamianquido mibëd iquec. Aido cuemepatecnëdan mimbi. ¹⁵ Adec nicadaitabo caido ëbi tantiate shubun puduedash mibëdi cuëdëncuededec icsamiantec bumpec.

¹⁶ Aidon chiaid tantienda. Ëmbi chiaid mibi niac-niacmenushe. Aidobëd tabadenda. Mibi cuëdëncuededacno chomenda. Ëbi chuiboed niacbidansho isun con ana shëcuënuësh cueshqueboedën chështen cuesacimboen mibi cuidtsiambique. ¹⁷ Nëbi ëbi tantiaquido utsibotsen chuinu. Ëmbi Pedcamo yacnocquido chuibocpadomboembidi con Mayanën mibitsen tantiametsiashe. Pabiate cuembo icquin ëmbi chuiboed tantiata. Chieshtoenquo icquin ëbi tantiasho bëdambo icmendambi. Nuquin Papan isadaidbo mana caid pemedenequin dayun uacpadomboen mibi bëdamboen tabadmendambi. Adshumbic: ‘Ëmbi tantiaidquido yec ëbi yacno puduedtequid nec,’ queshun cuënote ushu menendambi. Abi cuëmëdquid icnubi utsi uain cuëncquin aid cuënoten dada uatanquin menendambi. ‘Ëmbi meneboedënuidsëqui ma isna,’ quequin adoendambi,” quequin ëmbi Pedcamo yacnocquido chuiboed dada uata —quequin chuiposhi Esusën.

Tiatida yacnocquido Esusën chiaid

¹⁸ Adoshombic aidëmbidi padpiden chuioposhi. Cuëte isquidbimboec aton ëshë isquid-isquidquio yequi aton taë shocosh piubimboec nacnacpambo icposh. —Icsaisambo yec Nuquin Papan Madombo nec. Adquid yec abitedishun naid tantiaquidquio icquin matses cuidquidquio nec —camenuec adquio isadquidën naden chuiposhi. —Tiatida yacnocquidon ëbi tantiaquidon iste ëmbi naden chuiboed dada uata. ¹⁹ “Tantia, Tiatida yacnocquido. Mibitedi chuinu. Mimbi naid abitedi tantiambi. Ëbi tantiaquin mimbi utsibotsen bëdamboen tantiec. ‘Aton Papabëdtan Esusën bëdamboenshë natsiashe,’ quequin chieshtoenquo icquin mimbi ëbi tantiec. Adquid icquin ëbi tantiamenuen utsibo nashunquido mibi nec. Ëbi tantiesabon: ‘Padi. Esus tantienda,’ caqui mimbi chieshtoenquo icquin ëbi tantiapec. Tauamboen ëbi tantiaquin daëdpactsëc naondaidi nëbi ëbi tantiaquioshon ëmbi chiacpadomboen mimbi dadpen naic.

²⁰ Adec utsi-utsiec bēdambo icnubi icsamianquid chido abi iquec. Aid mimbi cuemepatecnēdan. Aid cuemenquio yec mibitedi icsaic. Mimbi cacumiabi mibi iccuededacno isadaidbo tsusedpan chido Esabed caidbimboequid chido icsamboshē icquid muanuec puduedposh. Puduedshumbic: ‘Nuquin Papan chiaid chuiquid nebique. Tantia. Chuinu,’ quequin abi bunaiduidquio chuibanosh. Adoac ēbi bēdiactsēc tantiauidtsēcboedi aidēn chiacpadec icsacuededposh. Nuquin Papapenquio utsibon papa caid tantiabededacno puduedposh. Adshumbic aidon papa quequin dasamboed nēish pichicaid pec tabadcuededquimbi aton chidopenquio chudbededposh.

²¹ Adsho isun aid chido: ‘Ma abi icsaid ēnu,’ queshun badedquio cuidenquio iccombi. Adoboqui abi icsaid ēnte bunenquio iccosh. ²² Adec abi icsaid ēntiapimbo icsho isumbimbi nēbi cuidendac. Ēmbi nac daicsabudash mēyadquiec aton ueten uendac. Ambi chiacpadomboen naquido adembidi mēyadquionoc cuidendambi. Aidon ambi naid ēnshoembi cuidenquio ictsiac. ²³ Aid chido cuidquioquimbi aton bacuēbobimboecquido aidēn chiacpadomboen naquin ēntiapimbo icquido adembidi cuidquiendambi. Ēmbi adsho isun ēbi tantiaquidtedishun: ‘Matsesēn otacquio tantiaid tantiaquidquio Esus nec. Adquid icquin abi icsaid ēnenquio icquido cuidquin abi tantiaquido bēdambo icmēdac,’ quequin tantiatsiash.

²⁴ Tantia. Ambocquido ēbi tantiaquidombotsen chuinu. Aden Satanasēn chuimiaidēn chuisho: ‘Aden chuisho tantiatiapimbo iquebi,’ mimbi capoc. Aden bēdamboen nasho isun utsi chienquio iquembi. ²⁵ Nēiduidtsēqui chuinu. Mimbi bēdamboen nabocpadomboen chieshtoenquio icquin ēbi tantiata. Ēbi choabi yacpadembi adota. ²⁶ Choshombimbi chieshtoenquio icquin ēmbi chiacpadomboen naquidombo ēbēdtan chuiquid dapabo icmēdac. Adoac ēbēdtan matses utsibo abitedi namēdac. ²⁷ Aden Nuquin Papan aido ēbēda tchiuquid dapa icmiacsho utsibon: ‘Dēniacquin ēmbiquen nanu,’ catiapimbo iquēdac. Ēbi chieshēnquido: ‘Esus dēniacquin ēmbiquen matses namenu,’ quesho tantiashun matsu nacnenquidēn ambi nacnenaid icsambo icsho isun pos-posachimboen cuidquiendambi. ²⁸ Badiadte anoentsēc uispa dapa choded-chodedbocpadquiec ēnēdenquio yec ēbi tantiaquidobēd iquēdabi. ²⁹ Ēbi tantiaquido utsibotsen chuinu. Ēmbi Tiatida yacnocquido chuibocpadomboen Nuquin Papan Mayanēn mibitsen pausuntsiashe. Pabi-ate cuembo icquin tantiata. Chieshtoenquio icquin ēbi tantiasho adembidi bēdambo icmēdambi,” quequin ēmbi chuiboed dada uata –quequin chuiposhi Esusēn.

3

Sadis yacnocquido Esusēn chiaid

¹ Adoshombic Nuquin Papan Mayan abi tantiaquidobēd tabadmequidquio icquin Esusēn padpiden chuiposhi. –Abi tantiaquido chuibanquid namequid nec –camenuen uispa 7tedi sananquin ismeboedēn naden chuiposhi. –Sadis yacnocquidon ēbi tantiaquidon iste ēmbi naden chuiboed dada uata. “Tantia, Sadis yacnocquido. Mibitedi chuinu. Mimbi naidtedi tantiembi. Bēdamboec tabadquido danquin utsibon: ‘Bēdambo icquido nec,’ mibi canubi ēmbien adotiapimbo iquec. Mibi bēdapenquio iquec. Unēsachimboen mimbi ēbi bēdamboen tantiēnquio iquec. ² Isucunachimboen ēbi padpiden tantiaquiota. Nuquin Papan chiacpadomboen mimbi nauidtsēcquoque. Mimbi ēbi tantiēnquio iqueque. ‘Nuquin Papan chiacpadquiec bēdamboec tabadnuna. Esus tantiaquionona,’ cananta.

³ Mimbi ēbi tantiabenondacpadomboen ēbi tantiaquiota. Bēpiscudenda.

Nëbi mibi icsaid ënshun ëmbi chiacpadomboen naoata. Isucunenquo yacimboen ëbi tantienquo icshoembi mibi cuidendac. ‘Ampequid choec,’ quequin tantienquo yacimboen ëmbi cuidte tantienquo icsho mibi cuidtsiambique. Ëbi tantiaquiota.

⁴ Mibi yacno icsaquido dadpen tabadnubi utsi-utsiec daëdpactsëc ambi naid icsa ucudacimboec icsainquo yec bëdamboec tabadec. Adec bëchish ucudacimboec abi icsaid ënash bëdamboec tabadsho isun ëbëdi tabadmequin icsaisa icmendambi. ⁵ Ëbi tantiaquido utsibotsen chuinu. Ëmbi chuibocpadquidën chieshtoenquo icquin ëbi tantiasho adembidi bëdamboen isun Nuquin Papa yacno ëbëdi tabadmequin icsaisa icmendambi. Aido cuëmëdquid cuëmëdquidquien Nuquin Papa chuibanendambi. ‘Aido ëbi tantiaquidotedi neque. Nuquibëd tabadmenuna,’ quequin adoendambi Nuquin Papan abi yacnoshon uaido mayan bëdabontsen tantianuc. Aden dada uaid ucudenquo yacimboen bëshunenquo icquin ëbëdi tabadtequido abitedi tantiembi. ⁶ Ëmbi Sadis yacnoquido chuibod Nuquin Papan Mayanën mibitsen tantiametsiashe. Pabiate cuembo icquin bëdamboen tantiata. Chieshtoenquo icquin ëbi tantiasho adembidi bëdambo icmendambi,” quequin ëmbi chuibod dada uata –quequin Esusën chuiposhi.

Pidadepia yacnoquido Esusën chiaid

⁷ Adoshombic icsaisambo icquin ambi chiacpadomboen naquidënquo Esusën padpiden chuiposhi. Con tsusedpa Dabid yampicpadquid matses namequidquo yec ambentsëqui Nuquin Papa yacno puduedmequid nec utsibon: –Padi –catiapimbo icnuc. Abi tantiesabo cacumequid Esus nec. Aidën naden chuiposhi. –Pidadepia yacnoquidon ëbi tantiaquidon iste ëmbi naden chuibod dada uata. ⁸ “Tantia, Pidadepia yacnoquido. Mibitedi chuinu. Mimbi naid tantiembi. Mibi yacno ëbi tantiaquido daëdpactsëc iquec. Adquid yec: ‘¿Ada nuquitedictsëqui chieshtoenquo icpatsiaba?’ queded-quededtsëcquien mimbi ëbi tantiaquioc. Chieshënaqui: ‘Esus tantiatiapimbo iquebi,’ quenquo mibi iccoc. Adec chieshtoenquo icsho isun ëmbi namiac ëmbi naid mimbi chuiban-chuibanendac utsibon ëmetiapimbo icquin. ⁹ Aden isadaidbon mibi ëmetiadquio iquec. Aido: ‘Con matses isadaidboudtsëqui Nuquin Papan bëdamboen isendac,’ quec muaboedo Satanasën yuabo niosh. Ëmbimbo namiac mibi yacno cho-chosho mimbi chuibanendac. Adoac: ‘Ai, abimboen mimbi caoc. Nuquin Papan Madon Esusën tantiadombo mibi nec,’ aidon mibi caindac. ¹⁰ Ëmbi chiacpadech chieshtoenquo icquin ëbi tantiasho isash mibi cudasendabi. ‘¿Ada Esus tantienquo yantsiashe? Tanu,’ qeshun nidaid utsi-utsiec yacno tabadquido abitedi Satanasën natiambo icmendac. Adosho mibi chieshtoenquo icquid icmendambi.

¹¹ Tantia. Nëbi choendabi. Utsibon chieshënaqui mibi icbocpadquiec chieshtoenquo yec bëdamboec tabadta. ‘Ëbi adenquo icsho isun Esusën abi yacno puduedmenquo ictsiashi,’ quiashe bëdamboec tabadta. ¹² Aden chieshtoenquo icquin ëbi tantiaquido utsibo abitedi Nuquin Papa yacno yuedendambi. Buintad nitsinaid chiquidtiapimbo yacimboecnuc con shubun icquido mibi icmendambi auëshquo cuentiapimbo icnuc. ¿Mitsipaden icbon: ‘Con na nec,’ quequin abi cuëmëdquid dada uaqin ismepec? Adembidi abitedi ismequin: ‘Con Pabëdan con matses nec,’ mibi caindambi. ‘Nuquin Papa yacno ëbi tabadaid Edusaden chuca caid abucüësh budtequid yacno tabadtequidombo nec,’ mibi caindambi. Nuquin Papan abitedishun Icbombo icmiac ëbëdtambi chuiquid mibi icmendambi. ¹³ Ëmbi

Pidadepia yacnocquido chuibocpadomboen Nuquin Papan Mayanën mibitsen pausuntsiashe. Pabiate cuembo icquin bédamboen tantiata. Chieshtoenquo icquin ëbi tantiasho adembidi bédambo icmendambi,” quequin ëmbi chuiboed dada uata –quequin Esusën chuiposhi.

Daudiseya yacnocquido Esusën chiaid

¹⁴ Adoshombic abitedishun naid tantiaquin abimbo chuiquidënquo Esusën padpiden chuioaposhi. Nidaidbêda abitedi uaquidënquo abitedishun Ichon chuiposhi naden. —Daudiseya yacnocquidon ëbi tantiaquidon iste naden ëmbi chuiboed dada uata. “Tantia, Daudiseya yacnocquido. Mibitedi chuinu. ¹⁵ Mimbi naid tantiambi. Chieshtoenquo icquin ëbi tantiaquid ictiadquidi adquidpenquo mibi nec. ¿Ëbi bédamboen tantiaquidon adopendactic? Padenquo. ‘Esus tantiaquid nebi,’ quiondaidëmbi mimbi naiduidi naquin mimbi ëbi bédiaactsëc tantiatsëccoc. Adsho tantiaahun: ‘Dayacquio yacimboen ëbi tantiaquiopashun,’ caimbi mibi. ¹⁶ Mibi adec chieshtonoc ëbitsen chieshtotiadquio iquebi. ‘Cacumiacbimboen Nuquin Papa yacno ëbëdi mibi tabadmenquo iquendambi,’ mibi catiadquio icchitebi. ¹⁷ Nuquin Papan chiaid niac-niaquec icsapobi,’ quetiadquidi: ‘Ëmbembi con na dadpen beshun dayun uaic utsi bunenquo yec bédambo iquebi,’ mibi quepoc. ‘Esus tantienquo yec Nuquin Papabêd tabadtiapimbo icchitebi,’ quetiadquidi mibi adenquo iccoc. Nuquin Papa yacno tabadte tantienquo icsho isun mibi shubiatiadquio iquebi. Bëchish ucabi yacimboen mibi icsaid ënabi icsho mibi bédamboen istiapimbo iquebi. Pacuënëdacimboen ëbi tantienquo mimbi iquec. ¹⁸ Adboedëmbi Nuquin Papabêd tabadte bunquin ëbi tantiaquiota. Ëbi tantiaquin bëchish ucacimboen mibi icsaid ënta. Adsho icsaisabimboecnuc mibi bédamboen isquin ëbëdi tabadtequid icmetsiambique. Pacuënëdaid paposhquiacbimboecnuc ëmbi naid mibi bédamboen tantiamet-siambique. Ëbi tantiata.

¹⁹ Ëmbi tantiaido bédamboen tantiamembi. Aton papan: ‘Padi, mibi ic-sambo iquec,’ quequin bacuë ëmiacbimboen ëbi tantiaquido icsasho isun ambi naid ëmenuequin natiambo icmendambi. Ëbi tantiaquin mimbi ic-samboen naid ënash bédamboec tabadta. ²⁰ Mibi tantiaquiembrieque. ‘Ëbi tantiata,’ ëmbi cac mibi: ‘Ai,’ quesho tantiash mibêd iquendabi. Pec tabadec bëisnanguiacimboec mibêd iquendabi. ²¹ Tantia. Ëbi tantiaquido utsibotsen chuinu. Chieshtoenquo icquin Nuquin Papan chiaidtedi naquin nainash aibëdi tabadquid nebi. Adquid yec aibëdi abitedishun Icbombo nebi. Adembidi ëmbi con Pan chiaid nacpadec chieshtoenquo yec ëbi tantiec tabadsho ëbëdi tabadmequin ëbêdan chuiquid icmendambi. ²² Ëmbi Daudiseya yacnocquido chuibocpadomboen Nuquin Papan Mayanën mibitsen pausuntsiashe. Pabiate cuembo icquin bédamboen tantiata. Chieshtoenquo icquin ëbi tantiasho adembidi bédambo icmendambi,” quequin ëmbi chuiboed dada uata –quequin chuiposhi Esusën.

4

Nuquin Papa Uanën isaid

¹ Asia yacnocquido Esusën ëmbudquin chuibon abuc ispombi. Adshun isquien shëcuë shëcniacbimboec isadpec. Adnubien chuibocpadquiec shon-cacimboec comapenec onqueaposh. —Nëmbo cho. “Nadquid iquendac. Nadotsiadac,” quequin mibi dadpen ismenu –caphi.

² Adoac Nuquin Papan Mayanën tantiamiac ambo nidacimboen ispombi. Ushquin isacimboembimbi caindac. Adshun isquien Nuquin Papambo

chuiquid dapan tsadte dapanquio tsadpec. ³—Chuiquid dapa abentsēcquiobi nec. Bēdamboshē iquec —camenuc matses bunaidquio casēdubimboec nacnacquo yec piumbo yec bēdamboshē isadposh. Abi tsadaid nēnantanquio uenquebudpamboec uen podquebudpamboec umu-umupambo icposh. —Bēdamboshē icquidquio nec —camenuc adquio icposh. ⁴ Nuquin Papa nēnantan icnuc abi dacuenadec matses tsusiobo Esus tantiaquido chuiquido 24tedi icquido tabadposh. Chuiquid tsadte utsi 24tedi tsadte icnuc icbo-icboec aid tsadten tabadcuededposh. Abēdi tabadmequin Nuquin Papan icsaisa icmiaido yec ushumboshē icquidquio dasiuidcuededposh. Chuiquid dapan mauetembo shocosh nacenaidquio mauecuededposh. ⁵ Adnubien Nuquin Papa yacnuēsh abubimboec bēd-bedquetanenubien abu tesquianiacbimboec cuēdtoposh. —Abitedishun Icbombo nec —camenuc adec cuēdposh. Nuquin Papan bēntsiaucquio tabote taboaid 7tedi icnuc tabēcaid icposh. —Aton Mayan abentsēcshun Nuquin Papa bēisquioquimbi abi tantiaquido chianequid yequi Esus tantiaquidobēdtsen icoaic —camenuc aden ismeposhi. ⁶ Bēntsiaucbidi actepenquio chian dapa acte-actectscēquio isadposh.

Nuquin Papa tsadaid anoen daēdtsēcquio abi dacuenadec aben icquidbimboecquid 4tedi icposh. Dadano chedobi ēshē ictscēquiec icposh. Utsi tanenquio. Abimbouidquio istequidquio icposh. Cachoc icnubi tacbiduc adquibidi icposh. ⁷ Abentsēc bēdi dapambo tēbuchoquidbimboec icposh. Utsibic bacā bēnēbimboec isadposh. Utsibic matsēsēn bētantetebimboec bēisadposh. Utsibic chiqui dapabimboec isadposh. ⁸ Icho-icboec aton podo uicchunēn podobimboec 6tedi icposh. Podonotsen adquibidi ēshēuidquio isadposh. Podo ananquio adquibidi icposh. Aidonquiobi ēnenquio icquin Nuquin Papa chuiposh nadec cuēdēnquin.

—Icsaisambo yec bēdamboshē icquidquio mibi nec.

Abitedishun Icbombo mibi icnuc mibipadquid utsi nibēdec.

Abitedimbo tantiaquidquio mibi icnuc mimbi tantiacmaid nibēdec.

Matses uabi yec icpampidi mibi nec. Nēbi adquid yec mibi nibēdantiapimbo icquidquio nec

—quec badiadquidēn badiadquidēnquiec cuēdēnashic inchēshēntsen cuēdēdeneposh.

⁹ Aden dadanobi ēshēcquidon: —Mimbi nac bēdambo iquebi. Mibi bēdamboshē iquec, Papa. Abitedishun adembidi: “Bēdambo iquec,” mibi cac bēdambo ictsiash, Papa —Nuquin Papa cadonenubi ¹⁰ tsusiobo 24ted icquido ambo tabadquido danēshēn tinquēbudcuededposh. Adtanquimbi mauete chichededtanquin Nuquin Papan tayun sambededposh: —Abitedishun Icbombo mibiuidtsēqui nec —quequin. Adotanquimbic aidontsen Nuquin Papa chuiposh nadec cuēdēnquin.

¹¹ —Mibi bēdamboshē iquec, Papa. Adembidi abitedishun mibi: “Bēdambo iquec,” capashun.

Abitedishun Icbombo mibiuidtsēqui nec.

Chuiquid dapambo abentsēcquiobi mibi nec.

Mibipadquid utsi nibēdec.

Nadatiambo icquidquio mibi nec.

Comapenen tantiaquidquio icquin mimbi abitedimbo uapampic.

Mimbi tantiacpadomboen mimbiuidtsēcquiobi abitedi uapampic.

Adoac mimbi tantiacpadequi mimbi uaido nibēdanabi yec abi iquec.

—quec tsusiobo cuēdēncuededposh.

5

Nuquin Papan chiacpadomboen namequid Esus isadaid

¹ Adshun isquien Nuquin Papan abiucshun ambi chiaid dada uaid sanampec. Abiuc daëdi dada uaid bidicabanquin: —Istemaidën isnushe —qeshun 7ted icnuc bitaccatempin bitaccabanaid neposh. ² Adnubien Nuquin Papan abi yacnoshon uaid mayan bëda chuiquid dapa comapenec onqueposh. —¿Tsuntsin nëid dada uaid bedshun bitaccaid chichanquin chuibampatsish? —quedo-quedoposh. —¿Tsuntsin Nuquin Papan chiaid bedshun isquin ambi chiacpadomboen naquin naimepatsiashba? —quequin tantiec adposh. ³ Adoaquien ëcbedanenquio icposh abitedimbo. Nëidic Nuquin Papabëd tabadquidotedi. Nëidic nidaidën tabadquidotedi. Nëidic unësaidotedi. Aidedi dada uaid bedshun bitaccaid chichanquin istequid nibëdposh. ⁴ Adsho isashini unësqüo icnuc shubipoc: —Aid dada uaid bedshun chichanquin chubanquid nibëdec —quiash. ⁵ Adshobini anocquid tsusion: —Otac. Shubienda. Ènëd. Is. Dada uaid bedshun chichanquin chubanquid abi iqueque. Nuquin Papan matsesmequin chomiondaidquio neque. Aton tsusedpa Uda yampid icnuc aton tsusedpa utsi Dabidbimboecquid chuiquid dapambo nec. Utsibon dëniacadiapimbo icquid nec. Aidëmbi chieshtoenquio icquin Nuquin Papan chiacpadomboenuidi naquidquio icquin aid dada uaid bedshun namëdac —caposhi.

⁶ Adoac isquien isadaidbon Nuquin Papa cuidmenquio icnuen abided unës uaid obeca bacuëbimboecquid Nuquin Papabëd abi tsadacnombo isadtsec. —Matses icsaid bedshunuec abided cuidadec unësaid Esusquio nec —camenuc adec isadposh. Utsibo dacuenadec tabadnuc nënantanquio Nuquin Papabëdquio icposh. Aonoentsëqui dadanobi ëshëcquido dacuenadec tabadnuc abi uquëctšëc tsusiobouidquio dacuenadec tabadposh. Padnuc obecabimboecquid yec aton pais 7tedi icnuc aton ëshëmbo aitededquibidi icposh. —Abitedishun Ichombo yec utsin dëniacadiapimbo icquid Esusquio nec —camenuc aden pais ismeposhi. Adembidi: —Aton Mayambidi Nuquin Papan Mayan yec nidaid utsi-utsiec yacno matses abitedi yacno nidmiaid icnuc ompodëmëdtiapimbo icquid Esus nec —camenuc ëshë 7tedi ismeposhi ushquin isacbimboecnuc. ⁷ Adshumbic obecabimboec isadboedën Esusën Nuquin Papan abiucshunquio sananaid dada uaid bedposh. ⁸ Bedsho istanequien dadanobi ëshëcquidobëd tsusiobo 24ted icquido Esus ismec danëshën tinquebudcuededposh. —Bëdamboshë icquidquio mibi nec —quiash adcuededposh. Tsusiobon icbo-icboen tencate sananquimbi utsiucshun shocoshëmpi bëdambo nuadnuc taitempi sanamposh. —Embi ten-tencamequin Nuquin Papa cuishoncamiacbimboec Esus tantiaquido cuëdënaid iquec —quequin aden ten-tencate sananquin ismeposhi. Adembidi: —Nëshun tauiac nëid pushudquid Nuquin Papa yacno nidacbimboec Esus tantiaquidon chianiaid iquec —quequin bëdambo nuadnuc taitempi sananquin ismeposhi. ⁹ Adashic cuëdënte chucan Esus chiec cuëdëncuededposh tsusiobo.

—Mibi bëdamboshë iquec.

Nuquin Papan chiacpadec matses cuidmenquio icnuc mibided cuidadec unësondaidquio mibi nec.

Nëbi icsambo icboedombi mibi tantiasho Nuquin Papan bëdamboen isendac.

Aden Nuquin Papan chiacpadomboen naquidquio mibiuidtsëqui nec.

Mimbiuidtsëqui Nuquin Papan sanamboëd dada uaid bedshun bitaccaid chichanquin isbanquin Nuquin Papan chiacpadomboen namëdac.

Mibi tantiaquidotedi Nuquin Papan bëdamboen isendac.

Nëidtedi matses caimbi. Nëidic matsesquio.

Nëidic matses utsibo.

Nëidic nidaid utsi-utsiec yacno tabadquido.

Aidedi mibi tantiaquido yansho Nuquin Papan bëdamboen isendac.

¹⁰ Adoac min yuabo yanshun Nuquin Papa yacno mibëdi tabadquin: “Mibi bëdamboshë iquec,” caded-cadedendac.

Mimbi tantiacpadën nidaidënuësh mibëdtan chuiquid iquendac
—quec cuëdëncuededposh tsusiobo.

¹¹ Adnubien abi yacnoshon Nuquin Papan uaido mayan bëdabotsen cuëdëncuededposh dadpenquioshë. 10,000 X 10,000tedi udimbo dëniacash cuëte podotedi tambantiapimbo yactedimbo comapenec cuëdëncuededposh. Nuquin Papa Esusbëdi nënantanquio icnuc anoentsëqui dadanobi ëshëcquidoudiquio dacuenadec tabadposh. Abi uquëctsc dacuenadec tsusioboudiquio tabadposh. Aid uquëctsc dacuenadequic mayan bëdaboudiquio tabadposh. ¹² Adec tabadec mayan bëdabo abitedimbo cuëdëncuededposh naden chiec.

—Isadaidbon obeca bacuëded cuidachimboec matses icsaid bedshunec abided cuidadec Esus unëspodash.

Esusquio bëdamboshë icquidquio nec.

Adquid icsho: “Abitedishun Icho icquin Nuquin Papan chiacpadomboen namequidquio mibi nec,” abitedishun capashun.

Adembidi: “Mimbi uaido yec mitsana abitedimbo nec.

Comapenen tantiaquid mibi icnuc mimbi tantiacmaid utsi nibëdec,” abitedishun capashun.

Adembidi: “Mibi bëdamboshë iquec. Mibi tantiaquiemi,” abitedishun capashun

—quec cuëdëncuededposh mayan bëdabo Esus tantiec.

¹³ Adnubien Nuquin Papan uaido abitedimbo cuëdëndocuededposh. Abi yacnocquidotedi yec nidaidën icquidotedi yec unësaid uincuemaiadotedi yec acten icquidotedi yec quec cuëdëncuededposh naden chiec.

—“Abitedishun Ichombo yec tsadte dapan tsadquidquio Nuquin Papa bëdamboshë iquec.

Obeca bacuëbimboecquid abided cuidadec unësaid Esussten bëdamboshë iquec,” canuna, ënenquio icquin.

“Abiuidtsëqui Nuquin Icho nec. Utsi adquid ictiapimbo iquec.

Aidën nac nuqui bëdamboshë iquec.

Abipadquid utsi nibëdec,” canuna ënenquio icquin

—quec cuëdëncuededposh abitedimbo.

¹⁴ Adsho tantiash dadanobi ëshëcquido: —Ai, abimbo caic —quenubi tsusiobo 24ted icquido: —Nuquin Icho bëdamboshë iquec. Ismenu —quetanec Nuquin Papabëdta Esus ismec danëshën tinquebudcuededposh.

6

Bitaccaid chicaid chiaid

¹ Adnubien Esusën Nuquin Papan: —Nadoendambi —quequin chiaid dada uaid 7tedi bitaccaid tauamboen abentsëc chicposh chicabi icquid 6tedi icnuc. Aid chicnubien Nuquin Papabëd icquid dadanobi ëshëcquidën abentsëcshun abu cuëdachimboec comapenec cuëdquin: —Cho —caposh.

² Adoac cabayo ushumbo icquid catsadec dada canti sanampamboec chosho ispombi. Adec chosho isun: —Mibi chieshënkuido uesquin cuesun se-caquidquio mibi nec —quetanquin chuiquid dapan mauetempo mauemeposh. Adoac adecbidi abi chieshënkuido cuesun secanuec nidposh.

³ Adnubien Esusën dada uaid bitaccaid utsi udictscquid chicposh chicabi icquid 5tedi icnuc. Aid chicnubien dadanobi ëshëcquid utsin: —Cho —cac ⁴ cabayo piumbo icquid catsadec dada choposh. —Matses cuesun secananquio icsho Nuquin Papan tantiacpadomboen aidën nac matses abitedimbo matses utsibobëd cuesun secananendac —queshun chështe dapa

matses siante dapa meneposh. Adomboen Nuquin Papan matses cuidte tantiameposhi.

⁵ Adnubien Esusën dada uaid bitaccaid uidictsëcquid chicposh chicabi icquid 4tedi icnuc. Aid chicnubien dadanobi ëshëcquid utsintsen: —Cho —cac cabayo chëshëmbo icquid catsadec dada choposh. —Pete daëdpactsëc icmete chiec —camenuen Pete yuë tante sanamposh. ⁶ Adnubien dadanobi ëshëcquido dacuenadec tabadnuc nënantanshunquo Nuquin Papan cabayo chëshëmbo icquid catsadquid chuiposh. —Pucquid dadpenquo meniac aton yuë daëdpactsëc nuc tambanshun Pete utsi-utsien daëdpactsëc menianquid iquendac —quequin Pete utsi-utsiec nibëdte chuiposh. Adshumbic: —Pete utsi-utsien nibëdmetanquin tiedën icquid Pete utsi-utsien nibëdmenquo icquin nata —quequin chuiposh. —Nuquin Papan cuidac adec Pete nibëdnuc matses Pete bunquiendac —quequin cuidte utsi aden ismeposhi.

⁷ Adnubien Esusën dada uaid bitaccaid uidictsëcquid chicposh chicabi icquid 3tedi icnuc. Aid chicnubien dadanobi ëshëcquid utsintsen ënquimbi chuiquin: —Cho —cac ⁸ cabayo bëdiactsëc ushu-ushupactsëcquid catsadec dada choposh. —Aid matses unës uaquid nec —quequin cuënsho tantiombi. Abipadquid utsin chinumposh. —Aidombi Nuquin Papan tantiacpadomboen matses cuidquin matses dadpenquioshë unës uabudnendac. Aidon namiac cuesun secananec dadpen naimëdbudnendac. Bunambi aidtedbidi unësbudnendac. Daicsaidëmbic aidtedbidi. Aben icquid uinsadpambo icquidën aidtedbidi acshun secaindac —quequin Nuquin Papan cuidte utsi ismeposhi.

⁹ Adnubien Esusën dada uaid bitaccaid utsi chicposh chicabi icquid 2tedtsëqui icnuc. Aid chicnubien Nuquin Papa yacno isombi. Abi tantiate nëish pichicate dapa dayun chieshënquidon cuesun secaido Esus tantiaquido tabadsho ispombi. Aido chieshtoenuquo icquin Nuquin Papan chiaidbëdta Esusën naid chuibanec bëdamboec tabadsho aden cuesun secaido niosh.

¹⁰ Adoaido icquin comapenec cuëdquin Nuquin Papa chuidoneposh. —Abitedishun Ichombo icquin mimbi tantiacpadomboen namequidquo mibi nec. Icsaisambo yec muesambo mibi neque. En chui, Papa, Nidaidën tabadquido ëbi chieshënquin cuesun secaboëdo ztedetsicshun mimbi cuidpe? —caquin chuidoneposh. ¹¹ Adoaquien: —Chiata. Yuec-yuepactsëcshun naindambi. Min utsibobimboecquido ëbi tantiaquido utsibo ëmbi tantiactedi chieshëmënuquidon ma cuesun secabono. Adoacsho isun cuesun secanquido cuidendambi —queposh. Adshumbic Nuquin Papan: —Ëbëdi tabadmequin icsaisa mibi icmembï —qeshun abitiombi dasiuidbudte ushumbo icquid dasiuibamposh.

¹² Adshumbic Esusën dada uaid bitaccaid utsi chicposh chicabi icquid abentsëc icnuc. Adnubien nidaid abichobi shëc-shëcquemboc comapenec uëdëqueposh. Nidaid uëdëquenubi abucüesh chënquequidtedi dacuëdampambo yamposh. Ushë dashcute chëshën bëpucacimboc inchëshquo icposh. Inchëshën ushëbic intacimboc piumboshë isadposh. ¹³ Uispabic nati-ambo cunquenuc cuëte bacuë tididiquiacimboc nidaidën tididieposh.

¹⁴ Abubic dashcute bidiquiacimboc isadposh. Macuësh dapabic abitedi manëdcuededposh. Acte nënantan nidaid icquidic abitedi manëdcuededposh.

¹⁵ Adsho isashien Esus tantiesabo abitedimbo: —Ashibi cuidpec —quetanec ompodec cuemposh. Nëidic chuiquid dapabo dadpenquo. Nëidic aidobëditan chuiquid utsibo. Nëidic sondado chuiquid dapabo. Nëidic aton na dadpen dayun uaquido. Nëidic cuesambo icquido. Nëidic matses yuabo. Nëidic matsesën yuacmaido. Aidtedi matses icsambo icquido abitedimbo sidquetanec ompodec cuemposh. Utsi-utsiec nidaid shëcuë dapan ompodnobi utsi-utsiec macuësh dapa yacno cuënote dapa dayun ompodposh. ¹⁶ Ompoduidsash:

—Macuësh dapa cuitiadbudnec sebudnequin mabëspashuni. Nuquin Papan istuidshun cuidnushe —quenubien utsibo: —Cuënote dapa abucuësh paëdbudnequin ompopashuni. Nuquin Papan istuidshun cuidnushe. Adem-bidi abided cuidadec unësaid Esusëntsens cuidnushe. ¹⁷ Aidon ambi tantia-cpadënguioibini nëbimbobi cuidchitec. Padtembo. ¿Tsutsi cuidenquo icpat-siashba? —queposh. —Nadomboen Nuquin Papan abi tantiaquido cuesun secaquido cuidëndac —quequin aden ismeposhi.

7

Isadaidbo Nuquin Papa tantiaquidombo bësiaid

¹ Aden Nuquin Papan cuidte ismeboshombic Nuquin Papa abi tantiaquido cudaste ismeposhi. Ismiac Nuquin Papan abi yacnoshon uaid mayan bëdabo 4tedi nidaid abichobi dacuenadec tabädsho isombi. Aidon cunquequid dapa 4tedbidi icho-ichoen uidën uaqin cuncamenquo icposh. —Nuquin Papa: “Ma cunquequidën icsa uabanu,” quiabi icnuc abemi cunquequidën nidaid yec acte yec cuëte yec quenuc icsa uanushe —qeshun adoposh. ² Adnubien mayan bëda utsi ushë choacmiuësh choposh. Nuquin Papa abi tantiaquido cudasëmenuen dada uaqin bësete sanamposh. Aidën cunquequid uidën uaquido comapenec onquequin chuituidposh. ³ —Chiata. “Nidaid yec acte yec cuëte yec quenuc icsa uanushe,” qeshun adembi cunquequid uidën uata. Nuquin Papa tantiaquido bësebambono. Nuquin Papan matses neque. “Icsambo icquidobëdta cuidnushe,” qeshun bësebambono —quetanquin Nuquin Papa tantiaquido bësebamposh ushë choacmiuësh choquidën.

⁴ Adshumbic ambi bësebamboed tambanquin chuibamposh. —Bëseboedtedi Acobo caidën madotedi 12ted icquidon matses tsyuecquido nec. Aidedti tambanac 144,000tedi icposh dadpenquioshë. ⁵ Nëidic Acobo caidën mado Uda caidën matses tsyuecquido 12,000tedi. Nëidic Acobon madobidi Duben caidën matses tsyuecquido 12,000tedbidi. Nëidic Acobon madobidi Cad caidën matses tsyuecquido 12,000tedbidi. ⁶ Nëidic Acobon madobidi Ased caidën matses tsyuecquido aidtedquibidi. Nëidic Acobon madobidi Netadi caidën matses tsyuecquido aidtedquibidi. Nëidic Acobon madobidi Manases caidën matses tsyuecquido aidtedquibidi. ⁷ Nëidic Acobon madobidi Simeyon caidën matses tsyuecquido aidtedquibidi. Nëidic Acobon madobidi Debi caidën matses tsyuecquido aidtedquibidi. Nëidic Acobon madobidi Isacad caidën matses tsyuecquido aidtedquibidi. ⁸ Nëidic Acobon madobidi Sabadon caidën matses tsyuecquido aidtedquibidi. Nëidic Acobon madobidi Ose caidën matses tsyuecquido aidtedquibidi. Nëidic Acobon madobidi Benamin caidën matses tsyuecquido 12,000tedbidi. Aid abitedi tsinacquin tanac 144,000tedi icposh —quequin chuiposhi mayan bëdan. Aden Nuquin Papabëdta Esus tantiaquido dadpenquioshë ismeposhi. —Adquido iquëndac —quequin adoposhi.

Esus tantiaquido Nuquin Papa yacno tabadaid

⁹ Aden Nuquin Papa tantiaquido bëseboedo 144,000tedi tambanquin ismeboshombic padpiden Nuquin Papa yacnombo ismeposhi. Adoac isquien Esus tantiaquido dadpenquioshë tabadpec. Tambantiapimbo yactedi iguec. Nëidic nidaid utsi-utsiec yacno tabadquido. Nëidic matses utsibo. Nëidic matsesquio. Aidedti Esus tantiaquido neposh. Nuquin Papa Esusbëd tabadacnombo tabadposh. Abëdi tabadmequin Nuquin Papan icsaisa icmi-aido yec ushumbo icquid dasiuidcuededposh. Con matsesën chuiquid dapa ismiacimboen: —Nuquin Papa bëdamboshë iqueque. Ismenu —quequin niste podobieccquid sananquin uic-uiccaposh. ¹⁰ Aido comapenec cuëdücuededposh.

—Abitedishun Icho icquin Nuquin Papan ambi tantiacpadomboen isadaidbon obeca bacuèded cuidaczimboen aton Mado Esused cuidpanèdash.

Adoac nuqui icsaid bedshunec abided ciudadec unèspondash Esus.

Aid tantiasho icsaido cuidacno nidmenquoio icquin nuqui abèdi tabadmec.

Aton Papabèd bédamboshè iquec

—quec cuèdèncuededposh.

¹¹ Adsho tantiash ambo tabadquido mayan bédabotedi danèshèn tinquebudcuededposh. —Nuquin Papabèd Esus abided ciudadaid bédamboshè iqueque. Ismenuna —quiash adposh. Nènantanquoio Nuquin Papabèd Esus tabadnuc abi uquèctèsèc dacuenadec dadanobi èshècquido 4tedi icquiduidquoio tabadposh. Abi uquèctèsèc dacuenadec tsusiobo 24tedi icquiduidquoio tabadnuc abi uquèctèsèc dacuenadèquic mayan bédabouidquio tabadposh. ¹² Aid mayan bédabotedi danèshèn tinquebudcuededequi comapenec cuèdèncuededposh.

—Aden abi tantiaquido abèdi tabadmequid bédamboshè iquec.

Esusbèdi Nuquin Papa bédamboshè iquec.

Adembidi abitedishun: “Mibi bédambo iquec, Papa,” quequin chuipashun.

Esusbèdi Nuquin Papa bédamboshè iquec.

Abipadquid utsi nibèdec.

Comapenen tantiaquidquoio icnuc ambi tantiacmaid utsi nibèdec.

Aiduidtsèqui bédamboen tantiaquidquoio nec.

Aidèn nashunac bédamboshè iquebi.

Nadatiambo icquid nec. Abitedishun Icbombo nec.

“Esusbèd Nuquin Papa bédamboshè iquec,” canuna

—quecuededposh mayan bédabotedi.

¹³ Adshumbic èmbi 24ted icquid isboed abentsècshun tsusion chuiposhi.

—Ma ushumbo icquid abitiombi dasiuidquido ¿tsutsi nepec? ¿Mitsiuèshquoio

aido chosh? —cac: ¹⁴ —Tsaudi, tsusio. Mimbibien tantiec —capombi.

Adsho tantiash: —Tantia. Mibi chuinu. Satanasèn: “¿Ada chieshtoenquoio

ictsiashè? Tanu,” qeshun natiamboshè icmiac Esus tantiec chieshtoenquoio

ictenedo nec. Adèc chieshtoenquoio icsho isun Satanasèn tantiacpadomboen

chieshèmènquidon unès uapondash. Abided ciudadec unèsaid Esus tantiaquido

icsho icsaisa icmiaido yec dashcute ushumbo icquid dasiuidcuededposh. ¹⁵ Esus tantiaquido icsho Nuquin Papan abi yacnombo

puedemeshun aton yuabo icmepondash. Adoac Nuquin Papa yacnombo tabadquimbi

abi ènenquoio icquin tantiendac. Adembidi Nuquin Papan: “Con mado mibi nec.

Con champi mibi nec. Nuquibi icnu. Cho,” qeshun abèdi tabadmequin

bédamboen dayun uaic. ¹⁶⁻¹⁷ Isadaidbo matsèsèn nèish yua obeca dadpen dayun

uacpaden abided ciudadec unèsaidèn Esusèn abi tantiaquido bédamboenshè

dayun uaindac padpidec unèstiapimbo icnuc. Adoac petè bunenquoio iquendac.

Actetsen bundoenquoio iquendac. Abi yacnuèsh ushèn pichiquenquoio

iquendac. Chun mèyadenquoio iquendac. Nidaidènuèsh shubidenedi Nuquin

Papa yacnuèsh shubitiapimbo iquendac. Natiamiante nibèdquiec iquendac.

Unèsquoio icmiantè nibèdquiec iquendac. Bacuè shubisho anin bèucquin

bédambo icmiaczimboen abi yacnoshon Nuquin Papan Esus tantiaquido

bédambouidquio icmendac —quequin chuibamposhi tsusion.

8

Dada uaid bitaccaid nainquin chicaid

¹ Nuquin Papa yacnoshon tsusion chuibombien obecabimboec isadquin Esusèn nainquin dada uaid bitaccaid chicposh. Aden chicnubien Nuquin

Papa yacnuësh nadimbo icposh. —Dacuëdampambo iquec —quec media oda yec yuec-yuecpectsëc otacquoio tantiec tabadposh. ² Adnubien Nuquin Papan abi yacnoshon uaido mayan bédabo sietetedi: —Nuquin Papan chiacpadomboen nanu —quec tabadposh. Adsho isun icbo-icboen shoncate sietetedi menebamposh. ³ Adnubien mayan bēda utsi ambobidi choposh. Choash bēdambo nuadquid tauinuequin shocosh nacenaid tauite dapa dayun nidtuidposh. Shocoshēmpin bēdamboshē nuadnuc tauitempi utsi sanamposh. Adsho isun bēdambo nuadquid nua meneposh. Adoac: —Nēid tauiac pushudquid Nuquin Papa yacno nidacimboec Esus tantiaquidon chianiaid iquec —quequin bēdambo nuadquid sanshun tauite nacenaid dapan tauiposh bēdambo nuadnuc. ⁴ Aden tauiac Nuquin Papa yacnombo pushudquid nidosh. —Adembidi Esus tantiaquidon chianiaid abi yacnoshon tantiahsun Nuquin Papan abi tantiaquido chieshēnquido cuidendac —quequin aden ismeposhi. ⁵ Adshumbic aid mayan bēdan tauite dapan samēdquid cuēte dētsisadaid isquidquio icquid bedshun shocoshēmpin sandoposh. Aden sandotanquimbic shocoshēmpichobi matses tabadacno masiabudposh. Nuquin Papa tabadacnoshon adoposh. Adnubien bed-bedquetanepamboec abu tesquiianiachimboec cuēdtoposh. Adnubien nidaid abichobi saca-sacaquemboec uēdēqueposh. —“Nuquin Papan ēbi chieshēnquido cuidpashun,” quequin Esus tantiaquidon chianesho tantiahsun aden Nuquin Papan comapenen cuidendac —quequin aden ismeposhi.

Shoncate shoncaquin ismiaid

⁶ Matses tabadacno cuēte dētsisadaid isquidquio icquid masiabudnubien shoncate bedboedon mayan bēdabon shoncanuen sanamposh. ⁷ Adshumbic abentsëcshumba shoncadoposh. Adnubien Nuquin Papan matses yacno uebimboecquid chomeposh. Nadquio icposh. Uē tsasi yec cuēte dētsisadaid isquidquio icquid yec intac yec quenuc chomeposh ue dapa choacbimboecnuc. Aden chomiadēn nidaid nuamboshē taidposh. Cuēte dadpenquioshē taidposh. Uasin dadpenquioshē pichiqueposh.

⁸ Adnubien mayan bēda utsin shoncaposh 5tedishun shoncabi icnuc. Shoncanubien macuësh dpatembi icquid nēdēnquepamboec abucuësh paēdec chian dapa mad caid nēpaēdposh. Adnuc chian nuamboshē intac yamposh. ⁹ Adec intac yanaidēn acten icquid dadpenquioshē unēsbudneposh. Adecbidi cano dapa antabēdquidotedi abi canochobi mentoadbudneposh.

¹⁰ Adnubien mayan bēda utsin shoncaposh 4tedishun shoncabi icnuc. Shoncanubien uispa dapabimboecquid abichobi tabotebimboec nēdēn-nēdēnquepamboec abucuësh budec acte nēpaēdposh. Aid acte nēpaēdboedēn acte utsi-utsiec dadpenquioshē actiapimbo yamposh. ¹¹ Aid uispa acte muca uaquid niosh. Aid nēpaēdquin muca uaid acte acash matses dadpenquioshē unēsbudneposh.

¹² Adnubien mayan bēda utsin shoncaposh 3tedshun shoncabi icnuc. Shoncanubien Nuquin Papan namiac chēnquequidtedi icsa uaposh. Ushē cuesquinc inchëshēn ushē cuesquinc uispa dadpenquioshē cuesquinc caquin icsa uaposh. Adoquien bēdambo chēnqueboedi bēdiactsëcquio chēnquiantsëccosh.

¹³ —Aden Nuquin Papan matses cuidquiendac —quequin ēbi ismenubien chiqui dapa cuēnequi matsesbimboec cuēdec comapenec cuēdcuemposh. —Esus tantiesabo Nuquin Papan cuidtequido tantiac unēsquioshē iquec. Shoncabi icboedon mayan bēda utsin 3tedshun shoncabanuc Nuquin Papan icsaaido cuidte abentsë chotsecnuc ismendac. Aid cuidte dacuëdampamboshē iquendac —quec cuēdcuemposh abuc cuenequi.

9

Mayan bëda utsin shoncanuc isaid

¹ Adnubien chiqui dapan chiacpadomboen mayan bëda utsin shoncaposh daëdshun shoncabi icnuc. Shoncanubien Nuquin Papa yacnuësh mayan bëda badedquio budash matses yacno choposh. Adsho isun Nuquin Papan chiacpadomboen bëtashte chictempi meneposh. Podobitsi icسابو uidën uacno nidaid shëcuë uquëduccio icquid bëtashte chichte neposh. ² Aid chictempin chicaquien uquëduccuësh tied nëdënquedoacbpamboec pushud-toposh. Abuc inchëshquio pushudquid icnuc ushë isadenquio icposh. ³ Adsho isaquien pushudacnuëshquio tsectsebiecquid dadpenquioshë choposh. Chichumbimboec sianquidquio niosh. ⁴ Adsho isun aido chuiposh. Aton petembo caic: —Nuquin Papan tantiapadomboen tiedën caniquidbëdta cuëte podo penda. Uasintsen penda. Adembidi Nuquin Papan cudasquin bësemiaido abi tantiaquido sebudnenda. Aido senquio icquin Esus tantiesabo bësiadabi icquidoidquio sebudneta —quequin chuiposh. ⁵ Adshubic: —Unësnuc seshun secainda. Inchëshën ushë 5tedi nidmequin chichumbimboecnuc sebudneta —cac tsectsebiecquidën sebudnequin ismeposhi. ⁶ Aid tsectsebiecquidën siac natiamboshë yec matses unëste bunquiendac. Unëste bunquidi badedi unësenquio iquendac.

⁷ Aden tsectsebiecquid ismeposhi. ¿Mitsipadquio nidaid cudasquid sondado catsadaid cabayo icpec? Adquio cabayobimboec tsectsebiecquid isadposh. Shocosh mauetebimboecquid mauecededposh. Matsesën bëtantetembobi bëisadposh. ⁸ Chidon tëbucshumbimboec isadposh. Bëdin shëtabimboec aton shëta icposh. ⁹ Bëntsiac shicdiadquid cudaste shocosh nacnenaiddimboec sictsasimbo icposh. Aid abi maisi cuensho tantiac tied nëdënquiacimboec comapenec cuëdposh. ¹⁰ Aid tsectsebiecquid chishpi-choquid yec chichumbimboec sianquidquio neposh. Inchëshën ushë 5tedi nidmequin adquidën dadpenshun natiamboshë icnuc matses sebudneposh. ¹¹ Abi nidmeguid aton icbo Satanasën yuaido uidën uacnuësh choquidbidi niosh. —Unës uanquidquio nec —quequin isadaidbon onqueten abadon caposh. Quidieco matsesën onqueten apoyon caposh.

¹² —Adomboen Nuquin Papan abi tantiesabo cuidendac —camenuen aden ismeposhi. Chiqui dapan chuiboed tauaquin aden ismeposhi daëd ismiabi icnuc.

Chiqui dapan chuiboed utsi

¹³ Adnubien shoncate sanamboedën mayan bëda utsin shoncaposh abentsëcshun shoncabi icnuc. Shoncanubien tauite dapa Nuquin Papan bëntsiac tsadunaid yacnuëshquio onquedosho tantiombi. ¹⁴ Adec onquidën nëbi shoncaboed chuiposh. —Acte dapa Eupëdates caid yacnoshon matses cuidquido mayan bëdabo 4tedi uidën uaccoshe. Aido nidmetan. “Mimbi tantiapadomboen naic nid,” quequin chuitan —caquien chuitamposh. ¹⁵ Aden chuitan aid mayan bëdabo 4tedishun matses dadpenquioshë cuesun secamenuen aton matses utsibo cuesun secate tantiamebeneposh. Nuquin Papan: —Adënguobi adoendac —quequin tantiapadomboen adoposh. ¹⁶ Adoaquien ambi namiaido cabayo catsadquido sondado chedo matses utsibo cuesun scanuec cho-choposh. Aido tambanaidtedi chuisho tantiombi. —Dadpenquioshë iquec cuëte podotedi. 200,000,000tedi iquec —quepesh.

¹⁷ Èmbi isboedquio nadquio icposh. Abi catsadaid cabayobëdi sondado chedo shicdiadquid cudaste shictonquecuededposh. Shicdiadquid cudaste isac piumbo yec umumbo yec bëshpiu-bëshpiu icquid yec quepesh. Cabayon

mapi bēdi dapan mapibimboec isadposh. Ana shēcūēnuēsh nēdēnquepamboec pushud-pushudpambo yec choposh. Cachinan bacuē pisenaid nuadacimboc asupede caid icsamboshē nuadposh. ¹⁸ Adshumbien ana shēcūēnuēsh choaidēn matses dadpenquioshē cuesun secabudneposh. ¹⁹ Aid cabayo chedon ana shēcūēnuēsh matses cuesun secate icnubi aton incuentembi mapi utsi iccondash. Nisin mapibimboecquid pianquidquio niosh. Aidēntsen matses dadpenquioshē unēs uabudnequin ismeposhi.

²⁰ Adnubien aden Nuquin Papan cuidaidēn unēs uamiabi yaidon matsesēn abi icsaid ēntiapimbo icposh. Ambi naiduidi nabamposh. Ēntiadquidi abi icsaquioposh. Nuquin Papa tantienuo icquin podobitsi icsabo tantiaquin ēntiapimbo icposh. Adembidi ambibi nacnenaid ambi papa caid ēnenquo icquin tantiaposh. Utsibon shocosh nacnenaid tantiaposh. Utsibombic cuēnote. Utsibombic cuēte. Adquid ambibi nacneshun tantiabededposh. Ambi nacnenaid anan onquetiapimbo icposh. Pabiaten tantiatiapimbo icposh. Taēn caputiapimbo icposh. Adquid papa quequin tantiabededposh. Aid tantienquo icquin Esusquo tantiatiadquidi ambi nacnenaiduidi tantiaposh. ²¹ Cuesanquidon abi cuesun secaposh. Nēnēchoquidombic abi unēs uabudneposh. Cuēte podo dauē icsa chodcaquidombic adembidi matses dadpen unēs uabudneposh. Aton chidopenquo chudquidombic adembi utsi chudshumbededposh. Adembidi aton bēnēpenquo chudmequidēn abi icsaid ēntiapimbo icposh. Adembidi aben uequidon abi chudmebededposh. Ampequidombic abi ampebededposh. Adec matses abitedi: —Nuquin Papan cuidnushē. Ēbi icsaid ēnu —quetiadquidobi adenquo icposh.

10

Mayan bēdan dada uaidēmpi pemiaid

¹ Cabayo uinsadpambo icquid ismeboshombic utsitsen ismeposhi. Adoac mayan bēda chuiquid dapa utsi dacuēdampambo icquidquio Nuquin Papa yacnuēshquo budsho ispombi. Abu ushubimboec isadec abitiombi dasiuidbudpaccosh. Uen podqued unquebudacpamboec mapino icposh. Ushēbimboec bētantete bēchamauanquiecposh. Buintad nitsinaid nēdēnquiabipamboec isquid-isquidpambo nidte icposh. ² Dada uaidēmpi bēcadotsaid sanamposh. Budash nidtuidposh. Tsiembudcuenshun taē abiucshun chian dapa mad caid nētıncaquimbi taē opiochshon mananuc tincaposh. Ēnapenquioshē icquid niosh. ³ Adashien bēdi noshquiacbimboec nuamboshē cuēdtoposh. Adec cuēdquin chiac abu 7tedec cuēdtonequin ēcbedtonepsh Nuquin Papan chiaid chuiquin. ⁴ Aden abu cuēdquin ēcbedtonesho tantiashun: —Abu cuēdquin chiaid dada uanu —queshobi: —Padi —caposhi Nuquin Papa yacnoshon chuiquin. —Abu cuēdquin chiaidtedi dada uainda. Padi. Utsibo chuiquin dada uainda —caposhi. Adoac dada uainquo iccomb.

⁵ Adnubien mayan bēda tsiembudcuenshun chian dapa nētıncaquin utsiucshun mananuc tincaboedēn ambibi podo abiucquio cadoposh. —Nuquin Papan isnubi abimbo chuiquidquio nebi —quequin tantiamenuen aden ambibi podo abiucquio cadoposh. ⁶ Adotanquin chuiposhi. —Tantia. Mibi chuinu. ¿Ttsutsi nidaid uabi yec ēdenquimboshē icpampic? Aidi Nuquin Papa nēbi adquid yec nibēdantiapimbo iquendac. Adquid icquin abitedi uapampic. Abu uashun aidēn icquidtedi uapampic. Nidaid uashun aidēn icquidtedi uapampic. Acte uashun aidēn icquidtedi uapampic. Aden abitedi uaquidēn chiaidquio chuinu. Nēbi Nuquin Papan ambi tantiacpadomboen icsambo icquido cuidquimbi abi tantiaquido abēdi tabadmendac. ⁷ Ēbi padquid mayan bēda utsin shoncate sanamboedēn: “Nēbi nainquin shoncanu,” cacpadēnquo Nuquin Papan ambi chiampicpadomboen adoendac —queposh

mayan bēda chuiquid dapa dacuēdampambo icquid Nuquin Papan matses cuidquin naimpanuda.

⁸ Adnubini abucuēsh cuēdquidēn chuiposh. —Aid mayan bēdan sanamboed dada uaid bed —cac: ⁹ —Dada uaid beccho —capombi. Adoaguien: —Nē bed. Bedshun che. Batambo icboedi min ana mucambo yanendac —caposhi. —Nēid bedshun chiacbimboen Nuquin Papan chiaid cuishonquequin isbanisbanash mucambo yanacbimboec Nuquin Papan cuidte tantiash shubitiadquio mibi yanendac —quequin tantiamenuen aden chuiposhi.

¹⁰ Adoac aid bedshun chiash adquo yanobi. ¹¹ Adquio yansho isun mayan bēdabo chuiquid dapan chuioposhi. —Nuquin Papan ambi chiaid tantiamiac matsesēn nabante dadpen mimbi chuibanendac. Nidaid utsiutsec yacno tabadquidon nabantebēdta chuiquid dapabon nabante mimbi chuibanendac. Aden Nuquin Papan tantiacpadomboen mimbi chuibanendac —quequin chuiposhi mayan bēdabo chuiquid dapan.

11

Nuquin Papan namiaidon daēdshun naid

¹ —Nuquin Papan tantiacpadomboen mimbi chuibanendac —quequin chuishumbic mayan bēda chuiquid dapan piabimboecquid tambante meneposhi. Adotanquin naden chuioposhi. —Edusaden yacno nidshun Nuquin Papa tabadte shubu uashunaid tambanta. Adotanquimbic Nuquin Papa tantiaquin bēdambo nuadnuc tauinuequin nacnēnaid dapatsen tambanta. Adotanquimbic Nuquin Papa tantianuec aid shubun pudued-puduedquido tambanta. ² Shubu nuntanquio tambanshun umanucquid daquēnē uaid tambanenda. “Ambo Nuquin Papa tantiesabo isadaidpembo pudued-puduedendac. Aidon Edusaden yacnoshon seta abentsē chotsecnuc matamequin dadpen icsa uabudnendac. Adash Nuquin Papa tabadte shubu uashunaid daquēnē uaidēn pudued-puduedendac,” qeshun aid shubu daquēnē uaid tambanenda. Aden Edusaden icsa uaqin seta 3tedi matamendac —quequin chuiposhi. —“Muainquio icquin Esusbēdta ēbi tantiaquidombo nec,” quequin Nuquin Papan tantiec —camenuen aden tambanaido tantiameposhi. ³ Adnubini Nuquin Papan chuiposh. —Aden Edusaden icsa uanubi matses daēdquibi ēmbi chuiboedquio chuimendambi. “Nuquin Papan namiaid nec,” quequin matses tantiamenuen comapenen tantiaquido icmendambi. Adoac seta abentsē chotsecnuc matamequin ēmbi chiacpadomboen chuibanendac. Adquid yec: “Matses abitedi icsamboshē icsho isash shubitiadquio iquebi,” quequin icsambo icquid abi icsaid ēmenuec dashcute icsactsēcquidquio dasiuidendac —quequin Nuquin Papan chuiposhi.

⁴ Adshobini mayan bēdan chuioposh. —Aido Nuquin Papan oncamiaid daēd isadaidbo matses tsusedpan chuipampid nendac. “Nuquin Papan bēntsiac cuēte odibos caid nitsinaid daēd bēdambo icquid iquendac. Ambobidi tabote daēd bēdambo icquid iquendac,” quequin chuipampid nendac. “Nuquin Papan Mayanēn tantiamiaidquio icquin ambi chiaidquio chuibanendac,” camenuen aden chuipampic. ⁵ Aden abi chuibansho abi chieshēnquidēn: “Mibi cuesunenu,” caqui cuesunadenquio iquendac. Nuquin Papan dayun uaid icquin ana shēcuēnuēsh choboedēn nibēdquiecnuc pichicacimboen abi cuesunenuequidotedi unēs uaindac. Nuquin Papan cuidte tantiamenuen adoendac. ⁶ Adembidi Nuquin Papan cuidte tantiamenuen Nuquin Papan Mayanēn namiaidquio icquin comapenen tantiaquin ismebanendac. Aden ismequin nac abi nidabi yacpadequi ue choenquio iquendac seta 3tedi matamec. Adembidi aidon acte in-tacuaindac. Adembidi ambibi tantiacpadomboen comapenen tantiaquin

dacuëdampamboecquin matses shubimendac Nuquin Papan cuidte tantiamenuen.

⁷ Aden Nuquin Papan chiaidtedi aid daëdshun nainquin naindac. Aden nainshobien matses chuiquid icsamboshë icquidën bëdi dapabimboecquidën abidaëdi cuesun secaindac. Satanasën namiacpadomboen adoendac. ⁸ Edusaden yacnoshon cuesun secashun chococainquio iquendac. “Ma cuesun secaid ischitono,” queshun chococainquio icquin podqued ansanendac. Nuquin Icbo Esus cüesten dectanacnoshonquio matsesën adoendac. Equipito yacno icpampido yec Sodoma yacno icpampido yec quequidbimboec icsamboshë icquin aden Nuquin Papan chiaid chuibanquido cuesun secaindac. ⁹⁻¹⁰ Aden cuesun secabosh: “Nuqui mëyanquid nëid daëd neque. Chococatiapimbo iquebi,” queshun chococainquio iquendac. Adashic matses abitedimbo cuesun secaboed isbededec tabadendac. “Nuqui shubimquido cuesun secaosh,” quiash cuishonquec abëd icquidobëd menenancuededendac. Matses abitedimbo caimbi. Nëidic matsesquio. Nëidic mayu. Nëidic nidaid utsi-utsiec yacno tabadquido. Aidtedi menenancuededendac. Abentsë chotsec ushquin aden ambi cuesun secaboed isbededec tabadendac —quequin chuiposhi mayan bëdan.

¹¹ Adashic abi onquec: —Abentsë chotsec ushquin isbededec tabadbombien Nuquin Papan cuesun secaboed daëd uincuemendac. Uincuemiacsho isash cuishonqueboedobi natia dacuëdec tabadendac. ¹² Adnubi Nuquin Papan abucshun cuënnquin: “Nëmbo cho,” cac abu ushu datanec cuesun secaboed daëd abuctoendac. Abi chieshënnquidon isnubi adendac. ¹³ Aid daëd abuctonoc nidaid saca-sacaquemboec natiambo uëdëquianendac. Nidaid uëdëquenubi shubu dadpenquio chimeshadbudnendac. Chimeshadbudnequimbi matses catashquin dadpenquio 7,000tedi unës uabudnendac. Adnubien unësabi icquido dacuëdcuededendac. Dacuëdequi: “Nuquin Papa dacuëdampamboecquidëmbien nash. Aidquien tantiatiad,” quecuededendac —quequin chuiposhi mayan bëdan. ¹⁴ Aden chiqui dapan chuibocpadomboen mayan bëdan Nuquin Papan cuidte utsi chuiposhi. Nainquin chiabi iccoshi. Abi utsi iquec.

Nainquin shoncaquin Uan ismiaid

¹⁵ Nuquin Papan uincuemetequido daëd chuibombien mayan bëdan shoncate sanamboëdën nainquin shoncaposh. Shoncanubien Nuquin Papa yacnuësh nua cuëdëncuededposh naden chiec.

—Nuquin Papabëdi aton Mado Esuquidistu abided cuidadec unësaid bëdamboshë iquec.

Abi chieshënnquidon naid ëmeshun aid abentsëcshumbi matses abitedimbo namendac ënenquio icquin.

Abitedishun Icbo nec

—quec cuëdëncuededposh. ¹⁶ Adashic Nuquin Papa yacnombo icbo-icboec tsadten tabadboedobi tsuioabo 24tedi icquido: —Mibi bëdamboshë iquec —quequin ismec danëshën tinquebucuededposh. ¹⁷ Adtanequi naded cuëdëncuededposh.

—Nidaid uabi yec ëndenquimboshë mibi icpampic, Papa.

Nëbi adquid yec nibëdantiapimbo icquid mibi nec.

Abitedishun Icbombo mibi icnuc:

“Ëmbiquen dëniacquin namenu,” Satanasën catiapimbo mibi iquec.

Nadatiambo icquid icquin mimbentsëqui matses abitedimbo mimbi namendac.

¹⁸ Nidaid utsi-utsiec yacno tabadquidon abi chuiquidobëdtan mibi chieshëdenec.

Mimbi uaidtedi icsa uadenec.

Adsho mimbi tantiacpadënquo nēbi mimbi cuidendac.

Matses abitedi uincuetanquin mimbi chiaid niac-niaquec icsaquido mimbi cuidendac.

Adoshombic mimbi chiaid chuibanquidobēdta mibi tantiaquido abitedimbo mibi yacno mibēdi mimbi tabadmendac.

Chuiquid dapambobēdta chuiquidpenquo mibi tantiaquidotedi bēdambo icmequin mimbi adoendac

—quequin tsusiobon Nuquin Papa chuisho tantiapombi ushquin isacbimboen.

¹⁹ Adshun isquien Nuquin Papa yacnombo con matses isadaidbon Nuquin Papa tabadte shubu uashunampid shēcniacchobi icposh. Aid shubu nuntan isaquien Moisesën ambi nacnēaid Nuquin Papan chiaid sandoampid icposh. —Ēndenquimboshē ambi chiampicpadomboen Nuquin Papan ambi tantiaidtedi nainquin naindac —camenuen aden ismeposhi. Aden ēbi ismenubien bed-bedquetanec abu teshquianiacbimboec nua cuēdtoneposh. Nidaid saca-sacaquemboec uēdēqueposh. Ue dapa nuamboshē choacbimboec ue tsasi choposh. —Nuquin Papambo abitedishun Icbombo nec —camenuen aden ismeposhi Nuquin Papa yacnoshon.

12

Chidobēdta nisibimboecquid dapa ismiaid

¹ Adoshombic Nuquin Papa yacnoshombidi utsitsen dacuēdampamboecquidbidi ismeoposhi. Adoac chido ushē dasiuidac bimboec bēchamauanqueicsho ispombi. Inchēshēn ushē tincash tsadposh. Uispa 12tedi nacnēaid maute maueposh. ² Bacuē nua usunec tishtiadtsēcquio yec shubibud-shubibudposh. —Isadaidbon chido Esus tishquid nec —camenuen aden ismeposhi. ³ Adnubien nisibimboecquid nuamboshē icquid choposh. Taēchopaidquio yec piumboshē icposh. Mapi 7tedi icposh. Pais 10tedi icposh. Aton mapitedi chuiquid dapabimboec mauete mauecuēdedposh. Satanas niosh. ⁴ Adshumbic nisibimboecquidēn aton incuente ēnapen icquid uic-uiccaquin uispa dadpen bedshun nidaidēn siabudposh. —Aden Nuquin Papabēd icquin Satanasën abipadquido utsibo mayan bēdabo icboedo utsi-utsien yuapampic. Aden yuash aton yuabobēdi nidaidēn choshon matsesēn icsamete bunquiec —camenuen aden ismeposhi. Adshumbic chidon tishacsho bacuē penuen aiduidi bēisquin cainuidposh. ⁵ Adnubien chidon dada bacuē tishposh. Bēdambo icquid matses abitedishun Icho ictequidēmpi niosh. Adshobien Nuquin Papan abi yacnombo buamposh nisibimboecquidēn petiapimbo icnuc. Buanshumbic abipadquid abitedishun Icbombo icmiac. —Aden Satanasën Esus nibēdametiapimbo iquec —quequin ismeposhi. ⁶ Adnubien chido nēbi bacuē tishboed nisibimboecquid dapa cuenēnec matses nibēdacnombo Nuquin Papan tantiacnombo nidposh. Ambobi tabadsho isun Nuquin Papan bēdamboen dayun uaposh yuenquo seta abentsē chotsecnuc matamequin. —Aden Esus tantiaquido Nuquin Papan dayun uaindac —camenuen aden ismeposhi.

⁷ Adshumbic Nuquin Papa yacnoshon padpiden ismiac nēidtedi isoapombi. Nēidic nisibimboecquid dapa Satanasquiobi. Nēidic mayan bēdabo icboedobi Nuquin Papan chiaid niac-niaquec icsash podobitsi icsabo yanaido Satanasën yuaido. Nēidic Nuquin Papabēd icquidombo mayan bēdabo dadpen. Nēidic aido chuiquid dapambo Miqued caid. Aidtedi ispombi. Adnubien Satanas nadposh. —Aton yuabo mayan bēdabo cuemiash Nuquin Papa dēniaquec ēbimbo abitedishun icbo yantsiabi —quiash nicantiadquio icposh. Satanas chedo nidaidēn nidmiabi icnuc

neposh. ⁸ Adshumbic: —Niunchitono —quequin bedbidan-bedbidanaquien Nuquin Papan yuabo Miqed chedo uidênquio icquido yec niadenquio icposh. Adshumbic Miqed chedon nisibimboecquid Satanas chedo nicaposh. Aton yuabobêda Nuquin Papa yacnoshon nicaposh. ⁹ Nicaquien matses tabadacno nidaidên choec Satanas chedo bud-budposh. Eba caid icsamepampid Satanas niosh. Nêbi matses dadpenquioshê icsamequin yuate bunquieic.

¹⁰ Adnubien Nuquin Papa tabadacnoshon anocquidên comapenec onquequin chuibamposh naden chuiquin.

—Aden Nuquin Papan aton Mado Esusbêdtan abi dêniacnuequido dêniacmenquio icposh.

Nuquin Papa chieshênquidquio icquin abi tantiaquido chieshênquin icsamboen chuishunquid nec.

“¿Esus tantiaquido bêdambo icquidoda nedic? Êmbi natiamiac aido chieshtot-siash,” quequin Nuquin Papa chuidenequid Satanas nec.

Satanas chedo cuemiasch Nuquin Papa aton Mado Esus abided ciudadec unêsaidbêdi dêniacadiapimbo yec abitedishun Icbombo nec

—quepoch Nuquin Papa yacnuêsh cuêdec. ¹¹ Adashic padpidec auêshbidi:

—Nêbi êmbi isac Satanasên Esus tantiaquido chieshtometiapimbo icposh.

Satanasên: “Chieshtomenu,” caqui:

“Padi. Esusën yuambo nebi,” quec chieshtoenquio icposh.

Cuidmenquio icnuec abided ciudadec unêsaid Esus tantiec chieshtoenquio icposh.

Adsho abi chieshênquidon matsesên: “Padi. Esus tantienda. Cueschitomane,” caqui

chieshtoenquio icquin adenuidi Esus tantiasho cuesun secamepoch Satanasên aton yua icmiambobi.

¹² Satanas cuemiaid tantiash cuishonquenuna.

Nuquin Papa yacno tabadquidotedi nuquibi cuishonquenuna.

Êbitedi cuishonquenuc nidaidên tabadquido matses yec mibi cuishonqueti-apimbo iquec.

Nêshun cuemiac mibi yacno budash Nuquin Papa chieshênquieic Satanas chieshêmênquieic tabadec.

Mibi icsamete bunquieic. “Nêbi Nuquin Papan êbi cuidquieque.

Abi tantiaquido yuashunchitono,” quec mibi icsamete bunquin mibi nati-ambo icmendac.

Adoac natiaic mibi tabadendac

—quepoch Nuquin Papa yacnuêsh cuêdec. Aden tantiameposhi.

¹³ Adshumbic êmbi isadaidbon chido isboed padpiden ismeposhi. Adoac

Esus tishquid isadaidbon chido unês uanuen nadancasho ispombi. —Nuquin

Papa yacnoshon nicachitoshi —qeshun chieshênquin nisibimboecquid Sa-

tanasên aid chido nadancaposh. ¹⁴ Adnubien Nuquin Papan chiqui dapan

podobieccquid meniac bedanec aid podombi cuenec matses nibêdacnombo

Nuquin Papan tantiacnombo chido cuempoch. Anoshombi nisibimboec-

quidên icsa uatiapimbo icnuc Nuquin Papan aid chido dayun uaposh. Seta

abentsê chotsecnuc matamequin dayun uaposh. ¹⁵ Adnubien nisibimboec-

quidên: —Aid chido unês uachitono —quequin ambibi ana shêcuêshun

chomequin acte dapa chido dayun uacno nua chomepoch. Aden Sa-

tanasên Nuquin Papa tantiaquido isadaidbo matses nibêdametiadquio iquec.

Adembidi Esus tantiaquido nibêdametiadquio iquec. ¹⁶ Acte dapa chomi-

acsho isun Nuquin Papan nidaid shêcuê uashun aid shêcuên acte nid-

miosh chido yacno chiuidenquio icnuc. ¹⁷⁻¹⁸ Adsho isun nisibimboecquidên

Satanasên nêshquioshon aid chidon bacuêbobimboecquido Esus tantiaquido

chieshënquioposh. Uesquin cuesun secatiadquio icposh. Nuquin Papan chi-
acpadomboen chieshtoenquio icquin bédamboen naquido Esus tantiaquido
caimbi.

13

Bëdibimboecquid dapa ismiaid

¹ Esus tantiaquido cuesun secate bunquid ismeboshombic Satanasëmbidi
chian dapa mad caid cuëmanshun cainquin ismeoaposhi. Aden cainubien
acte uquëducuësh bëdi dapabimboecquid pudundoposh. Mapi 7tedi icposh.
—Nuquin Papa caid nibëdquiec. Èbiuidtsëqui abitedishun icbombo icnu —
quequin aton mapitedi bédada uadaid neposh. Pais 10tedi icposh. Aid
paistedi chuiquid dapan mauete paisën dectambampaccosh. ² Aton dada
bëdin dadabimboec isadposh. Aton taë unsadpambo icquid utsi oso caidën
taëbimboec isadposh. Ana shëcuë bëdi utsi tëbuchoquidën ana shëcuëbimboec
icposh. Adsho isun Satanasën ambi caimboed chuiquid dapambo icmeposh.
Ambi tantiaidquio tantiaequin abi icsaid namebamposh. Adoac matses
abitedimbo chuiquid dapambo yamposh. Aden Satanasën matses icsam-
boshë icquid chuiquid dapa icmequin ismeposhi. ³ Adshumbic padpiden
ismeposhi. Adoac aid bëdi dapabimboecquid acte uquëducuësh choboedën
mapi abentsëc mëmuntiapimbo icnuc cuesuniaid uincuemiaid icsho ispombi.
Aden uincuemiaid icsho isash: —Comapenen tantiaquidien nechitec —
queshun matses abitedishun acte uquëducuësh choboedën chuiquid icsam-
boshë icquidën chiacpadomboenuidi nabededposh. ⁴ Adshumbic: —Èbi
chuiquid dapa namequid mibi nec —quequin Satanas papa caquin matsesën
tantiabededposh. —Aden Satanasën namiac èbi chuiquid dapapadquid utsi
nibëdec. Comapenen tantiaquidquio icnuc utsibon nuqui cuesun secati-
apimbo iquiec —queshun abi chuiquid dapa acte uquëducuësh choboedtsen
tantiaquioposh. ⁵ Aden matsesën tantiaid icquin Satanasën tantiamiac-
padomboen Nuquin Papa chieshënquiec: —Nuquin Papa caid nibëdquiec.
Èbiuidtsëqui namembi —quequin matses abitedimbo nameposh. Aden
Nuquin Papan tantiacpadembi inchëshën ushë 42tedi nidneposh seta
abentsë chotsecnuc matamequin. ⁶ Aidën Nuquin Papa chieshënquin naden
muauaposh. —Nuquin Papa caid nibëdquiec. Abi tabadaidtsen nibëdquiec.
Abi yacno tabadquido abitedi nibëdquiec. Ambembi chiaid niosh —quec
muaposh. ⁷ Adshumbic Satanasën tantiamiacpadomboen Esus tantiaquido
dadpen unës uabudneposh. Adembidi matses nidaid utsi-utsiec yacno
tabadquido abitedimbo ambi chiacpadomboen nameposh. —Matses icsam-
boshë icquid matses abitedi chuiquid dapa iquendac —quequin ushquin
isacimbocnuc ismeposhi. ⁸ Aid caic matses abitedishun: —Nadatiambo
icquid nec —quequin tantiaquiendac. Aid tantiaquido Esus tantiesabo nen-
dac. Èndenquimboshë matses uabi Nuquin Papan tantiampicpadec abided
cuidadec unësaid Esusquio tantiesabo nec. —Adquido yec Nuquin Papan:
“Èbëdi tabadmendambi,” quequin chiacmaidombo nec —quequin aden is-
meposhi.

⁹ Pabiate cuembo icquin bédamboen tantia. Esus tantiaquido icsho mibi
chuiquid. ¹⁰ Nuquin Papan: —Èbi tantiaquid chieshënquin quënën nauedquido
cuidendambi —caindac. Esus tantiesabon Esus tantiaquido chështen seshun
secaindac. Adsho Nuquin Papan seshun secanquido cuidquiendac. Èbi
adsho tantiash mimbi nacpadequi chieshtoenquio icta. Chieshtoenquio
icquin Esus tantiaquin ambi chiacpadomboenuidi nabanta.

Nidaid shëcuënuësh choboedtsen ismiaid

¹¹ Adshumbic padpiden ismeposhi. Adoac aben icquidbimboecquid ut-sitsen nidaid shëcuënuësh puduensho ispombi. Obecan paisbimboec aton pais daëd icposh. Satanasën ancanquidquo icmiacpadec dacuëdampamboec onqueposh. Bëdambo icquid damianquien mauquin chuiquanquidquo niosh. ¹² Adsho isun Satanasën abia chuiquid dapa icmeboedën nidaid shëcuënuësh puduemboed chuiquid dapatsen icmiac abëdtambi matses abitedimbo ancaquin nameposh. Aden namequin abi chuiquid dapa acte uquëducuësh choboedën chiacpadomboen matses abitedi nameposh naden chuiquin. —Seshuniaid uincuemiondaidën nuqui chuiquid dapan chaiduidtsëqui natiad —caposh. ¹³ Aden acte uquëducuësh choboedën abi chuiquid dapan chiaid namenuen comapenen tantiaquid icquin nidaid shëcuënuësh choboedën dadpen ismeposh. Matses dadpenhun isnubi abucshun abembi taboadaid budmequin ismeposh. ¹⁴ Aden Satanasën namiacpadomboen comapenen tantiaquin ismiac matses dadpenhun: —Abimbo caic —quequin abi chuiquid dapa icsamboshë icquidën chiaid nabededpoh Nuquin Papambo tantienquo icquin. Abi chuiquid tantiamquid nidaid shëcuënuësh choboedën: —Nuqui chuiquid dapa uincuemiaidquo icsho tantiaquin abibimboecnuc nuamboshë icnuc nacnenta —cac matsesën nacnemposh. ¹⁵ Nacnenacsho isun Satanasën namiacpadomboen nidaid shëcuënuësh choboedën abi chuiquid dapabimboecnuc nacnemboedi tibocameshun oncameposh. Adoquien nacnemboedquiobi chuiquid dapa icsabimboec onquequin: —Ëbi tantiesabo neque. Cuesun secatan —cac yuabon abi chuiquid dapa tantiesabo cuesun secatanposh. ¹⁶ Adnubien nidaid shëcuënuësh choboedën: —Nuqui chuiquid dapan yuabo nuqui nec —quequin ancabudquin matses dadpenquo dada uaquin bësiadmepoh nëidtedi. Nëidic chuiquid dapabo. Nëidic chuiquidpenquo. Nëidic dadpen dayun uaquido. Nëidic aton na nibëdquido. Nëidic matses yuabotedi. Nëidic yuapenquo. Aidtedi matses dadpenquioshë dada uaquin bësiadmepoh. Utsi-utsien bêtanteteno bësiadmepoh. Utsi-utsien mëdante abiucquo mësiadmepoh. —Acte uquëducuësh choboedën ëbi chuiquid dapan yuabo nec —qeshun nameposh. ¹⁷ Adshumbic nidaid shëcuënuësh choboedën chuiposh. —Adec ëmbi chiacpadec siadambo icquido piucquidbëdta mitsana utsi menenda. Ëmbi siadmiaduidtsëqui mene —queposh. Utsi-utsiec abi chuiquid icsamboshë icquid cuëmëdquid dada uaquin bësiadmiad nepoh. Utsi-utsiec aid cuëmëdaidbimboecquid naden 666 dada uaquin bësiadmiad nepoh. ¹⁸ ¿Ada ëmbi chuiboed tantio? Bëdamboen tantiaquidën: —Abi cuëmëdquidquo chienquo icquin naden 666 chuiquin dada uapac —catsiash. —Adec matses icsamboshë icquidquo chuiquid dapa yansho isun bëdambo icquid danenda —quequin ushqin isacbimboecnuc aden ismeposhi.

14

Nuquin Papan cudasënaido ismiaid

¹ Adoshombic padpiden ismiac abided cuidadec nësaid Esusquo macuësh dapa Sion caid mananënquo tabadsho ispombi. Abëdi abi tantiaquido dadpenquo 144,000tedi tabadpoh. —Con na neque. Chën —quequin cudasquin Nuquin Papan abi cuëmëdquidbëdta Esus cuëmëdquid dada uaquin bësemiaido niosh. —Adec Esus tantiaquido abëdi tabadendac —quequin aden ismeposhi. ² Adnubien Nuquin Papa yacnuësh çimidapadpamboec cuëdtopoh? Acte nua chododoquiachipamboequien niachipoh. Abu tesquianiachipamboequien nechitosh. Ten-tencate dapa dadpen icbo-icboen sananquin ten-tencacchipamboec comapenec

cuëdëncuededposh. ³ Adec Esusbëdi macuësh mananënquo tabadboedo 144,000tedi icquido cuëdëncuededposh. Nuquin Papa chuiquid dapan tsadten tsadacnombo cho-choash tabadec cuëdënte chucan cuëdëncuededposh. Tsusiobo 24tedi icquidobëdan dadanobi ëshëcquido 4tedi icquidën ambobidi tabadquin tantianuc adcuededposh. Abi icsaid bedshunec abided cuidadec unësaid Esus tantiaquidon matsesënuidsëqui aid cuëdënte chuca tantiec cuëdënosh. ⁴ Aido Nuquin Papa yacno nidabi yec nidaidën tabadnuc matses utsibo abitedimbo icsamboecshë tabadnubi aidoen bëdamboec tabadpanëdash. Utsibon Nuquin Papa Esusbëda tantiatiapimbo icnubi aidombien tantiaquiopanëdash. Abided cuidadec unësaid Esus tantiaquid icquin ambi chiapadomboen nabampanëdash. Adonëdaid icquin Nuquin Papabëda Esus cuishoncamequidombo niosh. ⁵ Chieshtoenquo icquin Esus tantiec muesabo icpanëdash. —Adquido iquendac —quequin ushquin isacimboecnuc aden ismeposhi.

Mayan bëda utsi 3tedshun chiaid

⁶ Aido ismeboshombic utsitsen ismiac Nuquin Papan abi yacnoshon uaid mayan bëda uicchun cuenacimboec abuc cuensho ispombi. Bënudtiapimbo icquid Nuquin Papan chiaidquido matses chuinec niosh nëidtedi. Nëidic matsesquio. Nëidic matses utsibo. Nëidic nidaid utsi-utsiec yacno tabadquido. Aidedi chuiquin Nuquin Papan matses icsaido cuidte chuinec niosh. ⁷ Abuc cuenquimbi chuibemposh. —Nuquin Papauidsëqui tantia. “Abu uaquinc nidaid uaquinc acte uaquinc caquid bëdamboshë iquec. Abipadquid utsi nibëdquio iquec,” quequin tantia. Nëbi ambi chiaid niac-niacquido cuidquieque. Aidquido tantia —quequin chuibemposh abuc cuenquimbi.

⁸ Adnubien mayan bëda utsi abuc cuenoaposh. Cuenquimbi naden chuibenaposh. —Shubu dadpen icquid Babidonia caid yacnocquido icpampidobimboec icsamboshë icquidobidi icsho Babidonia yacnocquido caimbi. Aidon uisma uanten danoshcachimboen matses utsibo abitedi Nuquin Papa tantiamenquo icquin icsamequioposh. Aduidequi icsho ënenquimboshë cuidampicpadomboen Nuquin Papan uesquin cuidquien-dac —quequin chuibemposh mayan bëda utsin abuc cuenquimbidi.

⁹ Adnubien mayan bëda utsitsen abuc cuenoaposh. Aidëntsen chuibenaposh. —Tantia. Nuquin Papan cuidtequido chuinu. Chuiquid dapa icsamboshë icquid acte uquëducuësh choboed tantiaquin aidimboecnuc nacnenaid tantiaquioposh. Aden abi chuiquid icsamboshë icquid tantiec: “Aton yua nebique. Ismenu,” quiash ambi tantiaidën chiapadec utsi-utsiec bësiadcuëdnubi utsi-utsiec mësiadcuëdedposh. Aden abi chuiquid icsamboshë icquid tantiaquidon abi tantiatiapimbo icsho Nuquin Papan cuidquendac. ¹⁰ Aidedi chuiquid icsamboshë icquidën yuabo icsho icbobëdtabi Nuquin Papan nëishënuquioshon cuidquendac. Icsaquido cuidquiacno chian anëdënquiacno nësecain adoendac. Abided cuidadec unësaid Esusënquo mayan bëdabobëdan isnubi adoendac. ¹¹ Ènenquo icquin adoendac. Aden Nuquin Papa chieshënuquidquido tantiec siadaido Nuquin Papan cuidquendac. Aden cuidsho: “Chiata,” cac “Ai,” quenquo icquin adembidi cuidquendac ënenquo icquin —quequin chuibemposh mayan bëdan. Aden ismeposhi.

¹² Èmbi chuiboed tantiahsun mimbi nabocpadomboembi chieshtoenquo icquin Esus tantiaquin ambi chiapadomboenuidi nabanta. Utsibon chieshënuquin: —Padi. Esus tantienda. Cueschitomane —caqui adenuidi ënenquo icquin Nuquin Papabëda Esus tantiaquiota.

¹³ Adnubi Nuquin Papa yacnuësh comapenec onquequin chuioposhi. —Naden chuiquin dada uata. Chieshënuquidon: “Esus tantiec,” qeshun

cuesun secaido Esus tantiaquido cuishonquendac —quequin chuiposhi. Adnubien Nuquin Papan Mayanëntsen: —Ai, abimbo caosh. Esus tantiaquido natiaic tabadtenedobi unësash bédamboshë iqendac shubitiapimbo yacno tabadec. Ambi chiacpadquiec bédamboec tabadec unësacsho Nuquin Papan aden bédamboshë icmendac —quequin chuiposhi.

Intac nua icnuc Nuquin Papan cuidtequid chiaid

¹⁴ Adshombic padpiden ismiac abu ushquio Esus tsadsho ispombi. —Abitedishun Icbombo nebi —quec chuiquid dapan mauetempo shocosh nacnenaid maueshun chështebimboecquid sanamposh. ¹⁵ Adnubien mayan bëda utsin abi yacnuësh choquin comapenec onquequin Nuquin Papan chuiboed Esus chuituidposh. —Nëbi nidaidën icquid sinaid butebanquin sando. Nuquin Papan tantiacpadën nëbimbobi nata ¹⁶ —caquien chështebimboecquidën sinaid butebanquin sandoposh. —Aden Nuquin Papan tantiacpadomboen abi tantiaquidotedi bedshun abi yacno Esusën buanendac —camenuen aden ismeposhi.

¹⁷ Adnubien mayan bëda utsi Nuquin Papa yacnuëshquibidi choposh chështebimboecquid sanampamboec. ¹⁸ Adec chështebimboecquid sanampamboec choshobien mayan bëda utsin matses tabadacno cuëte dëtsisadaid isquidquio icquid nidaid masiabudboedën tauite dapa dayunuëshquio choshon comapenec cuëdquin chuiposh. —Shancuinbimboecquid uba caid nidaidën caniquid chështebimboecquidën mëtebanquin sandoshon buanshun uba tish-tishten sando ¹⁹⁻²⁰ —caquien uba caid mëtebanquin sandoshon taën tin-tincaquin tish-tishaquien ënë nuamboshë yec piumbo icposh. —Intac nuambo icnuc Nuquin Papan cuidendac —camenuen aden ismeposhi. Adomboen uesquin cuidnuen Nuquin Papan matses icsambo icquido cho-chomendac. Édusaden yacno cho-chomeshun ashunquio Nuquin Papan cuidac matsesën intac nuamboshë chididiquec nua mauanendac. Acte nua chëuëdactipamboec cabayon mapi yaction intac chëuëdsho isombi. Ènapenquio quidometodos 300ted cactiombi cuësquec nuamboshë matsesën intac chëuëdsho isombi ushquin isacbimboen. —Aden Nuquin Papan abi chieshënquido cuidendac —quequin ismeposhi.

15

Nuquin Papan cuidtequid 7tedbidi nabanaid

¹ Adshumbic Nuquin Papan cuidte tantiamenuen Nuquin Papa yacnoshon dacuëdampamboecnuc padpiden ismeposhi. Adoac matses natiamequin cuidquido dacuëdampambo icquido 7tedi icsho ispombi. Mayan bëdaboniosh. —Aidon ambi chiacpadomboen ënquimbi matses icsaido cuidsho isash Nuquin Papa nëish bëdanendac —quequin tantiaquin ispombi.

² Nuquin Papa yacnobidi chian dapa icposh. Actepenquio yec actectesëcquio isadposh. —Nuquin Papa icsaquido cuidquidquio nec —camenuenec tied nëdënquiacbimboec aid bëntse isadposh. Aid cuëmambi Esus tantiaquido tabadposh. Satanasën namiaidën acte uquëducuësh choboedën chuiquid dapa icsamboshë icquidën: —Yuanu —cauidaido niosh. Chuiquid dapa icsamboshë icquidbimboecnuc nacnenaid tantiatiapimbo icquido aido niosh. Adecbidi icsamboshë icquidën ancabudacpaden nainquio yec aton yuabo ictiapimbo yec aid cuëmëdaidbimboecquid 666 dada uaquin siadmetiapimbo icquido niosh. Adec abi tantiaquido icsho Nuquin Papan meniaid ten-tencate cuëdëmec cuëdëncuededposh. ³ Nuquin Papan namiaid Moises: —Nuquin Papan nac ëbi chieshënquidon ëbi cuesun secainquio icposh —quec cuëdëmpampicpadec cuëdëncuededposh. Nuquin Papa

bëdamboen ismenuec abided cuidadec unësaidquio Esus aton Papabëdta tantiec cuëdëncuededposh naden chiec.

—Nadatiambo icquin nabanquidquio mibi nec, Papa.

Abitedimbo uaquidquio yec abitedishun Icbombo mibi nec, Papa.

Matsesën naid abitedi tantiaquidquio abimbo chuiquidquio mibi nec, Papa.

Mimbi naid bëdambo icnuc dacuëdampambo mibi iquec, Papa.

Nidaid utsi-utsiec yacno tabadquidon Icho icpampidi adecbidi matses abitedishun Icbombo mibi nec.

⁴ Matses abitedishun: “Nuquin Icho dacuëdampambo icquid neque.

Ambi chiacpadomboen nanuna,” mibi capashun, Papa.

Mibiuidtsëqui icsaisambo nec, Papa.

Adquid icquin mimbi chiacpadomboen icsaquido cuidquimbi bëdambo icquido mimbi bëdamboen isendac.

Adsho isun nidaid utsi-utsiec yacno tabadquidon matses abitedishun: “Mibi bëdambo iquec. Con Icbombo mibi nec,” caindac

—quec cuëdëncuededposh Esus tantiaquido.

⁵ Adshun isquien isadaidbon: “Nuquin Papa tabadte nec,” quequin shubuampicpadquid shubu shëcniacchobi icposh. Nuquin Papa tabadac-

nombo tantiamenuen aden ismeposhi. ⁶ Auëshquio Nuquin Papan chiac-

padec ëmbi isboedo mayan bëdabo 7tedi cho-choposh. Matses icsaquido cuidquido niosh aido. —Nuquin Papan yuabombo nec —camenuc dashcute

nac-nacquio icquid dasiuidcuededash dashcute bëshpiu-bëshpiumbo icquid shictonquecuededposh. ⁷ Adsho isun Nuquin Papabëd icquid dadanobi

ëshëcquid abentsëcshun maspanëmpi shocosh piu nacnenaid icbo-icboen menebamposh. Unëstiapimbo icquidën Nuquin Papan nëishënquioshon cuidte

cushtoaid maspanëmpi niosh. ⁸ Adnubien Nuquin Papa tabadaid nuntanuësh pushud-pushudpambo icposh. Adec dacuëdampamboecsho isash

Nuquin Papa chuinuëc puduedtiapimbo icposh. Ènquin cuidambi pad-

pidëc Nuquin Papa yacno puduednushi niosh. —Abitedishun Icbombo yec dacuëdampambo icquidën ambi tantiacpadomboen icsaquido uesquin

cuidendac utsibon: “Chën,” cadtiapimbo icquin —camenuen aden ismeposhi.

16

Maspanëmpin cushtoaid

¹ Adec pushudacnuësh abi tabadacnuësh Nuquin Papambo cuëdsho tantiombi. Maspanëmpi bedboedo chuiposh. —Matses yacno nidshun mas-

panëmpin cushtoaid chiuinquin matses uesquin cuidta —quequin chuiposh Nuquin Papan.

² Adoaquien abentsëcshun ambi bedboed maspanëmpin cushtoaid nidaidënshun chiuimposh. Adnubien ëmbi isboed acte uquëducuësh choboed

chuiquid dapa icsamboshë icquidën yuaidotedi natiambo yec chiuë-

chiuëtsëcquio yancuededposh. Satanasën namiaidquio icsamboshë icquid tantiaquin abibimboecnuc nacnenaid tantiaquido yec aton icbo cuëmëdquid

dada uaquin siadmiaido icsho aden cuidposh.

³ Adnubien utsin ambi bedboed maspanëmpin cushtoaid chian dapa mad caid nëchiuimposh. Adoaquien aid chian mad caid intacac. Ènden unësaidën intacbi-

pamboecnuc intacuac. Intacuidpambo icnuc acten icquidtedi unësbudneposh.

⁴ Adnubien utsintsen ambi bedboed maspanëmpin cushtoaid acte utsitedi nëchiuimbeneposh. Nëchiuimbeniac aidtsen intacposh. ⁵ Adsho isun mayan bëda utsin acte dayun uaquidën Nuquin Papa chuiposh.

—Aden mimbi cuidsho isun: “Mibi bédamboshë iquec,” caimbi, Papa.

Nidaid uabi yec ëndenquimboshë icpampidi mibi nec.

Nëbi adquid yec mibi nibédantiapimbo icquid nec.

Adquid yec abitedishun Icbombo mibi nec.

Icsaisa icquin mimbi chiacpadomboenuidi mimbi naic.

Muesambo mibi nec.

Aden mimbi chiacpadomboen mimbi icsaquido cuidec, Papa.

6 “Ëmbi chiaid chuibanquidobëdta ëbi tantiaquido nua intac icnuc chieshëmëñquidon cuesun secabudnepondash,” qeshun

cuesun secanquido cuidquin mimbi aton acte intacuashunacsho isun: “Mibi bédamboshë iquec,” caimbi, Papa

—queposh mayan bëda acte dayun uaquid.

7 Aden acte dayun uaquidën chuisho tantias Nuquin Papa tantiaquin nëish pichicate dapa yacnuëshquio utsi cuëdposh. —Ai, abimbo caic, Papa. Abitedishun Icbombo icquin comapenen tantiaquidquio mibi nec. Adquid icquin matsësën naidtedi mimbi tantiec, Papa. Icsambo icquidon naid abimbo chuiquin mimbi aido cuidec. Adsho isun: “Mibi bédamboshë iquec,” Papa, caimbi —queposh mayan bëda utsi.

8 Adnubien utsintsen ambi bedboed maspanëmpi cushtoaid badiadën ushë bëchiuimposh. Adoaquien Nuquin Papan namiacpadecc matses badedbadedquiec ushën pichiebudneposh. ⁹ Adec pichiebudneshumbien Nuquin Papa chushcabededposh. —Icsauidequi icsho Nuquin Papan nuqui cuid-eque. Nuqui icsaid ënash ambi chiacpadecc bédamboec tabadnuna —quetiadquidëmbi chieshënquin abi cuidquidquio Nuquin Papambo chushcabededposh.

10 Adnubien utsintsen ambi bedboed maspanëmpin cushtoaid chiuim-benequin acte uguëducuësh choboed chuiquid dapa icsamboshë icquid ambi namiaidobëd tabadacno chiuimbeneposh. Adoaquien inchëshpish inchëshquio yec. Badiadenquio icposh. Adsho isash matses abitedi natiambo dacuëdcuedeposh. ¹¹ Adec dacuëdcuedec: —Ambi chiaid niac-niacsho Nuquin Papan nuqui cuideque. Nuqui icsaid ënash ambi chiacpadecc tabad-nuna —quetiadquidëmbi: —Natiambo chiuëmianec Nuquin Papa icsambo iquec —qeshun Nuquin Papa chushcabededposh.

12 Adnubien utsintsen ambi bedboed maspanëmpin cushtoaid acte dapa Eupëdates caid nëchiuimposh. Adoaquien Eupëdates caid acte nua icboëdi nibëdquio yec uesadposh. Ma matses utsi-utsiec aton chuiquid dapabobëdi tsidadash Esus chedo cuesun secanuec ushë choacmiuësh choquin ma potenequin aden acte uesadmeposh.

13 Adec aid matses cho-choabi icnuc ushë choacmishun chometequidëmpi naden ismeposhi. Coqeshbimboecquid podobitsi icsa 3tedi ana shëcuënuësh cho-chosho ispombi. Nëidic nisi dapabimboecquid Satanasën ana shëcuënuësh choquid. Nëidic acte uguëducuësh choboed chuiquid dapa icsamboshë icquidën ana shëcuënuësh choquid. Nëidic nidaid shëcuënuësh choboedën Satanasën muauamequin oncameboedën ana shëcuënuësh choquid. Aidtedi chosho isombi. ¹⁴ Satanasën yuabo icquin comapenen tantiaquin nacnenquido niosh. Matses utsi-utsien abi chuiquid dapabobëdtabi namenuec niosh. —Aidon namiac chuiquid dapabo abitedi aton yuabobëdi tsidadash ushë choacmiuëshquio cho-choendac. Nuquin Papa chieshënquin Esus chedo cuesun secanuec adec cho-choendac. Nuquin Papan tantiacpadënquiobi adendac —camenuc mayan bëdan aden ismeposhi.

¹⁵ Adnubien Esusquo cuëdposh. —Tantia. Chuinu. Mimbi: “Nëbimbobi aid choec,” cacmaidquieni choendac. Ushenquo yacbimboen ëbi ënenquo icquin tantiec: “Nëbien Esus chochitec. Choshon nuqui icsaid abitedi chuiquin cuidnush. Bëdamboec tabadnuna,” quec bëdamboec tabadta. “Nëbi nidnu. Nid,” cac: “Ai, con na ënden nacnombique. Baded nid,” quiacbimboec icta ëbi cainec —queposh Esus.

¹⁶ Adnubimbi coqueshbimboecquid podobitsi icsabon namiac matses utsibo chuiquid dapabo abitedi aton sondadochedobëdi cho-chosho ispoc. Nidaid Isadaid caid yacno macuësh icsho isadaidbon onqueten Admaquedon caid yacno cho-choposh Esus chedo cuesun secanuec.

¹⁷ Adnubien maspanëmpi bedboed utsintsen ambembi chiuinguin Nuquin Papan cuidte ënquimbi ismeposh. Ambembi chiuinubien abi tabadacnuëshquo Nuquin Papa cuëdposh. —Padi. Nëbi ëmbi tantiacpadomboen ënquimbi cuidec —queposh. ¹⁸ Adnubien abu bedbedquetanepamboec abu tesquianenuec natiamboshë shëc-shëcquemboec nidaid uëdë-uëdëquiamposh. Nuquin Papan tauamboen matses uambi adec nidaid uëdëquiambo. Bëdiactëc nidaid uëdëquedenedi acquimboec uëdëquiamposh. ¹⁹ Adnubien matses dadpen yacno Babidonia caid yacnuësh nidaid abichobi icboedi 3tedi yanec tiadbudneposh. Aden Nuquin Papan: —Anocquido icsamboshë icquido nec —quequin Babidonia caid yacnocquido uesquin cuidquioposh. Adec nidaid uëdëquenubi nidaid utsi-utsiec yacno shubu dadpen icquid yacno-yacnomboec shubu abitedi uesadec chimeshadbudneposh. ²⁰ Nidaid uëdëquenubi chian dapa mad caid yacno acte nënantan nidaid icquid abitedimbo nibëdambudneposh. Adecbidi macuësh abitedi nibëdambudneposh. ²¹ Abucuëshquo ue dapa choacimboc ue tsasi nuacquid dapa guidos 50 icnuc yuë tanaid dadpenquo paëdbudnequimbi matses tish-tishbudneposh. Aden ue tsasi dapan mëyansho isun padenquo ictiadquidëmbi matsesën Nuquin Papa chushcabededposh. —Nuqui icsaid ënshun Esus tantianuna —quetiadquidëmbi chushcabededposh. —Adquido iquendac —quequin ushquin isacimbocnuc aden ismeposhi.

17

Chido chishpidabimboecquid ismiaid

¹ Adshumbic maspanëmpin icquid chiuimboedën abentsëcshun chuiamposhi. —Isec cho. Mimbi isboed Babidonia caid yacnocquido cuidte mibi ismenu. “Babidonia caid yacnocquido matses utsibo dadpenquo icsamete bunquido nec,” quequin chido chishpidabimboecquid acte dapa bëntse tsadsho mibi ismenu. “Adquid icsho Nuquin Papan cuidquiendac,” quequin mibi ismenu. ² Aido icsamboshë iquec. Matses utsi-utsien abi chuiquid dapabobëdta uisma uanten danoshcachimboen Nuquin Papambo tantiamenquo icquin ambi chiaid niac-niacmequioposh. Aido cuidsho isec cho —queposh.

³ Adshumbic ushquin isacimbocnuc ismeposhi. Nuquin Papan Mayanën tantiamiac masiuidquo yacno shubu nibëdacnombo chido aben icquid dapa catsadsho ispombi. Aben icquid piumboshë icposh. Aidën dadan: —Nuquin Papa caid nibëdquo iquec —quequin uesquin dada uapaidquo icposh. Aton mapi sietetedi icnuc aton pais 10tedi icposh. —Mimbi isboed acte uquëducuësh choboed chuiquid icsamboshë icquidquo nec —quequin aden aben icquid ismeposhi. ⁴ Aid catsadquid chido dashcute piumbo icquidbëd umumbo icquid dasiuidposh. Shocosh piu nacnenaid chedo cuënotempi nac-nacquo icquid chedo payuec aibidi mësiuidposh. Dëshote bëdambo icquid sanamposh. Aden sanansho

dêshote anisquin isaquien icsambo icquiduidquo icposh. —Chido chishpidabimboec Babidonia caid yacnocquido icsamboshê iquec. Uisma uanten danoshcabcimboen: “Nuquin Papa caid nibêdquiec,” quequin tantiamenuen matses utsibo dadpenquo icsamequidac —camenuen aden ismeposhi. ⁵ Adshun isquien aid chido abi tantiamete abi cuëmêdquid bêtanteteno bêdada uadac. —Babidonia yacnocquido bêdambo icquido damianquidi icsamboen tabadmequido nec —quequin dada uaid icposh. ⁶ Aid chido paëmbo icquid acacimboec Esus tantiaquidon intac acash tantiadenuio yamposh. —Babidonia caid yacnocquidon Esus tantiaquido dadpen cuesun secaindac —quequin tantiamenuen aden ismeposhi. Dacuêdampamboecsho isash: —¿Mitsipadquiopequini ique? —quebudquioibi.

⁷ Adbudquioshobini aid mayan bêdan: —“Tantiadenuio iquec,” ¿quecta ique? Tantia. Chido chishpidabêdta abi catsadaid aben icquid chuinu. ⁸ Mimbi isboed aben icquid icsamboshê icquid ictonedi nêbi nibêdec. Yuecshun Satanasën abi tabadacnoshon padpiden chomendac. Adoacsho yuecshun Nuquin Papan chian anêdênquiacono nêsecaindac. Aden cuidabi Satanasën chomebocsho isun Nuquin Papa tantiesabon: “Comapenen tantiaquidien nechitec. Matses nibêdanêdaidi uincuenashien choachitosh. Aidi tantianu,” caindac. Matses uabi icquin Nuquin Papan: “Ëbi tantiaquido iquendac,” cacmaidonquo adoendac —queposh mayan bêda.

⁹ Adshumbic padpiden chuiposhi. —Tantia. Ëmbi chuiboed bêdamboen tantiamenuen chuinu. Naden tantiamenuen aben icquidên mapi 7tedi icquid mibi ismiombi. “Babidonia caid yacno matses icsa uaquido tabadacno macuêsh dapa 7tedi iquec,” quequin tantiamequimbi: “Chuiquid dapabo 7tedbidi iquendac,” camenuen aid mapi 7tedi mibi ismiombi. ¹⁰ Aid chuiquid dapabo 5tedi nibêdnubi utsi abi iquec. Nêbi aidên aton matses namec. Utsitsen choendac. Choshon aton matses nametantsequi badedquo nibêdanendac. ¹¹ Nibêdanêdaidi choashic ëmbi ismeboed acte uquêducuêsh chobedo chuiquid dapa icsamboshê icquidquo iquendac. Aidên ëmbi chuiboedo chuiquid dapabo 7tedishun namiacimboen aton matses icsamboenshê namendac. Adoacsho isun Nuquin Papan icsaido cuidquiacono nêsecaindac —queposh mayan bêda.

¹² Adashic abi onquec: —Naden tantiamenuen aben icquidên pais 10tedi icquid mibi ismiombi. Chuiquid dapa utsibo 10tedi iquendac. Nêbi aton matses namiabi iquec. Padabi. Adquido yanendac. Satanasën acte yacnuêsh chobedo bêdta chuiquid dapabo icmiac matses icsamboenshê namiash yuec tabadabi badedquo nibêdanendac. ¹³ Nibêdanabi icquin aidon acte uquêducuêsh chobedo abi chuiquid dapambo icmendac. “Aidên namiac abi tantiaquidobêdta Esus nuquifedishun cuesun secatsiac nibêdquo icnuc,” qeshun aden icsamboshê icquid abi chuiquid dapa icmendac. ¹⁴ Aden Esus chieshênquidon: “Chieshtomenu,” cac Esusën yuaido abi tantiaquidotedi chieshtoenquo iquendac. Aton Icho Esusën abided cuidadec unêsaidên namiac chieshtoenquo iquendac. Aden abi tantiaquidobêdta chieshênquin cuesun secanuec cho-chosho isun Esusëmbi cuesun secaindac. “Ëbien matsesën Icbomoc nec,” quetanquin adoendac —queposh mayan bêda.

¹⁵ Adashic padpidec: —“Nidaid utsi-utsiec yacno tabadquido dadpenquo Babidonia caid yacnocquidon icsamendac,” quequin tantiamenuen chido chishpidabimboecquid acte dapa bëntse tsadsho mibi ismiombi. ¹⁶ Aden Babidonia caid yacnocquidon nasho isun mimbi isboed chuiquid dapa icsamboshê icquidên abêdta chuiquid 10tedi icquidbêdta Babidonia caid yacnocquido chieshênendac. Aden chieshênquin cuesun secatanquin shububêdtabi nêdêncaindac nibêdquiec nuc. ¹⁷ “Ma Babidonia caid yac-

nocquido uesquin cuidnu,” quequin ambi tantiacpadomboen Nuquin Papan aden acte uquëducuësh choboed chedo chuiquid dapabo icmendac. ¹⁸ “Matses utsi-utsien chuiquid dapabo aton matsesbëdtabi yuaquid abi iquec,” quequin mibi chido chishpidabimboecquid nëbi ismiombi —quequin mayan bëdan chuiposhi.

18

Nuquin Papan Babidonia caid yacnocquido cuidaid

¹ Aden Babidonia yacnocquido cuidte chuisho tantiaboshombic mayan bëda utsi Nuquin Papa yacnuësh abucuësh budsho ispombi. Nuquin Papan icmiacpadquid mayan bëdabo chuiquid dapa yec bëchamauanquiecposh. ² Choshombic nua cuëdquin chuiposh. —Babidonia caid yacnocquido Nuquin Papan uesquin cuidquiendac. Aden cuidac matses nibëdquiecnuc abi tabadtenecnombo podobitsiuidpambo tabadendac. Ambobidi edesteuidquo tabadendac. ³ Babidonia caid yacnocquidon matses utsibo abitedimbo abi chuiquid dapabobëdta Nuquin Papa tantiamenquio icquin icsamequiosh. Adembidi abi bunaid bednuen matses utsibo piucquid dadpen menedenequin Nuquin Papa tantiamenquio icposh. Adsho Nuquin Papan cuidquiendac —quequin mayan bëdabon chuiposhi. ⁴ Adnubien Nuquin Papa abucuësh onqueposh. —Tantia, Esus tantiaquido. Mibitsen chuinu. Babidonia caid yacnocquidon nacpadomboen nainda. “Aidobëdi icsasho ëbitsen cuidquionoshe,” qeshun aidon namiacpadomboen nainda. Auëshquio niqueta —qesho tantiombi. ⁵ Nuquin Papa yacnoshombidi utsin chuiposh. —Ënëdenquio yec icsauidequi icsho isun ambi tantiacpadomboen Nuquin Papan cuidquiendac. ⁶ Babidonia caid yacnocquidon matses utsibo dadpenquio icsamequiosh. Aden icsamequido icsho Nuquin Papan nëbi nëishquioshon uesquin cuidquiopashun —queposh mayan bëda. ⁷ Adashic abi onquec: —Babidonia caid yacnocquido cuidequido nec. Ambi naiduidi naquin aton na dadpenquio bedash: “Aidtedi dayun uaic bëdambo iquebi,” quepec Nuquin Papan cuidte tantienquio yequi. Adsho tantiashun: “Natiambo icnuc comapenen cuidquiopashun,” caimbi. Otacquo tantiec: “Nuquin matses yuabo dadpen icnuc nuqui bëdamboec tabadec. Chido niente bënë unësaid mëyadacimboec mëyadtiapimbo nuqui iquendac,” quechitequien iquec Babidonia caid yacnocquido Nuquin Papa tantiatiapimbo yec. ⁸ Adsho ambi: “Nëbi ëbi cuidec,” cacmaidënuquo cuidendac. Nuquin Papanquio abitedishun Icbombo icquin comapenen tantiaquin nacenquidquio icquin badedquio cuidquiendac. Aden dadpenquio unës uabudniacsho isash natiambo sedenquiecuededendac. Aton pete nibëdquiecnuc natia bunendac. Aton shububëdi dadpenquio nêdënuquendac —queposh mayan bëda.

⁹ Adashic abi onquec: —Adec Babidonia yacnuësh nêdënuqec pushudtonesho isash: “Aidon namiacpadomboen Nuquin Papa tantienquio icquin con na dadpen bedtenembi,” quequin chuiquid dapabon nadambocain sedencabededendac. ¹⁰ “Tantia. Nuqui tantiaido sidquebudneque,” quec uinte paëdtampamboec dacuëdtanash uanoshon isec tabadendac. Adec tabadec: “Aido unësquimboshë iquec. Aton matses aton yuabobëdi dadpenquio icpadenec. Ambi dayun uaid dadpenquio icpadenec. Matses utsibo dadpen namepadenec. Aido tantiac unësquimboshë iquec. Badedquio uesquin cuidquiopac,” quec sedenquiecuededendac Babidonia caid yacnocquido tantiec —queposh mayan bëda.

¹¹ Adashic abi onquec: —Babidonia caid yacnocquido aden cuidacsho isash utsibotsen: “Ëmbi meniaid bedshun piucquid dadpen menedenebi. Nëbi adquid nibëdquiec. ¿Tsuentsimbini ëmbi meniaid cuidquin piucquid

menepatsiashba?” quec sedenquecuededendac. ¹² Aidobidi: “Nadquid Babidonia caid yacnocquido menequin piucquid dadpen bedtenembi. Nèidic shocosh piu. Nèidic shocoshquo. Nèidic casèdubimboecquid cuènote bédambo icquid. Nèidic dashcute bédambo icquid. Nèidic dashcute piumbo icquid. Nèidic dashcute umumbo icquid. Nèidic sèntebimboecquid nacnenaid. Nèidic aben icquid edepanten shèta nacnenaid. Nèidic cuète utsi bédaidquio nacnenaid. Nèidic shocosh utsi nacnenaid. Nèidic cuènote nac-nacquo icquid nacnenaid. Piucquid dadpen menequin adquidtedi Babidonia caid yacnocquidon bedpadenec. ¹³ Utsitsen dadpen bedpadenec. Nèidic batambo icquid sabimboecquid. Nèidic bédambo nuadte. Nèidic bédambo nuadec danoshquete. Nèidic acte paèmbo icquid. Nèidic bèchi. Nèidic pan nacentenquid. Nèidic nèish yua baca caid. Nèidic nèish yua utsi obca caid. Nèidic nèish yua cabayo caid. Nèidic matses antsasho cabayon nimbanquin buante. Nèidic ambi chonoa uatequido matses ambi ampequin bedàido dadpen. Babidonia caid yacnocquidon aidtedi dadpenquio bedtenesho aton piucquid dadpen bedpadenembi,” quependac nidaid utsi-utsiec yacno tabadquido –queposh mayan bèda.

¹⁴ Adashic abi onquec: –Abi piucquid menedenedèn dayun uaid nibèdanesho isash: “Aid matses bunaidquio ambi dayun uaid pete nibèdquiec. Ambi dayun uaid dashcute bédambo icquidbèd aton na utsi dadpen abitedi nibèdquiec,” ¹⁵ quiash natiambo dacuèdec uanoshon isec tabadec sedenquecuededendac abi piucquid menedenedo tantiec. ¹⁶ “Aid matses tantiac unèsquimboshè iquec. Matses dadpen yuaquin matses dadpen namepadenec. Aton matses dashcute bédambo icquid dasiuidcuededtenec. Utsi-utsiec dashcute piumbo icquid dasiuidnubi utsi-utsiec dashcute umumbo icquid dasiuidcuededtenec. Utsibic casèdubimboecquid shocosh piu nacnenaid payudenec. Utsibic casèdubimboecquid utsi payuec mèsiuidtenec. Adec: ‘Con na dadpenquio icnuc bédamboec tabadebi,’ quepadenec Babidonia caid yacnocquido. ¹⁷ Adsho isun Nuquin Papan abi ushèmbi cuidquiãc ambi dayun uaidbèd aid matses badedquio nibèdanac,” quec sedenquecuededendac abi piucquid menedenedo tantiec. Adechidi nidaid utsin icquidotsen sedenquecuededendac. Nèidic cano dapa dancha icbo. Nèidic dancha icbobèd nidquido aton yuabo. Nèidic icbo piucquid meniash dancha antabèdtoquido. Nèidic nuècquid bedshun piucquid bednuen menequido. Aidtedi uanoshon isec sedenquecuededendac. ¹⁸ Nèdènquec pushudtonesho uanoshon isash: “Adquido utsi nibèdec,” ¹⁹ quiash natiaguec sedenquecuededendac. Adec shubiec: “Èbipadquid dancha icbon bèaidtedi bedshun piucquid dadpen menedenedo tantiac unèsquimboshè iquec. Is. Cuidquiãc badedquio nibèdanaque,” quec sedenquecuededendac –queposh mayan bèda.

²⁰ Adashic mayan bèdabidi: –Èbien cuishonquendac. “Nuquin Papa yacno tabadquidotsen èbèdi cuishonque,” quequin chiendambi. Esus tantiaquido chuiquinc Esusbèd icquidombo chuiquinc Nuquin Papan chiaid chuibanquido chuiquinc caquin: “Cuishonquec tabadnuna. Mibi chieshènquin nati-amiacpadomboen mibi chieshènquido Nuquin Papan uesquin cuidquioshe,” quequin chiendambi –queposh mayan bèda.

²¹ Adnubien mayan bèda utsin uidènquio icquidènquio nidaid moco nuacquid dapa yuèmboshè icquid cadotanquin acquimboen acte nènebidaanquimbi chuiposh. –Èmbi acquimboen nènebocpadomboen Nuquin Papan Babidonia caid yacnocquido uesquin cuidquiendac nibèdquiecnc. ²² Adoac aido ictenecombo nadimbo iquendac. Ten-tencate ten-tencainquio iquendac. Utsibobic cuèdènquio iquendac. Utsibombic shoncate shoncainquio iquendac. Cuète chèshun nacnenquio iquendac.

Piacbo macuesenquio iquendac. Nadimboshë iquendac. ²³ Tabote taboadaid nibëdendac. Dada aton chido ambi nëbi bedaidbëdi mamënenquio iquendac. Nibëdec. Nadimboshë iquendac. Adsho isash utsibo: “Babidonia caid yacnocquidon aton piucquid bednuen comapenen tantiaquin ambi naiduidi napadenec. Aden naquin ambi icsamboen tantiaid matses utsibo abitedi adembidi tantiaequin icsamepadenec,” quendac. ²⁴ Nuquin Papan cuidabi icnuc aden icsamequin Babidonia caid yacnocquidon Nuquin Papa chieshëquin ambi chiaid chuibanquidobëdtabi Esus tantiaquido dadpen cuesun secaindac. Adsho isun aidon yuaido matses utsibon adembidi Esus tantiaquido cuesun secaindac. Adsho isun Nuquin Papan uesquin cuidquendac –queposh mayan bëda.

19

Chieshëquido cuidacsho isash cuishonquiaid

¹ Aden mayan bëdan Nuquin Papan Babidonia caid yacnocquido cuidte chuisho tantiombi. Adshun tantiaquien Nuquin Papa yacnuëshquio Esus tantiaquido dadpenquioshë comapenec cuëdëncuededposh.

–Nuquin Papa bëdamboshë iquec.

Aiduidtsëqui matses abitedishun Icbombo nec.

Aton Mado abided cuidadec unësaid tantiaasho matses bëdamboen isec.

² Muesambo icquin ambi chiacpadomboen naquidquio nec.

Abi tantiesabo ënëdenquio yec icsauidequi icsho cuidquidquio nec.

Adquid icquin: “Icsamboshë iquec,” quequin matses utsibo icsamequido Babidonia caid yacnocquido cuidquiosh.

Nuquipadquid Esus tantiaquido cuesun secacsho isun cuidquiosh
–quec cuëdëncuededposh.

³ Adashic padpidemboec:

–Nuquin Papa bëdamboshë iquec.

Is. Pushud-pushudpambo icnuc nëdëncuquin Babidonia caid yacnocquido uesquin cuidquiosh

–quec cuëdëncuededposh Esus tantiaquido dadpenquioshë.

⁴ Adsho tantiaash Nuquin Papa chuiquid dapan tsadten tsadnuc abi dacuenadec tabadquido: –Nuquin Papa Nuquin Icho nec –quequin ismenuec danëshën tinquebudcuededposh. Adec tinquebudcuededequi: –Abimbo caic. Nuquin Papa bëdambo iquec –quecuededposh dadanobi ëshëcquido 4tedi icquido tsusiobo 24tedi icquidobëdi. ⁵ Adashic auëshquiobidi abentsëc cuëdposh.

–Nuquin Papa matses uaquidquio yec bëdamboshë iquec, canuna.

Nuquibi abi tantiaquidtedishun: “Nuquin Papa bëdamboshë iquec,” canuna.

Aton yuabo icquin nuquitedishun adonona.

Chuiquid dapabo aton yuabobëd icquimbi nuquitedishun: “Nuquin Papa bëdambo iquec,” canuna

–queposh.

Esusën abi tantiaquido beduante chiaid

⁶ Adsho tantiaash abu tesquianiabimboec acte nua chododoquiacbimboec Nuquin Papa yacnocquido dadpenquio cuëdëncuededposh.

–Abi chieshëquidon Nuquin Papa dëniactiapimbo iquendac.

Ambentsëqui abitedimbo namendac.

Nuquin Papa bëdamboshë iquec.

⁷ Nuquin Papa tantiec cuishonquenuna. Nuquin Papa bëdamboshë iquec.

Dadan aton chido buntacquio beduanacimboen abided cuidadec unësaid Esusën abi tantiaquido beduanshun abi yacno tabadmendac.

Bënën beduanabi yac chido: “Con bënën nëbi beduanebi,” quiaſh nacnemëdquiacbimboec:

“Nëbien con Icho chochitec,”

quiaſh Esus tantiaquido bëdamboec tabadec.

⁸ Abi tantiaſho Nuquin Papan bëdamboen isaïdo yec abi icſaïd ënaſh:

“Nëen con Icho chochitec,” quiaſh bëdamboec tabadec.

Aden abi tantiaſho Esusën daſhcute chuca uſhumbo icquid daſiuinachimboen abiteđi icſaiſa icmendac
—quec comapenec cuëđëncuededpoſh.

⁹ Adnubi mayan bëđan chuiſoapoſhi. —Ëmbi chuibocpadomboen dada uata. “Iſadaïdbo aton chido bedquin aton matſes cho-chomiſh pemec bëdamboec tabadquid. Adembidi abi tantiaquido Esusën: ‘Cho,’ cac abi yacno nidaniſh cuiſhonquequic tabadendac,” quequin dada uata. Abimbo caïmbi. Nuquin Papan chiaïdquic chieç nebi —quepoſh mayan bëđa.

¹⁰ Adſho tantiaſhini Nuquin Icho danec iſmenuec danëſhën tinquebuduidpoc. Adſhobini: —Ëbi aden iſmenda. Nuquin Papauïdtsëqui aden iſmeta. Mibipadquid Nuquin Papan yuabidi nebiçue. Nuquin Papan Mayanën Esus tantiamequin Nuquin Papan chiaïd dada uamepampic. Aiđëmbidi namiac mibipadquidobëđ Esusën yua nebiçue. Ëbi aden iſmenda —quepoſh mayan bëđa.

Cabayo uſhu catsadquid bëdamboshë icquid

¹¹ Adſhumbic abuc iſquin Nuquin Papa yacno ſhëcnepamboacſho iſpombi. Adſhun iſquien auëſhquio cabayo uſhumbo icquid catsadec chuiquid dapambo chopoſh. Adſho iſun: —Abi tantiaquidobëđ cuëſhëđtiapimbo icquid yec ambi chiacpadomboen naquidquio Esusquio nec —quequin tantiombi. Ambi chiacpadomboen icſaïdo cuidquidquio icquin icſaïdo cuesun ſecanuec niſoſh. ¹² —Matſeſën ompodëmëđtiapimbo icquidquio nec —camenuc cuëte iſquidquio icquidbimboec ëſhë icpoſh. —Abiteđimbo chuiquid dapambo nebi —quec mauete dadpen mauepoſh. Abi cuëmëđquid abi bëđada uadaïd tantiađenquio icpoſh. Utsibon tantiatiapimbo icnu ambentſëqui tantiate niſoſh. —Nuquin Papabëđtan Esusën naidteđimbo matſeſën tantiatiapimbo iquec —camenuen adeç bëđada uadaïd iſmepoſhi. ¹³ Abi cuëmëđquid utſiembi tantiatſëccoc. —Nuquin Papapadquidquio yec abi tantiamanquid nec —quequin cuënaïd niſoſh. Aton daſhcute bëntſe icquid cuidaïdën intaquën punachimboec piumboshë iſadpoſh. —Abi tantieſabo cuidquidquio nec —camenuen aden iſmepoſhi. ¹⁴ Esus bëyuc nidnuc abi tſibanec abi tantiaquidobëđ mayan bëđabo cabayo uſhucquidquidquio catsadcuëdedec cho-chopoſh. Içſaiſa icmiaïdo yec daſhcute uſhumbo icquid bëchish nibëđquidquio daſiuidcuëdedpoſh. ¹⁵ Abi bëyucquid ana ſhëcuënuëſhquio chëſhte cuënumbo icquid cuëſhquepoſh. —Ambi chiacpadomboen matſes icſaïdo abiteđi cuidquidquio Esus nec —camenuen aden iſmepoſhi. Adquid icquin nidaïd utſi-utſieç yacno tabadquido icſauiđequi icſho ueſquin cuesun ſecaindac. Nuquin Papan chiacpadomboen naquïn ſhancuinbimboecquid uba caïd nua ënë icnu tish-tiſhacchimboen nua intac icnu cuesun ſecaindac. ¹⁶ Aton daſhcute bëntſe icquidën abi cuëmëđquid utſi dada uaccōſh. —Abipadquid utſi nibëđnuc abiteđimbo chuiquid dapambo yec abiteđiſhun Icbombo nec —quequin dada uaccōſh. Aton bëuſudquid yacnombo adembidi dada uaccōſh.

¹⁷ Adnubien uſhë mëđucquio tabadquin mayan bëđa utſin edeſte chedo abuc cuen-cuenſho comapenec cuëđquin chuipoſh. —Nuquin Papan

cuidquin cuesun secaidon nami chec cho-cho. ¹⁸ Ëmbi chiacpadec cho-choshon matsesën nami mimbì nua tēpuisquin chendac nēidtedi. Nēidic matses utsi-utsien chuiquid dapabo. Nēidic sondado chuiquid dapabo. Nēidic dada cuesabo. Nēidic cabayo chedo abi catsadquidobēdtabi. Nēidic matses utsibo abitedimbo. Nēidic matses yuabo. Nēidic matses yuapenquo. Nēidic bacuēbo. Nēidic caniaido abitedi. Adquidtedi uesquin chec cho —quequin edeste chedo chuiposh. —Am̄bi tantiacpadomboen Nuquin Papan matses uesquin cuidquiendac —quequin aden ismeposhi.

¹⁹ Adshumbic mayan bēdan ismeboedo Esus chedo cuesun secanuec cho-chosho ispombi. Acte uquēducuēsh chochoed chuiquid dapa icsamboshē icquid chedo nidaid utsi-utsiec yacno tabadquido abi chuiquid dapa chedobēdi tsidadash cho-choposh coqueshbimboecquid podobitsi icsabon namiacpadec. —Cabayo ushumbo icquid catsadquid Esusquo abi tsibanquidobēdta cuesun secanu —caqui ²⁰ cuesun secadenquo icposh. Adshobien Esusën acte uquēducuēsh chochoed chuiquid dapa icsamboshē icquid bedposh. Adotanquimbic aid tantiamequid nidaid shēcuēnuēsh chochoed Satanasën oncamiaidtsen bedposh. Aid comapenen tantiaquin ismequin muaquin abi chuiquid dapan icsamboshē icquidēn chiacpadomboen matses namequidquo niosh. Adec muaquin abi chuiquid dapabimboecnuc nacnemequidtsen niosh. Adecbidi: —Ëbi chuiquidēn yuabo nec —quequin matses dadpen bēsiadmequid niosh. Adec icsambanquidquo icsho bedposh. Abi chuiquid dapabēdta bedshun unēs uabi chian dapa ēnēdenquo yec anēdēnquequid icsamboshē nuadquidquo nēsēcāposh. ²¹ Adshumbic Esusën ana shēcuēnuēsh chēshte cuēnumbo icquid cueshquequidēn: —Ëbi chieshēnquidotedi unēsta —caquien cho-chochoed utsibo abitedi unēsbudneposh. Adsho isun caimboedon edeste chedon nua-nuaic tēpuisquin matsesën nami chebededposh. —Aden Esusën abi chieshēnquido nibēdamendac —camenuen aden ismeposhi.

20

Satanas uidēn uaid

¹ Adshumbic padpiden ismeoaposhi. Adoac mayan bēda utsi Nuquin Papan tabadacnuēsh budsho ispombi. Podobitsi icsabo Satanasën yuabo shēcuēn tabadacno bētashaid chictēbēdta shocosh bucubimboecnuc nacnenaid dapa sanamposh. ² Adshumbic Eba icsamenuec nisipampid Satanasquo bedposh. Bedtanquimbic shocosh bucubimboecnuc nacnenaidēn ambì sanamboedēn uidēn uaposh. ³ Uidēn uatanquimbic aton yuabo uidēn uacno shēcuē aneposh. Adotanquimbic shēcuē bētashquioposh puđuentiapimbo icnuc. Seta dadpenquo 1000tedi matameshun bētashte chicshun Satanas cuemenuen adoposh. —Aden seta 1000tedi matamiabi icquin abi uidēn uactedembi matses muauaquin icsametiapimbo iquec —queshun chicten bidiacquin uidēn uaqioposh. Aden ismeposhi.

⁴ Adshumbic utsitsen ismeoaposhi. Adoac chuiquidēn tsadten icho-icboec chuiquid dapabo tabadsho ispombi. Esus tantiaquido neposh. Aido Nuquin Papan icmiacpadquid abimbo chuiquido icquin Esusbēdtambi matsesën naid abimbo chuibamposh. Aden matsēs bēdamboen nameposh. Satanas uidēn uacpadembi seta 1000tedi matamequin adoposh. Aido utsi-utsien mapi butiaido uincuemiaindo neposh. Aido Esus tantiaquin acte uquēducuēsh chochoed chuiquid dapabēdta abibimboecnuc nacnenaid tantiapimbo icquido neposh. Adecbidi: —Aidēn yua nebi —quec aid chuiquid icsamboshē icquid cuēmēquid dada uadec bēsiadiapimbo icquido niosh. Utsibic mēsiadiapimbo icquido niosh. Adquido icsho icsamboshē icquidon cuesun secaido niosh. Aido Nuquin Papan uincuemiāc tabadposh. ⁵ Unēsaidotedi

uincuemiambo icposh. Nuquin Papan ambi tantiactedi tauaquin uincuemeposh. —Seta 1000tedi matameshun utsibo abitedi uincuemendambi — quequin adoposh. ⁶ Adnubien tauaquin uincuemiaido bédambo yec cuishon-queposh: —Padpidec unéstiapimbo iquebi —quiash. —Adquid icquin Nuquin Papan yuabo yec: “ ‘Esusbéd Nuquin Papa bédamboshé iquec,’ canuna,” quequin chianequid nendac. Aid seta 1000tedi matamequin Esusbédambi utsibo bédamboen namequid nendac —quequin aden ismeposhi.

Satanasquio chian anédénquequid nēniaid

⁷ Adshumbic aidtedquio seta 1000tedi matameshun uidën uaid chicquin Satanas cuemendac. ⁸ Adoquien matses icsamenuec muaquin chiec nidaid utsi-utsiec yacno nidendac. Aden aidën muaquin namiaquien matses dadpenquio Esus chedo cuesun sianuec tsidadendac. Nēdic nidaid Coc caid yacnocquido. Nēdic nidaid utsi Macoc caid yacnocquido. Nēdic matses utsibo abitedi cuēte podotedi dadpenquioshē.

⁹ Aidedi tsidadash cho-choash Esus tantiaquido tabadacnombo Nuquin Papan tantiacnobi Edusaden yacno daquiadshun cuesun secatiadpambo iquendac. Adshobien Nuquin Papan nédénquepamboecquid budmequin uesquin pichicaindac. ¹⁰ Adshumbic aido icsa uamequidtsen Satanasquio bedshun acte uquēducūesh chondaid chuiquid icsamboshē icquidbēdta nidaid shēcuēnuēsh chondaid ènden nēsecaondacnombo chian anédénquequid Satanstsen nēnendac. Adoac aido ènēdenquio yec natiamboshē iquendac. Aden ismeposhi.

Icsambo icquido cuidte chiaid

¹¹ Adshumbic padpiden Nuquin Papan matses cuidte ismeposhi. Adoac tsadte nuacquid dapan ushumboshē icquidën Nuquin Papa tsadsho ispombi. —Icsaisambo icquin matsesën naidtedi chuibanquin Nuquin Papan icsambo icquido cuidendac —camenuec adec tsadposh. Icsambo icquido cuidquidquio yec dacuédampamboecshē Nuquin Papa isadnuc abubēdi nidaid abichobi nibédanaccosh padpidec isadtiapimbo yec. ¹² Nuquin Papa yacno unésaido uincuemiaido abitedimbo tabadposh. Adnubien bēshunenquio icquin dada uaten dada uabanacximboen Nuquin Papan abitedi tantiaquid icquin matsesën naidtedi abimbo chuibamposh cuidnumbi. Abi tantiaquido abēdi tabadmequimbi abi tantiesabo comapenen cuidnun aden chuibamposh. ¹³ Unésaido abitedi icposh. Utsi-utsiec unēsacsho chian dapa mad caid nēniaido uincuemiaido niosh. Utsi-utsiec nidaidën chococaid uincuemiaido niosh. Adsho aidon naidtedi Nuquin Papan chuibamposh. ¹⁴⁻¹⁵ Adshumbic Esus tantiesabo icsho documento nibédquidbimboecsho abi yacno tabadmenquio icquin chian dapa anédénquequid uesquin nēsecabamposh. Aden Esus tantiesabo nēsecan unéstequido utsibo nibédposh. Esus tantiesabo aton dada unésan abi tantiate tabadacno utsibo tabadenquio icposh. Adnubien Esus tantiaquido Nuquin Papa yacno tabadec unéstiapimbo icquiduidquio icposh. —Adquid iquendac —quequin aden ismeposhi.

21

Nuquin Papabéd tabadaidquio

¹ —Esus tantiesabo chian anédénquequid nēsecaindac —quequin ismehombic padpiden ismeoposhi. Adoac abu chucambo icsho ispombi. Nidaidtsen chucambo icposh. Abubēdi nidaid shēni nibédnuc utsi chucambo icquiduidquio icposh. Ènden iccondaid chian dapa mad caidtsen nibédposh.

² Adnubien Esusbēdi Nuquin Papa tabadaidquio abichobi Edusaden chuca

caid abucüesh budposh. Chido nëbi bedboedën aton bënë cuishoncamiacimboc cuishoncamiacimboec yec bédamboshë icposh. ³ Adnubien Nuquin Papa tsadacnuëshquio comapenec cuédposh naden chiec. —“Con matses nec,” quiahs nëbi Nuquin Papa matsesbëdi tabadendac cuëshedenquio yec. Adsho isun aton yuabo icquin matses abitedishun: “Nuquin Icbombo nuqui tantiaidquio nec,” caindac. ⁴ Ambo Nuquin Papan abitedi chuca uacnombo aidbëdi tabadec matses shubitiapimbo iquendac bëun ucacimboc. Nidaid shënin tabadec abitedi unëstequiduidquio icboedi Nuquin Papa yacnuëshien matses unëstiapimbo iquendac. Adecbidi sedenquetiapimbo iquendac. Adecbidi paëmbo ictiapimbo iquendac —queposh Nuquin Papa yacnuësh onquec.

⁵ Adnubien abitedishun Icbombo yec chuiquid dapan tsadten tsadquid onquedoposh. —Aden abitedimbo utsi uaquin chuca uaindami bédamboshë icnuc —queposh Nuquin Papa Esusbëdi. Adshumbic ëbi chuiposh. —Ëmbi aden chuiboed dada uata. Ëmbi muesambo icquin abimbo chiaid nec —queposh Nuquin Papa Esusbëdi.

⁶ Adashic Nuquin Papa padpidec onquec: —Ëmbi chuiboctedimbo nainquin naindami utsibon: “Padi,” catiapimbo icnuc. Ëndenquimboshë nidaid uabi ictenedi nebi. Nëbi adquid yec nibédantiapimbo icquid nebi. Adquid yec abitedishun Icbombo icquin ëmbi tauaidtedi nainendami. Adquid icquin acte bunachimboec ëbëd tabadte bunquidon con Mado Esus tantiasho ëbëdi tabadmendami. ⁷ Satanasën: “Chieshtomenu,” cauidaido Esusbëdta ëbi chieshtoenquio icquin tantiaquido ëbëdi tabadmendami bédamboshë yacnombo. Ëbi papa casho: “Ai, con mado mibi nec. Con champi mibi nec,” caindami. ⁸ Adshumbic utsibo chian dapa anëdënquequid icsamboshë nuadquid nësecaindami. Nëidtedi icsamboshë icquido adoendami. Nëidic ëbi bëdiactsëc tantiauidtsëchoedobi chieshëmënuquidon: “Cuesnu,” cac chieshtoash tantiesa yanoaido. Nëidic Esus tantiesabo abitedi. Nëidic icsamianquido. Nëidic chieshëmënec cuesunianquido. Nëidic dada aton dada utsibëdi chichudnanquido. Nëidic aton chidopenquio chudquido. Nëidic aton bënëpenquio chudmequido. Nëidic nënëchoquidobëdtabi cuëte podon unës uante bunquido. Nëidic ambi nacnenaidi papa caquin tantiaquido. Nëidic muauanquido. Aidtedi chian dapa anëdënquequid nësecaindami —queposh Nuquin Papa.

Abi tantiaquido Esusbëd icte chiaid

⁹ Adnubien mayan bëdan Nuquin Papan matses cuidte cushtoaid chiuimboed abentsëc choshon chuiaposhi. —Isec cho. Chido nëbi bedboedën aton bënë cuishoncamiacimboen abided ciudadec unësaid Esus cuishoncamequido tabadaid mibi ismenu. Cho —caposhi Esus tantiaquido ismenuen.

¹⁰ Adshumbic Nuquin Papan Mayanën tantiamiac ushqin isacimboen isombi. Mayan bëdan ëbi buanquin ispombi. Aden buanshun macuësh dapa mananënquio tsadumposhi. Adoac anoshon isquien abucüesh Nuquin Papa abi tantiaquidobëd abi tabadaid abichobi shubu dadpen icquid budposh. Aid tabadaid Edusaden chuca caposh. ¹¹ Aid tabadaidquio aid shubutedi Nuquin Papa tabadaid yec abi yacpadquio abichobi bëchamauanquieposh. Casëdu bédambo icquidimboc isquid-isquidquio isadposh. ¹² Shubu abitedi nënantan icnuc abichobi daquënë uaid icposh. Abucquio icnuc daquënë uaid niosh. Daquënë uaid puduedte shëcuë 12tedi icposh. Aid shëcuë icbo-icboen isquid yec mayan bédabo 12tedbidi icposh. Aid shëcuë bëtashte 12tedbidi icposh. Aid bëtashten Acobon mado cuëmëdquid 12tedbidi dada uabampaccosh naden. Bëtashten Acobon mado Ose cuëmëdquid dada uatanquin bëtashte utsin Acobon mado utsi Uda cuëmëdquid dada

uatanquimbic adenuidi bêtashten bêtashtenquien Acobon mado cuëmédquid cuëmédquidquien dada uabampaccosh. ¹³ Aid daquënë uaid puduedte shëcuë ushë choauc 3tedi icposh. Ushë nibëdauc nodte yauc aidtedbidi shëcuë icoaposh. Ushë nibëdaucbidi sud yauc aidtedbidi shëcuë icposh. Ushë budauc aidtedbidi shëcuë icposh. ¹⁴ Ambo tauaquin daquënë uadoquin nidaid cuënote nuamboshë icquid dapa 12tedi bedshun Esusbéd icquido ëbitedi cuëmédquid 12tedi aid cuënote dapan abentse-abentsen dada uabampaccosh naden. Cuënoten ëbi cuëmédquid Uan dada uatanquin cuënote utsin Petedo cuëmédquid dada uapaccosh. Adenuidi cuënoten cuënotenquien Esusbéd icquido cuëmédquid cuëmédquidquien dada uabampaccosh. Adoshombic nidaid uëdëshcabanshun tauaquin sandoshon cuënote utsi tsindoaid aid daquënë uaid niosh. —Esus tishabi icnuc Nuquin Papa tantiapampidobëdi Esus tantiaquido Nuquin Papa yacno Esusbëdi tabadendac —quequin tantiamenuen Acobon mado cuëmédquidotedi dada uaidbëda Esusbéd icquido cuëmédquid dada uaid aden ismeposhi.

¹⁵ Adshumbic ëbi chuiboedën mayan bëdan shocosh bëdaidquio nacenaid tambante sanamposh. —Nuquin Papa tabadacno tambanquin daquënë uaidbëdtabi puduedte shëcuëtëdi tambanten tambanu —queposh. ¹⁶ Adoshombic cuëma abitedi tambanac cuëma tiombi-tiombimboec icposh. Cuëma auc abentsëc tanac quidometedos 2,200ted cactiombi iccosh ënapenquioshë. Aidtionuidi iccosh cuëma abitedi. Adoshombic abuc yacmi cuembotsen tanac aidtionuibidi icposh. ¹⁷ Nidaid cuënote nuamboshë icquid dapa tsindoquin daquënë uaid bitsipambo icquidtsen tanac nuamboshë bitsi icposh. Matsesën nacenaid tambanten tanac metedos 65ted cactiombi icposh nuamboshë bitsipambo.

¹⁸ Daquënë uaid abichobi isquid-isquidquio isadposh. Bëdamboshë icposh. Padnuen shubu abitedi shocosh bëshpiu-bëshpiuctsëcquid nacenaiduidquio yec nac-nacquio icposh. ¹⁹ Aid daquënë uaqin tauaquin sandoaid nidaid cuënote dapa casëdubimboecquid bëdambo icquid matses comapenec bunaidquio utsi-utsien dabitaccabanaid niosh. Abentsëc aspe caid umu-umumbocttsëcquid dabitaccabampaccosh. Utsibic sapido caid umumbo icquid dabitaccabampaccosh. Utsibic acata caid ushumbo icquid. Utsibic esmedada caid umumbo icquid utsi. ²⁰ Utsibic onise caid piumbo icquid. Utsibic conadina caid piu-piupacttsëcquid. Utsibic quidisodito caid bëshpiu-bëshpiupacttsëcquid. Utsibic bedido caid umu-umupacttsëcquid utsi. Utsibic topasio caid piu-piupacttsëcquid utsi. Utsibic quidisopadasa caid nushan-nushanacttsëcquid. Utsibic asinto caid umumbo icquid utsi. Utsibic amatista caid umumbo icquidbidi. Aidtedi dabitaccabanaccosh. —Nuquin Papa yacnombo bëdamboshë iquendac —camenuen aden ismeposhi. ²¹ Daquënë uaid puduedte shëcuë 12tedi icposh. Aid bêtashtetedi acte chiumbimboecquidën casëdu ushu uaid nuacquid dapambo abichobi-abichobien nacenaid niosh. Ambo shubu dadpen icquid nënantanquio podqued icposh. Aid podqued shocosh bëshpiu-bëshpiucttsëcquid acte-actecttsëcquio icnuc mabiunaid icposh. —Esusbéd Nuquin Papa tabadacnombo bëdambo icquiduidquio iquendac —camenuen aden ismeposhi.

²² Ambobi abi bëisec tabadacnombo Nuquin Papa tabadte shubu uashunaid nibëdposh. Ambo Nuquin Icho Esus abided cuidadec unësaibëd Nuquin Papa icsho bëisquioquin tantiec anocquido tabadendac. ²³ Ambobidi inchështanec badiadenquio iquendac. Badiadën ushë isadenquio iquendac. Inchëshën ushëtsen isadenquio iquendac. Nuqui icsaid bedshunuec abided cuidadec unësaid Esusbéd Nuquin Papa bëchamaunquiequid icquin ambo ushëmbouidi icmendac. Inchëshaid tantiaadenquio iquendac. —Nuquin Papa icsaisambo icnuc abi yacno icsaido nibëdquio iquendac —camenuen

aden ismeposhi. ²⁴ Icsaisambo icquin Nuquin Papan tantiamiac matses utsi-utsiec abi chuiquid dapabobëdi Esus tantiaquido yanendac. Adash Nuquin Papa yacnombo quenene tabadcuenash: –Esusbëd Nuquin Papa abitedishun Icombombo nec. Abipadquid utsi nibëdec –quendac. ²⁵ Nuquin Papa matsesbëdi tabadacnombo inchëshenquio icnuc: –Icsambo icquido puduednushë. Bëdashnu –quetiapimbo icsho isun daquënë uaid shëcuë bëdashenquio iquendac. Shëniacchobi iquendac. ²⁶ Padnuen nidaid utsi-utsiec yacno tabadquido chuiquid dapabo Esus tantiaquido yanash Nuquin Papa yacnombo puduedash: –Daëdpactsëc tantiaquin matses daëdpactsëc namebampadenembi. Nuquin Papa aton Mado Esusbëdi comapenen tantiaquidquio yec abitedishun Icombombo nec. Abipadquid utsi nibëdec –quendac abitedi. ²⁷ Ambo icsambo icquid puduedtiapimbo iquendac. Adecbidi omposhon abi bunaiduidi naquidobëd muaquido puduedtiapimbo iquendac. Nuquin Papan bëshunenquio icquin dada uachimboen: –Icsambo icboedi abided cuidadec unësaid con Mado Esus tantiaquido aido nec. Con bacuëbo nec –capendac. Aden ambi con bacuëbo caido abi yacno puduedendac. –Nuquin Papa yacno adquio bëdamboshëuidquio iquendac –quequin aden ismeposhi mayan bëdan.

22

Nuquin Papa yacno acte ismiaid

¹ Adshumbic aid mayan bëdan padpiden ismeoaposhi. Adoac Nuquin Papa abided cuidadec unësaid aton Madobëdquio tsadte dapan tabadacnuësh matses unëstiapimbo icmetequad acte bëdambo icquid nushan nibëdquidquio chëuëdsho ispombi. ² Nuquin Papa yacnuëshquio choec chëuëdec ambo tabadquido Esus tantiaquido tabadaid shubu nënantanquio chëuëdposh. Aid cuëmambi matses unëstiapimbo icmetequad cuëtetsen icposh. Badedbadequic bacuëquidquio niosh. Inchëshën ushë choanchoanquic badedquio bacuëquid niosh. Aid cuëte podo nidaid utsi-utsiec yacno tabadquido bëdambo icmetequad niosh. –Aton Mado abided cuidadec unësaid tantiaquido abëdi tabadmequin Nuquin Papan unëstiapimbo icquid icmendac –camenuen aid acte ismeposhi. –Matses utsi-utsiec Esus tantiaquid icsho abëdi tabadmequin Nuquin Papan daicsabudtiapimbo icquid icmendac –camenuen cuëte aton podobëdta ismeposhi. ³ Aden abitedi bëdambo icmiac cuidtequido nibëdquio iquendac. Icsambo icquido nibëdnuc Nuquin Papa aton Mado Esusbëd tabadacnoshon aid daëdi tantiaquic Esus tantiaquido tabadendac. ⁴ Adec: –Con bacuëbo nec –quequin Nuquin Papan abi cuëmëdquid dada uaqin bësiaidon Nuquin Papambo bëisquic tabadendac. –Nidaidën tabadec bëdamboec tabadquido Nuquin Papabëd tabadec abipadquio bëdamboshë yanendac –camenuen aden ismeposhi. ⁵ Ambo bëdambouidquio yec inchëshenquio iquendac. Nuquin Papa bëchamauanquicquidëmbi ushëmbouidquio iquendac inchëshaid tantiadenuio yec. –Aden abi tantiaquido bëdamboen isquin ënenquio icquin bëdamboshë icmendac. Chuiquid dapabo icmiac Esusbëdtambi ënenquio icquin namendac –quequin ismeposhi.

⁶ Adshumbic mayan bëdan chuioaposhi. –Tantia. Mibi chuinu. Nuquin Papan Mayanën tantiamiac: “Yuecash adquid iquendac,” quequin min tsusedpabo isadaidbon abimbo chuiquin dada uapampic. Adembidi aton Mayanën namiaid icquin abimbo chuiquin mibi dadpen ismebanombi. “Nëbi adquid iquendac. Utsi yuecash iquendac,” quequin mibi tantiamenuen ismebanombi –queposh Nuquin Papan abi yacnoshon uaid mayan bëda.

Esus chote chiaid

⁷ Adnubini Esusënquio naden chuiposh. —Chieshtoenquio icquin ëbi tantia. Nëbimbobi nidaidën choec bûdebique. Nëid dada uaid isquin ëbi tantiaquiota. Adsho mibi bëdambo icmendambi —caposhi Esusën.

⁸ Uan nebi. Abimbo chuiquin nëid dada uaombi. Aden mayan bëdan chuibanquin ismeposhi. Aden ënquimbi ismiaquini: —Nuquin Papapadquidien nechitec —quetanec danëshën tinquebuduidpoc ëbi ismequid mayan bëda ismenuc. ⁹ Adshobini: —Padi. Aden ëbi ismenda. Mibipadquid Nuquin Papan yuabidi nebique. Ëndenquimboshë Nuquin Papan tantiamiac min tsusedpabo isadaidbon ambi chiaidquio dada uapampic. Nëbi ëmbi ismeboed tantiaquin Nuquin Papan chiacpadomboen naquido aton yuabobidi nec. Adquidbidi nebi aton yuambo. Nuquin Papauidtsëqui tantiaquin aden ismeta —caposhi mayan bëdan.

¹⁰ Adashic padpidec: —Ëmbi chuibamboedbëdta ëmbi ismeboedtedi chuiquin dada uata. “Nëid dada uaid isec onquequin ma Esus tantiaquidon tantianu. Nëbi adquid yanushe. Chieshtoenquio icquin Esus tantiec ma tabadnu,” qeshun dada uata. ¹¹ Nëbimbobi Esus chonoc Esus tantiesabo badedquio bëdamboec tabadcuentiapimbo iquendac. Abi icsaid badedquio ëntiapimbo iquendac. Esus tantiaquido abi bëdamboec tabadacpadquiecbidi bëdamboec tabadpashun —queposh mayan bëda.

¹² Adnubini Esusën chuioaposh. —Chieshtoenquio icquin ëbi tantiaata. Nëbimbobini choendac. Choshon matsesën naidtedi tantiaquin icsaido cuidquimbi ëbi tantiaquido ëbëdi tabadmendambi. ¹³ Nuquin Papapadquidquio nebi. Ëmbi tantiacmaid nibëdnuc abitedi comapenen tantiaquidquio nebi. Nidaid uabi yec ictenedi nëbi adquidquio yec nibëdantiambo icquid nebi. Adquid yec abitedishun Icbombo nebi.

¹⁴ Icsambo ichoedon ëbi tantiasho icsaisabimboecnc Nuquin Papan bëdamboen isendac. Adshun ëbi yacnombo puduedmequin unëstiapimbo icquido icmendac unëstiapimbo icmiantequid cuëte bacuë chemiachimboen. ¹⁵ Padnuen ëbi tantiesabo bëdamboen isacmaido Nuquin Papa yacno puduedtiapimbo iquendac. Nadquid icsambo icquid caimbi. Nëidic nënëchoquidobëdi cuëte podo chodcashun unës uante bunquido. Nëidic dada cuididimbo. Nëidic chido chishpida. Nëidic aton chidopenquio chudquido. Nëidic aton bënëpenquio chudmequido. Nëidic cuesanquido. Nëidic papa quequin ambi nacnenaiddi tantiaquido. Nëidic abi bunaiduidquio naic muauanquido. Aidtedi Nuquin Papa yacno puduedtiapimbo iquendac.

¹⁶ Ëmbi chiacpadomboen mayan bëdan mibi ismebamposh. “Ma ëbi tantiaquidon iste dada uanu,” quequin ëmbi chiacpadomboen mibi ismebamposh. Nuquin Papan dada uamiac matsesën: “Dabidën tsyuequid yec abitedimbo chuiquid dapa iquendac,” quequin chuipampid nebi. Isadaidbon cainaidquio nebi. Utsin: “Dëniacnu,” cadtiapimbo icquid nebi. Adquid icquin matses abitedimbo namendambi —quequin chuiposhi Esusën.

¹⁷ Adsho tantiasun Nuquin Papan Mayanën tantiamiacpadomboen chuiquin: —Nëbimbobi Esus chonoshe. Aidquio tantiabenta —caindac Esus tantiaquidon Esus tantiesabo chuiquin. Ëmbi chuiboed tantiaquidtedishun: —Nëbimbobi chonoshe. Aidquio tantianuna —cac bëdambo ictsiash. Adsho tantias Esus tantiesabo acte bunacimboec Esus tantiate bunsho Nuquin Papan bëdamboen isendac. Nuquin Papa bëdamboen ismenuen menete nibëdnuc Esusuidi tantiasho Nuquin Papan bëdamboen isquin abëdi tabadmendac.

¹⁸ Tanta. Ëmbi chuiboed tantiaquido chuinu. Nuquin Papan: —Nadquid iquendac. Yuecash utsi iquendac —quequin ëbi ismeboedtedi dada uaombi.

Ëmbi dada uaboed tsitënquin ambembi chiaid dada uainda. Ëmbi chuibocpadomboen Nuquin Papan mibi cuidtsiashe. ¹⁹ Adembidi ëmbi dada uaboed utsi uainquo icquin abimbo chuita. Ëmbi chuibocpadomboen Nuquin Papan mibi unëstiapimbo icquid icmenquo ictsiashe. Adembidi bëdamboshë yacno abëdi mibi tabadmenquo ictsiashe.

²⁰ —Ma aidtedi tantianu —quequin Esusën chiacpadomboen mayan bëdan aidtedi ismeposhi. Ëmbi chuibocpadomboen Esusën: —Nëbimbobini choendac —caposhi. Adsho tantiashun: —Ai, nëbimbobi chota —capombi.

²¹ Mibitedi Esus tantiaquidotedi tantiaquin: —Ambi nabocpadomboen Nuquin Icho Esusën bëdamboen isquin bëdambo icmepashun —cäimbi. Padi. Aidtedi chuiquin dada uaombi.